


9.9
6
9

62641/8



7
d. 12

MEDICAL SOCIETY
OF LONDON



ACCESSION NUMBER

PRESS MARK

HIPPOCRATES

T9



IOAN FRANC LOEW S.R.I. et
ab Erlsfeld et Loyowitz, Phil. IV.
Caesar: Reg: et antiquiss: Universitat: Carolo Ferdinanda Prag: Profes
sor Primar: Facult: Med: Senior: S.C.R. Majest: Consiliar: Sac. Lat:
Palat: Aulaeq Caesar: Comes et Medicus. Bis Rector Magnificus.
Aetat: 63. A° 1711.

NOVA ET VETUS
APHORISMORUM
DIVI SENIS
HIPPOCRATIS
INTERPRETATIO

IUXTA MENTEM

VETERUM ET RECENTIORUM
IN PUBLICA CATHEDRA
*INGENUÆ JUVENTUTI MEDICÆ TRA-
GENSI EXPLANATA*

A

JOANNE FRANCISCO LEO-
NE ab ERLSFELDT,

Philosophiæ, Juris Utriusque & Medicinæ Doctore, ejusdem-
que in Antiquissima & Celeberrima Universitate Carolo-Ferdinandea Pra-
genſi, Professore Regio, Primario, Publico & Ordinario, Facultatis
Medicæ Seniore, Sacræ Cæsareæ, Regiæque Majestatis Consiliario,
Sacri Lateranensis Palatii, Aulæque Cæsareæ Comite & Me-
dico, p. t. RECTORE MAGNIFICO.

ANNO

In qVo Aphorismi Hippocratis Leonino ardore
Noviter Interpretati sunt Ingenuæ Juventutis Pragensis.

[* * * * *]

FRANCOFURTI & LIPSIAE,

IMPENSIS JOHANNIS ZIEGERI, BIBLIOPOLÆ NORIMBERG.

ANNO M. D. CC. XI.

*N*oscitur ex ungue Leo : Legendo enim & sedulo revolvendo presentem in
Aphorismos Hippocratis fundatissimum Interpretem , novaque cum veteri
sententia accuratissimum Conciliatorem , nil vidi , nil reperi , quod solidissi-
mam in re Medica non saperet doctrinam. Dignissimus proinde cerebri Leoni-
ni fatus , qui , obstetricante pralo , quantocius lucem publicam , in singulare
publici emolumentum , videat , eosque , pro more aliorum partium Leonino-
rum , apud docentes & discentes solitos fructus abunde ferat. Dabam è Mu-
seo Micro-Praga , Die 26. Januarii Anno 1709.

Leonardus Ferdinandus Meisner,
de Löwenberg /

Philosophiæ & Med. Doctor, Inclyti Re-
gni Boëmiæ Regius Physicus Juratus.



PRÆFATIO.

*In Nomine Domini Nostri JE-
su Christi.*



Ncipit Lectio & Interpretatio
Aphorismorum Hippocratis ,
juxta unanimem Veterum &
Recentiorum mentem : Prius-
quam autem ad ipsius textûsex-
planationem descendamus, non-
nulla præloqui & præmittere o-
peræ pretium duximus , quæ
faci-

Præfatio.

faciliorem aditum & captum ad futuram doctrinam efficient.

Arduam inimus Provinciam Doctissimi Domini Medicinæ Auditores , dum Viam ad antiquissimum Hippocratis Sanctuarium , seu ad oraculosa Divini Hippocratis Aphoristica Diæteria , sternimus, in qua Via tot obscuritatum scopuli , tot difficultatum syrtes obtingunt.

Ac præprimis in magni hujus Sanctuarii Aphoristici Authoris Divi nempe Hippocratis laudes excurrere , idem mihi fore videtur , ac juxta magnum fluvium , puteum fodere. In ejus Encomia æternum duratura , jam olim & hodie disertissima priorum Medicorum diffluxerunt ingenia , & superabundantia undique , quotquot de re Medica scripserunt , scripta & impressa exstant testimonia.

Galenus , post Hippocratem Medicorum Coryphæus , hunc Divum Senem *Medicorum Principem* appellat ; *Veteres* , *Deitatis Simulacrum* nominant: *Duræus* . Hippocratis Scripta , *Medicorum tribunal* palam profitetur. *Recentiores* , ut *Paracelsus* , Priscorum omnium censor severissimus , ita & *Helmontius* , ejus diæteria reverentur & commendant , eundemque rarissimi Domini Virum , intulant : Imo *Macrobius* de eo scribit magnifice , & dicit , eum tam fallere quàm falli nescivisse, ejusque
sen-

Præfatio.

sententias cum Galeno , DEI vocibus æquiparat , & Divum appellat. Ego ut paucis dicam omnia , quod *Theologis* est *Divus Thomas* ; *Juris-Consultis Justinianus* : *Philosophis Aristoteles* , hoc nobis Medicis est *Hippocrates*. Nam sicut Theologis & Juris Consultis sentire & dissentire prohibitum est , ubi Sacra Pagina & Lex loquitur : ita apud Medicos sentire & dissentire non licet , dum Divinus loquitur Hippocrates ; cujus scripta veluti oracula habentur , quæ in dubium vocare , aut publico calamò impugnare , nefas est.

Inter hæc Hippocratica Scriptorum oracula , primum locum obtinent Libri Aphoristici , in quibus generalis Doctrinæ Theorico - Practicæ continetur compendium , & brevissima inibi memoriæ localis comprehenditur sententia , nam teste Horatio :

Quidquid præcipies esto brevis , ut cito dicta

Percipiant animi dociles , teneantque fideles. Et teste Tullio : nihil difficilius & rarius est , quam reperire parvum ex omni parte absolutum : Nam teste Seneca , nihil parum & parvum est , quod satis est. Atque ut verbo dicam , Aphorismi Hippocratis sunt quasi Sacer textus & Regulæ Juris in Medicina : unde maxima omnibus sæculis fuit dignitas & æstimium *Aphorismorum Hippocratis*. Cujus tanquam Medicorum Primatis , tum alia scripta , sum-

Præfatio.

mâ referta sunt sapientiâ , & Artis Medicæ genuinis arcanis : tum Aphorismi illi velut reliquorum omnium , rerumque Theologicarum, Moraliû & Politicarum , quoddam compendium sistunt. Sanè ut verum fateamur , quoties *Hippocratem* legimus , toties doctiores recedimus , tam inexhaustæ doctrinæ fonte imbuti, quàm ad ulteriorem meditationem invitati. Adeoque Author est Medicinæ Parens , magnus Hippocrates, Patriâ Cous , ex familia Asclepiadeorum oriundus, Vigésimus à Jove, decimus octavus ab Æsculapio, & Nonus à Chrysanide Rege ; cujus vita undique patet, & cujus dicta omnibus Medicis ob ἀξία suam debent esse commendatissima, nec Medicus dicendus vel habendus est , qui non hos Aphorismos aliquoties & legerit & relegerit, in usum trahere eosdem gnarus.

Inter omnes Hippocratis libros, nulli magis quam Aphoristici, interpretatione egent, in quibus enodandis , maxima quæque Veterum desudârunt ingenia , sed ex Recentioribus hætenus , quantum huc usque scio , repertus est , vix unus aut alter qui Hippocratis Aphorismos interpretatus fuisset. Conabor ego favente Numine, ad DEI Gloriam, publicam, & vestram Doctissimi Auditores, ac meam propriam utilitatem, primus glaciem frangere, & hanc doctrinam Aphoristicam ad mentem Veterum & Recentiorum

ex.

Præfatio.

explicare : in quo arduo opere si expectationi aliorum minus satisfecero , cum Ovidio me excuso :

Quod si deficient vires , audacia certe

Laus erit : in magnis & voluisse sat est.

Tanta enim horum aphorismorum in Republica Medica est authoritas, ut vulgo. *Consiliorum condimentum ; Scriptorum Sal, & Praxeos fundamentum* audiantur. Et sicut Juris Consultis indecorum est sine Lege , ita pudoris est Medico sine aphorismo loqui : Loquar & ego aphoristice , id est vere & serio , non tamen intermittam seriis quandoque curiosa quædam & rara, ad animos vestros erigendos, intermiscere, sequarque consilium Horatii :

Misce stultitiam Consiliis brevem.

Nam Macrobio teste :

Amœnitas intertexta, fastidio narrationum medetur.
& juxta illud :

Omne tulit punctum qui miscuit utile dulci

Lectorem delectando , pariterque movendo.

sic enim cum delectamento utilitatem haurient.

Nunc ergo ante alia sciendum est, quid sit aphorismus? Aphorismus à verbo ἀφορίζω, id est divido, definitio, breviter rem explico, concludo ; finitore *Galeno* 1. aph. 1 omnes rei proprietates quàm brevissimis verbis circumscribit : ceu regula in morbis observata & ex praxi desumpta, brevis concisa, paucis multa dicens. *Philothæus* antiquissimus Aphorismorum Interpretes dicit: Aphorismum esse, *Sermonem verborum inopem, sensibus autem locupletem.*

Praefatio.

Nostro ore vocari potest, ein furzer Lehr, Satz/Lehr-
Spruch. Brevissima hac loquendiratione, nuda quasi ve-
ritas, & sine veste, proponitur, unaque acumen non leve
inibi continetur, ut citra ambages, quidquid est rei, e-
micet palam. Vel Aphorismus est sententia universa-
lis, gravis, brevis, separata & vera.

Enim verò est sua laus quoque deductiori loquendi
vel scribendi generi; quis enim satis eloquatur vastum sci-
entiae naturalis, nè Medicæ dicam, pelagus? Interim ta-
men & ex Asiatico stylo eruendum est, quod intellectus
breviter & accuratè velut in thesi assequatur. Quia Hip-
pocrates in aphoristica sua Doctrina, aliud non intendit,
quàm docere artem Medicam in compendio, & in hoc
imitatus est Cosmographos, qui universum Orbem in an-
gustissimam Mappam contrahunt: Idem fecit Hippo-
crates, dum vastissimam & longam artem Medicam, ob
vitæ nostræ brevitatem in compendium redegit. Est e-
nim hæc Doctrina brevis, sed plena nectareo succo & o-
mnibus absoluta: & in hac, summa Medicinæ capita com-
prehenduntur, & quæ graviora sparsim alibi Hippocra-
tes docuit, in hoc uno opere collegit omnia generaliora
& principaliora Medicinæ Theoremata; certumque esse
existimo, Hippocratem Aphorismos, non in juventute,
sed in summa Senectute, tanquàm cumulum sui laboris
& Experientiæ, eosque partim ex infusione Divina, par-
tim ex propria industria, partim ab Antecessoribus suis, ex
genere materno, *Hercule & Jove*: ex paterno *Æscu-
lapio,*

Præfatio.

lapis, suoque Patre Heraclite, aliisque, scripsisse & hausisse. Constat pariter, Hippocratem multa practica collegisse ex tabulis templi Æsculapii, in quo multi ægri conveniunt curandorum morborum causâ, illa autem, quibus curati fuerunt, remedia, parietibus templi affigebantur, quas utpote nudas & simplices morborum observationes, præceptis & documentis firmissimis stabilivit. Nostræ autem morborum tabulæ non sunt parietes templi Æsculapii, sed Authores nostri.

Traduntur aphorismi septem libris, octavus enim utpote superfluous ferè, & interjectos continens, minùs attenditur, nec à Galeno nec aliis æquè agnoscitur. Et huius quoque divisio concinnior ac receptior est præ aliis, ita ut 404. aphorismi numerentur in universum, quamvis repetitus visatur unus & alter.

Primus liber Victum, seu immittenda & emittenda describit. *Secundus, Sextus & Septimus* signa morborum conquirunt. *Tertius* morbos juxta anni tempora & ætates distinguit. *Quartus* excrementorum, evacuationum & Crisium rationem affert.

Ut ut verò connexio quædam videri possit desiderari in aphorismis hisce primo intuitu, ex contextu tamen ipso symbolica quædam tractat. diratio emicat, vel sub certis classibus ordinate concipi potest. Hinc quod in proverbio est, velut ex ungue leonem, ex aphorismis de reliquis Divini *Co*i fontibus, imò amplius judicare fas est, quorum sunt rivuli & defectæ portiones. Sunt hi

Præfatio.

aphorismi magisterium quoddam artis, non nisi longo usu & experientia, à Viri summo ingenio, maximo cum judicio, in ætate sua provento ut dixi, exasciati, & ceu statuæ quædam mercuriales propositi.

Quamobrem & in examinibus solennibus aphorismorum resolutio est è præcipuis, & Hippocratis effata, fundamentum primum omnis Medicæ Scientiæ, seu antiquitatem spectes, seu veritatem, struxere, in nova etiam sententia.

Neque enim audiendi sunt, vel mitius interpretandi, qui in dubium vocare fidem aphorismorum, fategère. Cum enim ex praxi & longâ experientiâ ut dixi, nati sint, non ex vana & sterili speculatione, sistunt reverà historias ac casus, observationes factas, vel lemmata & regulas inde ductas. Neque etiam veritas vel illustratio æquè apud interpretes invenitur, quàm in genuino examine textûs & re ipsa.

Non potuimus, licet in praxi sat diu exercitati, sæpe assequi hujus vel illius aphorismi rationem prius, quàm similis aliquis casus nos manu ad assensum plenarium duxit: Exemplo sit 7. aph 36. Si quibus verò è renibus laborantibus, præter suprâ dicta signa, dolores etiam circa spinæ musculos fiant, siquidem ad loca exteriora sentiantur, extrinsecus abscessum quoque fore expecta: Si verò dolores ad interiora magis vergant, abscessum etiam intrinsecus futurum potius expectandum & sperandum est.

Quem

Præfatio.

Quem aphorismum optimè intelleximus ex observatione: Fœmina 24. annorum, ante quatuor hos annos, à tribus mensibus *ἀμν*®, unde gravidam se putabat, nobis renuentibus, offerebat circa sinistram lumborum regionem, tumorem grandem, quasi fungosum, durum & ad natem ac coxam vergentem, occasione casus ante biennium, præviis signis ab Hipp. laudatis, sensim enatum & neglectum, cum aridura quadam corporis reliqui, & pulsu frequenti,

Hic cum discuti non posset, rubore & dolore prævio in abscessum abibat, suppuratus, apertusque. Inde parumper levata visa, calore hæctico perdurante cum diarrhæa aliqua, sensim consumpta, vitam cum morte commutabat. Opinione graviditatis oblata sectione cadaveris, deprehendimus inter alia, hepar calidum & exsanguis, lienem maximum, lividum & ad putrilaginem primum, pancreas totum scirrhusum & durum, renem dextrum majorem & bene habentem, sinistrum vero vix sui vestigium relinquentem, instar ovi columbini ad summum, glandosum, durum excarnem, suppuratum & pus fundentem, ut & vestigia trium vel quatuor foraminum, circa hujus clima, ex quibus foras ad lumbos progressus puris factus, quorum unum sty-lum adhuc foras ad abscessum jam fere sanatum admittebat; uterum parvum, durum & quasi scirrhosum; circa pulmonem sinistrum aquam purulentam copio-

Præfatio.

sam, & pleuram consumptam, aquam pericardii itidem corruptam & quasi purulentam.

Accuratissimus igitur fuit observator Hippocrates nec temere quicquam prætervidit. Sicque occurrunt dubia vel aliter se habentia asserta, supplendum est, intelligenda ut plurimum & ordinarie, cæteris paribus, confirmanda ex praxi, cujus sunt cynosura, secundum quam tuto procedit, & feliciter medendi artifex, sub latitudine illa temperamentorum, ætatum, sexus, regionum, & circumstantiarum aliarum.

Offert se hic ad explicandum amplissimus campus, si sensus verbalis & realis eruatur, ut verba examine-
mus, maximè verò rem ipsam, si rationes & causæ, si subjecti & prædicati ambitus ac connexiones, si methodum analyticam & demonstrativam, cujus callentissimus artifex fuit Hippocrates, in subsidium vo-
cemus; si in partes suas locemus & distribuamus textus singulos, penitiùs sic in emphasin cujusvis penetran-
tes.

Adde si exempla, similitudines, contraria, & ex Chymia, anatome, mechanica, diæta, vita communi, huc pertinentia pensitemus, quæ omnia experti loquimur, emensi illud latifundium, & quasi pelagus Medicum. Sint etiam quædam exoleta, protrita, nec amplius in usu, vel aliter se habentia, nil obstat: dies enim diem docet, mitius explicari possunt & debent singula, quorum & spectant Georgii Friderici Laurentii Exercitationes,

Præfatio.

nes, in nonnullos minùs absolutè veros Hippocratis Aphorismos, eorumque rationes à Commentatoribus adductas. Non possumus hinc quin & Commentatorum mentionem aliquam faciamus. Nullus fortè liber fuerit ex Medicis in universum, vel Hippocratis seorsim, qui tot Commentatores fuerit sortitus, quàm libri hi aphorismorum, non solum Veteres, *Galenum*, omni laude & in hoc dignissimum: *Philotheum*, *Oribasium*, *Celsum*, *Leonicenum*, *Gorraum*, *Duretum*, *Martianum*, *Cornarium*, *Ætium*, *Paulum*, *Alexandrum*, *Aurelium*; sed & Recentiores, è superiori & nostro sæculo plurimos, & inter hos ipsos *Paracelsum*, *Actuarium*, *Brassavolam*, *Cardanum*, *Fonsecam*, *Fontanum*, *Heurnium*, *Holerium*, *Mercurialem*, *Oribasium*, *Argenterium*, *Montanum*, *Fuchsum*; *Bartholinum*, *Vegam*, *Valesium*, *Vischerum*, *Sorbait*, *Holerum*, *Wedelium*, *Tozzium* & plures alios. Tres tamen posteriores singulare in enodanda scientia Aphoristica, tum Veteri tum nova præbuerunt emolumentum, præ cæteris vir Eximius Lucas Tozzius qui omnem propè adimplevit claritatis & eruditionis paginam cujus Laudatissimis insistendo vestigiis, ejus potius Laudem his in terris hucusque ignotam potius propagare quàm meam facere lubens constitui.

Medicos etiam secuti sunt Juris Consulti & Theologi; ità & ex Theologis satis grandi volumine, Medicas, Politicas, Morales & Theologicas interpretatio-


nes

Præfatio.

nes edidit Canonherius. Alii integris locârunt operam, alii aliquibus saltim, quæ latius fuerit recensere, nè dicamus de modo tractandi diverso, uti *Offredus* commentarium analyticum scripsit, meris syllogismis explicationem complexus. *Lygræus* meram paraphrasim, ut *Marinellum*, *Brassavolam*, *Hollerium*, *Heurnium*. Commentatorem in Gallica lingua Anonymum, & alios silentiô prætereamus.

Nos ut majorem nobis, aliisque conciliemus fructum & utilitatem, eo collimabimus, ut eâ, quâ possumus succincta, clara tamen brevitate, hoc arduum opus, tum in Veteri tum in nova sententia ordiamur & absolvamus, ut mens, textus & usus facile patere queat: quod ut tanto ardentius & fructuosius fiat, Vos quotidie seduli estote in auscultando, ego omni die assiduus futurus in explicando.

*Nemo enim Iter
ad cælum perficit nisi qui quoti-
die incipit.*



LIBER PRIMUS
SEU
SECTIO PRIMA
APHORISMORUM HIPPOCRATIS
DE
VICTU SEU IMMITTENDIS
ET EMITTENDIS.

Aphorismus I.

Vita brevis, ars longa, occasio praeceps, experimentum periculosum, iudicium difficile: oportet autem non modo seipsum exhibere promptum, ad ea quae decent facienda, sed & agrum & praesentes, & externa.

Contentum seu Intentio.

De ratione aphoristicae doctrinae & concursu personarum circa morbos.



Um hic aphorismus sit primus à parte ante, nullam habet connexionem, quia nullus praecessit; cohæret tamen cum subsequenti ea ratione ut sit futurae doctrinae quasi principium & fundamentum. Quin imo ipse Galenus in ipso limine dubitat, an hic unus sit an plures apho-

A

rismi:

rismi: quod dubium increpando Galenum solvit *Cardanus: hoc enim esset* (inquit) *ipsum Hippocratem accusare, qui duo diversa in unum compegerit*: Cardanum hucusque secuti omnes Interpretes (ut passim videre est) asserunt unicum hunc esse aphorismum, sed duo ejus esse membra: *Primum*: movet difficultates ex parte Medici, & aphoristicae doctrinae necessitatem, quia vita humana brevis est ad tam arduam & longam artem addiscendam. *Secundum*: difficultates & Medici & ægri, assistentium & rerum externarum considerat; nempe requisita ad obtenti operis consecutionem, scilicet obtemperationem ægri, assistentium diligentiam, & externorum debitam præparationem & administrationem: unde videtur hic aphorismus universi operis Prodomus & Prooemium. In hoc ergo aphorismo Hippocrates prudentis Patris & Præceptoris officio functus est, qui filio aut discipulo ad statum aspiranti, prius degustandam offert putaminis amaritiam, antequam apertæ nucis dulcedinem porrigat. Vel agit aquilam quæ pullorum suorum constantiam & fortitudinem, per fulminantium nubium tonitrua prius explorat, antequam ad Solis aspectum dignos judicet: Unde ergo patet, nihil esse intermittendum quod ad illustrandam & ampliandam artem faciat; Tantoque magis quanto illuc concurrentia facile possunt vel elabi, ut occasio, vel frustrare ut experimentum. Medicus omnia ea conferre debet, quæullo modo ab ipso possunt desiderari. Hinc Medicus (ut ejus officium paucis comprehendamus) non solum debet esse peritus artis, diligens ac solers, occasionis captator, exercitatus & Natura prudens, verum etiam apud ægros & adstantes, morum honestate & elegantia, vitæ gravitate, humanitate, fide, taciturnitate, temperantia, pietate, industria, Vitæ integritate & castitate, officiorumque omnium promptitudine, auctoritatem & gloriam sibi conciliare studeat, ut ipsos ad omnia consilia & jussa habeat obedientes & benevolos; curet quoque ut externa universa ægro sint grata & commoda: cautus sit & circumspectus, ne clandestinis adstantium machinationibus decipiatur; desperatis non temere spem salutis polliceatur, neue inani spe impleat, aut ægrotantes leviter deserat: non quicquam inconsiderate præcipiat, memorque sit eorum quæ ante mandavit; corporis habitu majestatem quandam, fastu ac superbia carentem servet: vultu sit hilari erga ægros; suæ nobilitatis non immemor, ne dum se ægris gratiosum præbeat, illis manci-

mancipii ritu obsequatur; sermones non sint fatui ac insulsi nec de alienis: vestes habeat non sordidas nec tamen sumptuosas: Vulgi & imperitorum judicia non animo effæminato pertimescat, sed infracto & forti fabellas muliercularum contemnat, conscientia recte actorum fretus, accurate de singulis accidentibus ægrorum quærat, ut ipsorum salutem ei curæ esse intelligant. Denique operam det, ut omnis medicatio sit ruta, cita, & jucunda, ne tamen nimia festinatio periculum creet, quare festinet lente, prout morbi natura, virium constantia, ætas, sexus, & similia requirere videbuntur.

Non ergo in solo Medico est semper relevetur ut æger, interdum docta plus valet arte malum, sed plures concurrunt: nempe ægri, adstantes & externa.

Horum alterutro deficiente, præter fatalem moriendi necessitatem, facile per errorem eadem promovetur, & acceleratur, ut sæpe fit.

Vita, (tempus ad ampliandum & cognoscendam artem) *brevis*, (est) id est: Vita brevis est, facta comparatione ad artem quæ longa est; licet enim homines centum & ultra annos viverent, facta comparatione ad Medicinæ difficultatem & multifariam rerum cognitionem, vita illorum brevis dicenda foret, cum nec ætas hominis, nec multa sæcula sufficerent pro iis, quæ Veteres tradiderunt, & quæ Recentiores (veteribus ignota) invenerunt & amplificaverunt, v. g. de motu cordis, sanguinis, venis lacteis, lymphaticis, fermentis, generatione animalium &c. vel facta comparatione ad brevem aphorismorum doctrinam, quæ vitæ brevi optime convenit: vel facta comparatione ad alia quæ diutius durant, quam hominis Vita. Unde si ars aphoristica, id est breviter, omiſſis rebus inanibus tractetur, & sedulitas adsit, vita erit sufficiens. *Ars* (Medica) *longa*, (tum quoad amplitudinem regnorum, tum morborum, tum subjecti) id est, *ars longa*: longissimam inter artes, Medicinam esse,

I. probant sexcentæ morborum species, quorum essentiæ, causæ, signa, prognoses, indicationes, curæ, ex tempore & cito innotescant Medico, necesse est.

II. innumeræ sunt sublunarium varietates, ex regno vegetabili, animali, minerali, quorum omnium naturas & qualitates manifestas &

occultas callere debet Medicus, & eas in cerebro, quasi viva Bibliotheca circumferre oportet.

III. quam admiranda est, & infinitis partibus contexta, corporis humani statua, & quævis pars suo temperamento, actione, usu, nomine dotata?

IV. Medicus debet esse anatomicus, chirurgus, Philosophus, Botanicus, Pharmacopæus, Chymicus, & quæ non in his est farrago? unde pro his vix vita sufficit, nec plures ad obrinendam perfectionem sufficerent. Proinde miramur sane aliquorum volatilium ingeniorum immaturam curiositatem, qui in Arte Medica, multas horas in addiscendis inutilibus & curiosis quæstionibus collocantes, utilem & ægrotis tantopere necessariam Theoriam & Praxim cum magno illorum damno gignunt; Prudentissime sane Chylo Philosophus agebat; *ideo necessaria ignoramus quia necessaria non didicimus.* Hos Medicinæ Studiosos vivis coloribus depingit Poëta.

Unde istud? nisi quod pars horum maxima nescit
 Quid faciat: quid sit prorsus Medicina: sed ipsi
 Dum tantum incumbunt Sophiæ & Dialectica discunt
 Vincla quibus valeant indoctumnectere vulgus.
 Vix Elementa artis Medicæ & primordia libant;
 Sic labyrinthis ambagibus ad sua tecta
 Instructi redeunt, atque enthymemata vibrant:
 Hinc tumidi incedunt, hinc publica proemia poscunt,
 Id satis esse putant (nec decipiuntur) ad hoc ut
 Carnifices hominum sub honesto nomine fiant.

Tales ergo magis Vespilonum quam Medicorum numero adscribendi. *O. casio* (agendum effectum quæsito) *præceps* (subito labens in puncto sæpe consistens) *ocasio*, id est tempus idoneum exhibendi, *quæ anima curationis est*. *Præceps* est ob continuas & repetitas mutationes v. g. in acutis & aliis; si ergo hæc negligatur, actum est: sicut & fit si Medici post festum & tarde vocentur: Vel Medici curas procrastinant, & nimis naturæ fidant, est enim occasio sæpe momentanea & irreparabilis: nam teste Stobæo: *qui deserit occasionem ab occasione deseritur*: nam principiis obsta, sero medicina paratur. Hinc Ovidius:

Oppri-

Opprime dum nova sunt subiti mala semina morbi.

Omittendæ sunt longæ & superfluæ consultandi ceremoniæ, quibus remedia opportuna differuntur, vel omnino negliguntur. Nam quos Medici occidunt, plures occidunt passivè quam activè, id est remedia convenientia non exhibendo, vel inani timore differendo. Unde Plutarchus dicit: *hostem domare cum potes, est armare ut pereas.* Cito ergo curandum & malignitas ocyus suffocanda est; primæ viæ expiandæ, antequam massa sanguinis fermento illo exotico inquinetur: Non autem illud cito curandum cum temeritate fiat, quia hoc non esset tuto, sed cum periculo & morte curare, de quibus Poëta:

Non finis in longo miseros putrescere morbo
Absolvisque brevi morte, benignus homo es.

Tunc ergo operandum est Medico cum Natura vel omnino non, vel erroneè aut imperfectè operatur; quiescendum vero cum Natura bene operatur. Rectè profecto *Oribasius*, præcipitem occasionis lapsum comparavit, fluenti aquæ fluvii, ut quemadmodum quis digitum in fluvium immergens, mox elevans, ac subinde denuo immergens, non eandem tangit aquam, ita singulis horarum momentis corpus ægrotantis (utpote valde labile & innumeris obnoxium mutationibus) variat, & occasio agendorum præterit: Unde Veteres *occasionem* describere occipitio calvam, fronte vero capillatam: Et Galenus *I prognost.* inquit: *ocasio ita volat ut aliqui moriantur prius quam vocetur Medicus:* Illam equidem tanti fecit Hippocrates, ut libro de arte doceat omnem morbum curari posse si Medicus occasionem opportunam agendorum non omittat. *Experimentum periculosum:* (tum ob inquirendorum difficultatem, tum subjectorum varietatem, & in singulari, tum etiam propter humani corporis dignitatem, variamque ægrotantium habitudinem & symptomatum conditionem) loquitur hic Hipp. de Experientia quæ rationi non conjungitur, ut Empyrici, nam qui facile experitur, facile necat. Experientia non nisi longo usu contrahitur, juxta illud Ovidii:

seris venit usus ab annis.

Experientia à Gal. definitur lib. de optima Secta ad Thrasyb. *memoria ejus, quod sapius & eodem modo visum est*: Hinc subdit Gal. in commentario hujus aphorismi: *In corpore humano illa experiri, quæ non sunt experientia comprobata, non est citra periculum; cum mala experientia ad totius animalis interitum terminetur.* Unde eleganter dixit *Plinius Lib. 29. cap. I.* Medicos infectatus: Negotiantur animas nostras & experimenta per mortes agunt.

Hæc experientia in aliis artibus, quæ lutum, ferrum & lignum &c. pro subjecto habent, tam periculosa non est sicut in arte Medica. Delet pictor suos errores, figulus suos, faber suos; Jurista ad altius Tribunal appellat: sed Medici errores (in corpore humano) mors ipsa excipit: unde Poëta

- - - erravi sæpe necando
Dicere seu mavis errando sæpe necavi.

Nam de corio humano non licet impune ludere, & perdita semel causa non datur appellatio, unde Italorum adagium:

Morto io, morto tutto il mondo.

Nova experiri res fallax & plena periculi est; expertis uti etiam periculosum ob varietatem Naturarum, morborum, temporum, ætatum &c. Unde Medicus debet esse circumspectus, & à levioribus incipiat, ægrosque sæpe visitet, rationem cum experientia conjungat, & non ut Empyrici, qui sola experientia, nulli rationi juncta procedunt; hinc optima etiam remedia in Empyricorum manibus, sunt velut gladii in manibus furiosorum.

Judicium difficile: quod est vera ratio agendorum: *Judicium generale* in Medicina non est difficile: *particulare* & circa individua difficillimum ægri curantur in Scholis, & moriuntur in lectis; ratio est in promptu: quia doctrina solius ingenii & memoriæ foetus est: dexteritas autem agendi est partus judicii. Rarum autem est boni ingenii & solidi judicii connubium, juxta illud Epitaphium.

Hic jacet memoria & expectat Judicium.

Quanta non est difficultas in judicandis temperamentis, quæ tot sunt, quot homines: Unde Gal. 3. meth. med. dicit: *Si ego temperaturam corporis scire possem, qualisnam sit in toto corpore, me esse Æsculapium profiterer.*

Taceo

Taceo diversitatem morborum, taceo partes, taceo consensum, taceo dyscrasias partium & humorum, taceo ætates, anni tempora, regiones: taceo Authorum Veterum & Recentiorum volumina, & super ea ferenda iudicia, dum illi hæc, hi alia sentiunt & docent: taceo alia sexcenta v. g. signa, causas, prognosin, curam & millia millium remedia. Et licet remedium optime profecerit, ambigendum tamen adhuc est, quibus viis & qua efficacitate contulerit.

Opòrte autem (ad consequendum feliciter sanitatem seu finem) *non modo* (*Medicum*) *seipsum exhibere promptum ad ea quæ decent* (intus vel extus lege artis) *experientia & ratione, facienda sed & agrum* (ipsum in applicatione & diætâ) ægri enim qui vivunt prout volunt, curantur prout possunt, & moriuntur sicut solent; unde bene Poëta:

Qui fugienda facis, qui facienda fugis.

Caveat Medicus ne ægros curet simulatos, inobedientes suaviter admoneat, alias frustra curat, juxta illud:

Frustra Apothecarii medicatas ingeris offas

Quas Germana tibi Paule culina negat.

Frustra adhibentur sudorifera, ubi stragula deficiunt; frustra ordinatur aqua ubi famuli vinum clam porrigunt. Sæpe præcox gustus & ciborum sapor multos convalescentes, fermentis & morbis nondum restitutis ad mortem deduxit: juxta illud:

Millia sanctorum Rex sapor multa peremit

Occidit dulcis millia plura sapor.

Prudentiâ tamen Medici opus est, quâ facilè dignoscet simulationes, inobedientiam & peccata Patientum, hac etiam gratificari poterit in his quæ parum nocere possunt, ægrumque consolando & persuadendo.

Et presentes: adstantes, mulieres clinicas seu expertas, domesticos, aliosque Medici ministros, Chirurgos, Pharmacopæos, domesticas ancillas, servos &c. qui attendant ut omnia fiant & Medicus non decipiatur. *Ars enim inquit Hipp. I. Epidem. Sect. 2. Tit. 51. Tribus constat, morbo, agro, & Medico artis ministro, agri autem est una cum Medico morbo reluctari:*

Et externa. (in rebus sex non naturalibus v. g. aëre, animi affectibus) terror, strepitus, canum latratus, tristis aut lætus nuntius &c. motus, importunæ medicamentorum exhibitiones, vel malè præparata

parata & data medicamenta, nè natura impediatur in opere suo. Ea verò quæ fortuito & casu fiunt, DEO committenda & prognostico. Et Medicus etiam in his prudentiâ utatur. Confidentiam pariter ægroti in Medicum valde conferre ad morborum curationem docet Gal. *Ille plures, inquit, curat, in quem plures confidunt.*

Dices. Si ars sit longa & vita brevis, ergo nullus erit perfectus Medicus. R. Vita hic brevis intelligitur distracta, non soli Medicinæ vacans, Medicina enim tantum hominem requirit, quod nec fecit Hippocrates, nec Gal. nec nos facimus. Interim bonum erit & consultum, nullum in Doctorem promovere, qui non sit bene fundatus, minus enim habens, licet Doctoris nomen gerat, Doctor tamen reverà non est, sed talis velatis oculis currentem capere nititur, de quo Poëta:

Si vis sanari de morbo nescio quali
Accipias herbam sed qualem nescio vel quam
Ponas nescio quò, curabere nescio quando.

Quæres cur Vita hominis tam brevis sit? R. propter communem interitûs causam, nempe Elementorum contrarietatem & inde ortas in nobis mutationes, violentias, corporis & animi motus, officia, disturbia, persecutiones, excessus &c.

Quæres II. Quid sit Vita. R. Cum D. Thoma Vitam esse duplicem, *substantialem*, quæ est principium, quo quid in se immanenter & intrinsecè operatur: *accidentalem*, quæ est ipsa animæ operatio. Vivere enim & esse in animatis est idem, hinc animata solâ vitâ ab inanimatis differunt.

Quæres III. Utrùm verum sit illud: Turba Medicorum perdidit Cæsarem. R. Cum Seneca: multitudo Consiliariorum & confusio consiliorum nec decet esse multos, nec nullum, sed nec unicum: Tres ergo cùm faciunt collegium, etiam possunt facere consilium, tres ergo vel quatuor sed boni & veri Medici sufficiunt.

Quæres IV. Quasnam virtutes verus Medicus habeat necesse est? R. Cum Poëta breviter, fusiùs autem in Institutionibus, & mox suprà diximus:

Comis & indulgens miseris, minimumque superbus
Alloquii facilis, sit pronus semper adiri
Inter opes contemptor opum, contemptor honorum.

Apho-

Aphorismus II.

In perturbationibus ventris & vomitibus sponte evenientibus, siquidem qualia oportet purgari, purgantur, confert & facile ferunt, sin minus, contra: sic vero & vasorum evacuatio, siquidem fiat, qualem fieri decet, confert & facile ferunt, sin minus contra: quocirca considerare oportet & regionem & anni tempus, & aetatem & morbos, in quibus expedit aut non.

Contentum & Intentio.

De modulo Evacuationum.

Connexio: Priori aphorismo docuit difficultates artis, Medici, ægri, & adstantium, & externorum, & media ostendit ad eas tollendas; In hoc aphorismo signa docet & notas bonarum & malarum evacuationum, *αὐτὰ καὶ κατὰ* à natura sponte factarum. Hic aphorismus tres habet partes: In prima ponit medium suæ conclusionis de evacuationibus: in secunda ponitur Hippocratis intentio, si fiat evacuatio humoris peccantis, inducit conferentiam, sin minus, contra: In tertia adducit utilia quædam, quæ & pro probanda sua doctrina, ita & ipsi Medico multum serviunt; uti est Regio, ætas, tempus, morbus, temperamentum, victus, consuetudo.

Vomitibus & diarrhæa, ut ab arte, ita & sæpe sponte, vitio bilis, acidi, & similium irritatorum & onerosorum eveniunt.

Omnis excretio mensuranda est tum quantitate, tum qualitate, licet ut Galenus tenet, hic solam qualitatem intelligat Hippocrates, cum dicat qualia evacuari oportet; raro autem qualitas absque quantitate est, ergo utraque saltè implicitè intelligitur, ut patet in vasorum inanitione; tum instar omnium *ἰσότης* in utramque partem: *Euphoria*: id est debet evacuatio judicari non semper ex multitudine, sed ex euphoria id est conferentia & tolerantia, seu melioratione:

Per spontaneas evacuationes non excluduntur symptomaticæ quæ fiunt à Natura irritata, quæ etiam sunt spontaneæ, quia non fiunt ope Medici aut medicamenti, & eas etiam sequitur melioratio.

Præterea docet Medicum esse ministrum naturæ & imitorem, ut nempe naturam bene agentem imitetur, juxta illud: *quò natura vergit eò ducere oportet*: dando etiam simul specifica & humori peccanti appropriata: & hoc est talia purgare qualia purgare oportet, & leviter ferent. Et irritatam non sequatur. Neque Medicus etiam Naturam irritet violentis remediis, sic enim non leviter ferent, imò agros in extremam virium jacturam & hypercatharsin conjiciet: In Medici enim potestate non est excessum purgantis sistere, sicut sanguinem è vena secta effluentem cohibere.

Videre etiam oportet utrùm sit critica evacuatio, id est cum conferentia & humorum coctione, die critico: vel symptomatica cum dispendio Naturæ & cruditate humorum, & non die critico, sed in principiis morborum maxime, uti & aliis temporibus contingentes: v. g. sudores syncoptici, atræ bilis excretio supra & infra, hæmorrhagiæ majores vel pauciores. Euphoria consequitur evacuationem nocivorum & superfluum, relictis & imperturbatis humoribus bonis. Hæmorrhagiæ narium, uteri, hæmorrhoidum, evacuationum reliquarum æmulantur legem, in utramque juvantium & nocentium partem.

Excretionum modulus & prognosis variat pro circumstantiarum & rerum naturalium, nonnaturalium & praternaturalium constitutione varia: ac I. *Regio*, quæ plurimum potest in purgando corpore: aliter & facilius evacuantur Galli, Itali, Hispani: aliter & difficilius Germani & Septentrionales. II. *Tempus*: unde dicit 4. aph. 5. sub cane & ante canem difficiles sunt purgationes: & in hyeme faciliores, & in Vere & autumno. Difficiles etiam sub solstiriis, æquinoctiis, quia in iis magnæ fiunt mutationes. III. *Ætas*: quia infantes, pueri & senes, magnas humorum & sanguinis evacuationes non tolerant, iis tamen, sed lenioribus quandoque egent. IV. *Morbi*: v. g. inflammationes, tabes, hydrops, lypothymia & syncope, evacuationes magis prohibent, quam tolerant.

V. *Temperamentum, consuetudo, victus ratio*, etiam difficilem vel facilem faciunt evacuationem: sic sanguinei & biliosi facilius, pituitosi &

& melancholici difficilius : facilis assueti, difficilius inassueti: facilius temperati, difficilius ingluviosi & helluones.

Dices: Medicus non potest esse imitator Naturæ: I. Quia Natura per se agit: II. Natura agit in statu, sed Medicus in statu non audet: III. Quia Medicus non potest facere crisin sicut Natura: R. I. Si Natura bene agit, prorsus non eget Medico Imitatore. R. II. Non agit in principio & augmento status concedo, in fine status nego. R. III. Non facit Crisin dispositive nego, formaliter concedo.

Aphorismus III.

Athletarum seu Exercitatorum, seu boni habitus, ad summum (id est bonitatis) progressi; periculosi, si in extremo constiterint: neque enim possunt in eodem statu permanere, neque quiescere; cum vero non quiescant, neque ultra possint in melius proficere, reliquum est ut in deterius decidant. Horum igitur causa bonum eum habitum solvere conducit, non cunctanter, quo rursus nova nutritionis initium, corpus sumat: Neque vasorum concidentia ad extremum perducenda, periculosum enim: Sed qualis natura fuerit ejus, qui id perpeffurus est, eo usque progrediendum. Sic & evacuationes quæ ad extremum tendunt, periculosa: & rursus refectiones cum extrema fuerint, periculosa.

Contentum & Intentio.

De extremis repletionis & inanitionis.

Connexio: Egimus priori aphorismo maxime de qualitate evacuanda; in hoc agimus de quantitate educenda ad virium tolerantiam.

rantiam. Id est tantum evacuare oportet, quantum vires ferunt. Scopi evacuationis sunt: I. An. II. Quid: III. Quare. IV. Quo loco. V. Quo tempore. VI. Quomodo?

Omnis habitus corporis plus justo obefior, aliquid monstri alit, seu in infantibus seu in adultis occurrat.

Athletæ dicuntur quorum institutum erat luctari & in Palæstris fese variis certaminibus exercere, ideo alimentis vesciebantur multis & optimis, ut tanto speciosiores & formosiores se in lucta exhiberent: Cum igitur hi multa euchymorum ciborum copia se ingurgitarent, tantam carniū & sanguinis plenitudinem sæpe sæpius adipiscebantur, ut non raro subita & inopinata morte succumberent. Talis ergo obesus habitus est improporcionatus humoribus, vasis, spiritibus, actionibus, ob orgasmum, ruptionem & virium lapsum. Solvitur diæta, laboribus, & medicamentis attenuantibus, aperientibus & aliis decenter adhibitis.

Ut repletio nimia onerosa, ita & evacuatio extrema vitanda & quovis modo arcenda. Unde duæ sunt partes hujus aphorismi. I. Extrema plenitudo de qua jam diximus; & extrema inanitio. II. Extrema evacuatio non convenit fortibus, ergo minus debilibus, propter vires, *quia omne nimium natura inimicum* ob virium lapsum & irreparabile damnum. Et teste Seneca, *quidquid ad summum pervenit, ad exitum properat*: sicut nimium sanguinis, ita etiam nimius ejus defectus circulari apte non potest: & ex illo inflammationes & febres; ex hoc convulsio & syncope; & ex illo suffocatio, ex hoc mors.

Athletæ igitur & summe repleti evacuandi sunt, ne vasa distenta rumpantur, vel humores ad partem principem ruant. Vasa enim sanguifera vel copia turgida, vel rarefactione distenta, secta vena concidunt, & sanguis sicut mustum in fermentatione constitutum aperto foramine ocyus defervescit. Venæsectio sanguinis irritationem & Archæi excandescientiam cohibet & minuit, calorem temperat, rarefactionem refrænât, motum præternaturalem inhibet, deficientem stimulat.

Ab evacuatione nimia seu positive seu privative, id est à natura vel Medico facta, subsident & connivent fibrillæ & oscula vasorum, unde ut dixi impeditur circulatio sanguinis. Facta subsidentia osculorum non simul & semel, sed successive magis resectio est instituenda.

da. In his autem omnibus considerandæ vires, tempus, ætas, Regio, consuetudo. Neque etiam evacuatio facienda simul & semel, sed successive: ita etiam resectio, alias enim recidiva vel aliud malum evenit, in illa calor exstinguitur, in hac debilis obruitur, & impeditur cordis & sanguinis motus.

Dices: habitus athleticus tolli potest per inediam, frictiones, purgationes, ergo non tantum per venæsectionem. *R.* Potest tolli sine periculo & tam cito nego, cum periculo & molestia concedo: mora autem in hoc casu est periculosa.

Dices II. Extremis morbis extrema debentur remedia, ergo etiam extremæ repletioni extrema evacuatio. *R.* Distinguo in debilioribus & simul & semel facta nego consequentiam: in fortioribus & successive & paulatim facta concedo.

Quæres cur Athletæ in eodem bonitatis statu permanere nequeat? *R.* Siquidem in Athletis semper fit major sanguinis accretio, ex nova ab alimentis additione, unde postremo arteriæ & venæ novi sanguinis incapaces, vel rumpuntur vel interceptiuntur.

Quæres II. Cur in melius proficere non possint Athletæ? *R.* Quia absque hoc ad summum bonitatis sunt eVecti, ultra quod proficere impossibile est.

Aphorismus IV.

Victus tenuis & exquisitus, tum in morbis longis semper, tum in acutis ubi non convenit, periculosus; ac rursus qui ad extremum tenuitatis devenit victus, gravis; nam & repletiones ad extremum perducit & graves sunt.

Contentum & Intentio.

De victu tenui & exquisito.

Connexio: Hactenus egimus de detractioe per purgationem & phlebotomiam: nunc convertimus nos ad adjectionem. Nam Medicina est adjectio deficientium, & detractio redundantium. Duas

habet partes hic aphorismus: in Prima ostendit unum victum non omnibus convenire. In secunda ut doceat Medicum diversas victus species pro morborum diversitate præscribendas esse.

Victus triplex est: *tenuis*, qui vires restituit, sed debiliores quam ante erant v. g. sorbitio, & convenit acutis morbis. *Mediocris*, qui vires in eodem statu conservat; ab aliis dicitur Medicus; uti sunt juscula carniū & convenit valetudinariis, senibus convalescentibus, morbis chronicis. *Plenus* qui vires auget, v. g. carnes, & convenit sanis.

Alius victus aliis, ægris & morbis convenit; id est victus tenuis & exquisitus non convenit omnibus morbis: chronicis prorsus non, teste Hipp. 1. Aph. 9. infra. Nec semper acutis qui extenduntur, ob virium lapsum, quia minus reficit quam deperditum est. Unde bene dicit 2. Aph. 7. quæ longo tempore extenuata sunt corpora, lente reficere oportere, quæ vero brevi, breviter. Victus tenuis (in quantitate & qualitate, subtrahit, exquisitus subtrahit magis, strictus & ad demensum, imprimis ultra quam ferre & subsistere possit æger. Victus tenuis & exquisitus habet suos gradus diversimode applicandos, de quibus abunde agitur in Institutionibus. Quo magis ad extremum inclinat victus alteruter, eo magis naturæ inconveniens & periculosus, sed *Dices*: in morbis acutis tenuissimo victu utendum est teste Hipp. 5. Aph. 8. ergo. R. Hippocrates loquitur de morbis extreme acutis, vel cum in vigore sunt.

Victus tenuis & exquisitus morbis longis incongruus, attenuans vero proportionatus morborum à repletionem remedium optimum. Distinguitur autem victus tenuis & attenuans: tenuis non tantum parcum sed & nullius substantiæ alibilis cibum significat: attenuans vero substantiæ nutritibilis est, sed virtutis attenuantis & aperientis.

Quæres quænam vires sint reficiendæ R. maxime vitales, consecutive etiam animales & naturales.

Dices: Hippocrates dicit in morbis acutis tenuissimo victu utendum esse, ergo hic male dicitur esse periculosum. R. Hippocrates intelligendus est de extreme acutis, vel de summo morbi vigore.

Dices II. In Peste qui diate & parce vivunt, pereunt, qui plene salvantur. R. I. Sit fides penes Authorem: R. II. Noster aphorismus loquitur de morbis humoralibus in quibus fit humorum coctio, non
vero

vero qui pendent à qualitate maligna: & revera in his plus plenus quam tenuis victus ob vires debiles potest, quia facit resistantiam per cibos roborata non autem obruta natura.

Dices III. Quod in morbis à maxima evacuatione pendentibus summe quoque vires languent, quæ licet exigant pleniorum victum quo refici possint, illum tamen non sufferunt, quia nequit imbecilla virtus illum conficere. &c. Esto vires brevi extenuentur, solidæ partes vigent, à quibus plenior cibus conficitur, quia ciborum digestio potius ad solidas partes, earumque fermenta pertinet, quam ad spiritus. Sed bene notandum in hoc & simili casu semper aliquid esse condonandum Regioni, anni tempori, ætati, consuetudini, id quod in prudentis Medici judicio est collocatum.

Aphorismus V.

In victu tenui delinquunt agri, ob id magis laduntur, quicunque enim error committitur, major in tenui fit, quam in paulo plenior victu. Propterea etiam sanis periculosus est valde tenuis constitutus & exquisitus victus, quoniam errores gravius ferunt: hac igitur de causa tenuis & exquisitus victus, eo qui sit paulo plenior, maxima ex parte periculosior.

Contentum & Intentio.

De erratis victus collatis.

Connexio: Sicut in priori aphorismo egimus de modo exhibendi victum tenuem, mediocrem vel crassum, ita & in hoc de illo agimus: & sicut ibi damnavit, ita & hic damnat, quia dicit quod delinquant, & eo magis quo tenuior, una enim victus species, qualis tenuis est, non potest competere omnibus morbis.

Hic ergo aphorismus dividetur in tres partes: in prima concludit quo tenuior est victus ratio, eo periculosior. In secunda dicit hoc etiam

etiam fanis accidere: in tertia concludit errata, quæ in tali victu consistunt, sunt magni momenti & ægrum perdere possunt.

In omnibus morbis sufficere spiritibus fomitem sufficientem par est, alias natura succumbit ex defectu refectionis.

Quo minor est plenitudinis præsentis indicatio, eo magis victus tenuis non solum in cibo sed & potu nocet: unde Hipp. tres casus ponit. primus est de omnibus qui à victu tenui læduntur: secundus etiam fanis nocet; tertius ergo magis ægris.

-Nulla exacta victus ratio ultra appetitum, euphoriam, & corporis sensum imperanda vel admittenda. *Homo sanus nullis legibus obstringi debet teste Celfo.* Ex duobus malis præstat excessu peccare quam defectu, largius repleri quam minus: cum enim Medicus evidenter prævidere nequeat mox à principio, quo & quoto die morbus judicabitur, melius facit si pleniorum victum instituat, quam tenui ægrum exhauriat. Sequatur Juristarum regulam quæ docet, *favores ampliandos & odia restringenda esse*: alias enim contingit ut postea sub statu plenius debeat nutriri, quod est periculosum & tunc potius debet detrahi victus quam addi: unde Hipp. dat exemplum à navigio; sicut in navigio error qui tempore tranquillitatis, licet magnus contingat, vix nocet, tempore autem tempestatis minimus navem perdit: ita in fanis & morbis levibus error factus parum nocet; sic morbis gravibus, periculosus & acutis, hominem error perdet. Unde etiam fanis non semper delicati cibi conveniunt, quia talia facile dissolvuntur, & facile tales delicatuli à levi causa læduntur: Id quod observavit quidam Advocatus Juris, qui rustico vitulum donanti sic respondit:

Quid mihi cum vitulo pullis & mollibus ovibus

Flaccida, subtilis, rara fit inde caro.

Consuluit Medicus mihi duris carnibus uti

Sit tibi cura mei rustice, mitte bovem.

Sed *dices*: Hippocrates toties ordinat victum tenuem in acutis: *℞.* Quia frequentius morbi acuti prohibent victum plenum, quam ut vires conservandæ tunc exigant: Et Medicus magis debet attendere ad id quod magis urget. Et Hipp. maxime loquitur de statu morbi, ubi cibis detrahendus est, sed cum discretionem ne lædat.

Dices II. Multi multos morbos per inedia curarunt: *℞.* Si ad-

lit

fit magna repletio & simul vires, concedo, alias nego. Sed

Dices III. In principio morbi semper adest repletio, ergo victus tenuis convenit. *R.* Distinguo Consequens: Si morbi brevi ante resolutionem virium terminentur, concedo, alias nego.

Dices IV. Avicennas dicit: cum ignoras morbi causam, tenuiori victu utitor, ergo convenit. *R.* Avicennas non loquitur de adeo tenui victu, sed tantum de aliqua subtractione ciborum, quæ in principio morbi ignoti tuta esse solet.

Dices V. Hipp. Lib. 2. de victus rat. in acutis dicit: *ciborum adjectioni multo minus incumbendum, subtrahere vero omnino expedit:* *R.* Hunc textum Hippocratis intelligendum esse, in morbi vigore esse subtrahendum: & hoc non est contra nos, nec contra Hippocratem & Gal. qui Lib. 2. de vict. in acutis comm. 49. idem dicit. Ut verbo dicam: longe magis peccat, is qui cibum dat ubi non convenit, quam ille qui negat ubi convenit. Hippocrates optime in hoc aphorismo re ipsa contulit, damna victus tenuis & plenioris, atque rationabiliter pronuntiasse periculosiorem esse *tenuem paulo pleniori*, quia ille viribus detrimento est, hic autem prodest. Sed in his respicienda maxime est Natura, modus & mos vivendi, ætas, consuetudo, & alia.

Accurate victus rationem determinantes, tantum abest ut ideo sani sint magis, ut magis sæpenumero valetudinarii, & erroribus aliis facile lædendi. Unde Hipp. 6. Epid. dicit: *illos citius mori quo exquisitius vixerint:* quia ut supra diximus, *sanus homo nullis se legibus obligare debet.*

Aphorismus VI.

Vid. aph. 6. libr. 8.

Ad extremos morbos, extrema exquisita remedia optima: unde huc bene quadrat aph 6. sect. 8. quæcunque non sanant medicamenta, ferrum sanat, quæ ferrum non sanat, ignis sanat, quæ ignis non sanat, ea incurabilia judicare oportet.

C

Con-

Contentum & Intentio.

De remediis extremis.

C*onnexio:* In prioribus aphorismis Hipp. statuit extremam evacuationem & repletionem esse periculosas; in hoc aph. extremis morbis extrema & debita remedia proponit. Ut enim extremi morbi, ita & extrema dantur remedia. Brevitas aphorismi non patitur divisionem. Hippocrates reprehendit eos, qui semper à levioribus curationem inchoant: licet alibi dictum remedia extrema esse periculosa, illa tamen in necessitate non sunt omittenda. Unde Philosophus Dio dicit: *cunctatio in salute conservanda malis non cunctantibus est intempestiva.*

Extremi morbi sunt, qui vel necessario occidunt, vel qui frequenter occidunt, quandoque tamen præter spem sanantur, vel tum gravius à statu naturali recedentes tum urgentes, utrique periculosi, desperatis proximi, mortem illaturi, sive tales sint *actu* v. g. peracuti: sive *potentia* v. g. orgasmus seu turgentia: Vel in Athletis ubi ex parvo fieri potest magnus; vel ob periculum in mora; sputum sanguinis, vel partis nobilis; vel abscessus, hydrops, gangræna, calculus, apoplexia, epilepsia, pestis, magna symptomata, ex quibus Natura graviter afficitur cum manifesto vitæ periculo: Et hi extremis remediis debent curari.

Extrema remedia sunt heroica, chirurgica imprimis & Pharmaceutica. ferrum, ignis, opiata, Mercurialia, antimonialia; venæsectio in plethora, purgatio in cacochymia: item moxa, stuppa, cura lignorum, theriaca &c. Et hæc remedia dicuntur extrema, licet reipsa non sint, sortiuntur tamen sæpe vim extremi remedii, v. g. venæsectio in apoplectico, quæ occidit vel liberat.

Sunt nonnulli inter Recentiores qui negant venæsectionem & purgationem esse extrema remedia: Si enim nomine extremorum intelligere velint contraria distantissima, ut usurpat Aristoteles 10. metaphys. certe phlebotomia & pharmacia, nullam habent cum morbis contrarietatem, cum vera contrarietas, solum versari dicatur à Veteribus, inter qualitates; nec in super si ejusmodi forent, tuto possent adhiberi; nam præter alia in Institutionibus demonstrata *Galenus* expresse docet, 3. simpl. medicament. 12. & alibi; ab his, inquit, omnino

caven-

cavendum, ne morbus alter priore prior insequatur. Si vero extrema remedia à Veteribus appellentur, quia extremam corporibus commotionem inferunt, humores concitando & educendo; sub quo sensu solertiores Veteris Sectæ Medici, illa exponere consueverunt; Sane non erit ut à prudenti Viro sub ancipiti eventu, illa tam facile possint commendari, cum, eadem celeritate qua juvare possunt, soleant pariter & frequentius irreparabiliter interimere: quare si periculis implicata sæpissime fallant, rarissime & maxima præmeditatione administranda: Neque Hipp. neque Galenus absolute asseruit venæsectionem & purgationem extrema seu magna esse remedia, sed solum hæc esse præcipue & nonnunquam atque tantum in genere evacuantium, dum dixit: *si quid movendum videtur, move*: Imo etiam alibi dixit extremum remedium febris ardentis esse *potum aqua frigida*: & in dolore Colico præsentaneum remedium ac veluti incantamentum esse cucurbitulam magnam ventri & umbilico adhibitam: sic etiam Balnea tanquam exquisitissima remedia commendat: sæpe etiam meri potum. Quæ de causa sana ratione evincere quis poterit quodcunque Medicamentum, cum juverit, extremum & maximum dici posse. Potius ergo sanguinis missio & purgatio, extrema & magna remedia dicentur, quia magnam & ingentem in toto corpore commotionem excitant; aut quia generalia præsidia sunt, quamcunque partem respicientia; aut quia in locum reliquorum medicamentorum cum ignorantur, substituuntur. Si enim unicuique morbo congruentia, propria & specifica remedia adhibere sciremus, ininime generalibus ejusmodi medicamentis egeremus: Phlebotomia & Pharmacia, non nisi, illa ad venas deplendas, hæc vero ad alvum laxandam uteremur.

Præterea Hipp. magnum & extremum remedium constituit ignem, ut mox à principio diximus ex aph. quæ medicamentum non sanat, ferrum sanat, quæ ferrum non sanat, ignis sanat, quæ ignis non sanat incurabilia sunt: Sic similiter sternutamentum in retentis secundinis & foetu mortuo: somnus in delirio: aquæ frigidæ perfusio in tetano: Paracenthesis in Empyemate & hydrope, & alia id genus innumera extrema remedia dicuntur: unde inferunt Recentiores, nullatenus ex mente Hipp. ad hæc duo duntaxat Venæsectionem & purgationem extrema remedia esse coarctanda: patet enim hæc duo

in multis & magnis morbis locum non habere, v. g. hectica, diabete, lienteria, Syncope,

Verum enim vero ut sit, plus standum esse credimus experientia quam solis rationibus; illa autem multifarie constat, venæsectionem & purgationem magna & extrema esse remedia, quod ipse *Hellmontius*, horum remediorum infestus hostis, suo damno luit, dum pleuritide correptus, venæsectionem à prudentibus Medicis suam, obstinate renuit, ubi vero ad fata adactus, eam celebrandam institit, occasio præceps vitam cum morte commutavit. Sunt ergo quidquid ogganniant *Recentiores*. Venæsectio & purgatio duo magna & extrema remedia, non quidem sola & unica, neque semper, quod nunquam disputatum est. Extrema ergo & magna remedia tum ex mente *Veterum & Recentiorum*, dicimus ea quæ statim prodesse possunt, cujuscunque generis illa sint, sive cum, sive sine evacuatione.

Inter morbum & remedium perpetua, eaque prudens requiritur proportio: unde ubi necessitas non urget, satius est curam à levioribus incipere, & ad extrema sensim venire. Ubi vero necessitas urget, melius est teste Gal. 12. meth. med. lædere, quam permittere ut æger moriatur. *Duro namque nodo durus cuneus applicandus*, & teste Solone: *nunquam periculum sine periculo superatur*: teste Livio: *audendum est atque agendum, non consultandum in acutis & extremis*. Nullibi major quam in his requiritur *ἀκρίβεια*, id est accurata ratio, ut proficit remedium, non noceat. Præstat prius omnia tentare, quam ad extrema devenire, præstat abstinere tum ab aliis, tum extremis, imprimis remediis, quam nocere, sic enim Natura conservatur.

Dices I. Curatio semper incipienda est à levioribus teste Hipp. & Galen. & non urgente necessitate concedo, ubi morbus summe urget nego.

Dices II. Extremi morbi quandoque à Natura ipsa & sola curantur, ergo his non opus est. & à forti Natura concedo, à debili nego: deinde non omnes morbi curantur à Natura, ut gangræna, luxatio. *Instabis*: In natura debili non habent locum extrema remedia, ergo. & in Natura extreme debili concedo, in Natura oppressa tantum & non reforescunt nego.

Dices III. Extremum remedium non modo morbo, sed & Naturæ est contrarium, ergo non habet locum. & Morbo omnino esse con-

contrarium, sed non sequitur quod sit contrarium Naturæ ut patet in alexipharmacis quæ pesti sunt adversa sed Naturam roborant.

Dices IV. Chymici porrigunt antimoniatâ, mercurialia &c. etiam in levibus morbis, ergo non sunt extrema. R. Dant in levibus tendentibus ad maximum morbum concedo, in levibus manentibus nego vel dant præservative potius quam curative.

Aphorismus VII.

Ubi morbus peracutus est, statim extremos habet labores, & extreme tenuissimo victu utendum est: ubi vero non, sed plenius licet cibare, & tantum à tenui recedendum, quanto morbus ab extremis remissior est.

Contentum & Intentio.

De victu acutorum.

Connexio: Hipp. docuit in 4. aph. unam victus speciem in omnibus morbis non posse convenire, jam ad particularem morbum descendit, ad morbum acutum, & docet qui victus ipsi conveniat, nempe victus extreme tenuissimus. Alii dicunt: cum Hipp. in prioribus extremis morbis summam diætâ convenire dixerit, nunc in hoc veluti rationem adjiciens, subdit, quia ubi morbus peracutus est, statim extremos labores affert, ex cita ad augmentum & statum festinatione, gravibus afflicta symptomatibus Natura, conficiendis & dissolvendis cibis impotens, & ideo porius gravari quam refici contingit. Morbi acuti sunt, qui celerius sua decurrunt tempora, & symptomata in ἀκμή, id est vigore habent.

Duo ponit membra hujus aphorismi. I. in morbo peracuto, tenuissimo victu uti oportere. II. quo morbus magis distat ab extremo, plenior ei convenit victus: nolumus hic sequi Fonsecam qui quatuor species victus tenuis ponit morbis acutis: extreme acuto durante quatuor diebus, inedia convenit: secundo, qui durat septem diebus, convenit solus potus: tertio durante quatuordecim diebus, debetur for-

bitio: quarto qui viginti diebus durat, cibus competit solidior. Hunc modum Italici fami magis assueti relinquimus. Germanis vero magis ad mortem quam sanitatem profuturus, hi enim pleno victu assueti sunt: Consuetudini autem teste Hipp. aliquid concedendum est, & vires præ cæteris consulendæ. Gradus morborum acutorum diversi & in se & respectu curationis, sive medicamentorum & diætæ æstimandi. Sic prout morbus est v. g. angina, cujus una species est periculosior altera: vel si accedat malignitas vel causa violenta, vel error in cura & diæta. Peracuti ergo morbi nullatenus hic intelligendi qui ad septimum usque diem protrahuntur, sed qui non prætergrediuntur quartum diem, nam hi statim extremos labores habent. Et licet morbus peracutus etiam quatuor habeat tempora, & ideo extremus dici non possit, quia tamen illa celeriter percurrit, extremus est. In definiendo victu, & morbus ejusque intensio & remissio, & appetitus ipse, & vires respiciendæ; Unde morbus extremus tenuissimum victum requirit, quo minus vero est extremus, plenior victus ei debetur.

Non unum curandi momentum in diætæ regimine provido consistit, sed juxta circumstantias debet mutari. Vires & consuetudo attendenda.

Victu nunquam morbus augendus, sed imminuendus, corpus vero conservandum est. Nempe dum prodesse volumus, non obsumus.

Dices: Extremi labores non semper faciunt morbum peracutum ut patet in Colica, dolore dentium, podagra. & labores & dolores intelligi illos qui sunt morbis acutis juncti, qui hominem offendunt non autem separatos.

Dices II. Corpora impura quo plus nutries, plus lædes: sed magis sunt impura in principio quam in statu, ubi potior pars cocta est & separata, ergo in statu tenuis victus non convenit. & In principio non nutrimus ob puritatem vel impuritatem, sed ut vires reliquo tempore durent. & non nutrimus pleno victu, sed mediocri.

Dices III. Vires tum reficiendæ sunt quando maximè sunt debiles, sed in statu sunt maxime debiles, ergo. & negando semper in statu vires esse maxime debiles, licet sint summi labores, ob naturam in excretionem occupatam, nihilominus materia concocta est, & consequen-

sequenter Natura est morbo superior, ergo non eget tanto alimento.

Aphorismus VIII.

Cum morbus in vigore fuerit, tunc vel tenuissimo victu uti necesse.

Contentum & Intentio.

De victu in vigore morbi.

Connexio: in priori aphorismo egit de victu secundum morborum species, jam de eodem agit secundum morborum tempora. De quibus morbis hunc aphorismum scripserit Hipp. non est adeo facile divinare: etenim si de omnibus sermo sit, plane errore non vacabit, quoniam in morbis longis vigor aut status ad plures dies sæpissime protrahitur, ut potissimum in quartanis annuis, quarum vigor aut status universalis, menses complectitur; jam vero si per mensem victu tenuissimo uteremur in ejusmodi generibus morborum, procul dubio vires conciderent, & æger præ summa inedia periret. Nec insuper de solis peracutis intelligendus est aphorismus, hoc enim modo supervacaneus foret, cum jam superiori aph. dictum sit, in peracutis victum extreme tenuissimum exhibendum esse. Et quamvis dici possit ibi de toto morbo, hic solum de ejus vigore sermonem haberi, quia tamen totus morbus tempus etiam vigoris comprehendit, profecto si in toto morbo præcipitur victus extreme tenuissimus etiam in vigore & statu credendus erit imperatus. Probabilius ergo dicendum videtur, locutum hoc loco Hippocratem de victu tenuissimo exhibendo in vigore omnium acutorum, etiam si ex aliquo accidenti commentabilis esset paulo plenior, ut propterea in omnibus morbis acutis, licet inter initia & declinationis tempora paulo plenior victus foret adhibendus indicatione à viribus desumpta: cum nihilominus ad vigorem & statum ii pervenerint, extremis laboribus stipati, ne ex pleniori cibo Natura distrahatur à concoctione & secretionem causæ morbificæ, cui plurimum tunc temporis vacare cogitur, tenuissimus victus præscribendus est. Voluit autem hic primum de acutis tantum morbis sermonem habere,

bere, in quibus majus vitæ periculum imminet, à symptomatibus eo tempore augescentibus, & citiore mutatione quæ contingere solet, comprehensus in sequenti etiã chronicos. Hic aphorismus ob brevitatem non patitur divisionem.

Tempora morborum aliam atque aliam tractandi methodum requirunt: unde docet Hipp. si morbus in vigore seu statu est, seu quando symptomata maxime urgent, increscunt, vel nova & graviora superveniunt, tunc vigere morbus dicitur, juxta illud quod scribit 2. aph. 35. *Circa initia & fines, omnia imbecilliora, circa statum vero vehementiora*, id est, ut interpretatur Gal. symptomata quæ potissimum accidunt à commotione & fermentatione vehementi succorum, & ab eorundem inversione, tunc temporis contingente: & ideo fit, ut si secretis inutilibus & pravis humoribus, fermentatio in præcipitationem, quam coctionem appellant, desinat, morbi & febris statum excipiet declinatio, cum pristino salutis statu: Sin secus, ingrovescentibus symptomatibus, à sanguine coeterisque liquoribus vitæ tuendæ necessariis, in degenerem à naturali statum adductis & aliquando etiam corruptis, partes cunctæ corporis elanguent, cor in suo motu fatiscit, concrecente vel dissolutionem subeunte sanguine, ejusque motum vitiando vel impediendo vita desinit.

In vigore ergo æger tenuissime ali debet, & ideo uniformis per omnia morbi tempora victus non conceditur.

Ætatem morborum definiunt ab intra, symptomata, item coctio & cruditas, & motus morbi. Ab extra dies, quo incipiunt & finiri solent. Unde quatuor constituuntur tempora, principium, augmentum, status & declinatio: declinatio autem in morbis ad mortem tendentibus non datur.

Morbi status æquipollet acutiei gradui majori.

Quo magis gravatus & impetitus in statu Archæus, eo minora ferre & subigere potest succendicula. Unde bene notandum hunc aphorismum non tantum de victu in vigore morborum minuendo intelligendum esse, sed etiam de medicamentorum prope omnium administratione, atque eorum potissimum, quæ naturam salubriter operantem avertere possunt, eo enim tempore, omnia fere importune exhibentur, nisi illius motum adjuvent, si fortasse deficerere videatur.

Equi-

Equidem bene & prudenter advertit *Galenus in Comment.* hanc Hippocratis doctrinam iis tantummodo morbis aptandam, quorum causas superare Natura atque depellere potest, & in quibus post vigorem sequitur declinatio: Nam in illis quorum vigorem mors excipit, exactam hanc inedia nequaquam præscribemus, ne infaustus eventus nostro adscribatur errori; quare in his casibus rem omnem solo prognostico exequemur memores illius dicti Valesiani; *quod ad Medici honorem & artis admirationem magis referat, prædicere mortem in morituris, quam salutem in convalituris.* Etiam Galen. docet 11. meth. cap. 9. *Vbi omnino salus desperata est, imprudentis consilii esse apud vulgum infamare, præsidia, quæ multis fuere saluti.* Et 2. aph. comment. 29. deploratos attingere non oportere, sed magis abscedere, eventum morbi prænuntiato.

Tenuissimus victus principaliter in cibo & potu, adæquate & in medicamentis valet: estque tenuissimus victus vel inedia, vel sola forbitio seu potus.

Dices: in morbis desperatis non est opus victus præscriptione, ergo non in omnibus morbis præscribendus. *R.* in morbis desperatis ad mortem tendentibus concedo, tendentibus ad declinationem non est præscribendus nego.

Dices II. Sæpe causa morbi plus viget in principio quam statu v. g. in quartana principium plerumque est ferocius quam status, ergo non semper in statu præscribendus est tenuis victus. *R.* Nos loqui de statu morborum peracutorum non chronicorum ut est quartana, cujus vigor aliquando per duos menses durat, ubi tanto tempore victus tenuis suaderi non potest.

Dices III. Licet sæpius in accessione particulari cibare ubi vires concidunt; purgare in magna turgentia, sanguinem mittere si adest plethora, ergo etiam licebit in statu; sic in febre syncopali nutrimus: in febrium paroxysmis & colica purgamus. *R.* id fieri quando majus adest periculum ex repletionem vel virium defectu, quam humorum motu; sed ista in statu morbi universalis praticare non licet.

Aphorismus IX.

Conjicere autem oportet an sufficiat agro is victus usque ad morbi vigorem, & utrum prius ille deficiet, neque cum eo victu perdurare poterit, vel morbus ante deficiet & remittet.

Contentum & Intentio.

De victu è viribus æstimando.

Connexio: Cum tria sint à quibus maxime cibandi ratio petitur; *morbi species, vigor ejusdem, & vires agri*, de cibandi autem ratione ex morbi specie in peracutis, & in vigore morbi jam egerit Hippoc. in hoc aph. agit de cibandi ratione à viribus sumpta: utrum nempe illæ sufferre possint ejusmodi victus tenuitatem, quousque morbus constiterit. Si enim ejus sit roboris æger ut citra cibi mutationem morbum sustinere valeat, diætæ innovatio nulla facienda est; sin secus, pro illius varietate varie quoque æger alendus erit. Hic aphorismus licet multis verbis constet, unicam habet conclusionem. In hoc ergo aph. Hippocrates vult dicere: licet morbus indicet talem vel talem victus rationem; si tamen vires non permittant, in hoc casu Medicus dextro oculo primario vires, sinistro demum causam morbi intueatur; id est conferantur morbi vires cum viribus ægri, quod fiet & dimetiri debet ex facultatum robore, pulsu æquali, excrementorum egestionem facili, morbi remissione &c.

In definiendo victu, vires reliquis omnibus præponderant, veluti mensura diætæ; quia vires principaliter diætam præscribunt & gradus ejus limitant: Sed bene oportet distinguere an vires sint oppressæ vel resolutæ: Nam oppressæ nunquam victum pleniorum & adjectionem petunt, sed potius tenuem & detractionem: sed resolutæ de quibus hic loquitur, quas morbus & malignitas, vel spirituum & sanguinis defectus minuit.

Ita semper alendus æger, ut subsistere & perdurare possit citra virium jacturam atque defectum, usque ad vigorem morbi.

Quæres

Quæres utrum idem de sanis dicendum? R. Negative: nam in sanis robur indicat cibi additionem, debilitas vero abstractionem; in morbis fit contrarium, quia oppressæ vires à morbi vi requirunt incitamentum, resolutæ vires victum exigunt.

Non solum autem in præsens sed & in futurum ægro semper prospiciendum ut perdurare possit, ne in declinatione pereat.

Appetitus in acutis victum fere nullum nisi tenuem, imprimis quoad fluida admittit.

Abstinencia & victus tenuis, morbis curandis commoda, modo vires & cætera consentiant; unde hæc ponderanda sunt ex pulsu, urina, facibus, sudoribus, anni tempore, victu, ætate, sexu, temperamento, habitu, labore, dolore, vigiliis &c. & licet vires respectu sui à principio sint debiles, respectu tamen morbi sunt robustiores: quia licet à principio agant & debilitentur, quia tamen morbo fiunt superiores in statu sunt robustiores.

Quæres utrum morbus in principio dicendus sit malignior quam in statu? R. Natura vincente concedo, quia major est in principio cruditas quam in statu: Natura vero victa est morbus in statu malignior, quam in principio.

Aphorismus X.

Quibus igitur statim vigor adest, tenuiter statim alendi, quibus vero postea vigor futurus est, iis sub illud tempus & paulo ante subtrahendum, prius vero uberius alendum, quo durare possit æger.

Contentum & Intentio.

De victu variando juxta morborum vigorem.

Connexio: hic aphorismus est quasi idem cum priore: in prioribus egit de victu à morbi specie, vigore, & viribus sumpto, jam de illo agit qui convenit in uno eodemque morbo: hic aphorismus duas habet partes, in prima dicit non esse cibandum quando morbus statim in

vigore est, adeoque nullam esse faciendam mutationem: In altera dicit quando & quomodo ante vigorem vel remote ab eo cibandum, sive qualis in cibatione mutatio fieri debeat.

Pro morbi augmento vel remissione libranda est victus ratio. Cibus ergo tenuis exhibendus in summo morbi vigore: quanto autem morbus magis recedit à statu, tanto magis est cibandum, cum autem in principio magis recedat à statu, in principio magis erit cibandum, sensim tamen subtrahendo quo magis acceditur ad statum, observata virium tolerantia, ut nempe durare possit, ne morbus Naturæ fiat superior, meliusque est errare in excessu quam defectu. Hippocrates enim ipse 6. Epidem. dicit: *illos citius mori qui exquisitius vixerint*. Plenior victus, etiamsi æger velit, non promiscue concedendus, in febribus & aliis, ne alias verificetur illud: *plus oneras Baccho ventrem, quam Pallade mentem*.

Omnis vel concessio vel imminutio victus pleni debet per gradus & secundum naturam fieri.

Ad victum tenuem spectant etiam decocta aquosa, ad plenum vel quasi, syrapi. Nota victus acutorum ab Hipp. in tres classes dividitur: *extreme tenuissimum* & est sola inedia seu abstinencia à re nutriente: *tenuissimum*, estque potus hydromellitis, *tenuem*, & est cremor hordei, juscula substantifica cum vitello ovi & mica panis, poma, pruna, spinacchia. Primus nunquam conceditur, maxime Germanis, quia citius deficerent, quam morbus deficeret. Reliqui duo habent, sed cum discretionem, nempe in vigore nullatenus obruendus est æger, quia nemo potest duobus dominis servire, ita nec natura morbo & alimento, maxime si adsit cruditas & impuritas: *corpus enim impurum quo plus nutries, plus lades*. Velenim calor relicto morbo cibum coquet, vel relicto cibo morbum, utrumque est periculosum ut cuique patet. Itaque à duobus videtur in cibis exhibendis ratio & indicatio desumi ab Hippocrate, nimirum à virium constantia, & à morbi summo vigore, ut proinde cum vires constant & morbi status imminet, cibum subducendum velit: at vero imbecillis viribus & forte non duraturis ad morbi usque vigorem, pleniorum exhibendum. Quæ quidem omnia jam priori aphorismo deducta, clarissime parent; non est ergo, ut crambem recoquamus.

Dices: In vigore febris quartanæ non est tenui victu utendum,
ergo

ergo hic aphorismus non loquitur de omnibus morbis. R. Negando antecedens, nam in omni vigore tenui victu utendum est, non quidem æqualiter, sed in uno plus quam altero.

Dices II. Multi à principio per inediam morbos superant. R. hos morbos ad vigorem non pervenire, sed paulatim solvi ex bonitate naturæ.

Dices III. Impura corpora nutrire est lædere, ergo in principio non est alendum, quia cruditas augeret symptomata. R. non est alendum stomacho cruditatibus repleto concedo, neque etiam urgentibus symptomatibus, sed præmissis præmittendis.

Aphorismus XI.

In paroxysmis cibum subtrahere oportet, exhibere enim noxium, & quicunque morbi per periodos exacerbantur, in eorum paroxysmis subtrahere oportet.

Videatur etiam Aph. 19. qui est quasi idem.

Contentum & Intentio.

De victu in paroxysmis.

Connexio est, quia Hippocrates inhæret priori sententiæ, quomodo æger in, & extra paroxysmum cibandus.

Hic aphorismus duas habet partes: in prima dicit in accessibus esse abstinendum: in secunda enarrat damna quæ contingunt dum ægri cibantur in accessione; in prima agit universaliter, in secunda magis particulariter.

Prima aphorismi pars comprehendit accessiones seu paroxysmos febrium continuarum, altera vero pars continet invasiones febrium intermittentium, quæ per statutos circuitus redeunt, ut videre est ex Hipp. 4. de rat. victus in acut. 39.

Paroxysmi æquipollent morbis acutis, & statum repræsentant particularem. Unde æger cibandus non est, quo magis Natura

pugnat

pugnat & occupata est circa morbum, hoc autem fit in paroxysmo; ergo cibandum non est, ne ex uno malo plura fiant.

Hic nota: *Paroxysmi* seu accessiones, sunt exacerbationes incertæ morbi, in aliqua remissione constituti: idque in variis morbis, v. g. febribus, asthmate, epilepsia, hysterica passione, Colica &c.

Paroxysmus seu *circuitus* autem est reditus ejusdem morbi certo tempore factus, qui febribus intermittentibus & continuis est proprius: in illis est evidens, in his obscurus reditus seu accessio. *Quæres*: quando accessio est in febre continua vel intermittente, quando sit cibandus æger? R. In intermittente extra paroxysmum; in continua in vel post declinationem. In paroxysmis Archæus æque impetitur, licet transitorie, ac in morbi statu alio.

In paroxysmis Natura nec alimentis nec medicamentis actuandis sufficit, sed vel læditur facile, vel operationem differt, ut jam mox diximus: quia I. initiantibus paroxysmis, frigus sæpenumero corpus ægri excruciat, cum rigore vel horrore, & cor sive humoribus sive vaporibus infensis & adversis plurimum gravatur & angitur, unde si cibus tum temporis exhiberetur, graviora procul dubio hæc omnia evaderent cum majori febris incremento & non sine manifesto vitæ periculo. Unde 7. aph. 67. dicitur: *Cibum febricitantibus morbum fieri.* II. quia tunc Natura symptomatibus laceßita, non debet ingestis cibis opprimi, cum utrisque æque intenta esse non possit, eoque magis ingruente vigore in quo omnia evadunt fortiora. III. quia accessionis tempore morbificam causam agitari contingit, omnemque Naturæ conatum adversus eandem promoveri, unde cæteræ functiones quodammodo feriantur ac deficiunt, præsertim ea quæ in Ventriculo peragitur, cum in unam ciborum confectionem complures causas concurrere necesse sit, quæ per id tempus plurimum immutantur & languent, unde facillime evenit eos corrumpi potius & in alienam & dissentaneam substantiam degenerare, quam in alibilem humorem verti & commutari, potissimum in confluxu succorum è pancreate & cysti fellea derivantium, qui in febribus fere semper depravantur, & à naturali & convenienti conditione plurimum recedunt. Quod hætenus diximus de cibis idipsum, ut innuimus, intelligendum est de medicamentis, & longe magis, si ægrum exagitent & turbent, inde enim vires imminui, sanguinem liquari, viscera infici aut proritari contingit:

Pro-

Proinde idem Hipp. 1. & 4. de rat. victus, consuluit nec sorbitionem nec aliud quicquam exhibendum, priusquam calor ad pedes descenderit & cor reliquerit. Nec potus tamen omnis sitientibus denegandus.

In Paroxysmis non denegandus penitus omnis cibus, magis vero respective & ordinarie detrahendum quam addendum; unde etiam in ipso paroxysmo, præsertim in initio teste Galen. 10. Meth. cap. 3. & 4. cibandus æger Picrocholus, vel juvenis, vel senex, si vires deficient & animi deliquia urgeant, maxime in febribus subintrantibus, sed tunc dandum alimentum medicamento sum.

Quæres an ergo nulla possint dari medicamenta in paroxysmo? R. Vomitoria, purgantia, venæsectio, si natura & morbus ea insinuet, ita & clysteres.

Nota: Hipp. in prima aphorismi parte intelligit accessiones febrium continuarum: in secunda, febrium intermittentium, ut jam supra fusiùs diximus.

Præstat in febribus etiam ante paroxysmum subtrahere, quam ordinario vel pleniori victu uti.

Dices: in summa peste licet ægros cibare, ergo etiam in paroxysmo. R. licet sit in summa peste major debilitas quam in paroxysmo, tamen licet cibare, quia pestis est morbus malignus, non humoralis, adeoque non est periculum ne humores augeantur, per cibum autem malignitas obtunditur.

Quod diximus de febribus, eadem prorsus aptanda cæteris morbis qui per circuitus exacerbari solent, ut sunt catarrhi, hemicrania, colica, melancholia hypochondriaca, calculus, podagra, vertigo, palpitationes, passionēs hystericae, & similes ut docet Galen. Cardanus, Heurnius.

Aphorismus XII.

*Paroxysmos vero & constitutiones indicabunt morbi
& anni tempora, & periodorum ad se mutuo in-
crementa: sive quotidie, sive alternis diebus, sive
ex longiore fiant intervallo: quin etiam per ea
quæ*

qua juxta apparent, eadem indicantur, velut in pleuritide laborantibus, si sputum statim appareat inter initia, eam abbreviat: si vero postea appareat, producit: urinæ quoque & alvi excrementa & sudores, cum apparuerint, judicatu faciles vel difficiles, & breves vel longos fore morbos indicant.

Contentum seu Intentio.

De typo & phænomenis, morborum indicis.

C*onnexio:* in priori docuit modum cibandi in accessionibus, in hoc signa tradit, quibus accessiones, statum seu vigorem, & constitutionem dignoscere possimus. Hic aphorismus duas habet partes: In prima ponit signa per quæ Medicus universale & particulare morbi tempus cognoscit: in altera vero signa, per quæ & tempus universale morbi & illius exitus deprehenditur. Cum enim ex *Galen. in Comment.* tria sint considerata in victu rite exhibendo, *vires* nempe, *accessiones*, & *vigores morborum*, vel citius vel serius futuri, idcirco omis- sis indicis virium, de quibus supra diximus, reliquum erat, ut traderet signa prænoscentiarum accessionum & constitutionum morborum, quæ in hoc aphorismo commemorans, ad quatuor classes revocat; at- que alia desumit ab ipsis morbis, alia ab anni temporibus, quædam ex circuituum incrementis, inter se invicem collatis, & demum pleraque alia ab his quæ mox apparent.

Morborum quorundam velut essentielle est, paroxysmos velut totidem insultus, exhibere; Nota: *constitutio* hic significat tempus universale morbi, an breve vel longum, an morbus acutus, vel chroni- cus. *Accessio* dicit tempus particulare, quo invadit: sic tempus uni- versale est longum in chronicis morbis v. g. hydrope, quartana, poda- gra &c. In phrenitide, febre ardente &c. breve. Ex anni temporibus metiri paroxysmos, ex paroxysmis distinguere morbum, integrum est: sic æstas ponit morbos ac vigores breves, hyems longos, ut de quartana testatur infra Hippocrates 2. aph. 23. Sic etiam si accessio- nes

nes majores vel minores sunt, item si anticipent vel postponant, morbus major vel minor, longior vel brevior judicatur. In æstate sunt succi tenues, in hyeme lenti & crassi.

Typus paroxysmorum cum reliquis collatus, morborum, & februm maxime genium patefacit: unde si paroxysmi fuerint crebri, alternis vel singulis diebus accedentes, non diu durent, morbum brevem juxta Hipp. 4. aph. 59. *febris tertiana exquisita septem circuitibus terminari solet.* Sin è contra, longum ostendunt.

Ex febribus intermittentibus quotidiana, tertiana, quartana, præprimis sunt ordinariæ.

Non omnis quotidiana est quotidiana, nec omnis tertiana, tertiana, variant enim causæ ita & febres, ut legitimæ quæ tales esse nequeant.

Phænomena morborum, eorundem statum manifestant absolute & relative: sic si sit angina, apoplexia, febris ardens, erit morbus brevis; si hydrops, scirrhus &c. longus.

Phænomena morborum alia communia, alia propria, exquisita & spuria, diagnosin & prognosin eorundem variant. Sic proprium signum in pleuritide est punctura lateris, febris, tussis, & si illa sint initia, brevem, si fortia, longum morbum denotant & periculosum.

Signa spuria sunt quæ accidentaliter superveniunt morbo, & de natura ejus non sunt: v. g. deliria, convulsiones, quæ morbum magnum vel parvum indicant, vel crisin, vel durationem.

Sic etiam ex urina, facibus & sudoribus, cum variis modis à statu naturali recedant, cruda vel cocta sint, morbi magnitudinem, vel parvitatem denotant; & hæc sunt quæ mox apparent ut supra diximus, quia ista non semper à principio, sed vel in augmento vel statu comparent, ad differentiam assidentium signorum, quæ statim ab initio cum morbo conjunguntur: exemplum est sputum in morbo laterali, illud enim in initio deesse solet, at vero in statu comparet, & quo citius comparuerit, eo brevior morbus erit. Sic etiam signa concoctionis, sudoris &c.

Quæ vero de urinis memorantur à Medicis, sæpissime fallunt, præsertim quia nuperis observationibus Anatomicis compertum est, non omnem urinæ materiam una cum sanguine permanere, neque per venas emulgentes dictas in renes derivari, ibique secerni, ut à Veteribus proditum est, sed per compendiosiores vias quas *Pecquetus* & *Bartholinus* primi indicarunt, ad renes, ureteres & vesicam deferri;

E

quod

quod vel hinc etiam constare potest, quia ubi quis asparagos, aliaque olera diuresim moventia, vel etiam terebinthinam assumpserit, statim urinam egerat peculiari odore & colore inquinatam; quin & in potu quarundam aquarum thermalium mox statim mictum promoveri observamus, atque epotas aquas vix ac ne vix quidem immutatas excerni. Unde conjecturae ab urina, quae venarum exploratrix fida antiquitus credebatur, desumptae, fallacissimae evadunt.

Aphorismus XIII.

Senes facillime jejunium ferunt, deinde qui constanti sunt aetate, minime adolescentes, ex omnibus vero praecipue pueri, praesertim illi, qui inter ipsos sunt vividiores.

Contentum & Intentio.

De victu secundum aetates.

Connexio: In prioribus aphorismis dixit de victu in morbis, accessionibus, anni temporibus: hic loquitur de victu aetatum, qui uni vel alteri conveniat. Hic aphorismus posset dividi in quatuor partes, juxta quatuor aetates, quas ad invicem comparat, quamvis ex omnibus una conclusio fieri possit: nempe corpora, quo fuerint generationi propinquiora, minus jejunium ferunt. Inter expositores hujus aphorismi non convenit, num de sanis an de aëgris per aetatum differentias, scriptus sit hic aphorismus; siquidem nonnulli existimant, Hippocratem haëtenus locutum fuisse de ratione victus aëgrorum, impoëterum de victu sanorum, ad aphorismum usque vigesimum sermonem instituere. Alii vero de victu aëgris solum per aetates praëscribendo canones hic descripsisse contendunt, cum non omnes aëque jejunium & summam dietam sufferant, propter virium & corporis diversam habitudinem; adolescentium enim corpora robustissima sunt, debilissima vero senum & puerorum. Verum quaecunque demum sit mens Hippocratis in hoc aph. id tamen certum erit, peculiarem aetatum rationem hic illum habere voluisse in victus administra-

nistratione; ideo senes ait facillime jejunium ferre, deinde in ætate consistenti constitutos, minus juvenes & adolescentes, minime omnium pueros, atque inter hos qui vividiores & agiliores sunt.

Pro statu & gradu calidi dissipantis variat appetitus tum absolute, tum comparate: unde quo seniores sunt, eo facilius jejunium ferunt; hinc in sequenti aph. 14. dicit: senibus parum calidi innati inest, parum nutriuntur, & parum consumunt, quare copiosa restauratione non egent, quia calor debilis & extinctioni proximus, à quantitate cibi suffocaretur per modum flammæ debilis, à nimio lignorum cumulo: Senum partes sunt duræ, aridæ, non amplius attrahunt alimentum, & ideo à jejunio non ita læduntur, quia tardissime parum conficiunt. Contra fit in pueris, qui plurimum habent calidi innati, plurimo egent alimento, ut patet ex sequenti aphorismo.

Ætates sunt quatuor, alii magis accurate ponunt sex (prout magis vel minus subdividunt) *Pueritia*, à die generationis, usque ad *pubertatem*, id est 14. annum: quando semen erumpit, vel menstruum, incipit *Adolescentia*; deinde *Iuventus* quæ durat quamdiu crescit ad 33. annum vel 40. *ætas consistens* à 40. ad 50. ubi nec crescit nec decrescit. Postea *Senectus* ubi decrescit & durat ad finem vitæ, estque duplex, *prima* & *decrepita*: & de hac decrepita non loquitur aphorismus, quia hi in ediam ferre nequeunt, quia penitus deficerent.

Tantum ergo senibus edendum ut vires reficiantur, non opprimantur. Ætates autem variant juxta diversitatem & bonitatem naturæ, alii citius alii tardius pubescunt & senescunt: Non minus & pro statu humidi, ad nutrimentum corpori impendendi necessarii.

Quo ergo calor est vegetior & humidum magis impenditur, eo magis urget appetitus, & contra.

In senibus acidum fixius, in pueris *ἰσχυρὰ* seu potentia eundem variant calorem.

Dices. Senes sunt sicci, ergo non ferunt jejunium. *R.* Sunt sicci quoad continentia, humidi vero quoad contenta, ideo sunt sicci ob consumptionem humidi radicalis, humidi vero propter humores pituitosos contentos, quibus abundant.

Aphorismus XIV.

Qui crescunt plurimum habent calidi innati, plurimo igitur egent alimento, alioquin corpus absumitur: Senibus vero parum calidi innati inest; paucis propterea fomitibus indigent, quia à multis id exstingitur: hanc etiam ob causam febres senibus non perinde acutæ fiunt, frigidum enim eorum corpus.

Contentum & Intentio.

De ratione victus senum & puerorum.

Connexio: Hic aphorismus prioris rationem & causam exponit, & quoad primam partem cum priore convenit. Hic aphorismus in duas partes dividitur: in prima ut diximus, repetuntur eadem quæ in priori, nempe juvenes difficulter, senes autem facile jejunium ferunt: in altera probat sequenti argumento: Tantum corpori est suggerendum de alimentis, quantum & opus habet & ferre ac subigere potest: cum autem crescentes plurimum habeant calidi innati, ii magis sunt nutriendi, & quo vivaciores, eo plus, cum vivacitas sit signum caloris copiosi & intensi.

Calidum innatum est idem quod spiritus innatus, una cum sanguine, tanquam forma & subjectum simul, hoc est in concreto sumptum, de quo fusc tractavimus in Institutionibus.

Alimenta sunt calidi & humidi continuo reparandi materia.

In senibus sanguis & spiritus pauciores, sulphur depresso, humidum minus balsamicum, magis vero acetosum, temperiem frigidam & siccam inferunt.

Febres pueris & adolescentibus minus periculosa; juvenibus & viris frequentiores & periculosiores, senibus rariores sed frequentius lethales, juxta illud: minus periculosi sunt morbi cognati quam dissimiles.

Dices: Plus in juvenibus digeritur quam in pueris, ergo plus nutrimenti requiritur. *R.* Plus digeritur in juvenibus spectata proportio-

portione vel comparatione corporum concedo, absolute nego: Si enim corpora æque magna essent in pueris ac in juvenibus, plus nutrentur & plus digererent.

Dices II. Qui habent frigidum stomachum plerumque plus appetunt, & minus jejunium ferunt, sed senes habent frigidum stomachum, ergo. R. Si una cum frigido stomacho reliqua viscera sint calida concedo, si minus nego. Et nego etiam illam antipraxiam viscerum dari, cum Neotericis. Vid. Praxim meam de hoc.

Aphorismus XV.

Ventres hyeme & vere natura calidissimi sunt, & somni longissimi, per ea igitur tempora, copiosiora alimenta sunt exhibenda, siquidem calidi innati plus habent, unde & copiosiore indigent alimento; indicio sunt ætates & Athletæ.

Contentum seu Intentio.

De victu, ratione hyemis & Veris.

Connexio: In prioribus egit de cibandi ratione ætatum, in hoc agit de cibandi ratione in anni temporibus. Hic aphorismus duas habet partes: in prima suam thesim ponit dicens: ventres hyeme & vere, natura calidissimi: in secunda probat per exemplum ætatum, & Athletarum, qui plurimum alimenti ideo requirunt, quia calido innato plurimum abundant.

Quibus temporibus calor magis viget, & somnus est longior, plus alimenti consumitur, adeoque plus suggerendum est: somnus enim longior subactionem ciborum etiam juvat.

Hyeme stringuntur magis fibræ nerveæ, & acuuntur spiritus; Vere moderate laxantur: utrobique calor est sibi magis relictus; experientia constat, fermentorum & caloris nativi operationes, hyeme & vere esse potentissimas:

Si appetitus instrumentum sit sal acidum nitrosum, hoc in aëre

hyemali copiose delitescit. Sic pura vitalis lymp̃ha eodem tempore copiose stomacho suppeditatur. In hyeme appetitus comedendi est quasi duplex: unde proverbium, hyeme duobus coquis, uno cellario, æstate duobus cellariis & uno coquo opus esse.

Dices: In hyeme plus pituitæ generatur. *℞.* Quia etiam plus comeditur, & sic quandoque etiam non digeritur.

Nota: per ventres intelliguntur omnes partes, caput, pectus &c. Quo melior somnus, eo melior coctio & appetitus, somnus optimus coquus est & appellatur.

Pro ætheris & motus quoque ratione diversa, modificatur & variat etiam caloris ratio, pro caloris vero, alimenti.

Nota: anni tempora quatuor ab Astrologis numerari, juxta quatuor Zodiaci puncta: Duo scilicet æquinoctia quæ faciunt ver & autumnum: duo Solstitia quæ constituunt hyemem & æstatem. Æquinoctium unum est vernum, alterum autumnale. Solstitium unum æstivum alterum hyemale. In illo est Sol altissimus: in hoc profundissimus quoad nos.

Dices: Quo plus resolvitur in corpore, tanto magis alendum, sed in æstate plus resolvitur ut patet ex frequentibus sudoribus. *℞.* Quanto plus resolvitur à calore innato, tanto magis est nutriendum concedo, à calore extraneo nego. Calor enim extraneus in febribus plurimum resolvit, nec tamen ob id febricitantes sunt alendi.

Dices II. Quo major est calor in corpore, eo minor est somnus, sed in hyeme major est calor, ergo. *℞.* Quo major est calor absque humiditate, id est calor extraneus concedo: cum humiditate seu calor innatus, nego. Calor enim innatus facit ad concoctionem, humiditas ad somnum.

Quæres, utrum omnes sudores sint præter naturam, juxta illud: ubi sudor, ibi morbus. *℞.* Etiam sudores præcipue criticos à calore innato expelli, ergo sunt naturales, sicut urina per renes, & excrementa per alvum. Non ergo est universalis illa sententia, ubi sudor ibi morbus, sed tantum in statu præternaturali.

Dices III. Si ventres hyeme essent calidissimi, sequeretur quod etiam in hyeme essent plures febres quam æstate. *℞.* Negando hanc sequelam, calor enim innatus qui hyeme dominatur, non fabricat febres sicut æstivus extraneus, qui vere destructivus est.

Dices IV.

Dices IV. Ventres frigidi plurimum appetunt, ergo si vētres essent æstate frigidiores, plurimum appeterent, sed fit contrarium. & Veram appetentiam à calore innato provenire, ab extraneo vero dejici. Si autem frigiditas appetentiam excitat ut in hydropicis & quartanariis, non est naturalis appetentia.

Quares: cur pulsus non est frequentior in hyeme quam æstate, cum major est calor in corpore. & Quia non est usus auctus, sed abundantia caloris innati, qualis est in hyeme: ubi autem non est usus auctus, non opus est ut pulsus sit frequentior.

Aphorismus XVI.

Victus humidus febricitantibus omnibus convenit, maxime vero pueris, & aliis qui tali victu uti consueverunt.

Contentum seu Intentio.

De victu humido.

Connexio: In priori aph. agit de quantitate victus juxta anni tempora, in hoc agit de victu febricitantium & aliorum. Hic aphorismus duas habet partes: in prima præscribit febricitantibus victum: in secunda pueris & aliis.

In febribus, potu & humectantibus frustra & majori fere noxa ægris interdicitur. Per humidum non tantum intelligitur quod actu est tale, sed etiam potentia, id est fluidum & potabile & non solidum, sed facilis distributionis, lacteasque venas facile transeat. Quale est ptisana & ejus cremor, humida enim non tantum ideo prosunt quod humectent, sed etiam quod facile concoquantur & distribuuntur, calori resistent, vias aperiant, incidant, attenuent & roborent: humido enim vivimus & nutrimur: humida enim facile uniuntur substantiæ aliti: hinc bene dicit Hippocrates 2. aph. 11. *facilius est refici potu* (id est alimento liquido) *quam cibo*, id & alimento duro est solido. Neque tamen largiori humectationi indulgendum, unde dispositio ad cachexiam & tumorem pedum invehitur. Sed

Quæ

Quæres: cur non etiam frigidum sed tantum humidum cibum commendaverit Hippocrates? cum calori magis contrarietur frigiditas quam humiditas? *ꝛ.* Quia non ab indicatione curandi febrem per contrarias qualitates, sed à viribus reficiendis, & à facilitate & promptitudine coctionis & distributionis, victus humidus ab Hipp. præscriptus est, veluti conducibilior febricitantibus.

Febribus intermittentibus aperientia, humectantia; continuis temperantia & demulcentia optima.

Quo magis ætas, Regio, consuetudo, temperamentum & tempus anni id jubet, eo magis in febribus humectandum est; uno verbo: servanda est hic illa regula, ut similibus similia conserventur, & contraria contrariis curentur: febricitantes enim ab incendio febrili multum exsiccati, victu humido indigent, ut substantia à febre absumpta iterum resarciatur, idque jusculis & humidis, de quibus Poëta:

Jurista & Medicus sunt Juris uterque peritus,

Hic ægros, alter Jure tuetur agros.

Jus dare cuique suum didicit Legista clienti

Ægroto Medicus Jus dare cuique suum.

Jus Legistarum quid differat à Medicorum

Jure rogas? siccum est istud, at hoc liquidum.

Unde hic vere verificatur illud: contraria contrariis curantur.

Sic pueri è contra temperamento humido præditi per similia, id est victum humidum conservandi: & hæc est ratio cur vix nati solo lacte materno utamur.

Aves etiam semina prius in stomacho emolliunt, antequam ex ore juvenibus porrigunt.

In febribus continuis maxima lymphæ ratio habenda est, ne plus justo ineoquatur sanguini, & deficiat.

Dices: Multi in febribus sæpe adhibent, zinziber, piper, spiritum vini &c. ergo. *ꝛ.* Hæc adhibentur non ratione febris, sed ratione causæ morbi, quæ sæpe est pituita, crassi & crudi humores, putredo & obstructio, quæ per talia corrigitur.

Dices: Frigidum potius quam humidum victum opponere debuisset Hippocrates. *ꝛ.* Hippocrates brevitatis amator unius tantum contrarii mentionem fecit, alterum subintelligendo implicite, nempe frigidum.

Dices II.

Dices II. In febre cum hydrope, & in febre maligna non convenit victus humidus; sic nec febribus ab obstructione. *℞.* Hippocratem hic loqui de febribus simplicibus, non vero complicatis cum aliis morbis. *℞.* II. Non convenire febrei nego, morbo cum febre juncto concedo.

Instabis: in febre quotidiana à pituita vel quartana non competunt humectantia. *℞.* Ratione febris non convenit, nego, ratione causæ concedo. Causæ enim debentur remedia, dum morbus est in fieri, ipsi morbo vero dum est in facto esse.

Dices III. Victus humidus non videtur convenire febribus putridis, quia putredo provenit à calore & humiditate. *℞.* Ratione causæ concedo, ratione morbi nego.

Dices IV. Sape à principio in febribus nulla adest siccitas, ergo non convenit humidum. *℞.* Si febris est in fieri concedo, in facto esse nego.

Aphorismus XVII.

Et quibus semel aut bis, plura aut pauciora, & per partes offerre oportet, considerandum; concedendum autem aliquid tempestati anni, regioni, ætati, & consuetudini.

Contentum seu Intentio.

De offerendorum modulo.

Connexio: In priori aphorismo non sufficit dixisse victum humidum convenire: sed in hoc bimembri aphorismo docet I. tempus, an semel aut sæpius qualibet die vel nocte, plus vel minus, una vel pluribus vicibus sit exhibendus. II. Addit ea quæ faciunt ad ejus observationem v. g. consuetudo, anni tempus, regio & ætas, juxta illud Scholæ Salernitanæ:

Quale, quid, & quando, quantum, quoties, ubi, recte
Debent hæc Medico in victus ratione notari.

Unde non sufficit Medico scire quo victu, an tenui, pleno, hu-
F mido,

mido, sicco &c. æger tractandus, sed quoque modus & tempus cibandi observandum.

Tripliciter cibus adjici vel detrahi potest: *Adjici I. in quantitate*, id est dando plus. *II. In tempore*, id est dando sæpius. *III. In qualitate*, id est dando cibum copiosi nutrimenti. *Detrahi*: dando *parum, raro*, & pauci nutrimenti.

Definiendo victui, in quantitate continua & discreta, virium & morbi ratio principaliter inserviunt: an nempe vires durent ad vigorem morbi. Prima ergo indicatis semper à viribus sumenda est, pro illarum ergo ratione cibi erunt offerendi; & quidem parum alimenti sed sæpius exhibendum, præsertim cum ægri vires debiles fuerint: quippe languidæ vires, etsi restauratione egeant, multum tamen alimenti sufferre nequeunt, à quo potius obrutæ succumberent, quam increfcerent; alimentum autem parum & sæpe exhibitum æquivalet morbo. *Dicimus parum, & sæpe*, id est nullus debet esse defectus. Nihilominus tamen, ut innuit Hippocrates, aliquid indulgendum est tempori, Regioni, ætati, consuetudini.

Ut in victu, sic & in medicamentis pluribus vel paucioribus propinandis eadem sequendæ regulæ.

Victus & medicamentorum rationem ab essentialibus indicatam limitant imprimis res naturales. v. g. temperamentum, ætas, regio &c. Rationi congrua visa alium sæpe adsciscunt modum ab his ipsis penitus consideratis cibandi ægrum. Sic in Regionibus variis, aeris aut aquarum ratione, cibi facilius & citius concoquantur, vel contra difficilius & tarde.

Consuetudo ad res naturales merito referenda, quia consuetudo est altera natura. Alii enim sunt assueti multum, alii parum comedere: alii sæpe, alii raro. In hyeme raro & multum, quia tunc ut diximus supra, ventres sunt validiores, unde homines magis appetunt & melius digerunt, quia vero multam ciborum copiam, non nisi post longius tempus possunt conficere, propterea rarius alendi sunt ægri in hyeme. In vere & autumnò minus & raro, cum eo tempore tonus virium & ventriculi mediocriter se habent. In æstate sæpe & rarum, copiosioribus & humentibus ob ventriculi & virium languorem, ciborum multitudo minus toleratur, idcirco parcius sed sæpius alendum, ne vires alimenti paucitate deficiant. Pueris & adolescen-

lescentibus sæpe & plus quam senibus; sic pariter qui consueti frequentiores & abundantiores cibos sumere, sæpe & plus dare oportet. Ita quoque *graciles*, copiosioribus & humentibus; *obesi* vero tenuioribus & extenuantibus; *Carnosi* solidioribus & moderatis nutriendi. Septentrionalibus plus, Meridionalibus minus.

Dices: In morbis à corruptione ortis non videtur convenire plenior victus ob impuritatem quæ adest. *℞*. Nos intelligere corruptionem sanguinis quæ est in fieri, sicut enim vinum quod incipit acescere corrigitur reassumpto alio, ita etiam sanguis recenti adveniente corrigitur.

Instabis: Si novus sanguis affundatur in corruptione quæ provenit à repletionem, fiet major corruptio. *℞*. Si sit plethora seu repletio ad vasa concedo, ad vires nego.

Aphorismus XIIIX.

Æstate & autumno cibos difficillime ferunt, hyeme facillime, deinde vere.

Contentum & Intentio.

De victu ratione æstatis & autumnii.

C*onnexio*: In præcedenti aph. dixit quantum & quoties cibandum: hic particulariter ad quatuor anni tempora, quando difficulter & facile admittatur. Unde hic aphorismus duas habet partes: in prima dicit æstate & autumno cibos difficillime: In secunda in vere & hyeme facilius ferri. Hujus aphorismi causam & rationem prodidit divus Senex in aphorismo decimo quinto.

Pro diverso anni tempore variat appetitus, & consequenter ciborum exhibitio; unde Hippocrates in præcedenti aphorismo bene dixit, condonandum aliquid esse anni tempori, Regioni, & consuetudini. Calore magis exoluto vel gravato, minus commode appetitus & coctio, etiam quoad tempora anni fit.

Æstivo tempore major fit lymphæ difflatio, unde potus largior quam cibus appetitur.

Æstivo & autumnali tempore errores diætæ quoad repletionem facilius nocent, non tantum in præsens sed & in futurum: æstate enim calor externus internum à corporis centro ad superficiem non tantum attrahit, sed plurimum de eo resolvit; humores omnes fiunt alcalini & fervidi, acidum esurinum deprimitur. Idipsum in autumnoc fit, in quo calor naturalis ob præviam æstatem, omnino debilis efficitur. E contra in hyeme ut dixit 1. aph. 15. ventres hyeme & vere sunt calidissimi, ergo cibi facilius tolerantur. In aphorismo 15. locutus est de sanis, hic loquitur de ægris; ibi locutus est de quantitate, hic de partitione; ibi continetur causa plus aut minus nutriendi, hic vero de tolerantia majori vel minori.

Dices: Tunc facilius toleratur plenitudo, quando calor est vegetior, sed in hyeme est, ergo. R. Nego maiorem: quia plenitudo est objectum improporionatum caloris.

Dices II. In autumnoc sunt chronici morbi, quibus competit plenus victus, ergo facilius toleratur. R. Alius victus competit morbis, alius tempori.

Dices III. In æstaté plus resolvitur quam hyeme, ergo plus cibi requiritur. R. Plus resolvitur à calore extraneo concedo, ab innato nego, & nego consequentiam; calor enim extraneus dissipat innatum.

Aphorismus XIX.

Quibus per circuitus accessiones contingunt, nihil dato, neque cogito, sed de cibis ante judicationes detrahito.

Contentum seu Intentio.

De modulo victus in paroxysmis.

Connexio: In priori aph. dixit de partitione cibi inter anni tempora: hic autem repetit aph. 11. ubi dixit: in accessionibus abstinere oportet &c. In aphorismo 11. locutus est universaliter, hic vero loquitur particulariter, nempe de morbis qui ordinate suos habent circuitus, ut sunt febres ordinatæ, non vero erraticæ.

Duas

Duas habet partes aphorismus: in prima vetat cibrationes in accessionibus: in secunda, etiam prohibet cibos ante mutationes seu crises, quæ plerumque fiunt in accessionibus.

Quamvis quidem in hoc aphorismo indefinite scribat Hippocrates; *iis quibus per circuitus accessiones contingunt*; adeoque videatur quamcunque morbi accessionem periodicam complecti, specialius tamen intelligit recurrentes febrium invasiones, quæ à Galen. lib. de tempore morborum cap. 6. divisit in *accessiones & remissiones*: & rursus *accessiones* in principium, in æqualitatem, augmentum & statum: *remissiones* vero in declinationem & intervallum. Statis enim paroxysmis & exacerbatione quavis, natura maxime affligitur.

Ubicunque ergo vacare nequit ordinariæ actioni, nec appetit, præstat abstinere, id est in principio, in æqualitate, augmento & statu; in declinatione vero & intervallo posse tuto exhibere cibum: rationes omnium jam in superioribus sunt data.

Coactiva remedia etiam diætetica, quæ natura invita & renuente fiunt, magis damnosa quam proficua.

Consultum est aliquando plane abstinere & quiescere ut in paroxysmis, aliquando tantum detrahere.

Natura occupata circa crisin, roboranda quidem medicamentis accommodis & cibis, sed non oneranda est. At vero si stomachi languor urgeat, vel Syncope immineat, non nihil tamen pro viribus offerendum instante etiam paroxysmo, ut jam alibi diximus: ubi vero vigor & status accessionis adest, bene monet Hippocrates, non cogendos esse ægrotantes ad sumendum cibum ante judicationem, id est ante crisin, ne impediatur, hoc enim tempore particulares crises disponuntur, præsertim vero sudores, qui à cibo impediti, indubitanter nocent, imo cum interitu ægri accidunt: Unde tali tempore dum status adest aut crisis instat, nulla ratione cogendi sunt ad cibum, cum ut docet Hipp. 2 aph. 13. *quotiescunque crisis fit, iis nox gravis ante accessionem esse solet*; ideoque nec cibis appetitur, ergo multo minus cogendi ut cibum sumant; quemadmodum plerisque fieri solet, qui ægros vel invitos compellunt epulari, ut pugnam cum morbo, ut ipsi dicunt, strenue possint sustinere: prudentius facerent monente Hippocrate, non tantum non cogere, sed potius detrahere, id est ex priori & consueto cibo aliquid demere, & proxime tenuissimo victui accedere, ne

futura crisis impediatur, & interturbetur, ut videre est 4.aph. 63. Non loquimur autem hic de integra & omnimoda subtractione, id est inedia, qua ægri summum vitæ periculum subirent, essetque hoc Hippocratis documentum ad perniciem potius quam ad salutem indictum.

Quæres: à quo proveniat vere circuituum determinata repetitio? *R.* Plerique ab astris dicunt provenire. *Galenus* dicit fieri à natura irritata ad humorum expulsionem, à putredinali humorum qualitate seu proprietate periodice illi superveniente, & sanguini aliunde suppeditata; quæ in sanguine existens in quolibet paroxysmo ejicitur, idque quandoque omni die, vel tertio, vel quarto. Et hæc est sententia Veterum & Recentiorum.

Alii refundunt ad motum humorum: & cum pituita sit copiosa in ventriculo & prima regione quotidie cordi communicata, quotidianam efficit: Bilis cum sit pauca sed facile mobilis, tertianam: melancholia quia pauca & lenta difficulter mobilis, quartanam producit.

Aphorismus XX.

Quæ judicantur & judicata sunt perfecte, ne moveto, neque innovato sive purgantibus medicamentis, sive aliis irritamentis, sed finito.

Contentum & Intentio.

De regimine Criseos.

Connexio: dixit supra Hippocrates aph. 2. & 3. de quantitate & qualitate evacuationis, interpositis aliis aphorismis de variis cibandi rationibus; in hoc docet an & quando Medicus evacuare debeat nec ne: præsertim quando natura critice, bene & perfecte agit.

Hic ergo aphorismus nullas habet partes sed una conclusione, ut jam diximus, textum suum absolvit. Dicit ergo Hipp. mox à principio quæ judicantur, id est quæ salubriter à victrice Natura convenienter morbificam causam expellente peraguntur; *judicium enim seu crisis* teste *Galen.* comment. 13. lib. 2. Aph. est repentina mutatio morbi,

bi, ad salutem vel mortem: mutatio autem quæ paulatim fit, non est crisis, sed solutio seu coctio. Crisis ergo fit Natura separante à bonis mala, atque ea ad evacuationem disponente: subita quippe ut diximus esse debet, & tota causa morbifica simul expelli, vel saltem ad ignobiles partes transferri.

Nihil magis Naturæ circa crisin occupatæ nocet, quam purgantia.

Natura bene agens in opere suo nunquam turbanda. In crisi perfecta Medicus spectator seu minister esse debet magis quam turbator. Nam natura morbo superior facta, assistentia Medici non indiget: Unde in hoc casu nulla medicina est inter omnes optima; teste Livio dicente: Medici interdum plus quiescendo quam agendo proficiunt: & Poëta:

Non semper scriptis cedunt mala dira Receptis
Sæpius utilior charta bianca fuit.

Hinc non inepte *Galenus* comparat Medicum perito Nauclero, qui opportunis temporibus vela aptat & demittit; præposterus enim illorum usus profecto naufragium pareret. Hinc patet quam longissime à ratione & recta methodo medendi Hippocratis & Galeni, deflectant ii, qui quo tempore Natura crisin aggreditur & labores ingentes subit, in ipso morbi vigore, ægrum importuna remediorum multitudine ac varietate obruunt, & ne parum solliciti ac diligentes videantur, ipsam vexant, atque à proprio & salutari munere distrahunt, immemores illam esse morborum Medicatricem.

In hoc casu enim, natura bene operante purgantium motus, cum caloris naturalis & spirituum assistentiam requirat, sic advocatis ab expulsiōe morbi Naturæ principali instrumentis, corpus in limine sanitatis jam constitutum, temerarie alio avocatur. quare nec promovere nec turbare, nec distrahere aut impedire illam nullo modo & Medico licet, sed ut addit Hippocrates; *sinere oportet*. Neque etiam post perfectam crisin aliquid movendum, quia ut dicit Hipp. *judicata sunt integre*: & ex hac nil morbi in corpore relinquitur, ideoque nec Medico ulla superest purgandi indicatio. hinc Poëta:

Judicio facto nacta est curatio finem
Unde quis appellet, nemo tribunal habet.

Signa criseos præcipua sunt hæc tria: signa concoctionis in urina: nox præcedens inquieta: euphoria seu tolerantia, seu alleviatio. Crisis imperfecta & perfecta excedens ut & fiens, à Medico dirigi, juvari, corrigi debet; ut in sudore, hamorrhagia imperfecta, facta vero non temere turbanda. Imperfectæ autem crises, seu judicationes fiunt, vel ob virium languorem, vel ob morbificæ causæ repugnantiam, aut ob viarum per quas motiones & evacuationes tentantur, impedimenta, præter ea quæ ex erroribus Medici vel agri proficiscuntur. quæ omnia cum naturæ impedimento sint, totis viribus per congruentia & opportuna remedia, prudens Medicus remove conetur. Quoniam vero specialius crises distrahi & impediri possunt, usu medicamento-
rum vel *evacuantium* vel *irritantium*; propterea dicitur in aphorismo, *sive medicamentis sive aliter irritando*: Hæc ergo duo duntaxat medicamentorum genera potissimum norantur: excipiuntur autem quæ naturam non turbant, sed roborant, ut efficacius inchoatum opus perficiat: Sic in ipsa, etiam crisi ad reficiendas vires tutissime exhibentur cordialia, quorum farago passim apud Autores habetur.

Sed *dices*: huic sententiæ obstare videtur sequens aphorismus, quo admonet Hippocrates eo ducere oportere vitiosos humores, *quo natura vergit per loca conferentia*: unde infertur licere Medico congrua adhibere remedia, quæ crisin per loca conferentia adjuvent ac promoveant.

R. nullam in Hippocrate inveniri contradictionem, si consideremus hic crisin integram & perfectam memorari, ut patet ex verbo *integre*, id est perfecte, ut etiam notat *Galenus* in commentario: In sequenti autem aphorismo, agit de crisi imperfecta, qua non ex integro morbifica causa depellitur, ut propterea opus Medicum exquiratur. Quare Avicenna prima 4. in unum recolligens, ambas has Hippocratis sententias dixit: *Si Natura non movet, move tu motu ejus, at si ipsa movet, & actu movet, dimitte eam & operationem ejus.*

Quæ imperfecte sunt judicata, nisi corrigantur, facile recidivam patiuntur, ut testatur 2. aph. 12. In hoc casu lene purgans prodest. Plura de crisibus videantur in Institutionibus.

Aphorismus XXI.

Quæ educere oportet, quo maxime vergunt, eo ducenda, per loca convenientia.

Contentum & Intentio.

De loco evacuandorum.

C*onnexio:* in priori dixit an & quando evacuandum, nec ne: in hoc locum evacuationis aptum docet.

Non solum addendo & roborando, sed etiam expellendo & evacuando, naturæ succurrendum est. Sicut autem in priori dixit, quæ judicantur & judicata sunt integre, neque movere, neque novare oportet, sed sinere; ita in hoc aph. dicit, cum imperfecte moventur aut mota sunt, toto conatu adjuvare expediet, ut propterea hic aphorismus sit veluti appendix præcedentis, cumque imperfecte judicata à Natura, sint arte perficienda, ut omnino causa morbi depellatur, & morbus ipse plane desinat, docet nunc Hippocrates, per eadem loca, quæ natura ipsa indicaverit, esse promovendam totius causæ morbificæ evacuationem. Hinc tria potissimum videntur hoc aphorismo comprehensa: *Primum* oportere Medicum arte perficere quod Natura explere non potuit: *Secundum*: ut per loca conferentia & quæ Natura ipsa in Crisi jam inchoata indigitaverit. *Tertium*, ut ex variis fortasse illius motionibus, ea speciatim seligatur, ad quam maxime vergere videtur, & humor ipse deponendus promptior, paratior & magis dispositus est.

Hic aphorismus cum brevis sit, non patitur quasi divisionem: potest tamen partiri si quis velit: quod in prima parte doceat motum Naturæ imitandum esse: in altera cautionem esse adhibendam, ut mox diximus.

Plurimæ sunt viæ per quas morbi è corpore vel à natura vel arte expelluntur: vomitus, secessus alvi, urinam, menstrua, hæmorrhoides, sudores, sputa, hæmorrhagiam &c.

Cum ergo Natura sit morborum medicatrix, Medicus vero ejus Minister, ergo ad quas illa vergit, eo illam ducere debet: naturæ enim operatio, quæ est intrinseca rerum cognitio, fallere nequit, juxta illud:

Qui Medicus credit Natura doctior esse
 Stultitiæ primum jam tenet ille gradum.
 Hæc superat celebres. Lecturæ ignara Magistros
 Hæc sine luminibus cuncta futura videt.
 Servulus est Medicus; Domina est Natura, sequaces
 Hæc inter dominas, sola petit famulos.
 Nam cæco Natura sagax manu ducta Magistro
 Incidet in foveam, mors inopina tuam.

Quænam sint ista quæ ducere oportet, explicat *Galenus* in comment. quæ v. g. neque judicantur, neque sunt integre judicata, nempe causæ materiales morborum, quia crises non accidunt, nisi morbis pendentibus à materia sive humoribus qui degenerarunt: Et nisi sensibili evacuatione hi tollantur, illi non desinunt: quod si ergo contingat imperfecte ejusmodi vitiosos humores morborum causas repurgari ope Naturæ, beneficio artis oportebit diminutam eorundem evacuationem absolvere, ut æger in pristinum salutis statum reducatur & non recidat. Sed per quas vias educi debeant, quas sæpe ignoramus docet Hippocrates, ut per ea loca promoveatur evacuatio per quæ Natura ipsam inchoaverat, unde dicit *quo natura maxime vergit*. Natura vero nomine intelligitur ab Hipp. vis illa & internus motus tam partium fluidarum quam solidarum, rectam corporis œconomiam constituentium, unde fermentationibus, dissolutionibus & secretionibus, coctiones, nutritiones, mutationes & salubrium ab insalubribus humoribus repurgationes absolventur, indeque cordis & arteriarum motus ac totius animalis vita persistit. Hunc ergo partium omnium mutuo cohærentium atque in unum consentientium complexum & structuram, meditatus aliquando ipse Hippocrates dixit esse in homine ejusque partibus consensum unum, conspirationem unam, per quam sibi vicissim auxiliantur diversis fermentorum proprietatibus, viscerum secerniculis, humorum propensionibus, mutuisque succorum actionibus & fermentationibus, ut exinde huc aut illuc ferantur, unde

unde observamus pro varia partium affectarum habitudine & vitio-
 forum succorum inclinatione, quod alii humores aliis viis commodius
 evacuentur: Sic melancholia & lenti humores per secessum: bilis,
 sanguis, serum, utpote humores tenues, acres & sulphureos per vomitum,
 hæmorrhagiam, sudores educuntur. Datis locis inconvenien-
 tibus, convenientior quantum licet, assignandus. Unde dixit Hipp.
per loca conferentia: sic *prima* regionis excrementa per vomitum & al-
 vum; *secunda* per urinas: *tertia* per sudores: tota massa sanguinis per
 urinas & sudores. Loca non conferentia sunt I. partes principes,
 unde Avicennas ait, cave dum evacuas ne per membrum principale
 humor transeat: II. partes debiles & læsæ: III. partes quæ non habent
 meatus patentes v. g. cavitates pectoris verbo: morbi species, humo-
 ris peccantis natura, patientis temperamentum, viam maxime osten-
 dunt, præsertim etiam si tali evacuationi gravia symptomata socien-
 tur, v. g. vomitui cardialgia, singultus, lypothymia jungatur, locus con-
 ferens censeretur non potest.

In educendo tum materiale, & humorum qualitas ac dispositio,
 tum naturæ inclinatio attendenda est, ut jam diximus. ad quod etiam
 multum facit habitus corporis, anni tempus, & humorum copia: sic
 graciles per vomitum, obesi per alvum teste Hipp. 4. aph. 6. & 7. Sic
 æstate per superiora, hyeme vero per inferiora: 4. aph. 4. Sic humo-
 rum copia potius per alvum quam vomitum, meliusque per has vias,
 quam per urinas & sudores repurgantur.

Quæ educere non oportet, mature refrananda & aliorum diver-
 tendæ. Sic si v. g. menstrua per pulmones & hæmorrhagiam narium
 tendant, revelli debent. Sic etiam ab oculis ad fauces, à cerebro ad
 parotides, palatum & nares; à centro ad peripheriam revellendi
 humores &c.

Dices: in dysenteria evacuamus per loca affecta: R. ut materiam
 auferamus concedo, ut ibi permaneat nego: licet, si per vomitum eva-
 cuari possit, melius sit, teste Hipp. 6. aph. 15. *Quæres*: utrum non li-
 ceat quandoque retrahere ad suam originem? R. affirmative si pars
 mandans sit ignobilior quam recipiens.

Dices: Medicus non videtur esse imitator Naturæ sed ductor,
 cum illam ducat ad conferentia loca. R. Medicus diverso actu & re-
 spectu potest esse imitator, dum natura nihil operatur, sed aliquando

taliter bene operata est, vel defacto inclinatur: dicitur etiam adiutor & ductor, dum imperfecte agit: dicitur corrector dum irritata male agit.

Aphorismus XXII.

Concocta medicari oportet non cruda, neque per initia, nisi turgeant, plurima vero non turgent.

Contentum & Intentio.

De tempore purgandi.

Connexio: In priori aph. egit de loco evacuationis: in hoc agit de tempore, quando materia cocta & non cruda est. Dux sunt partes huius aphorismi: in *prima* agit de humoribus quietis & concoctis expurgandis: in *secunda* de inquietis & turgentibus evacuandis. Proponitur autem in hoc aphorismo opportuna occasio purgandi & tempus aptum egestionis vitiosorum humorum, ut tuta & conveniens morbificæ causæ propulsio succedat absque ulla innoxii humoris evacuatione: equidem non semper humores nocui evacuante medicamento, utiliter educuntur, cum primum concoqui ac postremo debeant evacuari. Non enim sine urgente necessitate in principiis acutorum purgandum est electivis; principia autem complectuntur totum tempus cruditatis, (nam laxativa excipiuntur, uti sunt manna, cassia, tamarindi &c. quæ tamen non nisi exigente causa etiam locum habent, cum sæpe ex his quoque ægri in vitæ discrimen deducti sint) ratio est, quia materia ut diximus in principio morbi non est concocta, sed cruda, id est particulæ fermentativæ heterogeneæ & crassæ, naturæ hostiles, sunt adhuc sanguini confusæ & ita unitæ, ut malum sine boni consortio absolute educi nequeat. ubi autem materia cocta est, id est, particulæ heterogeneæ, naturæ inimicæ, ab amico sanguinis consortio despumata & soluta & præcipitata (quod post statum fit) tunc facile purganti cedunt, & impermixta educuntur, quia ipsa natura tunc cooperatur homogenea ab heterogeneis separando. Facienda ergo evacuatione vel digerendum & præparandum prius pro morbi genio,

vel

vel citra hæc purgandum est. Fluxilia per se & ad motum apta, imo urgentia & turgentia brevi manu expurganda.

Turgens materia (materia autem turgens est) quam alii orgasmum appellant (quæ vel à natura est insuperabilis, vel adeo & impetuosè mobilis, ut metus sit raptus ad partem nobilem, v. g. malignitas) in febribus acutis maturius per emetica, hinc & per decocta lenientia evacuatur, & non purgantia.

Quæres utrum turgentia etiam per venæsectionem tolli possit? *R.* Quod sic, maxime quando Natura tendit ad superiores partes: si vero ad inferiores requirit purgationem potius. Cum enim turgentia ut diximus, (stante circulatione sanguinis & humorum) sit humorum motus impetuosior quam par est per venas & arterias, atque eas inæqualiter agitans, & in tumorem attollens, & simul multitudine & pravitate concitans, irritans, & viscera gravans, per quæ transit, unde periculum suffocationis minatur, nisi cito evacuetur: ergo huic malo & venæsectio & purgatio convenit ne periculum vitæ afferant.

Ejusmodi autem orgasmus seu impetuosus & fluctuosus humorum motus raro accidit, quia raro sanguis cum adjunctis humoribus, adeo multitudine turget & gravat, ut venas & arterias distendendo & tumefaciendo irruat in viscera corporis; unde bene subdit Hippocrates, *plurimum vero non turgenti* quametsi in motu perpetuo sint, ne quis tamen temere & inconsiderate statim à principio sub specie turgentis humoris, ad purgans deveniat; raro enim ita turgent, ut cathartico educi debeant, quippe qui non semper ad alvum vergunt. Hinc prudenter monet *Sanctorius*, non esse exhibendum medicamentum purgans in turgente materia, nisi ea inclinationem habeat ad intestina, quo scilicet ferri videatur: quod si enim vergere viderentur ad vias urinæ, aut in articulis aliisque partibus externis, cum abscesserint, immorari; profecto in alvum ducere & aliorsum distrahere non liceret. Denique animadvertendum aliquando ægros summa inquietudine & molestia affici, absque eo quod humores turgeant & cum impetu vagentur, cum nimirum præcordia æstuant & phlogosi vel inflammatione corripuntur, unde gravis anxietas, ingens sitis, febris ardens, vigiliæ & dolores exoriantur: In his plane purgans medicamentum mortiferum omnino est.

Coctio, aliis dicitur humorum præparatio; aliis perfectio: aliis maturatio; aliis assimilatio & alteratio; estque duplex: una *alimenti*, estque conversio humoris in substantiam corporis, ut cum ex cibo chylus, & ex chylo sanguis conficitur, ut is in aliti substantiam transcat. Altera *excrementi*: quæ consistit in reductione humoris ad temperiem, id est mutatio noxiorum humorum non tamen ut nutriant, sed ut subacti ac domiti, imo etiam à salubribus secreti, facilius possint per consueta emissaria expurgari, & de hac secunda loquitur Hippocrates, ut nimirum prius tales humores concoquantur, id est mox dicto modo disponantur, antequam medicamento expurgentur, ut dicitur 2. aph. 9. *Corpora cum quis purgare voluerit, ea fluida facere oportet.* Duo ergo videntur in universum exigere ad coctionem & promptam humorum purgationem, viarum scilicet laxitas, & humorum extenuatio. Coctio humorum crudorum fit eorundem præparatione, alteratione, contemperatione; id est crassos attenuare, tenaces incidere, tenues & calidos increassare, acidos edulcorare, absorbere, præcipitare. Coctio igitur ab Hippocrate hic memorata erit proprie & genuine solum dissolutio ac secretio inutilium humorum ab utilibus & præsertim à sanguine, eo prorsus modo quo in musto, cum in vinum perfectum prævia fermentatione transit, experimur. Sepositis enim partibus inutilibus & faculentis, utpote Naturæ dissentaneis, causa morbi evicta dicitur & concocta: Si ergo ante ejusmodi dissolutionem & secretionem purgatio instituatur, tum boni tum mali humores à cathartico indiscriminatim educuntur, vel boni solum & magis fluentes, magna cum virium jactura.

In inflammationibus, tussi, catarrhis, febribus, materia cruda minus purganda est, hæc enim in hoc aph. excipiuntur.

Cruditas & coctio humorum, partim ex urina universaliter, partim ex materia singulorum cognoscitur, quia Hipp. non tantum loquitur de medicamento purgante, sed de omni alia excrementi educatione, sive per urinam, sive per sudorem, ista enim non sunt movenda, nisi cocta materia.

Quæres: Cur humores ut plurimum non turgeant? R. Turgere præcipue dicuntur in morbis peracutis, sed quia isti raro invadunt, ideo raro turget materia. R. II. Quia raro tenuitas & acrimonia in principiis morborum adest, sed potius crassities & cruditas. *Dices*:

Aristo-

Aristoteles 4. Meteor. dicit, quæ concoquuntur calidiora evadere, ergo major erit turgentia in coctis quam crudis. R. Quæ concoquuntur coctione maturativa, calidiora fiunt v. g. fructus, concedo, concoctione fermentativa seu elixativa nego.

Aphorismus XXIII.

Confer Aph. hujus Sectionis 2. & 25.

Excreta non copia sunt æstimanda, sed si qualia oportet exeant, & facile ferat æger: atque ubi ad animi deliquium educere expedit, faciendum id quoque si æger par esse possit.

Contentum & Intentio.

De mensura evacuandorum.

Connexio: In priori egit de tempore concocta evacuandi, in hoc agit de modo & mensura, ejusque judicio.

Duas habet partes hic aphorismus: in prima suam proponit sententiam, quod bona evacuatio non debeat judicari ex quantitate ducti humoris, sed peccantis cum tolerantia. In secunda probat suam sententiam.

Medicus & in judicio de exeuntibus, sponte vel arte promotis, ultra vulgus sapere debet. Imo reprehendendi sunt homines, qui remedia, quæ moderate agunt, vilipendunt, & illa laudant quæ excessive & multum operantur; cum ex his vires deiciantur, cum utiles cum inutilibus humoribus & simul spiritus & alibilis substantia evacuentur. Propterea irrisione digni sunt, qui magnopere admirantur, quomodo aut quare quis ægrotet, postquam oppido multa dejecerit: quasi vero fuerit ita cum Natura comparatum, ut aliud quid, nisi vitiosus humor per cathartica educi nequeat.

Non tam quantitas quam qualitas singulorum æstimanda, & illa ex hac & viribus seu tolerantia, v. g. in exemplo: Petro tertiana legitima laboranti detur phlegmagogum v. g. turbith, jaloppa &c, purgabitur

bitur quidem & sat copiose, sed inutiliter, quia non expurgatur materia morbigica, quæ est sincera bilis, sed serum & phlegma pro ea frændanda necessarium educitur, & causa redditur malignior: ut diximus supra 1. aph. 3. & infra 25. dicemus.

Morbi graviores ad alterationem majorem & spirituum imminuendam copiam & ferociam, etiam venæsectionem vel purgationem largissimam sæpe exposcunt: unde Hipp. in hoc aph. non loquitur tantum de evacuationibus alvi, sed etiam de sanguinis missione, & alia quacunque evacuatione, à cujuslibet medicamenti ope commendabili, si ejusmodi sit, ut per eam peccantes humores egerantur, recuperandæ salutis causa: licet enim in vulgata latina translatione legatur, *si talia dejiciantur qualia conveniunt*: in Græco tamen Codice habetur τὰ χαρρόντα, quod non significat dejectiones, sed quacunque evacuationem ut docet *Fuchsius* & *Cenomanus*, unde congruentius legendum foret juxta interpretationem *Jani Cornarii*, *qua prodeunt seu excernuntur, non multitudine æstimare oportet, sed quamdiu prodeant, qualia oportet & facile ager ferat*: Quamvis specialius & ut plurimum dejectiones seu per alvum egestionem, sub hoc nomine comprehendantur, tanquam illæ quæ frequentius eveniunt & à vulgò plausibilis commendari solent. Ut sit, dummodo *convenienter*, seu *convenienter* fiant, id est, ut inde *modus, locus, & tempus opportunum* cum aliis conditionibus ad bonam & salutarem evacuationem requisitis designentur. Hinc perinde est dicere: *si talia ejiciantur qualia conveniunt*, quam dicere: *si illi humores qui morbum faciunt, egerantur, & quidem tempore opportuno, prævia coctione, per loca convenientia, atque citra ullam symptomatum supervenientium molestiam, ab his enim evacuationibus præsto erit salutaris eventus, unde morbus desinat & consistentibus viribus æger sufferat*.

Ad animi deliquium, si non inclusive, tamen exclusive, quandoque etiam evacuandum, teste Hipp. & Gal. 9. meth. cap. 4. tam per alvum quam sanguinis missionem, modo vires sint fortes, & tolerantia magna, magnus morbus, & magna necessitas.

Dixi non inclusive, hoc est, non usque ad syncopen ut omnes vires concidant: sed exclusive, ad aliquam lypothymiam, per quam vires non totaliter dejiciuntur, sed manet adhuc robur & pulsus, talis ergo evacuatio fieri potest in febre ardente, magna inflammatione,
magno

magno dolore, magna plethora: idque per venæsectionem non autem purgationem. Antiqui hoc frequenter faciebant, illi enim à ℥j. ad ℥iij. & ultra emittebant. Hoc autem intelligitur de venæsectione non autem de purgatione, licet morbus postulet, quia purgatio non est in nostra potestate sicut venæsectio. Ultra vires quam ferre possit æger non evacuandum, & omnis evacuatio vel operatio juxta illas regulanda est, prout facimus hodierno sæculo. Unde *Averroës* 11. collect. cap. 8. prudenter utrique Hippocrati & Gal. adversatur & tribus argumentis quamcunque evacuationem & præsertim sanguinis ad lypothymiam usque, vituperat. I. Medicus (inquit) Naturam recte operantem debet imitari, atqui hæc recte operans nunquam ad animi defectionem educit, quare nec Medicus eandem tentare audebit. II. Medici intentio in curationibus esse solum debet, superfluum atque inutile evacuare, atqui per evacuationem ad lypothymiam usque, non tantum superfluum & inutile, sed utile & necessarium inanitur, ergo nocua censenda est. III. Medicum oportet ut non tantum ægrorum saluti, verum etiam vitæ tuitioi prospiciat. atqui evacuatio usque ad animi defectionem non est cum vitæ custodia, quin potius illam in grave discrimen adducit, ergo prorsus evitanda. Hinc communiter Arabes cum ipsorum Principe Avicenna contendunt, meliorem & tutiorem esse parcam, sed iteratam, quam semel actam & immoderatam quamcunque evacuationem: cui sententiæ & nos subscribimus.

Aphorismus XXIV.

In acutis morbis raro & in principiis medicamentis purgantibus utendum, idque diligenti ante adhibita circumspectione faciendum.

Contentum & Intentio.
De purgantibus in acutis.

Connexio: In priori egit de omnibus evacuationibus; hic de illa sola agit quæ fit per purgantia. Et cum Hippocrates in præcedenti aph. docuerit turgentem humorem expurgandum, etsi nulla coctio appareat, acuti autem plerumque morbi, tali molesta anxietate stipantur, de his propterea speciatim nunc admonet Hippocrates, qua ratione, quo tempore, & quibus cum cautionibus purgantia medicamenta sint exhibenda.

Hic aphorismus duas habet partes: in prima dicit raro esse purgandum, & si faciendum, in principio hoc præstandum. In secunda dicit diligenter examinandum, antequam fiat purgatio, ne damnum inferatur.

Nota: de morbis chronicis non meminit hic Hippocrates, vel quia Aph. 22. illos comprehensos voluit, si fortasse ab humorum multitudinē & copia sint progeniti, vel quia sub illorum initia, peccans materia neque concocta & secreta esse potest, neque tam facile turgere solet: ideoque minime ad evacuationem est prompta; unde in illis semper oportet expectare coctionem. *Morbi acuti* quid sint jam supra diximus, nempe qui cito & celeriter ac cum vehementia suum absolvunt terminum. Quidque sit illorum principium pariter alibi diximus: principium nempe sumi vel pro primo insultu, vel pro primis tribus diebus, vel quousque cruditas in humoribus manet, sine ullo coctionis signo.

In acutis morbis ergo magis leniendum, quam purgandum, quia natura raro in acutis vergit ad alvum, nisi materia turgeat, quod raro fit, ut dixit Hipp. aph. 22.

Et in acutis melius agimus cum venæsectione quam purgatione; lenientia autem quæ vias aperiant & corpus fluxile reddant, dari possunt, cum magna tamen præmeditatione, & quidem prima statim die, quia Galenus principium morbi sumit primam diem. Per purgantia autem crises impediuntur: materia etiam est cruda: febris accenditur, quia purgantia omnia calida sunt: unde nec obstat 4. aph. 10.

aph. 10. Medicari in valde acutis si humores turgeant eodem die oportet &c. id est, si turgeant, alias non, idque tamen cum magna circumspeditione, & præmeditationis multis circumstantiis.

In febribus malignis fortiora purgantia facile bilem exacuunt, & hypercatharsin cient, malo cum eventu.

In morbis acutis maxima principiorum vitalium, & imprimis lymphæ habenda est ratio.

In adhibendis remediis heroicis & activioribus, probe prius omnia pensitanda, ne noxa aliqua inde oriatur: id est, debet bene considerari, an phlebotomia vel purgatione utendum, an hoc vel illo remedio, fortiori an debiliori, quod semper tutius est, id est cum præmeditatione. Res enim quæ magni momenti est, magna quoque eger circumspeditione & iudicio, in morbis autem nihil est magis periculosum teste Seneca, quam immatura Medicina, præsertim purgans, quæ naturam plurimum divexat & distrahit ab opere coctionis, & ab expulsiōe causæ morbificæ, quod est magni momenti, & magna egens præmeditatione. Quæ vero oporteat Medicum præmeditari antequam purgans exhibeat, colliguntur ex Hippocrate & Gal. & reducuntur ad quinque capita generaliora spectantia, *ægrum, morbum, medicamentum, humorem turgentem purgandum, & vires*. *Æger* nec puer sit nec senex, uterque enim facile ab evacuationibus concidit: ille ob promptam carniū dissolutionem, hic vero ob viriū languorem: *æger* neque obnoxius sit cardialgiæ, lypothymia, magnæ cruditati, hypochondriorum distensionī & inflationi, visceris alicujus inflammationi: huc quoque spectant utero gerentes, asthmatici, tabidi, phthysici &c. *Morbus* non sit cum inflammatione viscerum, neque cum febre junctus, neque cum obstructione & vehementi dolore. *Medicamentum*, morbo & causæ morbi respondeat, sit correctum bene præparatum, gratum palato, probatum & decenti dosi datum. *Humor turgens* citra molestiam educatur per alvum & patentes ductus quo vergit, alias anceps erit remedium. *Vires debiles* inhibent purgans medicamentum 7. aph. 4. ita etiam viscus languens præsertim imi ventris. Hæc ergo omnia bene sunt præmeditanda: His adhuc accedunt, tempus opportunum, modus, habitudo, & forma medicamenti. Sed *Quæres*: quare ergo tam accurate Hippocrates præci-

H 2

piat

piat & inquirat pro usu medicamenti purgantis in morbis acutis sub initio, etiam si materia turgeat? R. Quia est dubius huius medicamenti eventus, nam alii difficulter, alii parum evacuantur: II. Quia totum corpus turbat. III. Quia sapit naturam veneni, utpote naturæ infensum. IV. Sanguinem attenuat, carnes eliquat, fermenta depravat, ventriculum subvertit, intestina rodit & erodit, sitim & æstum affert, viscera laxat, spiritus dissipat, motum cordis & arteriarum turbat & alia incommoda excitat, imo sæpe in venenum abit ex malo succorum apparatu corruptum in ventriculo.

Aphorismus XXV.

Confer Aph. 2. 3. 4. & 23. ita etiam Section. 4. Aph. 3.

Si qualia oportet purgari purgentur, confert, & facile ferunt, si contra difficulter.

Contentum & Intentio.

De effectu purgantium.

Connexio: In prioribus egit de evacuationis scopis, an, quid, quantum, quando, quo loco & quomodo evacuandum; in hoc signa bona & mala exponit evacuationis. Hic aphorismus ob brevitatem non admittit divisionem. Mirum tamen est, quod tam anxie studeant Interpretes hunc aphorismum præcedentibus annectere, cumque fuisse inutiliter repetitum, sicuti deduci videtur ex Gal. qui illum existimat omnino contineri in secundo, in quo hæc ipsissima verba leguntur: Verum nos credimus præter eam mox in connexionem datam, etiam ex alia causa, fuisse ab Hipp. denuo pronuntiatum hunc aphorismum, quippe qui Laconica seu succincta dicendi methodo summe præcellens, non nisi premente necessitate plusquam semel idem repetere.

petere, nunquam consuevit: Id vero illum fecisse hic, rationes sunt, five quod ibi de sponte habitis, hic de arte promotis tantum evacuationibus; five quod de evacuatione in communi ibi, hic autem de purgationibus quæ fieri solent in principiis morborum solum turgente materia; five quod hoc ultimo aphorismo generaliter comprehensas omnes simul conditiones ad bonam evacuationem per quascunque vias, artis auxilio promovendam requisitas, atque adeo Epilogi loco hic tandem relatas voluerit.

In purgantibus ergo indicantia & vires à priori, à posteriori effectus maxime attendendus. Lynceis profecto oculis, Medico causa morbi indaganda est, nam ablata causa tollitur effectus seu morbus, quod est primarium Medici intentum.

Hinc conferentia & tolerantia laudabilem faciunt evacuationem: imo etiam quandoque non solum cruda sed prava quoque cum conferentia & tolerantia educuntur, v. gr. crisis per urinas nigras aliquando accidit. Evacuatio autem bona est, quæ fit humore cocto, debita quantitate, tempore, loco convenienti: omnium autem optima est quæ fit cum conferentia & tolerantia, five illa fiat à Natura vel arte. Nota: tolerantia intelligitur de præsentis virium statu, conferentia de futuro. Illius signa sunt, quando mox natura manifeste fortior evadit, vel si est fortis in eodem statu manet nec debilior fit. Hujus signa sunt, durante evacuatione, obscura, sed post evacuationem magis patent, ut æger ab illo onere omnino liberatus esse videatur.

Quandoque etiam medicamenta non *μολὴν*, id est laboriosa, seu mala, sed benigna magis, per accidens minori cum euphoria operantur.


Qui ad lypothymias & passiones hystericas dispositi, magis provide purgandi. Etiam fortius operatum medicamentum, si cum euphoria id fiat, non habendum in malis.

Dices: hic aphorismus idem prorsus docet teste Galen. in commentar. quod secundus in hac Sectione, ergo nihil docet. & Hunc aphorismum non tantum agere de spontaneis evacuationibus, sed etiam de arte factis, quas facile ferunt ægri si talia purgentur qualia oportet. Ergo nihil docet, nego Consequentiam, & dico in hoc aphorismo velut coronide Hippocratem hunc primum Aphorismorum Librum clausisse, fecitque bonorum Concionatorum more, qui in Epilogo breviter vel ex toto vel ex parte repetunt, quæ præcedenti dictione protulerunt, ut tanto aptior & genuina priorum cum posterioribus cruatur connexio

&

FINIS.





LIBER SECUNDUS
SEU
SECTIO SECUNDA
DE

REBUS NONNATURALIBUS,
NATURALIBUS, TEMPORIBUS MOR-
BORUM, DOLORIBUS, CONSUETUDI-
NE, PURGANTIBUS, FEBRIBUS,
APOPLEXIA, LYPOTHYMIA,
EPILEPSIA. &c.

Aphorismus I.

*Quo in morbo Somnus noxam (seu laborem) adfert,
lethale, si vero Somnus profit (seu juvet) minime
lethale.*

Contentum seu Intentio.

De Somno morbum juvante & minus juvante.

Connexio: Cum divus Senex de una rerum non naturalium
Cibo nempe, & cibandi modo in plurimis aphorismis Sectio-
nis primæ egisset, pariterque ibidem de morborum curatio-
ne perdiatam, pharmaciam & Chyrurgiam pertractasset: in hac se-
cunda Sectione reliquas res non naturales pertractare velle videtur,
cum in primo hoc aphorismo incipiat agere de Somno ad prognosim
facien-

faciendam, pro qua non tantum plurimos confecit aphorismos, sed etiam libros prognosticorum, prænotionum, prorheticorum, Coacorum &c. Perbelle novit Divus Senex in fundata prognosi, Medici gloriam, artis dignitatem, & ægri salutem, qui quandoque non nisi facto prognostico territus obedit, consistere: Unde *Hippocrates* in hoc libro, ut plurimum in cognoscendo morbi eventu laborat, licet non nulla interponat quæ ad dignotionem & curationem magnopere conducunt.

Hic Aphorismus bimebris est, & in duas partes dividitur, in quarum prima noxam ex somno, faciente mortem: in altera salutem ex eodem prædicit.

Somnus quid sit patet ex *Philosophia* & *Aristotele*: qui eum definit esse: *refrigerationem seu quietem primi sensorii, & facultatis sentientis vinculum*: *Plinius*: *Anima in se recessum* appellavit. *Villisius*: *famem cerebri* asseruit; & non inepte, quemadmodum enim in nutrimenti defectu, stomachus appeteret cibos quo corpus nutriretur, ita in Spirituum animalium defectu cerebrum appeteret somnum, quo mediante Spiritus animales restaurarentur. Est ergo somnus *formaliter* acceptus *quædam cessatio naturalis*, vel potius *obtusa & insensibilis perceptio sensus communis, seu primi sensorii, una cum exterioribus sensibus gratia salutis animalium facta*: *Efficienter & materialiter* est *refrigeratio, vel potius humectatio primi sensorii à vapore dulci, suavi & humido, à cerebri frigiditate in lympham & rorem insipidum conversio*. Seu (ut ad mentem recentiorum loquar) fit ex serosa sanguinis parte in glandulosa cerebri substantia extravasata, qua mediante spiritibus animalibus influxus in organa sensus & motus intercluditur, oleosa Spirituum indoles phlegmate diluitur, & per consequens vis eorum elastica ad tempus saltem, quasi omnino refrænatur, unde pori non rite inflati, subsident, & sic Spiritibus animalibus passum per accidens intercludunt. *Finaliter* somnus nihil aliud est, quam *cessatio actionum animalium*, ut sic calor naturalis ab exercitio actionum animalium, non impeditus, sed sibi relictus, deficientes Spiritus animales refarcire, & pro ulteriori actionum continuatione, novos generare possit: unde elapso somno per Spirituum animalium abundantiam matutinis horis maxime *Serenus*, & ad quascunque actiones animales aptissimus est: nam iuxta illud

Mane

Mane color rebus, faciesque reducitur orbi

Corporibusque redit mens animoque vigor.

Et juxta sententiam *Aristotelis* qui dicit: *Neceſſe eſt omne quod vigilat dormire*; quemadmodum enim aëris diurni & nocturni, cibi & abſtinentiæ, motus & quietis, ita ſomni & vigiliarum viciffitudo mortalibus abſolute eſt neceſſaria. Cum enim vitæ noſtræ decurfus ſit perpetuus torrens, quo plurimum de ſubſtantia noſtri corporis decedit: Sic abſoluta fuit neceſſitas, ut illud nova in dies ſubſtantia, id eſt cibo & potu, ſomno & quiete reſtauraretur, quod actione caloris nativi, abſtinentia, motibus & vigiliis deprædatum fuit: Etenim Spiritus animales in Vigiliis, ſeu effectivo ſenſuum exercitio partes organicas inflare, tendere, & ſic quaſi motu aliquo & labore concurrere ſolent. Requirebat igitur neceſſaria rerum viciffitudo, ut laborem requies, motum ceſſatio, tenſionem laxatio exciperet: Et ipſa natura ſemel in die feſſa, partes continuo tenſas per modum arens remitteret: Nam teſte *Ovidio*

Arcus & arma tibi ſunt imitanda Dianæ:

Si nunquam ceſſes tendere, mollis erit.

Ut nempe naturæ vires remiſſione nocturna per modum arcus robuſtiores factæ in novum actionum animalium exercitium vegetiores inſurgant: teſte *Statio*

- - - Vires inſtigat alitque

Tempeſtiva quies, major poſt otia virtus.

vel juxta illud *Ovidii*

Quod caret alterna requie durable non eſt.

Notandum autem eſt, ſomnum aliquando eſſe *Naturalem*, aliquando *Præternaturalem*: Naturalis coctiones, digeſtiones & fermenta juvat, hominem alacrem reddit, Spiritus animales & vitales multiplicat, corpus humectat & laſſitudinem tollit, dolores corporis & animi aufert, utilia ab excrementis ſeparat: Unde quanta ſomnus naturalis ſeu moderatus corpori noſtro afferat emolumenta docet *Tertullianus*; *Somnus*, inquit: eſt *Recreator corporum, Integrator virium, Probator valetudinum, Pacator operum, Medicus Laborum, quo legitime fruendo cedit dies, nox legem facit*. *Hippocrates* tantam in ſomno latere confortandi interiora corporis, potentiam deprehendit, ut 6. Epid. palam profiteatur, his verbis: *Et motus articulis, ita ſomnus viſceribus cibis*.

Somnus Præternaturalis seu immoderatus, & intempestivus è contra fluxiones movet, caput gravat, corpus enervat, & plus justo humectat & refrigerat, omnesque evacuationes suspendit, & inde cruditates in toto corpore prædominantur, & Spirituum animalium torpor & grævedo. Genealogiam hujus somni si quis scire cupit: Ejus *Pater Bacchus* est: nunquam enim cerebrum fuliginosis vaporibus magis obscuratur, quam dum culina Stomachi fumat, latrans enim Somachus etiam dormientes è Somno excitat; Hinc proverbium: Absque *Cerere & Bacco* friget *Venus* id est Somnus:

Mater Somni Pigritia est, hinc *Ovidius*:

- - - *Somnique ignavia mater*

Frater, Somno simillimus *Mors*, hinc *Seneca* de Somno

Frater dura languida Mortis

Filius Somni est Catharrus & Pituita: unde Poëta

Est frater gelida mortis sopor unicus: unde

Lethæis cerebrum lentus in undat aquis.

Nepotes Somni cacochymia, hydrops, apoplexia, aliique morbi frigidiores; unde Poëta

Filius est Spurius generosi Somnus Iachæ

Filius unda homines afficit igne Pater.

Hæc Somno naturali & præternaturali, juvante & nocente in genere, breviter dicta sufficiant, multum servitura posthac in sequentibus aphorismis.

Jam rursus ad nostrum præsentem aphorismum: in quo præprimis sciendum *Hippocratem* per *laborem* tria intelligere: *Exercitium, dolorem & molestiam* seu *læsionem* seu *nocumentum* Græce πονον dictum: & in hoc tertio significatu loquitur hic aphorismus. Si enim dicit in uno membro *juvare*, in altero oppositum est intelligendum nempe *nocere*. Non autem intelligenda hic est læsio seu noxa quæcunque, sed *gravis, magna, & perseverans*: Dico *gravis & magna* id est gravioris morbi V. S. delirii, convulsionis, inflammationis, difficilis respirationis, syncopis, comatis, dolorum inquietudinis continuæ &c. à Somno inducti. Dico *perseverans*: Nam possunt ex Somno extremæ læsiones fieri, nempe nocte antecedente crîsim, sed cum hæc non perseveret, non hic intelligitur, sed læsio durabilis: Hinc neque etiam hic generaliter credendum est, in omni morbo, & omni tempore morbi,

bi, nocentem somnum esse mortalem, nam v.g. in morbis paroxismos habentibus, in principio & augmento paroxismi, licet somnus noceat, mortale non est, quia illud communiter evenit; si vero in declinatione noceat, vere est mortale, nec in ullo alio morbi tempore magis fatale est, quam in hoc, in quo alias semper juvat. Unde bene concluditur generaliter, ubi somnus nocet in morbo & in morbi tempore, quibus nocere non debet, mortale est: Nam revera si, quæ juvare solent & debent, non juvent, passim malum est signum, idque non solum intelligendum de solo somno, sed de omnibus rebus non naturalibus & etiam medicamentis.

Proinde somnus placidus per totum morbum, vel saltem potior rem partem, & naturam levans, morbumque minuens, jure merito in bonis numerandus est. Quod si vero somnus alioquin virium & laborum refectorium, quo magis laborem facit, eo minus officium suum facit, & eo magis nocet, dum actu est, tum etiam post ipsum.

Sed quæres; unde autem hæc mala proprie & genuine ægris ex somno proveniant? R. scire & credere oportet, roridam illam substantiam qua cerebrum in ejus modi ægrotantibus perfunditur, suggeri à sanguine depravatam, maleque affectam, ut proinde nervorum fibræ graventur, obtundantur, vel etiam vellicentur & doleant in morbo. Ejus enim conditionis ros ille, è cerebro in nervos defluens esse debet, ut leni quadam aptaque irroratione demulceat, & flexiles illos faciat. Quamobrem cum ab hac naturali constitutione recesserit, potius conturbat, torquet, exasperat, adeoque animalibus operationibus obeundis ineptos eos reddit, unde postmodum dolores, lassitudines, aliaque graviora mala & defluxiones oriuntur. Porro roridus hic humor plurimum per vigiliam extenuatur & dissolvitur, qui propterea ex somno potius reficitur, quadam veluti ex arteriis per cerebrum transcolatione ejus potissimum liquoris, qui in ipso albicat & à concoctiori chyli portione procedit, perenni plane suggestu: Quare si per id tempus nocuus omnino sufficiatur, procul dubio cerebro, nervis, cunctisque partibus inferius & molestus accedet. Sed

Quæres II. Quomodo huic malo sit occurrendum? R. Non satis esse Medico laborem ex somno exitialem prælagire, nisi etiam solerti industria imminens ex inde periculum vitæ & infaustum exitum, quoad fieri potest prudens Medicus præcavere nitatur; operæ præ-

tium proinde esse duximus, ea hic in medium afferre, quæ valeant ejusmodi infortunato omni occurrere & sanguinem liquoremque nerveum ab inquinamentis mortiferis repurgare. Ea autem sunt quæ sudorem blandum atque urinam movere valent: optima censentur omnia bezoardica, uti sunt Δ auratum antimonii, tinctura antimonii, antimonium diaphoret. Arcan. duplicat. Mynsicht. Sal volatile Succini, C.C., viperarum, liq. C.C. Succinat. Sal volatile oleosum Silvii, vel meum nobile, mixtura simplex &c. Per vias urinæ specialius conferent, Spiritus urinæ volatilis, Spiritus \square volatilis, vel compositus, Spiritus Salis armoniaci correctus, vel aromatizatus, Spiritus Salis marini dulcis, vel aromatiz. in aquis & vehiculis specificis: atque id genus alia (quæ in mea Praxi videri poterunt titulo de soporosis affectibus) quæ nempe sanguini cæterisque humoribus corporis repurgandis ratione & experientia conferre & contulisse sæpe observata sunt.

Aphorismus II.

Ubi delirium somnus sedaverit bonum.

Contentum seu Intentio.

De somno in Deliriis.

Connectio: Parum aut nihil differt hic aphorismus à præcedenti, imo quasi pars ejus esse videtur: cum enim in præcedenti aphorismo egisset de læsione & juvamento ex somno, in hoc quasi exemplum quoddam adducit prioris sententiæ, ubi dixit, quando juvat somnus in morbo, non esse mortale, & quando somnus dolorem sedat bonum, hic tandem addit, quando somnus accidentia seu symptomata, v. g. delirium, dolorem, febrem, inflammationem &c. Sedaverit, etiam bonum esse.

Hujus Aphorismi brevitatis non patitur divisionem, sed unimembris est.

Quid Delirium (quod Hippocrates paraphrosyne vocat) sit, patet ex Institutionibus & Praxi nihil aliud in genere esse, quam: *notabilem functionum seu actionum animalium, imaginationis, ratiocinationis*

& memoria depravationem, seu motum depravatum : Delirantes enim omnia depravate judicant, & aliter quam se habeat apprehendunt. Vel brevius: *Delirium est aberratio à rectarationis semita*, ut, cum ægro-
tantes absurda & vana loquuntur aut imaginantur, idque vigilando & dormiendo; unde non immerito inquit *Hippocrates: Vbi somnus delirium sedat*, quia non semper per somnum delirium sedatur, imo dormientes quandoque delirant & obloquuntur. Delirium autem fit, cum sanguis per arterias carotides in plexus cerebri delatus, nimiaque fermentatione subactus exstillat in vaporem acrem & exardescentem, qui deinde per substantiam cerebri diffusus, continua & inæquali agitatione internam & medullarem ipsius substantiam percellit, & quaqua-
versum ejus poros pervadens ad delirium & vigiliam laceffit, quin & roridam substantiam qua ipsum & nervorum fibræ irrorantur, adeo exagitat & perturbat, ut subinde omnes propemodum operationes animales depraventur & vacillent.

Delirium autem est multiplex, *Cardanus ex Hippocrate* septem deliriorum genera colligit; nempe: *phrenitidem, insaniam, delirium, mentis motionem, stuporem, melancholiam, furorem seu maniam*; quid & quæ illa sint ex *Institutionibus & Praxi* mea patet: Inter hæc iterum aliud cum *risu*, aliud cum *Studio*, de quibus loquitur 6. Aph. 53. *Desipientiæ quæ cum risu fiunt, securiores, quæ cum Studio, periculosiores*: ratio est, quod illæ quæ cum risu fiunt levio-
rem in sanguine mutationem, & minorem cerebri læsionem designent; quæ vero cum studio fiunt gravio-
rem & majorem à statu naturali utriusque recessum arguunt: aliud rursum est *sine febre*, atque aliud *cum febre*; *sine febre*, vel est *iners*, ut *stultitia*, quæ quidem quibusdam naturaliter accidit, aut ex contusione, ictu, vel sanguinis immodica evacuatione: Vel *Studiosum & melancholicum* dicitur, per quod homo cum metu & mœrore delirat, vel furibunde insanit, idque fit vel per *Idiopathiam* seu à cerebro, vel per *Sympathiam*, seu ab hypochondriis & utero. Delirium *cum febre* vel est *soporosum*, quale est lethargicum, caroticum, comaticum, aut stupidum: aut *vigil*, & hoc est *continuum* ut phrenitis, vel *interpolatum*, seu ex intervallo adveniens, quale per ardentium febrium accessiones oritur.

Positis his deliriorum differentiis, notandum est *Hippocratem* (licet expresserit omnem sedationem delirii ex somno bonam esse)

loqui de ea sedatione, quæ fit in *febre acuta & cum vigilia*, seu continuo & non interpolato, seu secundum accessiones, quia hoc ultimum potest per somnum solvi, cui tamen fidendum semper non est, quia etiam ejus sedatio constans & durabilis non est: sed pure puto loquitur de delirio cum febre acuta seu vigili, & tunc est bonum signum, si tale delirium somnus sedet, quia ista sedatio fit secundum rationem & perdurat, tunc enim certam salutem denuntiat, quia fida & secura est; quæque sedatio non tantum intelligenda est de delirio solo, sed etiam de aliis accidentibus & symptomatibus, nempe convulsionibus, anxietatibus, animi deliquiis, syncope, inflammatione &c. Non ergo loquitur *Hippocrates* in hoc aphorismo de delirio sine febre, neque de comatoso seu soporoso, quia tale delirium somnus sedare non potest, cum illud porius augeat.

Notandum præterea, eo ipso quod somnus delirium vel aliud symptoma sedaverit, bonum est, quia signum est naturam morbum superasse: E contra vero, si hoc vel illud excitaverit, vel post somnum evenerit, malum est, quia signum, Naturam à morbo superari.

Somni proinde maxima habenda est ratio, præprimis in febribus, hinc etiam in aliis morbis: Somnus etenim & ut *causa*, & ut *signum* deliria sedat; ut *Causa*, nempe spiritibus placide irretitis & placatis; id est placita quiete & molli irroratione ac redinem sanguinis & roridæ substantiæ cerebri retundendo, vaporesque illud & fibras nervorum pervadentes lenes admodum & blandas reddendo, nec non vires ex vigilia immoderata fatiscentes commode instaurando, coctiones adjuvando, perspirationem adeo vitæ necessariam & sæpe etiam sudorem promovendo. Ut *signum*, cum denotet Lympham sufficientem vel minus deficientem.

Cur autem *Hippocrates* solius delirii ejusque sedationis mentionem fecerit, causa potissima illius videtur esse, quod *primo* delirium omnium accidentium & symptomatum terribilium sit terribilissimum, summam depravationem principum functionum & ipsius mentis inferens, & ex homine non hominem efficiens. *Secundo*: ut exprimeret periculum & violentiam causæ; constat enim deliria, irrequietum & eccentricum motum Spirituum (qui Spiritus præstantissima nostræ animæ & animalitatis sint instrumenta) ac observantium
inde

inde idearum sequantur. Nam deliria sunt insomnia vigilantium: & quo magis vigilant, eo pertinaciora & periculosiora.

Dices: Hippocrates I. Epid. asserit in Felini Uxore delirium per somnum fuisse sedatum, & tamen illam esse mortuam, ergo non semper est bonum signum si delirium per somnum sedetur? *℞*. Delirium illud fuisse per consensum, non per essentiam, adeoque etsi per se bona fuerit illa sedatio delirii, non tamen fuit fida & secura, quia non duravit, sed per intervalla, & per consensum affligebat illud delirium, adeoque facile rediturum.

Quæres Quomodo intelligendus sit Hippocrates in *Coacis præsa-*
giis, dum agit: insomnia in phreniticis evidentia bonum eventum portendere: in *Prorheticis* è contradicit: insomnia phrenitidem portendere, quæ formalis est contradictio? *℞*. Hippocratem in *Coacis* loqui de somniis minus turbulentis: in *Prorheticis* vero de turbulentis, adeoque nulla est contradictio: turbulenta autem deliria sunt, & dicuntur, quia pariter ab adstantibus & ipsis ægris vociferantibus ac terrefactis præsentuntur.

Quæres secundo. Quomodo ergo deliriis sit succurrendum? *℞*. I. Nihil convenientius & exoptabilius esse, deliris & vigilantibus ægris, quam blando sopore affici, quo nimirum sensus omnes non tantum conquiescunt & reficiuntur, verum etiam morbosis molestiis vacant: unde *Paracelsus* somnum existimavit maximum in Medicina arcanum, superans omnia arcana. *℞*. II. In deliriis atque vigiliis immoderatis oportet prudenti Medico somnum conciliantibus remediis uti, caute tamen & oportune, ne scilicet pro delirio *Lethargus*, & pro vigilia *Carus* inducatur: Quamobrem & dosis, & tempus, & modus in somniferis maxime erit attendendus: & quidem feligenda erunt ea ad hunc usum. Medicamenta quæ sensim & blande tranquillam quietem inducant, non vero subitam & violentam.

Prius ergo tentanda cura per externa balnea, pediluvia, epithemata &c.

Mox vero si ista non sufficiant per interna temperata prius, tandem urgente morbo per opiata rite præparata & caute adhibita: ne vero hæc dentur viribus jam prostratis, neque iis quibus sanguis mox detrahendus, vel jam extractus est, neque infantibus qui facile in
somnum

somnum labuntur, neque etiam cachecticis, hydropicis, stipticis, empiricis &c. plura vide apud Practicos, qui consulendi.

Aphorismus III.

Somnus & vigilia, utrumque si modum excefferint malum. Nota Cum hoc aphorismo confertur aphorismus Sect. 7. Aph. II.

Contentum seu Intentio.

De somni & vigiliarum immoderatione.

Connexio: Egit. Hippocrates in antecedentibus aphorismis de somno in particulari, quatenus in morbis acutis bonum vel malum portendit, & Medicus prognosim ex ipsius *effectibus* facere potest: in hoc autem aphorismo universaliter non tantum de somno sed & de vigilia agit, ad eandem prorsus prognoseos intentionem, quomodo nempe ex somno tanquam *causa* effectus & eventus colligere debemus:

Hic aph. ob nimiam brevitatem divisionem non patitur sed unimembris manet.

Præsciendum autem hic est generaliter, omne diætæ seu rerum non naturalium regimen consistere in medio, seu debita moderatione; punctum autem medietatis & consequenter sanitatis in alteratione decenti quoque consistere. Proinde in hoc aph. ostendit divus senex, non solum res præter naturam nocere, verum etiam *naturales* (quales sunt *somnus* & *vigilia* quæ revera reliquis velut sedem quandam & fundamentum concedunt) si modum & moderamen excedant.

Præterea innuit ut si hæc sanis accidant, Medicus futurum morbum præcaveat qui ex illis significatur, frigidus nempe, seu ex stagnatione à somno, calidus vero seu ex resolutione à vigilia; somni enim effectus morbofi in spirituum torpore præcipue, vigiliarum autem in eorundem motu & activitate continuitatis consistunt. Tandem etiam

etiam docet, ut in morbis ex utroque malum coniectemus, & utriusque excessum quovis modo corrigamus & ad medium redigamus.

De somni differentiis jam actum est in aph. I. qui nempe somnus *moderatus* seu *naturalis*, & qui *immoderatus* & *præternaturalis*, in quanto, quali, & tempore sit: hinc multus, profundus & commutatus in *quanto* excedit: inquietus & minus suavis in *quali* peccat, intempestivus seu insuetus in *tempore* delinquit.

Notandum autem est, Hippocratem in hoc Aph. non loqui simpliciter de somno præternaturali seu actu morbofo: nam de hoc nemo dubitat, & absque hoc clarum est, idque testatur *Galen. Lib. de opt. Sect.* non debere tradi præcepta de rebus omnino notis. Neque etiam loqui de somno puerorum, aut senum fatigatorum, crapulatorum, &c. qui longior esse solet, sed præcise de illo somno sermo est, qui modum excedit, quem natura requirit ad corporis dispositiones corrigendas, is enim censetur oriri à causis, quæ nisi tollantur, morbos pariunt. Somnus etenim præter modum plenitudinis indicium est in sanis, & morbi nuntius, in agris malus, & ut *causa* quia naturam debilitat, & ut *signum*, quia excedentem humiditatem aut frigiditatem significat: unde *convulsiones, paralysis podagra, hydrops, catarrhi, tusses, &c.* eadem ratione vigilia in sanis calidum & resolutionis morbum indicat: in ægro, & ut *causa* vires dissolvit, & ut *signum* cerebri siccitatem aut caliditatem denuntiat; inde bilis copia ut excessus, morbi acuti, inflammationes, hæctica, atrophia &c. Somnus naturalis & moderatus tantæ est efficacæ, ut non solum ad sanitatem, sed & ad vitæ longitudinem sit potentissimus: maximum enim cruditatis est remedium, & virium restauratio. Sanitas enim in moderatione sita est, ideoque mediocria sunt valetudini conservandæ etiam ipsi naturæ sunt valde consentanea: hanc mediocritatem quoque in vigilia & somno, veluti necessariam tacite Hipp. hic videtur commendare, præsertim quia non tantum ad salutem sed etiam ad vitam somnus & vigilia, sibi invicem succedere debent, & se vicissim interrumpere, utrumque autem si excesserit nocuum existimat: sive enim aliquis vel immodice dormiat, vel nimium vigilet, contra valetudinis præscripta faciet, & multa mala procreabit, quia *omne nimium natura inimicum*, - Sed

Quæres: Quænam mensura sit determinanda in somno & vigilia?

lia? R. Licet in determinanda horum mensura certa & statuta sit difficile: nihilominus si ætati, consuetudini, propriæque corporis & regionis constitutioni prospiciatur, poterit magna ex parte de longioris aut brevioris somni aut vigiliarum usu determinari. Pueri enim, & qui humidiores nacti sunt temperaturam; longiori indigent somno ut & illi qui frigidiores plagas inhabitant, & crassioribus vescuntur alimentis: è contra vero alii ita natura sunt comparati, ut brevior somnum exposcant, velut graciles &c. ita etiam aliqui morbi breviori, alii longiori somno vel vigilia curantur pro varia humorum peccantium conditione, quæ omnia bene sunt perpendenda & ponderanda.

Quæres II. Utrum deterius sit plus æquo dormire, quam vigilare? R. Licet & in hac nihil certi determinari possit, nihilominus si experientiam & rationem consulamus, facile conjiciemus longe deterius esse somnum immoderatum quam vigilias: etenim lethargici, comatosi, pervetusta Medicorum observatione infra septem dies pereunt, & apoplectici vix quartum pertingunt, imo sæpe eodem die moriuntur. At vero vigiles plures dies & menses vivere observati sunt. Sic teste *Fernellio* delirum quendam menses 14. insomnes duxisse legimus: *Heurnius de Nizola* sibi narratum refert, quod per decennium somno caruerit. *Seneca* etiam narrat *Mæcenatum* integro triennio ex somno extitisse. Accedit quod somnus morti comparatur, vigilia vitæ, quia per somnum hebetantur sensus & motus cordis, ac sanguinis cunctatur; per vigiliam vero illi acuuntur, hic incitatur & viget;

Aphorismus IV.

Non satietas, non fames, neque aliud quidquam quod naturæ modum excedat bonum.

Contentum seu Intentio.

De facietatis & famis immoderatione.

Connexio: Præsens aph. parum aut nihil differt à præcedenti, sed unus idemque fere esse videtur, in priori enim egit de excessu somni

somni & vigiliæ, in hoc, ejusque prima parte de satietate & fame, in altera parte de omnium rerum aliarum excessu ait, velut naturæ hoste & noxa.

Quemadmodum autem somnus & vigilia intra limites naturæ contenta, quæ in mediocritate consistunt, multa bona & utilia præstant, ita etiam facietas & fames & alia quæcunque: si vero hæc & alia naturæ modum excedant, morbifica & damnosa evadunt: omnis enim res non naturalis & præternaturam, æquitatem naturæ utrinque excedens, damnosa evadit, alia tamen pro diversitate excessus magis, alia minus: omnis autem immoderatio naturæ sensum incurrit, quæ tamen à volentibus & prudentibus facile caveri & præcaveri potest: & quo major in excessu vel defectu error committitur, eo læsio & morbus brevi præsens vel futurus est gravior. Quemadmodum enim in structura & constitutione corporis omnia membra & partes certam exigunt mensuram, atque extensionem, quam si excesserint, vitiosa fiunt: ita pariter quæcunque nutritioni atque conservationi eorundem usui esse possunt, certum modum & æquabilem quandam mensuram, quæ ipsis congruat, exposcunt. Et quidem à satietate, seu ciborum plenitudine gravatur ventriculus, diaphragmatis motus impeditur, adeoque respiratio offenditur, viscera circumjacentia comprimuntur, & succi dissolventes infringuntur, inde mala digestio & cruditas exoritur, atque subinde innumera detrimenta: à fame vero seu nimia à cibis abstinentia, præter morbum illum quem *bulimum* Græci vocant, *macies*, *languor*, *stomachi morsus*, *lypochymia* & similes ægri- tudines proficiscuntur.

Videtur Hipp. in hoc aph. *satietatem pro repletionem, famem pro inanitionem* (quamvis hæc etiam à Caco-chymia & discrasia liquorum provenire possit) accipere: fames autem alia *naturalis* est, alia *præternaturalis*: naturalis juxta *Aristotel.* est appetitus calidi & sicci; sicut sitis est appetitus frigidi & humidus ad restorationem & conservationem corporis humani: hanc famem veteres cum *Gal.* crediderunt oriri in orificio ventriculi superiori à prævia suctione universali partium corporis trahentium à venis sanguinem, atque harum à jecore, hujus autem per venas meseraicas, ab intestinis tenuibus, & à ventriculo ejusque stomacho, qui cum non habeat unde ulterius sugat, in se ipso coarctatus, sensum quaqua ratione molestum subeat, qui ipsis fames dicitur.

Juxta recentiores vero qui se facilius expediunt, fames est tristis quædam sensatio in ore ventriculi propter titillationem vel corrugationem fibrillarum & villorum (à tractatione partium exinanitarum) ad corporis sustentationem: partes enim inanitæ attrahunt alimentum ex arteriis proximis & capillaribus, hæ ex majoribus & corde, & hoc rursum à receptaculo chyli & vasis lacteis, hæ tandem ex ventriculo propria famis sede: unde quam primum ille tractionis sensus sentitur, stomachus sese corrugat, & contrahit, allicitque animal ad sibi cibum suggerendum: sensitivum enim habet appetitum, quo cibos, ut iis tanquam familiaribus fruatur & gaudeat, avide & sollicite appetit.

Brevius & Clarius hanc rem explicat *Tozzius* famem nempe oriri titillatione quadam inducta in tunicis ventriculi, ea potissimum in parte quæ nervosior est, & stomachus appellatur, à succis quibusdam acido acribus illuc confluentibus: *Helmontius* & *Castellus* è liene, alii ab arteriis gastricis & cæliacis id fieri crediderunt; probabilius autem videtur à glandulis in cavum & plicaturas ejusdem ventriculi desinentibus. Etsi autem isti succi in statu salutis perpetim exinde exstillent pro ciborum dissolutione, si tamen contingat ventriculum inveniri vacuum, proritatione quadam stomachum vellicant, & alimenta acquirenda sollicitant, quin & non raro acredine & acore plurimum excedente nec cibis ipsis infringuntur, sed eos veluti momento extenuant & colliquant, ac mox iterum iterumque ad nova alimenta ingurgitanda laceffant inexplebili sane appetitu, quem caninum aut lupinum vulgo appellant: quare ab hac etiam fame plurimum quandoque corpus affici contingit, cum in confinia ægritudinum per ipsam transeantur. Hinc bene *Horatius Lib. I. Satyr. I.* cecinit.

Est modus in rebus, sunt certi denique fines

Quos ultra citraque nequit consistere rectum.

Fames dupliciter excedit, vel secundum *quantitatem* & dicitur *non naturalis*, non autem toto genere præternaturam, nam aliud est præternaturam, quo in *modo* peccat, aliud quod in *essentia*. Vel fames excedit secundum *qualitatem*: *prima* fames (id est secundum quantitatem vel excedentem vel deficientem) contingit egenis & jejunantibus, estque noxia quia humores malos & nocivos ad stomachum attrahit, eumque iisdem replet. *Secunda* fames (id est secundum qualitatem)

tatem) est toto genere præternaturam, quia dependet à causis præternaturam à cacochymia seu dyscrasia humorum & liquorum circulantium, partes rodente & inaniente, neque ad corporis sustentationem & indigentiam, quæ est causa finalis naturalis famis.

Hippocrates in hoc aph. loquitur de fame quæ in *quanto* peccat, cui satietas opponitur, non vero de illa quæ in *quali* fit, qualis est *bovina* seu *bulimia*, cum qua satietas stare potest, & ideo ipsi non opponitur, licet etiam mala sit: omnia enim quæ excedunt mala sunt: quia *quæ talia* tanquam causa omnia sunt mala: cum ab his vel resolvitur, vel opprimitur natura; de priori autem præcipue loquitur à Græcis *λοιμος* dicta.

Satietas duo significat: *inappetentiam*, & *nimiam repletionem*: de *prima* quidem potissimum loquitur Hipp. sed etiam de *secunda*, verificatur aphorismus, magnam enim vim habere ad sanitatem docet Hipp. dum dicit 6. Epid. *non satiari cibis & impigrum esse ad labores sanitatis studium est.* Et alibi in Epidemiis dicit: Cibus, motus, somnus, Venus, omnia mediocria quia sanitas ut supra diximus in mediocritate consistit, à qua si recedatur, statim ægrotare contingit: sed notandum hic bene est, quod minus peccare videantur illi qui sensim modum & mediocritatem excedere assuescunt, longe gravius vero qui, cum jam diu à repletionem cibi & potus, vel à venere & exercitiis abstinerint, quandoque tamen cibis copiosis implentur, vel nimio coitu exsolvuntur, tunc enim æquabilitas destruitur.

Aphorismus V.

Lassitudines spontanea morbos prænuntiant.

Contentum seu Intentio.

De lassitudine spontanea & ejus effectu.

Connexio: Hippocrates in prioribus aph. signa à rebus non naturalibus assumpsit, non modo ad dignotionem, sed prædictionem: in hoc aph. res præternaturam assumit, non tamen in eo excessu, quo

morbos constituunt, sed prænuntiant. Hic aph. propter brevitatem etiam divisionem non patitur.

Lasitudo est *dispositio*, seu accidens, quæ refertur ad motum cum molestia & pigritia, & ideo omnis *lasitudo* est dolor, quia omnis molestia dolor est. *Lasitudo* ab effectibus quos producit in membris, varias ponit differentias: si dolor est gravans, *lasitudo* dicitur *tensiva* si pungens *ulcerosa*; si ambo sentiantur *phlegmonosa*; si ossa veluti contundi videantur, ut in quartanis.

Lasitudo à causis rursus varias patitur differentias: alia fit *sine motu* & dicitur *spontanea*: id est spontanea *lasitudo* ea est, quæ citra causam manifestam exercitii ac laboris evenit, & hæc instantem morbum præsignat: cumque hæc ex causis manifestis & naturalibus jam dictis non fiat, proculdubio ab occultis & morbois exoritur. Alia ex nimio *motu* seu *labore*, & non spontanea nominatur, hæcque tripliciter accidere potest: *primo* aut in exercitatis cum multum se exercent: *secundo* in inexercitatis seu exercitio non assuetis; *tertio* in exercitatis assueto exercitio si exercitium sit excessivum.

Galenus tam in *commentario* hujus aphor. quam 4to *de sanitate tuenda* Cap. 2. Tres adhuc enumerat *lasitudinis* spontaneæ species, à triplici molestia sensuque corporis desumptas: *Primam ulcerosam* vocat, quæ nimirum cum sensu ulceris fit. *Alteram* quæ cum sensu tensionis: *Tertiam* cum sensu inflammationis cum scilicet partes quasi inflammatae percipiuntur. *Ulcerosam* à *cacochymia* sive à vitiosis humoribus membra laceffentibus: *Secundam* à *plethora* seu humorum infantium & distendentium nimia plenitudine: *Tertiam* seu *Phlegmonosam* denique ab utraque causæ superfluitate, nempe ex vitio humorum, qui repleant simul & distendant, vellicent & proritent, partes & artus corporis oriri ait.

Cum ergo à sanguine præter naturam vitiato spontaneæ istæ oriuntur *lasitudines*, qui sanguis diversimode affectus, diversas infert partibus molestias, proinde fit ut morbi portendantur: & quidem ab ejus plenitudine vasa corporis tumescunt & inflantur, unde sensus ponderis, atque ad motum ineptitudo, imminentque mala 1. aph. 3. memorata: *athletarum corpora*. &c.

Cum vero acritatem, falsedinem, aliamve pravam conditionem contraxerit, pruritus, febres, inflammationes, ulcera &c. excitare potest.

test. Oportet autem musculos potissimum & artus, ejusmodi vitiis humorum affici ut lassitudines habeantur, quippe per hos motus speciatim offenditur & corpus ad se regendum & exercendum impotens evadit. Sed nec à sanguine solum vitiato sed à lymphâ quoque succo nerveo imò à reliquis etiam succis præter naturam affectis possunt lassitudines oriri: unde illæ præcedunt vel comitantur sæpe sæpius catharros, arthritides, hystericas passionés, cardialgias, epilepsias, apoplexias &c. Sæpe etiam quorundam morborum ea est natura, ut antequam invadant & sensibilibiter affligant, veluti prodromos lassitudines præmittant, ut experimur in renum calculo quibus multos ante dies contingit laceßere. Etiam aëris mutationes id præstant & lassitudines afferunt ut testatur Hipp. 3 aph. 5. austri auditum hebetant, calligine visum offendunt, caput gravant, fluxiones movent, tarditatem & languorem inducant.

Omnis quidem lassitudo morbum parere potest, sed magis *spontanea*, quia à causa interna occulta & morbosa nascitur, ideo magis timenda: omne enim vitium solutu facilius est, à causa externa & manifesta ortum ducens, dummodo naturam humanam non superet, ut in peste. Unde patet sicut à motu extraneo corporis, vel membrorum fortiori, ita & causa interna lassitudo fieri potest. Patet *secundo* quod motus partium solidarum motum fluidarum & spirituum supponat. Patet *tertio* lassitudinem quamcunque spiritus vel imminutos, vel gravatos vitio liquorum seu humorum arguere. Posito enim torpore fluidorum & spirituum extra statum morbosum lassitudo ipsa in propinquo est.

Cum igitur à sanguine cæterisque humoribus veluti à causis internis vitiatis lassitudines fiant & morbos vel instantes, vel etiam præsentés denuntiant, oportebit iis edomitis, correctis ac repurgatis, morbos ipsos adventantes avertere & impedire, prout species lassitudinis designaverit.

Imprimis autem perpetuo conferent omnia alkalia tum fixa, tum volatilia, quæ diaphoresim & diuresim promovere apta sunt: unde Hipp. 2. prædict. adnotavit, sanguinis mictu solvi lassitudines, si præsertim absque dolore & febre contingat: ita etiam si cacochymia vi-geat & corpus excrementis abundet, adhuc cathartica conventiora pro-

prodesse possunt; instituta interea diætæ quæ præfatis causis & patientis constitutioni ac ætati melius congruere videbitur.

Aphorismus VI.

Qui aliqua parte corporis dolentes, dolorem non sentiunt, iis mens agrotat.

Contentum seu Intentio.

De dolore insensili vel signis mentis laborantis.

Connexio: In præcedenti aph. tractavit Hipp. de lassitudine quæ species est (ut diximus doloris seu tristici sensationis) in hoc aphor. præfente, pergit dicere de iisdem tristibus sensationibus & celebre atque magnæ utilitatis ad ipsum dolorem seu tristem sensationem pertinens tradit præceptum, *causa nempe doloris præfente si dolor non sentitur, mens agrotat*: quo præcepto monet contra vulgi opinionem doloris ablationem non semper bonam esse, quin imo magnum malum ex hoc significari, si præfente causa dolor non sentitur: præterea ut ex hoc mentis turbationem Medicus prænuntiet. Sed

Nota: Pugnancia atque omnino absurda videtur hic locutus Hipp. quippe qui dolentem asserat, posse dolorem non sentire: quomodo enim fieri potest ut quis dolorem non sentiat, cum revera doleat? quamobrem *Celsus & Galenus* de causa doloris potius, quam de dolore ipso sententiam hanc interpretantur. Profecto ergo sic exponendus est aph. *quicumque aliqua corporis parte doloris causam habentes omnino dolorem non sentiunt, iis mens agrotat.* Et forsan *Heurnius* id ipsum meditatus præ reliquis interpretibus è Græco Codice vertit & agit: *Quicumque ex parte aliqua corporis laborant, & nullo modo eam læsionem percipiunt, iis mens laborat.*

Notandum secundo. Non pro dolore quamcunque morbosam affectionem, hic intelligendam esse, ut plerique arbitrantur, sed eam solum læsionem, quæ cum molesto sensu affectæ partis, à re vehementer tactum percellente ac vexante fit, ut clare deducitur ex contextu
ejus-

eiusdem aphorismi, ita ut sensus sit, eos qui à re dolorem, sive molestam sensationem in tactu inferre valentem afficiuntur, si fortasse dolorem illum non percipiant, mente laborare. At vero si de quacunque læsione sermonem hunc protulisset Hipp. procul dubio maligna febre affecti, *hæctici & tabidi*, qui se febrile non sentiunt, mente quoque laborarent. Itaque ergo de dolore proprie sumpto exponendus est aphorismus, id est cum quis inflammationem, vulnus, ulcus, vel quid simile quod dolorem inferre aptum est, re ipsa non persentit, is plane mente læsus est.

Notandum tertio. Quod mirari liceat, quam sicco transeant pede interpretes, causam ejuscemodi læsionis in mente, à partis laborantis indolentia, cum hæc non semper illam ægotantem arguat, ut in *Gangrana & Sphacelo*: Verum qui novit omnes sensationes in cerebro fieri, ut in Anatomia quondam ostendimus, facile difficultatem diluet: quia omnes sensationes excitantur in membris corporis sed percipiuntur à mente in cerebro; hæc autem distracta ecstasi abducta minimeque advertente licet partes reliquæ acriter afficiantur, sensio nihilominus nulla fit; qua ratione *Lethargici, Apoplectici, &c.* ligaturas, ustiones, & alia id genus tormenta, si adhibeantur, minime persentiunt. Sæpe etiam evenit ut sani licet homines, alio intenti & cogitabundi, adstantes nec videant, nec audiant, licet in oculos & aures color & sonus appulerint. Mens ergo advertere debet in ea quæ est perceptura: *Sola enim mens videt, & audit; reliqua cæca & surda.*

Quamobrem cerebrum illius sedes, bene se oportet habere ut sensationes istæ fiant, quæ tametsi per propria organa ab externis objectis promoveantur, revera tamen in cerebro perficiuntur. Hinc sagax *natura nervos* omnes, quibus sensationes peraguntur in cerebri meditullio colligavit, ut in ipsum quæ ex organis percipiuntur, recta pertingant, atq; in commune sensorium devolvantur, ut de illis judicium ferat. Hoc autem si forte consopiri aliterque ægotare contingat, motiones, licet periculosiores vehementes & dolorifice, minime percipientur; ut proinde recte dictum sit ab *Hippocrate* cerebri & mentis læsionem inde designari.

Hujus Aphorismi brevitatis & continuïtas divisionem non patitur.

Omnis ergo morbus, qui non sentitur & animadvertitur, vel mi-

nus æstimatur quam debet, semper gravior est habendus: Non animadvertuntur autem morbi, non solum ex negligentia, sed etiam & præcipue quando mens laborat, vel quando alio intenta est: ut in iis qui pugnant, non sentiunt dolores eo tempore. Vel quando sensus partis est abolitus ut in *Paralysi*: vel quando instrumentum sensus est læsum.

Mens dupliciter sumitur *late* & *stricte*; late sumitur pro anima in genere, de hac non intelligendus Aphorismus. Stricte & usitatus mens significat vim ac virtutem animæ humanæ, *rationalivam, dijudicativam & cognoscentem*: & de hac ultima loquitur *Hippocrates*.

Egregiam differentiam *animæ* & *animi* proponit doctissimus *Linden*: Animus & anima in hoc inquit distant: *Animus* est quo sapiamus: *Anima* qua vivimus: Sapimus *animo*: Fruimur *anima*: Medicis anima *vitalis* est, animus *animalis*.

Mens laborat tum quæ dolorem vel aliud malum gravissimum, levem vel plane non æstimat, tum quæ dolorem vel aliud malum externum obvium non sentit; tum quæ objecta tristia, dolorifica, læta, supina, confusa, turbata, non percipit.

Mens quoque laborat quando spiritus laborant, vel dum eccentrici seu turbati (ut in febribus maxime in phrenitide, ut diximus, in qua mens intense laborat) vel suffocandi seu extinguendi sunt. Unde periculosissime illi degunt ægri qui in periculo versantes, nec ægrota-re se credunt.

Dices sola memoriæ læsio & oblitio, videtur esse causa, quod dolentes dolorem non sentiant? *R.* Negative: nam stulti & obliviosi etiam quando feriuntur sentiunt, quamvis non ita acute & distincte.

Instabis: In stultis mens ægrotat, ergo non sentiunt? *R.* in stultis mens ægrotat in gradu remisso & confuso *concedo*, in gradu intenso seu distincto *nego*.

Aphorismus VII.

Quæ longo tempore extenuata sunt corpora, sensim (seu lente) reficere oportet, quæ vero brevi, celeriter. (seu breviter. seu repente.)

Con-

Contentum seu Intentio.

De reficiendi seu alterandi modis.

Connexio: Cum in superioribus egisset de præcautione *neutrorum* decidentia, in hoc de restauratione neutrorum convalescentia ait, & tradit perquam utile præceptum de adjectione seu refectione extenuatorum. Ante omnia autem bene notandum: *Hippocratem* non de ea hic agere extenuatione, quæ viventibus etiam sanis ad extremum senium atque ad interitum usque perenniter accedit, cum ut alibi dictum animalium corpora donec vivunt, continuo absumantur, ac propterea perenni indigeant per cibos restauratione, ne omnino contabescant, & citius quam deceat extenuata emoriantur: sed solum de ea loquitur extenuatione, quæ à morbis inducta est, ex quibus quandoque tanta fit brevi tempore corporis consumptio, ut indicio sit ipsam carniū substantiam colliquari & absumi. Pertinet hic aphorismus ad eam Medicinæ partem quæ *Analeptice* vocatur, si quidem docet, quo pacto nos gerere oporteat in reficiendis iis, qui nuper à morbo convaluere.

Hic Aphorismus duas habet partes: *Prior* pertinet ad eos, qui ex longo tempore extenuati sunt, illos lente esse reficiendos: *Alter* vero ad illos qui brevi extenuati sunt, breviter etiam esse reficiendos: debet enim reditus ad statum naturalem esse similis recessui: & ideo corpora quæ longiori tempore sunt extenuata, longiori etiam tempore sunt reficienda, quia sunt languida, & in iis non tantum humores & spiritus sunt consumpti, sed etiam partes solidæ, & eorum fermenta sunt exsoluta, quæ cito refici non possunt, veluti corpora quæ celeriter extenuantur: in his enim tantum humores, & potissimum spiritus sunt consumpti, qui brevi tempore refici possunt. Experientia docet, in quibusdam morbis paulatinam magis, in quibusdam celeriore curem locum habere: natura enim non facit saltum, nec alteratio in instantiaque fieri potest: Etenim quotidie videmus in longis extenuationibus, non tantum de substantia nostri corporis spirituosa & humorosa, sed insuper de solida plurimum consumi; ipsa viscera squalidam & hecticam contrahunt siccitatem & contabescantiam, ex qua calor partibus insitus in tantum debilitatur, ut copioso conficiendo a-

limento non sufficiat, imo ab ejus nimia copia opprimeretur & suffocaretur: & cum restauratio deperditarum partium solidarum durum & viscosum requirat nutrimentum, cujus subactio caloris nativi vigorem præsupponit; hinc *lente reficere oportet*; quia multo cibo gravantur potius, quam reficiantur, ideoque in cruditates labuntur, & non raro etiam in obstructions, cachexias & tumores: exhibendo nempe cibos paulatim, in pauca quantitate, repetitis vicibus (id est præterpropter omni sex horio, non autem in singulis duabus horis, ut quidam putant) qui sunt boni succi, facilis concoctionis, seu Euchimi & Eupepti, tenuium partium, id est modici alimenti, substantiæ humectantes, quales sunt: juscula destillata, consummata, contusa, expressa seu pistata, ova sorbilia, vinum &c. ut sic facile coquantur & ventriculus melius conficiat atque nec difficulter per exsuccas corporis partes & viscera penetrent (solidæ enim partes ac membra corporis jam diu à morbo conflictata quasi exaruerunt, alvusque præ morbi diuturnitate reddita ignava, negligentius in ea, quæ nutritui inserviunt, incumbit, convenientque valvulæ ac ostiola meatuum, atque extabefactæ glandulæ suo quoque defunt officio) nec non tandem viribus insensibiliter & sensim addendo, corpus nostrum ad victum plenior paulatim disponunt. Quæ dicimus de cibo & potu in refectione corporis, idem intelligimus de reliquis rebus non naturalibus nempe: *Somno, exercitio, aëre, animi passionibus moderatis.*

Quæ vero brevi & celeriter extenuantur corpora, ea etiam brevi & celeriter reficienda sunt: quia quæ corpora brevi tempore extenuantur, in his salvis omnino visceribus sola spirituosæ & humorosæ substantia consumitur, & robur viscerum non tam graviter labefactum est, viscera ergo robusta, cibum etiam copiosum concoquere & partis subtilioris jacturam brevi tempore refarcire possunt, quia facilius est absumptos humores & sanguinem ipsum restaurare, quam membra & solidas partes, quæ ex diuturniori morbo omnino exarefacta, longe difficilius reficiuntur, segniusque consumptam substantiam recuperant. Hæc ergo via Medico prudenti perpetuo est eligenda, quæ licet longis ducat callium ambagibus, ad indubitatam tandem perducit sanitatem, è contra vitanda, quæ licet brevissimo ducat tramite, per invia deducit præcipitia non sine periculo superanda. *Extenuatio est totius vel partis alicujus diminutio præter solitam magnitudinem*

nem seu molem. Ejusmodi autem corporum ex morbis *extenuatio* non unius modi est, aut æqualiter omnibus contingit; molliora enim puerorum corpora facillime ex inedia vel levi etiam ægritudine extenuantur, difficilius vero senum & aliorum: In gracilibus etiam, atque ex morbis urgentibus, major equidem fit carniū consumptio, at vero longe minor in obesis & succi plenīs, atque ubi morbi accidunt ex crassiori humore progeneriti.

Extenuatio ergo duplex est, *una* quæ *celeriter & sensibiliter*, *altera* quæ *insensibiliter & tarde* fit: *alia* quæ ab evacuatione *sensibili* fit, aut *insensibili*, si modum excedat, *altera* quæ oritur ex cacochymia: *Prima* repletionē curatur: *altera* vero evacuatione. *Extenuatio sensibiliter* fit per hæmorrhagiam cujuscunque partis, fluxum alvi, sudores, dolores, inedias, curas, vigilias, motus, deliria, ut in febribus ardentibus, & colliquativis; ita quoque ab obstructionibus.

Cito autem reficiunt, præter dicta mox ante, præprimis odores, hinc potus, inde sorbitiones, & gelatinæ, postea cibi humidiores, & tandem sicciore: Inter mille alia, quæ apprime huic scopo inserviant, quæ nempe alendo humefaciant & exsuccas partes irrorent illarumque poros promptius subeant & repleant, inserviet inductus jurium usus, præsertim ex viperarum carnibus ad reficienda convalescentium & tabidorum corpora utilissimus. Hinc patet quam male plerique Medicorum agant, qui famem ut expleant convalescentium illos permittunt multo cibo gravari, putantes, oportere plurimum eos ali, ut vires amissas & carnes absumptas resumant, cum tamen eo hebetentur magis atque in morbos recidant: Et enim propterea quod langueant, moderato cibo atque paulatim nutriendi sunt. *Extra:* epithemata cordi, pulsibus, ventriculo, admoveri possunt.

In Praxi generaliter *sciendum*: Morbos *chronicos* ob paulatinam congestionem, *successivam*, *acutos*, magis *celerem* curationem & refectiōem exposcere.

Sciendum II. Spirituum penuriam celerem restitutionem amare, humorum alterationem longiori mora egere.

Dices Gal. 6. Epid. Muliericuidam extenuatæ plurimum sanguinis extraxit & sic restituit: Ergo non refecit per additionem sed per subtractionem? R. Illam extenuationem factam fuisse à repletionē,

deficientibus scilicet menstruis; ergo bene fecit *Gal.* præsertim cum repetitis vicibus id præstiterit.

Instabis: Si id per Venæ sectionem fiat, id quoque fieri poterit per purgationem, quæ tamen magis attenuat? *℞.* Id per purgationem non tantum posse, sed etiam debere practicari, quando corpus pravis humoribus impredientibus nutritionem, vel promoventibus magis ejus absorptionem, est refertum:

Dices II. Vires multum dejectæ (ut in chronicis) multam petunt refectionem, ergo non lentam? *℞.* Multam petunt refectionem affatim factam *nego*, sensim factam & proportionatam, ut vires durare possint *concedo*.

Aphorismus VIII.

Si à morbo cibum capiens, quispiam vires non recipiat (seu corroboretur) copiosiore alimento corpus uti indicat: si vero cibum non capienti, idem eveniat, vacuatione indigere sciendum est.

Contentum seu Intentio.

De Robore corporis reparando.

Nota vid. 2. aphor. 31. qui fere idem est.

C*onnexio:* Hic aphorismus tam cohæret (inquit Expertissimus Paulus de Sorbait Comm. in aphor. hoc loco. m. fol. 185.) cum præcedente, ut sit velut annulus in catena.

In priori dixit quæ lente extenuantur, lente sunt reficienda, quæ brevi, breviter, agens de refectione convalescentium, eo nempe modo reficiendi esse, quo modo consumpti fuerunt: in hoc aph. reddit rationem hujus dicti: Si enim quærat quomodo corpora sint reficienda, hic vere rationem docet, dum agit: Si quis à morbo cibum capiens non corroboratur, copiosiore alimento uti significat: si vero cibum non capiente (id est juxta *Gal.* & *Hipp.* non appetente) id fiat, quod evacuatione egeat.

Divi-

Dividitur hic Aphor. in duas partes: in *prima* docet quando per excessum alimenti corpus non reficitur & nutritur: In *secunda* autem quando per cacochymiam illud ipsum prohibetur: & tandem quid in utroque casu faciendum.

Si quis ergo in statu convalescentiæ constitutus, postquam scilicet morbum superavit, & vivendi modum mutavit (ante v. g. sorbitionibus, jam vero solidiore victu utebatur) non reficiatur, quin imo in dies magis & magis deficere videatur, signum est ægrum copiosiore victu quam decet uti, adeoque detrahendum, & iterum ad sorbitiones & tenuiorem victum redeundum esse: quia probabile est, corpus ita per morbum exsiccatum esse, temperaturam mutatam, aut vasa corrugata exstare, ut cibus solidior aptus non sit ad reficiendum, vel calor naturalis ita debilis, ut cibo conficiendo non sufficiat: convalescentis enim corpus nisi reficiatur vel cibi detractionem vel evacuationem requirit: cruditas etenim & improportio, detractionem, corruptio, evacuationem exigit; quia nulla alia assignabilis est ratio, cur à cibo non reficiatur corpus? quam vel quia crudus & indigestus manet ab excessu, quod ex appetentia cognoscitur, vel quia corrumpitur à morbi reliquiis adhuc in corpore existentibus, hujus indicia sunt, inappetentia, sitis, amaritudo, vigilia, aut aliud excedens naturæ limites: assumptum enim alimentum minime in succum alibilem commutatur, quem viscera conficere nequeunt, sed majori ex parte degenerat in excrementum; veluti non recte à concoquente vi ex præcedente morbo labefactata confectum, & elaboratum. Ideo oportebit parcio-rem cibum assumere, quantum scilicet vis concoctrix viscerum conficere & congruenter transmutare queat. Bonæ autem vel malæ refectionis signa nobis præbent omnium actionum tum naturalium tum vitalium in dies crescens vel decrescens vigor, hinc si nec faciei color redeat, nec actiones quotidie melius exerceantur, sed potius in deterius ruant, cibum imminuendum esse, signum evidens est, aut qualitatem ejus esse immutandam. Palam enim constat robur corporis, si non omne, præcipuum tamen & substantificum ex assumptis cibo & potu repeti: Hinc posito appetitu bono, & assumptione sufficienti, vires consequuntur vel reparantur. Dupliciter autem potest cibum appetere convalescens vel *naturaliter* ex inanitione, tum nisi reficiatur, plus assumit quam decet: vel *præternaturaliter* ob intemperiem
frigi-

frigidam (ut Veteres) ob acidum esurinum (ut Recentiores) aut mordentem & acrem humorem (prout utrique) tunc non solum indiget detractiōe, sed purgatione: In *primo casu* calorem innatum, seu spiritum vitalem fovemus, cibum detrahimus (obrutum enim corpus alimentorum copia commode uti nequit, quin debiliter, cum à tali addypaxia seu voracitate sæpe obstructiones, inflationes & ariduræ oriantur) In *secundo casu*, paulatim seu per epicrasim (seu intervallatim) purgamus, quia talis purgatio, sæpe appetitum & consequenter vires reddit.

Sciendum autem est quod status corporum passim statuatur triplex à Medicis I. secundum naturam *sanorum*, II. præter naturam *agrorum*, III. medius *neutrorum*: in omni statu alimentum ad proportionem ejus, quod consumitur, & virtutis, dari debet: si quis vero alimentum sani, Neutro, neutri vero ægro exhibeat, magnopere lædet, magis enim offendere in ægris sanorum alimentum scripsit *Hipp. 7. aph. 75. & lib. de vet. Med.* quam neutrorum sanis; veluti etiam si quis sano ægri alimentum & nutrimentum adhibeat, sano morbus sit; In unaquaque natura tantum dare oportet, quantum vires conficere possunt sine detrimento. Nutrimenti etenim concoctio, distributio, assimilatio, utpote actiones naturales, per robur partium promoven- tur plurimum: robur autem partis in soliditate, & caloris nativi & spi- rituum copia essentialiter consistit, quæ una appetitum reconva- lescentibus quantocyus redeunt, unde si quis in hoc casu ad satietatem comedat, in manifestum alicujus recidivæ, vel alterius morbi, ex- cruditate oriundi, imo ipsius mortis periculo se committit. Unde Poëta

Æger cui morbum macra quadragesima claudit.

Cum Christo rursus paschale surget ovans,

Æger post morbum, qui Bacchanalia vivit

Nunc manet æterna, parca jejuna fame.

Hinc Medicus in reconvalescentibus, non ad appetitum, sed ad vires respiciat: docente *Hipp. Lib. de locis: si corpus superat cibos ingestos, flo- ret, corroboratur, bene coloratum efficitur & succulentum; sed si vincatur atque succumbat, ipsi quidem cibi per alvum secedunt, & alia mala faciunt, corpus autem gracile redditur.* De hoc reconvalescentium victu etiam loquitur infra 2. *Aph. 10. Impura corpora, quo plus nutrieris, plus lades.*

Redea-

Redeamus nunc ad secundam aphorismi partem: si nempe convalescens, seu qui à morbo convalescere videtur nullumque habeat appetitum, nec tamen largiori cibo indulgeat (quamvis melius sit à minori appetitu ad paulo maiorem ascendere, quam à magno statim deficere, unde *Hipp.* ipse in convalescenti magis laudat inappetentiam, quam immoderatam appetentiam) signum est, corpus esse repletum malis humoribus cacochymicis seu excrementitiis, qui etiam attractionem & appetitum, vel sensum obtundunt, unde nulla in stomacho sentitur fames; quod ipsum contingit si non tantum in stomacho, sed etiam in aliis partibus humores cacochymi exstant; in quibus casibus purgatione epicratica tamen opus est, nam si tales bis, aut etiam ter expurgentur, paulatim incipiunt nutriri, appetitumque recipiunt, ingestos cibos exactius conficiunt, & omnino curantur; quia in corporibus impuris assumptum alimentum in succum inutilem degenerat: Teste *Hippocrate*: *Corpora impura quo plus nutrieris plus lades* 2. *aph.* 10. nam non assumere seu non appetere perpetuum est imperfectæ criseos, & saburræ biliosæ in corpore stagnantis indicium, quæ utique repetitis blandioribus cholagogis educenda est, nisi velis tuum patientem evidenti superventuræ recidivæ periculo exponere, teste *Hippocrate*, mox infra sequente *aph.* 12. h. f. *quæ morbis relinquuntur* (post iudicium) recidivas facere consueverunt. Et *aph.* 17. h. f. *ubi alimentum præternaturam plus ingestum est, hoc morbum facit, ostendit autem sanatio*: de quibus in sequentibus. Sed

Quæres an ejusmodi malorum succorum evacuatio per vomitum potius, an per dejectionem facienda sit? R. Hoc internoscere oportet ab eorundem humorum inclinatione, loco, constitutione & consuetudine ægri, anni tempore, aliisque ab *Hippocrate* notatis; maximo 4. *aph.* 4. 6. 7. 8. & 9. etenim graciles & facile vomentes, æstate per superiora, hyeme vero & difficulter vomentes ac carnosius per inferiora opportunius purgantur. Sic pariter ducere oportet, quo maxime natura vergit & per loca conferentia teste *Hipp.* 1. *aph.* 21. quæ sane in convalescentibus præcedenti morbo, non leviter conflictatis observanda sunt.

Aphorismus IX.

Corpora cum quis purgare volet, ea fluxilia facere oportet.

Nota. 7. Aphorismum 70. qui fere idem est.

Contentum seu Intentio.

De preparatione purgationum.

Connexio: Postquam præcedente Aphorismo Hipp. præcepisset quosdam assumentes cibum, & non proficientes, vel esse purgandos, vel iis cibum esse detrahendum, in hoc aphorismo adoptatam purgationem rite & tuto perficiendam necessarias conditiones, utile & necessarium præceptum affert; dum inquit: *corpora cum quis purgare volet, ea fluxilia facere* (id est præparare) *oportet*. Generale ergo ponit præceptum corpora esse præparanda, antequam pharmacum assumatur: & quidem, si illa nuper à morbis convaluerint, si etiam re ipsa ægrotent, modo cacochyma sint.

Hic autem ante omnia sciendum; *primo* per purgationem non tantum eam per inferiora & alvum, sed etiam eam quæ per superiora, seu vomitum fit, intelligendum esse; ad quam procurandam, tam Antiqui, quam etiam nos cum illis corpus præparamus variis remediis v.g. per oximel &c. antequam ad electivæ purgantia descendamus. Præterea, ut in claris terminis versemur, & non ignotum per ignotius explicemus, operæ pretium est prius scire quid præparationem Medici proprie vocitent & quid intelligant. Unde

Sciendum *secundo*! Cum palam constet variarum rerum depurationes, ex professo certos præesse artifices, qui certo artificio illas ita disponunt & præparant, ut suas alias pertinacius adhæsuras impuritates, ultroneè & illibenter à se avelli patiantur: Sic *Aurifabri* prævia coctione cum tartaro; *Sclopetarii* unctione olei: *Lotrices* immersione in lixivium & affriktione saponis sua subjecta ita dealbant, poliunt & mundant, ut ad summam puritatem naturæ possibilem deducant. Ipsi *coqui* variis artibus cibos antecedenter præparant, ut palato magis grati & stomacho minus reluctantes efficiantur, nunc macerando,

v. g.

v. g. Carnes duriores Cervorum &c. nunc aëri exponendo v. g. Carnes molliores gallinarum, caponum &c. nunc fustibus contundendo, v. g. carnes mediocres, vituli castrati, seu vervecis &c.

Hoc eodem artificio Medici non raro indigent, maxime ubi cacochymia adjunctus lentor vel acrimonia non solum sui educationem, sed præviam ad iter dispositionem requirit: Cum enim omnis humor, ut proportionatum naturæ expellenti evadat subjectum, certam & quidem mediocrem consistentiam habeat necesse sit; ne vel vim expulsiuam eludat vel obstinate eidem refragetur: hinc sequitur infallibiliter, deficiente natura, humores artis opera eo deducendos esse: Quis quæso, mucilaginis pituitosæ lentorem, per modum crassioris visci partibus adhærentem, nunc cerebri substantiam, nunc pectoris, stomachi, intestinorum, uteri &c. pariter oblinentem, simplici medicamento solutivo & dejectorio evacuabit? nisi prius absterforio & incisforio glutinositatem attenuaverit, à partibus absterferit & in fluidiorem formam deduxerit: Quis nisi temerarius & Empyricus, humorem acrimonia biliosa suspectum suapte natura facile irritabilem per irritationem purgantis remedii factum effrænem, periculosos causaturum orgasmos, in sua sincera forma quantocius susque deque purgantibus movere audebit? nisi prævia edulcorantium & præcipitantium humidorum copia acrimoniam diluerit, fixiorum usu volatilitatem correxerit, amaricantium temperatiorum adminiculo eandem partibus impactam absterferit, & sic ad purgationem habilem reddiderit, quis, nisi in arte Medica minus fundatus, *acidum*, vel sero involutum, vel bili confermentatum, partes per quas transit non semel corrosurum, sæpius excoriaturum, & vix non semper in transitu, superstitie hac acrimonia, aquæ fortis æmula per partes summe sensiles, torminosum deducere præsumet? nisi prævia invertentium conchiliorum, crustaceorum, martialium, aut alkalium fixorum opera ejus acuminosa spicula aliquo modo obtuderit: idem dicendum de humoribus coagulationis caractere infectis, à circulo deligatis, in substantiam partium à sanguine præterfluente, veluti limus à flumine, relictis & stagnantibus, ab acido præter naturam, in grumofam lardeaceam, imo scirrhusam duritiem deductis: Certum enim & evidens est, quod quis prius optimi etiam sanguinis & succorum vitalium, per cathartica integras colliquabit libras, quam ut vel unicam hujus co-

guli unciam expurgabit. Ipsi quoque qui in massa sanguinea fluctuant humores cacochymici, non æque sine prævia præparatione ad purgationem apti sunt; si enim sint crudi (id est particulæ heterogeneæ, naturæ hostiles, cum bonis mixtæ, sanguini & sero alte incoctæ) dum sine boni consortio non dimittuntur: in quo casu si quis purgare tentet, infertur vis naturæ, vires sine necessitate diminuuntur, tormina, colliquationes, anxietates, spirituum dissipationes, virium inutiles dissolutiones, aliaque gravia symptomata excitantur, aut consequuntur, atque quod pessimum est, rebus semper in pejus ruentibus, & sine ulla Euphoria seu conferentia; si vero sint cocti (id est heterogenea ab homogeneis per actionem caloris naturalis vel febrilis separata & præcipitata & sic sero superficialiter innatantia) tum jussui purgantium facile auscultant.

De hac quidem humorum præparatione jam abunde egimus supra lib. I. Aph. 22. *concocta medicari oportet, non cruda.* Aphorismus autem noster magis respicit præparationem corporis: dum inquit *Corpora cum quis purgare voluerit fluida facere oportet*: id quod expressius ostendit 4. aph. 13. ubi inquit: *præhumectanda esse corpora eorum, qui helleborum sunt assumpturi*: ne nimirum pharmacum magna vi & inani conatu parum aut nihil educat. Et 7. Aph. 70. *Corpora cum quis repurgare volet fluxilia faciat oportet, & si quidem supra velit, alvus sistenda, si vero infra, humectanda.* Si enim corpus, id est partes continentes, cum contentis ante purgationem prævie humectentur, id est fluidiores & humidiores reddantur; non tantum ad purgationem, sed omnes universim evacuationes optime prædisponuntur: *Primo* enim viæ efficiuntur capaciores, magis patulæ, lubricæ, à stimulo præterfluentis excrementi tutiores, ad transitum corporum etiam duriorum habiliores.

Secundo quod excrementorum lentor attenuetur, crassities diluatur, acrimonia enervetur, maligna qualitas obtundatur. Huic doctrinæ laudabiliter inhærentes Galli, omnibus magnis curis, sive per repetita violenta cathartica, sive per longa lignorum decocta, sive per inunctiones mercuriales &c. instituendis, & institutis; nunc lactis, nunc feri lactis, nunc jusculorum humectantium, nunc balneorum, nunc clysterum lenientium, verbo, convenientis diætæ usum præmittunt, ut sic corpus reddatur fluidius, & humores Medicinis
magis

magis obediētes, viæ ab excrementis non lædantur, excrementa à viis non impediuntur: quam methodum nos quoque in nostris partibus, cum euphoria & fructu passim imitamur, maxime ubi præternaturalis corporis siccitas coindicantis rationem habet. Eandem fere sententiam (ut mox supra diximus) repetit divus senex 4. aph. 13. *qui ad elleborum non facile supra purgantur, eorum corpora ante potionem copiosiore alimento & quiete præhumectanda*: ciborum enim maxime liquidorum, & omnis acrimoniæ expertium copia, si quid aliud corpora nostra succulenta efficit, cui si quies cum somnis longioribus accedat, quid mirum humores solito fluidiores & ad purgationem aptiores fieri.

Ex his ergo hætenus dictis, patet, cuique præparationem esse duplicem: *una*, quæ pertinet ad humores: *altera*, quæ spectat ad partes corporis, per quas educitur humor: Humor præparatur, attenuatione, incrassatione, coctione. Corpus vero viarum apertione, humectatione, assuefactione, vigilia & motu: viarum apertio comprehendit canales per quos excrementa & humores educi possunt & solent, idque vel per intestina, menses, urinas, os, nares, aures &c. unde bene notandum quod vox ista *purgatio* non solum de dejectione sit intelligenda, sed de omni alia expulsionē seu per vomitum, urinas, menses, hæmorrhoides, sudores, illa fiat.

Observandum & notandum II. Medicamenta præparantia vulgo digestiva appellantur, mutuato nomine ab operationibus chymicis & chyrurgicis, nam eo modo, quo digestivus calor in furno chymico, subjectum spagiricum optime referat, ejus cruditates corrigit, virtutes exaltat; quo medicamenta digestiva chyrurgica materiæ purulentæ optimam & laudabilem conciliant consistentiam, simili modo hæc præparantia humores nostri corporis digerunt. Ab aliis Authoribus *Alterantia* vocantur, nec alio respectu alterantia ab his digestivis differunt, nisi quod alterantia ad simplicem quoque intemperiem seu discrasiam sine materia adhibeantur, nec semper sint purgantium prodromi, prout digestiva esse solent.

Notandum III. Longæ præparatoriæ ceremoniæ *Italæ, Galliæ & Hispaniæ* usuales ex decoctis & syrupis herbaceis compositæ, malæ & sapore nauseosæ, nostrorum Germanorum stomachos longo usu destructuræ infallibiliter, prædictis nationibus relinquendæ sunt, quæ à

Juventute similibus iusculis & deliciis dulcibus enutriuntur: Germanorum enim stomachus, carnibus & vini generosi potui asvetus, talia nimium refrigerantia & dulcia ac nauseosa lavacra supportare nequit: Hinc Poëta

Dum Tevto rubrum potat, comeditque cruentum

Sangvineos latices, tunc edit atque bibit;

Contra Italus gelidam potat, comeditque polentam

Sangvineos latices esurit, atque sitit.

Praxis moderna, & hodiernum fertile sæculum gratiora mole, virtute tamen non minora substituit.

Notandum 4. Methodum ordinariam esse ut per 4. vel 5. dies digerantur, sexta deinde expurgentur, repetendo vicissim usque ad totalem causæ morbificæ ablationem, vel saltem manifestam symptomatum remissionem. Quandoque in nodulis laxativis, pulveribus, aliisque formulis, digerentium & purgantium vires conjunguntur, non infelici successu: In hoc atque simili casu purgantia in dosi incompleta & quasi pro stimulo adduntur, ita ut singulis diebus ultra tres vel quatuor sedes non efficiant.

Notandum 5. Qui sensu intestinorum acutiori præditi sunt, ex usu præparantium, salinorum, abstergentium, in tormina facile deducuntur, à quibus admixto opio in dosi refracta sese præservare possunt.

Notandum 6. Alvus in usu digerentium quotidie respondeat, vel clystere sollicitetur, ne materia mota & deligata alio feratur.

Notandum 7. Acidum austerum ponticum, & ut vulgo dicitur melancholicum ex ratione duplici, correctione indiget. *Primo* ne transeundo partes, eas convellat vel corrodat. *Secundo* ne purgantium vim & activitatem eludat & infringat: chalybs in hoc nemini cedit, alcalia quoque fixa & testacea eundem effectum faciunt: ubi vero acor omnino fixus ad scorbuti naturam accedit, alcalibus volatilibus v.g. nasturtio, beccabunga, cochlearia &c. admixtis quoque aromaticis, eodem sale volatili turgidis, aut etiam salibus volatilibus C.C. succini, ♀, viperarum, sanguinis humani, &c. melius corrigitur.

Notandum 8. Biliosa acrimonia non tam in vertentibus acidis, quam dilatantibus insipidis & aquosis & diluentibus contempera-

Notan-

Notandum 9. Lympha (seu serum, utpote omnium humorum & medicamentorum vehiculum & menstruum universale) viscosa & glutinosa, nunc medicamentis incidentibus, nunc aliis calidis, acerbis, aromaticis, attenuantibus & resolventibus præparanda est, si vero acrior & salsa nimis, absorbentibus & edulcorantibus id præstandum. Si vero sit defectus lymphæ ea humectantibus substantiis ad augenda, nihil enim remoratur magis purgantia, vel alvum adstrictam reddit, quam siccitas & lymphæ defectus, vel fixitas ejusdem, & coagulum

Notandum tandem, nos formulas horum & singulorum digredientium & præparantium huc non apponere, cum passim in Autorum voluminibus abunde tractentur.

Quæritur ergo pro conclusione hujus aphorismi: Quando in morbis humores & corpus præparandum, vel quando non præparandum? & tunc præparatione non indigemus, quando humor ex natura sua est fluxilis v. g. ubi serum liquidum; *Secundo* ubi subitanea fit turgescencia & orgasmus, & humorum raptus ad partem nobilem cum subitaneo mortis periculo, in hoc casu enim mora locum non habet, quia majora damna & lethum affertur. V. G. Apoplexia, Hydrops, colica &c. *Tertio* ubi particule heterogeneæ à succis volatilibus jam sunt separatae: *Quarto* ubi cruditates & obstructions absunt, & humores primis tantum qualitatibus peccant, &c.

E contra: præparatione indigemus, I. ubi humores, præter naturam inducias præbent, ut prævia coctione & secretionem tutius repurgentur & educantur, ut potissimum fit in febribus. II. In morbis chronicis, ubi primarum qualitatum excessui lentor, crassities, aut acrimonia conjuncta est: III. ubi vitium in via. IV. Ubi humores natura sua immorigeri & rebelles &c. in his & similibus casibus præparatio prævia absolute necessaria est.

Aphorismus X.

Impura corpora quo plus nutrieris, eo magis læseris.

Nota: 7. Aph. 65. & 67. qui fere idem dicunt.

Contentum seu Intentio.

De nutritione cacochymicorum seu impurorum corporum.

Connexio: In præcedenti aphorismo *Hippocrates* retulit conditiones prærequisitas ad bonam purgationem, in hoc vero aph. ostendit, quanam corpora purgatione maxime indigeant, statuitque impura, quæ quanto magis nutriuntur, tanto magis læduntur.

Connectitur quoque cum Aphorismo octavo h. f. sicut causa cum suo effectu, docet enim, cur corpora purgatione indigeant, quæ à cibo modico non roborantur ex cibo.

Brevitas hujus Aphorismi divisionem non patitur. Ante omnia autem scire oportet, quid & quotuplex ac unde sit impuritas. Impuritas est vitium vel corruptio quædam humorum seu liquorum circulantium, in prima, secunda & tertia regione, qua mediante fiunt naturales vitiosi, & alendo corpori inutiles, & ad morbos generandos apti & idonei.

Duplex est impuritas: *Vna* quæ Plethora, seu solius sanguinis longe lateque sparsa, quæ improprie impuritas, magis proprie potius corruptio quædam dicitur. Et hæc iterum duplex est, *una* ob *plenitudinem*, quæ evacuationem largam & longam requirit; altera ob aliam causam, nempe *defectum*, seu *diuturnam inediam* &c. quæ quandoque refecutionem exigit, & alimento subinde potest corrigi:

Hæc Plethora seu Sanguinis impuritas iterum *duplex* est: *Perfecta* & *Imperfecta*. *Perfecta* est, quando sanguis ex toto corruptus est (a quibusdam plethora cacochymica sanguinea dicta) quæ corrigi amplius non potest, sed necessario evacuari debet, quod corruptum est: *Altera* seu *Imperfecta*, in qua non totus sanguis sed pars ejus corrupta est, & illa pars sanguinis quæ nondum corrupta est, potest præservari, & propter hanc partem quæ adhuc integra est, alimentum porrigimus.

Impuritas alia est, quæ *cacochymia* dicitur, seu aliorum humorum seu liquorum; quæ rursum *duplex* est, *cum*, vel *sine* putredine: & in hac alimentum detrahendum est, ad procurandam eorum coctionem, quæ

quæ novi alimenti accessione impeditur: quia ex adjectione alimenti in corpore impuro augetur quantitas & conservatur qualitas: omnis autem nutritio quæ adhibetur corpori, vel est ad robur & refectionem vel ad conservationem & vitæ necessitatem: Impuritas vero corporis neutrum secure admittit.

Corpora equidem impura pravis omnino scatent humoribus, quia tum sanguis, tum fermenta viscerum perpetim inquinantur, eaque præsertim quæ coctionibus & secretionibus sunt dicata.

Hæc impuritas cacochymica plerumque in ventriculo, hepate, liene, vasis, & habitu corporis reperitur, alimentumque liberius prohibet, non quidem semper & perpetuo, sed tam diu solum, donec humores cacochymici fuerint evacuati.

Patulum enim est fermenta morbosa esse sui semper multiplicativa: Sic enim chylus (ut à primitivo quodam fermentorum ante incipiamus) inquinatus & conspurcatus, facescit in causam morbificam sanguinis, sanguis in aliam; juxta illud: *Qualis chylus talis chymus, qualis chymus talis sanguis, qualis sanguis, tale alimentum, & tandem sanitas vel morbus.* Quamobrem, alimentum quod primo incipit in ventriculi digestionem à naturali conditione deflectere, mox etiam in reliquis visceribus, magis magisque depravatur, ac deinde arterias & venas ingressus, nec nutrire, nec vitam sustinere valet, unde cachexia, marcores, febres mali moris exoriuntur. Impura ergo corpora quo plus cibis implentur, eo copiosioribus succis inutilibus infarciuntur, & consequenter magis læduntur, quam nutriuntur.

Corpus impurum dicitur dupliciter: vel *extra solum*, vel *intus solum*, vel *intus & extra*. In primo casu licet aliquando corpus, in secundo, nequaquam nutrire. Impuritas ad *intra* cognoscitur ex impuritate excrementorum, urina potissimum: ubi vero pura sunt excrementa, tunc corpus mundum est ad *intra*; ut docet Hippocrates 2. Aph. 15. infra.

His prælibatis nunc superest rationem dare ulteriorem aphorismi, cur impura corpora nutriendo lædamus; & hic est: quod alimenta impuritatibus misceantur, ab illis corrumpantur, malumque augeatur; cacochymia enim per nutrimentum superfluum quantitate augetur & qualitate non imminuitur: viscera etenim præternaturali quocunque sapore, vel quocunque denique fermento ex cacochymia aliqua deli-

tescente inquinata per modum ollæ rancidæ vel dolioli acetarii, optimos etiam cibos corrumpunt, & in similem saburram transmutant.

Dices: quo major est corporis impuritas, eo major est alimenti necessitas? *℞.* si nihil aliud obftet *concedo*, si majus malum impediat *nego*. aliquod alimentum est necessarium, sed non uberius.

Dices 2. Omnia quasi corpora sunt impura, ergo nullum erit nutriendum? *℞.* si impuritas sit notabilis *concedo*, si exigua *nego*.

Dices 3. *Hippocrates* dicit illos, qui corruptione humorum laborant, plurimo cibo egere: Idem dicit *Avicenna*, ergo corpora impura sunt nutrienda *℞.* transeat *antecedens*, distinguo *consequens*. sunt nutrienda nutritione pure alitiva seu resumptiva *nego*, alitiva & alterativa simul *concedo*: alterativa enim moderate adhibita cacochymiam corrigit.

Dices 4. *Hippocrates* l. *Epidem.* refert: Eos solum ex peste esse servatos, qui se liberaliter infarcirent: Ergo saltem aliquando, ut diximus, conferre videtur impura licet corpora lautius nutrire & cibis replere? *℞.* si lues ejus tempestatis exactius perpendatur, palam fiet, id speciatim ægris tunc accidisse quod omni prorsus appetitū destituerentur. Quamobrem ii duntaxat evadebant, qui sibi ipsis vim veluti inferentes, cibum assumerent, quo nimirum pestiferæ illius luis conditio & malitia retunderetur, & vires quodam modo servatæ violentiam morbi evaderent, ne omnino extrema inedia fatiscentes corruerent. Cæterum res aliter in aliis tractanda est.

Aphorismus XI.

Facilius est potu saturari (id est refici seu impleri) quam cibo.

Contentum seu Intentio.

De refectivis fluidis.

Connexio: Cum *Hippocrates* supra aphorismo septimo statuisset convalescentes extenuatos, ad amissum & pro ratione extenuationis esse reficiendos, *sensim nempe illos, qui longo tempore extenuati fuerunt,*

runt, breviter vero illos, qui breviter extenuati. In hoc simplici Aphorismo, qui ob brevitate[m] divisionem non patitur, utilem sententiam mox dictæ conformem affert, nempe: *facilius esse refici potu, quam cibo:* Hic previe.

Notandum: quod deperdita corporis nostri substantia tripliciter reficiatur: *Primo* secundum partes spirituosas: *Secundo* secundum partes humidas seu humores: *Tertio* secundum solidas: quæ omnes & singulæ proportionato sibi alimento nempe spirituosæ spirituofo, humidæ humido, substantifico, solidæ solido debent refici.

Per *potum Hippocrates* hic non intelligit potum simpliciter, quatenus opponitur cibo, sed alimenta liquida (quæ sorbitione, vel haustu capiuntur, & masticatione non indigent, quæ ab Hippocrate plurimis in locis potulenta, ab aliis cibi potabiles, seu in potionis formam dissoluti appellantur (ut clare liquet ex his quæ ab eodem scripta sunt *Lib. de aliment.* inquit enim: *Quotiescunque opus est certissima & promptissima refectio, tunc humidum alimentum, ad instaurandas vires, valde est conducibile: quemadmodum ubi adhuc celerius est reficiendum, opus est odoratu*) eo quod multo facilius subigantur, cito in cor, cæterasque partes corporis per arterias trajiciantur, celerius nutrant & reconvalescentibus magis conveniant, quam cibi simpliciter seu solidi, quos Hippocrates semper sub nomine *cibi* intellexit: & ratio est I. quia solida potentiorum requirunt calorem concoquentem, qui in convalescentibus adhuc deficit; quippe à morbo & calor & æger languidus est, illiusque operationes universæ hebetes & imbecilles, unde solida alimenta, nec tam bene, nec tam cito confici queunt, ut in substantiam aliti commutentur. II. Quod non liceat devenire ab uno extremo ad alterum, id est à victu tenui ad plenum sine medio maxime in morborum declinatione, ubi calor naturalis adhuc est debilis. Liquida autem omnia facilius subeunt, actuantur, evaporantur & distribuuntur: Præterea, quo citius ad vitalia datur accessus, eo facilius fit refectio & deficientis supplementum. Quamvis autem attenta faciliiori ciborum digestionem & distributionem in rationabilem sensum, Hippocratis sententia revocetur, non tamen quis hic generatim existimet, liquidum ac potabile alimentum solido semper esse præferendum: Etenim quæ dentibus conficiuntur non tantum citius exsolvi solent, & in perfectum chylum commutari sed etiam in accomodatius alimentum converti. Valde

liquidem conducit ad ciborum in ventriculo dissolutionem *saliva*, quæ sale quodam abundat, fermentationi promovendæ peropportuno, quo videlicet & panificium fermentum quis excitare posset, ac forte fortuna amissum restituere. Constat autem aliunde ocyus salita quam insulsa fermentescere & exsolvi atque ciborum reliquias in dentium intercapedinibus remansas, sponte sua per salivam quodam modo chylicari. Tunc igitur satius erit, potulenta convalescentibus commendare, cum sanguis acrior videtur, & corpora salivario rore carentia, multa maciæ confecta sunt, atque viscera, imi præsertim ventris exaruerè, ut potissimum hæcticis accidit: Quibus vero stomachus à mucosis succis langvet, salivæ abundantia est, & acidi ructus frequenter accidunt, solidi potius cibi, illorum malitiam temperantes commendabuntur. Cum vero substantia nostri corporis triplex sit (ut mox de refectione deperditæ substantiæ innuimus) *spirituosa, humorosa, & solida*: sic ratio requirit ut primo loco spirituosa, mox vel simul humorosa, & ultimo tandem loca solida refarciatur.

Refarcitur autem *spirituosa*, tam juxta mentem *Veterum Pitagoræ, Platonis, Hippocratis*, quam etiam juxta consensum omnium prope Medicorum tam in sanis debilibus, quam convalescentibus sæpissime per solos odores. Talem refectionem præstat mica panis vino generoso madida & naribus admota, hoc remedio *Democritus* referente *Diogene* vitam suam ad plures dies prolongavit: *Aristoteles* refert, quendam solo mellis odore (utpote rem ex meris floribus odoriferis constatam) ultra quadraginta dies vixisse: Talia etiam odorata porriguntur in facculis vel nodulis impletis caryophyllis, cinnamomo, melissa, thymo, flor. aurantiorum &c. intinctis in aceto & naribus sæpius admotis, idem præstant unguenta, balsama, olea odorata &c. ventriculi cordis & pulluum regioni admota; nam odorifera immediatum & citissimum habent cum spiritibus contactum. Sed

Dices *Aristoteles L. b. de Sensu* asserit: odorem non facere ad alimentum seu nutritionem aut refectionem sed ad sanitatem; rationem allegat dicens, nullum simplex potest nutrire, sed odor est simplex, ergo non potest nutrire: quia iisdem nutrimur, ex quibus constamus, sed constamus ex mixtis, ergo ex mixtis nutrimur & non ex simplicibus &c. licet *Aristoteles* hoc dicat, non negat tamen absolute odorem non suo modo nutrire seu reficere, fatemur quidem & nos odores

dores plus facere ad sanitatem, quam alimentationem: Experientia tamen constat syncope laborantibus illos odoribus statim refici: Patet etiam spiritus ex aëre & vaporibus fieri & ex eo etiam nutrirī & conservari: Si ergo ex aëre & vaporibus nutriuntur spiritus, quanto magis ex evaporatione odoriferorum: Neque vero quis ambigat, tenuissimos ejuscemodi halitus nulla ratione nequire solida quoque membra restaurare, cum & illi queant denuo intra corpus cum cæteris liquoribus subacti in concrefcentem succum converti nutritioni aptissimum: Hoc pacto arbores è terræ succo in vaporem elato, imo & plæreque plantæ solo vapore aqueo augefcunt & nutriuntur; atque ex Phycis melioris notæ viri sunt, qui volunt animalium partes tenuissimo solum succo, ex chyli portionibus purioribus elcito, ali atque compingi: Sic etiam ex durissimis corporibus tenuissimos liquores, ope chymica extrahi videmus, ipsosque in duriora deinde corpora coagulari, ut propterea vicissim nullo pene negotio res quascunque & dilui & concrefcere posse, jam satis unicuique notum sit.

Præter ea autem, quæ extra odoratum, pro virium & spirituum restauratione, conducere diximus, etiam ad intra talia spirituosâ adhiberi commode queunt v. g. Elixir vitæ, aquæ magnanimitatis, spiritus reffectivus, confectio alkermes, pulvis analepticus, essentia ambræ, essentia satyrionis (quæ vere euporiston est) & similia, quæ veluti momento temporis cor & distractas vires reficiunt, quia nulla in ventriculo mora illico vitales partes petunt, & cum sanguine commixta, cordi, totique corpori succurrunt; & quidem nihil æque ac *vinum, vini-que spiritus*, eique analogâ id citissime præstare videntur, cum experiamur vix ore degustata, palati & linguæ papillas, porulosque subire, sequæ in auras extenuata, interiores partes pervadere & vivificare.

Humorosa substantia refarcitur per alimenta liquida, tenuium partium, boni succi & facilis digestionis; per liquores carniū seu juscula, collisa, contusa, expressa, destillata, consummata, gelatinas, ptisanam vel cremorem hordei, vinum lymphatum &c. quæ sua humiditate, quoquo versum penetrant, & succi ex iisdem homogenea bonitate facile concoquantur, & ob partium tenuitatem, minimis etiam viribus conficiuntur.

Ultimo tandem loco ad carnes ipsas caponum, perdicum, phasianorum

norum accedendum, & per plenam victus rationem partes etiam solidæ nutriendæ sunt.

Dices *Hippocrates Lib. de alimento* dicit, siccum alimentum aliquando facilius transmutari, quam humidum, ergo falsus est aphorismus: probatur *antecedens*, quia sicca membra ob similitudinem facilius à siccis nutriuntur, faciliior enim est transitus in symbolis. & Licet in sicco membro facilius transmutetur siccum alimentum, quando jam est appositum illi immediate; attamen quia nutritio fit per mutationes multas, cibi in chylum, & hujus in sanguinem, ideo fit ut citius & facilius per istas mutationes transeat humidum, quare mediate semper facilius transmutatur humidum.

Aphorismus XII.

Quæ in morbis post crisin seu judicationem relinquuntur, recidivas facere consueverunt.

Contentum seu Intentio.

De Recidivis Morborum.

Connexio: Hic Aphorismus ob brevitatem uni membri divisionem non patitur, & connectitur cum octavo hujus Section. à quo tanquam Filius à Patre productus videtur, nam quando cibos assumit convalescens & non nutritur aut corroboratur, signum est aliquid fuisse de morbi causa relictum per crisin imperfectam (crisis enim imperfecta ea est, ex qua aliquid de materia morbifica in corpore relinquitur) quod recidivam facturum est: quia morbi qui imperfecte judicantur, facile recidivant, nisi mature expurgetur: judicantur autem plerumque morbi salubriter criticis evacuationibus, per sudorem, vomitum, dejectionem, urinam, similesque ejectiones, quibus eorundem causæ omnino subactæ & secretæ, à natura, extra corpus expelluntur: At vero aliquando, licet exacte terminati ac devicti videantur ob reliquias tamen vitiosorum humorum alicubi relictas, post aliquot tempus redeunt, & exinde recidivi morbi appellantur, de iis ergo in hoc *Aphor.* monet *Hipp.* ne omnino fidant Medici ejusmodi morborum remissioni-

tionibus, quoties crises perfectæ non sunt, nec causæ morborum fuerint penitus secretæ, atque extra corpus expulsæ. Evidens autem est, omnes morbos, quos medici *materiales* appellant, eousque perseverare, quousque causæ eos foventes & conservantes in corpore perduraverint, Hæ autem vitium in sanguine & visceribus inducentes, fermentationem procul dubio indebitam promovent, qua portiones utiles & salutarēs, cum inutilibus & nocivis commixtæ, commotionem non levem universo corpori inferunt, uti est febris, inquietudo, vigilia, dolor, aliaque graviora symptomata: quia concitatam modo fermentationem, & præcipationem, ut morbus in salutem desinat, sin secus, mors præsto erit. Repetentes enim & recidivantes morbi deteriores sunt sua Matre: ad novum enim conflictum, priori longe periculosiorem (cum viribus jam fractis fiat) naturam provocare solent: In his igitur feriandum non est, sed movendum, etiam repetitis vicibus, si necessitas exigat: recidivæ enim optime purgantibus, præcipientibus & balsamicis præcaventur: Et revera in omnibus morbis præcipue febribus eo respiciendum ut curatio sit constans, ne recidivent. Debent itaque, causæ morbificæ, & fermenta viscerum præternaturam excitata, omnino ab utilibus & salubribus humoribus sejungi, ac tandem eliminari, ut corpus in naturalem statum redeat, idque crisis est seu Judicium, de quo idem *Hipp.* alias protulit *1. Aph. 20. Quæ judicantur & judicata sunt integre, neq. movere neq. novare oportet, sed sinere.* Quod si contingat reliquias saltem præternaturalium fermentorum, in corpore remanere, atque alicubi latitare, procul dubio morbus, ex nova in convenienti fermentatione evehctus, brevi redibit. Contingit autem quandoque ut nulla supersit materia morbifica, sed nuda (ut veteres;) intemperies vel simplex (ut Recentiores) discrasia, quæ paulatim humores vitiat & corrumpit, & in die critico, vel etiam die paroxysmi recidivam facit: Frequentius tamen victus intemperans, seu vitium diætæ, assumptorum, aëris, vel causæ seu injuriæ externæ recidivas causant & efficiunt; Frequentissimæ autem recidivarum causæ sunt internæ, præsertim fermentum morbosum, non penitus destructum vel repululans.

Hinc tamen bene notandum est *Hipp.* non dixisse, *quæ relinquuntur in morbis post judicationem recidivas necessario facere* sed tantum *solere*: Ratio est: interdum enim reliquiæ istæ sensim post judicium diffi-

diffipantur, cum observemus, lente admodum à morbo convalescentes, forte ex istiusmodi reliquiis, paulatim appetitum, consuetum colorem, robur & carnes recuperare, absumptis interea atque evanescentibus his quæ in corpore relicta erant; Jure merito ergo recidivæ tantum timendæ sunt, cum evacuationes naturales & consuetæ denuo supprimuntur, vires nihilum reficiuntur, stomachus adhuc languet, vel nausea tenetur, nec cibum bene conficit et si convenienter alatur, non tamen in melius proficit convaliturus. Præterea si morbus sine causa evidenti, aut manifesta crisi remittatur, non erit de recidiva dubitandum, nam his quæ non ex justa causa fiunt, fidere non oportet, ut docet infra h. f. aph. 27. Adjicit & aliud novum relabentis morbi judicium, Ipse *Hipp. in Coacis prænotion.* Si videlicet urina in febricitantibus, crassum, densumque sedimentum contineat, divulsum tamen atque distractum: Etenim quod densum est, difficulter dissolvitur, difficiliusque repurgatur, quo circa saltem ex parte in venis & arteriis remanens, febrem facillime revocabit, ni sudor ubertim profluat, aut alvi fluxus superveniat, quibus scilicet crassiores succi egeri queant.

Signa perfectæ crisis (in qua nihil relinquitur) sunt alleviatio, coctionis signis apparentibus, & in die judicatoria, per aliquam effectum dignam evacuationem vel abscessum.

Signa vero imperfectæ crisis & futuræ recidivæ è contra juxta Hipp. 9. Epid. sunt. si morbus alleviet, non secundum rationem, hoc est sine coctionis signis, vel extra diem criticum, vel sine evidenti evacuatione aut abscessu sic v. g. ex *antecedentibus* si hæmorrhagia imperfecte facta fuerit, conjicimus adhuc aliquid superesse de materia illa morbifica, futuræ recidivæ causæ. Ex *consequentibus*, si remaneat siccitas & amaritudo oris, cibi nausea, seu inappetentia, sitis vigilia, seu noctes insomnes & turbulentæ, aut somnus præternaturam, tristitia, corpus à cibo non corroboretur &c. unde si talia occurrant, eorum causæ sunt oppugnandæ, nempe: repletio per phlebotomiam, cacochymia per purgationem, intemperies seu discrasia per alterantia, & dietam, quæ ad amussim est servanda.

Notandum autem est, aliam esse recidivam *veram*, aliam *non veram* seu *spuriam*. *Vera* accidit in *imperfecta crisi*, quoties natura non potuit in totum causam morbificam eradicare, sed remanet dispositio in ma-

in materia antecedente vel in parte quasi nidor, unde rursus morbus renovatur. *Recidiva non vera* est illa, quæ accidit in *crisi perfecta* ob aliquam causam externam v. g. diætæ vitium, aut aëris injuriam ut mox supra diximus.

Notandum II. quod Crisis (ut patet ex institutionibus) *fit subitanea & repentina in morbo facta mutatio, ad salutem vel mortem cum notabili materia motione.* Illam autem aliter fieri non contingit, quam concoquente, & segregante natura, bona à malis, adeoque per fermentationem subigente, quæ ipsi adversa, totius corporis œconomiam perturbarunt, ut in apostematum maturatione atque puris concoctione manifeste patet. At vero in hac concoctione & secretionem magna percipitur agitatio, eo quasi modo, ac in musto fermentescente experimur, cujus partes tenues & mobiles à crassioribus & fœculentis necesse est extricari, ut in perfectum vinum commutetur. Sed de crisi multa diximus in Institutionibus & dicemus plura in sequenti Aphorismo.

Notandum III. Quod morbus qui succedit morbo, vel est ejusdem rationis, quod plerumque fit in recidiva, vel diversæ rationis, sed in hoc casu potius morbus in alium transmutari dicitur, quam veram facere recidivam, id autem fit vel errore Medici, vel agri, naturæ imbecillitate, morbifici fermenti repugnantia, remediorum contrarietate, copia &c. inducente contrarium morbum, vel morbo ipso alterum morbum generante, uti v. g. sanguinis sputum, Tabem, peripneumoniam, phrenitidem. Unde bene notandum quæ de revertentibus & de recidivantibus morbis scribit Hipp. nos ad commutantes quoque retrahimus: rem exemplo à pleuritide & peripneumonia desumpto declaramus: siquidem non raro experimur, depressam ex pleuritide aut peripneumonia subacta, febrim protinus redire, induto nimirum empyemate, quoniam purulentus humor ex pleuritide domita relictus, thoracis cavum occupans, febrim denuo promovet, & quandoque priore pejorem. Differt tamen ut diximus recidivus morbus à commutato, quoniam in hoc causa variat cum symptomatibus, sed in illo utroque in variata plerumque perseverant.

Diximus autem mox ante hanc transmutationem morbi unius in alium seu etiam ex relictis causis morbificis, recidivam fieri ex multiplici capite, *vel errore Medici, vel agri, vel imbecillitate naturæ, vel*

fermenti morbifici repugnantia, vel *remediorum contrarietate*, *copia &c.*
Errore Medici quidem, si fortasse in declinatione morbi, inchoatam
 crisim impediatur, vel prævertatur, v. g. si comparente sudore critico
 pharmacum exhibeat, cohibentia medicamenta propinet, cutim &
 humores constipantia. *Errore agri*: si diætam debitam non servet,
 seque aëri frigido exponat. *Naturæ imbecillitate*: si v. g. præ languo-
 re non valeat crisim perficere, atque universa recrementa morbosa
 repurgare. *Fermenti morbifici repugnantia*: si tenax, viscosum, mul-
 tum, rebelle, vel malignum illud sit, ut in parotidibus & aliis abscessi-
 bus contingit. *Remediorum contrarietas*: si nimirum ignota causa, aut
 in consueto fundato Medico remedia quævis obvia, vel plus solita &
 necessaria adhibeantur ab adstantibus, vel ab ipsis patientibus appe-
 tantur, vel assumantur. His accedunt speciales quandoque tempo-
 rum constitutiones, quæ recidivantes morbos afferre solent, ut lo-
 quitur Hipp. I. Epid. tanta, inquit est vis aëris, in perturbanda humani
 corporis æconomia, non tantum in inspiratione, sed & abitu. Sed

Quæres, quomodo his incommodis, ac recidivanti morbo sit
 occurrendum? R. Solers Medicus his facile occurret si inchoatam
 & imperfectam crisim expleat, rebelles ac viscosos succos attenuet ac
 dissolvat, obstructos meatus referet, naturæ robur adiiciat, nervos-
 que omnes una intendat, ut relicta inquinamenta per convenientia
 loca & emissaria educat: Fieri autem facile potest, ut *protrusus* magna
 ex parte vitiosus humor critice per vias urinæ, vel sudores, residuus
 per alvum sit egerendus, quia crassior & compactior non aliter quam
 cathartico medicamento exturbari potest. Notandum, non raro
 etiam accidere, ut reliquiæ ejusmodi morborum certam quandam
 fermenti vim & conditionem nanciscantur, aptam utiles quoque liquo-
 res inquinare, quæ sensim adeo increbescere solet, ut tractu temporis
 potentior reddita, majora detrimenta pariat: in his autem morbis
 etsi magna promoveatur evacuatio, nisi ejusmodi quoque fermentum
 educatur, nunquam ægri bene convalescent: E contra vero sæ-
 pissime fit, ut modico sudore, levi vomitu, pauca dejectione, vel
 etiam per urinam excretionem, graves cæteroquin morbi desinant, qui
 magis & iteratis evacuationibus abigi non potuerunt.

Dices. Recidivæ non possunt fieri, quia nihil relinquitur in mor-
 bis, cum morbi post crisim non amplius sint. R. Si crisis sit perfecta,
 nihil relinquitur concedo, in imperfecta nego. Dices

Dices II. Recidivæ maxime fiunt in declinatione, postquam morbus in totum remisit, & natura jam maximum separavit. R. Concedimus in declinatione recidivas fieri, idque ex difformitate materiæ, cujus una pars à natura superata levamen dedit, altera parte remanente, quam natura non expulit, postquam irritata repululat.

Quæres quomodo combinandus sit Hippocrates, ubi dicit: *Morbos qui ad suppurationem tendunt recidivas non facere*: & sic v. g. parotides, quæ dum non suppurantur, faciunt recidivam, quæ vero suppurantur non redeunt: Et in alio loco 3. prognos. 7. dicit: *aurium suppurationes recidivas facere & seniores plerumque occidere* R. Hippoc. in uno loco loqui de magnis & perfectis suppurationibus, in alio loco de exiguis, quæ in auribus contingunt, & quæ à continuo affluente materia, facile recrudescunt.

Aphorismus XIII.

Quibus crisis fit (seu instat) iis nox, quæ accessionem præcedit, gravis, quæ vero subsequitur, levior fere (seu maxima ex parte) solet existere.

Contentum seu Intentio.

De Crisim antecedentibus & consequentibus.

Connexio: Cum Hippocrates in antecedente aphorismo mentionem fecerit crisis, & docuerit, reliquias imperfecti iudicii morbos revocare; modo in hoc aphorismo modum ostendit, cognoscendi ipsam crisim, & prædicendi illam: signum enim futuræ crisis tradit, nempe *molestiam*, quæ nocte præcedente crisim, ægrum molestat: præterea ipsum Medicum erudit, ut præcognitis signis crisim antecedentibus, non turbetur, si quid gravius accidat, sed crisim prope futuram denuntiet, in suo iudicio se firmet, & confidat.

Duas hic aphorismus habet partes: In *prima* dicit, noctem crisim præcedentem, esse *gravem*: In *secunda* dicit, noctem quæ sequitur, esse quietiorem.

Galenus quidem *primo* ad *glauconem* dicit, quod in omni crisi, sive

sive sit ad salutem, sive ad mortem, mox præcedens gravis sit: contrarium tamen evenit in secunda aphorismi parte, nam in crisi mala, nox consequens non potest esse quæta.

Ut vero clarius, & ad captum facilius fiat hujus aphorismi interpretatio, opere pretium ducimus, modum enodare, quæ & qualia, ante crisin contingat. Unde

Notandum I. Crisim aliter non fieri (ut diximus præcedenti aphorismo) quam concoquente & segregante natura, bona à malis, adeoque per fermentationem subigente, quæ ipsi adversa totius corporis œconomiam perturbant, ut in apostematum maturatione, & puris concoctione manifeste patet, in hac vero concoctione & secretionem magna percipitur agitatio, eo quasi modo ac in musto fermentante experimur, cujus partes tenues & mobiles à crassioribus & fœculentis necesse est extricari, ut in perfectum vinum commutetur. Hac ergo de causa, contingit futuram crisin, agitationes & molestias præire, quibus ægri noctes plurimum insomnes & inquietas patiuntur: Hinc quod plerisque dicitur ante *accessionem*, vertunt alii, ante *Judicationem*. Sed revera nunquam crises accidunt, nisi in paroxysmis morborum, cum nimirum natura, causam morbosam adoritur, ac subigere conatur; unde perinde erit ante *accessionem*, ac ante *judicationem* in *accessione* contingentem molestias & inquietudines perferri, ut mox diximus.

Notandum II. Antequam crisis fiat & massa sanguinis clarificetur & depuretur, solet natura nostra sanguinem extraordinaria concussione & motu exagitari, & veluti tempestas aliqua, ingentes in liquore sanguineo suscitare fluctus: vocatur hæc tempestas perturbatio critica, de qua divus senex in hoc aphorismo loquitur, omnia ergo in prævia sanguinis concussione & motu exacerbantur symptomata; calor fit magnus, sitiis major, inquietudo maxima: Nunc fluctus illi, seu illa mala, crisin præcedere solita, *caput* feriunt, unde vigiliæ, somni præternaturam, deliria, dolores, vertigines, convulsiones, oculorum inflammationes seu rubor, splendores, squallores, lachrymæ, aurium tinnitus, pruritus narium, vasorum in oculis, collo & facie intumescencia, capitis dolor, temporum pulsatio, phantasmata & somnia de præliis, rixis, igne &c, futuræ narium hæmorrhagiæ ordinaria præsagia.

Nunc Regionem *pectoris* inundant; unde pulsus inæqualis, difficilis & crebra respiratio, cordis anxietas, palpitatio, præcordiorum æstus, partium externarum calor & mador, corporis denudatio &c. Sudorum paulo post subsecutorum vel subsequendorum, aut urinæ compressionis, manifesta indicia.

Nunc *viscera inferioris abdominis* concutiunt, unde hypochondriorum tensio, nausea, & ciborum fastidium, dolor & morsus stomachi, oris amaritudo, intestinorum tormina & murmura, labii inferioris tremor & contractio, faciei rubor, somni turbulenti, corporis jactitatio, cordis palpitatio, urinæ turbatio & ardor, &c, materiæ per vomitum, vel alvi fluxum excernendæ, perpetui quasi præcursores.

Verum quemadmodum Iris in Cœlo, foederis symbolum, sine præviis obscuris nubibus apparere nescit: eodem modo, ex præcedentibus perturbationibus criticis, paulo post secutura naturæ victoria colligitur, venti enim desituri violentissime spirare solent.

Notandum III. Mirum non esse hæc ita fieri, nam sicuti, ubi fit pus adest febris & dolor, ita quando naturæ cum morbo magna est lucta, in venis & arteriis, pro separanda materia morbifica, tum excitantur vapores, vasa distenduntur & vellicantur, distorquentur fibræ ultra modum, insurgentes ad expulsionem.

Notandum IV. Non tantum durare aliquando istam perturbationem criticam per unam diem aut unam noctem, sed aliquando per duas, tres & quatuor: Imo duæ vel tres quandoque fiunt crises, præcipue in nostris regionibus ubi materiæ crudæ magnus est apparatus, adeoque prima crisis fit imperfecta, sic tandem natura sese iterum post aliquot tempus accingit ad novam crisin, donec tandem tota materia morbifica sit excussa & exclusa. Proinde

Notandum V. Crisim habere *tres partes I. Perturbationem*, dum separatur bonum à malo: *II. Excretionem III. Solutionem*: Et quamvis una quæque istarum, crisis dici possit, magis tamen secundam intelligit *Hippocrates*, quia in separatione magis perturbatur æger, quæ excretionem præcedit.

Notandum VI. Quod prima pars crisis quæ *perturbatio* dicitur, magis fiat in nocte, quam die; Rationes hujus dant Authores varias. Primo (ut aliqui opinantur; quia luna) utpote cujus regimini multa

à vulgo adscribuntur) quæ humores ad motum concitat, magis eo tempore dominatur, unde terræ motus, inundationes, & partes eo tempore plerumque contingunt: *Secundo*. Quia vis naturalis eo tempore fortior & unita magis, tum quia humoris irritatio magis etiam sentitur in nocte, somno interrupto, & natura non occupata, & distracta, in actionibus diurnis. *Tertio*. Quia nocte etiam levia, graviora percipiuntur, cum id tempus quieti destinatum sit, & mens minus distracta esse soleat; ideo dolores, perturbationes & cætera symptomata per noctem experimur molestiora. *Quarto* Quod nocte ex aëre densiori & frigidiori, perspirationes in nobis quodammodo impediuntur ac retardantur, unde sanguis ipse & viscera corporis magis infici & divexari solent. *Quinto* Eo quod in illo tempore calor concentratior, materiam violentius exagitet, ipsaque nox ordinarie omnia ægrotantium symptomata intendere & duplicare soleat: Cum enim omnis tristis sensatio, secundum modernorum Philosophorum mentem, per tristem & pungentem contactum, particularum plus minus acutarum, fiat: Hinc Poëta dat rationem, cur omnia accidentia nocturno magis sint sensibilia

Sol globus est, nocturna gerit duo cornua luna,

Jam scio, cur noctu, pungere luna queat.

De die tamen etiam fieri crises, ostendit experientia, & virorum Practicantium autoritas, & ratio quoque subest, quia motus humorum sive excretio, magis fit in die adjuvante solis calore, promovente, effundente, & meatus aperiente: Unde Crises quæ diurnæ sunt, nox præcedens gravis est, quæ nocturnæ, dies prægressa gravior existit.

Tertia pars Crisis, quæ est Levatio seu Solutio, ad sequentem noctem sequitur. Videtur nobis perturbationem hanc criticam pro depurando sanguine ordinatam, non multum dissimilem esse exagitationibus illis, quæ clarificationes rerum turbidarum v. g. decoctorum, musti, & lactis præcipitationem præcedere debent: ubi *Decocta* prævia despumatoria coctione; *Vinum* fermentationis motu; *Lac* concussione diuturna & violenta per baculum, heterogeneas tandem particulas à se dimittunt ad vasis fundum vel superficiem separandas. In hoc ergo exagitationis motu, omnia intenduntur symptomata, exemplo puris ut mox diximus, & teste *Hipp. 2. aph. 47.* dum pus fit, dolor & febris intenditur, pure autem confecto omnia remittunt.

Hæc

Hæc ergo & id genus alia pro crifium varietate accident, nocte præcedente, fequenti vero, leviora plane erunt omnia, & æger ipfe melius fe habebit, imo fi critica evacuatio perfectâ fuerit, atque caufa morbi omnino fuerit evicta & expulfa, non folum nox quæ fequitur, magna ex parte levior fit, fed etiam æger convalefcet: Ægrum autem ferendo effe oportet, nam viribus ex crifi in fractis de vita verendam; unde dicebat *Hippocrates in Coacis prænotionibus: quandoque in optimis crifibus ægri pereunt*: præfertim ubi vires non fufferunt. Atque hinc falutaris crifeos figna & indicia patebunt, nec non cujuscunque evacuationis exitus: quippe fi fubinde morbus cum adjunctis fymptomatibus penitus vel magna ex parte cefferit, & vires tulerint, profecto res fuccedet ex voto, fin fecus, omnia ruent in interitum.

Dices: nox ante quemlibet paroxifinum effe gravis, ergo iftud fignum non tum pertinet ad crifim. *R. nego* fequelam, imo & omnes fentiunt, quemlibet paroxifinum effe crifim, vel faltem ei æqui pollere, unde mirum non effe noctem ante paroxifinum effe gravem.

Dices 2. Quando nox effe gravis non inftat crifis fed adef, ergo non bene dicitur inftare? *R. Adef crifis inchoative concedo, terminative nego.* Ergo bene dicitur inftare.

Dices 3. Crifis bona fit materia jam concocta, ergo non debet fieri cum gravitate & labore? *R. Quamvis materia fit concocta, tamen eo ipfo quod confertim agitetur & evacuetur, percipitur ingens agitatio & motus in corpore, & partes per quas tranfit vellicat.*

Inftabis. Si materia effe concocta & feparata, non opus effe tanta agitatione. *R. Licet fit cocta, non tamen effe educta, & hæc eductio omnia illa fymptomata caufare poteft.*

Quæres: Unde fiat, quod etiam non nunquam nox crifim fubfequens fit gravis? *R. Vel quia crifis adhuc terminata non effe, vel quod æger errorem commiferit, vel in alium morbum inciderit, vel quod crifis fuerit infida.*

Aphorifmus XIV.

*In profluviis alvi, mutationes excrementorum juvant,
nifi in prava mutantur.*

Con-

Contentum seu Intentio.

De Prognosi alvi fluxuum ex fœcum mutatione.

Connexio: Cum in præcedenti *Aphorismo Hippocrates* mentionem fecisset de crisi, illam nempe cognosci posse futuram, per noctem gravem: In hoc ostendit signum terminatæ & factæ crisis, vel ad bonum, vel ad malum, dum dicit: *In profluvii alvi &c. simul in hoc aphor.* profert signum crisis, quæ fit per evacuationem, eamque communissimam, alvi dejectionem. Egestionem enim per alvum habitæ, quemadmodum sæpe numero salutare sunt, ita nonnunquam valde perniciose.

Brevitas huius Aphorismi divisionem non patitur, brevis omnino est, sed in se pulcherrimus & artificiosus, ex hoc enim Medicus potest discere, in omni morbo mutationes, quomodocunque fiant, esse attendendas; præterea ex hoc potest discere, alvi profluvium vel esse symptomaticum, vel criticum, malum aut bonum; Excrementa enim alvi, coctionis & cruditatis arbitrium suggerunt. Ratio huius *Aphor.* hæc est: ubi excrementa perseverant in uno eodemque statu, causæ pertinacia ex hoc demonstratur, at ubi mutatio fit ad bonum, superans natura ostenditur & valida ejus actio in materiam peccantem: & ideo *Hipp.* dixit 6. Aph. 1. *Acidum ructum in diuturno alvi profluvio bonum significare, coctionem enim ex illo signo perfici quodam modo ostenditur.*

Non autem solum, ut habet hoc loco *Hipp.* Egestionem debent existimari malæ, quando succedentes mutationes fiunt ad mala, verum etiam cum immoderatae sunt, & tormina ac dolores inducunt, internamque intestinorum tunicam erodunt, siquidem præter diarrhæam & dysenteriam, solent tabem, & totius corporis consumptionem afferre.

Ut autem ista se habeant, memorat hic *Hippocrates*, mutationes excrementorum juvare in alvi profluviiis, nisi ad mala mutatio fiat: Etenim cum in lenterico & caliaci fluxu egestionem quæ antea albæ, chylosæ & fluentes admodum erant, coloratæ comparent, repurgatæ & consistentes, naturalem conditionem inducunt, ut etiam de acido ructu superveniente protulit idem *Hippocrates* 6. Aph. 1. mox ante citato: Sic pariter excrementa, diarrhæam ac dysenteriam comitantia,

tia, nigra, foetida, purulenta, ubi malitiam horum exuerint, atque in flavum, minusque olentem humorem commutantur, argumento sunt naturam, in pristinum sanitatis statum redire, facileque in posterum moderari posse fluentium excrementorum malitiam & originem: At vero, quotiescunque evacuationes unius modi sunt, & sibi similes continuo prodeunt, morbum, causamque morbi persistentem & contumacem significant. Melius igitur erit in alvi profluviiis excrementa sensim apparere mutata, neutiquam vero in pejorem deducta conditionem, ut cum è flavo in nigrum, è minus olente in foetidum, è consistente in corruptum humorem abeunt, ut propterea prudenter sane adjecerit *Hipp. nisi ad mala mutatio fiat*. Hac de causa exitiosæ sunt dejectiones in dysenteria, quæ è pallidis in croceas, in virides, in atras, è crassis in dilutas & putridas, è stercorariis in pingves & strigmentosas abeunt: mutationes etenim istæ nulla ratione prodesse possunt, utpote à naturali statu plurimum recedentes: quamobrem utiles tantum censendæ sunt, quæ ad naturæ statum redeunt vel saltem non multum à sanitatis statu deflectunt. Unde

Nota: Excrementorum mutatio duplex est: *primo:* Excrementa mutantur secundum *substantiam*; ut quando humor primo exit crudus, deinde coctus, vel dum primo exit adustus, deinde minus adustus, vel semper idem est & exit. *Secundo:* Excrementa mutantur secundum *speciem* (id est de specie in speciem) ut quando post excretionem pituitæ, seu lymphæ acidæ & coagulatae, fit excretio bilis, vel è contra quod melius est: vel quando in diuturno alvi profluvio, acidus ructus ut diximus, salutis nuntius habetur. Bona ergo est ejusmodi excrementorum mutatio, nisi ad prava fiat, quæ mala est.

Plerique Medici distingvere consueverunt, ejusmodi per alvum evacuationes in *stomachicas*, & *jecorarias* seu *hepaticas*, atque illas à *ventriculo male concoquente*, & in excrementa cibos commutante oriri ajunt: has vero è jecore intemperato ad *frigidum* quidem (ut veteres passim loquuntur) v. g. è fluxu quem *hepaticum* vocant, ad *calidum* vero, ut in diarrhæa & dysenteria.

Verum (ut sentiunt recentiores) licet in lenteria & caliacæ affectione, dejiciantur ubi nondum digesti, qui ventriculi defectum arguant, non tamen putandum, ejusdem semper vitio hujus generis dejectiones haberi: si quidem non raro à depravatis succis pancreatico

nempe & felleo, importunæ ac immodicæ evacuationes oriuntur: cum enim in eundem usum succi isti à natura sint destinati, ut transeuntem chylum per intestina gracilia diluant, atque à fœculentis portionibus repurgent, si fortasse aquei viscosi, inertes, aut aliter præternaturam sint affecti, vel illorum ductus obstructi, nulla vel mala secretio fit, unde simul cum fœculentis partibus, chylosæ & alibiles pariter egeruntur: atque hinc est, quod in his conferant salida, acida, acria, austera, quibus scilicet succi illi corrigantur, vigorentur, vel per proprios ductus confluant in intestina.

De *fluxu vero hepatico*, nemo est vel leviter in rebus anatomicis versatus, omni culpa carere *jecur* in hujusmodi alvi profluviiis, cum jam satis superque constet nec ipsum sangvificandi munere fungi, nec ex illo per venas sangvinem ad intestina permeare, sed potius ab his ad illud revehi: atqui in dysenteria & diarrhæa, si ab hepate per venas in intestina, acres illi & erodentes humores derivarent, procul dubio laxatis & apertis venis, una simul cum humoribus, sangvis ipse affluenter profiliret. Pro majori & faciliiori captu.

Notandum alvi fluxum vel esse *spontaneum*, vel esse factum ope Medici: *Spontaneus* vel est criticus vel symptomaticus: *Symptomaticus* rursus triplex: *diarrhæa*, *dysenteria*, & *lientheria*: Si ergo ope Medicamenti procuretur purgatio & alvi fluxus, juvat mutatio etiam, tametsi fiat ad prava, saltem ratione *causæ*, quamvis non ratione *signi*, bonum enim est humorem pravum esse extra corpus: Sed de hac evacuatione & profluvio, ope Medici facto non loquitur hic *Hippocrates*: Si vero fiat evacuatio, & in illa mutatio ad prava critice, juvat etiam, nam & per nigras urinas, & æruginosum vomitum, morbum expelli, sed raro, notamus. Verum enim vero etiam in symptomatico fluxu juvat mutatio, non solum si sit ad bonum, sed si sit ad æquale seu proportionatum quia mutatio arguit robur naturæ; sed hoc valde rarum est: communiter enim omnis motus symptomaticus absolute malus est, sicut bonus est motus criticus, qui fit de specie in speciem, quando humores à natura perfecte evacuantur, ut quando v.g. primo à natura evacuatur bilis, deinde pituita, tunc signum est naturam perfecte evacuare: præterea bonus est motus, quando excrementa mollia, cohærentia, non admodum foetentia, subrufa, & juxta ciborum ingestorum copiam ejiciuntur: Quando autem humores qui evacuantur sunt ver-

ficu-

ficulores, tunc teste *Hippocrate 2. prognost. commentar. 23.* morbus est diuturnior, quia opus est diuturniore tempore, ad coctionem humorum variegatorum, qui plures morbos indicant, & procreant: atque etiam, quando excrementa sunt liquida, alba, extreme rufa, viridia &c.

Sed omnium pessimus est motus, per quem evacuationes fiunt prave syncerae, putridae, nigrae, lividae, pingves, cruentae, æruginosae, ramentosae &c. quæ colliquationem significant teste *Hipp. 3. Aphor. 6.* ubi agit: *in morbo diuturno fastidium cibi, & dejectiones syncerae mala:*

Syncerae autem dejectiones sunt humores privati humiditate, vel alterius humoris admixtione qui indicant omnem prope humiditatem esse consumptam, uti v.g. est atra, æruginosa, livida bilis, dysenteriam faciens lethalem: idem tenemus de colliquativis, & enormiter foetentibus, quæ extremam putredinem & cadaverosum statum arguunt.

Quæ diximus hæcenus de alvi excrementis, idem quoque intelligi volumus de urina, sputo, sudore, vomitu &c.

Aphorismus XV.

Ubi fauces agrotant (seu dolent) aut tubercula exoriuntur in corpore, excrementa spectare oportet, nam si biliosa fuerint, una corpus agrotat: si vero sanorum similia exstiterint, tuto corpus alere poteris.

Contentum seu Intentio.

De Dolore faucium, tuberculis corporis, de iudicio excernendorum, & alendo corpore.

Connexio: Attulit in præcedente Aphor. Hippocrates loco exempli crises per dejectiones factas: nunc eas quæ per abscessum contingunt examinans, utitur exemplo glandularum tumefactarum, atque tuberculorum in corpore erumpentium, aitque intumescantibus

faucium glandulis, vel erumpentibus tuberculis in corpore, an non idem nutriendum sit, excretionibus observandas esse: etenim si illæ biliosæ fuerint, indicium erit corpus, ejusque interna viscera, una simul ægrotare; si vero sanorum egestionibus similes sint, tutum erit corpus nutrire. Ubi ergo natura totum humorem ad partem aliquam deponit, tuto corpus alere possumus, ubi vero aliquid intus manet, non tuto.

Dividitur hic Aphorismus in duas partes, in prima docet quomodo impurum corpus cognoscatur, in altera vero quomodo cognoscatur purum. Quando in aliquo corpore materia abscedit ad fauces (morbi enim glandularum tum alibi, tum maxime in faucibus & habitu corporis emicant) vel cutim cum excrementis biliosis, eo ipso corpus impurum arguit, biliosum enim excrementum, indicat pravos humores non totos in illas partes missos, sed intus adhuc manere; ergo talia corpora utpote impura, nutrire non licet, ut diximus supra aphor. 10. quando autem corpora intus sunt pura & sana, tuto ali possunt, si autem abscessus sit perfectus, eo ipso sanum corpus, & intus purum judicatur; *ab intra enim ferri foras bonum, è contra malum*: humor enim in abscessu contentus, non amplius inficit alimentum, quin imo roborat naturam.

Ut autem hæc penitus cognoscamus, bene monet *Hippocrat.* inspicienda esse excrementa seu excretiones, non tantum alvinas sed omnes alias, potissimum vero urinas & quæ per alios ductus fiunt, undecunque enim illæ prodeunt, corporis statum bonum designant. Hæ enim totius venosi & arteriosi generis, imo totius fere corporis præbent notitiam & corporis statum designant, maxime autem quando cacochymia est in vasis.

Si ergo dum fauces dolent, vel adsunt tubercula, similes urinæ reddantur, signum est, totam materiam biliosam (idem de omni alio vitio, pituitæ, lymphæ acidæ, frequentissime autem de bile, utpote sæpius accurrente dici & intelligi potest) nondum totam esse ad habitum corporis, aut fauces propulsam, sed adhuc in infimo corpore plurimum restare, quod alimentationem ob rationes in Aphor. 10. allatas (*corpora impura quo plus nutrieris, plus læseris*) prohibet.

Non autem tantum ejusmodi faucium dolor & tubercula sunt æstimanda post judicationem aut crism, sed etiam extra crism, quando

do nempe natura non potest extra corpus educere noxiam materiam, sed illam saltem ad ignobiles partes transmittit, aures, fauces, axillas, inguina, articulos, cutim &c. ad quæ loca ordinarie tubercula, exanthemata, & abscessus fieri solent. In his & similibus casibus non tantum *purgatio* requiritur, sed etiam quandoque *venæ sectio*, quia illi humores in profundo corporis latentes possunt utroque modo, melius tamen per *purgationem*, minus aptæ per *venæ sectionem* (cum non semper subsit plethora) evacuari: Experientia autem constat, in doloribus colli, imo etiam in vera angina ubi excretiones fuerant biliosæ præmissa *venæ* sectione, purgatione, malum ex toto sustulisse. Biliosa autem Cacochymia facile colligitur adesse, ex oris siccitate, siti, amaritudine lingvæ, ciborum fastidio &c. & tunc maxime purgandum est.

Notandum hic: quod contingat aliquando, pura esse excrementa, & tamen ægrum pessime habere, uti v. g. in peste, & maligna febre, urina apparet naturalis, morbus tamen hominem occidit: Verum id contingit quia natura, ob præsentiam tantæ malignitatis, & tantam inde conceptam debilitatem, materiam non potest aggredi.

Notandum 2. Hunc *Aphorismum Hippocratis* non de angina esse intelligendum, ut male plerique interpretantur. Etenim si de ea, quæ musculorum gutturis & inflammatio est, sermonem instituisset *Hippocrates*, non plane de convalescentibus ex abscessu, & de omnino morbos corporibus ageret, adeoque male fuisset adjectum: *Si vero sanis similes, tutum est corpus nutrire*: Igitur de abscessibus ad glandulas faucium & colli: itemque de tumoribus erumpentibus ad cutim omnino locutus est, & quidem observationibus iteratis est compertum, solere glandulas, tum internas, tum subtercutaneas, quibus universum fere corpus refertum est in plerisque morbis vitari, imo reliquorum omnium viscerum affectiones prompte subire, quod vasa quæcunque, tum sanguinem & nervorum liquorem, tum lympham deducentia in se excipiant & moderentur, unde harum male affectarum causa plerumque accidit ægrotare, vel morborum crises per abscessus admittere. Quamobrem non immerito *Hippocrates* tumefactarum adenum & tuberculorum in habitu corporis prodeuntium exemplo speciatim hic usus est: quippe humores quicunque per vasa corporis excurrentes, in ipsas deducuntur, ibique commiscuntur, atque ab impuritatibus repurgantur:

Hinc triplici de causa, non tantum facium glandulas, sed cunctas prope modum contingit ægrotare, indeque tuberculâ progigni: vel scilicet vitio sanguinis, lymphæ, & liquoris nervorum, minime à recrementis expurganti: vel impedita per poros cutis perspiratione: vel denique earundem glandularum vitio, quæ nimirum non excipiant, nec deducant, nec bene permeantes succos repurgent, & emendent: Meminit autem *Hippocrates*, biliosarum solummodo hic excretionum, non quot à reliquis aliis excrementorum vitiis, illas affici non contingat, sed quia in acutis morbis, hujus generis excrementa, plerumque excitari solent, quippe quæ acriorem sanguinis constitutionem & inflammabilem naturam consequuntur, unde febres æstuosæ, sitis, oris amarities, dolor, vigilia, & consimilia symptomata exoriuntur. Cum ergo excreta ista mala sunt, totum corpus adhuc infectum denuntiant, nec sufficienter ex abscessibus fuisse repurgatum, ideoque tuto nutriri non posse, nisi fuerit omnino ab inquinamentis detersum & evacuationes similes sanis habeantur.

Notantur pariter hic tubercula, speciatim extrinsecus apparentia, licet consimilibus tumoribus fere semper interiora afficiantur, Anatome quippe sæpius observatum est tumores in collo & faucibus erumpentes, occupasse primum Mesenterium, pancreas aliaque viscera glandulosa seu adenoſa, ut in variolis quoque accidit: quamobrem non mirum si ob consensum partium, per glandulas putaverint plerique, ab ipsis bene vel male affectis, de totius habitudine judicium ferri posse. Frustra igitur hujusmodi tubercula tollere adnituntur, qui toti sunt in lituris seu unctionibus, lotionibus & emplastris adhibendis occupati, cum tamen oporteat internis medicamentis, concretos ibidem humores dissolvere & extenuare, purgatis quoque à sanguine, cæterisque utilibus humoribus, quæ retenta sunt excrementis, in hunc sane usum valde conferunt (præ cæteris purgantibus) antimonium diaphoreticum, sanguis hircinus, C.C. pulvis viperarum & omnia salia volatilia &c. quibus scilicet & diaphoresis & diuresis facile possit promoveri.

Dices: ubi corpus est repletum bile, non oportet subtrahere alimentum, picrocholi enim minime ferunt famem, imo exasperantur. &c. Nos non dicimus, quod in tali casu, alimentum liquidum, humidum & moderatum prohibeatur, sed siccum, multum, crassum, & calidum interdicitur.

Aphorismus XVI.

Ubi fames, laborandum non est.

Contentum seu Intentio.

De Laboris & victus relatione.

Connexio: Dixit Hippocrates in præcedenti aphorismo de crisi, seu evacuatione, vel abscessu, bene vel male evomentibus: in hoc brevi & uni membri aphorismo, qui divisionem ob brevitatem non patitur, docet, quando evacuandum, quando quiescendum & non laborandum sit, monetque *Hippocrates*, non esse simul, convalescentibus potissimum, injungendam *inediam* & *laborem*, cum natura duplicem evacuationem ferre nequeat; unde ait: *Ubi fames, laborandum non est*; vel (ut alii volunt) *ubi corpus inedia conficitur vel confectum est, laborare non debet*. Connectitur etiam hic aph. cum octavo, ubi ex nimia fame recidivam fieri statuit: Jam de fame loquitur & docet, quid vitare debeant famescentes: Quamvis autem de fame solum videatur locutus fuisse *Hippocrates*, facile tamen (ut monet Gal. in Comment.) cætera quoque inanientia subintellecte voluit, & proinde summa hujus sententiæ sit, duplici evacuatione nunquam utendum ne vires dissolvantur, & natura omnino succumbat, cum alias ex eodem *Hippocrate* doceamur, magnum studium habendum esse, præsertim in ægris, fortem servare virtutem. Atque hinc sane non leve argumentum sumere licet, ad redarguendos eos, qui ex *Hippocrate* cum præcipiant victum valde tenuem, & quandoque etiam tenuissimum, in morbis acutis, iteratas tamen phlebotomias, aliasque evacuationes præscribere non verentur magno virium dispendio. At vero prudenter hic *Galenus* monet: *Sanis non sunt præcipienda exercitia simul & inedia, neque etiam ægris aliquis vehementior motus adhibendus una cum cibi abstinentia, neque sanguinem mittere oportet, neque citare vomitum, neque purgare, neque multa uti frictione, neque in unum aliquo forti motu, vel corporis alteratione: In talibus siquidem motibus omnibus, ubi cibus defuturus sit vires dissolvuntur, sive ægrotent, sive etiam sani sint homines.*

Famis

Famis nomine hic intelligitur *tristis sensatio in ore ventriculi, ob alimenti & nutritionis indigentiam & magnam partium inanitionem orta, cum adjuncta virium debilitate.*

Optime & rationaliter ergo dicit *Hippocrates: ubi fames, laborandum non est: neque evacuandum.* Hoc est, corporibus fame (sive voluntaria sive coacta, seu ex defectu sit) exhaustis, non sunt imperanda & concedenda violenta exercitia, aut labores, aut alia, quæ illud ulteriore humiditate privare possunt: Hunc quidem Aphorismum sensu nimis stricto operarii nostri hodie interpretantur: summus enim ipsorum labor est, laboribus detrahere, & cibis adjicere. Hinc Poëta

Inter sartores, sunt isti Pamphile mores

Cum comedunt sudant, frigescent quando laborant.

Certum quidem est, violentos labores victum omnino plenum & vix non pleniorē requirere: hinc tempore messis, triturationis &c. duplex prandium & duplex cæna, id est: Jentaculum, prandium, merenda & cæna operariis exhibetur; & digne quidem, ut qui pro duobus hominibus laboraverint, duplici quoque cibo nutriantur, succumberent enim naturæ vires per violentos labores prostratæ, nisi quantocyus copiosiore nutrimento restaurarentur: Cum è contra labores leves pauciori indigeant nutrimento, eo quod per similes labores parum de corpore nostro decedat. Eadem ratio in præsentī aphorismo militat; longa enim fames, exsugendo partes solidas, & humiditas resolvendo, spirituosas depradando, magnam in humana œconomia inducit debilitatem, quæ utique omnia per labores augeantur: Hinc non labor, sed quies imperanda, eo quod juxta *Politicos* & *Iuris Consultos* ad *L. navis. 4. §. cum autem 2. ff. ad legem Rhodiam de jactu. L. Divus marcus 14. in principio ff. de officio Præsidis*: Afflicto non sit addenda afflictio. Nec duplici pœna reus castigandus; ut habetur in citata lege *divus Marcus*. *Hippocrates* autem in hoc aphor. (ut ex dictis, & ex sensu ipso colligimus) non quemcunque motum, laborem vocat, sed qui lassitudinem infert: Medici enim solertiores simplicem motum ab exercitio & labore distinguunt, ac per sudorem & lassitudinem dimetiuntur, & quidem levem corporis agitationem motum appellant. Cum sudore & anhelitu *Exercitium*: *Laborem* vero ad lassitudinem & defatigationem usque deductum. Hoc autem loco specialius

etiam sumitur *labor*, quo nimirum corpora virium dispendium patiuntur, quos plurimum licet credere inedia exsolutos: Per laborem etiam sanguis citatior redditur, ac tenuior, qui profecto facillime expirat per poros corporis, eadem occasione redditos patentiores, unde sudores etiam affluentius emanant, & universa fere membra fatiscunt; Quoniam vero famis mentio ab *Hippocrate* fit: Jure quis dubitare potest, de qua fame Author loquatur: Sane cum de convalescentibus magis agat, famem potius naturalem intelligere videtur, cujus nimirum causa sollicitamur ad exquirenda alimenta: Alibi enim alias jam meminimus, à succis quibusdam acidoacribus, os ventriculi superius proritari, cum is vacuus est, alimenta vero ingesta dissolvi, cum est repletus, cumque per laborem sanguis potenter extenuetur, & vires langueant, si fortasse è vacuo per famem ventriculo nil possit suggeri, quod sanguinem & vires reficere queat, profecto ex languore nimio, totum corpus, grave periculum subiret: Verum tamen famem idem Author, consuluit solum in humidioribus naturis & temperamentis lib. 7. aph. 59.

Quod de labore corporis dicimus, id ipsum de labore mentis, & animi pathematibus intelligimus, ne nimirum etiam ipsa mens inquietetur, cum & hujus labor multum inaniat & consumat: Ante famem quidem accommodatus labor non obstat, quia adjuvat alimenti coctionem, distributionem, & excrementorum expulsionem: Quare tam diu laborandum & exercendum corpus, quousque fames succedat, & succedente fame quiescendum.

Si pariter nomine *laboris* intelligimus, qui fit per *purgationem* vel *vena sectionem*, quæ æque substantiam, spiritus & vires absumunt: nam sicut *plenus venter non laborat libenter*, ita multo magis vacuus, illibenter laborem suffert.

Hic ergo Aphorismus universalis est, tam agris, quam sanis & convalescentibus: nam per evacuationem & dissipationem, in penuria factam, universaliter omne corpus sive sanum, sive ægrum exsiccat, vires magis prosteruntur, convulsiones & mors procuratur: Hinc *Hipp.* 4. aph. 16. dicit; *Carnes sanas habentibus helleborus perniciosus est*, quia facile excitantur convulsiones & vires demuntur, quibus cessantibus, omnes Medici operationes cessant, adeoque his præ
Q
omni-

omnibus incumbendum est & hæ prius restaurandæ; deinde ad alia medicinæ instrumenta manus est admoventenda.

Quæres: Quousque vita, summa cum inedia, & absque ullo cibo ac potu sustineri queat? R. Licet ab *Hipp.* scriptum sit Lib. de *car-nibus*, seu de *principiis*, ante septimam diem, illam non esse exitialem. Et *Plinius* lib. 11. cap. 54. adhuc ultra undecimum plerosque durasse referat: Experimentis nihilominus innumeris observatum ab aliis est, etiam ad menses integros atque ad annos incolumem fuisse productam. At quamvis crediderim id factum in quibusdam, ex peculiari corporum & succorum constitutione, forte etiam non sine eorundem vitio atque acrimonia: In cæteris tamen universim, non diutius vitam naturaliter prorogari posse, ut sine cibo ac potu, hebdomadas transcendant, vix induci possum ut credam; Si potissimum succi ciborum dissolutionibus dicati, & ventriculus in suis operibus bene se habeant. In multis animalibus expertum se fatetur Clarissimus Redi infra quadragesimum diem duntaxat perduraturam, verum tamen homines, beneque valentes ipse existimaverim, haud difficulter decimum quartum transilire posse, quin & post octavum, bulimonia incurrere, quo nec amplius deinde fameſcant, nec cibum capiant, illumque fortasse assumptum, vel per vim inditum, nec retineant, nec conficiant, ut sæpe observatum est. Qui ergo referuntur ad plures menses & annos, sine ullo cibo vixisse, præter naturam plane affecti, in succis ventriculi, & intestinorum dissolventibus vitium aliquod passi sunt, unde ad cibos exquirendos minime sollicitantur.

Sed & sanguis pariter ejusmodi sane constitutionis fieri potest, ut vel minimum, vel nihil admodum extenuetur & absumatur, æque ac animalibus illis accidit, quæ per hyemem in latibulis degunt absque cibo: viscerum quoque & membrorum textura, plurimum in id ipsum confert, si non tam laxa ac tenuis sit, ut celeri consumptioni subjiçiat; Etenim quibus cutis densior est, nec facile perspirationi patet, levioſem sane patiuntur corporis dissolutionem. Simile quid accidit iis, qui ingenti timore & vehementi mœſtitia correpti, omni pene ciborum desiderio, destituuntur, & in ediam ad plures dies sufferunt. Qua ratione crediderim ob quam rem nonnulli sub ædificiorum ruina, ad hebdomadas supervixerint, & pleræque volucres intra nives semestri spatio immobiles persistant, & adhuc in vita perdu-

perdurent. Porro in his impedita perspiratione, sanguis non diffatur, ideoque nec novo pabulo eget ut continenter reficiatur. Quamquam & aër ipse sive inspiratus, sive per poros cutis, aut aliter exceptus, potest in aliquibus ita sanguinem temperare, ut sine evidenti consumptione, is diutius perennet; & sicut peculiares quædam aëris constitutiones solent quibusdam talem famem excitare, ut pluries in die cibum sumere cogantur, ita ex adverso poterunt, in certis saltem habitudinibus corporum illam obtundere, ut queant absque cibis in longum tempus perdurare, cujus forte constitutionis fuit ille, quem memorat *Aristoteles* solo aëre & sole sustentatum: hinc non omnino fabulosum putandum est, quod scribit *Plinius Lib. 7. cap. 2.* & confirmat *Arabo Lib. 15. de situ orbis.* Ad extremos fines Indiæ ab oriente, circa fontem Gangis Astomorum Gentem, sine ore, halitu tamen viventem, & odore, quem naribus trahunt, nullum illis cibum, nullumque potum esse.

Odore etiam plurimos sibi vitam prorogasse posteritati traditum, ut de *Democrito Laërtius* & de *Homero*, qui ejus vitam descripsit, memorat: Refert quoque *Xiphillinus ex Dione*, *Britannos* cibum parare consuevisse, qui ad unius fabæ quantitatem degustatus, & famem, & sitim penitus inhiberet: Feruntur & *Indi*, beneficio cujusdam herbæ *Coca*, ipsis dictæ, ac ore gestatæ, famem à seipsis repellere, quod etiam à *scythis* factitatum meminit *Mathiolus in præfatione ad Dioscoridem*: Sic pariter milites, tabaca fumali utentes, famem obtundunt, & ludrice credunt eam nutrire, cum interea nil præstet, quam alkama sua vi, acidum ventriculi, appetitum alias acuens, obtundens, & famem eo ipso minuens. Cæterum in aliis, qui diutius cibis caruisse narrantur, vel impostura locum habuit, vel virtus divina præluxit.

Dices I. In acutis morbis imperatur inedia, ergo falsus est *aphorismus*? R. Si corpora in acutis morbis laborantia sint repleta & cacochymica *concedo*, si vero inanita, imperatur inedia *nego*.

Dices II. *Hippocrates 7. Aph. 5. & 9. dicit*: in febribus esse famefcendum & laborandum, ergo contradicit sibi? R. *Distinguo antecedens* in corporibus humidis & repletis *concedo*, in siccis & consumptis *nego*.

Dices III. Biliosi facile famefcunt, imo si iis cibis negetur & potus, teste *Hippoc. 4. acutorum*, in graves affectus incidunt, ergo ta-

les nunquam essent purgandi, nec laboribus afficiendi? *R.* *Distinguo consequens*: si sint biliosi deficientes *concedo*, si autem sint biliosi *cachymici* & constantes viribus *nego*. Præterea in Praxi bene notandum, in picrocholis seu biliosis, labores & exercitia potius post pastum convenire, quam ante pastum, humidis vero & Eufarchis ante pastum, & sic intelligendus est locus *Hipp. I. de diata. in fine*: ubi dicit: ut labores cibos præcedant, id est in humidis, non vero biliosis.

Dices 4. Illi qui plurimum acidi habent in stomacho, plurimam habent famem, & tamen ii non sunt cibandi, sed potius evacuandi, ergo loquitur contra nostrum aphorismum, ubi famem potius laborandum, id est evacuandum & movendum est? *R.* Per famem ut diximus intelligimus inopiam alimenti, qui autem multum acidi habent, non carent alimento & materia, quæ evacuationem facile tolerant: id quod innuisse videtur *Hippocrates 2. aph. 21.* quando ait: *Famem thorexie sive vini potio solvit*, id est vini generosi, acidum infringentis & absumentis.

Aphorismus XVII.

Ubi præter naturam, copiosior cibus ingestus est, morbum id creat, quod ostendit etiam curatio (seu sanatio.)

Contentum seu Intentio.

De Cibi immoderatione.

Connexio: Quamvis hic *aphorismus* connexionem habere possit cum quarto, ut vult *Galenus in Commentariis*: *Non satietas, non fames, nec aliud quidquam quod natura modum excedat, bonum.* Si quidem sicut ibi, ita & hic mediocritatem omnino servandam esse, in natura apud omnes, præsertim in alimentorum sumptione nervose inculcat: Nihil ominus tamen illum connectimus cum præcedente, qui huic videtur occasionem dedisse, cum enim in præcedenti dixisset: *ubi fames laborandum non est*, imo potius replendum & alimentandum: in hoc autem innuit, cibum quidem assumendum esse, sed

sed non nimium, nec ultra vires & ultra repletionem debitam vasorum: hoc enim à natura regi non potest, unde humorum corruptio, & tandem morbus, ut patet ex illius sanatione: & revera hic verificatur illud: *Plures occidit Gula quam Gladius*; Sic si nimium sebum, simul & semellique factum ad flammam candelæ affluat, eandem non alit, sed extinguit. Unde illud symbolum

Nutrimeto extinguitur.

Nimia similiter alimentorum copia, sanitatem (id est hostram naturalem flammam) non alit, sed extinguit & destruit.

Diogenes dicere solebat: ubi frumentorum copia, ibi mures, ubi alimentorum superabundantia, ibi morbi. Vitandas ergo in hoc aphorismo docet Hippocrates satietates, quoniam ab illis morbi ex plenitudine fiunt.

In duas partes dividitur hic *Aphorismus*, in prima suam mox allegatam intentionem exponit; in altera vero causam suæ intentionis adducit: imo primam Aphorismi partem probat secunda, dum dicit: *Hoc indicat sanatio*, quæ est probatio à posteriori, seu ab eventu & effectu, qui hic non fortunæ filius, uti apud *Empyricos*, sed veri consilii & Judicii soboles, uti habet *Hippocrates Lib. de natura humana*:

Generatur autem ex nimia ciborum quantitate, vel *Plethora* vel *Cacochymia*: *Plethora* in robustis, *cacochymia* in debilibus, utrumque fames & causa communis ac universalis est variorum morborum, vulgo notum est & testatur *Socrates* Dicens: *Ingluvies & luxuria, morborum monstra è lateribus eliciunt*: Guituitamen & consuetudini aliquid in cibo & potu tribuendum, juxta illud: *Quod sapit nutrit*: At tamen probe ponderandum, ut quo debilius est naturæ robur, eo minus cibo eget, eoque facilius ab ingestis læditur etiam alioquin sanus.

Notandum I. Per verbum *ubi* duo significari, locum nempe & *tempus*: in quemcunque locum cibus præternaturam ingreditur, morbum creat: Sic etiam quocunque tempore præternaturam assumitur, morbos pariter gignit.

Notandum II. Cibus præternaturam talis est, vel *quantitate*, vel *qualitate*: *Quantitate* excedit dupliciter, vel *continua* vel *discreta*: De *quantitate continua* seu *molis* scripsit *Hippocrates Lib. de affectionibus*, cibos etiam temperatos & naturæ familiares, si quis illis vel in tempestivis aut pluribus utatur, quam tempestivum est, morbos gignere,

re, & ex morbis mortes. De *quantitate discreta* scripsit quoque ob-
sonia variis intritis præparata, quia diversas inter se vires habent, æ-
stuosa esse & noxia. De *Qualitate* quoque præter naturam in cibo,
qualis est falsus, acris, amarus, acidus, monuit idem *Hippocrates*, fie-
ri in corpore turbationes, quia alimentum & augmentum non fit nisi
per id, quod probe temperatum est & edomitum.

Dicitur etiam *præter naturam*, sive ut legunt ultra naturæ exi-
gentiam, cibus, qui licet speciei humanæ sit familiaris, alicui tamen
particulari, seu in individuo adeo est invisus, ut fugiat illum velut ve-
nenum, qualis est caseus quibusdam, vinum aliis, pisces aliis, panis
aliis & alia aliis de quibus tractant fusc Authores

Notandum III. Quod verbum illud: *præter naturam* designet
ex mente Hippocratis cibi ingesti quantitatem mensurandam esse, à
peculiari cujusvis corporis constitutione: quæ enim quantitas uni in-
debita & excedens videtur, alii erit naturalis & consentanea: Quam-
obrem semper est habendus respectus ad ætatem, propriam constitu-
tionem, exercitia, incolatum, in ciborum administratione. Vel
etiam ly verbum *præter naturam* explicari potest, prout vires gravat,
& ventriculum plus justo replet; concoquentis quippe ventriculi vis
limitata est, & succi ejusdem non omnem ciborum copiam dissolve-
re queunt, sicut nec certa aquæ stygiæ quantitas illimitatam metallo-
rum molem diluere & erodere valet. Und 3. ly *præternaturam* vel
indicat parvum excessum vel magnum: In hoc *aphoris*. juxta mentem
*Galen*i intelligitur excessus magnus, quia parvus excessus morbum
non procreat: Verum nos salvo *Galen*i arbitrio, etiam de parvo ex-
cessu veram hanc esse *Hippocratis* sententiam, credimus: de magno ex-
cessu nemo dubitat, quia à plenitudine & semel & repente, morbus
creari potest, ut in *ebriis*; Sed etiam à parvo excessu, si duret & con-
tinuet, paulatim morbus fieri potest, & fit; nam teste *Hippocrate* 6.
epid. Lib. de diata, morbus paulatim fit, sed repente invadit. Quoniam
vero *Hippocrates* in hoc *aphorismo* inquit: *ex cibo præternaturam plus in-
gesto morbum fieri, non mortem*, adeoque admittere sanationem: Inde
profecto deducere possumus, excessum duntaxat cibi assumpti, illum
hic notare voluisse; sive autem excessus sit relatus ad cibum solito
abundantior, ut de foemina quadam idem Author in *Epidemiis* te-
statur, quæ liberalius pasta, quo die judicata fuerat, recidit; sive ad
vinum

vinum & facultatem ventriculi etiam moderatam ejusdem quantitatem exacte conficere nequeunt, cum multum & paucum ad aliquid referantur, parum intererit: Nam & importunus & insuetus & impræparatus & crudus, atque nec debito ordine, nec convenienti modo sumptus cibus, non tantum convalescentibus, sed etiam sanis nocuus & periculosus esse solet: *Cibus profecto* (inquit idem Hippocrates Lib. de locis in homine) *(si vincit naturam, efficit morbum.* Verbo? quocunque demum modo naturam superet, præter naturam erit, atque adeo morbum faciet.

Notandum 4. Duplicem esse plenitudinem seu repletionem, unam ad *vasa*, alteram ad *vires*: Ad *vasa*, quando nimio humore distenduntur: ad *vires*, ea est humoris id est sanguinis copia ut à natura superari non queat.

Notandum 5. Plenitudo in genere dicitur & fit, ubi cibi superant labores: ita testatur *Hippocrates de diæta 4. de morbis: de locis in homine.*

Notandum 6. Quod una quæque plenitudo sua habeat signa: v. g. ventriculi, intestinorum, ex ructu, oscitatione, flatu, gravitate segnitie, dormituratione, capitis dolore, nausea, torminibus, *venarum*: ex tumore earum, colore rubicundo, capitis dolore, tussi, stillicidio sanguinis: *Humorum*. sunt cujuscunque humoris sua quæque indicia propria. *Partium & membrorum*: ex lassitudine.

Notandum 7. Per illud verbum: *ostendit autem sanatio*: docet nos *Hippocrates*, quod sanatio, quæ fit in repletionem in *quanto*, vel repletionem in *quali* procuratur per evacuationem seu depletionem.

Evacuatio autem ex mente unanimi *veterum & recentiorum* fit per *vena sectionem* in *plethora* seu in repletionem in *quanto*: per *purgationem* in *cacochymia*, seu in repletionem in *quali*, præterea etiam per clysteres, exercitia, balnea, frictiones, inedias, & alia alterantia convenientia: Patet quidem ex hoc *Aphor.* ex cibo præter naturam plus ingesto, morbum oriri, & hoc ipsum sanationem ostendere; nullam tamen mentionem facit de morbi specie aut de ejusdem sanatione: fortasse voluit subintelligendas ægrotudines ex cruditate, quam fere omnes morbi consequi possunt, nisi etiam eandem prægressam ægrotudinem, & graviolem ex indigestis corruptisque cibis redire existimaverit, aut etiam morbi nomine abusus, damnum atque detrimentum inde

indefinite expresserit. Sanationem vero per vomitum aut dejectionem vel per inediam implicite complexus est: Etenim mala ex cibis uberioribus vel infestis orta, quam citissime vomitu, aut exacta diæta corriguntur.

Quod si interiores ductus subierint, & viscera ac sanguinem inferint, non nisi alexipharmacis curabuntur: Cæterum à cibis abundantius ingestis, depravatis aut corruptis, præter cruditates proficiuntur obstructions, tumores, alvi profluvia, cholera, colica, febres, idque genus alia & pejora mala; si præterea ut diximus cacochymi ii sint, seu infalubres, malique succi, etiam febres pestilenciales oriri consueverunt, item vertigines, syncopes, lethargi, apoplexia, & alii perniciosi morbi, quos memorat *Galenus de cibis boni & mali succi*. Quamobrem si ex his morbi provenerint, pro illorum ratione varia, diversimode quoque tractandi sunt.

Quæres utrum plenitudo sit morbus? R. stricte loquendo non est morbus, sed causa morbi, posset tamen minus stricte dici morbus pro materiali.

Dices: Hic *Aphorismus* idem est cum *Aph. 4.* Ergo entia multiplicantur sine necessitate? R. *Nego antecedens*: nam hic agit de excessu præternaturam, ille *quartus* de excessu præter modum, seu supra mediocritatem, qui non est præter naturam: ita *Galenus de differentiis morborum*.

Aphorismus XVIII.

Eorum quæ confertim (alii dicunt universim) & celeriter alunt, celeres quoque sunt excretiones.

Contentum seu Intentio.

De Excrementis juxta assumptorum qualitatem.

Notandum prævie, duplicem passim ab *Autoribus* afferri hujus Aphorismi sensum & interpretationem: alii dicunt: Eorum quæ *universim*, hoc est secundum totam substantiam & velociter nutriunt, celeres quoque fieri residuorum excretiones. Aliis sic placet

cet (non *universim* sed *affatim* seu *confertim* seu non sensim) exponere, adeoque Aphorismum sic interpretantur, quod ea quæ abundantem & celerem suggerunt nutrientem substantiam, celerem quoque patiuntur excretionem. De quibus mox clarius.

Connexio: In Aphorismo 16. dixit *Hippocrates: Vbi fames, laborandum non est*: In decimo septimo seu præcedente nos cautos reddit in nutriendo esurientes: In hoc decimo octavo jam monstrat quomodo nutriendi sint ne lædantur, ut sciamus cognoscere, quod illa, quæ celeriter alunt, etiam celeriter diffentur, distribuuntur, & evacuantur, id est quæ citissime digeruntur & concoquuntur, atque distribuuntur, etiam citissime nutriunt, & citissime eorum fiunt educationes. Ut simul exinde cognoscat Medicus, cibos, qui facile & breviter reficiunt, & qui aptissimi sunt convalescentibus, & maxime iis, qui celeri refectioe indigent. Pabulum autem apud Medicos est, quod velox nutritio, velocem quoque excretionem referat; quia sicut se habet digestio ad nutritionem, ita se habet secretio ac distributio ad evacuationem: Unde si velox facta sit nutritio, velox quoque designatur absoluta digestio & distributio adeoque excrementorum repurgatio & expulsio.

Hic Aphorismus ob brevitatem divisionem non patitur. Si ergo sumpto cibo brevi tempore, id est, interpositis paucis horis, subsequatur ejusdem per alvum excretio, manifestum est signum, illum cibum fuisse facilis concoctionis, & consequenter etiam facilis nutritionis: Est enim concoctio & excretio, una eademque continuata actio, ab eadem causa efficiente, calore nempe naturali emanans, unde absoluta concoctione, quantocyus cibus excernitur. *Primo* quidem per duodenum ad intestina, in quibus nutritibili sua emulsione, per venas lacteas exhaustus, in fœces degenerat, mox per alvum excernendas, natura enim feriari nequit. Verum enim vero qua ratione universim seu affatim nutrientia, celerem subeant evacuationem, non bene intelligi potest, cum pleraque nutrant & abundanter, nec tamen celeriter evacuantur; sic v. g. carnes melius & abundantius nutriunt quam olera, cum tamen ista facilioris sint & celerioris excretionis: Multa alia ut v. g. astaci, tardius plane concoquuntur, mox vero in intestina tenuia delapsa, statim ventrem movent, & plus quam ratio exi-

git egeruntur: Ova insuper facilis & citæ dicuntur coctionis, multumque nutrire, & cum tamen robustum quid habeant & inflent teste *Hippocrate* de diæta. 2. quin & *Galen.* ipse multa alia in hunc locum congerit, quibus *Hippocratis* effatum, non levibus videtur implexum difficultatibus. Sed tamen, ut ipse credo voluisse hic *Hippocratem* indicare, quod alia phrasi dixerat, *in lib. de alimento: Cibum scilicet, qui difficulter transmutatur agre consumi, qui vero facile alteratur & apponitur, absumi etiam facile:* Cum enim refectio virium celerrime habeatur à vino, vinique spiritu, aut à rebus consimilem naturam participantibus, profecto, quemadmodum ista velociter restaurant, ita velociter quoque sua tenuitate dissolvuntur: alimenta pariter tenuiorem substantiam nacta, & labilis appositionis, celeris etiam sunt difflationis, & adhuc per poros cutis perspiratione: Contra vero succum sortita crassiores & compactiores, sicuti difficilius in ventriculo dissolvuntur, ita tardius in succum nutritium transmutantur, partibus apponuntur, atque pari ratione serius absumentur & perspirant.

Pro majori ergo claritate hujus aphorismi explicandi: *Notandum* ea alimenta, quæ universim & velociter nutriunt, quæque vertuntur in alimentum in ventriculo, simulatque ingesta sunt, concoqui incipiunt & distribuuntur, ut mox diximus, velociter per venas, & universim secundum omnes *partes alibiles*, non vero secundum *partes excrementitias* (nihil enim sub cælo reperibile est, quod nobis unde quaque simillimum non sit, ita nulla pars excrementitia sit, non enim omnia quæ cito alterant & nutriunt æque constanter & firmiter id præstant) ergo inquam, secundum omnes *partes alibiles*, non vero secundum *excrementitias* corporis nostri partes alunt: Palam constat, nutrimenti seu alimenti duas esse partes, *alteram utilem* quæ trahitur, alteram inutilem quæ *expellitur*.

Triplices sunt corporis excretiones, sicut tres sunt coctiones: *Prima* sunt stomachi & intestinorum: *Secunda* urinæ & sudoris quæ in visceribus naturalibus potissimum contingit: *Tertia* sunt sordium quæ efficiuntur in morbis. De omnibus loquitur *Hipp.* sed manifestius de fœcibus alvi & urinis.

Quando ergo dicitur *excretiones quoque celeriter fiunt*, id est distributiones & educationes (seu ut *Galen.* interpretatur) difflationes, per modo dictas partes, non autem præcise alvi subductiones, si quidem enim

enim quo plus quid nutrit, eo pauciores causat excretiones, & celeriter nutrit. Nam coctio est propter distributionem, distributio propter nutritionem, nutritio propter restaurationem. Cibi qui celeriter coquantur, sunt liquidi & fluidi, qui caloris impressionem facile recipiunt (citior enim est fluidorum nutritio & excretio, tardior vero solidorum, quia solida carent vehiculo) talia sunt ova, testes Gallinacei, sorbitiones & similia, quæ fere tantum nutrimenti afferunt, quantum ponderant, quia nimirum ejusmodi cibi sunt facilis concoctionis, facilis distributionis, & pauci excrementi, paucæque cruditatis, & sic quia partes non habent crassiores, calori sese protinus submitunt & coctionem recipiunt. Ut paucis dicamus omnia; hoc *Aphorismo* censuit *Hippocrates* generale quoddam documentum tradere, quo sciamus quibus alimentis, ægros & convalescentes oporteat reficere, & quibus indiciis utiliora internoscamus. At vero à liquiditate & mollitie ciborum fallax judicium sumitur, *facilis & citæ refectionis*; nam si vini spiritum excipias & ipsum vinum, reliqua propemodum omnia, non æque cunctis conferunt, nec pari modo se habent - cum non desint, qui melius & promptius restaurentur solidioribus, quam mollioribus cibariis.

Dices: quæ alunt non excernuntur, quia quæ alunt convertuntur in substantiam aliti, ergo non excernuntur, ergo falsus est Aphorismus? R. Non hic intelligi excretiones alvinas crassiores sed tenuiores, seu potius distributiones & diffusiones ut dictum supra: illa enim quæ cito fiunt, cito pereunt, ita etiam quæ cito aggenerantur, cito etiam resolvuntur.

Dices 2. Quæ confertim alunt, debent etiam confertim converti in substantiam aliti, sed hoc non videtur fieri posse, quia alimentum primo confertim in chylum, postea in sangvinem, & tandem circulo aliquoties facto in substantiam aliti commutatur. R. *Ly alunt*, in hoc Aphorismo sumi metaphorice, id est vertuntur confertim in alimentum & coquantur: Est igitur potius hic Aphorismi sensus: Eorum quæ *velociter & universim* nutriunt, quæcunque vertuntur in alimentum in ventriculo simul ac ingesta sunt, concoqui incipiunt & verti confertim in alimentum, id est secundum omnes partes alibiles convertuntur, ita & velociter distribuuntur per venas, uno verbo velociter diffillantur.

Instabis: Illa quæ jam sunt, & fuerunt alimenta, non est opus

converti in alimenta, ergo nulla solutio? R. Illa quæ sunt & fuerunt alimenta *proxima*, non est opus converti in alimenta *concedo*. Illa quæ fuerunt alimenta *remota*, non erat opus converti in alimenta *proxima nego*.

Aphorismus XIX.

Morborum acutorum, non omnino certæ sunt prædictiones, neque mortis, neque salutis.

Contentum seu Intentio.

De Prognosi Acutorum.

Connexio: Cum in antecedentibus *Hippocrates* multa de felici aut infelici morborum successu & prognosi, ob evacuationes, tum per purgationes, tum per venæ sectiones factas discurrisset & scripsisset; in hoc autem *Aphor.* videtur progredi in prognostico seu morborum eventu, dum dicit *acutorum morborum non omnino &c.*

Brevitas hujus Aphorismi non patitur divisionem & compositionem.

Notandum hic præliminariter, inter alias morborum divisiones notissimam illam esse, qua alii *acuti*, alii *chronici* dicuntur, cumque acuti ob citam eorundem solutionem intra breve tempus de agrotantis vita decernat, cujus eventus præsagio, ab ignominia plerumque Medicos vindicat, ne tamen exinde multum faciles in prædicendo illi sint, idcirco *accuratissimus Hippocrates*, ut quorundam conjectorum impudentiam & arrogantiam reprimat, qui etiam à prima die se jactant, morborum exitum prænuntiare. Hic monet non omnino certas esse, & infallibiles acutorum morborum vel ad salutem vel mortem prædictiones. Hinc *idem magnus Hippocrates lib. 2. prædiction:* postquam hos deriserit, subdit: *Consulo autem (inquit) ut quam prudentissime agant, tum in reliqua arte, tum in hujusmodi prædictionibus, illius probe memores quod si cui successerit prædictio, is apud agrotum, intelligentia præditum in admiratione fuerit; si vero quis aberraverit, supra hoc quod odio habe-*

habetur, fortasse etiam insanire videbitur: quapropter jubeo, ut cum alias omnes tum has pradictiones prudenter faciunt, quanquam sane & audiam & videam, neque judicare recte homines ea, quæ dicuntur ac fiunt in arte neque narrare.

Quinam autem morbi acuti dicendi sint, jam supra, & etiam in Institutionibus abunde ostensum est. Nempe eos breves ac symptomatum magnitudine & vehementia sociatos esse debere; etenim febres Ephemera dictæ, quamvis brevissimæ sint, ob defectum tamen symptomatum graviorum, acutæ minimæ dicuntur; sed & nec Hydrops, empyema, tabes, aliique morbi *vehementissimis pernitiosissimisque symptomatibus conjuncti, acuti morbi nominantur*, quia breves non sunt. Quamobrem merito novit Hippocrates 1. Aph. 7. *morbos acutos statim extremos afferre labores.*

Unde autem morbis accidat acute lædere & ægros affligere profecto à partis affectæ præstantia, & à vitiosi humoris conditione deducere licet: à *partis præstantia quidem*, nam hæc diu molestiam, gravemque noxam sustinere non potest, qua ratione apoplexiæ, lethargi, phrenitides, syncopes, palpitationes, ob cerebri & cordis cum vita necessitudinem non multum protrahuntur: à *noxii humoris natura vero*, qui plerumque in acutis morbis sanguini infensus, vitæ conservandæ ineptum illum reddit, sive quod dissolvat & erumpat, sive quod cogat, aut aliter inficiat, ut solutus, concretus, & effoctus nequeat tandem motum cordis tueri. Hæc plane damna sæpe numero eveniunt, è degenerantibus inversis & corruptis fermentis viscerum, quibus sanguis permeans inficitur.

Quamvis vero morbi quicunque inchoant, augeſcunt, consistunt, & declinant, non tantum inter initia de illorum exitu certo præſagire nequimus, verum etiam fallax judicium & incerta prædictio erit, quousque exacte non constiterint, cæperintque declinare: cum enim nondum devicti pugnantes causam in corpore latentem adhuc habent, vitæ possunt insidias moliri, & ob agendi rapiditatem, quacunque de causa, momento temporis permutantur, & symptomata quæ remitti visa sunt, denuo exasperantur, imo quandoque graviora redeunt.

Hanc incertitudinis causam referunt fere communiter interpretes in humorum peccantium mobilitatem & tenuitatem, quoniam scilicet facile ii de loco in locum feruntur, & quascunque corporis par-

tes pervadunt, ut propterea chronici morbi à crassis humoribus pro-
geniti, cum lente procedunt, soleant facilius & tutius futuri eventus
indicia prodere. Verum enim vero, potius petenda videtur causa à
motu particularum in sanguine, cæterisque liquoribus fermentescen-
tium: Etenim quamdiu fermentatio perseveraverit, & in depressio-
nem & excretionem non desierit, quæ sola salutarem exitum ægris
prænuntiat, morbus ipse in ancipiti est, quandoquidem in coagulatio-
nem & resolutionem abire potest. *Hippocrates* ergo notanter dicit:
non omnino certa sunt prædictiones: id est non dari talem prognostican-
di certitudinem in acutis, ut Medicus rem pro infallibili vendere pos-
sit, sed tantum pro dubia, licet à potiori verificetur. Si enim Medico
in acutis ab omni prognostico abstinendum esset, ad quid *Hippocrates*
tot prognosticandi libros reliquisset? *Aphorismos, prognostica, prorrheti-
ca, coacas prænotiones* &c. qui potissimum de prognosi auctorum scri-
pti sunt. Præterea in nostro Aphor. adjecit prudenter *Hippocrates*:
non omnino: ne nimirum Medici prorsus desperent de prognosi, cum
cæteroquin magnam laudem exinde consequi soleant teste *Hippoc 1.
prognost.* Quare ut quis rationabiliter conjiciat de successu ægrorum
docuit *Galenus 3. de Crisibus 4.* ad tria hæc respicere debere: *Ad ideam
morbi, ad magnitudinem, & ad morem*: nempe cujus generis morbus
sit, quæ symptomata illum comitentur & num à benignis vel malignis
succis ortum ducat: Perpendat etiam sagax Medicus Naturæ vires, an
validæ, an imbecilles sint, & quidem examinando singulas corporis
operationes animales, vitales & naturales, ab his nempe bene vel male
habentibus levius & gravius probabiliter saltem cujuscunque morbi
eventum conjectabit.

Insuper adhuc addit & subdit *Hippocrates: non omnino sunt certa
prædictiones*: si quidem Medicina tota conjecturalis est, & universa
conjecturis inhæret, ideo 1. Aph. 1. *Judicium fallax* dicitur. Et *Celsus
Lib. 2. cap. 6.* inquit: *Spes ejus interdum frustratur, & moritur aliquis de
quo Medicus securus primo fuit*: ut mox dicemus pluribus. Attamen
non sunt ex hoc omnino parvi faciendæ ejusmodi conjecturæ, nam etsi
aliquando fallant, sæpe tamen colimant, unde idem *Celsus*: Sed est
tamen Medicinæ fides, quæ multo sæpius perque multo plures ægro-
tos prodest.

Rationes proinde nostri Aphorismi ejusque incertitudinis nobis
prin-

principaliter sunt quatuor. *Prima* est iudicii critici incertitudo: O! quoties natura cocto jam morbo succumbit in expulsiōe, & ubi heri signa coctionis in urinis erant, hodie cruda omnino visa urina & signa potius mortis quam salutis præsefert, quia nimirum natura vi symptomatum obruta, destitit à coctionis opere, & quæ heri victrix & morbo superior, hodie succumbit. O! quoties è contra succumbere visa, inopinate resurgit, & quæ heri erant pessima omnia, hodie sunt meliora, remittentibus scilicet symptomatibus natura coctioni incumbere capit, atque ita morbo superior evasit.

Utrumque ergo Medicos etiam oculatissimos fallit: Hinc Hippocrates ait *Lib. de Decenti ornatu*: *Instabilia sunt, quæ in humidis consistunt, quare facile & à natura, & à fortuna transmutantur.* Morbi acuti enim sæpe aliud præseferunt, quam in recessu minitentur.

Secunda ratio: Est periculum metastasis, seu translationis humorum ad partem *nobilem* seu *principem*: Materia acutorum est subtilis, tenuis, calida, movetur motu frequenti, violento, & impetuoso, effervescentia præternaturali rarefacta, vasa dilatat, distendit, implet, hinc summum inflammationis periculum, quæ si in parte *Nobili* fiat (quod Medicus prævidere nescit) jam mutata est scena, & Medicus in sua prognosi deceptus.

Tertia ratio: Est morbi malignitas, hæc dum blanditur, nocet, & dum nocet, decipit, uno verbo adulatorum & Pseudo Politicorum naturam habet, de quibus Poëta

Annis mille jam peractis

Nulla fides est in pactis

Mel in ore, verba lactis

Fel in corde, fraus in factis.

In benignis enim febribus, bona signa raro fallunt, in malignis raro verificantur.

Quarta ratio est: quod subinde longo tempore varii abscessus, arte medica inperscrutabiles in corpore delitescunt, qui si febrili calore maturati crepent, & rumpantur, non semel improvise morre morbo epilogum imponunt. Si ergo Propheta infallibilis audiri velis, *morbi speciem, ideam, mores, partem affectam, humoris peccantis quantitatem, motum, naturæ robur, pulsum, mutationes, emergentia exacte perspecta omnia habeas necesse est.*

Vulgare

Vulgare & tritum est Philosophorum axioma: *de futuris contingentibus non datur determinata veritas*: ista autem sunt in triplici differentia: quædam ut plurimum eveniunt, ut in æstate calor, in hyeme frigus: quædam raro accidunt ut Cometæ: quædam sunt ad utrumlibet, quia æqualiter fieri & non fieri possunt, ut quæ à voluntate nostra pendent: de *primis* & *secundis* est determinata veritas, quod erunt, vel non erunt, ut plurimum vel raro: At de contingenti futuro ad utrumlibet, non est determinata veritas; talis est in universum eventus acuti morbi, quia potest occidere vel non occidere.

Notandum 1. Quod in ipso morbo adhuc triplex illud contingens reperiatur: Exemplo sit *pleuritis*, si omnia signa bona habeat, æger sanabitur, si omnia mala, morietur. Si autem partim bona, partim mala, dubius erit morbus: In *primo* & *secundo* casu Medicus fere semper vera prædicit; quia ut plurimum contingit sanari cum signis bonis, & mori cum malis: At in *tertio* dubius est eventus, ideo in omnibus his incertæ sunt prædictiones ut plurimum, in primo autem & secundo casu raro incertæ.

Notandum 2. Quod morbi quidam dicantur *boni moris*, alii *mali moris*: *Boni moris* est ille, qui servat sua signa exquisita: Exemplo sit *Causus*, sitim, vigilias, calorem ardentem servans, *Benignus* dicitur: At *Causus* sine siti, vel cum somno, *Malignus* dicitur: In *benigno* raro contingit errare apparentibus signis optimis vel pessimis; in *maligno* autem contingit errare ut plurimum quia inconstans: Ideo bene dicit *Hippocrates* 3. Aph. 8. *In inconstantibus temporibus inconstantes morbos fieri, & dubii, & mali iudicii.*

Notandum 3. Quod in omni morbo acuto prædictio fieri possit vel in principio, vel in augmento, vel in statu ipsius morbi: in principio ut plurimum incertæ sunt prædictiones; ita etiam in augmento: Ideo *Hippocrates* præcepit, non esse prædicendum, donec statum acceperit morbus, eo enim tempore coctiones accidunt, & quidquid natura potest, ostenditur.

Notandum 4. Quod abs re non sit facilius in acutis diem & horam, quam in longis & chronicis prædicere posse Medicum, in his enim sæpissime errant Medici, dum v. g. Hydropico vel Phtifico diem vel horam mortis prædicere satagunt, in cujus septimana, imo mense prædicendo sæpissime hallucinantur: Attamen, cum ut mox diximus
insta-

instabiles sint acuti, etiam in his incertæ sunt prædictiones: Unde, ut verbo dicamus omnia, nullibi magis cautus & providus esse debet Medicus, quam in prognosi acutorum.

Notandum 5. Quamvis meminerit *Hippocrates, salutis* duntaxat & *mortis*; sub his nihilominus, aliæ in morbis mutationes comprehenduntur, ut proinde non modo cauti simus, in præsagiendo salutis aut mortis eventu, verum etiam omnium accidentium & mutationum, quæ in morborum decursu contingere possunt. Notavit autem speciatim acutos, quibus ex brevitate & impetu facilius accidit mutatio: at vero chronici cum in longius protrahantur, nec tam subitam motionem subeunt, nec sine alicujus visceris affectu dixerent certiora & firmiora signa imminentis quandoque interitus proferunt.

Dices: *Hippocrates III. prognosticor.* dicit: *breves morbos facilius discerni, quam longos*, ergo est contradictio? R. Breves morbi facilius discernuntur quoad diem vel horam *concedo*, quoad salutem vel mortem *nego*.

Dices II. Apoplexia fortis est morbus & acutissimus, atqui in ea est certa & non incerta prædictio; quod *probat*, quia ipsemet *Hippocrates* dicit: *Apoplexiam fortem solvere impossibile est*, ergo est certa prædictio? R. I. *Distinguo majorem*: Apoplexia est morbus acutissimus quoad accessionem vel prognosim *concedo*, quoad causam & essentiam *nego*. R. II. Apoplexiam fortem solvere impossibile est, intelligitur *ly impossibile absolute*, quod nempe apoplexia fortis nunquam solvatur, quin non in paralysem vel hemiplegiam desinat, unde tali sensu benedicatur, absolute apoplecticum talem integre sanitati non restitui, quin non fiat vel paralyticus vel hemiplecticus: *Ly impossibile autem* si respective sumatur, respectu puræ putæ apoplexiæ, illa quidem suo modo solvitur, sed majori ex parte in alios sibi affines morbos degenerat.

Dices III. Morborum chronicorum incertæ sunt prædictiones, ergo acutorum erunt certæ; contrariorum enim contrariæ sunt rationes, Imo *Hippocrates* ut diximus 3. *prognost.* dicit: *breves morbos facilius discerni, quam longos*: Item *Hipp. Lib. de natura humana* dicit, Medicum certo prædicere non posse salutem aut mortem in mor-

bis qui paulatim gignuntur, uti sunt morbi chronici. *R. Hippocrat.* in his locis loqui de prædictione durationis virium, & non de duratione morbi: Ex his autem nulla contrariæ durationis ratio elici potest.

Dices 4. Morbus in declinatione sua etiam dicitur acutus & tamen ejus tunc certa datur prædictio, nullus enim in declinatione moritur, teste *Gal. 3. de Crisibus cap. 5.* qui dicit: nullum esse mortis periculum statu morbi elapso, id est in declinatione, quia materia est cocta & natura victrix, ergo datur certa prædictio. *R. I.* In declinatione morbi acuti eo ipso quod declinet; non dici proprie amplius acutum cæteris consentientibus. *R. II.* Licet morbus in declinatione sit, non tamen certa prædictio, quia facile æger pati potest recidivam, vel portio materiæ residuæ potest regredi & transferri ad partem nobilem, & sic inferre insperatum periculum, vel alia accidentia vehementia naturam deicientia accedant. *R. III.* Nullus in declinatione moritur si vere & absolute declinet *concedo*, si vero recidivet, aut in partem mobilem regrediatur, *nego*. *R. IV.* Ergo est certa prædictio, quoad declinationem morbi *concedo*, quoad causam & errorem naturæ vel Medici supervenientem est certa prædictio *nego*. *R. V.* Ægros mori in declinatione particulari v. g. status, non autem in declinatione universali.

Dices 5. *Hippoc. Lib. I. prognost.* ait: In febribus idem est terminus salutis & mortis, ergo certa est prædictio. *R.* In febribus idem est terminus, id est, iidem sunt dies indicatorii, dum per crisin terminantur *concedo*, ergo terminus ultimus certus est, *nego*. Aliud enim est prædicere de crisi, quæ est tendentia ad salutem vel mortem, aliud est prædicere de ipsa salute vel morte.

Quæres, quid hîc intelligat *Hippocrates* per morbos acutos? *R.* Intelligere ut supra diximus eos morbos, qui cum celeritate & vehementia moventur & terminantur, idque fit vel ob partis nobilitatem vel materiæ potens vitium.

Aphorismus XX.

Quibus per Juventutem, alvi sunt humida, iis senescentibus exsiccantur: Quibus vero in juventute alvi sunt sicca, iis senescentibus humectantur.

Nota:

Nota: Similis si non prorsus idem est aphorism. huius Sect. 53. qui sic sonat: *Quicumque alvos humidus habent, si quidem iuvenis fuerint, melius degunt his qui siccas habent; at in senectute deterius degunt, nam senescentibus ut plurimum siccantur.*

Contentum seu Intentio.

De Diversitate alvi excretorum ratione ætatis.

Connexio: Præsens Aphorismus non tam bene connectitur cum præcedente, quam cum decimo octavo, in quo docuit alimenta celeriter nutrientia, etiam celeriter excerni; In hoc autem ostendit, quomodo dejectiones fiant & mutantur in ætatibus; dicit enim eos, qui in Juventute sunt laxi, in senectute fiunt stiptici & è contra, & hoc *divus senex* habet à diuturna observatione & experientia potius quam rationibus, prout Interpretes faciunt, de quibus mox dicemus: ostendit præterea *Hippocrates* non loqui hic de *morbosa*, sed de *naturali* alvi siccitate, & humectatione, dividitur hic Aphorismus in duas partes, in prima, primam facit conclusionem, in altera parte alteram illi contrariam: Idque breviter & philosophice probat. Causæ contrariæ, effectus pariunt contrarios; sic etiam constitutiones contrariæ, contrarios habent effectus: sed causæ dejectionis in Juvene & sene sunt contrariæ, sicque constitutio Juvenilis est contraria senili, ergo etiam contrarios habebit effectus, & per consequens alvus in Juventute humida, sicca fiet in senectute & è contra,

Hippocrates in hoc aphorismo non est locutus de *pueris*, quam potius de *juvenibus*, ratio est, quia pueri plerumque sunt alvi humidioris, ob totius & præcipue capitis maiorem humiditatem: *Iuvenes* autem non ita sunt humidi, sed sicciores fiunt, ob maiorem caloris activitatem, & cum in senectute non tantus adsit calor, sed potius status contrarius, hinc etiam fit ut contrarii generentur effectus. Quod autem alvus quæ in juventute fuit humida, in senectute siccetur, causa est, quia humiditas per tot juventutis excretiones tollitur: E contra in alvo juvenum adstricta paulatim humiditas colligitur, quæ in senectute operarii incipit: Quamvis quidem hæc res difficilis explicatu videatur, si tamen ea quæ ad ciborum confectionem, dissolutionem & excrementorum alvi secretionem alibi diximus, hic in memo-

riam revocentur, causæ ejusmodi permutationis in ætatum varietate rationabilius quæri poterunt.

Evidens enim, & in Praxi quasi res patula est: quod statum corporis, tum quoad alia, tum potissimum quoad excretiones mutet ætas, & hinc excrementorum frequens vel tardior secundum naturam (de morbosa enim non loquimur) dejectio, à tempore seu Crisi diversa corporis partium atque ciborum assumptorum proportionem contingit: Ciborum enim dissolutionem, atque utilium ab inutilibus partibus secretionem promovent potissimum confluentes succi illi, è pancreate per *VVürjungii* ductum, & cysti fellea per cholydochum in intestina: Debent autem hi ita esse à natura comparati, ut alter alterum nec mole, nec conditione prævaleat aut exsuperet: Si vero felleus humor fortasse præcellat & acrior atque tenuior sit, alvus lubricior redditur, at contra adstrictior fit, si præpolleat è pancreate deductus. Quandoque etiam serosus humor, qui è potu & cibis humidis derivat, totus fere in intestina delabitur, & cum fœcibus commiscetur ad alvi lubricitatem, aliquando vero majori ex parte ad renes percolatur & ad vesicam; unde urina copiosior fit, alvus vero siccior evadit: quamobrem in urinæ profluviiis ventrem constipari, & fœces durissimas excerni: Hinc dicebat *Hippocrates: multa urina profusio, paucam significat dejectionem.* Hinc viscera calidiora humiditates suspendunt & attrahunt, non secus, ac in magno calore aëris humiditates è terra in altum sublimantur: Viscera vero è contra discrasata, obstructa aut debilitata, magis cadere & delabi sinunt, quia vim non habent humores sublimandi, sed eos potius reddunt ponderosiores, hinc etiam facilius decidunt, nisi accedat magna siccitas, aut ariditas, quæ etiam in senibus expulsionem potest impedire. Non tamen negamus etiam viscera calidiora, multum attrahentia & humiditates cumulantia successu temporis sicciora reddi, simulque stomachus hebetatus & acido infarctus, multum appetit & parum digerit, exinde multas cumulat humiditates, alvi laxioris causas: quia error primæ digestionis non corrigitur in altera, multo minus in tertia.

Bilis itidem ad alvi laxationem non parum facit velut clyster seu stimulus naturalis. Patet etiam mutationes in ætatibus, ac vicissitudines non semper ad amissim inter se contingere, ob errores in diæta commissos, quæ contenta & excernenda variare possunt.

Pro hujus nostri *aphorismi* veritate, debet supponi (ut plerique sentiunt) à nobis idem homo, non diversi, idem cibus, eodemque modo paratus, & denique æqualitas in rebus cæteris non naturalibus: Et juxta illos solum debet esse differentia in ætatibus: sed de hoc paulo post infra explicatius loquemur.

Atque ut rem totam paucis reddamus clariorem, breviter *notandum* est; quod humiditas seu lubricitas alvi in Juvenibus ex duplici potissimum causa fiat: *Primo* ex nimia fervidioris, acris, & volatilis bilis (*bilis enim director omnium operationum* à multis dicitur) in duodenum effusione, quam natura (ut diximus) veluti clystere acri irritata, cum chylo nutritibili, copiosa lymphæ salivæ, & succo pancreatico falsiori & fluxiliori permixtam ad intestina crassiora amandat, mox per alvum excernendam; sunt autem hæc excrementa solito liquidiora, cum defectu competentis, in intestinis tenuibus moræ, humiditas illa nutritibilis per venas lacteas sufficienter non fuerit separata; Contrarium autem fit, si bilis prænominata parcior, austerior, & effœta, atque succus pancreaticus acidior & consistentior fuerit: Hinc quoties felleus humor austeritate alvum in juventute constipat, succedente senectute aquosior redditus, eandem relaxat; id ipsum parcitate & copia evenit, quibus nimirum diversimode afficitur ac permutatur confluens alter succus pancreaticus, ut proinde egestiones excrementorum in intestinis varient, pro eorundem succorum varia affectione & permutatione. Multum etiam (ut mox diximus) in hanc rem valet habitudo lactearum venarum, an non partes chyli puriores admittant vel respuant, inde enim non raro accidit, fœces diminui & obdurari vel contra multiplicari & humescere, quod etiam ex urina parciori aut abundantiori jam supra ex *Hippocrate* notatum est.

Secunda causa est nimia ingluvies, juvenes enim appetitui indulgentes, plus comedunt, quam corpus ab incremento jam desistens requirat, natura enim non nisi necessarium attrahit: Utraque hæc ratio in senio cessat, nam parum appetunt, & corpus plurima restauratione indiget, bilis enim una cum calore viscerum, in quantitate & qualitate plurimum decrescit.

Contrario modo: si juvenibus alvus est sicca, hoc fit ex dictis mox causis & rationibus, vel ex calida & sicca viscerum inferioris ventris

intemperie & dyscrasia: vel ex multiplicato per insensibilem transpirationem effluvio, cui serum est vehiculum, vel acrioris bilis prædominio, quæ sua indorosa amaritie, fermentum stomachi pervertendo, appetentiam ciborum dejicit, hinc pauca illa assumptorum quantitas à canina venosi generis fame ulterius exhausta, excrementis alvinis, paucam, eamque exsuccam subministrat materiam. Omnes hæ rationes cessant in *senio*. I. Intemperies præfervida detepescit. II. Insensibile effluviolum propter resolutionem caloris evaporantis diminuitur: III. Bile paulatim deficiente appetitus novas reassumit vires: in similem senem loquitur Poëta.

Dum Petre canescis, gustum juvenescere mirum est!

Tempore sis edens, tempore rursus edens.

Quod autem mutationes ejusmodi, ætatum varietate contingant plane liquet, cum & coctiones, nutritiones, & secretiones, pro ætatum diversitate, diversimode habeantur: quo etiam fit ut sæpe numero qui in juventute graciles fuerant, in ætate consistente & senili pinguescant, quique Juvenes obeso erant corpore, procedente ætate gracilescant, atqui obesorum alvi plerumque laxiores esse solent.

Pro coronide tandem advertere oportebit, quod etiam notavit *Galenus* hoc loco, hunc *aphorismum* non simpliciter & absolute esse intelligendum, sed majori ex parte collatis invicem ætatibus ut deducatur ex *aphorismo* 53. hujus *libri*, ubi non nisi comparate eandem fere sententiam concessit. Sed & eadem victus ratione servata, sub eodem cœli statu & cum iisdem exercitiis, nulla que interea per ætates ægritudine suborta, quæ viscerum fermenta immutaverit, ejusmodi permutationes alterne contingent: prout fuse hac de re discurrit *Galenus* in hunc aphorismum. Firmum proinde manet, non tantum de ætate, sed & Regione, exercitiis, usu medicamentorum, atque contracta aliqua viscerum naturalium ægritudine (prout de affectione Hypochondriaca experimur) aphorismum intelligendum esse.

Dices: Multi sunt & fuerunt, qui tota sua vita constipati fuerunt, ergo falsus est aphorismus. R. I. Rabi Moysen & Hugonem Senensem hunc aphorismum plane negare, sed R. II. Hoc fieri per accidens, id est, vel ob mutationem Regionis, victus, & ob temperamenti bonitatem, sunt enim multi senes, qui mentiuntur Juvenes.

Dices II.

Dices II. *Galenus* I. *Aphorif. 15.* dicit copiosa per hyemem esse excrementa: R. Quia in hyeme etiam plus cibi assumimus. *Secundo Galenus* loquitur de hyeme humidiorē, non sicciorē.

Aphorismus XXI.

Famem vini potio (id est Thorexis) solvit.

Contentum seu Intentio.

De remediis famis morboſa.

Connexio: Cum multa de convalescentium refectione supra dixisset Hippocrates, sapiusque autem contingat, non proficere corpora, ob nimiam alimentorum assumptionem: In hoc ergo Aphorismo docet, quomodo sit reprimendus appetitus, nempe vini potu, quod etiam docuit aphorismo decimo sexto, alia ratione, & modo; imperando nempe quietem, dixit enim, *ubi fames laborandum non est.*

Hujus aphorismi brevitatem divisionem nullam patitur. Omnes plerumque Authores putant in hoc aphorismo tantum præternaturalem famem intelligendam esse, quæ est symptoma quoddam præternaturam seu affectus, qualis est Pica Bulimos &c. quæ potissimum utero gerentes infecta & extranea appetentes afficiuntur, quam Plinius malaciam gravidarum appellat. Sed nostro Judicio etiam verificari potest de fame naturali & sanorum, quæ multipliciter contingit, vel ob insuetam inanitionem, id est alvi profluvium, fluxum sanguinis &c. & *mediocris est.* Vel convalescentium, & vehementior est, vel ob nimiam corporis (per nimia exercitia, inedia) consumptionem, & *Vrgens est.*

Omnis vero fames præternaturam in excessu consistit: Estque duplex: Canina, per quam homo nunquam expletur, sed quantumvis edat, ad vomitum redit, sicut canis. Alia autem dicitur, per quam homo in principio quidem, vehementer appetit, sed paulo post deficiente Cibo deficit & linquitur animo, oritur ab ingenti ventriculi frigore, in iis, qui per nives, & glacies plus minus, nimium Jejuni iter faciunt, rapitur enim, & concentratur calor

lor ad cor, non habens unde pascatur; vel humor acris ad ventriculum attractus, consensu cor afficit, und syncope oritur.

Intelligitur igitur aphorismus tam de præternaturali quam etiam naturali fame, siquidem videmus bibulos minus esse edaces, idque maxime probatur, quia vinum famis causam oppugnat, famis autem cujusque causa est inanitio, & corrugatio oris ventriculi.

Fames ergo quæcunque optime curatur saturantibus; saturant autem spiritus, & corpus inanitum restaurant non solum alimenta & imprimis panis, sed etiam ocysus potulenta & præcipue vinum generosum per se, vel cum pane sumptum: Saturant quoque acidum esurinum, quod famem excitat, alcalia, inter quæ etiam vina generosa censentur: hæc enim præ aliis reficiunt spiritus, prompte nutriunt, & poros subsidentes blande referant, maxime ea vina, quæ sulphure magis pollent, eo magis etiam saturant.

Cum ergo solum vinum inter omnia creata, hanc prærogativam habeat, ut sit *alimentum*, *Potus*, & *Medicamentum*, ut *alimentum* nutrit, significat, & partes suggerit alendo corpori idoneas: ut *Potus* extinguit sitim: ut *Medicamentum* calefacit, exsiccat, spiritus restaurat, & tenuitate sua naturæ amicissima, intima corporis nostri penetrantia quoquo versum pervadit, & hinc vehiculum medicamentorum convenientissimum audit: si autem alicui nocere debeat, hoc fit, vel excessive potum, vel minus defœcatum, vel nimis adustum, quod calefacit & exsiccat nimium, vel saltem fumoso suo spiritu caput ferit; quæ tamen omnia incommoda facile admixta aquæ portione præcaventur, juxta illud:

Omne tulit punctum, qui miscuit utile dulci
Jam dulci miscere mero licet utile flumen.

Notandum, quod vinorum aliud est *generosum*, aliud *mediocre*, aliud *debile*: Rursum in *sapore* aliud *dulce*, aliud *austum* aliud *medium*: Et demum aliud *fragans* & *odoratum* aliud minus *odoratum*. Vinum itaque hic intelligit Hippocrates, calidum odoratum: quale est vinum Græcum, malvaticum vel simile generosum: Hoc enim tollit tam naturalem famem, quam præternaturalem: Sed

Notandum II. in Naturali fame dandum cum cibo & post illud, cum

cū pane & offa intinctum, ac vacua vasa reperiens caput offendat, In fame vero præter naturali, & ante & post cibum exhibendum, nam fames canina eo curatur, præsertim si in vino infundantur aut decoquantur salvia, melissa abrotanum, vel in illo dari possunt 4. vel 5. guttæ olei anisi, quod omnem famem mirabiliter sedat.

Notandum III. Vinum non tantum reficit intro sumptum, sed etiam odoratum, præcipue quando animi deliquia sunt conjuncta fami, vel potius famem præcedant; odores enim vini protinus penetrant & reficiunt.

Notandum IV. Hippocratem non tantum intelligere hic simplicem & parcam vini potionem, quia *Thorexis* venit à verbo Græco *θῶρεω* quod significat *furere* adeoque vini potio debet esse generosa & ex vino generoso, ut lætificet & restauret juxta illud: Vinum lætificat cor hominis, & Vinum est lac senum & infirmorum.

Dices: Galenus in *Comment.* tantum loquitur de fame canina, ergo non naturali. R. Curative Concedo, prophylactice etiam & tacite loquitur de naturali, quia vinum replendo tollit inanitionem, quæ etiam in fame naturali est.

Dices 2. Vinum non potest sedare famem, hæc siquidem est appetitus calidi & sicci, vinum aurem frigidum & humidum. R. Vinum actu est frigidum & humidum Concedo, potentia Nego, quia est calidum & siccum: Neque etiam vinum præcise datur ob appetitum calidi & sicci, nec etiam præcise, quia calidum & siccum est vinum, sed propter inanitionem, quam curat.

Dices 3. Fames quandoque à bile excitatur, atqui hanc vinum non tollit, sed augeat. R. I. Non facile legitur à bile famem excitatam esse. R. II. Posito etiam famem à bile excitari, eam tamen facile tollet vinum, illam abstergendo & per urinas evacuando.

Dices 4. Si per *Thorexim* intelligat Hippocrates furorem, ergo sine furore non sedabitur fames. R. Non intelligi hic furorem intensum, sed alacritatem, velut Germani loquuntur *ein Spißl.* si enim nimium excedatur, haud dubie non modo fames non tollitur, sed etiam spasmus, tremor, phtisis, apoplexia, &c. causari posset.

Quæres cur Hippocrates 3. *Acutorum* pueris usque ad decimum quartum annum vinum prohibeat. &. Quia vini potus thorexim parit velut furorem caputque puerorum debile summo-
pere impedit, & Epilepsiam, & stupiditatem inducit, & calculum procreat: Imo vinum etiam nutricibus, ob rationes dictas, inhi-
bendum est.

Quæres 2. Cur adeo absurda v. g. in gravidis & chlorosi labo-
rantibus non noceant? &. Ideo non nocere, quia sunt remedia cau-
sarum morbificarum intus latentium, sic v. g. bolus, armena, creta,
calx corrigit pituitam acidam & aquosam.

Aphorismus XXII.

*Morbos, qui ex repletione sunt, curat Evacua-
tio, eos vero qui ex Evacuatione repletio, &
in cæteris contrarietas remedio est.*

Contentum seu Intentio.

De Methodo medendi per contraria.

Connexio: Cum in præcedenti Aphorismo de famis remedio tra-
ctasset, nempe de vini portione: In hoc aphorismo causam
reddit, cur vinum famem tollat, quia illi contrarium est: cum pa-
lam constet contraria contrariis curari: Ergo infert, si contraria
contrariis curantur, Judiciose infertur, repletio curatur Evacuatio-
ne, & Evacuatio seu Inanitio repletionem: Ex quo quisque (con-
tra quosdam vulgo sentientes) certo, & propemodum evi-
denter infert, dari morbos ex inanitione, & non omnes fieri à
repletionem.

Hic aphorismus duas habet partes: In prima parte causam
sui propositi & intentionis divus senex affert. In secunda parte ejus-
dem conclusionem nempe *contraria contrariis curari*. Omnis enim
morbo-

morbis curatio debita tum respectu morbi tum causæ fit per contraria. Morbi etenim per appositionem similium, & detractionem contrariorum curantur. Nam juxta Hippocratem Medicina seu Ars Medica est adjectio deficientium & detractio redundantium. Hoc ipsum clarissime dilucidavit divus senex aphorismo decimo septimo, dicens, ubi cibus, plusquam ratio postulat, assumptus est, sanatio fit stomacho evacuato aut vomitu aut dejectione: Et è contra in præcedente Aphorismo asseruit: Fames repletionem tollitur: Ergo rursus infertur *contraria contrariis curantur.*

Hic Aphorismus est Columna & fundamentum totius medicinæ practicæ emanans ex doctrina *Hippocratis de flatibus*, ubi dicit contraria contrariis curantur. Status enim naturalis ideo conservatur per similia, quia natura & sanitas consistunt in temperamento unde amant sibi similia id est temperata: E contra status morbosus per contraria curandus est, cum sit recessus à temperamento, quod non nisi per suum contrarium ad temperiem reduci potest, vel enim præternaturalis illa & morbifica humorum dispositio consistit in *substantia, quantitate, & qualitate*, omnia hæc contrarium suum expostulant: Et licet quidem ut Philosophi docent, substantiæ nihil sit contrarium, medice tamen loquendo, substantia peccans remedia tota substantia contraria expostulat v. g. venena, Alexipharmacum, quantitas autem evacuationem teste Hippoc. supra Aphor. 17. *Vbi alimentum præter naturam plus ingestum est, hoc morbum facit, ostendit autem sanatio*, id est quod hujus plenitudinis sanatio per Evacuantia fieri debeat: Quantitas diminuta repletionem, prout textus citati Aphorismi docet; dicitur *repletionem*, non autem quamcunque aut subitam, sed mediocrem ac paulatim promotam.

Si sit qualitas, vel peccat hoc vel illo modo, omnia suo curantur contrario, calidum frigido, humidum sicco, amarum acido, acidum alcalico, crassum tenui, viscosum abstergente, specificum contrario specifico.

Siquidem omne remedium contrarium sit nostro malo ut illud expellat necesse est, sive id actu, sive potentia mediate vel

immediate, per se vel per accidens fiat, sicuti vomitus vomitum, fluxus fluxum curat, modo habeat vim contrarium terminum & effectum inducendi, auferendo causam; Sive jam illa contrarietas lato modo contrarietas dicatur, sive magis proprie *oppositio* dicatur, quæ quocunque modo suo contrario se opponit, ut jam diximus non tantum de calido & frigido, sed etiam de amaro & acido &c. Omnis enim status onerosus evacuari & depleri desiderat, sive ab extrinseca sive ab intrinseca causa proveniat, ita tamen ut pro humoris diversi statu diversa præsidia depletiva, in ejus vero defectu completiva adhibeantur.

Quid autem plenitudo seu repletio sit, & quot sint illius genera, abunde diximus supra Aphorismo decimo septimo: Hoc interim certum est plenitudinem præsertim eam, quæ ex satietate & ciborum ingluviæ fit, de qua genuine hic aphorismus intelligendus est, frequentissimam & maxime familiarem morborum causam esse: Plus enim ventri & Ebrietati indulgemus, quam temperantiæ.

Notandum autem est primo. Per evacuationem non tantum intelligi venæ sectionem & purgationem sed etiam vomitum, sudores, insensibilem transpirationem, Errhina, masticatoria &c.

Notandum II. Per repletionem intelligi eam quæ fit ad vasa & ad vires, de qua jam supra egimus, & ex institutionibus res patula est.

Dices 1. Conservatio corporis sani non potest fieri sine additione & demptione, ergo nec contrariis, quod tamen est contra rationem. R. Breviter corpus sanum, cum non patiatur affectus sensibiles non cadere sub Medici curam, alias enim homo esset perpetuo patiens, ergo nec etiam eget contrariis. Et licet homo sanus addat cibos & demat excrementa, illa additio & demptio potest fieri sine Medici auxilio seu ab ipsa natura.

Dices 2. Similia similibus curantur, scorpio v. g. mordens appositus parti medetur proprio veneno, viperæ morfu medetur ejus pulvis intro sumptus; Pili canis rabidi morsui applicati sunt contra rabiem & hydrophobiam &c. Nec hanc curam fieri per similia sed per
contra-

contraria: potuit enim forma animalis producere venena, forma mixti vero Alexipharmaca, quæ à proprietate juvant. Neve dicas scorpionem (idem de aliis) venenum attrahere per similitudinem: Nam hoc falsum esse experientia docet, quia scorpio mortuus venenatus amplius non est, ut rursus patet experientia, quod oleum scorpionum simplex & compositum Mathioli (quod revera alterum est aurum potabile) innoxie imo summo cum fructu, tam intra quam extra adhibeatur.

Nota hic obiter, quod similitudo in eo potissimum consistere videatur, quod per medicamenta natura tanquam primaria morborum medicatrix, adjuta ac vigorata morbificam causam efficacius adoriatur & deprimat: quidquid enim causam morbi corrigit, removet aut depellit, ipsis contrariari dicitur, sive cæteroquin similia vel dissimilia, consentanea, vel dissentanea re ipsa sint, qualitate, conditione, natura.

Dices 3. Aqua frigida effusa curat Paralysem morbum frigidum: Rhabarbarum calidum & siccum, curat febrem calidam & siccam, ergo similia similibus, & non contraria contrariis curantur. *R.* I. Primum fieri per accidens, quod poros occludendo calorem concentret, causæ paralyseos utpote frigida interne contrariatur, virtus enim unita id est concentrata fortior. *R.* II. Rhabarbarum non curat febrem quia calidum & siccum, sed quia suffert ejus causam id est bilem, unde causæ non morbo tantum est contrarium.

Dices 4. Calor naturalis curat morbum calidum præterea calor naturalis curat partem inflammata[m] pus generando, ergo simile curat simile. *R.* Calorem naturalem calori præternaturali saltem quoad effectum esse contrarium, prior enim generat, alter corrumpit, prior coquit, alter cruditates generat.

Dices 5. Dolor solvit dolorem teste Hippoc. 7. 2. Ejusdem Cap. 4. & dolor major obscurat minorem ergo similia similibus & non contrariis curantur. *R.* Id fieri per accidens v. g. quando aperitur abscessus dolor, qui infertur per vulneris inflictionem, solvit alium dolorem, quia sequitur materiæ purulentæ evacuatione.

cuatio. Deinde dolor major non solvit minorem sed obscurat, sicut majus lumen obscurat minus.

Dices 6. Sanguinis missio solvit hæmorrhagiam, & tamen sanguinis missio non est contraria sanguinis missioni, ergo similia similibus & non contrariis curantur. R. Per sanguinis missionem conciliari contrarium motum sanguini & consequenter curam adhuc fieri per contrarium nempe revulsionem, quæ fit per contraria.

Dices *ultimo* Vomitus vomitum, fluxus fluxum curat, ergo per similia & non contraria. R. Hoc ipsum fieri per contraria, quia causam auferunt, ergo causæ sunt contraria, licet symptomati sint similia, symptoma autem ut symptoma nihil evincit.

Nota pro Coronide: Quamvis Hippoc. dixerit morbos ex repletionem factos evacuatione sanari, si tamen ista non persistat, & proxime illos foveat, haud quaquam evacuantibus desinent: sic calculus renum & vesicæ ex ciborum ingluvie, atque adeo ex cruditatibus progeniti; Itemque tumores, obstructions, febres, nequaquam curabuntur sola ventriculi inanitione, sed necesse erit aliis, aliisque remediis calculum contere, vias aperire, diaphoresim, vel diuresim movere, ut curatio absolvatur. Itaque conferet solum inanitio persistente causa in ventriculo aut intestinorum ductibus, quæ morbum inducat vel foveat, cæterum in aliis evacuationibus potius præcavendo, quam curando conferent.

Aphorismus XXIII.

Morbi acuti judicantur intra quatuordecim dies.

Contentum seu Intentio.

Determino Acutorum.

Connexio: Postquam in antecedenti aphorismo egisset Hippocrates de curatione morborum à repletionem provenientium, nempe per

per inanitionem esse perficiendam, cum autem plerumque morbi acuti, qui per crisin judicantur proveniant à repletionem; In hoc aphorismo agit de termino morborum acutorum, qui plerumque est quatuordecim dierum: *Decimus plerumque* quia non opus est, ut ipso decimo quarto die fiat illa judicatio totalis, verum sufficit ut intra quatuordecim dierum spatium fiat, nam quandoque septimo, quandoque undecimo, quandoque sexto, octavo vel duodecimo judicantur, sed tamen sæpe infelicitur.

Hic Aphorismus ob brevitatem non patitur divisionem sed unimembris est.

In hoc ergo Aphorismo divus senex quasi Propheta principium morbi, augmentum, statum, declinationem & finem seu terminum revelat. Ratio autem hujus Aphorismi est, quod tam cito terminentur, quia natura tantos labores diutius perferre non potest, adeoque decimi quarti diei terminum raro prætergreditur. Potest autem decimus quartus dies numerari non tantum à principio morbi, sed etiam ab ejusdem vehementia. Interim experientia constat terminum morborum acutorum, ut diximus esse plerumque decimum quartum.

Altera ratio, quod tam cito terminentur morbi acuti, est, quia pars princeps diu pati non potest, & calor in ea plerumque multus, aut vinci aut vincere festinat.

Tertia Ratio, quia morbus acutus, est morbus magnus, & qui celeriter & simul consociatis vehementioribus symptomatibus movetur, præsertim si sit uniformis, qui statim viget & perseverant in suo vigore: Non autem de difformibus & interpolatim, vel per decidentiam seu degenerum, qui etiam usque ad quadagesimum perdurare possunt, quia non habent continuos labores à principio usque ad finem.

Quarta Ratio, quia in acutis omnia concurrunt, quæ motum despumativum sanguinis celerem & impetuosum reddunt: calor movens est præternaturalis: Materia mobilis summe volatilis tenuis & calida; Ipse sanguis acrimonia hostili præditus, sine intermissione naturam irritat, nec feriari sinit, donec vel ipsa natura (quod ordinarie spatium quatuordecim dierum contingere solet) longo conflictu delasfata succumbat, vel superior & victrix hostem è corpore humano expellat.

Aliam

Aliam adhuc rationem reddit Poëta dicens:

Cur sit Acutorum tam curta tragædia quæris?

Pallida cur rapidis Parca feratur equis?

In promptu causa est; dum morbus acumine pungit,
Per plenam postam, currere Parca solet.

Dices Anaxion pleoriticus duravit usque ad trigesimam diem, ergo non fuit Judicatus decima quarta die. quod est contra Hippoc. 3. *Epid. comment. 3.* ubi dicit pleoriticum intra 14. dies Judicari vel in suppurationem transire. R. Anaxionem fuisse Judicatum die undecima, quia tunc temporis incoepit exspuere & consequenter evidens mutatio facta est: Unde sunt nonnulli docti viri qui sentiunt illos quatuordecim dies numerandos esse à principio exspuitionis, non morbi. Et cum exspuitio facta fuerit undecimo, potuit morbus pervenire ad 24. imo etiam ad trigesimam obstetricante debilitate virium, materiæ copia & cruditate.

Dices 2. Epilepsia, apoplexia &c. sunt morbi acuti, qui tamen non judicantur intra 14 dies, ergo falsus est Aphor. R. Hi morbi sunt acuti secundum accessionem particularem, non secundum universalem: In Apoplexia tamen fiunt magnæ mutationes intra illos 14. dies, nam vel occidit, vel mutatur in Paralyfin.

Dices 3. *Morborum acutorum incerta sunt prædictiones*, ut supra diximus Aph. 19. ergo nec certo prædici poterit 14. dies. R. Aliud est prædicere terminum morbi, aliud termini qualitatem, potuit itaque prædicere terminum, minime prædicta qualitate termini scilicet salute vel morte.

Quæres, quæ ergo sit causa hujus diei critici & aliorum dierum criticorum? R. Montanus & cum eo plures alii referunt ad oppositionem lunæ quæ magnas facit in morbis mutationes: Verum hæc ratio à pluribus exploditur, quia si causam horum ad motus lunæ diversitatem referamus, profecto reperiemus, quod alios etiam naturæ motus illuc referre debeamus v. g. crises, Partus variorum animalium v. g. canis intra novem septimanas, hominis intra novem menses. Item Paroxismi febriles eo referri deberent &c. De his autem abunde egimus

egimus in institutionibus, quo lectorem brevitatis causa & materiae scitu dignae ablegamus. Breviter insinuandae criseos & dierum criticorum rationem & genuinum fundamentum esse positum in proportionem morbi & naturae, remotius solum in lunae decursu.

Aphorismus XXIV.

Septimorum (seu septenariorum) quartus in signis (id est , Index est) sequentis (seu alterius) septimanae octavus initium : Notandus quoque est undecimus dies, siquidem is secunda septimanae quartus est : rursus quoque decimus septimus observandus, is enim à decimo quarto, quartus est, & ab undecimo septimus.

Contentum seu Intentio.

De Diebus criticis.

Connexio: Cum in antecedenti Aphorismo de tempore eventus in acutis morbis tractasset & statuisset quatuordecim dies: In praesenti modo Aphorismo de diebus contemplabilibus egit in iisdem malis. Haec materia de diebus decretoriis ab Hippocrate tacta, tantae difficultatis est, qua fere nulla in tota Medicina difficilior, & in qua tot se torserunt ingenia, tum Medica tum astronomica: Nam in materiam de crisibus, quae certo dierum numero contingunt, plurimi & celeberrimi medici & Astronomi magnos scripserunt codices: Ipsi quoque Philosophi, Oratores & Poetae in naturae operationibus criticam aliquam mutationem fieri observarunt. Pythagoras septimum numerum vitae humanae vehiculum, & complementum: Cicero libro de

U

somnia

somnio Scipionis, *omnium rerum nodum appellat*: Cui consentit Virgilius

Numero DEUS impare gaudet.

Alii *septem* numero *Planetas*, non sine magno mysterio creatos arbitrantur, utpote quibus *septem metalla* in sublunari mundo correspondent: Aurum soli, Argentum lunæ, Cuprum Veneri, Plumbum Saturno, ferrum Marti &c. Hippocrates ipse L. 4. de morbis scribit: *Natura die pari trahit, expellit in Impari*. Et ideo credit naturæ motus magis fieri die impari, quare fit ut morbi, qui per dies pares habent accessiones, sint difficilis iudicii, & febres quæ in imparibus non solvuntur recidivas faciant.

Nos in hac materia nolumus esse prolixi, cum raræ in hac nostra Patria perfectæ crises dentur: humores enim hic locorum raro sunt ita sinceri, calidi & impetuosus, ut in Græcia Patria Hippocratis: à potiori spurii & sero copioso diluti: Accedit & hoc quod moderno nostro tempore, exquisita illa victus ratio ab Hippocrate in acutis præscripta nullatenus observetur. Victus noster tenuissimus vix tenuis est, si scripta Hippocratica examinentur: quam parce olim veteres vixerint, docet Juvenalis:

Hæc olim nostri jam luxuriosa senatus
Cana fuit: Curius primo quæ legerat horto,
Ipse focis brevibus ponebat obuscula (id est dolera) quæ nunc
Squalidus in magna fastidit compode fossor.

Sed hodierno sæculo mutata multum scena est,

Atque ultra Gangem, ultra Garamantas & Indos
Quæsitis Epulis: Ventres distendere mos est.

Ipse Amatus Lusitanus fatetur in Germania crises rarissimas, Venetiis & Paduæ raras Anconæ frequentiores, in Affrica autem & aliis climatibus calidioribus frequentissimas observasse.

Crisis ut supra diximus est subita & repentina in morbis facta mutatio, quæ ad salutem vel mortem terminatur. Nos proinde ut diximus, nolumus esse in hac materia prolixi, nec nostri fori hic est (prout fuit in institutionibus) eam omnino perlustrare & recal-

citrare,

citrare, sed allaborabimus tantum, hunc præsentem Aphorismum, pro loci & temporis angustia illustrare.

Cum ergo ut meminimus noster Hippocrates in præcedenti Aphorismo de termino acutorum egisset, in hoc de diebus criticis indicibus, quas diximus cum Hippocrate quartum septimi, undecimum decimi quarti, decimum septimum vigesimi indices.

Contingit autem crisis seu illa mutatio vix non semper diebus imparibus, ut patet ex hoc nostro Aphorismo: Ut autem hæc debite intelligantur, consonum duxi quædam breviter & enucleate scitu digna præmittere: Vitæ humanæ juratus & hæreditarius hostis est morbus: Solet autem nostrum corpus variis morbis oppugnari: Nunc (cum malignus est maxime & sanguinem sitit) amicitiam simulat, sed

O Pueri fugite hinc, latet anguis in herba.

Nunc longa quasi obsidione & fame, in *Phtisi & hectica* nunc paulatina aquarum inundatione, in *Cachexia & hydrope*. Nunc subterraneis cuniculis, nempe in *abscessibus & ulceribus internis*: tam insensibiliter & clandestine corpus nostrum oppugnat, ut nostra natura tum demum se prostratam cognoscat, cum amplius surgere & debitam defensionem suscipere nequit: unde in his morbis vel nullæ vel rarissimæ fiunt crises.

Ubi vero, quod frequentissimum est, morbus aperto certamine naturam provocat (quæ lucta vulgo *febris* dicitur) tunc certaminis hujus finis & victoria, crisis appellatur, quæ cum potissimum in septimo (seu in cujusvis septimanæ ultimo) fiat, hinc pro meliori nostri citati Aphorismi intelligentia dies in morbis acutis in *quatuor* classes dividendi sunt. I. Sunt dies critici: II. *Indices*. III. *Intercidentes* seu *provocatorii*. IV. *Vacui* seu *Medici*. *Critici* proprie tantum sunt ultimi cujusvis septimanæ id est *septimus, decimus quartus & vigesimus*; Omnia ergo illa, quæ prædictis diebus contingunt, sive bona sive mala, maximam vim habent & Medico practico accurate observanda sunt.

Dices: Indices seu Contemplativi sunt itidem *tres* quartus Index
U 2 septimi;

septimi, undecimus decimi quarti, decimus septimus vigesimus. *Dies Intercidentes seu Provocatorii* sunt, in quibus natura, quantitate, qualitate, vel malignitate laceffita ante coctionem materiae excretionem molitur. Prima septimana duos habet *tertium & quintum*. Secunda septimana itidem duos *nonum & decimum tertium*. Tertia septimana tantum unum id est decimum nonum. *Vacui* denique seu *Medici* illi sunt in quibus neque decretionem neque irritative operatur, & si quæ mutationes in illis fiant à puro morbo victore & natura superata contingunt;

In prima septimana est sextus à Galeno Tyrannus appellatus: In secunda septimana *decimus & duodecimus*. In tertia septimana *decimus sextus & decimus octavus*.

Tanta fuit *numeri septimi* omni sæculo (nescio an superstitiose vel rationabiliter) authoritas ut (tacendo de aliis Professionibus) ipsi medici in hoc numero semper aliquid ominosum & occultum suspicarentur, unde massam pilularum vix non semper in *septem* vel impares saltem globulos repartendam & exhibendam præscribant: Etates septimis potissimum annis mutari, & annos clymætericos evenire potissimum statuunt.

Sit autem, quidquid sit, non sumus solliciti cum aliquibus otiosis ingeniis, hujus arcani fundamentalem causam afferre, qui super hac re longos, sed inutiles scripserunt tractatus, hoc enim esset *Pulicem aurea catena circumducere*: Sufficit nobis dicere cum doctissimo *Montano* præter principia naturalia etiam numeros septenarios assumpserunt Medici, non quod vim aliquam habeant numeri, sed propter aliam causam occultam, nani Galenus in hujus causæ investigatione nec sibi nec aliis satisfacit, sed quidquid sit de causa, experimento certo constat rem ita se habere: Hæc Montanus. Nos breviter repetimus, quæ in priori Aphorismo ad finem diximus criseos & dierum criticorum rationem & fundamentum genuinum habemus in proportionem, morbi & naturæ remotius solum in lunæ decursu: qui ergo meliora sapit, nos eruditiones amantes erudiat. Hic interim notan-

notandum quod numerus dierum diversa ratione fiat : aliquando enim numeramus ab ea hora , in qua sensibilibiter homo male valet : aliquando ab illa hora , in qua morbus maxime viget ; aliquando vero ab aliquo accidente , à quo morbus pendet , ut in *abortu & partu* , si succedat aliquis acutus morbus.

Cum igitur tria ista principia concurrunt , nullus contingit error in ratione numerandi , at si non concurrant , potest numerari unus dies pro alio & sic dies septimus videbitur sextus aut octavus.

Contingit etiam error ob Idiotas ægros , qui primam diem morbi non recte accipiunt : si enim quis ægrotavit , prima v. g. die mensis ad vesperam , numerant illam diem unam , cum tamen una dies sit accipienda , viginti quatuor horarum ab ea hora , in qua cecidit homo : Et ex hoc contingere potest , ut dies septima videatur octava : quæ omnia à Medico bene sunt consideranda.

Sunt quidem nonnulli , qui pro *Indicibus* volunt accipere *contemplabiles* , & hinc etiam latius hoc nomen extendunt , ponuntque etiam septimum , decimum quartum & vigesimum tanquam dies maxime contemplabiles , qui tamen ratione sunt contemplabiles , quam ratione alterius.

Et quamvis hic Aphorismus à quibusdam *Incompositus* dicatur , nos tamen putamus in hoc non tantum dies *Indices* patefieri , sed etiam principia & fines *septimanarum* indicari . Innuit enim Hippocrates *diem octavum* esse principium secundæ septimanæ , ergo decimus quartus erit finis : Deinde dicit *decimum septimum* esse quartum tertiæ septimanæ , cujus finis est vigesimus.

Unde autem hoc fiat , nunc inquirendum est apertius . Mutationes in morbis fieri singulis lunæ quadris , olim & hodie apud plerosque in confesso est : Cum autem unus lunæ quadrans , non integros septem dies in se contineat , sed tantum sex dies & sedecim horas , cum una tertia horæ parte , hinc quatuor *quadra* habent

Viginti sex dies, viginti & unam horam cum tertia circiter parte horæ.

Prima igitur *septimana* distinguitur à *secunda* quia primus dies *secundæ septimanæ* non incipit à *septimo* sed ab *octavo*; ut enim inciperet à *septimo*, deberet *secunda septimana*, *dimidium* vel *plus diei septimæ* participare, quod non est, nec esse potest, sunt enim tantum sex horæ cum dimidia, ergo non habet sex dies.

Secunda septimana die *decimo quarto* finitur circa horam decimam tertiam cum tertia horæ parte, hinc est, quod *tertia septimana* eodem die incipiat, non die *decimo quinto*, & finiatur uti dictum est die *vigesimo* cum dictis quatuor horis mutuatis à *vigesima prima*: Hinc factum est quod multi *vigesimam primam* criticam putarint: Inde est, quod *quarta septimana* inchoetur à *vigesimo primo* & absolvatur *vigesimo septimo*, hora *vigesima prima* cum una tertia, quia unusquisque lunæ quadrans habet sex diēs, sedecim horas & unam tertiam.

Quinta septimana inchoatur à *vigesimo octavo* & finitur *trigesimo quarto*, cuius tantum quatuordecim horas vendicat, hinc ab eodem die sextæ quadræ relinquuntur decem horæ cum una tertia, atque adeo sexta hæc quadra finitur *quadragesimo die* hora *septima*; Propterea hæ mutationes, quæ tunc temporis fiunt *quadragesimæ* potius quam *quadragesimæ primæ* adscribuntur.

Ex his *lunæ quadris* & mutationibus metiri debemus quæ fiunt non tantum diebus *Indicibus*, sed etiam criticis.

Hæc quidem scitu curiosæ sunt, & qui lunæ operationibus se confidunt, sacro sancta habentur & tenentur præsertim à Galeni Affeclis: cum interim palam constet paucissimos morbos cum luna incipere, nisi tot velimus lunationes facere, quot morbos: Galenistæ autem credunt satis esse, quod à puncto à quo morbus incepit, & à quo facienda est supputatio finita *septimana* luna ad oppositum signum perveniat.

Sed & hæc omnia magis curiosa quam certa & necessaria sunt: Patet enim ipsum Hippocratem si in cæteris suis operibus

ribus consulamus varium, & differentem imo differentem compariemus, quippe qui omnibus diebus crises accidisse commemorat, five pares sint, five impares. Quamobrem Jure optimo Celsus ex sententia Asclepiadis vanum statuit criticorum dierum observationem, atque oportere Medicos non dies in morbis numerare, sed ipsas accessiones intueri.

Dices: quivis dies criticus indifferenter crisin promittit præcipue is, quem præcessit perfecta, & manifesta concoctio, ergo crisis non adscribenda diei critico, sed humorum concoctioni. R. Galenistæ se non negare humorum concoctiones, sed & hos à lunæ motu tamquam humorum dominatrice (teste Hippocrate) dirigi posse.

Dices 2. Morbi qui paribus diebus judicantur plerumque ut diximus male judicantur, ergo non bene judicabuntur die decimo quarto qui est unus ex paribus. R. Diem decimum quartum non esse parem sed imparem, & finem secundæ septimanæ incipiendo nempe ab octavo & sic erit septimus secundæ septimanæ.

Aphorismus XXV.

Æstiva quartana plerumque breves sunt: Autumnales vero longæ, & maxime quæ ad hyemem pertingunt.

Contentum seu Intentio.

*De Prognosi quartana juxta tempora
Anni.*

Connexio: Postquam Hippocrates in præcedenti Aphorismo indicia mutationum in morbis tractasset, in hoc Aphorismo mor-

morborum adducit Indicia ex ipsis anni temporibus petenda.

Hic Aphorismus bimebris est & in duas partes dividitur. In prima parte brevitās, in secunda diuturnitas febrium quartanarum ob diversa anni tempora attingitur, id est in prima parte de quartana æstiva, in altera de quartana autumnali vel hyemali conclusionem ponit. Hic prænotandum est febrium brevitatem aut longitudinem à natura & conditione fermentorum sive peccantium humorum præter loci & affectæ partis habitudinem oriri.

Hoc etiam apud Medicos habetur pro irrefragabili, quod omnes morbi æstivi sint autumnalibus & hyemalibus breviores, cujus ratio est, quia materia febrim generans in æstate non adeo crassa est, sed volatilis & subtilis in æstate, in autumnno vero ut hyeme magis crassa & fixa: Volatilis in æstate ob calorem solis omnia subtilisantem, attenuantem & poros corporis, imo internos ipsos ejusdem corporis meatus referantem crassa & fixa in autumnno & hyeme ob aëris humidioris & intensioris frigoris præsentiam, contrarios id est crassitudinis & fixitatis effectus producentem: Hinc etiam minus adest materiæ morbificæ in æstate, in hyeme plus quo corpora sunt densiora, viæ occlusæ & humores crassi in iisdem difficulter mobiles.

Accedit quod plerumque in æstate quartanæ sint nothæ quæ bilem sibi habent commixtam, morbi autem biliosi & calidi breves, acidi vero, melancholici, frigidi chronici, serosi, longi esse consueverunt: Quartanæ æstivæ fermentum acido biliosum magis dissipabile & expugnabile; Autumnales & hyemales acidum fixum tenax & magis rebelle obtinent, ad quod non parum facit, humorum adustio ab æstate causata, ita pariter virium ab excessivo solis calore resolutio corpori relicta.

Quartana vulgo duplex est. *Exquisita* & *nota* illa à syncero humore vel melancholico seu acido; hæc ab iisdem cum bile mixtis humoribus oritur.

Quartana rursus alia est *simplex* id est nulli alteri affectui conjuncta: Alia *composita*, quæ ex tumore lienis &c. enascitur:
Utraque

Utraque iterum vel est *Intermittens* vel *continua*: *Intermittens* rursum vel unica vel duplex aut triplex: *Unica* quarto quoque die corripit: *Duplex* bis intra quatuor dies: *Triplex* ter intra illud spatium. Hinc etiam una periculosior altera: *Simplex* licet longa sit, est tamen secura: *Duplex* vel *triplex* intermittens vel *simplex* continua magis periculosa: *Quartana* vero cum tumore & scirrholienis &c. periculosissima, quia in hydropem transit.

Diximus quartana simplex est secura, intellige in Juvenibus, quia teste Hippocrate illos à magnis morbis liberat: In senibus vero non vacat periculo ob varias rationes, virium nempe corporis improprietatem &c.

Quamvis autem Hippocrates quartanarum febrium solummodo hoc loco meminerit, solent tamen & reliquæ febres, imo plerique alii morbi, cum ex autumno in hyemem excurrerint fieri diuturniores, qui sane per æstatem breviarentur. Ea enim est aëris, qui nos ambit, vis & efficacia, ut præ cæteris causis, humana corpora alterare valentibus primas obtineat, quamobrem secundum varias illius affectiones, diversimode quoque illa afficiantur, unde experimur tempestatum mutatione quosdam morbos desinere, alios invadere, siquidem non modo extimo contactu, verum etiam inspiratione, intimas corporis partes pervadit, & cum sanguine ipso permixtus, plurimum valet, vel inficere vel emendare. Accedit summa illa utilitas; quæ ex perspiratione est, quæque per multos morbos delet, impedita provocat vel confirmat: Sudores etiam tantopere conducibiles in febribus aëris calore plerumque prompte emanant algore vero reconduntur.

Verum bene notandum hæc ex Hippocrate memorata, tum potissimum accidere, cum anni tempora, suas proprias, debitas & consuetas servant constitutiones: Nam si fortasse æstas à suo calore desciscat, autumnus vero exæstuet, proculdubio ea quæ hic ab Hippocrate sunt præscripta, non recte experientia cohererent.

Præterea nec quartanæ ab infarctu viscerum progenitæ hoc aphorismo possunt comprehendi, quippe quæ sive per æstatem, sive

per autumnum minime curabuntur, nisi prius obstructa fuerint re-
ferata.

Curantur tamen moderno tempore plures morbi autumnales
quam olim, quia Medicis prioris ævi fere immedicabiles crediti, eo
quod hominem sagacitas & industria, plura & potentiora ac speci-
fica adinvenerit remedia, quæ cito & jucunde omnis generis febres
etiam quartanas curant, prout inter mille summum Euporiston
est cortex Peruvianus seu china chinæ &c. de quibus vide meam
praxim.

Dices Tunc breviores sunt morbi, quando virtus est fortior,
sed in hyeme est fortior, Ergo. R. Si virtus est fortior & materia
fixa & rebellis Nego. R. 2. Virtutem absolute in hyeme non esse
fortiorem, sed *Instabis*: Ventres hyeme calidiores esse ait Hippoc.
1. Aph. 15. ergo virtus est fortior. R. Licet in hyeme calor sit fortior
intensive id est magis concentratus ad coquendum, non tamen ex-
tensive est fortior ad fundendos humores. R. 2. Calor est major
in hyeme *quantitate*, in æstate vero auctior *qualitate*; ille coquit, iste
fundit humores, & liquat.

Urgebis Calor externus nempe æstivus fundit humores utiles
& inutiles, ergo vires debilitat. R. Negando suppositum æqua-
liter resolvi & fundi humores bonos & malos: Natura enim sem-
per diutius, quod optimum est retinet, & quod malum est,
rejecit.

Utro instabis. Calor externus nihil confert ad cibi concoctio-
nem, ergo etiam nihil conferet ad materiæ morbificæ fusio-
nem & resolutionem. R. Transeat antecedens nego consequen-
tiam & paritatem.

Nam etsi calor externus non juvet immediate concoctionem
(quamvis de moderato calore id falsum sit) potest tamen juvare fusio-
nem & resolutionem humorum:

Videmus enim quod applicato pane ex clibano recenter extra-
cto, vel etiam lagenis aqua calida plenis excitemus sudores, qui ante
multo medicamento elici non potuerunt. Si ergo hæc fundant hu-
mores, quanto magis moderatus solis calor: dicimus autem mo-
deratus,

deratus, nam moderatus tam potenter resolvit ut sudores potius impediat.

Dices 2. Hippocrates lib. prædictionum dicit, ver & æstatem ad pessimos & vetustissimos morbos movendos majorem præstare commoditatem, quam autumnum & hyemem. R. Quod ver & æstas faciant ad morbos submovendos, est, quia tunc concoctio & expulsio materiæ morbificæ facilius perficiuntur ob majorem humorum dispositionem.

Dices 3. Tetanus curatur aquæ frigidæ affusione ergo frigidis, ergo citius hyeme, quam æstate. R. Tetanum curari per accidens, nempe concentrato calore adeoque non frigore immediate, sed à calore.

Dices 4. Hæctica in æstate orta est longissima ergo morbi æstivi non sunt breviores. R. Hunc nostrum Aphorismum intelligi de morbis humoralibus, ad quos hæctica non refertur.

Aphorismus XXVI.

Febrem convulsioni supervenire satius est, quam convulsionem feбри.

Contentum seu Intentio.

De Febris & convulsionis relatione.

Connexio: Cum quartana se ad convulsionem habeat, ut superveniens convulsioni illam solvat, ideo occasionem est nactus, cum in præcedenti de quartana tractasset, nunc de convulsione agit, quomodo se ad febrem habeat: Unde in hoc Aphorismo, generale aliquod prognosticum in febribus præscripsit dicens: melius esse ut convulsioni succedat febris, quam è contra: ut nempe ostendat unum morbum per alterum curari posse, & licere Medico aliquando ad unius morbi curationem alterum inducere,

ducere, atque hoc exemplo doceat morbos frigidos à febre juvari.

Hinc multi errare quasi videntur, qui ut vulgo credunt febrem morbum esse, cum ut experientia & præsens aphorismus docet, ejus beneficio morborum causæ subiguntur ac debellantur: Morbi enim ab humoribus pendentes, febre carentes, longiores plerumque obſervantur, qui per eam cæteroquin plurimum subacti breviarentur: Sic apostemata catharri & quicunque ex lentis & crassis succis progeniti morbi maturationi promptius subjiciuntur. Febre superveniente, atque omnes fere causæ morbosæ citius egerantur, natura febrem concitat; nec unquam crises evenirent febre vehementi non promota: ea enim internus motus naturæ est secernere & expurgare conantis, quidquid ipsi adversum insolescit in corpore. Non sunt itaque febres sua natura malæ, sed prout causam morbificam in corpore latentem, ac vitæ infensam arguunt, unde operationes cunctas depravari contingit & de exitu periclitari.

Febris ergo commodum considerans in hoc aphorismo Hippocrates ait, præstare illam convulsioni supervenire quam vice versa ut mox dicemus infra.

Hic Aphorismus ob brevitatem divisionem non patitur.

Ratio præter dictam alterior nostri Aphorismi est, quia febris convulsioni succedens dupliciter est bona, & ut signum & ut causa: Ut *signum* quia ostendit convulsionem fieri à repletionem, quæ per calorem febrilem consumitur, atque curatu facilior est convulsio, quæ fit à repletionem, quam quæ fit ab inanitionem, quia repletio facilius tollitur, quam inanitio, præcipue quam sequitur convulsio, signum enim est pervenisse ad partes solidas adeoque inductam esse siccitatem quasi habitualement. Febris præterea convulsioni superveniens naturam designat conatus suos adhibere in exsolvenda & depellenda materia, quæ convulsionem parit: excitata scilicet in humoribus nervos & musculos afficientibus fermentationem, per quam discussi & extenuati extra corpus vel diaphoresi vel diuresi propelluntur. Hinc ipse Hippocrates 5. Aphorism. 5. inquit, *si ebrius quispiam repente obmutuerit, convulsus moritur, nisi*

nisi febre corripiatur, & 4. Aphorism. 37. qui à convulsione aut distensione nervorum tenetur, febre superveniente liberatur: & Lib. de locis in homine: à convulsione si febris invaserit, sedatur eadem die aut sequenti, aut omnino tertia.

Ut causa bona est, quia febris causam convulsionis coquit, attenuat, resolvit, fundit, obstructions referat, humores absumit. Et licet etiam convulsio à calida & acri materia serosa fiat (prout fieri potest) etiam discutere potest superveniens febris imo citius.

E contra convulsio febris superveniens mala est, ut *signum*, quia ostendit à siccitate & defectu lymphæ & exhaustis viribus fieri, quæ est perniciofa: & ut *causa* quia auget malum. Designat enim causam febrilem tantæ pravitatis, ut non tantum febrem concitando naturam exagitet, sed & cerebrum & nervos divexando convulsionem inferat: adeoque utilitas, quæ ex febre forte speraretur, cedat in noxam, si eadem die, qua invadit, non remittat, & febrem terminet. Hinc non dixit Hippocrat. bonum simpliciter esse sed melius, nam aliquid mali adhuc per febrem corpori accessisse denotatur, quod naturam non leuiter laceffat: quamquam etiam ex febre nervorum succus cum fibris notabiliter exarescit, unde supervenientem convulsionem vereri licebit, ortam ex inanitione teste Hippoc. 6. Aph. 39. *Eam vero restaurare est omnino difficillimum* In pueris autem hæc omnia semper evadunt mitiora, quippe qui ex levissima quaque causa convelluntur, modo id cerebri vitio seu Idiopathice non patiantur.

Quaritur autem, quænam aut qualis febris sit intelligenda? plerique Authores respondent, non quamcunque febrem id efficere posse: nam magna vires dissolvit, parva non sufficit ad materiæ dissolutionem: si vero materia pauca sit, etiam diaria potest, sed plerumque intelligitur febris solennis, qualis est quartana, ut dicebat priori Aphorismo, tertiana quidem etiam febrem acutum adstruunt, dummodo non nimis potens aut malignitatis compos.

Potissimum autem Hipp. intelligit & adducit quartanam: dicit

enim 5. Aph. 70. à *quartanis capti non admodum convulsionibus corripiuntur, si vero prius capiantur, & quartana supervenerit, liberantur;* utraque enim ab uno eodemque humore acido videntur oriri, qui sive inferius deponatur, sive per corporis concussionem dissolvatur, sive etiam sudore & alia evacuatione egeratur, nequit in quartanis febribus nervorum fibras laceffere & convulsionem excitare. Eadem ratione accidit, nec comitiali morbo corripì quartanarios & correptos per ipsas sanari.

Verum nos credimus, alias quoque febres convulsis profuturas, modo leviores sint, intermittentes, & symptomatibus vehementioribus exutæ, quæ nimirum levi fermentatione, & blando calore humores nervos replentes aut vellicantes, sensim valeant solvere, ac sudorem potissimum amandare.

Dices. Febris magis replet nervos convulsos, ergo augebit convulsionem, quia vapores ad caput tanquam principium nervorum transmittit. R. Negando Ant. & consequentiam, ad illius probationem dicimus, licet vapores febrilis materiæ caput impetant, quia tamen admodum tenues sunt, facile discutiuntur, & quia tenues & calidi sunt, si nervos petant, stabulantes in iis crassos & viscosos acidosque humores potius resolvunt.

Dices 2, Febris sæpe convulsiones & membrorum resolutiones causat, ergo non curat. R. Si inducta sit siccitas actualis & inani- tio concedo, si convulsio præcedat à repletionem nego.

Dices 3. Febris non curat Apoplexiam ut refert Hippoc. in Epidem. de Numeni filio apoplectico, cui febris excitata, tamen interiit. R. I. Nos non dicimus omnem febrem omnem convulsionem curare. R. II. In Numeni Filio febrem non fuisse sufficientem, ut materiam adeo crassam & tam profunde hærentem dissolveret.

Dices 4. Hippocrates in coacis asserit contrarium & dicit convulsio feбри superveniens eam solvit. R. Hippocratem eodem loco addere *secundo aut tertio die*, adeoque specialius loquitur in hoc ultimo textu quam in primo, posterior enim voluntas (ut docent Juristæ) derogat priori: Et hæc convulsio ordinarie evenit pueris translata ad nervos materia & feбри exiguæ, non autem auctæ aut malignæ,

signæ, de quibus Hippocrates hoc loco non loquitur, sed de humoribus & in specie potissimum de quartana, de qua priori Aphorismo, non gratis egit.

Nota: Convulsio est nervorum, musculorumque versus originem seu suum principium continua & perpetua retractio. Sed

Dices: In Tetano non est motus, ergo mala definitio &. Non est motus localis & interpolatus concedo, non est tonicus & continuus, Nego.

Instabis. In multis convulsionibus non est dolor, quia non sentitur &. Non sentitur dolor transeat, non est dolor Nego: Potest autem esse dolor & non sentiri patet ex Aphorismo sexto hujus sectionis, *qui dolentes aliqua corporis parte, dolorem non sentiunt, iis mens agrotat.*

Urgebis. Non adest judicium nec tristis sensatio, ergo nec dolor. &. Non adest libera sensatio concedo, impedita Nego.

Dices tandem: Galenus Lib. de convulsione ait eos qui ex siccitate convelluntur protinus mori, nec de remedio aliquo tempus deliberandi concedi, ergo est incurabilis. &. Si convulsio fiat ab extrema siccitate concedo, à minus intensa Nego.

Quæres ergo: Ultrum ad convulsionem vel Paralysem vel aliam nervorum affectionem sanandam liceat febrem excitare? &. Quamvis multi Galenum & Hippocratem s. Aph. 21. sequentes, aquæ frigidæ affusione largiori, poros constipent & febrem procurent; *secundo*, sunt non nulli, qui omnino affirmant, eo argumento ducti, quod possit Medicus, ut imitator naturæ prosequi, aut tentare, quæ natura ipsa salubriter agere consuevit.

Tertio. Alii vero applicent manuum carpis scarabæos cornutos pulverisatos, & in Emplastri formam cum aliquo liquore redactos & febrem excitant: Nos tamen cum aliis existimamus tutius convulsionibus, aliis exsiccantibus sudoriferis appropriatis & alexipharmicis quam febrium periculosa inductione curari. Non enim quod natura salubriter promovere solet, potest tuto à Medico excitari, multa enim naturæ sunt nota, nobis ignota, id est agendi opportunitas quantitas & qualitas medicamenti: sic non
semper

semper ab exhibito purgante evacuatio succedit, qualis & quanta sponte naturæ conatu contingeret; nec ab epoto sudorifero certa spes est futuri sudoris: sine naturæ adminiculo vanum & irritum est omne remedium imo sæpe noxium: ergo etiam difficillimum præbere remedium, quod febrem adferat convulsis & eos sanet. Poterimus igitur, ut diximus ipsis opitulari medicamentis attenuantibus & diaphoreticis, quæ sub nomine ignis & febris fuere ab Hippocrat. 2. prorrh. & 1. Epidem. Lib. de locis in homine commemorata. Talia sunt nervina, cephalica v. g. spiritus C. C. Essent. castorei cum aqua salviæ, spiritus sanguinis, magisterium succini, salia volatilia & alia interna & externa, de quibus vide meam Praxim *titulis de capitis affectibus*. Quod autem hoc ipsum dicto loco fecerit Hippocrates multa aquæ frigidaë affusione, id præstitit in Juvene bene carnosio, media æstate, sine vulnere & inflammatione, quæ nullam noxam intulit, quod exemplum tamen non est sequendum.

Aphorismus XXVII.

His, quæ non cum ratione subleuant, non oportet fidere, neque multum reformidare mala, quæ præter rationem eveniunt, plurima enim horum incerta sunt, nec admodum perseverare aut longo tempore durare consueverunt.

Contentum seu Intentio.

De emergentium mutationum potissimum in febribus ratione.

Connexio: Cum Hippocrates multa hætenus de prognostico tractasset, & posthac multa de eo dicturus sit; In hoc aphorismo

rismo celebrem animadversionem affert circa prædictionem, prout etiam fecit in Aphorismo decimo nono; *morborum acuterum non omnino certa sunt prædictiones, neque mortis, neque salutis.* Et in coacis prænotionibus breviter dicit: *qui morbi cum malis signis levantur, & qui in bonis non remittunt difficiles.*

Hic Aphorismus bipartito dividitur: In prima ejus parte asserit: Signis quæ levamen afferunt citra evidentem rationem, id est citra crisin vel insignem evacuationem &c. non esse fidendum: In secunda vero parte, causam hujus suæ propositionis affert, quia scilicet talia neque permanere, neque morari diu solent, iis credendum non est, quæ levant absque evidenti ratione, atqui quæ levant absque crisi aut evacuatione aliqua sensibili aut medicamento, levant absque ratione, ergo iis credendum non est.

Generaliter notandum I. quod alleviationes absque ratione dicantur esse, cum criticam evacuationem non sequuntur, vel si fortasse illa præcessit, diminuta & imperfecta illa fuit, nec per eas vias per quas fieri oporteret; aut non ejus humoris, qui expurgandus est: Hac de causa dejectiones in morbis pectoris non conferunt: Stillæ sanguinis in febribus pravitatem indicant: sudores frigidi in internis inflammationibus mortem portendunt; & id genus alia. Sic etiam si absque illa evacuatione videantur morbi ab humoribus pendentes declinari & subito remitti, proculdubio redibunt, & fortasse impetuosiores, quia eorum causa injecta non est, sed in corpore latens, fieri non potest, quin denuo resurgat & vehementius invadat. Ejusmodi ergo mutationibus, quibus ægri videntur melius se habere nullatenus oportet fidere, quoniam alleviationes hæc stabiles non sunt, & persistente adhuc in corpore causa morbifica, necesse est ut morbus redeat, non sine vitæ periculo: Porro indubitatum est; eatenus morbos & morborum symptomata duratura quoad causæ eorundem non fuerint è corpore penitus eliminatæ.

Verum enim vero, visæ sunt tamen aliquando febres, imo & pleuritides & Anginæ aliique similes morbi ex humoribus progeniti, sponte ac sine omni sensibili & manifesta evacuatione salubriter desinisse sine recidiva aut alterius morbi impetu; Fortassis quia soluti & atte-

nuati insensibiliter perspirarunt. Hinc ut in his iudicium recte feratur perpendere oportebit, num morbus omnino desinat, simulque symptomata omnia recedant ipsis enim penitus ablegatis indicio erit, causam quoque morbificam funditus esse deletam: At vero si unum vel alterum perduraverit, de regressu morbi timendum. Quemadmodum non fidendum iis (inquit) quæ absque ratione fiunt, ita non metuenda mala (subdit) quæ præter rationem eveniunt, cuiusmodi sunt symptomata crises concomitantia & antecedentia, de quibus locutus Hippoc. Aph. 13. cum enim hæc accidunt ex instante crisi, instabilia merito dicuntur, scilicet quia mox ab illa desinunt, quod si præterea perdurarent, non omnino parvi facienda forent, utpote aliud quid indicantia, quam quod ex motu naturæ critico contingere solet: Utraque autem debent morbo, morbiq; causæ respondere, ne spes infida sequatur.

Generaliter autem notandum 2. quod in acutis febribus, præter calorem, pulsum, & vires, etiam Phænomena seu signa emergentia, id est mutationes sint attendendæ. Signum triplex est in significando: Vel enim est omnino *fidum* & *rationale* v. g. alleviatio seu remissio morbi totalis in die critico, præcedente coctione & evacuatione, & facta crisi perfecta omnino fida est ad bonum.

Vel est omnino *insidum* & *irrationale* v. g. gravitas quæ cruditates sequitur ad malum. Si v. g. apparente coctione & evacuatione, morbus ingravescat, vel nullo ex iis apparente levetur.

Vel est partim *fidum* partim *insidum* seu *neutrum*. V. G. si apparente coctione & evacuatione morbus ingravescat, vel etiam si nec coctione nec evacuatione præsentem, morbus omnino remittere videatur: Vel etiam alleviatio sine coctione sed in die critica: Vel apparente coctione, sed sine evacuatione; vel apparente coctione & evacuatione, sed non in die critica.

Signa Infida (de quibus maxime in hoc Aphorismo loquitur Hippocrates) iterum dividuntur dupliciter seu in duas classes. Vel enim apparent in morbo uniformi seu suam naturam servante (morbus enim uniformis est qui signa suæ naturæ convenientia servat) uti sunt sitis, dolor capitis, vigilia, seu nox insomnis &c. in febre

febre ardente: Vel in morbo difformi v. g. si febris ardens sit, nec tamen signa habeat uniformia suæ naturæ convenientia, si absit sitis, dolor capitis &c. certum est, quod non sit febris ardens exquisita & uniformis, sed difformis: Hinc signum uniforme est fidum, difforme vero infidum. *Signum* uniforme & conforme est summa lassitudo à principio durans, & perservans, cum pulsu bono, & laudabili urina, quod evidenter malignitatem indicat, adeoque ejusmodi signis fidendum est, quia sunt perdurabilia & non instabilia.

Sæpe autem cum bonis signis morbus invalescit, ut v. g. quando pleuritis transit in peripnevmoniam, à parte nempe sensibili ad insensibilem, dolor quidem mitescit sed male: Vel etiam fiunt alleviationes ob sensum partis mortuum, quod utique malum est, & sic cum malis signis mitescit morbus, quod fit vel ob causas externas, v. g. temporum & aëris mutationes, astorum influxus, commissos in victu errores: Vel ob causas internas, nempe ob humorum perturbationes instante crisi: vel ob materiæ cruditates & constitutiones inæquales, quas natura uniformi actione superare non potest; vel ob malignam aliquam humorum dispositionem; vel ob noyas de parte in partem materiæ morbificæ translationes, quæ etsi à parte nobili ad ignobilem fiant, non sunt contemnendæ, semper enim maximum & importunum naturæ laborem significant; vel ob animi pathemata, quorum quædam calorem suscitant ut ira, quædam suffocant, ut tristitia. Et sic de pluribus aliis.

Hic Aphorismus, ut paucis multa dicam, inter primas Practicantium maximas habendus: Medicum enim ignorantem à docto exactissime distinguit: Et in hoc Aphorismo Hippocrates, nimiam confidentiam præter rationem & nimium timorem sine ratione à Medico auferre conatur; quæ duæ passiones Medicum à recto operationis tramite non raro seducunt, ita, ut non ita operetur, uti deberet: Hinc occasio quæ in morbis est momentanea & præceptis teste Hippoc. 1. Aphorismo 1. præterlabitur, cum manifesto agri periculo: Medicus igitur tamquam Minister rationalis naturæ, solida prius rationis trutina exacte omnes consideret cir-

cumstantias, omnia examinet symptomata, antequam temerariam ferat prognosim, quia perversum & solidum vulgus, mortem à Medico non prævisam ordinarie Medico adscribere solet de quibus Poeta

O stulti! morbo non arte peritur
 Ars non peccavit, sed Adamus & Eva, neposque
 Posthumus & quotquot nuper tumulavimus una,
 Quid Medicum vexas insontem vane sophista
 Debita naturæ damnati solvimus omnes,
 Solvemusque: Cinis sumus in cineremque redimus.

Rem declaramus exemplo: Calor in febre est igneus, ratio requirit. ut symptomata quoque veluti effectus sint intensissima & propterea in tantum non reformidanda, quia *propter rationem eveniunt*: E contra si urgente febrili incendio, ut supra diximus, absit sitis, urinæ mingantur crudæ & albæ &c. status multo periculosior est, quia symptomata morbo non correspondent, adeoque *præter & contra rationem fiunt*.

Aliud exemplum quod etiam jam supra attulimus, & pro meliori captura repetimus: Febris v. g. remittat sine coctionis signis, sine excretionem critica, die non critico: hinc alleviationi fidendum non est *quia fit sine ratione*: E contra augeantur in febribus improvise omnia symptomata, accedat difficultas spirandi, delirium, anxietas, jactitatio &c. Medicus propterea non ocyus fiat pusillanimus & terreatur; si enim coctionis signa præcesserint fiat die critico, signum est perturbationis criticæ, quam mox superventura evacuatio & hujus pedissequa sanitas excipiet.

Notanter dixit Hippocrat. Plurima stabilia non sunt neque multum durare consueverunt: Morbus enim corpus est, symptoma ejus umbra, adeoque umbra magnitudinem corporis præsentet necesse est, si omnia in corpore secundum rationem & naturam fiant.

Fallit quidem subinde umbra juxta illud Poëtæ:
 Curtus es & quovis tibi longior esse videris
 Umbram mane tuam aut vespere mensus eras.

Fallit

Fallit inquam subinde umbra : si enim morbo crescente decreseat umbra id est symptoma, vel morbo decrecente crescat res suspecta est, & mutatio hæc diu durare nequit : Nam si morbo declinante hoc fiat, ordinariæ à causis externis ortum trahit, quod Medicum non terrefaciat, brevi enim tempore talis tempestas disparere solet.

E contra non fidendum, ubi symptomata crescente morbo remittunt, nam & hoc diu durare nequit, cum sit infida & symptomatica morbi remissio, seu potius naturæ de obtinenda victoria desperatio, ex qua symptomata detepescunt, vergente ad exitum ægroto.

Hæc omnia hætenus dicta, ut perbelle perpendat Medicus methodicus, tanquam verus & unicus naturæ minister summe necesse est : annuente Ovidio :

Non eadem est ratio, sentire & demere morbos
Sensus inest cunctus : tollitur arte malum.

Hinc est quod antiqui Apollinem pingebant ceu judicem in folio sedentem, dextra Scipionem, draconis caput sinistra prementem, cane domestico ad ejus pedes devoluto :

Indicaturi, judicium Medicum tribus indigere consiliariis : *Resolutione : Prudentia & fidelitate.*

Dices Hippocrat. in coacis prænotationibus : faciem bonam laudavit in morbis malignis : Et præter rationem extenuatam in morbis pravis damnavit : iisque fidem adhibuit, cum tamen non sint secundum rationem, quod est contra Aphorismum. *℞.* Ideo Hippocrates iis fidem adhibuit ibi, quia vidit esse durabilia ? In hoc autem aphorismo loquitur Hippocrates de signis præter rationem, quæ non diu durant.

Dices 2. In malignis febribus sæpe fiunt concoctiones apparentes in urinis & excretiones diebus criticis imo etiam alleviationes, nihilominus ægri moriuntur. Illa priora sunt secundum rationem & tamen his fidendum non est. *℞.* Has alleviationes non esse durabiles : *℞.* II. Coctiones in febribus malignis

ut diximus fallunt cum sit occultum quid & non cruditas aut putredo.

Dices 3. Perturbationes quæ fiunt instante mala crisi, fiunt cum ratione, & tamen maxime sunt reformidandæ. Ergo dantur perturbationes cum ratione, quæ sunt formidandæ. R. In his perturbationibus non præcessisse signa concoctionis, ergo non sunt cum ratione.

Instabis: perturbationes istæ fiunt die critico, ergo sunt secundum rationem. R. Negando antecedens, quia crises malæ plerumque non attingunt dies criticos.

Quæres, quanam sint mala, quæ fiunt secundum rationem. R. Ea esse, quæ fiunt à causis, quæ semper lædere sunt aptæ v. g. si aquæ frigida aspersione febris calorem mitigemus, qui paulo post vehementior redit, quia tale quid ex medendi ratione prohibetur, utpote quæ jubet, potius aperire poros quam occludere, ita etiam calor in principio paroxismi & sitis, epota frigida in principio mitescit, sed redit auctior, eo quod bibendi tempus non fuerit. Ita sanatur ulcus sordidum, obducta cicatrice, ante basis sublationem, sed alleviatio hæc & sanatio non durat. Ita vulneratus à cane rabido facile sanatur & ulcus occluditur, sed lupo in stabulo clauditur, estque mendax alleviatio, quia venenum paulo post suas vires exierit: Et omnes tales alleviationes fiunt præter artem & rationem.

Aphorismus XXIIIX.

Febricitantium non omnino leviter corpus sibi constare (id est permanere) & nihil minui, aut etiam plus æquo colliquesieri, malum: Illud siquidem morbi longitudinem hoc vero imbecillitatem significat.

Con-

Contentum seu Intentio.

De statu corporis febricitantium.

C*onnexio:* Cum Hippocrates in præcedenti Aphorif. statueret non esse fidendum signis infidis & irrationalibus: In hoc Aphorismo signum sumit à corporis constantia vel extenuatione, quando præter rationem fit: nempe in magnis febribus nimia permanentia corpulentia humoralis in eodem statu longum morbum: nimia vero extenuatio, virium imbecillitatem & brevi futuram partium solidarum aggressionem, à febris vehementia significat; ut nempe Medicus febrium longitudinem & brevitatem hisce signis notari habeat.

Hic Aphorismus in duas partes dividitur, in prima conclusionem affert: In secunda causam suæ intentionis allegat. Quidquid enim morbi longitudinem, vel virium imbecillitatem significat, est malum, atqui corporis nimia & durans constantia, ita & nimia ejusdem extenuatio, vel morbi longitudinem vel virium imbecillitatem significat, ergo est malum.

Sciendum autem est, quod febris quædam sit vehemens, alia levis, alia mediocris. Leves seu parvæ febres uti diaria, nisi malignitatem eximiam conjunctam sibi habeant, extenuare per se non solent; Mediocres & vehementes febres frequentius extenuant, hinc si mediocres extenuent, præter rationem id faciunt, & consequenter major subesse censenda est virium debilitas; Ita etiam robur & vires corporis sibi constantes, per se quidem nobile laudabile præbent signum, sed comparatione facta ad morbum, quando non sunt secundum rationem morbi longitudinem, in corpore scilicet denso & minus perspirante, præsupposita scilicet humoralis corpulentia & copia humorum vitiosorum.

Extenuatio seu colliquatio etiam nimia seu præter rationem semper censetur esse mala & præcipue si fuerit extrema, vel si appareat in primis tribus diebus sine causa manifesta, mortalis est apud Hippocratem.

Ubi igitur corpus constat seu permanet præter rationem, Medicus debet humores attenuare & calefacere, habitum rarefacere seu poros aperire, & prohibitam transpirationem referare & referatis ductibus evacuare per loca conferentia.

At ubi præter rationem corpus extenuatur, debet humores incrassare, habitum densare, poros & transpirationem obtundere & vires corroborare adhibitis etiam Alexipharmacis.

Signum autem extenuationis vel permanentiæ corporis manifestissimum sumimus à facie, ideo hanc imprimis considerandam esse à Medico scripsit Hippocrates I. prognosticorum: quando nasus est acutus, oculi concavi, collapsa tempora, ungues curvi &c. quia primo se offert: Præterea extenuationis signum desumitur à ventre inferiori, siquidem etiam ibi manifeste hoc signum patet quoniam magis in illa parte quam alibi viget pinguedo: Ideo scripsit Hippocrates infra 2. Aphor. 35. *Partes ad infimum ventrem pertinentes, crassiores esse præstare: Illarum vero extenuationem malam esse.*

Illa autem quæ præcipue corpus nostrum extenuant, sunt, causa morbi morbus & symptoma, efferatio, malignitas, spirituum debilitas, raritas corporis & cutis, abusus rerum non naturalium, humores acres, anni tempus calidum, evacuationes extrema, ætas senilis &c.

Dices. Raritas corporis in febribus facit ad expulsionem causæ morbificæ, ergo non facit ad extenuationem corporis. R. Non tantum per raritatem excludi humores noxios sed etiam utiles, adeoque adhuc eam posse corpus extenuare.

Dices 2. Hæctica laborantes non febricitant fortiter, & tamen extenuantur. R. Non febricitant fortiter intensive concedo, non febricitant fortiter extensive nego, totus enim habitus in hæctica afficitur: R. Varios esse gradus hæcticæ ergo etiam major vel minor potest fieri extenuatio.

Aphorismus XXIX.

Incipientibus morbis, si quid movendum videtur move: vigentibus autem, quiescere multo præstat.

Contentum seu Intentio.

De Tempore Evacuantium in febris.

Connexio: Cum Hippocrates in duobus prioribus Aphorismis statuisse, non esse fidendum signis, quæ præter rationem gravant vel levant, & per consequens, non debere Medicum victus rationem ob illam mutare: In hoc Aphorismo de medici actione tractat. docens magis operandum à principio morborum, quam in statu seu vigore. Connectitur secundo hic Aphorismus cum 24. ubi intra quatuordecim dies judicari dixit acutos morbos, ideo svadet in hoc Aphorismo statim in principio subveniendum.

In duas dividitur partes præsens Aphorismus: In prima dicit maxime operandum in morborum initiis. In secunda vero magis in vigore illorum quiescendum. Et ratio utriusque partis est, quia in morbi principio vires sunt fortiores, & morbus debilior atque symptomata mitiora & remissiora, ergo cum tunc temporis omnia adminiculentur, tutius erit operari magnis & universalibus remediis, ut pote venæsectione, purgatione, vomitivis, & sudoriferis, quam in statu, ubi & vires naturales præcipue in ratione sui debiles sunt & morbus fortis & symptomata maxima, quæ singula mox dicta remedia limitant, & Medicum monent, ne tunc Naturam cum morbo pugnantem & se defatigantem, minime à suo opere divertant, & magis his remediis affligant, Medicus enim Minister, Imitator, & Corrector Naturæ est: Ideo quando illa non movet, stimulanda est, ubi necessitas urget, ideo dum Natura quiescit moveat Medicus, dum natura movet, Medicus quiescat.

Morbi enim ordinarie, cum inchoant ab humoribus pendent, qui in primis ductibus consistunt, & nondum in arterias & venas permanunt: quandoque etiam multi sunt, atque ad exitum parati, ut quocunque levi auxilio promptissime egerantur. Hos ergo antequam naturam obruant, interiora viscera inficiant & graviora pariant symptomata, monet Hipp. statim inter initia, ne altiores figant radices posse promoveri, at vero ubi constiterint, quiescere satius esse putat. Morbi autem in principio esse dicuntur, cum ut diximus nondum vires per symptomata adepti sunt, quamvis aliqui primos tantum tres vel quatuor dies ex eodem Hipp. interpretentur qui 4. acutorum 64. Hos *si ab initio* (inquit) *purgare volueris id ante diem quintum facito*: Cum tamen 4. *Epidem.* famulæ Aristidis idem Hipp. purgans medicamentum propinaverit & 3. *Epidem.* 5. Anaxioni, sanguinem detraxerit octava die.

Ly verbum *movere in principio* intelligendum est de magno remedio, id est de venæ sectione, & purgatione electiva (minorativa enim & lenitiva à multis semper & sine scrupulo adhibentur) *quando materia turget seu orgasmus adest*, (non autem quando non turget) juxta Hipp. *in principio statim movendum in acutis, tardare enim in talibus malum*: Et quo acutior morbus eo magis indicat à principio operandum, turget enim semper materia in acutissimis morbis:

Hippocrates autem (quod bene notandum) non dixit *simpliciter & omnino* movendum esse, sed si videatur prudenti Medico faciendum. Quare non perpetuo vult ejusmodi evacuationes promoveri oportere, sed cum occasio tulerit, & humores ad exitum dispositi sint, nec semper solis purgantibus, sed iis omnibus, quibus congruenter Naturæ moventi succurrere valeamus. Unde ipse Hipp. 1. *Aph.* 24. *existimavit, raro & in principiis medicamentis purgantibus, uti licere, idque, si aliquando fieri necessum sit, maxime cum prameditatione faciendum.*

Quemadmodum autem in hoc Aphorismo initiantibus morbis movendum consulit, ita pariter in eodem idem dehortatur, cum consistunt ac vigent, atque ad augmentum & statum pervenerint; his enim temporibus ut diximus, natura à symptomatibus tunc ingruentibus maxime affligitur, vires langvent, & coctio ac secretio, quæ tantopere desideratur, usu medicamentorum, præsertim purgantium pluri-

plurimum interturbatur. *Verum tamen non omnino malum esse* dicit, aliquid movere, sed solum melius esse, si illo tempore quiescamus, nam si fortasse necessitas urgeat, vel opportuna agendi occasio præstetur, nil prohibet, quin & per eadem tempora moveamus, indicationes enim operandi, non à temporibus, sed à motu Naturæ, ab indicantium dispositione & virtutis robore, sumuntur,

Hic Aphorismus noster videtur è diametro contrariari Aphorismo Sectionis primæ 22. ubi dicit *concocta medicari oportet non cruda, neque in principiis morborum*. Plurimi tamen in hoc conveniunt, dicendo Hipp. in Aphorismo 1. Aph. 22. loqui de principio secundum concoctionem, in hoc præsentem Aphorismo autem de principio secundum accidentia: cum autem principium accidentium coctionem præcedat; qui ergo in horum principio purgat concoctionis principium antevertat necesse est, adeoque rationi magis consonum videtur, ut quis purgationes per tempora partiatur, ita ut hæc sententia de *minorativa*, illa autem, *concocta mederi oportet* de *eradicativa* purgatione intelligatur.

Quamvis Hippocrates autem de morbis omnibus hanc sententiam protulerit, magis tamen illa febribus congruit, in quibus quatuor illa tempora sensibilibus observantur majus imminet vitæ periculum, cum ob intempestivam medicamentorum exhibitionem, natura plurimum avertatur ab opere coctionis & secretionis, quibus valetudo recuperatur. Compertum enim habemus, sepejus semper habuisse febricitantes ab importuno usu medicaminum purgantium, vel saltem sero admodum convaluisse, quam à solis corrigentibus & coctionem morbificæ causæ adjuvantibus: Si quid vero unquam primam ventris regionem occuparit, plani feliciter primo, secundo aut tertio die vomitoriis eductum, febrem vel extinxit vel remisit: Et hoc ex Antimonio parata præcellunt ceteris veluti tutiora & efficaciora, quæque simul superne & inferne vitiosos succos extrudunt.

Dices primo: Concocta medicari oportet, sed in vigore morbi sunt concocta, ergo tunc medicari oportet. *R.* In principio vigoris seu status sunt concocta nego, in fine vigoris (id est vergente ad declinationem) concedo; in fine ergo status non prohibetur purgatio cæteris consentientibus.

Dices secundo: Medicus non est imitator naturæ, quia in statu

movere non debet, quando Natura movet. *R.* Medicus non est Imitator Naturæ male agentis & semper concedo, bene agentis & aliquando nego.

Instabis: In statu Natura bene agit movendo, id est pura ab impuris segregando, ergo etiam Medicus Naturam imitari debet & movere. *R.* quando dicitur Natura est imitanda, id est illo die, per illas vias & illo modo, quo bene agit est imitanda concedo, simul & semel & dum male agit, nego.

Dices tertio: Omne remedium purgans electivum est calefaciens, ergo nec in principio febrium convenit, sed potius refrigerans, dicit enim Hipp. 4. de victus ratione in acutis; purgantia carnes colliquare. *R.* *Primo* transeat Catharticum aliquantulum calefacere, ergo non convenit nego consequentiam, quia licet omnis febris indicet refrigerans ratione sui, ratione tamen causæ febris id negatur, à causa autem indicationem purgationis desumimus non à febre ipsa. *R.* *Secundo:* Hippocratem dicere medicamentum in principio carnes colliquare intelligit de vehementissimo medicamento.

Dices quarto: Plurimi purgant materiam febrilem elective, quæ nec turget nec urget nulla expectata concoctione teste Rhafi lib. 3. tract. 3. cap. 4. Et Hippoc. 2. de victus ratione textu 11. in pleuritide cruda exhibet veratrum seu elleborum: Ita etiam Galen. Lib. quos, quibus & quando; docet tenues humores statim esse evacuan- dos. *R.* in locis illis ab Hippoc. & Galen. adductis vel intelligi Cacochymiam primæ regionis evacuari, à qua materia morbi dependebat aut poterat augeri; vel humores massæ sanguineæ non commixtos expurgari debere.

Dices quinto: Humor tantum crudus causat febrem, coctus enim non amplius nocet, ergo purgatio debetur humori crudo & non cocto, ergo in principio debet purgari. *R.* Licet coctus humor non creditur nutritioni aptus, imo retentus in corpore causat recidivam & est adhuc cacochymicus per purgationem requirit, nam etiam cocta si retineantur febrem causare possunt. Si vero coctus humor sit laudabilis, ille non amplius nocet, quia talis humor per coctionem fit aptus nutritioni.

Dices sexto: Dum adest indicans purgationis, debet adhiberi purgatio, sed in principio adest indicans, nempe humor cacochymicus,

micus, ergo debet adhiberi purgatio. R. Si humor cacochymicus sit separatus à sanguine concedo, si conjunctus nego, quia in hoc casu requiritur venæsectio & non purgatio.

Dices septimo: Quando Natura movet, Medico quiescendum est, sed Natura movet in principio, quia turget, ergo Medico quiescendum est. R. Quando Natura movet humores coctos critiche, Medico quiescendum est, quando movet humores crudos, uti hic fit, nego.

Aphorismus XXX.

Circa initia & fines morborum, remissiora (seu imbecilliora) sunt omnia, vigentibus vero (id est circa statum,) vehementiora, seu fortiora.

Contentum seu Intentio.

De Temporibus morborum.

Connexio: In priori Aphorismo Hippocrates statuit, magis movendum esse à principio morborum, quam in eorum statu: In hoc vero causam hujus affert & rationem reddit; interroganti enim cur inchoantibus morbis aliquid movere conveniat, in vigore vero & statu potius quiescere? apte responderi potest, quia circa principia & finem omnia symptomata sunt mitiora, circa statum vero validiora: Cum evacuationes ut conferant & facile tolerentur robustas vires exigunt & Naturam à symptomatibus vel nihil vel leviter divexatam: In statu vero morbi Natura maxime affligitur & à causa morbi exagitatür vehementior, ideo non est laessenda amplius, & quod pejus avocanda ab opere coctionis & criseos.

Connectitur proinde hic Aphorismus cum priori tamquam causa cum effectu. Cum ergo in priori dixerit potius in principiis morborum movendum esse quam in statu, in hoc rationem, inquam, reddit, dicens, circa initia & fines omnia remissiora sunt, id est omnia symptomata sunt magis quietia *in principiis morborum* præprimis, cum natura nondum certamen aggressa sit circa morbum & ejus causam pro inchoando pepasino seu concoctione, hinc nondum sese dolorose movet, nec humores pellit de parte in partem, nisi adsit turgentia, nec tanta adhuc humorum adest fermentatio, nec ii tantam adhuc contraxerunt acrimoniam, unde natura & partes corporis non adeo stimulantur, punguntur & dolent.

In *Declinatione* vero similiter omnia sunt quietiora, quia humores jam sunt concocti & à natura superati, imo alienis & acribus suis qualitatibus corpori noxiis exuti, naturam non amplius molestantes, stimulant aut sua mole opprimentes.

Hic Aphorismus ob brevitatem suam unimembris est & nullam patitur divisionem, simpliciter enim docet tempora morborum diversum symptomatum statum distingvere, id est, tempora morborum universalis variare remedia tum universalis tum particularia.

Unde autem tempora ista morborum internosci possint, ne unum pro altero sumatur breviter dicimus & declaramus: quatuor potissimum signorum genera traduntur: *Primum* desumitur à viribus: *Secundum* à symptomatibus: *Tertium* à motibus Criticis: *Quartum* à cruditate vel coctione causæ morbificæ, & quidem cum vires ægrotantis validæ sunt, symptomata mitia, & motus critici non apparent, imo sæpe numero omnes fere evacuationes consuetæ magna ex parte deficiunt, ac demum cruditas viget: *Principium* morbi *universale* dicitur; concussis vero viribus, augescentibus symptomatibus vel consistentibus & apparentibus criticis evacuationibus, *augmentum* & *status* appellatur: Denique cum symptomata remittuntur vel desinunt, criticæ evacuationes libere prodeunt & coctiones in uno quoque genere persistunt, quamvis vires remaneant imbecilles, *universalis declinatio erit.*

Quia ergo in principio, morbifica causa, nondum per fermentationem in arterias & in sanguinem irrepsit, vel saltem non usque quaque exagitavit vel infecit nec viscerum operationes deturbavit; in de-

clina-

clinatione vero subacta atque evicta foras extruditur, idcirco circa initia & fines, omnia sunt debiliora.

In hoc ergo Aphorismo quatuor perpetuo & potissimum morborum tempora manifestantur, *principium* nempe & *declinatio*, in quibus omnia symptomata sunt remissiora, *augmentum* & *status*, in quibus sunt vehementiora, quia illo tempore, ut diximus omnia sunt fortiora, quia magis patitur æger, atqui hoc fit in statu seu vigore morbi, ergo omnia sunt fortiora.

Hic autem non accipitur morbi vigor penes coctionem & cruditatem, sed pro illo tempore quo patiens magis patitur & affligitur. Aliud enim est *symptomatum*, aliud *concoctionis* vigor: Vigor *symptomatum* per se non prohibet remedia, quia tunc temporis natura non potest agere contra morbum, ergo medicamenta ipsam non impediunt ab actione, cum non agat? E contra vigor *concoctionis* remedia prohibet, quæ naturam à suo opere revocant & impediunt.

Quando ergo symptomatum vigor separatur à vigore coctionis, non omnia in illo sunt vehementiora ut in pleuritide, quando vero cum eo conjungitur tunc omnia in eo sunt vehementiora.

Sunt nonnulli morbi ut *synocha febres*, quæ tantum vigoris tempus sensibile obtinent, principium vero & augmentum percurrunt insensibiliter: Alii morbi peracuti sua tempora ita habent conjuncta, ut fere unum sint sensibiliter, alio tamen modo insensibiliter sese habeant.

Dices primo: Initium febris v.g. tertianæ est molestissimum cum vomitu, siti, inquietudine, quod non est in statu, ergo falsum est, quod circa initia omnia sint imbecilliora. R. In principio febris tertianæ omnia sunt fortiora, quoad symptomatum vigorem concedo, quoad coctionis vigorem, nego, taliter enim sunt imbecilliora.

Dices secundo: In morbo salutari omnia in statu sunt mitiora, quia in lethali omnia sunt vehementiora, contrariorum enim eadem est ratio. R. In morbo salutari omnia sunt mitiora in statu quam in lethali, concedo, quia respectu causa morbi & consequenter ipse morbus mitior est, & magis quidem quam in principio ubi aderat major malignitas, nihilominus vigor coctionis est major: Ex hoc tamen non sequitur, quod in statu semper mitiora sint omnia, quo ad omnia.

Aphorismus XXXI.

Si à morbo belle comedenti corpus non proficiat, malum.

Nota hic Aphorismus quasi idem est cum Aphorismo 8. hujus Sectionis : si à morbo cibum capiens quispiam vires non recipiat copiosiore alimento corpus uti indicat, si vero cibum non capienti idem eveniat, vacuatione indigere sciendum est.

Contentum seu Intentio.

De Prognosi appetitus reconvalescentium.

Connexio: Cum Hippocrates in mox allegato Aphorismo octavo hujus Sectionis, causas retulisset, cur convalescentes cibati non reficiantur : Dixit enim Aphor. 8. *Si à morbo cibum assumens quis non corroboratur, pluri alimento corpus uti significatur : si vero non assumenti, nec appetenti hoc accadat, scire oportet, quod indiget evacuatione.* In hoc Aphorismo, illius octavi facit prognosticum & dicit malum esse si appetens non proficiat, & quod lateat angvis in herba, subsitque periculum recidivæ, vel peioris alicujus affectus. Hunc ergo Aphor. Divus Senex in *Signum* tantum, illum vero in *Causam* adduxit, quo nimirum & causam sciamus *Cur* quis per cibum non corroboretur, & medelam simul adhibeamus auxilio evacuationis. Addit pariter *Cardanus*, *majus & deterius esse nihil proficere quam non corroborari: non corroborari enim necessario non est malum, sed nihil proficere, nec viribus, nec carne, nec colore, quæ tria in morbis reperiri solent, hoc malum est.* *Malum* inquit *simpliciter*, sed in quo genere non explicat Hippocrates. Arbitramur nos, in digestionem, trajectionem & nutritum : si quidem avide comedentes, nihil tamen inde proficientes incidere solent in ciborum fastidium & vomitum, mox etiam in obstructions, cachexiam, ventris profluvia, aliaque hujus generis mala.

Specialius autem meminit Hippocrates sequenti Aphorismo pro-

prostrati appetitus, veluti ab opposito provenientis: etenim ubi primum avide comedentes nihil profecerint, tandem cibum fastidientes, non amplius appetent, ab excrementis in ventriculo congestis.

Verum nec hi procul aberrant à vero, qui existimant (ut à principio innuimus) hic non de convalescentibus de quibus Aphorismus octavus, sed de agrotantibus sermonem habere, si fortasse ex morbo seu morbi causa avide comedant & nihil inde proficiant, quandoquidem malum erit, cum universa illa librorum quantitas cupide ingesta, nec in alimentum transmutata, necessario in excrementitios succos sit convertenda, qui deinceps non tantum morbo priori suppetias dabunt, sed etiam novum generantes, Naturam oppriment, cum vitæ discrimine, ut latius in sequenti Aphorismo dicemus. Hic Aphorismus cum brevissimus sit, non patitur divisionem.

In praxi passim observatur, à morbo reconvalescentes ut plurimum impense esse voraces, præsertim juvenes. Certum præterea est, quod appetitus in morbis revertens vires brevi reparare soleat: Accedit; quod si quis reconvalescens (vel etiam quiscunque) appetat, necesse est stomachum bene se habere; quando autem non proficit, signum est adesse, vel pravos humores, vel partium intemperiem seu discrasiam, vel alias causas externas vel internas, unde rursus corrumpatur & vitietur alimentum: Uti v. g. si lateat in venoso genere, aut mesenterii tractu saburra aliqua cacochoymica, quæ chylum etiam optimum corrumpit, ut testatur Hippocrates in *Coacis, qui à morbo bene resicientes non proficiunt, ii maligne in recidivam incidunt.* Vel si calor naturalis copię ciborum assumptorum sit adhuc impar, ut testatur Hippoc. in dicto Aphor. octavo. Vel, si prævio febrili calore succi nimis evaporati & particulis activis depauperati, a corem præternaturalem esurinum contraxerint, quo mediante non tantum cibos, sed etiam ipsam corporis substantiam (non obstante ciborum euchimorum usu adhibito) depascuntur, ita ut fame quasi perpetua reconvalescentes lancinati, ac si stomachus fundo careret, instar pullorum comedendo emarcescat: In hos Poëta:

Sunt tria queis nunquam satis est, mare, fœmina, flamma

Tum acilente vorax hæctice quartus eris.

In his itaque casibus, quando tale quid accidit, Medici requiritur officium & auxilium ut corpus per Epicrasim seu paulatim & per vices

evacuet, deinde nutriat & reficiat: præterea debet Medicus intemperiem vel discrasiam viscerum corrigere alterantibus & cordialibus seu corroborantibus &c.

Signa autem quæ corpus refici docent, sunt coloris in dies melioratio, marcoris deperditio, corporis profectus, actionum omnium restauratio: Secus autem fit, quando etsi bene cibetur in dies homo magis gracilescit, calorem amittit, actiones deficiunt, ut patet in Cachexia.

Dices: Hipp. 4. Aph. 23. dicit: *qui ventriculo sunt calido præditi, frigidas habent carnes, tenuesque existunt* &c. hoc loco agere videtur de sanis, calidum ventriculum habentibus, & ob id gracilibus non proficientibus, ergo id non tantum dicitur de convalescentibus. R. Aliud est esse graciles à natura, aliud à morbo, prout nostri convalescentes sunt & de his agit noster Aphorismus.

Aphorismus XXXII.

Ut plurimum omnes male habentes, circa initia quidem cibum bene sumentes, neque quidquam proficientes, tandem cibum rursum averfantur: qui vero circa initia, cibum vehementer fastidiunt, postea autem bene appetunt, ii melius evadunt.

Contentum seu Intentio.

De Appetitus in morbis alteratione seu varietate.

Connexio: Hippocrates in præcedenti Aphorismo dixit appetentiam, quæ fit sine ullo profectu esse malam & damnandam: In hoc præsentis Aphorismo dicit ejusmodi appetentiam ad finem rursus in fastidium mutari.

Hic Aphorismus in duas partes dividitur: in prima de his agit, qui in principio appetunt: in secunda vero de his, qui cibum fastidiunt.

Duos

Duos differentes casus proponit in hoc Aphorismo Hippocrates: *Primus Casus* est illorum, qui Crisi imperfecta judicati, appetunt quidem cibos sed comedendi non proficiunt: *Appetunt*, cum morbi reliquæ non hæreant in primis viis; non *proficiunt*, cum chylus depravetur antequam in alimentum transeat, ex quo non corpus sed morbus nutritur; hi ergo rursus inappetentes fiunt, eo quod fermentum morbificum, in dies magis dilatatum, succos tandem laudabiles, & fermenta viscerum de novo inquinet: Nam teste Aristotele, *omne agens agit, ut assimilet sibi passum*, ex quo appetentia rursus dejicitur: teste Ovidio:

Parva subinducta latuit scintilla favilla,
Crescere & inveteres agitata resurgere flammæ.

Secundus Casus illorum est, qui *circa initia non valde appetunt*, id est non magnum habent appetitum, quod cum ex levi causa oriatur, nihil mirum, *si rursus appetentes fiant*, cum dispositiones leviores natura sola facile superet.

Casus ergo ultimus melior est quam primus; fastidium nempe converti in appetentiam, quam è contra appetentiam converti in fastidium.

Quæres utrum hic Aphorismus de convalescentibus, an etiam de ægris intelligendus sit? R. *Primo*: Galen in commentario dicit eum de convalescentibus scriptum esse, alii autem etiam de morbi affectis interpretantur, eo quod ægrotantes, si circa initia morbi cupide comedant, nec inde quidquam proficiant, in declinationem perducti, cibos non appetant: Si vero incunte morbo cibum valde fastidiant postea bene appetentes proficiant in melius procedunt. R. *Secundo*: Sive Hipp. de convalescentibus sive de ægris exponatur, certum illud erit, præstare illos inter initia fame destitui, mox progressu temporis appetere atque edendo proficere, quam à principio, citra commodum avide comedere, & ut diximus postremo non appetere. Ratio hujus desumitur ex eo, quia avide ab initio cibum assumentes nec proficientes, illum nec bene conficiunt, nec in aliti substantiam convertunt, unde necessario excrementitios & viscosos succos cumulant, qui ventriculum opplentes, nauseam tandem & stomachi fastidium inferent; qui vero circa initia cibos abhorrent, diffusos per ventriculi cavum humores, quibus fames obtunditur, inedia tandem corrigunt ac dige-

runt, hisque exsolutis appetitus redit, quo per cibum convenienter ingestum debite reficiuntur. Succipariter ciborum digestionem & dissolutionem addicti, licet inter initia inertes sint, sensim per inediam acuntur, & vegetiores fiunt: Unde postmodum appetitum excitant, & assumptos cibos in succos alibiles permutant pro virium & carnum instauratione.

Cur autem convalescentes plus appetant, quam quod possint concoquere, præter causas supra allatas est, quod sint exsangues, unde cibi ex prima regione velocius & præpropere attrahuntur, hinc crudi permanent, qui postea corrumpuntur, unde cacochymia & vitiosa viscerum fermenta, ut mox supra diximus, suboriuntur. Et revera melius est à principio reconvalescentiæ minus appetere, debilis enim natura non plus appetit, quam necesse est, dummodo inappetentia non diu duret, ne nimirum deficient.

Hinc modo colligere est, perperam eos agere, qui statim à principiis morborum immodice cibos ingurgitant, putantes hoc pacto se viribus pro toto morbi decursu opportune prospicere: tantum autem abest, ut id assequatur, ut potius excrementa multiplicantes, morbificam causam adaugeant, & morbum ipsum, si non deteriorem certe longiorem reddant. Non tamen hinc quis scrupulosus existimet, cibos ab initio morbi appetere, malum esse, cum alias in *quovis morbo mente constare & bene se habere ad ea, quæ offeruntur bonum* dicatur in sequenti Aphorismo, sed solum malum esse ut ægri statim inter initia, multum ex appetitu comedant, quod plane digerere exacte nequeunt, præsertim quia appetitus in principiis morborum vigens naturalis & verus plerumque non est, quippe qui fieri solet à vitiosis & acidis humoribus ventriculum occupantibus; quod si adhuc consentaneus & naturalis sit, neque tamen multo cibo gravandus, ne plenitudine distrahatur natura ab opere coctionis causam morbificam, quæ sæpe etiam increpescit à cibis, eorumque recrementis, unde postremo nausea ventriculi torpor & diutius saltem morbus perdurat. Cæterum sententia hæc non tam est universalis, ut aliquando non fallat, quo circa Hippocrates dixit *omnes fere*, ut nimirum significaret, non semper, sed plerumque fieri, ut id, quod ipse notavit, eveniat.

Appetentia duplex est: Naturalis & præternaturalis.

Prima est, quæ fit à ventriculo sano, sed in reliquo corpore adest caco-

cacochymia, five in una five in pluribus partibus subsistat, quæ postea ventriculo communicatur.

Secunda est, quando ventriculus vel est affectus intemperie seu discrasia, vel repletus acribus, acidis aut austeris humoribus.

Svademus proinde Praxim exercere volentibus ægros convalescentes circa initia bene appetentes parce cibandos esse, juxta illud Hippocratis *corpora impura quanto magis nutries, tanto magis ledes*: Idem tenendum in febricitantibus & in neutro statu constitutis, de quibus etiam intelligendus est noster Aphorismus.

Pro coronide hujus Aphorismi. Notar: His, qui à principio multum appetunt, nec quidquam proficientes, cupide comedunt, *moderata diæta* remedio erit; *Purgatio* vero, vel vomitus, his qui cibos fastidiunt, si fortasse stomachum roborantia non profecerint.

Aphorismus XXXIII.

In quovis morbo valere ratione (id est mente bene constare) recteque se habere ad ea, quæ offeruntur, bonum, contrarium vero, malum.

Contentum seu Intentio.

De Prognosi ex ratione & appetitu.

C*onnexio*: Cum in antecedenti Aphorismo Hipp. magis laudasset inappetentiam, quam appetentiam in convalescentibus: Ne quis putaret, hoc in universum verum esse, in hoc Aphorismo, appetentiam cum ratione conjungit; magni enim momenti sunt in morbis ista duo.

Hic Aphorismus ob brevitatem non admittit divisionem, nisi quis secare velit in duas partes, propter duas conclusiones contrarias.

Duo in hoc Aphorismo Hippocrates universalis & præstantissima signa ad prædicendam sanitatem adducit nempe *mente constare, & bene se habere ad ea, quæ offeruntur.*

Certissima eaque Universalis in Praxi signa salutis & mortis: brevitatis & longitudinis morbi ab excrementis desumuntur, quæ si fuerint cocta, salutem, si depravata & corrupta, mortem; si cruda morbi longitudinem indicant.

Ex majori enim vel minori recessu à consveto sanitatis statu, morbos graviores vel leviores conjicere solemus: illum autem à læsis operationibus metimur & quidem quo magis vel minus, vel plures vel pauciores illæ offendantur. Id ergo considerans hic Hipp. inquit: bonum signum esse in morbis quibuscunque operationes, tum ad partem animale, tum ad naturalem spectantes bene se habere quippe quæ leviolem & minorem recessum à naturali statu fecisse ægrum, arguant.

Post excrementa vim prædicandi & prognosticandi magnam habent, hæc duo mox dicta in Aphorismo proposita præcepta: *Mente constare & bene se habere ad ea quæ offeruntur: Primum* facultatis animalis integritatem: *Alterum* facultatis naturalis vigorem denotat: hinc optima salutis spes, cum facultates principes in membris principalibus robore polleant, in operationibus mentalibus nihil præter rationem & consuetudinem agere.

Depravatur hæc actio *quatuor* modis; *primo* delira & absurda contra rationem loquendo: *Secundo* motus habere incompósitos & inconcinnos: *Tertio* in moribus & ingenio immutari: *Quarto* dolorem non sentire. Hæc omnia in acutis pessimum præsagunt effectum, cum febris vel debeat esse violentissima vel saltem maligna, quæ tantam spirituum animalium confusionem suscitet (delirium enim non nisi malis ægri rebus contingere potest, si illud excipias, quod rarissime críticas evacuationes præcedit) maxime si fuerit continuum, quod ordinarie ipsius cerebri inflammationem denotat.

Appetitus itidem 4. modis depravatur.

Primi consvetos tantum cibos sumunt: *Alii* consvetos nauseant & recusant, atque insvetos desiderant: *Alii* appetunt & appositos respuunt: *Alii* nec appetunt nec assumunt: Et hi omnium ultimo pessime habent: Signum enim est ipsam facultatem appetitricem paulatim extinguvi.

Patulum est Naturam optimum esse Medicum, si ergo robur Naturæ vigeat semper bene sperandum: E contra si ad morbi vim accedat Naturæ debilitas, vix non desperandum: cognoscitur primum, ut diximus quod se ægri bene habeant ad ea quæ offeruntur: Alterum elucescit à contrario.

Per *mentem* intelligit Hippocrates, omnem sensum internum, ita
ut

ut æger nihil præter consuetudinem agat, vel sibi imaginetur, nec judicet, nec timeat, nec lætetur, nec tristetur, nec furiat, nec turpia loquatur nec obliviscatur, nec vigilet, nec sopiatur, nec alimenta nec medicamenta respuat, nec difficulter spiret &c. Ratio enim status facultatis animalis appetitus naturalis præcipuum est argumentum. Meminit ergo Hippocrates in hoc Aphorismo *operationem animalium* quæ mentis & rationis: & *naturalium* quæ ventriculi appetentis & concoquentis sunt; tacuit vero *vitales*: Fortasse, quia fuit illi in animo, eos potissimum morbos commemorare, quæ vitæ cominus insidiantur; vel quia vitales non omnino labefactatas putavit, cum naturales & animales constant; vel quia vitalibus læsis comparare voluit naturales & animales bene valentes, vel quia demum, non omnes ad cerebrum & ad viscera naturalia pertinentes, sed duntaxat ratiocinationi & appetitui inservientes operationes specialius perpendentes existimavit. Dicit enim *mente constare & bene se habere ad ea quæ offeruntur*: quasi hic duabus constantibus, reliquæ etsi deficient, sint ægroti convalituri. Tantum autem ejusmodi facultatibus, videtur tribuendum, ut ad vitam quoque spectantes inde foveri, sint, qui crediderint, cum & cor moveri non posse dicatur, nisi per nervos & roriferum nervorum succum à *Cerebro*, ac puriorem chyli substantiam è Ventriculo suggestam. Unde non solum in hoc, sed etiam superioribus Aphorismis, plurimi fecit Hippoc. appetentis & concoquentis virtutis, quam, prout bene vel male se habeat, cæteræ pariter eodem modo affectæ consequantur. Atque hinc *sicut bonum dixit*, si æger mente constet, & *bene se habeat ad ea, quæ offeruntur*; ita ex adverso, *malum si ad utrumque se male habeat*: quandoquidem præter læsas alias vitæ operationes, contingit quoque animales & naturales depravari; unde profecto diu vita prorogari nequit, ob maximum & remotissimum recessum à consueto sanitatis statu, ergo his duobus, ut diximus, veluti generibus signorum & gravioris & levioris morbi fidelibus seu fidis testimoniis, verisimile est, voluisse Hippocratem de morborum acutorum eventu tradere prædictiones, de quibus antea meminerat, non licere tam certo præsagire.

Dices: Appetitus caninus & pica quandoque fit in morbis v. g. in chlorosi absque damno, nam bene valent etiam comedentes cretam, calcem, corium &c. R. Etsi in pica non videantur statim lædi, tamen illa tolerantior non est permanens, quia plerumque incidunt in

in summum fastidium, ideoque non possunt dici ad ea quæ offeruntur se bene habere.

Dices secundo: Maniacus mente non constat, cibos respuit & tamen curatur, ergo falsus est Aphorismus: R. Etsi maniacus curetur, attamen caput velut partem nobilissimam agrotare malum est: Præterea quod Maniacus cibos respuat, sæpe non fit ob defectum appetitus, sed quia iudicium habet depravatum.

Dices tertio: In principio febris tertianæ ægri sese male habent ad ea quæ offeruntur, & tamen non est malum, ergo falsus est Aphorismus. R. Illam intolerantiam non esse permanentem, de qua intelligendus est Hippocrates.

Quæres: Quomodo ægri dicantur appetere medicamenta, cum illud rarissimum sit. R. Hic appetere significare non respuere.

Aphorismus XXXIV.

In morbis minus periclitantur, quorum Natura & ætati & habitui, & anni tempestati morbus magis cognatus fuerit, quam quibus in nullo horum cognatus fuerit.

Contentum seu Intentio.

De Morbis congruis.

Connexio: Cum in præcedenti Aphorismo mentis constantiam & stomachi appetentiam, veluti certissima duo salutis prognostica, attulisset Hippocrates: In hoc Aphorismo aliud universale signum adducit, quod ad prognosticandum de ægri salute maximum affert emolumentum.

Quamvis quidem exitus morborum in ancipiti perpetuo sint, ut alibi dictum, nihilominus, si illi congruant Naturæ, ætati, consuetudini, habitui, anni tempori &c. minus de vita ægrotantis, vereri contingit, quam si omnino dissentiant.

Hic

Hic Aphorismus propter materiæ unitatem, dividi non potest, sed unimembris manet.

Aphorismus autem præsens, aureo calculo & omnium practican-
tium memoria dignissimus est: vult enim Hippocrates, morbos esse
salubriores, si consentiant *Natura*, periculosiores vero si dissentiant,
per naturam Galen. intelligit temperiem, Neo-terici crasim, seu potius
propriam cujusque corporis constitutionem, unde ratione hujus di-
cuntur morbi consentientes, vel dissentientes: v. g. febris ardens in
temperamento pituitoso: morbus in assycto repugnat consuetudini,
ætati v. g. febris in sene; unde dixit Hippocrates 1. Aphorismorum 14.
senes raro & difficulter acutis febribus corripitur, facillime Juvenes:
Habitui v. g. febris in corpore crasso, densiore. *Tempori* v. g. febris in
hyeme vel autumnò: Et hoc non tantum de vitæ periculo, sed etiam
de longitudine morbi intelligendum est: Verificatur autem hæc re-
gula primario, si morbus cum temperamento nostro dissentiat; Ratio
est, quia cum morbus auferri nequeat, nisi ablata causa morbifica, se-
quitur morbum illum curatu difficiliorem esse, cujus causa est vehe-
mentior, major & violentior: Præsupponitur autem, causam, quæ
cum natura nostra dissentit, talem esse: nam teste Aristotele, *inhaben-
tia symbolum, facilis est transitus*; Et magna nostræ naturæ debet infer-
ri violentia, si in corpore bilioso, in juventute, in macilento, in æstate,
pituitosus humor colligatur: Hæc eadem est ratio cur juvenes robu-
stissimi, ex morbis acutis citius intereant, quam imbecilles & valetudi-
narii; robusti enim non nisi ex causa vehementissima decumbunt;
Imbecilles levis etiam causa prosternt. Non inepte, & non absque
Joco ex hoc Aphorismo Poëta quidam ingeniosus conatur diducere
rationem, cur parvi fures catenis ferreis suspendantur, magni au-
reis exornentur.

Fur dives splendet, fur pauper ab arbore pendet,

Qui nescit causam, consulat Hippocratem.

Cum Natura malum fovet, est ait, absque periculo,

Res est divitibus, congenita accipere

Magnates sunt Magnetes: quia ferrea magnes

Corpora, Magnates aurea dona trahunt.

Id quod diximus de Natura, ætate, habitu, consuetudine, tempore
etiam de aëre, sexu, regione, & vitæ conditione &c. debet intelligi.

Hæc enim & similia sive congrua sint, sive incongrua, variant prognosim, sic morbi congrui dispositionem humorum, incongrui indispositionem & sic majorem recessum à statu naturali denotant, & ideo incongrui præ congruis magis periculosi.

Verum in his omnibus hætenus dictis, contrarium visum est Diocli Carystio, qui proximis post Hippocratem temporibus claruit, existimans longe pejus se habere ægros à similibus quam à contrariis, quippe qui à similibus afficiantur, ab oppositis vero curentur, ut ipsemet Hippocrates statuit *Lib. de flatibus*: Et quidem videntur minus resistentes facilius succumbere, quam qui dissentientem nacti sunt temperaturam, corporis constitutionem ac habitudinem: Unde graciles facillime evadunt tabidi, & obesi, & otiosi, quacunque levi ex causa incidunt in hydropem; & pituitosi senes, gravedines ac raucedines immedicabiles incurrunt.

Verum his aliisque argumentis satis abunde fecisse videtur Gal. in commentario, qui aliter ac Diocles à causa temporis, ætatis & habitudinis contrarietatem superante, Hippocrates hic tuetur: *Cum enim, ipse inquit, anni tempus cohibere non potuerit causa magnitudinem, cum tamen haberet sanitatem sibi suffragantem, multo minus jam facto morbo superaverit, non assistente sanitatis robore.* Atqui Hippocrates dixit, minus periclitari eos, quibus aliqua ratione congruit morbus, quia minorem recessum patiuntur à sanitatis statu, qui vero in dissentientes sibi morbos incidunt, à potentiori sane causa corripuntur, quæ scilicet valuerit omnino dissimilem ætati, naturæ, consuetudini, & anni tempori morbum inferre: Finge senem incidisse in ardentem febrem, vel alium acutum morbum, procul dubio causa, quæ acutum ejusmodi morbum intulit, validissima existimanda est, quæ senilem ætatem cum tanto recessu à suo statu deturbavit: Sic etiam quod senibus contingant, Podagræ, calculi, catharri, nihil mirum, cum vel levi ex causa hos morbos incurrant; sed iisdem juvenes vexari, gravius omnino, quoniam causæ designantur adeo validæ, ut potuerint cum tanto recessu à naturali & consueti statu juventutem prævertere & labefactare. Hic animadvertere decet, non dixisse Hippocratem minus affici, corripì aut laborare, sed *minus periclitari* quorum Naturæ, ætati, consuetudini aut anni tempori congruit morbus, siquidem licet omnino verum sit, difficilius homines ardente febre corripì hyemali tempore, quam

quam æstivo; senes quam juvenes; pituitosos quam biliosos, sedentarios quam excitatos, attamen quandoque ardens febris hyeme aliquem invaserit ea vehementia, qua solet æstare, tum profecto æger in magno discrimine censendus est ob causæ vehementiam, quæ potuerit febrem ardentem hyeme progignere.

Dices primo: Convulsio seu Epilepsia teste Hippocrate 4. de morbis: est pueris familiaris, & tamen est illis periculosissima, quia plurimos inde mori quotidie contigit. R. Pueri à convulsionibus sæpissime moriuntur per accidens, vel quia minus possunt resistere ob debilitatem, vel quia plures convulsionibus afficiuntur, ergo etiam plures mori necesse est.

Dices secundo: Sputum sanguinis est affine juvenibus, & tamen ex hoc teste Hippocrate 4. de morbis facilius moriuntur, quam senes, ergo non subsistit Aphorismus. R. hoc etiam fieri per accidens, & non per se, id est, quia juvenes facilius & magis inflammantur quam senes, & magis acutioribus morbis afficiuntur quam senes.

Dices tertio: Hippocrates 2. Aph. 4. dicit Catharros in senibus non concoqui, sed comitari usque ad mortem, atqui catharri sunt affines senibus, ergo Aphorismus fallit. R. Catharros per se non esse causam mortis in senibus, sed caloris debilitatem, qui eos non potest amplius concoquere.

Instabis: Isti debili calori sunt affines catharri, ergo affines morbi sunt magis periculosi. R. Affines morbi sunt magis periculosi per se nego. Per accidens concedo. Negatur etiam suppositum, quod catharri sint affines senectuti, quia senectus quo ad partes solidas consistit in sicco & non in humido.

Dices quarto: Febres in æstate sunt breviores, & tamen non omnes febres sunt æstati cognatæ. R. Sunt breviores, transeat, sunt semper salubriores nego, de periculo enim hic loquitur Hippocrates.

Dices quinto: Aristoteles Problematum 25. dicit omnes morbos periculosius afficere in æstate, quam hyeme, ergo febris biliosa erit periculosior, etsi sit temporis cognata. R. Quando Aristoteles loquitur, omnes morbos æstate esse periculosiores, facit comparisonem ad vires, quæ tunc temporis sunt debiliores, non vero ad tempus.

Dices sexto: Hippocrates dicit febres autumnales aut longæ aut

lethales, sed hæ conveniunt tempori, ergo non subsistit Aphorismus. R. Febres autumnales conveniunt tempori ratione causæ concedo, ratione essentiæ nego. Quartana enim est intermittens, & periculo vacans: si vero febris quartana degeneret in continuam, fit lethalis, quæ tempori non est cognata, vel etiam si degeneret in hydropem, quæ non fit ratione febris, sed ratione errorum commissorum.

Quares primo: an robusti, & etiam ii, qui nunquam ægrotarunt, periculosius ægrotent, quam debiles & valetudinarii. R. Quod sic, quia major est recessus à statu naturali & causæ sunt violentiores.

Quares secundo: Quinam demum sint morbi ætatibus & constitutionibus temporum congruentes: R. Eos late prosequitur Hippocrates Sect. 3. ubi singulorum morbos enumerat.

Aphorismus XXXV.

In omnibus morbis partes, quæ ad umbilicum, & imum ventrem sunt, crassitudinem habere melius est: valde vero tennes, & labefactatas esse, prævum, sed & hoc quoque ad infernas purgationes periculosum.

Contentum seu Intentio.

De Examine & constitutione infimi ventris.

Connexio: Cum in antecedentibus Aphorismis de universalibus signis, ad prædictionem egisset, quæ ex appetentia, mentis constantia, morbi affinitate, ejusque intensione & remissione, tempore & eventu &c. petuntur: In hoc Aphorismo aliud signum assumit ad eandem intentionem à ventris inferioris dispositione & constitutione: dicitque ejus crassitiem, carnositatem, figuram hemisphericam, non nihil tamen depressam esse bonam: Macilentiam & tabem præter naturam & consuetudinem esse malam præcipue ad infernas purgationes.

Hic

Hic ergo Aphorismus in duas dividitur partes, in prima ponit signum, à dispositione ventris ad bonum, in secunda vero ad malum. Ut ergo Medicus ex hoc signo de morbi eventu certior fiat; primo prognosticorum 37. statim à principio monet Medicum, ut visu & tactu eos diligenter exploret, an tumeant, reniteant, caleant, inquit enim citato loco optimum esse, hypochondria absque dolore esse mollia & æqualia &c. Tales enim partes bene constitutæ ad alimentorum digestionem, distributionem, ad excrementorum separationem, receptionem & tam naturales quam artificiales excretionem plurimum faciunt, ex quibus boni vel mali toti corpori accidit, dependet: nam quod est terra plantis, hoc est venter animali; hic enim robur maxime declarat, quod nempe earum partium pingvis substantia nullo morbo sit assumpta, crassities enim partium ventris inferioris ex duplici causa bonum promittit effectum.

Primo : quia significat partium nutritarum (quæ sunt viscera inferioris abdominis) vigorem, ipsiusque sanguinis nutrientis, tam laudabilem esse conditionem, ut à statu naturali nondum (ut mox diximus) recesserit: hæc autem omnia in omnibus morbis bene sperare faciunt.

Secundo : quia crassities partium abdominis, etiam ut *causa* omnes digestionem, concoctionem, & separationem plurimum promovet, eo quod calor naturalis in partium crassitie conservetur diutius & operetur intensius.

Hinc patet ratio, cur macilenti illi Hypochondriaci, quibus umbilicus vix non dorso alligatus, & omentum omni pingvedine destitutum, per modum telæ aranearum intestina involvit; quibus stomachus, intestina, & mesenterium, omnino macilenta & earum tunica, omnino subtilis, velut membrana pergamenæ existit, perpetuam accusent stomachi debilitatem: Nam calor digestivus ad chylosim necessarius in partibus tam tenuibus, quam macilentis, nec est satis intensus, nec satis copiosus, adeoque ad stomachi digestionem insufficiens.

Consistit autem hæc ab Hippocrate deprædicata abdominis crassities in musculorum abdominis & viscerum debito & molli incremento, nec non proportionata abdominis pingvedine, quæ veluti culcitra partes tegendo, & fovendo, calorem naturalem non parum intendit:

Dicitur *debito, & molli incremento*: nam si viscera solito duriora & majora forent, ipseque venter quasi inflatus excresceret, non pro bono, sed malo omine habendum est: Nam venter solito durior & major, inflammationes, obstructions, scyrrhos &c. Solito flaccidior crudorum humorum abundantiam: solito magis inflatus, caloris nativi pauperiem & flatuum copiam denotat. Sagacissime proinde celebriores Medici in Italia, & Gallia, utpote genuini Hippocratis filii perpetuam tenent ventris inferioris rationem, & vix non in omnibus morbis, Hypochondria, & abdominis partes tangendo, crassitiem, vel macilentiam, duritiem, vel mollitiem, calorem, vel frigus explorant: qui mos laudabilis imo medico Hippocratico dignissimus, & absolute necessarius est: Mirari proinde licet aliquorum in Germania Medicorum etiam celeberrimorum vel inexcusabilem negligentiam vel culpabilem pudicitiam (supponimus enim Medicos in tangendo corpore debere esse Angelos) qui nullo habito hujus Aphorismi & Ventris inferioris respectu in chronicis & acutis, nec semel ventris aut Hypochondriorum regionem tangere dignantur, cum tamen hæc cognitio ad prognosim & curationem absolute sit necessaria. Et hoc est quod vult Hippocrates, dum dixit, *sed & hoc quoque ad inferiores purgationes periculosum*: quasi vellet dicere: si velis agrotum violentiore cathartico evacuare, explora prius abdominis regionem, nam crassities harum partium in violentis purgationibus absolute necessaria est: primo, quia in magnis purgationibus partium expellentium robur requiritur, quod per partium crassitiem plurimum promovetur: *Secundo*, quod intestina tenuia & subtilia pingvedine destituta à medicamento purgantis violentioris acrimonia facile excoriarentur. Unde Hippocrates ante magnas & violentas sui temporis purgationes corpora, longo lactis usu humectare & nutrire solebat: Et hinc sequitur crassiores ventres catharticis etiam violentioribus tuto; raræ texturæ corpora non nisi lenitivis tractari debent.

Hunc totum Aphorismum in compendio tradit Poëta:

Si pingvis venter, purgat Medicina libenter,

Si pingvedo perit, tunc Medicina ferit.

Sed nota: Hippocrates in hoc Aphorismo dixit *melius esse*, non autem omnino bonum, nam nullam pati ista interiora in morbis extenuationem, bonum non est, ut supra diximus, sed & obstructionem, hydro-

hydropem, & alium similem affectum ostendit: unde subjunxit; *multum vero extenuari & contabescere malum*: multam opponens extenuationem crassitudini. Sicut enim impossibile est, nullam ex morbis quibuscunque subsequi in abdomine extenuationem, ita multam & excedentem, malam omnino credere oportebit: quippe hæc non tantum viscerum in imo ventre contentorum magnam noxam ostendit, sed etiam succi alibilis malitiam & ineptitudinem: quare istæ ingentes emaciationes in malignis, & perniciosis morbis plerumque observantur.

Quid autem abdomen seu venter inferior sit, ubi incipiat & finiat, quæ in eo contineantur partes &c. ex Anatomia cuique satis patet.

Quæres, an etiam Hippocrates in hoc Aphorismo purgationes per superiora intelligat. R. Implicite quod sic, quia etiam in valde extenuatis non facile vomitoria propinamus: Nec obstat Aphorismus 4. Aph. 6. *graciles, & facile vomentes per superiora esse purgandos*, ergo etiam graciles & extenuati per inferiora sunt purgandi. R. Hic non intelligi omnino graciles, & valde extenuatos, sed aliquantulum graciles & latipectoris facile vomentes & pronos ad vomitus: Extenuatis autem purgationes potenter nocent, quia privantur auxilio necessario, auferendo utile necessarium quod absque hoc est exiguum, & præterea etiam partes nudæ & graciles potenter vellicantur, & eroduntur à medicamentis purgantibus.

Aphorismus XXXVI.

Sana habentes corpora, pharmacis purgata, cito exsolvuntur, ut & qui pravo utuntur victu.

Contentum seu Intentio.

De Dispositis ad Hypercatharsim.

Connexio: Exposuit in præcedenti Aphorismo, eos qui ventris gracilitatem seu extenuationem habent, ineptos esse ad medicamenta

menta purgantia; in hoc Aphorismo dicit sana corpora, vel simpliciter seu absolute talia, vel ut non talia, victu pravo nempe utentia, medicamentis purgantibus facile exsolvi, adeoque non esse temere fortibus movenda: Verbo, in hoc & sequenti Aphorismo memorat Hippocrates medicamentorum purgantium damna, in sanis praesertim corporibus: Nam quæ corpora malo victu utentia fortiter movent & exagitant, eadem facile exsolvunt, sed medicamenta fortia id faciunt, ergo eadem facile exsolvunt, ergo ab iis abstinendum est. Præterea medicamenta, ubi in corporibus sanis humores peccantes non reperiunt, adoriuntur utiles & alibiles, ut in priori Aphorismo diximus, hypercathartice spiritus & corpora resolvunt.

Duas ergo habet partes hic Aphorismus: prima ad sana corpora, altera ad male nutrita refertur.

Corpora proinde sana, seu minus succorum vitiosorum cumulo affecta, graviter, & fortiter afficiunt purgantia, id enim quod Naturæ familiare est aggrediuntur. Sic pariter corpora, quæ alias ob pravum victum aliis, meliori victu utentibus sunt imbecilliora, acrimoniamque domesticam jam fœventibus, per medicamentum facilius & potentius dissolvuntur, diutius hærendo in stomacho, tetros vapores tum cordi tum capiti communicando, partes vellicando, & multa alia symptomata excitando: satius est ergo talia adhibere, quæ per Epicrasim seu paulatim evacuant, & à viribus debilibus sufferuntur.

Cum enim medicamenta purgantia & cathartica irritando quadam vi partibus infensa humores educant, si fortasse viriosi succi non adsint, utiles liquores ad expulsionem sollicitari, pravos vero ad irritationem ingentem moveri necessum est, unde corpora labefactari contingit. Ejusmodi autem perturbationis, atque exsolutionis mala, attestantur, sitis, ciborum fastidium, vomitus, dejectio, ventris tormina, coloris faciei mutatio, macies, & id genus alia, quæ catharsim comitantur, vel consequuntur importunam. Quod autem irritante vi purgantia medicamenta humores expurgent, & educant, liquido constare potest ex eo, quod glandes seu suppositoria podici indita, à superioribus etiam intestinis, ad motum peristalticum lacescitis fæces submoverant: Mercurius vitæ lingua degustatus vomitum provocat, & dejectionem: Unguentum de Arthanita abdomini & umbilico illitum alvum solvit: Purgantia per inferiora, in majori dosi exhibita vo-

mitum

mitum movent, non alia ex causa, nisi quia vehementius ventriculum vellicant, & citius quam dissolutio peragatur, stomachi tunicas & fibras laceffunt.

Non autem sana omnino corpora, aut ea quæ pravo utuntur victu, à purgantibus offenduntur, & debilitantur, sed etiam quæ nuper à morbo convalescere, post evictam, & extrusam causam morbificam, atque in pristinum sanitatis statum sunt restituta: quin imò longe majus futurum damnum timere est in restitutis, quæ sane imbecilliora esse solent, quam in his, quæ antea ægrotarunt: siquidem illa non sunt pravis cibis infarcienda, ita neque catharticis molestanda, cum perinde sit, membra suo & convenienti alimento privare ac malis succis replere.

Notandum autem, quod sanum corpus duplex sit: unum simpliciter *sanum*, quod sanum simpliciter dicitur: alterum sanum ut nunc tale, quod suam propriam habet sanitatem; de utroque loquitur Hippocrates in Aphorismo.

Dices: Juxta hunc Aphorismum nunquam essent purgandi humores vitiosi, ergo est falsus. *ꝛ.* Si adsit cum humoribus vitiosis magna virium debilitas & inferioris ventris gracilitas, nunquam erunt purgandi fortibus remediis concedo lenioribus & per intervalla nego.

Dices secundo: Corpora robusta facile ferunt purgationes, sed sana corpora sunt robusta, ergo. *ꝛ.* Corpora robusta quatenus ægrotant & ægra sunt, facile ferunt purgationes concedo quatenus sana sunt. Nego.

Dices tertio: Rustici & laboratores seu Opifices pravo utuntur victu, & tamen facile ferunt purgationes. *ꝛ.* Negando consequentiam, imò pessime se habent post medicinas, & licet pravo utantur victu, ob labores tamen, pauca progenerant excrementa, & ideo ad sumendas medicinas inepti sunt.

Dices quarto: Ergo purgationes majales & præservativæ in sanis corporibus erunt frustraneæ. *ꝛ.* Corpora in Majo non expurgantur ut absolute sana, sed ut sana secundum quid, ergo etiam secundum quid purgari possunt.

Dices quinto: Humores cacochymici & vitiosi sunt expurgandi, atqui qui pravo utuntur victu, tales habent, ergo. *ꝛ.* dicendo minorem sunt expurgandi fortibus remediis de quibus loquitur Hipp. nego lenioribus concedo.

Dices sexto: Natura ipsa expellit humores, ergo etiam potest fieri per medicamenta. R. Naturam irritatam etiam expellere utiles & alibiles humores, atqui hoc non fit à Natura per se, sed per medicamento acrimoniam Naturam irritantem, ergo per accidens.

Aphorismus XXXVII.

Qui bona (id est) integra sunt corporis valetudine purgationes difficulter ferunt.

Contentum seu Intentio.

De Purgatione sanorum.

Connexio: Jure merito hic Aphorismus ordine doctrinae, antecedenti præponi aut saltem eidem adjungi debuisset; Universalior enim est priore, utpote qui ad omnem medicationem, & non tantum ad pharmaca, sed ad omne genus medicamenti, sive ex pharmaceutico, chirurgico, aut diætetico desumptum sit se extendere videtur.

Unde nonnulli sunt, qui utrumque hunc Aphorismum nectunt hoc modo: *qui sanitate corporis fruuntur, medicamenta purgantia assumptes, statim debilitantur: quoniam qui corpore valent, difficulter ferunt purgationes.*

In hoc Aphorismo ob brevitatem nulla datur divisio, sed breviter Divus senex ostendere vult, corpora sana, non tantum à purgante medicamento exsolvi, & in alia multa incommoda incidere (quia nulla adest medicamenti cathartici indicatio) sed etiam ab omnibus aliis medicamentis lædi: Nam primo purgatione offendi in præcedente Aphorismo probatum est: quod secundo à venæ sectione lædatur quandoque, apparet, & docet experientia, quia sæpe in vertigines, lethargum, deliquium incidunt ob motum humorum per venæ sectionem factum.

Quod autem Hippocrates in hoc Aphorismo potius meminerit purgationis, quam venæ sectionis, ratio est, quod frequentior committatur error in purgatione quam venæ sectione; præterea, quia citius mederi

mederi possumus erroribus à venæ sectione commissis quam à purgatione: Sanis enim & ægris sæpe nocet purgatio, si non bona & attenta habeatur Naturæ, humorum, & ipsius medicamenti fortioris aut lenioris consideratio, ex his enim tormina, humorum motus, vertigo, syncope, & alia mala eveniunt.

Omnis denique quæcunque sit medicatio, sano corpori obest; Nam sana corpora se bene habent ad conservationem, ergo male se habent ad curationem; conservatio enim fit per similia, curatio per contraria, quæ dum non contrariantur morbo, ut pote non esistenti, contrariantur corpori illud aggrediendo. Patulum enim in quotidiana praxi est, à medicamentis purgantibus bene valentia corpora plurimum turbari, & concuti, atque irritatione visceribus illata, fermenta depravari, sanguinem fundi, & succos nutritios & alibiles exsolvi: sunt enim purgantia, ut alibi diximus, de genere venenorum, & ut Celsus habet, humano corpori inimica, quæ si fortasse inveniant, quos extenuent ac dissolvant pravos humores, leviozem noxam inferunt: si vero ut in corporibus sanis non habeant, quod Cacochymicum exturbent, utiles ac salutare humores invertunt, depravant, corrumpunt, unde non sine gravi virium jactura tolerantur, ni forsan plane perimant, & occidant.

Neque tamen verum est, quod Galen. in Commentario habet, evenire ejusmodi mala in sanis, quia purgantia medicamenta, cum sibi proprium, quem attrahere appetunt, non inveniant humorem, necessario sanguinem & carnes eliquant, ut ex ipsis illum seligant. Satis enim, superque liquet, omnes, & quoscunque humores indifferenter educi, quocunque purgante Medicamento, nisi quod à benignioribus levius, à vehementioribus efficacius promoveantur, & expurgentur, ut latius alibi diximus & dicemus.

Quamvis autem supra dictum sit, cathartica in sanis difficulter tolerari, non tamen hinc quis existimet, facilius illa sufferri in ægris, quippe in utrisque eadem vel paria symptomata comperimus. Id vero in his discrimen aderit, quod purgatio in ægris, si recte & opportune instituat, morificam causam eliminando prodesse poterit; in sanis vero præter noxam ab irritamento etiam utiles succi evertuntur, & evacuantur viribus infractis. Quamobrem jure optimo animadversum hic est ab Hippocrate ægrius ferri à sanis quam ab ægrotantibus

bus medicationes, cum revera cacochymica corpora ex quovis levissimo pharmaco subitas sortiantur evacuationes, euchymorum vero purgationes difficilius fiant, & maxima cum universi corporis perturbatione.

Dices primo: Venæ sectio prodest hominibus sanis, ergo in hoc Aphorismo non comprehenditur. Prob. Anteced. Prodest Athletico corpori, sed Athletæ sunt sani, ergo prodest sanis corporibus venæ sectio. R. Athleticos non haberi pro vere sanis, de quibus loquitur Aphorismus; quia tales ad summum repletionis gradum pervenerunt, & licet de facto non ægrotent, brevi tamen futurum est teste Hipp. 1. Aph. 3.

Dices secundo: Diata medicamentosa non videtur in sanis prohiberi ex hoc Aphorismo, quia hæc corpori non obest. R. Etiam diatam medicam in corporibus vere sanis superfluum esse, imo ex supposito, quod omnia sint bene constituta in corpore, plus obesse, quam prodesse.

Plura repete ex Aphorismo præcedente, quæ hic locum habent.

Aphorismus XXXVIII.

Paulo deterior & potus & cibus, suavior tamen, melioribus quidem, sed insuavioribus (seu ingratis) præferendus.

Contentum seu Intentio.

De assumptorum gratia & salubritate comparata.

C*onnexio:* Cum in antecedenti Aphorismo tractasset Hippocrates: quomodo sana corpora se habeant ad Medicamenta, in hoc Aphorismo ostendit, quomodo sese habeant tum sani tum ægri ad cibi & potus, vel melioris vel deterioris exhibitionem, dum ait (quod multis paradoxum videtur) paulo deteriolem, sed suaviorem ad gustum saltem. Ita & suavem seu ad gustum, meliori & saniori non tamen ad gustum, id est ingrato, præferendum esse, dicitur paulo deteriolem, id est, non
nimis

nimis malum, aut ex se omnino pravum & malum, de quo non loquitur Aphorismus.

Brevitas hujus Aphorismi nullam patitur divisionem. Hoc tamen brevi Aphorismo Hippocrates (licet passim constet, quod nemo in propria causa possit esse Judex, & arbiter) insinuare velle videtur, quod Medicis missa omni morositate & scrupulo, aliquando sed prudenter, gustui patientum debeat indulgere, & gratificari quantum fieri potest, & licet; imo ejusdem decreto aliquid concedendum est, consuetudini, ætati, anni tempori, Regioni &c. dum non noceat, prout faciunt quidam Adulatores Medici & medicastri, qui ne Patientes offendant, deterrima quæque concedunt, & potius à patientibus reguntur, quam patientes à Medicis. Cordatus vero & fundatus Medicus in rebus nocentibus debet esse inexorabilis teste Gal. 1. Meth. inquit: Medicus debet imperare agris, sicut Imperator & Dux imperat subditis.

Cum ergo pateat *primo* cibos alios, ita & potus, ab aliis sapore, gustu, gratia, & salubritate differre: Patet *secundo* optimum ciborum & assumptorum omnium condimentum, & intrinsecum esse appetitum.

His ergo suppositis facile eruitur ratio hujus Aphorismi, quod ille cibus, etsi in se sit deterior, modo magis sapiat ægroti palato, vel consuetus sit (consuetudo enim altera Natura) vel solidus & nutritivus ac utilis substantiæ, vel habens aliquam sympathiam & proprietatem cum nostro corpore (sicut enim per antipathiam multa averfamur, ita per sympathiam multa appetimus) præferendus sit meliori. Ratio rationis datur; ad quæ enim Archæus seu Natura magis fertur, eo facilius feruntur & concoquantur, quæ vero averfatur, minus feruntur, & concoquantur: quod enim sapit, nutrit, & conducit, quod non sapit, nocet, gravat, & destruit. Hinc experientia videmus, plurimos curatos, vel per avide devoratos crambes (vulgo *Röhl-Rraut*) quibus se à quartana liberarunt: alios halecum esu idem præstitisse. Non autem horum & similium ciborum svavitas, extendi debet & potest ad omnes seu ad totam speciem, sed tantum ad quædam individua v.g. Petrum vel Paulum, ejusmodi cibos appetentes, quos forsan Joannes & Jacobus, & omnes alii averfarentur.

Et licet, ejusmodi cibi, vel causæ morbi, vel morbo ipsi similes

esse videantur, attamen quod tam avide appetantur, vel his ita delectetur Natura, eosdem in sinu suo fortissime constringit, virtusque unita fortior efficiatur, Natura enim optima alimentorum coqua, & optima morborum medicatrix est. Ratio ergo generalis hujus nostri Aphorismi deducitur à *suavitate*: quia suaviorem cibum aut potum ventriculus arctius amplectitur, retinet, melius digerit, atque in probum chylum transmutat, unde vires & membra reficiuntur. De hoc plura vide in Hippocrate Lib. de Affectionibus: Item 6. Epidem. s. 4.

Hinc & Autopsia docemur laxiorem paulo diætam & copiosiorē saepe strictiori, modo intra terminos maneat, & appetitus eam ferat, præferendum esse.

Docemur secundo: Multos languentes & ægrotos, diuturno alicujus desiderio percitos (dictante indubia Natura, eo tandem obtento sanatos esse.

Similem nacti sunt conditionem (ut seriis jocosa misceam) pluri mi juvenes qui vetulas edentulas non ex amore sed ob divitias duxerunt, qui ægram, miseram & molestam vitam duxerunt, quibus tandem (faventibus superis) per mortem sublatis, & obtenta aliqua diu fortassis desiderata & sibi præfixa sponsa quasi rejuvenescunt: Ecce tantum potest immissio possessoris in rem diu desideratam: Idem fit si Natura cibum aliquem avide appetat, nullumque ad alia prorsus habeat appetitum, etsi paulo deterior sit, concedendus est: Nam Natura non gratis rem tam avide appetit, & nemo Naturæ tam conscius est, quam ipsa sui ipsius.

Quod diximus de alimentis & potulentis, id quoque de medicamentis intelligendum volumus, quantum fieri potest, & licet: Nam morbi vix semper suavis curari queunt, qui saepe amara dulcibus miscere oporteat. Et bene attendendum ne per suavitatem vim medicamenti tollamus.

Quæres: Cur stomachus plerumque nauseet ingrata? *R.* quia illa neque amplectitur neque digerit & multa alia procreat.

Dices: In febre ardente partes appetunt aquam frigidam, à qua tamen læduntur. *R.* Id fieri per accidens, quatenus aqua diu in stomacho stagnans bilescit, aut corrumpitur, aut concoctu fit difficilior, exinde materia febris, quod Natura appetens ignorat, & ideo lædit:

non

non tamen sequitur inde, aquam febrili calori non esse opponendam, licet aliqua minora inde sequantur incommoda.

Dices II. Intemperies omnis præternaturalis appetit contraria, ergo ea semper sunt concedenda. *℞.* Si morbus sit à sola intemperie concedo si autem ab aliis fiat. v. g. obstructionibus, quæ à refrigerantibus augentur nego.

Dices III. Febricitantes multi appetunt vinum ut simile, ergo etiam illis illud erit concedendum juxta Aphorismum. *℞.* Appetunt non tanquam potentia calidum, sed tanquam actu frigidum, & humidum, id est non appetunt vinum ratione caliditatis, sed ratione humiditatis, ergo illis concedendum nego Consequentiam. quia vinum non est potus paulo deterior, sed multum nocens, adeoque non concedendus. Et revera plerique potius appetunt aquam, quia consuetudo in causa est.

Dices IV. Similia debentur viribus, sed paulo deteriora non sunt similia, quia quatenus deteriora sunt, necessario aliquid habent, quod est Naturæ nostræ contrarium, alias talia proprie non dicerentur. *℞.* Non ideo contraria dici, quod multum contrarientur nostræ naturæ, sed quod sint vel difficilioris digestionis, & crassioris substantiæ, vel licet quasdam qualitates habeant contrarias, eæ tamen non sunt tam intensæ, ut noceant, cum Natura ea affectet.

Dices V. Mulieres gravidæ pica laborantes appetunt cretam, carbones &c. Sed hæc sunt multo deteriora, quæ tamen conceduntur, ad præcavendum abortum. *℞.* Etsi hæc substantia noceant, qualitate tamen profuat, nempe humorem acidum picam excitantem absorbendo, abstergendo ab orificio stomachi. Præterea talia non regulariter & semper conceduntur, sed tantum coacte ad evitandum majus malum.

Dices VI. Non in omnibus morbis & morbi temporibus hæc regula aphoristica locum habet, nam in morbis acutissimis exquisitissimo victu, ergo non deteriori utendum est juxta Hipp. 1. Aph. 8, ne morbi causa augeatur, & deterius fiat. *℞.* Hic non est quæstio de morbi temporibus, in quibus omnino abstinendum est, sed si cibi vel potus minimum sit dandum, semper eligi potest illud, quod suavius est, etsi paulo sit deterius, neque hoc inter errores computandum, siquidem ad coctionem, & distributionem plurimum facit suavitas, ideo à mul-

is varietas ciborum præfertur simplicitati, ob suavitatem & facilem coctionem.

Duplex autem est suavitas in cibis, naturalis, quam ex se habent, & artificialis, quæ arte culinaria & condimentis comparatur.

Quæres ergo, cur Hippocrates non nomine deterioris sed suavioris usus sit? &c. Ex Hippocrate deterior is cibus intelligendus est, qui minus ad vires restaurandas valet, minusque causæ morbificæ adverte-
tur; at vero suavior qui gustum voluptuosius afficiat, & ventricu-
lum ad appetendum, & conficiendum, jucundius alliciat, ut si quæ
nausea, vel stomachi subversio aderat, tollatur, vel remittatur, eadem
perfecto tunica lingua, fauces, & ventriculus vestiuntur.

Solent autem suaviores esse cibi, qui tempore sanitatis sumi con-
sueverunt, nam quæ consveta sunt, minus molestare solent, præsertim si
materno desiderio ab incunabulis appetivimus, vel ab uberibus depul-
si, primos à lacte esitavimus: Unde Hippoc. de ratione victus in acutis
inquit, facilius ferri malos cibos consvetos, quam bonos insvetos, quia
ut dictum, consuetudo altera natura. Deteriores etiam cibi si rite &
recte condiantur, salubriores fiunt, & aviditatem excitant. Attamen
non sunt illa in escam concedenda, à quibus nullus utilis succus elicitur
qualia esse solent, quæ à picacea fame laborantibus expetuntur, ea ete-
nim veluti deterrima, omnino sunt interdicens; sed & neque per-
mittenda sunt, quæ dulcem succum præferre videntur, ut sunt bella-
ria omnis generis ex saccharo potissimum confecta, hæc enim facilli-
me, aut amarescunt, seu bilescunt, aut acescunt, & in succos ventricu-
lo infensos, quam citissime vertuntur.

Aphorismus XXXIX.

*Magnam partem senes juvenibus minus egrotant;
quicumque vero morbi iis accidunt, diuturni ple-
rumque commoriuntur, id est eos comitantur ad
mortem.*

Con-

Contentum seu Intentio.

De valetudine senum.

Connexio: Cum in præcedentibus signa tum à partibus ventris extenuatis, tum à corporibus sanis expurgatis, tum à cibo & potu paulo deterioribus, sed svavibus desumpisset Hippocrates: In hoc præsentis Aphorismo signa desumit ab ætate, senectute nempe & juventute.

Duas habet partes & conclusiones hic Aphorismus: Prima dicit senes minus ægrotant quam juvenes: Secunda asserit, senes diuturnis morbis comprehensi, eos usque ad ipsam mortem comitari.

In hoc Aphorismo ostendit Hippocrates, quantum possit moderatus vivendi modus: siquidem senes licet invalidi, & imbecilles, tamen victu moderato utentes, minus ægrotant, quam juvenes, licet robusti sint, per inordinatam temperantiam sæpius & frequentius ægrotant, errores enim in victu majores & frequentiores sunt juvenibus quam senibus, qui utpote prudentiores, & quid profit, vel oblit agnoscetes attentius suam curant valetudinem: Præterea senes præ juvenibus ob longe moderatius calidum innatum rarius corripuntur morbis acutis febrilibus, quia senes putredini minus obnoxii. Verum hæc causa, quia nimis communes sunt, nisi alia magis specifica causa accedat, per quam rarius illos acutis morbis laborare contingat, non plene Hippocratis sententia censebitur explanata. Existimandum ea propter, senectutem idcirco rarius acutis morbis corripi, quia sanguis ætatum mutatione desciscit ab illa prompta & facili, quæ per juventutem vigere solet acredine, ac fermentatione, sensim enim hebescit, & alkali suo vivifico ac volatili spoliatur, quo levi ex causa in juvenibus concitatur, & effervesceat: Succietiam ex illo provenientes effati fiunt, & in acidum declinant, quo potius concrevit sanguis, & ideo raro acutæ febres senes invadunt. Si enim ex supra dictis causis, & temperantia solum victus non ægrotarent, illa profecto non minus quoque proderet, ne in chronicos morbos inciderent, cum tamen his frequentius capiuntur & correpti fere commoriantur: Itaque à conditione potius sanguinis mutata, quæ per ætatem sensim acquiritur id illis accidere dicendum est.

E contra vero licet ex hætenus dictis senes non ita facile corripiantur, correpti vero difficilius curantur, & difficilius etiam evadunt, sed commoriuntur: Unde in senibus quam primum curare & non tardare debet Medicus: Nam *principiis obsta, sero medicina paratur, cum mala per longas invaluere moras*. Si enim morbus in senibus perseveret, non amplius tolli potest. Unde ratio, cur senes suis diuturnis morbis commoriantur hæc est: Natura duabus utitur alis, quibus operationes suas perficit, & evolando morbo superior evadit: *calore* scilicet naturali, & spirituum assistentia. Ambæ hæc alæ senili muco veluti visco oblitæ, ad ulteriores operationes in dies magis, magisque inhabiles redduntur; hinc natura beneficio harum alarum destituta, solito modo evolare nescit, sed à priori materiæ morbificæ onere impar succumbit. Cum enim ad Victoriæ de morbo, necessario requiratur ut materia peccans, vel resolvatur vel expellatur, vel concoquatur. *Resolutio* autem corporis *raritatem*: *Expulsio* humorum *tenuitatem*. *Coctio* caloris naturalis *vigorem* præsupponat, quid mirum? si nulla ex his operationibus in senio perficiatur: obstat enim *resolutioni cutis crassities*, & *caloris evaporantis pauperies*: *Expulsioni* humorum omnium præsertim sanguinis effæti & inutilis *glutinositas*: *Coctioni* summa & extinctioni proxima caloris naturalis *imbecillitas* & *penuria*: adeoque morbi plurimi in juvenibus vix periculosi, senibus decrepitis lethales sunt, & fiunt, per modum terræ mortuum, qui licet sint mediocres, domum tamen ruinofam & ex se proxime lapsuram facile prosternunt. Plurimi enim morbi maxime autem per se chronici in senibus magis radicanter, longius durant, & facile vel repetunt, vel ad mortem usque comitantur: quos Hippoc. 3. Aph. 31. plerosque enumerat. Vix enim aliquis morbus per crisin in senibus terminatur, ex rationibus jam datis: Non male proinde Hippocrates 1. de diætâ dixit: *Inter ætates maxime sani sunt pueri, secundo loco juvenes, morbosissimi qui maxime senes & his proximi*. Senes itaque sunt juvenibus insalubriores, id est ex se & natura sua, licet juvenes juxta Aphorismi tenorem frequentius ægrotent quam senes, id enim fit, quod juvenes magis (ut diximus) sint dediti excessibus, quam senes, quia mortem timent, & ideo sunt abstinentiores, adeoque minus infirmantur; si tamen infirmantur, desperate ut multi volunt, id est usque ad mortem (nisi ocyus succurratur) morbidi degunt.

Notan-

Notandum autem hic bene est: Iſtas duas concluſiones in Aphoriſmo allatas, veras tantum eſſe ut plurimum, non autem abſolute, quandoque enim etiam falſas: Unde non gratis Hipp. dixit ut *plurimum ſeu vere*, non enim omnino ex chronicis quibuſcunque morbis ſenes decedunt, cum à quibuſdam ſaltem liberari poſſint, adhibita præſertim diligenti curatione: Illos vero plerumque inſanabiles experimur, qui langvorem partium conſequentur atque à perversis & hærentibus humoribus dependent: ut aſthma, hydrops, renum & veſicæ affectus, ſuffuſio oculorum, ſurditas, & alii ſimiles. Rationes autem cur etiam acutis morbis corripì, vel etiam à chronicis morbis liberari vel non liberari poſſint præter dictas ſunt *primo*, quia ſenes, qui mala utuntur victus ratione, vel qui in juventute multum deliquerunt, non rarius ægrotant quam juvenes, de his ſenibus autem non loquitur Hippocrates quia cum illi in juventute & ætatis progreſſu fuerint morbidì, quomodo in ſenio ſani evadent, imo tales ante tempus ſeneſcunt.

Secundo: Poteſt tamen fieri (licet rarius) ſaltem aliquando, ut morbus per illa tria nempe reſolutionem, expulſionem, vel coctiorem ſolvatur in ſenibus ut teſtatur Hipp. 5. Epidem. Sed (quod bene notandum) illos ibi intelligit ſenes, qui à juvenili ætate ſunt connutriti: vel loquitur in citato mox textu de prima ſenectate, in qua multi morbi curantur: hic vero in Aphoriſmo loquitur de ſenectute decrepita, quæ morbis commoritur. Nam multi ſunt primæ ſenectutis homines adeo robuſti & validi, ut multos ſanitate & viribus juvenes facile ſuperent: Verum proinde eſt meum à pluribus annis uſitatum vulgare proverbium: Vir ſenex robuſtus, juvenis. Vir juvenis morbidus, ſenex. In teutonico ſenſu ſic ſonat. Ein alter Mann/ ein geſunder Mann/ ein junger Mann/ ein junger Mann/ ein kranker Mann/ ein alter Mann.

Comparatio igitur ſenum ad juvenes, multipliciter fieri poteſt. *Primo*: Vel fit in eodem homine, vel diverſis hominibus, utroque modo vera eſt prima Aphoriſmi concluſio.

Secundo: Fit ad morbos in univerſum, & ſic etiam vera eſt.

Tertio: Poteſt fieri comparatio de cognatis morbis, ut minus ægrotent ſenes morbis frigidis quam juvenes calidis & hoc modo etiam vera eſt prima concluſio.

Quarto: Vel fit comparatio quo ad pericula, & sic periculosius ægrotant juvenes quam senes quo ad acutos morbos, contra senes magis quam juvenes in longis seu chronicis. Sed

Dices: Morbi frigidi sunt cognati senibus, calidi juvenibus, ergo periculosius deberent ægrotare senes calido quam frigido morbo. *R.* Omnes morbos tam acutos quam chronicos esse senibus periculosos, præcipue in extrema senectute propter imbecillitatem virium, licet etiam leviores morbi sint: Juvenes autem magis periclitantur in acutis, propter inflammationem, quæ in iis tam violenta est, ut calorem innatum facile ex toto dissipet.

Dices Senectus ipsa est morbus, ergo falsus est Aph. R. dicendo Ant. per se & ex Natura sua concedo per accidens in temperatis, & libidini minime obnoxii senibus, & qui in juventute magnos excessus non fecerunt, adeoque illorum corpus validum conservarunt: Nam quando Hipp. dixit senes minus ægrotare quam juvenes, vitam spectavit, non ætatem, quod bene notandum est. Neque etiam negari potest, senes, qui mala utuntur victus ratione, aut qui in juventute multum & sæpe excefferunt, multo frequentius ægrotare, quam juvenes: de his enim non loquitur noster Aphorismus, sed de senibus temperatis & amantibus suam sanitatem, noxia prudenter fugiendo, quæ juvenes audaces & imprudentes ambabus manibus amplectuntur, & luxui, conviviis, luctis, cursibus, venationibus & aliis vitiis dediti sunt.

Dices III. Hæctica etiam est morbus longus, sed huic magis sunt obnoxii juvenes, quam senes, ergo senes non sunt magis obnoxii morbis longis quam juvenes. *R.* Licet magis obnoxii sint hæctica juvenes, non tamen tam periculosa est illis, quia eorum ætati magis convenit.

Dices IV. Qui minus ægrotant, sunt minus insalubres sed senes juxta Aphorismum minus ægrotant, ergo sunt minus insalubres. *R.* Negando majorem; licet enim senes minus ægrotent quam juvenes, sunt tamen juvenibus longe insalubriores, quare morbosissimos senes appellat Hippocrates Lib. I. de Diæta: Sunt igitur juvenes salubres, senes vero insalubres: sed non est idem, sed longe aliud esse insalubre, & actu ægrotare: Insalubre enim duo significat, nempe male sanum esse, & actu ægrotare: possunt autem ægrotare, & non esse male sanos, seu insalubres, id est, non habere illam contractam longo tem-

tempore insalubritatem, seu valetudinariam dispositionem, quam habent senes, adeoque in hoc sensu, qui minus ægrotant, non sunt ideo minus insalubres: ergo primo modo sunt salubriores juvenes; secundo modo senes, quia calorem habent imbecillum & sangvinem paucum, quare etiam non tot ac juvenes morbis v. g. febribus, inflammationibus &c. obnoxii. Uno verbo totum dicimus: Juvenes magis ægrotare, & minus mori: Senes vero minus ægrotare & magis mori. Nec mirum, si enim homo uni pedi innixus facile prosternitur, hinc levis sufficiet causa, quæ seniculos dejiciat, cum unum jam pedem in cymba Charontis habent: hinc Ovidius de senectute dicit:

In te corruimus tua sunt quæcunque fatiscunt,

Ultima quæque suo, conficis ipsa malo.

Dices V. Senes etiam laborant morbis acutis & curantur, ergo non tantum juvenes his laborant, & curantur. R. Senes laborant morbis acutis & curantur, si morbi calidi sunt curantur, sed raro concedo si morbi sint frigidi, curantur, nego. Sunt enim etiam morbi non acuti calidi, à quibus senes aliquando juvantur v. g. Cephalæa, hemi-crania, arthritidis &c. alii frigidi, astma, calculus, paralytis &c. ab his raro, aut nunquam senes liberantur.

Dices VI. Hipp. 6. Epidem. ait sese vitia renum & vesicæ post 50. annum nunquam vidisse sanata. R. à negante autoritate non sequitur firmum argumentum. R. Licet Hippocrates & plures alii non viderint renum & vesicæ vitia sanata fuisse solius naturæ ope perfectæ, arte tamen & sectione id fuisse factum, quamvis rarissima existent exempla.

Aphorismus XL.

Raucedines & gravedines in valde senibus non concoquuntur (seu concoctionem non admittunt.)

Contentum seu Intentio.

De Catharris senum.

Connexio: In priori Aphorismo dixit Divus senex morbos longos senibus commori: In hoc vero prioris exemplum affert, & illius

rationem reddit, cur nempe longi morbi in senibus non curentur, dicit enim *raucedines & gravedines* in valde senibus non concoquantur, sunt enim ambæ hæ valde senibus infestæ, ut quacunque ex causa etiam ambientis frigoris, vel venti austrini illos divexent.

Hic Aphorismus ob brevitatem nullam patitur divisionem.

Antequam ad debitam hujus Aphorismi explicationem nos conferamus, operæ pretium erit, pauca quædam scitu digna præmittere.

Sciendum ergo est primo Hippocratem per *raucedines & gravedines*, non tantum intelligere has præcise affectiones, sed etiam quoscunque Catharros & fluxiones, imo alios morbos chronicos & longos intelligere:

Sciendum secundo: Quod *raucedo* fiat ex humectatione asperæ arteriæ & faucium, unde vox aut nulla aut obscura redditur, quia aër impulsus & percussus nequit libere excurrere, & reflecti, ad vocis modulationem, sed tubæ interius humefactæ vix sonum edunt. Huic contrarius est clangor, per quem vox sonora redditur, & solet accidere in acutis febribus cum pernicie ægri, exsiccata humiditate asperæ arteriæ. *Gravedo* vero seu *coryza* vox attica est humoris fluxus ad nares vel palatum.

Sciendum tertio: Quod vulgus & plerique veteres passim sed erroneè crediderint, omnem Catharrum esse fluxionem à capite ad quamvis corporis partem: quod falsum ipsa ratio dictat, autoritas & experientia tum veterum tum recentiorum convincit.

Non negamus quidem caput ob figuram & situm, tanquam alembicum esse capax omnis repletionis: Unde à veteribus fons & origo pituitæ, & consequenter catharrorum dictum est. Accedit, quod cerebri substantia tam corticalis seu cineritia, quam medullaris seu albicans, sit tota glandulosa, quæ exsugit facillime & recipit: Verum his non obstantibus:

Præsciendum quarto: Sangvinem nostrum (idem dicendum de aliis humoribus, & liquoribus circulantibus) ad omnes partes totius corporis moveri (motu circulari) & in quibusdam earundem aliquam mutationem (vi fermentorum particularium) pati & subire, imprimis quidem in visceribus internis, maxime in iis, in quibus fiunt solennes digestiones & secretiones: & inter cætera viscera, vix non primatum locum

locum & nomen obtinent, quando prædictus sanguis & liquores ad glandulas moventur ut in iisdem aliquid separetur, quod ad serum seu lymphæ constitutionem seu elaborationem requiritur. Unde:

Præsciendum quinto: Subjectum seu partem affectam mandantem primariam & universalem esse massam sanguineam variis liquoribus præsertim lymphæ seu sero inundatam, ut mox diximus. Partem affectam vero partim *mandantem* partim *recipientem*, esse glandulas tam conglomeratas, quam conglobatas, cum suis vasis lymphaticis, ob quamcunque causam distentis, ruptis, aut quocunque alio modo læsis, vel vitiatis, quibus cerebrum, omnesque aliæ partes inundantur. Ergo

Præsciendum sexto: Materiam catharrorum esse lympham, quæ aut quantitate peccat, & nimia est: aut qualitate excedit, & acris, & acida, ac tandem nimia falsedine prædita lixivialis, & corrosiva evadit. Proinde:

Præsciendum septimo: Per glandulas lympham recentiorum, seu serum veterum, aut copiose seu nimis abundanter exclusum, aut vitiatum, seu vitiose constitutum, excretum, catharros, id est defluxus lymphæ aut copiosæ aut vitiatæ ex glandulis præprimis conglomeratis circa caput, collum, laryngem, asperam arteriam, aliasque similes partes vicinas constituere: Hinc

Præsciendum octavo: Opiniones veterum, & recentiorum de Catharri materia, non esse contrarias & discrepantes; sive enim serum sive lympham, sive laticem cum Helmontio appellemus, parum interest, dummodo eandem rem intelligamus: Hoc quidem verum est veteres in modo quo Catharri fiunt aliququaliter errasse, eo quod in motu circulari sanguinis & lymphæ seu sero minus fundati & instructi, & præterea de vasis lymphaticis minime informati hanc rem obiter, & magis speculative, quam practice pertractaverint. Sed de his enucleatius & fusius tractatum est in Praxi Titulo de Catharris.

Præsciendum nono: Quod senectus sit illa ætas, in qua diminuitur animal, seu imminutio animalis à tempore contingens: Seu est mensura durationis vitæ humanæ sub frigido, & sicco temperamento, ratione multitudinis annorum proveniens: Dicitur sub temperamento frigido & sicco: Licet enim senes ex defectu caloris multis sca-teant humiditatibus, & excrementis, & sic potius frigidi & humidi dicendi

cendi forent; nihilominus quia ex se & natura sua omnes partes habent siccas & aridas, meliori jure & magis proprie sicci dicuntur.

Præsciendum decimo: Sicut ætates aliæ, ita etiam senilis quandam inter se latitudinem habet. Senectus vulgo triplex statuitur. *Prima* dicitur cruda, seu viridis senectus, eaque extenditur ad sexagesimum annum. *Secunda* dicitur media ad septuagesimum. *Tertia* præcipitata seu decrepita, quæ proprie senium dicitur seu marasmus usque ad mortem naturalem.

His ergo præscitis, & præcognitis manifeste patet Aphorismum nostrum non intelligendum esse de constitutis in primo senio seu viridi senectute, quam quidam esse putant à sexagesimo usque ad septuagesimum; cum in hac multæ defluxiones coquantur, & curentur & sæpe ut diximus Aphorismo antecedenti tales senes multos juvenes in Naturæ vigore & bonitate superent; sed Aphorismus loquitur de majori & extremo senio ab anno septuagesimo usque ad ipsam mortem, in quibus catharri raro, imo sæpe nunquam concoquantur, sed comites sunt ad æternam vitam.

Ratio autem (licet jam aliquantulum insinuata) in promptu est, quia serum in senio, non sola quantitate sed omnibus qualitatibus simul sumptis peccat, *primo* quia frigidius, *secundo* quia crassius & viscosius; *tertio* quia aëre corrosivum, acidum &c. quæ omnia originem debent defectui caloris naturalis, qui cum arte refarciri nequeat, hinc producta quoque morbifica ab ejus extinctione paulatina emanantia coctionem non admittunt: Et hinc emergit, quod senes defluxionibus seu Catharris præ aliis ætatibus sint obnoxii: & revera clare exinde patet, ætatem maximum esse remedium vel impedimentum ad sanationem morborum: nam autoritate & experientia docemur Epilepsiam sanari ætatis mutatione: gravedines vero & raucedines, ratione ætatis non sanari: Serum enim falsum & vapescent quale est in senioribus minus pepasum admittit, sed potius Catharri, & raucedines in valde senibus per *λυσιν* id est paulatinam discussionem & assumptionem, quam expectorationem & coctionem curantur: Hinc consultius est, ut quod Natura per se præstare nequit in senibus, artis seu medicamentorum & diætæ ope aliquando curetur & adjuvetur coctio, vini nempe generosioris potu, vinum enim lac senum; alimento boni succi & calido, jusculis restaurantibus, somno, quiete, frictionibus, detractione

ctione copiosioris cibi, qua sola observata plures à Cathartis liberati sunt.

Unde bene notandum binas supra ægritudines, gravedinem nempe & raucedinem, non adeo & semper perniciosas esse, ut perpetuo insanabiles credantur in senibus, quin imo sæpissime observentur curatu faciles præsertim si illi cautius res suas agant, & in victus genere errata non admittant: Lepide quidem, & acute respondit olim Alberto Savarolæ hunc Aphorismum objicienti Leonicens, cum fere centenarius raucedine laboraret, eum non fuisse pro Medicis scriptum, indicans prudentem & temperantem hominem posse infauftum Aphorismi omen cavere, & à raucedine liberari, ut evenit; nam jure caponum & seminibus gossipii tandem convaluit: Plures alii referuntur exacta diætâ id ipsum affecuti, conferente tamen plurimum valida corporis constitutione, & spiritalium partium amplitudine, atque energia, Verum tamen etsi raucedo & gravedo in emendabiles non sint, evadunt nihilominus plerumque tales in valde senibus ob langvorem ejus ætatis, quasi dixerit Hippocrates & gravedines in aliis ætatibus facile curabiles, imo nullius fere momenti, si in ultima senectute contingant, ob viscerum laxitatem & sanguinis jam effæti, viriumque langvorem coctionem non admittunt, & ferme insanabiles fiunt. Quamobrem animadvertendum est, speciatim notasse Hippocratem *valde senes*, id est in summa senectute constitutos, qui plerumque langvidi cum sint & cadaverosi, etiam levibus superandis morbis impotentes evadunt, ut hinc facile inferatur, quod minime curationi subjici queant, Astma, Hydrops, Empyema, tussis, morbi longe graviores, quos consulto tacuit, si leviores, ut raucedo & gravedo difficulter in illis maturecant: Sed revera raucedinem & gravedinem in decrepitis, nec insanabiles ipse asseruit, sed solum coctionem non admittere, ut postremo prorsus desinant, cum non raro extremo senio confecti interquiescunt quidem, sed non omnino ejusmodi morbis potissimum productis convalescant, etsi valentiores videantur, & opportunis remediis sint adjuti. Coctionem autem in his vel nunquam vel raro admittunt, tum à confluyente continuo humore eas partes relaxante, qui sæpissime in senibus tenuior plerumque est, tum à sanguinis vitio, quam à cerebri, & glandularum laxitate, tum etiam ob contractum acorem in provecta senectute increpescentem qui suo alkali

vivifico non coërcitus, nec subactus coëctioni refragatur. Et hoc non tantum valde senibus sed & aliis langvidis contingit.

Quæres cur Asthma non curetur in senibus? R. quia plerumque mutatur in hydropem transeunte materia ad capacitatem abdominis. Hinc illud

Hydrops, & Asthma mirabile phantasma,
Quod nullum curat Cataplasma.

Quæres II. An opiata & incrassantia in valde senibus locum habeant? R. raro aut potius nunquam.

Aphorismus XLI.

*Qui sæpe & vehementer, sine causa manifesta animo
linquuntur, ii derepente moriuntur.*

Contentum seu Intentio.

De prognosi syncopes.

Connexio: In præcedenti Aphorismo Hippocrates præmisit prognosticum gravedinis & raucedinis in senibus, in hoc Aphorismo progreditur & statuit aliud prognosticum, de iis, qui sæpe & vehementer ac sine causa manifesta animo delinquuntur, quod illi derepente moriantur. In hoc Aphorismo Hippocrates docet Medicos mortem vel prævenire, vel saltem summa sui nominis gloria prædicere. Est enim ejusmodi exsolutio præcepti omnium virium lapsus, quomodo agri derepente concidunt, fiunt aphony (id est perdunt usum lingvæ & vocis) sudores frigidos emittunt, calorem totius corporis mutant, nec ullus (sicut in solo animi deliquio fit) remanet pulsus, adeoque potius syncopen intelligit Hippocrates, quam animi deliquium.

Brevitas Aphorismi non patitur divisionem. Ut autem hujus Aphorismi veritas perpetuo constet, tria simul hæc ab Hippocrate recensita jungi oportet, ut nempe *sæpe vehementer & sine causa manifesta* defectus animi insequatur, cum in hystericis affectibus, in melancholicis, inedia confectis, & aliis, quos sæpe sæpius linqui animo contingit,

ut sæpe vel vehementer, non certo repentinus interitus timeatur, ut in Aphorismo dicitur: Itaque junctim exposuit Hipp. *frequentiam* id est iteratas animi defectiones & pluries brevi repetentes: *Vehementiam*, ob quam pulsus omnino langveant, vires dissolvantur, corpus concidat, vultus palleat, & partes præsertim extremæ frigescent, quin & frons, & collum glutinoso sudore perfundantur: Demum sine causa manifesta; Nam si à mœrore inedia immodica, quacunque evacuatione, aliave evidenti causa animo deficiat æger (quamvis & ab his quoque perire possit) repentinus interitus minime contingeret, de quibus mox infra fûsius.

Delinquentia ergo seu exsolutio est repentinus omnium virium lapsus, ejusque diversi sunt gradus, alia levis, & transitoria, alia vehemens, & constans: ubi igitur omnes vires repente concidunt cum prædictis mox signis, & accidentibus syncope dicitur: ubi vero deficient vires, lypothymia seu defectus animi nascitur, constante adhuc motus, & pulsus robore.

Dicitur autem *sine causa manifesta*, non quod si fiat à manifesta, non occidat, sed quia non ita necessario quoniam cognita causa, illius ablatione fortasse tolli potest; per manifestam autem causam intelligit causam cognitam, sive illa sit externa, seu interna in ipso sanguine vel corde sita, tales sunt cordis intemperies seu dyscrasia, abscessus, tumor præternaturalis in ipso corde vel pericardio, frequentissima est Polypus cordis, qui sæpe de repente mortem infert, aqua nimia in pericardio; retri vapores à febre maligna, vel miasmate venenato attracto vel assumpto, cholera, dysenteria, diarrhæa, lienteria, hæmorrhagia, Hypercatharsis, ingens fames, morsus & ictus venenati, inflammatio visceris, Gangræna, dolor ingens, vigiliæ nimix, graves obstructions, spirituum excessus, vel defectus &c. Epilepsia sæpe & valide recurrens: Apoplexia, sanguinis nimia copia, ut patet ab effectu venæ sectionis; affectio hysterica fortior & continua.

Omnium autem causa frequentissima hujus tum vehementis animi defectionis (ut subito ac repente perimat) est vitalium spirituum dissolutio, qui vel deleterio humore infecti penitus exstingvantur, vel crasso & frigido succo suffocentur, vel maxima exsolutione dispereant, ut in pestilentia. Huic causæ nos alteram addimus nempe sanguinem vitiatum: is enim cum nimia crassitie, acore, aliove vitio,

in additu dextri & sinistri ventriculi concrefcit, & hæret, syncopen mortiferam infert: fic in multis peftiferis constitutionibus repente concidunt exftincti homines, ac beftiæ, quia peftilentes halitus, feu vapores per aërem diffusi, ejus funt conditionis, ut inspirati, atque in pulmonibus cum fangvine cor ingreffuro commiffi illum concrefcen- tem, & hærentem reddant, inter valvulas arteriæ venofæ, vel in ipfo fi- niftri ventriculi hiatu, atque fimul ejus cavum exitiali contagione infi- ciunt, & labefactant: Unde motu cordis & fangvinis intercepto, syn- cope accidit & mors.

Sed & non raro evenit, ut fangvinis vafa quæ ad cor tendunt, fen- fim lentis & tenacibus succis obftuantur veluti ut diximus polypis, qui postmodum præter fluentem fangvinem retardent, fintque in caufa, ut hic in alias partes irruens, vel opprimat, vel difrumpat, quæ cordis mo- tui ac vitæ funt omnino & penitus neceffaria. Quoniam vero hæc & alia valde differentia folent plerumque paulatim fieri, & ex variis caufis augeri aut mitefcere, ideo eft, ut iterato redeant gravius vel lenius, pro circumftantiarum varietate, potiffimum vero quia fangvis indu- ctus cordis libere permeare nequit, & quousque obftaculum à novo fuperveniente propulfu vicerit, animi defectio perdurabit: at vero cum propelli nequit, non tantum fibi, fed & fuccedenti fanguini impe- dimento eft, quare intumefcens vafa primum dilatat, mox difcindit, unde mors fequitur repentina. Si diutius præterea fangvis grumefa- ctus alicubi remoretur, vel contra impetuosius & uberius in dextrum cordis ventriculum influat, id ipfum plane eveniet, ut cum à diuturno mœrore, & subito metu, immodico, & infperato gaudio quis depre- henditur. Hinc & hujus mali externæ caufæ funt balnea, motus, ira, triftitia, metus, gaudium (omnia excedentia.)

Cum autem syncope fit perniciofiffima paffio, & quidem mem- bri principaliffimi adeoque hominem citiffime necans, nec ullum tem- pus Medico concedens, ideo fine mora illi occurrendum, tum ne fiat, tum etiam magis poftquam facta eft, partes principes roborando fre- quenter & fortius internis & externis remediis, epithematibus, odori- bus aquarum, infufione, frictionibus, extremorum ligaturis, adu- ftionibus, feu cauteriis actualibus: Interne cordialibus, aromaticis, fpirituofis, volatilibus de quibus vide in Praxi. Si vero ab utero, An- tihyftericis, Epilepticis i. hic mirari non fatis poffum quorundam cru-

crudelitatem, qua sibi persvadent ad cordis vigorem & spirituum refectionem valere margaritas, & lapides pretiosos &c. quæ nullam analogiam cum sanguine & spiritibus habent, cum potius à spirituosiss, aromaticis, volatilibus, odoratis id assequi liceat, quæ concrecentem sanguinem dissolvunt, & acidum coagulans infringunt.

Notandum adhuc, ut syncope fiat, requiri magnam & validam debilitatem, & exsolutionem, unde non omnis debilitas causa est syncopes, alias enim omnes debiles essent syncoptici.

Notandum secundo: Sive debilitas illa sit facultatis animalis, siue vitalis, potest induci syncope, in illa per consensum, in hac per essentiam.

Aphorismus XLII.

Solvere apoplexiam vehementem (seu fortem) impossibile quidem, levem vero (seu debilem) non facile.

Contentum seu Intentio.

De Prognosi Apoplexia.

Connexio: In priori Aphorismo de affectu periculoso mortem repentinam inferente agit Hippocrates, in hoc agit de alio, nempe Apoplexia, quæ æque exolutio quædam est, & mortem repentinam infert.

Hic Aphorismus dividitur in duas partes, una loquitur de forti Apoplexia, & incurabili, altera de levi, & difficulter curabili.

In hoc Aphorismo Divus senex Medicum docet debite & caute prognosticare, ne temere promittat salutem in morbo tam desperato, sed præmisso semper prognostico, providi Medici officium faciat.

Apoplexia ut patet ex praxi est sensus & motus omniumque functionum animalium privatio, superstite respiratione, licet & hæc multum quoque offendatur, unde differentia seu gradus illius juxta læsionem respirationis & stertoris magnitudinem, aut parvitatem, quatuor

recensentur à Galen. maxima, seu fortissima apoplexia est, in qua fere nullus patet respirationis sensus: Magna seu fortis, in qua respiratio violentissima est, & intermittens: Mitis seu levis, in qua non est violenta sed intermittens respiratio: Levissima seu debilis, in qua ordinata, & non intermittens respiratio. Unde fortissimam & fortem solvere ut plurimum impossibile est: Levem non facile, quia priores seu fortissima & fortis hominem suffocat, adeoque lethalis est: Levis autem difficulter curatur, quia est gravis affectus & obstructio partis principis seu stagnatio motus circularis sanguinis & spirituum animalium per tubulos impedimentum à multis causis antecedentibus ortum ducens, & ab hac non nisi pauci & juvenes & robusti evadunt, & plerumque in paralysem commutatur, de quibus fuse actum est in praxi, quo lectorem remittimus.

Dices: Hippocrates in Proorrh. dicit apoplexiam febre superveniente solvi, ergo potest curari. *R.* Potest solvi apoplexia ab arte nego antecedens, potest solvi à Natura concedo.

Dices II. Ab arte potest induci febris, ergo ab arte potest curare. *R.* Licet multi se jactent, applicatis scarabæis cornutis ad pulsus manuum febres se inducere posse, attamen fides sit penes Autorem: deinde etsi per artem febris induci posset, adhuc manet naturæ curatio, quæ est morborum medicatrix.

Instabis à contrario: à cerebri inflammatione Erisipelatosa fit Apoplexia, ergo à febre, ergo ab eadem non curatur. *R.* Esse causarum diversitatem; nam in hoc casu excitatur tumor, qui comprimit cerebrum, in altero vero calor febrilis consumit materiam stagnantem apoplexiæ causam: ubi nota, si Apoplexia fortis est, nec eam febrem supervenientem solvere vel saltem rarissime: si vero levis, facilius negotium succedere posse non dubitamus,

Dices III. Hystericæ mulieres possunt aliquot horis vivere absque respiratione, ergo etiam apoplectici. *R.* Esse magnam disparitatem, quia apoplexia est morbus organicus, hystericæ passio, est morbus humoralis seu potius à vapore maligno & narcotico ortus.

Quares, quænam ergo genuina sit ratio, quod Apoplexia immedicabilis censeatur? *R.* Veteres obstructionem ventriculorum cerebri & impeditum transitum spirituum animalium in nervos incusant: Sed *R.* secundo: Hæc veterum opinio vana & levis est, & jam à cunctis

refu-

refutata, cum omnibus jam innotuerit, cerebri ventriculos, repurgandis potius recrementis, quam generandis spiritibus usui esse, qui nec, si sibi in nervos deduci possent, quod nulli ductus ibi pateant, in cerebri meditullium, atque nervorum principium, quin & amplo hiatu patuli requirent illi genitos spiritus continere, qui tenues cum sint ac valde mobiles, sponte sua citissime evolarent.

Verum verisimiliorem nos cum recentioribus adstruimus rationem, nimirum cum ea potissimum cerebri pars, quæ nervorum origo est, ab humore illuc appellente vitiato obstruitur, aut hebetatur, vel ab intercepto sanguinis motu perplexus, nempe reticularem & choroidem, aliave de causa afficitur, gravatur, aut stupet, ut nervis, sensui & motui addictis minime suffragari queat, attonitum, syderatumque corpus evadit: ab hoc autem nervorum principio, his & similibus modis affecto, fit ut respiratio in apoplecticis tam graviter offendatur, quippe quæ nervis & musculis egeat, ut perennet, ea vero omnino impedita sensibiliter læsa, sive interrupta nequit sanguis ex dextro cordis ventriculo libere per pulmones in sinistrum permeare, quamobrem is, tum in eodem dextro cordis ventriculo, tum in ipsis pulmonibus, penitus vel majori ex parte restagnet, exhausto interea sinistro, qui exceptum antea sanguinem propellere non cessat in aortam arteriam: Unde in extinctis, apoplexia, non aliter ac in præfocatis, dexter cordis ventriculus, multo & concreto sanguine turgidus invenitur, sinister vero penitus inanitus: Liquet igitur quam ob causam apoplectici cum gravi respirationis læsione omnino pereant, & cum leviori non tam facile convalescant, quia difficile admodum est eos sanguinis ductus medicamentorum ope referare, atque sanguinem absque ulla remora circumeuntem tueri, cum pulmones sensim concidant, & respirationi inhabiles fiant: Accedit quod motus ipse cordis etiam non sine nervorum influxu habeatur, ut proinde isto deficiente ille quoque desinat.

Quamvis autem Hippocrates in Aphorismo asserat impossibile esse fortem solvere apoplexiam, quod & argumenta mox allata svadere videntur, non tamen non tentandum (quo ad naturæ vires tulerint) quodcunque prodesse poterit, aut aliquando contulisse visum sit; & quidem sub duplici classe continentur, quæ proficere sunt observata:

Eva-

Evacuantia nimirum, quæ respiciunt causam hebetantem, aut obstruentem, & corrigentia humoris malitiam ac cerebri torporem, Antiapoplectica dicta. Inter priora præstat Extractum Catholicum & Extract. Ellebori nigri cum modico Castorei. Inter posteriora vero præcellunt spiritus Antiapoplecticus, spiritus sanguinis humani, spiritus salis armoniaci correctus simplex vel aromatizatus, Spiritus C. C. Liqueur C. C. succinatus, Sal volatile oleosum Silvii, vel Sal volatile oleosum meum nobile, mixtura simplex, Spiritus ceraforum nigrorum, Elixir Cephalicum, vel magnanimitatis, Elixir vitæ Mathioli, oleum cinamomi, cariophyllorum. *Extra.* Oleum succini, rutæ, anisi, rorismarini, & similia, quæ Diaphoresim & diuresim moveant. Cætera remedia plerumque adhiberi nequeunt in attonitis, omni motu & sensu privatis, quin imo, etsi illa per vim indantur, ægre admodum obhebetem & consopitam virtutem proficiunt.

Aphorismus XLIII.

Ex iis qui strangulantur, seu suffocantur & dissolvuntur, nec dum tamen mortui sunt, non se recolligunt (id est ad se non redeunt) quibus spuma circa os fuerit.

Contentum seu Intentio.

De prognosi strangulatorum solutorum.

Connexio: Hic Aphorismus est Exemplum celebre prioris, in qua de magna & forti apoplexia egit, in hoc vero Aphorismo signum fortis apoplexiæ adducit, nempe *spumam circa os*. Apoplectici enim non aliter intereunt, ac ii, qui suffocati moriuntur.

Hic Aphorismus ob suam unitatem & brevitatem non patitur divisionem.

Respirationis maximam esse necessitatem ad vitam sustentandam palam constat, vita enim & respiratio pari passu ambulant, nam impossibile est vivere sine respiratione, & respirare sine vita.

Respi-

Respirationis autem abolitionem adesse in strangulatis demonstrat spuma circa os, unde quando ad illum terminum devenerit apoplexia, inter mortales reponenda, extinctionem enim caloris nativi denotat, quod mortale est.

Nota quæ Hippocrates hic de apoplectica suffocatione videtur indicare, plerique etiam extendunt in strangulatis laqueo vel angina, in submersis aqua, & aliis non dissimili fato enecatis, adeo ut generalius locutus fuisse videatur de quibuscunque ab intercluso spiritu pereuntibus: Et quidem in his omnibus spuma circa os apparens funestum est signum, denuntians spiritalium partium læsionem, & respirationis noxam, unde referri in vitam difficile est. Verum

Notandum secundo: Quod Hippocrates dicit: *qui suffocantur, & à vita deficiunt*: non enim satis est suffocari, sive spiritalium ductuum angustia premi, sed etiam est opus vita deficere, quod scilicet cordis & sanguinis motum interceptum arguat, quamobrem utrumque junctim ægros perpeti necessum est: hac quippe ratione præter spiritalium viscerum læsionem, designatur pariter cordis labefactio: quare cum res ita se habet, de vita sperare amplius non licebit, ubi spuma os occupaverit. Sed qua de causa mors inde certo sit expectanda, cum cæteroquin spuma plerisque accidat, sine ullo vitæ periculo, & epileptici ore spumosi non raro fiant, attamen reviviscunt: Hanc difficultatem mox in sequentibus solvemus.

Spumæ causa materialis est aër & aqua ad invicem commixta, & commota, vel ut dicit Galen. in Commentario, causa spumæ est duarum substantiarum mixtio, *una spirituosæ, altera humidæ*, ex quibus in multa perfractis, & mutuo complexu commixtis ampullæ gignuntur; sicut enim spuma in aqua maris fit post magnam ejusdem agitationem & motum, qui est causa efficiens una cum calore: Vel in vino & cerevisia post fermentationem, vel in loquacibus & garrulis post magnas & ferventes concertationes, ita & iratis in pugna & ultimo conatu contra inimicum funeste facto, & extinctione caloris vitalis, tandem prodit illa spuma circa os: vel sicut in lebetibus igne ferventibus.

Cum autem humida substantia tenax est spiritus seu substantia aërea conclusa difficulter evolat, diuque consistit, qua de causa spuma diu quoque perdurat. Duplicem autem hanc substantiam esse in apoplecticis & suffocatis evidens est; spiritum, nimirum, qui exspira-

tione propellitur, atque à compresso pulmone per angustos ipsius ductus quodammodo intercipitur, & lymphaticum illum humorem ac salivalem rorem è glandulis faucium & gutturis exsillantem, qui ex impedito sanguinis circuitu, non tam fluidus esse solet, imo aliquantum crascescit, ut propterea arctius offendentem spiritum, & pulmonis halitus devinciat, atque ampullas & spumam pariat consistentiorem: atqui hæc omnia in strangulatis sensibilia esse solent, quippe qui præter crebritatem & violentiam pectoris & pulmonis commotionem, loci angustiam, & aëris plus justo perfracti exagitationem cum impedito prorsus sanguinis, & lymphæ circuitu, subitam & maximam subeunt in faucibus & gutture præfocationem. Atque hinc apta modo deducetur ratio, cur non redeant in vitam, quibus spuma circa os apparet: nimirum quia ingentem pulmonis compressionem, summam respirandi difficultatem, & viarum tum sanguinis tum aëris interceptionem maximam denuntiat: quod etiam indicare usus est Hippocrates *Lib. de morbo sacro, & Lib. de flatibus*. Cæterum in Epilepticis vel nulla, vel levis noxa accidit pulmonis & cordis motui, cum respiratio in illis perennet, & sanguis per pulmonis ductus in cor traducatur: quamobrem spuma in ore comparens, nullatenus sequitur offendentis spiritus & perfracti ex tracheolis pulmonum aëris interceptionem, sed solum salivalem rorem, ob concussionem musculorum mandibularium expressionem, atque addentes, aliasque oris partes collisionem, una cum intercluso aëre, in concamerato palati fornice commixti. Itaque ut de veritate Aphorismi perpetuo constet, nequiquam reviviscent, qui spumam emittunt, ab intercepto spiritu in pulmonis ductibus, atque impedito sanguinis per eodem motu: qui vero aliis de causis spumant, bene possunt in vitam revocari.

Per strangulatos seu suffocatos eos intelligimus, qui ex defectu respirationis male, imo sæpe pessime habent. Strangulationis autem variæ sunt causæ. Externæ, & internæ: Externæ sunt laqueus, aër venenatus summa aëris densitas: Internæ sunt bronchiorum pulmonis, asperæ arteriæ, & venarum omnimoda interceptio, vel per obstructionem vel compressionem, vel subsistentiam & resolutionem factam, vel per luxationem spinæ dorsi, vel per tuberculum, & tumorem præter naturam v. g. in angina, & peripnevmonia, tales ægrineque loquuntur ob resolutionem sextæ conjugationis nervorum nempe vocalium,

calium, neque moventur, neque sentiunt, intercepto nempe animali spiritu per nervos resolutos, vel obstructos: Intercepto etiam vitali spiritu per arterias carotides, vel etiam intercepta sanguinis circulatione per venas jugulares compressas, vel obstructas, tandem jugulantur eo quod ob copiam retentæ fuliginis & prohibitam aëris intromissionem calor nativus suffocetur.

Ad Aphorismi autem nostri stabiliendam ulterius veritatem oportet supponere, non modo *strangulatos*, sed & *resolutos*, ideo Hippocrates dixit, *nondum mortui*, quia in Epilepsia, seu paroxismo epileptico suffocantur & convulsi fiunt, sed non moriuntur, etiamsi spuma appareat in ore, quia non sunt *resoluti*: Nam spuma in Epileptico fit magis à pituita, seu potius salivali rore, in ore à mandibularum & linguæ violento motu agitata, ut mox ante pluribus diximus: In apoplectico autem fit ex fuligine, quæ oritur ex cordis, & præcordiorum, seu pulmonis resolutio calore: in hoc adest maxima resolutio, in illo autem non, quia liberatur: fit tamen sæpe ut apoplexia fortissimo Epilepsia insultui succedat, & tunc nulla est distinctio.

Notandum bene: Non ita pridem excogitatum esse modum, quo isti, & qui sub aquis sunt demersi, in vitam referantur, nisi tamen penitus sint extincti, quod plerumque post duas horas evenit. Primum sunt inverso corpore, & sublati sursum pedibus, ac capite deorsum pendulo, eo usque detinendi, circum accenso interea igne, quo usque recalescere incipiant, & aquam per asperam arteriam eructent; facto sensim corde, totoque pectore cum spiritu vini, Elixir vitæ, vel pane calente, generoso vino irrorato, hisque sæpius, & sæpius iteratis: fiet enim, ut mox (nisi omnino decesserint) cor in suo motu restituitur & paulatim sanguinem admittat, atque in arteriam propellat cum vitæ restauratione. Qui vero laqueo suspensi ac strangulati nondum perierunt in vitam facile redire solent, in sufflato per asperam arteriam aëre, ut nimirum pulmonum bronchiis turgentibus, sanguis possit è dextro in sinistrum ventriculum protrudi, subindeque restitui motus tum cordi, tum sanguini qui ex strangulata substiterat. Ad promovendum autem sanguinis motum, atque ad dissolvendum eum, qui forte in dextro ventriculo, & in vasis pulmonicis hære, ac concrecere coeperat, plurimum conferent Elixir Vitæ, magnanimitatis, proprietatis, spiritus salis armoniaci, spiritus theriacalis,

oleum cinamomi volatilia spirituosā aromatica, & id genus alia, sensim atque iterato, ut res ipsa tulerit, exhibita. Cæterum quiqui ultra duas horas præfocati supervixerunt, ut de eo confert Cardanus, cui aspera arteria ossea erat, sicuti ductuum aëris interclusionem omnino non sunt passi, ita sanguinis & cordis motu revera non sunt defecti, nisi etiam hi parem cum Amphybiis & nobili illo Urinatore *Cela* Caranense pisce cognominato, fortiti sint Naturam.

Dices: Irati, imo homines loquaces generant spumam, ergo etiam illi inter strangulatos erunt numerandi? *℞.* In loquacibus, & iratis spuma generatur ex saliva fortiter, & frequenter agitata, cum qua vapor & aër ex pulmone affatim miscetur: In apoplecticis & strangulatis vero, omnis ferme spiritus supprimitur, hinc etiam hæc spuma non generatur ore, sed per modum vaporis ex pectore exsurgit, & exprimitur, & in extremo ore concrescit.

Instabis: Si ejusdem spuma naturaliter præcederet ex pectore, deberet tussim causare, quod tamen non facit. *℞.* Esse svavem humiditatem, quæ naturam non stimulat deinde etsi stimulare, non sentiretur, hinc nec esset tussis.

Dices secundo: Qui laqueo strangulantur non emittunt spumam, & tamen censentur à plerisque apoplexia interire. *℞.* Id fieri, quando laqueus immediate infra mentum injicitur supra laryngem, & sic via præcluditur, per quam vapor è pulmonibus spumæ materia fieri deberet, arcte intercluditur.

Dices tertio: Dictum est, spumam fieri vel à motu seu agitatione, vel à calore, sed neutrum est in apoplectico, id est nec motus, nec calor, quia est affectus frigidus. *℞.* Motum fieri in pectore: *Secundo* calorem esse concentratum, & in illo conflictu ultimo contra morbum institutum.

Dices quarto: Cum Galen. in Comment. asserat, non evadere apoplecticos cum spuma nisi rarissime, ergo tamen aliquando evadunt. *℞.* si fortis succedat febris, secundum Hippocratem evadunt, sed rarissime.

Quæres: Utrum omnis spuma in Apoplectico sit signum lethale? *℞.* non sed rubra maxime, quæ summam cordis compressionem, & quasi crepaturam ostendit, ob quam etiam ipsum sanguinem expellere cogitur; tale Exemplum tristissimum observavi in meo Dignissimo

Professore piæ memoriæ Domino --- Franchimont, qui apoplexia forti correptus, eidem copiosissima spuma sanguinolenta ex ore effluxit.

Aphorismus XLIV.

Qui Natura sunt valde crassi (seu obesi) citius moriuntur, quam qui graciles.

Contentum seu Intentio.

De obesis & gracilibus comparatis.

Connexio: In præcedenti Aphorismo Hippocrates egit de strangulatis, & suffocatis: In hoc vero agit de obesis, & gracilibus, & dicit obesos esse facilioris suffocationis, quam graciles, hoc est, citius ex Apoplexia, animi defectione, ac suffocatione obesos interire quam graciles. Alioquin enim certum est valetudinariam perpetuo vitam magis ducere pingues quam graciles.

Hic Aphorismus ob brevitatem non patitur divisionem. Hippocrates hoc Aphorismo Medicum docet, quomodo de obesis & gracilibus prognosim facere, de longitudine & brevitate pronuntiare, & debitam prophylaxim seu præcautionem seu præservatoriam curam instituere per diætam; tandem etiam prædicere possit, quibusnam morbis magis obnoxii sint obesi, quam graciles; quod nimirum crassi à prima ætate & naturali conformatione citius suffocentur: Dicimus à Natura seu à naturali conformatione, quia qui vitam sedentariam ob lautam diætam crassi & carnosius magis quam pingues evadunt, magis longævi, magisque salubres esse possunt, quam extreme graciles, quia illis non deest amplitudo venarum & robur partium. Aphorismus ergo *valde crassos* intelligit, qui non tantum multo adipescant, sed & venas & arterias habent exiles & ossa tenuia, quæ ingentem corporis molem ægre admodum regere valent, & alia incommoda sufferunt, ut mox dicetur. Non vero intelliguntur etiam Athletæ, & carnosius, & lacertosi, evsarca enim corpora cunctis præferuntur.

Hinc bene notandum, quod habitus corporis quidam est extremus in crassitie, alius in tenuitate, alius inter hos mediocris, de prioribus duobus loquitur Hippocrates.

Crassitie & obesitati multa passim adscribuntur damna, & effectus: Pigritia ad motum; humiditas & frigiditas superflua, vasorum angustia, & ideo modicus sanguis saltem comparate ad carnum multitudinem; paucitas calidi innati, & vivifici caloris, vitæ fomitis, & vigoris, cutis densitas, & transpirationis defectus, inde multa congerunt excrementa, & inutilibus succis scatent, & gravantur, gravissimisque morbis succumbunt, difficilis respiratio, obstructio vasorum & viscerum; Circulationis sanguinis impedimentum; sterilitas, hebetudo: verbo, obesitas, & humiditas superflua est putredinis *fomes*: *Causa* variarum corruptionum; *Effectus* deficientis nativi caloris: *Signum* fermentorum exoletorum: de illis Poëta:

Pingua nam tenuem suffocant corpora sensum,
Et mala farta suas, conculcant viscera mentes.

Pinguedo enim & crassities ordinarie & communiter defectui caloris naturalis suam debet originem; sanguis etenim in hoc casu, neque debite attenuatur, neque dextre distribuitur, sed pinguedines, seu glutinis forma membranosis partibus adhæret, & ob mucilaginosiorem consistentiam semi crudus assimilatur, quo scilicet ii adeo pinguescunt: Unde corporis molem, & inconcinnam crassitiem jam olim Pythagoras carceri comparuit, in quo velut in tenebris calor naturalis inclusus emarcesceret; suntque præterea obesi ordinarie torpidini actionibus obeundis unde Poëta:

Omnia crassa tibi, Venter, pes, labra, manusque
Crassus es, at nihil est crassius ingenio.

Quod est evidens signum, quod tales spirituum & sanguinis penuria laborent, ob angustata illorum vasa, cum tamen calor & vita in spirituum & sanguinis copia, mors & frigus in spirituum & sanguinis paucitate consistat. Aliam rationem, cur pingues citius moriantur quam macilenti invenit Poëta dicens:

Quo

Quo magis aule bibis, mirum! minus hoc bibis aule:

Quo magis aulus edit, quo minus aulus edit.

Mors jugulat crassos Ventres: pinguescere vellet

Nempe saginatis mors macilenta cibus.

Præterea obesi variis iisque gravissimis morbis obnoxii sunt, Cachexiæ, Asthmatis, hydropi, Apoplexiæ &c.

Graciles quoque sua damna & difficultates habent: debilitatem & magis in quovis motu, à calore, & frigore externo afficiuntur, difficile ferunt violentias, & casus, vigiliis infestantur, facile læduntur, famem non tolerant: obnoxii sunt febribus biliosis, ardentibus, tabi, hæcticæ, etsi sunt valde extenuati, brevem vitam ducunt ob defectum caloris, & humiditatis.

Sed Hippocrates non loquitur de nimium gracilibus, seu omnino macilentis, vel plane extenuatis seu tabidis, sed de moderate gracilibus, qui venas & arterias latas & amplas habent, & robusta membra, & moderate quoque carnosæ, sanguinis vivacitatem, corporis perspirabilitatem. Si ergo corpora fuerint nimium crassa & obesa, illa sunt extenuanda secundum Hippocratem *Lib de diæta*: Pingues inquit, qui graciles fieri volunt omnes labores jejuni facere debent, & cibos assumere anhelantes, non nisi fatigati, & non refrigerati præ poto vino, vel diluto, vel puro & generoso, abstineant à refrigerantibus, obsonia condiantur aromatibus, semel tantum & moderate in die comedant, mollia lecti sternia fugiant, acetis squilliticis, vel oximellitidis squilliticis cochlear unum vel alterum matutino tempore sumant &c.

E contra si graciles sunt & pingues fieri volunt, non nimium corpus moveant, aut laborent, jejunium vitent, cibis vescantur Euchymis, & multi nutrimenti, vinum aqua temperatum bibant, refrigerantibus & substantiis humectantibus nutriantur, aromata & condimenta respiciant, molliter dormiant, iram & tristitiam vitent.

Dices: Mors fit per consumptionem humiditatis à calido sed hæc potius fiet in gracilibus quam obesis, ergo falsus est Aphorismus: *Æ. Universaliter negando majorem quia multi pereunt per suffocationem calidi ab humido quod est contrarium: Æ. II. Negando minorem, nam calor in obesis potius exiguum humidum primigenium absorbit,*

absumit, quam multum in gracilibus, obesi enim multum habent humidi adventitii parum radicalis.

Dices secundo: Dilatatio corporis est signum ex superantis caloris, sed hæc est in obesitas, ergo. R. Dilatatio venarum & articularum concedo dilatatio corporis per pinguedinem nego. Pinguedo enim fit potius per concretionem quam per rarefactionem.

Dices tertio: Qui parum nutriuntur, brevius etiam vivunt, sed tales sunt graciles, ergo. R. Tales sunt graciles temperati nego. Extreme graciles concedo de his autem non loquimur.

Dices quarto: Obesi habent humidum radicale magis oleosum, & minus siccabile, ergo etiam vita illorum erit longior. R. Habent magis oleosum seu humidum adventitium concedo humidum oleosum radicale. Nego.

Dices quinto: Illi diutius vivunt, qui sunt minus obnoxii morbis, sed tales sunt obesi, ergo. R. Negando majorem. Nam valetudinarii quandoque sanis diutius vivunt, quia salubrius & attentius vivunt sanis, qui multis excessibus dediti: si autem sani moderate vivunt, diutius etiam vivunt valetudinariis: Deinde obesi sunt minus obnoxii morbis à causa externa ortis concedo interna. Nego.

Aphorismus XLV.

A comitali morbo juvenes qui laborant mutatione potissimum ætatis, seu temporis & regionum, seu loci, id est æris, & victuum liberantur.

Nota: Aphor. 7. Sect. 5. esse fere eundem: Epilepsia, quibus ante pubertatem contingit, mutationem recipit, quibus post vigesimum quintum annum, eos fere comitatur usque ad mortem.

Contentum seu Intentio.

De Prognosi Epilepsia.

Connexio: Postquam supra Hippocrates statuisset de Apoplexia, eam aut non, aut cum difficultate curari, in hoc Aphorismo agit de

de Epilepsia (tanquam valde affini apoplexiæ affectu) eam non solum curari posse, sed simul modum ostendit ipsius curationis.

Hic Aphorismus ob brevitatem non admittit divisionem.

In hoc Aphorismo Hippocrates ostendit per tria remedia velut extrema, difficiles alias curatu morbos, nullaque prorsus alia re juvante curari, adeoque Medico in desperatis & rebellibus morbis esse amplectenda: Patet enim *primo* morbos plerumque solvi per *alterantia, digerentia, & evacuantia*. Ergo Epilepsia maxime solvetur, *mutatione ætatis*, seu temporis, *victus & regionum* seu loci, siquidem hæc alterant, digerunt, seu coquunt & evacuant. Patet *secundo*: Longos morbos, & qui sensim geniti sunt, sensim quoque esse curandos, id est tribus jam dictis remediis, quibus Medicus se confidere potest: Ac si vellet dicere, morbus Epilepticus à primordio contractus non curatur, nisi tota individui Natura immutetur, mutatur autem ætate, victu & loco: si ergo puer v.g. in loco humido laborat epilepsia, transporteretur ad locum, & regionem sicciolem; vel si accedat ad pubertatem, procul dubio magnam sentiet alterationem, causa epilepsiæ digeretur, & tandem statuta per naturam crisi (quæ plerumque in mutatione ætatis fit) evacuabitur.

Huic Sententiæ & Aphorismo contradicit Ethicus:

Quod morbos tollat, non credo Juventa caducos,

Nil Juvene ad lapsum, pronius esse potest.

Epilepsia quid sit ex praxi abunde patet, affectio seu passio, seu motus convulsivus, per quem homo concutitur sine sensu, ita ut nec videat, nec audiat, nec præteritorum reminiscatur, calcitrat, quandoque ululat, & repente concidit.

Epilepsiam morbum esse puerorum, vel Juvenum, seu pueris propriam tradidit Hippocrates *Lib. de morbo sacro; Lib. de aëre, locis, & aquis*: 6. Epidem. & mox allato Aphorismo Sect. 5. Aphor. 7. Quid autem Medici intelligant per pueros vel Juvenes, parum interest: Hoc solum breviter hic dicimus Hippocratem universam hominis vitam in duo solum tempora discriminare, Juventutis nimirum & senectutis: qua ratione non tantum Juvenes, sed etiam pueri, & adolescentes morbo comitiali correptos mutatione ætatis, temporum, locorum, & victuum sanari poterunt.

De causis illius videatur: Differentia illius principalis est,

Gg

quod

quod vel sit *primaria* seu essentialis, seu Ithiopathica, id est primario affecto cerebro, ejusque partibus: *Secundaria* seu per consensum aliarum inferiorum partium seu sympathica, id est quando ab aliis partibus vicinis & inferioribus cerebrum in consensum trahitur v.g. utero, ventriculo, intestinis, veneno vel morfu venenato, quæ non nisi curatis fermentis prædictorum viscerum curatur.

Epilepsia invadit in pueritia, alia post pueritiam à decimo quarto ad vigesimum quintum annum, prima igitur, si duret usque ad vigesimum quintum annum & transcendat decimum quartum annum incurabilis ponitur, ut diximus ex Hippocrate 5. Aph. 7. & plerumque usque ad mortem comitatur.

Puer seu pubertas vulgo dicitur, quando vir semen, fæmina menstrua emittit, quare qui morbi ab orta, in hac ætate non solvuntur, ad mortem usque perdurant, recte enim dixit Celsus comitialem morbum in pueris veneris, *in Puellis menstruorum initium tollere.*

Ab ætate enim in curandis morbis plurimum sperandum est: ad ætatem nos etiam tempora referimus, ne entia multiplicemus sine necessitate, ætas enim tempora, & tempora ætatem faciunt & constituunt.

Per victum non solum alimentum seu cibum est potam sed absolutum regimen in sex rebus non naturalibus intelligimus, si nempe in contrarium causæ morbificæ mutetur.

Per locum non tantum intelligimus diversum situm in ea civitate, vel regione, sed ad diversas & distitas etiam regiones, non tamen extremas, sed temperatas & morbi causæ contrarias.

Quamvis autem Hippocrates pro solutione & curatione hujus morbi, prædicta tria remedia tum sigillatim, tum conjunctim sudent, non tamen interim omittenda sunt apta remedia ad hunc morbum curandum; nam licet Natura prima sit morborum medica-trix, nihilominus in arduis & difficillimis morbis opem & suppetias exquirat ab arte. Et cum constet pueros hoc morbo tum intra tum extra uterum corripì, mox ergo dum nascuntur ab omni impuritate mundandi sunt, ipsisque nutricibus quoque prospiciendum est: reliquum naturæ & ætati committendum; major enim mutatio in humido corpore, toto vitæ decursu non fit quam pubertatis tempore:

pore: Imo nova quasi Natura tunc temporis inducitur; quod non fit in aliis ætatibus, in quibus quidem mutationes etiam fiunt sed non ita confertim, & solennes.

Quares: Utrum motus Epileptici à sola Natura vel à solo morbo fiant. R. Motum Epilepticum fieri à Natura non libera sed irritata, ergo à Natura & morbo simul.

Aphorismus XLVI.

Duobus doloribus simul obortis, non eadem tamen in parte (seu non eundem locum infestantibus) vehementior alterum obscurat.

Contentum seu Intentio.

De doloribus non una in parte concurrentibus.

Connexio: In præcedenti Aphor. Hippocrates docuit exemplo Epilepsiæ, ejus curationem fieri per contrarium, nempe ætatis, loci & victus: In hoc vero Aphorismo docet exemplo doloris, ejus curationem fieri per similia.

Hujus Aphorismi brevitatis non patitur divisionem.

Hic notandum quod Hippocrates de doloribus fatetur, non nulli de cæteris quibuscunque affectibus intelligendum volunt, ita ut non tantum vehementior debiliorem dolorem obscuret, sed etiam quilibet affectus præter naturam gravior, minus gravem insensibilem reddat, adeoque inflammatio pulmonis, meningum, cerebri, hepatis & alterius interni visceris, externos humores præoccupet: Sed revera sensus genuinus Aphorismi ad dolentes tantum partes, videtur congruentius optari posse, quia per dolorem sensibiliter afficiuntur, indeque judicium ferri potest gravioris, vel levioris affectus, cum cæteroquin in aliis morbis falli sæpissime possint patientes, æstimantes levio-rem, aliquo tamen dolore vel molestia sociatum, longe gravio-rem eo, qui revera infensior foret, sed dolore vacat. Dolorifici itaque affe-

Atque inter sese duntaxat comparantur, & quidem acerbiores cum mitioribus, qui tales erunt, relati ad causas dolorem inferentes, & ad partes ipsas dolorem subeuntes; quo enim illæ acriores & vehementiores fuerint; atque hæ nervosiores & sensibiliores, eo quoque dolor acerbior & molestior erit. Hac plane ratione humores acredine præditi, acidi, falsi, tenues, mobiles, asperius excruciant, dolentque sensibilius membranæ quam parenchymata.

Non debent autem duo dolores eandem omnino partem infestare, nam aliter mutuo confunderentur, & potius alter alterum adaugeret, ut cum dolens membrum inciditur, & cutis ex admotis cucurbitulis tumida, adeoque dolens scarificatur; sed diversas & distinctas partes afficere ut comparatio fieri possit: puta si una simul doleant cerebri meninges & dentes pleura, & lumbi: renes & femur; tunc quippe vehementior, aut propter causæ acerbitatem, aut ob loci & sensus præstantiam, alterum debiliorem obscurabit, seu in causa erit, ut minus sentiat.

Sed unde deveniat, non est adeo facile explicatu: sunt qui dicunt, vim sentientem unius partis distrahi ad vehementiorem, aut spiritus in partem vehementius dolentem, subsidii ergo demandari, adeoque in parte minus dolente sensationem impediri aut infringi. Sed inania isthæc verba sunt eorum, qui rem sibi fingunt pro more sufficienter explicatam, quam revera magis implicant; cum cæteroquin sensationes, quæ fieri videntur in sensibus externis, præcipiantur ab interno: nihil enim est in intellectu, quod non prius fuit in sensu. Qui insuper id ipsum explicare conantur exemplo luminis majoris obscurantis lumen minus, longe etiam, lateque falluntur, cum non ex eo quod diurno tempore, lucente sole stellarum lumen non conspicitur, bene inferri possit, stellarum lumen obscurari à lumine solari; nam ex profundo puteo, quis cælum interdum suspiciens, stellas saltem primæ magnitudinis, perpendiculariter fitas clarissime intuetur: Et nihil est novi *Venerem* per diem conspici posse: licet aliæ videri nequeant ad aspectum luminis solaris, quia ita eo oculi nostri afficiuntur, ut ad perceptionem minorum inidonei reddantur.

Sic pariter auditus organa ingenti strepitu percussa nequeunt exiles sonitus percipere: & tactu ipso non persentiuntur, quæ leniter contrectantur, cum fortasse unctione vel sectione illius organa percelluntur.

suntur. Hæc autem omnia non alia de causa contingunt, nisi quia sensationes omnes in cerebro fiunt per motum in organis sensuum externis excitatum, atque per nervos, nervorumque fibras illi communicatum, ut propterea, quæ molesta partibus subjectis accidunt, percipiuntur à mente, prout in eas partes intenta est, unde ea ab alienata, vel alio distracta, dolor, vel voluptas nec percipitur: Cum igitur à vehementiori motu dolorificæ causæ affecta est, nequit profecto leviores persentire; hi quippe mitius nervorum fibras commovent, & lenius cerebri medullium concitant: quam ut valeant mentem avocare in partem lenius affectam.

In hoc Aphorismo plurimum gloriantur chymici eo quod suis innixi principiis statuunt curationes morborum non per contraria (ut methodici sentiunt) sed per similia esse instituendas: Et hujus Aphorismi occasione etiam alios adhuc arripiunt Aphorismos, quos pro se citant, nempe quod vomitus vomitu curetur. Verum hæc chymicorum gloria, vanitas & fumus est, & famosis hoc in puncto innituntur fundamentis, immemores præcedentis Aphorismi nec credentes hoc levamen seu obscuracionem non esse veram curationem, sed tantum palliativum, seu ad apparentiam tantum. Voluit enim in hoc Aphorismo Hippocrates insinuare Medico, quandoque ad minuendum unum dolorem alterum excitare, ut scilicet, retractis ex uno sensorio seu parte ad aliam spiritibus & sanguine, doloris sensus in una parte minueretur, ad eum enim locum maxime fluit sanguis & spiritus, qui magis dolet.

Causa autem quod sanguis & spiritus ad partem dolentem confluant, est Naturæ providentia, quæ suppetias mittere cupiens per accidens, non ex proposito dolorem auget, parte scilicet magis inflammata & distenta, unde major continui solutio contingit: si vero spiritus & sanguis retrahantur ad aliam partem, fit remissio doloris.

Duplex autem est dolor, unus corporis, alter animi, de utroque verus est Aphorismus: Unde comparatio hæc fieri potest, vel inter duos dolores corporis, vel duos dolores animi: Vel unum animi, & alterum corporis: sic dolor corporis v. g. Colica obscurat podagram & è contra: sic dolor capitis, scarificatis & ligatis auribus lenitur: sic etiam in dolore animi, major tristitia tollit minorem: timor vitæ obscurat timorem perdendæ pecuniæ, vel vestis, ira lætitiā.

Sic etiam non tantum dolor major ejusdem speciei tollit dolorem minorem ejusdem, sed etiam diversæ speciei, nam dolor animi tollit dolorem corporis juxta Aphorismum Hippocratis, *qui dolentes aliqua corporis parte, dolorem non sentiunt, iis mens agrotat*; Ita è contra corporis dolor animi dolorem tollit v. g. in pueris flentibus si flagellentur &c. quia Natura distrahitur circa singula minus attenta. Raro autem duæ partes ita æquales sunt sibi que similes ut æqualiter objecto violento resistent, & ab eodem æqualiter patiantur: Interim tamen regula communis est *urgentiori dolori præ altero minus urgente esse succurrendum.*

Sed nota, non licere tamen tenore Aphorismi dolorem dolore levare, & ad partes ignobiles referre, sicut deduci videtur ex eodem Hippocrate 6. Epidem. Sect. 8. Cum Hippocrates hic dixerit dolorem vehementiorem *obscurare* non autem tollere aut sedare minorem. Nec boni Medici est graviolem dolorem excitare sub dubia spe, quod minor desinat. Sed & perperam & inutiliter agere experimur, qui in gravibus morbis partium supernarum tibias & pedes asperius attrectando, vitiosos humores in artus avocare nituntur, putantes se ita illas exsolvere.

Dices: Si tollit dolor dolorem, ergo simile simili curatur. R. Licet dolor sit dolori similis quo ad causam, est tamen dissimilis & contrarius quo ad affectum quia revellit & attrahit in partem contrariam seu oppositam: Doloris enim sicut caloris est attrahere.

Instabis: Major dolor in eadem parte obscurat minorem, ergo nulla solutio. R. Etiam in una, eademque parte ut mox diximus dantur partes sibi oppositæ, pars enim non est indivisibilis & una partis particula præ altera magis vel minus sentit: Potestque in una parte esse duplex dolor v. g. in pleuritide dolor pungens & distendens: alias autem duo dolores ejusdem speciei in una eademque particula se ipsos potius augent quam minuunt, ut diximus.

Aphorismus XLVII.

Dum pus fit, dolores ac febres accidunt magis quam confecto.

Contentum seu Intentio.

De Dolore suppurationis ejusque Indice.

Connexio: Postquam in Antecedenti Aphorismo Hippocrates egisset de dolore majori, obscurante minorem; In hoc Aphorismo, utilissimum nobis reliquit diagnosticum de dolore, vigore & declinatione inflammationum, quando dicit: *Dum pus fit, dolores ac febres magis accidunt, quam confecto*: denotat nobis tempus Divus senex, quo fit pus, cum illo quo factum est juxta illud supra dictum, *circa principia & fines omnia sunt remissiora, in statu vero fortissima.*

Hic Aphorismus ob brevitatem non dividitur.

Hic notandum: Cum sanguis alicubi restagnat, & tumorem ac inflammationem parit, concrescit primum, mox sensim corrumpitur, & vertitur in pus, in cujus generatione vehementi quadam fermentatione subigitur, & simul carnes quodammodo discerpando dolorem excitat, atque per commotionem & disjunctionem partium tenuium à crassioribus calorem excitat, & febrem accendit. Id autem considerans Hippoc. inquit, *dolores & febres accidere majores, dum conficitur, quam jam confecto pure.* Equidem in ipsa puris confectioe, partes illæ tenuiores per fermentationem adiguntur & adnituntur crassiores subigere unde tumefactionem, expansionem, & pulsationem molestam inferunt: Postquam autem pus confectum fuerit, extricatis tenuioribus particulis agitatio, atque commotio cessat, fermentatione ad præcipitationem perducta, nisi quod solum molestia illa persistit, quæ ab ipso pure, veluti à re morbosa provenit, cujus causa circumjacentes partes infici atque in suis operationibus deinceps lædi poterunt, nisi

nisi cito data porta educatur: Id quod plane expertum in cuiuslibet tumoris suppuratione, & mox à sectione confecti puris expulsionem: Sed & non raro per suppurationem egeruntur ea, quæ vix ac ne vix quidem aliter extrudi poterant, omni adhibita diligentia; sic spica digito infixæ, nisi aliter possit extrahi, suppuratione promota subducitur: sic etiam ossium squammulæ seu ramenta in vulneribus & ulceribus sponte foras educuntur, aliaque plura præter naturam corpori ingenta, vel adverso casu affixa.

Quoniam vero à suppuratione habita dolores mitescere solent, hinc videmur apprime admoneri in tumoribus atque inflammationibus internis, quæ diris cruciatibus miseros ægros divexarunt, si fortasse deinde sedentur, cautos esse oportere, tum in prognosi facienda, tum in remediis adhibendis, ne rupto apostemate, effusoque in partem vitæ necessariam pure, mors repente accidat, aut saltem gravior morbus insequatur, cum æger se jam curatum credat: Id quod in vomica Pulmonis, Empyemate, Angina, Pleuritide, aut hepaticide suppuratis, aliisque sæpe evenit.

Confectio ergo puris sua habet tempora ut alii morbi principium, augmentum, statum, & declinationem: per ly *fit* intelligenda sunt tria prima principia, per ly *confecto* intelligitur declinatio.

Notandum *secundo*: Quod actio Naturæ duplex est in materiam: Una agit in materiam (seu humorem) Naturæ familiarem, domesticam, & benignam, unde fit alimentum quæ proprie dicitur nutritio: altera agit in materiam extraneam: Et hæc triplex est, vel Naturæ vincentis, & dicitur coctio & resolutio: Vel Naturæ victæ & dicitur corruptio seu putrefactio: vel medio modo se habet, & hæc pus generat. Terminus ergo actionis quæ fit alimentum est *nutritio* in qua solum humor benignus mutatur: Sed dum fit corruptio seu purificatio, non solum humor benignus seu sanguis solum, sed etiam pars ipsa præcipue carnosæ transit in pus: juxta illud: *Carnes contusas necesse est putrefieri*, ut patet in vulneribus capitis.

Quatuor passim sunt tumores præter naturam Phlegmone, Erysipelas, oedema, scirrhus: Et hi tumores quinque modis terminari possunt; resolutione, transudatione, suppuratione, induratione, & corruptione: Priores duo ut plurimum boni, ultimi duo ut plurimum mali, suppuratio vero medio modo se habet. Phlegmone
sæpius

ſæpius ſuppuratur quam Eryſipelas, & reliqui tumores, quia fit a ſanguine ad ſuppurationem maxime apto. Eryſipelatis materia ut pote tenuis non facile ſuppuratur, niſi per ſuppurantia externa frigida increſcetur, & concentretur & dum exulceratio peſſima fit. Oedema difficilius ſuppuratur, ſcirrhus difficillime; non autem ſuppuratio tantum fit in tumoribus ſed etiam in ulceribus.

De puris bonitate abunde diximus in inſtitutionibus & praxi, quod nempe debeat eſſe album leve & æquale: Oportet autem bene diſtingvere inter *Pus*, *Saniem*, & *Ichorem*. Pus enim fit ex ſanguine ſolo vel mixto vel etiam ex partibus præcipue carnoſis contuſis. Sanies quam Barbari virus appellant eſt excrementum tenue & aquoſum, quod emanat extra ulcus, ex calore debili, cui ſuccedit corruptio fatida & tandem Gangræna. Ichor eſt aquoſa vel ſeroſa humiditas intra corpus proveniens ab humore quocunque.

His præſuppoſitis, nunc danda eſt ratio noſtri Aphoriſmi, quod dum pus fit id eſt à principio inflammationis, adſit dolor & febris cauſa eſt, dum quia circa principia & fines (ut diximus) omnia mitiora, circa ſtatum vero omnia vehementiſſima, quia maxime eo tempore ſolvitur continuum, eſt ſummus naturæ & morbi conflictus: Et tum cauſa eſt ebullitio ſeu efferveſcentia, quæ fit in parte, in qua fit ſuppuratio, à qua calidi & putridi vapores per adjacentes venas cordi communicantur, qui illud accendunt, & illud poſtmodum accenſum, eundem calorem per totum corpus, mediante circulatione diffundit, & hinc febris oritur.

Dolor autem fit, quando fit pus, quia Natura copioſis ſpiritibus ad hoc opus perficiendum ad partem confluit, unde fit diſtenſio partium, nempe membranarum, fibrarum, panniculi carnoſi. &c.

Febris autem ut mox diximus adeſt ob putrefactionem; pus enim fieri non poteſt absque magna fermentatione & putrefactione, unde febris ſymptomatica non eſſentialis excitatur. Proinde optimo jure dixit Hippocrates *Lib. de flat.* omnem morbum eſſe ulcus aut ulceris ſeu putredinis aut putrefactionis conditionem præſeferre.

Poſtquam vero pus confectum eſt, victrix natura quieſcit, omnia ſymptomata v. g. dolor & febris remittunt, quia ceſſat efferveſcentia, & diſtenſio, coctumque pus extra corpus natura eliminat, modo fit pus

leve, æquale, album & minime graveolens: si vero sit fæculentum lividum & fætidum (uti fit in vomica integra vel rupta) in hoc casu superata est Natura, & ad expurgandam hanc materiam vires sæpe non sufficiunt, sed æger moritur, Hipp. 2. prognosticorum.

Signa fientis uti & facti puris in externis tumoribus describit Poëta:

Duritiēs longa, pulsus, dolor & calor auctus,
Signat pus fieri, sed facto dicta remissa,
Sub digitis undans, albescens pars & acuta.

Cæterum quæcunque possunt tenues particulas concitando & exagitando crassas & adhærentes fermentationem promovere, atque poros cutis obturando, perspirationem in partibus tumefactis impedire, valent pariter suppurationis opus adjuvare, qualia sunt pingvia & calorifica dicta, *calidum* enim inquit Hippocrates est *suppuratorium*.

Dices: Hippocrates in Aphorismo dicit destillationes in Ventrem superiorem suppurantur intra viginti dies, ergo alii humores præter sanguinem & carnes suppurantur. *℞. Primo:* Per destillationes Hippocratem intelligere inflammationes, quæ dictis partibus incumbunt. *℞. Secundo:* Hippoc. per ly suppurantur, in citato loco intelligere concoquuntur non proprie suppurantur.

Dices II. Hippocrates primo prognosticorum dicit molles tumores suppurari, sed molles tumores sunt œdematosi, ergo. *℞.* Molles tumores, qui à sola pituita fiunt, & puri œdematosi sunt suppurantur nego à pituita mixta cum sanguine concedo.

Dices III. Si sanguis possit in pus mutari intra venas, ergo etiam in febribus putridis continuis generabitur pus in venis quod est falsum. *℞.* Si in febribus putridis tanta fiat humorum putredo, ut ipse sanguis in specie corrumpatur concedo, sed tanta putredo non est, nisi summa adsit malignitas, si vero hoc fiat, homo moritur, quia à purulenta materia ad verum sanguinem nullus datur regressus; ut abunde diximus de putredine, titulo de febribus in genere.

Dices IV. Putredo est passio mixtorum, sed humores v. g. bilis, lympa, pituita cum sanguine sunt mixta, ergo possunt putrescere, ergo in pus converti. *℞.* Concedo totum, negando ultimam consequentiam, si enim omnia mixta putrescibilia possent verti in pus, etiam herbæ

herbæ & ligna, putredini alias obnoxia possent verti in pus, quod est falsum.

Dices V. Dicitur pus fieri per coctionem, cum tamen etiam fiat per putredinem, atqui coctio & putredo utpote contraria non possunt esse in eodem subjecto, ergo pus non potest fieri per coctionem à calore naturali, sed potius à calore putredinali. & Contraria esse circa idem subjectum, & sese ex eodem subjecto expellere, adeoque ut sese ex eodem subjecto expellant, debent esse in eodem subjecto; nec calor putredinalis & naturalis contraria immediate dici possunt, sed tantum mediate, ratione effectus contrarii, quia calor naturalis generat, putredinalis corrumpit.

Aphorismus XLVIII.

In omni corporis motu, ubi fatigari ceperit, quies statim lassitudinem levat.

Contentum seu Intentio.

De termino motus.

Connexio: Cum in duobus præcedentibus Aphorismis Hippocrates egisset de doloribus, nunc in præsentī Aphorismo ad doloris speciem quam gignit lassitudo, progreditur.

Hic Aphorismus ob brevitatem unimembris & indivisibilis est. Nemo autem hunc brevem sed enucleatum Aphorismum secundum exteriora verba accipiat, & credat Hippocratem tam fuisse simplicem, ut id docere voluerit, quod quies lassitudinem, & defatigationem à motu causatam auferat; nam tali modo hic Aphorismus Hippocrate dignus non foret: Hoc enim noverunt Rustici, hoc naturali instinctu callent ipsæ bestiae, quæ post exantlatos magnos labores sua membra humi prosternunt, remedium in quiete consistere non ignorantes. Sensus ergo verus & genuinus hujus Aphorismi est, juxta illud tritum *contraria contrariis curantur*, quod si membra laborent lassitudine naturali ex motu, tunc quiete tanquam contrario opposito, *statim* (id

est brevi tempore (intervallo) restituuntur: si vero quies lassitudinem non *statim* auferat, signum est lassitudinem illam esse praternaturalem & morbosam seu morbi prænuntiam quam Hippocrates supra hac Sectione Aph. 5. *Spontaneam* appellavit, adeoque eidem quantocumque congruis remediis obviandum esse, cum eodem teste citato loco morbos prænuntiet. Ostendit ergo in hoc Aphorismo Hippocrates ad ablationem causæ tolli effectum: ostendit etiam exercitii terminum & effectum esse lassitudinem: ostendit pariter motum omnem ultra suos terminos productum facile evadere morbosum: ostendit tandem ut cognoscat Medicus, quando à quiete non tollitur lassitudo, esse jam confirmatam & morbum parituram, nisi ocyus & convenienter remedia adhibeantur.

Motus naturalis terminus est fatigatio sudor & Euphoria seu tollerantia, quam transcendere non temere licet: quies est optimum fatigationis, doloris, & virium recuperandarum remedium. Proinde omnis motus corporis & animi mature quiete interpolandus, & curandus est: Præterea sicut motus excedens exasperat humores & spiritus, sic quies nimia torpidos reddit, & ad motum minus aptos efficit.

Motus ergo corporis duplex est, unus carniū & partium externarum; alter viscerum: carnes & partes externæ recreantur exercitiis loco motivis; viscera vero cibo, potu & somno. Motus rursus duplex est, unus levis, qualis est ambulatio, alter validus, qui proprie dicitur exercitium: *Primus* omnibus naturis convenit, calidis seu frigidis, pueris ac senibus atque debilibus; *Secundus* magis robustis pituitosis & torpidis.

Cum autem is, qui se movet (sive ad partes externas nempe ambulando, luctando, ludendo in palæstra & quovis modo immoderate laborando, venerem exercendo &c. sive quoad viscera edendo aut bibendo, aut dolendo, fatigetur, corpusque lassari incipiat, ei quies imperanda est: Nam

Quod caret alterna requie durabile non est,
Hæc reparat vires, fessaque membra levat.

Vel:

Sterne diu nescit, quod non aliquando quiescit:
Et Seneca:

Quis-

Quisquis medium defugit iter
Stabili nunquam tramite curret.

Nam:

Omne quod est nimium, vertitur in vitium,

Quia:

Omne nimium Naturæ inimicum.

Sic ergo per laboris & exercitii intermissionem & quietis vicissitudinem, suum lassitudo remedium invenit, siquidem, ut diximus, ablata causa tollitur effectus, lassitudinis autem causa est motus immoderatus qui duratione sua resolvit, liquat, & exsiccat aliquatenus humidum.

Quies per quam tollitur lassitudo tria significat: vel absolutam motus privationem; vel ejusdem remissionem, vel somnum. Omnia hæc tria lassitudinem tollunt, quæ ex motu nascitur: Nam *primo* quies seu privatio motus omnino motum tollit, quia otiantur, quæ prius laborabant membra. *Secundo*: Motus etiam remissus tollit lassitudinem, unde ambulandum esse leniter post exercitium (id est lulum, vel saltum etc.) monuit Hippocrates, id quod in equis Equites observant post vehementem cursum, eos dembulare lente præcipiunt, ut eo leni motu, humiditates per carnes dispersæ diffentur. *Tertio*: De somno quoque non est dubium, quod lassitudinem tollat.

Per quietem ergo spiritus dissipati recolliguntur, debilitati reficiuntur, diminuti restaurantur: quies autem non sit excessiva: Nam

Otia damnantur, quæ nulla negotia tractant.

Et Ovidius:

Cernis ut ignavum corrumpant otia corpus,
Et capiant vitium, ni moveantur aquæ.

Et Silius:

Plandoque veneno

Desidiæ virtus paulatim evicta senescit.

Quemadmodum enim ferrum nimis quiescendo rubiginem & aquæ stagnando putredinem contrahunt, eodem modo calor natus continua quiete emarcéscit, putrescit, nisi ex eo veluti ex lapide pyrio attritione & motu flamma elidatur.

Per somnum pariter partes, motu & vigiliis exsiccatæ iterum humectantur, exhaustæ replentur, laxatæ restringuntur, hinc ortum est illud proverbium: *qui cum siti dormitum eunt, surgunt cum sanitate*:

somnus enim statim sitim levat, quia humectat, è contra qui bene poti cubitum cunt, plerumque surgunt male habentes, ut vulgo dicitur: *Es thuen die Haar wehe.*

Si ergo per somnum lassitudo non sit sublata, signum est, eam jam esse radicatam, & morbi imminentis prodromum.

Dices: Quies non reponit, quod per motum est deperditum, quia non reponit liquatum humidum, ergo nec tollit lassitudinem, quia non reponit quod est deperditum. *R.* Quies non reponit, quod deperditum est, per se concedo per accidens, quatenus nempe vires non amplius fatigantur, & quatenus moti & dissipati spiritus quiescunt, & reuniuntur; & tandem quatenus per motum violentum alimenta non amplius distrahuntur. Nego. Verum quidem est per quietem tolli recentem, & quæ est in fieri, lassitudinem, eam vero quæ est in facto esse, non tollit, sed tamen impedit, ne magis invaleseat.

Quares: Utrum hoc præceptum spectet ad Therapeuticam seu ad tuendam sanitatem, an vero ad aliam partem. *R. primo:* Therapeutice, tam curam prophylacticam, quam eradicativam respicit, ergo optimo Jure ad eam pertinet. *R. secundo:* Si lassitudo sit symptoma morbi de qua supra 2. Aph. 5. & hic etiam diximus, concedo non pertinere proprie ad prophylaxin: sic vero non est symptoma causæ aut morbi. Nego. Hic autem Hippocrates sumit lassitudinem non quatenus est symptoma, & jam producta à morbo, sed quatenus accidens à nimio motu inducta, quod facile per quietem mitescit. Sed contra

Dices: In lassitudine est actionum læsio, ergo morbus. *R.* Est læsio & morbus transiens concedo est permanens seu in facto esse, quod requiritur ad morbum, & ejus symptoma. Nego.

Instabis: Cum lassitudine debet adesse dolor teste Galen. in Comment. sed ubi est dolor est solutio continui, ergo & morbus, quia solutio continui est morbus. *R.* Pariter. Dolor & solutio continui transiens concedo permanens nego. Et hæc requiritur adesse vere morbum.

Urgebis: Motus calorem nativum auget, partes roborat, excrementa tertiæ regionis evacuat, ergo lassitudinem non inducit, sed bona efficit. *R.* Motus calorem nativum auget & roborat. Dicendo motus brevis & moderatus in corporibus moderatis, temperatis,

ris, & bene affectis concedo, longus, & immoderatus in impuris corporibus nego.

Dices II. Quies sanis hominibus non prodest, sed obest, Ergo. R. Sanis hominibus non lassus & fatigatus transeat, lassus & fatigatus nego.

Dices III. Tristitia & moeror inducit corporis lassitudinem per longas meditationes, atqui hæc lassitudo non quiete, sed motu tollitur, nempe per distractionem animi & corporis, ergo falsus est Aphorismus. R. Etiam hæc lassitudo per se requirit quietem, licet fortassis causa ejus motum requirat, quia per motum melancholici & fixi vapores discutiuntur, & hoc nihil facit contra Aphorismum.

Dices tandem: Per nimiam cibi & potus ingurgitationem, fit repletio, ergo non fatigatio seu lassitudo, quia hæc fit à contrario, ab inanitis nempe partibus, ergo falsus adhuc est Aphorismus, qui ex cibo & potu (ut interpretes volunt) dicit fieri lassitudinem. R. Nos & omnes alii tenemus lassitudinem fieri non tantum ab exhausto vel dissipato humido, sed etiam ab excessu & repletionem: Nam ut diximus

Omne nimium Naturæ inimicum.

Aphorismus XLIX.

Consueti solidos (id est quotidianos) labores ferre etsi fuerint invalidi aut senes, non consuetis (seu insuetis) quamvis robustis & juvenibus facilius ferunt.

Contentum seu Intentio.

De consuetis laboribus, eorumque tollerantia.

Connexio: In præcedenti Aphorismo nobis præceptum tradidit Hippocrates de lassitudine orta ex motu: In præsentī Aphorismo docet & ostendit nobis effectum ulteriorem motus, laboris, & exercitationis, tam in assuetis, quam insuetis, simulque vim consuetudinis, quæ tum à Galen. 2. de tuenda sanitate tum ab Aristotele 7. Ethic. acqui-

acquisititia seu altera Natura dicitur, declarat. Est autem consuetudo habitus seu facilitas in nobis, qua prompte operamur in his, quæ exercuimus.

Duas hic Aphorismus patitur partes, in prima consuetudinem ejusque vim explicat, in altera docet consuetudinem & exercitia consueti ob ætatem vel imbecillitatem non esse omittenda.

Consuetudinem ergo alteram esse Naturam audivimus jam, & quotidie etiam in nobismet ipsis abunde experimur, sic quoque contestatur Princeps Poëtarum Virgilius:

Nimirum quidquid primis adolevit ab annis,
Non facile aufertur, Naturam parturit usus.

Sanctus Augustinus Lib. 6. de *Musica. Consuetudinem secundum & quasi affabrefactam Naturam appellat*: Curtius asserit imperium consuetudinis Natura potentius esse credit: hinc est, quod Juris consulti vim legis seu Jus non scriptum consuetudini attribuant, unde Poëta:

Consuetudo & mos vim legis habere videntur,
Improbilas hodie vim quoque legis habet,

Seneca hanc consuetudinis in Naturæ vires potentiam admiratur & exclamat!

O gravissimum consuetudinis Imperium.

Fertur enim Natura in consuetudinem & consuetudo in Naturam, fraterno quasi vinculo & Amore: & tanto quidem ut Natura illatas sibi à consuetudine injurias, ridente quasi & benigno suscipiat animo. Testes hujus harmoniæ sunt sensus exteriores: Nonne *gustus* cibos assuetos & familiares, licet pessimos, aliisque stomachum everfuros v. g. Hispanus ita & Polonus Raphanum, Gallus Lardum, Germanus Brassicam conditam (vulgo *Sauer Kraut*) Ungarus alium &c. avido amplectitur appetitu: Sic fætor vicinæ cloacæ, aut putrescentis fimi, rusticorum nares non ferit: Sic limarum insuperabilis stridor fabri ferrarii aures non offendit: Sic consuetis Africanis nigredo Æthiopum oculos non male afficit: Hæc autem & similia in non assuetis, heu! quam tristem, & contrariam sensationem sensorio imprimunt, quæ tandem sola consuetudine in amicitiam Naturæ recepta non amplius nauseoso, foetido, stridulo, & ingrato, sed blando omnino contactu Naturam afficiunt unde Ovidius:

Quod male fers, assuesce, feres, bene cuncta vetustos
Lenit.

De *Tacture* res etiam clara est: Nam Italus patrium calorem, Germanus patrium frigus consuetum facile sufferunt: Hinc Aristoteles tradidit veteres Germanos, filios Neo-natos, gelidis intinxisse fluminibus ut explorarent, an à genitoribus suis, non degeneres, connatam haberent Naturæ Germanæ duritiem, & omnibus injuriis resistendi potentiam, de qua Poëta:

Explorabat aquis spurios Germania partus
Nunc Teuto Vini se probat inditio.

Quanta autem sit consuetudinis in Naturam Potentia præter quotidianam experientiam docet Plinius de Milone Cratoniate, qui vitulum in dies portare assuetus, tantum roboris suo corpori adjecit, ut bovem etiam ex vitulo factum ad stadium circumtulit: Unde vere verificatur noster Aphorismus, *qui consueti solitos labores ferre, & fuerint imbecilles & senes* fortioribus atque Juvenibus facilius ferunt: quod Ovidius de se ipso in exilio existens canit:

Quique fugax rerum, securaque in otia natus
Mollis, & impatiens ante laboris eram.

Nunc mea continuo cedens Natura labori,
Accepit vires, vixque ferenda tulit.

Sic multi assueti sunt ter vel quater, imo semel tantum de die, hoc est à mane usque ad vespertinum vorare & cibum sumere: carnibus infumatis & suillis, bubula, vervecina crambe condita (*Röhl- oder Kraut = Fleisch*). pane filigineo etiam nigerrimo qualem pinsunt Westphali vulgo *Pompernickel* vesci, & cerevisiam crassam haurire: & illi tamen, etsi sint debiles & senes, quam insueti, facilius ejusmodi victum ferunt: Imo vini potatores, si abstemii fiant de mala concoctione & ventriculi languore conqueruntur. Idem dici potest & observatur de omnibus aliis laboribus durioribus, quos assueti facile sufferunt, inassueti sufferre non possunt.

Ratio autem, quod continuati labores corpus efficiant robustius duplex est: *Primo*: Quia consuetudo motus facilitatem & tollerantiam promovet: Facilitas seu habitus ex frequentatis actibus oritur, muscoli enim ad hunc vel illum motum sæpius applicati multo facilius sese contrahunt, & extendunt, quod etiam in rotis & aliis rebus mobilibus contingit, in quibus omnes motus primi sunt difficiliore sub-sequentibus.

Tollerantia per robur acquiritur; roborantur autem partes per consuetos labores; cum consuetudo teste proverbio, *rebus quasi cal- lum inducat*: Cutis enim exinde evadit crassa, dura, callosa, minus sen- sibilis, robustior, omnibus injuriis, igni etiam & ferro resistens: juxta illud: *ab assuetis non fit passio*.

Secundo: Ratio est, quia per motum calor partis duplicatur hu- midum radicale fit magis vegetum, spiritus sunt agiliores, sanguis ela- boratus, & ab excrementis purus atque ad circulationem aptior; par- tes ipsæ, articuli, tendines, ligamenta, muscoli sicciores & spissiores evadunt: In calore autem & siccitate robur partis consistit; sicut in frigiditate & humiditate segnities & ad motum ineptitudo tum flui- dorum tum solidorum.

Accedat & hoc quod Natura ad partem labore exercitum con- tinuum mandet spirituum & sanguinis commercium, quod novum quoque vigorem parti addit, ambi dextrorum exemplo res clara est. Præterea consuetudine fibræ musculorum motrices aptantur certa se- rie ad ejusmodi munera peragenda imo ex his usu habitis magis robo- rantur & virtute cæteris omnibus præcellunt.

Natura & consuetudo igitur uno passu ambulant, in hoc tamen differt Natura à consuetudine, quod Natura unum finem terminate petat v. g. seminis virtus formationem fœtus, seu hominis, unde for- mato homine sentit, attrahit, coquit, expellit, nulla facta assuetudine, sed à Natura. Quia vero Natura fertur in finem cum quadam latitu- dine, ideo confunditur Natura cum consuetudine; appetit enim sto- machus naturaliter, sed quod hunc victum magis quam illum id ex assuetudine sequitur; moventur membra à Natura, sed quod adhuc motum magis quam illum, id à consuetudine est: Consuetudo enim determinat Naturam, quæ alias in unum finem certum collimabat, ut in alium terminaretur.

Tanta ergo est vis consuetudinis, ut quidam Philosophi fuerint, quiasseruerunt mundum universum consuetudinem esse & gubernari, non secus ac contingere videmus in gubernatione regnorum & ur- bium vulgo *Lands Gebrauch / oder ländlich sittlich*: Plura de con- suetudine dicemus sequenti Aphorismo 50.

Dices ex hoc sequeretur Aphorismo, quod senex debilis laborio- sus sit validior Juvene robusto, quia exercitati nunquam essent debilio-
res

res inexercitatis. *R.* Juvenem absolute esse fortio- rem sene debili habito tamen respectu ad certas consuetudines censetur debilior v. g. senex assuetus injurias temporum & itinera difficilia, usum medicamentorum (de quibus etiam intelligendus Aphorismus) & ciborum, facilius tolerat quam Juvenis insuetus.

Dices II. Senes in universum facilius jejunium ferunt, quam Juvenes (ut supra in Aphorismo dictum) etsi Jejunio non sunt assueti senes. *R.* Senes facilius jejunium ferunt, verum est, id autem non fit ob consuetudinem, sed ut supra diximus, ob temperamentum & cras- sin frigidam & siccam, quæ tantum non appetit quam Juvenum, ergo nihil est contra Aphorismum.

Quæres: Utrum per Imbecilles intelligendi sint à morbo tales, & per fortes à Natura tales. *R.* Ad utrumque negative: quia imbecillitas à morbo seu morbosa, ad gravia quævis sustinenda censetur incepta, quamvis etiam morbis assueti, morbos ipsos facilius tolerant, quam qui nunquam fuerunt ægroti. Unde per imbecilles intelligimus à Natura per fortes non à robore sed à consuetudine tales: Et hæc est ratio nostri Aphorismi.

Dices III. Robur facit, ut quoscunque labores feramus, ergo Juvenes omnes labores ferent, quod est contra Aphorismum. *R.* Verum est, quod robusti omnes labores tolerant, consueti tamen facilius ferunt quam insueti.

Dices IV. Per labores perduntur vires, ergo non acquiruntur. *R.* Deperduntur vires ad tempus concedo perduntur ita ut per consuetudinem non reddantur eo tempore fortiores & habiliores nego.

Quæres: Utrum qui à cibo abstinere assueti sunt, facilius ab- stineant, quam non assueti? *R.* Affirmative. Hoc probant antiqui mili- tes, qui multo graviora, quam Juvenes pati & sustinere possunt.

Aphorismus L.

Consuetudo longo tempore, etiamsi deteriora sint, insuetis minus molesta esse solent: quam ad insolita quo- que facienda mutatio.

Contentum seu Intentio.

De Euphoria seu tolerantia consuetorum.

Connexio: Tractavit in Antecedenti Aphorismo Hippocrates de consuetudine, facta comparatione ad labores: In presenti autem de eadem universaliter & generaliter agit, non tantum demonstrando consuetudinem esse alteram Naturam, sed etiam mutationem exprimit, quomodo nempe ad insueta quandoque mutationem facere oporteat, quod præceptum & exemplum aphoristicum medico medenti plurimum est observandum; quomodo nempe ab assuetis paulatim recedendum sit, & ad insueta meliora transeundum sit, pro consequenda, & obtinenda, & conservanda vitæ securitate.

Hic ergo Aphorismus duas habet partes: in prima loquitur de consuetudine: In secunda deducit consuetudinis mutationem, in omnibus rebus, quæ humano corpori possunt adhiberi, aut quocunque modo in vitæ usum evenire.

Primæ partis ratio est, quia consueta longo tempore, etiam si deteriora sint, Naturæ tamen sunt amica, adeoque minus molesta, usus enim continuatus amicitiam parit inter Naturam & assueta, unde hic vim & efficaciam consuetudinis includat.

Secundæ partis ratio deducitur ex prima; nam si minus molesta sunt assueta, ergo ad securitatem vitæ, facienda est ad contraria mutatio. Consuetudinem autem in conferenda sanitate posse plurimum extra dubium est, & abunde demonstravimus præcedenti Aphorismo unde Ovidius:

Fac tibi consuescat, nil consuetudine majus.

Sic Jure merito consuetudo dicitur Natura ascititia, quæ primævam corrigere & permutare valet.

Nam si quis tota die hypocausto vel lecto conclusus & inclusus fuerit, porrecto è fenestra capite facile Catharro corripietur, quia inassuetus aura, ejus injurias minus suffert. Sic alii cum stomachum suum ex Natura alias robustum, & durioribus digerendis non impari, non nisi ad tenerrima etiam debiliore calore superabilia, inertiore menstruo solubilia assuefaciant, tam delicatum & subtilem sibi efficiunt ventriculum, ut non nisi mollioribus digerendis aptus, cibos duriores

riores indigestos & crudos cum magno sanitatis & longævæ vitæ dispendio relinquat: Id ipsum quoque accidit iis, qui corpus suum continuo otio, somno, & deliciis marcidum, & effæminatum reddunt, hi ad quosvis graviores labores subeundos plane inepti, ad superandos varios internos & externos excessus inhabiles & in media & florente sanitate valetudinarii efficiuntur.

Sic è contra videmus, quod aër frigidissimus, & incolatus borealium & nivosarum regionum, non tantum commode & salubriter, ab illorum locorum incolis toleratur sed etiam valde proficit ad corporum firmitudinem: si deinde in calidiorem commutetur, & in regiones temperatas, graviter afficiet, & noxam adferet. Sic qui purgantibus medicamentis assvescunt, inde succedentes facillime sufferunt evacuationes, quo facto, ut Medici inter coindicantia purgationis consuetudinem retulerint. Sic pariter qui Toxica & venena sumere consueverat, nullo unquam tempore ab aliis visus est damnum perferre: Taceo plura, quæ passim in Autoribus legi possunt.

Ut vero consuetudo id præstet, longo tempore inducta sit, oportet, quo circa apposite notavit Hippocrates, *quæ ex longo tempore consueverunt*: Etenim quo vetustior illa est, eo radices altiores figit, atque firmam ac stabilem in assuetis promptitudinem & repugnantiam ad opposita operatur.

Consuetudo autem triplex est: alia bona, alia mala, alia pessima: Bona est, quando homo alias bene temperatus, temperatis assuefactus est: Mala est, quando intemperans aliquammodo est: Pessima est, quando homo est excessive intemperans. *Prima* licet ad sanitatem commendetur, non tamen ad vitæ securitatem utilis est, quare monet faciendam esse mutationem per intervalla ad contraria, sic v. g. qui vino est assuetus & illi conducit, confert aliquando aquam bibere. Mala consuetudo si fuerit recens, statim mutanda est, nam temporis progressu solet valde lædere; At vero si *mala* consuetudo fuerit vetus & antiqua, non est subito, sed paulatim tollenda, & sensim mutanda in contrarium, ne ab uno extremo ad alterum fiat transitus cum Naturæ dispendio; nam quod mollissimum est, non potest una statim vice fieri durissimum, & è contra. *Pessima* consuetudo, seu à Natura sua sit excessus, seu per accidens sic v. g. si quis aquam bibat, & illi sit assuetus usque ad senectutem, & talis laboret cruditatibus, & sit imbecillis,

mutanda est consuetudo & transeundum ad vinum, quia aqua senibus & imbecilibus pessima est, vinum autem lac senum, quia lætificat cor hominis præcipue senis.

Unde pessime illi faciunt, qui in Juventute sese vario cibo & potui non assuefaciunt, cum delicata & uniformis diæta tam sit periculosa teste Celso: qui dicit Lib. I. Cap. I. Hominem sanum, nullam vivendi rationem servare oportere, sed modo plus quam decet indulgere, modo abstinere, modo vigilare, modo dormire, modo foris, modo domi esse debere.

Corpus ergo nostrum ita & animus (nam teste proverbio animus duris assuefactus minus læditur) ad aspera etiam & violenta assuefaciendus est: Hos enim postea neque aëris injuria, neque ciborum quantitas aut qualitas facile offendit: Imo Arabes pro sanitate conservanda, ebrietatem semel in mense etiam ad vomitum usque continuatam proficiam esse voluerunt: Ex qua Arabum regula Poëta in ebriosum sic invehitur:

Quovis mense semel Medicus jubet, ebrius esto:

Quovis mense semel, sobrius esse soles.

Uno verbo, ut Natura nostra, indusium ferreum (ut proverbium Germanorum sonat) vulgo *ein Panzer* per consuetudinem induar: non semper temperato, sed quandoque calido & frigido, non semper moderato sed subinde pauco, & nimio, non semper molli, sed suo tempore aspero & duro assuefacienda est: Hinc Fabri ferrarii, ut ferro duritiem concilient, ignitum in aqua frigida semel iterumque extinguunt.

Hoc autem nequiquam in hoc sensu intelligendum volumus ac si ab uno extremo ad alterum Natura violenter deducenda foret: hoc enim esset Naturæ vim & violentiam inferre à lege Naturæ damnatam: Nec mens nostra est, quod solis aëris, ciborum, aliarumque sex rerum non naturalium excessibus sit assuefacienda; nam pessimus exinde contraheretur habitus, qui utique sine subjecti corruptione diu superesse non posset.

Notandum autem mutationem consuetudinis, vel fieri in sanis, vel in ægris: si fiat in sanis, paulatim facienda, unde docet Hippocrates 6. Epidem. *contraria paulatim esse adhibenda*: In ægris vero repente facienda mutatio, neque ideo lædit, quia corpus per morbum etiam
repente

repente mutatur, & quo major fuerit morbus, eo major sit mutatio, ideo in acutissimo morbo nihil exhibemus, & pro vino aquam pro cibo forbitionem præbemus, & quierem sine noxa imperamus. Præterea hæc mutatio securius instituitur in Juventute: Et sensim sine sensu fieri debet: Inveterata vix sine periculo mutari potest, maxime in senio juxta illud: *Antiquus Canis catena non assuefit.* In genere ergo à malis ad bona, & à bonis ad meliora tutior semper est mutatio.

Dices I. Multi Catharris tota vita sunt obnoxii & iis consequenter assueti, & tamen ab uno catharro moriuntur, ergo. R. hic Aphorismus non intelligitur de morbis, sed de victu, & sex rebus non naturalibus spectantibus ad valetudinem conservandam.

Dices II. Hic Aphorismus contradicit priori: in hoc dicit consveta immutanda: in priori dixit consveta etsi etiam deteriora, minus esse nociva adeoque in iis persistendum & non immutanda esse ad meliora. R. Non esse immutanda, etsi meliora repente (nisi consuetudo sit recens in illa licet repente) concedo paulatim nego. Repentinæ enim mutationes nocent, paulatinæ ob vitæ securitatem sunt proficuæ.

Dices III. Longo tempore consveta transeant in habitum nec amplius possunt nocere, sicut venenum Regi Mithridati ergo non sunt immutanda. R. Licet consveta transeant in habitum etiam ipsa venena, & nec amplius noceant pro nunc concedo in futurum nego, venenum ut venenum non potest nutrire, ergo tamen successu temporis nocere.

Dices IV. Ex dictis consveta longo tempore derepente possunt mutari in morbis, ergo magis in sanis, quia ad mutationem requiruntur vires, quæ in sanis sunt fortiores quam in ægris. R. Nego consequentiam; mutantur enim tempore morbi velut summe noxia actu, tempore sanitatis velut moderate noxia in futurum, ergo non est par ratio nec par necessitas.

Instabis: Omnes mutationes repentinæ ab uno extremo ad alterum sunt noxiæ, ergo etiam in morbis. R. Mutationes sunt noxiæ ratione virium transeat, ratione morbi & causæ ejus nego semper autem illud quod magis nocet & urget, agendum, sed magis urget & nocet morbus & ejus causa, quam vires, quæ in principiis morborum
semper

semper sunt fortiores, adeoque illarum tanta non est habenda ratio, quam morbi & ejus causæ.

Dices V. Victus mutatio est periculosa, sed ista svadetur, ergo. *R.* Svadetur paulatina pravi victus mutatio concedo. Repentina. Nego.

Aphorismus LI.

Plurimum & repente evacuare, vel replere, vel calefacere, vel refrigerare, aut alio quovis modo corpus movere, periculosum: omne siquidem nimium Naturæ inimicum: Paulatim autem quod fit, tutum, & præsertim, si quis ab uno ad aliud transierit.

Contentum seu Intentio.

De Mutationibus subitis.

Connexio: In præcedenti Aphorismo dixit Hippocrates oportere ad insveta mutationem fieri; in hoc Aphorismo docet, quomodo mutatio facienda; & cum Natura non possit ferre subitanæ mutationem (omne enim nimium Naturæ inimicum, quale est subita mutatio) ergo eam dicit ad securitatem vitæ, tarde & paulatim esse faciendam: si v.g. aliquis septem vel octo diebus bene jejunaverit, & de repente multis sese cibis repleverit: Vel si siti & calore confectus aliquis repentine gelido haustu sese ingurgitaverit, in maximum vitæ periculum, ob subitanæ mutationem Naturæ inimicam incidit: Vel si quis ex intensissimo frigore sese recipiat in locum calidissimum, utique periclitatur, quia calor ex frigore violente concentratus ad præsentiam alterius caloris sese violente exerit, & ita diffundit, ut penitus una cum spiritibus & sanguine dissipetur, & mox sequitur syncope aut plane extinctio. Sic videmus eos, qui in densissimis tenebris diu detenti

tenti fuerunt, derepente in locum lucidissimum adductos cæcutire, de quibus Poëta:

Heu miser! in medio perdo mea lumina sole,

Quique diem generat, surripit ille mihi.

Quia omne nimium, in quanto, quali, tempore, modo, & more Naturæ inimicum, sed mediocritas Naturæ amica & proficua.

Hic Aphorismus duas habet partes, in una de mutatione repentina loquitur, & eam damnat: in altera de mutatione paulatina, eamque commendat.

Natura ergo cum in mediocritate quadam & harmonia consistat, mutatio subitanea eam dissolvit, unde non hac, sed illa, nempe paulatina, id est, quæ fit transitu per medium non ab uno extremo ad alterum, delectatur. Sive enim fit mutatio à bono in malum, vel à malo in bonum, sive in sanis sive in ægris, parum vel multum calidis, aliisque quibus cunque naturalibus & non naturalibus semper debet esse paulatina & per medium, non violenta aut repentina & ab uno extremo aliud. Apprime proinde inquit Hipp. *Plurimum ac repente*, ut scilicet denotet vehementiam simul & violentiam alterationis: quædam enim alterant quidem plurimum, sive calefaciendo, sive refrigerando, at sine violentia & longo temporis tractu: quædam vero violenter ac citissime, at non cum tanto successu; si autem utrumque præstent, *plurimum* sane exagitabant, *subitam* simul ac ingentem mutationem inferendo. Et quamvis alterutrum si humano corpori accidat, grave sit, & potenter immutet, ac depravet illius œconomiam, ubi tamen utrumque conjungatur, periculum vitæ minabitur, divexata nimirum impense Natura, quæ mediocritate solum, ut diximus, gaudet, & immoderationem ferre nullatenus potest: Subdit insuper Hipp. *Evacuare vel replere, calefacere, vel refrigerare*: De evacuationibus & repletionibus immoderatis dixerat etiam 1. Aph. 3. illas ad extremum ductas esse periculosas; quia inanitionibus immodicis exsolvitur corpus, membra lassantur, & vires deficiunt: Repletionibus vero, cuncta gravantur, infarciuntur, suffocantur. Vehementer quoque *calefacere* periculosum, quia à calore nimio, carniū mollities & laxitas, imbecillitas nervorum, mentis torpor, sanguinis profluvium & animi defectio oboritur, quibus tandem mors succedit, ut dicitur 5. Aph. 16. *Frigidum* vero, convulsiones, tetanos, livorem, & rigores febriles parit, estq; inimicum ossibus, dentibus, nervis, cerebro, spinali medullæ. 5. Aph. 17. & 18.

Utque omnem violentam & repentinam mutationem completatur, addit; *sive quovis alio modo corpus movere*: omne enim nimium naturæ inimicum, sanitas quippe in mediocritate subsistit: quo etiam argumento ductus Hipp. docuit *somnum & vigiliam utroque excedentia malum*: Item: *nec satietatem nec famem*, neque aliud quidquam quod modum naturæ excesserit bonum.

Tam ergo ad sanitatem conservandam quam ad morbos abigendos, & tum in casu alimentorum, tum etiam in usu medicamentorum sententiam hanc prolatam esse demonstrant adjecta verba *evacuare vel replere*: Unde medicamenta cathartica validiora, sanguinis detractio-nes, victus plenioris frequens exhibitio, immoderata quies &c. sunt omnino devitanda.

Cum hoc Aphorismo concordat aurea illa *Avicenna* sententia, dicentis: *In morborum curationibus à levioribus progrediendum esse*: quia quod paulatim fit, tutum est. Hanc regulam ipsa Natura in omnibus suis operationibus exacte observat: quæ hyemæ & æstati ver-
num tempus, æstati & hyemæ autumnum interposuit, quin imo in ipso generationis & corruptionis opere, non nisi per paulatinos gradus, omnia ad suum esse, & perfectionem insensibiliter deducit: si vero in-
verso naturæ ordine ab uno extremo ad aliud simultaneus fiat transi-
tus, summa omnibus rebus infertur violentia: Paulatinis ergo gressi-
bus ad fortiora deveniendum, nec non nisi levioribus in casum tenta-
tis; sæpe enim levioribus remediis ducendo & cunctando plus profici-
tur, quam gravioribus pellendo & festinando. Teste Seneca:

Quisquis medium defugit iter,
Stabili nunquam tramite curret.

Olim oraculi loco in Delpho ante fores templi Apollinis tabulæ in scripta fuit majusculis verbis hæc sententia: *Ne quid nimis*: Ratio est, quia cum Natura in omnibus actionibus sui conservationem inten-
dat, necessario odit extremum & amat medium, id est temperatum, nam teste Aristotele 2. Ethicorum Cap. 6. *Virtus in medio consistit*: Per temperatum enim omnes actiones viventium meliorantur: per in-
temperatum quocunque modo excedat, destruuntur: Est enim vio-
lentum repentina vis, ex qua natura fortis violenter concutitur, debi-
lis omnino prosternitur. Nonne multi ex violenta majorum tormen-
torum

torum bellicorum explosione auditum? alii ex pestifera exhalantium factorum aporrhæa olfactum perdiderunt? quis nescit vitrum quantocyus crepare, si à summo calore repentino frigori exponatur: Baculus vel arbor simul & semel flexa rumpitur, teste Ovidio:

Flectitur obsequio curvatus ab arbore ramus
Frangas, si vires experiere tuas.

Interim non absolute negamus, cum extrema necessitas urget, etiam extremam mutationem esse arripiendam, quia ut diximus Sect. 1. Aph. 6. *Extremis morbis extrema remedia optima*: Sed hæc est cura coacta, non regularis; de coacta autem in nostro Aphorismo Hippocrates non loquitur: Nam dum etiam in extremis morbis extrema adhibentur remedia, non negat Hippocrates, ea etiam cum periculo adhiberi, sed inter duo mala minus eligendum, ut majus evitetur.

Dices: Nonne faciendum malum, ut bonum eveniat. *R.* Moraliter concedo. Medice nego, sic urimus, secamus, ut sanemus.

Instabis: Galen. ait corporis sanitas in mediocritate consistit, ergo per extrema contraria acquiri non potest. *R.* Per extrema contraria velut ultimos fines acquiri non potest concedo per extrema contraria velut media tendentia ad fines, vel quibus fines sanitatis acquiruntur nego.

Instabis: In extremis morbis extrema tentari debent, ergo etiam ultimi fines. *R.* Tentari debent coacte & cum periculo concedo regulariter & sine periculo nego.

Dices secundo: Hippocrates dicit: *quod paulatim fit tutum est*: ergo etiam paulatim erit agendum in morbis acutis, nec elective purgandum, nec sanguis in copia mittendus, quod est contra experientiam. *R.* Dicendo pariter est paulatim agendum, regulariter concedo urgente necessitate nego. Mensurare enim oportet dispositiones corporum, si enim summe ægri, insigniter oportet agere, si minus ægri, mediocriter, si sani parce.

Aphorismus LII.

Omnia secundum rationem facienti, si non (seu minus) succedant secundum rationem, non est transseundum (id est protinus) ad aliud, manente eo, quod ab initio visum fuit.

Contentum seu Intentio.

De Mutatione methodi medendi.

Connexio: Facilis & manifestus est nexus hujus Aphorismi cum priore: In priore egit variis mutationibus circa res naturales, non naturales & præternaturales, in hoc Aphorismo tradit utilissimum præceptum, nempe rationale remedium, non debere mutari, etiamsi non succedat; vel quando in morbis mutanda sunt remedia & quando non sunt mutanda.

Hic Aphorismus proinde duas habet partes: In prima ponit hoc præceptum: In secunda autem illius cautionem adducit.

Ubi ergo primo notandum: Methodum medendi esse viam Regiam omnis curationis morborum: eam autem obtentam, & semel initam, temere nunquam derelinquendam.

Notandum secundo: Indicationes esse medium terminum demonstrationis in quovis morbo decenter curando: tunc enim dicuntur secundum rationem fieri remedia, quando per suas indicationes rite & recte examinatas fuerint opportune adhibita: Cognita nempe à Medico prudenti causa morbi congruentibus ex diætâ & pharmaciâ desumptis utitur auxiliis, & licet ea non statim juvent, causam hujus adferat, vel quod morbus in augmento, vel statu sit, vel crassities & tenacitas causæ obftet, vel coctio & secretio non fiat &c. Unde potius inceptæ curæ insistas, nec ad aliud transeat, quamdiu eadem ratio, & indicatio subsistit: ubi vero causa & morbus & symptomata mutata fuerint, & eadem indicatio non persistat, ad alia tuto transitus faciendus est.

Non tamen hinc velim, ut quis pertinaciter insistens præconceptæ suæ opinioni, idem prorsus medicamentum commendare ac præscribe-

scribere non desinat, dum illud visum est, non solum non profuisse, sed etiam obfuisse ægrotanti: non enim desunt, ut mox dicetur, qui errorem semel conceptum, adhuc in perniciem hominum tueri non verecundantur, & cum inconstantes, aut falsi videri nolunt, grave dedecus & propriæ famæ jacturam sibi pariunt: Imo quod gravius est, nec morbum multoties, nec causam morbi cognitam habentes, sibi multa fingunt & congerunt, ac in medium afferunt. His profecto effatum Hippocratis nullatenus suffragatur, nihilque rationabile suppetit, quod à principio rectum & probatum sit: tales enim nec de eventu aut successu judicare possunt, cum secundum rationem non sint operati, cum penetralia Naturæ illos lateant, cujusmodi sunt medicæ Notiones à juvantibus & lædentibus rationabiliter desumpta. Quare non transeundum ad aliud, ex Hippocrate monemur, cum exhibitum medicamentum, licet omnino non juverit, minime nihilominus nocuerit, quippe aliquando juvare subito non solet, *vel ex repugnantia causa morifica*, quæ successu temporis superabitur, *vel ex languore Naturæ*, quæ sensim oppressa & morbum excutiet.

Verum enim vero, quæ per morborum tempora variant, diversum plane exigunt temperamentorum usum, ut propterea ad alia atque alia pro ratione transeundum sit, sicut enim cum re mutare consilium prudentis est, ita expediet omnino in his pro re nata permutare medicamenta. sic v. g. in inflammationibus internis, quæ ab initio probantur proficere coctioni & suppurationi, omnino mutanda deinceps erant in detergentia, expurgantia, consolidantia, postquam maturaverint.

Notandum tertio: Punctum seu momentum feliciter curandi situm esse in initio: juxta illud

Dimidium facti qui bene cepit habet.

Notandum quarto: Immutari quidem quandoque posse remedia seu medicamenta, eorumque formulas, sed mutare methodum non facile licere, quia incerta redditur curatio.

Curatio autem morborum (ut patet ex methodo) duplex est, una scientifica, altera conjecturalis: *scientifica* est illa, quæ fit per indicationes & semper secundum rationem, & derivatur ex perfectâ morbi, ejusque causæ cognitione, provenitque ex notitia temperamenti & crasis, loci seu partis affectæ, virium, anni temporis, regionis, aëris, consuetudinis,

sexus, ætatis secundo, quæ omnia scientificè inventa, scientificam indicant morbi curationem, & de hac loquitur noster Aphorismus.

Conjecturalis curatio est iterum duplex: Nam una prope est accedens ad scientificam: altera procul recedens: quia vero non semper possumus habere scientificam morborum curationem utpote quæ sæpe in obscuro & profundo corporis ita latet, ut sagacissimis etiam Medicis laborem imponat, & necesse sit quandoque confugere ad conjecturalem.

Scientificam autem eruimus, eo quod manifesta sit morbi causa seu manifestum adsit indicans, illudque persistat & signa à principio perseverent: Unde si curationem per auxilia & medicamenta inceperimus, etiamsi nullum inde evidens persentiamus commodum, nullamque meliorationem, eo quod morbi adsit pertinacia, cruditas & insuperabilitas, quæ medicamentorum activitatibus & viribus licet generosis cedere recusât, vel quod medicamenta exhibita brevi tempore suam operationem non perficiant ex defectu naturæ actuantis, ad medicamenta contraria seu diversi generis (nam ejusdem generis medicamenta, quandoque dosim, vel gradum augere & formulam immutare licet) refugere non licet.

Nam si rationale remedium permutetur in contrarium fit irrationale, & summe noxium: Et hoc ipsum observandum est in curatione conjecturali prope accedente ad curationem scientificam: In curatione autem conjecturali recedente & valde remota à scientifica, ut quando aliquid divinum est in morbis, ob propria delicta à DEO vindicæ immixtis, vel quando morbi sunt confusi & ipsam Promethei figuras induunt; in conjecturali hac cognitione licet transire ad remedia contraria secundum illud: ubi remedia ordinaria non profunt, transeundum est aliud: teste Hippocrate *Lib. de locis in homine*: inquit: *si quis morbum non cognoscit*, medicamentum præbeat non forte, si itaque levatur æger, demonstratur, quod curandus sit, si non levatur, faciendum est contrarium: unde ubi morbus non cognoscitur, licet mutare remedia omnibus modis.

Deinde morbi acuti plerumque sunt evidentes & cito curantur vel occidunt: E contra morbi Chronici longi sunt & occulti sæpe, unde lente tractari desiderant: sic v. g. si qui curam quartanæ medicamentis violentioribus, purgantibus, diaphoreticis, febrifugis calidioribus

bus & fumosis maturare laborant, non tantum contra rationem faciunt, & sine suo sæpe frustrantur, sed eandem in continuam manifestum ægri periculo transmutant: Unde in his & similibus properandum & festinandum non est: *Sat enim cito si sat bene*: Nam sicut indulgentis & præcipitis est Medici aliquid obiter facere, ita inconstantis est subito auxilium & consilium mutare, ut innuit *Fabius* dicens: Medicos & Imperatores sæpe magis proficere quiescendo, quam multum agendo: Unde non tantum manus & pedes ad cognitionem morbi animent rationales Medici, sed & oculos & præcipue mentem, ab omni affectatione, ita & crapula liberam & serenam habeant. Maxime enim interest, quia nihil boni præstare potest, qui morbum ignorat: Morbus autem cognitus (inquit Hippocrates) morbus est curatus; siue morbi cognitio est media curatio: Patientia & discretione opus est, *gutta enim cavat lapidem non vi sed sæpe cadendo*: & juxta illud, *applicata juvant, continuata sanant*: Patientia enim colligit rosas, & sola patientia desperati alias morbi curati sunt.

Hic igitur Aphorismus scriptus est iis Medicis, qui nescio ex qua animi inconstantia, per modum mulierum & vetularum, ut mox diximus, praxim medicam exercentes, ut aliquid sapere videantur, & ne si moriatur æger, infamentur, ob auxiliorum inopiam, vel ne frustra mercedem suscipere videantur, singulis diebus, imo in qualibet visitatione, ad minimarum circumstantiarum variationem, novam sibi fabricant medendi methodum; vel si quid ab adstantibus exhibendum propositum fuerit, ambabus quantocyus manibus, ad auram vulgi captandam amplectuntur, & medicamentorum copia Naturam à salubri opere & officio abstrahunt & disturbant: Cum tamen teste Hippocrate: *Secundo Acutorum quiescendum sit dum morbi vigent*: seu, vigentibus morbis quiescere multo præstat. Hos Medicos seu potius Medicastros vivis coloribus depingit Poëta:

Quod cupis id cupio, quod spernis, sperno: tuumque

Velle meum velle est, nolleque nolle meum:

Propter te varios, ut Protheus in duo vultus.

Dices I. Empyrici pleraque remedia in omnibus morbis tentant, continuo mutant, & tamen curant, ergo hic Aphorismus non est observandus, R. Hoc Empyrici audacter faciunt, & etiam sæpe audacter occidunt, quia ignorant & non considerant morbi naturam, tempera-

men-

mentum &c. Et licet curent, hoc sorti, fortunæ, casui, & Naturæ robori non iis adscribendum.

Dices II. Sunt multi qui totum negotium Naturæ committunt, & voti sui fiunt compotes, ergo. *℞.* Hoc facere meticulosos medicastros, non vero rationales medicos, qui tales procrastinationes odunt: Natura enim multitudine materiæ morbificæ oppressa ope medica secundanda est, ne obruatur.

Dices III. Medicina duobus cruribus innititur *ratione & experientia*, ergo defectuose dixit Hippocrates omnia secundum rationem facienti, sed debuisset addere etiam secundum experientiam. *℞.* Etiam medicamenta quæ per experientiam inveniuntur, maxime à rationabilibus Medicis rationi subjici, adeoque implicite saltem experientiam inclusisse.

Dices IV. Natura, temperamentum, tempus & alia multa mutantur quotidie in morbis, ergo quotidie erit transeundum ad aliud. *℞.* si mutatio fiat per contrarium statum concedo si minus. Nego. Mens autem Hippocratis est de iis morbis, qui permanent sub eodem genere non de iis qui transeunt in aliud genus.

Dices V. Medicamenta per longum usum ita nobis familiaria redduntur, quæ tandem amittunt omnem virtutem & actionem, ergo nullatenus continuanda sunt. *℞.* Medicos rationales ordinarie & regulariter incipere à mitioribus & progredi ad fortiora, adeoque non possunt fieri omnino familiaria.

Instabis: A mitioribus ad fortiora transire est ad alia transire, ergo vel errat Medicus primo dando mitiora, vel eo ipso transit ad alia. *℞.* est transire ad alia diversi generis nego. Ejusdem generis concedo. Ergo erravit Medicus nego consequentiam, quia non transit ad contraria.

Aphorismus LIII.

Quicumque alvos humidus habent, siquidem Juvenes fuerint, melius degunt iis, qui siccas habent: At in senectute deterius degunt, nam senescentibus ut plurimum siccantur.

Nota: Hic Aphorismus est prorsus idem cum illo quem hac Sectione supra Aphorismo vigesimo explicuimus: qui sic sonat.

Quibus

Quibus per juventutem alvi sunt humida, iis senescentibus exsiccantur: quibus vero in juventute alvi sunt sicca iis senescentibus humectantur.

Contentum seu Intentio.

De Diversitate alvi excretorum ratione ætatis.

Connexio: Hic Aphorismus ut diximus abunde explicatus est supra in Aphorismo vigesimo hujus Sectionis, quo Lectorem remittimus: nihilominus tamen paucula quædam doctrinæ gratia subnectemus.

Connectitur ergo hic Aphorismus cum Antecedente: in illo egit de actione Medici seu mutatione facienda per Medicum, in hoc agit de actione Naturæ seu mutatione, quæ fit per ætatem.

Hic Aphorismus duas habet partes, quia etiam duas conclusiones; in prima parte ponitur conclusio, nempe, *juvenes, quibus est humida alvus, melius degunt iis, quibus est sicca*: In secunda parte ponitur altera conclusio, nimirum, *juvenes facili dejectionis in senectute pejus habent*.

Differt tamen ergo hic Aphorismus à vigesimo supra allato, quia ibi solum de commutatione alvi per ætatem agit, in hoc vero docet melius esse alvos humidæ habere absolute quam siccas: *Secundo*: Melius esse, senes esse humidæ alvi quam juvenes. *Tertio*: Rursus ibi absolute dixit transmutari alvum à sicca ad humidam, & è contra in juventute & senectute: In hoc magna ex parte fieri dicit & simul meliorem vel deteriolem ex his constitutionem addidit; Nam in hoc Aphorismo non tantum agit de Naturæ actione, sed etiam de ejus qualitate: dicit enim meliorem esse Naturæ actionem in juventute, quæ alvum apertam & laxam servat, quam quæ strictam habet: sed & dicit juvenibus laxis difficiliorem contingere senectutem, eo quod secundum *Aphorismum 20.* hujus Sect. iis alvus exsicceetur.

Strictam autem alvum nunquam esse salutarem, patet ex hoc, quod obstructi plurima in corpore retineant excrementa, unde obstructions, putredines, febres, & vapores plurimi ad caput feruntur, unde defluxiones catharrales & arthriticæ: Flatuum copia retenta & inde colica, Tympanitis; & ex retenta per obstructions bile, sitis, oris siccitas &c. Alvi è contra facilitatem tanti fecit Hippocrates, ut scripserit *Lib. de aëre, locis & aquis. Homines facilis egestionis fere acutis morbis non laborare*. Generaliter alvus lubrica semper melior est adstricta.

Cur autem senes obstructi pejus habeant quam Juvenes, ratio est, quia in Juvenibus adhuc magna fit perspiratio excrementorum per poros, motu & exercitiis apertos: *Secundo*: Calor Juvenum moderatus plurimos humores concoquit, superfluitates dissolvit, & per varia corporis emunctoria rejicit, quod non fit in senibus: *Tertio*: plus etiam in Juvenibus, pro temporis nutritione consumitur quam in senibus, in quibus perspiratio est exigua, ob habitus corporis exiccationem, pororum constipationem, egerendi impotentiam, hinc senes tot abundant excrementis: unde illud *senectus ipsa est morbus*.

Dices I. Celsus ait, melior est in Juvenibus fusior seu laxior in senes strictior alvus, ergo falsa sunt quæ diximus. *R.* Celsus hic putat meliorem esse alvum strictiorem in senes, quam excessive lubricam, quod & nos concedimus.

Dices II. Juvenes sunt Naturæ calidæ & siccæ, sed tales sunt strictioris alvi, quia obstructio alvi provenit à calore, ergo non sunt laxioris alvi. *R.* Distinguo majorem, sunt calidæ & siccæ Naturæ denominative à toto seu à partibus principalioribus, concedo, denominative à parte v.g. intestinis nego. *R.* *Secundo*: Non omnes qui sunt calidæ & siccæ Naturæ esse constipatos, imo plurimos biliosos observamus esse alvi laxioris, ob bilem ad intestina delatam eaque stimulantem.

Instabis: Quale est totum, tale etiam est pars, sed ex concessis totum est calidum & siccum, ergo etiam pars. *R.* Si totum sumatur pro omnibus partibus totius corporis concedo, si pro una vel altera parte nego.

Dices III. Dictum est in superioribus senes quoad contenta esse humidos, ergo non habebunt alvum siccam. *R.* Senes sunt humidi quoad contenta, qui in Juventute fuerunt alvi strictioris concedo, qui fuerunt alvi laxioris sunt humidi quoad intestina nego.

Instabis: Omnes senes abundant pituita, ergo etiam ii, qui fuerunt alvi laxioris in Juventute. *R.* Omnes senes abundant pituita quoad intestina nego quoad alias partes transeat.

Pro coronide Nota: cum hætenus dicta tam varie accidant hominibus ex causis jam fuse allatis, nos paucis dicendo omnia credimus, quod ex hoc certa regula deduci nequeat, cum multi sic, alii alio modo se melius habeant.

Aphorismus LIV.

In procero corpore Juventutem exigere, liberale est, nec indecorum: eidem vero insenescere incommodum & deterius brevitate. (alii aliter habent.)

Longa corporis statura in juventute quidem degenda, liberalis nec indecora est; in senectute vero inutilis & brevitate deterior.

Contentum seu Intentio.

De Statura procera commodis & incommodis.

Connexio: In præcedenti Aphorismo comparavit Hippocrates humidam alvum Juventutis cum sicca senectutis & è contra: In hoc Aphorismo proceram staturam Juventutis comparat cum procera statura senectutis; & è contra parvitatem Juvenis, cum parvitate senis: Dicitque longitudinem corporis, in Juvene quidem esse decoram, spectabilem, & authoritativam, sed in senectute esse inutilem & deteriore parvitate.

Unde hic Aphorismus duas habet partes: In prima ut mox diximus, comparat Juventutem ad magnitudinem: in secunda senectutem ad magnitudinem.

Damnatur ergo corporis magnitudo in senectute, & damnatur parvitas in Juventute: *Medium ergo tenere Beati*, mediocritas itaque magis laudanda in corpore, quam magnitudo & parvitas, ad comoda vitæ & sanitatis.

Hoc quidem vulgariter verum est corporis quadraturam & carnositatem semper magis quam gracilitatem, ita & magnitudinem magis, quam parvitatem in hominum delectu & æstimatione esse.

Magnitudo consideratur vel secundum unam dimensionem v. g. in *longam* vel secundum omnes id est, longam, latam, & profundam: de utraque acceptione verus est Aphorismus, licet Galenus, & ex eo Fuchsius & Celsus magis de longitudine intelligat, sed non bene, quia

longitudo sine latitudine non videtur formosa & liberalis, quia tales despiciuntur, unde Cardanus invehitur in Galenum de sola longitudine sententiam hanc interpretasse.

Quando comparatio fit magni ad parvum, debet fieri cæteris paribus: si ergo fiat secundum longitudinem, dicimus corpora breviora esse magis laudanda, quia prudentiora, agilia, robustiora: *Virtus enim unita fortior.* Vitæ sunt diuturnæ, nec gravantur mole corporis, aut torquentur in senectute, & calor sufficit corpori parvo regendo & movendo. Magna vero & procera corpora inepta sunt ad labores & inagilia & in senectute inutilia, irregibilia à paucitate caloris, sanguinis & spirituum, hinc fiunt gibbosi, impotentes, claudi, multis infirmitatibus obnoxii, vires effœtæ, flammula vitæ à mole nimia & obesitate suffocatur, languent, & pigrescunt, ingenii sunt stupidi & puerilis, unde illud: *Senes bis pueri.*

Causa proceritatis est calidi & humidici copia: hinc Hippocrates *Lib. de aëre, locis, & aquis* dicebat Asiaticos esse præ Europæis magnitudine præstantiores: Causa parvitatit calido & sicco magis accommodata, & ideo prudentiores, & sagaciores.

Nota: Hippocratem hic pro Juventute etiam pueritiam & adolescentiam intelligere, ut supra monuimus.

Quares: Cur viri mulieribus plerumque sint proceriores cum tamen hæ plus humiditatis obtineant, quæ facit ad extensionem. R. id fieri ob majorem virorum calorem, & licet mulieres sint humidiores, calor tamen debilis materiæ humidæ extendendæ, plerumque non sufficit: Sufficiat autem nobis

hujus Libri & Sectionis
Aphoristicæ

FINIS.



LIBER TERTIUS
SEU
SECTIO TERTIA
DE
VARIETATE MORBORUM
SECUNDUM ANNI TEMPORA
ET ÆTATES.

Aphorismus I.

*Mutationes temporum potissimum pariunt morbos:
& in quibusdam temporibus magnæ mutationes
aut frigoris aut caloris, & alia pro ratione eo-
dem modo.*

Contentum seu Intentio.

De Mutationibus temporum morbos.

Priusquam ad Aphorismi explanationem me conferam necesse
est, aliqua præmittere ad ejus meliorem captum: Sciendum
proinde *primo*: Intentionem Hippocratis in hoc Libro esse
breviter explanare, quam vim & virtutem tempus & ætas ad procre-
andos morbos habeant, non tantum unius hominis, sed integrarum

etiam Provinciarum generandos & solvendo, dignoscendos & prænoscendos, præservandos & curandos. Hanc Doctrinam Hipp. 1. prognost. in præmio teste Galen. prorsus divinam, simul & difficillimam vocavit.

Sciendum secundo: Hanc Doctrinam magnum afferre emolumentum, ex eo, quod in hac compendiosissime tradantur, quæ firma ratione, & longa experientia in libris Epidemiorum, in libro de aëre & aquis aliisque voluminibus, longe lateque tradidit & congeffit.

Sciendum tertio: Hanc Doctrinam demonstrare Medicis morbos qui ex aëre pendent, non solum ad manifestas, sed & occultas qualitates, ad ventos & astrorum mutationes referri.

Sciendum quarto: Pro mutatione caloris & frigoris sicci & humidi in Macrocosmo, alterationem etiam suo modo fieri earundem qualitatum in Microcosmo seu corpore humano.

C*onnexio*: Quamvis hic Aphorismus, cum primus sit in ordine, & antecedentem non habeat, connecti non posse videatur; cum tamen Hippocrates in præcedentibus damnasset magnas & repentinas mutationes generaliter, inter eas autem etiam sit mutatio temporis, ideo ab universali ad particulare descendit, & in hoc Aphorismo, magnas temporum & aëris mutationes, velut morborum genitrices affert, ut ostendat aërem maximopere, corpora nostra immutare: Inter cæteras enim causas externas, morbos inferre valentes, præcipuus plane est aër, qui, cum nos perpetuo ambiat, & per habitum, poros nempe & canaliculos attrahatur, atque assidua inspiratione, viscera vitalia subeat, & cum sanguine in pulmonibus misceatur, ita quidem, ut ubi purus & salubris est, vitam & valetudinem tuetur, si vero alieno vitio afficiatur, aut halituum labefactetur, potenter admodum sanitatem immutat & eandem inquinat: proinde ejus necessitas indispensabilis est, & spirituum indoles & sanguinis Natura & ciborum transmutatio, imo & terræ fertilitas & sterilitas, de hoc plurimum participat, sed nulli mortalium mirum videri queat, ab eodem magnas & repentinas morborum mutationes fieri. Hinc Ovidius in Exilio:

Nec coelum, nec aquæ faciunt, nec terra nec auræ;

Heu mihi! perpetuus corpora languor habet.

Per has mutationes enim Naturæ violentia infertur, teste Hippocrate 2. Aph. 52. *omne nimium Natura inimicum, quod autem paulatim fit tutum*: Etenim ex hoc repentino impetu, temperamentum robustum concutitur, debile omnino prosternitur: accinente Ovidio:

Cum modo frigoribus premimur, modo solvimur æstu:

Aëre non certo, corpora languor habet.

Hic Aphorismus in duas partes dividitur: In prima parte ponitur conclusio magis universalis: In secunda vero magis particularis, in qua etiam explicatur, quarum rerum mutatio aërem alteret.

Aër autem, ut testantur Autorum volumina, & autopsiæ quotidianæ convincunt, innumeris propemodum mutationibus obnoxius est, & variis, atque differentibus, vaporibus, halitibus, fuliginibus, nebulis, rore, pruina, nivibus, ventis &c. depravatur, unde & nos diversimode afficit, propterea factum puto, cur Hippocrates illius rationem maximam præ ceteris habuerit, atque Libro de Nat. homin. decreverit, à spiritu seu aëre & à cibis & potibus omnia morborum genera proficisci, idem testatur Libro de flatibus. Hoc autem Libro speciatim memorans mutationes aëri contingentes à temporum varietate, primum inquit, illas potissimum morbos parere, ut propterea ceteris aliis causis externis morbos inferre valentibus, temporum mutationes præferat.

Verum quænam sint ejusmodi mutationes? non levis est inter Autores disceptatio, proinde:

Notandum quod mutatio temporum, à Philosophis & Medicis dupliciter consideretur: *Vna* ratione ejus quod mutatur: *altera*: ratione illius quod mutat. Prima rursus duplex est: Vel *naturalis* ubi tempora sibi invicem succedentia qualitates suas servant: vel *fortuita praternaturalis* cum peregrinas habent qualitates, seu id in una anni parte vel in pluribus vel etiam in toto anno fiat. *Naturalis* iterum temporum mutatio alia est mediocris ut in Regione temperata: alia *Magna* quæ in Regione intemperata succedit, qualis est Regio ad Aquilonem vergens. *Alter*a mutatio temporum ratione ejus quod mutat: ea multis modis contingere potest in aëre vel secundum primas qualitates vel secundas vel tertias quas Neoterici proprietates,

Philo-

Philosophi substantificas nominant vel etiam secundum tranquillitates & ventos, vel serenitates & nebulas, vel secundum influxum stellarum & astrorum vel totius substantiæ corruptionem.

Notandum II. Mutationes aëris alias iterum esse regulares alias irregulares, *regulares* sunt, quas sol constanti velut naturæ regula, singulis annis, in æquinoctiorum & solstitiorum viciniis causat; has mutationes Hippocrates Lib. de aëre aqua & locis periculosissimas dicit: præprimis solstitia maxime autem æstivum, ita & æquinoctia præsertim autumnale, quippe tunc valde mutabilis fieri solet aëris flatus, & repentini plerumque contingunt casus & alterationes. *Irregulares* mutationes sunt, quando æstas v. g. multum à suo flatu naturali deflectit, & tum si multum deflectat, magnos & multos, si parvum, parvos & paucos generat morbos & hos quidem in corporibus irritabilibus, qualia sunt potissimum, quæ morborum causam habent quietam in corpore latitantem. His prænotatis:

Quæritur quanam ex his mutationibus temporum in hoc Aphorismo intelligatur? Nonnulli eas solum existimant, quæ in quatuor anni temporibus contingunt, præsertim cum vices illæ commutant & novos etiam morbos generant. Sed hanc opinionem refutat Galenus in commentario hujus Aphorismi, propter adjectionem verbi *potissimum*, nam hæ mutationes paulatim fiunt, & morbos antiquos potius corrigunt, quam novos producant; itaque intelligendæ sunt non *paulatina* sed *magna & repentina* temporum alterationes nunc in calidum, nunc in frigidum, nunc in humidum nunc in siccum, & præcipue à contrario in contrarium, semper enim anomalia seu inæqualitas ista noxia est. Imo non sola ista mutatio quæ fit de calido in frigidum morbos gignit, sed etiam illa quæ fit à parum calido, in calidissimum: Exemplo esse possunt, Pleiadum, Hyadum & Arcturi atque caniculæ exordia, sub quibus teste Hippocrate citato loco, gravissimi caloris excessus, & ad eorum occasum ejusdem caloris in frigus recessus, ac per consequens morbi, præcipue in subjectis debilioribus, & ad morbos recipiendos dispositis fiunt. *Alii* mutationem eam intelligunt, ubi prædicta Anni tempora debitam temperiem non servant, ut cum æstas autumnæ, & ver æstatis morem referre videtur. Plerique autem juxta verba Aphorismi caloris & frigoris in æqualibus vicissitudinibus adscribunt.

Verum

Verum ut meam super hac re feram sententiam existimo, omnem & quamcunque mutationem subitam, ac humanis corporibus incongruentem in hoc nostro aphorismo intelligendam esse, cum indefinite illas Hippocrates memoraverit, & ab omnibus pari modo nostra corpora præternaturam affici possint. Et quidem cum ab hyeme in ver mutatur temporis constitutio, quemadmodum aër incalcescit, dies noctes superant & sol diutius nostrum Horizontem illustrat, sic pariter humana corpora ad alia disponuntur, valde differentia ab his, quibus ex præcedenti hyeme fuerant affecta; & multo magis cum ex temperato vere fit transitus in æstatem, per quam ex maximo aëris æstu ob solis accessum ad nostrum verticem vehementius corpora alterantur, & in acutas admodum ægritudines incidunt, quæ & longe graviores accidunt sub autumno, aliter aliterque affectis corporibus, ex immutato in aliam habitudinem aëre, ut & adventante hyeme, in aliam omnino differentem, uti subsequenter aphorismis, singulatim recenserebimus.

Notandum tamen bene est, quod istiusmodi supra dicta quaternaria anni divisio, quæ nobis Europæis zonam temperatam incolentibus congruit, minime cæteris omnibus terræ habitatoribus pariformiter respondet: cum sub Zona torrida aliquibus scilicet sub æquatore sitis æstas duplex accadat, sole perlustrante signa arietis & libræ, quæ nobis sunt æquinoctialia: aliis vero videlicet Accolis cum sol utrinque posita signa migrat, quæ cæteroquin fixa dicuntur, prout in alterutram, ab æquinoctiali partem declinant: In aliis vero signis à vertice remotioribus hyemes, aut potius caloris remissiones, veri & autumno quodammodo respondentes fiunt. Sed & Atæcis diversa quoque accidunt; nam quibus in signis sol nobis æstatem facit, illis parit Hyemem & è contra: & ubi nobis incipit ver, illis inchoat autumnus: Silentio prætereo, quas diversas etiam fortiuntur tempestatum mutationes, qui antipodes nobis sunt, & qui frigidas Zonas inhabitant, ab Astronomis & Geographis abundantissime collectas. Unde ridiculus plane fuit ille, qui inter Theses quasdam publico propugnatas, primam fecit, qua indefinite atque universim se defensurum asseverabat,

quatuor solum esse omnibus anni tempora: huic apprime conveniebat illud Plinianum ex Apelle: Non futor ultra crepitam. Ad clariorem huius rei doctrinam, non omittenda est quæ veteribus fuit in usu anni temporum distributio: Illis enim etsi communem zonam, eademque climata nobiscum colerent, annum aliter partiri visum est, & quidem in septem tempora, ut memorat Gal. hoc eodem libro comment. 14. & fufius 1. Epid. Comment. 1. *Primum* autem ab æquinoctio verno, sive ab ingressu solis in signum arietis ad ortum Vergiliarum seu Pleiadum, ver constituebant; ab istarum ortu ad solstitium æstivum *tempus secundum* & quodammodo æstatis initium: *Tertium* æstivum à solstitio ad ortum caniculæ extendebatur: *Quartum* ab ortu caniculæ ad ortum arcturi, opora dictum, *Quintum* autumnale, ab ortu arcturi ad Pleiadum occasum vocabant *σπωρατον*: *Sextum* ab occasu Pleiadum ad solstitium hybernum: *Septimum* demum à solstitio hyberno ad vernale æquinoctium quod *την φυτωλιαν* appellabant, seu tempus insitionis, cum nempe à flante Favonio purpureæ violæ exoriuntur.

Cum his quoque observabiles sunt dies caniculares ab ortu utriusque canis ad finem usque Augusti de quibus Hippocrates 4. Aph. 5. sub cane & ante canem purgationes id est medicationes difficiles: *Item* dies Halciony qui circa festum divi Martini tranquilli & aprici esse solent: *Item* ortus & occasus Hyadum elabente Majo atque imminente Decembre: *Item* lunæ elationes & depressiones circa tellurem in suis Apogæis & Perigæis; aliaque huius generis plura, ab agricolis potissimum & nautis passim observata, cum ex his putent aërem plurimum immutari, exoriri ventos, grandines, procellas, unde corpora etiam vehementer affici contingit.

Præterea cum anni tempus naturalem & consuetam (ut supra innuimus) non servat constitutionem, varias & diversas ægritudines progignit: V. G. cum per æstatem pluviae ingruunt: & per hyemem Austri perflant impetuosius: Ver alget, æstuat autumnus; Ita namque graves & morbosas constitutiones accidisse refert Hippocrates in libris epidem. & huius libri variis Aphorismis.

Licet autem Hippocrates solum caloris & frigoris in nostro Aphorismo mentionem fecerit non tamen credendum solum caloris & frigoris vehementes & subitas alterationes sed etiam humidita-

tis & siccitatis mutationes morbificæ esse consueverunt, ut propterea quacunque de causa aër permutetur, aut afficiatur, humana corpora perturbari contingat; unde si crassus, nebulosus, turbulentus, nimbosus, ventis agitatus; mox omnino tranquillus, apricus, fervidus, densatus, aut laxatus fiat, non leviter nocebit: Natura enim nostra sicut congruentibus & assuetis gaudet, ita repentinas & incongruentes mutationes atque vicissitudines ægre ferre solet: quamobrem subdit Hippocrates: *& in quibusdam temporibus, magna mutationes aut frigoris aut caloris, & alia proratione, eodem modo:* quibus quoque comprehendendi videntur, quæ incolatu, exercitiis, vestimentis, aliisque similibus subitæ mutationes fiunt, ut quotidie experimur, ab his etenim mutatis repente, diversimode quoque aër nos afficit, turbata præsertim perspiratione, quanta autem sit vis aëris in corporibus quibuscunque permutandis & alterandis, vel ex eo quisque conjiciet, quod omnia quæ ab eo defenduntur, diutissime perdurent; Sic v. g. vinum ad annos integros servatur, ferens æstatem & vigorem inconcussum, quando oleo ab ambiente aëre præmunitur: Fructus recentes, cera oblitæ ad remotissimas regiones deferuntur, & nedum incorrupti, sed perinde ac ab arboribus mox decerpti, pari modo multa servantur in melle, vino, ejusque spiritu, aliisque liquoribus: sed & in milio arena, cineribus, aliisque quibus illa ab aëris contactu præcaveantur: Et in machina pneumatica Boyle, exhausto aëre, diutissime carnes fraga, mora, cerasa, pruna, atque alii fructus & varii flores adeo illibata conservantur, ut nec marcescant, nec a corem contrahant: Vinum quoque cerevisia ac sanguis ipse ab animalibus eductus, etsi longo tempore in eadem sint reposita, non aliter inde postea extrahuntur ac fuerunt inclusa: aëris quippe vi, atque efficacia, quam elateris nomine insignitam recentiores Philosophi voluerunt, suscitantur in corporibus fermentationes & commotiones internæ, ut & acerba quæque maturitati subjiciantur, atque in jam maturis mobiles, tenuioresque partes adigantur & exsolvantur, quin imo pro variorum corporum halituum & vaporum cum ipso intermixtione, variæ & multigenæ excitentur mutationes: Unde experimur ædificia ad oras maritimas exposita per elaterem, cum vaporibus acido-muriaticis æquoris commixtum sensim corrodi atque manifeste consumi, quamobrem optimo jure credi potest, vorax tempus cuncta consumere dentibus

ab aëre mutuatis, præsertim cum diversimode is affertur per tempestatum vicissitudines, multifariam quoque halituum & vaporum commixtione acuitur & erodentior evadit: unde illud Nemefiani:

Omnia tempus alit, tempus rapit, usus in arcto est.

Ab uno siquidem aëre consumimur simul & alimur, unde principium alimenti aër Hippocrati dicitur, & errantium hætenus accidentium causa: usus quoque ejus in arcto est, nam sicuti juvat in plerisque, ita in multis aliis nocere solet: unde causa indifferens statuitur à Medicis, cum pro vario illius usu & obesse & prodesse possit.

Verum præter temporum anni varietates, notabiles quoque in aëre sunt mutationes, indeque corporum alterationes, atque ægritudines à *Ventis*: Hi namque non solum aërem vel repurgant, vel inquinant, adeoque serenitatem vel nebulas afferunt, æstum vel algorem, sed etiam variis & multigenis vaporibus & halitibus inficiunt, nitrosis, sulphureis, alumnosis, vitriolicis, Mercurialibus & aliis quibus respiratio in animantibus, non minimum offenditur, & permeans sanguis per pulmones inficitur, unde sæpe numero catharri, tussis, hæmoptoes, pleuritides peripneumoniæ & periculosissimæ exoriuntur. Sunt autem ex his ventis aliqui statis temporibus perflantes, ut etiam aves ad certas regiones perducant; Sunt & alii qui indifferenter flant: Verumtamen & regiones pleræque certis quibusdam ventis subjiciuntur alia Provinciæ peculiare ventos sunt sortitæ, statis temporibus prosperos vel adversos. Notum abunde est pestes ex una regione in alteram fuisse delatas ventorum afflatu, quas solus ignis correxit & delevit accensis etiam ipsis sylvis, ut testatur Hippocrates. Plura dicemus de ventis aphorismo quinto hujus sectionis, Verum non omnes homines in ejusmodi temporum mutationibus & aëris alterationibus æqualiter afficiuntur vel ægrotant, sed ii solum qui aut habitudine aut humoribus sunt dispositi: propterea sequentibus aphorismis quibus tempestatibus ac particularibus temporum mutationibus corporum habitudines specialiter subjiciuntur sigillatim enucleabimus. Aërem salubrem in intima corporis penetrantem fortius operari quam cibum & potum patet 1. in Medicarum rerum & præcipue prognosticorum vero scrutinio, ut patulum est cunctis in arte versatis Medicis: Patet 2. ex eo quod si transitus aëris ex morbifica

fica constitutione in salubrem fiat morbi qui prius facti sunt mitescunt, ex data mox ratione.

Aër autem vario modo se habet & varie quoque agit sic i. aër tenuis & rarus, influentiis cælestibus imprægnatus, vitam in corporibus conservat, & animale spiritum excitat, eoque semper melius, quominus alienæ insolitæ & excedentis mixtionis, ex sublimibus & infimis seu ex cælo, terra & aquis &c. participat; secus vel agitatus per ventos, vel alteratus per calores frigora &c. magnos facit in humoribus & spiritibus motus quibus facile sanitas è corpore eliditur. Unde si simpliciter aëris catastemata consideremus, ille magis salubris est, qui moderate frigidus, siccus & serenus est, aër autem quovis modo excedens nocet. Aëris flatus frigidus & humidus, nisi sit congener tempori, calori nativo plurimum contrariatur: frigiditas quidem temperat, sed cum humiditate non purificat, hinc actionum læsiones. Prioribus longe deterior est aër calidus & humidus velut vaporosus, turbulentus & febrilis. Hinc si aëris alteratio contingat ad caliditatem atque siccitatem, febres ardentes seu causones sunt insidiis: aër qui ferret aut alget, cum humiditate vel siccitate, corpora quibus contrarius est disponit ad intemperiem seu discrasiam, quam sequuntur aliæ primis cognatæ qualitates & passionēs, à quibus humores ad infligendos morbos apparantur; Exemplo sunt austrini venti, diurnæ pluvie & exsuperans humiditas, decubitus sub radiante luna, aut in cubiculo humido, vel cujus parietes, cemento recenter sunt incrustati, diurna versatio in locis palustribus; hinc mirum non est si insueta aliqua repente exorta & terrifica tempestas, atque irregularis constitutio ingentes in corporibus nostris jam ante dispositis excitent meteorismos, & consonum est, vel ipsis senibus; si talia fiant in Macrocosmo, si aqua in diluviis & ex intimis terræ visceribus in superficiem eliciatur, profecto idem, humiditates corporis nostri fermentare, alterare & fovere poterit, quæ omnia nobis sub concisa hac Aphorismi brevitate Hippocrates innuere videtur.

Dices 1. Arist. in Problematis. dicit graviores esse mutationes aquæ quam aëris, atqui hoc est contra nostram doctrinam &c. Gravior est aquæ quam aëris mutatio, in minori terræ spatio concedo: in majori vero non.

Dices 2. Mutatione temporis curantur morbi, ergo non generantur.

rantur. *R.* Mutatione temporis naturali temperata & paulatina curantur morbi concedo: præternaturali immoderata & repentina nego.

Instabis etiam naturalis temporis mutatio parit morbos ergo *R.* Naturalis temporis mutatio parit morbos per se nego, per accidens concedo; quatenus nempe corpora disposita tangit, alias autem corpora temperata & ad morbos indisposita conservat.

Urgebis non fit actio, nisi in passum dispositum: Ergo etiam præternaturalis mutatio temporum per se nihil poterit. *R.* Magnas etiam & vehementes mutationes corpora indisposita aggredi, ad morbos disponere, & tandem morbis afficere, magis tamen disposita.

Dices 3. Singulis annis fiunt vehementes ejusmodi mutationes; Ergo singulis annis etiam corpora indisposita ægrotabunt, quod est contra experientiam. *R.* Alia corpora magis, alia minus ejusmodi mutationibus obijci, non esse opus, ut quæ minus obijciuntur ægrotent.

Dices 4. Mutationes à calido moderato ad calidum immoderatum sunt etiam noxiæ, ergo Galeni commentaria in quibus solum meminit contrariorum, non subsistunt. *R.* Licet calor moderatus, cum intensissimo non sint contraria per se, sunt tamen contraria per accidens, & ratione effectuum; nam sicut calor moderatus & temperatus conservat, ita intemperatus destruit: majus enim lumen obscurat vel extinguit minus, major dolor seipit minorem. Sic dupliciter generantur morbi, nempe per qualitates speciem mutantem, & per ea quæ modum non servant.

Dices 5. In hoc Aphorismo tautologice id est de eadem re bis & repetitum loquitur. *R.* Alias esse mutationes temporum, alias caloris in frigus, vel frigoris in calorem ergo non tautologice loquitur.

Instabis: Non videtur posse dari unum absque altero, nempe mutationem caloris in frigus absque mutatione temporum ergo nulla solutio prioris argumenti *R.* Nego antecedens, quia potest esse mutatio temporum, absque hoc quod magna caloris in frigus vel è contra fiat mutatio: Deinde mutatio caloris in frigus non est formaliter temporum mutatio, sed tantum quid consecutivum.

Aphorismus II.

Naturarum quaedam ad hyemem, quaedam ad æstatem melius pejusve sese habent.

Contentum seu Intentio.

De Temperamentis ad anni tempora collatis.

Connexio: Cum in præcedenti Aphorismo Hippocrates dixisset: quod temporum mutationes morbos producant in hoc præsentē Aphorismo exponit, quæ potissimum sint illæ mutationes, & in cuius naturæ corporibus temporum mutationes eosdem morbos producant.

Innumeris enim exemplis & quotidiana docemur experientia non omnes homines, quovis anni tempore, æque bene vitam degere, atque inculcata valetudine frui, sed quosdam in una, alios in alia salubrius vivere. Hic Aphorismus utpote brevis, unam, tantum eamque brevem habet conclusionem, & ideo divisionem non admittit. Quid per *naturam* intelligatur, variæ tam veterum quam recentiorum sunt sententiæ. Veteres cum Galeno dicunt 1. quod per naturam intelligi posset *temperies* simplex vel composita, totalis vel partialis, temperata vel intemperata; siquidem veteres omnia humanis corporibus contingentia, calore, frigore, humiditate ac siccitate, velut primis qualitatibus sunt metiti. 2. Dicunt naturæ nomine intelligi potest, *calidum innatum* prout accipitur, ubi dicitur *ventres hyeme & vere natura calidissimi*.

3. Natura ab ipsis sumitur pro toto corporis habitu, nempe pro corporis compositione ex omnibus prædictis: Et de his omnibus intelligitur aphorismus iisque subternitur natura, quæ potiori ex parte melius sese habet, ad dissimilem aëris statum quam ad similem: nam à simili plerumq; exasperatur, à dissimili vero corrigitur & emendatur, nunquam enim æstivus aut hybernus aër, nostræ naturæ tam similis est, ut eam non excedat, ipsique noceat, nam ad conservationem nostri corporis, non solum requiritur qualitas similis sed etiam quantitas gradus æqualis,

æqualis, simile enim quod modum mutat æque parum nobis confert quam dissimile, etsi quoad qualitatem suam nobis sit familiare: Sic v. g. æstivus calor, bilioso temperamento similis quidem est & magis quidem quam hyemale frigus, attamen æstivus calor, non conservat, temperamentum biliosum in subjecti bonum sed potius in ruinam, hybernium autem frigus, biliosum temperamentum corrigit ac præservat, quæ præservatio hic non secus ac curatio potius fit à contrariis quam à similibus. Sic bilioso temperamento seu calidioribus naturis bene est in hyeme pituitoso seu frigidioribus in æstate; ita etiam iis quibus serum est exuperans, vel intemperatum, falsum, acre &c. Vere & autumnno pejus habent: Dicta autem hæc de intemperatis solum intelligenda esse volunt nam temperata verno tempore temperato, bene habent male vero ad hyemem & æstatem. Verbo, temperamenta alterationes accipiunt secundum temperiem temporum, in pejus declinantia ad statum morbosum; in melius conformi magis contrarietate: sic intemperata natura, quæ non nihil excedit, bene sese habet ad similia, quia servatur, si vero multum excedit male ad similia, bene ad contraria sese habet: Scorbuitici vero cum heteroditis & heterogeneis abundant humoribus, alii ad calidum alii ad frigidum cœli statum exacerbationem vel meliorationem persentiunt. Si per naturam intelligat Hippocrates calidum innatum, illud quoque vel bene vel male sese ad hyemem vel ad æstatem habet, prout est in subjecto, nam si est in corporibus obessis, bene sese habet in hyeme, quia fortius est, male in æstate, quia deficit, eo quod dissipetur: calidum innatum in gracilibus & ex sanguibus male sese in hyeme habet, quia frigus penetrans illud vincit, bene autem vivit in æstate, nam sub hac augetur.

Si natura ab Hippocrate sumatur pro habitu corporis & toto composito, ii homines, qui sunt densi habitus bene sese habent in hyeme, etsi sint frigidiores quia frigus non penetrat, obstante scilicet subacuta illa naturali, nempe pinguedine aut carnositate. Hinc non bene sequitur, læditur à frigido, ergo est rari habitus, quem frigus facile penetrat; similiter homo calidi, ob raritatem habitus facile læditur & è contra.

Phtisici & Tabidi male sese habent ad autumnum universaliter loquendo, sanguinei in vere, biliosi in æstate, melancholici in autumno,

tumno, pituitosi in hyeme: nam iis temporibus, fiunt fermentationes sui generis, hinc vel pejus habent, vel saltem mutationes quasdam experiuntur, quibus bene instituta victus ratione ex sex rebus non naturalibus occurrendum est.

Hac est sententia veterum Medicorum, de quiditate naturæ seu quid ly natura sit, & juxta quam hætenus Aphorismi intentum explicarunt: Nunc autem audiendi sunt Neoterici, quid illi per naturam intelligant.

Neoterici æque ratione, Authoritate, & experientia ducti, tenent, non omnes homines quovis anni tempore, eodem prorsus modo se habere, & valere, sed quosdam in uno melius, quosdam in alio deterius vivere: prout nimirum ipsorum habitudo & propensio id est vulgo natura, huic vel illi tempori magis subjiçetur.

Per naturam igitur Neotorici aliud non intelligunt, quam certam quandam materiæ proportionem, pro cuius variis gradibus & modis, magnitudinis, situs, figuræ, connexionis &c. exoritur certus & peculiaris quidam effectus, in aliquo corpore naturali: Unde dicunt sic verum esse, naturam esse principium sive causam certi alicujus motus aut quietis, in quo est primo & per se; Sive certum & peculiarem materiæ in singulis corporibus dispositionem seu texturam esse causam, juxta quam necessario actiones sive effectus, illi texturæ possibiles ita fiant & non aliter, nisi quid præternaturam accidat. Alii brevius dicunt, quod ly natura aliud non sit, quam corporum constitutio & habitudo, desumpta à textura, dispositione seu modificatione, partium similarium, organicas componentium, una cum sanguinis, illas irrigantis, conformatione. Unde dicunt 2. (suppositis jam dictis de nomine naturæ) quibus inest sanguis floridus, vegetus, vividus, qui quæqua versum partis subeat, & ad obeundas operationes agitet, hos calidam temperiem seu crasim seu constitutionem nactos asserunt, quibus vero parte auctifica potius refertus est, obesiores fieri, sed minus calida præditos temperatura affirmant.

Ac proinde hisce pariter prælibatis pro explicatione hujus nostri aphorismi dicunt: Conferre ambientem aërem sive calidior sive frigidior evadat, ad ejusmodi corporum constitutiones vigorandas vel permutandas, inspiratione simul ac perspiratione; quamobrem tempore æstivo, quia tenuior sanguis evadit, ex inspirato aëre, & ex cute rariori promptius perspirant, crassiora ejusdem repurgamenta, propterea hebetes & humidæ corporum constitutiones, salubrius tum degunt, deterius vero hyeme, impedita ejuscemodi perspiratione, & sanguine à frigidiore aëre aliquantulum constipato: Ita pariter reliquæ corporum habitudines, melius æstate, pejus hyeme degent, quatenus ab utroque hoc vel alterutro aëris beneficio, emolumentum aut detrimentum ex adverso sortientur.

Neque vero perpetuo verum est, frigidas, quas veteres vocant, aut calidas temperaturas, æstate bene hyeme male, ac vicissim se habere, nisi ex memoratis causis, inspirationis & transpirationis, sanguis bene vel male afficiatur: siquidem fieri potest ut frigido præditi temperamento, sicut & calido, obesi simul ac graciles neque male se habeant, in hyeme ac in æstate, si nimirum effœtus in illis sanguis, in his valde tenuis, facile disperdatur & evanescat, ab ingenti aëris æstu, & opprimatur atque hebetetur à Brumæ algore: Unde experientia constat, ex utraque anni tempestate aspera, fere quotannis ægrotare, & solum vitam ducere, salubriorem tempore verno, aut etiam æstivo, modo calor remissior foret, aut aërem incolerent temperatiorem, Zephyrisque perflatum, quoniam in his imbecilla sanguinis constitutio, & laxa textura membrorum, utrumque excessum ferre non poterat; Sic levis lucernæ flammula, cito extinguitur, cum si argenti, densatoque aëri exponatur, tum si distracto & ventilato, imo etiam radiis solaribus vehementer verberato aut aliter intensius calefacto. Jure ergo optimo Hippocrates, naturas hominum indiscriminatim comparavit, nulla caloris aut frigoris, alteriusve qualitatis mentione.

Quæstio famosa inter Medicos movetur an magis conducat totum annum temperatum esse, sicut in vere, an vero melius sit temporum varias esse mutationes & contrarias? Respondemus breviter, in universum necessariam esse contrariorum vicissitudinem sed quo minor & frequentior est, eo etiam est præstantior, uti v. g. sub æquinoctia-

noctiali, nam ibi tot mutationibus terra est fertilissima: Et Hippocrates Lib. de aëre & aquis scripsit, ob temporum æqualitatem omnia esse grandiora & pulchriora. Et licet validæ temporum mutationes, simpliciter non sint meliores, ad robur tamen, fortitudinem & audaciam magis desiderantur: Unde idem Hippocrates testatur, fortissimas gentes, uti sunt Helucti populi Alpini &c. hyemes & æstates habere validissimas, regiones asperas & montanas inhabitare, ventis validis expositas.

Dices 1. Ventres hyeme & vere calidissimi sunt juxta aphorismum, ergo tum temporis minime patientur corpora: Prob. consequ. quia quo major est calor innatus, eo minor etiam erit morbus, ergo etiam mutationes illæ temporum minus nocebunt, & omnia corpora ad hyemem melius habebunt, quia universaliter ventres sunt hyeme & vere calidissimi.

R. 1. Etsi ventres sint calidissimi, non tamen sequitur quod mutationes temporum non noceant:

R. 2. Quod quædam naturæ ad hyemem melius, aliæ pejus habeant, nam ut supradictum nimium frigus, corporibus sanguine & calore destitutis, summe nocere, siquidem satis resistere non possunt.

Dices 2. Si aliqui homines ad hyemem sese bene haberent, tales essent biliosi, atqui si non bene se habent ad hyemem ergo Prob. Min. ab hyeme, utpote macilenti & rari habitus facile offenduntur Ergo R. Alios esse biliosos macilentos, alios carnosos & quadratos, illi ab hyeme læduntur concedo, hi nego.

Instabis Hyems, auget bilem ergo semper & omnes læduntur Prob. Ant. Hyems concentrat calorem ergo auget bilem, ergo omnes biliosos lædit. R. Bilem augeri à calore extraneo & ascititio concedo, à naturali nego; imo ab hoc concoquitur & expellitur: Urgebis conservatio fit à similibus, sicut curatio à contrariis, ergo omnes biliosi in æstate melius habebunt quam in hyeme. R. Conservatio intemperatorum fit à similibus nego, temperatorum concedo de prioribus autem est nostra sententia.

Instabis denuo leo est calidissimæ naturæ, & tamen bene se habet ad similia, quia optime vivit in regionibus calidissimis, in frigidis vero pessime, atqui leo est intemperatus, ergo in temperata

similibus & non contrariis conservantur. R. Leonem esse intemperatum respectu aliorum animalium concedo. Respectu sui ipsius nego, quia illi proprium est habere naturam calidissimam. R. 2. Leonem se bene habere à calidis quo ad conservationem, non vero quo ad correctionem.

Dices 3. Si corpora quadrata bene habent ad hyemem, ergo male habebunt ad æstatem, eo quod dictum, calor innatus dissipetur in iis: sed hoc videtur esse falsum, quia dictum est macilenta corpora, æque ab æstate ac hyeme lædi, siquidem ab extrinsecis facilius, quam ab intrinsecis læduntur, è contra obesa ab intrinsecis facilius quam extrinsecis offenduntur, ergo tuentur carnosa à calore æstivo & in iis calor natus non dissipabitur ut dictum est. R. Alia esse corpora carnosa, alia obesa & pingua, obesa sunt constipati habitus & à pinguedine instar subuculæ custodiuntur, sed carnosa sapius sunt rari quam densi habitus, hinc calor solaris in æstate magis penetrat, & calorem innatum dissipat.

Dices 4. Quædam corpora se melius habent ad ver, quædam ad autumnum, ergo hic aphorismus est defectuosus quia ista duo tempora sunt omissa. R. Ver ad æstatem spectare, secundum partem posteriorem, secundum priorem ad hyemem: Sicut autumnus, secundum priorem partem ad æstatem, secundum posteriorem ad hyemem spectat, ergo hoc modo omnia quatuor tempora anni complexus est Aphorismus.

Quæres utrum per naturam hic intelligatur genuina vel ascititia R. utraque sive ratione æstatis sive aëris, sive victus sive cujusvis alterius consuetudinis fuerit contracta. Hoc siquidem à similibus suæ temperie aut craseos causis læditur, servatur autem à modico contrariorum usu, quæ vero nullum excessum habet à simili bene habet, male à contrario.

Aphorismus III.

Morbi quoque alii ad alia tempora, bene vel male se habent, & quædam ætates, ad tempora, & loca, & aliud victus genus.

Con-

Contentum seu Intentio.

De morbis & ætatibus, ad anni tempora collatis.

Connexio: Adeo pendet hujus aphorismi sensus & sententia, à priori seu mox præcedente, ut fere unum cum illa efficiat aphorismum, cumque in antecedenti comparasset naturas & corporum constitutiones, ad tempora: modo ea ipsa tempora, loca, victus, morbos & ætates & sic non solum res naturales v.g. ætatem, non naturales v.g. victum (ut in priori fecit) sed etiam morbos, tamquam res præter naturales comparat, ad tempora, regiones & victus, unde Medicus colligat tum ad conservandam sanitatem tum ad pellendos morbos, magnam vim habere tempus, ætatem, & regionem, quemadmodum enim temporum ad naturam aliquod est maleficiū ita etiam beneficium, nam sicuti morbi quibusdam temporibus similibus generantur, ita contrariis curantur, quæ generatio & solutio maxime attenditur in hoc aphorismo. In duas partes dividitur hic aphorismus: In *prima* comparat morbos ad anni tempora: In *secunda* ætates ad loca & victus genera.

Sensus ergo hujus aphorismi est, morbos in quibusdam mitiores evadere & securiores; in aliis vero graviores & periculosiores, prout ægri ipsi hac vel illa natura seu habitudine præditi, in unam vel alteram morborum constitutionem proclives fuerint.

Notandum 1. Quod morbus quatuor modis possit comparari ad anni tempora, regiones, & victus: 1. Quoad generationem: 2. Quoad periculum: 3. Quoad brevitatem: 4. Quoad solutionem. *Primo modo*, morbus male se habet semper ad simile; morbi autem nomine ægrum intelligimus. *Secundo modo*, melius se habet ad simile juxta illud; minus periculose ægrotant, à morbo proportionali tempore homines: *Tertio modo* melius se habent omnes morbi ad ætatem, quia eo tempore omnis morbus brevior est, ut quartanæ exemplo demonstravit Hippocrates 2. Aph. 25. *Quarto modo* considerati morbo correpti, omnes bene sese habent ad contraria; male vero ad similia, ideo morbos hyemales sanari ad æstatem, autumnales vero ad ver docuit Hippocrates.

Notandum 2. Quod si morbi comparentur ad regiones, eadem ratione se invicem respiciunt: habet autem regio unaquæque suos peculiare morbos, ratione situs ad solem, ac ventos, seu ratione aquarum & victus, qui endemii græce dicuntur, tam vel illam Provinciam communiter infestantes.

Dices aër patrius similis est & tamen magis curat morbos quam contrarios &c. Id fieri per accidens, scilicet ratione consuetudinis & naturæ quæ similia indicant, unde majus fit Juvamentum quam à contrarietate aëris. Si iterum morbus comparetur ad victum, non diversa ratione id efficietur, etsi aliquando similia sanent, ut v. g. piper & cape febrem, id enim à multa contrarietate fit seu sympathia quam plerumque licet ignorare videamur, attamen in sententia neotericorum & veterum facile eruitur, tum talia causæ crudæ, crassæ, acidæ prospiciendo febrem tollunt.

Notandum 3. Quod ætates cum sint secundum naturam, ideo fit ut bene se habeant ad similia, quæ temperatæ sunt, ad contraria vero quæ intemperatæ, quare pueri & adolescentes vere & prima æstate, bene se habent & valent: æstate autem & ad autumnii partem senes: reliquo tempore & hyeme, mediæ ætatis homines: celsus Lib. 2. Cap. 1. ætas autem *Puerilis* licet humida sit, similia possit, & tempore & regione & victu, quia ea humiditas nativa est, & necessaria ad augmentum; vel etiam quia talem temperiem seu crasim temperatam veteres calidam & humidam, neoterici crasim optime constitutam appellant. Ætas autem *senilis* licet frigida & sicca, quia vitæ repugnat talis temperies & crasis, bene se habet ad victum calidum & humidum, licet si primæ intentioni attendamus, cum ætas sit res naturalis similia exposceret, nihilominus tamen Hippocrates, per contrarium victum regit ætates, qui respicit tutiorem victum; nam à natura & ætate, quamvis intemperatis sumi debet indicatio ad similia, cum de ratione naturæ sit, conservatio, non vero reductio aut curatio.

Notandum 4. Quod aër dupliciter nos immutare solet vel ut *alimentum*, vel ut refrigerans seu *alterans*: *Primo modo* similis esse debet nostræ naturæ; *Secundo modo* vero contrarius: & hoc est illud quod scripsit Hippoc. *Libro de alimento: omnia membra simile trahere alimentum, pulmonem vero contrarium.* His ergo notatis: Patulum jam

jam est, quod sicut æstas calida & sicca, congeneres producit morbos, ita frigidos & humidos solvit, & è contra in hyeme. Eodem modo ætas juvenilis, calida & sicca, generat morbos calidos & siccos, curat frigidos & humidos, velut Epilepsiam, Paralysem &c. Sic juvenis excessive biliosa pejus in æstate, melius valet in hyeme: Sic senes gaudent regionibus calidis, juvenes frigidis, senes gaudent calida victus ratione, juvenes frigida. Sic morbi quicunque generati frigidis temporibus vel ætate decrepita, vel in regione frigida, vel à victu humido, & vita otiosa seu sedentaria &c. calidis temporibus, regionibus calidis, victu calido &c. curantur & è contra.

Sic graciles & macilenti, ex destillationibus, tulsi dysenteria; obesi & pingues vero ex asthma, hydrope sopore gravius afficiuntur; Sic in ætate Puerili minus periculosa sunt variolæ quam in ætate consistenti vel senili. Sic facilius pariter desinunt quartanæ, obstructions & articulorum dolores in æstate, quam hyeme. Hydropes & cachexiæ in montanis ac maritimis locis levius affligunt, & melius curantur, in campestribus vero Phthises & atrophici. Sic attenuans victus, gravior in juventute, & in morbis à tenuibus humoribus exortis, uti & plenior ac consistentior in succi plenis. Horum autem latissime meminit in Lib. *Epidemiorum Lib. 1. & 3.* ubi Epidemios morbos referens, populariter grassantes, non omnes tamen ægros, æqualiter affectos narrat, sed pro varia cujusque habitudine, natura, ætate, tempore, regione, diæta alios gravius, alios levius ægrotasse, neque singulos, cum uno eodemque genere symptomatum.

Restat notabilis quæstio, num Hippocrates in hoc aphorismo potius an verius ad causas respexerit, & unde bene vel male ægritudines se habere dixerit ad alia atque alia comparatas. R. 1. Et quidem in textu videtur solum ægritudines memorasse, tanquam effectus nostris sensibus magis obvios. R. 2. Revera magis causas respexisse dicendum videtur, nam morbi bene vel male se habent, ad alia aut alia, quatenus causæ illos efficientes, aut conservantes abscinduntur vel emendantur, aut è contra augentur & exasperantur: non enim alia de causâ tertianæ febres æstate breviantur & ingravescent, nisi quia humor illas fovens, promptius dissipatur aut è contra acuitur: Sic pariter dolores articulares, citius desinere solent æstate, serius hyeme, quia per æstum, vitiosi succi attenuantur & solvuntur, per hybern-

num

num vero frigus detinentur & incrassescunt. Perperam proinde agunt, qui in præscribendo victu ægrotantibus, summo studio adnuntuntur adversus morbos pugnare, cum in calidis quos vocant morbis refrigerantia cibaria præcipiunt, etiam si humores prædicent crudos & phlegmaticam & tenacem pituitam; quamobrem omnes febricitantes, pari modo cibant oleribus, jusculis consumptis, cum feminibus, syrupis & electuariis refrigerantibus, ut propterea morbos insanabiles reddant, & diutissime protrahant. Adjecit præterea Hippocrates quasdam ætates, ad quædam tempora, loca, & victus genera, etiam vel bene vel male se habere, quorum omnium rationes jam supra dedimus, de iis qui mala utuntur victus ratione, hic dicendum non est, cum patulum sit tales raro aut nunquam se bene habere posse, hi enim plerumque vel in phtisim vel hydropem incidunt: Sic Helluones & Bibulos corripit phtisis & hydrops teste Poëta.

Ut valeant reges, diadematique Monarchæ:

Sæpius & plusquam sit satis, aule bibis

Unde tibi sitiens num venit & aridus hydrops,

Hoc bibere est aliis, aule, sitire sibi,

De gulosis & voracibus, tamquam plenis catharris & obstructionibus, canit idem Poëta:

Non sola nobis mors insidiatur in olla

In pateris etiam, lancibus, inque cibus.

In omnibus ergo hætenus dictis pro bono hominum conservando & malo avertendo, prudens Medicus pro varia corporum constitutione & habitudine, diversimode in illorum morbis se gerat, & prout noverit in hanc vel aliam, tum morbos, eorumque causas tum ægros & eorum naturas atque ætates propendere constitutionem, ita hoc vel illo utetur victu & medicamento, cavendo ea, quæ omnino dissidentanea ejusmodi temporibus & constitutionibus videntur & videbuntur.

Verumtamen sæpe contigit, experientia duce, populares quosdam morbos feliciter depulisse in dicto statim à principio vomitu: alios potionibus frigidis alexipharmacis. Sic præstat sæpe morbum protinus validissimis remediis adoriri interdum vero ejus impetum effuge-

effugere ac declinare, *Celsi* consilio Lib. 2. Cap. 5. Quæritaque sciverit morbos per suos impetus ac tempora, in variis corporum temperaturis & habitudinibus, atque ætatibus, secundum vicissitudines moderari, is plane in facienda Medicina magnus erit.

Objicies 1. Ægroti melius habent & non tam periculose laborant à morbo proportionato suæ ætati, temperamento, regioni &c. Ergo juxta aphorismum ad contraria melius non habebunt. R. Melius habent, ad similia, ratione periculi & generationis concedo; ratione solutionis nego, morbus enim variis modis comparatur ad anni tempora ut supra diximus vel ratione generationis, vel periculi vel brevitatis vel solutionis.

Dices 2. Aër patrius similis est, qui tamen potius curat morbos quam Extraneus R. Aërem patrium curare morbos per accidens, nempe ratione naturæ & consuetudinis, quæ sibi indicant similia.

Dices 3. In multis locis præfertim Regionibus Septentrionalibus febres curantur pipere, zingibere & aromatibus in spiritu vini sumptis, ergo similibus R. Distinguo consequens, curantur similibus quoad febrem ipsam, transeat, quoad causam febris nego consequentiam, causa enim sæpe est humor crassus, viscidus, acidus, crudus, cui talia calida tamquam contraria opponuntur, sicque tali causa correctæ & sublata, etiam effectus seu febris tollitur.

Dices 4. Ætas est res naturalis ut supra dictum ergo requirit similia ergo non debet corrigi per contraria. R. Tutius corrigi ætates, præcipue si excedant per victum moderate contrarium; nempe, cum intenditur paulatina reductio prodest.

Dices 5. Tempore & signis morbi origini oppositis fiunt crises bonæ vel malæ ergo ad contraria tempora morbi non bene habent ægri seu morbi ut dictum est R. Aphorismum loqui de temporibus anni non vero morbi, illa tempora autem ab his de quibus agere, mens Hippocratis minime fuit, plurimum differunt.

Dices 6. Si ad frigida corpora, requirantur calida, ergo ad frigidum corpus, requiritur aër calidus, ergo cor non refrigerabitur; Ergo pulmo (ut mox supra ex Hippocrate Lib. de aliment. diximus) non attrahit alimentum frigidum, sicut omnia alia membra calidum R. Et si aër calidus attrahatur, tamen cor refrigeratur utpote calidissimum, quod ab aëre minus calido sufficiens recipit refrigerium.

Quæres 1. Cum pueri sint humidi, cur vinum potentia siccum ipsis non possit? R. Humiditatem in pueris non esse molestam modo non excedat, sed potius naturalem & convenientem, quia facit ad corporis extensionem & incrementum &c. ergo non eget correctione: cum autem pueri obtineant substantiam, cito diffilabilem, & resolubilem, hinc est quod vinum ipsis ante decimum octavum annum ut vult Galenus non competat.

Quæres 2. Cur temperata corpora similibus, Intemperata dissimilibus gaudeant? R. Quia temperata sunt ejusdem rationis, intemperata vero diversæ hinc à se invicem multis modis distant, & dissimilibus gaudent.

Dices cum intemperata sint diversæ rationis, & appetant heterogenea, illa heterogenea videntur esse similia, quia ratione partium heterogenearum, quas habent, quævis harum sibi similia appetit; Ergo adhuc sibi videntur appetere similia R. Etsi illa quæ appetunt, sint similia disjunctive, non tamen sunt collective.

Aphorismus IV.

In temporibus, quando eadem die modo calor, modo frigus fit, autumnales morbos expectare oportet.

Contentum seu Intentio.

*De inequalitate temporis dierum mor-
bifera.*

Connexio: Præsens Aphorismus, non tam exacte cum præcedente, quam cum primo connectitur, in quo nimirum dictum est in genere, mutationes temporum morbos gignere: In hoc vero in specie seu in particulari, de mutationibus loquitur, quæ fiunt vel in uno die vel duobus, tribus, aut quatuor diebus, ut patet 7. Epidem. ubi inquit, quod dum fiunt ejusmodi mutationes & inequalitates temporum, generentur morbi, non generaliter seu universaliter & indeterminate ut in primo dixit, sed in specie seu particulariter;

Ratio

Ratio autem est, quia tempus morbos non gigneret nisi alterato aëre.

Hic aphorismus ob tantam brevitatem non patitur divisionem. Ad faciliorem captum hujus aphorismi autem est prænotandum 1. toto anno non esse majorem temporum inæqualitatem, quam in autumno, omnibus notum videtur: Fervet enim subinde in meridie calor, æstivo similis; cum tamen aurora redux, ob noctium longitudinem, frigus; vix non hyemale reducat & producat, & hinc est quod morbi autumnales sint plerumque longi aut mortales, præceps enim aëris mutatio, naturæ nostræ infert violentiam, & causis morbificis addit incrementum & vim, quod jam olim cognovit juvenalis dum de Medico aliquo in Satiris canit:

Quod Themison ægros, autumno occiderit uno.

Quo enim major est aëris inæqualitas, & quidem citiori vicissitudine contingens, eo magis corpus alterat & afficit, quia revera motus nimis contrarios, minus natura sufferre potest, ex eo quia valde à se differunt: si ergo tempora imitentur naturam autumnii id est quando eodem die, modo calor, modo frigus fit, non est mirum morbos quoque ab illa mutatione productos autumnales, id est curatu difficiles, longos periculosos & mortales esse.

Prænotandum 2. Hunc aphorismum ab Hippocrate allatum, non simpliciter & solum de autumno intelligendum esse, sed etiam de aliis anni temporibus, quando illa quoad mutationes, autumno sunt similia, ut passim fieri observamus, sicque per anamolias & inæqualitates illorum morbi autumnales vel autumnalibus similes, ab humoribus mixtis, variegatis, & crudis generentur, quique modo torpent, modo exasperantur, nullumque servant ordinem, in temporibus suis universalibus, & modo per certas periodos, modo non, raro per crises, sæpe hoc vel illo incerto modo fauste vel infauste terminantur. Unde:

Prænotandum 3. Quod quatuor anni tempora suas habeant qualitates, quatuor elementis peripateticorum correspondentes: *Ver* calidum est & humidum: *Æstas* calida & sicca: *Autumnus* frigidus & siccus: *Hyems* frigida & humida: cum ergo ita se habent illa tempora, suas servant naturas. & sibi peculiare ac proprios procreant morbos, de quibus infra dicemus: at cum ut mox diximus al-

terius temporis, potissimum autumnus naturam assumunt, morbos illius progenerant, id quod Hippocrates in hoc aphorismo de autumnus pro exemplo adducit.

Prænotandum 4. Morbos autumnales (ne crambem repetamus) Hippocrates infra Aphorismo vigesimo secundo hujus libri per extensum refert, quo lectorem causa brevitatis remittimus, morbi que tales sunt qui vel cito occidunt vel corpora nostra diu affligunt.

Prænotandum 5. Cum autumnus frigidus & siccus sit, similes morbos, frigidos nempe & siccos, difficulter mobiles, periculosos graves & incerti prorsus judicii producit.

His prænotatis ad aphorismi explicationem accedimus: quemadmodum autem damna ex mutationibus temporum universaliter & passim contingunt, sic pariter & speciatim morbi autumnales id est morbi difficiles, longi, maligni, periculosi, nullius judicii, imo lethales oriri possunt, quandoque nempe eodem die, modo calor modo frigus viget, idque sive in vere, æstate, autumnus aut hyeme contingat. Neque autem quis credat, hoc evenire, si solum eadem die, sed etiam longa dierum serie, ejusmodi mutationes fiant: id tamen extra dubium non est, quod eodem die contingentes, frigoris & caloris mutationes, procul dubio, longe periculosiores sint, quia nimirum subitanæ & repentinæ celeriter corpora agitantes & perturbantes, atque quasi vi violenta trahentes ad opposita nempe frigoris & caloris alternationem utpote quæ sensibilis, liquidas & solidas corporis partes commovent, & in contraria deducunt: calore enim humores liquantur attenuantur atque ad sudores disponuntur viscera laxantur, pori cutis rarefiunt, & halituum perspiratio uberior fit; frigore vero ista cohibetur, densantur humores, & promotus sudor impeditur, quare ex inæquali & subita hac commotione graves noxas ingruere necessum est, quales passim Medici per antononiasiam morbos autumnales vocant, idque vel propter illorum inconstantiam & pessimum morem, quia nullum plane anni tempus majores habet inæqualitates quam ut plurimum præsefert autumnus, etenim mane & circa solis occasum frigus persentitur & longe majus noctu; meridie vero calor nimius quandoque invalescit, quæ ratio est, ut ea tempestate plurimi & graves morbi passim ingruere soleant. Non tamen
quis

quis existimet, ex unico duntaxat die mutationem ex calido in frigidum vicissim habitam, morbos portendere graves & autumnales, sed cum diu perduraverit: Siquidem quod semel accidit facile à quocunque etiam debili toleratur, neque tantæ efficacitatis esse potest, ut vehementer corpora concutiat & sensibilem noxam imprimat; itaque oportet ut iteratis diebus tales permutationes contingant, subitæ igitur & repentinæ vicissitudines, non tantum ipso vigente autumnò, sed etiam extra hoc tempus quodocunque contingunt, timendæ sunt, cum subinde vagari soleant, illa morborum genera quæ ea tempestate grassantur, siquidem non à tempore, sed ab ipsa vicissitudine causæ morborum, ipsique morbi propter subitas corporum alterationes progignuntur; quamobrem plurimum degenerabunt à consueta & naturali constitutione, reliquæ anni tempestates, si fortasse non æquabilem servaverint, aut caloris aut frigoris habitudinem, sicque necessario, & à potiori longe deterior fiet autumnus, si & ipse in sua inæqualitate adhuc sit justo inconstantior & inæqualis.

Cæterum si mutationes istæ, & vicissitudines aëris repentinæ nocent sanis, multo magis afficient ægrotos, unde experimur ægritudines cæteroquin leves ac benignas, ob autumnalis tempestatis varietatem, & inconstantiam protinus in malignas & exitiales commutari: perperam proinde agunt, qui præter aëris inclementiam, ultro neas sibi excitant hujusmodi permutationes, cum modo calido, modo frigido aëri se exponant modo æstuent & sudent, modo refrigescant & frigida laventur, modo integumentis duplicatis, modo simplicioribus utantur.

Dices Galenus de causis pulsuum cap. 6. ait pulsus in autumnò sunt vehementissimi ergo tunc fortior erit natura, & consequenter nec tot nec tam graves morbi juxta aphorismum generabuntur. R. Galenum intelligendum esse de principio, autumnì quod non est tantæ intemperiei & inæqualitatis, & non de ejusdem medio & fine de quibus intelligendus est aphorismus.

Dices 2. Toto anno sunt tales dierum vicissitudines ergo semper erunt morbi autumnales R. Sunt vicissitudines remissæ & inconsiderabiles concedo, intensæ & consideratione dignæ nego.

Aphorismus V.

Auster auditum hebetat, caliginem visus inducit, caput gravat, pigros & languidos reddit: cum hic dominatum tenuerit, talia in morbis patiuntur: Si vero aquilonia fuerit tempestas, tusses, farcium asperitates, aliis duræ, urinæ difficultates, horrores, laterum & pectoris dolores sunt: cum hac tempestas dominatum tenuerit, talia expectare oportet.

Nota Aphorismus decimus septimas ejusdem quasi est sensus & contextus, tantum aliis verbis explanatus.

Contentum seu Intentio.

De Ventis morbificis.

C*onnexio:* In præcedenti aphorismo Hippocrates descripsit damna & effectus caloris & frigoris, unius vel plurium dierum, in hoc præsentem aphorismo, detrimenta & effectus, à ventis præcipue austris & Boreæ seu Aquilone utpote cæteris infensioribus, frequentioribus & principalioribus, oriundos deducit.

In duas partes dividitur hic aphorismus: *Prima* agit de effectibus Austris; *altera* de effectibus aquilonis seu Boreæ:

Antequam autem ad deductionem Aphorismi nos convertamus, operæ pretium erit prius enodare, quid, quot & quales venti sint, qui in Macrocosmo, tum à Philosophis tum Medicis notabiles observantur. Quid venti sint patet ex Philosophia quo lectorem remittimus. Plinius cæterique veteres *quatuor* ventos Cardinales seu principales, à quatuor mundi cardinibus ortos & secundum quatuor Horisontis partes dictos, nempe *orientalem, occidentalem, meridionalem & septentrionalem* adstruxerunt; Et hi sunt *Auster* seu *Nothus*; *Boreas* seu *Aquilo*; *Zephyrus* & *Eurus*: Penes hos adhuc numerant alios minus

minus principales seu collaterales: *Orientalis* partis; nempe medium, *Subsolanum* & *Zesiam*: *occidentalis*; *Favonium* *Corum* & *Affricum*; *Meridionalis*; *Euronothum* & *Libanothum*: *Septentrionalis*; *Coryzeam* & *Boream*.

Auster de quo Hippocrates loquitur est calidus & humidus, nebulosus, pluvius, mollis & quandoque vehemens spissat & laxat, torporem & putrilaginem humoribus infert, & quia à meridie spirat, lentus & evaporationibus aquosis gravidus (illa enim mundi plaga, magis aquosa est; septentrionalis è contra magis terrea) unde ob motus tarditatem, & copiosas, quas secum vehit, humiditates, terræ potissimum incumbit: hinc quoque super abundantem illam humiditatem, potissima sui parte, aquæ marinæ sobolem, non facile discutit, sed à potiori in copiosas pluvias resolvit; vel saltem humido extraneo, inferiorem nostrum aërem ita inquinat, ut non tantum corpus humanum, sed ipsa saxa & traves, præternaturali humido irrigentur: de hoc Virgilius:

— Ingeminant Austri nunc & densissimus Imber

Nunc nemora ingenti vento, nunc littora plangunt.

Alterius Austri mentionem facit Hippocrates in *Epidemiis*, qui siccum & serenum facit coelum, sed hoc loco dicitur siccus non absolute, sed respective, quia minus est altero humidus, nec hunc in nostro aphorismo intelligimus sed primum, qui etiam rursus considerandus venit, prout certum è certo loco perflat locum, nam si à mari flet, *maritimus* dicitur, & est valde in salubris, si à media terra *Mediterraneus* nominatur, estque magis salubris, nisi proveniat à locis stagnosis & palustribus qui etiam ut vult aphorismus, non tantum auditum sed cæteros etiam sensus hebetat: quia Auster sua humiditate aërem humectat, & tenebrosum reddit, cerebrum replet multis humiditatibus & crassis vaporibus, quibus congeneres generantur spiritus, nervique redduntur flaccidi, imbecilles & languidi, unde motus impotentia, somnolentia, pigrities, ulcera cacohectica, & putrida, capitis dolores, catharri, rheumata, vertigines, auditus hebetudo, & oculorum caligo &c. ubi tamen bene nota, hæc & similia non contingere à quovis Austri flatu, sed tantum ab eo, qui diu continuat & perdurat regionem pervadendo: Cum enim aër in auditu & visione sit medium necessarium, hic diaphanus & serenus sit oportet; si ergo

aporrhæis

aporrhæis copiosis per Austrinam tempestatem congregatis fiat crassior & spissior, eo ipso ad prædictas functiones minus est habilis: Et quis ignorat? quod nebularum, nivium vel pluviarum decadentium tempore sonus campanarum multo obtusior audiat; Tympanum enim in auribus, ut debitum tremorem ad auditum necessarium, concipiat, non nimis flaccidum sit est necesse: Hinc similitudine à Tympano bellico sumpta, Poëta aliam dat hujus Aphorismi rationem:

Tympana si madeant pluviis, quasi laxa catharro,

Diffona & obtuso murmure rauca strepant,

Tympana in aure hominum, sensus hebetantibus Austris,

Sic nequeunt claros, pulsa referre sonos.

Præterea cerebro utpote visceri ex sua natura molliori humidum extraneum præternaturale valde inimicum esse patet, exinde enim, flaccescit, effæminatur & quasi concidit: Spiritus animales itidem in hac aëris constitutione ut diximus, generantur solito aquosiores & tardioris motus; qui cum partes debite non inflent, hinc pigritia seu inertia sensuum ortum ducit: Nervosum quoque genus per austrinum aërem de robore suo congenito (quod in nervorum siccitate & spirituum animalium vigore consistit) plurimum deperdit. Accedit, quod superflua in massa sanguinea serositates per insensibilem transpirationem obstante aëris humiditate, non facile resolubiles, in capite tanquam parte mere glandulosa facillime deponantur. Nunc ad alteram Aphorismi partem transeamus: Aquilo seu Boreas, ventus tota natura austro contrarius & ideo aquilo dictus, quod celeritate & vehementia flandi aquilæ volatum imitetur, qui alias censetur omnium ventorum saluberrimus, sicut ver inter partes anni, attamen non credendum est, quod ab aquilone nulli morbi generentur, sed quod pauciores, quam ab aliis ventis fiant; Est frigidus & siccus, & ideo pectori inimicus, siquidem tusses excitat, ob aërem frigidum inspiratum, qui laryngem & reliqua respirationis instrumenta lædit: Tussis ab aquilone excitata, vel est sicca, in qua nihil vel parum expuitur: vel est humida, præcipue quando præcessit Auster humidus, cujus collectas in capite humiditates exprimit cerebrum, & ejus membranas condensando, velut spongas, hinc plurima exspuuntur: vel ab eodem aquilone fauces exsiccantur & exasperantur unde raucedines & anhelitus difficultates fiunt; Aquilo enim concentrat aërem

aërem, fibras stringit, exasperat, & humores ad coagula magis disponit; Hinc etiam alvi obstruuntur, ab ejusdem frigore, sphincterem ani, & intestinum rectum condensante, vel quia calor concentratus, excrementa minuit, & quia vis exiccandi Aquilonis major est, quam solis etiam intensissimi, ut testantur rustici, & ipsa experientia, plus ventis quam sole terram exsiccare, vel quia totum corpus exsiccatum, ab externo frigore attrahit humores à centro ad Peripheriam. Urinarum quoque difficultates, cum maximis horroribus contingunt, quia vesica à frigore offenditur, velut pars nervosa, cui frigus est inimicum. Sic pariter oriuntur Pleuritides & peripneumoniae, à frigore quoque humores reperiunt & impingente. Denique venti, non tantum manifestis qualitatibus nos afficiunt, sed etiam occultis & venenatis, maxime quando oriuntur à Plagis, vel morte piscium, vel aliorum cadaverum, vel putridorum terræ hiatusum, unde aura putrida & maligna efflatur, & calamitates mortalibus affert.

Quæres cum tanta & tam varia sit ventorum vis & efficacia, quanam sit hujus genuina causa & origo? &c. Hanc quæstionem hætenus, tantum Physiologorum fatigasse ingenia, ut inter arcana naturæ, illam plerique repositam existimaverint, cum post longam & continuam inquisitionem necdum hætenus patuerit. Antequam nos ad motam quæstionem respondeamus, prius notandum est:

1. Certum ac notum esse unicuique, ventis aërem diversimode agitari, atque huc vel illuc violentius commoveri, unde plerisque putatum, ventum non esse aliud, quam aërem motum, quibus assentitur Hippocrates *Lib. de flatibus*, definiens ventum, *aëris fluxum & fusionem*.

Notandum 2. Ut autem aër impetuosius moveatur, quidpiam omnino alienum, ac differens, quod agitet, & impellat, cum illo intermisceri necessum est, cujus causa, varias quoque excitet alterationes.

Aristotelici, halitus, è terraquo globo erumpentes causam commoti aëris dixerunt, qui vi solis in altum elati, ubi ad secundam ejus Regionem offenderint, reperiuntur, ac nequeunt deorsum, contra levium naturam tendere, in gyrum primum revolvuntur, deinde huc aut illuc diffiliunt, & ventos gignunt, in hanc vel illam Plagam excurrentes. Verum si exhalationes istæ ejusmodi sunt, eandemque

semper terream naturam participant, profecto omnes venti, siccitatem præseferrent, & ejusdem observarentur conditionis. Neque verum est, quod Macrobius asserit *Lib. 2. in Somn. Scipio cap. 5.* Variari ventos, à locorum, per quæ transeunt varietate, adeoque austrum in sua origine gelidum, per zonam torridam commeatu, sensim incallescere, atque postremo ad nos calidum pervenire; ut & ventum septentrionalem, ad eos qui Australes regiones inhabitant propter eandem rationem: Nam deberent quoque, qui æstate calidi sunt, fieri per hyemem frigidi, & qui hyeme frigidi, per æstatem calidi, dum regiones ex opposito rigentes, aut ferventes pervaderent, quin & nulli per æstatem frigidi forent, & nulli per Hyemem calidi, sed omnes temporis constitutionem sequi deberent, aut etiam locorum conditionem; atque sub zona torrida calidissimi, in temperata moderati, in frigida frigidissimi semper essent: Atqui falsum omnino est, ventos sub zona torrida æstuosos esse, etenim qui eas Regiones perlustrarunt, referunt suaves Zephyros, ac largos imbres, & ventos, ibi vigere, & temperare plurimum perpendiculares solis radices, & propterea perperam creditum sit Aristoteli, cæterisque veteribus, zonam illam esse inhabitabilem; Neque præterea verum est, ventos tam vastas, & remotas Regiones percurrere, cum peculiaribus quibusdam locis concluduntur, & suos una quæque Regio proprios, & particulares habeat flatus, quibus serenitate gaudeat, aut Imbris irrigetur, caleat aut frigeat. Auster & notus, aliis locis sunt humidissimi, aliis serenitatem afferunt, quibus tamen pluit, flante Euro vel Cæcia: Sed & non raro alicubi venti perflant sævissimi quo tempore alibi, modico telluris tractu interjecto, neque levis aura per sentitur, Cum Neapoli 1588. Nonis Junii, horribilis ille terræ motus accidit, quiescente post dirum præsterema ære, viguit Romæ Auster vehementissimus: Unde liquet, oriri, aut perire flatus, & ventos longe propius, quam ut vulgo putatur, ex specubus, è clivis, fastigiis, & radicibus montium, è mari fretis sinibus, nec è tam dissitis locis proficisci. At vero, varietas ventorum, ferentium sive frigus sive calorem, referenda videtur ad halitus quidem, & vapores, qui è terra vel mari erumpentes, per aërem diffunduntur, sed naturam diversam referunt Spirituoso-Salinam, halinitri, armoniaci, aluminis, sulphuris, vitrioli, bituminis, aliusve, quique sæpe numero diffiliunt, atque

atque feruntur, quo radii solis impellunt, & luna telluri propinquior deprimat, aut peculiaris quædam loci habitudo coarctat; Equidem Halinitrosi, aërem infrigidant, aluminosi, sulphurei, & ammoniaci calefaciunt; mixti, grandines simul & procellas adducunt, & bituminosi etiam tonitrua, ac fulmina; ut propterea sit, cur primi post æstatem imbres, procellis, grandinibus, tonitruis, ac vehementissimis flatibus consociantur, quia ex præarefacta tellure, varii ac diversi salium spiritus, per aërem sunt interspersi, qui mox nubibus conclusi, procellas excitant. Statis etiam temporibus, spirant non raro venti, ejus plane prauitatis, ut illis sata, fructus, flores, folia, palmites urantur, & veluti siderata vita priventur, ob hostilem & pessimam vaporum, aut exhalationum, flatus ipsos promoventium conditionem, unde ros etiam ac pruina ex his decidua, infensissima vegetantibus esse solet, & transit in rubiginem: Sic quoque experimur, sale nitro aquam congelari, & congelatam à spiritibus, ex alumine & ammoniaco elicitis, exsolvi & cale fieri. Etesiæ venti ab Hippocrate memorati, circa solstitium æstivum, cum aquæ exundare incipiunt, quot annis spirant, atque aëris æstum mirifice temperant, quoniam tum aquæ ipsæ, tum spiritus perflantes, plurima nitri copia sunt referti. Hinc etiam est, quod Boreales venti, aërem serenum & frigidum faciant, austrini vero turbent, & nubilum ac pluviosum reddant, quia vapores aquei, à spiritibus nitrosis congelantur, ac præcipitantur; ab aluminosis vero dissolvuntur, & attolluntur, sed & radii solis, & lunæ motus, propinquior nostræ telluri, solent quoque sæpe sæpius, ventos in hanc vel illam plagam propellere, unde oriente sole, venti plerumque spirant orientales, Eurus, subsolanus, & vulturnus, ita & occidui. Favonius, Circius & Zephyrus, ipso in occasum declinante: In signis Australibus, Austrini, & in Borealibus Borei, sæpissime perflant, quia imo ab Austrinis flatibus, calor in aëre sensibilius per sentitur, frigus vero in Borealibus. Luna insuper circa tellurem depressior, vim aëris elasticam seu impetuosam & penetrabilem comprimendo, & coarctando, ventos quoque excitat, plerumque turbulentos, & irregulares, ob variam Elateris commotionem & protrusionem, nisi tamen recta, ex concordii impetu feratur, diversa demum locorum habitudo flatus et-

iam excitat vel variat; Etenim in montibus speluncis, Asthmis, & in cujusvis generis fodinis, peculiares quidem flatus observantur, item in quibusdam maris Sinubus, fretis, scopulis, quia nimirum halitus, aut vapores, illinc erumpunt, aërem commoventes, & magis minusque agitantes, huc aut illuc, pro loci & vaporum conditione. Hac ratione, venti in montibus, plerumque frigorifici esse solent, in oris maritimis humectantes & calorifici, atque in aliis locis alii, pro fossilium varietate, quibus aër diversimode refertus, diverso quoque modo, nostra corpora afficit.

Hinc his prælibatis, facile responsio dari, & ratio reddi potest, cur Austri complura, corporibus præcipue debilibus incommoda afferant præsertim vero auditum hebetent, caliginem visui offundant, caput gravent; quia nempe vapores plurimos concitant, & aërem turbant, qui viscera laxat & inquinat, cunctos liquores fluxiliores reddit, sed speciatim sanguinem à sua compage laxiorem, unde morbi & incommoda, supra recensita oriuntur. Ejusmodi autem à ventis impetuosioribus, tum austrinis tum Boreis. Incommoda, qua ratione vitari & remederi possint, docuit Vitruvius, Palladius, atque medice magis Galenus, *in Libris de Sanitate tuenda*: memorabile vero est, quod olim est molitus Acron Agrigentinus (Laërtius id etiam factum scribit ab Empedoele, ejusdem Acronis Auditore) insignis sui temporis medicus, atque Hippocrate vetustior, ad vindicandam ab immani peste Siciliam: Is enim coriis bubulis, ad id affabre comparatis, ventos primum quorundam montium, unde illi spirabant, angustiis interceptis, coercuit, mox ignes plurimos accendi jussit, ut pravi halitus per aërem dispersi absumerentur, isque meliorem nactus conditionem, remedio in posterum foret sanguini & cordi, quod prius infecerat. Id ipsum quoque factum legimus ab Hippocrate, qui integras Sylvas, comburi jussit, cum Græcia pravo ventorum afflatu, peste vexaretur. Cæterum partibus speciatim affectis, ex mala earundem tempestatum constitutione, succurrendum erit iis præsidiorum generibus, quæ alibi docuimus in praxi. Breviter pro coronide respondemus ad supra allatam quæstionem; Causam ventorum *Materialem* esse exhalationem nitro sulphuream *formalem* entia meteorologica: *efficientem* eorundem motum ab una regione in aliam: *finalem* aëris ventilationem.

Dices

Dices 1. Dantur Austri & Favonii, qui terram reddunt fertilem, laxando emolliendo. Ergo falsus est aphorismus quod ita noceant & Hippocratem hic non intelligere Austrum moderatum, & in limite se continentem, sed eum qui diu durat, & terminos excedit.

Dices 2. Venti ut dictum est, sunt nitro sulphureæ exhalationes, ergo non sunt noxii, sulphur enim & nitrum corpus conservant. & Ventus ut ventos non esse insalubres, sed prout, vel à Regionibus in salabribus oriuntur, vel dispositiones in corporibus nostris inveniunt.

Dices 3. Venti purgant aërem, ergo non inficiunt & Impurum purgant concedo, purum vero aliquando inficiunt, nimirum impuros humores aliunde advehendo.

Dices Similia non agunt in similia, sed Auster utpote calidus & humidus, est similis naturæ nostræ, ergo non agit in corpus nostrum & Similia temperata non agunt in consimilia concedo, in temperata nego, hæc enim ut supra dictum est, ad sui correctionem requirunt contraria, non similia, ergo suo modo agunt in corpora.

Aphorismus VI.

Quando æstas fit veri similis, sudores in febris multis expectare oportet.

Contentum seu Intentio.

De Sudore febricitantium.

Connexio: Hic aphorismus non tam cum præcedente, quam cum quarto connectitur, in quo dixit, *quando eodem die, modo calor modo frigus fit, autumnales morbos expectare oportet*: Potest autem etiam cum antecedente connecti, cum enim in priori Hippocrates egerit de his quæ accidunt ægris, ab austrina & Aquilonia tempestate, in hoc præsentate Aphorismo, ea prosequitur, quæ à mutata &

variata constitutione temporum eveniunt, præsertim autem æstatis meminit, cum veris naturam æmulatur, & dicit, febricitantes plurimum sudaturos, quando nempe æstas fit veri similis, id est ingenti suo ardore deficit, & temperiem quandam refert, non ab similem vi, quæ in vere naturaliter contingit; & quoniam morbi per æstatem vagantes, plerumque sudore finiuntur, quo carere solent ægritudines hybernæ, idcirco de æstate solummodo hæc specialiter notavit.

Hic aphorismus, ob brevitatem suam, divisionem non patitur.

In hoc ergo Aphorismo Hippocrates rursus demonstrat, quod tempora anni, non solum ad gignendos, sed etiam ad solvendos morbos vim habeant, maxime autem per sudores; id est non videtur innuere tantum solutionem morborum per sudores fieri ob similem causam, nempe quando æstas est veri similis, sed etiam quod corpora apta sint ad morbos generandos, eosque etiam solvendos, quod autem in febribus sint expectandi sudores, ubi æstas veri similis, in promptu causa est, quia juxta Galenum, causa sudoris *efficiens* est calor, & materialis ipsa humiditas: calor enim rarefacit corpora, & humiditates à centro pellit ad habitum, hinc fiunt in febribus sudores, qui multam requirunt humiditatem, & temperatum calorem; nam si calor est excessivus in æstate, vel sudores insensibiliter consumit, & in halitum solvit, vel corpora exsiccando condensat, unde vel pauci vel nulli fiunt in febribus sudores.

Neque vero, meo Judicio, à temperie solum aëris vernali, per æstatem contingente, futuros in febribus sudores evenire sed (ut plerique mecum sentiunt) etiam à pluviosa constitutione, quippe quia ver pluviosum esse solet; unde Aristoteles in meteoris, asseruit, pluviosum magis esse tempus vernum quam Hybernium, tum enim sol moderato calore, vapores e terraqueo globo elicit, elevat, & in imbres commutat, qui sane per æstatem extenuati dispereunt, & in hyeme congelantur, vel alio ab Aquiloniis ventis amandantur, cum igitur æstas fit veri similis, imbribus abundans, sudores multi in febribus aderunt, consequenter ejus tempestatis humidam & pluviosam constitutionem: Hinc 2. Epidem. Sect. 1. dicitur *pluvias minutas in æstate, febres sudorificas efficere*: quia minutæ pluvix, sunt propriæ vernalis tempestatis.

Ex his autem facile deducere licebit, qua ratione Hippocrates,
suo-

sudores afferat multos in febribus expectandos; cum enim corpora multo humore, per id temporis imbuantur, necesse est motu naturæ, causam morbificam depellere conantis, illam subinde educi sudoribus, qui tam febris impetu, quam æstivi temporis ratione, plurimi fient, quin imo etiam à principio comparebunt, exsudante nimium sponte aqueo humore, poros cutis, & glandulas subcutaneas occupante & imperente.

Memoravit autem Hippocrates speciatim febres, non quod in cæteris morbis, qui eo tempore contingere possunt, sudores ejusmodi nulli fiant, sed quia hi potissimum febres comitantur, & ab æstu febrili promptius erumpunt.

At vero non distinxit febris speciem, forte quia omnes voluit comprehensas, ea solum differentia, quod in quibusdam sudores isti critici & salutares sint, in aliis symptomatatici & inutiles; utrosque enim hic intelligit.

Quamobrem tacite Medicos admonet, ne sudoris copiam ac promptitudinem omnino reformident, aut ultro commendent, quasi vero damnum aut emolumentum pro re nata non sit interdum allaturus, omne enim nimium naturæ inimicum; etenim ab humida temporis constitutione, non vero à causa morbifica sudor ille provenit; Quamquam possit etiam cum humore febrili conjungi, & simul excerni salubriter, si nimirum cætera concurrunt, quæ crisin salutarem comitantur. Hinc quemadmodum præcedenti aphorismo adjectum est, *talìa in morbis expectare oportet*, sic pariter nunc dicitur, *sudores multos in febribus expectare oportet cum æstas sit veri similis*, non quidem à febre, ejusque causa, sed ab ambientis humidi ac pluviosi constitutione.

Quod si autem fortasse ejusmodi verna constitutio vigeat per æstatem, nec tamen febricitantes sudare videantur, oportebit omnem industriam adhibere, ut illi ad sudorem disponantur, secus duplici malo conflictabuntur, altero à febrili causa, altero à tempestate pluviosa, unde impedita perspiratione, febris in longius producet, vel in priorem commutabitur: Verbo videndum eo, ut in febribus sudores fluant, sed iisdem ne diffluant ægri sedulo cavendum. Sudorum autem differentia (ut patet ex institutionibus) desumuntur vel à *quantitate* unde sunt vel pauci vel multi: vel à *qualitate*

ate idque vel *primis*, & hinc sunt vel calidi vel frigidi, vel *secundis*, unde sunt falsi, acres, amari dulces: vel à *tempore morbi* hinc alius est criticus, alius symptomaticus; Vel à *diei naturalis partibus*, & sic alius est diurnus, alius nocturnus; Vel à *subjecto*, adeoque alius est universalis in toto corpore, vel particularis in aliqua tantum parte; Vel ab *Eventu*, hinc alius est bonus, melior, optimus, alius malus, peior, pessimus.

Dices 1. Quo magis temperata erit æstas, eo pauciores fient febres, & consequenter pauciores sudores, sed ubi æstas erit veri similis erit magis temperata ergo pauciores febres. R. Nego min. nam æstas veri similis non est temperata, quia degenerat à sua naturali temperie, nempe calida & sicca.

Dices 2. Æstas humida majorem habet putredinem, & consequenter majorem calorem, ergo pauciores sudores, quia calor absument R. Habet majorem calorem cum humiditate majori concedo, sine illa, nego ergo pauciores sudores, si sit sine humiditate concedo, cum illa, nego.

Dices 3. In æstate calida & sicca plus bibitur quam in æstate verisimili ergo &c. plures erunt sudores in æstate vera quam verisimili R. Si plus bibatur plus etiam per urinas excernitur, & plus transpirat, in æstate verisimili, humiditas illa retinetur & postea febre accedente excernitur.

Dices 4. Omnis æstas est calida & sicca, ergo nulla veri similis Prob. Ant. calor & siccitas est de essentia æstatis ergo æstas ut est & manet æstas, est calida & sicca concedo, ut deflectens à sua natura, & alterius temporis naturam induens, nego.

Dices 5. In vere absolute magis quam æstate sudores fiunt ergo falsa est propositio aphorismi R. Æstate suam naturam servante plures fiunt sudores numero, in vere autem plures quantitate.

Aphorismus VII.

Per siccitates febres acutæ fiunt, & siquidem annus, magna ex parte, talis exstiterit, qualem effecerit constitutionem, tales ut plurimum quoque morbos expectare oportet.

Con-

Contentum seu Intentio.

De Morbis tempestati consonis.

Connexio: Hic quoque aphorismus, magis cum quarto, quam præcedente connectitur ubi de qualitatibus activis, calore & frigore, temporis, & diei egit; In hoc de passivis agit, adducens siccitatem, temporibus dominantem, dicitque eam febres acutas generare, & quod si totius anni decursus sit talis temperamenti, quod etiam similes morbi sint expectandi.

Prima fronte videtur hic aphorismus opponi i s. hujus sectionis, in quo dicitur. *Siccitates sunt imbris salubriores & minus mortiferae*: nam si siccitates dicuntur salubriores, cur est quod nunc febres acutas parere dicantur? Verum soluitur hæc oppositio facile, quia in græco codice scribitur ἐν τοῖς ἀρχμοῖς id est *in squaloribus*, qui extremam siccitatem, illamque diuturnam significant, ut propterea non quamcunque siccitatem, sed summam & vehementem adnotat in hoc aphorismo Hippocrates, ut plerique famosiores authores tenent, qua scilicet nimio ardore cuncta pene exarefacta, atque ambusta videntur: Neque autem absolute protulit salutare omnino esse siccitates, sed tantum imbris, seu Austrinis tempestatibus pluviosis salubriores, facta nimirum inter se invicem comparatione, de qua re in sequentibus dicemus.

Hic Aphorismus duas habet partes: in *prima* ponitur conclusio: magnis siccitatibus febres acutæ fiunt: in *secunda*, qualis fuerit in anno temporis flatus, tales morbi expectandi. Ex quibus conclusionibus Medicus & prædicere & præcavere possit morbos, qui in siccitatibus fiunt, atque in universum intelligat morbos sequi constitutionem temporum,

Hic quæstio solennis & intricata oritur, cur in siccitatibus extremis febres acutæ fiant? Plerique Authores rationem desumendam putant, ex ipsa met natura siccitatis, quæ fere semper cum calore jungitur, ut propterea vigente constitutione calida sicca, febres acutas oriri necessum sit. Verum revera ego non video, quo jure isti mentem Hippocratis sic temere velint extorquendam: Si enim de tempestatibus

Qq

calidis,

calidis, siccis, hanc sententiam protulisset, sane potius dixisset, in *caloribus* aut *æstibus*, quam in *siccitatibus*; cum cæteroquin, calor habeatur potior & efficacior qualitas, vi longe excellentiori prædita inter eas, quas vulgo *Primas* vocant: at vero videtur congruenter Hippocrates notasse *siccitates*, non *calores*, quia mens ejus erat, referre detrimenta constitutionis oppositæ vi, quam in præcedenti aphorismo protulerat de æstate, in *humidum* vergente, ut proinde gratia exempli notatum voluerit, quod quemadmodum ab humida tempestate, longi seu autumnales morbi, ita ab arida breves seu acuti oriuntur. Accedit, quod à siccitate longa, & deprædicatoria, extenuentur humores, absumentur aquosæ corporis superfluitates, lymphæ diffilatur, & sanguis ipse biliosior, acrior, calidior, sincerior redditur, absumpta nempe quæ ipsum diluebat & frænabat humiditate, quæ morbos vel protrahit, vel hebetat si adsit, si vero absit vel absumpta sit, eos præsertim febres, reddit breviores & acutiores, quia liquores circulantes acutioribus instructi particulis, non tantum ad coctionis sed etiam excretionis opus, naturam incessanter stimulant. Habere autem acria hæc & salina subjecta, particulas hamatas, pungentes, irritativas, & quasi dentatas, docet experientia & ipse sensus testis est, omni exceptione major: licet eas particulas dentatas magis tamen ascetico quam syncero modo quidam facetus Poëta constanter neget, ex ratione & experientia, quod foemina nunquam mordacior quam dum edentula: inquit enim:

Particulas quis dentatas, mordacibus esse

Credat? anus mordax foemina dente caret.

Præterea ulterius de siccitate probatur nostra sententia: cum enim insuper aphorismus, singulas anni tempestates complectatur, æque enim de æstate, ac de autumno, hyeme & vere videtur pronuntiatus, propterea usus est Hippocrates ea (loco exempli) constitutione, quæ communis omnibus esse potest, & indifferenter per utraslibet vagari, modo & ver & autumnus, æstas & hyems siccitatem præferre possunt, id est pluviarum vacuitatem & carentiam: neque enim aliter res siccae fieri dicuntur, nisi quia extenuatæ atque exsuccæ, omni penitus humore exhauriuntur, ut in expressa & exsucta spongia palam fit. Quando enim per siccitatem extremam pori cutis, supra modum constipantur, partes obdurescunt, & perspiratio plurimum

nam impeditur, quin & sanguis ipse, per pulmones trajectus, non leviter, ut diximus, à sua crassi, & fluiditate declinat, unde alicubi restagnans & præsertim, in apicibus arteriarum, febres excitat vehementissimas, & admodum periculosas: Sicut enim præhumidus aër & austrinus ex una parte nocuus est, sic ex altera parte aquilonius, & plus justo attenuatur, distracto videlicet, & ut ita dicam, nimium furiente ejus Elatere id est expansione & impetu.

Secunda Pars seu secunda Conclusio hujus aphorismi desumpta est, *ex Libro de Humoribus*, ubi & plura alia, ad annorum tempestates pertinentia scripta leguntur: neque aliud ex illa inferre vult Hippocrates, nisi quod morborum per tempora affectiones, magna ex parte sequantur ipsius anni constitutionem, ut propterea si tempestas sicca, admodum esse pergat, per universa anni tempora, per omnes etiam tempestates febres acutæ, magna ex parte sunt expectandæ, sicut quoque aliis generis ægrotudines, pro ratione vagantis constitutionis; quo enim diutius squalor in aëre ac tellure perduraverit, eo etiam acuti morbi graviores fient, scriptum est autem *magna ex parte, seu ut plurimum*, nam satis est, si plerumque tellus & aër imbribus non madescat, nec humectetur, & raro pluat; vix enim fieri potest, totum & integrum annum in nostris Regionibus, imbribus fore cariturum. Sed utrum per idem omnino tempus, quo sicca & imbribus vacua constitutio viget, acutæ febres, hic ab Hippocrate notatæ, observandæ sint, an vero imposterum? non levis est hujus loci difficultas: Et quamvis aliquibus videri possit, non nisi, quo tempore arida tempestas viget, acutas febres vagari, juxta effatum illud Philosophorum, *causas tum re ipsa effectus parere, cum adsunt, & vi atque impulsu operationes promovent*; Nihilominus, si verba aphorismi perpendantur, plane etiam imminentes, & futuras comprehensas affirmabimus; dicitur enim; *Tales morbos oportet expectare*; Si ergo expectandi, igitur per idem tempus, quo sicca viget constitutio, non sunt: Neque vero effatum illud Philosophorum, perpetuo verum est in causis Procatarticis & externis, sed solum synecticis, conjunctis & proximis, illæ namque, ut morbos inferant, debent primo internas causas excitare, inter quas & morbos est necessaria connexio, secus vero cum causis Procatarticis: Etenim adhuc vitato aëre, atque remoto cibo, aut motu, qui morbus ab his semel inductus est perseverat, nec desinit, nisi

causa interna & proxima auferatur: Cum itaque Hippocrates de causis externis & procatarticis, hic agat, nimirum de anni constitutionibus, proculdubio non modo de praesentibus, sed & de imminentibus quoque & futuris morbis exponendus erit: recte ergo dicebat Celsus Lib. 2. Cap. 1. *neque solum interest, quales dies sint, sed etiam quales ante praecesserint.*

Sciendum praeterea verba in secunda conclusione addita *magna ex parte* seu *ut plurimum* non significare esse necessarium tales fore morbos, qualis temporum constitutio indicat; quia victus ratio cibus, potus, motus & alia, sicut male usa, ut mox diximus, possunt eos producere, sic etiam debite celebrata eas prohibere possunt.

Sciendum tandem per febres acutas continuas (& non intermittentes, nisi & illae intermittentes acutae quo ad paroxysmum forent) intelligi, febres autem acutae intelliguntur vel essentielles vel symptomatae, cito & cum periculo cursum suum absolventes inter quas etiam malignae, pestilentes &c. subintelliguntur.

Dices 1. Haec sententia Hippocratis videtur esse falsa, ergo non admittenda Prob. Ant. siccitas juncta frigori, potius generat melancholiam quam bilem: praeterea siccitas juncta calori non videtur generare morbos, quia est qualitas passiva, calor autem activa, cui attribuendi morbi. R. Nego primum antecedens, & distinguo secundum, summa siccitas juncta frigori generat melancholiam, transeat, non ita intensa nego R. Quod actio productionis morborum acutorum, non tribuatur calori sed siccitati, jam mox ante diximus, id non fit ratione producentis sed ratione producti, id est advertere, oportet quod humiditas juncta calori, morbis acutis & malignis producendis tam apta non sit quam siccitas. Denique Hippocrates, non dicit à siccitatibus fieri morbos, sed in siccitatibus.

Dices 2, In siccitate sanguis adustus fit crassior, ergo non tenuior, ergo potius in melancholiam degenerabit quam in bilem, sed melancholia ob crassitiem non est apta in producendis morbis acutis ergo. R. Sanguis multum adustus seu per secundum terminum fit crassior, concedo, per primum nego; nam sanguis dum calefit, pro primo termino habet tenuitatem, & non crassitiem, quae primum fit consumpta, ut plurimum humiditate; Et licet etiam sanguis sit
valde

valde adustus, non statim degenerat in melancholiam sed in bilem adustam.

Dices 3. In aphorismo nono dicit Hippocrates, in autumnino morbos in universum esse acutissimos, cum tamen eo tempore siccitas cum frigore dominetur, ergo falsus est aphorismus: R. In autumnii parte æstati proxima sunt morbi acutissimi, concedo, in medio aut fine autumnii nego.

Aphorismus VIII.

Constantibus temporibus, si tempestita tempestitve fiant, morbi stabiles, & boni judicii accidunt: Inconstantibus autem instabiles & mali judicii.

Contentum seu Intentio.

De Tempestatis constantia & inconstantia.

Connexio: Cum in præcedentibus aphorismis Hippocrates, de hac vel illa temporis mutatione egisset in particulari, & statuisset tales fore morbos, quales sunt anni mutationes nunc idipsum magis explicat, & dilucidat, assumendo omnes mutationes totius anni, & omnium ejus temporum. Hic aphorismus duas habet partes seu duas conclusiones; *Prima est* constanti tempore, constantes fieri morbos, ac judicatu faciles, id est specie, idæa, numero, tempore, &c. *Secunda* & primæ contraria est: Inconstantibus temporibus inconstantes fieri morbos, & judicatu difficiles.

Sermonem igitur hic habet Hippocrates, de morborum successu in anni temporibus, ut nimirum ex his varie procedentibus, sagax Medicus prælagire sciat, quem modum illi sint observaturi, & quem quoque finem habituri; dicitque morbos legitimos, & boni judicii futuros, si anni tempora convenienter processerint: Illegitimos vero malique judicii, si præpostere atque intempe-

stive se habuerint, & à propria, & naturali constitutione declinaverint.

Quamobrem inquit *constantibus temporibus* vel ut alii vertunt *legitimis*, vel ut Fuchsius *certis & moderatis*: Legitima autem constantia, & certa tempora, intelligit, cum singula propriam servant naturam, & suis unumquodque limitibus concluditur, ut scilicet statotempore incipiat, & desinat, nec ultra quam deceat, & consueverit, progrediatur aut morem, conditionem, idæam &c. naturalem excedat vel prævertat: Hac ratione si ver sub æquinoctio strictis, moderato calore inchoet, sensim aërem, ab exceptis solaribus radiis, hyemali exuere rigore, & succedens à solstitio cancri æstas, calorem augeat, qui deinde paulatim mitescat, sole in æquinoctium libræ inflexo, legitima & constantia tempora dicentur, suamque servare temperaturam, & consuetudinem: Itaque tunc tempora legitima erunt, & constantia, cum tempestive adveniant, & desinunt, & convenienti vicissitudine invicem succedunt. Insuper dicitur in Aphorismo *si tempestiva tempestive fiant*, seu ut alii, *convenientem servantibus temperaturam*: ubi nimirum *Ver*, moderatum referat calorem; longe majorem & excedentem *Æstas*, temperatiorem *Autumnus*, commutatum vero in algorem *Hyems*, prout ipsæmet temporum constitutiones expostulant: Quæ sane non alia ratione variant, & vicissitudine regulari commutantur, quam à motu solis accedentis, vel recedentis à nostro vertice, qui prout spiras efficit modo sublimiores, modo humiliores, supra nostrum Horizontem, ita radios immittit, vel prope perpendiculares, vel admodum demissos, adeoque æstatem & Hyemem parit, atque in mediis temporibus, ver & autumnum.

Præterea addit, *morbos stabiles seu constantes seu legitimos oriri*: Stabiles seu legitimi autem morbi intelliguntur, aut qui simplices & uniformes sunt, eundem semper modum servantes, atque ab eodem fomite pendentes: aut qui, cum aliorum morborum symptomatibus non junguntur: aut etiam qui constantes & synceri observantur, non autem inæquales, fallaces & varii, ut autumnales, (quia autumnus hoc habet particulare, ut sua natura inconstans sit semper & ideo morbos inconstantes gignit) nec male morati, velut maligni.

Demum addit *boni judicii*, id est salutaris judicationis, & exitus, absque

absque ulla recidiva, neque cum ingenti corporis perturbatione, aut in locis incongruentibus & periculosis: cum enim ab inæquali, & heterogenea materia non dependent, citius ac facilius naturæ viribus subiguntur, atque coctione & secretione extra corpus, debito tempore, ordine, & competentibus viis (quod manifestissimum est naturæ victricis indicium,) critice ablegantur & expelluntur; est enim teste Hippocrate, *natura morborum Medicatrix, Medicus autem ejus minister: juxta Poëtam:*

Cur miser ægrotus, Medica sine sponte resurgit?

Eludit Medicas, mors Libitina manus?

Est Medicus Medico, natura potentior omni:

Langueat hic Physicus, nil poterit Medicus.

Hinc elucescit ratio, quod non alia de causa, spuria & illegitimæ febres dictæ, graviores & difficiliore solutu esse solent, nisi ex commixtione diversorum succorum, aut ex varia fermentorum febrilium conditione: Hippocrates etiam hemitritæum periculosum dixit, quia unius generis febris non est, sed quotidianæ & tertianæ naturam æmulatur.

Quod si ergo hæc non servaverint, sed intempestiva, inconstantia, & immoderata fuerint, puta, si æstas humida sit, & nequaquam calida; Vere nix & grandines cadant, aliæque tempestates, sibi ipsis pro more non respondeant, inconstantes illegitimi, & mali judicii, oppositis plane de causis, morbi fient.

Unde autem, boni vel mali judicii signa petenda sint, inquisitione videtur dignum; Et quidem à symptomatibus potissimum adjunctis, atque à coctione, vel cruditate, illa desumi poterunt: symptomata enim leviora, vel morbo non dissentanea, salutarem exitum portendere solent: graviora vero & morbo dissimilia, periculosum finem denuntiant. Coctiones etiam cito comparentes, non tantum bonum, sed & brevi futurum morbi judicium significant; coctio siquidem prævalentem naturam arguit, & causam morbificam jam evictam aut secretam, adeoque certam salutem portendit.

Unde Hippocrates 1. *Epidem. Sect. 2. Coctiones* inquit, *judicii celeritatem, & sanitatis securitatem significant: cruditates vero judicationis sublationem, aut diuturnitatem, aut mortem, aut eorundem recidivas.*

Dices

Dices 1. Autumnus suam temperiem servans est inconstans, ergo inconstantes morbos, & judicatu difficiles generat, ergo falsum est tempora anni, suam temperaturam servantes, morbos judicatu faciles producere. R. Morbi autumnales sunt inconstantes, respectu autumnus, nego, quia ipsi sunt connaturales, respectu aliorum temporum sunt inconstantes, concedo: Imo totum argumentum non est contra nos, quia certum est quod morbi autumnales, licet inconstantes ut plurimum, non sunt tamen tam difficiles judicatu, quam curatu; juxta illud: *Morbi autumnales aut longi aut mortales.*

Dices 2. Legitima passim dicuntur, quæ qualitatem, modum, ordinem &c. servant; Ergo morbi, qui à simplicibus humoribus oriuntur, erunt legitimi, atqui hoc est contra Hippocratem, qui 7. *Aph.* 23. & *Gal. ibid in comment.* asserit, synceras, id est, à simplicibus humoribus oriundas dejectiones, esse pessimas. Ergo unum vel alterum erit falsum. R. Concedo primum antecedens & consequentiam, & subsumptum distinguo, dejectiones synceræ sunt pessimæ, si pure ab uno eodemque humore oriantur, nego, si ab uno humore aliis commixto, illo tamen prædominante oriantur, sunt pessimæ, concedo ut plurimum, non autem semper teste experientia.

Dices 3. Ex hoc sequeretur quod hyems excessive frigida non noceret, quia suam debitam observat qualitatem. R. Hyems si modum excedat noxia est, quia non sufficit ut solum speciem qualitatis, sed & speciem & modum, & si hæc non observet noxia est, omne enim violentum est noxium.

Aphorismus IX.

Autumno, in universum morbi acutissimi & perniciosissimi: Ver autem saluberrimum & minime exitiale.

Contentum seu Intentio.

De Autumno, & vere comparatis.

Connexio: Hic aphorismus dupliciter potest connecti, vel cum quarto, in quo dixit fieri morbos autumnales, cum eodem die viget

viget modo calor modo frigus: in hoc autem refert, & declarat, qui isti morbi sint, nempe acutissimi & exitiosissimi. Vel connecti potest cum præcedente, in qua dixit, constantibus anni temporibus constantes morbos, inconstantibus vero inconstantes fieri, cum autem ver, tempus constans maxime sit, autumnus vero inconstans, ideo nunc de autumnus & veris natura, & in iis obvenientibus morbis agit.

In duas ergo dividitur partes hic Aphorismus: In *prima* agit de autumnus ejusque morbis: In *secunda* de vere, & ejusdem morbis.

Notandum autem bene est non omnes, eodem modo tempus autumnus metiri: *Nonnulli* ex Priscorum monumentis, ab ortu arcturi ad occasum Vergiliarum ejus limites definiunt: *Alii* cum Astronomis circumscriptum putant, æquinoctio libræ, & solstitio hyberno capricorni. *Agricola* & vulgus hominum, in primoribus imbribus Septembris, inchoari, & usque ad suprema sationis tempora protendi. Medicorum denique plerique, cum primum inæquales vicissitudines caloris & frigoris, dies subeunt, & quousque frigus æqualiter in aëre consistere videatur; idque cohærenter Hippocrati, qui autumnales ægritudines portendit à temporis inæqualitate & inconstantia: Et sane potior causa, cur morbi in autumnus acutissimi & exitiales accendant, videtur esse illius vicissitudo atque inæqualitas.

Quamvis autem Hippocrates, dicat vagari per autumnus morbos acutissimos, qui scilicet brevi finiantur, non tamen omnes eo tempore evenientes tales erunt, cum & non raro plerique in longius tempus protrahantur, ut clare patet ex Aphorismo 22. hujus sectionis, ubi plures eosque chronicos morbos in autumnus evenientes commemorat: Quamobrem, plerique authores non *semper* sed *ut plurimum* vel *magna ex parte* fore exitiales intelligendum esse; id est quasi dicere voluerit, qui acutissimi, accidunt plerumque in exitium terminantur, aut si exitiosi futuri sint, in longius tempus nequaquam protrahentur: Et si fortasse diutius protrahantur, vacabunt exitio, ut in quartanis, vel in quartanas desinentibus febribus præsertim experimur. Verum credere quoque licet, paroxysmos duntaxat morborum, in ejusmodi extrema morborum acutie voluisse designare, exclusa eorundem remissione, seu

declinatione; quare cum dixit acutissimos fieri morbos autumnales, idem fere intelligere voluit ac cito ad augmentum illos pervenire: Sunt etenim morbi qui tarde admodum omnia quatuor tempora percurrunt, quales chronici sunt, & alii qui licet tardum exhibeant principium, celerius tamen augmentum pertranscunt, quemadmodum videntur esse inflammationes, & abscessus interni: Alii denique vix inchoant, ut statim ad augmentum & statum deducantur, sicut ardentes febres & partium principalium ægritudines, lethargi & apoplexiæ, atque de his videtur mentionem fecisse hoc loco Hippocrates, statuens morbos autumnales acutissimos, id est ejus fore conditionis & naturæ, ut postquam inceperint, statim augmentum acquirant; & quidem si exitiales sunt, proculdubio declinatione carent, cum certum sit apud omnes, lethales morbos ad declinationem non pertingere, sed vel in augmento vel statu interimere ægrotantes.

At vero adjicit Hippocrates ut *plurimum* seu *maxima ex parte*: nam non omnino ac perpetuo mortem afferunt, quandoquidem in longius tempus perducti, sicuti acutiem amittunt, ita & perniciem: qua ratione observamus ægrotantes autumnno si mortem effugerint, longissimam pati declinationem sed tandem convalescere.

Unde autem tanta acuties & pernicies autumnalibus morbis veniat? Variæ variorum sunt opiniones: Major pars Medicorum incusat, pravitatem *humoris Atrabilarii* eo tempore exundantis, qui cum suapte natura virulentus existimetur, morbos proinde lethales progignit. *Alii* ad immoderatum fructuum esum referant, quibus ajunt plurima congeri in humanis corporibus excrementa, atque sanguinem generari valde obnoxium corruptioni: *Galenus* autem in *commentario* plures causas commemorat, inquit enim; *Autumno hoc imprimis inesse, quod eadem die aliquando calor, aliquando frigus percipitur: deinde æstivum subsequitur tempus, in quo multis quidem humores assati sunt, quibusdam vero & vires sunt debilitata: neque solum hac ratione autumnus malus est, sed etiam quia primum quidem humores movebantur ad cutem, atque difflabantur, autumnno vero ab aëris ambientis frigiditate traduntur, atque ad interiora impelluntur.*

Verum qui *atram bilem* insimulant, coguntur ejus humoris tunc geniti ac prævalentis causam referre & probare; quam enim ab ætate

æstate bilem naturalem adurentem desumunt, non levioribus implicatur difficultatibus, quam ipsiusmet atræ bilis generatio, utraque autem (ex mente neotericorum) fictitia est, fucati coloris speciem nobis imponens, ejusdem omnino aspectus interius extitisse. Verum tamen quo pacto se res hæc habeat, explicabimus in commentariis libri quarti.

Qui præterea ab esu fructuum causam deducunt, naturam ipsam rerum omnium opificem, primam atque supremam infamare non verecundantur, quod fructus procreaverit, quo tempore in perniciem hominum conspirent, cum tamen compertum habeamus, ipso quoque confirmante Galeno, opimari id est impinguari rusticos, agricolas, atque vinitores, ab assiduo, uvarum, ficuum similiumque fructuum esu. Summo quippe consilio, atque divina providentia factum est, arbores per æstatem & autumnum fructus suos edere, ut humano forent usui, in alimentum ventribus eo tempore debilibus valde accommodum: Atqui damna accidunt, ex cibis solidioris substantiæ & difficilioris digestionis, qui cum fructibus commiscentur, atque intemperanter & intempestive ingeruntur, unde cruditates, putrefactiones, atque ex his vomitus, lienteria, cholera, diarrhæa, dysenteria, febres & alia mala exoriuntur. Vicissitudo vero aëris videtur quoque verno tempore convenire, quod adhuc tum contingat, è frigido in calidum aërem mutari, neque minor mutatio sit frigoris in calorem vere, quam caloris in frigus autumnum.

Verum tamen quia sol veris tempore propius semper accedit nostro vertici, & dies efficit longiores noctibus, sensimque aërem calefacit, quo congruentius vitæ fovendæ pro usu respirationis utamur, propterea fit, ut salubrior sit mutatio frigoris in calorem vere, quam ea quæ contingit autumnum, caloris in frigus: Calore enim cuncta vivencia invalescunt & vigorantur, frigore vero hebetantur & languent: aër quoque qui per æstatem tenuior & laxior est effectus, confertioribus vaporibus, adventante autumnum inficitur, imbribus & frigore crassescit, ac densatur, unde perspirationes, & inspirationes non leviter interturbantur. Vere insuper repurgantur in nobis humores & leni quadam atque insensibili fermentatione, cuncta viscerum fermenta, impuritatum, & superfluitatum secretionibus reflorescunt, & sanguis ipse floridior redditus atque vegetior tum

vivificandis tum nutriendis partibus accommodatior evadit, & quem-
admodum tunc annum veluti repuerascere observamus, ita viventia
quoque omnia repubescere & reflorescere & novam videntur induc-
re corporis habitudinem. Hic non immerito *Plautus*, vitam huma-
nam, herbam solstitialem appellare solebat, eo quod omnes vitales
motus à sole tamquam primo motore potissimum dependerent: Hinc
quoque ortum illud *Aristotelis* adagium; *sol & homo generant hominem.*

Rem totam exemplo & experientia reddemus evidentiorē;
Ros & pluviae vernaes quæ v. g. in Martio colliguntur, propter sal ali-
quod astrale, & balsamicum occultum in iisdem delitescens, ad plu-
res annos sine corruptione perdurant; cum è contra ros aut pluviae
autumnales, quantocyus fatorem & putredinem concipiant: Hinc
est quod aliqui Philosophi & Medici, ut mox ante innuimus ver anni
juventutem, autumnum anni senectutem appellarint, eo quod tem-
pore vernali omnes ægitudines veluti in juventute mitiores, tutio-
res & facilioris sint curationis.

Non tamen credendum & fatendum est, hætenus dicta cun-
ctis terræ habitationibus, eodem tempore evenire; nam ut supra in-
nuimus, cum hominibus zonam temperatam septentrionalem in ha-
bitantibus ver accidit, sole perlustrante signa Arietis, Tauri & Gemi-
norum, aliis è contra vel æstas fit, vel hyems, vel etiam tempestas
alia autumnò non dissimilis. Neque præterea indiscriminatim ver
omnibus saluberrimum evenit, cum in Ægypto mense Majo, vel in-
eunte Junio, epidemica quadam ægitudine incolas illos affici contin-
gat, qua non nisi *gutta* ut vocant, decidente, paulo ante Nili inunda-
tionem evadere datum est.

Etenim quæ Hippocrates protulit, non sunt adeo catholica &
immutabilia, ut alicubi saltem non fallant, quippe is ea, quæ vidit,
ac pluries observavit, summa qua decuit ingenuitate, litteris man-
davit, ac posteris in usum hominum considerata tradidit, quæ aut
locorum varietate, aut temporum differentia, non mirum si varient.
Constat enim diversis omnino dogmatibus tractari Medicinam, apud
Ægyptios, Chineses, Japponenses, Tartaros, Americanos, quæ
monumentis Hippocratis parum vel nullatenus cohærent; cum &
his alii morbi aliæque tempestates accidant, & alia quoque alimen-
torum ac Medicamentorum genera sint in usu: Nobis autem ple-
ru-

rumque congruunt, quia in pluribus, cum Græcis aliqua saltem differentia excepta convenimus, & quæ his accidere Hippocrates expertus est, plane cæteris Europæis, nulla vel modica varietate, in singulis anni tempestatibus, serius modicum aut citius contingunt; At vero reliquis Terræ habitatoribus, sive Antæcis sive Antipodibus non item, sicuti nec aliis hinc procul distitis, aut soli, aut ventorum, aut ciborum & potuum varietate, vel propter vitæ genus varium, differentemque ab incunabulis consuetudinem.

Dices 1. Hippocrates *Lib. de aëre locis & aquis* ait solstitia esse periculosa æquinoctiis, ergo æstas & hyems erunt periculosiores autumno, quia in illis fiunt solstitia, ergo etiam morbi erunt periculosiores. R. Solstitia & sub iis actu contingentes morbi, & mala sunt periculosa quoad excedentes qualitates caloris & frigoris concedo, quoad alias pravas, occultas in autumno obvenientes qualitates, nego.

Instabis: In æstate morbi semper fiunt acutiores quam in autumno, ergo nulla solutio. R. Fiunt acutiores morbi ratione brevitatis, transeat, ratione pravorum symptomatum nego; Vel sic distinguo, in æstate morbi benigni sunt acutiores quam in autumno, transeat, maligni & pravi nego.

Urgebis: Autumnus parum aut nihil distat à vere, quia etiam in vere est inæqualitas frigoris & caloris ergo tanta mala autumno non sunt attribuenda. R. 1. Autumnus & ver parum distant in qualitatibus manifestis, transeat, in occultis nego. R. 2. Negando absolute ea non distare, ver enim est calidum & humidum autumnus frigidus & siccus; Præterea multum differunt in eo, quod ver hyemem sequatur, autumnus vero sequitur æstatem; transitus autem à frigore ad calorem laudabilior est, quam transitus caloris in frigus, ille vivificat, hoc perimit & occidit.

Instabis: Denuo Hippocrates ait 6. Epidem. 7. ver tabidis esse lethale ergo idem fit in vere quod in autumno, qui tabidis est malus, ut dicitur sequenti Aphorismo. R. Hippocratem intelligendum esse de principio veris, non de medio & fine, quod in multis ver in principio hyemem adhuc æmuletur.

Dices 2. Hippocrates 2. Aphorism. 25. ait; æstivæ quartanæ breves, autumnales longæ, ergo morbi autumnales non sunt acutis-

simi id est brevissimi. *℞.* Hippocratem ibi addidisse ut *plurimum seu magna ex parte*, ergo non semper.

Dices 3. Ver est calidum & humidum ergo non temperatum, quod est contra Hippocratem. *℞.* Distinguo, est calidum & humidum excessive nego, temperate concedo, ergo & temperatum. Calidum autem & humidum excessivum, haud dubie est pessimum, quia in illis putredo & corruptio consistit.

Instabis: in vere juxta Aphor. 20. hujus sectionis tot & tanti morbi fiunt, ergo ver non erit saluberrimum, imo morbiferum ut autumnus. *℞.* Ver dicitur saluberrimum comparative ad alia tempora, interea tamen negari non potest in eo morbos generari, licet non tam exitiales quam in autumnus.

Quares obiter, si ver sit saluberrimum cur ergo in vere mittatur sanguis? *℞.* Cum Galeno Comment. 14. Sect. 1. ubi ait, hoc ex usu & ratione, observatione hominum, & præcautione majorum malorum evenisse.

Dices: Tandem vel hic Aphorismus est falsus, vel præcedens: quia in præcedenti dixit, in constantibus anni temporibus fieri morbos faciliis judicii: in hoc dicit contrarium, nempe quod in autumnus in universum sint morbi difficilis judicii, nempe periculosissimi, ergo non fiunt constantes & faciliis judicii, ergo male. *℞.* Hippocratem comparare in hoc Aphorismo autumnus cum aliis anni temporibus, & sic sumptus, generat morbos periculosissimos: In præcedenti autem Aphorismo, comparavit autumnus cum autumnus, nempe constantem cum constanti, ergo sibi non contradixit:

Aphorismus X.

Autumnus tabidis malus.

Contentum seu Intentio.

De Fatalitate Tabidorum ex tempore anni.

Connexio: Exitiosum ægrotantibus dixit autumnus præcedenti aphorismo Hippocrates, quod nimirum exitiales generet morbos,

bos, nunc specialius asserit, etiam tabidis esse exitialem & funestum, ut non tantum acutos, sed etiam chronicos morbos complectatur, & in exemplum adducat.

Hic Aphorismus ob summam brevitatem, divisionem non habet. Indefinite autem Hippocrates in hoc Aphorismo *Tabidos* nominat, non distinguens, qua marcoris specie affectos velit: Quo circa Galenus ipse in Commentario hæc habet: *Virum vero illos solum nominet Tabidos, quibus pulmo est exulceratus, vel omnes quomodocunque extrema confectos macie non possumus conjectari.* Verum tamen τῶν φθίνοντι, qua voce utitur Hippocrates, magis proprie significare videtur eos, qui ex affecto Pulmone maciem incurrunt.

Plura autem tabis genera memorat idem Hippocrates 2. de morbis & Lib. de internis affectionibus. Una est *senilis* in qua absque ullo pulmonis ulcere ejiciuntur purulenta, seu potius compacta, & phlegmatica excrementa, similia puri. Altera dicitur *Dorsalis*, in qua juxta dorsum & spinam sentiuntur quædam titillationes, veluti decurrentes formicæ: de alia huic congenere, eruditum, libellum edidit *Franciscus Glissonius de Rachitide* inscriptum. Tertia appellatur *Pulmonica* quæ ex ulcere Pulmonis oritur, & primum sanguinis, mox puris excreatione ægros perimit: Aliæ rursus Tabes ab aliis referuntur, nempe ab affectis atque obstructis visceribus, potissimum vero à menstruis & hæmorrhoidibus detentis; sic Hippocrates mulierem tabidam, à menstruis detentis, frequenti venæsectione, præter omnium spem, pristinae sanitati restituit: oritur autem ordinarie tabes à retentis menstruis aut hæmorrhoidibus, quando nimirum sanguis retentus, redditur acrior, & sic ineptus, à partibus non attrahitur, multo minus iisdem apponitur, & sic deficiunt & contabescunt: Idem etiam potest facere materia podagrica in corpore & sanguine retenta, partes pnevmonicas erodente aut consumente. *Celsus* Lib. 3. Capite 22. pleraque Hippocratis dogmata sectatus, tam Atrophiam quam cachexiam, præter phthisin, nec non alii colliquationem & Marasimum, tum torridum tum frigidum dictam, ad Tabem tamquam ad genus retulerunt. Ex his autem pessima procul dubio reputatur, quæ exulceratum pulmonem ac sputum purulentum sequitur, de qua idem Hippocrates in coacis prænotionibus: Item 5. Aph. 11. 12. 14. & *Celsus* Lib. 2. Cap. 8. abunde loquitur.

Neque

Neque vero solum his tabescentibus, nocuus est autumnus, sed etiam emaciatīs quibuscunque. Pluries enim experti sumus à diabete, ab ulcere renum, ab obstructione inveterata, à doloribus coxendicis, ab immodico hæmorrhoidum profluvio, similique ægritudine diuturna, extenuatos autumnino interiisse.

Neque etiam solum Tabidis autumnus lethalis, sed & Hydropticis, Astmaticis, & aliis morbis chronicis.

Neque tandem solum autumnus Tabidis noxius sed & ver (præsertim in ejus principio) ut testatur Hippocrates 6. Epidem. Sect. 7. *Tabescentibus*, inquit, *autumnus malus, malum item ver, cum fici folia cornicis pedibus similia fuerint*: quando nimirum sub veris tempore, algorem spirat Favonius vel inæqualitatem refert, atque vicissim modo calore, modo frigore, aut vario ventorum afflatu aër inficitur.

Cur autem autumnus Tabidis malus sit? Galenus in Comment. rationem dat, quia siccus frigidus & simul inæqualis est. At sibi ipsi & Hippocrati contradicere videtur ex 2. Aph. 34. ubi dicitur: *In morbis minus periclitantur, quorum natura & ætati, aut consuetudini, aut anni tempori magis congruit morbus, calida enim natura* (subdit ibidem Galenus) *& ætati & consuetudini & tempori & anni constitutioni, ac Regioni, morbi calidiores sunt congruentes, frigidioribus vero frigidiores, eadem ratione & siccioribus sicciores, & humidioribus humidiores.* Sequeretur etiam, & ob urentem siccitatem, quod tabidi periclitarentur æstate, atque ob siccitatem simul & algorem, magis adhuc hyeme: Atqui siccus aër Pulmonis ulceri magnopere prodesse consuevit, ad saniem abstergendam, exiccandam, & ulcus consolidandum, ut patet ex Galeno 5. Meth. Cap. 12. qui propterea Tabierum aërem, pulmonis exulcerationibus conferentem scribit, imo Hippocrates ipse phthisicos ad Tabies ablegavit, quod ibidem siccior aër haberetur.

Nostro ergo judicio potius Tabidis nocuus videtur autumnus, quia aërem sua inæqualitate perturbans, atque heterogeneis, fixis, & salinis halitibus inficiens, lympham intemperatam & acriorem reddens, in causa est, ut sanguis & lympa per pulmones trajecta, atque cum eodem aëre commixta, magis magisque indebita fermentatione exagitetur & dissolvatur: Constat etenim sanguinem tabidis fluidum dilutumque nimis fieri, atque muriatica quadam acritudine

tudine dissolutum, ineptum evadere partium nutritioni : Cum autem ambientis aëris inæqualitate, is gravius afficitur, atque tot vicissitudinibus perturbatur, non tantum ipsum pulmonem, sed & reliqua alia viscera acrius molestat, adaucta non minimum præconcepta acredine ac dissolutione. Atqui hæc longe graviora fiunt in Tabidis ex pure & ulcere pulmonis, cum inquinatus & commotus tam repente aër, proximius partem ipsam affectam, pervadens, ulcus, pus & circumeuntem sanguinem inficiat, unde majora procul dubio mala expectanda sunt. Per idem quoque tempus destillationes vagantur, à compresso & gravato aëre, perspirationem interturbante, & quodam modo coarctante glandulas, atque aquosos liquores per illas excurrentes; unde Catharri, tusses, gravedines: Sudor quippe per æstatem uberrimus, omnino, vel magna ex parte supprimitur in autumno, unde hos aliosque graviores morbos parere solet: proinde si hæc nocent sanis, quam acerbius oberunt tabefactis, quibus revera perniciosissimæ sunt istiusmodi alternationes, atque cujusvis generis vicissitudines, sanguine & carnibus consumptis.

Dices 1. Autumnus est siccus, sed ut diximus, siccitas prodest ulceribus, ut etiam testatus est Gal. & Hippoc. Ergo non est nocuus. *R.* Autumnus est siccus tantum, nego, siccus & frigidus concedo; magis autem nocet ratione frigoris & vicissitudinarius caloribus.

Dices 2. Autumnus multis prodest & multi saniores sunt in autumno, ergo non nocet. *R.* Transeat totum quia nihil probat: vel distinguo; Autumnus prodest calidis & humidis seu sanguineis concedo, Tabidis nego.

Dices 3. Æstas videtur heceticis magis officere quam autumnus. *R.* Pure heceticis transeat, heceticis & phthisicis ulceratis simul nego:

Dices 4. Multi sunt qui ob immodicam distillationem à motu excessivo in æstate sive corporis sive animi cadunt in atrophiam & tabem, qui tamen accedente autumno reficiuntur, quia pori occluduntur, & distillatio impeditur, ergo autumnus non est noxius. *R.* Tales non esse Tabidos confirmatos, de quibus Hippocrates loquitur: deinde per solum autumnum non curantur, sed per victum analepticum, Balnea dulcia & similia: Ergo hæc objectio nihil probat.

Dices 5. Hippocrates sibi contradicere videtur; nam *I. Epid. Sect. I.* scribit: tabidos citius mori, quibus natura ad tale malum prompta, &

inclinata est, cum tamen videatur major recessus, à statu naturali, in iis tabidis, qui ad Tabem à natura inclinati non sunt, adeoque ii potius mori-
 rientur: sicuti tam periculosi non sunt morbi, qui naturæ ægrorum
 magis conveniunt, ut dictum est 2. *Aph. 34. ii in morbis minus periclitan-
 tur, quorum natura, ætati &c. morbus magis congruit.* R. Quando
 Hippocrates præcitatis locis dicit, Tabidos citius mori, quibus à
 natura tale malum est, intelligendus est de Tabe habituali, qualitas
 autem habitualis dicitur naturalis seu radicata quia producitur ab
 ipsa forma per habitum, hæc qualitas ergo non est naturæ debilitatæ,
 amplius proportionata, und magis & citius lædit: Et sic non videtur
 sibi contradicere Hippocrates.

Instabis: Promptum esse ad tale malum, non est esse talem habitua-
 liter ergo nulla solutio. R. Actus non tollit potentiam, nec prompti-
 tudo actualis, tollit actum tabis habitualis, ergo promptum esse, potest
 esse tale, habitualiter actu.

Aphorismus XI.

*Inter anni tempora (seu paries) si hyems sicca &
 Aquilonia; Ver autem pluviosum & australe
 fuerit, æstate necesse est, febres acutas fieri, &
 lippitudines (seu ophtalmias) & dysenterias (seu
 intestinorum difficultates) mulieribus præsertim,
 & viris natura humidioribus.*

Contentum seu Intentio.

De Hyeme aquilonia, & vere Austrino.

Connexio: Cum hætenus variis in locis, præsertim autem in primo
 hujus sectionis Aphorismo, multa, de temporum mutationibus,
 quasi in universum disputasset Hippocrates, & affectus ex iisdem pro-
 venientes recensuisset: Nunc in hoc aphorismo, de mutatione agit in
 particulari, plurium temporum, quatenus sibi invicem succedentes,
 varios morbos gignunt, id est, pergit speciatim enarrare effectus
 hyemis degenerantis, justo scilicet siccioris & aquiloniæ, & veris
 pluviosi & austrini; quod nempe posita hac vicissitudine, & altera-
 tione, in Æstate febres acutæ, lippitudines, dysenterici expectandæ
 sint;

sint; nam talis vicissitudo, facta prius pororum coarctatione, & hinc humorum ad fermentationem majori dispositione humiditatumque congregatione, oculi & intestina potissimum læduntur, morbi que acuti, biliosi, inflammationes, & alii sinistri effectus consequuntur.

Hic Aphorismus unicam continet conclusionem, & sic divisionem non admittit.

Hanc sententiam Hippocratis, Celsus *Lib. 2. Cap. 1.* paucis immutatis verbis sic vertit: *Si hyems sicca, septentrionales ventos habuit; ver autem Austros, & pluvias exhibet, fere subeunt lippitudines, tormina, febres, maximeque in mollioribus corporibus, præcipue in mulieribus.*

Hanc aphoristicam sententiam Hippocrates ipse in *Libro de aëre, aquis & locis* (unde mihi desumpta esse videtur) longe clariorem, una cum ejusdem ratione transcripsit, unde ex utriusque loci contextu, mentem Hippocratis, facile assequemur: *Siquidem hyems sicca* (inquit) *& aquilonia fuerit, ver autem pluviosum & australe, necesse est, æstate febres & lippitudines fieri:* Et mox citato loco addit: *Cum enim æstas derepente accedat, dum terra adhuc humida est, à vernis imbribus & austris, necesse est æstum duplicatum esse, & à terra irrigua ac calida, & à sole urente; cum ventres in hominibus nondum constricti sint, neque cerebrum resiccatum: Non enim fieri potest, cum ver tale existat, ut corpus & caro, non humore fluida fiant, adeo ut febres acutissimæ in omnes irruant, maxime autem in pituitosos.* At dysenterias par est fieri, *& mulieribus, & viris humidioribus:* Et si circa cani exortum accedat, aqua ac tempestas *& Etesia spiraverint, spes est cessationis, & ut autumnus salubris fiat; sin minus periculum est ne & pueri, & mulieres moriantur, minime vero senes, & ne, qui superstites evadunt, in quartanas desinant, & ex quartanis in hydropes.* Hæc Hippocrates citato loco.

At vero quamvis sententia hæc uberius explicata videatur, non tamen omnino difficultatibus vacat: Et quidem *Primo* dubitare contingit, cur Hippocrates hyemem voluerit considerandam, in morbis eventuris in æstate: Si enim morbos acutos æstate contingentes, non aliunde deduxit, nisi ab humida terra, ob imbres, & ventos Austrinos, in vere; procul dubio satis erat, notasse vernum tempus pluviosum, & australe, nulla mentione facta, hyemis siccæ, & aquiloniæ. Verum quia ex sicca & aquilonia constitutione hyemali, terra aridior effecta, vernis imbribus magis & largius humescit,

neque solum superficie tenus, sed altius in hiatibus, & voraginibus pluvias excipit, propterea fit, ut per æstatem vapores inde elevati aërem inficiant & coinquent, unde postmodum morbi acuti, febres, ophtalmiæ, & dysenteria: quod enim toti corpori est febris, id oculis est (ait Aristoteles) lippitudo seu ophtalmia; addo ego, & intestinis dysenteria; una omnium communis causa nempe fervens, acris, falsa & mordax materia. Cur præterea Hippocrates dixerit, *neesse esse æstate febres acutas fieri*? Forte quia inevitabiles; quippe quod necessarium dicitur inevitabile quoque est: Sed revera, non adeo futura certo est, ejusmodi acutorum morborum constitutio, ut penitus vitari non possit, cum & insalubritas illa aëris, correctionem arte vel natura admittat; arte quidem locus facile alterari potest, natura vero, si victus ratio mutetur, & corpori exsiccantibus prospiciatur: Neque audiendus Galenus, asserens, id pronuntiatum ab Hippocrate, velut ex natura rei persuaso, & non ex observatione; nam nulla convincens ratio apparet, quæ cogat isthæc omnino eventura; Sed & contrarium docet experientia nostra propria, ab hyberna tempestate sicca, & succedente vere pluvioso, nullas per æstatem exstitisse agritudines acutas, sed, quas ante retulimus, medio fere autumnino, etsi hujus initium fuerit æstuosissimum: neque vero Hippocrates quod scripsit ex fictis ejusmodi (ut Galenus) argumentis, colligere unquam ausus est, sed potius ex iteratis & acuratis observationibus, quas fortasse etiam aliis, à vetustioribus habitis comparavit: His ergo solum fides, omissis fallacibus argumentis, ex necessitate dixit, sic morbiferam futuram æstatem, cum naturæ effectus plerumque conformes esse soleant, ubi eadem ad illos gignendos concurrunt. Verum quemadmodum à ventis Etesiiis & ab imbribus, circa canis exortum supervenientibus, spes est cessationis, ut ipse subdit, ita poterit ejusmodi constitutio, aliis quoque de causis, vel infringi vel aboleri. Ne quis vero objiciat, Hippocratem (asserendo, *cessare hos morbos, non solum si spiraverint Etesia, sed si pluat in æstate*) commisisse terminorum repugnantiam, siquidem humida constitutio à pluvia non videatur corrigi, quin potius augeri posse: Verum facilis ad hoc datur responsio, Hippocratem hic locutum fuisse, de pluvia moderata, & æstati connaturali & tempestitiva, non veto de longa, intemperata & intempestitiva: prima autem cum sit tempestitiva & naturalis multum facit ad curationes, & non productiones

nes morborum, non secus ac patrius aër, cui multum passim tribuitur in curandis deploratis morbis.

Cur insuper Hippocrates dixerit, *à terra irrigua & à vernis imbribus, duplicatum aestum fieri*, cum potius (ut multi docent) imbres & terra humectata, calorem & aestum temperare debeant, ex doctrina Aristotelis & Galeni, qui volunt humidum, actione saltem in directa, igni & calori obsistere. Galenus pro more suo consueto confugit ad putredinem, *habiles enim* (is inquit) *sunt humiditates modum excedentes, ad putrescendum*: Sed nimis inaniter; inde enim inquinari potest aër, non incallescere; Potius ergo à vaporibus in aëre confertioribus aestas geminatur: Etenim cum aër crassior & densior fit, radii solis ad terram trajecti, ex regulis dioptricæ (dioptra est instrumentum quo res quævis depuratur & decantatur) magis intenduntur & impensius nos feriunt, quin & incidentes in madidam tellurem resiliunt, iterumque deducuntur in aëre, unde tot, tantisque solaribus radiis, veluti spiculis, non tantum aër ipse exæstuat, sed & animantia cuncta, urenti ardore, moleste admodum lacerata, graves & arduas subeunt ægitudines, ut sæpe in rabiem agantur, in iis præsertim Regionibus, quæ suapte natura, calidiores esse solent. Hinc autem contingit, ut ex aëre vaporibus confertiori, aestum molestissimum patiamur, atque ab apparentibus, per ipsum staminibus, veluti in araneorum telis, futuros imbres congerere soleamus, quos præsentientes quoque anseres, & anates, impensius obstrepunt, & præter modum volitant; Muscæ vero solito infensiores fiunt, unde & ab his futurum imbrem Meteorologici præfagiunt: Eadem de causa, loca quæcunque fluminibus, aut stagnis, circumvallata, aut prope palustres aquas exstructa, æstatem patiuntur æstuosissimam, ab aëris crassitudine, quæ non nisi à vaporibus, cum illo plurimum intermissis exoritur. Cur etiam ultro Hippocrates subjunxerit, *febres acutissimas exoriri ab Austris & Imbribus quibus carnes molles, & humores fluidi & aquosi fiunt, imò corpora potissimum pituitosa ac mulieres, & viros humidiores affici doceat*: Febres siquidem acutissimæ, hic præfagitæ potius Picrocholos, & biliosos, quam homines pituitosos corripunt: Pituitosi namque succi, diurnas & spurias febres pariunt, ex Galeno 1. Epidem. & 2. de febr. differentiis. Verum hæc difficultas sicuti Galeni doctrinam vulnerat, ita Hippocratis dogmatibus suffragatur:

Hic enim, nec ab humoribus, febrium periodos deduxit, nec ab iisdem putrescentibus, febres pendere arbitratus est, sed solum à motu sanguinis perturbato, vel ab ejusdem recrementis vitiatis, atque in acidum, salsum, amarum, aliumve degeneratis, quemadmodum expresse docet, *Libro de veteri Medicina*, ubi non propter calidum simpliciter, homines febricitare, neque hoc esse febrium causam, inquit, sed amarum, acidum, salsum aliaque innumera. A commotis autem, & turbatis humoribus, febres cæterosque morbos acutos proficisci, sæpius repetit *Lib. 4. de morbis*. Neque vero, acutas febres, hic fieri dixit, ab humoribus pituitosis, ut putat Galenus, sed futuras febres, aliasque ægritudines acutas, ex temporum inæqualitate, illasque magis foeminas & humidiores viros afficere, desumpta fortassis ratione, vel à majori horum corporum impuritate, vel ob minorem hujuscemodi causis alterantibus repugnantiam: Sunt etenim in his carnes molliores, laxior cutis, & sanguis ipse hebetior, unde facilius alterationibus subjiuntur. Auster enim pluviosus & mollis, aquiloni frigido, & rigido immediate succedens, subitanea contrariarum qualitatatum introductione, & corpus debilitat, & plurimis excrementitiis humoribus infarcit; qui cum obstante Austri ambientis inclementia & naturæ debilitate, impotentia, per sudorem vel insensibilem transpirationem resolvi nequeunt, à succedente æstivo calore funduntur, unde febres prodeunt; particulæ enim insensibilis effluvii, summe spirituosæ, agiles & activæ, in massa sangvineâ, præternaturaliter accumulata, sanguinem attenuare, volatilizare, impellere, & ad concipiendum impetum & incendium disponere solent, maxime si ab æstivo calore fiant impetuosæ, vel etiam quando in loco aliquo collectæ fermentantur, & mox effervescendo citatiorem motum acquirunt & febres excitant: Sunt autem plerumque febres acutæ, quia fiunt æstate, à particulis turgescitibus, & à calore extraneo fundente. *Ophthalmia seu lippitudines* autem fiunt, quia cum palam constet, oculos ob lacertosam illorum substantiam, sensum habere acutissimum, qui hyemali tempore, dentatas ex nitro, aëris particulas in adnata ejus tunica restagnantes & in ejusdem arteriolis incrasscentes supportare nequit: aquilonico ergo frigore, debilitati oculi, humiditatem per Austrum collectam, sole æstivo liquefactam, facile suscipiunt, & ophthalmias pro-

procreant: Nec obstat, mens *Majoli* asserentis lacertosum (id est ex meris musculis, nervis, & membranis constantem) visum, obtutu solis non mediocriter acui, & certum esse, oculum delectari calore, & offendi frigore: cum ille magis virtutem oculi quem igneae naturae, syderum coelestium æmulæ dixit, & non naturam, & compagem ipsam oculi expresserit. *Dysenteria* pariter fiunt, quando particulæ heterogeneae, humidioris Austri intemperie accumulatae, æstivi solis calore fusæ, vel extrinsece tantum sanguini cohærent, vel eidem radicaliter, & intrinsece sunt unitæ, & incoctæ: Si ultimo modo, sine febrili exagitatione ad intestina prævio Aquilone debilitata, austrina constitutione laxata facile feruntur, ibique propter contractam, tum stagnatione tum caloris æstivi ustione acrimoniam, dysenteriam producunt, præsertim in mulieribus & viris humidioribus tanquam præ cæteris excrementosioribus & aluum nactis lubriciorem.

Postremo quare Hippocrates *spirantibus Etesis* spem faciat *cessionis malæ tempestatis æstivæ*, causa in promptu est, quoniam *Etesia* venti sunt salutare, & spirare solent, quotannis ab exortu Caniculæ, quem & alii præcedunt Prodrumi dicti, quasi Præcursores. Inter cætera autem commoda illud videtur præcipuum, quod serenitatem afferant, & aërem ab inquinamentis repurgent: participant enim Boream & nitrosam conditionem, valentem superfluitates humorum ab obesis, & muliebribus corporibus absumere atque emendare.

Verum tamen his aliisque ingruentibus ex hac tempestate morbis, expediet obsistere, recto & convenienti usu ciborum attenuantium, parco potu, exercitiis ad sudorem usque promotis, & medicamentis, tum caput tum ventriculum roborantibus.

Dices 1. Hyemis siccitatem corrigit ver humidum, ergo non nocet, ut intendit Aphorismus &. Hyemis siccitatem corrigit ver humidum, exiguo tempore durans concedo diutius nego: Sic enim corpus ad contrariam constitutionem deducit & debilitat.

Dices 2. Febris acuta cholericæ plerumque fit post siccitates, ergo non fit post veris pluvias ut dicit Aphorismus &. Febres acutas esse duplices: simplices & complicatas: priores uti est synochus simplex Biliosa maxime fuit à siccitatibus; posteriores, uti est synochus putri-

putrida cum vel sine malignitate, & hæc fiunt à calido & humido excedente, de quibus ultimis Aphorismus loquitur.

Dices 3. Oculi sunt natura humidi, Intestina vero sicca ergo ab eadem causa non lædentur &c. Licet intestina velut partes continentes sint sicca, illorum tamen contenta sunt humida, quæ intestinis communicantur, maxime quando diutius, in iisdem detinentur, & acriora facta, corroduunt.

Dices 4. Galenus in *Commentario* dicit, pueros & mulieres affici quartana, præviis prædictis hyemis & veris tempestatibus, cum tamen hi morbi à succo melancholico fiant; pueri autem, & mulieres, utpote humidiores, tali succo non abundant. &c. Hanc commentationem Galeni non esse attendendam quia certe nullius fundamenti & rationis, ita mecum sentiunt plures Autores.

Aphorismus XII.

Si vero hyems australis & pluviosa (alii habent & clemens alii & serena) fuerit: Ver autem siccum & Aquilonium, mulieres quibus partus in ver incidit, quavis occasione abortiunt, quæ vero pepererint, imbecilles & morbosos infantes edunt, ita ut vel statim intereant, vel tenues & valetudinarii vivant: Cateris vero mortalibus dysenteria & ophthalmia sicca fiunt, & senibus catharri perniciosi brevi allaturi.

Contentum seu Intentio.

De Hyemis, & Veris commutata temperie.

Connexio: Cum in præcedenti Aphorismo, Hippocrates hyemis sicca & Aquilonia, veris autem austrini & pluviosi effectus, morbos nempe æstivos adduxisset: nunc in hoc Aphorismo, contrariam constitutionem, nimirum hyemis Austrina & pluviosa veris autem aquilo-

aquilonii & sicci producit, simulque eos, qui in iis accidunt morbos enumerat.

Cum autem hic Aphorismus licet amplior unicam tantum conclusionem habeat, qui nempe morbi, sub his temporibus contingant, nullam divisionem patitur, sed uniformis manet.

Hic etiam Aphorismus sicut præcedens est desumptus ex libro *de aëre aquis, & locis*, ubi fusiori sermone eundem, ejusque constitutionem describit, & morbos subinde futuros, cum suis causis per extensum enarrat; Sic autem à Cornario & Cardano exponitur: Si vero hyems australis fiat, & pluviosa & clemens (Cardano ex veteri versione tranquilla, clarius forsitan placida) ver autem boreale, & siccum & tempestuosum, primum quidem mulieres, quæ uterum gestant, & partus ipsis ad ver instat, abortum facturæ esse verisimile est: quæ vero etiam pepererint, impotentes ac morbosos pueros parere, ita ut aut statim pereant, aut tennes, aut debiles, ac morbosi vivant: atque hæc quidem mulieribus, reliquis vero dysenterias & lippitudines siccæ, & aliquibus defluxiones à capite in pulmonem. Pituitosis igitur dysenterias fieri veri simile est, & mulieribus pituita de cerebro defluente, propter naturæ humiditatem. Biliosis vero lippitudines siccæ, propter carnis caliditatem ac siccitatem. Valde autem senibus d fluxiones, propter raritatem ac eliquationem venarum, adeo ut aliqui quidam derepente pereant, aliqui vero seni syderati, aut dextra aut sinistra parte fiant. Cum enim hyems sit australis & pluviosa ac calida, & corpus non adstringatur, neque venæ; Vere accedente boreali, & sicco ac frigido, cerebrum postquam ipsum dissolvi ac purgari contigit à gravedine, ac raucedine, tunc simul cum vere stabilitur ac constringitur; quare repente æstate accedente & ardore, ac mutatione contingente, hi morbi incidunt, & intestinorum sanitates, & aqua intercus, fere reliquis morbis desinentibus, superveniunt, cum non queant facile ventriculi, à concepta humiditate exiccari. Cum ergo in Libro *de aëre aquis & locis*, unde hic Aphorismus transcriptus est, expresse refertur, hyems australis, pluviosa, & clemens seu placida, non videtur expungenda vox hæc *et dicitur*, licet minus apte à Leoniceno Serena exponatur; unde factum est, ut plerique, non tantum illam omiserint, sed acriter in eos interpretes sint inveci, qui retinendam illam omnino voluerunt: quin imo Cardanus ad confusionem omnium inquit, id pertinere, quamquam postea putet in libro *de aëre aquis & locis*, utrumque,

tranquillum scilicet & *tempestuosum*, veluti invicem opposita bene convenire in hoc autem aphorismo neutrum.

Ut autem res agatur, non ea tanti momenti est, ut vel mentem Hippocratis extorqueat, vel sententiam depravet, vel causas morbosæ istius tempestatis adulteret: perinde enim est, si dictio hæc adjiciatur, aut expungatur, & si *clemens, tranquilla, placida*, vel ut aliis placet *tepidā*, aut etiam *serena* exponatur, modo id retineamus, voluisse Hippocratem, hyemem ita constitutam, ut à rigida & consuetā sua conditione, non minimum deflectat: Equidem hyems, ob extremum solis recessum à nostro vertice, frigoris esse solet, at vero, ut morbiferam constitutionem hanc afferat, australis simul & pluviosa, atque à consueto rigore declinans, hic ab Hippocrate expostulatur, quo nimirum fiat, ut vices permutet, cum succedente vere, quod eadem de causa, oportere siccum & aquilonium esse, ipse animadvertit. Cæterum posse hyemem, placidam simul & austrinam haberi, fatetur idem Author 2. *Epidem. Sect. 3.* cum inquit: *in Perinthum circa solstitium fere æstivum venimus; facta autem est hyems clementi Cælo austrina &c.* Atqui passim in Regionibus Siciliæ, ad mare mediterraneum positis, experimur hyemes tam placidas, clementes & austrinas simul, ut vernum tempus referant. *Placida* autem & *clemens* hyems dicitur, cum algida non est: *Austrina* vero, quæ australibus plerumque ventis, haud quaquam tamen impetuosius, & per sublimiora discurrentibus perflatur, sed & pluviosa quoque erit, si per intervalla, imbres admittat exiguos & fugaces: aliter etiam austrinam & tranquillam hyemem student alii compositam explicare, documento Galeni *Lib. 3. Epidem. Sect. 3. Comment. 1.* Annum tranquillum & austrinum, ab Hippocrate ibidem memoratum exponentis, quem videre cuique placeat, nobis interim suffecerit, hæc breviter, in eruditionem juventutis, & ejusdem confusionem avertendam adnotasse. Talem igitur exigere videtur hyemem Hippocrates, quæ cutis poros potius laxet, caput vaporibus repleat, & sanguinem dilutiorem, atque aquositatibus imbutum reddat, & universum corpus molle, languidum & succi plenum officiat, ut proinde adventante vere, frigorifico & aquilonio, ob compressas & densatas partes, detentis humoribus, & halitibus, fætus in utero gerentibus, & viscera interiora, in cæteris hominibus, graviter inficiantur: Neque enim à sola

sola hyeme Austrina, sed à succedente vere aquilonio, prædicit Hippocrates futuros abortus in gravidis, aliosque morbos in viris cum scilicet perspiratio interturbatur, & sanguis nequit sufficienter repur-
gari: Coacervatur enim, per austrinam constitutionem plurimum, de serosa & lymphatica colluvie, quæ cum ad uterum fertur (fertur autem facillime eo, cum uterus totius corporis cloaca vulgo audiat) lubricando parietes, & ligamenta emolliendo, frequentissima fit abortus causa: maxime autem, quando aquilonia ut diximus, succedat tempestas, quæ penetrante suo frigore, partes membranaceas irritando, plurimum cooperatur; atque simul infantes ipsos in utero debilitat: similitudine desumpta à fructibus quæ alluisse videtur Poëta:

Quos maturat hyems præcoces fervida fructus,
Insolito veris frigore sponte cadunt.

At vero nec ista tempestatum indebita vicissitudo, semper sufficiens est, ut abortum provocet, sed sæpius tantum disponit, ut is, quacunque alia de causa, vel interna, vel externa accedente subsequatur; quamobrem tunc abortient utero gerentes, cum animi motibus & passionibus perturbatæ, aut immodicis exercitationibus commotæ, aut largiori victu & potu usæ, cumulas, ex præcedenti temporum vicissitudine, & dentatas humorum superfluitates, veluti consopitas excitent & exagitent; unde uterus, ejusque vasa ut mox diximus laxentur, atque lubriciores viæ redditæ deponant, quod interius est reconditum: Hinc in Aphorismo adjectum est, *ex quacunque occasione Gravidæ abortire*, quæ nimirum commoveat & agitet, excrementa, per hyemem austrinam congesta, atque ab aquilonio vere detenta, ut hæc commota, & agitata, relaxent vasa uteri, & abortum procurent: Contingit autem potissimum fætum ab his labefactari, quia cum tenerior sit, facile quascunque alterationes suscipit & succumbit.

Quod si causæ istæ externæ desint, nullamque præbeant utero gerentes, ejuscemodi perturbationis occasionem, adeoque ad legitimum pariendi tempus perveniant, fore adhuc, subdit Hippocrates, ut ipsæ mulieres partus edant imbecilles & valetudinarios, quippe humores illi antea cumulati, per partum fieri nequit, quin commoveantur, & commoti tenellum fætum non inficiant & perturbent: sed & verendum valde, ne per tempora partum præcedentia, ad uterum cum fætus alimento delati, teneras ejus partes etiam defædaverint

& coinquinaverint circa sanguinem, unde postmodum languor, & mala valetudo, veletiam interitus statim à partu, cum præsertim aëri, per aquiloniam tempestatem algido subjiuntur.

Hæc ergo speciatim de gravidis atque enixis adnotat Hippocrates: Cæteris vero hominibus, dysenterias & ophthalmias siccas, ut explicat in Commentario Galenus, quæ sunt sine fluxu, nam cum oculis illachrymantibus humidæ dicuntur, At vero praxis & experientia docet, lippitudines seu ophthalmiæ potius graciles & picrocholos corripient, obesos vero & humidos intestinorum difficultates seu dysenteria; quod & idem Hippocrates exposuit *citat. Libro de aëre aquis & locis; pituitosis igitur difficultates intestinorum fieri verisimile est, & mulieribus, pituita de cerebro defluente, propter naturam humidiores; biliosis autem lippitudines siccas, propter carnis caliditatem & siccitatem.* Quod autem dysenteria tales oriantur hac tempestate, ratio jam sæpe data, Auster enim non tantum congregat succos, sed etiam caloris & acrimoniæ characterem iisdem imprimit: Hi potissimum ad intestina confluunt, utpote prævio Aquilone debilitata, ibique propter acrimoniam excoriantem facile *dysenteriam* excitant.

Ophthalmia sicca autem ex eo contingunt, quod quidem oculi, ab Aquilone debiliores redditi, suscipiunt illud quod ab Austro collectum est, sed effluere non permittunt obstante aëris algore & rigore atque exinde facta pororum constrictione & consequenter *ophthalmia sicca*, denique in hoc Aphorismo ait Hippocrates, *senibus accidere destillationes qua cito interimunt.* Has autem non simplices esse, quales ad os & nares feruntur, manifeste deducitur ex eo, quod hic in textu subjicitur, *cito interimere*: Imò clarius explicatur in *supracitato Lib. de aëre, aquis & locis: ubi propter raritatem & eliquationem venarum*, ejusmodi defluxiones in senibus fieri dicitur, *quibus aliqui repente pereant, & alii semisyderati dextra aut sinistra parte fiant.* Jam ergo, etsi defluxiones & destillationes in senibus difficulter concoquantur, non tamen repente interimere solent aut syderationem afferre: Quare putandum ex Aquilonia tempestate cerebrum, per hyemem Austrinam humoribus aquosis & crassis repletum quodammodo comprimi, ejusque ductus atque emissaria impediri, quo minus valeat seipsum ab hisce superfluitatibus repurgare, quæ propterea ex vitio per moram & per frigidum aërem contracto, si principium nervo-

nervorum & nervos ipsos occupent, Apoplexiam vel Hemiplexiam afferent, quia ibidem circulatio impeditur: Si vero venas aut vasa lymphatica subeant in abdomine, lævitates intestinorum & hydropes, similesque alios morbos parient, ut ipsemet Hippocrates profequitur in sæpe cit. *Lib. de aëre aquis & locis*, quin & si in fauces aut Pulmones, decumbant, & cordis vascula pervadant, anginas, pleuritides (quæ rigidissimo & Aquilonari potissimum tempore generantur) procurant & cito interimunt.

Hæc autem facilius videntur senioribus evenire, quippe qui destillationibus sunt obnoxii, & capite ac pectore prælanguidi, amborum partium ægritudinibus sæpe numero laborare solent. Quamvis vero hæc mala senibus accidere dicat Hippocrates, verisimile tamen est etiam prænotata mala juniores arripere; quamobrem rationi consentaneum videtur, non solum pro ætatum diversitate, sed etiam pro cujusque varia constitutione, & corporis habitudine, vitaque antea, diversimode tum viros, tum feminas, tum juvenes tum senes, tum pingues tum macilentos, ab ejusmodi tempestate laboraturos, iis vero præsertim in partibus quæ affectæ & debiles fuerint.

Num autem ægritudines hic ab Hippocrate recensitæ, ipso quidem vere, an vero succedente æstate futuræ sint, non convenit inter expositores. Verum cum in Aphorismo dicatur: *quibus partus in ver incidit*: & in *Lib. de aëre aquis & locis* scriptum sit; *primum quidem mulieres, quibus partus ad ver instat*: certe fateri oportet, abortus, & funestos exitus infantum ipso verno tempore eventuros: si enim supervixerint, interitus periculum evasi, atque usu lactis perpurgati, conceptam in utero malitiam ut deponant, & salubriorem induant constitutionem necesse est; multum enim ad id valet, nec non ad permutandas naturas, ac mores ipsos, proba lactis conditio, ut in libro meo de morbis infantium fuse ostendi.

Celsus etiam Libro 2. Capite 1. hanc Hippocratis sententiam interpretatur, sic habet: *Si austri, pluviaeque hyemem occuparunt: ver autem frigidum & siccum est: gravidae quidem fœmina, quibus dum adest partus, abortu periclitantur, hæ vero quæ gignunt, imbecilles, vixque vitales edunt.* Quibus plane ostendit, fœminas ipso vere parientes periclitari: Cateri vero morbi, aliis contingentes, pro corporum &

habituum varietate, poterunt in sequentem etiam æstatem protendi & populariter grassari. Sed enim tunc potissimum morbi inde provenientes observabuntur, cum superfluitates humorum detentæ, viscera opprimunt & inficiunt, istæ vero non nisi ex Aquilonio vere detinentur, adeoque tunc morbos parient, citius tamen vel serius pro corporum varietate & humorum superabundantium dispositione: Si autem usque ad æstatem protraherentur, facile possent æstivo calore attenuari dissolvi atque etiam per sudorem educi.

Quid tandem agendum sit, ut, quoad fieri possit, ejusmodi calamitatibus occurratur, paucis exponam, plura ex praxi arripienda. Et quidem si ab inquinamentis & aquositatibus detentis, hæc mala imminet, ratio dictare videtur, illis potissimum repurgandis incumbendum, in dicta quoque diætâ, quæ valeat sanguinem puriorem progignere capite simul & ventre roboratis: Quamobrem cibi vitentur humectantes, atque obstruentes, potus rerum gelidarum, somnus immoderatus, ipseque aër aquilonius & frigorificus, & quæcunque possunt sanguinem obtundere, effatere & perspirationem impedire. Venter in utero gerentibus præsertim, assiduo foveatur aromatibus, ac sæpe etiam tum is, tum lumbi spiritu vini purissimo, tinctura Kermes, nec non unguento vel emplastro comitissæ dicto, de crussa panis montagnanæ aliisque roboventur, cavendo ab his quæ vel bene vel male olent, item à trepidatione, saltu, ac vehementibus animi pathematibus: Succum Astaci contusi & expressi cum vino semel aut bis singulis mensibus exhibitum ab abortu præcavere scribit Hartmannus: è Vitriolo Romano ad solem in calicis formam redacto, atque pelle arietina acu percusa incluso, instar zonæ, lumbis gestato, præcautas ab abortu plerasque prægnantes vidi, quibus levi quacunque de causa is alias accidisset: id ipsum haberi à magnete adnotat Helmontius de magnetica vulnerum curatione.

Infantes jam editi, si debiles videantur, præter fots externos, vegeto lacte ex sanis nutricibus alantur, & oleo macis perungantur, stomacho & spina; atque interea detineantur in locis calidis, ut aëris inclementiam evitent.

Cæterum in aliis hominibus & morbis proderunt, quæ cumulos humores educunt, sudores movent, & ventriculum ac cerebrum

brum roborant, servata interea convenienti diætâ, pro corporum affectorum diversitate.

Dices 1. Non videtur hic potior esse ratio, cur ejusmodi fiant in vere, quam in æstate ut dictum in præcedenti aphorismo, ergo præsens hic Aphorismus male sonat. R. Morbos anticipare tripliciter 1. cum magna & prava est mutatio, sic scripsit *Hippoc. 2. Epid. 1. in cranone æstate humida carbunculos fuisse factos.* II. Quando adest dispositio corporum, nam debilitas corporis facit, ut citius morbi arripiant, ita hic mulieribus (non expectata æstate) abortus & difficiles partus fiunt, ut testatur 1. Epidem 3. *ubi cum hyems multa in vere fieret plurimas mulieres graviter ex partu laborasse scribit & post partum graviter egrotasse.* III. Causæ sunt qualitates temporis non naturales, variæ & peregrinæ atque inconstantes, omnium vero pessima est calida & humida atque austrina constitutio, ubi diu perseverat, cujus exemplum adducit 3. Epidem. Sect. 3. Ista enim maxime facit, ad morborum accelerationem, quia corpora magis reddit fluxilia, abortui & catharris obnoxia, & humores ad putredinem disponit; Id quod non fuit in præcedenti aphorismo, ubi de hyeme aquilonia & sicca locutum fuit.

Dices 2. Hyems eo videtur salubrior, quanto magis recedit ab extremis & fit temperata, atqui austrina magis recedit ab extremis intemperiebus & fit magis temperata, ergo erit salubrior & non erit tot morborum productiva ut vult Aphorismus. R. Negando minorem, nam hyemis austrinæ constitutio non recedit ab extremis quin imo est extrema humiditas, contraria moderatæ siccitati, quin imo contraria est etiam moderatæ humiditati, saltem quoad effectum.

Dices 3. Hyems australis & pluviosa non potest causare contrarios effectus, quales sunt abortus ab humiditatibus & lippitudines à siccitatibus provenientes ergo non verificatur aphorismus. R. Non causat contrarios effectus eodem causandi modo concedo, diverso modo nego, lippitudines enim fiunt à frigore & algore veris, humores tenues reperiuntur, poros cutis constringente, & partem irritante quæ veluti debilior facta per hyemem, & privata quodammodo motu suo, humoribus aquosis stagnationem imperit, accedentibus humoribus biliosis inflammationem parit; Abortus autem fiunt, tum à debilitate foetus, tum ab humoribus & per eosdem

eosdem facta mollitie & laxitate ligamentorum uteri, lubricitatem & exitum foetui parantibus.

Dices 4. Multi Authores ut mox supra diximus, habent in hoc Aphorismo: Si hyems fuerit australis, pluviosa serena: pluviosa autem serena simul stare non possunt sed sibi contrariantur *R. 1.* Solutionem hujus dubii jam in Themate & textu esse datam, omnes has particulas stare posse, dummodo debite nempe per *ly serena*, tepida græce *ἐνθ' ἡος* intelligatur, comparatione enim facta Austri ad Aquilonem sic enim Auster cum sit Aquilone mitior, potest dici serenus id est Tepidus.

Dices 5. Gal. in Comment. dicit sequentia: pituitosis itaque par est difficultates intestinorum advenire, biliosis vero lippitudines, ob carnis siccitatem & caliditatem, ergo hi affectus non fient ab hyeme Australi & pluviosa *R.* Solutio hujus est docta in objectione tertia, & clarius adhuc in ipso textu, ubi modum recensuimus, quo lippitudines generantur.

Dices 6. Ambiens frigidum condensat corpora & sibi vias occludit, ergo non penetrabit *R.* Cum Gal. in Comment. corpora humida, mollia & laxa ab hyeme facta, ad intimas sui partes, aëris ambientis frigiditatem facile admittere; & licet frigus constipet poros, prius tamen communicatur humoribus, qui frigoris sunt vehicula ad partes corporis intimas, stante præcipue sanguinis circulatione. Imo ipsa Autophia docemur & experimur magis penetrare frigus humidum seu humiditati conjunctum, quæ est ipsius vehiculum, quam frigus siccum.

Dices 7. Hippocrates citato sæpius *Lib. de aëre, aquis & locis* ait: valde autem senibus fiunt destillationes, propter raritatem & venarum colliquationem, ita ut subito intereant: Atqui senibus nulla videtur esse raritas, quia compacta & arida sunt illorum corpora utpote frigida ergo: *R.* Etiam hujus dubii in textu jam datam solutionem esse: *R. 2.* Hinc non intelligi tenuitatem non stricte sumptam, id est pororum raritatem: Sed per *ly raritas* intelligitur partium quædam tenuitas & gracilitas, quam plerique quasi senes habet: per colliquationem venarum præter dicta intelligi potest inanitio.

Dices 8. Destillationes in senibus sunt diuturnæ, ergo non statim

stini interimunt, ut dicit Aphorismus: &c. Et hoc in textu esse solum, nempe Hippocratem non intelligere vulgares & minutas destillationes quæ ad os & pectus, sed de iis quæ ad venas collinant.

Aphorismus XIII.

Si vero æstas sicca & aquilonia fuerit; autumnus autem pluviosus & australis, capitis dolores ad hyemem fiunt, & tusses & raucedines & gravedines, nonnulli etiam Tabes.

Contentum seu Intentio.

De æstatis & autumnus declinationibus.

Connexio: A constitutionibus, tempestatis hyemalis & vernæ, æqualitatem non servantium, in præcedentibus Aphorismis fusc deductis, transit Hippocrates in hoc Aphorismo ad alias duas, *æstivam* & *autumnalem*, examinandas, cum suas quoque patiuntur alterationes:

Hic Aphorismus non dividitur, cum una conclusione comprehendatur.

Primum itaque Hippocrates considerat ea, quæ contingunt ex æstate sicca & aquilonia, superveniente autumno pluvioso & australi: mirum autem videtur quod, dum inquit constitutiones æstatis & autumnus, nullam rationem habeat, nec mentionem faciat veris & hyemis, forsitan quia existimat, eas suas habitudines & temperaturas servasse, adeoque præcedentes in prioribus Aphorismis memoratas vicissitudines nullatenus subiisse, ne scilicet quis ea ratione putaret ex æstate sicca & aquilonia, atque autumno pluvioso & australi, una cum inæqualitatibus, reliquarum duarum tempestatum, futuros esse morbos, quos hic in hyeme succedente recenset: Quare sicut bina ibi, sic & hic duo solum inter se comparat anni tempora vicissim permutata.

Inquit itaque; *Si æstas sicca fuerit*: id est plusquam naturalis illius conditio esse consuevit, atque adeo, vel propter imbrium inopiam,

Uu

quibus

quibus non raro humescere solet; vel propter ventos boreales, per idem tempus spirantes, omnemque aëris humorem absumentes; vel denique, si etesiæ venti anniversarii, aëris æstus quotannis temperantes, fortasse per æstatem non spirent; sane hoc modo, dies Caniculares, proculdubio fervidiores observabuntur, ut & Tellus ipsa, præ nimia ariditate, plures in hiatus & fissuras diducatur: His quoque de causis siccum aërem appellamus, cum vaporum est expers & pluviis caret, ac ventis vapores, & nubes dissipantibus percellitur; hinc idem Hippocrates adjecit, *si sicca fuerit & aquilonia*: sicca plane, à perflantibus ventis aquilonaribus: In hanc quoque sententiam condescendit Celsus Lib. 2. cap. 1. qui sic Aphorismum latine vertit: *si sicca æstas Aquilones habuit, autumno vero imbres, austrig sunt, tota hyeme quæ proxima est, tussis, destillatio, raucitas, in quibusdam etiam Tabes oriuntur.*

Siccam ergo & aquiloniam æstatem, si autumnus exceperit pluviosus & australis, ad hyemem, inquit, dolores capitis vehementer fieri: Non enim satis est autumnum esse pluviosum, sed australem pariter esse oportet: nam quandoquidem solent pluviae per autumnum ingentes fieri, præsertim sub ortu arcturi, & Pleiadum occasu, quæ tamen absque ventis Austrinis, sed plerumque cum occiduis contingunt; ut propterea, peculiarem habendam voluerit rationem ventorum australium, qui majora, quam imbres, damna nobis incutiunt: Hi enim sæpissime simplices ac tempestivi, non leve emolumentum cunctis animantibus afferunt, ipsomet autumno, vel ineunte, vel vigente, si præcipue ferantur à ventis salubrioribus: at vero cum ventis australibus, omnino nocent; quippe Austri infestissimi sunt, ex supra traditis. Quamobrem, non immerito junxit Hippocrates, *pluviosam simul & australem* autumnus tempestatem, qua scilicet caput gravetur & destillationes promoveantur, cum pulmonis læsione. Dolores Capitis, qui exinde portenduntur, dicuntur esse vehementes (sive hi Cephalalgia, sive Cephalææ sive Hemicrania, id est vel recentes, vel antiqui iique totius capitis vel dimidiæ seu unius partis sint) quoniam ex imbris & Austris autumnalibus, caput multis humoribus & aquosis succis repleri contingit, qui per meninges, & cæteras partes nervis contextas diffusi dolores pariunt. Accedit quod hyems nullam plenitudinem solvat, sed potius augeat, ac proinde

inde humiditates præfatæ per autumnum collectæ per insensibilem transpirationem, vel sudores, obstante aëris hyemalis injuria, resolvi nequeunt, sed ad glandulas depositæ, & data causa irritatæ varias fluxionum & dolorum species producant.

At quæritur, quomodo fieri possit, ut ab humentibus succis & ab aquositatibus, dolor excitetur, isque vehemens, ut hic asserit Hippocrates? cum tamen ex doctrina veterum & Galenicorum humida intemperies, dolorifica esse nequeat, veluti quæ potius hebetet & obtundat, atque sola corpulentia gravet, quam molestum sensum inferat, qui ipsis dolor audit?

Respondeo, si molesta in sensu tactus perceptio dolor est, quæcumque vim habent poros corporis scindere, dilatare, contrahere, aut aliter à consueto situ distorquere, poterunt quoque dolorem inferre, & eo vehementiorem quo violentius afficient, ut latius diximus in Praxi: Hoc ipsum humores cujusvis generis præstabunt, si malitia pungant, scindant, erodant; si multitudine comprimant, distendant, ac disrumpant; si motu affatim irruant, vel interciso aut impedito cursu seu motu alicubi hæreant. Porro aquosi humores, per pluviosam & austrinam tempestatem in capite collecti, ob falsilaginem, aut acritatem subinde contractam, & multitudine, qua cumulati sunt, & violentia, qua sunt intrusi, vellicando, distendendo, explendo & tumefaciendo, dolores vehementissimos incutient. Sed etsi nullum, suapte natura dolorem excitarent, saltem perspirationem, & circularem sanguinem, si sola quantitate seu mole impediant, & retardent, nocui & molesti partibus erunt, adeoque doloris causam dantes, dolorifici evadent: Pari modo vasa lymphatica, quæ multa per caput circumquaque feruntur, & cerebri corticem, ac Meninges perreptant, plurimum aquosis, ejuscemodi superfluitatibus, per austrinam tempestatem à sanguine refluis oppleri observantur: itemque glandulæ universa totius corporis, iisdem imbibi, quæ deinde à superveniente frigore hyemali compressæ, hæc eadem & graviora mala progignent v.g. corruptiones tabes, Hydropes, tumores. Hinc autem contingit desinere non raro vehementes, ac diuturnos ejusmodi capitis dolores, spontanea è naribus hæmorrhagia, vel sanie ex auribus prodeunte, aut acriori ex iisdem naribus destillante, vel per poros cutis, aut in vias urinarias prolabente, post

acutas febres de genere earum, quas Galenus vocat ardentes spurias.

Ex hac ipsissima ratione & causa, & tussēs & raucedines, & gravedines, per hyemem aderunt, prout aquosi humores, vel pectus vel guttur, vel nasum occupaverint: siquidem cerebrum, magnæ glandulæ ab Hippocrate comparatum, cum aquositatibus repletum, hiberno deinde frigore constipatur, & quodammodo constringitur: Hoc enim certum est, quod Aquilo, suo frigore hostili naturæ nostræ potissimum capiti, pectori & nervis nunquam magis hostilis sit, quam dum media æstate spirat: Cum enim æstivo tempore, corpus nostrum omnibus injuriis patēt, porique undiq; hient, effluvium insensibile sit copiosissimum, & aëris nullo anni tempore major necessitas: Sic aër aquilonius, per apertam corporis nostri Januam, ubique penetrando, non tantum prædictam insensibilem transpirationem plurimum diminuit, sed ipsis etiam visceribus, tota natura contrarius, labem non brevem imprimere solet: Hanc corporis dispositionem excipit autumnus, non solum pluviosus, sed etiam australis, id est ventis calidis & humidis permixtus; & sic corpora nostra plurimis replendo humiditatibus, eas in varias corporis partes, potissimum glandulosas, nitroso aëris ambientis sale irritatas deponit: si protrudat in nares Coryzam, si in guttur & asperam arteriam raucedinem, si in pectus & pulmonem, tussim generabit, aliasque ægri tudines pro vario, in alias partes vitiosorum humorum illapsu. Has autem solummodo Hippocrates memoravit, veluti eas, quæ partes cerebro proximiores affectas denotant, promptiusque cum eodem laborante compatientes, & per glandulas attiguas, excurrentes, vel humores stagnantes solitas excipere.

Denique in fine Aphorismi additur: *quibusdam autem & tabes.* Verum de qua tabe intelligat? potest etiam hic dubitari, & quamvis de quacunque extenuatione exponi possit, attamen magis cohærebit Hippocratis menti, si ea tabes speciatim explanetur, quæ pulmoniacæ appellatur; siquidem in græco textu scribitur *Phthisis* quæ proprie pulmonis affectio est, & verisimilis induci potest, ex pluviosa & austrina autumnæ tempestate, qua non tantum caput, sed etiam pulmonem superfluitatibus serosis repleti contingit, ac postmodum illarum repurgationem impediri, à super-

veni-

veniente hyeme, pectori potissimum & pulmōni, ut diximus, inimica.

Quamquam autem humores isti, in pulmōnibus hærentes, sæpe numero acrimoniam, acorem vel salsedinem contrahant, etiam ex vitiatō partis alimento, & ex consimili conditione, quam sortiri solent, detenti halitus ac vapores è toto corpore exspirantes, ita & sudores & urinæ: Nihilominus tamen, adhuc omni malitia exuti, sola quantitate & mole, si diutius restagnent, non leviter pulmōnem inficere, & tabem ac Phthisim inferre consueverunt. Unde Hippocrates 7. Aph. 38. *destillationes* (inquit) *in ventrem superiorem* (id est in thoracem) *suppurantur intra viginti dies*: ubi cum usus sit græca voce *Catharri*, profecto ab humoribus vulgo pituitosis, hodie lymphaticis seu aquosis dictis, illas pendere existimandum. Hæ enim destillationes seu defluxiones, cum ordinarie acres sint, facile tenellam pulmōnum substantiam exulcerant; maxime in iis qui ad Tabem dispositi sunt; quas describit Poëta:

Ad tabem properat, Phthysico de stemmate natus:

Cui sæpe ad pectus, phlegmata falsa cadunt,

Qui faciem Hebræi, maciemque figurat avari:

Cui vox angusto pectore rauca sonat.

Qui gerit oblongum, velut alta ciconia collum:

Cui, velut ala Aquilæ, prominet os scapulæ,

Nescis, cur Phthysico natura annexerit alas?

Debet ad ignotas, mox volitare plagas.

Qui autem isti sint, quos tabes ex hac constitutione sit vexatura, Hippocrates tacuit & non expressit: Profecto non omnes eo morbi genere affectum iri liquet ex dictione, *quibusdam vero tabes per ly quibusdam* aliquos duntaxat tabe laboraturos indicatur. Galenus in commentario interpretatur, qui ad hunc morbum apti natura sunt, utpote qui angusto sunt pectore, & quibus à capite ad pulmōnem fluxio defertur. Sed clarius ex eodem Hippocrate 1. & 3. Epidemior: videntur esse, quibus scopulæ instar alarum sunt exporrectæ, pectus angustum, collum oblongum, caput magnum, ut in gracilibus, qui

sanguinem natura nacti sunt acriorem & tenuiorem, modico glutine, & multo fero scatentem; unde cum à præcedentē tempestate pluviosa & australi, pulmones & cerebrum abundantiori fero perfundantur, facile in tabem incidunt, labe nimirum per sanguinem illata.

Horum ergo imminentium morborum prophylaxim & præcautiones ex antea traditis facile innotescunt, præterea, quæ inferius afferremus, & in praxi per extensum retulimus.

Dices 1. Cum eadem videatur esse ratio undecimi & decimi tertii aphorismi, perperam videtur Hippocrates omisisse in hoc ophthalmias & dysenterias: præterea cur non pariter innuit, in hyeme futurum parturientibus periculum? denique cur destillationes, quarum hic meminit, ibi etiam non addiderit? ratio quærendi est, nam quemadmodum illi hyemi pluviosæ & australi, succedit in vere frigus aquilonium, ita hic autumno pluvioso succedit hyems frigida; Ergo eadem debuisset esse ratio. *℞.* Hippocratem tantum virum, hæc nullatenus temere omisisse, nam longe alia est hyemis, alia aquilonis natura & conditio, nam Aquilo, multo magis viscera interna penetrat & ferit quam hyems, cujus frigiditas ignava est, & tantum exteriora superficie tenuis percutit, nec tanta vi interiora ferit: Hinc etiam abortus prægnantium non ita timendi sunt, nec quoque dysenterix quæ magis internam requirunt impressionem & characterem, tam facile pertimescendæ: Hinc neque tam cito interimentes fiunt destillationes in hyeme, quam in Aquilone: deinde hyemis frigiditas est ordinaria & naturalis, Aquilonia tempestas autem præternaturalis.

Instabis Tabes (quarum hic meminit) videntur habere majorem impressionem quam destillationes, ergo hyems contra jam dictum assertum, majores faciet impressiones, quam Aquilo. *℞.* Negando antecedens, nam major est impressio, quæ celeriter interimit, quam illa quæ tarde, sed à destillationibus istis aquilonaribus, celerius interimitur homo, quam à Tabe, ergo.

Urgebis: Major est impressio habitualis, quam non habitualis, sed in Tabe est habitualis, in destillationibus vero non, ergo. *℞.* Major est impressio quoad durationem concedo, quoad instantaneum peri-

periculum nego, ergo absolute major est impressio, nego consequentiam.

Instabis denuo: Tabes potest fieri, in utraque constitutione (in Aphorismo undecimo & decimo tertio memorata) ergo non videtur habuisse rationem quod ejusdem hic meminerit, in altero non: *℞.* Tabem quidem in utraque constitutione fieri posse, magis tamen hic propter autumnii inæqualitatem: Imo experientia docet quod ad easdem contrarietates, iidem semper non fiant morbi, ob circumstantiarum defectum & mutationem.

Dices 2. Ab humiditate, non videntur fieri posse dolores capitis, quia hæc est qualitas passiva & non activa. *℞.* In abstracto & lato sensu est passiva concedo: in concreto & stricte loquendo, aut absolute est passiva nego, quia ut diximus in textu, quantitate & mole sola humores peccare posse, partes distendendo & gravando.

Dices 3. Plurimi homines continuo fere patiuntur destillationes ad pectus, & tamen non fiunt Tabidi, ergo Aphorismus non est tantæ veritatis. *℞.* Hippocrates dixit *quibusdam* non omnes fieri Tabidos, eos ergo intelligit fieri tabidos, qui ad Tabem sunt maxime dispositi, quos in textu abunde descripsimus.

Dices 4. Commentatores alii, ad hunc Aphorismum referunt cerebri sphacelismos, Cataphoras, Caros, Lethargos, Catalepses &c. quarum nos nullam fecimus mentionem. *℞.* Hos affectus Authores nobiscum referre ad Cephalalgias de quibus egimus. Quod autem in ejusmodi tempestatum constitutionibus sphacelismi persæpe fiant, patet ex segetum rubigine (vulgo *Brandt*) qua spicæ manescunt, & in foetidum pollinem degenerant: de hoc Sphacelo segetum, arborum & vitium legatur Plinius.

Aphorismus XIV.

Si vero Aquilonius & siccus sit autumnus, hominibus natura humidis & mulieribus commodus: reliquis vero ophthalmia sicca accident, & febres acuta, & gravedines diuturnæ.

Nota

(Nota ly gravedines plerique omittunt & merito quidem ut audiemus in textu, & sic ponunt & febres acutæ & diuturnæ) *nonnullis vero etiam melancholia.*

Contentum seu Intentio.
De Aquilonio & sicco autumno.

Connexio: Tam arcte connectitur hic Aphorismus cum præcedenti, ut Galenus ipse in *Commentario* scripserit ob nimiam affinitatem & inter se conjunctionem, ex duobus unum esse faciendum, ut ex utroque unica sententia colligatur; veluti serie quadam continuata, plures in unum locum transtulit Celsus *Lib. 2. Cap. 1.* qui postquam morbos ex æstate aquilonari, & autumno austrino ex eodem Hippocrate commemoraverit, statim subjunxit: *Sic autem autumnus, quoque æque siccus, iisdem Aquilonibus perflatur, omnibus quidem mollioribus corporibus inter quæ muliebria esse proposui, secunda valetudo contingit: durioribus vero instare possunt lippitudines sicca & febres, partim aucta, partim longa, & hi morbi qui ex atrabile nascuntur.* Et Hippocrates ipse, libro sæpius citato *de aëre aquis & locis*, uti præcedentis appendicem, hanc eandem sententiam his verbis describit: *Quod si Borealis sit autumnus & siccus, & neque sub arcturo pluviosus, confert pituitosis natura, & maxime his, qui humidi sunt & mulieribus, biliosis autem infestissima est hæc constitutio: valde enim exsiccantur, acciduntque eis lippitudines arida & febres acuta, ac diuturna, & aliquibus bilis atra, siquidem quod liquidissimum & aquosissimum in bile est, consumitur; densissimum vero & acerrimum remanet quod idem accidit, secundum eandem rationem sanguini, unde hi morbi his accidunt.* Unde sic affectum autumnum succedere æstati, pari modo sicca, & aquilonari, antea descriptæ, manifestissime demonstrat, ut ex contextu ejusdem loci liquido patet, Ejusdem quoque sententiæ est Galenus, qui in *commentario hujus Aphorismi*; apparet inquit, sermonem nunc habitum non esse integrum Aphorismum, sed partem secundum unius aphorismi, cujus priorem partem nuper seu paulo ante destitimus explanare. Conferendus etiam in his est Aristoteles qui *Lib. I. probl. II.*

causam secundæ valetudinis, in mulieribus & pituitosis, ex sicca & aquilonari æstatis & autumnii constitutione inquit, & mox Problemate duodecimo, cur biliosi exinde infestentur examinat, continuata omnino oratione, sub eadē æstatis & autumnii sicca & aquilonia tempestate.

Hic Aphorismus duas habet partes: In prima juvari ait naturas humidæ ex ea constitutione: In secunda vero morbos addit, qui in siccis naturis expectandi sunt.

Confert autem hæc sicca & aquilonaris constitutio, corporibus humidioribus, absumptis nimirum, vel compressis & deductis ad vias urinæ, aquosis superfluitatibus, quibus illa ut & muliebria superabundant. Cæteris vero id est biliosis, ut idem Hippocrates explicat, sive ut mavult Celsus, durioribus corporibus infestissima est hæc sicca temporis constitutio, quæ illa magis extenuat, exiccat, & obdurat; quin imo aridis lippitudinibus & febribus acutis ac diuturnis afficit: acutis quidem, quibus sanguis & bilis ipsa tenuior & acrior fit, diuturnis vero, quibus acidior, consistentior & magis effoeta, pro aliarum rerum non naturalium usu vario, ab ejusmodi corporibus antea servato; unde adjectum est in Aphorismo, *nonnullis etiam morbi melancholici*: cujus rationem idem Hippocrates *Lib. de aëre aquis & locis* afferens inquit: *quod liquidissimum & aquosissimum in bili est, consumitur, densissimum vero & acerrimum remanet; quod idem accidit, secundum eandem rationem & sanguini, unde hi morbi his accidunt.* Quemadmodum autem Picrocholis & gracilibus antea dixerat, acutas febres, & lippitudines siccæ evenire, ita nunc durioris texturæ corporibus & sanguinem nactis consistentiorem, morbos melancholicos, intellige, scirrhus, affectiones Hypochondriacas, deliria melancholica, mania, melancholiæ, & alia id genus accidere portendit.

Hæc quippe notiora sunt, quam ut fusiori egeant deductione: verum quod de *longis gravedinibus*, à quibusdam memoratur, penitus mihi non videtur consonare; nam quæ unquam ratio afferri potest aut poterit, quæ persuadeat longas gravedines, ex æstate & autumnio siccis atque aquilonaribus futuras? cum per ejusmodi arefacientem tempestatem, si quæ in corporibus, humidæ superfluitates collectæ erant, satis superque, extenuari, consumi & egeri possint.

Quocirca, nec illarum, nec alterius humidæ ægritudinis ne verbum quidem fecit Hippocrates in *Libro de aëre aquis & locis*; sed neque

diligentissimus sententiarum ejus Compiler Celsus, qui sic locum hunc, ut antea dictum est rectissime interpretatur: *durioribus vero instare possunt, & aride lippitudines, & febres partim acuta, partim diuturna & hi morbi qui ex atrabile nascuntur*; quamobrem jure optimo Fuchsius existimat, *Librarium seu Typographum errore quodam, κόρυζαι pro Περίχρονιαι, quod ab una in aliam dictionem facilis sit lapsus*. Neque vero his contentus Cardanus, hanc errandi causam Galeno adscribere non veretur cum inquit: *Galenus suo more, legit in utroque textu gravedines, seu κόρυζαι & utriusque omittit expositionem: gravis & accuratus certe expositor, dignusque pro quo quidam tantum digladiantur*: Et paulo ante scripserat: *Legi debet: & diuturna: non gravedines*. Littera enim græca corrupta erat ex Πυρετοι ὀξέες χροινικαὶ pro Κόρυζαι. Per lippitudines siccas intelliguntur illæ quæ fiunt, & propter lentorem tenacem, quo humores nimium inspissati partibus adhærent, & propter mordacitatem, qua partes exquisitoris sensus, veluti sunt oculi, irritantur.

Per *melancholiam* vel prout in aliis legitur contextibus *atram bilem*, veteres adustam & torridam bilem, recentiores, succum acidum quendam ex humore acido & bile enixo lixiviosum & scorbuticum vulgo dictum, qui furia humani corporis pessima (quocumque nomine vocitetur) quæ cuncta levia spernit remedia, & violentioribus exacerbatur: unde ex hoc malo hoste ortum ducunt morbi melancholici supra dicti, quando nimirum humores moderate acidi, evaporatione substantiæ humidæ & serosæ, in majorem corrosionem, imo malignitatis gradum deducuntur, vel ab ipsa oleosa sanguinis parte vulgo bile appellata, quæ debite sero, quo veluti fræno regebatur, destituta concentratione fit effera, ut impetuose in corpore humano tumultuetur unde deliria maniaca. Revera id ipsum in foro Politico contingit, si desit actionibus humanis debita phlegmatis miscella, ingrata, tædiosa ac importunæ evadunt: Hinc bene Terentius: *Illud est vere sapere ubicunque opus, animum flectere*: clarius adhuc Poëta:

Actio nulla sapit, si dulcia phlegmata desint;
His sine, fel mordax, vis, furor, ignis erit.
Qui nequit occultos abscondere pectoris æstus,
Offensamque hilari, dissimulare joco.

Hic

Hic merito imprudens, vaftris sapientibus audit,
 Frigescat modica flammeus ignis aqua.
 Nec mirare: Sal est sapientia, solvitur undis:
 Quippe sal in sicco, diffluere igne nequit.

Hic adhuc mirari & inquirere libet, cur eam hoc in Aphorismo omiserit constitutionem, quam eodem *Lib. de aëre, aquis & locis*. inter jam relatas descripserat, ex æstate nimirum pluviosa & austrina, & simili autumno, indeque futuram hyemem morbidam, *pituitosis* quidem per febres ardentes, spurias dictas, *biliosis* verò per *costarum & pulmonis inflammationes seu pleuritides & peripneumonias*, non est facile divinare: sic pariter, cur alias temporum conjugationes deseruerit, quas Galenus comminiscitur, atque artificiali schemate effingit Cardanus, pluribus itentidem in eundem Galenum invecus de regionibus temperatis, & de ordine temporum, ex ortibus & occasibus stellarum. Verum credere licet voluisse has solum veluti in cæterarum exemplum Hippocratem afferre, ut inde discerent Medici, quæ de causa, ipsemet scripserit initio hujus libri, temporum mutationes morbos parere. Verum quid est, quod nobis mortalibus non officiat? Currant & procedant anni, & anni tempestates, ea serie, ea salubritate, quam sibi fingit Heurnius, forte homines non ægrotabunt, non obibunt? aër ipse, quem assiduo, in ipsiusmet vitæ tuitiorem inspiramus, nobis nocumento est: cibo quo vescimur, gravamur. Aqua siti sedandæ per accommoda, si frigidior debilitat, si abundantior opprimit, si importuna delaxat: Vino reficimur, exacui-mur, amissumque resumimus vigorem; sed & dolemus, inebriamur, stupefcimus: somnus qui fessa membra levat, otium parturit, hebetat cerebrum, & vigilia quæ spiritus & sanguinem acuit, infirmat: sed & quo tempore, re quapiam delectamur, fastidimur; & gaudium ipsum nobis tam optabile, & jucundum, sæpissime exanimat: nec ulla res est quæ prosit, quin ex adverso statim, & ultro non obfit. Quamobrem ruimus adhuc in morbos, & in mortem etsi anni tempestates, prospere & salubriter procedant. *Quotidie enim morimur* inquit *Seneca, quotidie demitur aliqua pars vitæ, & tunc quoque cum crescimus, vitæ decrescit, & hunc ipsum quem agimus diem, cum morte dividimus.*

Dices I. *Omne nimium natura inimicum*, sed æstas sicca & Aquilonia

lonia & autumnus similis sunt nimia, ergo erunt naturæ inimica, ergo etiam humidis naturis, aut mulieribus non proderunt. *℞.* Distinguo minorem, sunt nimia naturis siccis concedo, humidis in temperatis nego, neque timenda est mutatio, ab uno contrario ad aliud, quia si à tali tempestate tantum, humidi intemperati læderentur, inde omnes sicc perirent.

Instabis Simile sese bene habet ad simile, ergo humidi & mulieres bene sese habebunt ad tempus humidum, ergo non bene ad tempus siccum ut asserit aphorismus. *℞.* Simile temperatum bene sese habet ad simile concedo, intemperatum nego.

Dices 2. Horum temporum eventus ac fortunæ, non possunt omnibus Regionibus accommodari, præsertim in temperatis, & moderatis, quia in his rariores sunt, imo sæpe nulli morbi, ejusmodi enim tempora, Regionis intemperiem corrigunt, & sæpe calida & sicca Regio corrigitur, ab æstate frigida & humida ergo male sonat Aphorismus. *℞.* Concedo totum antecedens, nego consequentiam.

Dices 3. Autumnus est naturaliter siccus, ergo qua talis nec singulariter proderit, nec nocebit. *℞.* Nego consequentiam, nam quod hic profit vel noceat, non facit id respectu sui ipsius, sed respectu prægressæ æstatis calidæ & siccæ.

Dices 4. Si autumnus siccus & Aquilonius causaret febres acutas & longas, causaret contraria, quod fieri nequit. *℞.* Causaret contraria in genere causæ æquivocæ concedo, in genere causæ univocæ nego: febres enim acutas causant in corpore bilis & sanguis aliique humores exaltati, ferventes & fermentantes, & quidem in corporibus biliosis: Longas efficit Humor crassus, crudus, acidus, viscosus, in corporibus humidis.

Quæres ergo 1. Qualis nam aër nostro corpori in genere sit saluberrimus? *℞.* Schola Salernitana comprehendit aëris saluberrimi conditiones, his duobus versiculis.

Lucidus ac mundus fit rite habitabilis aër
In foetus neque fit, nec olens fælore cloacæ.

Optimus inter omnes aër est, qui in primis qualitatibus est temperatus, & sic est sanitati analogus: illuminatus & clarus, & sic animatur: Eventilatus vel naturaliter vel artificialiter, & sicc cribatur
&

& perficitur, alias quiete per modum aquæ corrumpitur, juxta illud: *putrescunt sensim, ni moveantur aquæ*: Omnis evaporationis expers, ex solo sterili & saxoso spirans, & sic naturæ sui elementi, evadit similior: Nullis aporrhæis corporum corruptibilium inquinatus, hæc enim corpuscula fermentabilia, vehiculo aëris ad interiora delata, non semel in humoribus & spiritibus vitalibus ingescuntiam & motum præternaturalem concitant: Has aëris qualitates humano generi sanissimas; Medicis autem Solis insalubres esse docet Poëta,

Fætidus, obscurus, crassus, nebulisque refertus,

Iste aër Medicos, Marce, valere facit.

Ægrotos, quæ sternit humi: cumulando monetam

Stare facit loculos, aura Galene tuos.

Qui mala mille pluit, mortalibus humidus Æther:

Hic medico nummos, divitiasque pluit.

Sicca serena petit, solaria tempora messis:

Dum fluit æther aquis, tum Medicina metit.

Quæres 2. Curaër superior, inferiore sit frigidior? cum tamen vicinior sit soli & astris, à quibus calor in inferiora influit? &c. Hoc fieri duplici modo? *Primo* quia aër nos ambiens illum calorem à radiis solaribus in petris & terra reflexis mutuum habet: *Secundo*, cum aër inferior à pondere superioris incumbentis pressus, multo fiat spissior, crassior & gravior; hinc radii solares in eo magis reflexi calidiorem efficiunt.

Quæres 3. Cur in aëris Regione valde sublimi, animantia vivere nequeant; teste *Majolo*, qui docet in Olympi vertice nulla inveniri viventia: & doctissimo *Boyle* qui experientia didicit, animantia recipienti inclusa, extracto per machinam pnevumaticam aëre, quanto citius mori. &c. Aërem in sublimi regione (ibi etenim propter spatii amplitudinem rarefactus quaquaversus extenditur: nec per modum aëris inferioris à superiori comprimitur) tam levium & subtilium esse partium, ut impropportionata, respirationis evadat materia; id est ob nimiam subtilitatem, vesicularem, pulmonum substantiam inflare nequeat, quæ proin in sese concidens, circulationem sanguinis, circa cor impediendo mortem infert.

Aphorismus XV.

Ex anni constitutionibus, in universum siccitates, assiduis imbribus sunt salubriores, & minus mortiferae.

Contentum seu Intentio.

De Tempestate sicca cum Pluvia comparata.

Connexio: Cum superioribus Aphorismis, diversas temporum constitutiones retulisset, easque tum siccas tum aquilonias, tum pluviosas & austrinas, ex quibus morbos varios imminere dixit: Nunc omnes simul unico, sed generaliori Aphorismo, inter se comparatas decernit, *siccitates semper* imbribus esse salubriores & minus mortiferas. Et generaliter dicit (intellige; modo cetera ex æquo procedant) *siccæ constitutiones, pluviosis sunt salubriores*: Unde hic Aphorismus ob brevitatem nullam patitur divisionem, cum hac unica conclusione totus comprehendatur, ejusque ratio facile ac paucis deducitur: Nam aër suapte natura talis est conditionis, qualem animalium vita videtur exigere, quo circa si ex imbribus humidior evadat, sicut ad complura vitæ munia, præsertim ad sanguinis floriditatem, & pulmonis repurgationem erit ineptus, ita morbis inducendis materiam suppeditabit; sæpissime enim ex humescente sanguine, & aquosis superfluitatibus ægrotamus, quæ nec recte regi, nec exacte confici queunt, cum ipsum sanguinem hebetent, viscera infarciant & inquinent, nervos mollescent, & relaxent, sensum motumque obtundant, corpora densent, & excrementa omnis generis in eodem accumulent, & putredinem ac corruptionem procreent, & sic non raro morbos afferant immedicabiles: Præterea aër imbribus, & ventis Australibus, immodice humefactus, & crassior effectus, non modo obest, dum inspiratur, sed etiam contactu suo impedit, quo minus insensibilis perspiratio recte procedat, ut mox monuimus.

E con-

E contra vero aër ejuscemodi humore aut humiditate liber & vacuus, insensibilem transpirationem adjuvat, & melius internas superfluitates, è sanguine absorbens, per pulmones expiratione repurgat: siccitate enim corpora universim roborantur, pauciora aggregantur excrementa, spiritus depurantur, minor putredini locus ac per consequens rarior morbis occasio præbetur. Hanc veritatem experientia ipsa multiplex confirmat, non tantum siccas temporum constitutiones, sed etiam Regiones, in quibus aër tenuior, & siccior est, salubriores omnino esse iis, quæ humidiores & crassiores illum sunt sortitæ: audiamus quædam experimenta, quæ dicta nostra luce meridiana clarius demonstrant: siccioris & subtilioris aëris incolæ, corporis & ingenii robore multum superant, humidioris aëris & palustrum aquarum Accolas: Animantia sicca v. g. cervus, dama, anser sylvestris, tum salubritate corporis tum longævitate vitæ, bestiis humidioribus longe præferuntur: Ideo hodierna adhuc die teste *Verulamio* in certis *Æthiopiarum* montibus, aura siccissima perflatis, ab omni Palade, fluminibus, mari, aliisque aquosis evaporationibus longe distitis, incolarum vita ad centum quinquaginta annos extenditur: Ratio in promptu est quia sanitas nostra, sæpissime humidi excessu, rarissime defectu laborat.

Hæc autem hæcenus dicta, cum grano salis de siccitate tantum temperata, non excessiva aut longiori tempore durante intelligenda esse, excessiva enim æque nociva est, & variorum quoque morborum causa procatacætica evadit, ut clare sequens Aphorismus docet: *In siccitatibus autem tabitudines, lippitudines &c.*

Imo ipse etiam Poëta siccitatem, in conservanda bona valetudine humido præfert, dum canit.

Opto tibi multam, nullam tibi poto salutem:

Est potior pota, sicca salute salus.

Verum plura adversus jam dicta, & hanc Hippocratis sententiam pugnare videntur.

Primo: Quia vita ex Aristotele dicitur, *Mansio caloris in humido*, quamobrem videtur salubrior statuenda, humida anni constitutio, veluti vitæ congener, neutiquam sicca illi contraria, hinc senes idcirco ad interitum festinare dicuntur, quia per ætates semper sicciores fiunt.

Secundo

Secundo quoniam ex Hippocrate 2. Aph. 16: victus humidus commendatur pueris, pueri autem humidi sunt, utque in eadem humida natura conserventur, humidus victus illis præscribitur.

Tertio: Hoc eodem 3. Aph. 9. dicitur in autumno exitiales morbos fieri, verum autem saluberrimum esse & minime exitiosum: atqui verum humidum est, autumnus vero siccus, ut propterea tabidis nocuus dicatur.

Quarto Pueritia omnium ætatum optima censetur, quia humida, senectus vero pessima quia sicca.

Quinto Propria aëris qualitas & natura humida ponitur, igitur humida & non sicca constitutio, veluti salubrior anteponenda est, cum per illam aër in suo statu naturali servetur.

Verum hæc facillime diluuntur, iisdem plane Criteriis Aristotelicis & Galenicis, & quidem *Primo*: vitam egere humido dicimus, sed proprio, consentaneo & alibi, ut idem Aristoteles advertit, non autem extraneo, incongruenti & aqueo, quo potius illa extinguitur, quam foveatur, quo circa vita comparatur ab iisdem flammula, quæ oleo eget, ut conservetur.

Secundo: Modo Hippocrates, hic humidum ex imbribus externum in salubre dicit; humidum victum, id est liquidum & potabilem, pueris febrientibus commendasse Hippocratem, in commentario illius aphorismi jam supra exposuimus; Etenim Hippocrates non vult alendos esse febricitantes, cibis duris & solidis sed potabilibus quæ Sect. 2. Aph. 11. clarius explanavit.

Tertio: Autumnus non siccitate, sed summa vicissitudine, exitiosos morbos parturit, ut suo loco dictum est.

Quarto: Senes ad interitum festinant, non præcise exsiccitate sed ab effecto sanguine & à viscerum languore: & licet ex siccitate mors contingeret, illa extrema esse debet siccitas, quæ vitæ fomitem exhauriat, secus vero quæ moderata est & externa, superfluum humidum absumendo, vitæ potius opitulatur quam adversetur.

Quinto: Aër sua natura nec calidus, nec frigidus nec humidus est, sed fluidus & permeabilis cujuscumque alterationis suscipiendæ capax, atque tunc solum à sua naturali conditione desciscere videtur, cum nimium densatur & crassescit, vel plus justo rarefcit & distrahitur, ut proinde immobilis & impermeabilis evadat, quemadmodum Florentinis & Boyleis experimentis, jam satis innotuit, hi
enim

enim præternaturam affectus, vim patitur & animantibus cunctis infensissimus fit, ut etiam vita privet.

Constat ergo siccitates esse imbris salubriores: sed etiam minus mortiferæ sint, cum cæteroquin dictum sit, in siccitatibus febres acutas fieri? Cardanus distinguit febres acutas, morbis acutis, & ex 1. Epid. Constit. 1. & 2. Epid. Sect. 3. colligit, acutas febres magna ex parte non esse mortiferas, quemadmodum vel ex tertianis intermittentibus deducere est: verum hujus ratio petenda est ex Aphorismo sequenti. Obstant tamen adhuc aliqua, prius diluenda: unde:

Dices 1. In siccitatibus sunt morbi, ab inanitione sed hi peiores & difficiliores curæ sunt, quam qui sunt ab humida repletione ergo siccitates erunt insalubriores imbris. *ꝛ.* Morbi ab inanitione habituales sunt peiores concedo: non habituales nego: sunt enim quidam morbi inanitionis minime habituales, ut syncope diarrhæa, dysenteria, hæmorrhagia, & qui non ratione, qua sunt symptomata, sed ratione morborum discrasia, conformationis vel solutionis continui, non sunt peiores aut difficilioris curæ, quam morbi à repletionem vel ab humiditate.

Instabis: per siccitates sunt alui obstructions plurimorum malorum causæ, per humiditates alui humectantur & laxantur & mala avertuntur ergo adhuc imbres sunt salubriores siccitatibus. *ꝛ.* Siccitates maxime dici salubres, quo ad tertiam corporis Regionem, ad primam enim & secundam non ita penetrant, adeoque nec ipsis adeo nocere possunt.

Urgebis: Humiditates sunt naturæ humanæ magis convenientes, quam siccitates, imo siccitates sunt contrariæ vitæ, quæ consistit in calido & humido. *ꝛ.* Siccitates moderatæ sunt convenienter concedo immoderatæ & perpetuæ nego.

Dices 2. Acuti morbi toto genere sunt cæteris morbis magis lethales sed siccitas parit morbos acutos ut docet Hippocrates ergo à siccitate erunt magis lethales. *ꝛ.* Siccitas parit morbos acutos sola nego cum humiditate & calore concedo, nam phrænitis, pleuritis & aliæ inflammationes ex confluxu humorum atrocitate sua superant acutas febres quæ ex aëris siccitate oriuntur, & rarius ut diximus interimunt.

Dices 3. Nautæ, Balneatores & qui ad stagna habitant, versantur in continuis humiditatibus & tamen sunt saniores illis qui in locis siccis degunt utpote sæpe hectici ergo fallit Aphorismus. *ꝛ.* Nautas quod attinet, hi assueti sunt, ab assuetis autem non fit passio: deinde exha-

lationes marinæ, salæ sunt & siccæ, hinc vehementer siccant: Balneatores, qui continuo in Balneis Laconicis sudant, etsi à vaporibus inundentur, eos etiam simul exsudent, imo tabidi, hectici fiunt.

Dices 4. Hippocrates *de locis in homine* ait siccum magis retinere morbos & dolores augere ergo videtur sibi contradicere. &. Hippocratem in locis de homine reddere rationem, cur in siccitate morbus stabilior sit, quia in humido defluit; Verum etsi morbi in sicco stabiliiores sint, non sequitur esse periculosiores, quia morbi in humido maiorem plerumque faciunt putredinem.

Dices 5. Contra hanc solutionem, morbi acuti maligni & pestilentes, sunt maxime periculosi atqui tales fiunt in siccitatibus, ergo in siccitatibus & non humiditatibus fiunt morbi periculosissimi. &. Distinguo maiorem, isti morbi sunt maxime periculosi in siccitatibus, habito respectu ad morbos qui fiunt in humiditatibus, nego, in se concedo.

Instabis Tum maxime periculosi sunt morbi, quo humores sunt acriores, sed in siccitatibus humores sunt acriores ut dictum est ergo. &. Negando maiorem quia taliter sequeretur febrem tertianam à bile ortam esse periculosiorem apoplexia à pituita aut stagnantibus humoribus serosis aut sanguine proveniente.

Aphorismus XVI.

Affiduis imbribus morbi fere fiunt, febres longæ, fluxiones alui, putredines, epilepsia, apoplexia & angina: Siccitatibus autem, morbi Tabifici, ophthalmia, articulorum dolores, urina & intestinorum difficultates.

Contentum seu Intentio.

De statu pluvio & sicciori morbifero.

Connexio: Nectitur hic Aphorismus cum præcedenti, ut quisque rationem illius, prout in fine diximus deducere possit. Enarrat hoc in Aphorismo Hippocrates, morbos qui ex multis imbribus & qui ex siccitatibus oriuntur: Ex his enim inter se invicem comparatis, facile innotescit, longe graviores esse, qui in imbribus, quam qui in siccitatibus contingunt. Hinc plerisque visum est & præsertim Heurnio, ita ex
græ-

græco in latinum Sermonem hunc vertere: *Namquæ assiduis imbribus qui morbi incidunt, huiusmodi fere sunt febres diuturnæ &c.* Quare consentaneum videtur, voluisse Hippocratem, argumento à morbis ipsis, per ejusmodi tempora vagantibus desumpto, præcedentem Aphorismum demonstrare, quod Galenus minime advertit in *Commentario*.

Hic ergo Aphorismus in duas partes dividitur: *Prima* morbos qui ex assiduis imbribus contingunt, refert, febres diuturnas fluxiones alui, putredines, epilepsias (seu morbos comitiales) apoplexias, anginas: *Secunda* vero illos qui ex siccitatibus accidunt enumerat, nempe Tabes, opthalmias (seu lippitudines oculorum) articulorum dolores, urinæ stillicidia, seu urinæ & intestinorum difficultates seu dysenterias.

Effectus utriusque excessus, tum humiditatis, tum siccitatis nimiae, abunde discussimus, in mox ante deductis Aphorismis, ut nauseam parent eosdem recoquere, nunc saltem videndum, quomodo morbi ab utraque prolecti, fiant, & cur ab humiditate prodeuntes longe graviores sint iis à siccitate productis. *Febres longas chronicas seu diuturnas* (ut vulgus loquitur ad quadraginta dies usque se extendentes) ex pluviosa constitutione oriri posse, patet ex jam antea traditis Aphorismis, quoniam per eam plurimæ aquosæ superfluitates cumulantur, quæ sanguinem inficiunt, atque ad indebite fermentescendum disponunt: cumque partim multitudine, partim qualitate seu crassitie, diuturnum tempus exigant, ut dissolvantur, longas propterea febres pariunt.

Eadem ferme de causa *Alui profluvia seu diarrhææ* ex humida constitutione proficiunt, siquidem istiusmodi excrementa plerumq; deferuntur in intestina & aluum plus æquo lubricam reddunt: & quidem hic alui profluvia nullatenus dysenteriae sed alui dejectiones ab accuratioribus interpretibus exponuntur, ut ex ipso textu græco palam fit, ac manifestissime deducitur ex Celso, qui sententiam istam sic est interpretatus: *In siccitatibus, acutæ febres, lippitudines, tormina, urinæ difficultas, alui dejectiones, angina, cancri, morbi comitiales, resolutio nervorum quam Paralyfin græci vocant.* Quin & dysenteriae connumerantur potus ab Hippocrate, inter morbos siccae constitutionis, quare ventris laxitates, intestinorum læviores, & citra dolorem uberriores egestionες designantur.

Putredines hoc loco, non solum intelligendæ sunt humorum, sed etiam partium solidarum, quales in Gangræna & Sphacelo: quippe in tempestatibus humidioribus, non tantum humores à naturali sua constitutione declinant, adeoque corrumpi possunt, verum etiam membra corporis flaccescunt & in putrefactionem abeunt, unde postmodum Gangrænæ & ulcera sordida & mali moris.

Morbi comitiales seu Epilepsia seu morbi Attoniti facile etiam ex largis imbribus eveniunt, cum ex ipsis graviter cerebrum afficiatur, & pravis humoribus gravetur, unde sensus & motus torpor atque abolitio, nempe *Apoplexia*.

Angina seu gutturis & faucium tumores, ab humoribus, eas in partes confluentibus oriuntur & gignuntur; plerumque autem ex pluvia tempestate tonsillæ, adenes ibidem sitæ, ab abundantioris lymphæ confluxu tumescunt, & Anginas quas Spurias vocant inferunt, itemque raucedines & tussis, Bronchoceles, & parotides, pro circumjacentium partium affectarum diversitate, & varia stagnantis lymphæ conditione; humidi enim aëris status ut sæpe diximus, facile obstruit, densat fuligines, coacervat, putredini & stagnationi favet.

Sed neque credendum has solum recensitas ægritudines ex multis imbribus contingere, sed & alias plures consimilis naturæ accidere posse non minus graves quam ante dictas: quippe ut antea notatum est, videmur ita natura comparati ut molestius humido quam sicco tempore afficiamur, & potius inutilium humorum copia quam inopia salutarium: Quamobrem merito Hippocrates, morbos in pluviarum multitudine contingentes, periculosiores longe iis esse, inquit, qui in siccitatibus contingunt.

Tabes enim etsi sæpe sæpius ad mortem quoque perducatur agros, in longius tamen tempus protrahuntur & inducias præbent, quæ sane sperandæ non sunt à prænarratis morbis. Præterquam quod Galenus, memoratur hic Tabes ad oculorum lippitudines, ait esse referendas, ut proinde putet in siccitatibus lippitudines tabidas fieri, seu ad Tabem oculorum terminari; Lippitudines autem periculi sunt expertes.

Articulorum dolores, & urina stillicidia, non dissimiliter diu protrahun-

trahuntur, & fere cum ægrotantibus consenescent: at vero ejusmodi affectiones, in siccitatibus contingunt potius ab acribus & salis humoribus, qui tunc magis exacuuntur, & tenuiores & hostiliores natura redditi promptius artuum juncturas subeunt, & peristia laceffunt, vel cum sero urinario commixti, mingendi difficultatem pariunt, sive eam ad stranguriam vel dysuriam referamus.

Quamobrem collatis invicem siccis & pluviosis tempestatibus, facile nunc decernere erit, longe graviores & periculosiores esse, quæ cum imbribus, quam quæ ex siccitatibus contingunt.

Dices 1. Per humiditates fiunt membra mollia & languida & pori dilatantur, ergo non impeditur transpiratio, cum nulla adsit constrictio. *℞.* Licet pori sint aperti (quod tamen negari potest, quia subsident & corrugantur) tamen humores viscosi per illos non excernuntur, ob eorum crassitiem & viscositatem, unde impedita transpiratio.

Instabis Idem potest dici de excretionem intestinorum, ergo non fient diarhææ *℞.* Alui excretionem fieri à copia humiditatis laxantis fibras intestinorum, quæ partim pondere partim lubricitate ad excretionem stimulant, non item ad pororum reserationem.

Dices 2. Hippocrates *Lib. de aëre aquis & locis* dicit: qui habent aluos humidus, non afficiuntur morbis acutis, sed humidis temporibus habent aluos humidus, ergo non corripientur morbis acutis ut sunt anginae. *℞.* Qui habent aluos humidus critice concedo Symptomatically nego vel distinguo sic qui habent aluos humidus moderate non corripientur morbis acutis concedo, excessive nego.

Dices 3. Galenus in commentario in præcedentes Aphorismos dicit Tabes fieri magis à calida & humida constitutione. *℞.* Tabem ut supra diximus aliam esse humidam & siccam, de prima, non de secunda loquitur Galenus.

Quæres Cur hic Hippocrates meminerit anginae & non pleuritidis? *℞.* Celeriore stagnationem ab aëre humido fieri in glandulis faucium & colli quam pectoris.

Aphorismus XVII.

Quotidiana autem constitutiones, aquilonia quidem cogunt corpora & firma & agilia beneque colorata, ac auditu valentiora reddunt, alium siccant, oculos mordent, & si pectus dolor aliquis prius habuerit exasperant: at austrina corpora exolvunt & humectant, auditum hebetant, caput gravant, vertiginem oculis, tarditatem corporibus adferunt, alium humectant.

Contentum seu Intentio.

De statu Aquilonio & Australi.

Nota hic Aphorismus prorsus similis est tertio hujus sectionis, supra explicato.

Connexio: Affectus seu morbos ab aquilonia & austrina Catastasi provenientes supra recensuit Hippocrates: hic autem commoda & incommoda ab eadem provenientia clarius recenset, neque ideo ταυτολογία seu repetitione arguendus, cum hocce loco plura addat prioribus, quæ comparat hoc Aphorismo Hippocrates quosdam alios effectus, qui à constitutionibus siccis & humidis oriuntur, & fortasse ut manifestius ostendat, humidæ & austrinæ tempestatis incommoda, longe graviora esse iis, quæ à sicca & aquilonari proveniunt, sed & quæ ex hac accedant corpori emolumenta, simul una commemorat, ut nimirum omni ex parte concludat, salubriores semper esse siccas constitutiones, austrinis & pluviosis. Dividitur hic Aphorismus in duas partes: prima ad aquilonem spectat: altera ad austrum pertinet.

Quantum autem colligere licet, non videtur hic Hippocrates
de

de totius anni, vel integræ alicujus tempestatis constitutione, sermonem habere, sed de illis tantummodo vicissitudinibus, quotidie seu indies, per quæcumque anni tempora contingunt, cum aër alterne mutatur, & oppositarum aquilonis & austris vices subit: verum tamen si quotidianis mutationibus aquiloniis, vel austrinis hos effectus parturit, proculdubio majores, & diuturniores erit allaturos, quando integra tempestate seu tempore non dissimiliter perflatur ut antea Aphorismo quinto notatum est, ut propterea Celsus inter ea, quæ tempestates consequuntur, retulerit Lib. 2. Cap. 1. Aquilonem ventrem adstringere, dolores lateris & pectoris afferre, sanum tamen corpus solidare & spissare & mobilius & expeditius reddere: Nam moderata siccitas est nervis amica: consumendo nempe cerebri & nervorum humiditates, quæ ipsa languida reddebant, sic pariter spiritus animales subtiliores & magis depurati redduntur, habitus corporis totius efficitur vivacior, hinc durante aquilonia Catastasi, perfectius ratiocinamur, movemur, meminimus, audimus, videmus, gustamus & tangimus: Austrum vero ut pergit Celsus, caput & aures hebetare, alium solvere, & totum corpus (præsertim nervos, tendines, ligamenta) multis humiditatibus languidum efficere, vertigines atque alia incommoda inducere.

*Quod autem aquilonares constitutiones corpora (ut ait Celsus) co-
gant & densent, certo certius, siquidem humiditas superfluitates ab-
sumit, poros constipat, & constipando membra condensat, unde
totius corporis firmitudo: hac etiam de causa frigidas & septen-
trionales Regiones incolentes, durioris & firmitoris texturæ obser-
vantur, atque laborum omnium patientiores, unde fortasse etiam
finxit antiquitas fortitudinem & impenetrabilitatem in corporibus
exoriri. Non tantum autem firmitatem, sed etiam agilitatem a-
quilonares venti conferunt, nam exhaustis humidis superfluitati-
bus, atque aqueis excrementis, quibus plurimum corpora gra-
vantur & hebetantur, illa graciliora reddita, fiunt quoque agilia:
Eadem etiam ratione, videntur reddi posse coloratiora, quippe obe-
sa, succi plena & humida, plerumque decolorata & pallida ob-
servantur.*

*Quod melius audientia fiant, patet similiter ex his quæ supra
apho-*

aphorismo quinto dicta sunt, *ubi austrum auditum hebetare* scripsit Hippocrates: Fit namque saepe numero surditas vel subfurditas, ob tympanum seu membranam illam, primum à secundo meatu auditionis determinantem, nimia ferocitate laxatam, quo appulsus aer eam non concitat motionem & percussionem, quæ satis sit auditioni perficiendæ, unde vel sonus non percipitur, vel ob-
ruffe admodum, quemadmodum experimur in Tympano bel-
lico madefacto, si tum pulsetur; quod tamen ingentem sonitum edit, cum tensum & sicum evaserit.

Aluos præterea exiccari in constitutionibus aquilonariis, seu constipari & obdurescere, ut excrementa prompte non deponant, antea quoque ostensum est, cum & egestionibus quæcunque deficient, per ejusmodi siccam & frigidam constitutionem, urina solum co-
piosiori plerumque perseverante, compresso è glandulis & tubulis aquosis latice, per universum corpus disperso.

Additur & hic oculos morderi hoc est ardorem & pruritum in oculis & palpebris excitari: aut quia impeditæ perspirationes oculos petunt, & per membranas, præsertim adnatam diffusæ, molestam inferunt motionem; aut quia corrugatione ibidem inducta, præ-
terfluentem sanguinem venæ ex arteriis prompte non excipiunt, sed quodammodo retardant, unde etiam aridæ lippitudines: Nec mirum si præ cæteris partibus oculi, in his constitutionibus affici-
antur, veluti qui obnoxii sunt, cuicunque aeris alterationi, omnem-
que ejus vim primi sentiunt.

Augent quoque frigidi & sicci aquilones *dolores pectoris* si prius isti partes illas obsederint: siccitas enim faucium & gutturis asperi-
tatem inducit, unde tussis facile exoritur, quam deinde dolor pecto-
ris insequitur; cumque frigus eidem quoque infensum sit, profe-
cto si antea doluerit, longe gravius ab aquilonia constitutione affi-
cietur, perquam utrumque jungitur pectori molestissimum.

A Constitutionibus vero austrinis, corpora relaxantur, & humefi-
unt: nam austri humidi sunt & pluviosi; *Auditus* obtunditur, imo &
reliqui sensus omnes hebetantur, caput gravatur, & multis re-
pletur excrementis; Unde *vertigines, & hebetudines oculorum*, atque to-
tius corporis ad motum *impotentia*, & ad cæteras operationes, præ-
sertim

sertim animales obeundas ineptitudo ; ob nervorum scilicet laxitatem, à sanguine, ejusque nutritio liquore serosiori. *Alvi denique lubriciores* fiunt, tum ex mala digestionē, quæ flante Austro fieri solet, tum ex facili inutilium humorum, per humectiores ductus, ad alvum depositione, præsertim quia fibræ intestinorum, per idem tempus austrinum, prompte admodum laxantur, ipsæque fæces, humidiores redditæ facilius quoque egeruntur, quæ sane cum ex antea demonstratis notissima sunt, ulteriori non egent explicatione: Solum paulo uberius causam vertiginis examinemus: Equidem non bene constare videtur, quod ex dialibus Austris & ex diebus austrinis fugacibus vertigines oriuntur: quippe Hippocrates ægritudines referens, ex Austrina & diuturna tempestate imminentes, ne verbum quidem fecit vertiginis, quam procul dubio veluti cæteris periculosiorem recensere debuisset, eoque magis si ex diurnis aëris mutationibus, atque alterationibus ab Austro diali oriundam fateatur. Jure merito ergo existimat Cardanus legendum cum Theodoro Gaza, *cui uni plus credendum inquit, in hac causa, quam universis interpretibus latinis ut qui græcus natus sit, & exquisitissimam scripserit græcam Grammaticam, ut rationem dicendi, nemo melius callere potuerit: Vertigines in oculis fieri* pro eo, quod scriptum est *sejunctim ; vertigines faciunt, oculis, atque corporibus difficilem motum præstant*: addit præterea nequaquam potuisse Hippocratem de Vertigine cerebri, quæ cum comitiali morbo convenit, sermonem habere, eo quod unius diei constitutio, minime possit materiam congregare comitiali, aut syderationi aptam. Verum quanam sit hæc oculorum vertigo, ipse non explicat: Putaverim ego, esse quandam in visu trepidationem, cum objecta per aërem vapidum spectata, quasi trepidare, concuti & vacillare videntur. Id autem quamvis in oculis, ipsisque nervis ocularibus & in tunica reticulari fieri possit, perturbata per serositates objectorum repræsentatione, sæpius tamen contingit, ex radiorum Solarium, in crassiori aëre refractione, atque luminis ad oculos pertingentis quadam veluti inflexione & titubatione. Sæpissimi enim id ipsum experimur, cum fluctuantem aquam, scintillanter igniculos, & tremulum lumen candelarum ex sevo confectarum attentius intuemur: at vero accidit facillime, per austrinas constitutiones aërem hujusmodi perturbationem subire, cum turbulentus simul fiat, crassus, & radiis solaribus confertus, sed & oculi una quoque per idem tempus

hebetantur & caligine suffunduntur, ut propterea male objecta corpora cernere queant, vel non nisi cominus, præsertim cum à densis nubibus aër sit tenebricosus, aut luce crepera sublucidus.

Non prætereunda est sub hoc Aphorismo illa Hippocratis salutaris admonitio, quam habet *Lib. de aëre aquis & locis*, quod nempe ubi Medicus ad aliquam civitatem accedit, debet *primo* illius situm considerare, an scilicet exposita sit ad Austrum, vel potius ad aquilonem vergat; *deinde* aquas quibus utitur, an lacustres, vel fluminum vel fontium: *Tertio diatas*, quibus illud genus hominum utitur: *Quarto* anni constitutionem. Si itaque *primo* civitas male posita sit, ad ventos & solem, procurare debet (saltem per artem, locum & domum eligere, quæ ventorum malignitati repugnet: *Secundo* aquæ simulæ sunt corrigendæ: *Tertio* diata si prava sit, mutanda: *Quarto* anni constitutio, si præter naturam fuerit, per contraria oppugnanda, hinc fiet, inquit, ut morbis præcaveat & sanitatem conservet: Nam qui hæc consideraverit, ait Hippocrates, non solum cognoscet statim, qui morbi sint in illa Regione peculiare, etiamsi nunquam in illa fuerit, sed prædicet & præcavebit, cum maxima artis Medicæ gloria, quæ cum negligunt Medici, ac civitatum etiam Gubernatores in causa sunt, cur multi homines ægrotent, & pereant, quod tamen non contingeret, si iis, quantum fieri possit, occurrerent per Medici prudentiam: Cum autem civitatum situs, maximam sanitatis causam incolarum contineat, deberent civitatum conditores, Medicos peritos consulere ut situm eum eligerent, qui maxime esset salubris: multum enim interest, si unum tantum stadium interponatur ut scribit Hippocrates citato loco.

Dices I. Dictum est Aphorismo decimo quarto hujus Sectionis ab Aquilone fieri gravedines & melancholias, & alibi articulorum dolores ab eo fieri, atqui in talibus affectibus corpora potius languescunt, quam mobilia & coloratiora & robustiora fiant, ergo male loquitur hic Aphorismus hæc fieri ab Aquilone. *R.* Aphorismum hunc intelligendum esse, de Aquilone temperate frigido, in Aphorismo decimo quarto vero de intemperate frigido, & sic nihil absurdi eruitur. Articulorum dolores sunt quidem ab aquilone, sed multum excedente.

Instabis: Etiam aquilones calidi & sicci corpora dissolvunt, ergo. *R.* Aquilones calidi & sicci, corpora calida & sicca dissolvunt concedo humida nego.

Dices

Dices II. Pectori nocet aquilo, propter frigus ut dictum, ergo non est temperate frigidus & omne frigus esse inimicum pectori, ergo etiam temperatum saltem suo modo.

Instabis : Ergo omnis attractio frigidi erit noxia pulmonibus, quod est absurdum, siquidem propter frigidi attractionem est respiratio. & Etsi inspiratio frigidi, prosit cordi, pulmonibus tamen non usque quaque amica est, quia sunt rari & subtiles, dempta autem frigore quocunque naturali illorum raritate, ipsis noxa infertur.

Dices III. Hippocrates *sexto Epidem.* dixit, carniū densitatem alvum humidiores reddere, & raritatem sicciorem, ergo cum Aquilones densent corpora & consequenter carnes, alvos humidas & non siccās efficient. & Aliam esse carniū densitatem naturalem, aliam illatam ab Aquilone frigido, in illa tamen humores nec transpirant, nec exsiccantur, sed ad alvum reperiuntur; in hac vero transpirant & exsiccantur, hinc etiam alvi sunt sicciore; quæ solutio clarior est quam illa, quam Fonseca affert.

Quæres I. Cum Hippocrates in Aphorismo dixerit, *corpora* melius fieri audientia, utrum omnes sensus sub hoc intelligantur. & posse quidem cum Galeno in Comment. dici quod sic, quia omnes à sicco temperato corroborantur, excepto gustu, qui moderata humiditate delectatur & à nimia siccitate læditur.

Quæres II. Quomodo hic Aphorismus differat à quinto? & Hippocratem ibi tantum fuisse locutum de damnis ab Aquilone & austro illatis, hic autem etiam loquitur de commodis: Secundo ibi agit de diuturnis constitutionibus, hic vero de quotidianis.

Quæres III. Utrum hominibus ad Aquilonem & Austrum habitantibus, iidem effectus sunt expectandi? & Certum est, quod melius sit ad Aquilonem habitare quam ad Austrum, hinc urbes ad Aquilonem sitæ, magis salubres sunt ut diximus in textu, quam quæ ad Austrum.

Quæres IV. Quomodo Auster possit corpora humectare cum supra dictum sit, humiditates corpora densare & poros corrugare? & nos consecutive locutos, & non statim à principio: deinde per inspirationes, tum pectoris tum capitis corpora perpetuo humectantur.

Aphorismus XVIII.

Per tempora vero anni, vere quidem & prima æstate, pueri, & his ætate proximi, optime degunt, valentque maxime: æstate vero & autumno, ad aliquam usque partem, senes. Reliquo autumno & hyeme, qui mediam ætatem agunt.

Contentum seu Intentio.

De Temporibus anni ætatibus assignatis.

Connexio: Cum in tertio hujus Libri Aphorismo, ætates varias, ad anni tempora, varie se habere pronuntiaffet Hippocrates, interpositis sententiis multis clarissimis, ad temporum constitutionem pertinentibus, nunc ad ætates accedit, explicans, quo singulæ modo se ad tempora habeant.

Proinde Aphorismus præsens in tres partes dividitur: *Prima* concludit: quod *pueri, & iis ætate proximi vere & prima æstate optime degant: Secunda: Senes æstate, & ad aliquam partem autumni maxime valeant: Tertia: Media ætatis homines, Hyeme & aliqua Autumni parte, bene se habeant:* Verbo concludit: contraria contrariis curanda & similia similibus conservanda esse.

Prosequitur itaque Hippocrates in hoc Aphorismo, singulis hominum ætatibus, convenientia anni tempora explicare, cum mox inferius morbos iisdem contingentes sit enarraturus. Enumerat autem quatuor tantummodo temporum mutationes, aut quia istæ sensibiliores sunt, & vulgo magis receptæ; aut quia de regionibus, in Zonis & climatibus temperatis, solum sermonem habere voluit: aut quia demum in his tantum suas observationes instituit, cum ea, quæ experimentis comperit, consulto scripserit, & posteris tradiderit.

Facto itaque initio à prima anni ætate seu *vere pueros* inquit, optime sub illo valere, quibus & adolescentes adjunxit, ut significare videntur

dentur verba illa : [*& qui hos proxime sequuntur ætate* : Etenim Hippocrates, non quatuor ætates solum in hominum vita, quemadmodum visus est docere Galenus, sed multo plures distinxit; quamobrem Celsus, merito eos hic interpretatur, qui illis ætate vicini, proximi & conjuncti sunt: ut qui proximi & conjuncti pueris sunt Adolescentes. Sic pariter cum vere, primam æstatem, seu illius principium conjunxit, quod ejusdem fere sit conditionis; quamquam Galenus superstitiose nimis Adolescentes vere, æstatis vero initio pueros, salubriter vivere commentatus est: Æstate autem & autumno non omnino, sed aliqua ex parte senes sanos degere, & per reliquum anni tempus, atque succedente Hyeme eos, qui mediam seu consistentem ætatem habent.

Quibus Hippocratem reprehendere libido est, quique nodum in scirpo quærunt, multa in hoc Aphorismo ogganiunt.

Primo: Illum redarguunt oblivionis, quod superioribus Aphorismis dixerit, Naturarum alias quidem ad æstatem alias vero ad hyemem, bene vel male se habere, quo sane inquit, satis fuisse dictum & statutum, quod hic inutiliter videtur repetitum, cum & pueri & juvenes, & senes, sub generali ætatum consideratione, omnino comprehendantur.

Secundo: Addunt non recte dictum, ab eodem: *Vere pueros, & qui proxime sequuntur ætate*, scilicet Adolescentes, *optime degere*; cum id tempus sua Natura sit cunctis saluberrimum, ideoque non solum pueris & adolescentibus, sed etiam juvenibus, atque in consistenti ætate constitutis, documento ejusdem Hippocratis Aphorismo nono hujus Sectionis.

Tertio: Subdunt, pueri vere, ob consimilem Naturam, & temperiei commodationem, bene se habent, ideo est, ut etiam primam æstatem addiderit; quæ cæteroquin calorem præfert, aliquanto prævalentior puerili ætati penitus in congruentem, cum hac undequaque moderamine fruatur & gaudeat.

Quarto: Nec hoc omnino videtur verum, vere optime pueros degere nam ex infra dicendis constabit per id tempus, sanguineis morbis, eos corripi.

Quinto: De senibus quoque addunt, quod licet bene se habeant æstate, autumno tamen ii male vivant: Quippe autumnus tabidis malus dicitur, inter quos senes ab eodem Hippocrate referuntur *secundo*

de Morbis; isque utpote inæqualis, utrisque exitiosus esse solet, senibus autem potissimum, ob maximum ejus ætatis languorem.

Sexto: Perperam quoque ipsis videtur adjectum; *æstate vero & autumno, aliquatenus senes*: quasi hi non omnino bene se habeant æstate, cum tamen senilis calor veluti imbecillis & infractus, quam maxime foveatur, & adjuvetur ab ambientis aëris æstivo calore.

Septimo: Qui in media seu consistenti sunt ætate nec videntur rationabiliter dici posse salubriorem vitam ducere, per reliquum autumni tempus, & in hyeme; quandoquidem hi frigidi quoque & sicci dicuntur, atque melancholicis ægritudinibus obnoxii, minusque ferrentes autumnales aëris vicissitudines, atque inæqualitates.

Octavo: Cum hoc loco Hippocrates de temporibus agat, quæ singularum ætatum temperaturis congruant ut videntur denotare verba illa: *sani sunt maxime*; certe, quemadmodum puerilis ætas, & quæ proxime hanc sequitur ob consimilem temperaturam, bene se vere habebit, & optima sanitate fruetur; ita ex adverso senilis hyeme, & juvenilis æstate optime deget, cum alias ab eodem dictum sit, minus periclitari eos, qui temporis magis congruunt, in suis temperiebus. *Verum* isti injuste nimis Hippocratem arguunt, cui manifestæ rationes & experientiæ suffragantur.

Primo: Quidem Aphorismo 2. hujus Libri, generalem tantummodo rationem habuit Naturarum, quod aliæ ad æstatem, & aliæ ad hyemem bene maleve se haberent, ubi non tantum salubritatis sed etiam proclivitatis ad ægritudines contrahendas meminit; at hic, restrictiori sermone ætates memorat, quæ in anni tempestatibus salubrius degunt; unde quod ibi generaliter protulit, hic speciatim singulis ætatibus adscribit.

Secundo: Ver, quamvis sua Natura saluberrimum sit, maxime tamen puerorum sanitati conducit: Et tametsi senes, verno tempore bene quoque se habeant, relatis scilicet ad cæteras præcedentes tempestates, adhuc tamen salubriorem vitam ducunt æstate, cum nimirum calidior aër, vividiores reddit cunctas eorundem operationes.

Tertio: Dixit etiam *prima æstate*, pueros, & adolescentes eadem salubritate frui, quoniam principium æstatis eandem referre solet, cum veris fine temperiem, & conditionem, cum per id tempus, aër non adeo feruidus sit, ut mollem puerilium carniū texturam exsolvere,

vere, & eliquare queat, præsertim si initium æstatis, ea distributione sumatur, qua idem Hippocrates juxta morem antiquorum, ab ortu vergiliarum ad solstitium æstivum facere consueverat.

Quarto: Cæterum, quod tunc ægrotare aliquando illis accidat, non inde fit, ut plerumque & maxima ex parte salubrius non degant: quippe cunctis temporibus omnibus morborum generibus homines in una quaque ætate laborare possunt, tunc præsertim, cum præpotens causa, ægrotare faciens præcesserit.

Quinto: Autumnus senibus plane periculosus est.

Sexto: Neque vero dicit Hippocrates salubriter illos vivere tempore autumnali sed tantum *aliquatenus* seu *aliquantisper*, si potissimum æstatis conditionem referat, unde disjunctim legendum, *æstate vero & autumno aliquatenus*; ita ut sensus fiat senes æstate quidem bene degere, autumno vero aliquatenus, id est aliqua ex parte, præcipue inter illius initia, & cum consimilem æstati constitutionem participaverit; id quod præsertim fieri solet ipso ineunte.

Septimo: Per reliquum autem autumnus tempus & hyemem, bene se habebunt, consistentem ac mediam ætatem adepti, qui non solum viri sed & juvenes intelligendi sunt, utque commentatur Heurnius etiam à vigesimo quinto anno ad quadagesimum producti, comprehendentes nimirum juventutem & virilitatis initia cum reliquum ætatis virilis referatur Hippocrati, ad crudam senectutem, quæ ex mente ejusdem Autoris, initium sumit, à septimo annorum septenario, tum enim vires robustæ sunt & sanguis vegetior, unde in æqualitatem autumnus non tantum ferent, qui in media & constanti ætate sunt, sed etiam superabant hyemalis temporis rigorem. Clarius proinde Celsus, hanc sententiam est interpretatus, ut juvenes hyeme, & qui inter juventutem & senectutem sunt salubriorem vitam ducere scripserit: Accedit, quod consistentem ætatem nacti, sunt omni ex parte prudentiores, ut quascunque causas extremas vitare, & ab aëris vicissitudinibus atque alterationibus se tueri quam optime calleant.

Octavo & ultimo: Puerilis ætas, veluti in moderamine posita, vere, cæteris temporibus temperationi melius se habet: porro id mediocritatis est, ut in alterutram partem, vergens à sanitate declinet. At vero intemperata Naturæ à mediocritate recedentes, ut in salubritatem revocentur, in oppositum quodammodo statum ducendæ sunt; unde

unde in oppositis sibi tempestatibus melius degunt, ut jam supra meminimus; quamobrem juvenes & viri, ante annum quinquagesimum floridiori sanguine præditi, sicuti æstatis ardorem non bene sufferant, ita hybernium frigus melius sustinent, imo exinde salubrius vivunt, sanguine in contractiorem crasim restituto. Unde an bene vel male à quibusdam ætas juventuti comparetur aliorum sit discutere, id sensisse videtur Ovidius:

Transit in æstatem, post ver robustior annus
Fitque valens juvenis, neque enim robustior ætas
Ulla, nec uberior, nec quæ magis ardeat, ulla est.

Hoc quidem vero simile est æstatem & juventutem in multis esse similia sed non convenientia ad sui conservationem: Æstatis enim aër est calidus acer & exustorius, juventutis calor intensus, acer & deprædatorius. Æstatis succi, sunt ingrati, amari, corrodescentes: Juventutis liquores biliosi, amari, effervescentes: In æstate pecora deponunt petulantiam, induunt ferocitatem & quædam rabiem. In juventute deponitur suavitas & induitur sæpe sapius iracundia: hinc *Horatius* de *Juvenibus*:

Invidus, iracundus, iners, rixosus, amator.

Autumno similis dicitur virilitas: teste eodem Ovidio:

Excipit autumnus posito fervore juvenæ,
Maturus, mitisque inter juvenemque senemque
Temperie medius, sparsis quoque tempora canis.

Quod nimirum autumnæ solis recessus in macrocosmo hoc caloris recessus in microcosmo: In autumnæ maturantur fructus, implentur horrea: In virilitate maturantur homines implentur marsupia: In autumnæ recedente sole, succi refluunt ad interiora terræ, in virilitate paulisper deficiente calore humores in profundum corporis: In autumnæ pruina decolorat folia: In virilitate auræ asperitas capillos: In autumnæ non tantum foliorum ex arboribus, sed totius vegetationis incipit decadentia: In virilitate, non tantum crinium sed omnium actionum decrementum & morborum feracissima seges.

Hyems & Senium etiam coincidunt, teste eodem Ovidio:

Inde senilis hyems, tremulo venit horrida passu,
Aut spoliata suos, aut quos habet alba capillos.

Ut enim anno hyems, sic senectus vitæ finem imponit: In hyeme tremunt artus, in senectute vacillant: Hyemali frigori ignis; senibus fornax præsidio est, unde in hoc nostro Aphorismo apprime dixit Hippocrates: *Æstate senes optime degere*: In hyeme aqua congelascit; in senio lymphæ crassescit & vitrescit: Hyeme gelu dependet à tectis, in senio mucus ex naribus: Hyeme tecta coperta sunt nive; in senio capita canitie: Hyeme nihil crescit; in senio corpus decrescit: Hyeme animantia taciturna & melancholica; in senio homines morosi & insipidi: Hinc Poëta:

Ex nigro mentum, senio mutatur in album,

Candida quæ fuerat mens, tibi facta nigra est.

Et sicut animantia in hyeme, ita homines in senio plurimum requiescunt, & quasi adhuc viventes sese ad requiem æternam & somnum perpetuo duraturum (mortem scilicet) disponunt: quam ex hac ratione nullatenus timuit ille seniculus dum canit:

In somnis quamquam similem pro tempore mortem,

Non est pars vitæ, dulcior ulla meæ.

Permirus est in morte igitur quid tam sit acerbum,

Tam dulcis cum sit, mortis imago, sopor.

Æstas ergo senibus remedio est, eo quod sol in leone, & calor ambiens externus, caloris interni defectus aliquantulum compenset, frigoris effectus omnino prohibeat: Aliam & sat acuminosam hujus rationem dat Poëta:

Claude Galene libros, nulla est Medicina Senectæ:

Magnum hoc secretum, solus Apollo tenet.

Primus Apollo fuit Medicus: sed & invidus artem

Curandi vetulas, ad sua regna tulit.

Hæc interim ad distractionem curiosam, non ad doctrinam dicta sunt.

Quæres primo: Quomodo pueritia dicatur temperata, cum tamen sit quasi excedenter humida? &c. Respective ad alios non absolute, vel est temperata, temperamento ad justitiam, non ad pondus.

Quæres secundo: Cur Hippocrates corpora generationi vicina vocavit calidissima, nam quod est tale, non potest esse temperatum? &c. calidissima vocari calore innato, non adventitio; primo autem

modo possunt dici temperata, quia talis calor illorum Naturæ & ætati convenit.

Quæres tertio: Quomodo ver potest dici temperatum, cum sit calidum & humidum? *R.* Tale dici ver, quia maxime accedit ad normam crasim, non tamen absolute id asserendum.

Quæres quarto: Quænam ætas inter omnes ætates dicatur temperata? *R.* illa quæ est circa finem incrementi, est enim medium quoddam temperatum æqualitate numerica.

Quæres quinto: Quænam ætas sit temperata ad iustitiam? *R.* Eam esse quæ vitam respicit, quæ minus ægrotat, errata facilius tolerat, & actiones omnes habet inculpatas, id est *adolescencia* in qua adest virium robur, optimus sanguis, optima corporis moles, omnes facultates & actiones vigent.

Quæres sexto: Quotupliciter se habeat ætas ad anni tempora? *R.* cum Fonseca *tripliciter:* *Primo* respectu universalis vitæ; qua ratione omnis ætas sese bene habet ad ver, male ad autumnum; quia ver saluberrimum est, autumnus autem insalubris: *Secundo* ratione caloris, sic omnes ætates robustæ melius sese habent ad hyemem, eo quod per illud tempus calidum innatum sit copiosum & magis concentratum & unitum: *Tertio* ætas se habet ad anni tempora, quo ad temperamenti correctionem vel conservationem, ut accipitur in hoc Aphorismo.

Dices I. Pueri sunt exuperanter humidi, ergo non bene se habebunt ad ver utpote humidum, ergo melius se habebunt ad æstatem vel autumnum *R.* puerorum humiditatem esse illis utilem & necessariam ob incrementum corporis, quia alias demenda foret illis humiditas & alimentum siccum præscribendum, quod est contra rationem: deinde posito, quod æstas pueris prodesset, ob siccitatem, noceret ob calorem.

Instabis: Autumnus confert calidis & humidis ergo etiam pueris *R.* convenit calidis & humidis excessive talibus concedo, moderate talibus ut sunt pueri nego.

Urgebis: Senes sunt à Natura sicci, ergo illis etiam debet æstas sua siccitate nocere *R.* plus illis calorem æstatis prodesse quam siccitatem quæ est passiva qualitas.

Dices

Dices II. Ver omnibus prodest, ergo etiam senibus &c. æque ac æstas nego, aliquomodo prodest concedo.

Dices III. Autumnus omnibus nocet ob in æqualitatem ergo maxime senibus &c. prima pars autumnus quæ est æstati vicina nego, media & ultima pars transeat.

Dices IV. Qui mediam ætatem habent, videntur maxime temperati, quia medium respectu utriusque extremi, maxime debet esse temperatum, præsertim quando transitur ab uno ad aliud, ut hic fit, &c. jam antea diximus esse tantum medium in æqualitate numerica. Deinde patet ex Aphorismo, quod qui mediam ætatem habent, gaudeant hyeme; ergo sunt intemperati secundum calorem & siccitatem nam hyems est frigida & humida.

Aphorismus XIX.

Quilibet, in quibusvis anni temporibus morbi fiunt, nonnulli tamen in quibusdam ipsorum, tum fiunt tum exacerbantur.

Contentum seu Intentio.

De Morbis à temporibus anni invitatis.

Connexio : Cum hucusque Hippocrates, morbos in diversis anni constitutionibus ac tempestatibus seu temporibus evenientes retulerit, atque in posterum erat enarraturus, ne quis crederet, eos non nisi his vigentibus futuros in reliquis vero nequaquam; admonere cogitat hoc Aphorismo Medicos, ut unoquoque tempore, ac vigente quacunque anni tempestate & constitutione, cujusque morbi periculum timeant, cauteque prævideant, cum quolibet tempore, illi accidere, & vage omnia corpora afficere possint; sunt tamen illorum plerique, qui magis uno quam altero anni tempore observantur & affligunt. Proinde hic Aphorismus in duas partes dividitur : In prima docet, quolibet tempore posse fieri quemlibet morbum : In se-

cunda vero tradit, quod tamen in quædam anni tempora quidam morbi magis incidant & eveniant.

Hinc quoad primam partem clare elucescit, opus nec necessarium esse, ut omnes morbi sint aërei, vel aëri cognati, seu ut pure pute ab aëre tantum proveniant, ratio est, quia quovis anni & aëris tempore, omnis generis & quicunque morbi fieri possunt, v.g. à depravata victus ratione, cibo vel potu vel aliis rebus non naturalibus præpostere & indiscriminatim usurpatis, nempe otio seu vita sedentaria somno pomeridiano aut alias longiori, commestationibus & gulosis ingurgitationibus, ingentibus mœroribus, ira, Heraclito temperamento, & crasi, cacochymia, plethora, vel ab utraque, vel ætate, loco, sexu vel quocunque alio vitio, interno vel externo, unde solis anni temporibus, eorumque mutationibus, hi semper adscribendi & attribuendi non sunt. Licet quidem rarum sit ab his morbos progigni, quin non pariter aër accedat corpora diversimode disponens.

In secunda tamen Aphorismi parte, & quidem fundate dicit, quod quidam atque plures morbi magis uno quam alio tempore incidant, & affligant: Unde nonnulli potius æstate quam hyeme; alii autumno potius quam æstate: Sic experimur, pleuritides, Catharros, apoplexias, Paralyfes, sopores &c. Hyeme potius evenire quam æstate: febres ardentes, tertianas, variolas, morbillos, erysipelata magis æstate quam hyeme. Sunt & alii; qui licet fieri quidem possint, quocunque anni tempore, magis tamen alio increbescunt & exacerbantur: Hydrops enim aliquando contingunt æstate, exacerbantur autem hyeme: ut & quartanæ febres æstate & sæpe sæpius autumno invadentes, graviores & infensiores observantur brumali tempore.

Verum tamen à causis petenda est, istius modi morborum varietas: Etenim qui omnino ab aëre pendere videntur, licet soleant esse communes, universales, & epidemii, possunt nihilominus, certo quodam anni tempore exacerbari & vigere: à cibis vero, laboribus, animi pathematibus, aliisque causis (ut mox innuimus) inducti, sicut particulares plerumque sunt, ita particularibus mutationibus permutantur, quarum certa ratio haberi nequit, cum fere indefinitæ illæ causæ sint.

A propriis & peculiaribus etiam corporum constitutionibus & habi-

habitudinibus sæpe numero accidit, ut morbi quosdam arripiant, cum aliqui unius, & alii alius constitutionis & habitudinis sint immunes. Atque hinc fit, cur graciles aliquando ægrotent, & obesi salubriter degant, ut & pueri infirmentur, non senes, fæminæ non mares, sedentariam vitam ducentes, haud quaquam exercitiis dediti vel è contra, refert *Cardanus* olim Patavii, gravi quodam morbi genere fuisse Hebræos solum affectos, alios minime: & Basileæ alias, pestilenti morbo cives duntaxat laborasse, non advenas, forte quia ex vitio, à cibis & potibus, jam pridem in communem usum habitis, illorum habitudo, atque corporum constitutio, eam contraxerat in humoribus & sanguine constitutionem & dispositionem, ut luem illam soli cives incurrerent, non exteri, alio victus genere usi. Refert quidam Autor Anno 1618. solos pueros per universam fere Italiam, sed immanius per Regnum Neapolitanum, Angina maligna sustulit, cujus deinceps contagione, interierunt succedentibus annis omnis fere generis quadrupedia cornigera præsertim boves. Huc etiam referri possunt morbi illi, qui Endemii seu Patrii aut Vernaculi appellantur, qui scilicet, peculiæares tantummodo Regionibus infestant, ut est scorbutus, familiaris Belgis, Hollandis, Danis & Anglis: Sic pariter fuit lepra apud Hebræos; Elephantiasis apud Græcos, Mentagra Romanis tempore Plinii; sudor Anglicus, Plica Polonica, ut Syphillis seu morbus Americanus.

Unde autem morbi omnes, omnibus indiscriminatim & universis anni temporibus contingere possint, ratio desumenda videtur ex eo, quia morbi potius, ab internis causis, puta, humoribus præter naturam affectis, quam ab externis & procatarticeis quæ vulgo occasionales appellantur, exoriuntur: Cumque illi quocunque anni tempore infici possint atque diversimode permutari, inverti, & à consueto ac naturali more desciscere, poterunt quoque, quodocunque male affecti fuerint, omnes & quoscunque morbos in quibusvis corporibus parere: At vero quia non tam facile sponte sua vitiantur, nisi ab aëre, cibis ac potibus, cæterisque causis, non naturalibus dictis, perturbentur, hinc fit, ut sæpe numero istas diversimode corpora alterantes morbi consequantur & aliquando magis aut minus exacerbentur pro varia earundem & corporum affectorum conditione.

Dices I. In hyeme & sene non semper adest causa intemperiei calidæ, ergo non potest corripì febribus ergo non quolibet tempore,

quivis morbus potest fieri & posse morbum calidum in hyeme & sene generari, facto nempe gravi excessu in rebus sex nonnaturalibus præsertim in cibo & potu calido.

Instabis: Tempore calido & sicco non possunt fieri morbi humidi uti sunt catharri Ergo & catharros in hoc casu fieri per fusionem & liquationem materiæ in corpore turgentis.

Dices II. Tempus, cum teste Aristotele, sit mensura motus, secundum prius & posterius, mensura non potest agere in nos, quia est tantum quædam qualitas relativa, quæ nullam habet actionem & tempus in abstracto non agit in nos concedo: In concreto, quatenus connotat talem astrorum dispositionem & motum nego.

Dices III. Morbi hæreditarii ut phtisis, arthritis &c. non possunt quolibet anni tempore fieri, cum multi sint qui à semine non sunt læsi ergo Aphorismus non est universalis & morbi hæreditarii non possunt in quolibet fieri indisposito concedo: disposito nego.

Instabis: Nec in disposito quia jam factus est, ergo non potest amplius fieri & potest tamen semper iterum excitari.

Urgebis: Ista dispositio hæreditaria non potest esse in fætu adhuc ergo nulla solutio & non potest esse in actu primo nego, in actu secundo concedo.

Aphorismus XX.

Vere enim furores, melancholia (seu atra biles) Epilepsia, fluxiones sanguinis, Angina, gravedines, raucedines, tusses, lepra, impetigines, vitiligines, & pustula ulceroſa plurima, tubercula & articulorum dolores.

Contentum seu Intentio.

De Pathologia morborum vernalium.

Connexio: Manifesta prorsus ratione, cohæret præsens Aphorismus cum superiori; cum enim in eo scripserit Hippocrates, quos-

quosdam morbos esse communes & proprios cuiusque temporis, modo id speciatim explicare aggreditur, assumens primum ver & illius peculiare morbos: Enumerat proinde in hoc veris, in sequentibus autem Aphorismis morbos, qui singulis anni temporibus plerumque accidunt.

Unde hic Aphorismus, cum unicam ponat conclusionem, nempe de morbis veris, non eget divisione, sed manet unimembris, facit ergo in hoc Aphorismo initium à vere, & dicit, furores, melancholias seu morbos melancholicos, comitiales seu epilepsias aliosque hoc tempore evenire, non autem quod hi solum eo anni tempore contingant, sed ut plurimum; cum & alii plures, consimilem Naturam participant, per idem tempus observari possint, ubi præsertim nihil obstitit, quod ratione propriarum constitutionum, & ætatum, vel etiam peculiaris Climatis & Regionis, aut demum Causa ciborum, potuum, exercitiorum, & cæterarum rerum non naturalium, Vernalis temporis dispositionem præverterit & immutaverit. Si itaque genericam horum in Aphorismo enarratorum morborum rationem elicere velimus, generaliter hoc observandum & sciendum atque dicendum erit: Succos omnes in Macrocosmo hyemali tempore, vel delitescunt in terræ profundo steriles, vel stagnant in ejus superficie inertes & mortui: Vernali tempore, calor Solaris nobis vicinior factus, sublunaria hæc, vivifica quasi aura afflando & animando, succos steriles fecundat, mortuos vivificat, crassos attenuat, stagnantes movet, pigros impellit, in profundo sepultos ad terræ superficiem attrahit. Hac ipsa Vernalis caloris actione, succi in corpore humano, hyemali tempore stagnantes, novum motum & fermentationem concipiunt; ipsaque Natura propriis viribus vernali tempore, maxime vigentibus confisa, in humores peccantes, crassos, viscidos, lentos, acidos, crudos, adustos, & corruptos, autumnali & hyemali tempore collectos & retentos in surgit, massamque sanguinis exagitando, heterogenea separare & educere; homogenea vero congregare, meliorare, & sic individui Naturam annuatim quasi renovare satagit: Et ex hac critica humorum commotione, omnes morbi vernaes suam trahunt originem.

At hic illico se exhibet, enucleanda non levis in Hippocrate contradictio. Is enim Aphorismo nono hujus Sectionis *ver saluberrimum* & minime exitiale profitetur, indicans exinde, vel nullos vel levissimos morbos,

morbos, veris tempore evenire; modo autem enarrati morbi & multi sunt & pessimi, quales potissimum comitiales, furores, sanguinis profluvia, angina, lepræ &c. à quibus non raro periclitari, & perire ægro-
tantes cunctis notum est.

Conatur Galenus *in commentario* contradictionem hanc solvere & utramque sententiam in commodum sensum referre; saluberrimum inquit, bene dici ver, etsi hos pariat morbos, quoniam à centro corporis ad ejusdem habitum, humores vitiosos educit: nam hoc ipso tempore profundum corporis expurgatur, vitiosis humoribus à partibus principalibus ad cutem pervenientibus, vel ad loca viliora transpositis. Alii sunt, qui enarratos morbos, à sola sanguinis plenitudine ortos putant, quæ comparata ad cacochymiam levior, & quodammodo salubrior censenda videtur: Alii ver dupliciter considerant, quo ad morborum generationem, vel ratione sui ipsius vel ratione temporum præcedentium: Unde bene adscripsit Hippocrates præfatio Aphorismo nono verni temporis constitutionem, sanis potissimum corporibus congruentem, quibus procul dubio saluberrima est: at vero ob tempora præcedentia, puta autumnum & hyemem, & per ea, aut à Natura ipsa corpora recrementis inquinata, & male affecta, quando adventante vere alterantur & morbosa fiunt, in dicta potissimum mala incidunt, in Aphorismo nostro recensita: hæc enim est differentia inter tempus vernale & alias anni tempestates, ut illud, nisi corpora impura fuerint & pravis succis imbuta, in optima salubritate tueatur; reliquæ vero tempestates, etiamsi corpora se bene habeant, adhuc tamen male afficiant & alterent; quippe *æstate* sudoribus, oris amarore, siti, ciborum fastidio, cruditate, lassitudine, anxietate plurimum vexantur; quin excandescente sanguine, facillime corripuntur febribus, doloribus, vigiliis, diarrhæis, cæterisque gravioribus symptomatibus, humorum omnium acredinem & tenuitatem ab æstu consequentibus: & *hyeme* catharri, tusses, gravedines, raucedines, perfrigerationes fiunt: at vere nihil horum accidit, sed corpus ab aëre temperato, in summa mediocritate constitutum, omni fere vitio caret; quamobrem nisi humores pravi & excrementa alicubi restagnaverint, sane nulli morbi per id tempus aderunt.

Quo autem pacto furores & morbi melancholici ac comitiales, sicut pariter lepræ, pustulæ & dolores articulorum vere accidere possint?

sint? quæ ratione inter vernaes morbos, hic recenseantur? alia est huius loci gravior difficultas, cum alioquin illi referendi videantur inter morbos hyemales, præsertim quia ex superioribus Aphorismis, maior pars horum in constitutionibus pluviosis & austrinis evenire dicta est: Austrinæ autem & pluviosæ constitutiones quam maxime vigere observantur hyeme non vere. At huic facile occurret, qui tantum habuerit morbos vere contingentes, ex peculiari ejusdem constitutione, sequi vitium sanguinis, cum hic eo tempore, internam subeat commotionem, atque partium inutilium sensibiliorem plane secretionem & exolutionem; quin & manifestius fermentetur, increseat & moveatur, eo prorsus modo, quo per idem tempus, experimur succos alibiles ad augeri, & promptius & uberius, poros & fibras arborum subire. Quoniam vero sanguis, per partium texturam transiens, præcedenti hyeme, non tam commode (ut diximus) à suis impuritatibus potuit depurari, accedente vere, quo carniū textura laxior fit, & ductus ac se- cernicula corporis, patentiora evadunt, melius ille repurgatur, ut pene novam videatur induere Naturam: quo etiam fit, ut vagantes per Hyemem quartanæ, aliæque horridicæ febres, eodem verno tempore desinant, secretis nimirum & depulsis sanguinis inquinamentis: Id ipsum comprobare licet, analogia Microcosmi cum Macrocosmo, in aquis Thermalibus, quæ sponte sua per eadem tempora è terræ visceribus erumpunt, & vires suas exerunt, longe cæteris temporibus efficaciores: At vero quis non videt, venas & arterias, vernali tempore turgere, pulsus fieri elatiores, roseo colore vultum præcipue decorari, urinas augeri, capillos renasci & sanguinem ipsum, vegetiorem redditum, sponte sua plerisque è naribus extillare: Juxta Poëtam, qui ad sydus Tauri Vernali tempore Dominans alludit:

Vere novo Goliath, superat Natura gigantem

Hic maxilla asini, victor ab hoste fuit.

Martia vulnificis Natura potentior armis

Vere coit, Tauri cornua prona gerit.

Si ergo sanguis vere, ejusmodi mutationes subit, non mirum si morbi tunc sanguinei exoriantur, quos hoc loco memorat Hippocrates, ubi vitium aliquod, is contraxerit, secretis nimirum & depulsis impuritatibus. Et quoniam præcedenti Hyeme plerumque, sanguis ex constipata cute, ac perspiratione præpedita, acorem aut acritatem contra-

hit, idcirco furores, morbi melancholici, lepræ, aliæque similes ægri-
tudines contingunt; variæ solum pro varietate partium in quas excre-
mentosi humores deponuntur.

Furores hoc loco memorati, non sunt qui cum febre accidunt, cu-
jusmodi est Phrenitis, sed solum communi nomine dicti, *mentis mo-
tiones* seu desipientiæ, quas idem Hippocrates unico vocabulo est
complexus, cum inquit 6. Aph. 53. *Desipientia seu deliria quæ cum risu
fiunt, securiora, quæ vero cum studio periculosa.* Distinxit autem ali-
bi idem Autor quatuor classes deliramentorum, quæ scilicet cum ferit-
tate & impetu, *ut in Phrenitide & Mania*; quæ cum maestitia & timore,
ut in *Melancholia*, quæ cum mansuetudine & fatuitate, ut in *Insania &
Stupiditate*, & demum quæ cum risu & lætitia, ut in *Amore, gaudio &
ebrietate*. Modo videtur hic, vel, generali quodam delirio seu men-
tis depravatione furorem designasse, vel, etiam tantum desipientiæ
speciem quæ cum risu & gaudio evenit, cum hujusce generis desipien-
tia, à sanguine potissimum vegetiori & vividiori pendere soleat. Non
incongrue etiam intelligi posset delirium Melancholicum, quodam-
modo indicatum in Textu: 'Siquidem sanguis acore quodam per
præcedentem Hyemem infectus, & mucositatibus hyemalibus quasi
vinculis ligatus totaque hyeme quietus, & incognitus per modum Can-
cri occulti in corpore humano delitescens; adventante postmodum
vere, Natura nostra in melioranda individui conditione sedulo occu-
pata, istis pravis acidis, fixis, viscidis & lentis humoribus, novam spiritu-
ascentiam, volatilitatem & edulcorationem, inducere laborat, quo
motu perfectivo exagitati, facile ejusmodi pravas superfluitates libe-
riori meatu per laxiorem viscerum texturam trajicit & in glandulas,
per cerebri corticem dispersas deducit vel alio deponit: unde cere-
brum in suis functionibus animalibus depravetur: quandoquidem
docente eodem Hippocrate, affecto liene atque sinistro Hypochon-
drio fortiter pulsante, mens illico commovetur: Et alibi in morbis
melancholicis furorem quoque evenire dicitur; & 6. Epidem. Sect. 3.
sanguineum corpus in Melancholiam, biliosum in furorem transire
fertur. Quamobrem non immerito hic furores, vel generatim men-
tis motiones, vel desipientias cum gaudio & amore, vel etiam cum
vehementi quadam in hac applicatione, quæ internos sensus fatiget, si-
ve idiopathice sive sympathice, possumus congruenter interpretari.

Pro

Pro morbis autem melancholicis non tantum deliria melancholica, ut plerique tenent, sed quicunque alii morbi à melancholicis, Tartareis, & acidis succis progeniti, sumi possunt, ut consueverunt esse strumæ, obstructions, tumores duri, hypochondriacæ affectiones & similes alii; acidum enim, quod in fermentis viscerum, cæterisque liquoribus, vi aut copia exorbitat, & per Hyemem veluti sopitum forte hæsit, verno tempore dilutius effluit, & varias partes petens, patientius inficit, & diversas ægritudines parit, pro corporum & ætatum diversitate: Unde lympham, sanguinem, succum alibilem & cæteros humores in visceribus & glandulis figens diversimode quoque præternaturam inficiet.

Jure merito ergo notantur hic potissimum ab Hippocrate morbi melancholici, puta ab ejusmodi succis melancholicis & acidis inducti: quoniam hi præsertim vere in corporibus male affectis, ex præcedenti hyberno tempore exoriri possunt repurgato nimirum sanguine, à faculentis hisce humoribus acidis per Hyemem cumulat. Quæ etiam ratione comitiales morbos fieri dicendum est, ut qui Hyeme veluti latuere, mox vere prodeant, exuta quodammodo Natura, veterem, & foedam humorum omnium & præsertim sanguinis conditionem, renascentis anni beneficio:

Verum hic dubitare contingit, cur Hippocrates retulerit morbos verno tempore contingentes, ad eos potissimum, qui caput & cerebrum divexant; alius autem visceris interni ægritudinum non meminerit? Huic autem dubio facile satis fit, cum vernalis morbi metastasis & abscessus Naturam referant, quod impuritates sanguinis tunc temporis secernantur, & istæ plerumque in glandulas abscedant, proinde fit ut cerebrum, quod magna glandula dicitur, potissimum ex illarum decubitu afficiatur. Neque vero cerebrum solum, sed etiam circumjacentes glandulæ faucium, & colli non raro inficiuntur & ejusmodi superfluitatibus imbuuntur. Quod autem abscessus morbi isti rationem referant, clare deduci potest ex eo, quod Hippocrates inter vernaes ægritudines retulerit quoque imperigines, vitiligines, lepras, pustulas & tubercula, quæ sane decubitus sunt vitiosorum succorum in glandulas subcutaneas, quin & articulares dolores hoc eodem loco memorati, pari modo ad abscessus reducuntur, ut liquet: Sed tamen non hinc quis credat, has solum hoc Aphorismo descriptas

ægritudines verno tempore exoriri, cum & aliæ aliæque similes, non dissimiliter prodire possint, si fortasse in alias aliasque partes, vitiosi illi humores à sanguine secreti transferantur: quippe non raro comper- tum est, per idem tempus, & pleuritides & peripnevmonias & choleras & febres, aliisque generis acutas ægritudines sæviisse, quamquam Hippocrates illas solum, ut frequentiores, velut in Exemplum Medicis objecerit; cum & hæmorrhagias & gravedines & raucitates & tusses pariter adjecerit.

Sanguinis profluvia frequentissima vere esse solent, non tantum per consuetos ductus uteri in fæminis, & in maribus per marisias seu hæmorrhoides, sed etiam per nares & os. Sunt enim plerique, qui quotannis, statuto quodam tempore vigentis veris, hæmorrhagias na- rium patiuntur, quæ nisi sanguifera vasa, ad certam quantitatem de- pleant, nulla arte cohiberi possunt, at vero sponte sua desinunt, statim atque sanguis deferbuerit, & in pristinam & naturalem crasim fuerit restitutus. Sunt & nonnulli, qui singulis annis mense Majo, per ali- quot dies sanguinem exspuerent citra cujusvis periculi suspicionem, imo cum ante hoc tempus capite dolerent, totoque corpore anxii & anhelosi viderentur, mox ab excreto sanguine levabantur, adeo ut meliorem habitudinem induerent, & salubriorem deinceps vitam vi- verent. Contingunt autem istæ hæmorrhagiæ aut quia sanguis tunc vegetior, & floridior redditus à suis conceptaculis sponte exilit, atque per teneriora & laxiora venarum & arteriolarum oscilla, sibi quodam- modo vias aperit, majorem forte exquirens capacitatem, cum illum pori partium satis excipere non valeant; aut quia acore per hyemem contracto easdem lacescit, atque referat; aut etiam quia, partes ipsæ corporis molliores, & laxiores per id tempus redditæ, liberum luxuri- anti sanguini aditum præbent. Verum enim vero nec Hippocrates, quamcunque sanguinis eruptionem vere contingentem, hoc loco su- mendam voluit sed largam & copiosam; nam inquit *sanguinis proflu- via*: Et quamvis non exprefferit modum & locum istiusmodi profu- sionis, nihilominus credere licet anastomosi potius proflire, per hian- tes venarum & arteriolarum fines, ubi illæ mutuo coeunt, & ex his in illas sanguis propellitur. Quod si ex arteriolis egressus poros partium subeat, & uberius, quam par sit, effluat atque restagnet, inflammatio- nes ac apostemata parit. Hinc non immerito in textu dicitur: Inde

Anginas quoque exoriri cum scilicet in glandulis ac musculis faucium, & gutturis, is hæret. Non dissimiliter *raucedines* & *gravedines* evenire credendum est, siue quod serosiores, diluti sanguinis superfluitates in os, & nares à cerebro confluant; aut è vasis lymphaticis, in eorundem glandulas derivent; siue quod solamina aëremutationem, à solis accessu illæ consequantur. Siquidem ejus vi proximiora nostro vertici signa perlustrantis ambiens calor, sensibilior persentitur, unde attenuantur humores, & aquei vapores è terraqueo globo, uberius elati vapidum, pruinosum, ac nimbosum aërem efficiunt, catharrorum certissimum promotorem.

Lepra hoc loco memoratæ, num revera illæ intelligendæ sint, quæ maximi apud veteres horroris erant, & non tantum insanabiles credebantur, sed etiam contagiosæ, dubitari potest: Nam si ejusmodi conditionis & naturæ lepra foret, non videtur ex vernali constitutione illam posse oriri; quippe sanguis licet vere à suis impuritatibus repurgetur, nunquam tamen ad eam pertinet pravitatem, quæ tam horribilem & contagiosam affectionem pariat, ut non raro etiam instar pestis miserrime patientes enecet. Accedit quod Hippocrates simul cum lepra junxit *vitilignes* & *impetigines*, quæ longe mitiores sunt cutis ægritudines, utpote citra vitæ periculum tolerabiles, & absque contagio. Quare alterius generis videtur statuenda, qualis nostra ætate *scabies*, & puerorum *prurigo* est. Sed enim non eadem fuit Hebræorum, Græcorum, & Arabum lepra, quamvis *Mercurialis Lib. de Morbis Cutaneis 2. cap. 5.* contendat lepram Græcorum seu Elephantiasim, esse *albaram* nigram ab *Avicenna* descriptam *Lib. 4. Fen. 30. Tract. 30. cap. 1.* Eam namque differentiam statuit *Marcellus Donatus Lib. 1. de Histor. Med. mirabil. Cap. 4.* Inter lepram Arabum, & Elephantiasim Græcorum, quod illa, tumorem pedum, & crurum, cum varicibus protuberantibus & atro colore, referret, ex *Rhass Lib. 9. ad Almanzorem cap. 93.* Elephantiasis vero Græcorum, universi corporis foedum tumorem adjunctum haberet, adeo ut Paulus *Lib. 4. cap. 1.* Universi corporis Cancrum appellaverit, & Galenus *Lib. 2. de Morb. Causis Cap. 7.* Elephantiacis totam formam immutari tradiderit. At vero hoc morbi genus fusius describere visus est *Arctæus Lib. 2. Cap. 13.* qui legi potest, & passim alii ex Praxi consulendi.

Rarissimum nostris temporibus hunc morbum, imo & antiquioribus

ribus ignotum pene in Italia scribit *Celsus* Lib. 3. Cap. 25. Peculiarem vero Ægypto & Alexandria testantur *Plinius* Lib. 26. Cap. 1. & *Galenus* 2. de arte Curandi ad *Glaucanem* Cap. 10. at nunc in Belgio, & Gallia, frequentem esse referunt, *Amatus Lusitanus* Cent. 2. Curat. 34. & *Valleriola* Lib. 6. enarratione 5. Contigit transactis annis, videre Neapoli, Monachum quendam Elephantiacum, qui licet cum aliis familiariter versaretur, nunquam tamen illos infecit, unde veritati consonat, quod ex *Alexandro Tralliano* Lib. 2. probl. Med. 42. habet Mercurialis, minus contagiosam esse lepram in Italia: quod pariter innuere visus est *Aristoteles* Sect. ultima Probl. 7.

Hinc modo deducere licet, lepram inter morbos vernos ab *Hippocrate* recensitam, non eam, quæ contagio inficit, putatusque incurabilis, sed quæ *in fine Proreth.* mitior, & facilioris dicitur Curationis, esse intelligendam, veluti quæ à repurgamento sanguinis oriatur, sitque ad scabiei dirioris speciem referenda. Sub nomine autem lepræ hic ab *Hippocrate* indigitatur, ob quandam solummodo analogiam, quia veluti scabies cutaneus Morbus est; quamquam lepra etiam reliquarum partium & humorum vitium consequatur.

Impetigines & Vitiligines morbi quoque cutanei sunt, solumque differre dicuntur, quod non æque cutim fædent, aut profunde inficiant: cæterum in utrisque Pili & Capilli radicitus eroduntur ac defluunt, imo ipsa cutis quandoque ad album, aliquando etiam ad nigrum aut aliter coloratur; contagione carent, nec aliud in commodum pariunt quam turpitudinis: Et licet veterum plerique scripserint, graves esse ægritudines, & *Paulus*, *Ætius* & *Serapion*, morbos fecerint incurabiles, hi tamen nunquam lethales appellarunt, sed solum difficillimæ curationis; unde *Celsus* foedas illas quidem nuncupavit, minime vero periculosas: Fient autem solum deteriores, cum in ulcera desinunt, & præter cutis læsionem, interius pervadunt & viscera inficiunt: Nec tamen aliter contingunt vere, quam aliæ ægritudines cutim afficientes à repurgati scilicet sanguinis in cutim transpositione. Nec alia de causa prodeunt verno tempore *pustula ulcerosa* videlicet, cum inquinamenta sanguinis in cutim delata ibidem hærent, salsam acrem, acidamque conditionem præferentia, unde simul cutim fædent & ulcerent. Quamobrem diversitas harum omnium cutanearum affectionum tota erit, à diversa cutis,

cutis, & vitiati sanguinis conditione, ut propterea acidus austerus & crassus humor in densiori cute lepras, impetigines vero & vitilignes, tenuis & acer, falsus denique & erodens, in cute rariori pustulas ulcerosas excitet. Verisimile autem est, hasce sanguinis superfluitates, priusquam ad cutim, tamquam ad universale corporis emundatorium deferantur, & simul cum sanguine in venis & arteriis continentur non tantæ esse pravitatis nam si fortasse ejuscemodi vitium interius referrent, fieri non posset, quin viscera inficerent, & febres, inflammationes, cæterosque graviores morbos excitarent, unde credendum est, hujusmodi gravitatem contrahere, cum ad habitum corporis eruperint, ambientis aëris potissimum alteratione, atque succorum in glandulis subcutaneis mixtione: tum enim hærentes, alienam induunt Naturam, coagulationi & corruptioni subjiuntur, atque à perspirantibus halitibus exagitata, extraneas & inconvenientes fermentationes subeunt, & degenerant in fermenta, unde quaque vitæ dissidentanea & molesta, quo fit, ut ardorem, dolorem & pruritum afferant, præsertim à pastu, & ex motu, vel cum aëri calido corpus exponitur, *Tubercula* denique & *Articulorum dolores* fiunt pariter verno tempore, abscedentibus ad cutim & artus, iisdem excrementitiis humoribus à sanguine, qui si serosi fuerint magisque fluxiles, dolores; si vero crassi & consistentes tumores afferent.

Ne autem hæc damna male affectis istiusmodi corporibus ingruant, præstabit statim ineunte vere, sanguinem ab hujusmodi inquinamenti repurgare, iis præsertim medicamentorum generibus, quæ diaphoresim blande movere apta sunt, sed & per reliqua corporis emissaria crassiores succos promovere: In quam rem potissimum conferre consueverunt, quæ ex viperarum carnibus conficiuntur, item ex Cornu Cervi, Antimonio Diaphoretico, chalybe &c. præter ea quæ per alvum & vias urinæ educendo, opportuniora videbuntur. Quod si jam ista mala accesserint, proderit speciatim ad insanias, melancholias & cæteras melancholicas affectiones, Ellebori seu Veratrius. Ad profluvia sanguinis, Vitriolum spiritu & oleo orbatum, atque externe ad calcis formam redactum. Ad impetigines & vitilignes, præter diaphoretica, quidquid ex sulphure præparatur. Ad lepram & Elephan-

phantiasim, omnisque generis pustulas, vinum viperinum, ac pulvis viperarum, Extra vero aqua Calcis. Plura ex Praxi petenda.

Dices I. Ver est saluberrimum Ergo non generabit furores nec alios morbos &c. non generabit morbos ratione sui ut diximus concedo, ratione alterius causæ & temporum præcedentium nego.

Instabis: Infania, Melancholia, Epilepsia sunt morbi autumnales, Ergo non vernaes &c. sunt morbi autumnales seu ab autumno orti, tamquam à principio à quo concedo: tamquam à principio ad quod nego: Autumnus autem ejusmodi humores melancholicos generavit, qui per hyemem latuerunt in corpore, in vere autem incipiunt primo actuari per fermentationem.

Urgebis: Idem videtur dicendum de sanguinis fluxionibus, impetiginibus, lepris &c. &c. negando paritatem, nam si morbi sunt magis veri proprii, ut jam diximus in Textu.

Denuo Instabis: Isti morbi non possunt dici proprie veris, quia eorum materia æque per hyemem colligitur & hæret &c. respectu materiæ per hyemem collectæ non sunt proprie veris concedo, respectu fermentationis; depurationis & motionis in vere factæ nego.

Dices II. Podagra refertur ad articulares morbos, sed illa maxime fit in hyeme, Ergo non in vere. &c. Podagra frigida seu à serosis humoribus orta plerumque fit in hyeme transeat calida bilioso sanguinea maxime fit in hyeme nego.

Aphorismus XXI.

Æstate vero nonnulli horum, & febres continua & ardentes, & tertiana plurima, quartana item, & vomitiones, alvi profluvia, ophthalmia (seu lippitudines) aurium dolores, oris ulcerationes, genitalium putredines, & sudationes.

Con-

Contentum seu Intentio.

De Pathologia morborum æstivalium.

Connexio : Cum in antecedenti Aphorismo, de Morbis veri propriis suam mentem explicuisset, nunc in hoc Aphorismo ad æstatem accedit, & illius quoque peculiare morbos exponit; sequitur enim æstas ipsum ver. Dividitur autem hic Aphorismus in duas partes: In *prima* dicit: æstate aliquos verno morbos fieri: In *secunda* ait: æstatis morbos, esse febres continuas, ardentes, tertianas plurimos alvi fluxus, ophthalmias, aurium dolores, oris ulcera, genitalium putredines & sudamina.

Progreditur ergo in hoc Aphorismo Hippocrates æstivos morbos enarrare, illosque partim veri convenire, partim proprios & peculiare æstatis esse, quare mox initio huius Aphorismi inquit: *Æstate autem nonnulli horum*: quinam autem isti morbi sint, non explicat; verisimile tamen videtur eos esse qui maiorem retinent analogiam, cum æstu illius tempestatis, atque ab humoribus tenuioribus & acribus pendere possunt, ut sunt profluvia sanguinis, impetigines, pustulæ, ulcera, angina. Sanguis etenim, vel tenuior redditus vel acrior, cutem exulcerare, & musculos gutturis ac faucium inflammare potest: Accedit quod prima æstatis pars, magis veri assimilatur, hinc etiam similes morbos producere potest. Præter hos, fieri etiam æstate ait febres continuas, & ardentes & tertianas, non quod reliquæ adhuc febres in æstate fieri nequeant, sed quod hæc potissimum à vehementi æstu illius tempestatis æstivæ fiant.

Verum unde tres hic relatæ febrium species, inter sese differant disquirere super vacuum non erit, cum distinctis non tantum nominibus, sed & proprietatibus atque effectibus illas experiamur.

Veteres & Galenistæ, febres ardentes & tertianas, tum continuas tum intermittentes, vel secundum triplicem caloris naturam, vel solum loco differre asserunt. Cum autem triplex ipsis sit calor: Elementaris seu simplex: putridus: & malignus: ideo tres nascuntur febrium species; *simplex* uti est ephemera synochus simplex & hectica, quia unus solum calor excedit. *Putrida* uti est febris continua tertiana, synochus putrida, ardens seu causus &c. *Maligna* uti est Ungarica, petechialis, pestilentialis. Materiam autem omnium harum

harum febrium, eandem prorsus esse statuunt, bilem nempe quam in venis collocant, & naturalem appellant, cum putruerit constituunt, sed si in venis maioribus & circa præcordia *ardentem*; si in venis minoribus, aut earum apicibus *tertianam continuam*; si demum extra venas diffusa, in habita corporis putredinem contraxerit, *tertianam intermittentem* pariat. Verum hæc documenta veterum à Neotericis non probantur, qui plurimis rationibus atque experimentis, evictam, & falsam demonstrarunt, hanc, de quaternario, humorum intra venas numero doctrinam: Et si qui unquam in venis & venarum apicibus putrescent, vicissim per arterias circumiret, & universum sanguinem inficeret; imo adhuc è venis minoribus in majores immitti oporteret, ut cor præternaturam alterant: Sed & neque Bilis ista intra venas putrescens, posset unquam ad habitum corporis, aliove extramitti, sine vasorum diruptione, atque ingenti sanguinis effusione: Quæ præterea de fuliginibus putridis effumantibus ad cor ipsi commentantur, vana omnino sunt, nam si putridæ essent, excurrento per venas, sanguinem & reliquos humores inevitabiliter inficerent, perenni cum iisdem societate; quin imo improbabile prorsus est, unum humorem intra venas putrescere, cæteris una simul commixtis, non æque in putredinem adactis, præsertim, cum pituita & melancholia in quotidianis & quartanis febribus putruerint, immunibus interea à putredine, Bile & sanguine, ad illam contrahendam aptioribus. At de hac re fusius egimus in tractatu de febribus, ubi ad fermenta & variam fermentationem in sanguine inductam, omnia retulimus: Illud autem nunc hisce tribus febrium speciebus, hoc loco ab Hippocrate memoratis commune videtur, quod acritudinem in sanguine inductam consequantur, per quam facillime is ad fermentescendum disponitur, unde postmodum, ardores, inquietudines, sitis, vigiliæ, insomnia perturbata, deliria, vomitus, cardialgiæ, diarrhææ, aliaque id genus oriuntur.

Atque hinc est, cur æstate potissimum eveniant, cum scilicet aëris æstu attenuantur humores, sanguinis motus celerior fit, aquei liquores per sudorem uberrime egeruntur, adeoque in cunctis humoribus facilis commotio ac fermentatio concitatur, cum acredine & sulphurea quadam phlogosi seu inflammabilitate, quam sæpissime istiusmodi febres tertianæ & ardentes comitantur, stipatæ symptomatibus id ipsum omnino attestantibus. Poëta Astrologus aliam hujus dat rationem:

Æstivo

Æstivo rabiosa scatet cur tempore bilis?

Syderens regnat corpora nostra leo.

At mirum fortasse videbitur, cur Hippocrates inter morbos æstivos quartanas febres referat, quas idem sequenti Aphorismo cum Autumnalibus junxit. Sunt quidem plerique interpretes, qui expungendas esse arbitrantur, quod neque in antiquis Exemplaribus, nec apud Theodorum Gazam, fidissimum & diligentissimum expositorem, nec etiam apud Galenum in hoc Aphorismo memorentur. Sed & neque Celsus hanc eandem sententiam interpretatus, *quartanarum* meminit: Quamobrem non immerito, perperam adjectas hoc loco illas existimant. Verum cum ipse Hippocrates 2. Aph. 25. *æstivas quartanas* scripserit magna ex parte breves esse, atque experimentis innumeris compertum habeamus, plures per idem tempus vagari, procul dubio nihil vetabit, quin etiam cum æstivis morbis illas commemoremus. Forte autem difficile visum est commentatoribus, ad æstivos morbos quartanas febres referre, quoniam creditum ipsis est hætenus in solo humore melancholico qui æstate vigere non putatur illas exoriri; at cum febres istæ non ab humoribus sed à periodis, quas servant, sint desumptæ, plane poterunt omnes ab omnibus & singulis humoribus depravatis, ad certum tamen tempus cumulatis ac fermentescentibus, progigni, ut alias fuse est demonstratum: Sed enim, Hippocratis tempore, maximus error erat, velle à succis febres periodicas determinare, cum tamen tunc in confesso cunctis esset, ab uno, eodemque humore, quascunque febres proficisci; unde ab eodem Hippocrate proditum est, omnes febres à bile fieri, diversimode tamen affecta.

Vomitus æstate faciles esse solent, tum quia ventriculus illo tempore, gravari solet excrementis ex mala ciborum digestionem cumulatis, à fermentorum dissolventium hebetudine, tum quia male confectus & degeneratur Chylus, in acres & fastidientes humores versus, infensa quadam oleositate ventriculum nausea & vomitu afficit, cujus indicio est oris amarities, sitis, ciborum fastidium & stomachi laxitas ac molesta turbatio, unde prompta & facilis vomitio. Quod si fortasse isti succi vel sponte sua defluant, vel adigente ventriculo per fibras in pylorum & intestina protrudantur, eversis una simul humoribus, è ductu pancreatico & cholidocho eodem confluentibus *alvi profluvia*

contingunt, quæ hic græco nomine *Diarrhæa* specialius appellantur, idque potissimum cum alimenta labiliora fuerint, velut fructus horrarii dicti, qui fermenta ipsa pervertant magis ac diluant, atque intestina laxent, indeque facillime secessus moveant. Sed tamen æstivo tempore biliosæ superfluitates è sanguine copiosiores cumulantur atque in cystim & cholidochum deducuntur itemque liquor pancreaticus acrior & tenuior esse solet, qui & potentius exsolvit, & vehementiorem cum felleo humore fermentationem excitat, & acrius quoque intestina ad motum peristalticum proritat; unde non tantum *Diarrhæa* sed etiam dysenteria, cholera & similes egestiones inferri possunt.

De oculorum lippitudinibus seu ophthalmis res est evidens quod sæpius in æstate vagentur, à nimio aëris æstu, à pulvere, à lumine, tunc confertiori: Num autem humidæ an siccæ intelligantur, nonnulli ambigunt; & quamvis de utrisque sermo videatur habitus, cum ab æstu siccæ, atque à defluente in oculos, liquato per calorem seroso humore, humidæ dici possint; quia tamen Hippocrates alibi siccas expressit, hic vero reticuit, videtur humidas voluisse notare, nam cum illas maluerit intelligere, siccas semper lippitudines in Aphorismis adiecit: Sed tamen opinari licebit, tum humidas, tum siccas, hoc loco consideratas, utpote indefinite sumptas: humidas quidem in obesioribus, & fucci plenis, siccas vero in pichrocolis & gracilibus. At maior difficultas est de *aurium doloribus*: siquidem hi potius hyemis, quam æstatis morbi videntur, quemadmodum idem Hippocrates antea retulit, quippe huiusmodi dolores à delabentibus è capite in aures excrementitiis humoribus, progigni solent, qui cum hyeme potissimum superabundent, & caput oppleant, non videntur propterea æstivo etiam tempore prævalere, in aures deferri & dolores incutere: Quod si non minus hyeme, quam æstate vigeant, & eiusmodi mala pariant, profecto nullum tempus ab hac aurium molestia immune erit, cum cæteroquin æstivum tempus, vim habeat, quascunque serosas superfluitates, saltem per sudorem, absumendi. Verum aurium dolores, cum variè esse possint, à varietate delabentium humorum, poterunt quoque aliis anni temporibus inferri. Hyeme namque, & in constitutionibus austrinis, à lymphæ caput gravante, aures dolebunt, dolore tamen obtusiori, unde etiam subsurditates fieri ante notatum est; at vero æstate, dolores pungentes & acerbiores accident, ab humoribus tenuio-

nuioribus & acrioribus illati; modo hos aures petere manifeste docuit Hippocrates 4. Aph. 27. inquiens: *Quibus biliosa sunt dejectiones, hæ superveniente surditate cessant: Et quibus surditas adest, supervenientibus biliosis dejectionibus cessat.* Et Aphor. 60. ejusdem Libri: *Quibus in febribus aures obsurduerunt, sanguis ex naribus fluens, aut alvus turbata, solvit morbum.*

Oris exulcerationes fieri etiam possunt æstate, vel ab illabente sero, tunc temporis acriore, vel à consimili salivarii roris vitio, vel ab halitibus è ventriculo male affecto elevatis, vel etiam à molestis acrium & erodentium succorum vomitionibus, quibus non raro & os, & fauces, & guttur, & dentes graviter offenduntur.

Genitalium putredines hic memoratæ exponuntur à quibusdam, pudendorum ulcerationes ut pubis simul & sedis, adjacensque partium, vitia denotentur. Illæ autem, non solum fieri possunt, propter decubitum humorum acrium, ad eas partes, sed etiam ob sudores, furfures, & egestionem alias, per cutim, æstivo tempore frequentiores, quæ nisi convenienter abstergantur, & repurgentur, procul dubio, pustulas, & putrefactiones afferent, humida præsertim & austrina constitutione; cumque hujusmodi mala pudendis accidunt, ab iterato sudore, proinde addit Hippocrates in textu *sudores*: Et quidem hi, peculiare sunt ejus tempestatis evacuationes, à tenuitate simul humorum & à majori pororum cutis laxitate. Neque vero simplices sudores intelligit, sed pustulas quasdam, quæ per id tempus à mordacibus sudoribus in cute erumpere, solent. Græce enim scribitur *ἰδρωα*, latine *sudamina*, quæ pustulæ sunt tenues & rubræ per totum corpus dispersæ, aquea materia sudoris æmula repletæ, & non raro ardorem ingentem, ac pruritum molestum afferunt. Oriuntur à lymphæ, vel sanguinis sero acriori, falsilagine muriatica prædito, ambientis æris æstu attenuato, atque ad habitum corporis transmissio.

Ceterum quæ alias ad fugandas febres in praxi sunt recensita, hic in usum revocari poterunt, ut ipsis per æstatem imminentibus occurramus præprimis autem repurgato sanguine, correctisque fermentis viscerum, unde ejusmodi labem exoriri suspicio est.

Nec dissimiliter in cæteris morbis, hoc Aphorismo memoratis operandum, cum omnes ab eodem fonte proficiscantur. Cumque hæc ex praxi dictis notissima sint, non est, ut longius in iis enarrandis, immoremur.

Quæres: Cur in æstate pauciores morbi cutanei fiant quam aliis anni temporibus? *R.* quia ut diximus, cutis in æstate magis aperta est, unde humores cito dissipantur, neque obdiuturnam moram corrumpuntur, unde fieri possent exulcerationes, nisi cutis tam subtilis sit, ut in ipso transitu exulceretur, veluti in ore sæpius contingere videmus ob cutis subtilitatem, quæ in illa parte vel maxime est.

Dices: Sanguis est humor benignus ergo ab hoc furor fieri non poterit *R.* sanguis nec quali nec quanto nec motu peccans est humor benignus concedo: qui vero in uno horum peccat est benignus nego.

Aphorismus XXII.

Autumno vero, æstivi etiam, multi morbi fiunt, & febres quartanæ & erraticæ & lienes, aqua inter cutem, tabes, urinæ stillicidia, lienteria, dysenteria, coxæ dolores, angina, asthmata, volvuli, epilepsia, insania, (furores) melancholia.

Contentum seu Intentio.

De Pathologia morborum autumnalium.

Connexio: Cum in præcedenti Aphorismo peculiare æstatis morbos numerasset, nunc ad eos qui in autumno fiunt, accedit.

In duas partes dividitur hic Aphorismus: In *prima* dicit quod in autumno multi æstivi morbi fiant: in *secunda* memorat proprios & peculiare morbos, qui in autumno obtingunt, quos nempe in Aphorismo expressit & specificavit. Et sicut in æstate dixerat, nonnullos vernos morbos eo tempore contingere, ita nunc plurimos æstivos adhuc

huc autumno fieri afferit. Et quidem credibile est, eos autumno etiam evenire, potissimum inter illius initia, qui propter communem utriusque temporis, scilicet desinentis æstatis & incipientis autumnii habitudinem, maximam cognationem habent, & eorundem succorum vitia consequuntur, veluti sunt tertianæ febres, tum continuæ tum intermittentes. Sed præterea recenset, speciatim autumno vagari quartanas febres & erraticas & lienes seu infarctus & tumores atque obstructions lienis, aquas inter cutem græce hydropes, tabes, urinæ stillicidia, lævitates & difficultates intestinorum seu lenterias & dysenterias atque alias in Aphorismo recensitas.

De *quartanis febribus* nulli dubium est quod inter autumnales morbos sint recensendi, cum ab acidis tartareis seu (ut veteribus placeat) melancholicis succis progigni perhibeantur, qui autumno vigere solent.

Erraticæ etiam febres ejusdem tempestatis peculiare dici debent, tum quia autumnus, ob sui inæqualitatem, heterogeneorum succorum causa est, qui varie & differenter corpora inficiunt; tum etiam quia humores, ex præcedenti æstate ad cutem commoti, atque sudoribus exoluti, autumno detinentur, & sparsim per membra corporis diffusi, inæqualiter illorum fermenta, & sanguinem ipsum alterant, ideoque *erraticas* pariunt ægritudines.

Dicuntur autem *febres erraticæ*, quæ certum typum, ordinatam periodum, & eundem invasionis modum non servant, sed modo diebus singulis, sed diversis horis, modo alternis & interruptis adoriuntur & ægros affligunt, aliquando noctu ingravescent, quandoque interdiu, nonnunquam cum rigore aut horrore, aliquando sine illo, modo his modo aliis symptomatibus stipatæ; de quibus scripsit Hippocrates, *Lib. de Rat. Victus in acutis: Inconstantes & erraticos morbos curare non expedit, priusquam constiterint*: id est certa lege & periodo invadere cæperint.

His plerique adjungendas esse contendunt febres illas quæ *quintana sexana & septana* vocantur ab eodem Hippocrate *1. Epidem.* moti autoritate Galeni, negantis ibidem quintanas, sexanas & septanas febres, easque ex accidenti tantum haberi posse, id est, cum quis ex periodica febre convalescens, ob errorem in victus genere commissum, *febrem ephemeram* incurrat, quæ ab ultima accessione febris periodicæ
differ

distet intervallo quinque, sex, aut septem dierum, unde possit quinta-na, sexana, aut septana seu septimana appellari. At vero isti longe lateque falluntur: Etenim Hippocrates ibidem febres ex accidenti & irregulariter inductas non describit, sed periodicas & ordinatas, illas-que veluti sæpius observatas memorat: Erraticas vero febres nequa-quam convenire posse cum quintanis, sexanis, aut septimanis, inter pe-riodicas, ab eodem Hippocrate relatis, evincitur clarissime ex Celso, qui *erraticas incertas* vertit, quæ scilicet nullum statum tempus, nec ul-lum accessionum & remissionum ordinem servant, quemadmodum habent periodicæ. Error autem inde ortum habuit, quia putarunt cum Galeno, à diversis specie humoribus, periodicas febres differri & distingui, id est, tertianas à bile, quartanas à melancholia & quotidia-nas à pituita; cum tamen potius à reditu & circuitu quem referunt, ta-les appellandæ sint.

Lienis tumores à restagnante ibidem sanguine acidior ac me-lancholico fieri, apud omnes, veteres & recentiores in confesso est: Unde lienosi livescunt, ventre tument, præsertim sinistro hypochon-drio, reliquo corpore marcescunt, & in cunctis operationibus hebetes evadunt: Hinc notavit idem Hippocrates *Lib. de Loc. in homine*; co-yivaciores & salubriores fieri homines, quo magis lien detumuerit & mole fuerit imminutus; at contra valetudinarios esse, quibus incre-buerit; quamobrem Alciatus illum comparavit fisco, qui alienis opibus ditescit inquit *Lib. 2. Embl. 97.*

Splene aucto reliquitabescunt corporis artus:

Fisco aucto arguitur civica pauperies.

Sed unde id accadat difficile est determinare. Qui illum cum He-pate sanguinis Officinam credidere, plus justo per Ramum Spleni-cum, Chylum Hepati subtractum, ad se trahere arbitrantur. Tho-mas Bartholinus, acidum sanguinem fermentantem, reliquo corpo-ri detrahare putat, indeque maciem universalem exoriri. Ego ve-ro existimo, alternatim & vicissitudine quadam sanguinem & lienem infici crassitie & acore, eoque veluti in utili corpus non ali, sed potius coinquinari & marcescere, hunc vero obstrui & tumefieri. Id vero frequentius obtingere solet post febres, sanguis enim paroxysmorum frequentia, particulis suis balsamicis, maxima ex parte orbatus, totus crassus viscidus, acidus, grumosus & iners, adeoque ad stagnationem, obstru-

obstructionem, & tumescantiam aptissimus efficitur: Separantur autem, terrestres hæ faculentia à sanguine facillime in ipsa filtratoria lienis machina; tum quod sanguis ad hanc partem, ob arteriarum & vasorum variorum, copiam facilius feratur, & difficulter per revectantium vasorum exilitatem & inopiam refluat; tum quod propter eorum tortuositates facile stagnet, & propter hujus visceris spongiositatem excrementa facile imbibantur, quibus infarctus lien, in tumorem subinde maximum excrescit.

Eximi capit hoc nostro sæculo lien è canibus in Anglia, & *Bartholinus in Anatomiarenovat*: refert se ejusmodi extractionem, felici cum successu vidisse institutam coram Friderico Tertio Danorum Rege, animalibus exinde superstitebus sanis & agilibus. Lienis etiam è canibus exemptos vita superstitere refert *Barbette prax. Lib. 3. Cap. 10.* In vetula etiam, splenis scirrhus laborante tentatam fatetur Leonardus Fioravante, quæ supervixit: Aliam quoque memorat Clerckius in rustico quodam apud *Bonnetum Medicina Septentrion. Tom. 1. Lib. 3. Sect. 20. Cap. 12.* Fabulosam nihilominus illam putat Bartholinus in hominibus, quippe qui subinde vasa plurima frangi & scindi necesse dicat, non sine vitæ periculo: additque invectam esse hanc fabulam à Plinio & antiqua Erasistrati opinione, qui lienem frustra animantibus à Natura inditum affirmabat, cum quæ urinaria vesica carent, liene quoque sint ordata. At ego non video, qua ratione id ipsum peragi non possit in hominibus, quod in cæteris animalibus actum ipsemet Bartholinus, aliique fatentur, nisi solum ex imminente vitæ periculo, ab infelici ejus operationis eventu; non enim tam temere licet humanum corium æque ac belluinum negotiari.

A tumoribus & obstructionibus lienis, ejusque infarctibus inveteratis sæpe *hydrops* seu *aqua intercus* oritur cum exinde aqua intercutem collecta tumorem efficiat, non raro etiam universalem, qui si digitis comprimatur, foveam relinquit. Veteres existimarunt, aquam hanc in hydropicis colligi, aut vitio hepatis, in aquosum humorem, chylum commutantis, aut ex abundantiori melancholico lienis humore, qui ab Hippocrate, sub nomine aquæ fuit pluries indigitatus. Sed nuperrimis observationibus jam innotuit, à lymphæ suis vasis relaxatis, aut disruptis, exiliente provenire, quæ si in toto corpore colligatur, anasarcam, si in imo ventre, ascitem, si in solo capite, hydro-

Ecc

cepha-

cephalon, si in scroto, hydrocelem, atque alibi, alias hydropes particulares pariat; cumque ista vasa plurima per jecur & lienem diffundantur, propterea fit, ut ex illorum affectionibus sæpe sæpius hydropes oriantur: Quod equidem facile contingit, *vel* quia per diuturnam conflagrationem febrilem, activa à sanguine avolant; passiva uti est frigidum, acidum glutinosum exaltantur: Vel quia visceribus filtratorii & separatoriis graviter obstructis & tumore notabili obsessis, serum seu dicta lymphæ à sanguine separari, & per vasa lymphatica reflueri nequit, eo quod acini viscerum glandulosi, amissa naturali mollitie & spongiositate, sero transudanti, debitum denegent transitum, quod non raro ad optimam hepatis superficiem delatum, vesiculas hydropides elevat, quæ crescendo ruptæ, continuas in abdominis cavitatem aquositates destillant: Vel quia ut pariter innuimus, quia serum lymphaticum in massa sanguinis collectum cacochymiam universalem, & viscerum dyscrasiam inducere solet, maxime autem in iis, qui nimio potui in paroxysmis febrium indulgent, nec debitis sudoribus in eorum sine diffuunt. Quod *tabes* in autumno plerumque contingant, jam supra quoque notatum est, imo quod eo tempore tabidi male se habent & periclitentur, docuit hoc in superioribus locis Hippocrates. Videtur autem macies tunc fieri sensibilior, quoniam ob temporis inæqualitatem, sanguis per pulmonem trajectus & circulatus, diversimode afficitur, & iteratis aeris vicissitudinibus perpetuo alteratur, atque à blanda sua indole, partibus nutriendis amica, non parum declinat: *Vel* quia febres chronicae & autumnales, partim longo incendio humores evaporando, partim diuturnis sudoribus colliquando, extremam corporis maciem inducere solent: *Vel* quia ob partium externarum constipationem & pororum occlusionem, materia scabiosa vel arthritica, pro more suo ad partes extimas expelli non poterat, collecta in pectore, ibidemque tragædias suas rodendo & absumendo, ludat & varios affectus, imo & ipsam tabem inducat: Sed & humani corporis habitudo, non minus ac cæterorum viventium, eo anni tempore non leviter permutatur, tunc quippe, quemadmodum arbores & plantæ universæ defrondent, ac veluti succo nutritio privata, contabescunt, ita pro modulo suo humana corpora nutritionibus deficiunt, eaque potissimum, quæ gracilia sunt, & sanguinem sunt nata morbosiore vel saltem minus defæcatum. Hinc Poëta:

Sub

Sub variis mala longa petit mors pallida larvis:

Excipit hos hydrops: hos macilenta Phtyfis.

Cum macie huic, res mira! fames simul hectica crescit:

Huic non decrescit, flumine pota sitis.

Sillicidia urine græce *stranguria* frequenter autumnino inchoant, & frequentius quoque exasperantur. Cum enim hæ ab humorum in illos ductus confluentium acredine, aut ab ulcere ibidem contracto, aut etiam ab angustia, tuberculis, calculis, arenulis, & glutinosis succis inducta, procedant, sane per autumni tempus, quo hæc omnia incrementum solent, vel incipiunt vel augefcunt.

Difficultates & levitates intestinorum etiam referuntur inter morbos autumnales, qui licet oppositis de causis evenire videantur, ut propterea à *Celso lib. 2. cap. 1.* à *Theodoro Gaza* sint in expositione hujus Aphorismi prætermittæ *dysenteria*, non tamen eas simul inferri credendum est, sed prout illæ in diversis corporibus prævaluerint. Et quidem si in alvum superfluitates humorales per æstatem cumulatae, mox autumnali tempore compressæ, & depravatae dependantur, orientur *dysenteria*: Si vero relaxentur viæ intestinorum, ac succi dissolventes diluantur, fient *lienteria*. Congestæ cruditates ab immodico usu fructuum, ab intempestivis potibus gelidarum aquarum & aliis similibus, id ipsum parere possunt, modo invertant, depravent, corrumpant, tum fermenta stomachi, tum intestinorum liquores, alimentorum dissolutioni & secretioni inservientes. Sed & difficiles & dolentes egestionem non raro insequuntur, fæcum duritiem, & viscosos & hærentes succos, vellicante acore molestos, ut in *Tenesmo*, qui autumnino maxime, ab iisdem dictis causis fit.

Coxendicum dolores græce *Ischiades* inferri dicuntur, à luxatione ejus articuli, quo Ischium cum Ilio jungitur, luxationem seu laxationem potius hanc efficiunt crassi & glutinosi humores, qui in cavum juncturae horum ossium inseruntur, & Ischium præsertim seu coxam in sensu & motu divexant, & membranas circumvestientes, nervulis fere innumeris refertas, acerbissimo dolore excruciant. Solet non raro etiam insequi vitium depluentis succi in medullarem Ischii substantiam, qui membranulam circum ambientem vellicet & pungat. Non semel quoque observatum est, dolorem

hunc oriri ab affecto perioestio, quo deinde syderato fit, ut coxa universa sensim paralyfim, & totius cruris tabem incurrat.

De Anginis, nihil est, quod repetamus hoc loco, cum de iis jam supra actum sit: Solum adnotare juvabit; progigni illas autumnno, partim ab ambiente aëre, inæqualiter affecto & gutturis ac faucium musculos exasperante; partim etiam à detentis halitibus, qui ad organa vocis potissimum delati, inflammationem, & tam deglutitionis quam respirationis. difficultatem pariant.

Si vero decumbant humores in pulmonem, ac ductus aëris impedian, graventque sua mole, spongiosam & raram ejus visceris substantiam *Asthma* exoritur, seu creber anhelitus, gravior tamen & levior, pro majori vel minori ejusdem infarctu. Videtur autem hoc loco Hippocrates, eam solum modo speciem, designare voluisse, quæ difficilem quidem efficit respirationem, sed absque multo conatu, & ronchis, ut accidit in Orthopnoea, quam obrem non immerito usus est, nomine Asthmatis, quamvis Cardanus anhelationes exponat.

Volvuli græce *Ilei*, ab Intestino Ileo & Volvulo, quod speciatim in his affici putatur, morbi sunt; in quibus nihil per alvum egeri potest, sed fæces sursum, inverso motu peristaltico, delatæ per os excernuntur. Quamquam Hippocrates in *Epidemiis* memoret faminam quandam volvulosam, modicos quosdam secessus habuisse eorum forte humorum, qui postrema intestina occupaverant. Frequentiores causæ, hujus affectionis esse consueverunt, inflammatio intestini ilei, aut circumscripti mesenterii, duriora plus justo excrementa, & glutinosi succis infarcta atque ejusdem intestini convolutio vel delapsus; quæ vero ex his autumnno sæpius accidat, videtur à facibus constipatis & compactis succis oriri, unde etiam delabi & contorqueri queat intestinum.

Comitiales morbi seu epilepsiæ per idem tempus fieri, dicuntur à Galeno, propter aëris inæqualitatem quæ maxime apta esse solet, tum ad debilitandum caput, tum ad heterogeneos humores inducendos, præsertim melancholicos & acidos, unde illi plerumque excitantur. Hinc Hippocrates in *Epidemiis* inquit: *Melancholici fiunt Epileptici & Epileptici melancholici: Et qui morbo sacro corripiantur, quartana superveniente liberantur*, translato scilicet vitioso humore è cerebro in partes corporis inferiores, atque per febrem sensim absumpto.

sumpto. *Eodem* modo dici possunt progeniti *Furores & Melancholia* qui morbi sunt valde melancholicis familiares, in quibus acidum adeo prævalet, ut sæpe numero ad timorem & mœstitiam cuncta conspirent.

Ne autem mala ista ingruant, oportebit statim, ac opportunum tempus incipientis autumnii tulerit, corpora his obnoxia hujusmodi superfluitatibus repurgare, atque salubriori & temperatiori victu alere; quo circa ex Hippocrate Galenus Comment. 47. Aphor. 6. commendat in iis, qui ægri futuri sunt, convenientem purgationem male affectorum humorum, ut subinde prævertatur illorum malitia, atque imminens aut futurus morbus prohibeatur: Neque solum purgatione satis erit, superabundanter & vitiosos succos educere, sed & ultra opus erit, relictum fortasse in sanguine aut viscerum fermentis, vitium emendare, usu præsertim medicamentorum, acido, autumnio vaganti, occurrentium, qualia sunt, quæ ex chalybe conficiuntur. Postquam autem morbi accesserint, oppugnandi iis quæ in praxi passim dilucide recensentur.

Dices I. Humor melancholicus utpote frigidus & siccus ad putredinem minime est dispositus, Ergo ab illo febres non oriuntur. *℞.* Negando consequentiam, putrescit enim æque ac alii licet tardius hinc etiam fiunt paroxysmi longiores & tardius recurrentes; id vero facilius fit ut putrescat, si aliis commixtus sit humoribus.

Instabis: Melancholici diutissime vivunt, Ergo succus melancholicus tam graves morbos non generat *℞.* diu vivunt, non ob humorem melancholicum, sed ob accuratam victus rationem quam servant, credunt enim ab omnibus sese offendi, & ideo ab illis cavent: Melancholicus autem succus licet tardius moveatur ideo tamen morbos & quidem graviores progignere potest.

Dices II. Si Epilepsia esset morbus autumnalis, contingeret magis senibus quam pueris, atqui hoc est contra autopsiam Ergo. *℞.* Negando sequelam majoris, quia senes non ita facile afficiuntur teste experientia.

Instabis: In pueris non est copia humoris melancholici, Ergo nec tam frequenter epilepsia corripitur possunt, *℞.* negando suppositum quod epilepsia aliique morbi autumnales, omnes & semper à melancholia fiant, fiunt enim à variis & multiplicibus causis tum internis tum externis.

Urgebis: Epilepsiæ, insaniæ, furores, melancholiæ fiunt etiam in vere Ergo non in autumno, quia nulla est horum temporum affinitas & hos affectus in vere fieri ob prægressam hyemem in autumno autem per se.

Aphorismus XXIII.

Hyeme vero morbi laterales (pleuritides) & pulmonis inflammationes (peripneumoniæ, lethargi, gravedines, raucedines, tusses, pectoris, laterum, & lumborum dolores, vertigines, apoplexiæ.

Contentum seu Intentio.

De Pathologia morborum hyemalium.

Connexio: Postquam Hippocrates morbos veris, æstatis & autumnalibus enarrasset in præcedentibus Aphorismis, pergit jam num in hoc Aphorismo enarrare ægitudines hyeme peculiare.

Hic Aphorismus non patitur divisionem, quia unica divi Senis intentio est, explicare hoc loco morbos hyemi proprios, ut eo facilius prædici, præcaveri & curari queant. Num autem in hoc etiam Aphorismo, inter morbos hyemales referendi sint nonnulli ex autumnalibus, quemadmodum in cæteris anni temporibus antea notavit Hippocrates valde dubitat in *Comment. Galenus*. Verum parum refert: Sive ex communi voluerit, ut ipsemet subdit, hoc quoque in loco nos subaudire dictorum aliquid, sive simpliciter pronuntiare, tamquam nihil autumnale tempus cum hyemali communicet.

Ut autem sit, voluit Hippocrates solum hic morbos hyernos referre, qui frequentiores & urgentiores esse solent, relictis & omissis aliis qui communes forent, & tacite subintelligi viderentur: Neque tam stricto sensu hoc loco accipere morbos hyemales, quin non aliis anni temporibus etiam fieri possent, Primo autem pleuritides seu morbos laterales recenset; mox addit dolores pectoris & laterum, ne quis putet

putet eundem morbum sub diversis vocibus inutiliter repetitum significare.

Et quidem morbos laterales hic intelligi proprie pleuritides græcus Codex manifeste declarat: Laterum vero & pectoris dolores, solummodo ad musculos, & partes externas thoracis, pertinere putandum est, cum non raro doleant solum costæ, & partes exteriores pectoris, citra inflammationem, à flatibus, aut solo confluxu, serosioris lymphæ in glandulas ejusdem subcutaneas, vel etiam ab impedita perspiratione: Addit insuper *pectoris & laterum*, desumpta nimirum differentia nominis, à loco potius quam à Natura morbi, quoniam aliquando dolent partes Thoracis anteriores, quas pectus appellamus, quandoque vero latera & partes ejusdem posteriores, scapulæ dorsum &c. At unde morbi laterales, qui inflammationem præseferunt, hyberno tempore algido contingant? Profecto eos progigni fatendum, ab impeditis & detentis halitibus, qui cum pectoris internas partes, ab inspirato frigido aëre, non leviter affectas, potissimum invadant, propterea pleuritides & peripnevmonia suboriantur. Accedit quod hyemali tempore sanguis consistentior sit, & glutinosus & acidis succis inficitur, qui exiles & angustas pleuræ arteriolas pervadere nequeunt, facile in his hærent, stagnationem & inflammationem inducunt. Eadem ratione pulmonis inflammationes seu peripnevmonia, per idem tempus accidunt, atque eo magis, quo aër impurus, & nitrosis vaporibus refertus, ejusmodi consistentiam in sanguine adjuverit, transitu per pulmonis vasa habito, ubi aër cum illo commiscetur, observatione Lowerii.

Gravedines & raucedines hyeme potissimum vagari notissimum est, tum à serosis humoribus tunc vigentibus, tum ab humidis & austri- nis aëris alterationibus, cerebrum & cunctas glandulas gravantibus, ut alibi jam diximus. Cum vero non solum caput asperæ arteriæ, sed etiam Bronchia & pulmo ipse immodice irrigantur, quinimo (ut sæpe evenit) quodammodo obstruuntur, tussis quoque fiunt & anhelationes, aliisque peiores pectoris & pulmonis affectus.

Quod si humores isti & vapores internam pectoris partem non occupent, sed potius externam, quæ costis adjacet, afferent *dolores laterum & lumborum*, laxis nimirum musculis ibidem dispositis; cumque

istæ

istæ partes mutuq̃ communicent inter se, ideo fit, ut non raro, una simul compatiantur, quare ægri ipsi indiscriminatim, de dolore dorſi, ſcapularum, laterum & lumborum conqueruntur, & viciffim unum pro altero accusant.

Non diſſimili modo capitis dolores fiunt, cum humores & vapores, meninges cerebri aut pericranium afficiunt, multoties autem catharros prænuntiant: quippe ñ primum in capite cumulantur. mox alias partes petunt, & alias & diverſas affectiones, pro partium affectarum diverſitate parturiunt.

Vertigines demum & *apoplexias* antea jam quoque retulit Hippocrates, evenire ex constitutionibus auſtrinis & pluvioſis, quæ cum poſtiſſimum hyemali tempore contingant, non mirum ſi illæ inter hybernos morbos, hoc loco recenſeantur. Adjectos quoque legimus in græco Codice *Lethargos* quos non diſſimiliter oriri, per easdem auſtrinas hyemis constitutiones, patulum cunctis eſt. Et licet *Galenus*, in *hujus Aphoriſmi Comment.* illorum non meminerit, hanc eandem tamen Hippocratis ſententiam referens 8. *de placitis Hipp. & Plato*: cum gravedine, raucedine, & tuſſi, lethargos etiam connumerat.

Hybernis ergo hiſce calamitatibus, præcipue occurremus in dicta victus ratione, quæ cumulas fortasſe humidas ſuperfluitates, atque inductos jam craſſos & acidos ſuccos diluat & abſumat: Itemque exhibitis medicamentis alhali volatili præditis, quæ una ſimul valeant viſcera & præſertim cerebrum roborare, ſanguinem vividiorẽ reddere, craſſos ſuccos attenuare, atque per ſuos ductus prout res ipſa exigere videbitur, deducere.

Hac ſane ratione plures catharris obnoxii, ſalubrius hyeme, cum alias frequenter ægrotare conſueverant, impoſterum degerunt, quam æſtate.

Objectiones & dubia, quæ ſuper hoc Aphoriſmo moveri poterant, jam ſolvimus in ipſo textu, unde majori enodatione non egent.

Aphorismus XXIV.

Secundum ætates autem hæc eveniunt, parvis & nuper natis puerulis, serpentina oris ulcera, vomitiones, tusses, vigilia, pavores, umbilici inflammationes, aurium humiditates.

Contentum seu Intentio.

De Pathologia morborum infantum recens natorum.

Connexio: Cum hætenus de peculiaribus, cujusque temporis morbis tractasset Hippocrates, nunc ad illos accedit affectus qui in unaquaque ætate contingere solent, & in iis ordinem & connexionem servat.

Hic Aphorismus divisionem non habet, quia simpliciter concludit & demonstrat, qui morbi in prima illa ætate contingunt, ut Medicus illos prædicere & præcavere commodius possit, simulque insinuat, hominem inter cætera animalia, ab ortu usque ad occasum, morbis maxime obnoxium esse; siquidem nulla fere ætas est, quæ plurimis & maximis non abundet ægritudinibus; vita enim nostra & sanitas, omnino inconstans & labilis est, juxta Poëtam.

Corpus morborum hospitium, carcerque doloris

Mortis Lar, custos vulneris, olla Luis,

Augiæ stabulum, factorum lurida fedes,

Squallor, fax, cribrum pulveris, umbra nihil.

Mors illabandi, rimas habet impigra mille,

Unam evadendi, non habet omnis homo.

Ætates supra divisit Hippocrates & Galenus in septem gradus: primum gradum seu primam ætatem dicit infantilem quæ talis dicitur à primordio generationis, ad septimum usque mensem cum pueruli dentire incipiunt, dicitq; illam ætatem obnoxiam esse oris ulceribus græce *aphthis*, vomitui, tussi, vigiliis, pavoribus, umbilici inflammationibus & aurium

humiditatibus, non tamen quod his solum, sed quod præ cæteris, quoniam à subita mutatione, quam recens nati subire coguntur, tum aëris, tum alimenti, tum loci, tum violentia partus, necesse est sanguinem, aliosque liquores, & viscera universa notanter alterari, unde ejusmodi morbi prodeant. *Aphthæ seu ulcera oris* illis accidunt, vel à lacte acri & salso vel à sero & lymphâ, per ductus salivales in palatum delabente. Sunt namque Aphthæ oris ulcuscula, quæ palatum, linguam, & fauces non raro exedunt, si præsertim diutius serpant; albicant & multoties totum oris cavum occupantes, suctioni impedimento sunt, & nisi cito succurratur mortem inferunt, aut malignæ efficiuntur difficillimæ curationis. Solent etiam subsequi, gallicam à parentibus & nutricibus contagionem; & quandoque etiam ex hac lue infectorum osculis, amplexibus, halitu, proficisci, cum tenellæ infantium carnes facile quacunque de causa infici possint. Neque vero solum pueris, sed etiam adultioribus illas accidisse compertum est, adhuc venenatas, contagiosas & ut mox diximus malignas, ut refert Hippocrates 3. *Epidem.* viguisse olim quasdam Aphthas deleterias & contagiosas à pestilenti constitutione: Tales etiam aphthæ sunt, quæ adultis fiunt à lue venerea, seu tempore Pthialismi seu Salivationis per Mercurium procuratæ.

Vomitus à lactis etiam vitio, sæpissime puerulis accidit, vel quia in ventriculo acescit & coagulatur, vel quia sero abundans, fibras laxat, atque adeo ad vomendum lacescit. Potest præterea à vermibus vomitus inferri, sicuti etiam à ventriculi languore, cum non raro qui diu frigido aëri expositi fuere, vomitionibus corripiantur, quique lac suxerunt à nutricibus cibos fastidientibus, aut perperam pastis, ob malam esculentorum conditionem nimiam nempe pulmentorum & lactis ingluviem, cum plurimi infantes, eo usque sugere non desinant, donec ad crepaturam quasi stomachum implendo, per modum hircudinum seu sanguisugarum à Papillis decidant, de quibus verificatur illud:

Si mel erit nimium, fel magis quam mel erit.

Vel juxta hoc:

Nascentes morimur, finisque ab origine pendet.

Tussis ab aëre fiunt; cum enim recenter in lucem editi aërem inspirant

spirent inæqualiter affectum, & plerumque frigidum, non mirum si tussi corripiantur, quod si fortasse, præter aëris alterationem, delabantur etiam serosi humores in Trachæam & Bronchia pulmonis, non solum tussis orietur molestior, sed etiam periculosa, spasmodica seu convulsiva, à qua facile pueri suffocari possunt, cum nequeant sufficienter extussire & excreare; quamobrem stagnantibus humoribus in pulmone facile opprimuntur & suffocantur.

Vigilia accidunt puerulis, *vel* à tussi, *vel* ob ventris tormina, quibus plurimum obnoxii sunt, *vel* ob immodicas egestionem ex corrupto lacte progenitas, quæ ipsis non levem molestiam afferunt, vel ob easdem retardatas ac diminutas, unde intestina distendantur & dolorem excitent; infantes enim bene se habentes, urforum more, somnum retinent, quem in utero matris jam contraxerunt. Vigiliarum quoque causa sed raro est cerebri exsiccatio. *His accedunt* etiam, quæ ab *umbilico recenter exsecto* iis accidunt, quippe in eam partem quandoque sanguis irrui, Ichores confluunt & tumefaciendo, non raro *exomphalon* inducunt. Non tamen istæ *Vigilia* diuturnæ admodum erunt, sicut in adultioribus & senibus, sed solum comparatæ ad statum & conditionem illius ætatis; siquidem puelli proclives à natura sunt ad somnum, ut propterea maiorem temporis partem, dormiendo consumant: Cum ergo à consueto & naturali staturecessum faciunt, Vigiles dicuntur.

Pavores proprii sunt illius ætatis: cum enim infantes insueti sint, commotiones, strepitus & alias perturbationes pati, quacunque proinde de causa, percelluntur, contremiscunt & pavent: quod si à lacte in ventriculo aut intestinis corrupto vel coagulato, ac fere in caseum verso, originem trahant, profecto punctiones præcedent, unde non solum pavores sed etiam motus spasmodici atque Epileptici subsequuntur, aut sola per fibras nerveas percussione, aut etiam infensa per easdem evaporatione in cerebrum delata.

Umbilici inflammationes infantibus quoque frequentissimæ sunt, tum ob recenter factam umbilicalium vasorum resectionem, ubi sanguis facile stagnat: tum à vagitu, quo partes illæ intumescunt & inflammantur. Sed non raro vasa ipsa etiam delaxantur, & sanguinem effundunt, non sine vitæ periculo; quamobrem obstetrices statim, à partu, illa arte vinciunt, & postquam fuerint rescissa pulvere coccineo

vel lio adstringente inspergunt, ut sanguinem sistant & inflammationem inhibeant.

Aurium humiditates sæpe pariter infantes molestant, cerebro per eam ætatem laxiori atque humoribus, tum ex aëre, tum ex lacte, scatente. Notavit autem specialiter Hippocrates, *humidas aurium sordes* quia reliquæ per nares & os, sine dubio ejusmodi sunt; quæ vero ex auribus prodeunt, compactiores Natura esse solent, & longe cæteris parciore. Neque tamen solum per aures, sed etiam per totum caput, collum & faciem serosa excrementa repurgantur, & *crustam lacteam* vulgo *Ansprung* excitant, imo aliquando nec satis, ut & colli glandulæ non intumescant, strumarum instar, non sine graviore malo.

Ut igitur ab his infantes præcaveantur, statim à partu, cochlear unum olei amigdalæ dulcium sine igne expressi & saccharo commixti sorbeant; mox injurias ambientis aëris evitent, deinde lac sugant, à Nutricibus sanis, optime alitis, sobriis, Juvenibus, hylaribus & bonæ constitutionis: Præferendum autem semper foret maternum velut magis analogum ei, quod intra uterum, saltē ultimis diebus, cessit illis in alimentum, idque non tantum ad corporis salubritatem facere, sed etiam ad mores passim creditur. Inde enim ea præsertim beneficia prodeunt quæ à colostro exsucto oriri palam est, quippe est hoc illis utilissimum medicamentum, ad repurgandas universas corporis sordes & inhibendas lactis coagulationes, unde tot & tanta mala infantibus contingunt: Sed quis unquam id vulgo & ignaris Medicis persuadebit? hi enim primum lac è mammis prodiens, adeo nocuum existimant, ut pro veneno habeant. Cæterum omnia alia remedia aut vana sunt aut nocua, præsertim si interius adhibeantur, cum tenelli infantes nihil quidpiam aliud sufferant ore assumptum quam purum lac; quandoquidem ventriculi fermentum nulli alii, quam lacti dissolvendo est aptum, per mollem & laxam ejus ætatis constitutionem.

Quæres I. Cur ejusmodi morbis, infantes in utero non molestantur? *R. primo* nec in utero ab iis insontes vivere infantes, licet non tam facile ac frequenter: unde *R. secundo* cum fatus in utero puriori lactis parte fruatur his non facile corripitur, editus vero multis heterogeneitatibus & injuriis subicitur: Præterea quia fatus in utero, nullum effatu dignum excrementum in ventre suscipit.

Quæres

Quares II. Cur pueri synochis febribus raro vel nunquam laborant? R. licet calidi & humidi sint & putredini obnoxii videantur, quia tamen sanguis illorum totus in nutricatum cedit, ideo raro hic febribus corripiuntur.

Dices. Plurimi infantes moriuntur epilepsia, & tamen hujus nulla ab Hippocrate facta est mentio. R. Tacite epilepsiam intellexisse sub ly pavoribus, ut in textu diximus: præterea epilepsia maxime fit circa dentitionis tempus unde de illa expressius acturus in sequenti Aphorismo.

Aphorismus XXV.

Ad dentiendi vero tempus accedentibus, gingivarum pruritus, febres, convulsiones, alvi profluvia, maxime cum caninos edunt dentes, & iis præsertim pueris, qui crassissimi sunt, & qui alvo sunt dura.

Contentum seu Intentio.

De Pathologia morborum dentientium.

Connexio: Cum priori Aphorismo Hippocrates, primæ ætatis quæ ad septimum Mensem extenditur, morbos enarrasset; in hoc Aphorismo ad illos accedit morbos, quos ὁδονδοquia id est dentitio profert.

Quamvis autem certum dentitionis tempus passim à septimo Mense, ad tertium aut quartum Annum credatur, attamen & ante hoc tempus quoque experimur, imo & quosdam cum dentibus intra uterum progenitis, prædiisse ipse sæpius vidi & alii plurimi fatentur, unde tales à Plinio *Dentati* dicti fuere. Sunt & nonnulli quibus circa annum trigesium, quadragesimum imo ut refert Plinius octuagesimum, dentes prodeunt, qui dentes Serotini, Sophronistines, seu sapientiæ appellantur.

Hic Aphorismus duas partes habet: *in prima* Hippocrates explicat & notum facit, quam laboriosa sit humano generi dentium emissio: *in secunda* qui morbi peculiare eam comitentur & sequantur.

Quis autem dentium sit numerus, & quæ eorum Natura, usus, & nomina &c. abunde constat ex institutis & anatomia quo lectorem, ad chrambes evitandas, remittimus. Ne quis autem putet, dentes revera prædicto tempore primo nasci, quasi vero post aliorum ossium structuram generentur, sed solum per eam ætatem erumpere & conspicuos è maxillarum alveolis fieri.

Dentientium vero puerorum plurima, eaque subinde periculosissima symptomata, non tam Medicorum Hippocraticorum, quam sæpius Medicarum Hippocraticarum fores in dies pulsant, quæ vix non in omnibus infantium morbis, innocentes dentes, quibus ipsæ destitutæ & orbatae sunt, ipsisque infantibus juniores essent, si a defectuoso dentium numero, annorum series numeraretur: in talem Edentulum scribit Poëta:

Quid juvat os oris, si non habet intus os ossis,
Si mandare potest, mandere vero nequit.

Inter symptomata dentientium maxime familiaris est *gingivarum prurigo & dolor*, quando nempe ut mox dictum erumpunt & è maxillarum alveolis conspicui fiunt, atque in gingivarum fastigium producuntur, quas quodammodo perforant & lacerant, dictamque pruriginem & alia mala mox dicenda procreant.

Indicium dentitionis autem est mandendi & mordendi aviditas, qua nimium anxii, & lac iterato sugunt, & mammarum papillas mordent, & quidquid illis offertur, dolentibus gingivis apponunt, ut veluti a Natura edocti dentium eruptionem coadjuvent; in quam eandem rem, peritæ Nutrices, pastillos huic usui conferentes conficiunt, & dentientibus puerulis data opera mandendos exhibent.

Febres quoque hoc eodem tempore accidunt: sive quod adveniant *symptomata*, a dolore & inquietudine puellorum, sive ab impetu Naturæ dentium eruptionem promoventis, sive etiam a permutatione fermentorum, quæ in cibos deinceps mandendos, in ventriculo acuuntur, ut proinde fermentatione excedente, in sanguine inducta, febris oriatur, quæ illius ætatis comes est indissolubilis. Etenim tum pueri incipiunt, solidiores cibos exquirere & mandere, plane fermenta exigunt valentiora, quæ illos conficiant.

Propte-

Propterea hac de causa sanguis mutatur, bilis cumulatur, furfures abundantiores, innovati & permutati corporis argumenta.

Convulsiones seu motus convulsivi seu epilepsia per hoc etiam tempus accidunt, vellicatis nimirum nervis à vaporibus vel humoribus, ex mala lactis & aliorum ciborum commixtione progenitis; siquidem lac facile acescit, & corrumpitur, à miscela cujusvis alterius rei, cum illo non consentientis; unde hæc, & alia graviora mala oriri possunt. Non tamen est necesse, ut humores, aut vapores, ex vitiato lacte & cibo degenerati, cerebrum & nervorum principium petant, cum si tantum intestina vellicent, pilorum, ventriculorum, in puerulis motus excitent convulsivos, ob nimiam partium teneritudinem, vel saltem cruciatus, tormina, inquietudines, dentium stridores, vagitus, & ejulatus.

Quemadmodum vitiosi succi, si cerebrum & nervos afficiant, convulsiones & epilepticos motus pariunt; ita si ad alvum vergant, afferunt *Diarrhas* ex levissima etiam causa fieri solitas in illa ætate; unde Hippocrates, *peculiari libello de dentitione*, inquit: *quibus in dentitione alvus plus subducit, minus convelluntur; qui vero dentientes, habitiores manent, & altiore somno utuntur magis obnoxii sunt convulsioni. Qui hyeme dentiunt, reliquis similibus existentibus, melius liberantur: Non omnes in dentitione convulsi moriuntur, sed multi etiam servantur.* Itaque juxta humoris abundantiam, & in unam, aut aliam partem corporis inclinationem, diversa contingunt, pueris dentientibus accidentia: ut proinde Jure dictum sit, quibus alvus plus subducitur, minus convelluntur, deposito nimirum ad alvum humore. Quid autem pro alvi profluvii intellexerit Hippocrates, dubitari potest; in Græco codice scribitur *διαρροιαί*, ægritudines quidem alvi, atque ex humoribus acris, & biliosis progigni putatæ, Verum pueruli neque humores istos, generare dicuntur ex Galeno, neque in alvi profluvii humores egerunt acres, amaros, & biliosos, ut patet ex linctu canum, qui egestas ejusmodi puellorum fæces, avidissime devorant. Hinc credo Diarrhæam hic intelligi latissima plane significatione, ut omnem & quancunque excedentem alvi evacuationem complectatur; quippe in puellis egestionem immoderatam pendent solum ab indigesto, & degenerato

rato lacte, quod licet colorem aliquando referat flavescentem, non tamen acredinem, aut amarorem sapit, nec biliosam, & felleam conditionem, sed solius serosæ, nec omnino butyro exutæ portionis depravatæ materia est. Serum namque & butyrum cum permutantur, sæpiissime flavum colorem exhibent; præterquam quod à varia & diversa mixtura cæterorum succorum, atque à depravatis secretionibus, non raro etiam in adultioribus, hi, alique colores, in excretis observari consueverunt, ut propterea nimium coloribus credendum non sit, quod & alias à nobis est notatum.

Hæc autem illi potissimum ætati accidere subdit Hippocrates cui *dentes Canini* erumpunt, quos Græci Cynodontas appellant, vel quod Canum dentibus similes sint, vel quod soliditate, & acie acutissima instar crassioris spinæ præ cæteris instructi, firmitate ac longitudine præcellentiores quidem, sed & in eorum quocunque tempore facta eruptione, semper cæteris molestiores & periculosiores; unde illud proverbium: *Donec non sunt editi, Canini dentes; de filiis genitores non sint gaudentes.*

Qua autem ratione iis præsertim asperius accidant, qui *Crassissimi* sunt & *alvos duras & adstrictas* habent, majoris ponderis videtur difficultas. Galenus in *Comment.* id retulit, ad convulsiones tantum, ut proinde velit crassissimos, & alvos duras habentes, convulsionibus magis affici, quoniam, inquit, isti plenum corpus habent, & abundans superfluitatibus, ideoque convulsionibus facile capiuntur. Sed revera, adjecta hæc verba referenda sunt, ad omnes ante dictas affectiones, ut sensus sit, eos potissimum puerulos, prænaratis morbis obnoxios esse, qui crassioris seu obesioris sunt constitutionis, quoniam his humores insunt copiosiores, excrementa serosa cumulationes, laxiores carnes, & minus sana corporis habitudo, ut alibi docet Hippocrates.

Sed cur etiam adjectum sit, & qui alvos duras habent: cum cæteroquin alvos duras nacti, temperiem & habitudinem præseferant aridam & exsuccam, carentem excrementis. Verum duras alvos habentes, à transfluxu humidarum superfluitatum in alias partes corporis, hic subaudiuntur, in quibus scilicet arescunt & con-

constipantur fæces, quia serosiora excrementa detinentur, & alio vergunt, quo confluere non deberent; quamobrem sanguis, lymphæ, liquor nerveus, aliique peculiare viscerum humores, illis imbuti ac mali affecti, febres, convulsiones, dolores, aliaque incommoda graviora excitabunt. Quod si in intestina deferantur, magis vellitabunt & compungent, acriusque torquentes non tantum alvi profluvia, sed etiam tormina, lancinationes, & dolores inferent; cum gravius diarrhæis afficiantur, qui styptica sunt alvo, quam qui lubrica, vel ob desuetudinem vel ob exquisitiorem partium sensum, vel ob maiorem confluentium succorum in illis acredinem. Sunt etiam qui putant, dictiones illas, disjunctim legendas esse, ut qui crassissimi sunt, obnoxii fiant prædictis affectionibus, ex una atque ex altera qui alvos duras habent; utraque enim causa efficax esse potest convulsione, aliorumque morborum in hoc Aphorismo memoratorum: Et quidem hæc indicia tantum sunt pravæ habitudinis & exsuperantis in corpore morbificæ superfluitatis.

Verum tamen durum alvum habentes, non omnino styptici, & suppressione fæcum laborantes intelligendi sunt, sed qui non adeo lubricam alvum sunt sortiti, cum pueruli universim solutum ventrem habeant: quare styptici solum dicentur, relati ad eos qui solito lubricior rem nacti sunt.

Tametsi hos duntaxat dentitionis morbos recenseat hoc loco Hippocrates, non tamen quis negaverit, alios plures præter eos accidere posse: Etenim experimur per hoc idem tempus, obnoxios esse infantes, variolis & morbillis, quorum tamen nulla invenitur facta mentio apud Hippocratem, Galenum, & cæteros veteres Græcos Medicinæ Scriptores, cum ab Arabibus solum, in hæc nostra tempora viguisse memorentur, ut latissime deduximus *in nostro tractatu de variolis & morbillis*, quo lectorem remittimus.

Cæterum his & similibus non aliter ac de aliis ut antea dictum conveniente lacte, & usu rerum, dentitionem promoventium providendum erit, quæ dicto tractatu de variolis & morbillis, morbisque infantum abunde descripta legi & adhiberi possunt.

Dices Hipp. 5. Aph. 18. dentes ab ossibus secludit, dum ait, frigidum esse inimicum ossibus, dentibus &c. Ergo vel dentes non erunt ossa, vel Hipp. tautologiam fecit & dentes omnino esse ossa & quidem durissima

imo ossa comminuentia, & ideo dicta ossa sui generis de quibus in Anatomia.

Aphorismus XXVI.

Ipsis vero grandiusculis (id est cum jam magis adoleverint) tonsillarum inflammationes, vertebrae in occipitio introrsum luxationes, asthmata (seu crebri anhelitus) calculi, lumbrici rotundi, ascarides, verruca pensiles, satyriasmus, stranguria, struma, & alia tubercula, precipue vero antedicta.

Contentum seu Intentio.

De Pathologia morborum infantum.

Connexio: In superiori Aphorismo infantum dentientium id est illius ætatis à septimo Mense ad tertium vel quartum Annum seplurumque extendentis; nunc tertio loco recta ratione recenset illius ætatis morbos, quæ à quarto, ad duodecimum vel secundum quosdam ad decimum quartum Annum seu pubertatem extenditur.

Hic Aphorismus divisionem non patitur, cum in una conclusione subsistat.

Dicit autem Hippocrates in hac ætate primum accedere, *tonsillas seu tonsillarum inflammationes*: Sunt autem tonsillæ, glandulæ illæ, quæ ad radicem linguæ jacent, à Barbaris Amygdalæ dictæ, quæ cum tumescunt & inflammantur, ductuum aëris & cibi angustiam afferunt, unde difficiles deglutitiones & respirationes (ita ut pueruli potum per nares rejiciant) exoriuntur, quamobrem à Græcis

Græcis *Paristmia* appellantur. Ejusmodi ergo inflammationes glandularum, aliarumque partium adjacentium familiares sunt adolescentulis, aut quia sanguis per eam ætatem vegetior & abundantior factus, nequit commode intra proprios ductus contineri, ut propterea in vicinās partes effluat; aut quia refluentes per suos ductus à capite lymphaticos, & pituitosos humores, glandulæ istæ excipiunt, & tumescunt, atque impedito aliquatenus in ipsis sanguinis circuitu, nec illo sat bene repurgato, similes exoriuntur inflammationes.

Mox subdit *vertebrae occipitis ad interiora luxationes*; hæ fiunt in pueris, vel a tumoribus, & inflammationibus musculorum, & glandularum colli, siquidem eam ætatem valde strumis obnoxiam experimur; vel etiam ab illapsu crudorum humorum, interstitia vertebrarum, quandoquidem laxatis & amplificatis viis, quæ musculos & ligamenta illarum interiacent, ob ætatem accretioni summe vacantem, promptius è capite confluunt humores in vertebrae, tum magis motu exagitatas; unde facile postmodum luxationes exoriuntur. Quod si ulterius contingat, impediri respirationem, ab hujusmodi vertebrarum cervicis luxationibus lethalis exsurgit *Angina* ut docet Hippocrates 2. de morbis. Imo affectus ex se plerumque lethalis dicit in Aphorismo: *qui (inquit) gibbi fiunt ex asthmate, ante pubertatem pereunt.*

Crebri præterea anhelitus seu asthmata iisdem contingunt, a congestis crudis humoribus in ductibus pulmonum; pueri enim voracissimi sunt, & facile crudum nec bene elaboratum chylum faciunt, qui deinde per ramum Thoracicum, in pulmonem delatus, præ vasorum angustia & visceris laxitate, hæret, & anhelitum inducit.

Sed & comprimitur sæpe pulmo, atque in suo motu aliquantulum impeditur a sanguine, tunc temporis vegetius fermentescente, & per aëris mixturam vasa spiritalia efficacius amplificante: Quo fortasse argumento Galenus annotavit 9. meth. cap. 4. & 5. Synochas febres, ex sanguine progenitas asthmaticas esse, qua effervescens sanguis pulmonis ductus vehementer dilatat, ejusque substantiam opprimit, unde *anhelitus & asthma.*

Calculi insuper his fiunt, magis tamen in vesica quam in renibus: Isti enim molles & laxi cum sint, meatusque habeant, qui per eam ætatem, prompte expanduntur, non tam facile crudos, & crassos succos detinent, sed ultro illos sine ullo impedimento, in vesicæ cavum delabi sinunt, ubi diutius hærentes in *calculos* vertuntur, adjuvante plurimum sale illo urinario, tenaces istos & tartareos succos figente & coagulante. Deponi autem crudos, & crassos succos, & quidem plurimos in vesicam, patet evidenter ex eo quia puerorum urina multo & inutili sedimento scatet, quod cum illa consistit, subsidet, & fundo matulæ hæret.

Vermes seu *lumbrici* etiam sunt admodum pueris familiares, & tum *teretes* tum *ascarites* dicti, de quibus late Galenus in *commentario* huius Aphorismi: Modum autem & locum generationis istorum, diversosque affectus, exinde provenientes non est ut hic diutius inquiramus; sat enim ab aliis magnæ notæ viris de illis actum: Solum tamen addam, quod quemadmodum hi familiares sunt pueris, ita nullius periculi esse solent; quamvis si *teretes* ventriculum occupent, vomitus, convulsiones, febres, & dolores pariant, non omnino condemnandos.

Verruca vulgo *porri* sunt tubercula dura in cute erumpentia, rotunda & sensus expertia. Sponte sua sæpenumero abscedunt & exsiccantur; aliquando vero etiam acribus, & erodentibus remediis non cedunt, atque ad plures annos perdurant. Comparant autem puerili hac ætate transpositis, in cutim consistentioribus succis glandularum subcutanearum, repurgatoque sanguine ab excrementis tartareis, & faculentis, in callos veluti degenerantibus.

Satyria seu *satiriasmi* quinam sint, non adhuc bene constat inter expositores; Galenus in *commentario* nec verbum quidem de illis facit, meminit tamen eorum alibi referens voces Hippocratis rariores, & vocavit *satyriasmos* vel potius *satyrismos*, tumores scilicet circa aures erumpentes, & 8. de *placitis* Hippocratis & Platonis fere cum strumis confundere videtur; sed & ex eodem Hippocrate *satyriasmus* vel *satyriasis* diversos morbos significat; aliquando elephantiasim, quod elephantiaci, more satyrorum in venerem ferantur;

rantur; quandoque pudendi perpetuam densionem, & interdum aurium retorsionem, & labiorum tumefactionem, quo etiam vitio satyri laborabant; hoc autem loco satyriasum subdit *Heurnius* speciem quandam esse *parotidis*. Verum ex eo quod Galenus in contextu vocem hanc omiserit nonnulli putarunt fuisse perperam in Græco codice adjectam, vel cum strumis convenire, vel pro satyriasmo legendam *sciriasim* ut mavult Triverius, vel denique phthyriasim qui morbus est pedicularis quam maxime familiaris pueris.

Stranguria non raro etiam pueris accidunt, iis præsertim qui cum lotio arenulas & viscosos succos emittunt, aut vesicæ calculo laborant; quamobrem non dissimili ex causa in his fiunt, ac in adultis & aliis dictum in praxi.

Struma & *alia tubercula* tum in glandulis cervicis vulgo *die trüßlein*/ tum in aliis partibus glandulosis erumpentia, à decubitu & secretionem humorum dependent: Cumque glandulæ colli, potissimum, depositos è capite inutiles succos excipiant, propterea fit, ut *strumas* & alios tumores his consimiles contrahant: ejusmodi autem crassis & crudis glandularum tumefactionibus, pueri præ cæteris subjiuntur, ob nimiam voracitatem & malam chylosis elaborationem.

Per hanc eandem ætatem solent *variola* & *morbilli* comparere nostro tempore pueris familiarissimæ, ut vix unum vel alterum invenias ab his immunem: De his autem eorum origine, Idæa, causis, differentiis, signis, prognosticis, cura tum prophylactica tum eradicativa & symptomatibus abundantissime egimus tractatu nostro de variolis & morbillis, quæ ibidem legi & in usum trahi possunt, ita etiam remedia & auxilia, pro cæteris in hoc Aphorismo recensitis ægritudinibus, quæ ibidem in morbis infantium per extensum & cujusque libitum reperiuntur.

Dices: Senes laborant asthmate ut dicemus infra Aphorismo 31. hujus Sectionis Ergo pueri non laborant & negando consequentiam, nec ratio subest dubitandi ut in textu diximus.

Quæres: Cur Hippocrates dicat ex lacte bilioso fieri calculos & in bile vim lapidificam esse maximam præsertim si effœta reddatur, experientia docet & observavi in quodam illustri viro ex lacte & cerevisia amara

ortos in Vesicula fellea calculos Numero trecentos & sexaginta quatuor.

Aphorismus XXVII.

Grandioribus autem adhuc, & ad pubertatem accedentibus, plurima ex his, & febres diuturnæ potius, & ex naribus sanguinis fluxiones.

Contentum seu Intentio.

De Pathologia morborum puerilium ad pubertatem accedentium.

C*onnexio*: Explicatis peculiaribus pueritiæ morbis in præcedenti Aphorismo: In præsentī accedit ad eos qui pubertatis, id est illius ætatis sunt, quæ a decimo, duodecimo vel decimo quarto Anno, ad vigesimum vel vigesimum secundum plerumque extenditur. Dico *plerumque*: Licet enim ut plurimum pubertas inter quatuordecim & viginti Annos eveniat, fit tamen id ipsum in aliis, id est calidioribus citius, in frigidioribus tardius, idque vel maxime pro varia carniū firmitudine & viriū robore. Tunc autem vulgo dicuntur pubescere, quando *masculi* hircire, venerem ambire, semen emittere, vocem mutare; *Femellis* autem Menses erumpere incipiunt, quod equidem ex Galeno citius aut tardius evenire solet: *Vrit enim mature quod vult urtica manere: & sæpe* malitia superat ætatem.

Duas hic Aphorismus habet partes: In prima dicit, ad *pubertatem* accedentibus, multos in pueritia morbos fieri: In altera: morbos proprios dicit esse huius ætatis, febres diuturnas, & è naribus profluvia sanguinis seu hæmorrhagias & plerosque in prioribus Aphorismis recensitos.

Febres

Febres diurnæ quidem oriuntur, ob majorem crudorum succorum copiam, quoniam, ut dictum, pueri voraces, facile cruditates incurrunt, & consequenter febres. Non raro etiam in graves & longas febres incidunt, ex seminis effusione quæ causa admodum molesta sæpius esse solet; quippe per hanc ætatem ad venerationem acti, innumeras subeunt calamitates, & mille patiuntur incommoda, sive quod abstineant sive quod illa impensius abutantur, taceo, quas ex diversis & repentinis animi pathematibus sufferunt alterationes. Ad hanc fortasse Classem revocandæ erunt, quæ febres in foemellis Chloroses, & in maribus Eroticæ appellantur, ad tabem perducentes.

Profluvia vero sanguinis è naribus, non quidem ex eo, quod abundantius generetur, ut bene notat *in Comment.* Galenus, adversus eos, qui putant Naturam in superfluis, quandoque abundare & sanguinem affluentius progignere; sed quia per hoc tempus minus ex ipso absumitur, & tenuior, vividior, & acrior fit, utpote qui per ætates, sensim permutatur, quamobrem facile potest exiles narium arteriolas, ac venulas referare, & hæmorrhagias inferre.

Dices I. Si calidiores citius pubescant, Ergo mulieres erunt calidiores viris, quia citius pubescunt &c. quando dicitur calidiores citius pubescere, non intelligitur de utroque sexu inter se comparato, sed de uno, nempe quod masculi vel femellæ calidiores frigidioribus citius pubescant. Quod autem femellæ citius pubescant, quam masculi, præter dictam mox ante, causa est, quod sit plerumque brevioris vitæ, multis excrementis abundant, minus perspirant, vitæ sedentariæ assuescunt, & longe pluribus affectibus obnoxia.

Dices II. Quo calor est major, eo semper febres fiunt magis acutæ & breves, sed calor in pubescentibus est major Ergo febres erunt acutæ & non diurnæ &c. distinguo minorem, quo calor naturalis est major, fiunt magis acutæ febres, nego, præternaturalis concedo, in pubescentibus calor naturalis est major in actu, non vero præternaturalis.

Instabis: Si in pubescentibus calor naturalis est major, Ergo attenuabit humores & tamen acutæ febres efficit &c. calorem naturalem.

ralem quidem attenuare, non tamen intantum ut febrem excitet acutam, nisi præternaturalis fiat.

Dices III. Pubertas plurimos curat morbos teste Hippocrate quia in illa magna fit mutatio, perquam puerorum morbi solvuntur v. g. epilepsia, paralytis &c. Ergo non generat morbos ut dicit Aphorismus R. negando consequentiam, nam sicut autumnus curat morbos æstivos, & generat alios sui generis, sic etiam ætates.

Dices IV. Refert Jacobus Curio in Comment. Aphorismorum, historiam quod novem annorum puer suam nutricem ingravidaverit Ergo emissio seminis fit ante pubertatem R. hanc historiam vix esse credibilem: Vel dicendum quod supra, malitiam superasse ætatem.

Aphorismus XXVIII.

Pueris autem plurimi morbi judicantur, alii intra dies quadraginta, nonnulli intra septem menses, quidam intra annos septem, alii ipsis ad pubertatem accedentibus: qui vero pueris permanserint, neque circa pubertatem soluti fuerint, aut faminis cum menstrua erumpunt, in veterascere consueverunt.

Contentum seu Intentio.

De Pathologia morborum puerilium.

Connexio: Cum Hippocrates morbos pueriles usque ad pubertatem hætenus enumerasset, cumque pubertatis ætas, potissimum omnes præcedentes morbos finiat; ideo hac occasione motus, docet in præsentī Aphorismo, quomodo per has ætates solvantur & non solvantur morbi.

Hic

Hic Aphorismus in duas partes dividitur: *In prima* afferit & informat, morbos pueriles judicari vel intra quadraginta diebus, vel septem mensibus, vel septem annis, aut denique ad pubertatem: *In secunda* parte docet, eos morbos, qui ad seminis vel mensium eruptionem non solvuntur, inveterascere & ad mortem plerumque comitari.

Sed mirum sane videri debet quam anxii sint interpretes, in per-vestiganda Hippocratis mente, an de Acutis, an vero de Chronicis morbis hunc scripserit Aphorismum. Galenus, *aut de diuturnis morbis prolatum* (inquit) *aut imperfectum sermonem esse*; atque adeo omnino vult legendum, hoc modo: *Plurimi autem pueris diuturni morbi judicantur*: In quam Galeni sententiam, reliqui fere omnes expositores consenserunt: at Cardanus non semel Galeno conviciatur, hic speciatim illum ignaviae notat, existimans implicite diuturnos morbos comprehendi sub græca voce $\pi\acute{\alpha}\theta\epsilon\alpha$, qua hoc loco Hippocrates usus est. Verum frustra apud Medicos hæc agitari puto, si acutos morbos, non raro protrahi & in chronicos desinere observamus: Sic non raro tertianæ febres, & ardentes, ut & malignæ acutissimæ, sensim solent mitescere, & in longius tempus ægrotantes affligere, in alias aliasque ægritudines commutatae. Ita quoque pleuritides, acutæ cæteroquin transeunt in empyemata: Apoplexiæ in Paralyfes: Phrenitides in insanias, & melancholias: Dysenterici in tenesmos: Ut propterea passim experiamur quosdam morbos, ab initio omnino esse acutos, procedente mox tempore produci, & chronicos, annuos, ac consenescentes fieri, permutata conditione causa, parte affecta, aliaque simili circumstantia eorum, quæ morbis consociantur. Non immerito igitur Hippocrates, indiscriminatim morbos hic retulit, scilicet ut *acutos* simul, & *chronicos* comprehenderet; cujus rei non leve videtur argumentum, quod idem in Aphorismo apposuit, nonnullos scilicet morbos judicari in quadraginta diebus, qui extremum acutis terminum constituunt. Profecto æstimabilius est, quod idem Cardanus animadvertit, menses & annos hoc loco memoratos, non à morbi initio, sed à nativitate ipsa puerorum esse numerandos, ductus ejusdem Hippocratis autoritate, cui & Celsus adhærere interpretatur. Id ipsum quoque videntur indicare verba illa: *Quidam vero jam ad pubertatem accedentibus, qui vero permanserint, nec in pubertate finierint; aut cum*
Hhh men.

menstrua erumpunt. Quæ sane ad ætates puerorum, non ad morborum tempora referri possunt.

Sensus itaque Aphorismi est, morbos in pueris terminum aut remissionem sortiri, ab ipsa ætatum mutatione; cumque hæc mutationem subeant, plerumque in septenariis, idcirco de his mentionem faciens Hippocrates dixit: *In septem mensibus: in septem annis:* finem in illis designans ab ætate, non autem à temporibus morborum, aut à criticis diebus. Quod si diu perstiterint atque ultra pubertatem perduraverint, adhuc erumpentibus menstruis in fæminis, & postquam ex Ephebis excefferunt in maribus, procul dubio inveterascunt, & cum ægris ipsis consenescent; unde idem Hippocrates 5. Aph. 7. *Quibuscunque* (ait) *morbi comitiales sunt, ante pubertatem mutationem accipiunt; quibuscunque autem vigesimo quinto, fere commoriuntur.*

Ratio horum desumenda est ex sanguinis, aliorumque humorum, successu temporis, mutatione; unde crasis & constitutio corporis variat, atque per meliorem excrementorum repurgationem, viarum laxitatem, viscerum virtutem, & efficaciam, universa corporis œconomia, in salubriorem statum perducitur. Alibi autem abunde ostensum est, sanguinem procedente tempore sensim mutari, ut ubi primum dulcis nimium, & multo glutine satur est; in *pueritia* mox attenuatur, & portione vivifica fit prævalentior: deinde vero in *pubertate* & *adolescencia*, adhuc floridior, minusque auctifica parte præditus observatur; atque in *juvenibus* & tenuior & vegetior & acrior; in *viris* tandem ac *senibus* magis & magis, effœtus, vapidus, & postremo acidus & adeo exsolutus, ut vitæ tuendæ omnino inutilis evadat. Sic prope modum mustum, ubi ex uvis recens est expressum, dulcissimum & glutinosum est, & spiritibus vacuum, mox vero intumescit & fervet, ubi autem deferbuerit clarescit, & sensim, deposita fæce tartarea vigorem exerit, atque in perfectissimum & robustissimum vinum evadit. Si autem ex agitationibus æstu, flatibus austrinis aliisque, potissimum vero temporis diuturnitate evaporet & evanescat, exolvitur & subinde acescit aut fugit. Porro hæc omnia sanguini contingunt per ætates, & una simul visceribus cunctis quibus veluti colis trajicitur ac repurgatur: siquidem decurrentibus annis, ipsæ quoque firmanentur, obdurescunt, amplificantur. At quis unquam ejusmodi in partibus corporis, muta-

At vero verbum illud *judicantur* non ita, id est pro bona Crisi semper accipiendum videtur, ut semper in salutem pueriles morbos desinere credendum sit, cum & non raro in iisdem temporibus, ut *Celsus* advertit, maxime pueri periclitentur, quamobrem & bene & male, eos per ejusmodi tempora terminari, id est cum vel sine crisi pro varia eorundem conditione intelligemus: Cæterum quandocunque pubertatem exceßerint, atque à feminis & menstruorum eruptione minime desierint, difficilem exitum plerumque nanciscuntur aut etiam consenescent.

Instabis: Ab ipsa seminis emissionem summe debilitatur homo, Ergo ab hac non curantur morbi & negando consequentiam, nec enim est propria debilitas à coitu sed tantum defatigatio: deinde morbi à repletionem, nonne curantur inanitionem? Præterea ipse Hippocrates *Lib. de Virg. Morb. & Lib. 6. Epidem.* inquit: *increscen- tes morbos Venus solvit.* Denique non tantum per seminis emissionem, sed per mutationem temperamenti & ætatis contrariæ curantur morbi, quæ in pubertate maxime fieri consuevit.

Urgebis: Nullus morbus fit vitio ætatis, Ergo falsus est Aphorismus. Prob. Antecedens, ætas est tantum mensura vitæ humanæ quæ se pure habet relative, & sic malum nec infert nec curat. *℞.* Quando morbi dicuntur fieri vitio ætatis, non est quod ætas ipsa univoce causet morbos sed quod morbi ad eam sequantur; quando autem dicitur, quod morbi, qui vitio ætatis fiunt, per ætatem contrariam curari debeant, per ætatem intelligendum est temperamentum seu crasis v.g. pueritiæ & juventutis, nempe quod morbi, qui vitio temperamenti puerilis fiunt, curentur per temperamentum juventutis vel alterius ætatis.

Quæres: An ergo & cur septenarius numerus tantum vim & poten-

potentiam in nostro corpore habeat, ut vulgo creditur? *R. primo:* Pythagoras numerum septimum vitæ humanæ vehiculum & complementum vocat, cui in hoc Aphorismo subscribit Hippocrates. *R. secundo:* Rationem hujus arcani, varii Medicorum proceres perscrutari conati sunt, nunc in lunæ concavo, nunc ex abyſſo maris, nescio quas demonstrationes, ut credunt, astrologicas afferendo. *R. tertio:* Ego ingenue cum aliis viris doctis fateor me non esse tam fundatum & profectum Astrologum: nam:

Ut bonus Astrologus fiam, coelum nimis altum

Impedit, ut Physicus, terra profunda nimis.

Malo ergo tacere docte quam ignoranter loqui, & meam in hac re ignorantiam lubens agnoscere; nam *teste Philostrato:* Agnoscere propriam ignorantiam est primus gradus ad prudentiam.

Aphorismus XXIX.

Adolescentibus (seu juvenibus) autem sanguinis spuitiones, tabes, febres acutæ, epilepsia (seu morbi comitiales) alique morbi, sed præcipue antea dicti.

Contentum seu Intentio.

De Pathologia morborum adolescentium.

Connexio: Cum in priori Aphorismo morbos enumerasset, qui in pubertate fiunt, sub qua etiam adolescentiam complectitur, nunc juventutis morbus à vigesimo quinto anno ad trigesimum quintum, vel ut alii à decimo octavo ad quadragesimum annum (in qua ætate, magna pars pubertatis etiam comprehenditur) exponit & enumerat.

Hic Aphorismus simplex est, & una conclusione circumscribitur, adeoque divisionem non patitur.

Ad morbos ergo *juventutis* pergens in hoc Aphorismo Hippocrates, cum visus sit, prætermisisse eos, qui ad *adolescentiam* pertinerent, statim à Galeno arguitur oblivionis: Imo neque hujus solum, sed etiam,

etiam, quod nec satis plene de morbis acutis dixerit, quin imo tertianas maxime & febres ardentes omiserit: Contra vero adjecerit morbum comitalem, qui potius puerilis est, & ætatum mutatione sanatur: Deniq; tabes & sanguinis spuitiones, non ætatis ratione, sed ex accidenti juvenibus evenire Galenus contra Hippocratem contendit: Unde concludit: *Quare melius fuerat (ait) ita scribere Aphorismum: juvenibus autem eveniunt prope omnes alii morbi, quos diximus aliis accidere ætatibus, sed præcipue ardores & tertiana febres: hæc Galenus.*

Verum non temere arguendus est Hippocrates: Ad primum Galeni oppositum, facile est responsum, quamvis etenim non desint, qui pro juvenibus, adolescentes interpretantur, licebit nihilominus vocem juvenum ex græco codice congruentius retinere. Deinde neque ætatem adolescentiæ prætermisit, cum eam ad pubertatem antea retulerit, quemadmodum *Heurnius* quoque existimat; puberes enim & adolescentes, in idem omnino tempus conveniunt, atque ab anno decimo quarto ad vigesimum primum vel vigesimum quintum extenduntur.

Sanguinis spuitiones intelliguntur, quæ ex gingivis, ore, faucibus, vel quæ ex aspera arteria & pulmone emanant; quoniam per hanc ætatem, sanguis tenuior & acrior redditus, facile illarum partium arteriolas & venulas referare, aut erodere potest, præsertim autem, cum organa spiritus, tunc amplificentur, unde vox gravior, & respiratio crebrior, ac latior motus cordis, & sanguis longe citatior observatur, & sæpius si violentior causa subsit, spem in angusto collocat & ægrum mortis faucibus subicit: Sanitas enim non est vestis, nec Medici Sartores, qui viventes partes in profundo corporis consuere noscant: & in hoc acutissimis sartoribus, ultroneè palmam cedunt: de quibus Poëta:

Subtile ingenium, nostris sartoribus esse

Nemo neget, tangunt omnia semper acu.

Tabes seu phthises consequuntur spuitiones sanguinis: Nam ex sanguinis sputo, puris sputum, ex puris sputo tabes. 7. Aph. 15. 16. Possunt quoque tabes juvenibus accidere, ab acriori & tenuiori sanguine, qui sensim sua portione auctifica exutus, nutriendis partibus inidoneus efficiatur, unde postmodum totius corporis extenuatio; quia carie

plurimi ex juvenibus veluti plantæ, in medio annorum flore consumpti emarescunt: unde Poëta:

Nimors mactaret juvenes, laniique juvencos:
Omnia stultorum plena boumque forent.

Vel ut alius de illo juvene præmature mortuo Joanne Kalb, seu Vitulo:

O DEVS omnipotens Vituli miserere Joannis,
Quem mors præveniens, non finit esse bovem.

Quod autem Galenus ex accidenti solum, sputa sanguinis, & phtises his evenire crediderit, *aut quia vulnerantur aut quia franguntur, aut saliant, aut clamant vehementius, vel quia refrigerantur, aut humi cubant, aut replentur; aut propter ejusmodi causam*; licet verum quoque sit, non tamen huic duntaxat ætati, ab ejusmodi causis, spuitiones accidere poterunt, sed cunctis propemodum, potissimum vero ætati puerili, quæ imperita & inexperta magis, his omnibus ultro se subjicit.

Febribus acutis juvenes, quacunque ex causa corripuntur, quoniam in illis sanguis acrior, & volatilis, copiosorem felleum humorem cumulat, & in cykli deponit, unde acutos morbos fieri apud Medicos in confesso est. Et hi sunt illi morbi, qui fortes prosternunt, & leoninam violentiam & stragem inferunt, imo instar pulveris pirii eos violentius concutiunt, quos suæ activitati potentius resistere deprehendunt: Qui hodie erecta incedit cervice, ut papaver, cras detruncato jacet collo cadaver: qui hodie est rosa sine spinis, cras febre exustus jacet cinis. Tanta enim acredine & volatili conditione, facillime violentæ fermentationi, atque acutis & brevibus morbis subjiciuntur: Unde idem Hippocratis 1. Aph. 14. *Senes, dixit, acutis morbis non corripitur quia frigidum est illorum corpus*; Juvenes vero utpote calidissimos, præ cæteris promptius affici. Sub his autem acutis febribus, & *tertianis & ardentibus* aliosque similes morbos, tacite comprehensos voluit, quidquid Galenus obgarriat.

Morbus comitialis licet puerilis dicatur & plerumque pueros afficiat, non hinc tamen, cæteris quoque ætatibus contingere non posse fatendum, & præsertim juventuti, de qua speciatim scribit idem Hippocrates *Lib. de Morbo Sacro: Si post vigesimum quintum annum*

annum morbo sacro homines corripiantur, non sanari: Quod etiam repetit Aphorismo quinto *tit. 7.* Quocirca posse etiam hoc morbo juvenes infestari, clarissime demonstrat. Distinguenda autem est duplex epilepsia, altera *sympathica*, ab affectis aliis visceribus, præsertim ventriculo & utero: altera quidem *idiopathica* vitio cerebri inducta; quæ licet epilepsia proximam cerebri læsionem insequens pueris magis sit familiaris, & mutatione ætatum sæpissime sanetur, ea tamen quæ à consentientibus Hypochondriis, ventriculo, & utero fit, procul dubio juvenes torquere poterit, quibus scilicet oris amarities, & acida cruditas, nausea, vomitus, atque inde vertigo, & insultationes epilepticæ frequentissime contingunt.

Denique cum, inquit, & alii sed præcipue *antedicti*, præter enarratos intelligit plures alios morbos posse juvenes invadere, qui nimirum vel affinitate temperiei ipsis congruunt, vel sanguinis aliorumque humorum acredine promanant, vel à cruditatibus & intemperantiis exoriuntur; vel denique in feminis à menstruorum suppressione, atque hystericis affectionibus originem ducunt, adeoque cæteris ætatibus pro ratione communes esse solent. Hinc non est, cur Galenus tam male de Hippocrate sentiat, & Aphorismum hunc prævertat, quippe qui peculiare solum tradidit, alios implicite sub his contentos tacite sub intelligendos voluit; communes denique veluti in aliis Aphorismis memoratos, non sine ratione prætermisit, de his confer. 2. Aphorif. 45. & 5. Aphor. 7.

Dices: Morbus comitialis maximo contingit melancholicis, sed Juvenes non sunt melancholici Ergo &c. non sunt melancholici temperamento innato concedo; acquisito nego, Imo negatur, omnem morbum comitiale à sola melancholia fieri, sed aliis causis in textu recensitis.

Aphorismus XXX.

Ultra hanc aetatem proVectis, asthmata, pleuritides (morbi laterales) peripneumonia (seu pulmonis inflammationes) lethargi, phrenitides, ardentes febres, diuturna alvi profluvia, cholera, dysenteria, lienteria, hemorrhoides.

Contentum seu Intentio.

De Pathologia morborum aetatis consistentis.

C*onnexio:* Explicatis in praecedenti Aphorismo morbis, qui juventutis sunt, in hoc praesenti ad illos, qui in aetate consistente fieri solent accedit, ea autem aetas à trigesimo quinto anno incipit, & usque ad sexagesimum annum extenditur, & primum senium amplectitur.

Hic Aphorismus ob simplicem conclusionem divisione non eget. Huic ergo aetati plurimos quoque morbos accidere asserit hoc Aphorismo Hippocrates, sed praecipue in sanguine, & caeteris liquoribus mutationem, atque vitiata in visceribus texturam insequentes, à quibus aetates hominum mutari supra à nobis abunde ostensum est.

Et quidem *asthma* seu *creber anhelitus* illis fiet ab humoribus crassis, & glutinosiori lymphæ à sanguine secreta, quæ facile pulmonibus adhæreat; & si fortasse acorem contrahat & sanguinem pari vitio afficiat, etiam *pleuritidem* & *peripneumoniam* minetur, aliosque *dolores* & *tumores* lateribus & musculis respirationi inservientibus infensus. *Pari modo lethargi* orientur & *phrenitides* si lymphatici humores aut sanguis ipse per cerebri meatus excurrentes, acido-concreti, vel glutinosa plus justo portione referti, in meningibus & plexibus, in cerebri cortice, aut alibi remorantes, & quandam veluti phlogosim inferant: Longe facilius autem apud fæminas quam mares, quæ ob Naturæ debilitatem & fragilitatem levissima imo sæpe nulla de causa delirant aut in furias aguntur teste Juvenali:

Nulla

Nulla fere causa est, in qua non fœmina litem
moveat.

Neque solum mox dictas cerebri affectiones, in ætate virili constitutos pati posse credere licebit, sed etiam deliria *melancholica, ecstases, catalepses*, aliosque morbos capitis ab acidis succis aut halitibus dependentes.

Ardentes febres juvenibus familiares, viris quoque evenire posse, inter initia saltem consistentis ætatis, ob utriusque analogiam, eadem ratione facile deduci potest: Sanguis enim prompte in utrisque fermentescit, & in ætate virili ob cutis densitatem ab impedita aliquatenus perspiratione cuicunque alterationi citius subicitur, unde *febres ardentes & acutæ*. Quoniam non raro etiam acore infectus sanguis hærare solet in apicibus arteriolarum, qui propterea febres excitat vehementissimas, & quandoque etiam mali moris, ut diximus in tractatu de febribus.

Diuturna profluvia specialius per alvum fiunt ab humorum acedine, & mala ciborum digestionem, & à confluxu aliorum succorum è cæteris corporis partibus sensim languentibus.

His addit choleras id est immodicas & subitas per os & alvum diversorum succorum evacuationes, propter depravatos ventriculi & intestinorum dissolventes succos, qui si deorsum solummodo ferantur, in erodentes & lancinantes degenerati molestas admodum *dysenterias*, in dilutos vero ab acido corrupto & effœcto, ad chylosim inepto *lienterias* excitabunt.

Hæmorrhoides demum virilem ætatem peculiariter comitantur, in ea enim sanguis acore magis inficitur & promptius hæret, unde nequit tam libere remeare. Potissimum autem lienem & mesenterium afficit, è quibus arteriæ splenicæ & mesentericæ in alvum deductæ, hæmorrhoidales efformant, sanguinem sæpissime fundentes, ab ejusdem ibidem concreti vitio. Per hanc eandem ætatem *varices* etiam fieri solent, non dissimili ex causa progeneratæ, à decubitu scilicet sanguinis fœculenti & acidiali alicubi stagnantis.

Dices I. Hippocrates dicit in hac ætate homines tentari morbis acutis ergo non tentantur diuturnis alvi profluviis & hæmorrhoidibus &c. non tentantur simul & semel concedo, consecutive nego.

Aphorismus XXXI.

*Senibus, spirandi difficultates, destillationes cum tussi
stranguria, dysaria, articularum dolores, nephri-
tides, vertigines, apoplexia, mali corporis habitus,
pruritus totius corporis, vigilia alvi, oculorum,
& narium humiditates, visus hebetudines, glau-
comata, auditus graves.*

Contentum seu Intentio.

De Pathologia morborum senilium.

Connexio: Explicatis jam omnium ætatum morbis usque ad pri-
mum senium: In hoc ultimo Aphorismo, ultimæ quoque ætatis
affectiones enarrare intendit, ejus scilicet, quæ decrepita dicta & à
sexagesimo quinto anno, usque ad mortem perdurat, sicque etiam
claudit, & finit hunc tertium Aphorismorum librum morbis, qui se-
nectutem potissimum solent infestare.

Principaliores autem, ex innumeris aliis hic recenset, quippe
non tantum isti sed complures alii per eam ætatem vagari solent.
Quam autem senectutem Hippocrates proprie voluerit intelligen-
dam, dubitari hoc loco solet: Siquidem Hippocrates, senilem æta-
tem, in tres alias distinguere consuevit, *crudam* scilicet seu *incipientem*
senectutem, *mediam* & *decrepitam*. Verum tamen cum nullam hujus-
modi distinctionem hic fecerit, sane videtur omnes voluisse compre-
hendere, quamvis ultimi in Aphorismo recensiti morbi, potius ad ma-
turam, quam ad crudam pertineant, cum non nisi extremam viscerum
& sensuum labefactionem ac virium languorem consequantur: Ita
etiam Celsus Lib. 2. Cap. 1. Senectutem voce generaliiori usurpa-
vit, utpote innumerorum morborum receptaculum de qua senec-
tate Seneca:

In nos ætas ultima venit,
O nos dura sorte creatos.

In

In hac ætate Spiritus in vappam; oleum in aquam; acidum homogeneum in insipidum; calor in frigus; humidum in siccum; activum in passivum; uno verbo vita in mortem paulatim deducitur: Maturitas nempe, senibus vitam eripit: hinc Poëta:

Curva senecta mihi, Nex, Nix, Nox, Nux velut audit.

Nex cur dicatur? nempe Senex prope Nex.

Nix? niveas nutrit, frondoso vertice crines.

Nox? peragrandam brevi semita noctis erit.

Nux? Senium sistit validum, sine labe putamen,

Interiora nucis, viscera vermis edit.

Primus inter seniles morbos, numerantur *spirandi difficultates*, quæ tamen differunt à præcedentibus, quæ antea aliis ætatibus sunt adscriptæ, quoniam senes difficilem respirationem à languore potius subeunt: Siquidem ut recte monuit Plato *in Timæo*, non semper ab affecto pulmone, atque hærentibus ibidem crassis succis, difficultas respirationis proficiscitur, sed non raro etiam ab impotentia Thoracis, & musculorum intercostalium, ac diaphragmatis, veluti senibus accidit. Quamquam & laxitas pulmonis, & succorum ibidem crescentium pondus id ipsum quoque sæpe sæpius efficiunt, utraque eidem ætati familiaria: Quamobrem adjectum est in Aphorismo *destillationes cum tussi*, quæ infarctum pulmonem denuntiant: Enim vero in gravescente ætate, cuncta pene viscera imbecilliora fiunt, sanguis hebescit, & lenti & viscosi succi plurimi ubique cumulantur, præsertim in partibus sua Natura laxioribus. Sed & senum corpora, nec bene nec facile perspirant, quapropter plurima pars eorum, quæ insensibiliter perspirare debent, interiorius detenta, viscera & sanguinem inficit, unde omnis generis catharri.

Cum autem succi prædicti spirandi difficultates excitantes, ad *renes & vesicam* confluant, non tantum serum urinarium depravant, sed etiam ductus ipsos obstruunt, atque varios in ipsis morbos adducunt, præsertim vero *strangurias & dysurias*: Hæ namque fiunt potissimum in senibus à viscosis & acidis succis, qui vel urinæ exitum interdicentes, vel urinam ipsam reddentes æriorem, mictui non levem molestiam afferunt, & non raro, in calculos & arenulas conversi, gravando aut vellicando, vehementer sphincterem musculum excruciant: Hic autem eo gravius afficitur & laceffitur, quo vesicæ habitudo

ad propulsiōem impotentior evaserit, ob senilis ætatis imbecillitatem.

His etiam de causis contingunt *dolores articularum*, ut propterea qui humores ad vias urinæ præfatas, afferunt affectiones, in artus delati pariunt *arthritides*, unde congeneres ejusmodi ægritudines experimur, atque iisdem pene medicamentorum generibus curari. Quoniam vero ferofiores plerumque humores, aut exeruntur, aut promptius diffiantur, crassioribus detentis, proinde fit, ut hi in Artubus Tophos, in renibus & Vesica Calculos, progignant, atque in aliis aliisque partibus stagnantes, aliasque inferant gravissimas affectiones, & in cerebro quidem *vertigines apoplexias, mentisque hebetudines*, obstructis nimium vasis, in quibus liquor Nerveus à sanguine scernitur; in visceribus imi ventris *oppilationes, hydropes, tumores*; in oculis *glaucedinem & visum obtusum*; in auribus *surditatem*, atque alibi alias propemodum infinitas.

Neque vero solum in quibusdam partibus, peculiare morbi contingunt, sed etiam toti pene corpori, per cachexiam seu depravatum habitum, ob malam ejusdem nutritionem, tum propter vitiatum in sanguine alimentum, tum propter defectum viscerum male transmutantium, repurgantiumque alibilem corporis substantiam, equidem hæc omnia perperam aguntur in ætate senili, cum & facultates & spiritus ac fermenta viscerum, sensim sensimque deficient, ex alibi probatis.

Quoniam autem serum, lymphæ caterique liquores, atque fermenta, potissimum glandularum, per ultimas ætates sponte sua acorem contrahunt, & cum alicubi detinentur diutius quam par sit, etiam muriatica, & austera falsedine inficiuntur, idcirco sæpissime quoque accidit, ut senes acido-salsis ichoribus abundant, qui detentis fuliginibus, ex mala transpiratione commixtis, longe peiores, & molestiores fiunt; unde postmodum *pruritus, pustulæ*, & non raro etiam *ulcuscula* illis accidunt, per universam fere cutem dispersa. Atque hinc plane evenit, cur tantopere senectus, de totius corporis æstu conqueratur, qui falso à vulgaribus Medicis, calidæ jecoris intemperiei solet adscribi, cum tamen per juventutem, nullus viguerit.

Adhuc

Adhuc etiam admodum *vigiles* sunt senes: iis enim cerebrum plurimum exarescit, & liquor ille, tum ipsi cerebro, tum nervis irrorandis addictus vel multum deficit, vel à naturali & convenienti humectatione desciscit; & quamvis senes pituitosis scateant humoribus, hi tamen ad somnum conciliandum utiles non sunt, imo si quandoque cerebrum impingant, gravando atque obstruendo, potius soporem atque apoplexiam inferunt: Atqui ros ille somno conciliando peropportunos, lenis, placidus, blandusque esse debet, quo scilicet pueri potissimum abundant: Unde fit, ut somno præcæteris indulgeant. Sed & senectus *curarum* plena est; quibus plerumque anxii ac solliciti, exsomnes fiunt, cum alioquin somnus requies animorum appelletur ab Homero.

Ex oculis præterea & *naribus* senum solet plurimus excrementitius humor exstillare: nam illorum cerebrum multis perpetuo scatet inutilibus succis, ex effæcto sanguine, ejusque fero & lymphæ abundantiori depositis, qui si fortasse detineantur, præfatos morbos capitis afferunt; si vero per consuetos ductus deferantur, & oculos & nares plus justo humentes efficiunt, imo in os confluentes sputa multiplicant, & labia salivosa reddunt, his quoque incommodis, ventriculus afficitur, plerumque ex mala ciborum confectione, quandoque etiam ex illapsu consimilium succorum in glandulas, & meatus intestinorum; unde alvus magis lubrica evadit.

At vero nunquam fere non obnoxii sunt senes *visus hebetudini* cum rari admodum sint, qui per eam ætatem videndi acie præpolleant; verum tamen non solo languore, aut spirituum inopia, ut à plerisque creditur, sed potius humorum aut tunicarum crassitie, vel extenuatione, situ, figura, & structura oculi, per ætatem variatâ; ut alias alibi est ostensum. Cum autem visus hebetudo triplex observetur, aut in remotis solum, aut in proximis objectis corporibus, aut in utrisque, hinc prima dicitur *Myopia*, secunda *Presbitia* tertia *Ampliopia*. Et quidem *Myopes* propius admota cernunt, remota vel nullatenus vel confuse admodum, atque hoc vitii genus familiare est potius juvenibus, un-

de ingravescente ætate, sæpe numero corrigitur. *Presbita* vero remotiora distincte, proximiora confuse vident, cujus modi sunt senes. *Ambliopes* tandem, tum ad proxima tum ad remota deficiunt. Hinc autem liquet, non ad spirituum copiam vel inopiam, robur, aut languorem, visionis vitia esse referenda, cum imbecilli senes, si proxima cernere nequeunt minus remota discernerent, & robusti Juvenes non tam exigenter, ut objecta forent, oculis admota. Accidunt ergo hæc visus hebetudines, à vitiata tunicarum, & humorum structura ac dispositione: Etenim in prioribus videndi vitiis, crystallinus humor non habet à Retina justam distantiam, sed vel ad eandem proprius accedit, ut in Presbitis, vel ab illa longius recedit, ut in Myopibus: Quamobrem, conspiciendorum ope, plurimum adjuvatur, alteruter in his videndi defectus; Nam in presbitis, crystallus in lenticularem formam redacta seu connexa; in Myopibus vero concava oculos juvat, sive ad proximiora, sive ad remotiora conspicienda. Porro hæc vel formatione, vel consuetudine, vel sola ætatum mutatione contingere solent, cum sensim humores & tunicæ oculorum hujusmodi permutationes, in situ, ac dispositione, à naturali, & debita constitutione plerumque subeant.

Tertia denique hebetudinis species, tum ad proxima, tum ad remota objecta prospicienda, quandoque vitium sequitur illius tunicæ, quæ Cornea appellatur, forte quia convenienti pelluciditate caret, sed vel crassior vel rugosior vel aliter affecta, evadit opaca: aliquando ab humore aqueo, vitreo, vel crystallino oritur, qui alieno, atque impuro humore, maculatus, lumen non bene admittit ac excipit, nec ad Retinam clare trajicit. Nonnunquam etiam in Retina ipsa, quæ simulacra rerum, debet excipere vitium latet, & distinctæ visioni, redditur inutilis.

Glauco pariter senum oculis sæpissime accidit, cum humores præsertim crystallinus, crassescunt & densiores fiunt, ut luminis in ipsos incidentis, refractione à debita ratione variet, & glaucus color, cæsius, ac cæruleus, qualis noctuarum in oculis observetur. Evenit autem hoc vitium in valde senum oculis, exarescentibus quo-

quodammodo humoribus, aqueo & crySTALLINO, ipsa sensum occidente senectute.

Tandem vero cum sensus omnes in senibus hebescant, tum potissimum auditus fit gravior, quin & memoria ac mens ipsa, in occidua illa ætate, paulatim deficit.

Senilibus autem istiusmodi ægitudinibus, quo ad ipsa ætas ferre poterit, bono potius victus regimine quam multis & inutilibus medicamentis occurrere debemus, quæ ex praxi petenda.

Dices primo: Senes sunt sicci, Ergo non laborant asthmate, quin alias hectici forent maxime asthmatici & senes sunt sicci, quo ad partes continentes concedo, quod ad contenta nego. Ergo non laborant asthmate, nego consequentiam.

Instabis: Senes habent vasa ampliora quam Juvenes, quia caro & pinguedo consumpta est à quibus antea angustiabantur. Ergo senes minus asthmate laborabunt quam Juvenes. & Nego antecedens, nam licet caro & pinguedo consumpta sit, non ideo fiunt ampliora vasa, quia vel corrugantur vel concidunt & hinc fiunt potius angustiora.

Urgebis: Ideo senes sunt apoplexiæ, paralyfi & defluxionibus magis obnoxii, quia habent vasa ampliora ut vult Fonseca Ergo in iis non corrugantur & concidunt. & In primo Senio transeat, in ultimo nego.

Dices secundo: Hippocrates dicit Senes minus ægrotare quam Juvenes; Ergo falsum est, quod tot obnoxii sint morbis & Senes minus ægrotare febribus & morbis acutis concedo, Ergo non laborabunt morbis in Aphorismo recensitis, nego.

Dices tertio: Hippocrates in *Coacis* dicit post sexagesimum octavum annum, nec Strumas nec Lapides in Vesica amplius fieri: Ante pubertatem pueros nec Podagra nec pleuritide laborare; cum tamen multi senes sint, qui Lapide in vesica usque ad mortem gravissime fuerunt cruciati: deinde pueros observatum est, Podagra laborare ante pubertatem, Ergo dicta ab Hippocrate, non videntur esse vera.

& pri-


R. primo: Hippocratis mentem esse, quod senes post sexagesimum octavum annum lapidibus in vesica non laborent, quos ante non habuerunt, ergo illi videntur, prius lapides illos habuisse & illis post illud tempus non crevisse.

R. secundo: Pueros non laborare Podagra, nisi hæreditaria, quæ tamen raro actuatur ante usum veneris.

R. tertio: Pleuritis seu pulmonia rarior est in pueris, præcipue quæ fit à causis internis, eo quod omnis sanguis corpori alendo applicetur.

Et hæc sunt, quæ favente DEO pro ingenii nostri tenuitate, in tertiam Aphorismorum Sectionem enodare, & sincere tradere intendimus: Benevolus Lector æqui bonique consulat nostro-
que labori faveat, id enim unicus est noster &
hujus Libri,

FINIS.





LIBER QUARTUS
 SEU
 SECTIO QUARTA
 DE
 REGIMINE PURGANTIUM,
 FEBRIBUS, SUDORIBUS ET
 URINA.

Aphorismus I.

Pregnantes purgabis, si materia turgeat; quadrimestres, & usque ad septimum mensem; sed has parcius: Juniores autem & seniores, caute vitare (seu abstinere) oportet.

Nota: Hic ipsissimus Aphorismus, iisdem prorsus verbis repetitur Sectione quinta Aphorismo 29. Rationem autem hujus repetitionis, dicemus, quando ad locum mox dictum accedemus.

Contentum seu Intentio.

De Purgatione gravidarum seu pregnantium.

Connexio: Quamvis hic Aphorismus, utpote ordine primus non habeat connexionem; eam tamen habet, præsens liber quartus, cum præcedente libro tertio: In quo cum Hippocrates, morbos, qui & ad anni tempora & ætates

fieri consueverunt, explicuisset; modo in hoc quarto libro, ad particularem tum curandi tum prædicendi formam accedit: Quoniam vero inter remedia, & quidem validiora & usu recepta, sit medicamentum, ideo præ cæteris, de pharmaco purgante seu cathartico multa docet, & in hoc Aphorismo specialissime exponit tempus, in quo tuto vel non tuto, mulieri gravidæ medicamentum purgans exhiberi possit? Ideoque hic Aphorismus *dividitur* in duas partes juxta duplicem in textu positam conclusionem: quarum *prima* docet purgandas esse mulieres à quarto ad septimum mensem: *altera* vero negat, id esse faciendum ante vel post illud tempus. Quandoquidem ergo Hippocrates in hoc Libro per plures Aphorismos de recta purgantium medicamentorum ratione, in ægrotantibus verba faciat, antequam ad ulteriorem Aphorismi hujus explanationem nos accingamus, prius quædam paucula, notatu digna, *de purgatione* in genere præmittere, cum palam sit apud Medicos, duas potissimas manus auxiliares, quibus præcipuæ operationes Medicæ perficiuntur, esse *vena sectionem & purgationem*: de illa alibi, de hac autem in præsentī. Ab hac enim dextre in morbis applicata, non tantum judicium & dexteritas Medici fundati elucescit, sed & plurimum ei gloriæ accedit: Sinistre autem adhibita, non tantum fortuna ejus obscuratur, sed & famæ plurimum decedit. Est enim purgatio illa materia, qua apte instituta & ponderata in tota Medicina non est utilior, imo si politice loqui liceat, nulla in rerum Natura, reperitur professio, quæ pro suo scopo, non habeat purgationem; hinc Poëta:

Theologus animam purgat, Jurista Crumenam

Et corpus Medicus: unus utrinque labor.

Mirari proinde licet quorundam immaturum impetum, & innatam quasi in omnibus contradicendi inclinationem, qui omnia purgantia ex foro Medico proscribere conati, tam frivolas adduxerunt rationes ut refutationem non mereantur: Inter hos ex veterum coetu fuit *Asclepiades* à Galeno jam abunde refutatus, ex Neotericorum classe *Helmontius*, qui, si vera forent, quæ jactat arcana, quæ, nempe intactis succis vitalibus, sola excrementa educerent, hominem sanum prorsus non purgarent, humorem ubicunque latentem radicitus evellerent, jure merito à nostris purgantibus usualibus abstinere videtur: Sed ut verum fatear *Helmontii* promissa & secreta, cum suo universali men-

menstruo liquore, nempe *Alkaest*, plerisque ita & nobis semper sunt & fuerunt suspecta, nam:

Promissis Dives, quilibet esse potest.

Retulit enim fide dignissima quidam famosus Doctor *Lespier* Bruxelensis Medicus Helmontii Collega, in eadem urbe, eodem tempore, cum eo communem praxim exercens, Helmontium nec singulis annis aliquot mille curasse Hydropicos: Nec omnem Hecticam in Lunæ Cursu; nec omnes quartanas & lienis scirrhotates solo topico (prout passim in suis scriptis, vaniloque persuadere conatur) nec tantum fuisse Herculem, qui Mercurio suo Diaphoretico, veluti Clava in febribus continuis, criticum Naturæ certamen inhibere, prævenire, & massæ sanguineæ præcipitationes, certis diebus & horis pro libitu promoveri potuerit: Sed quanta prærogativa relinquis Medicis suo tempore subtilitate ingenii & Theoria fuisset felicior, tanta distinctione, ipsum extitisse, usu practico reliquis infeliciorem: de Helmontio verificatur illud *Plauti* dicentis; *qui se omnia scire putant, nihil sciunt*: Infelicitas Helmontii maxima, exinde elucescit, quod correptus pleuritide, venæ sectionem (cujus abjuratus hostis extitit) ab aliis Medicis suasam, pertinaciter renuens, tandem, sed sero nimis annuens, misere & præmature perierit. Censura talium contradicentium hominum eleganter descripta legi potest apud *Galenum* 4. de *Loc. affectis* Cap. 4. Taceo, patulum & luce meridiana cunctis clarissimum esse; Naturam nostram in plurimis morbis vomitum, vel alvi fluxum, hæmorrhagias, aliosque sanguinis fluxus cum Euphoria instituere, & per has vias quotidie particulas heterogeneas, sibi inimicas critice & laudabiliter expellere; hinc Medicus erroris argui nequit, si ejus vestigiis insistendo, medicamentorum opera illud efficere conetur: Et quæ & quanta noster Hippocrates, saluberrima dogmata ac præcepta de Purgatione posteritati reliquit, quæ sparsim in suis voluminibus, potissimum etiam in suis Aphoristicis Diæteriis promulgavit, prout & in hoc Aphorismo, aliisque sequentibus contestatur, atque in nostro præsentis Aphorismo initium ducit ab utero gerentibus morbo affectis, cujus causa purgatio instituenda videatur, atque eas docet purgante medicamento tractari posse, si tamen materia turgeat, à quarto Mense usque ad septimum; has autem minus, in cæteris vero omnino abstinere oportere; tum ob foetus debilitatem tum ob tenuitatem & mollitiem, vasorum umbili-

Calium & vinculorum uteri, quibus dorso, lumbis & intestinis adhæret: Quemadmodum enim teste Galeno *in Comment.* & Hippocrate *Lib. de octimestri & septimestri partu*, tenelli baccarum & fructuum immaturorum petioli à levi ventorum flatu, solutis retinaculis, firmamentis & copulis disrumpuntur, qui vero, maturiores sunt, levius adhærentes, privati scilicet vinculo naturali, facile separantur, & ab ipsa arbore, una cum fructu decidunt: Sic pariter fit in muliere, quæ expurgatur prædictis temporibus, ut foetus tenuior facillime decidat & ab utero separeretur: Id ipsum quoque eo facilius evenit, ubi foetus grandior & pene maturus (post septimum nempe aut prope octavum & nonum mensem) extiterit, tunc enim paulatim concidunt & connivere incipiunt vasa umbilicalia, quæ antea habebant, ob gravitatem foetus, ipsa quoque uteri ligamenta laxantur, foetus versus Hypogastrium declinat, mater fit imbecillior, ob defraudationem alimenti, quod partim ad alendum foetum grandiore jamnum, partim ad generationem lactis, quod provida Natura foetui excludendo, provide præparat, matri detrahitur.

Videtur itaque Aphorismus, tria universim comprehendere: *Primo* morbos nimirum in quibus gravidas purgare conveniat: *Secundo* tempus opportunum & minus periculosum, hujusmodi evacuationis: *Tertio* tempora graviditatis lubriciora, eaque cavenda.

Cathartici itaque seu elective purgantibus medicamentis gravidas non esse commovendas, nisi gravi & acuto morbo afficiantur, nemo unquam in dubium vertere ausus est, cum subinde maximum, ut mox innuimus, tum ipsis, tum conceptis foetibus, detrimentum sit adfuturum ab abortu, qui à purgante medicamento procul dubio sequeretur, & quod innoxios humores educeret, & quod sanguinem aliosque liquores funderet, atque alibilem succum perturbaret; & quod uterum, & cætera viscera naturalia lacerando, plurimum conciteret, & contorqueret, adeo ut existimaverit Averrhoes, omnem Medicinam solutivam utero nocuam esse, ut quæ per ejusdem ductus ac per meatus urinarios, vitiosos humores etiam promoveat.

Cathartici ergo tunc solum utero gerentes subjiciuntur, cum acuto & gravi morbo corripuntur, ac præterea cum peccans humor,

mor, illius causa, efferus est, & motu irrequietus, sive ut loquitur Hippocrates *turget*, de sumpto vocabulo ab animalibus ad Coitum concitatis: Cujus rationem, tum hic tum alibi & *comment. 10. hujus Libri* attulit Galenus: *Nam cum (inquit) superabundantes humores moventur, & per totum corpus feruntur, nondum in aliqua parte firmati, tunc ad eos expellendos Natura incitatur, & aliquo indiget manum porrigente, & hunc humorum motum ad alvum deducente, priusquam robur corporis dissolvatur, vel febris caliditas augeatur, aut ad aliquod membrum principale decumbant ii. qui per corpus vagantur humores.* Unde rursum *tria* exiguntur ad *turgentiam* in humoribus inducendam; *primo*: Impetus scilicet humorum & plus quam Natura postulat, in partes irruptio: *Secundo*: Robur earundem partium, quæ à se ipsis illabentes humores propellant: *Tertio*: Multitudo, quæ regi, aut cum reliquis excrementis corporis sensim simul educi nequeat. Quamobrem turgens materia ex sui copia evacuationem expostulat, & causa mobilitatis facilem ac promptam illam pollicetur, quæ sane difficillime succederet, si alicui parti adhærent aut impacta foret; neque vero absque manifesto periculo, si principem partem occuparet, aut in uterum decumberet, foetui & matri noxam certissimam allatura.

Sed quo genere purgantis medicamenti turgentes, in utero gerentibus, humores educendi sint, gravior videtur difficultas; & Fuchsius in expositione hujus Aphorismi præscribit medicamenta vere & elective purgantia ex colocynthide, scammonio, turpetho idque genus aliis: Et quamquam ista medicamenta (inquit) vix citra foetus noxam sumantur, cum ex Galeno 2. de victu acutorum Comment. 12. purgantium omnium medicamentorum Natura, corporum quæ expurgantur, Naturis contraria atque deleteria sit, tamen præstat, hunc solum ista ratione lædi, quam ut nullo prorsus dato, & matrem & foetum de vita periclitari patiamur.

Verum communior praxis ab his abstinet, & tutius purat licere uti levioribus, quæ satis sunt educendis humoribus, & sponte sua mobilibus. Sd Abortus periculum non tantum à purgantis medicamenti Natura, sed sæpe magis imminet ab irritamento & concussione vehementi à Catharticis fortioribus inducta: Quamobrem non

tantum illa fortiora, sed & *flatuosa*, & *folia Senna*, *Cassia*, & nimis *aperientia* ut *aloë*, quod vasorum oscilla facillime aperit & hæmorrhoides excitat: Imo & *rhabarbarum* quibusdam suspectum videtur, eo quod per vias urinæ humores potenter moveat, sicque attiguum uterum facili negotio proritare & laceßere possit: hinc omnia quoque *diuretica* proprie dicta vetantur, nec non alimenta *Flatuosa*, ut sunt legumina bulbosa, *Castanea*, *faba*, *Caseus* &c. omnia quoque *Emollientia* quæ ligamenta uteri elongant & emolliunt; qualia sunt juscula ex emollientibus confecta: Sic pariter abstinendum à multo potu, fructibus hortariis: Demum evitanda omnia violenta animi pathemata, ira, tristitia metus, gaudium &c.

De Vomitoriis alia potest esse difficultas, num ista in usum purgandarum uterogredientium trahi commode queant? Variæ multorum super hac re existant Autorum veterum & recentiorum sententiæ: Ego crediderim (salvo melius sentientium Judicio) illa tuto præscribi posse, dummodo turgens humor ventriculum petat, illumque ad nauseam disponat, subvertat, & ad vomendum sollicitet; eo enim ducendi sunt humores, quo Natura vergit teste Hippocrate 1. Aph. 21. quia & sæpissime uterogredientes spontaneas subire solent vomitiones, quibus à plerisque morbis vel præcaventur vel vindicantur, qua etiam ratione partum in debitum tempus salubriter protrahunt, alias procul dubio abortituræ. Consentit quoque in id Hippocrates 5. *Epidem* 18. ubi uxorem Antimachi, gravidam bimestrem, à dejectorio medicamento mortuam scribit, eamque vivere potuisse si aquam bibisset & evomisset.

An præterea tuto purgari quoque possint, uterogredientes si aliis morbis afficiantur, & vitiosi humores, minime turgeant, sed potius alicubi consistent? &c. Equidem inficias non iverim, cum vitiosus humor partem principem occupat, id commode in usum trahi posse; quare in apoplexiis, convulsionibus, lethargis, cæterisque cerebri affectibus soporiferis, nemo est, qui non audacter medicamentum purgans adhibeat gravidis, etiamsi exinde periculum abortus immineat; præstat enim opitulanti matri, ne mater & foetus simul periclitetur: In uteri quoque affectionibus, & cum pravus humor in illum ruit, ne abortus inde sequatur, consueverunt peritiores practici impetentem humorem intercipere, & leni aliquo cathartico ad alvum deducere.

Quo ad tempus vero magis opportunum hujuscemodi purgationis, statuit Hippocrates ut mox innuimus, mediam illud esse gestationis, nempe à *quarto mense usque ad septimum*; & quidem quartus mensis includitur; cum ex græco Codice τετράμηνος quadri menses interpretentur Fuchsius & Heurnius, quasi vero istæ potissimum purgationem sufferant, quod foetus per vasa umbilicalia, tenacius placentæ & utero tunc adhæreat, nec tam facile à concutiente Cathartico dissocietur. Recte pariter observat Heurnius, quadrimestres foetus intelligendos esse, non spatio temporis, sed in motus conceptione, cum scilicet moveri cæperint; quippe tum denotant membra cuncta firmiora jam evasisse: at vero foetus in utero moveri incipiunt, si robore præcellant, circa tertium & quartum mensem; unde idem Hippocrates 1. Epid. 3. agro 13. spontaneas alvi dejectiones in Trimestri promovit, & quidem salubriter, quo circa gravida illa à febre decima quarta die judicata est. De septimo autem mense major difficultas est: Putat Brassavolus etiam ab Hippocrate comprehendi: At Fuchsius excludendum arbitratur, quod Hippocrates dixerit, *usque ad septimum*: si enim, inquit, hunc excludere noluiisset, profecto dixisset, *ad octavum usque*, at vero octavus mensis periculosissimus est & septimus non raro Partui dicatur: Verum adjecta verba, *sed hæc minus*, manifeste declarant, etiam septimum voluisse inclusum, non tamen adeo tutum esse, veluti sextus quintus & quartus Mensis, ut propterea, quo uteri gestatio septimum propius attigerit, eo periculosior purgatio existimetur. Multum autem hictribuendum est solertiæ Medici, qui pro ratione morbi, ejusque causæ atque ægrotantis gravidæ constitutione septimestrem Catharsi subjiciet vel eximet.

Postremo à Juniore & Seniore foetu abstinere oportere, hoc est omnino Catharsim cavere, necessum esse, in primis & ultimis mensibus graviditatis admonet Hippocrates, ex evidenti abortus & vitæ periculo, tum matris tum foetus, quoniam ex Galeno, ut supra innuimus, foetuum connexus cum utero eandem habet proportionem quam fructus cum plantis.

Illud tandem hic superesset examinandum, quo pacto & quo coalitu adhærescat foetus utero materno, unde alimentum & vitam mutatur: Sed cum id à nobis in institutionibus & anatomia luculenter ostensum sit, eo lectorem remittimus.

Dices

Dices I. Hippocrates dicit morbos acutos esse lethales in prægnantibus; Ergo non erunt purgandæ etiam turgente materia, ne afflictis addatur afflictio. &. Per ly lethale ab Hippocrate intelligi non absolute lethale seu desperatum sed incertum eventum seu dubiam spem: juxta illud morborum acutorum incertæ sunt prædictiones salutis & mortis.

Dices II. Piaculum est prægnantes in septimo utpote Critico & partui vel abortui sæpius destinato mense purgare & cum Hippocrate parcius non sunt purgandæ nego, fortius concedo.

Dices III. Utero gerentes feminae, quovis tempore patiuntur innocue diuturnas Diarrhæas, Ergo etiam quovis tempore innoxie purgari poterunt &. transeat antecedens, quod revera dubium est, nego consequentiam, quia medicamentum catharticum, quid sit & quid præstet diximus in textu; levis autem Diarrhæa ea damna non præstat.

Dices IV. Apud Hippocratem s. *Epidem.* uxori Anthimachi utrogerenti datum est fortissimum purgans *elaterium* & mortua est, non tamen abortivit, ergo purgantia non faciunt abortire & in hoc casu, Natura vi medicamenti fuit ita prostrata, ut foetus excludi, non potuerit, & mors abortum prævenit, sed si aquam bibisset & vomuisset & mater & foetus salvati fuissent.

Dices V. Multæ mulieres in materiae turgentia, primis mensibus feliciter sunt purgatæ ergo Aphorismus non est verus. &. Id robori & bonitati Naturæ esse adscribendum, neque facile tentandum sed cum magna circumspectione faciendum idque levioribus.

Dices VI. Foetus bimestres & trimestres, in ediam facilius tolerant matre acuto morbo affecta quam à quarto ad septimum: Ergo illi non tam facile ejicientur quam hi & omnia in tenuioribus foetibus esse debiliora: licet enim ob sui tenuitatem, facilius in ediam ferant, sunt tamen debiles & purgantia minime ferentes.

Quares I. Utrum gravidæ tutior sit purgatio, quam saltatio? &. Si utraque sit & fieri debet, tutiorem esse purgationem primis mensibus quam saltationem, quæ primis & ultimis mensibus magis nocet: cæterum neutra horum secuta est.

Quares II. Utrum per purgationem facilius abortiant, primis an ultimis mensibus? &. primis mensibus utrogerentes minori cum periculo expurgari, quia foetus sunt insensibiles adhuc qui sæpe nec violent-

lentissimis motibus nec vomitionibus (intellige in robustioribus non vero debilibus) ejiciuntur: Ultimis vero mensibus, ob facilem ex pondere ligamentorum rupturam, tum foetus tum excrementorum molem & copiam, purgantis quoque commotionem, facilius abortiunt.

Quæres III. Cur aloë intus sumpta aperiat venas, extra vero applicata orificia vasorum constringat? R. Aloë habere duplices potissimum partes; unam *resinosam* quæ igneæ & calefacientis ac potenter attenuantis nec non aperientis est Naturæ, unde intus sumpta, sanguinem actuat, fundit, fervidiorem reddit & orificia vasorum aperit: alteram *terrestrem*, quæ cruditati & putredini resistit, exiccat, & oscula vasorum constringit & oblini.

Aphorismus II.

Purgantium medicamentorum usu, talia è corpore educenda, qualia sponte etiam prodeuntia juvant: contrario vero modo exeuntia sistenda.

Contentum seu Intentio.

De Qualitate & modo Purgantium.

Connexio: Cum Hippocrates in præcedenti Aphorismo docuisset quo tempore & necessitate, utero gerentes purgare conveniat, & de purgatione gravidarum in particulari locutus fuisset: In hoc præsentem autem nunc Aphorismo de Purgatione universali loquitur, & præceptum utilissimum tradit, Medico qua Naturæ modo imitatori modo Correctori, quando nimirum Natura sit imitanda & quando corrigenda. Duas ergo hic Aphorismus habet conclusiones & ideo in duas partes dividitur: In *prima* docet, talia esse

medicamentis purganda, qualia sponte prodeuntia juvant: In *secunda* docet, sistere ea, quæ sponte prodeuntia non juvant.

De hac materia quidem supra Lib. 1. Aphorismo 2. abunde egimus, sed magis diagnostice quam practice, hic autem sermonem nostrum potissimum ad Praxim dirigimus: Et revera hic præfens Aphorismus in multis differt à secundo Libri primi: *Primo* quidem quod noster Aphorismus, de materia quæ est in motu; ibi vero de materia in universum: *Secundo*: Hic de Purgatione solum, quæ cathartici auxilio peragitur, ibi de quacunque evacuatione sponte Naturæ promota: *Tertio*: Hic sistendum esse evacuationem eorum, quæ prodeuntia non juvant; at ibi solum ex conferentia ac tolerantia, bonam judicat operationem.

Dicit ergo in hoc Aphorismo, educenda esse talia è corpore artificialibus purgationibus, qualia sponte seu Natura proprio Marte, utiliter educit, & è contra talia etiam cohibenda esse, qualia Natura inutiliter id est sine Euphoria seu bona tolerantia sed cum detrimento ægri, seu alia ob his quæ peccant, expurgat: Si itaque juvat purgatio à Sola Natura instituta, etiam juvabit illa quæ ab arte instituetur; quare consulit hoc Aphorismo Hippocrates, Medicos in Catharticis Naturam imitari oportere. *Est autem imitatio* (inquit Galenus in Comment.) *tales in uno quoque morbo humores evacuare, quales novimus in spontaneis prodesse evacuationibus* Nomine vero talium & qualium humorum, intelligendi sunt in specie peccantes, id est biliosi, lymphatici, crassi seu pituitosi, tartarei seu melancholici, acres, acidi & alii, si fortasse plus justo superabundent.

Afferit Galenus exempla earum, quæ sponte fiunt, salutarium evacuationum, ex eodem Hippocrate desumpta, ut cum aqua inter cutem seu hydrope laboranti, & lippitudinem seu ophtalmiam, aut surditatem patienti, alvus solvitur; unde easdem evacuationes arte promovere, utile putare est, cum id peragatur, quod Natura sponte sua salubriter perficere consuevit, quamquam non semper ex voto succedere soleat.

Quoniam vero Hippocrates, sponte prodeuntibus, artificiales evacuationes, salutares ut eveniant, comparavit indefinite, Jure merito

merito hic dubitare licet, quid pro sponte prodeuntibus intelligere voluerit, cum & Criticis & symptomaticis illa aptari queant. Et quidem de Criticis res in confesso est apud omnes, quia per illas Natura, se ipsam à molestiis exonerat, & ægros à morbis vindicat: neque aliunde, Criticæ & salutare dicuntur evacuationes, nisi quia per ipsas morbi judicantur ac desinunt: At vero symptomaticæ tales non sunt, quibus non raro Natura plurimum elanguet, morbi ingravescent, & sæpe etiam mors subsequitur, cum tamen humores in illis sponte prodeant.

Quamobrem non videtur Aphorismus indefinite accipiendus de quibusvis sponte prodeuntibus, etiam symptomaticis. Hinc Fuchsius illum ita scribendum putat: *In usu medicamentorum purgantium, talia è corpore educere oportet, qualia etiam, si sponte prodirent, utilia essent*: ita ut sensus hic sit; talia è corpore esse educenda, qualia ubi sponte prodirent, utilia forent, id est, qualia à Natura ipsa utiliter cum Euphoria & tolerantia evacuarentur: Quo casu etiam symptomaticæ evacuationes salutare censendæ erunt, si ejus sint humoris, qui obest & nocet. Quocirca solent communiter dici *conferentes* in genere *causæ*, quia morbifica causa per ipsas minuitur: *Mala* vero in genere *signi*, quo significant humorum multitudinem, vel pravitatem, unde partes gravatæ, vel irritatæ evacuationem moliantur.

Quemadmodum autem purgationes ope medicamenti ab arte promotæ salutare & utiles sunt, si ejus sint humoris, qui peccat, & qui sponte Naturæ prodiret, si critice egereretur: ita è contra malæ & inutiles existimantur, si à catharticis medicamentis vacuentur, quæ non utiliter educeret: Quamobrem consulit Hippocrates illas esse cohibendas: Sic oportebit, fluentem immodice sanguinem & alvum ex hypercatharsi aut egestionem, alius humoris ab eo, qui educendus esset, firmare & cohibere, remediis in hanc rem plane specialioribus.

Unde autem Medicus conjicere possit, fore utilem vel inutilem, artificialem ejusmodi evacuationem, ut sinenda vel inhibenda sit, ab his quæ conferre vel tolerari probaverint, judicium sumendum esse admonet; utrum æger melius an deterius habeat; si

prius sinenda, si posterius, purgatio à Natura instituta prohibenda, artificialis autem præcavenda: Et licet Natura aliquandiu, bene & utiliter expurget, quia tamen ob irritationem limites bonæ operationis excedit, illa refrænanda venit, cum modum excedat. Neque tamen itidem, mox ad alia transeundum est, etsi sub principium in purgationibus & vomitibus, quædam, eaque graviora excitentur symptomata, tormina, rosiones stomachi & virium quidam languor, tum nempe Natura materiam peccantem & turgentem aggreditur & educit, dummodo cum tempore, omnia in melius mutantur; è contra si è bono statu omnia vertantur in deterius, manifesto indicio est, purgationem non fuisse criticam sed symptomaticam, cum in quali, quanto & modo excedat; prout ex sequenti Aphorismo clarius patebit, quem ideo Hippocrates subjungit, veluti istius appendicem.

Dices primo: In cholera morbo ubi bilis sursum & deorsum symptomatice movetur, & purgantia & vomitoria exhibet Galenus Ergo motus symptomatici non sunt prohibendi sed promovendi. *℞.* Id fieri ratione causæ morbi tanquam magis urgentis ratione cujus evacuatio in principio minime prohibenda est, si vero diutius perduret cum virium dejectione, amplius non licet.

Dices secundo: Natura quandoque in principiis morborum, materiam crudam educit cum tolerantia, sed hoc arte fieri non licet, teste Hippocrate, nam *concocta medicari oportet non cruda, neque in principiis morborum* Ergo Aphorismus non verificatur. *℞.* Natura materiam crudam educit cum Euphoria *simplicitur* nego, quia sic requiritur, ut materia sit concocta & per loca convenientia fiat: Educit *secundum quid*, ubi turget & per se ipsam exitum urget concedo: Ergo in hoc non est imitanda Natura nego consequentiam.

Dices tertio: Vomitus in principiis febrium per artem utiliter materia in ventriculo contenta instituitur; à Natura autem institutus, nocet, quia fit à Natura irritata. *℞.* negando quod vomitus in principio non æque utiliter instituatur à Natura, quam ab arte, quia sive à Natura sive arte fiat, fit cum causæ diminutione, & majus est commodum quod inde evenit, quam damnum ab irritatione profectum.

Dices

Dices quarto: Sudores in principio febrium instituuntur à Natura sed male Ergo etiam nec per artem licet. R. Non negamus quidem meliores esse sudores in declinatione, profunt tamen etiam secundum quid in principio, si materia turgeat, quia Natura per hoc sublevatur portione oneris sui.

Dices quinto: Evacuationes in Dysenteria non sunt utiles, & tamen non sunt cohibendæ ne lupus in stabulo includatur, Ergo non semper cohibendæ sunt, evacuationes inutiles. R. Evacuationes in Dysenteria non sunt cohibendæ statim à principio concedo: Postea nego. Hinc etiam in principio non sunt omnino inutiles, quia alios morbos v.g. epilepsias, febres &c. sæpe curant.

Dices sexto: Ubi natura bene agit, totum negotium est ipsi relinquendum, Ergo non opus est arte, ne actum agatur, aut turbetur. R. ubi Natura bene agit, est totum negotium relinquendum, in actu diviso nego, in actu composito concedo.

Aphorismus III.

*Si qualia oportet, purgentur, confert, & facile ferunt:
contra vero si fiat, graviter.*

Nota: Videatur Aphorismus 2. Sectionis 1. qui fere idem est.

Contentum seu Intentio.

De Medio Terminò Purgantium.

Connexio: Cum dixerit Hippocrates in priori Aphorismo, utile esse, in purgationibus arte promotis, talia educere è corpore, qualia sponte Naturæ prodirent; In hoc præsentì Aphorismo, Indicia tradit proficientis ejusmodi purgationis, desumpta ex eo, quod conferat; morbus remittat; & æger sufferat, cum vires, nul-

lum vel leve admodum detrimentum ab illa patiantur: Talis enim purgatio utilis est, utpote quæ malos humores educit, benignos vero intactos relinquit, neque in quanto quali aut modo peccat, causam quaecumque morbificam tollit & sic Naturam plus alleviat quam supprimat. Purgatio autem quæ contrario modo fit in utilis & valde noxia est.

Quamquam autem id ipsum fere totum docuerit Hippocrates *Lib. 1. Aphorismo 2.* ut propterea hic videatur inutiliter & frustra repetitus, non tamen eximendus, ut bene advertit Cardanus, nam ita nequitur præcedenti, ut oratio omnino mutila remaneret, si deesset: Sicut enim in evacuationibus ultroneis, utilitas certa & perseverans judicatur, si conferat & toleretur, cum scilicet talia egeruntur, qualia convenit evacuari; ita in evacuationibus, medica ope proritatis, emolumentum certo futurum conjicitur, si ea purgentur, quæ purgari oportet; & contra si talia sint educata, qualia erant educenda, certo quidem conferet & ager sufficeret, ut proinde vicissim se res habeat, ad utrumque. Qua sane ratione, ergo judico, facile his responderi posse, qui ausi sunt Hippocratem notare, quod tum hic tum *Aphorismo 2. sect. 1* nihil quidquam se dignum scripserit, sed Lippis & Tonforibus notissimum, ut fusius alibi notavimus; hoc unicum compendiose memoriæ commendamus, quod Medico, linceis semper oculis, causa morbi ante omnia indaganda sit, nam ablata causa tollitur effectus, id est morbus & hoc est primarium Medici intentum: Hac causa, si sit Cacochymia purgationem indicans, variis modis peccat: nunc enim est inipida, nunc acris, nunc tenuis & liquida, nunc crassa & viscosa, nunc amara, acerba, falsa, dulcis, nunc acida nunc alkalina, nunc fixa nunc volatilis: nunc in cavitate contenta, nunc partium substantiæ impacta; nunc medicamento facile cedens nunc difficulter; nunc in una nunc in altera corporis Regione contenta: Nunc biliosa vel serosa vel alterius vitii.

Impossibile autem est, ut unum idemque medicamentum, tot specie diversos humores educat (frustaneus enim alias esset, tot purgantium selectus) Exemplo res fiet clarior: ponamus v.g. humorem

morem peccantem esse calidum, tenue, facile mobile; si medicamentum purgans itidem sit calidum, acre incidens, violentum; purgabit quidem, sed plus nocebit quam conferet: Vel si humor sit frigidus, crassus, lentus, medicamentum vero dulce refrigerans insipidum, lene; itidem quidem purgabit, sed non cum Euphoria seu tolerantia, sed potius cum detrimento; *cum non expurgentur ea, quæ expurgari oportet*; sed relinquantur in corpore cum notabili detrimento; hinc causa morbi frigida, crassa, radicata, partibus impacta, victus ratio crassa & plena, habitus robustus, violenta desiderat medicamenta: è contra causa tenuis, calida, biliosa, in prima Regione fluctuans, victus tenuis, habitus tener suaviora exposcit: Nam

Non facit una bonum, sutoria forma Magistrum

Unica nec celebrem, forma facit Medicum.

Sunt & alii Scopi, pro quibus purgantia adhibenda, virtute quadam & proprietate specifica: Sic *elleborus niger* datur ad enervandum acidum melancholicum: *Colocynthis* ad solvendam lymphæ seu pituitæ gelatinam: *Gialapa* ad lympham seu serum fundendum: *Rhabarbarum* ad bilem ferocientem restringendam, & viscerum Atro-niam corrigendam: *Aloe* ad ventriculi aliorumque viscerum infarctus referandos, & restituendum depauperati sanguinis balsamum, excitandum sanguinem, & corrigendum in primis viis peccans acidum: *Tamarindi* ad enervandam bilis amaritudinem: *Cassia* ad diluendam concentratorum humorum acrimoniam &c.

Hæ Regulæ si à solerti Medico observentur, medicamenti purgantis effectus erit cum tolerantia & conferentia, quam 1. Aphorif. 25. pro bono purgationis signo proposuit Hippocrates, & fit, cum expurgatur illud, quod peccat, id est noxium, superfluum, à vitali consortio jam superatum, Naturæ inimicum; Succis vitalibus & balsamicis, à medicamento purgantis activitate, nequaquam perturbatis aut è corpore educitis: Hinc nullo negotio deducetur, neque conferre neque tolerari evacuationem humorum, qui utiles aut alibiles cum sint, nullatenus sunt educendi, sed potius graviolem noxam asferre, commotis nempe & exasperatis
his,

his, qui noxii sunt & morbum faciunt. Et hæc non modo Medicis, sed cuique homini notissima sunt, propterea longiori non egent explicatione.

Aphorismus IV.

Æstate superiores potius ventres, hyeme vero inferiores purgandi.

Contentum seu Intentio.

De Tempore Anni commodiore ad Emedica vel purgantia propinanda.

Connexio: Prosequitur Hippocrates coeptam de purgatione materiam, & cum in præcedenti Aphorismo, de humore peccante indicationem sumpsisset: In præsentī jam de Loco Purgationis agit.

Hic Aphorismus duas habet partes & conclusiones: In prima dicit æstate superiores: In secunda hyeme inferiores ventres esse purgandos statuit.

Videtur autem Hippocrates hoc Loco, sicuti *Libro de aëre Locis & aquis* Annum dividere in duas partes; *Æstatem* nempe & *Hyemem*: Et sic *Æstas* accipienda erit, à medio vere usque ad medium Autumnum: *Hyemis* à medio Autumno usque ad medium Ver. Alii malunt *Æstatem* intelligere, quæ fit in Summo *Æstu*, nempe ab ortu Vergeliarum seu *Plejadum* usque ad ortum *Arcturi*, vel à Solstitio, usque ad Caniculæ declinationem. *Hyemem* vero sumunt, quando summum viget frigus.

Per

Per *ventrem superiorem* ut dicit in *comment.* Galenus, *stomachum* magis æstate, hyeme vero per *inferiorem ventrem* seu *intestina* purgandum esse: Et rationem affert, *quoniam qui tunc superabundat humor flavus bilis est, & tota natura animalis, propter ambientem caliditatem, magis ad superiora movetur.* Hyeme vero potius prævalent, crudi, crassi, visceri, pituitosi, inertes, fixi, graves & in profundo delitescentes succi, partim ob continuum sanguinis refrigerium ab ambiente algore & frigore; partim ob frigidam aëris inspirationem; partim ob majorem ciborum ingurgitationem & ingluviem; partim ob reliquias ab autumno restantes; partim ob pororum constipationem & transpirationis defectum: quo tempore præfati succi sponte sua deorsum feruntur & tunicis intestinorum adhærent ut proinde ad superiora, obstante illorum gravitate, difficillime deduci possit, quamobrem melius dejectoriis ad alium ducuntur.

E Contra constat Experientia per Æstatem, calorem æstivum omnibus corporis nostri succis, bonis & malis, biliosis & serosis, non tantum particularem fluibilitatem & tenuitatem, sed etiam volatilitatem & igneam quasi proprietatem imprimere, qua mediante magis superiora quam inferiora versus inclinent: Et sic natura, Medicis curanti, digito quasi viam monstrat, eoducendam, quo ipsa vergit: Autopsia etiam docet, per æstatem os facillime amarescere, & ventriculum ejusque orificium superius ad vomendum sollicitari, sive quod fermenta illuc ex arteriis gastricis derivantia, acriora sint; sive quod sanguis ipse, acrioribus & quasi sulphureis particulis plus æquo redundans, in cystim felleam, easdem uberius deponat: Unde & urinæ per idem tempus flavescere magis soleant & fæces & cætera corporis excrementa pari colore inficiantur: quæ sane ex documento ejusdem Hippocratis, promptam & facilem pollicentur vomitionem.

Sed obstare sibi ipsi videtur Hippocrates libro de salubri victu docens, *sex hybernis mensibus vomere utile esse, nam & pituita plus, & capitis pravitas subest; In æstate vero clysmatum sit usus & superiores corporis partes per inferiores purganda.*

Id ipsum protulit Celsus lib. 1. cap. 3. vomitum indicens utiliore hyeme, quam æstate, hanc eandem proculdubio Hippocratis sententiam secutus; Verum licet plerisque visum sit, librum hunc non Hippocrati, sed Polybio adscribere, nihil tamen inde deducere, quod rationabiliter propositæ objectioni satisfaciat,

cum & Polybius gravissimus Author sit, neque vel sua ratione, vel experientia destituatur.

Neque vero satis facit Galenus distinguens evacuationes vel ad totum corpus spectantes, vel ad ventriculum solum ut propterea velit hunc Aphorismum intelligendum esse, de evacuatione totius corporis per superiora æstate promovenda, per inferiora hyeme: Effatum autem Hippocratis de *salubri diata* restringendum esse ad solius ventriculi exonerationem: quoniam sive æstas sive hyems fuerit, semper ac ventriculus humoribus gravatur, vomitu exonerandus est, exigente id loci conditione, & humoris expurgandi promptitudine, quippe qui compendiosiori via statim educitur.

Verum enim vero, quocumque humore ventriculus infarcitur, facilius plane per vomitum, quam dejectione exonerabitur, sive tempus æstivum sive hyemale sit, cum non à tempore, sed ab humoris evacuandi proclivitate & facilitate indicationes desumantur, ejuscemodi specialium egestionum. Quoniam vero humores, sub æstate plerumque ventriculum occupant, atque à depravatis ejusdem digestionibus morbos inferunt, unde eo tempore faciles, cruditates, nausæ, oris amaritudines: Propterea fit, ut promptius per vomitum egerantur. Faciunt in idem esus fructuum immoderatus, gelidæ potationes, balneationes, & cætera his similia, quibus plurimum ventriculus elanguet, & impuritatibus oneratur. Hinc compertum habemus cunctos propemodum morbos æstate vagantes ab uno ventriculo crudis humoribus oppresso exoriri, ut propterea vomitus opportune concitatus, momento veluti gravissimis cæteroquin morbis remedio sit. Sed & neque absolute dixit Hippocrates, æstate per superiora solummodo purgandum, etenim usus est comparativa voce *magis*, quasi dicere voluerit, plerumque æstate per vomitum, vitiosos humores esse educendos, quoniam isti plurimum primos ductus gravare solent, aut circa ventriculum stagnare. Quod si fortasse alibi resideant, per alios ductus erunt evacuandi, quo nimirum illi vergere videbuntur, modo loca ipsa sint conferentia. Ita quoque si hyeme ventriculus, biliosis ut vocant succis, scateret, non inferne sed superne vacuandus foret, nulla habita ratione temporis, sed tantum loci, præternaturam expleti, & prompte per superiora exonerandi: quia tamen hyeme crassi humores, infestina sæpe

occu-

occupant, inde fit, ut facilius deiciantur, cum difficile admodum foret, inverso intestinorum motu per ventriculum illos protrudere & per os expurgare, idque non sine gravi periculo. Cur autem humores vitiosi plerumque in hyeme, intestina vel glandulas mesenterii occupat, ratio peti potest, non tantum ex eorundem, qui sæpe sæpius crassi & viscosi esse solent conditione, sed & potissimum ex tardiori secretionem quæ tunc peragitur: Sicut enim æstate ciborum digestio seu dissolutio in ventriculo languet, & tarda est; Secretio vero in intestinis celerrima fit, sive à fermentorum acredine, sive à laxitate viarum: Ita vice versa ciborum confectio, hyeme in ventriculo citior est, cum ventres hyeme & vere natura calidiores ab Hippocrate dicantur, at vero secretio & distributio tardior, unde etiam alius adstrictior evadit, & pulsus eo tempore rariores fiunt. Accedit quod somni longissimi per hyemem adjuvant coctionem; Vigiliæ & motus per æstatem faciunt distributionem, ut proinde mirum non sit, cur humores excrementitii æstate potius ventriculum occupent hyeme vero intestinis & glandulis mesenterii restagnent; quam obrem illi per vomitum, hi vero per dejectionem facilius educuntur.

Atque hinc modo contradicentia Hippocratis loca facile erit in unum, & concordem sensum revocare: Etenim ideo hyemali tempore vomitum commendavit, quia ventriculum multa pituita repletum existimat, ut clarius ejus latinus interpret Celsus expressit; siquidem non à tempore sed ab humore ventriculum occupante, indicatio vomendi desumitur, quare sive æstas sive hyems sit, parum refert, dummodo locus vomitioni paratus videatur.

Quod autem putaverit Brassavolus vomitum æstate commendatum, ad inaniendos superiores ventres, caput nempe & Thoracem: revera nec Hippocrati, nec rationi aut experientiæ cohæret. Hippocrates siquidem in diversis capitis morbis, alui subductionem consulit, non vomitum, ut in surditate, oculorum dolore, & aliis id genus; quin & Galenus *in comment. hujus*, non nisi de ventriculo solum aphoristicam hanc sententiam est commentatus. Ratio vero tantum abest, ut suadeat Caput & Thoracem per vomitum inaniri, ut potius expansa, repleantur, & graviter ab impetente ventriculo afficiantur; unde vomitus in affectibus oculorum & pectoris, omnium

sensu, tamquam nocivus reprobat. Experientia denique pluries constitit, in harum partium morbis, plurimum vomitum obfuisse & quibusdam, sputum sanguinis, aliis oculorum inflammationem, & vehementissimum capitis dolorem attulisse, ut propterea nemo sit, qui in praxi audeat, vomitoria à partium superiorum præscribere, nisi tantum cum illi laborante ventriculo proficiunt, à cujus levamine illæ confanescant.

Ventres corporis humani, vulgo à Medicis tres statuuntur Caput. Thorax. & Abdomen. Caput humeris terminatur: Thorax septo transverso: Abdomen à costis ultimis atque ad Pubem.

Dices Bilis naturaliter vergit vel intestinum duodenum per meatum cholidochum ergo illuc ducenda est, quia quo natura vergit eo ducenda. *R.* Non negamus inclinationem bilis ad intestina, at tamen quando regurgitat ad ventriculum, ut sæpissime fit in Pichrocholis, tunc evacuanda est per vomitum, tamquam breviorē viam. Inclinatione autem illa, non tam est ab ipsa bile quam à natura agente, ut in textu diximus.

Dices 2. Hippocrates dicit, per revulsionem curam esse tutissimam, ergo bilis tutius ducetur per inferiora quam vomitum. *R.* Hippocratem intelligendum esse de revulsione per venæ sectionem, in partis alicujus inflammatione, non de purgatione, vel vomitu.

Dices 3. Æstate ventres sunt frigidiores, sicut hyeme calidiores ut vult Aphorismus, ergo in æstate bilis minus generabitur. *R.* Negando consequentiam; bilis enim in æstate magis ab externo calore quam interno causatur.

Dices 4. Sub cane & ante canem difficiles sunt purgationes ut dicit sequens Aphorismus 5. ergo in æstate circa canem non erit purgandum per superiora. *R.* Sub cane & ante canem difficiles sunt purgationes, in corporibus Eufarchis & bene habentibus concedo, in cacochymicis & male habentibus nego, necessitas enim non habet legem.

Aphorismus V.

Sub cane & ante canem difficiles sunt purgationes (seu medicationes.)

Con-

Contentum seu Intentio.

De Purgatione sub diebus canicularibus.

Connexio: Cum in præcedenti Aphorismo Hippocrates dixisset quo anni tempore per superiora, & quo per inferiora purgandum foret: In hoc præsentī Aphorismo, affert tempus quo purgare, non usque quaque consultum est, nempe *sub cane & ante canem*.

Hic Aphorismus ob summam brevitatē divisionem non paritur. Quantum autem opportunum tempus conferat in purgantibus medicamentis adhibendis, ut subinde conducant, & sine ullo incommodo utiliter ferantur, non tantum hic, sed alibi sæpius inculcavit Hippocrates, speciatim autem *Lib. de aëre, aquis & locis*, illorum usum inhibuit, in magnis temporum mutationibus, itemque in solstitiis & æquinoctiis: considerandos quoque voluit in errantium astrorum exortus, præcipue *canis & arcturi & Pleiadum occasum*: Unde non minimam partem conferre ad rem medicam Astronomiam censuit, tum in prænoscentis tum in curandis morbis, ut vix errare Medicum posse asserat, qui stellarum congressus præsentire & observare didicit.

Apprime igitur in hoc Aphorismo quoque difficiles & molestas admonet futuras purgationes, *sub cane & ante canem*: quod etiam docuit *Lib. de medicament. purgant. in fine*, inquiens; *tempore æstatis à canis ortu, per dies quinquaginta vitare oportet, & non dare medicamentum, sed infusis per Clysterem uti*. Quia ex Galeno in comment. hujus Aphorismi, exusta tum, inquit, nostra natura, eam, quæ à medicamentis purgantibus existit, non fert acritudinem: quare & pluries purgati, hoc tempore incidunt in febres, & natura ex æstu imbecillis, magis ex purgatione dissolvitur: & quidem purgatio hac mala fiet, cum calor aëris ambientis in partem trahat extrinsecam, contrariam ei ad quam Medicina ducit humores.

Quod nam autem sit ejusmodi temp⁹ *sub cane & ante canem* est dignū inquisitione: verum oportet scire ex Astronomia, duos affigi firmamento *Asterismos canis* nomine appellatos, quorum alterum *canem majorem*,

alterum *minorem* faciunt. Ambo sunt in Plaga Australi extra Zodiacum, sed *minor* ab æquinoctiali declinat ad Boream, *major* vero ad Austrum. Asterismo *canis minoris* ad femur appingitur stella primæ magnitudinis fulgidissima, quam Ptolomæus in *Almagesto* stellarum pulcherrimam appellavit, quod ob magnitudinem & splendorem præ cæteris longe admodum micet, atque scintillet; Hæc vero per dies decem circiter post Procyonis ortum, ex Horizonte cum sole emergit. Cum igitur dixit Hippocrates *sub cane* tempus illud intelligendum voluit, quo *Sirius & canis major* viget, sive cum sole cosmice oritur; *Ante canem* vero tempus quo Procyon exortum Sirii præcedit.

Sed non bene convenit inter Authores, cuinam cani, nomen *canicula* proprie tribuendum: Equidem si vocem ipsam attendamus, videtur convenire *cani minori*, quem pro canicula usurpant tabulæ plerorumque Astronomorum: cui sententiæ quoque favet Horatius Lib. 3. Ode 29. dicens

- - - jam Procyon furit
Et stella vesani leonis,
Sole dies referente siccos.

Multo clarius Plinius Lib. 18. Cap. 28. inquit: *Ægypto vero Procyon matutino æstuosus, quod Sydus apud Romanos non habet nomen, nisi caniculam hanc velimus intelligi hoc est minorem canem, sane ut Astris pingitur.*

Bayerus in sua *Uranometria* utrumque canem vocat *caniculam* quod & alii faciunt. At multo plures sunt, qui *canicula* nomen *Sirio* attribuunt, & inter cæteros Astronomi, qui propterea caniculares mutationes cani majori & Sirio adscribunt; unde Manilius *Astronomic. 5.*

Cum vero in vastos surgit Nemeæus hiatus,
Exoriturque canis, latratque canicula flammæ
Et rapit igne suo, geminatque incendia solis.
Qua subdente facem terris, radiosque movente
Dimicat in cineres orbis, fatumque supremum
Sortitur, languetque suis Neptunus in undis
Et viridis Nemori sanguis decedit & herbis &c.

Quamquam Galenus 1. *Epidem. Comment. 1. Constit. 1.* de Sirio hæc

hæc habet; *Hunc aliqui nomine abutentes, totius Syderis canem etiam nominant: atqui cani universo Syderi est nomen; illi vero quæ in ejus est mandibula, canicula, quam recte anticanem, non canem appelles.* Idemque indicatum legimus ab Arato vetustissimo Poëta dicente

Ætheriæ canis ille Plagæ, cui plurimus ardor

Æstuat in mento:

Et mox:

Qui formidato sub nomine Sirius æthram

Urit, huic rutilos si sol adflexerit axes,

Quantus corporibus, quantus labor imminet ægris.

Quo insuper tempore, uterque canis oriatur, licet aliter, aliterque apud veteres scriptum sit, nostris tamen temporibus Cosmicus ortus Sirii incipit initio Augusti, Procyonis vero ad diem 24. Julii. At si ortum Heliacum spectemus hujus accidit tertia idus seu 30. Augusti; illius vero 17. Calendas id est 16. Septembris. Tempore autem Hippocratis, annis ante Christum natum 400. & in quarto Climate, quod per Rhodum insulam transit, ortus Caniculæ referebatur ad pridie Idus id est 12. Julii. Et tempore Avicennæ, id est Anno Christi millesimo centesimo circiter ad 16. Calendas id est 17. Augusti, idque fortasse ex Plinio Lib. 2. Cap. 47. qui ad dies 15. ante Calendas Augusti adscribit. Et clarius Lib. 18. Cap. 28. decima sexta Calendas, id est 17. Augusti, *Affiriæ Procyon exoritur; deinde postridie, fere ubique confessum, inter omnes, sidus indicans, quod canis ortum vocamus, sole partem primam Leonis ingresso: Hoc fit post solstitium 23. die:* Et rursus, Cap. 29. *Pleniluniis nocet ad 4. Nonas id est 2. Julii, cum Ægypto canicula exoritur vel certe 16. calendas id est 17. Augusti.* Circa idem tempus illam oriri testatur quoque Ptolemæus Lib. de inerr. stell. At vero Maginus anno Domini millesimo sexcentesimo ad altitudinem Poli graduum 45. ortum caniculæ cosmicum, accidisse scribit 4. Nonas id est 2. Augusti. Et Argolus Romæ anno millesimo sexcentesimo quadragésimo tertio ad pridie Calendas id est 31. Julii. Verum tamen variat semper illius ortus, non tantum pro varia locorum latitudine & Poli elevatione, verum etiam quia stellæ fixæ, ex acuratissimis observationibus *Tychonis* & cæterorum Recentiorum Astronomorum, quotannis in ortum, secundum signorum ordinem feruntur.

Nume-

Numerus dierum canicularium varius adhuc dicitur ab Authoribus. Idem Argolus ad dies duntaxat 26. contrahit, nempe à die 23. Julii (cum sol ingreditur amplitudinem orbis lucis Sirii) ad diem 18. Augusti. Manginus protrahit ad dies triginta: Keplerus ad 35. vel 40. At vero Hippocrates ad 50. dies produxit: hinc ad idus usque id est 13. Septembris, ex mente ejusdem purgantia medicamenta, veluti toleratu difficilia ac molesta, in plerisque Regionibus vitanda erunt.

Num insuper ex solo hujus temporis æstu immoderato existimaverit Hippocrates, difficiles & molestas futuras purgationes, an etiam ex peculiari Astrorum vi, atque influxu, nolim ego determinare; quippe ex una parte, non solum fervida hæc, atque æstuosa tempora, vitanda is monuit, sed etiam temperata, cujusmodi sunt æquinoctia, itemque occasus Arcturi & Pleiadum per Autumnum contingentes; quamobrem non à solo aëris calore, molestiam purgantium deducit: Ex altera vero parte non levis ratio suppetit ex Galeno superius adducta, quam latius sunt prosecuti Fuchsius & Cardanus hoc loco, quod eo tempore natura imbecilla sit, corpus exsiccum & excalesfactum, atque humores sponte sua ad habitum corporis ferantur per sudores, ut propterea non tuto ad interiora duci possint, nec ambobus inter se pugnantibus natura distrahatur, aut penitus dissipetur. Expertum quoque dicitur in caniculæ exortu, solem cæteroqui à vertice declivior, urentiorem, & molestiorem persentiri: quin imo scribit Plinius *Lib. 2. cap. 40.* maria, ex oriente Sirio, plurimum fernere, fluctuare in cellis vina, stagna moveri, canes in rabiem agi, apes uberrime mellificare, et eas ventos spirare, aliosque plures effectus sane admirandos in terra percipi, qui non aliunde quam à vi, atque influxu speciali hujus Syderis proficisci posse videntur.

Sed ut verum fatear, non video qua ratione, tot actanta caniculæ & Sirio tribuantur, quæ in nostris Regionibus, vel nulla sunt, vel potius soli, quam ipsi debentur: Ea enim longe admodum à nostro vertice distita est, amplitudinem habens ortivam perquam proximam Tropico capricorni, unde vix gradibus 33. supra Horizontem assurgit, & tum potissimum à sole remotissima fit. Sed & quibus illa in vertice est non calorem, sed frigus affert, quo tempore cum sole
cosmi-

cosmice exoriens, nobis sub zona temperata degentibus æstum con-
geminare putatur, quippe tum illis hyems est. Quod si in erranti-
bus stellis quidpiam virtutis erga nos unquam inesset, profecto id
foret potius conferendum, Regulo, Basilisco, seu cordi Leonis, stel-
læ primæ magnitudinis, de natura quoque martis, quæ tum juncta
soli, signum ipsum Leonis peragranti, per idem tempus supra Hori-
zontem emergit, Coelum mediat, & iterata circuitione revolvitur.
Attamen negari non potest, maxime tunc etiam in urentiorem æstum
conferre, majorem in aëre vaporosiori refractionem. Compertum
enim habemus aërem etiam in nostris Regionibus, per hæc eadem
tempora, vaporibus fieri confertiolem; unde radii solis, etsi aliquan-
to decliviores, ad tellurem trajecti, uberrime, velut ex vitro ustorio,
colliguntur & quodammodo exurunt. Hinc quo die caliginosum
aërem antelucanis vel vespertinis horis prospicimus, æstum longe
admodum urentiorem futurum prælagire solemus, quem mox per
diem experimur. Fieri autem per hæc tempora aërem vaporibus
confertiolem, ipse crediderim, ejusdem solis vi, qui è Ter-
raqueo Globo, in hiatus potentissimos dehiscente, innume-
ros & varios vapores elicit, cumque hi per noctem, nequeant
deinde discuti, nec præ sui tenuitate, in pluviam concrefcere,
per circumambientem propterea aërem dispersi, neque mul-
tum à tellure sublimati, iusta distantia, collectos solis radios,
arctissime in nos transfundunt, & ad igneum pene ardorem
iterum iterumque conduplicant. Hac ergo de causa fit, ut ma-
ne & ante solis exortum, non leve frigus perſentiamus, inter-
diu vero exæstuemus: Hinc etiam est, cur per hoc idem tem-
pus tam perniciosæ apud quosdam sint locorum mutationes,
quippe aër tum quoque ex hiantē tellure, variis & multige-
nis evaporationibus inficitur, quæ non minimum officiunt re-
ſpirationi, & sanguini per pulmonem circulanti, & nisi per
ingentes, & iteratos imbres, aut à flante Borea, aër omni-
no repurgetur, exitioſas ægri tudines minatur, ut alibi di-
ximus. Dixit autem Hippocrates *sub cane & ante canem*:
non vires sed tempus potius, exortus utriusque designans,
cum nimirum ea accidunt, quibus aër æstuosior fit, & corporum ha-
bitudi-

bitudines adeo afficiuntur, ut purgantium medicamentorum vim & commotionem sufferre nequeant. Quoniam vero Hippocrates de tempore ortus utriusque canis expresse hoc Aphorismo meminit, plane audiendi non sunt, qui existimant, *sub cane* illum voluisse oppositum tempus ortus canis designare, atque adeo hyberni solstitii, & intensioris frigoris dies referre: quamquam & hoc etiam tempus importunum Galeno videatur *Lib. quos, quibus & quando*, purgantibus adhibendis, cum tunc quoque difficiles & molestæ admodum contingant purgationes, quod humores, non tam sint ad exitum parati, nec viæ laxæ aut expeditæ: id enim licet verum sit, non tamen menti Hippocratis hoc in Aphorismo cohæret, cui solum de tempore ortus Sirii & Procyonis meminisse in animo fuit. Verum enim vero non omnino cavenda dixit tempora, vigentis utriusque canis in usu purgantium medicamentorum, sed solum per ea tempora, purgationes difficiles & molestas, id est, non facile tolerabiles, accidere. Siquidem illa dicitur ab eodem salutaris evacuatio, quæ confert & toleratur, modo hæc minime videtur sufferri posse in diebus canicularibus ex antea traditis. At si morbus talis per hæc tempora contingat, quæ exigat purgationem, profecto illa adhibenda, quoniam potissima indicatio agendi in morbis, non quidem à temporibus sumitur sed ut sæpius diximus, à causis morbificis, atque ab his, quæ intra corpus sunt, non extra. Sic apoplecticos, hydropicos, colico dolore vexatos, aliosque, tempore caniculari graviter affectos, absque ullo metu æstus aut caniculæ, communiter in praxi, cathartici curare adnituntur, ad humoris vitiosi expulsionem: Idque eo facilius & securius præstari solet, in nostris Regionibus in quibus sæpe numero, longe temperatiorem, imo nonnunquam rigidiorē, ac ipso veris tempore, aërem experimur.

Quamobrem hunc Aphorismum potius servandum interpreta-
bimur in his, qui ab imminentibus se tueri, quam à præsentibus mor-
bis vindicari satagunt, & potius in corporibus sanis vel neutris, quam
in morboſis, quæ morbo laborant, cathartici usum exoptulante;
Etenim de his, qui adhuc sunt sani, sed ægri futuri sunt scripsit Hippo-
crates 6. Aph. 47. *quibuscumque venæ sectio, vel medicatio convenit, hos
vere purgare, vel venam incidere oportet*, ad præveniendos imminentes
per æstatem morbos, ut fuse Galenus explicat *in comment. ejusdem*

Apho-

Aphorismi. Quod autem hos memoret Hippocrates, qui per medicamenta purgantia se tueri cupiunt, manifeste declarat Galenus hoc loco inquiring; *quare & plures purgati hoc tempore incidunt in febres, & natura ex æstu imbecillis, magis ex purgatione dissolvitur.* Si enim timor est ne incidant in febres, procul dubio de non febrientibus & morbosus sermo est habitus.

Non autem hætenus dicta, de caniculæ exortu solummodo sed & de omni syderum vehementi mutatione, ut supra innuimus, intelligenda, & in eadem, magna remedia fugienda sunt, unde scripsit Hippocrates *Lib. de aëre & aquis*, vitanda esse *æquinoctia & solstitia* per dies decem ante & post, nec per illa tempora aliquid moliendum, nisi urgeat necessitas. Imo non solum ad tempora sed & ad Regiones traducenda est Aphorismi sententia, quippe calidissimæ & frigidissimæ medicamenta difficile ferunt, Neque pariter solum de medicamentis purgantibus intelligendus Aphorismus, sed etiam horum exemplo, de aliis magnis remediis, venæsectione, ustione, sectione aliisque id genus.

Dices 1. Hollerius ait, nullum tempus esse salubrius canicularibus, quia morbi, mense Junio & Julio nati sub canicula solvantur, ergo Aphorismus non subsistit. *R.* Hollerium intelligendum esse de canicularibus ab Etesiiis perflatis, non vero de æstuantibus, & hoc ipsum jam in textu diximus.

Instabis Ergo flantibus Etesiiis, etiam in canicularibus licebit magna medicamenta præscribere, quod est contra Aphorismum. *R.* Concedo totum, quia nec obstat nimius calor, nec corporis debilitas &c.

Dices 2. In maxima hyeme & frigore sæpius & purgationes & venæsectiones instituuntur, maxime tum adest gravis cacochymia vel Plethora. Idque etiam fit in æstate ergo non sunt inhibendæ. *R.* Necessitas non habet legem sed tamen, etiam urgente necessitate, ea cum magna circumspectione adhibendæ.

Dices 3. In canicularibus natura vergit ad sudores ergo per sudores & non purgantia aut alia est medicanda. *R.* Si natura ipsa cum Euphoria id præstet, relinquenda si vero prævicarie & symptomatice agat, neque arte irritanda, neque per se relinquenda in violento opere.

Aphorismus VI.

Graciles & ad vomendum faciles, per superna, purgare oportet, caventes hyemem.

Contentum seu Intentio.
De dispositis ad vomitoria.

Connexio: Apprime conjungitur hic Aphorismus cum superioribus: nam cum de indicatione locutus esset, quæ à tempore sumitur, ad locum purgationis eligendum, seu per quas partes corpus esset expurgandum: In hoc Aphorismo indicationes desumit à corporis habitu, & facili vel difficili inclinatione ad vomendum vel purgandum.

Hic Aphorismus, ob summam brevitatem divisionem non patitur.

Quemadmodum ergo in præcedentibus Aphorismis de temporibus aptis vel ineptis ad vomitum aut dejectionem egit, ita nunc de corporibus, & illorum habitudinibus verba facit. Et primum *graciles ac facile vomentes* considerat, quos ait per superiora purgandos esse. Pro gracilibus autem non intelligendi sunt tabidi, & qui ex morbo graciles evasere seu qui ad ptyſim vel sputum sanguinis dispositi, vel effectiva ptyſi jam laborant; nam de his agemus *Aphorismo octavo*, sed qui obesi & carnosæ naturæ non sunt. Neque eos qui longis morbis, laboribus & vigiliis exhausti. Plerumque autem graciles istiusmodi solent esse *Picrocoli* vulgo Biliosi & Cholerici, ut advertit *in Comment.* Galenus quibus venæ & arteriæ latæ sunt, sanguis tenuior & acrior ac stomachus atque os ingenti amarore suffunditur, qui proinde ob salinam acrimoniam ad nutritionem & appositionem aliti, minus est habilis, sanguine dulciore & modificato: quod ita declarat Poëta:

Bilis & ira suum consumunt tabida corpus:

Impinguant corpus, somnus & unda suum.

Igneæ vis bilis est, sævumque liquescit ab igne:

Phlegmatico contra, frigore stagnat adeps.

Cogno-

Cognoscuntur autem facile tales graciles & extenuati atque ad Phtisim proclives, ad vomitum autem periculosi, quod scilicet iis lymphæ, eaque solito acrior, vix non quotidie ad partes pectoris destillet, tussim sæpius vulpinam exirritatione procreet, color faciei lividus & pallidus, à cibo vero assumpto & elevatis inde vaporibus rubicundus, collum longum, tenue, anserinum cum gutturis prominentia, pectus angustum & breve, scapularum instar alarum, ita & claviculæ per modum arcus prominentia. Hos ergo ab emeticis cavere summe expedit, ob periculum convulsionis, & inanitionis, unde quaque periculum minitantis: Nemo medicorum ignorat consensum (mediantibus musculis, nervis & membranis) qui inter tussim & vomitum in praxi passim observatur: quippe tussibus violentis aut inveteratis, sæpius succedunt vomitus, & rursus, ipsos vomitus tussicula quædam, vel præcedit vel comitatur; quorum ope & motu violentiori concussivo, pulmonibus & pectori violentia infertur, idque cum summo ruptionis vasorum periculo.

Non autem solum satis est, à natura esse graciles, nisi etiam faciles sint ad vomendum, siquidem multum valet promptitudo loci, & facilitas, seu dispositio humoris, sponte sua vergentis, ad supera: tales autem observantur, qui breve collum habent, Thoracem latum, & Pylorum ex irritamento protinus se invertentem excoarctatione fibrarum circularium: Anatome quippe expertum est, vomiturientes sortiri, cholidochum ductum recta pergentem in pylorum, quo bilarius succus superabundans facile irruit & vomitum concitat. Itaque quando hæc omnia plerumque concurrunt in gracilibus, merito per superiora illi purgandi erunt. Adjicit tamen Galenus adverbium *magis*, nam magna ex parte, inquit, graciles sunt biliosi. Quod si gracilitas talis sit, qualis in melancholicis corporibus esse solet, quia in illis etiam desunt conditiones mox memoratæ, jure merito tamquam inepta (sicut de gracilibus extenuatis diximus) ad vomendum excluduntur ab eodem Hippocrate Aphorismo nono infra explicando.

Verum unde oriatur aut accidat gracilitas ista corporibus curiosum est inquirere? At, qui consideraverit, partem sanguinis glutinosam & albicantem, in animalibus obesioribus, & mole & virtute plurimum valere, tenuem vero & dilutam

nimis esse in gracilibus; Plane causam utriusque inveniet; quæcunque enim animalia sunt obesa & multo adipe scatentia, sanguine quoque abundant glutinosiori, qui facile partibus appingitur & hærescit pro nutritu; quæ vero macilentia sunt, modica glutine donantur, eoque plerumque dilutiori, ut propterea concreescere non satis fit, & in augmentum partium adhiberi.

Hac eadem ratione contingit, senes sensim extenuari, & contabescere, marasmo ut vocant frigido, quoniam sanguis in ipsis, ætatum progressu, tenuior atque dilutior fit, & si fortasse concreseat, potius à crudo & inutili phlegmate crassescit, quod partibus gravamen esse solet. Contra vero pueri, sanguinem sortiri consistentiorem & glutine abundantem, in dies incrementum suscipiunt, atque ad trianam dimensionem vegetant.

Verum tamen est, quod licet gracilia corpora, nacta sint sanguinem multo glutine non saturum, adeoque illa modice nutriantur & crescant, solent nihilominus esse vegetiora & validiora, quippe quæ sanguinem habent acriorem, floridiorem, multisque spiritibus refectum, quo sane privantur obesa; sed & venæ quoque ac arteriæ in his observantur magis exiles, quæ tamen latiores sunt in gracilibus, unde & pulsus in illis fiunt tardiores & minus validi, in his vero crebriores & vehementiores; quin imo dixit Hippocrates 2. Aph. 44. Natura admodum crassos citius interire, quam graciles, cuius rationem reddens Galenus *in comment.* inquit, *Angustæ enim sunt horum arteriæ & venæ atque ob id paucum omnino sanguinem habent, spiritumve, adeo ut cum ætate processerint, cito ipsis, vel parvam ob causam, calor natus destruat.*

Quoniam ergo gracilia corpora, tenuiorem habent sanguinem felleum humorem plus justo cumulant, qui delatus, ut dictum, ad pylorum, facilem in illis vomitum excitat; cumque bilarius iste succus, quodammodo etiam conferat excrementorum per alvum expulsionem, ne ista magis hyeme impediatur, quæ tardior per id tempus esse solet, proinde consulit Hippocrates, *cavendum hyeme.*

Præterquam quod eo tempore bilis iners esse solet, vel saltem à congestionem excrementi mucosi, ex tardiori distributione, emergentis, plurimum retusa; quamobrem satius erit, per eadem tempora alvum, si oportuerit, subducere, & tardas ipsius egestionem promote.

movere, crassos itemque succos & in plicis intestinorum impactos, detergere & expurgare. Sed mirum est, quod Celsus exactissimus sententiarum Hippocratis compilator, in hac re tam clara, atque ab omnibus recepta illi contradicere videatur, cum asserat *Lib. 1. Cap. 3.* vomitum gracilibus, & imbecillum stomachum habentibus inutilem esse, utilem vero plenis & biliosis omnibus, si vel nimium se repleverunt, vel parum concoxerunt. Sed recte utrumque conciliat Fuchsius, Celsum interpretatus, de gracilibus, qui vi morbi sunt extenuati, ac ventriculum languidum & humoribus vacuum habent. Si enim is vomitum utilem esse ait, plenis & biliosis omnibus, profecto graciles intelligit tabidos, exhaustos, viribus exolutos.

Illud tandem erit advertendum, tunc graciles & facile vomentes, per superiora purgandos, cum morbo laborant, purgationem indicante atque per vomitum opportunius: Etenim in omni evacuatione necesse est primum quod exigit in esse; mox etiam abesse quod repugnat, ut illa convenienter instituat, simulque conferat & toleretur ab agrotante.

Quæres Utrum magis debilitet, an vomitus an dejectio? *R.* Vomitum in ipsa operatione, magis affligere, at infernam purgationem, post operationem.

Dices 1. Graciles & biliosi omnes sunt faciles ad vomitum, ergo non opus fuit addere illud & facile vomentes. *R.* Cum Fonseca, hominem dupliciter esse biliosum, vel ad inferiora, scilicet ad ventrem, vel ad superiora ut sunt Pichrocoli quibus bilis ad ventriculum fertur; primi commodius per ventrem secundi per vomitum purgantur.

Instabis: In obesis & corpulentis videtur minus esse periculum à vomitu, quam in gracilibus, quia in omnibus sunt robustiores & firmiores. *R.* Nego suppositum, non enim intelligit hic Hippocrates, extreme graciles & extenuatos, ut diximus, sed mediocriter tales, unde nullum periculum emergit.

Dices 2. Videtur à multis in Phtificis vomitus concedi, eo quod minus à vomitu quam à tussi offendantur, quia tussis est depravata actio pulmonum, non autem vomitus, qui est proprius ipsius stomachi. *R.* Nullam hic esse contradictionem, quia non plane extenuatis

aut

aut heceticis vomitus conceditur, sed ut cumque bene se adhuc habentibus, id est aliququaliter carnosus.

Aphorismus VII.

Vomentes vero difficulter, & mediocriter carnosos, per inferiora, caventes æstatem.

Contentum seu Intentio.

De Indispositis ad vomendum.

Connexio: Cum contraria juxta se posita magis elucescant sic hic Aphorismus cum præcedenti, tamquam omnino contrarius, seu contraria ejusdem pars conjungitur: In priori egit de gracilibus, hic agit de carnosus; ibi egit de vomitu; hic de purgatione, qui motus sunt contrarii; ibi hyemem exclusit, hic æstatem.

Hic Aphorismus ob brevitatem suam etiam divisionem non patitur. Quemadmodum ergo facile vomentes ad vomitum inducendi sunt, ut in ventriculum irruentes egerant humores; Ita vomentes difficulter illum cavebunt; ne periculum dilacerationis venarum incurrant, potissimum in Thorace; aut lypothimia aut motus convulsivi succedant, & filum vitæ præscindant. Quod si præterea carnosus sint, adhuc magis periclitabuntur, ob nimiam ventris compressionem, renixum musculorum & vasorum exilitatem. observat enim Fuchsius, non temere adjectum esse *mediocriter* græce μέσως, quoniam qui mediocriter carnosus sunt, mediocri habitu corporis præditi, meliori fruuntur sanitate, & quandoque optima, quamobrem nulla evacuatione molestantur ut dicitur 2 Aphor. 36. & 37. cæterum omnino pingues seu nimis obesi, inepti sunt vomitioni, scatentque humoribus pituitosis & tenacibus, hærentibus potissimum in glandulis mesenterii & intestinorum, qui proinde dejectoriis potius, quam vomitoriis educi possunt, juxta Poëtam

Incolit infernum caro, daemon mundus: & hinc est,

Quod caro cum succis, inferiora petat.

Vel juxta illud:

Si pinguis venter, purgat Medicina libenter,

Si pinguedo perit, tunc Medicina ferit.

Additur

Additur postremo cavendo æstatem: & quidem non tantum ex nuper traditis, verum etiam quia carnosus & obesus à purgantibus medicamentis facillime eliquantur & sanguis in illis funditur usque ad hypercatharsim, si præsertim medicamenta sumantur validiora, ut deducitur ex Galeno *Comment. 36. & 37. mox memorati Lib. 2. Aph. 36. 37.* cum & per æstatem ejusmodi corpora multis, & abundantibus sudoribus perfundantur. At quamquam cavendam dixerit Hippocrates æstatem, non tamen reliqua anni tempora prohibuit, quæ alibi tutiora & convenientiora promulgavit.

Dices 1. Nec hic nec præcedens Aphorismus à practicis observantur, siquidem facile vomentibus carnosus & obesus, quovis tempore vomitoria porrexerunt, & graciles etiam æstatis tempore per inferiora purgarunt: Imo Argenterius dicit, hos duos Aphorismos cum rudi Medicina natos esse. *R.* Nec nos nec alii in modice carnosus & obesus, ita & modice gracilibus, ut in textu diximus, omnis vomitus in hyeme, vel omnis purgatio in æstate prohibemus, sed tantum caute & cum circumspectione faciendam. *R.* 2. Argenterium mordacem alias virum quod attinet, ejus dictum nullius momenti est, cum hi Aphorismi, eodem tempore nati sint, quo alii, & alii non fuerunt nati, cum rudi Medicina, ergo nec hi.

Dices 2. Hippocrates dicit: nec *sani* nec *cacochimici* sunt expurgandi, ergo nulli sunt expurgandi, siquidem *sani* inquit, *exolvuntur sicut & malo utentes succo.* *R.* Quod *sani* non sint expurgandi, certum est, nam *sani non egent Medico*: dicit autem malo succo utentes non esse expurgandos, id est forti medicina sed tantum per epicrasin quod sufficit.

Aphorismus VIII.

Tabidos vero per inferiora, caventes superiora. Vel brevius: Tabi obnoxios supra ne purgato.

Contentum seu Intentio.
De Purgatione Phthisicorum.

C*onnexio:* Cum in sexto supra Aphorismo, graciles per superiora purgandos monuisset; in hoc Aphorismo glossat illam sententiam, eos hic excipiens, qui tabi sunt ob noxii, hi enim ordinarie & ut plurimum graciles sunt. Hic Aphorismus ob brevitatem divisionem non patitur. Ne ergo quis confunderet graciles cum tabidis & à morbo extenuatis, de quibus antea egimus, adjicit hunc Aphorismum Hippocrates, quo admonet, *Tabidos* græce *φθινώδεις*, seu Phthisicos per superiora purgandos non esse, per quas scilicet vias superius dixerat graciles purgari oportere. At quamvis Galenus *in Comment* pro Tabidis phthisicos, quique Phthisim morbum patiuntur, sit interpretatus, videtur tamen non verisimile, hos voluisse Hippocratem comprehendere, nam qua causa, quave indicatione unquam Phthisi laborantes ad vomitum sint deducendi, non bene constat, quippe qui ex succi & macilenti, potius repleri, quam evacuari expostulant. Quamobrem verisimilius exponit Cardanus, eos hic subintelligendos esse, qui ad tabem & Phthisim contrahendam proni sunt, quales describuntur à Galeno, ex mente ipsius Hippocratis *1. Epidem.* Thorace & tergo restricti, & angusti ac scapulas habentes alarum instar exporrectas, atque ampliori capite præditi, destillationibus in pulmonem & Thoracem irruentibus, obnoxii; genæ rubent præcipue à pastu: In his enim Pulmo mollis & laxus admodum & cætera respirationis instrumenta valde debilia, facile à confluentibus succis eroduntur, unde sanguinis sputum, empyema & Phthisis. Si his ergo vomitus indicitur, procul dubio periclitantur. Mirari quoque subit cur in codice Leonicensi adjectum inveniatur, per *inferiora*, cum nec Heurnius nec Fuchsius neque Cardanus, aliusque ex recentioribus Aphorismorum interpretibus, id in suis versionibus habeant. Qua enim ratione, sive qui Phthisi laborant, sive qui ad Phthisim contrahendam sunt dispositi, quocunque medicamenti purgantis genere tractari possint. Verum tacite subintelligendum (quod nos in textu expresse posuimus) existimo purgationem per inferiora potius moliendam esse, si fortasse ventriculus

Ius cum adjunctis duobus fuerit aliquo humore gravatus : quamvis enim ex humore in ventriculo stagnante vomitus foret indicatus, ob malam tamen pectoris & corporis habitudinem, vergentem ad Tabem, potius ad inferiora is ducendus erit, ne periculum disruptionis vasorum & suffocationis subeatur, ut dictum.

Medicamenta autem purgantia ex levioribus seligenda erunt, Manna, Cassia, Rosa, Rhabarbarum, ne per acredinem major in humoribus commotio excitetur, cum alioquin satis sit, in his blande alvum subducere, & neque multum neque universaliter evacua- re, sed tantummodo ventriculum, atque intestina inutilibus succis oppleta, leniter inanire & quodammodo abluere; Fortiora enim pur- gantia, æque ac vomitoria Tabidis nocere possunt, cum praxis doceat alui fluxus, ipsis fatales esse.

Dices 1. Hippocrates 7. Aph. 2. exhibet Tabidis Elleborum, ergo purgat per superiora contra hunc Aphorismum. R. Hippocra- tem hoc fecisse, summa urgente necessitate, imminente nimirum suffocatione ex magna fluxione.

Instabis: Quò natura vergit eo ducenda est, sed in Tabidis & Phtificis vergit ad superiora ergo. R. Si natura vergat ad loca con- ferentia, illuc ducenda est, concedo, sed vomitus hic excitatus, non fit per loca conferentia, quia ex toto corpore trahit humores noxios ad partem affectam.

Urgebis: Non sunt alia loca conferentia; nam ut dictum neque per alvum duci possunt ex metu diarrhææ colliquativæ ergo. R. Quod si non adsit summa Tabes, cum minori periculo posse duci per infe- riora quam per partem affectam. Deinde non sumitur hic indicatio à motu humorum, sed à partis affectæ habitudine.

Instabis denuo: Hippocrates Tabidæ in fieri multoties venam secuit ergo etiam purgare licebit. R. Hippocratem, Tabidæ mulie- ri ob retenta menstrua venam secuisse, & bene quidem, sic enim natu- ra, à Plethora ad vires liberata, resipuit.

Urgebis tandem: Tabes est ob defectum alimenti & nutritionis, ergo cum hac, non videtur posse subsistere Plethora etiam ad vires. R. Tabes est ob defectum alimenti vel nutrimenti immediati, conce- do, mediati nego: potest enim alimentum corruptum in venis exi- stere, & tamen non attrahi à partibus siquidem hæ illud respuunt.

Aphorismus IX.

Melancholicos, infra vehementius purgabis, eadem ratione contraria adhibens.

Contentum seu Intentio.

De Purgatione melancholicorum.

Connexio: Cum graciles sint vel biliosi vel melancholici & mox supra dictum sit, biliosos per superiora purgandos: Nunc in hoc Aphorismo de gracilibus melancholicis verba facit, explicans, illos per inferiora & quidem vehementius esse purgandos. Hic Aphorismus duas habet partes: in prima dicit, melancholicos per inferiora esse purgandos: In secunda docet, eos fortius evacuandos.

Quemadmodum ergo Tabidos interpretati sumus eos, qui ad Tabem sunt dispositi, non autem qui jam Tabidi & Phthisici facti sunt: Ita Melancholicos hic sumere oportebit eos, qui habitus sunt melancholici, sive Proclives ad melancholicum habitum contrahendum, ad differentiam eorum, qui solent à Medicis appellari, biliosi, sanguinei, pituitosi, ex dispositione qua sunt affecti, hunc potius, non alium humorem cumulandi, vel etiam ex conditione sanguinis crassioris, & fixioris, non vero tenuioris & acrioris. Quomobrem Galeno visum est, *Lib. de humoribus & Comm. de natura humana biliosos* appellare, qui in operationibus agiles nimium sunt, & cutis colore flavescentes: *Sanguineos* qui rubicundiores, & roseo colore suffusi atque hilares: *Pituitosos* quibus cutis albicat, aquosa excrementa insunt, & operationes segnes fiunt: *Melancholicos* denique quorum fuscus color est, mens intenta & cogitabunda, cum moerore & taciturnitate.

Hos itaque ait Hippocrates, per inferiora purgandos esse, sine cessitas exegerit, & quidem *vehementius*, vel ut alii legunt *Plenus*, quam in Tabidis dictum est ob crassitatem, aciditatem, austeritatem, densitatem, fixitatem, gravitatem & terrestritatem humoris melancholici, qui non tam facile purganti medicamento cedit,

nec prompte per angustos meatus corporis ad exitum deducitur. Sive autem dicatur Plenius vel vehementius, id ita accipiendum, ut edoceamur, iteratis potius egestionibus, si oportuerit, melancholicos & tartareos eosque contumaces succos esse educendos, quam unico & vehementi cathartico, quo magis surerent & excandescerent, vel è contra tenacius hærent, seroliori portione seposita: Ea propter melius isti craffi & compacti succi blandis subducentibus parere consueverunt, quibus scilicet lubriciores redditi, & laxiores sibi faciunt vias, & commodius in alvum citra molestiam deducuntur: juxta Poëtam:

Ut levis humor humum fugit & petit Attale summum;
Sic gravis ad Matrem confluit humor humum.

Adjecta denique verba: *Eadem ratione contraria adhibens* denuntiant, pro varia ratione peccantium humorum, diversimode Medicum se gerere oportere; ut proinde vitiosus humor, si promptus ad exitum videatur vomitu, forte quia ventriculum occupat, eo promovendus: Si vero tunicis & glandulis intestinorum aut mesenterii adhæret, purgatione, magis & minus valida, pro majori vel minori, ipsius & Patientis corporis habitudine. Nisi etiam dicere velimus cum Argenterio, his in textu adjectis significare Hippocratem voluisse, melancholicum humorem, per inferiorum vacuandum esse, dummodo nil impediat æstas, corporis gracilitas, aut ad vomendum promptitudo, vel quidpiam aliud eorum, quæ pollicentur faciliorem per superiora evacuationem.

Dices 1. Galenus *de arte curativa ad glauconem de cura quartana* dicit utendum esse vomitibus post cibum continue, imo ipsum Elæborum porrigendum, si vero vomere nequeant, per inferiora purgandum, quod est contra Aphorismum. R. Galenum intelligendum esse de quartanariis famelicis, quibus melancholicus humor ventriculum petit, non vero de iis in quibus is ad intestina deponitur.

Instabis: Melancholici sunt debiles ergo fortiter non sunt purgandi. R. Omnes melancholici sunt debiles nego, aliqui concedo; & in iis Medicus scit moderari remedia.

Urgebis: Humor melancholicus per fortia remedia exasperatur, sic videmus quartanas intermittentes factas esse continuas & lethales. R. Tam fortibus remediis non est oppugnandus per vomitum con-

cedo: per inferiora (de quibus loquitur Aphorismus) nego. Præsertim præmissis præparantibus.

Dices 2. Hippocrates 6. Epidem. ait. Melancholicos abundare sanguine ichoroso, sed ichor non est difficilis purgationis utpote tenuis ergo non eget tam fortibus remediis. R. Per melancholicos hic intelligi melancholicos ad cachexiam vergentes, non vero qui revera & simpliciter tales sunt, de quibus est Aphorismus.

Aphorismus X.

Purgandum in valde acutis, si turgeat materia, eodem ipso die, differre enim in talibus malum;

Contentum seu Intentio.

De Purgatione in Acutis.

C*onnexio:* Cum hætenus Hippocrates in prioribus Aphorismis, de purgatione, multa præcepta tradidisset, desumpta, tum ab anni tempore, tum consuetudine, & habitu corporis; In hoc Aphorismo jam agit de illa, quatenus à morbo, ejusque causa desumitur.

Hic Aphorismus duas habet partes: In prima, ponit conclusionem, purgandum nempe, in valde acutis, si turget materia, eodem ipso die: In secunda, ponit rationem illius conclusionis, quod nimirum, differre purgationem, turgente materia, in valde acutis, malum sit. Quibus monet medicum vigilantissimum esse, in arripienda occasione, nec differendum remedium præcipue in morbis acutis.

Quamobrem jubet in hoc Aphorismo Hippocrates, statim esse purgandum in valde acutis morbis, si tamen materia turgeat, nulla expectata coctione, quam alias in morbis curandis & evacuandis humoribus, exigere visus est, ex jam allata ratione, quoniam tardare in his malum est.

Turgentia græce *ὀγκασμός* seu materia turgens dupliciter intelligitur; aut cum hinc inde movetur, non habens determinatum locum in corpore: aut quia movetur ad aliquam partem ad faciendam inflammationem antequam firmetur.

Quod

Quod autem de sola purgatione illico instituenda loquatur, patet ex verbo *Purgandum* vel ut alii *Medicari*: quod passim à Græcis & Latinis Scriptoribus, sic & non aliter expositum legitur: neque aliud quidpiam, videtur posse significare; nam ex superioribus Aphorismis, continuatus semper sermo est habitus de purgatione per Cathartica, ut propterea nec de venæ sectione seu missione sanguinis, nec de diuresi aut Diaphoresi promovenda liceat interpretari sed solum de dejectione, vel vomitu, prout humor, in hanc vel illam partem vergere videbitur: quamvis non nulli sint, qui credunt, primum supra dictum, turgentis materiæ modum, purgationem indicare: Secundum vero, sanguinis missionem exigere; ac proinde hunc Aphorismum, non solum ad Pharmaciam sed & ad Chirurgiam conscriptum esse. In hoc autem Aphorismo præterea intelligendi sunt morbi valde acuti, id est peracuti, qui scilicet cito & cum violentia ad finem suum, tendunt, & quartum aut septimum diem non transcendunt: hi enim cum tanto impetu aggrediuntur, ut quam citissime omnia quatuor tempora transigant, & non raro etiam vehementissimis symptomatibus sociantur, de quibus idem Hippocrates 1. Aph. 7. *Vbi morbus peracutus est, statim extremos habet labores.*

Vult ergo Hippocrates medicandum seu purgandum statim *seu eodem ipso die, cum materia* turget: Licet Argenterius arbitretur purgationem subito indicatam, non ex turgentia ut ipse loquitur, humorum, sed ex acutie, vehementia subitanea ejusmodi morborum, qui inducias non præbent, ut proinde putet delendas & expungendas illas particulas *si materia turget.*

Verum quod non temere *turgens materia* hic sit apposita, suadent potissimum, quæ alias à nobis sunt animadversa: Etenim, ratio & autopsia docet, non omnem morbum peracutum indicare purgationem, cujusmodi est suffocans Angina, Causus seu febris ardens, febris lypiria, quælibet inflammatio interna idque genus alii morbi: Item juxta Hippocratem *Lib. de internis affectibus* si materia (inquit) incipiat decumbere ad partes externas seu glandulas, purgationem vetat, ne scilicet materia à Peripheria ad centrum retrahatur.

Nihilominus ut diximus, non temere adjecta verba; *si materia turget*: Nam idem Hippocrates Lib. 1. Aph. 27. *concocta medicanda docuit, cruda vero non movenda, neque in principiis, modo non turgeant: &*
1. Aph.

1. Aph. 24. *In acutis morbis dixit, raro & in principiis medicamentis purgantibus uti licere.* Accedit quod prior ratio exhibendi cathartica in peracutis desumpta videtur ex imminente periculo, decubitus humorum vergentium in membra vitæ principaliora, cum magno ejusdem discrimine: quod sane deesse solet in acutis morbis, *materia non turgente*, cum cæteroqui in peracutis æstus febrilis, sitis, humorum cruditas, tenuitas urinarum, vel earundem turbatio, purgationem contraindicent: quare prudenter nos admonet Hippocrates 4. de rat. victus in acutis 38. non tantum abstinere oportere inter initia febrium aliorumque morborum acutorum, à purgantibus sed à quibuscunque medicamentis naturam turbantibus & humores commoventibus. Et Lib. de medic. purgant. inhibet usum eorundem, in febribus vehementibus, quales sunt ardentes & peracutæ, sed solis clysteribus suadet molliendam alvum si opus sit. Conferenda huc quoque sunt, quæ fufius attulimus in Expositione 1. Aph. 22. 24.

Cum igitur turget materia, duntaxat purgare licebit inter initia, imo protinus, nulla data mora, priusquam scilicet robur corporis dissolvatur, vel æstus febrilis augeatur, aut ad aliquod membrum principale decumbant ii, qui per corpus vagantur humores, ut subdit in Comment. Galenus: Idque profecto est quod Hippocrates in Aphorismo inquit. *Tardare in talibus malum.* Quod si humores agitati, & commoti, alicubi per decubitum consistant, abstinendum plane ut supra innuimus, à purgante medicamento, ne denuo commoveantur, & interiores & nobiliores partes petant, modo tamen is sit factus, in parte corporis, quæ universam peccantem materiam capiat, eumque comitetur symptomatum abolitio vel remissio, juxta ea quæ de abscessu salutari notantur à practicis & fufe referuntur à Galeno 2. & 6. Epidemio.

Dices 1. Morbi valde acuti statim à principio Phlebotomiam requirunt, Ergo non requirunt purgationem, utrumque enim debilis natura uno eodemque die sustinere non potest. R. Morbi valde acuti dependentes à sanguine seu plethora, requirunt phlebotomiam concedo, à turgente cacochymia de qua Ayhorisinus loquitur, Nego.

Instabis: In morbis à sanguine ortis etiam adest turgentia, ergo debet statim fieri venæsectio. R. Nego antecedens, nam sanguis, unicu-

unicus naturæ thesaurus, nunquam eum per se incitat ad sui expulsi-
onem, sicut facit materia cacochymica: Nec obstat, quod natura quan-
doque expellat sanguinem per Hæmorrhagiam, id enim facit, vel
ratione quantitatis à qua stimulatur aut ratione qualitatis à qua
irritatur.

Urgebis: Purgatio majorem excitat calorem & vires magis de-
bilitat ergo non habet locum. R. Hippocratem in Lib. 1. Apho-
rismorum dixisse, id cum præmeditatione & raro faciendum esse, con-
sideratis viribus; nos in nostra patria, cum raro sit turgentia, raro
id præstatur, sed contenti sumus lenitivis & clysteribus.

Dices 2. Hippocrates 4. *Acutor*: jubet in febribus acutis exhibe-
re purgationem ante quartam diem, non statim ab initio ut hic ergo
contradicit sibi. R. Hippocratem ibidem intelligendum esse de mor-
bis non valde acutis, neque ibidem facit mentionem turgentiae, ergo
aliter ibi, aliter hic sentit.

Aphorismus XI.

*Quibus Tormina adsunt, & circa umbilicum crucia-
tus, & lumborum dolor, qui neque Medicamen-
to neque per alia præsidia solvatur, in siccum hy-
dropem firmatur.*

Contentum seu Intentio.

De Signis futura Tympanitidis.

Connexio: Cum hætenus Hippocrates de temporibus & consti-
tutionibus corporum egisset, in quibus purgatio instituenda fo-
ret, vel per superiora, vel per inferiora, ad præcautionem vel
curationem morborum: In hoc nunc Aphorismo, memorat
eos, qui licet purgationem exigant, non tamen ab illa juvan-
tur, sed ob repugnantem causam vel partium discrasiam, in
morbos graviores & pene incurabiles delabuntur. Hinc

Ppp

vide-

videtur Aphorismus ad Prognosim pertinere, qua præmuniri possit medicus, ne suo fine frustratus infamia notetur, simulque præagere sciat à juvantibus & lædentibus, futurum ex mala naturalium viscerum constitutione morbum ejusque eventum.

Hic Aphorismus ob simplicem conclusionem simplex & Indivisibilis est. Inquit enim, quibus tormina contingunt & circa Umbilicum dolores, seu anxietates ac molestiæ, una cum doloribus Lumborum, unde medicamentis subducentibus, vel aliter solventibus, videantur tractandi, si his non proficiant, futurum, ut in siccum hydropem incidant. Tria ergo hic commemoravit simul Hippocrates: *Tormina: circa umbilicum labores: & lumborum dolorem:* ut nimirum his universam fere Regionem naturalem seu infimam comprehenderet: Tormina pertinent ad intestina: circa umbilicum labores ad mesenterium, omentum & peritonæum: Lumborum dolores denique complectuntur utrumque hypochondrium, jecur, lienem, pancreas, cum adjunctis partibus, & glandulis lumbaribus, & ubi potissimum peritonæum adnectitur. Quoties ergo ejusmodi partes afficiuntur, ac dolent, nec tam facile medicamentis consanescunt, plane denuntiant causam omnino rebellem & contumacem, quæ ob reconditos anfractus, neque facilem inveniat aditum, sed potius excitata, atque excussa solvatur in flatus, qui deinde distendendo, & inflando, ventrem tumefaciunt, & hydropem siccum inducant.

Equidem Tormina fiunt à re quapiam tenacius hærente, & sensim in halitus evaporante, ideoque extendente & contorquente plerumque cavitates corporis ampliores, quales potissimum sunt intestinorum, quæ distenta, utpote sensu prædita acriori cruciatus subeunt acerbissimos. Neque solum molestantur intestina ab his quæ interius illorum cavum occupant. sed ab iis etiam, quæ per mesenterium, ejusque ductus, illuc confluunt, atque gravando, irritando, vel inæqualiter afficiendo, non leviter divexant & excruciant. Debent autem ista, ejus esse conditionis, ut acidum austerum redolcant; ita enim & concrecentem substantiam in humoribus pariunt, & tormina atque lancinantes dolores inferunt: quamobrem veteribus, causa horum cruciatuum, *pituita vitrea* dicta est, & recentioribus *succus Pancreaticus* acidior redditus, & in debile commixtus glutinosiori chylo, & oleosiori felleo humori: qui propterea plicis & cellulis inte-

intestinatorum hærentes, & crassitie difficulter removeantur, & austera aciditate vellicent, compungant, & moleste nimis contorqueant, universam abdominis Regionem. Ex causis omnino iisdem contingunt, circa *umbilicum labores*, sive ut Heurnius vertit *Cruciatus*: nam quæ interius intestinatorum involucta infestant, circa umbilicum esse videntur, ubi potissimum intestinum ileon, omnium longissimum, & maxime anfractibus flexuosum residet, & ubi diutius fæces immorantur, & innumeris hiant osculis, vasa chylifera seu lactea, & venæ meseraicæ dictæ.

Ad *lumborum vero dolorem* referuntur mala quæcunque pertinentia ad glandulas lombares, centrum mesenterii, Pancreas, utriusque hypochondrii latera atque his adjacentia viscera, quorum affectiones hoc loco Hippocrates sub generaliore nomine doloris complexus est. Sunt enim partes istæ, sensu non modico præditæ, ob innumeras nervorum propagines, tum à vago pari, tum à vertebrae lumbis & ossis sacri dependentes. Dolent autem ab humoribus ibidem congestis, & acidam, acrem & muriaticam conditionem nactis, unde innumera propemodum mala exoriuntur, ut primus omnium suspicatus est Fernelius, moxque per Anatomicos reliqui post ipsum detexerunt.

Cum itaque hæc alicui accidunt, atque ab usu purgantium non desinunt, quæ cæteroqui per evacuationem peccantium humorum desinere deberent, vel saltem infringi, ac sedari, ope aliorum medicamentorum diuresim vel diaphoresim moventium, *siccus hydrops* facillime succedet: Inde etiam arguitur, mala partium dyscrasia & vitiosorum succorum repugnantia, quæ prædictis medicamentorum generibus non cedit. Sed & quamvis genita ac cumulata ibidem excrementa, vi medicamentorum repurgentur, non tamen fieri potest, ut omnino evellantur, ob humorum crassitiem, viarum angustiam, glandularum ineptitudinem, & partium affectarum imbecillitatem, cum neque medicamenta facilem habeant ad eas accessum, sine multa & valida commotione & violentia. Quod vero *siccus hydrops* græce Tympanites, inde potius oriatur, causa est humorum crassities & acor, unde multi & tenaces halitus, atqui morbus hic à materia crassa & concreta, & flatibus permixta dependet, à qua etiam ventris *Tormina*, circa umbilicum labores & lumborum dolores dependent

& oriuntur ut ante diximus. Sed tamen non solum hydrops siccus, verum etiam congeneres alii morbi contingere possunt, quales sunt colici dolores, hypochondriacæ affectiones, hystericae passionēs, Ischiades. Meminit autem potissimum Hippocrates *sicci hydropis*, tamquam morbi patentioris, qui scilicet visu, & tactu percipitur eo enim imus venter, non solum ingenter intumescit, sed percussus talem sonum edit, qualem Tympana, ut loquitur Galenus *in Comment.* ad differentiam humidi hydropis, qui *ascites* ab utrisque similitudine dicitur, in eo enim materia, in ventre collecta, non est flatuosus aer, sed humor aquosus.

Dices 1. Plures colica diuturna laborantes, nulli remedio cedens tamen in Tympanitidem non inciderunt, sed in contracturam & Paralysem ergo non subsistit Aphorismus. *℞.* Tales colicas fuisse humidas non siccas de quibus intelligendus Aphorismus.

Dices 2. Sicuti sanguinis fluxum sequitur Ascites, ita fluxum alui sequitur Tympanitis, sed in utroque casu tollitur humiditas, ergo in utroque fieri debet Tympanitis. *℞.* Per sanguinis fluxum, non immediate tolli humiditatem intestinorum, sicut fit in alui fluxu.

Dices 3. Ascites & Tympanitis differunt tantum secundum magis & minus, ergo uterque fiet à siccitate, cum tamen Ascites sit ab humore aquoso, Tympanitis à flatu. *℞.* Licet Ascites fiat ab humore aquoso, tamen cum tempore etiam adest siccitas, & sicci flatus, sicut pariter in Tympanitide aqua ex retentione urinarum ob vaporum compressionem.

Instabis Tympanitis juxta plures sæpe fit à calore, Ascites à frigore ergo non tantum differunt secundum magis & minus. *℞.* Licet Galenus *Lib. de locis affectis* videatur asserere, hydropem fieri à calore, tamen id alibi negat: Putaverim autem Galenum in loco citato intelligendum esse de causa remota v. g. prævia aliqua febre ardente, & diuturna alio autem loco, de causa proxima intelligi debet, nempe ubi putat fieri à frigore.

Urgebis Tympanitis calore sicco semper abundat, quod patet ex intenso urinarum rubore, ex hæctica, consummata, ergo Tympanitis etiam fit à calore ut causa conjuncta. *℞.* Et si Tympanitis calore sicco semper abundet adest tamen quædam ascititia humiditas, à resolutione caloris orta.

Aphorismus XII.

Quorum alui Lævitate intestinorum laborant, eos hyeme supra purgare malum.

Contentum seu Intentio.

De Purgatione Lientericorum.

Connexio: In superioribus Aphorismis Hippocrates, ad Tempus comparavit habitum & temperamentum seu Crasim corporis, & potissimam esse dixit indicationem, quæ à tempore sumebatur: In hoc præsentē Aphorismo, ad idem tempus comparat morbum, & simul indicationem, quæ de purgationis loco ex eodem sumitur: hic Aphorismus duas habet partes: In *prima* dicit, lientericos hyeme per superiora non esse purgandos: In *secunda*, docet, indicationem quæ à tempore sumitur, superare eam quæ à morbo.

Plures hic Aphorismus patitur difficultates, si vulgari commentatione exponatur. Et quidem 1. Cum Hippocrates antea generaliter vituperaverit, usum purgantium per superiora hyeme, non errat cur nunc, id ipsum repeteret, in lævitate intestinorum, quæ multo magis vomitum recusat, cum ex mala coctione ciborum oriatur. 2. Non videtur consentaneum rationi, Lævitate intestinorum laborantes, debere unquam vomitoriis tractari, cum lævitas Intestinorum, græce *Lienteria* definiatur à Galeno tum hic tum *Comment. 1. Lib. 6. Velox exitus eorum, quæ comeduntur & bibuntur, quæque talia dejiciuntur, qualia sunt devorata.* Vel brevius: *Defectio coctionis*: Quando ergo coctionis defectus accidit ex languore ventriculi, & caloris naturalis concoquentis, ex ejusdem Galeni doctrina; Unde igitur desumi poterit indicatio, promovendi vomitum in ejusmodi morbo, qui potius roborantia expostulat. 3. Excluditur in Textu, usus purgantium nimirum per superiora; videtur ergo, tacite is admitti per inferiora, ut clare deducitur ex præcedentibus Aphorismis, in quibus alter semper ex duobus admittitur, & alteruter tantum vituperatur; quis autem unquam commendaverit purgantia dejectoria in languore ventriculi? 4. Pugna-
re videtur præsens Aphorismus cum Aphorism. 15. Sect. 6.

Ubi longo alui profluvio laboranti, spontaneus vomitus superveniens salutaris dicitur: certe si spontaneus vomitus prodest, poterit quoque prodesse ex arte factus, nam Medicus naturæ imitator esse debet.

Verum hæc omnia solutu difficillima profecto forent, si lienteriae incommoda, à languido ventriculi calore deducere niteremur, & ut antiquioribus est creditum, à vitio concoctricis, retentricis, & expultricis Facultatis; nam cum in lienteria cibi incocti statim egerantur, eo fere modo, quo sunt assumpti, ad imbecillitatem concoquentis Facultatis, illos conficere, & in chylum permutare nequeatis, causam ejuscemodi subitæ egestionis veterum plerique retulerunt: Alii ad defectum etiam retentricis, unde debitum tempus concoctrici denegaretur: Alii ad irritatam simul expultricem, quæ ante tempus sollicitata, cogeretur cibos præ propera propulsione ad alvum deturbare.

Quocunque autem modo, ciborum hæc cita dejectio explicetur semper eadem occurrent difficultates. At vero si perpendantur, quæ ab eodem Hippocrate, de lævitate intestinorum dicta sunt, certe faciliorem & verisimiliorem hujus morbi causam inveniemus, atque propositarum difficultatum solutiones, Is enim 6. Aphorism. 1. inquit: *In longis lævitatibus intestinorum, si ructus acidus superveniat, qui prius non erat, signum bonum.* Quoniam ut subdit in Comment. Galenus, *significant ructus acidi, tantisper cibum in ventriculo retineri, donec principium mutationis accipiat, & naturam suorum operum reminisci.* Siquidem jam satis ex anatomia compertum est, ciborum dissolutionem, seu coctionem in ventriculo, ope quorundam succorum acidocrurum fieri, quin & distributionem eorundem, jam dissolutorum contingere in intestinis tenuibus, per mixturam confluentium succorum, fellei scilicet & pancreatici. Quoties itaque succi isti hebetes sunt, vel mucore retusi, præpediti, vel aliter depravati, nulla vel mala fit ciborum confectio, dissolutio, distributio & secretio, sed gravamine intestinis illato sponte sua illi feruntur in alvum & egeruntur.

Neque vero improbabile omnino est, quod ex veterum medicorum sententia refert Galenus *ibidem*, fieri ejusmodi morbum, propter intrinsecæ intestinorum superficiei lævitatem. Etenim ex anatome constat, internam intestinorum Tunicam, rugosam, & villosam esse, innumeris glandulis miliaribus refertam, in quas hiant oscilla, venarum

rum lactearum, quæ transeuntem chylum, à suis facibus secretum exugant, deducendum deinde, per proprios ductus, in commune Pecqueti receptaculum.

Si igitur contingat, villosam hanc intestinorum crustam, à re quapiam erodente abradi & complanari, ut deinceps nequeant lactea vasa præter fluentem chylum exugere, proculdubio, sponte sua, tota massa chylosa, vel etiam non confecti cibi ad alvum delabentur, & evacuationem promovebunt lientericam. Id ipsum quoque accidet, à laxitate fibrarum intestinalium, & cum à vitiatis, felleo & Pancreatico liquore, mala sit alibilis portionis dissolutio, atque à facibus secretio, ut patet ex praxi.

His itaque sic constitutis & expositis, facili nunc negotio Hippocratis mens in præsentī Aphorismo dilucidabitur: eo enim 1. insinua-
re videtur lævitatem intestinorum saltem aliquando oriri vitio alicujus humoris, ut etiam videtur annotasse Galenus in *Comment. in Aph. 1. Sect. 6.* qui propterea evacuatione egeat, sicuti superioribus Aphorismis de aliis meminerat. 2. Vomitum non omnino in hoc morbo prohiberi, si præsertim ille æstate contingat, ex humoribus ventriculi occupantibus, cum in hoc textu dicat, Hyberno tempore non licere per superiora purgari, unde in aliis temporibus, & præsertim æstate, forte aliquando licebit, alias indefinite dixisset, in lævitatibus intestinorum nunquam per superiora purgandum. 3. Quod hyberno tempore malum sit lientericos, per superiora purgare: tum quia per id tempus vomitus non solet esse facilis, ob crassitiem & gravitatem humorum, suo pondere naturali ad inferiora inclinantium: tum quia, hyeme coctio, quæ in ventriculo peragitur, melior esse consuevit distributione, quæ fit in intestinis, ut mox ante ostensum est; quare ne vitiosi humores ibidem stagnantes, ad ventriculum per vomitum revocentur, propterea dixit, malum hyberno tempore per superiora purgari: Accedit, quod si lientericus fluxus, ex glandulis intestinorum, mucosis succis obsitis, & veluti incrustatis oriatur, certe illi per inferiora & non per superiora purgandi erunt, quod & plerique famosi practici observant. 4. Difficultati ex *Aph. 15. Sect. 6.* propositæ facile satis fiet, si dicamus, locutum ibi Hippocratem, non de lienteria proprie dicta, sed de diarrhæa, quæ inter se multum differunt: Sed & ibi de vomitu spontaneo diarrhæa contingenti, hic vero, de

de purgationibus arte promotis sermo est: Atqui non semper licet, quocunque morbi tempore, id ipsum agere, quod aliquando solet, specialis & provida morborum rectorix & medicatrix natura sponte sua operari: sic per hæmorrhagias narium, per suppurationes ex auribus, per Parotidas, per umbilici relaxationem, morbos sæpe numero & causas morbosas abstulit, per quas vias, minime Medico expediret: Et quis unquam naturæ solertiam poterit imitari, quæ sibi mille parat vias, ut se ipsam à morbis vindicet, quemadmodum Galenus animadvertit.

Dices 1. Lienteria etiam potest fieri à bile, ut facta & observata est, ergo saltem tunc per vomitum curari debet. *℞.* Etsi Lienteria à quovis humore fieri possit, tamen in hyeme potissimum fit à crassis viscidis & pituitosis, & de his loquitur Aphorismus.

Dices 2. Hippocrates ait, quod diuturne intestinorum lævitatibus, superveniens vomitus sit proficiuus ergo si à natura bene & utiliter fit, etiam ante fieri potest: *℞.* Extra hyemem transeat, in hyeme nego. Consequentia in textu est ventilata nempe artem non ea posse, quæ natura potest.

Dices 3. Revulsiones ad partem contrariam, si hæc non sit nobilis, sunt semper bonæ, ergo affectis in lienteria intestinis, conferet vomitus. *℞.* In Lienteria stomachum primario. Intestina autem tantum secundo esse affecta: Ergo si fiateductio humorum per stomachum, non erit revulsio, sed potius tractio ad partem affectam, & afflictæ addetur afflictio.

Aphorismus XIII.

Qui ad Helleborum, non facile supra purgantur, eorum corpora, ante potionem copiosiore alimento & quiete præhumectanda.

Contentum seu Intentio.

De Preparationibus Emeticorum.

Connexio: Cum in præcedenti Aphorismo, Regulam circa vomitum à tempore & morbo desumptam tradidisset; In hoc de præparatio-

paratione ad vomitum verba facit: nimirum, quod si ex supposito corpus sit purgandum per Elleborum, quid faciendum iis, qui difficulter sursum moventur, scilicet eorum corpora præparanda esse humectantibus, potu nempe cibo & quiete &c. Verbo vult dicere corpora ad vomendum difficilia, non esse ad usum Hellebori ducenda, priusquam fuerint humectata.

Hic Aphorismus simplex est & divisionem non patitur.

Helleborus seu *Veratrum* in officinis, duplex semper est habitus, *albus* unus, alter *niger*: albus ad vomitum, niger potius ad dejectiones efficax. De albo autem, hic mentio facta videtur, cum de evacuatione per vomitum, sermo sit, & usu is foret frequentiore apud veteres, quibus familiarissimæ quoque erant vomitiones; unde Plinius *Lib. 25. Cap. 5.* illud quondam terribile, postea tam promiscuum evasisse scribit, ut plerique studiorum gratia, ad exploranda acrius quæ commentabantur, sæpius in usum traxerint: Sed & tutissime sumi in Anticyra Insula, quoniam Sesamoides seu Sesamum veterum vulgo *Glachs-Dotter* / admiscunt: In ejus autem usu, cautionem sane dignissimam proponit, hoc Aphorismo Hippocrates, ne mala inde sequantur, quorum alias ipsemet meminerit, cum importunus & immoderatus est,

Primum considerat, num corpora difficulter, per superiora purgentur, an vero facilem subeant vomitionem. Si facile ad vomendum deducantur, non erit ut ad Ellebori usum definiendum sit, cum levi quocunq; vomitorio ventriculus possit exonerari. Solum ergo veratri usum, admittendum consulit, in difficulter vomentibus, quorum ventriculus, acriori eget stimulo, quam ut à quocunque alio blandiori medicamento levius præritetur, ad difficilem vomitionem promovendam. Difficilis autem vomitus contingit, vel à structura ventriculi, se potius per fibras ad inferiora, quam ad superiora corrugantis, vel à crassiori tunica, qua interius ipse vestitur; vel à glutinosis & crassis succis internam illius partem oblinentibus, vel ab ejusdem ventriculi fundo distantiori, ut non tam facile per vomitum subversus, se possit per oesophagum exonerari, renitente quodammodo per angustiam, atque stomachum comprimente diaphragmate, ut in arctis pectore sæpe evenit. Quocunque autem modo, vomendi

difficultas accadat, semper opus est valentiori vomitorio, quo scilicet, irritatio sensibilior, & molestior excitetur, ad invertendum ventriculi, & intestinorum motum peristalticum, cum vomitus motus sit ventriculi inversus conantis expellere ea, quæ illius cavum occupant. Cum igitur vomitus, non facile succedit his, qui ex allatis causis, non omni leviori vomitorio, per superiora, purgari possunt, monet Hippocrates, ad veratrum esse confugiendum: veruntamen, pleniori cibo, & longiori quiete esse magnopere præhumectandos agros. Siquidem elleborus tenuium est partium, & inter pharmaca, nimia acredine, & ingenti mordacitate pollet; unde, ne ventriculo vehementi noceat irritatione, atque inflammationem inducat, expediet illum præmunire, humectantibus alimentis; secus ab utraque sequi facile posset convulsio, quam ex Elleboro lethalem, idem Hippocrates pronuntiavit 5. Aph. 1. Humectabitur autem convenienter ventriculus, jusculis potissimum & alimentis pinguibus: quin & consueverunt plerique, ante ejuscemodi vomitoriorum exhibitionem, cibum ad saturitatem usque, & ex rebus, præsertim oleosis & pinguibus imperare, ut melius crassi & tenaces succi, cibo commixti, una simul evomantur, & medicamentum vomitum inducens, quodammodo cibo retusum, nequeat ventriculum vehementius laceffere & exagitare.

Quod sane non tantum in Hellebori usu, sed in cujusvis alterius efficacis & violenti vomitorii intelligendum: Etenim Hippocrates, eo solum hic usus est loco exempli.

Eadem de causa, quietem servandam docet, antequam veratrum sumatur, eamque non solum corporis sed & animi. Confert enim utraque quies, non tantum ad humefaciendum, verum etiam ad vitale robur servandum, quod bene valere necessum est, ad sufferendam vomitionem: Equidem corporis & animi motus, plurimum extenuant, & vires debilitant.

Verum, cum Ellebori usus, veluti periculosissimus (tametsi multifariam illum corrigere & preparare veteres conati sint, ut apud Dioscoridem Lib. 4. Ætium Lib. 3. Cap. 124. Aeginetam Lib. 7. Cap. 21. & Galenum Lib. quos, quibus & quando & 3. de fractur.) nostris tamen temporibus exolevit, alia & quidem tutiora vomitoria excogitata sunt, in quibus tanta cautio, quanta in Elleboro expostulatur, non vide-

videtur necessaria. Verum tamen non temere, & inconsiderate, quæcunque vomitum movent, usurpanda sunt, cum aliquibus satis sint, quæ ex vegetabilibus conficiuntur, aliis vero etiam, quæ ex mineralibus sunt parata: quo pacto hic Hippocrates, non omnibus vult Elleborum esse exhibendum, sed solum iis qui difficulter evomunt, unde pro varia evacuandorum humorum conditione, vomitoria ista variare licebit.

Dices 1. Juvenes sunt calidi & sicci, ergo elleborus non convenit. *℞.* Nisi prius humectentur concedo alias nego.

Dices 2. Hippocrates Elleborum febricitantibus exhibet, cum tamen sit acris & calidæ substantiæ, & febrem magis accendit, ergo non est exhibendus: *℞.* Hippocratem non dedisse Elleborum, fortiter febricitantibus, sed tantum febribus à crassis & viscosis succis atque stomachalibus laborantibus. Præterea in mania, insania &c.

Quæres Quænam sit præparatio & dosis Ellebori? *℞. 1.* Varia à variis, ejus instituitur præparatio; alii cum pomo cydonio miscent & sub cineribus coquunt; alii cum raphano: alii involvunt pastæ & coquunt in spiritu vini, donec consumptus sit spiritus: alii macerent per plures dies in aceto, alii aliter id præstant. *℞. 2.* Sunt qui radicem ad ʒj dant, & ultra, sed revera cum periculo; nos non transgredimur ʒj aut ʒ^{ss} in pulvere, in infusione à ʒj ad ʒii cum corrigentibus aromaticis.

Aphorismus XIV.

Poto Elleboro, corpus movendum potius, quam somno tradendum aut quieti: nam vel navigatio indicat, motione turbari corpora.

Contentum seu Intentio.

De promoventibus vomitoriorum operationem.

Connexio: Cum in præcedenti Aphorismo Hippocrates de præparatione, quæ ante potionem Ellebori, fieri debet, egisset:

Qqq 2

In

In hoc presenti vero agit de modo, quomodo sese ager debeat gere-
re accepto Elleboro, ut facilem faciat purgationem. Hic Apho-
rismus duas habet partes: in *prima* concludit, quod poto Elleboro
corpus potius movendum sit, quam somno tradendum aut quieti:
In *secunda*, reddit causam & rationem, quod nimirum non solum in
vomitu, sed in omni alia purgatione, motus acceleret operationem
medicamenti, quies vero impediat.

Postquam ergo corpora ad Ellebori sumptionem sunt disposi-
ta, ut facilem ex illo nanciscantur evacuationem, consulit Hippo-
crates ad motiones esse ducenda, sumpto exemplo, à navigatione,
perquam constat, illa turbari & promptius evomere, juxta illud: qui
vult vomitare, eat ad mare: vel juxta Hippocratem: *Si medicinam
ducere velis, corpus moveto.*

Doctissime autem advertit Cardanus, hunc Aphorismum
scriptum fuisse, ad commodam, facilem, celerem, & minus mole-
stam ab Elleboro evacuationem: Sequentem vero Aphorismum, ad-
jectum esse, ad illam augendam vel cohibendam, si fortasse vel dimi-
nuta, vel excedens videatur: qua ratione vindicatur Hippocrates, à
calumniis Galeni, in *Comment.* dicentis: *Liquet, quod hic sermo eandem
viā habeat, cum priore:* quasi vero Hippocrates, bis de eadem re
verba fecerit.

Confert itaque motus, evacuationi promovendæ: tum quia
humores attenuat, & fluxiles reddit: tum quia ductus corporis dila-
tat: tum etiam, quia calorem suscitatur, & medicamenti assumpti ope-
rationem felicitat: Contra vero quies & somnus impedit & cohi-
bet: quamobrem experimur sisti somno, omnes, cujusvis generis
evacuaciones, uno solum excepto sudore.

Non tamen motus adeo vehemens & immoderatus esse debet, ut
corpus delasset, vires enervet, & ad cutim commotos humores dedu-
cat: Hoc enim pacto, retardaretur potius evacuatio, quæ ex assumpto
vomitorio desideratur, quin imo duceretur vis venefica e poti Ellebo-
ri, in partes corporis penitiores, non sine gravi noxa totius.

Sed & nec quicunque motus, ad vomitum promovendum re-
quiritur, sed qui corpora turbare valeat, & nauseam movere, cujusmo-
di est navigatio, perquam inæqualiter illa exagitantur. Unde existi-
mavit Argenterius, conducibiles solum, in id esse navigationem, equi-
tationem, & ambulationem per circulum. Sed

Sed an statim ab assumpto Elleboro, & alio vomitorio medicamento movendum sit corpus? Ego puto, eo usque quiescere oportere, quousque medicamentum fuerit in ventriculo dissolutum, sive ut practici loquuntur, à potentia deductum in actum: Cum vero ventriculum vellicare, & nauseam movere cæperit, turbatione commovere necessum erit; quod & plerique facere consueverunt, sola linguæ & summitatis œsophagi vellicatione. Verum in hac re plurimum tribuendum prudentiæ & sagacitati assidentium, ne diutius, crebrius aut impensius, quam par sit, ventriculus proritatione subvertatur, & mala suboriantur, non raro immedicabilia. Idem quoque servandum erit, in usu purgantium & subducentium medicamentorum, in quibus pro quiete somnus, & pro motu vigilia (si forte illum corpus ferre nequeat) commendabiles erunt, prout medicamentum dilui aut exacui exoptulaverit.

Dices Si ab assumpto medicamento corpus moveatur, illud mox rejicietur ante operationem, ergo non est movendum. *R.* Ut diximus si statim moveatur concedo, si postea, postquam in actum reductum nego.

Quæres Cur ambulatio ante cibum ventrem stringat, post cibum laxet? *R.* Hoc fit quia per motum ante cibum alvus siccatur, post cibum humectatur, quia alimenta humida eo feruntur: juxta scholam Salernitanam *post pastum stabis aut passus mille meabis*: Ante cibum autem, motu corpus magis exsiccatur.

Aphorismus XV.

Cum Elleborum magis ducere voles, move corpus: cum vero sistere, somnum concilia, nec move.

Contentum seu Intentio.

De promoventibus & sistentibus purgantia.

Connexio: Cum in antecedenti Aphorismo docuisset motum & vigiliam facilem reddere evacuationem; quietem vero & somnum eandem retardare & sistere: In hoc præsentè Aphorismo eandem doctrinam dilucidat, quid nempe faciendum sit, cum operationem medicamenti sistere, aut augere intendimus.

Hic Aphorismus etiam duas habet partes: In *prima* docet augendam purgationem seu evacuationem per motum: In *secunda* vero sistendam per somnum & quietem, ubi id requirit medendi ratio.

Quod ergo hoc Aphorismo doceat Hippocrates, modum, quo assumptum Elleborum, evacuationem copiosiore eliciat, patet per adverbium illud: *Magis*; nam proculdubio vehementius & uberius purgabit Elleborus, si à motu se ipsum insinuaverit, & confluentes humores adhuc à ventriculo & intestinis remotiores eduxerit, potissimum si motus ejus sit conditionis, ut præter attenuationem & amplificationem, agitet, turbet & nauseam moveat, ut ante dictum est. Sicut autem motus confert ad copiosiore evacuationem promovendam, ita somnus & quies, eandem, forte immoderatam sistit & cohibet; quamobrem Hippocrates consulit, hoc eodem Aphorismo, à motu abstinendum, & somnum esse inducendum, si illam sistere opus fuerit.

At quo pacto somnus inducatur, Hippocrates non explicat: Et quidem non tam facile est, in egestionibus, à purgante medicamento excitatis, quo scilicet venter assiduo ad secessus proritat, somnum conciliare. Verum ad compescendas evacuationes, per alvum immoderatas, non raro cibus assumptus mire contulit: eo enim allecta natura, ab evacuatione destitit, & fibræ ventriculi ac intestinorum, plurimum eadem de causa delassatæ, contrahuntur, & confluxuros humores detinent, quin imo vis medicamenti, à portionibus cibi humidioribus, non leviter infringitur, ipsæque succorum particule, jam antea dissolutæ & attenuatæ, summopere crassescunt & consistunt. Attamen in vomitu, quia ventriculus graviter afficitur, & per plures horas, nausea & subversione tenetur, non est opportunum cibum assumere, is quippe subinde gravatus, magis & magis, ad vomendum sollicitaretur, non sine graviore noxa. Proderunt ea propter, quæ stomacho grata, reficere quidem possunt, sed vi quadam opiata vomitum sedant; qualia sunt vinum, vini spiritus rectificatus, aqua cinamomi &c. Extra in ungendo & applicando unguenta olea, balsama: Theriaca extra & intro maxime recens adhibita, ita & methridatium, diascordium; Laudanum denique opiatum, in compescendo vomitu, & in cæteris evacuationibus cohibendis præcellere dicitur, cavendum tamen ne importune aut excedente

dente dosi adhibeatur, nam consopitis omnino viribus, & stupefacto cerebro mors subsequeretur.

Dices Quies opponitur motui, & non somnus, ergo potius imperanda quies ad motum compescendum humorum quam somnus. *R.* Somnum adhuc magis contrariari motui, quam quietem, medice loquendo quia etsi homo quiescat, non tamen semper sistitur motus medicamenti, sed si dormiat æger, citius quietatur, humorum & medicamenti motus.

Aphorismus XVI.

Elleborus periculosus, carnes sanas habentibus; Convulsionem enim inducit.

Contentum seu Intentio,

De Noxis Hellebori.

C*onnexio:* Cum de operatione & evacuatione, quæ per Helleborum fit, multa hætenus docuisset Hippocrates: in hoc præsentis Aphorismo, cautum reddit medicum periculi, quod non tantum in eo, sed in omnibus medicamentis catharticis fortioribus observatur.

Hic Aphorismus duas habet partes: in *prima* docet exemplo Hellebori cavendum omne forte Pharmacum, ab his, qui sanas habent carnes: In *secunda*, ut peculiariter, vitium & noxam, quæ in Helleboro est, gignendi convulsionem, manifestet, quod non nisi cum summa cautione & præmeditatione, tale Pharmacum sit exhibendum. Quod ergo alias, Hippocrates, de quocunque purgante medicamento, in bene valentibus protulit, speciatim in hoc Aphorismo de Helleboro adnotat, & quidem albo, quo nimirum vomitus concitatur, ut ex hætenus traditis clare deducitur.

Sed mirum videri potest, quod Elleborus, sit unquam sanis exhibendus, ut exinde convulsionis periculum timeatur, quis enim unquam sanæ mentis Helleboro utetur, aut suo aut alieno consilio cum bene valet? quamobrem videtur hic Aphorismus inutiliter adjectus,

quo

quo fortasse debeant bene valentes commonefieri, ne Helleborum assumant. Verum non dixit Hippocrates *bene valentibus*, sed, *sanas carnes habentibus* Elleborum esse periculosum: nam possunt corpora, sanas carnes habere, & aliquo morbo laborare, præsertim citra febrem, & absque ullo sanguinis vitio, sed sola quarundam partium affectione, uti est dolor Lumborum, genuum gravitas, Ischiades, ardor stomachi &c. In his enim affectibus solebant veteres vomitoriis uti, imo ex quacunque occasione Elleborum sumere: tam illis familiare & consuetum erat vomere; Hos ergo consulit Hippocrates ab Elleboro abstinere si carnes sanas habeant, additque rationem, quia Elleborus convulsionem affert.

At quomodo ex Elleboro convulsio oriatur, dubitari non incongrue potest; Et quidem non ex vi purgante id evenire fatendum, ex eo potissimum, quod cætera cathartica medicamenta, etsi vehementissima, uti sunt *colocynthis*, *Scammonium* *Elaterium* convulsionem non afferant. Videtur itaque convulsionem afferre, Helleborus acredine potius ventriculo, & nervis infensa, quemadmodum *Cantharides* speciatim nocuæ sunt vesicæ urinariæ; *colocynthis* & *Scammonium* intestinis, *opium* cerebro. Propter vomitum enim, quem violenter inducit, fibras ventriculi lacescit, & nervos ejusdem compungit, ac extorquet, unde fit, ut convulsionem, quæ passio nervorum est pariat. At vero magis afficit Elleborus habentes sanas carnes, quoniam in his nervorum fibræ exquisitioris sensus sunt, atque adeo facilius acris & irritantis medicamenti vim, & molestiam percipiunt, quam minime persentirent, si hebetioris sensus forent, aut multa pinguedine & crassorum succorum copia infarcirentur. Quæ etiam ratione fit, ventriculum lentis & viscosis humoribus, aut adiposis cibis oblitum, acredinem Ellebori, minus persentire, quam si omnino vacuus & bene valens sit. Hinc experimur gravius affici eos, qui jejuni Arsenicum, auripigmentum, sublimatam & alia similia venena assumpserunt, levius vel nullimode, qui a pastu: Cujus rei, non ignari, circumforanei, Pharmacopolæ, arcannorum jactatores, ut rudem Plebeculam illudant, venena sumunt, postquam se plurimum ingurgitaverint, & cibis potissimum oleosis ac pinguibus, quibus interna ventriculi tunica, ad efficaciam veneni retundendam obliniatur.

Cæterum convulsio hic ab Hippocrate notata, non vera convulsio intelligenda est, sed motus convulsivus: Si quidem
per

per convulsionem veram, nervi & muscoli ad sua principia retrahuntur, & retracti perdurant, ut in Tetano, Opisthomo & Empisthomo: at vero convulsio, quæ ex Elleboro contingit, refert potius inæquales, atque irregulares earundem partium commotiones spasmodicas, congruentiori nomine appellatas, quemadmodum in Epilepsia: quæ similis sæpe est strangulationi, quia peculiare est Elleboro strangulare. Sed quibus remediis succurrendum iis sit, qui ex usu Ellebori aliisque similis medicamenti, motus istiusmodi convulsivos patiuntur, non erit abs re, hic breviter memorare, idque lubentius, quoniam non sunt hi iisdem omnino remediis tractandi, quæ usui esse solent cæteris convulsionibus, aut motibus convulsivis, ab humore nervos occupante progeneris, in quibus purgantia, dissolventia & calefacientia dicta à practicis commenduntur: sed potius humectantibus & obtundentibus acrimoniam ab Elleboro inductam: quare juscula ex vegetabilibus, quæ nervis opitulentur, & stomacho grata sint proderunt, quæ potissimum parantur ex Bardana, stæchade visco quercino, floribus Nymphææ & violarum: Cydonium ipsum & ex eo parata fertur Ellebori magnum Antidotum, item Gelatina cornu cervi & mirifice etiam conferre dicitur sambucus atque ex eo facta remedia, Theriaca mithridatium recens. Exterius vero proderunt, quæcunque leniunt, & partes concitatas demulcere valent, unde oleum Hyperici, baccarum lauri; Item radices Angelicæ in vino coctæ & in Cataplasmatibus formam applicatæ conferunt. Item Theriacæ naturales & artificiales Balneationes ex anodynis, præsertim Chamomilla, meliloto Hyperico &c. reliqua ex praxi petenda.

Dices 1. Hippocrates 2. Aph. 36. ait: *qui salubritate corporis sunt præditi, ii, hausto purgante medicamento, statim deficiunt, & qui pravo utuntur victu.* Item 2. Aph. 37. *qui integra sunt corporis valetudine, medicationes agre & moleste ferunt,* atqui idem dicit hic Aphorismus ergo idem repetit. &c. Quod ibidem dixit in genere, hic repetit in specie de Elleboro, ergo idem repetit, nego consequentiam.

Instabis Qui sanas carnes habent, non indigent Elleboro, ergo
Rrr
frustra

frustra positus est Aphorismus. &. Ideo hic ponitur, ut præcaveatur ipsius exhibitio in corporibus sanis.

Quares Cum Elleborus sit periculosus, an tamen tuta conscientia possit adhiberi. &. Sidebite sit præparatus, cum cautione & circumspeditione potest adhiberi, non autem indiscriminatim.

Aphorismus XVII.

Non febricitanti, cibi fastidium, oris ventriculi morsus, vertigo tenebricosa, & oris amaritudo, purgatione per superiora opus esse significant.

Contentum seu Intentio.

De Indicantibus vomitoriorum.

C*onnexio:* Cum in superioribus docuisset, quibus vomitorium medicamentum, & in specie ex Elleboro factum, dare vel vitare opportunum esset, addendo tempus, habitum & consuetudinem: In præsentī Aphorismo adducit indicantia & symptomata quæ supernam purgationem seu vomitum pro sui ablatione expetunt.

Hic Aphorismus simplex est, nullamque patitur divisionem. Recenset itaque in hoc Aphorismo Hippocrates indicia quibus medici dignoscere queant, quando nam per superiora vitiosos humores expurgare cogantur, imitantes naturæ motum, ut idem Hippocrates alibi scripserat, *quo natura* vergit eo ducere oportet.

Et quidem ad superiora ferri indicabunt 1. *Ciborum fastidium*, quo designatur ventriculus, inutilibus humoribus repletus, unde illius fibræ laxatæ nequeant corrugari, succi dissolventes, digestionī addicti, præpediti, aut retusi, famis sensum, non exacuant, & jus ipsa ciborum concoctrix hebetetur & elangueat.

2. *Oris ventriculi morsus*, qui non nisi ab humoribus præter naturam ibidem congestis, acribus & biliosis dictis, causatur, quibus nimirum stomachus vellicatur & compungitur, ea doloris specie, græce *Cardiogmos* & *Cardialgia* appellatur.

3. *Vertigo* designans, iisdem humoribus in ventriculo congestis &

& collectis sive per nervos, sive per Arterias cerebrum affici & pravis halitibus, adeo tentari, ut subinde in suis operationibus turbetur & vertiginem incurrat, vel simplicem vel tenebricosam dictam.

4. *Oris amaritudo* quæ à degeneratis pariter humoribus amarorem præferentibus exoritur: unde oesophagus palatum & lingua, pari affectione, per consentientes glandulas, & tunicas cum salivario rore depraventur.

Quamobrem cum hæc omnia manifestissime demonstrent vitiosos humores, ventriculi cavum occupare, merito per superiora, veluti per loca conferentia, illi erunt exturbandi; si enim ad inferas partes deicerentur usu purgantis dejectorii, non tam prompte & expedite evacuarentur, & proculdubio infici quodammodo quoque possent, qui in intestina confluunt succi: quin & catharticum ipsum, ab eorundem succorum miscela, depravatum & corruptum, graviorum molestiam afferet, atque ex diuturniori mora in intestinis, venæ lacteæ inquinarentur, & facile oriri possent tormina, diarrhææ, febres, atque alia non leviora, reliquorum viscerum naturalium mala, speciatim vero Renum & vesicæ, ob transmissionem alicujus portionis dejectorii medicamenti: Id enim cujuscunque generis illud fuerit, diureticum fieri solet, quemadmodum testantur urinæ, per id tempus coloratiores & multum turbatæ.

Hæc autem indicia simul juncta dixit indicare per superiora purgationem, absente tamen febre, nam si fortasse illa feбри sociarentur, certe non à præsentia humoris in ventriculo, quæ plane vomitum indicat, sed ab ipsa febre oriri possent. Quamobrem, si humor ventriculi cavum occupans desit, evacuatio minime indicabitur, quæ non nisi expostulata videtur ab humore ventriculum replente: at vero non raro à febre accidit cuncta hæc oriri quæ tamen purgationem non exigunt, imo & aliquando contraindicant, ut cum febris inflammationi & Phlogosi copulatur.

Verum quamvis ista signa, citra febrem corpus denuntient per superiora purgandum, eo quod designent ventriculum malis humoribus repletum; non tamen si febris adsit, oportebit semper & absolute à vomitoriis abstinere, si ex iisdem & aliis signis conjiciamus, humorem ventriculi cavum occupare; Etenim semper ac humores ventriculum infestant, vomitu ejiciendi sunt; unde sensus Aphorismi 15.

erit, ut si absente febre, nausea, morsus oris ventriculi, vertigo tenebricosa, & oris amaritudo, quempiam affecerint, vomitus semper indicetur: Si vero hæc omnia à febre habeantur, citra humorem in ventriculo contentum. ab illo abstinendum, cum hæc eadem, à sola febre dependere possint, at si præterea, etiam humoris præsentiam in ventriculo sequantur, & non præcise à febre oriantur, vomitus adhuc erit proculdubio indicatus, potissimum inter ejusdem initia. Dixi inter ejusdem initia, nam si fortasse hæc accidant, tempore declinantis febris, quia significant criticam evacuationem per superiora futuram, oportebit à vomitorio abstinere, & naturæ motum criticum expectare, ex regula ab eodem Hippocrate tradita *Lib. I. Aph. 29. quæ judicantur & judicata sunt integre, neque movere neque novare aliquid, sive medicamentis, sive aliter irritando, sed sinere oportet*: de qua etiam re legendus Galenus 3. de *crisibus*. Liceret autem si præmonitam evacuationem, minime natura expleret, ut alibi diximus. Verum inter ea, quæ vomitum movent & cito ac tuto conferre solent, præstant ex stybio seu antimonio præparata.

Quæres quid per Cardiogmos seu Cardialgiam intelligatur, cujus in textu facta est mentio. R. Per illam intelligi vellicationem quandam seu dolorem superioris orificii ventriculi, quod ab antiquis cor nominabatur, quia est exquisitissimi sensus, dicitur ejus dolor vulgo *Herzgespan* / præterea est vicinum atque nervis & arteriis cordi junctum, & sic facile syncope comitatur, & cum cerebro pariter magnam mediantibus nervis habet Sympathiam unde vertigines, dolores, convulsiones &c.

Aphorismus XIIIX.

Supra septum transversum, (vel ut alii supra præcordia) dolores, quicumque egenti purgatione, per superna purgandum esse significant; qui vero infra sunt, per inferna.

Con-

Contentum seu Intentio.

*De distinctis indicationibus Purgandi**ἀνω καὶ κάτω.*

Infra vel Supra

C*onnexio:* Cum in prædenti Aphorismo indicationem sumpisset ad supernam purgationem ex symptomatibus seu productis morbosus; In hoc prædenti dolorem (utpote symptoma solenne & famosum) assumens demonstrat, quando supra & quando infra purgare conveniat.

Hic Aphorismus duas habet partes: In *Prima* concludit & dicit, quod dolores supra septum transversum (vel ut alii supra præcordia) qui purgationem postulant, vomitum indicare: In *secunda* dicit, qui vero dolores infra sunt, per inferna purgationem faciendum denotare.

In doloribus itaque, sive (ut Fuchsius & Heurnius exponunt) in molestiis, seu affectionibus, supra præcordia seu supra septum transversum, si purgatione egeant, vomitu potius agendum & utendum, quia breviori via & faciliori molimine, se natura exonerabit, imo humores ipsi evacuandi promptiores, & paratiores erunt ad exitum. Non tamen dixit in doloribus seu molestiis quibuscunque sive *in doloribus simpliciter & absolute*: Nam neque pleuritis, aut Peripnevmonia, neque angina vel alius dolor cum inflammatione, purgationem indicabit: sed in doloribus, qui purgatione egent, quales scilicet à ventriculi orificio superiori, ex pravis humoribus oriuntur. Sed neque defuerunt, nec hodie dum desunt, qui etiam in affectibus Pectoris & Pulmonis, etiam cum inflammatione conjunctis, vomitum commendent, quemadmodum præ cæteris Rulandus, qui usu suæ *Aqua Benedictæ* ab ipso met appellatæ, Pleuritidem, Peripnevmoniam, Empyema, & cæteros morbos Thoracis tuto se curasse testatur. Quamobrem hac ratione, sensus istius Aphorismi generalissimus foret aptandus, cuicunque morbo supra septum transversum. Quod si non supra septum transversum, sed supra Præcordia

dolores ac molestiæ hic intelligantur, hic Aphorismus proculdubio clarior fiet, quippe *Præcordia* sub nomine *Phrenas* græce nuncupata, comprehendunt etiam viscera plurima sub septo transverso constituta, ut hepar ventriculum Lienem & alia adjacentia (ut patet ex anatomia) in quorum doloribus seu molestiis purgare per superiora tutius licebit, ob consensum quæ ista ineunt, cum eodem ventriculo, in cuius cavum se plerumque exonerant. Quemadmodum autem affectiones partium superiorum, ob loci promptitudinem, indicant per superiora purgandum: Ita è converso, quæ inferiores partes molestant, exigunt purgationem per inferiora: difficillime enim humores in imo ventre consistentes possent per vomitum expurgari, cum tamen promptissime, in intestina confluentes ad alvum deponantur. Nec abs re dixit Hippocrates, *qui infra sunt seu subsistunt* id est stabiles & firmi sunt; nam si fortasse vagi forent, hanc vel illam partem impetentes, non temere purgationem exquirerent, cum non bene constaret, per quas vias esset educendum, quin & metuendum foret, ne à flatibus orti commoda adhuc purgatione desinerent, quin potius exacerbarentur.

Neque verò rationi dissentaneum putandum est, non tantum evacuationibus per cathartica tantum Hippocratem locutum, verum etiam de quibuscunque aliis egestionibus supra vel infra promovendis, ut propterea sensus Aphorismi sit, in doloribus supra septum transversum, & vomitione & Anacatharsi, prout alterutra opus fuerit, utendum esse; infra septum transversum vero & dejectione & diverſi, pro loci & humoris proclivitate: non minus enim una quam alia evacuatione, corpus affectum purgari posse experimur, quamvis hic de Catharsi proprie videatur locutus Hippocrates: cæterum observandus alibi traditus Hippocratis Aphorismus: *quo natura vergit, eo ducere oportet per loca conferentia.*

Dices 1. Ventriculus est infra diaphragma seu septum transversum ergo semper erit purgandus per inferiora. *R.* Ventriculus est infra diaphragma secundum Pylorum seu inferius ejus orificium, secundum œsophagum seu orificium superius nego.

Instabis: In dolore capitis & oculorum purgamus per inferiora imò vomitus in his multum nocet, ergo non subsistit Aphorismus. *R.* si dolor capitis & oculorum est idiopathicus seu per essentiam concedo

cedo non debere purgari per superiora, si vero sympathicus seu per consensum inferiorum partium nego.

Aphorismus XIX.

Qui medicamentis purgati non sitiunt, ipsorum purgandi finis non fit, donec sitiverint.

Contentum seu Intentio.

De Purgantium pedissequa siti.

Connexio: Cum in præcedenti Aphorismo Hippocrates egisset de iis per quas fieri deberet evacuatio seu purgatio: In hoc jam Aphorismo, signum completæ purgationis, à medicamento habitæ proponit, illudque dicitur esse *sitis*, evacuationem subsequens, ut propterea eo usque purgationem esse producendam videatur asserum, quo usque sitis comparuerit.

Hic Aphorismus ob brevitatem & simplicem conclusionem, divisionem non patitur. Duplex tamen est sensus hujus Aphorismi: *Primus*: quod qui dum purgantur, non sitiunt, illis non cesset purgatio, donec sitiant: *Secundus* vero, quod cum sitiunt si non prius sitierant, finis est purgationis.

Afferit Galenus *in Comment.* quatuor causas, sitis expurgante medicamento: oritur: 1. *Ratione ipsius ventriculi, qui ex caliditate vel siccitate, vel ambabus qualitatibus promte ad siccitatem perducatur:* 2. *Ratione medicamenti, cum acre fuerit, calidum & mordax:* 3. *Ratione humoris evacuati, qui plerumque bilis amara est:* 4. *Ratione superabundantis evacuationis, per quam rorida substantiaeducta, siccitas deinde subsequitur & sitis,*

Quamvis autem hæc ut plurimum, ita se habeant, non tamen semper & ubique veritati consonant, cum non raro expertum sit, ingentem sitim fuisse subortam, absque ulla vel modica evacuatione, atque ab usu medicamenti leviter purgantis, quod sedandæ siti
usui

usui esse solet, quemadmodum fatentur de Pulpa Tamarindorum, de casia, de violis &c.

Contra vero sitis nulla vel exigua subsecuta est à cathartico vehementiori; unde fallacem nimis conjecturam plerique existimarunt succedentem ex purgatione sitim: quin & de veritate istius Aphorismi magnopere sunt veriti. Si præterea perpendantur, quæ à Galeno sunt in ejus argumentum proposita, plane alias & quidem graviores addere poterimus difficultates: Etenim si ex caliditate & siccitate sitis oriretur, proculdubio, febre hectica laborantes, immensum sitirent, nullatenus vero Hydropici; neque vero etiam propter medicamentum cum acre fuerit, calidum & mordax; neque propter humorem evacuatum, & si biliosus sit, sitis orietur; nam etiam levia & quæ benedicta vocantur purgantia medicamenta, sitim sæpissime excitant molestissimam; Et evacuato humore, præsertim bilioso, febrem & sitim inferente, utraque potius desinere deberet.

Quod præterea idem Galenus scribit *i. de simpl. medic. facult. Cap. 30.* augeri sitim, vel ob caloris copiam, vel ob humoris inopiam: *ob caloris copiam* quidem ex febribus, aëre astivo, cibis calefacientibus & exsiccantibus, purgantibus medicamentis, venenis erodentibus & id genus aliis: *ob humoris inopiam* vero, ex laboribus, vigiliis, sudoribus, & ceteris evacuationibus immodicis, neque veritati cohæret; Siquidem Hydropicos intensa & molesta sitis urget, quæ nec ab humoris inopia, neque à caloris copia dependet.

De Organo seu sitis sede, multi disceptant: nam quamvis, in *Comment.* hujus Aphorismi & alibi putaverit Galenus esse *Ventriculum*: alii tamen, non tantum ex recentioribus sed ex vetustioribus Philosophis & Medicis *pulmonem* existimarunt: Cujus sententiæ fuerunt Plato & Aristoteles. Unde sicut Edaces dixerunt eos, qui latiore ventrem à nativitate nacti sunt: ita Bibaces ex adverso, qui ampliorem & longiorem thoracem. Hippocrates etiam *libro de carnibus* id ipsum manifeste docere videtur, asserens per laryngis rimam aliquid potulenti in Trachæam & pulmonis Bronchia delabi, ad illum irrorandum & humectandum: cui consentit pariter Galenus 8. de Plac. Hippoc. & Platonis Cap. 15. Hinc idem Hippocrates infra 4. Aph. 54. inquit: Quibus

Quibus plurimum sicca tusses, leviter irritantes in febribus ardentibus sunt, non multum siti infestantur: quoniam ut subdit Gal. in comment. madescunt loca, quæ ad asperam pertinent arteriam & ideo minus siticulosi sunt. Quamobrem sæpe expertum, magis extinguere sitim usu Gargarisiorum, quibus scilicet asperæ arteriæ ductus humectatur, quam si liberalior potus ventriculum irroraret. Huc etiam facit, quod notavit pariter Hippocrates *in epidemiis* magnopere ad omnem sitim prodesse os claudere & tacere; quandoquidem ex loquela, non solum salivarius ros extenuatur & deficit sed etiam Thorax, Pulmo, & aspera arteria plurimum defatigantur & exarescunt; Si autem à ventriculo sitis oriretur, haud quaquam proficeret silentium, eo loco ab Hippocrate recommendatum, cum vox & loquela ad Thoracem, Tracheam & Pulmonem pertineat, juxta illud: *Cor sapit, pulmo loquitur, fel commovet Iram:*

Splen ridere facit, cogit amare jecur.

Atqui non raro à pastu si diutius loquamur, vehementius sitimus, etsi ventriculus, uberiori potu jam inundet.

Ex his igitur & aliis, quæ consulto omittimus, videntur plane rationes à Galeno pro expositione hujus Aphorismi supra adductæ, non minime enervari. Quamobrem ut sensum Hippocratis verius assequamur, & congruentius tueamur à vindictis, scire oportet, sitim in animantibus, induci ex defectu ejus humoris, qui per sua vasa circumfluit irrorandis partibus addicitur, *latex & lymphæ* ab Anatomicis dicitur: Etenim in statu naturali, pari circuitu, partes cunctas corporis petit, irrigat & humefacit, quo sanguis in easdem illapsus, alit fovet & in vita tuetur: Hic idem aqueus humor, glandulas salivales pervadens, fauces, linguam & guttur irrorat, atque gustui & locutioni peragendæ plurimum confert: oculos quoque oblnit: serum in Pericardio conservat, & pro Pulmonibus aliqua sui parte, in pectoris cavo colligitur; Imò universas glandulas corporis alluens, nec non articulos, membranas, Parenchymata, non solum nutritui & incremento proficit, sed etiam à plurimis morbis cuncta tutatur.

At vero sicuti in statu naturali, substantia, qualitate, quantitate convenienti, cum per suos ductus circuit, omnia hæc beneficia corpori elargitur; Ita in statu præternaturali seu morbofo, si in his deficiat, mille propemodum incommoda parit: potissimum autem sitim

excitat, si desit, totoque fere corpore exhauriatur, sudoribus, mitionibus, sputo, lachrimis, aliisque immodicis evacuationibus, siue sponte siue arte promotis. Similiter si glutinosior, falsior, acrior, acidior redditur, nequeat fauces, guttur & linguam convenienter irrigare, ut experimur in Catharris, in febribus, in subito timore, & aliquando etiam mox à pastu. Si præterea alio confluat, quam ut decet, aut alicubi restagnans, extra proprios ductus feratur ut in hydrope & diplsaco seu diabete. Quare non mirum, si diversimode sitim se dari comperiamus, non tantum largo aquæ haustu, sed & vino, ejusque spiritu; aliquando spiritu vitrioli vel salis, & cæteris multum inter se disparibus, quandoquidem non ab una eademque causa lymphæ vitium & sitis exoritur.

Naturalis præterea sitis in ventriculo quidem & in Faucibus excitatur ac persentitur: at vero morbosa & quæ præter naturam evenit, etiam in Gutturæ, Trachea, & pulmonibus, unde sæpe numero accidit, ut ingenti siti crucientur ægri, etsi ventriculus multis humoribus, etiam aqueis sit repletus, imo nonnunquam adhuc languidus & nausea affectus. Sunt insuper qui solis Gargarismis, ab ejusmodi sitis molestia liberantur; & alii inspirato duntaxat aëre frigidior: sub quo sensu dixit Hippocrates, *Tusses leviter irritantes in febribus sitim sedare & infringere.*

Purgantia autem medicamenta, postquam dissolutionem in ventriculo passa sunt, suas operationes plerumque exerunt in intestinis tenuibus, ubi irritatione simul, ac fermentatione indebita, cum liquoribus, felleo & Pancreatico perpetim inducta, eos primum humores diluunt, & extenuant, qui tunicis & glandulis, eorundem impacti, facum depositionem non raro etiam remorantur; Unde prima alui exoneratio, tota ferme stercoraria esse solet. Mox si ejus sunt efficacitatis, ut lacteas venas subeant, atque etiam cum sanguine, secundum partes saltem tenuiores misceantur ipsum fundunt, & Glandulas potissimum mesenterii laxant, & exturbant & extenuant, ideoque vasa lymphatica illuc pertingentia, pari molestia cogunt lympham ubertim effundere & quandoque etiam sanguine tinctam, ut in hypercatharsi contingit. Quoniam vero in Glandulis præsertim, solent vitiosi & inutiles humores hære, cum ob spongiosam earundem substantiam facile suscipiant, & difficulter deponant, quos
seinel

semel humores exceperunt, id circo fit, ut nunquam à Catharticis congrua purgatio sit successura, nisi glandulæ malis humoribus sint inanitæ, & ex præterlabente lymphæ quodammodo deterfæ, ut inde universalis corporis purgatio, & veluti purificatio habeatur. Hinc modo ad expositionem, præsentis Aphorismi dicendum; Hippocratem hoc loco de ea purgatione habuisse sermonem, quæ ex medicamentis vere purgantibus & catharticis universalibus dictis peragitur, neutiquam vero de laxantibus solum & lenitivis appellatis, quæ utrum antiquis cognita fuerint, alibi discussum est. Ea vero cum sit addicta, purgandis non solum primis ductibus corporis, sed etiam intimioribus ejusdem partibus atque à ventriculo remotissimis, plane in glandulas mesenterii & Pancreatis, imo in Arterias & Venas, vires suas diffundunt: quamobrem non tantum excrementa in iisdem primis ductibus stagnantia, sed etiam penitiores alios humores, tum utiles tum alibiles, sed degeneratos, exturbant & evacuant; & quoniam cum his, multum Lymphæ pariter educatur, emunctis fere glandulis universis, proinde ingens sitis ad ejuscemodi purgationem subsequitur, quam Hippocrates hoc loco, veluti signum completæ purgationis in toto corpore specialiter consideravit, ut proinde dixerit: qui in medicamentis, scilicet catharticis & universalibus purgati, id est, humoribus, sive quantitate sive qualitate peccantibus inaniti, non sitiunt, non cessant purgari, priusquam humores ex glandulis & ex vasis sanguineis ac Lymphaticis, educti non fuerint; ut propterea ab horum evacuatione sitire cogantur. Hinc sitis subsequens à medicamento purgationem, non est generale indicium cujuscunque evacuationis à cathartico habitæ, sed ejus duntaxat, quæ à vehementioribus inducitur, atque totius fere corporis est, cum Lymphæ & feri sanguinis educatione. Quod si præterea Hypercatharsis subsequatur, proculdubio sitis molestissima accidet, præter alia & graviora symptomata, immodicam & inconvenientem evacuationem comitantia de quibus Galenus *Comment. 36. & 37. 2. Lib. Aph. & alibi.* Quamquam autem videatur Hippocrates in hoc Aphorismo ex superveniente siti, completam purgationem determinare, non tamen putandum, metam exinde præfigi, in quibusvis evacuationibus promovendis: sitis enim ex medicamento purgante proveniens, designat solum maximam in humoribus & partibus so-

lidis motionem, unde licet purgationi superveniat non tamen illam sistit, sed attenuato & dissoluto nimium sanguine potius augere potest. Quare si fortasse purgati non eo devenerint, ut sitiant, non idcirco sunt ad sitim subeundam, alio forte medicamento purgante cogendi, ne utiles humores dissolvantur, sanguis fundatur & Hypercatharsis subsequatur omnino perniciofa: quoniam ex eodem Hippocrate, evacuationes non sunt multitudine aestimandæ, sed si talia deiciantur, qualia conveniunt, & ægri facile tolerant, 1. *Aph.* 23. Præterquam quod infidele signum est, in purgationibus sitire, cum interdum sitiant à medicamento ægrotantes, nec tamen bene sint purgati, & aliquando sitiant, ex peculiari ventriculi constitutione, quandoque etiam à conditione medicamenti, ab æstu aëris, à morbo, & aliis innumeris causis.

Notabile vero est, quod monet Cardanus hoc loco, multum conferre motum ad juvandam purgationem, cum catharticum sitim non inducit, ne scilicet aut penitus non purget, aut parum & imperfecte, deducto argumento ex præcedenti *Aphorismo* 15. *cum volueris ducere Helleborum, move corpus.* Etenim assumpta medicamenta, quæ non purgant, plerumque nocua sunt & mortifera, nisi ejiciantur, ut contigit adolescenti Eubæo s. *Epidem.* Verum enim vero pluries expertum in praxi, magnopere promoveri purgationes, Catharticum epoto juscule diluto, vel sero lactis depurato imò in Italia usitatum, epota aqua frigida, quin imò usitatissimum est Medicis Romanis, largissimas aquæ gelidæ portiones commendare iis, qui catharticum assumpserunt, ut subinde abundantius egerant, & absque siti, laxatis nimirum & humectatis ductibus, atque lubriciori aluo reddita, quæ non raro constipatur & contrahitur, à medicamento fibras intestinorum ex irritamento corrugante & convellente.

Dices Autopsia docet, quod homines optime purgati, minime sitiant, ergo falsum est bonam purgationem sequi sitim. R. Non semper opus esse, ut diximus, sitim sequi: Nam sicut in febribus ardentibus, nulla adest sitis; In his enim & aliis casibus adest aliud stomachum rrigans, humectans, sitim impediens.

Aphorismus XX.

Febribus expertibus, si tormina adsint, & genuum gravitas, & dolor lumborum, inferna purgatione opus esse significant.

Contentum seu Intentio.

De Notis Purgationis per alvum.

Connexio: Adeo cum decimo septimo Aphorismo, præsens coheret Aphorismus, ut revera pars illius esse videatur: Ibi enim tradidit Hippocrates, signa purgandorum humorum per superiora: Hic num Indicia profert, quibus internosse liceat; purgationem esse faciendam per inferiora: Et sicut ibidem de non febricitantibus sententiam protulit; Ita hic etiam febricitantes excipit, dicitque Tormina seu Cruciatus, circa umbilicum, gravitatem genuum & lumborum dolorem citra febrem, indicare purgationem per inferiora molliendam; Unde oportebat hunc Aphorismum antè scribi, ut connexa oratione notarentur signa utriusque evacuationis per superna & infera promovendæ.

Hic Aphorismus simplex est & divisionem nullam patitur: Recenset itaque Hippocrates in hoc Aphorismo tria signa demonstrantia, purgationem faciendam per inferiora: Tormina nimirum seu Cruciatus circa umbilicum: Genuum gravitatem: & lumborum dolorem; quæ sane denuntiant humorem, infernas partes occupantem, ut etiam superius ostensum est. At vero speciatim hæc tria memoravit, non quod alia id ipsum indicent, sed quod per hæc necessario purgandum sit, ne humores, in iisdem partibus affectis firmati, graviora mala afferant, vel saltem irresolubiles deinceps fiant; quamobrem non immerito adjectum est *opus esse*: Excipiuntur autem febricitantes quoniam in his ejusmodi signa, non semper indicant materiam humoralem, vel omnino purgatione educendam; siquidem non raro in febribus, decubitus humorum ad eas partes denuntiant criticas motiones, vel abscessus ad articulos,

unde à purgante medicamento, esset abstinendum, ne motus criticus naturæ impediretur, aut alio distraheretur, non sine febriculis documento. Cæterum semper ac ejusmodi accidentia, ab humoribus contingunt, qui in inferiores partes tendant, purgatio non poterit non esse salutaris, cum & loci promptitudinem, & humoris gravis vergentiam, & facilem à purgante medicamento evacuationem illa denuntient.

Verum tamen animadvertere oportebit, an non faustus ac salutaris eventus ejusmodi evacuationem subinde subsequatur. Quippe nisi statim profecerit, verendum ne à majori commotione humorum, & tumultuaria viscerum naturalium concussione, futurus sit gravior affectus, in imo ventre, cujusmodi siccus hydrops ab Hippocrate *Aphorismo II. hujus libri* præfagitur. Quare vitanda erunt ea, quæ in purgationibus nimium exagitant, & flatus excitant; sed potius, in usum ducenda sunt, quæ gratiora visceribus, sine ulla perturbatione, vitiosos humores blande subducant, & amicabiliter alliciant.

Aliam rationem adhuc affert Galenus, cur febricitantes excipiat Hippocrates, ut nempe & Paroxysmorum & Crisium habeatur ratio, in iisque caveatur purgatio, quæ motum naturæ impedit; præterquam quod medicamenta calida, febrium augeant calores; Deinde si essent cum febre, non tantum purgationem sed etiam, imo potius venæsectionem requirerent, quia tales dolores, plerumque denotant inflammationem, nisi sint à flatibus, qui tamen in febribus sunt rariores, siquidem generati, à calore febrili discutiuntur, vel eorum generatio impeditur.

Dices I. Quando ejusmodi symptomata, ut tormina, genuum gravitas &c. adsunt in febribus, quandoque etiam indicant purgationem, ergo febres excipi non debebant. *R.* Si materia turgeat concedo, sed hic Aphorismus non est intelligendus de materia turgente.

Instabis Nec cruda materia, nec in principiis morborum est purgandum, nisi materia turgeat, ergo in torminibus, genuum gravitate &c. erit purgandum. *R.* Nondum esse hic principium morbi, nisi principium latius sumatur, pro ejus imminetia, quando nimirum causæ

causæ morbi paulatim dispositiones faciunt, ad morbum generandum, hoc autem tempore purgare licet, ad prophylaxim, præparata tamen prius materia.

Quæres 1. Utrum dolori renum à calculo, etiam debeat purgatio? *R.* Affirmative, suo tamen tempore, sic enim materia antecedens calculi ex stomacho, intestinis &c. expurgatur.

Quæres 2. Cur in dolore renum à calculo, æger non purgetur per superiora, cum, ut experientia constat, plurimum vomituriat, & *quo natura vergit eo ducenda est?* *R.* In dolore renum à calculo, homines quidem vomiturire, nempe ob Sympathiam renum, ureterum & ventriculi, mediante peritoneo & nervis; sed id non fit per loca conferentia, quod requiritur.

Aphorismus XXI.

Excrementa alui nigra, sanguini atro similia, sponte euntia, sive cum febre, sive citra febrem, pessima: Et, quanto ipsorum colores pravi, fuerint plures, eo deterius, à medicamento autem, talia exigere, seu egeri melius est, idque quanto ipsorum plures fuerint colores, non malum.

Contentum seu Intentio.

De sedibus nigris & variegatis in genere.

Connexio: Cum de inferna alui purgatione, multa hætenus Hippocrates dixisset: In hoc Aphorismo, de alui excrementis sermonem instituit, quæ magni sunt ponderis & considerationis, sive sponte veniant, sive opem medicamento educantur.

Hic Aphorismus duas habet partes; *Prima* docet excrementa alui nigra, sanguine atro similia, sponte exeuntia pessima esse: *Secunda*

cunda veto statuit, minus mala esse excrementa, si à medicamento educantur.

Quæres Quænam autem sint istæ dejectiones nigræ, sanguini atro similes? *℞.* Certe eas hic Hippocratem non intelligere quæ atrabiliaria dicuntur; de quibus infra.

℞. 2. Neque eas quæ concretum & nigrum sanguinem referunt aut proprie sanguineæ sunt, quippe non dixisset, *sanguini atro similes*; ubi similitudinem tantummodo non substantiam, vel qualitatem in excretionibus notavit.

℞. 3. Neque præterea eas esse humorem illum quem melancholicum appellant, ut in *Comment.* Galenus interpretatur: Etenim dixisset, dejectiones nigræ bilis, quemadmodum veteres melancholiam nuncupare consueverunt; sed & neque ejusmodi melancholicus humor uspiam reperitur, cum satis superque à recentioribus ostensum sit, quaternarium humorum numerum fictitium esse, & qui in liene fingitur, potius acore quam crassitudine aut nigredine talis appellatur; & si fortasse in alvum decumberet, non quidem per venas, sed per arterias illuc mearet, adeoque simul cum sanguine effundi deberet, quemadmodum in Hæmorrhoidibus; cum tamen nullius harum evacuationum meminerit hic Hippocrates.

℞. 4. Pari modo, reliquæ ejectiones nigræ, ab adusta bile vel pituita, perperam à veteribus excogitatæ, veluti omnino commentitiæ, rejiciendæ aut melius explicandæ sunt, quæ & hic neque aptari possent, ubi istiusmodi nigræ dejectiones, etiam sine febre pessimæ referuntur, cum cæteroquin adusta pituita & bilis, non nisi cum acutis febribus, jungi posse perhibeantur.

℞. 5. Verisimilius itaque putandum cohærenter Anatomia, *dejectiones nigras* in hoc Aphorismo ab Hippocrate memoratas fieri vitio succi Pancreatici acido-austerioris redditi, & præter naturam fermentantis, tum bilem è ductu cholidocho defluentem, sed crassam & inertem seu effoctam, tum partem cibi depravatam & corruptam efficit: ea enim est conditio istiusmodi acidi humoris, cum austerior fit, ut compingat simul & in atrum commutet, quidquid crassiusculum adjicitur, eo ferme modo, quo fieri experimur ex acido vitrioli cum alkali gallarum in atramento scriptorio, & potissimum compactiori; cum

cum enim Pancreaticus hic humor, à naturali statu recesserit, & ponticam austeritatem acquisierit, sic felleum humorem imbibit, crassa præsertim pituita seu lymphæ conjunctum, quibus ejus acor prævalet, ut in Hypochondriacis, scorbuticis, lienosis, & aliis solent ejuscemodi atræ egestionem comparere, quæ vulgo melancholicæ appellantur. Quod si acidum illud etiam in liene exorbitet unde sanguis è ramo splenico, in mesentericum derivans, trajiciatur in arterias, indeque etiam in venas, quæ turgidæ & varicosæ hæmorrhoidales cæcæ nuncupantur, proculdubio egestionem quoque promovere poterit consimilis atræ coloris, & non raro etiam concreti sanguinis, si diuturniorem moram ibidem contraxerit, ut sæpe sæpius observatum. Et quamvis in Aphorismo videatur similitudo potius notata, ut propterea non sanguis niger, sed alius humor nigro sanguini similis designetur; si tamen ex græco codice, verba textus examinentur non videtur concretus & nigricans sanguis, ab ejusmodi dejectionibus exclusus, unde Fuchsius exponit, *veluti sanguis niger*; & Heurnius *cujusmodi est sanguis niger*, id est ab acido austeriori concretus & ater redditus.

Dejectiones præterea istæ pessimæ censendæ sunt, cum sponte processerint; *Sponte* quidem, quoniam significant talem ac tantam esse humoris virulentiam, ut sponte sua, nullo adigente medicamento, viam faciat, & exitum sibi paret. *Procedentes* vero, id est, non semel exeuntes sed iteratis vicibus, & per universam fere morbi latitudinem perseverantes, etiam inter initia. Siquidem symptomaticæ evacuationes, solum à principio comparent & continenter perseverant: at vero criticæ statim absolvuntur & non nisi circa declinationem accidunt. Unde si dejectiones istæ nigrae semel tantum appareant, non erunt æque malæ, ac si integra morbi duratione perseverent.

Neque vero est necesse illas cum febre conjungi, ut malæ sint, quoniam haudquaquam à febris societate, malitiam suscipiunt, sed ab humoris exeuntis conditione, ac pravitate, & à viscerum dyscrasia. Quare perinde erit, si febris adsit vel absit. Est tamen verum, quod longe peiores censendæ erunt, si febrem comitem habeant: nam præter morborum & symptomatum pluralitatem, arguunt quoque sanguinis vitium, & indebitam inductam in illo fermentationem, & cordis, aliorumque

viscerum læsionem; idque sive febris symptomata, sive essentialis dicta putetur.

Cæterum *peffimas* dixit Hippocrates non *exitiales*, sicut de atra bile pronuntiavit, & cum ad morbos acutos, vel diuturnos cum extenuatione, ac languore consequuntur: Etenim istæ medelam non admittunt, ut inferius ostendemus; at vero, quæ hic memorantur, poterunt artis industria, temperari & corrigi, si potissimum diu non perduraverint, & vires aliunde constiterint, in ætate non admodum pro- vecta: quod sane præstari poterit, usu roborantium medicamento- rum & acidum superabundans corrigentium, qualia præsertim sunt ex chalybe composita, & alkalina appellata.

Verum enim vero, pravitas & pluralitas *colorum* apparentium in excretis augent malitiam & periculum affectorum: an quia ex humo- rum heterogeneitate, varia quoque viscerum dyscrasia significatur, quæ propterea non tam facile queat artis auxilio emendari: an quia extremam denuntiant corruptelam, varii pluresque humores dege- nerati in virides & porraceos, æruginosos, lividos & atros. Unde idem Hippocrates 2. *Aph.* 24. dicebat: *In profluvii alui, mutationes excrementorum juvant, nisi ad mala mutatio fiat.* Pluralitas autem colorum in excretis, hoc loco intelligitur eorum, qui omnino præter naturam sunt, secus vero si secundum naturam forent: quamobrem recte in textu dicitur & quanto colores *pravi* fuerint plures: Pravi autem colores à naturalibus, & consuetis penitus declinant, cujus- modi esse solent vitellini dicti, porracei, æruginosi, lividi &c. Atque hinc facile occurri poterit difficultati, ex præcitato Aphorismo Lib. 2. *Aph.* 24. ubi mutationes excrementorum utiles referuntur, cum hic dicantur perniciosæ: Ibi enim mutatio fieri intelligitur in colori- bus naturæ consuetis, & à malis in bonos: hic vero in morbofis & de malis in peiores ac pessimos.

Sed cur à Medicamento procedentes, nigræ dejectiones me- liores reputandæ sint? &c. Et quidem nigras non solum, sed & flavas, virentes & alias dejectiones vi Medicamentorum habitas nemo am- plius reformidat, cum unicuique compertum sit, eas potissimum consequi conditionem & tincturam medicamentorum: Rhabarba- rum enim ad flavum, Senna & Cassia ad nigrum, Agaricus ad album excre-

excretos humores colorant; quin pro varia eorundem excrementorum vi & miscela, multi quoque & varii colores in excrementis comparere solent, & non raro absque ullo viscerum vitio, aut morborum constitutionis vestigio. Sed etsi morbificam causam consequantur, adhuc decedentes, ex assumpto medicamento, humores pravi, validam arguunt naturam, & se ipsos non adeo rebelles, ut eidem evacuanti obsistant, vel non statim obsequantur. Non tamen hinc quis existimet omnino periculo vacare, quæ à medicamento prava & atra seu livida procedunt: Etenim Hippocrates non simpliciter, nigras dejectiones, ope medicamento habitas, bonas dixit, sed meliores, comparate nimirum ad eas, quæ sponte naturæ contingunt; nam nigræ dejectiones, ex pravis humoribus, semper malæ existimandæ sunt, eo quod denuntient, pravas inesse corpori dispositiones, unde nigræ illæ prodeant, adeo à naturali statu recedentes.

Postremo advertit Hippocrates, quo plures colores in excretis, à medicamento comparuerint, eo minus malos esse, quoniam universam humorum colluviem, omnemque malum corporis apparatus inde evacuari significatur, adeoque naturam medicamento adjutam, potuisse modico temporis intervallo, vitiosos humores deponere & expurgare, absque partium solidarum noxa sensibili. Colores autem plures & non pravi, si omnino secundum naturam sint, certe non tantum meliorem sed etiam optimam indicabunt egestionem ut antea ex Aph. 24. Lib. 2. est memoratum: si vero præter naturæ morem accidant, denuntiant quidem profuturam evacuationem, in genere causæ, cum pravi humores excernantur: at vero in genere signi, malam saltem arguunt viscerum dispositionem, unde tam prava colorum varietas exoriatur.

Dices. Lienosi juxta Hippocratem intestinorum difficultate, rejectis nigris excrementis liberantur, ergo non sunt tam malæ, ut dicit Aphorismus, &c. Lienosi intestinorum difficultate liberantur in principio, nego, in declinatione & facta humorum concoctione concedo: Aphorismus autem intelligitur de iis quæ in principiis morborum rejiciuntur. Sic etiam in alio loco Hippocrates excretionem nigras in declinatione febrium, quæ fiunt, cum euphoria & materia jam concocta bonas denuntiat, non vero in principio morbi, materia adhuc existente cruda & cum dejectione virium.

Instabis Hippocrates in hoc Aphorismo dicit in febribus & extra febres, ergo non intelligendus in declinatione, maxime extra febres. *℞.* Hic declinationem semper dici, quando materia jam concocta est, adeoque potest etiam esse extra febres.

Urgebis: Humor lividus & æruginosus, non suscipit concoctionem, sed perniciem, ergo nunquam potest esse salutaris ejus excretio. *℞.* Non suscipit concoctionem stricte dictam, ut reddatur naturæ aptus, concedo, late dicta, ita ut separetur ab aliis humoribus & corrigatur nego.

Quæres Utrum dejectiones nigrae cum febre peiores sint quam sine febre? *℞.* affirmative quia duplex est lucta naturæ, cum febre & humore.

Dices Hippocrates alio loco dicit dejectiones nigras sine febre esse pessimas cum febre peiores. *℞.* posse dari pestem sine febre, & in hac dejectiones nigras esse pessimas.

Aphorismus XXII.

Morbis quibusvis incipientibus, si atra bilis supra, infra ve exierit lethale.

Contentum seu Intentio.

De alui fluxibus & vomitibus atrabilaris in morbi principio.

Connexio: In præcedenti Aphorismo egit de solis dejectionibus per alvum, hic de utrisque, nempe supra & infra: Præterea in præcedenti Aphorismo, egit de excrementis nigris, in genere, & illa simpliciter vituperavit: Nunc autem in specie quæ atræ bilis conditionem referunt, omnino exitiales & lethales asserit; de quibus dicit Galenus, se neminem unquam vidisse qui evaserit.

Hic Aphorismus ob simplicem conclusionem & brevitatem non admittit divisionem.

Dicit Ergo Hippocrates, excretiones atræ bilis αἷμα καὶ πατὸς esse lethales; & quidem incipientibus morbis, solummodo atræ bilis evacuationem exitialem esse docet; quandoquidem, *nil tunc excer-*

nitur

nitur (inquit in Comment. Galenus) *natura ratione, sed omnia sunt symptomata earum, quæ præter naturam sunt in corpore dispositionum; unde cum adest cruditas humorum, aliquid utiliter evacuari est impossibile; siquidem oportet coctionem præire, subsequi vero discretionem, & postea evacuationem, ut bona sit crisis.* Hinc communi voto damnantur à Medicis evacuationes habitæ in principiis morborum, cum vel multitudinem vel pravitatem significant: at vero iisdem declinantibus, & post humorum coctionem, quælibet excretio salutaris est, velut procedens à victrice natura, corpus à suis impuritatibus repurgante.

At quamvis cujuslibet humoris evacuatio, inter initia morborum mala sit, longe tamen periculosior erit, si atram bilem redoleat. Dicitur autem à Medicis *atra bilis*, humor ille, qui colore nigricat, sed non concrefcit, ut sanguis, imo in terram decidens fermentescit, & bullas excitat, velut acetum & vinum, lumini objectum splendet, & acrimoniam & mordacitatem sapit, quamobrem viscera, per quæ transit, erodit & ulcerat, instar aquæ stygiæ: Hinc inter humores omnes, qui statum corporis morbosum consequuntur, pessimus hic omnino reputatur & venenosus, veluti extremam nactus corruptionem, vitæ penitus inimicam.

Verum quo pacto, ejusmodi deleterius humor atrabilarius, in humano corpore generetur, non inutiliter quæri potest. Hætenus est creditum, bilem duplicem, in humano corpore reperiri, naturalem unam & alibilem in venis una cum sanguine contentam; alteram non naturalem & excrementosam in Cysti fellea collectam, ac continenter in tenuia intestina confluentem; fieri autem ut eodem agrotante, vi atque pernicie morborum, viscera & præsertim jecur intemperetur, atque ejusmodi biliosi humores putredine & exultione degenerent, in vitellinos, croceos, mox etiam in æruginosos, porraceos, ac denique in atrabilarios, extremum corruptionis terminum designantes, qui propterea veluti summe recedentes, à consueti naturæ statu, ubicunque comparuerint, lethum prænuntiant.

Sed jam satis superque ab acuratiore Medicis & Anatomicis, de bile in venis contenta, excogitata & vana ac futilis opinio detecta est, ut de illa ulterius verba facere vix non pudeat: Solum bilem in cysti fellea contentam, & per cholidochum in intestinum jejunum transmissam, gravem & nocuam mutationem subire posse constat ex Anatome, si nimirum, indebita fermentatione cum aliis humoribus, & præsertim Pancreatico, illuc confluentibus, præter morem invertatur, & non tantum colore, sed etiam acredine & malitia, commutetur, in naturam ferme deleterium: Unde apposite quidem Galenus *6. de locis affect. cap. 5.* animadvertit, generari non raro posse in humano corpore humores veneno similes, qui scilicet id ipsum agant, quod à venenis assumptis, vel inflictis fieri experimur.

Et quidem, si felleus iste humor, acer & oleosus redditus, cum acido Pancreatis, vel alio commisceatur, in intestinis tenuibus, ita ingenti fermentatione exacuitur, ut erodendi vim adipiscatur; neque solum in intestinis, sed & in ventriculo, ex depravato ejusdem fermento, & corruptis cibis; pariterque ex lymphâ acriori, cum fermento glandularum vitiato. Nec dissimilem pati solet serum urinarium depravationem, si acrius sit & sale acidior inspergatur: Ita quoque si menstruus sanguis, atque alia uteri recrementa, fermentis hystericeis coinquantur & subsistant. Quamobrem ubique ex mala atque indebita mixtura fermentorum poterunt pravi & deleterii humores progigni, & è diversis egeri emissariis, venenorum naturam redolentes, unde erosiones, pustulæ, ulcera, gangrænæ, aliaque hujus generis perniciosissima mala.

Quoties itaque ex inconvenienti mixtura ac fermentatione succorum alii, & quidem præter naturam exorti, præsertim acres, atrii, & venenosi per alvum aut per os egeruntur multis ex rationibus, mortem prænuntiant; quippe significant viscera, non bene suos humores secernere & repurgare, sed potius ex vitiata textura & crasi illos inficere; unde fermentationes, dissolutiones, & distributiones alimentorum, pessimæ fiunt, in prægrande virium dispendium: Sed & humores ipsi depravati, acritudine veluti arsenicali, & acore ferme vitriolico, partes quas pervadunt; pungunt, erodunt, ulcerant, & gangrænam aut sphacelum inferunt; Imo sanguinem ipsum, aut coagulando aut exsolvendo ineptum circulationi reddunt: Infecto
vita.

autem sanguine, & vel concreto vel exoluto motus cordis desinit & vita. Caterum egestionis istiusmodi, aut supra aut infra habitæ, sunt nobis tantum indicia, quibus malam viscerum & fermentorum constitutionem conjiciamus jamjam lethum comminamur, nam non ex eo, quod nigra prodeant, sed quod intus genita vitæ fontem inficiant & corrumpant, mors imminet.

Dices 1. Quo magis natura levatur à suo onere, eo melius sese semper habet, sed in principio morbi levatur à suo onere natura, ergo. *ꝛ.* Nego minorem, quia non est motus criticus à natura vincente, sed symptomaticus à morbo & causa morbi factus.

Dices 2. Febris quartana fit ab humore acido putrescente ergo ab atrabile, sed febris quartana, non est tam lethalis ergo morbi ab atrabile, non sunt tam lethales. *ꝛ.* Si sit vehemens putredo acidi humoris, potest fieri perniciofa, sive jam atrabilis aut quocunque nomine vocitetur: talis autem vehemens putredo, non est quæ quartanam generat, imo tamen quandoque esse potest, cum patulum sit non raro quartanarios mori.

Aphorismus XXIII.

Quibus per morbos acutos aut diuturnos, aut vulnera, aut alium modum extenuatis, atrabilis, aut velut sanguis niger subierit, postridie moriuntur.

Contentum seu Intentio.

De excretis nigris, in extenuatis à morbo.

Connexio: Videtur hic Aphorismus multum cum 21. hujus libri congruere: Verum cum in duobus præcedentibus Aphorismis dejectiones nigras, universim supra quam infra vituperasset Hippocrates; Nunc in hoc præsentis Aphorismo specialius, exitiales eas asserit in extenuatis; Decernit enim, nigram bilem aliumque nigrum humorem, per inferiora excretum, in valde extenuatis, postridie seu altera die mortem portendere.

Hic

Hic Aphorismus non dividitur, cum in solo prognostico consistat. Cum igitur indefinite asserat, paulo post successuram mortem iis, qui extreme extenuati sunt, si nigra dejecerint, inutilis proculdubio, censenda est quorundam interpretum controversia, qua ambigunt, num de atrabile proprie dicta, an vero de melancholia sermonem habuerit. Nam quæ adjecta sunt; *aut veluti sanguis niger*: manifeste declarant, omnem cujuscunque humoris nigri dejectionem voluisse Hippocratem comprehendere, ut proinde parum aut nihil intersit, num bilis atra, an melancholia, vel alius niger humor, egeratur, modo corpus, vi morbi sit extenuatum; etenim imminentis mortis causa proprie ad languorem, & corporis extenuationem refertur; unde hujus Aphorismi rationem afferens in *Comment.* Galenus, subdit: *est enim in talibus* (id est extreme extenuatis) *Natura imbecillis, adeo ut non possit concoquere, neque discernere, neque excernere, quæ ita prava existunt.* Quin Heurnius, historiam cujusdam Ducis militum refert, qui cum diu quartana febre laborasset, indeque macrasset, tandem à concreti sanguinis per alvum excretionem, postridie obiit: Porro in hoc, nec atra bilis, nec melancholicus humor prodit.

Quamvis autem hoc loco, nigrae solum dejectionis, sive atræ bilis sive melancholiæ, aut fœculenti sanguinis Hippocrates meminerit, veluti omnino exitialis in extreme emaciatiss; non tamen hinc erunt eximendi aliorum humorum, imo etiam ipsius sanguinis & chyli egressus inconvenientes: Etenim *Lib. 5. Aphorismorum & alibi plurimis in locis*; tabidos etiam brevi morituros ait, si alvus immodice solvatur, sed, si dejectio nigra, lethalis est emaciatiss seu extenuatiss, ob extremam maciem & virium languorem, sane longe periculosior erit dejectio sanguinis, aut chyli, quod arguat summam naturæ labefactionem, quæ difficillime in extenuatiss remittitur. Quare in his quælibet evacuatio magni facienda est, sed ejus potissimum humoris, qui tuendæ vitæ magis conferat, cujusmodi est sanguis & chylus.

Sed

Sed quod de dejectione Hippocrates adnotavit, an exponi quoque possit de *Vomitu*, non irrationabiliter ambigitur, cum atram bilem, inferne vel superne exeuntem mortiferam præcedenti Aphorismo pronuntiaverit. Et quidem si causa, instantis mortis provenit ex extrema macie, & summo virium languore, nulli dubium est, quod etiam vomitus niger, valde extenuatis lethalis sit: Raro autem tabefactis & languidis vomitus accidit, quibus præ summa virium jactura, vomendi conatus nullus esse potest; unde factum puto, hanc evacuationis speciem Hippocratem reticuisse.

De cæteris evacuationibus, veluti per urinam, sputum; itemque furfures, sudamina, rubercula, adhuc dubitari potest, an non citam mortem portendant, si nigra compareant, in extenuatis: Et dicendum lethalia plerumque indicia esse, sed non ad tam breve tempus, ut postridie mortem afferant; imo dubiam aliquando fieri conjecturam, cum ob morborum, sive acutorum, sive chronicorum, eorumque temporum varietatem, diversimode sit prognosticandum; atque aliter in viris, ac in foeminis, & aliter adhuc in Epidemiis constitutionibus: de qua re legendus idem Hippocrates in *Epidemiis* & prognosticis.

Quoniam vero hic solum nigri cujuscunque humoris lethalem exitum in extenuatis adnotavit, videndum cujus generis extenuatos intelligere voluerit. Interpretes communiter eos exponunt, quibus non tantum spiritus & humores consumpti sunt, sed etiam solidæ partes exhaustæ, tum acutie & pravitate, tum morbi longitudine, cum evacuatione conjuncta: Etenim extenuatio talis ac tanta esse debet, quæ virium dissolutionem & Naturæ languorem inferat, ut proinde vitiosi humores sponte sua effluant: Nisi enim penitus extenuati forent ægotanter, profecto non tam citam mortem subirent, ut in Aphorismo dicitur, quando quidem plurimi ab eodem Hippocrate referuntur, in *Libris Epidemiorum*, quæ nigra dejecerint, & minime obierint, vel saltem in longius tempus vitam protraxerint: Sic Herophon ægrotus tertius in *Epidemiis* quinta die nigra dejecit, & decima septima judicatus est: Et æger tertius 3. *Epidem. Sect. 1.* qui decumbebat in Dealcis horro, quinta, sexta & octava die, ac denuo decima quinta & decima septima, & per universum fere morbi decursum nigra egressit, & grave olentia, quadragesima tamen perfecte convaluit.

De tempore tandem Jure etiam dubitari potest, num in principio solum, an solum in augmento, & statu, aut in declinatione, comparentes nigrae dejectiones exitiales sint, an vero quocunque tempore indiscriminatum. Et sane, cum de extenuatis sermo sit, nequit intelligi de morbi principio, quando omnia symptomata debilia & levia sunt, nec tantus marcor esse potest, quantus videtur exactus, ad carniū dissolutionem & viriū languorem; quin & Hippocrates ipse *per morbos acutos* dixit, vel *diuturnos*: modo diuturni morbi dicuntur, qui quadragesimam diem transilierunt. Ad declinationem vero ducti, nunquam morbi lethales esse consueverunt, etiam ex documento Galeni 3. *de Crisibus cap. 5. dicentis: Nemo unquam vi morbi, in ejusdem declinatione mortuus est, nisi solum ex accidenti, aut ex aliquo errore commisso, vel à Medico vel ab aegroto.* Igitur vel in augmento & statu morborum, id evenire fatendum; in augmento quidem, si morbus fuerit acutus, quippe tunc extenuatio provenit ex virulentia, quemadmodum in Pestilentiis: In statu vero, si fuerit chronicus, cum ex ipsa morbi diuturnitate, corpus languefiat, & contabescat.

Dices I. Vulnerati non extenuantur, neque atris abundant humoribus ergo tales humores ante mortem, non rejiciunt ante mortem juxta Aphorismum &. negando antecedens, nam post ingentes hæmorrhagias etiam extenuantur vulnerati, & accedente febre, humores aduruntur, præcipue sanguis, si sit extra vasatus, qui postea nigri, ante & post mortem rejiciuntur.

Dices II. Evacuantur in tali casu talia, qualia oportet, nempe humor niger, qui est toto genere præter naturam, Ergo bene. &. Et si talia evacuentur qualia oportet, tamen quia id fit, in corpore extenuato, & sine Euphoria sed cum spirituum & viriū dissipatione & debilitate.

Aphorismus XXIV.

Dysenteria, si ab atra bile incipiat, lethalis est.

Con-

Contentum seu Intentio.

De Dysenteria ab atra Bile.

Connexio : Cum in Antecedentibus, de atræ bilis dejectionibus dixisset Hippocrates, eas vituperans, & non nisi cum ægri exitio provenire posse: In hoc præsentî Aphorismo, particulariter & in specie de Dysenteria seu difficultate intestinorum incipiente loquitur, quæ ex atra bile originem ducit, eamque lethalem pronuntiat.

Hic Aphorismus ob brevitatem & simplicem conclusionem, divisionem non patitur.

Igitur inter plurima damna, quæ atra bilis deorsum excreta, afferre potest, memorat hoc loco Hippocrates Dysenteriam veluti frequentius ex illa procedentem, cum infernas partes petierit, in alvum delata. Est enim Dysenteria græce, latine difficultas intestinorum, frequens, cruenta & dolorosa dejectio; quamquam nomine Dysenteria, quicumque alvi fluxus, cum dolore junctus, non raro intelligatur, ut propterea Diarrhæam quoque comprehendat; quemadmodum deducitur ex Galeno 3. de Symptom. causis Cap. 8. Plerumque illa fieri dicitur, ab humoribus acerbis, qui vellicando intestina & dolorem afferant cum torminibus, & sæpius compellant ægros excernere: Nonnunquam etiam à mucosis & falsis humoribus, qui tenacitate assiduo torqueant, falsedine vero erodant, & ulcus inferant.

Et quidem ab his inducta Dysenteria, non tam facile sanatur, imo omnino lethalis dicitur, si ab atra bile inceperit, quoniam ab illa non solum intestina ulcerantur, sed exeduntur & mortificantur, ob virulentam ejusdem conditionem. Atque hinc monendi sunt, quicumque rem medicam sunt facturi, ut non tam glutinantibus remediis Dysenteria opitulentur, quam corrigentibus, & acidos ac acres humores temperantibus: quo pacto, non semel vidimus Dysentericos veluti repente sanatos, hujusce generis medicamentis tormentilla, bistorta, plantagine, centinodio, verbasco, baccis sambuci, croco martis, colchotare vitrioli, hæmatite, sanguine leporino, & similibus. Hac quippe ratione, non solum affectis intestinis consulitur, sed specialius humori ulceranti & corrumpenti, unde affectio ortum ducit, quemad-

modum ex antea traditis facile est deducere, & ex Praxi magis elucescit.

Dices I. Hippocrates dixit mox supra Aphorismo 22. morbis quibusvis incipientibus, si atra bilis supra vel infra exierit malum, Ergo frustra hunc repetit. *R.* Sub hoc Aphorismo praesenti, mortem adhuc certiolem indicari.

Instabis: Curantur Dysenteriae ab atra bile provenientes Ergo. *R.* Curantur si criticae sunt concedo, symptomaticae & incipientes nego: Sic etiam dicit in Aphorismo 6. quod lienosis superveniens difficultas intestinorum bona sit, Critica nempe, non symptomatica.

Urgebis: Dejectio atrae bilis, extenuatis est lethalis juxta Aphorismum 23. Ergo eusarchis bona erit: *R.* negando consequentiam: Lex enim contrariorum huc trahi non potest nec debet, quia multa concurrunt, nempe humorum cruditas, & materiae funesta conditio.

Aphorismus XXV.

Sanguinem superne quidem efferri, qualiscunque sit, malum: Inferne vero niger, si dejiciatur, bonum.

Contentum seu Intentio.

De sanguine ἀνω καὶ κάτω excreto.

Connexio: Apprime hic Aphorismus dependet à prioribus: cum enim lethales dixisset excretiones atrae bilis aut humoris liquidi sanguini similis: modo, in hoc Aphorismo, specialius sermonem convertit, ad sanguinis excretiones, & tam per superiora, quam per inferiora, & cum supra fertur malum dicitur, cum infra bonum, si niger dejiciatur: Unde: Hic Aphorismus juxta duas allatas conclusiones, in duas partes dividitur: quarum *prima* docet, malum esse sanguinem per superiora excerni; *secunda* vero nigrum sanguinem dejici, bonum fore.

Præ-

Prænotandum autem est, quod sanguis *supra* efferri possit, per os, nares, aures; rursus per os cum exit, vel ex ipso ore manat, vel ex Capite, vel ex pulmone, vel Thorace, vel ventriculo, vel hepate, vel liene: *Infra* vero progrediens, vel per alvum, vel urinas, vel uterum educitur: rursus si per alvum, vel ab intestinis, vel ab aliis partibus: ab intestinis, vel cum ulcere in Dysenteria, vel sine eo, ab hæmorrhoidibus.

De evacuatione igitur sanguinis per os habita, manifeste intelligendus est Hippocrates, ut interpretatur Galenus, excepta illa, quæ per nares fit: Siquidem è naribus sanguinem fundi, & sapissime salubriter & cum Euphoria, innumeris fere constat experimentis, cum & febres tertianæ, & continuæ, & ardentes, non raro etiam malignæ & pestilentes, aliique morbi, critice terminentur, ut extant exempla, tum apud Hippocratem & Galenum, tum etiam apud reliquos rei Medicæ Professores: Sic clarus habetur textus Hippocratis 6 *Aph. 10. qui capite dolent & vehementer laborant, si pus vel aqua, vel sanguis per nares, aut os, aut aures effluat bonum.*

Proinde non vituperatur critica per aures vel nares sanguinis evacuatio, sed tantum stillæ ejusdem è naribus (idem est de aliis) erumpentes, veluti signum, ingentem pravitatem denuntians: Sicut pariter immoderata hæmorrhagia, quæ non facile sistitur: Cæterum in reliquis ut mox diximus, conferre consuevit; unde passim experientia constat, plerosque, qui à periodica, per eas partes sanguinis eruptione, non tantum à gravissimis capitis doloribus evaserunt, sed etiam ab aliis pessimis morbis præservati diutissime vixerunt.

Sanguis igitur per os excretus, hoc loco vituperatur, & quidem, tum ratione sui, qui de genere earum rerum est, quæ nunquam egeri debent, tum ratione viscerum & vasorum, in quibus asservatur, quoniam ea reserata, aut erosa credendum, cum prodit: Et quidem sive è capite, sive ex ventriculo sive demum ex thorace, ut dictum, profiliat, semper sui & principalis alicujus visceris noxam arguit, & non levem vitæ languorem, quippe quæ suo fomite depauperetur.

Neque vero ab his solum egrediens cruor malus est, sed, quod majus, quia alicubi stagnans, ut facile fit, illico concrefcit, acorem contrahit & corrumpitur, ac tandem in pus vertitur: Ex pure autem innu-

mera propemodum detrimenta oriuntur, febres potissimum, *ulcera, marcores: unde idem Hippocrates 2. Aph. 47. dum pus conficitur, dolores ac febres accidunt: & 6. Aph. 26. Si in ventrem sanguis præter naturam effunditur, necesse est suppurari: & 7. Aph. 15. à sanguinis sputo, puris sputum, à puris sputo tabes, à tabe mors.*

Quamvis autem sanguis per os excretus, semper aliquid mali referat, & sive spumofus sit & floridus, sive nigricans & concretus, quemadmodum colligitur ex adjecta voce: *Qualiscunque sit; nihilominus levius malum portendit in foeminis in quibus sanguinis excreationes, utiles esse consueverunt, etiam per tussim, modo à suppressis menstruis purgationibus procedant: quamobrem idem Hippocrates 5. Aph. 32. Mulieri, inquit, sanguinem evomenti, menstruis erumpentibus solutio fit; referatis nimirum uteri ductibus, atque excunte sanguine per loca convenientiora: Et 5. Aph. 33. Menstruis deficientibus, sanguis ex naribus fluens, bonum.*

At quod foeminis salubriter accidit, ex menstruorum suppressione, non raro etiam contingit viris ex pleuritide si nimirum sputum sanguineum comparuerit; ut dicitur 1. Aph. 12. Quare generale hoc Hippocratis effatum, in aliquibus excipietur; verum tamen oportebit diligenter advertere, num sanguis ipse immediate è suis vasis prodeat, & sequatur alicujus principalis visceris erosionem; an vero ex tumore jam disrupto, vel suppurato excernatur; etenim sicuti in priori casu semper malum, ita in posteriori sæpissime bonum; quin imo (ut 5. Aph. 8.) *morbo laterali laborantes, si intra quatuordecim diebus non repurgantur, ad suppurationem vertuntur. Et 5. Aph. 15. Suppurati vero nisi in quadraginta diebus purgentur, à die, qua ruptio facta fuerit, in Tabem transeunt.*

Quod si sanguis è glandulis faucium exsudet, & sputo excernatur, non solum nihil mali portendere solet, sed sæpe numero etiam prodest: Compertum enim sæpe est, vehementi capitis dolore vexatos, veluti momento convaluisse, excreto ex prædictis locis faucium sanguine. Quo sensu exponendus idem Hippocrates 7. Aph. 37. ubi sibi ipsi contradicere visus, inquit: *quicunque evomunt sanguinem, si sine febre quidem salutare; si vero cum febre malum.* Adeoque non omnem sanguinis per os evacuationem malam pronuntiat, imo saluta-

lutarem vocat, si sine febre sit. Plane is intelligendus de sanguinis exitu haud quaquam à ventriculo, cujus vomitus peculiaris actio est, sed à glandulis faucium, & gulæ, è quibus profiliens sanguis evomitur. Quamquam & absque ulla ventriculi læsione, ex viscerum naturalium obstructione, aut tumore, possit sanguis ubertim evomi, aut excreari, pari modo ac ex utero male affecto contingit, ut ante dictum est.

Sicuti *supra* ejectus sanguis, quicumque sit, malum dicitur, ita deorsum excretus, bonum, si tamen niger egeratur: at qua ratione, non bene constat, præsertim si ad memoriam revocentur, quæ præcedentibus Aphorismis sunt recensita, in quibus dejectiones nigras, pessimas, Hippocrates promulgavit.

Quare, cum in præsentī, nigrum sanguinem, per inferiora excretum, bonum proferat, videtur sibi ipsi manifestissime contradicere. Verum quamvis hæc apud cæteros expositores, non sint facilia soluta, sic tamen à nobis explicantur, ut quemadmodum Hippocrates, superioribus Aphorismis, nigras damnaverit dejectiones, ortas ex mala & indebita mixtura, ac fermentatione succorum fellei & pancreatici (antiquitus atrabilarii) in intestina tenuia confluentium: Ita hic laudabiliorem existimet, nigram dejectionem, procedentem à sanguine è venis hæmorrhoidalibus concrecente: manifeste enim hoc loco, opponit sanguinem per os excretum, sanguini deorsum exeunti, ubi antea non sanguinem, sed dejectiones nigras, sanguini atro similes retulit, easque ab interioribus & male affectis visceribus promanantes. Sed & multum quoque interest, num sanguis in ipsis visceribus degeneratus concreverit, an solum in venis sedis sua crassitie subsederit, aut tanquam impurus à reliquo sepositus sponte sua prodierit: quamobrem Jure addit Hippocrates, *cum niger dejicitur*; nam si fortasse purus & floridus egeratur, profecto malum erit, & quidem præter corporis languorem, & decolorationem, pulsum imbecillitatem, viscerum labefactionem, minabitur Tabem vel Hydropem.

At vero si niger dejiciatur, & per intervalla, longiori periodo, plurimum proderit, præsertim melancholicis & nephriticis ut dicitur 6. *Aph. II.* Imo solet à gravissimis morbis præcavere 6. *Epidem. Sect. 3.* ubi, qui hæmorrhoides habent, neque pleuritide, neque peripneumonia,

nia, neque phagadæna, neque furunculis, neque tuberculis therebinthi figuram habentibus, neque lepra, neque vitiliginibus correpti referuntur : iis vero suppressis Hydrops aut Tabes subsequitur ex eodem 6. Aphor. 12. Unde nec supra modum fluere, nec omnino supprimi salubre erit.

Dices 1. Si sanguis excernatur per urinam malum est, Ergo excretio per inferiora, non est bona &c. Hippocratem per excretionem per inferiora, maxime ut diximus, intelligendum, de excretionem per menstrua vel hæmorrhoides : Imo excretio sanguinis per urinas tam periculosa non est quam per pulmones, teste Autopsia.

Instabis : Multi ex hæmorrhoidum fluxu moriuntur, Ergo nec hæc excretio est bona &c. moriuntur ex fluxu excessivo concedo, modico & critico nego.

Urgebis : Fluxus hæmorrhoidum est præter naturam, Ergo nullo modo est bonus. &c. quandoque est præter naturam, concedo semper nego, dum nempe critice vel consueto modo procedit, plurimosque magnis morbis liberat.

Instabis denuo : Natura bene sese habens, non excernit sanguinem per inferiora, Ergo nulla est bona &c. nisi adsit plethora concedo, ea præsentem & urgente nego : hoc enim modo se à plenitudine liberat.

Urgebis denuo : Si sanguinis evacuatio per superiora semper est mala, Ergo per inferiora semper erit bona, quod falsum esse demonstrat dysenteria. &c. Generaliter loquendo, omnem evacuationem sanguinis per inferiora esse meliorem quam per superiora, quia ex multis causis est periculosior ut jam abunde diximus.

Aphorismus XXVI.

Si Dysenteria laboranti, veluti caruncula dejuvantur, lethale.

Con-

Contentum seu Intentio.

De Dysenteria Carnosa.

Connexio: Cum in præcedenti Aphorismo egisset, de symptomati-
ca excretionē, seu sanguinis rejectione per superiora: In hoc jam
agit de dejectione per inferiora, & quidem de Dysenteria seu rejectione
caruncularum in Dysenteria, eamque lethalem esse pronuntiat.

Hic Aphorismus ob brevitatem non dividitur.

Agit ergo iterum de Dysenteria hoc loco Hippocrates quam
terminum lethalem sortiri inquit, si nempe in egestionibus carunculæ
dejiciantur: Neque vero incipientem intelligit, velut in *Aphorismo 24.*
hujus Libri, sed aliquantulum protractam, ut ostendunt verba illa: *Si*
Dysenteria laboranti, quæ sane ægrotantem diutius ea affectione deten-
tum significant.

Sed enim neque carunculæ & strigmenta intestinorum statim
inter initia comparere possunt, quippe primo humores varii & acres,
mox vero mucosa quædam, deinde cruenta, postremo strigmentosa
veluti carunculæ egeruntur: His autem apparentibus lethale signum
est, *quod neque caro concreescere, neque cicatrix obduci in his possit*, ut sub-
dit in Comment. Galenus.

Adnotat autem non inepte Cardanus, *lethale* hoc loco intelli-
gendum, quod plerumque mortem affert, & Natura sua, non autem
necessario, nec semper, nisi adjungatur, virium imbecillitas, materiæ
pravitas, vel fragmenti intestini excretio, quo casu æger omnino
moriatur.

Quamobrem in Dysenteriis considerata sunt, quæcunque in
ulceribus perpenduntur, conditio videlicet ipsius ulceris, pars ulcera-
ta, & causa vel efficiens vel fovens ulcus: Ex his enim oritur, unde ul-
cera lethalia fiant: *Ab ulceris* namque *conditione* prælagire solemus le-
thalem eventum, si magnum, profundum, malignum, putridum exe-
dens, cum inflammatione aut Gangræna conjunctum illud sit: *à parte*
affecteda, si principem partem occupet; *à causis* demum, si ab acris,
erodentibus & venenosis humoribus foveatur. Id ipsum quoque ob-
servandum in Dysenteria, siquidem cum intestina tenuia & gracilia
sunt affecta, à pravis & deleteriis humoribus, unde fatida, nigra, livida

egerantur, cum ramentis intestinorum, ingenti dolore, cibi fastidio, febre, virium jactura, certe mors præsto erit: Porro cum ista desint in Tenesmo, etsi non raro carunculæ egerantur, mors non ideo necessario subsequitur. Sub carunculis autem comprehenduntur, non tantum glandulæ, internam intestinorum tunicam occupantes, sed etiam fibræ illæ carneæ, quibus interiorē eorundem substantiam communi, Anatomicorum nupera diligentia detectum est, ad motum peristalticum perpetuandum. Si ergo ulcus eo pervenerit, ut exesa interna tunica duriori, fibras istiusmodi erodat, & exteriorē pervadat, longe molliorem irreparabile profecto exitium portendetur, & eo citius, quo priora intestina, & tenuia fuerint magis affecta, cum ista discissa non coalescant, ex eodem Hippocrate 6. *Aphor.* 18. & 24.

Dices I. In intestinis utpote membranosis non sunt carunculæ, Ergo falsus est Aphorismus. *R.* Cum Cardano Hippocratem in Aphorismo addere, *veluti*, adeoque non asserere esse vere carunculas, quamvis ut diximus in textu duplicem adesse tunicam duriores, carnosiores seu internam, exteriorē vero membranosam, in illa sunt carunculæ in hac vero non.

Instabis. Dysenteria fortissimæ curant epilepsiam & alios plenitudinis affectus, Ergo non omnes sunt lethales. *R.* In nostro Aphorismo supponimus adesse penes summam virium debilitatem &c. ut in textu diximus, quæ non semper, etiam in fortissima dysenteria adsunt.

Vrgebis: Galenus dicit multos fuisse servatos, quibus interior intestinorum tunica fuerat consumpta, Ergo talis dejectio non est lethalis. *R.* Galenum per tunicam interiorē intellexisse Epidermidem, vel illam mucosam & adiposam substantiam ut in textu diximus.

Vrgebis denuo: Intestina gladio perforata sanantur, Ergo etiam caruncularum rejectio. *R.* Negando consequentiam, siquidem in priori casu, causa desuit, in posteriori causa conjuncta, nempe humor corrosivus permanet.

Aphorismus XXVII.

Quibus per febres, sanguinis undecunque eruperit copia, iis, cum reficiuntur, ventres (seu alvi) humectantur.

Contentum seu Intentio.

De humiditate exuperante, hamorrhagia largioris pedissequa.

Connexio: Hic Aphorismus manifestam habet connexionem cum superioribus Aphorismis, cum, sicut in illis, ita & hic de sanguinis evacuatione agit.

Hic Aphorismus ob simplicem conclusionem non patitur divisionem.

Proponit in hoc Aphorismo Hippocrates prognosim, succedentis alvi humectationis, in febricitantibus, ex fluxu sanguinis præcedente, undecunque prodierit: Rem revera, tam raro visam, ut perpauci sint, qui illam observaverint; unde factum quoque est, ut expositores, de ejusdem veritate, plurimum etiam dubitaverint: proinde non mirum, si quod Fuchsius non solum in febribus, verum etiam in aliis morbis fieri dixit, alii ex adverso ad febres duntaxat contraxerint, & quam sententiam Cardanus, universaliter veram fassus est, probabilem solum neque necessariam statuerit Argenterius: Nunc nos videamus, quomodo illam, congruis argumentis aptemus.

Sanguinem immodice fluentem, jam antea nocuum adnotavimus, cum inde vita humana, sensim fatiscat, ac tandem desinat, si fortasse ad eam pertingat quantiratem, ut motum cordis intercipiat. Si ergo febrientibus accidat, larga sanguinis profusione debilitari, etsi extincta febre evaserint, à resumptis viribus, facile oriri putandum, non levem alvi humiditatem seu laxitatem tum quia, ubi antea excrementa cujusvis generis detinebantur, mox statim vigorata Natura, deponuntur, & alvus fit lubrica, idque potissimum, si à languente ventriculo,

cibi nec bene digesti, nec bene sint distributi; tum quia lymphæ, causa febris, tenuior reddita, ac detenta, propter immoderatum sanguinis exitum, incipit deinde, cum corpus reficitur, ad alvum deponi, ideoque excrementa solvere, atque intestina reddere lubriciora: tum demum quia resectis partibus, omnia illarum recrementa, parimodo deferuntur ad alvum, quæ prius vi morbi detenta fuerant: quo scilicet pacto experimur, declinantibus febribus, cunctas promoveri evacuationes, tum sensibiles per alvum, urinam, sputum, sudorem, tum etiam insensibiles, per poros cutis perspiratione. Porro ab immodica sanguinis evacuatione, fieri plerumque solet, ut multo sero in vasa inanita intruso, per febrem scateat, & deinceps revalescens in alvum, aut vesicam deponat. Accedit quod in iis magnam sanguinis evacuationem patientibus, appetitus sat magnus succedat, atque convalescentes, suapte Natura plus appetant, quam queant digerere, unde ob nimiam ingestionem pedes intumescunt & non raro fiunt cachectici; non quidem quod morbus, per illas partes terminetur, ut vulgo creditur, sed quod alterius morbi adsit promptitudo ac principium.

Speciatim autem notavit Hippocrates, id febricitantibus accidere, quoniam per febrem plerumque corpora exarescunt, unde serosa excrementa, non tam facile per id tempus egeruntur; at vero desinente febre, cum gravamini illa deinde sint, toti corpori, solent à Natura in pristinum statum restituta, per proprios & patentiores ductus evacuari: Hinc merito adjecit, id duntaxat accidere, cum corpora reficiuntur. Atqui non parum in idem confert felleus humor, qui per febrilium accessionum tempora depravatus, ineptus evaserat facum expurgationi, mox in salubrem statum revocatus, consueto usui secretionis & excretionis intestinalium excrementorum, reficitur.

Verum alvum humectari solummodo animadvertendum, cum memorata excrementa feruntur ad intestina; at si fortasse in vias urinarias ducerentur, copiosior urina potius, quam lubricior alvus fieret, ut deducitur *ex 3. Prorhetic. 40.* Sic pariter, si ad convalescentis corporis refectionem, ciborum frugalitas servetur, unde multa excrementa nequeant cumulari, nec profecto alvus humidior evadet: Sequitur enim lubricitas alvi, immodicam excrementorum collectionem quæ non nisi largiorem ciborum usum consequi solet, cohærenter his, quæ idem Hippocrates docuerat, 2. *Aph. 7. & 17.* ubi cibum præter

præter Naturam, plus ingestum morbum facere dicitur, idque patere sanatione, hoc est, collectorum excrementorum expurgatione, ut subdit in *Comment* Galenus.

Quod hoc in Aphorismo, de copiosa eruptione sanguinis fieri atque accidere dicitur, non raro quoque per frequentes atque immodicas Phlebotomias incurritur, proinde caute & non nisi grano salis instituendæ.

Dices I. Consumpta humiditate venter exsiccat, sed per magnam sanguinis evacuationem consumitur ventris humiditas, Ergo alvus sicca & non lubrica reddetur. *R.* Humiditatem ventris non consistere in solo sanguine, sed in aliis humoribus potissimum in lymphâ, ut in textu diximus, quæ ex causis allatis alvum humectat.

Dices II. Ad magnam effusionem sanguinis, fieri multos ructus, dicit Hippocrates in *Prorhetic.* ut in textu adnotavimus, atqui multi ructus sunt sicci, Ergo siccitas, non humiditas fiet. *R.* Hippocratem loqui de ructibus acidis, adeoque humidis, qui sunt humiditatis ac cruditatis soboles.

Dices III. Eruptio sanguinis in febribus plurimos servat, Ergo non nocet *R.* si critica sit concedo: immoderata nego.

Aphorismus XXVIII.

Quibus dejectiones sunt biliosæ, superveniente surditate, cessant: Et quibus surditas adest, biliosorum dejectione finitur.

Contentum seu Intentio.

De Consensu aurium cum Alvo.

Connexio: Cum hætenus Hippocrates egerit de variis excretionibus symptomaticis, nimirum atræ bilis & sanguinis seu supra seu infra: In hoc Aphorismo, de dejectionibus bilis sermonem instituit.

Hic Aphorismus duas habet partes: in *Prima* docet, ad surditatem cessare biliosas dejectiones: In *Secunda* ad biliosas dejectiones, cessare surditatem.

Patulum sane, ac in confesso est apud omnes, à translatione humorum, de una in aliam corporis partem, varios ac diversos accidere morbos, cum illi pro varietate partium, in quas feruntur, varias quoque excitent operationum læsiones, adeoque morbos omnino differentes; unde humor, qui stomachum vellicando cardialgiam affert, si fortasse in cerebrum, vel meninges deducatur, phrenitidem, vel alium morbum pariet: Et qui suo acore alvum stipticam facit, in renes delatus calculos procreat, in liene restagnans scirrhum, in pleura pleuritidem, atque alibi alias promovet affectiones. Hinc perpendens Hippocrates, in febribus potissimum ejusmodi humorum in caput & aures decubitum seu metastasim, vel ex his in alvum depositionem, adnotat surditatem oriri vel desinere.

Pro biliosis autem dejectionibus eas intelligit, quæ tenuium & labilium sunt humorum, qui sponte sua mobiles, facile ex una in aliam partem deducuntur. Hæ vero tam sunt frequentes in febricitantibus, ut vix unum ex millenis invenias, qui ejusmodi humorum egestionem per alvum non patiat; cum enim in febribus sanguis indebitè fermentescens, secundum aliquas sui partes saltem, acrior evadat, fit propterea, ut ejusmodi acrium succorum, in cysti fellea copiosior secretio, ac repurgatio habeatur, unde fæces urinæ, imo etiam sudores & cætera cutanea spiramenta consimilem referant conditionem & non raro cutis ipsa pari formiter inficiatur. Igitur si fortasse per consueta corporis emissaria recrementa ista minime repurgentur, sed in sanguine detenta, ferantur in caput & aures, procul dubio surditatem afferent, oppletis nimirum ductibus, auditioni conferentibus, cum etiam in statu sano, ejusdem generis recrementa, in primam auditus semitam deponantur, unde cerumen exoritur, flavum simul & salitum. At vero si ab his ad alvum deferantur, flavæ dejectiones comparebunt, & quidem affluentiores, desinente interea surditate.

Verum & rectè advertit Galenus, non de ea hic surditate Hippocratem locutum, quæ inveterata & ex habitu difficulter solvitur & proprie surditas appellatur, sed quæ repente in febribus, vel aliter fieri solet, & subauditio seu gravis auditus dicitur; illa quippe vitium organi sequitur, vel saltem à tenaci & hærente humore dependet: hæc vero quæ febricitantibus accidit, quoniam à fluente humore procedit, per-

seve-

severans esse non solet; quamobrem qua facilitate evenit, eadem destruso inferius humore brevissime desinit.

Cæterum hæc tum solum eventui prædicto respondebunt, cum surditas, seu subsurditas ex memoratis humoribus provenit: Nam si fortasse illa aliunde oriatur, ut accidit, Hermocrati *agrote secundo 3. Epidem.* certe prognosis fallit. Sed & poterit quoque humor in auribus collectus, alio diverti, & per sudorem, aut urinam expurgari, & desinet surditas absque ulla per alvum evacuatione. Itaque debent ista reciproce correspondere, ut aphoristica hæc sententia, ubique vera inveniatur. Non enim dixit Hippocrates *neccessario* surditatem solvi per biliosam dejectionem: Sicuti nec surditas sequitur necessario ad alvi suppressionem: sed tum in casibus ut diximus.

Unde autem hunc consensum aurium cum intestinis deducamus, ut his fluentibus, illæ laborantes, reaudiant, arduum sane est ex Anatome explicare, nisi solum communes arteriarum vias recenscamus, & mutuo inter se referentes ambarum pattium glandulas; unde non semel vidimus brevi solutas parotides, ingenter tumefactas, egestionibus per alvum habitis. Attamen crediderim, istiusmodi subsurditatem febricitantibus evenire, ab humoribus duntaxat circa ventriculum collectis; sicut enim saepe numero experimur aures obsurdescere, & tinnitum & sibilum pati, in vertiginosis à ventriculo, imo & dolores & cæteras capitis affectiones, à stagnantibus ibidem humoribus excitari; sic pariter credere licet in surditate, hic ab Hippocrate memorata ex suppressis egestionibus obtingere. Neque verosimile videtur, tantam humorum colluviem, posse aures occupare, quanta solet per alvum deinde in febrientibus egeri. Satis enim est nervos, per eas partes excurrentes, præter naturam affici, vellicari, atque à pravorum succorum præsentia gravari, aut extorqueri, ut mox cerebrum, ejusque organa sensuum coafficiantur; fiet autem, ut potius aures in his lædantur, quam sensus alii, à conditione vitiosi humoris, acris & biliosi, quippe is ut antea dictum, nullum respondet cerumini, quod aurium recrementum est felleum & amarum.

Hoc pariter Praxis hætenus docuit si durante febre, post biliosas dejectiones, agrotans derepente obsurdescat, non bonum sed malum esse indicium, raptus nimirum biliosæ materiæ ad caput, unde phrenitides; deliria & convulsiones excitantur; prout passim quoque

observatur in pueris dentientibus, qui desinentibus biliosis evacuationibus convelluntur.

Dices I. Praxis docet, quod surditas in febribus continuis & malignis, signum bonum præbeat; facta nimirum metastasi ab intra ad extra, utpote bona, effatu Hippocratis. *R.* Praxim non intelligere surditatem istam quæ fit, præcedente alvi fluxu bilioso, sed eam quæ immediate magnis deliriis, & magnæ feбри, sine alvi fluxu succedit.

Dices II. Surditas fit quandoque cerebri aut stomachi vitio Ergo non fit cessante bilioso alvi fluxu. *R.* Concedo antecedens, nego consequentiam, nam contrarium quotidiana docet experientia.

Instabis: Praxis rursus docet, surditatem fieri à crasso & viscido humore Ergo non à bile. *R.* Bilem plerumque aliis esse commixtam humoribus, unde distinguo, non fit à bile syncera transeat, mixta nego: Et licet syncera foret, effœta tamen & viscida aut alio modo vitata, idem ac crassus humor præstare poterit.

Aphorismus XXIX.

Febricitantibus, si sexto die rigores fiant, judicationem habent difficilem.

Contentum seu Intentio.

De Rigoribus sexto die evenientibus.

Connexio: Sicut præcedens Aphorismus, ita & præsens quoque ad prognosim pertinet, quo Hippocrates nos docet prævidere & prognosticare, rigorem febricitantibus contingentem, sexto die, difficilem judicationem præmonstrare. Hic Aphorismus ob brevitatem divisionem non patitur.

Rigor quidem adeo solet esse febricitantibus familiaris, ut unum ex peculiaribus symptomatibus, quæ febres comitantur, recenseatur: Est autem rigor motus, cum concussione factus à causa aliqua præternaturam: Est autem, vel Periodicus, vel Criticus, vel Symptomaticus.

Perio-

Periodicus, cum accessiones febriam intermittentium, potissimum tertianarum, initiat & renovat, & sicut is, inseparabile, & proprium signum earundem esse solet, ita quoque bonum existimatur, de quo Hippocrates hoc eodem Libro Aph. 63. quibus in febribus quotidie rigores fiunt, quotidie febres solvuntur.

Criticus est cum continuis vel continentibus febribus supervenit, præcedente coctione: eo namque febres aut desinunt, aut in intermittentes commutantur; unde Hippocrates hoc Lib. Aph. 58. inquit: *febre ardente laboranti, rigore superveniente, solutio fit: Symptomaticus* demum febricitantibus accidit, sed absque ulla febris remissione, irritamentum & pravitatem humoris arguens, & si fortasse ægro jam debili accidat, lethale signum dicitur, hoc Libro Aph. 46. *Si rigor* (inquit) incidat febre non deficiente, ægro jam debili, *lethale*: modo rigor hoc loco memoratus, nec periodicus, nec criticus esse potest, sed omnino symptomaticus adeoque malus.

Neque vero ex uno tantum capite malus ille censendus est, nam sexto die contingens, veluti inter initia febris, & vigente cruditate, malignitatis nota esse solet, ut ex Hippocrate, pluribus in locis Epidemiorum clarissime deducitur, & quæcunque per hæc tempora contingunt, mala sunt: unde & morbus regius & sudores sexto die incidentes, pessimi ab eodem Hippocrate proclamantur: Quamobrem Galenus, sextum diem Tyrannum appellavit, difficilem enim crisin, vel recidivam vel transitum in alium morbum, vel ipsam mortem sexto die in febribus continuis contingens rigor importet; unde sexta die agens Natura, raro aut nunquam à Medico imitanda, qui imitator tantum est Naturæ bene operantis.

Sed quam nocuus & molestus sit rigor febricitantibus, ex ipsius Natura deducitur; est enim, ut diximus, universalis concussio corporis cum sensu frigoris, illata ab humore partes ejusdem sensu præditas irritante: Ex hac autem concussione adeo totum corpus affligitur, ut velut à longo itinere defatigatum, ac verberibus cæsum conqueratur: Succedente vero intermissione, qua omnino febre vacet, quodammodo reficitur, & quiete compensat, quod à febre rigorifica perpeßum est: at vero si febris intermissio nulla sequatur, talem ex rigore molestam concussionem rependere cum non possit, magis & magis debilitatur, ut tandem succumbat. Accedit, quod causa rigoris

humor est, omnibus partibus infensus, itemque sanguini, lymphæ & liquori nervorum, qua propter nisi deinde repurgetur, & per aliquam evacuationem egeratur, procul dubio mala minabitur periculosissima.

Quamquam autem Hippocrates speciatim notaverit rigorem, sexto die malum, non ideo cætera accidentia, si forte eodem die, & alio non critico contingant, bona censenda erunt, cum & sudores, & vomitus & dejectiones, & icterus, aliaque hujus generis, tum sexto die, tum aliis diebus, nec criticis nec indicibus ante coctionem difficile judicium portendant: Nam quælibet evacuatio, ex præcedente coctione & secretionem non contingens, pro symptomatice censenda est, veluti ex pravitate, vel multitudine proveniens, nec tamen ejus humoris qui morbum facit. Hinc Philini uxor *agr. 4. Epidem. 4.* cum octava die superriguisset, vigesima obiit: & uxor Dromeada, passa rigorem tertia & sexta, paulo post periit: Sic & Hermocrates *3. Epidem.* morbo Regio affectus sexta die, periit vigesima septima: Contra vero Epicratis uxor, quæ superriguit decima quarta, judicata est quadragesima.

Quare ut rigor & alius Naturæ motus Criticus & salutaris censeatur, coctionem & secretionem, peccantis humoris consequi debet, cum febris intermissione conjuncta, concurrentibus simul aliis bonæ judicationis indiciis.

Quale nam sit ejusmodi judicium difficile, deduci potest, ex *1. Epidem. Sect. 2. Const. 2.* ubi Hippocrates, *cruda & incocta, & in malos abcessus conversa*, inquit, *aut judicationem non futuram aut dolores, aut diuturnitatem, autem mortem aut recidivam* (ut supra innuimus) *significare*: quod & *in comment. hujus Aphorismi*, memorans Galenus subdit: *eos, qui in hoc die, (puta sexto) fiunt rigores, difficile habere judicium, hoc est malum afferre, ac si male judicantes dixisset; vel certe infirmum, ut qui facile recidivam facerent, vel in longum tempus protraherentur, ac si dixisset, difficulter solubiles.*

Dices 1. Rigor non semper futuram crisin indicat, Ergo falsum quod rigor sexta die crisin malam præfagiat &c. etsi rigor quandoque vel à calculo vel aliunde fiat, semper tamen significatur adesse, molimen alicujus excretionis, in febre autem continua est certissimum signum criseos futuræ, modo non sit in principio febris.

Instabis:

Instabis: Si rigores sexta die, essent funesti, ergo bona crisis in morbis biliosis, non deberet fieri, paribus diebus, quod falsum est, quia tum fiunt crises, quando fiunt paroxysmi, sed paribus diebus, in morbis biliosis fiunt paroxysmi Ergo & Crises. R. Licet bonæ crises v. g. fiant quarta die, qui putatur esse par, tamen par non est ratione septimi, sed tantum ratione primi ut patet ex institutionibus, Ergo crisis non fit in quarto ratione paritatis, sed ratione imparitatis, nempe septimi, Ergo nulla debet fieri ad sextum diem comparatio.

Instabis denuo: Hippocrates *in Epidem.* ut in textu diximus, affert Philistida, Heraclitis uxor, quæ sexta die superriguit, minxit multum & septima perfecte judicata est: Ergo rigor in sexto tam funestus non est R. ibi naturam ob robur, circa finem sextæ diei crisim in cepisse, sed non perfecisse usque ad septimum: Aphorismus autem intelligit de rigoribus, quæ immediate crisim præcedunt, idque in principio, non in fine sextæ diei.

Urgebis: Hippocrates dicit rigorem febris ardenti supervenientem, illam solvere Ergo non tam funestus est R. rigor superveniens febris ardenti sexto die solvit illam, nego, alio tempore apparentibus signis concoctionis & sequente sudore concedo: Neque hæc obiectio est contra *Aphorismum 46. hujus Libri*, quia intelligitur de febre à cruda & non deficiente febre.

Instabis III. Potest fieri, coctio sexto die, Ergo etiam potest fieri Crisis Prob. Antecedens concoctio potest fieri quarto die, Ergo multo magis sexto R. concoctio potest fieri die quarto Natura existente forti, concedo, debili nego: Ergo potest esse sexto, id est circa finem & initium septimi in Natura forti concedo, à Natura debili & in principio sexti nego.

Quæres: Quæ ergo sit ratio, quod rigor in sexto sit malus cum aliis temporibus sit Prodromus bonæ criseos, præsertim si præcesserint signa concoctionis? R. Licet nulla fundamentalis possit dari ratio, tamen id suadet autoritas & observatio seu frequens experientia: Potest tamen etiam dari ratio, quod pares dies sint discriti, & criticorum rationem non habeat, inter quos sextus præcipuus est: adde demum, quod non præcesserint signa concoctionis, Ergo nec crisis bona esse potest.

Aphorismus XXX.

Quibus Paroxysmi fiunt, quacunque hora febris dimiserit, eadem si cras (seu postero die) repetat, iudicatu difficile esse solet.

Contentum seu Intentio.

De Februm longitudine ex constantia Paroxysmi arguenda.

Connexio: Sicut præcedens Aphorismus fuit prognosticus de difficili Iudicio; ita & hic Aphorismus ad partem pertinet prognosticam eventus februm, & quidem ex repetentibus Paroxysmis, eadem hora inconcussa, & invariata, eas solutu difficiles testatur. Exemplum, pro captu, affert Galenus; febris quæ semper eadem hora, puta tertia, redeat, & tum primo, tum secundo, tertio ac quarto die initium resummat, & sic deinceps, licet alia quavis hora intermittat & desinat: Tales enim inquit, febres horam sui Principii in accessionibus inconcussam & invariata habentes, futuras longas, & difficulter solubiles, idque siue quotidie, siue tertio, siue quarto quoque die, illæ repetant.

Quod autem revera de quibusvis periodicis febribus sermo hic sit ab Hippocrate prolatus, colligi posse videtur ex adjectis verbis *quibus paroxysmi seu accessiones fiunt*: Accessiones vero indefinite comprehendunt, quotidianas, tertianas & quartanas. Verum cum idem dicat: *Si eadem cras seu postero die repetat*: quotidianas potius expressas voluit, vel tertianas & quartanas duplices & triplices, singulis scilicet diebus affligentes. Quamquam probabile quoque sit, voluisse id exempli loco notatum, quemadmodum alibi consuevit, pari loquendi formula usus, generalia medicinæ dogmata singularibus Exemplis tradere.

Sed, num voluerit sub quacunque hora intermissionis, febris designare repetitionem & inceptionem sequentis accessionis, ita ut finis unius sit initium alterius; an vero principium singulorum paroxysmorum,

rum, eadem semper hora contingat, licet finis & declinatio cum intermissione variet, ab expositoribus disceptatur. Sub priori sensu interpretatur Heurnius, qui vult casum ab Hippocrate fingi, si sequenti die, invaleat febris eadem hora, quæ desit antecedenti. At vero sub posteriori exponit Galenus, qui servari quidem semper horam, in qua accessio suum faciat initium, non servari vero alias, in quibus finitur, ut antea notatum est, commentatur; parumque interesse, an quacunque hora, & citius & tardius febris desinat, dummodo, eadem semper hora redeat & incipiat. Et quamvis utraque expositione sensus Aphorismi cohæreat experimento, suisque rationibus fulciatur, longe tamen probabilior videtur, & menti Hippocratis congruentior interpretatio, si finem unius accessionis, alterius principium excipiat, ut cum expectatur intermissio præcedentis, & altera subsequens febris accessio subingreditur. Etenim hic Aphorismus videtur scriptus de febribus continuis, licet periodicis; cum intermittentes *Aphorismo 43. hujus Libri*, dicantur periculo vacare, quæ propterea difficile judicium habere nequeunt. Cum igitur febres accidunt, quarum remissiones initiantes, succedentium accessiones excipiunt, ut quotidianæ, tertianæ aut quartanæ duplices, Hemitritæ, aliæque per *subintrantiam* seu *subintrantes* dictæ, tum profecto difficile judicium sequitur, in his enim multi & mali solent esse humores ingeniti, foci febrium sordidi, & fermenta viscerum non parum depravata. Accidit præterea, ex ejusmodi febrium generibus, ingens in viribus jactura, cum neque coctiones ciborum, neque alimenti distributiones commode peragantur, & quod gravius, ob accessiones sibi subito succedentes Natura nequeat, ut in intermittentibus restaurari, sed sensim hebescit, & elanguet: Secus autem accideret, si febris omnino intermitteret & desineret, ut exillimat Galenus.

Quam præterea idem Galenus rationem difficilis Judicii (Judicium morbi Medicis significat magnam mutationem, seu in melius, seu in pejus, unde judicari dixit Hippocrates, in morbis esse, cum augentur, aut in alterum transmutantur, aut finiuntur) quam, inquam, rationem difficilis judicii affert, desumptam, ex fixa & firmata causa accessionum, quæ idcirco difficulter solubilis sit, multis improbat Argenterius, sed potissimum ex eo, quod erraticæ febres deberent esse facillime solubiles, ob vagam & instabilem causam, ex qua oriuntur, cum

tamen ex eodem Hippocrate habentur, difficillimæ solutionis esse, atque adeo longissimas evadere; quin & illæ, quæ fixam & stabilem causam recognoscunt, ob id ipsum solvi facilius deberent, quippe quæ melius subjiciantur coctioni, & secretioni, quam si erraticam & vagantem consequantur; unde concludit facilius concoqui biliosam materiam, alicubi stagnantem, quam fluentem & vagantem pituitam; itemque citius febres continuas, ex humore in venis concluso, quam intermittentes procedentes ex humore, per habitum corporis diffuso, ut idemet Galenus arbitratur: Sed enim experimur, tertianas & quartanas intermittentes, mensurnas & annuas evadere, cum Hyemem præsertim attigerint.

At quamvis hæc adversus Galeni expositionem, ab Argenterio proposita, non levis momenti videantur non tamen improbabilis illa penitus dicenda erit, si repetitiones febrilium accessionum- stasis semper horis habitæ, invariata temporis invasionem servant: Siquidem reditus, accessionis febrilis, eadem semper hora, immutabiliter arguit æquabilem & constantem, in vasa sanguinea fermenti febrilis intrusionem, atque in visceribus, seu focus febrium, per uniformem & determinatam fermentescentis sanguinis, in sua emissaria depositionem. Verum quo pacto illa accidant, clarius infra explicabimus.

Quod quarundam febrium Paroxysmi anticipent, quarundam postponant, ratio est, quod anticipantes materiæ subtilitatem, caliditatem & paucitatem; quæ vero postponunt, cruditatem, crassitiem, frigiditatem & copiam præferant.

Dices: Anticipatio Paroxysmi, significat morbi augmentum, postpositio declinationem, æqualitas statum, sed statum morbi significare, non est significare malum judicium Ergo. &c. Anticipatio, significat morbi augmentum, tantum nego, potest enim fieri à virium robore, & postpositio à debilitate, & tandem æqualitas paroxysmi esse potest, toto morbi tempore.

Aphorismus XXXI.

Qui per febres lassitudinem sentiunt, iis ad articulos, & juxta maxillas, potissimum abscessus fiunt.

Contentum seu Intentio.

De Abscessibus futuris in febribus.

Connexio: Haftenus egit Hippocrates, de Judicio morborum, in hoc Aphorismo agit de Judicio, quod fit, per abscessum factum ad Articulos, maxillas & glandulas. Hic Aphorismus. ob simplicem conclusionem non dividitur.

Jam alibi praesertim Lib. 2. Aph. 5. dixerat Hippocrates, spontaneas lassitudines morbos praenuntiare, iisque propterea usus est, veluti signis, morbos praemonstrantibus: Nunc autem in hoc Aphorismo easdem assumit, in signa prognostica futurorum abscessuum, in ante dictis partibus, si febricitantibus accidunt, & absque ulla causa manifesta.

Notavit autem speciatim, febricitantes, quoniam licet abscessus quibuscunque agrotantibus accidere possint, ex multa & tenui materia, cum virium languore, vel ex tenaci & crassa, expulsionem repugnantem; frequentius tamen febricitantibus contingunt, eo quod humores febrim excitantes, per indebitam fermentationem, motui magis subjiciantur, & de loco in locum ferri possint.

Cum itaque febricitantes, citra quamcunque evidentem causam membra corporis defatigare valentem, lassitudinem incurrunt, ut, vel si minimum & leviter moveantur, se impotentes percipiant, abscessibus subjiciuntur; etenim exinde significatur humores ad partes musculosas, itemque ad tendines, & ligamenta articulorum decumbere unde impedimentum motus, & impotentia regendi corporis pondus oxoriatur.

Quoniam vero lassitudo triplex, memoratur à Galeno,
Com-

Comment. ejusdem Aphor. 5. Lib. 2. *prima* quæ ulceris, *altera* quæ tensionis, *tertia* quæ inflammationis sensum refert, dubitari hoc loco potest, quænam potius hic sit adjicienda, quæ futuros abscessus, in loca articulorum prænuntiet. Et dicendum omnem, & quamcunque esse comprehensam, cum unaquæque ab humoribus exoriatur, & solum inter se differat sensu, quem partibus inferunt; quamobrem non immerito Hippocrates, indiscriminatim lassitudines nominavit, porro, ad partes lassitudine affectas, veluti debiliores facile quicunque humores appellunt & abscessus inferunt.

At vero non ex modica & momentanea corporis lassitudine hi protinus sunt præfagiendi, sed ex continuata, diuque perseverante afflictione, ut propterea in Aphorismo notentur, qui *habent*, hoc est, qui perpetim patiuntur *lassitudines*, non qui *habuerunt* vel passi sunt. Inde enim arguitur imbecillitas artuum, qui facillime ea propter excipere possint, decumbentes humores.

Sed & in articulis & circa maxillas potissimum memorantur abscessus fieri, quia humores à partibus nobilioribus sepositi, non alibi promptius recipi & consistere possunt. Sunt enim in articulis vacuitates; glandulæ vero veluti partes corporis spongiosæ, facile etiam excipiunt & detinent: Harum autem præcipue notavit, quæ circa maxillas, ut in buccis, juxta aures, itemque in collo, & in jugulo ad linguæ radicem, quippe in has sæpissime vitiosos humores à cerebro aliisque internis visceribus abscedere experimur.

Quamquam autem articulos, & glandulas circa maxillas abscessus pati retulerit Hippocrates, non tamen reliquas, id ipsum subire posse negandum: Etenim sectis cadaveribus, sæpius abscessus inventi sunt in glandulis mesenterii & pancreatis, itemque in glandulis lumborum & renum & aliis corporis partibus: Et sane quæ ratione pone aures & in collo glandulæ suscipere possunt, vitiosos humores, eadem ratione & cæteræ, tum internæ, tum externæ abscessus pati poterunt; quin imo non semel expertum est multo citius quam exteriores glandulæ tumerent, interiores in mesenterio intumuisse; unde rationaliter quidem dissolventia & diaphoretica medicamenta, in ejusmodi temporibus à peritioribus medicis commendantur quæ scilicet impactos & hærentes humores incidant, attenuent & dissolvant, & per patentiores ductus foras amandent, quemadmodum de urina multa

&

& crassa idem Hippocrates infra *Aphorismo 74. hujus Libri* fatetur, inquiens: *Quibus speratur futurus abscessus ad Articulos, eos liberat ab abscessu, urina multa, crassa & alba, qualis in laboriosis febribus, quarto die quibusdam incipit fieri &c. de quibus inferius plura.* Id ipsum quoque præstat alvi fluxus, sudores, vomitus, hæmorrhagia aut alia corporis evacuatio, abscessus præpediens.

Dices I. Omnes febricitantes sentiunt lassitudinem, Ergo omnibus fient abscessus & negando antecedens, in plurimis enim febribus, non observatur lassitudo, imo tam fortes sunt sæpe ægri, ut durante ipso febris vigore, & in deliriis à pluribus viris fortibus vix teneri & coerceri possint.

Instabis: Lassitudines sunt affectus musculorum, Ergo non sunt articulorum & per Articulos non intelligi juncturas tantum sed partes circumjacentes etiam musculosas & tendinosas.

Urgebis: Futurum in maxillis abscessum, non videtur præcedere lassitudo, quia maxillæ male factæ, nihil faciunt ad læsionem motus musculorum ipsius corporis. & Satis esse si pars mandans, nempe Caput afficiatur, quod est principium nervorum, unde lassitudo, imo sopor ante abscessum accedere solet.

Aphorismus XXXII.

Quibus ex morbo convalescentibus, pars aliqua laborat (seu dolet) eo (seu ibi) abscessus fiunt.

Contentum seu Intentio.

De Abscessibus Convalescentium.

Connexio: Connexio hujus Aphorismi cum antecedente clara & manifesta est: quod enim de febricitantibus ex lassitudine, præcedenti Aphorismo, pronuntiavit, nunc de convalescentibus, ex labore seu dolore, partem aliquam infestante id ipsum profert Hippocrates. Quare & hic Aphorismus, partim propter brevitatem partim

Zzz

cum

cum pariter prognosticus sit divisionem non patitur; tradit enim alterum Judicium futuri abscessus, & quidem ea in parte, quam dolor excruciat.

Proponit autem convalescentes ex morbo, id est, qui nuper à morbo servati sunt, præsertim acuto: nam ex morbis chronicis, non tam facile abscessus eveniunt, resoluta nimirum sensim materia morbifica, ex morbi diuturnitate, quippe ex reliquiis humorum non bene subactis nec expulsis, ejusmodi abscessus fiunt.

Pro laborante seu dolente vero parte, non solum intelligit, quæ revera dolore, sive pungente sive gravante afficitur, sed quocunque modo laborantem imbecillem & languidam (labor enim hic significat omnem membri debilitatem.) Nam cum abscessus, translatio sit humoris, de una in aliam partem, præsertim ignobilem, certe nisi hæc languida sit, & debilis, commotum humorem minime excipiet, unde sive à dolore, re ipsa cruciante, sive ab imbecillitate, undecunque inducta, pars aliqua laboret, obnoxia fiet abscessui. Hinc experimur, in partes torpidas, exangues, extenuatas, aut doloribus affectas, commotos humores decumbere & abscessus parere. Quod vero vulgo dicitur dolorem trahere, veluti cucurbitula, ridiculum est, cum & Galenus ipse 3. de Natur. Fac. 23. languorem in partibus, non dolorem accuset.

Ejusmodi abscessus plerumque in imperfecte per crisim judicatis contingunt; in crisi enim imperfecta, Natura quandoque partem materiæ excernit, partem coquit, & partem retinet, ex qua abscessum format, qui à Medico prædicendus est, ubi in aliqua parte labor, dolor, aut lassitudo, idque in declinatione observatur: Id quod pluries accidit, quando vel æger non satis expurgatus fuerit, ut patet in pueris post variolas, quibus non purgatis facile abscessus fucere scunt; ita pariter quando æger multum aut justo plus quam Natura sufferre queat, in cibo & potu excesserit.

Dices: Quæ in morbis relinquuntur, recidivas facere consueverunt teste Hippocrate 2. Aph. 12. Ergo non fiunt abscessus. R. Abscessus fieri in declinatione, siquidem materia à partibus nobilibus ad ignobiles defertur, nisi ab his ad illas fiat metastasis; recidivæ autem fiunt, post non omnimodam causæ morbificæ morbi ablationem; ergo est differentia inter recidivam & abscessum de qua re fusius alibi.

Aph.

Aphorismus XXXIII.

Sed &, si ante morbum, pars quæpiam laboraverit (seu doluerit) in eam se morbus obfirmat.

Contentum seu Intentio.

De Parte ad abscessus recipiendos apta.

Connexio: Cum duobus antecedentibus, manifestam connexionem habet hic Aphorismus: quemadmodum enim præcedentibus duobus Aphorismis, ex indiciis, concomitantibus, vel consequentibus morbos, conjuncta videlicet lassitudine, aut in sequente dolore, prognosim futuri abscessus deduxit Hippocrates: Ita hic ex præcedente morbum dolore, in aliqua parte corporis, conjicit futurum morbum ibidem consistere & firmari: quamobrem inquit Galenus in *Comment.* si quis velit connectere, duobus prioribus sermonibus illum, qui nunc dicitur, ad unius Aphorismi integritatem, sive seorsim unumquemque scribere, nihil refert, nam & communitas eorum estensa est, & singulorum proprietas in sermone præposito.

Hic Aphorismus cum simpliciter Prognosticus & brevis sit, non patitur divisionem.

Cum igitur antequam morbus invadat, pars aliqua corporis ad ægritudinem disposita dolore afficitur, vel aliter molestatur aut languet, ibi futurus morbus firmabitur, sumpta conjectura ex languore ejusdem partis affectæ. Nam sicuti spontaneæ lassitudines ante morbi invasionem contingentes, corpus ob noxium morbis portentunt, ita labor, dolor, languor, cujusvis partis, prænuntiat futuram in eadem parte affectionem: quippe pars dolens, aut aliter affecta, subjicitur recipiendis humoribus, præter naturam adauctis, & vitiatis, qui propterea ibidem consistentes morbum excitabunt, inflammationis, tumoris, aut abscessus naturam referentem, nisi tamen evacuatione

per vias urinæ, vel intestinorum aut etiam per sudorem, vel narium hæmorrhagiam, aliterue, vitiosus ac collectus humor egeratur, ut ex eodem Hippocrate deducitur *6. Epidem. Sect. 4. inter initia: Et 6. Epid. Sect. 7. & infra hoc Libro Aph. 79.* ubi dicit: *Si pars inferius caleseat aut frigeat, ibi morbi sedes est futura & alibi: ubi sudor ibi morbus.* Si ergo pars aliqua seu viscus in corpore humano vel Natura, vel ascititia debilitate, in vel ante morbum contracta, labefactatum est, in hoc casu, reliquæ morbi abscessum causaturæ in hanc & non in aliam partem ferentur: Cum hæc pars ad receptionem excrementorum sit maxime habilis, ad expulsionem vero ineptissima: Est enim partis debilitatæ substantia, effaminata, mollis & laxa, quæ ideo fæces, cum sanguinis torrente, eo allatas propter flacciditatem præter naturalem, veluti spongia, facile recipit, & propter deficientem siccitatem, ad tensionem necessariam (in quo robur consistit) difficulter expellit.

Dices I. Plurimis ante morbum, ingens fuit capitis dolor, qui aliquando plurimis annis perduravit, deinde inciderunt, in gravem morbum, non capitis, sed alterius partis, Ergo Aphorismus non verificatur. *R.* quemadmodum Hippocrates incepit sermonem de articulis, ita per partem hic articulos intelligit: deinde falsum est, morbos & abscessus, in Capite debili non fieri ac in alia parte corporis.

Dices II. Ubi sudor ibi morbus, Ergo in æstate v. g. post exercitium morbus erit in toto corpore, quod est falsum, nam sudor etiam excitatur in corporibus sanissimis. *R.* Hippocratem hic intelligere sudorem, qui fit durante morbo, non in corpore sano, vel etiam à causa interna, non ab externa & violenta.

Instabis: Sudor in morbis, significat morbi solutionem, Ergo non significat morbum *R.* sudor criticus, qui fit die critico, & præcedente coctione, significat morbi solutionem, concedo: Symptomaticus nego, & de hoc loquitur Aphorismus.

Urgebis: Sudor syncopticus est sudor symptomaticus, qui plerumque fit in fronte, cum tamen morbus sit in Corde, nempe lypothimia, animi deliquium &c. Ergo neque sudor symptomaticus est, ubi morbus est, *R.* In syncope est omnium virium lapsus; ergo non tantum affectus est in corde, sed in toto corpore.

Aphorismus XXXIV.

Si febre detento, suffocatio derepente supervenerit, nullo in faucibus apparente tumore, lethale.

Contentum seu Intentio.

De Angina tumore experte.

Connexio: Pergit Hippocrates, agere de abscessibus, ut paulo ante fecit, de iis quæ partibus nobilibus ad ignobiles fiebant; in hoc Aphorismo è contra agit, de abscessu, qui fit in parte nobili & perniciosus est.

Hic Aphorismus proinde, cum rursus prognosticus sit & simplex, divisionem non patitur.

Pertinet autem quoque hic Aphorismus ad partem prognosticam, quia eo interitus præfagitur febricitanti, si repente suffocatione corripiatur, citra faucium tumorem.

Quandoquidem inquit: *febre detento* (seu *febrem habenti*) procul dubio is, cui hæc accidunt, febre multo antea correptus existimandus est: idque magis, quoniam suffocatio dicitur supervenire; quare eadem repente contingens erit symptoma superveniens febricitanti.

De qua vero febre intelligat Hippocrates, dubitat in *Comment. Galenus*. Et quamvis de eo, cui magna insit febris, videatur interpretari; contingit tamen, subdit etiam sine magna febre, strangulatione repente superveniente, hominem interire; inevitabilior autem & citior est mors, ut ne sperari quidem possit illius salus, cum vehemens febris detinet ægrotantem, ob majorem respirationis indigentiam.

Sive igitur acuta & gravi febre, sive etiam leviori æger afficiatur, si nullo tumore fauces occupante, videatur repente suffocatione corripì, is prædicatur interiturus. Cum enim citra causam evidentem suffocatio supervenit, vel in pulmone, vel in aspera arteria vitium aderit, & quidem ejus conditionis, ut non tam mole, quam venefica & convulsiva qualitate & pravitate, respirandi organa inficiat, vel etiam à spinæ vertebris luxatis, atq; introrsum inflexis, partes respirationi dicatæ

comprimuntur: quorum utrumque lethale est, medelam haud quamquam admittens: *Suffocatio* namque *non aliud est* inquit Galenus, *nisi interitus subitus, propter defectum inspirationis, qui fit ex angustia aliqujus instrumenti, ex iis qua observiunt respirationi.* Quoniam vero dixit *nullo tumore in faucibus existente*, implicite proinde intelligendum voluit tumorem guttur occupare: quæ enim internam partem, asperæ arteriæ infestant, vel exterius circum obsistunt, nullatenus visu spectari possunt, etiamsi os undequaque amplificetur: Inflammato autem gutture, ejusque musculis, impeditur respiratio & exspiratio, vel per compressionem, si forte exterius inflammatione gravetur, vel per obstructionem, si interius constipetur.

Sed quid si tumor in faucibus appareat, an non lethale signum existimandum sit; Et quidem sine vitæ periculo, ejusmodi in faucibus tumor non erit, cum non minus periclitentur ægrotantes, ex impedita respiratione, quam ex impedita ciborum deglutitione. At vero longe periculosior erit læsio respirationis, quam deglutitionis, cum sine respiratione & aëre, diu vivere nequeamus, absque deglutitione vero & sine cibo, ad plures dies vivere possimus. Accedit, quod tumor apparens in faucibus, multis & variis medicamentorum generibus tractari potest, & non raro ad maturationem, vel resolutionem perductus, ægrum incolumem relinquit, secus vero qui guttur & asperam arteriam occupat, & si fortasse maturitatem subeat, delabente in pulmonem & thoracem, purulenta materia necem quoque affert.

Dubitari præterea solet, quinam tumor hic ab Hippocrate memoretur, cum apud Medicos tres species tumorum (excepto crysipelate) communiter recenseantur, phlegmonis scirrhi, & oedematis. In codice græco, scribitur *œdema* id est tumor mollis factus à phlegmate, unde is videtur speciatim in Aphorismo notatus, eoque magis, quia citra dolorem est, cujus ne quidem verbum facit Hippocrates in textu.

Verum crediderim potius, inflammationem seu phlegmonem intelligendum esse, cum febricitanti superveniat, ubi humoris acredinem & tenuitatem sortiuntur. Præterquam quod humores oedematosi, veluti à lentis humoribus inducti, sensim & per paulatinam congestionem fiunt, nec facile gutturi, aut asperæ arteriæ adnascuntur, in Aphorismo autem dicitur, repente suffocationem fieri oportere, & minime

minime apparentem. Quamquam si fortasse oedema exoriat, adhuc vitæ periculum minetur, ob interclusam respirationis semitam. Usus est autem nomine oedematis Hippocrates, quod omnem tumorem seu inflationem significat, ut etiam in *Comment.* Galenus advertit.

Non est autem prætereundum periclitari aliquando ægros & suffocatos interire, absque ullo tumore aut inflammatione gutturis, vel faucium, ob malignam solum, & venenatam inspirati aëris conditionem, ut sæpe in morbis epidemiis observavimus. Compertum quoque est suffocari homines, & cætera animalia, peculiaribus halitibus è quibusdam cavernis ac fodinis erumpentibus: Ex densiori etiam, aut plus justo tenuiori aëre, id ipsum sæpius visum, quemadmodum in cellis vinariis, ex fermentescente musto, locis occlusis, specubus subterraneis, thermis, hypocaustis, & aliis. Potest tandem id ipsum provenire suffocationis periculum, à vaporibus tetris ab utero ascendentibus, vel interceptione circulationis sanguinis, uti in hysterica passione, vel apoplexia. Verum tamen suffocatio, in hoc Aphorismo memorata, non nisi grave pulmonis vitium, vomica abscessus, atque ab interna, non autem externa causa illatum, & quidem cum febre, & non sine febre (ut in hysterica apoplexia atque recensitis casibus fit) prout ante dictum est.

Dices I. Talis suffocatio potest tolli larga venæsectione, Ergo non est adeo lethalis &c. si sit à sola plethora concedo: si vero à debilitate, resolutione, convulsione, potest tolli venæsectione, nego.

Dices II. Homo potest pilis, vel re tenui deglutita suffocari, ut testatur experientia, Ergo non opus est tam violentis causis &c. hominem pilo posse suffocari est revera Problema medicum: Si tamen contingat, id non præcise à pilo, sed potius à convulsione & concussione gutturis, pilum violente expellere conantis provenire.

Aphorismus XXXV.

Si febre detento, repente collum intorqueatur, ac vix deglutire queat, nullo existente tumore lethale.

Con-

Contentum seu Intentio.

De Angina Convulsiva.

Connexio: Nexus hujus Aphorismi, cum antecedentis est clarissimus: Præsens enim non minus, quam præcedens, agit de strangulatione repente facta in febribus: differt tamen ab illo; quod in præcedenti Aphorismo lethale signum, ex subita suffocatione, febricitanti superveniente, à læso gutture vel pulmone desumpsit: nunc ab impedita deglutitione idem Judicium sumatur, ob vitium faucium & gulæ: Equidem sicut respiratio pertinet ad asperam arteriam, ejusque ductus, ita ad fauces & œsophagum deglutitio.

Hic Aphorismus æque ac præcedens, cum simplex in conclusione sit, divisionem non patitur.

Utrumque ergo symptoma considerat Hippocrates in febricitantibus, quibus semper gravius ac periculosius est, ejusmodi extraordinariis accidentibus molestari, cum per febrem magis labefactentur, vitæ usus, & operationum vitalium commoda sensibilius afficiantur, quæ plane diutius læsa esse non possunt, etsi in cæteris morbis facilius sufferantur.

Quoties ergo præter incommoda febris & symptomatum illam frequentius concomitantium, accidit, febricitantes rarioribus & infuetis aliis vexari, longe majus periculum imminet. Et quidem de vita est magnopere ambigendum, si repente illis collum pervertatur & contorqueatur, ut vix ac ne vix quidem possit deglutire. Significatur enim talem ac tantam læsionem, in musculis moventibus, flectentibus & circumvolventibus collum inductam esse, ut etiam nervi & vertebræ spinalis medullæ coafficiantur; unde etiam gula, quæ per fibras & musculos spinæ adhæret, suo munere deglutiendi defungatur. Atqui hæc, non sine luxatione, inflammatione, paralyti aut convulsione contingunt, quæ febricitantibus mortiferæ esse solent: Sed, & impedimentum deglutitionis non leviter quoque incommodat, cum corpus alimento, & debita virium restauratione privet. Quod autem ab inflammatione, ex luxatis vertebris, & alia simili affectione spinæ id exoriatur, clarius expressit idem Hippocrates 2. *Epidem. Sect. 2.* & Galenus 4. *de Loc. affect. 3.* Quamobrem quomodocunque spinæ vertebræ offendantur, sive contusione, contorsione, vulnere &c. valde de exitu lethali timendum erit.

Dices I. Hippocrates 6, *Epidem.* 7. ait: illi gravius affligebantur, quibus cum febre cervix intus vergebat; illis vero, qui solum deglutire non poterant, valde mites erant Anginae, Ergo ex deglutitione in febre laesa, tantum non resultat periculum. R. Hos fuisse absque suffocatione, adeoque in tanto non fuisse periculo: Vel R. Hippocratem loco citato egisse tantum de simplici angina, in hoc autem Aphorismo, de contorsione ipsius colli.

Dices II. Convulsio superveniens feбри, saepe non est lethalis, ut docet praxis, Ergo contorsio illa colli à convulsione, non erit tam exitialis. R. Et si rarum sit, aliquem à febre convulsum evadere, nihilominus peior est, colli convulsio & contorsio, quam alia quaecunque, ut apparet, in Emprostotano, Opisthotano, & Tetano, à quibus vel rarissime vel nemo evadit.

Aphorismus XXXVI.

Sudores febricitantibus boni, qui manare ceperint, die tertio, quinto, septimo, nono, undecimo, decimo quarto, decimo septimo, vigesimo primo, vigesimo septimo, trigesimo primo, trigesimo quarto; ii enim sudores, morbos judicant; qui vero secus evenerint, laborem, & morbi longitudinem, & recidivam significant.

Contentum seu Intentio.

De Sudoribus Criticis & minus talibus.

Connexio: Haftenus noster Hippocrates, varia attulit de crisi per abscessus facta: In hoc praesente Aphorismo, agit de Crisi, quae per excretionem fit, & pro Exemplo sudores assumit.

Hic Aphorismus duas habet partes: in *Prima* laudat dies, qui bonos sudores efficiunt; in *Secunda* vero qui malos procreant.

Pergit ergo Hippocrates in hoc Aphorismo, examinare sudores, in febribus evenientes, per quos haec sapissime judicantur; eos autem

Aaaa inquit

inquit, si inceperint, diebus imparibus, potissimum indicibus, & Decretoriis, bonos & salutare esse, secus in aliis: Quare considerat hic solummodo tempus apparitionis sudoris, nam de substantia, qualitate, loco, & modo, infra dicetur.

Quamquam autem, fere omnes interpretes, unanimi consensu, generalem hanc Hippocratis sententiam exponant, indeque rationem dierum judicatoriorum tueantur; si nihilo minus acuratius perpendantur, quæ hic eorundem serie is complexus est, procul dubio plures, & quidem non levis momenti difficultates occurrunt excutiendæ.

Primo autem se offert examinandum, cur ad seriem criticorum & indicum, *quartum diem* in hoc Aphorismo, non retulerit, recensuerit vero, tertium & quintum; itemque cur vigesimum primum, non *vigesimum*; qui tamen ab eodem inter potiores Criticos alibi referatur; & cur vigesimum septimum, non *vigesimum octavum*, veluti per septenos, comparatum ad vigesimum primum.

Nec deinde difficultate caret, quare tempus sudoris incipientis in febribus sit hic per dies impares, veluti crimos recensitum, cum tamen idem Autor *1. Epidem.* judicatorios dies diviserit in impares, & pares, eo sane discrimine, ut si morbi per dies impares exacerbentur, imparibus quoque judicentur, & per pares, diebus paribus.

Verum licet per dies impares, ingravescentes morbos, speciatim voluerit hoc Aphorismo designare, unde postmodum non decimum tertium, sed decimum quartum recensuit, & trigesimum quartum, non trigesimum tertium, vel trigesimum quintum, in quibus accessiones repetunt sensibiliores, & gravius affligentes, cum febres periodum servant tertianarum.

Unde præterea, tantam fidem hoc loco, judicatoriis diebus præstitit Hippocrates, qui *in Libris Epid.* quamlibet diem, tum impari, tum pari, decretoriam notat: Equidem Larissæam virginem, sexta die judicatam refert, ut & filiam Eurianactis. Pythion æger primus *1. Epidem.* decima die sudavit, & judicatus est; alique plures pari modo judicati memorantur, ut supra late ostendimus. Quamobrem Celsus diligentissimus cæteroqui præceptorum Hippocratis observator, nullam dierum criticorum, rationem habendam voluit, sed tantum accessiones repetentium febrium considerandas, cum ex illis morbi iudicium sumant. Animadversione pariter dignum videtur, cur omise-

rit quadragessimum diem, ultimum criticum acutorum morborum, in quo multi à gravissimis morbis vindicati memorantur, ut præteream reliquos dies in Chronicis considerabiles, sexagesimum, octuagesimum, centesimum, & centesimum vigesimum. Hinc traditam Criticorum dierum rationem suspectam plerique habuere, neque solum ex recentioribus, sed apud vetustiores quoque testis est ipse Galenus, qui in *Comment. hujus Aphorismi* hæc habet: *Non parva est de diebus scriptis in Aphorismo discordia, cum alii alios pro arbitrio scribant.*

Adhuc insuper inquirendum foret, quomodo possit sudor die tertio vel quinto Criticus & salutaris esse, tunc morbus in principio sit, quo tempore nunquam salubriter Natura movet, quæ tam brevi concoquere, & malos humores secernere nequit. Contra vero quomodo fieri potest, ut sudor post vigesimum septimum, vel trigesimum primum erumpens, tam malus sit, ut longitudinem morbi, laborem, vel recidivam portendat, si aliter succedat, cum jam sat diu is perduraverit, ejusque causa morbifica, magna ex parte, domita putetur, cum signis coctionis & criscos, præsertim quia sudores ab humoribus tenuibus proficiscuntur, & hic ab Hippocrate considerantur, veluti acutis morbis finem imponentes, qui propterea ultra quadragessimum producti non referuntur.

At vero quamvis hæc plurimi facienda sint, ut alias quoque meminimus; attamen Aphoristicam hanc Hippocratis sententiam non incommodant, quippe is sudores hic memorat, qui frequentius febricitantes alleviant, & potius iterato febres sensim solvunt, quam semel per absolutam & exactam crisin judicant, quemadmodum Galenus 3. de *crisibus* adnotavit, raro nimirum febres, præsertim productas unica & perfecta crisi terminari, sed sæpius repetitis evacuationibus desinere, quas idem solutiones appellavit, cohærenter his quæ Hippocrates ipse *Aphorismo 63. hujus Libri*, ex rigoribus quotidie recurrentibus, febres quotidie pariter solvi animadvertit, potissimum per sudores. Quoniam vero istæ per dies plerumque impares invadunt, nec quadragessimum transcendunt, ideo factum, ut impares præcipue notaverit, & omiserit quadragessimum. Quod autem de sudoribus non semel apparentibus, & judicantibus febrem, sed incipientibus apparere, & sæpius redeuntibus agere constituerit, patet manifeste ex contextu, ejusdem Aphorismi, nam inquit: *Sudores febricitanti si caperint: Si*

ergo enarratis diebus inceperint, ac deinceps progrediantur, utiles existimandi erunt. Cum imparibus autem connumeravit decimum quartum, & trigessimum quartum, an quod voluerit sequi priscorum morem, qui ex Pythagoreis, hos dies magis commendabiles fecerunt; an vero quia sub his adjacentes comprehensos voluit, quos ideo non retulit; an demum quia quæ sæpius observavit, scripsit. Atqui anticipantes, aut serius redeuntis febres, non raro in causa sunt, ut crises, quæ cæteroquin die impari evenirent, pari accidant; etenim fieri potest, ut tam diu iteratis accessionibus præveniant, aut remorentur, ut tandem dies permutent. Cæterum quartæ diei Hippocrates non meminit, quia sudores hic consideravit in declinationibus febrium comparantes, quæ cum per die impares ponantur exacerbari, propterea illi, non nisi in diebus imparibus quoque prodibunt: Sed & raro crises observatas testatur Galenus in quarto die, qui se semel tantum, & Archigenem bis in tota vita vidisse fatetur.

Quod postremo sudores aliis diebus contingentes, quam in his, qui notantur in Aphorismo, laborem portendant, morbi longitudinem vel recidivam intelligendum, cum absque signis coctionis accidunt, neque vi naturæ post secretionem expellentis; tum enim humorum multitudinem aut pravitatem consequuntur, adeoque morbum futurum longum, molestum, redeuntem, ancipitem, & non raro etiam capitalem, si præsertim alia pravitatis indicia simul copulentur.

Quid autem sudor sit, & quæ sudorum differentia & causæ aliaque observatu ac scitu digna, abunde tradita sunt in institutionibus, nec hujus loci est crambem reperere.

Dices I. Dies quartus est Criticus juxta Hippocratem *Lib. de Vi&et. rat. in acut. & Epidem.* Ergo tamen in hoc Aphorismo poni debuiſſet. *R. 1.* rationem, cur omissus fuerit, quartus dies in hoc Aphorismo, jam in contextu fuisse datam. *R. 2.* dies quartus est Criticus, ratione primi solius nego, ratione primi & septimi (ut supra diximus) quortam medius est concedo.

Instabis: Sæpius in febribus biliosis observantur crises, quarto die, quia est index septimi, Ergo etiam Judicatorius, Indices enim etiam sunt Judicatorii. *R. 1.* fieri crises in febribus die quarto, non autem ratione sui, sed ex præparatione tertiæ diei, licet excretio primo absoluta sit quarto die, talis ergo crisis, non propria est quartæ sed ter-

tia

tie diei: teste Galeno qui *in comment* dicit: *morbum, dum festinat imparibus diebus* (qualis est tertius) *judicari, ubi vero tardat, & postponit, ad dies pares* (qualis est quartus) *accessiones transferri.* R. 2. Dies Indices esse judicatorios, non ratione sui, sed ratione præcedentium dierum, quibus facta est coctio, ita quartus est judicatorius, respectu tertii, vel quinti, ubi morbi sunt ante vel post ponentes.

Aphorismus XXXVII.

Frigidi sudores, cum febre quidem acuta, mortem: cum mitiore vero, morbi longitudinem significant.

Contentum seu Intentio.

De Sudoribus frigidis.

Connexio: Cum in antecedenti Aphorismo, de sudoribus bonis aut malis, juxta dies pares aut impares evenientes, tractasset: In hoc præsentis Aphorismo, qualitatem sudoris, in febricitantibus considerat Hippocrates, & præsertim eam, quæ ad tactum pertinet, veluti sensibiliorem & frequentiore, frigoris videlicet aut caloris. Inquit autem, frigidos sudores semper malos esse, sed tamen cum acuta febre junctos, mortem; cum mitiori vero morbi solum longitudinem præsignare. Unde duas partes habet hic Aphorismus, juxta jamjam datas duas conclusiones.

Sudores autem in febribus calidos præsentiri oportere, vulgo notum est, tum quia à partibus viventibus, calore præditis emanant; tum quia sanguinis, vitæ fomitis, serositates redolent, & salium mixturas, unde sensationem tactui inferunt calorificam: Quo scilicet pacto, calor è corporibus percipitur, media actione sensui tactus illata: quamobrem quæ acrius tactum afficiunt, & patentius cutis poros divellunt & discerpunt, ea quoque calorem excitant recentiore. Contra vero, quæ coarctando constipant, vel obtundunt, atque tenuiores partes hebetant ac figunt, ita sensum frigoris inducunt, & non raro etiam stupefaciunt, si fortasse modum excedant, Hæc autem ab uno & solo sanguine, vel in motum celeriore adacto, vel è contra præpedito contingunt: Siquidem quoad usque sanguis mediocriter fluidus, per

venas & arterias excurrit, atque portione sui florida, & vivifica cunctas corporis partes irrigat, & quaqua versum inseritur calor, quem vitalem appellamus, in iisdem persentitur, quæque inde prodeunt, etiam excrementa, caloris quoque sensum exhibent. At vero ubi præter naturam, is afficitur, & vel exoluta portione volatili, vel etiam coagulata, vel aliter irretita, circuitum æque bene persolvere nequit, imo effatus & vapidus, nec arteriolarum externarum partium subit, nec cutim convenienter fovet, cumque ab acido potissimum serosiores & lymphaticæ portiones, ex eodem male affecto, pressius & infensius exprimantur, & per glandulas subtercutaneas, in exteriorem corporis ambitum protrusæ, ab ambiente aëre figantur, sudor proinde frigidus exoritur.

Atque hinc sudores frigidi, cum acuta & continua febre conjuncti mortem prænuntiant, quippe qui significant, eam in sanguine, & cæteris liquoribus corporis discrasiam, & depravatam affectionem inductam esse, ut jamjam cruorem, & floridam ejus portionem figendo, aut exolvendo, circuitum remoretur, & pulsationes in corde & in arteriis intercipiat, cum magno vitæ discrimine. Frigidis sudoribus quibus legimus periisse, Philiscum, Silenum, & uxorem Dromeadae *i. Epid.* Quod si febris acuta & continua non sit, sed levis & pusilla, ut ex adjunctis symptomatibus, ab humore potius, in glandulis subcutaneis concreto, atque sensim per febrem extenuato, ejusmodi sudor exorietur, quare longitudinem solummodo præsignabit.

Est tamen verum quod multum differt sudor frigidus, cum febre acuta copulatus, ab eo, qui mitem febrem comitem habet: qui enim febri acutæ & continuæ jungitur, veluti ab exoluto sanguine procedens, præter sensum frigoris, instar glutinis adhæret, unde liquatæ substantiæ alibilis, portionem exhibet; qui vero febri mitiori sociatur, cum non nisi lympham crassiozem, in glandulis hærentem, & sensim contabescentem, pro materia recognoscat, procul dubio serosiozem conditionem participabit, adeoque minus malus erit, quoniam nil aliud mali arguit, quam multam, crassam, & crudam materiam, quæ tandem diuturnitate temporis dissolvetur & superabitur.

Debent autem mites ejusmodi febres, tales revera esse ex sui Natura, modicum scilicet, levemque recessum à consueto, & sano statu corporis, inducentes: Nam si fortasse mites & pusillæ forent, ex
maligna

maligna & venenata conditione quemadmodum Galenus animadvertit, pusillas febres, inquiens, quandoque valde malignas esse, certe majus, & celerius periculum minantur, an quod internam alicujus visceris inflammationem consequuntur, an etiam, quia corruptionem & gangrænam. Quoniam vero indiscriminatim dixit Hippocrates, frigidos sudores, malos esse in febricitantibus, merito dubitari potest, an de sudore quocunque morbi tempore erumpente intelligere voluerit; an vero de sudore, solum in diebus criticis. Et quidem cum superiori Aphorismo, sudoris meminerit, certis solum diebus prodeuntis, videtur notasse, duntaxat cum, qui, quo die crisis expectatur, erumpat, ut existimat Heurnius. Verum non est, ut Aphorismum, ad hoc tantummodo sudores contrahamus, cum & reliqui etiam inter initia febrium comparentes, si frigidi sint, id ipsum præfagiant. Imo fatetur Mercurialis, rarissime contingere, quod ægri in principiis morborum, multum sudantes, aut non periclitentur aut longo morbo non corripiantur: quin & calidi sudores lethales esse consueverunt, si ægrum non allevent & vires dissolvant. Quamobrem non ideo quia sudores Hippocrates, frigidos vituperavit, calidos perpetuo utiles putandum, cum & hinc modum, & quantitatem servant à viribus tolerabilem, atque universales sint, è toto nimirum corpore manantes, in febrium declinationibus quæ propterea subinde intermittant, pessime quoque censendi sint. Attamen non semel vidimus, ejuscemodi frigidos & exitiales sudores, compescuisse Diaphoretica alexipharmaca, veluti antimonium Diaphoreticum rite præparatum & convenienti dosi Electuario Diascordii Fracastorii mixtum: Itemque bezoarticum minerale aut martiale, sal volatile viperarum, spiritum salis armoniaci aromatizatum &c. Fotis interea partibus externis spiritu vini vel simplici vel camphorato: quod quidem plerisque Paradoxum, sed ab effectu historiam & experimentum testatur.

Objectiones quæ super hoc Aphorismo moveri possent, jam in ipso contextu enucleatæ sunt.

Aphorismus XXXVIII.

Qua corporis parte sudor est, ibi morbum esse significat.

Con-

Contentum seu Intentio.

De Sudore Loci affecti indice.

Connexio: Cum in duobus antecedentibus Aphorismis Hippocrates egisset, de sudore, quoad tempus & qualitatem: In hoc præsentem Aphorismo, agit de sudore, quoad locum, seu partem corporis quam occupat. Hic Aphorismus ob brevitatem & simplicem conclusionem, non patitur divisionem.

Sudores in febribus, ut salutare sint, non tantum calidi, sed è toto corpore stillantes esse debent, cum inter evacuationes universales à Medicis referantur. Quandoque igitur particulares sunt ex una, vel altera corporis parte manantes, mali putantur ex 2. *Prognost.* 26.

Damnat itaque illos hic Hippocrates, non tantum ut causas morbosas, verum etiam ut signa, ostendentia illam partem, unde effluunt, speciatim affectam esse. Non tamen hæc cutanea solum intelligenda, quasi vero sudor, ex poris cutis emergens, eandem cutim laborantem designet, sed potius viscera interiora recondita; quamobrem è capite profluens cerebrum, ejusque meninges, laborare designabit, è pectore vero Pulmonem & Cor. Neque insuper ex illo semel erumpente, id ipsum conjecturandum erit, sed ex iteratis & recurrentibus sudoribus; unde experimur eos, qui cerebro destillationibus obnoxio laborant, in somno, circa frontem, & cervicem sudore perfundi & nares humidiores pati; qua ratione dicebat Hippocrates 6. *Aph.* 2. quibus nares Natura humidiores, & genitura humidior, ii minus integra sanitate fruuntur; quoniam cerebrum serositatibus abundat. Oportet autem sudorem, in his sponte prodire, nulla causa externa impellente, puta æstu aëris, exercitiis, hypocaustis &c. quippe à superabundanti humore necesse est, ut is solummodo erumpat; quamobrem, sicuti egestionem, per alvum, aut per vias urinæ, sponte habitæ, & plusquam Natura postulat, excedentes multitudinem humorum ostendunt, eorum præsertim, quæ inum ventrem occupant: Ita pariter exsudationes particulares adauctæ, atque alicubi collectæ, serositatis indicia sunt. At vero plerumque in glandulis quæ innumerabiles per habitum corporis, dispersæ detectæ sunt, serosi isti humores colliguntur, ut præ cæteris prodidit Warthonus in *sua Adenographia*: hæ autem cum vel à frigore ambiente exprimuntur, vel cum ab ejusdem æstu attenuantur & rarescunt vel

vel cum adeo turgidæ, ulterioris lymphæ incapaces evadunt, solent sponte sua illam in sudorem adigere. Atq; hinc obesiora corpora veluti succi plena, facile ex quacunq; levi causa copioso sudore perfunduntur.

Neq; vero sudor, qua parte erumpit, male affectam illam solum indicat, sed eam quoque unde provenit: Expertum enim est, caput aliquando sudare, ab affecto ventriculo, aut utero, ut in vertigine sympathica & hysterica affectione. In his enim non tantum morbus in capite & cerebro designatur, ubi sudor compareret, sed potissimum in ventriculo, in utero, unde affectum cerebrum titubat: Sic pariter sudat cervix, & frons ex syncope, inopino timore, cordis anxietate, & aliis vehementioribus animi pathematibus, neutiquam morbo cerebrum afficiente, sed cor, quoniam ex corde vehementer perturbato, sanguis tumultuarie commoveretur, & in serositates exstillat, caput & faciem potissimum perfundentes, ob imaginatricis conturbatæ vim, & molestant impressionem, à tristi & injucundo objecto susceptam.

Postremo, ejusmodi sudores, plerumque noctu & inter dormiendum contingere solent. Compertum enim habemus, eos, qui pectore laborant, vel laxiori & imbecilliori capite sunt præditi, per noctem sudare, circa partes easdem, in quibus se læsos, experiuntur, sensim scilicet se exonerante Natura, quibus superfluitatibus opprimitur. Vigilantes quoq; nonnulli consueverunt, circa stomachum & ventriculum sudare, cum præsertim multo cibo, & immoderato potu infarciuntur. Qui præterea doloribus articulorum obnoxii sunt, solent sæpius ex nullo, vel levi motu, in plantis pedum, & volis manuum, crassiori humore interdum madescere. Quare pars sudans, significabit morbum in se ipsa latentem, à susceptis ex imbecillitate humoribus, vel aliunde transmissis, vel ibidem congestis, & ingenitis. Hinc medicamenta ejusmodi humores abscindentia, dirigi debebunt, tum ad partem ipsam, quæ sudat, tum ad eam, quæ sudoris materiam procreat & suppeditat.

Dices 1. Potest esse sudor in aliqua parte, sine morbo, ergo falsus est Aphor. & sine morbo transeat, sine causa morbi nego, & hoc sufficit.

Instabis: Sæpe aliqua pars sudat, absque causa morbi: v. g. ex violento exercitio, Ergo nulla solutio. & ut dictum in contextu de hoc sudore ex tali causa, non loquitur Hippoc. non enim est morbosus.

Urgebis: Si hic Aph. verus esset, ergo quotiescunq; cutis sudaret, esset morbus in cute, & non in parte illi subjecta, quod falsum est. & cutem

tantum esse viam perquam sudor transit, unde dum illa sudat, non sequitur ergo in illa morbus est.

Aphorismus XXXIX.

Et, qua parte corporis, inest calor aut frigus, ibi morbus.

Contentum seu Intentio.

De Calore & frigore, loci affecti indice.

Connexio: Hic Aphorismus est continuatio prioris morbi sedem investigans, per qualitates caloris vel frigoris. Hic Aphorismus pariter ac præcedens, ob brevitatem divisionem non admittit.

Non tantum ergo à sudore, particulatim erumpente, latentis ibidem morbi indicia sumere possumus, verum etiam ex aliis accidentibus, quæ eidem insueta contingunt, unde ex mutato cutis colore, alopecia, asperitate, duritie & aliis, id ipsum conjicere solemus. Notat autem speciatim in hoc Aphorismo Hippocrates sensum caloris, aut frigoris, qui si fortasse, in aliqua parte diutius perseveret, nec facile cedat, eam morbo laborantem designabit.

Et quidem calor aut frigus, partem affectam indicabunt, si modum & temperaturam exceßerint, cum recessum arguant à consueto & naturali: Calor enim alicubi exuperans, sicut & frigus, designant humorem ibidem collectum hæere, qui aut indebitam fermentationem excitet, aut circulantem sanguinem retardet, aut consuetam perspirationem impediat, aut alibilem succum depravet, vel aliud præter naturæ morem, agat, quod sensum acuat vel obtundat, quemadmodum à sanguine restagnante, plerumque accidit ut in tumoribus. Sed & aliquando fit, ut partem exolutam vel emortuam denuntiet, adeoque præsentem vel imminensem gangrænam. In his etiam, qui quartanas vel tertianas febres patiuntur, frigus molestissimum, instar glaciæ inter initia paroxysmorum, circa lumbos persentitur, designans ad easdem partes, harum febrium focos pertinere, prout novissime demonstravit, Franciscus de le Boe Sylvius. Necessè autem est, caloris aut frigoris excessum, ita partibus accidere, ut diutius perseveret: Nam si fortasse illico dispareret, cum non à firma & stabili causa procederet, certe vel nullum vel levem tantum partis morbum indicaret, sed solam ejusdem imbecillitatem, qua obnoxia illa denotaretur perturbationibus

bus subeundis præsertim ex halitibus, è quibus fugaces ejusmodi calores excitari solent.

Pari ratione, si fotibus calorificis, sensus frigoris desineret, nec liceret latentem in parte morbum arguere: etenim non raro ab æstu aëris immoderato, facies plurimum calere solet, quæ frigida ablutione, illico mitescit; & contra sæpissime per hyemem, algent manus & pedes, nullo interius latente morbo, quia mox igne, vel alio corpore calorifico in naturalem & consuetum calorem restituuntur. Quare ejusmodi excalefactiones & refrigerationes, ab internis causis induci debent, neque ut levis momenti sint, oportet, ut proinde obsistant, adhibitis extrinsecus medicamentis, secus latentem sub cute morbum non indicabunt.

Morbus denique ex ejusmodi sensu frigoris vel caloris, in partibus affectis indicatus, materialis esse debet, nam quemadmodum dolor non fit, nisi à re solvente continuum; ita frigus & calor in partibus excitatus, non sine aliquo sensu doloris, absque causa materiali nequit haberi, puta ab humore sensum frigoris vel caloris inferre valente. Porro omnes istiusmodi sensationes cum tactu sunt: *Tangere autem vel tangi, nisi corpus, nulla potest res.* Unde bene dixit Fonseca in *Comment. hujus Aphorismi*; morbus, inquit, non est intemperies, sed quidpiam aliud intemperiem sequens, seu ex illa resultans, id est, indispositio corporis per calorem vel frigus inducta.

Dices I. Sæpe sentitur in aliqua parte calor vel frigus, & tamen non adest morbus, Ergo non subsistit Aphorismus. R. si calor & frigus non sint permanentia concedo, si sint permanentia nego.

Instabis: Calor & frigus in aliqua parte, non significat morbum in soluta unitate, non in mala conformatione, Ergo morbum intemperiei, ergo tamen frigus & calor erit morbus, contra dicta in contextu. R. negando antecedens, nam in morbo solutæ unitatis v.g. læso nervo vel in mala conformatione v.g. ligatis vel obstructis venis sentitur calor vel frigus: | Ergo calor & frigus est morbus intemperiei & pro materiali seu intemperiei cum materia concedo, pro formali seu sine materia nego.

Urgebis: Calor & frigus sunt motus de gradu in gradum, sed isti motus lædunt immediate & per se actiones; sub sumo: atqui quod taliter lædit actiones est morbus, Ergo calor & frigus sunt morbi pro formali. R. Ejusmodi motus, non immediate lædere actiones, quia non

sunt quid in facto esse, (quod est morbi) sed tantum in fieri (quod est causæ) R. 2. morbus est dispositio, quæ est terminus secundarius istius motus, quaque primo & per se lædit actiones.

Aphorismus XL.

Et, quando toto corpore, mutationes accidunt, ut si corpus refrigeretur, & vicissim calefiat, vel calor alius, ex alio oriatur, longitudinem morbi significant.

Nota: Hic Aphorismus repetitur iisdem prorsus verbis Lib. 7. Aph. 60. Ubi toto corpore mutatio, & corpus refrigeratur, & vicissim calefit, aut colorem alium ex alio mutat, morbi significatur longitudo.

Contentum seu Intentio.

De Vicissitudine caloris, frigoris & coloris.

Connexio: In priori Aphorismo egit de calore & frigore; in hoc præsentis Aphorismo, agit de mutatione, quæ fit in calore & frigore, & de successione colorum. Hic Aphorismus, simplici constans conclusionem, dividi non potest.

Sciendum ergo, etiam ex coloribus, in corpore apparentibus, mox vero disparentibus, & cæteris mutationibus, repente subortis, atq; evanescentibus, de morbi conditione, iudicium ferri posse decernit Hippocrates; & ubi præcedentibus Aphorismis, partem affectam, ex sudore & sensu caloris aut frigoris dignoscendam protulit, nunc ex mutationibus corpori contingentibus, futuri morbi chronici seu diuturni prognosim exhibet. Mutationes ægris corporibus evenientes, quamvis plurimæ esse possint, sensibiliores tamen, & frequentiores referuntur, quæ visu & tactu cunctis innotescunt, veluti excalefactiones, refrigerationes, & colorum mutationes, præsertim in facie. Hæ modo, cum subinde fiunt, & sæpius variant, male affectam corporis & sanguinis, aliorumq; humorum, constitutionem designant. Sicut enim colores, qui naturaliter corporibus accidunt, ex sanguine, & cæteris succis, cum sanguine commixtis exoriuntur, unde vulgo fertur: *qualis color in cute seu facie, talis humor seu sanguis abundat in corpore*: Ita in statu morbofo, colores varii in cute apparentes, varietatem, confluentium in sanguinem humorum consequuntur, atq; adeo depravatam ejusdem sanguinis

guinis habitudinem. Irem, sicut calor moderatus, conformis & consentaneus vitæ, à sanguine conveniente est, ita ab eodem male affecto, ac vitiato, variæ & differentes colorum mutationes proficiuntur.

Non tamen hic intelligendas vult Hippocrâtes, eas corporis mutationes, quæ sensim & progressu temporis, agris eveniunt, vel certâ solum periodo, & statuto ordine redeunt, sed subitaneas, repentinas in ordinatas violentas, quemadmodum colligitur *Lib. de Judiciis*; unde hic Aph. videtur desumptus. Et sane; siquidem mutationes periodum servantes, & per intervalla redeunt, ejusmodi in febribus intermittentibus, in quarum initiis cutis friget & pallet, calet vero & rubet in augmento, non semper morbi longitudinem portendunt. Quare tum erunt potius observabiles, cum repente accidunt, & evanescent, ut cum facies v. g. mox rubet, mox pallet, modo livescit, modo flavescit, calet & friget, quodque uni parti accidit, contingat quoque reliquis, ac toti corpori, & quidem, vel simul juncta partium omnium extimarum, vel unius post aliam, continuata mutatione.

Sed cur hæc repentinæ mutationes, morbi longitudinem prænuntient, difficilioris est inquisitionis. Et crediderim, id ex mala & varia sanguinis affectione verisimilius evenire. Cum enim partes acres, acidas, serofas, crassas, exsolventes, coagulantes, & alias in se ille suscipit, varias affectiones partibus, quas permeat, imprimit; unde acredine calorem & ruborem, acre pallorem & frigus, serositate mollitiem, alborum & madorem crassitie, nigrorem, tumorem & hebetudinem, & si fortasse falsuginem contrahat, pruritum, asperitatem & erosionem partibus inferet. Hinc Hipp. *Lib. de ossibus in fine* scribit: *Laxatis venis* (seu potius arteriis) *ex corde fiunt ca'ores rubicundi ac lucidi; adstrictis vero virides cum pallore, aut etiam lividi.* Laxantur autem aut constringuntur arteriæ & venæ, prout sanguis acrior & floridior, vel contra acidiior & consistentior evaserit. Quando sanguis, cum varias contrahit affectiones, atq; diversorum succorum mixturas certe longius tempus exigit, ut percolatione & secretionem in emissariis habita in statum naturalem redigatur. Accedit quod ex varia & multigena sanguinis constitutione, viscera corporis diversimode quoq; afficiuntur, & illorum fermenta vitiantur, quo circa ob differentem eorundem discrasiam, non tam facile potest ægritudo inde deducta removeri, sed in longum tempus necessario protrahitur; sed & neque periculo vacabit, si præsertim alia

tur, quæ illius pravitatem ac malitiam ostendant, quippe non sine vitæ discrimine fit sæpenumero morbi longitudo: Neq; hic Hipp. longum morbum attestatus, securum illum & salutarem est ausus affirmare.

Verum hæc, non ex quacunque causa, profecta putandum, sed ex infixa ac tenaciter hærente, secus morbi longitudinem minime portenderent, veluti si à vaporibus tantummodo provenirent, memoratæ colorum mutationes: hæ etenim in affectionibus hystericeis, in morbillorum ac variolarum eruptionibus, in renum & intestinorum doloribus, sæpissime accidunt, citra diuturnitatem.

Galenus his paucis complexus est huius Aphorismi commentum: *Variæ, inquit, & discrepantes affectiones, semper diuturniores fiunt, quam quæ sunt unius modi & formæ; quia scilicet natura parvo tempore multas affectiones subigere nequit.*

Dices I. Hippocrates in prognosticis, laudat mutationem caloris, ergo hic non debet illam damnare. R. ibi Hippocratem egisse de paulatina mutatione in melius: hic vero de repentina mutatione in pejus.

Instabis: Varietas arguit brevitatem, ut supra diximus, nam febres quæ paroxismos non mutant, & eadem hora redeunt longæ sunt. R. Etsi febres eadem hora redeunt, arguant febris longitudinem, non tamen sequitur, quod varietas in toto corpore, arguat brevitatem: præterea alia est diversitas, quæ fit de hora in horam, frigoris aut caloris aut coloris, de qua in hoc Aphorismo: alia quæ fit in paroxysmis recurrentibus, alternis vel ternis vel quaternis diebus, de qua ibi.

Urgebis: In animi pathematibus, ut in ira, metu &c. fit illa caloris & frigoris, imo & coloris repentina vicissitudo, absque ullo morbo, Ergo non est tam funesta. R. Hippocratem loqui, de istis mutationibus, quæ fiunt in morbis, non extra morbos.

Instabis denuo: Instante crisi in morbis, ejusmodi fiunt mutationes & tamem plerumque sine periculo. R. Etiam tunc temporis significari causarum diversitatem, contrarietatem & difficilem coctionem adeoque etiam suo modo, mali ominis esse.

Urgebis: In principio paroxysmorum febrilium, una eademq; hora adest illa mutatio, caloris frigoris & coloris, ergo omnes febres erunt, vel lethales vel longæ, quod est falsum. R. vicissitudinem illam in febribus non esse talem, siquidem frigori quidem succedit calor, sed à calore iterum non reditur ad frigus, una eademq; hora, ut vult Aphorismus.

Apho-

Aphorismus XLI.

Sudor multus per somnum, citra causam manifestam factus, copiosiore cibo corpus uti, significat, quod si cibum, non assumenti hoc accidat, evacuatione indigere significat.

Nota: Idem quasi Hippocrates repetit infra Lib. 7. Aph. 61.

Contentum seu Intentio.

De Sudoribus nocturnis.

C*onnexio:* Cum antea dixisset de sudore, qui partis morbum indicat, unde effluit: In hoc Aphorismo agit de sudore, qui in sanis fieri solet. Hic Aphorismus in duas partes dividitur: in *Prima* docet, sudoris multitudinem per somnum indicare nimiam cibi, potusque copiam seu plusquam Natura ferat: in *Secunda* vero dicit, purgationem denotare, si moderate comedatur.

Per utili sane documento, admonet hoc Aphorismo Hippocrates quid ex multo sudore conjectandum, quidque agendum sit, tradita causa immoderatæ istiusmodi sudationis. Unde ad diagnosim ille pertinet, qua curatio congruenter institui possit. Verum sunt hic plura distinctim animadvertenda.

Primo sudor multus refertur seu copiosus; quandoquidem salutaris ut illi sit, non parcus & imperfectus esse debet, sed qui universam causam morbificam, extra corpus educat. Jure merito ergo adnotatur multus, ut exinde ambigere non liceat, ab ejus parcite catharsim judicari necessariam, quæ compleat, quod à sudore forsan perfici non potuit.

Secundo: In ductus ex somno: nam ut supra diximus, sudor salutaris debet esse calidus, universalis, & in somno factus: si modo is calidus, universalis & copiosus, in somno contingens non profit, illius malitia aliunde petenda erit, cum iterato profluat & non allevet.

Tertio: Adjicitur sine causa manifesta, id est, quod prodeat, non ex æstu ambientis aëris, aut hypocausti, nec ab assumpto medicamento sudorem propellente, nec aliquam aliam causam, quæ ipsum promovere valeat, sed solum internam, & reconditam consequatur.

Cum

Cum igitur hæc simul junguntur, sudor autem non semel accidat, sed sæpius repetat, corpore interea nihil proficiente, suspicari primum licebit, eum à ciborum & potuum copia provenire, unde tanta ejusdem materia suggeratur: solent quippe partes corporis, præsertim extenuatæ, aut etiam viribus exolutæ, statim ab assumpto cibo, dilutiores ejus particulas, in suis poris excipere, quibus deinde gravatæ, cum nequeant omnes, in sui nutritum transmutare, coguntur in adjacentes glandulas deponere, & mox per sudorem excernere, qui sane desinet, assumpto cibo & potu frugaliori, quantus scilicet satis sit viribus reficiendis, absq; ullo partium gravamine. Si autem sudor multus, ciborum & potuum copiam non sequatur, plane designabit ingentem, aquei & serosi humoris collectionem, quæ omnino evacuatione egebit. Verum tamen sudor si modicus foret, languorem potius Naturæ, vel rariorem cutis texturam argueret, cum fortasse diutius repeteret.

At quo genere evacuationis, impurum ejusmodi corpus repurgari debeat in Aphor. Hipp. non explicuit: quare licet pressius intelligi possit, quæ per cathartica peragitur, quibus compactiores & crassiores succi, à sudationibus relictæ, efficacius educuntur; nihilominus etiam, quæ per vias urinæ fieri solet, admitti poterit, si præsertim ad eas vergere videantur, qui excernendi sunt. Nam qua ratione crassi humores, ad articulos deponendi, solent non raro, per vias urinæ expurgari, poterunt & eadem, qui per cutim omnino excerni nequeunt, in renum ductus transmitti & evacuari. Sæpe etiam expertum est, ex stipticiori alvo, laxatis urinæ meatibus, uberius illam profluxisse, crassam & turbidam ac multo sedimento saturam. Verum tutius semper erit, catharticis uti, si non semel & vehementioribus, saltem blandioribus & per intervalla, prout res ipsa & vires tulerint. Ea autem ejus potissimum sint generis, ut simul incidant & attenuent, referantque conditionem hydroticam aut phlegmagogam. Neq; vero hic reticendum, quod jam pridem iterato usu compertum, contumaces morbos, atq; reconditas morborum causas, inpenitioribus corporis partibus hærentes, tuto & salubriter fugari & quod admirabilius, absq; ulla sæpius evidenti evacuatione expulvere antimonii & nitri, seu arcano duplicato, ad plures dies adhibito, dosi tamen varia, pro corporū & ætatum diversitate, mira enim præstabit.

Dices I. Idem videtur dixisse Hipp. Lib. 2. Aph. 8. ubi dixit: Si à morbo cibum accipiens, non reficiatur, copiosiore alimento corpus onerari significat:

eat: si vero modice epulanti, id accadat, purgatione eget. Ergo hic male repetit. & Hipp. ibi loqui tantum de convalescentibus, hic vero de sanis.

Dices II. Si sudor nocturnus fieret ob copiam alimenti, Ergo etiam diurnus fieri deberet, de quo nulla fit mentio. & Nego consequentiam, quia calor de nocte magis redit ad partes internas, & sic concentratus potentius agit.

Instabis: Pori ob motum de die magis patent, Ergo magis sudare deberet homo de die & etsi pori magis pateant, non tamen major debet esse sudor, sed potius major insensibilis transpiratio, præterea corpus & calor de die magis distrahitur, de nocte autem concentratur.

Aphorismus XLII.

Sudor multus frigidus calidusve semper fluens; frigidus majorem, calidus minorem morbum significat.

Nota: Hic Aphorismus fere coincidit cum Aphor. 37. hujus Libri supra explicati.

Contentum seu Intentio.

De Sudore frigido vel calido continuante.

Connexio: Iterum Hippocrates sicut in antecedentibus agit de sudore, & quidem symptomatico, secundum quantitatem seu multitudinem, qualitatem seu frigidam seu calidam & tempus.

Hic Aphorismus duas habet partes: In *prima* docet continuum sudorem esse malum: In *secunda*, frigidum pejorem calido.

Sudorem proinde hic multum seu copiosum semperque fluentem considerat, illumque ait, omnino morbum indicare: Equidem modicus sudor, utpote levis momenti, ab Hippoc. parvipenditur, veluti levem quoque causam designans; at vero abundans & perpetuo profluens, non semel scilicet, aut unico die, præsertim critico, sed tota morbi duratione contingens, multitudinem simul, ac malitiam arguit, quæ saltem diuturniori tempore emendari poterit: Pravitatem autem significabit majorem vel minorem, prout frigidus vel calidus ille fuerit; nam calidus tenues & mobiles humores designabit, qui facilius exolvi & expurgari possint; frigidus vero crassos & consistentes coctionis longe difficilioris: quamobrem non magis & minus legendum existimant Fuchsius

- & Heurnius, ut Leonicens verit, sed *maiores* seu longiores morbum & *minores* seu breviores.

Consideratur præterea hic sudor è toto corpore manans, non vero ex aliqua tantum parte. Ita enim melius necitur præcedenti Aphorismo; nam de sudoribus particularibus antea verba fecerat: quamquam nihil repugnat, ut etiam aptari possit sudoribus ab una vel altera parte erumpentibus; equidem sicut se habet sudor universalis ad totum corpus, ita sudor particularis, ad speciales corporis partes, ideoq; sudor multus, sive frigidus sive calidus semper fluens, morbum omnino magnum indicabit, vel dignitate partis affectæ, vel symptomatum magnitudine, ac sævitia aut curandi difficultate. Hinc omnis sudor calidus bonus est, nisi alia conjungantur, quæ sudoris bonitatem attestentur, ut præsertim si in declinatione morbi fiat, præcedentem coctionem subsequatur, feratq; deinceps ægri levamen, ac morbi, causæ morbificæ & symptomatum abolitionem. Frigidus autem sudor contrarium tenet, vita enim in calido, mors in frigido consistit, sic pariter frigidus sudor plerumque interitum causat.

Dices I. Morbi ex materia calida sunt magis periculosi, quam ex frigida, Ergo frigidi sudores erunt minus periculosi quam calidi. & sudores frigidos non tantum fieri à causa frigida, sed etiam calida, quia hi calamitosum morbum indicant, quando externa frigent, interna uruntur.

Dices II. Nunquam datur sudor semper fluens, ergo in Aphor. falsè allegatur. & per semper fluens, intelligi superfluens seu superfluous.

Dices III. Sudor in principio febrium, cruda existente materia nunquam est bonus, Ergo nunquam debet provocari. & 1. si sudores sunt symptomati vires naturæ dissolventes, debent provocari. etiam ut passim fit ipsa theriaca &c. & 2. negando antecedens, quod sudor simpliciter crudus provocetur sed sudor ille, qui in principio morbi provocatur, est humorum pars jam cocta, cujus onere levata natura, facile reliquum superat.

Instabis: In principio morborum nihil movendum est, nisi materia turgeat, Ergo nec sudores provocandi. & hic Aphorismus intelligendus est maxime de purgatione & venæsectione, non de sudoribus præsertim symptomaticis.

Aphorismus XLIII.

Febres, quæ tertio quoque die affligentes, non intermittunt; periculosiores: quoque autem modo intermiserint, periculum abesse significant.

Nota: *Hic Aphorismus iisdem prorsus verbis repetitur Lib. 7. Aph. 62.*

Contentum seu Intentio.

De prognosi febrium continuarum & intermittentium.

Connexio: Postquam hætenus varia prognostica à sudoribus, in & extra febres desumpsisset in superioribus Aphor. Hippocrates: In hoc præsentī Aphorismo, judiciose incipit agere, de prognosticis ab ipsis febribus & à febrium paroxysmis desumendis, quod per reliquos Sectionis hujus Aphorismos continuaturus est.

Hic Aphorismus duas habet partes: In *Prima* docet, febres, quæ tertio quoq; die affligentes, non intermittunt, esse periculosas: In *Secunda* vero, quoquo autem modo intermiserint, vacare periculo asserit.

Orditur ergo nunc Hippocrates, accidentia febrium, quidquid boni vel mali, ex illarum accessionibus, ac progressibus prælagiri possit, pluribus Aphorismis edocet.

Primum autem, illarum continuitatem, atq; intermissionem memorat, & dicit intermittentes periculo vacare; continuas vero, & tertio præsertim quoque die ingravescentes, periculosas magis magisque fieri, quo graviores & validiores fuerint.

Omnes itaq; febres complectitur, cum dicat, *quacunque*: quo nimirum nullam excipit, modo non intermittat: dicuntur autem non intermittere, cum ægrotum, nunquam febre vacantem deserunt, licet magis vel minus excrucient, prout magis & minus ad augmentum accesserint, in quo omnia symptomata vehementiora fiunt. Has febrium species Græci consueverunt *Synochas* appellare, id est, continenter affligentes, non quod suis quoque temporibus particularibus careant, sed quia ægrum nunquam immunem relinquunt, quamvis pro varia materiæ morbificæ motionē, modo incipiant, modo augeantur, aut stent, modo denique in declinationem vergant, quam nondum absolutam, alia accessio febrilis excipiat, cum iisdem omnino molestiis, ut prius, sed & non raro tertio quoq; die, vehementius adoriuntur & affligunt.

At quænam sint ejusmodi febres continuæ, tertio quoque die vehementius affligentes, controvertitur apud interpretes: Fuchsius, semitertianas interpretatur, græce *Hamitritæos*, de quibus Hipp. 1. *Epid. constit.* 1. hæc habet: *Febres horridæ, continuæ, acutæ, omnino non intermittentes, forma autem erat semitertiana, uno die leviores, altero vero gravius invadentes, & in summa acutiores evadentes.* Hinc duas statuunt exigi conditiones, in febre semitertiana, ut nimirum continua & acuta sit, itemq; horrida, & alternis diebus gravius affligens: quas ut Galenus eidem applicaret, semitertianam febrem facit compositam, ex tertiana intermittente, & quotidiana continua: hæc enim ratione inquit, simul horridicam fieri, tertius quibusvis diebus ingravescentem, continuam atque acutam.

At crediderim, voluisse hic Hippocratem eas febres memorare, quæ græce *Tritæophyes* appellantur, tertianarum naturam referentes: harum quoq; meminit Galenus 2. *de differ. feb. Cap. 2.* vocatque tertianas extensas, quæ scilicet de uno in alterum diem, adeo protrahuntur, ut antequam prior accessio desinat, nova per triduum subingrediatur: *Tritæophyes* ergo istæ febres, præterquam quod sua Natura molestissima, cum continuæ sint, & de tertio, in tertium, novis semper accessionibus recurrentes, solent etiam gravissimis symptomatibus stipari, quæ procedentibus paroxysmis, magis magisque increbescunt; quamobrem præ languidi redditæ ægrotantes facillime succumbunt; Jure merito igitur in Aphorismo periculosiores referuntur.

Verum quomodocunque intermittentes periculo vacare, qua ratione adjectum sit, non omnino bene constat; cum apud gravissimos plerosq; Autores habeatur, ab intermittentibus febribus ægrotos periiisse, & non sine nota malignitatis; quamvis à Galeno proditum sit in *Comment. hujus Aphorismi*: *Sola illa, quæ in quietem febre vacantem desinunt, periculo carent, etiamsi vehementissimam, & valde longam habuerint accessionem. Non absq; ratione autem eas, quæ in quietem febre vacantem desinunt, esse absq; periculo, inquit, ut quæ non ex inflammatione aliqua, neque ex maligna humorum putredine, occasionem habeant: Neutra enim harum, ad quietem pervenit, febre vacantem.*

Attamen non desunt, qui vel omnino falsum, vel non perpetuo sed ut plurimum, verum, hunc Aph. asserant, præsertim quia citra inflammationem, & absq; humorum maligna putredine continuæ, & periculosa febres observata sint, imo exitiales, & malignæ sæpe sapius videantur

antur cum intermissione: ut de Hemocrate scribit Hippocrates 3. *Epid. agro 2.* qui licet sæpius à febre liber visus fuerit, nihilominus vigesima septima die mortuus est.

At esto, hæc à quibusdam opponantur, non tamen rationabiliter convinci poterit, febres revera intermittentes, periculosas esse, nisi prius successu remporis in continuas permutentur. Per id enim quod vere intermittunt, periculo vacant, unde ut periculum minentur, continuæ fieri debent. In quacunque cujuslibet accessionis, intermittentium februm declinatione, febrile fermentum, veluti sanguini extraneum, repurgatur & expellitur, vel per sudorem, vel dejectionem, aut vomitum, vel per urinam, vel saltem insensibiliter media transpiratione: cumque mors contingere nequeat, absque proxima & continuata sanguinis & cordis læsione, qua utriusque motus interrumpatur, fit proinde, ut cum febris intermissione, illa haberi nequeat.

Quæ vero febres intermittentes referuntur mortem attulisse, revera intermittentes non fuerunt, vel continuæ mox evaserunt. Et quidem sunt, quæ remissionem & declinationem subeunt, non tamen omnino desinunt, sive ad quietem febre vacantem perveniunt, unde apparenter solum videntur intermittere, prout Hemocrati accidit, qui visus est à febre immunis, sed revera febricitabat, idque ex eo potissimum, quia nunquam à symptomatibus fuit vacuus, ut bene etiam observat Mercurialis *hoc loco*; unde non legitima, & vera intermissione suspicari jure possumus. quin & sæpe sæpius, absque ulla evacuatione, vel manifesta causa, perfecte declinasse, non licet credere.

Sunt præterea, quæ primū intermittentes, deinde transeunt in continuas, ut cum fermentum febrile antea extraneum sanguini, deinde intraneum evadit, aut ex mala sanguinis habitudine, aut ex viscerum dyscrasia, unde sanguis perpetin inficiatur & contrahat simile vitium, quod aliunde suggerebatur: sic aliquando acidum ex Pancreate suggestum, ita illum succedentibus Paroxysmis vitiat, ut non tantum acorem imprimat, difficulter secernibilem, verum etiam eundem reddat concretum, unde febres simul continuæ & malignæ. Sed dubitari potest, an Hippocrates, hunc Aph. voluerit intelligendam, de omnibus febribus intermittentibus, ut nimirum illæ, vi solum intermissionis periculo vacent; an vero solas tertianas expresserit, cum earum duntaxat, quæ tertio die fortiores sunt, in prima Aphorismi parte meminerit.

Equidem probabile videtur, excipere voluisse solū tertianas febres,

quocunq; modo intermittentes; etenim hac ratione, exceptio memorata, in II. parte Aph. responderet ad amissam generali assertioni primæ. Verum quia febres istiusmodi periculo vacare dicuntur, uti intermittentes, procul dubio parum intererit, an tertianæ, quotidianæ, vel quartanæ sint, dummodo intermittant, & ægrum febre vacantem deferant. Febres siquidem omnes à periodis desumptæ possunt ab uno, eodemque humore, diversimode tamen affecto exoriri, ut alias abunde est ostensum. Quare eas periculo vacare putandum, non à conditione peccantis humoris, qui idem in omnibus esse potest, sed ab intermissione; quamvis tertianæ cæteris, semper securiores, hoc Aphorismo notentur, cum intermiserint, forte quia cæteris breviores. Cæterum dicuntur intermittentes febres, periculo vacare, secluso quocunque alio morbo, cum quo illæ copulari possunt: quippe quartanæ febres, cæteroqui tutissimæ, ubi intermiserint, at si cum obstructione & scirrholienis conjungantur, lethales esse consueverunt: sicut pariter tertianæ cum ictero, ac hepatis tumore; & quotidianæ cum ventriculi languore, & fluxu cæliaco: Id ipsum de cæteris ætate decrepita, virium dejectione, erroribus in victu si in febribus adsint, dicendum. Porro, quo tempus intermissionis longius fuerit, eo febris securior fiet: habet enim Natura, quo melius se ipsam reficere valeat.

Dices: Febres tertianæ intermittentes, à quibusdam dicuntur acutæ, ergo sunt periculosæ. & sunt acutæ respectu paroxysmi particularis aliquando concedo; respectu paroxysmi universalis & semper nego.

Reliquæ objectiones & difficultates in contextu sunt resolutæ.

Aphorismus XLIV.

Quos febres longæ exercent, iis tubercula ad articulos, vel dolores fiunt.

Nota: Hic Aphorismus iisdem prorsus verbis repetitur infra L. 7. Aph. 63.

Contentum seu Intentio.

De consequentibus febres, tuberculis vel doloribus.

Connexio: Jam supra Aphorismo decimo tertio hujus Libri Hippocrates detexerat, abscessum fore ex lassitudine: In hoc Aphorismo autem à febris longitudine, abscessus & dolores fore prognosticat. Hic Aphorismus, ob brevem & simplicem conclusionem non patitur divisionem.

Præ-

Præsupposita distinctione febrium quarumcunq; in *acutæ* & *chronicæ*, quemadmodum acutæ sæpiissime solent, per sensibiles evacuationes terminari, potissimum vero per sudores, urinam, ac dejectionem, quia excitantur ab humoribus fluxilioribus, & facile mobilibus: Ita Chronicæ potius per abscessus desinunt, quod crassi & tenaces humores difficilius, extra corpus, per consueta emissaria queant expurgari. Hinc Hippocrates eos hoc Aphorismo prædicit, qui longis ac diuturnis febribus laborant, in tumores & articulorum dolores incidere, quo tempore declinationem attigerint. Humores enim in his febribus, tum ex crassitie & ineptitudine admotum, tum ex imbecillitate Naturæ, quæ tanta diuturnitate, debilis evasit, nequeunt nisi in articulos decumbere, unde postmodum labores & dolores accidunt. Tubercula licet in articulis pariter non raro oboriantur, nihil tamen prohibet, quin etiam in reliquis partibus, præsertim adenosæ seu glandulosæ, erumpant, ubi facile ejusmodi humores adhærent, & in tumores attolluntur. Hinc tubercula, non ad articulos referenda putat Cardanus, & Fuchsius Aphorismum legendum esse arbitratur, cum particula disjunctiva *vel*, ita ut tubercula ad totum corpus, labores vero seu dolores ad articulos pertineant. Verum, quæ de causa, longis febribus hæc accidunt, docet Hippocrates mox sequenti Aphorismo.

Dices I. Fiunt etiam abscessus in febribus acutis & brevibus v. g. parotides, bubones, carbunculi &c. Ergo non tantum in longis & chronicis. *R.* Nos non negare febribus acutis abscessus; sed in his fiunt repente & magis insperati.

Dices II. Chronicæ febres, etiam terminantur hæmorrhagiis & urinæ profluvio, Ergo non tantum per abscessus. *R.* Concedo totum, hic autem Hippocrates solum loquitur de abscessibus & doloribus.

Dices III. Ubi est abscessus, ibi est dolor, & ubi est dolor, ibi est abscessus, quia dolor fit cum solutione continui, quæ vere est abscessus, Ergo superfluum est ista duo disjunctive ponere. *R.* 1. Solutionem jam esse datam in contextu, dolores nimirum pertinere ad articulos, abscessus vero ad totum corpus. *R.* 2. Negando antecedens, fiunt enim abscessus quandoque sine dolore; deinde licet dolor fiat à solutione continui, hæc tamen non est proprie abscessus, qui proprie sumitur hoc Aphorismo pro tumore.

Quæres: Quid per labores intelligatur? *R.* jam supra diximus per labores intelligi dolorem, imbecillitatem, molestiam, quæ sentitur.

Aphorismus XLV.

Quibus tubercula ad articulos, vel dolores post febres diuturnas fiunt, ii pluribus cibariis utuntur.

Nota: Hic Aph. iisdem propemodum verbis recensetur, infra L. 7. Aph. 64.

Contentum seu Intentio.

De occasione tuberculorum & dolorum in febribus longis.

Connexio: Cum in antecedenti Aphorismo de abscessu locutus fuisset Hippocrates, qui sequitur causam internam; in hoc præsentī Aphorismo de illo abscessu agit, qui causam sequitur externam, scilicet cibi copiam. Hic Aphorismus ob brevitatem non dividitur.

Explicat ergo Hippocrates hoc Aphorismo, quibus tubercula, vel in articulis dolores ex febribus accidunt, eos nimirum, qui pleniori utuntur cibo à febribus liberati. Quare de convalescentibus, post febres diuturnas, dictum exponunt cum Galeno Fuchsius & Cardanus: nec absq; ratione; siquidem remanent, ab his febricitantes, multum languidi, & extenuati, ac proinde partes diu alimento depauperatæ, mox uberius pastæ, facile, ob debilem concoquendi facultatem, pravis atq; indigestis succis opplentur, qui deinde, ad glandulas corporis, vel ad articulos depositi, abscessus, tubercula, & dolores articulorum excitant. Hac eadem ratione experimur, à diuturnis morbis sanatos, plurimum fameſcentes, nec tamen bene cibos conficientes, excrementorum pluralitate, obſtructiones incurrere, aliaq; huius generis mala. Neque vero poterunt aliunde hæc accidere, etenim qui ex febribus convalescunt, post evictam & expulsam causam, vindicatos esse oportet; si ergo non ab humoribus, qui febrem excitaverant, nec à reliquiis eorundem, tubercula & labores articulorum pendere possunt, quippe eos expulsos credendum est, si febris desiit; procul dubio à copia ciborum, & ab excrementorum inde emergentium superfluitate, tubercula & articulorum dolores exoriri putandum. At vero pro varia excrementorum, sive ad cutim, sive ad articulos motione & depositione, modo articularii dolores, modo tubercula excitabuntur, ut supra jam diximus.

Dices I. Abscessus ad articulos est crisis quædam, sed hæc non fit extra morbos, Ergo abscessus non fiet ab alimentis. & omnis abscessus est

est crisis proprie dicta in morbis, concedo, extra morbos, nego: Est enim metastasis seu translatio materiæ, quam Natura non potuit domare, crisis improprie dicta.

Instabis: Etiam abscessus fiunt à nimio alimento extra febres, Ergo non tantum post diuturnas febres. *R.* Utrumque hic, saltem implicite intelligit Hippocrates, magis tamen in hoc Aph. abscessus post febres.

Dices II. Hippocrates 1. Aph. 8. dixit, eos qui à morbo non reficiuntur, pluri cibo uti &c. atqui hoc ipsum hic dicit, ergo idem dicit. *R.* Hippocratem ibi locutum fuisse de morbis acutis & brevibus, hic vero de diuturnis & chronicis.

Aphorismus XLVI.

Si Rigor, febre non intermittente, ægrum jam debilem, frequenter (inciderit seu) invadat, mortiferum est.

Contentum seu Intentio.

De Rigore mortifero.

Connexio: Cum supra de rigore, sexta die adveniente dixisset Hippocrates, eumque vituperasset: In hoc Aphorismo eundem rigorem in considerationem ducit, ad vires comparando. Hic Aphorismus ob simplicem conclusionem indivisibilis est.

Rigor (seu horror seu frigus, hæc enim tantum secundum magis & minus differunt) ut in febribus sit salutaris, sequentem, opus est, ut habeat intermissionem, seu quietem, omnino febre vacantem. Si enim exinde febris non intermittat, nec ægrum deserat, certe mali morbi testimonium erit, & ingentis pravitatis indicium, ut latius à nobis mox citato Aph. 29. hujus Libri est ostensum. Si præterea ægrum debilem invadat, lethale signum omnino erit, ut hic ab Hippocrate indicatur.

Advertit autem & recte Galenus, aliud quid referre verbum; *inciderit ac invadat*: *Inciderit*, enim, *unum significat rigoris insultum*: *Invadat seu incidat vero plures insultus*. Unde rigor hoc loco notatus, non erit, qui semel contigerit, sed qui sæpius repetierit. Plurimum namque affligitur æger à rigore, ob vehementem totius corporis concussionem, per quam vires in fringuntur, & universa membra delaxantur, quæ sane incommoda, nisi febris intermissione, restauratis scilicet viribus, compensentur, gravissima existimanda sunt. *Quod si præterea,*
Dddd inquit

inquit Galenus, aliqua evacuatio, rigorem subsequatur, quæ nullam facit intermissionem, propter utrumq; dissolvi hominem par est, tum quia vis imbecillis, ferre non potest, rigoris agitationem, tum quia ab evacuatione dissolvitur: Si vero solus accidat rigor, nulla evacuatione subsequente, utroq; modo casus caret bonitate, nam tamquam causa mala, vires hominis tentat; & malum signum erit, illius indicans imbecillitatem, quæ solita erat noxios humores, in rigoribus evacuare, nunc vero hoc non potest efficere. Hactenus Galenus.

Insuper animadversione dignum est, quod verbum *invadat* (seu ut alii) *incidat*, non significat rigoris repetitionem, à principio habitam, sed vel in augmento, vel in statu contingentem, cum antea febris absq; rigore invaserit, unde *invadat seu incidat* perinde est ac *superveniat*, sive casu, & sine ulla causa rationabili contingat: Porro ita sit, ut ab humore maligno & irritante, non vero à Natura, quæ causam morbi adoriatur, rigor excitetur; unde merito Galenus illum vituperat, & veluti causam malam, vim & facultatem corporis lædentem, & uti signum malum ejusdem indicans imbecillitatem, idque potissimum quia febris non intermittit.

Quoniam vero Hippocrates inquit, in ægro debili, ejusmodi rigorem lethale signum esse, videndum quam imbecillitatem intelligat, partis scilicet, naturalis, vitalis, an animalis. Et quamvis de omnibus exponi possit, cum unaquæque in agrotantibus, mala sit, & à singulis bene constantibus, salutis spes affulgeat, juxta illud quod Hippocrates scripsit 2. Aph. *mente constare, & bene se habere ad ea, quæ offeruntur, bonum, contra vero malum*: Nihilominus specialius vires vitales attenduntur, quibus Natura pugnam cum morbo sustinet: Parum autem refert, an debilitas absq; causa manifesta contingat, an etiam aliquam evacuationem, aut extremam in ediam consequatur, sive etiam per oppressionem, vel resolutionem sit, modo talis sit, ut naturam ferendo impotentem effecerit. Cæterum de Rigore legi meretur idem Hippocrates Lib. 1. de morbis, & Cardanus in Comment. hujus Aphorismi.

Dices: Rigor calorem potius interne confortat, quia concentrat, virtus autem unita fortior, ergo non debilitatur æger ex rigore. & non tam per rigorem debilitari ægrum, quam per irritam actionem quam frustra in coquenda & expellenda materia inepta exercet.

Aphorismus XLVII.

Excreationes, in febribus non intermittentibus, lividae, cruenta, foetida, biliosa, omnes mala: commode tamen (seu prospere) si prodeant, bonæ: Sed eadem quoque est, eorum quæ per alvum & urinas excernuntur, ratio: Si quid vero quod non juvet, per hæc loca excernatur, malum.

Nota: Hic Aphorismus iisdem prorsus verbis repetitur infra L. 7. Aph. 69.

Contentum seu Intentio.

De Prognosi excretorum.

Connexio: Cum in priori Aphorismo Hippocrates prognosticum ceruerit ex rigore, actione scilicet læsa seu depravata: In hoc Aphorismo, ad excreta, tum quæ fiunt per sputum, tum alvum, tum per urinas, se convertit. Unde hic Aphorismus tres habet Partes: *Prima* asserit excreationes in febribus non intermittentibus, lividas cruentas &c. omnes malas: *Secunda*, ponit bonas esse, si commode prodeant. *Tertia* autem id ipsum, de alvi & urinæ excrementis pronuntiat.

Statim in ipso limine Commentarii incusat Galenus Hippocratem prolixitatis, asserens, potuisse sententiam hanc dici compendiosius: Sed non tantum Hippocrates à Cardano defenditur, verum inscitiae potius ipsemet Galenus insimulatur. Etenim Hippocrates excreta in febribus trifariam hic considerat, examinata primo illorum natura, deinde excretionis modo; postremo successu. Excreta, siquidem præter naturæ morem, semper re ipsa mala sunt: quæ facile educuntur bona: difficulter vero mala: & demum si exinde levetur æger, atq; in melius proficiat, bonum, contra malum. Propterea hanc Aphoristicam sententiam ita exponit Cardanus, ut excreationes in febribus non intermittentibus, qualitercunque parvæ fuerint, seu colore, seu odore seu substantia, seu permissione, seu alio modo, malum significant, pariter si difficulter prodeant, & absq; levamine; Secus bonæ erunt. His adjici quoque debet locus, per quem fiunt, quemadmodum ex textu deducitur; nam si per loca consueta & conferentia habeantur, bonum; per aliena vero & insueta, malum.

Quamvis insuper Hippocrates retulerit, excreationes speciales per alvum & vias urinæ, quæ debuisset generalioribus Aphorismum describere, ut objicit Galenus; implicite tamen continentur sub his quæcunque evacuationes. Mos enim Hippocratis est, sub speciali cujuspiam exemplo, generalem proponere doctrinam; Sed & voluit is quoque, universas evacuationes, cum particularibus comparare, pendentes ex affectionibus, similiter universalibus ad particulares relatis: quia, ut bene Cardanus: *Specialia signa, in morbis universalibus, & universalia in morbis particularibus seu specialibus, non significant, bonum, neque salutem: Unde excreationes in febre, non sunt bonum signum. Sicut nec urina, in morbo Laterali, sed sunt signa impertinentia*: Hæc pro Hippocrate, adversus Galeni calumnias ex Cardano: nunc sensum Aphorismi aperiamus.

Memorat Hippocrates excreationes, seu per os expurgationes, in febribus, veluti evacuationes particulares, nihilum facientes in febricitantibus, in quibus commendabiles solum sunt universales. Illæ etenim, veluti pertinentes, nec facientes ad rem, & causam morbificam, malæ censendæ sunt, & præsertim si fuerint lividæ, cruentæ, foetidæ & biliosæ, quippe quæ incongruentes simul & ineptæ, quoniam Lividæ, cruentæ, foetidæ, biliosæ. Nam lividæ & foetidæ, corruptelam; cruentæ ur biliosæ, sanguinis vitium, & vasorum laxitatem aut erosionem arguunt. Hæc autem si continue febricitantibus accidant, pessimam in sanguine Diathesim seu constitutionem, & in Visceribus pectoris, aut Capitis, gravem indicant affectionem.

Verum tamen, quæ ex propria substantia aut conditione excreationes malæ sunt, poterunt aliquando bonitatem participare, si prospere, commode & facile prodeant. Neque vero hæc solum, sed præterea, quæ per alvum & vias urinæ contingunt, bonæ erunt, si modum servaverint Naturæ convenientem, idest, absque dolore aut anxietate & sine ullo Virium dispendio. Etenim quamvis excrementa alvi, & Vesicæ, pravam referant conditionem, si tamen commode & absque molestia egerantur, salutaria sunt, expulsa nimirum causa morbifica. Contra vero oberunt, si Naturam potius laceessant, & crucient, & Vires labefaciant; quod autem bene prodeant, argumento erit, *Coctio & bona tolerantia* inquit in comment. Galenus; atq; cum hic & morbi species & tempus anni, & Regio, & ætas, & Natura aegrotantis.

Concludit demum Hippocrates: *Si vero aliquid eorum quod non juvet, per hæc loca excernatur, malum.* Quibus admonet malam & pernicio-

clofam esse evacuationem, per has Vias eorum, quæ excerni non debent, veluti Chylus sanguis, vel alius ab illo, qui morbum faciens, debet evacuari: Nam quemadmodum expellenda, si retineantur, nocent, ita retinenda, si egerantur, non proficiunt: Quod plane intelligendum, non tantum de substantia rei excretæ, sed etiam de qualitate & tempore excretionis. Unde sex universim semper sunt, in quacunque evacuatione considerata, *Substantia*, & Natura rei, quæ excernitur, num sanguis, chylus pus, Caro, Vermis, Lapis: *Qualitas* rei excretæ, num calida, frigida, bene vel male olens, mordax, salsa, acida, tenax aut fluida, alba vel nigra: *Quantitas*, num moderata, vel immoderata, servata præsertim proportionem, cum morbo & causa morbi: *Tempus*, num cocta, vel cruda materia, inter initia, aut in declinatione morbi, *Locus*, an per loca consentanea & consueta Naturæ, an vero per dissidentanea, ut si fæces per os, non per alvum: *Modus* demum, num cum dolore, anxietate, vel sine ulla molestia nulloque negotio. Hinc facile quispiam conjecturabit, num utilis, & salubris sit, an perniciofa evacuatio, undecunq; illa prodierit, quemadmodum hoc loco Hippocrates docere visus est.

Dices I. Foetida & livida excretio, per superiora, nunquam potest esse bona, ergo nunquam possunt commode procedere ut vult Aphorismus. *R.* Jam in textu est soluta hæc difficultas, nempe *ly commode* referri ad universalem excretionem, non ad particularem.

Instabis: Tales dejectiones, nunquam possunt dijudicare morbum ergo nunquam possunt esse bona. *R.* Iterum: Ex toto concedo; ex parte & in melius nego. Sed è contra:

Urgebis: Empyema rejicitur per sputum foetidum cruentum, quod tamen est salutare; Ergo sputa foetida, non omnia sunt mala. *R.* Empyema rejicitur per tussim, non per sputum; deinde talis rejectio fit remittente febre; nam post Empyematis rejectionem, febris remittit.

Instabis denuo: Multi excreant Livida, sine ulla noxa, Ergo Lividæ excretiones, non sunt semper malæ. *R.* Extra febres concedo, in febribus nego; multi enim splenetici, nigra & Livida excreant absque periculo: Sic passim observamus, post longas & continuas Lucubrationes ad Candelas, in hypocaustis factas, ejusmodi rejectiones fieri, absque ullo penitus morbo.

Urgebis denuo: Bonum ex integra causa, malum ex quocunq; defectu; Ergo cum istæ excretiones aliquid mali in se habeant, semper erunt malæ, contra Aphorismum. *R.* Sunt malæ secundum generatio-

nem, concedo; secundum excretionem nego. Si enim per alvum & urinas cum Euphoria & signis concoctionis excernantur, bonæ sunt.

Aphorismus XLVIII.

In febris, non intermittentibus, si partes externa algeant, interna urantur, & sitiant, lethale est.

Nota: Hic Aphorismus iisdem prorsus verbis repetitur Lib. 7. Aph. 72.

Contentum seu Intentio.

De Prognosi febrium inaequalium.

C*onnexio:* Superius dixit de rigore, superveniente in continua febre, lethalem esse Aph. 46. cum ægrum debilem apprehendit; in hoc præsentem Aph. de frigore, quod in eadem continua febre, apparere solet, cum pernicio. Hic Aph. ob simplicem conclusionem non dividitur.

In hoc ergo Aphorismo, interitus præfagitur his, qui febre non intermittente, seu continua laborantes, frigent exterius, & interius æstuant, & sitiunt. Et quamvis fere omnes interpretes, id accidere fateantur febribus ardentibus malignis, veluti lypiriis, quarum proprium est ingenti siti ægrotantes cruciari, & æstu immodico exercere, non tamen cæteris quoque febribus id ipsum pariter evenire posse negandum, si internam inflammationem consequantur. Verum necesse est, febres hæc continuo affligere, cum ejusmodi accidentia, nequeant in intermittentibus conjungi, ut prudenter ab Hipp. est animadversum, fuitque pariter à Gal. notatum *comment. 43. hujus Libri*; qui intermittentes febres, nec ab interna inflammatione, nec à maligna humorum putredine oriri posse docuit. Ut autem hæc interitum portendant, non satis est ægrotantem interius uri, atque ingenti siti cruciari, sed etiam necesse est exteriora frigere: quippe viscerum internorum æstus, ab inflammatione procedens, sanguini circumeunti impedimento est, imo signum est manifestissimum, remorantis sanguinis, qui non nisi ab acido figente restagnat, adeoque non solum frigus, extremis partibus incutit, verum etiam gangrænam internam inducit, uti sectionibus cadaverum sæpius innotuit.

Sed & Erysipelas non raro interiores partes occupat, unde æstus & sitis ingens. Quemadmodum enim partes cutaneæ, Erysipelate sæpe sæpius affici solent, & quandoque etiam erratico; ita internæ præsertim pulmo,

pulmo, Diaphragma, Hepar, aliæq; pari modo Erysipelate infestantur, ut propterea multos in praxi ejuscemodi molestiis vexatos, cum inquietudine, anxietate, linguæ scabritie, hoc mali genere ægrotantes suspicari liceat; unde postmodum fit, cum non semper suppurationes consequantur, cum deinceps isti convalescunt, resoluta insensibiliter materia, quemadmodum externo Erysipelati contingit. Porro Erysipelata interius progenita, non tantum admittit in *comment.* & alibi, sed etiam Ætius, qui præterea *Lib. 5. Cap. 89.* ex diversis partibus Erysipelate affectis, varias quoque febrium ardentium species distinguit; unde *Lypiriam* appellat, quæ fit ex Erysipelate, in ventriculo, *Typhodem* quæ in Jecore, & *Crymodem* quæ in Pulmone. Hippocrates etiam 5. Aph. 43. meminit, Erysipelatis in utero, itemque Erysipelatis in pulmone 2. *de morbis*, unde ab exterioribus ad interiora idem verti, malum scripsit 6. Aph. 25. ab interioribus autem, ad exteriora bonum.

Adjecit in textu Hippocrates sitim, veluti symptoma omnino cum febre ardente conjunctum; siquidem duo referuntur signa illius pathognomonica, *calor exurens & ingens sitis*. Verum crediderim, funestum etiam futurum eventum, ex solo internorum viscerum æstu, atque extimarum partium refrigeratione. Sitis autem sive adsit, sive absit, nihil pernicipiei detrahet, aut addet: Equidem si adsit, ardorem viscerum confirmat; si vero desit eorundem stuporem & gangrænam arguit: Atqui sitim fortasse adjungit Hipp. veluti signum, quo internarum partium æstus patentius possit internosci, non tam ex sensu ipso, quo sæpe istiusmodi febricitantes carent, quam ex linguæ scabritie, & ariditate, quæ in his nunquam abest.

Dices I. In vehementi Colica vel alio alicujus partis dolore v. g. ventriculi, vel in syncope &c. partes externæ quandoq; frigent, internæ præ dolore quasi uruntur, ergo non verus est Aphorismus. R. Colica, cardialgia, syncope, extra febres, nullum invehunt periculum, à partium externarum refrigeratione petitum, concedo: in febre acuta & continua nego.

Dices II. Hic Aphorismus videtur plane idem cum Aphorismo I: Libri septimi, in quo dicitur: *In acutis frigus, extremarum partium malum*: Ergo male repetitur. R. Ibi non addere sitim, neque etiam ardorem partium internarum, quod hic facit.

Dices III. Hippocrates 2. *de morbis* affert curam lypiriæ, ergo non est tam lethalis, ut hic dicitur, R. Per lethale, hic non intelligitur, quod nullus

nullus omnino evadat, sed ut plurimum seu summe periculosum, à quo quandoque, ubi vires sunt fortes, ægri evadunt, resoluti nempe habitu corporis in sudores.

Dices IV. In febribus continuis, à materia crassa & viscida, obstruntur viæ ad habitum & fit refrigeratio, intercepto nempe calore, quibus solutis redit calor Ergo refrigeratio non est tam periculosa. R. Si absit omnis inflammatio interna, sitque ista refrigeratio à sola obstructione concedo: Si adsit inflammatio, nego.

Dices V. Etiam in febribus intermittentibus, magnus adest circa præcordia ardor, & partium externarum refrigeratio, ergo idem de intermittentibus dicendum foret, quod dictum de continuis. R. In continuis esse quid continuum & semper durans, secus in intermittentibus.

Aphorismus XLIX.

In febre, non intermittente, si labrum, aut supercilium, seu palpebra, aut oculus, aut nasus pervertatur; si non videat; si non audiat, imbecillo jam corpore, quidquid horum acciderit, in propinquo mors est.

Nota: Hic Aphorismus iisdem prorsus verbis repetitur infra L. 7. Aph. 73.

Contentum seu Intentio.

De Signis, imminentis mortis, in febribus.

Connexio: Cum in priori Aphorismo Hippocrates, lethalia quædam signa, febribus non intermittentibus supervenientia adduxisset: In hoc præsentī Aphorismo, plura alia, propinquæ mortis signa lethalia recenset, in textu ipso enumerata. Hic Aphorismus, ob simplicem conclusionem non dividitur.

Tradit ergo in hoc Aphorismo Hippocrates, imminentis exitii signa, in febricitantibus, desumpta, ex læso sensu & motu animali, atque adeo ex heberatis organis, in id concurrentibus, hisque potissimum, quæ cerebro sunt proximiora, ac visui & auditui sunt destinata, atque ex contractis partibus ad labia & palpebras spectantibus.

Et quidem hæc febre non intermittente laborantibus si acciderint, instantis interitus (qui plerumque intra 24. horas plus minus accidit) indicia esse testantur; nam si fortasse inter initia, paroxysmorum inter-

mitten-

mittentium febrium eveniant , quo tempore per Rigorem & horrorem, universum corpus concutitur, nihil damni (ut in priori Aphorismo diximus) timendum foret; febre enim intermittente , ista statim desineret; neque vero tam facile est, ejusmodi symptomata, intermittenter febribus, per rigorem aut horrorem evenire, & diutius perseverare.

Animales autem operationes hic speciatim læsas memorat, & tum quæ ad motum, tum quæ ad sensum pertinent, contorsionem nimirum, seu contractionem labii, palpebræ, supercilii, oculi vel nasi, atque hebetudinem Visus & auditus. Contingunt enim ejusmodi contractiones vitio cerebri, & nervorum, indeque derivantis liquoris, qui fibras nerveas irroraturus, ac credine potius, atque infensa conditione vellicat, & compungit, unde convulsionem manifestam parit, in partibus proximioribus & cerebro attiguis, solent etiam non raro nervi, & cerebri meninges, phlogosi aut erysipelate corripì, ut propterea potius proximiores, quam remotiores partes contorqueantur. Id ipsum quoque arguit, læsa videndi, atque audiendi facultas, cum perceptiones & sensationes quæcunque ut fiant, ad cerebrum per nervos referri debeat.

Verum tamen ægro jam debili, hæc accidere oportere animadvertit, quando quidem per fractis viribus vitalibus, læsiones istæ partis animalis, omnino erunt inemendabiles, nequeunte scilicet Natura, per sanguinem, operationum animalium vitia corrigere, atque in pristinum vigorem restituere, Symptomata autem virium languorem comitantia, aut consequentia, semper cæteris priora sunt, & mortem mox futuram portendunt, succumbente nimirum, violentiæ morbi, natura.

Ne quis autem putaret, symptomata isthæc, partem animalemlæsam indicantia, junctim esse intelligenda, advertit postremo Hippocrates, unumquodque illorum satis esse ad exitum lethalem prænuntiandum, cum ad virium vitalium languorem, quæcunque animalis operatio læsa, si consequatur, naturam omnino Labe factatam ac summe fatiscentem designet. Itaque debilem ægrotantem, in operibus vitæ, præsertim pulsu, nullo negotio è medio tollunt, & è vita eripiunt quæcunque aliæ partim animalis læsiones, etiam in externis sensibus, si ab internis profisciscantur. Cæterum de tempore, ne quidem verbum fecit Hippocrates, quia quandocunque prodierint, semper mala sunt,

Eccc

quam-

quamvis plerumque, in augmento, aut statu febrium universali comparere soleant, & Lethum afferant.

Dices I. Hippocrates tantum hic symptomata adducit Facultatis animalis, ergo ex his non potest summa debilitas argui, quia ex summa trium facultatum, non unius, debilitate, eruitur summa virium debilitas. *R.* Hippocratem per ly *imbecillo jam corpore*, totius seu omnium facultatum imbecillitatem, ex adductis symptomatibus intellexisse.

Instabis: Etiam in perturbatione critica, labia & oculi pervertuntur, præsertim ante vomitum criticum, sine periculo, Ergo non est prædicendum ex his tantum periculum. *R.* Hæc non fieri; corpore jam imbecillo, quod semper vult Hippocrates.

Urgebis: Etiam instante crisi, æger summe debilis est, Ergo nulla solutio. *R.* Est summe debilis per oppressionem, concedo, per resolutionem, quæ in Aphorismo intelligitur, nego.

Instabis denuo: Ejusmodi symptomata, etiam contingunt quandoque in non acutis, absque gravi periculo, Ergo non tantum in acutis, ut vult Aphorismus. *R.* Convulsionem quidem fieri in non acutis, sed à plenitudine, non ab inanitione ut hic.

Urgebis denuo: Si ista symptomata fiant ab inanitione sive siccitate, Ergo tabidis semper & maxime fient. *R.* Negative, nam in tabidis illa inanitio est paulatim introducta, & facta quasi Naturæ familiaris; hæc autem de qua loquitur Aphorismus derepente à summo febris æstu.

Aphorismus L.

Ubi in febre non intermittente, difficultas spirandi, & delirium acciderit, Lethale.

Contentum seu Intentio.

De Dyspnæa in febribus continuis Lethali.

Connexio: Præcedenti Aphorismo læsas in febricitantibus partis animalis operationes, tum ad motum tum ad sensum pertinentes potissimum adnotavit Hippocrates: In præsentī Aphorismo eas considerat, quæ organis spiritualibus debentur, nempe spirandi difficultatem cum delirio conjunctam, & hanc exitiosam quoque pernuntiat, si febrem non intermittentem consequatur.

Diffi -

Difficultas autem respirandi hic ab Hippocrate memorata, non quæcunque & levis solum per intervalla recurrens, sed gravis & continens intelligitur: quippe illa fere semper febres acutas comitatur, etiam intermittentes, saltem inter initia, aut cum increverint, sed citra periculum, quoniam his remittentibus desinit. At vero quæ hic consideranda proponitur, in febre non intermittente seu continua, perseverans esse debet, quæq; non tantum statis horis invadat, sed quousque febris duraverit, ægrotum continenter afficiat. Porro hæc accidit febricitantibus, non ex sola febris conditione, quæ plerumq; respirationis usum depravat, ob novi semper & recentis aëris indigentiam, sed potissimum ob maximam in pulmonibus sanguinis exagitationem, fermentationem & phlogosim, quæ non raro etiam erysipelatodem inflammationem arguit, pulmonibus ipsis & cordi summopere inferens, à qua paucissimi sunt, qui mortem effugiant.

Respirationis difficultati, adjicit Hippocrates delirium, ut propterea hæc duo conjuncta voluerit: Ex ambabus enim, vitali scilicet & animali potentia læsis, mortem præmonstrari animadvertit. Et quidem cum utrumq; in febribus non intermittentibus jungitur, internam indicat inflammationem, potissimum pulmonis; unde respirandi difficultas, veluti consequens in inflammationem, esset quodammodo causa delirii. Sed & in inflammatio diaphragmatis id ipsum afferre potest, cum illud arteriosum & nervosum viscus sit, ac principale respirationis instrumentum, quamobrem ipso inflammato, & respirandi & ratiocinandi vis atq; facultas, sæpissime læditur; quinimo Antiquis semper putatum, delirium quodcunque sympathicum & interruptum ab una & sola Diaphragmatis inflammatione proficisci: quod tamen non omnino verum, ut late ostenditur in Praxi, Capite de Phrenitide.

Verum cum plures difficilis respirationis differentias retulerit Hippocrates 6. Epidem. Sect. 2. sub illis verbis: *Spiritus pravi, crebri, magni, rari, hic quidem tardus, ille vero velox*, jure merito dubitari potest, quam hic specialius notata illi voluerit, acute quidem Fuchsius, si hæc, inquit, duo symptomata, difficultas spirandi, & delirium conjungantur, necesse erit Hippocratem interpretari, de magna & rara respiratione, quod scilicet illa proprium sit delirii symptoma, quemadmodum in prognosticis diserte iis verbis testatur: *magnus spiritus ex longis intervallis, delirium declarat*, & mox rationem assignans subdit: *quippe hæc, magnitudo scilicet & raritas spirationis, veluti oblita actionis pathemata*

sunt. Si vero sensim de difficultate spirandi loquimur, delirio amoto, tunc hæc ipsa propter mala quæ instrumentis spirationi inservientibus accidunt, & quæ à Galeno *in comment.* recensentur evenire solet, veloci & crebra erit. At vero concludit, hæc duo symptomata in hoc Aphorismo conjungit Hippocrates, dicitq; esse lethalia, quod nimirum & cerebrum & instrumenta respirationis læsa esse significant.

Sequitur autem Pulmonis aut Diaphragmatis inflammationem cerebri commotio, & delirium, non tam propter nervos, mutuo communicantes, quam ob arterias, & medio sanguine, qui sua, per inflammationem contracta acredine, cerebrum vellicat, atq; ad depravate operandum laceffit, ac disponit, ut alibi demonstratum est.

Caterum hæc non nisi febres continuas comitantur, proinde scriptum, *ubi in febre non intermittente*: hæc enim delirium, proprie, inter sua symptomata, non admittit.

Dices I. In principiis Paroxysmorum & instanti crisi in febribus acutis sæpius fit respirationis difficultas cum delirio, ex causis eo delatis & tamen plerumq; nullum est mortis periculum, Ergo minus lethale. *R.* Illam respirationem non esse diuturnam, nec perdurans delirium qualia intelligit & vult Hippocrates in hoc Aphorismo.

Dices II. In pleuritide & peripneumonia est spirandi difficultas & quidem sæpe cum delirio, & tamen plerumq; non est Lethalis. *R.* Hic non loqui de spirandi difficultate in principio, sed in augmento vel statu, ægro jam existente debili.

Aphorismus LI.

In febribus abscessus, qui primis Judicationibus non solvuntur, longitudinem morbi significant.

Contentum seu Intentio.

De Abscessibus febrium prognosticis.

Connexio: Postquam jam aliquot Aphorismis Hippocrates egisset, de fatali morbi eventu, desumpto à quibusdam funestis symptomatibus: In hoc præsentis Aphorismo, pergit tempore longo aut brevi, morbi facere prognosticum, idq; desumens in febribus ab abscessibus.

Hic Aphorismus ob brevitatem non dividitur.

Quamvis autem Hippocrates, simpliciter dicat, *in febribus*, tacite tamen intelligendum, *productis & protractis*: Etenim ut superius animad-

versum, istæ sæpe sæpius per abscessus judicantur. Cum autem superveniens abscessus, illas non terminat, diuturniores futuras significat, nondum scilicet universa februm materia ad habitum corporis seposita, sed crassiori, & compactiori adhuc interius hærente, quæ febrim in longius protrahit.

Quoniam vero abscessus morbi longitudinem significare dicuntur, qui ad primas judicationes non solvunt, jure merito propterea dubitari solet, quid pro illis intelligere voluerit Hippocrates. Sed bene Fuchsius ex græco codice interpretatur, qui in primis diebus judicatoriis contingunt; at non prima aut secunda septimana, cum febres istæ longæ sint, nec tam cito possint, primis hebdomadibus judicari, sed posterioribus; unde non referenda prioritas hæc, ad dies ipsos criticos, sed ad abscessus eruptionem, ita ut sensus fiat, futuras febres longas, cum non desinunt, statim ac abscessus apparuerit, argumento, quod adhuc causa persistat, nec sufficienter per abscessum sit evicta, nec perfecte à sanguine seposita. Qui vero cum Brassavolo Philotheum secuto, pro *non solvunt* ad febrem relato, passive vertunt, non *solvuntur*, id est abscessus, plurimum aberrant à veritate, & ab Hippocratis mente; cum impossibile videatur, abscessus, statim ac apparuerint solvi, & evanescere, quippe qui fiunt, ab humoribus crassis & consistentibus, non nisi diutissimo tempore solubilibus, ut bene etiâ Fuchsius animadvertit. Quamquam & abscessus ipsi, si diutius persistant, nec tam facile solvantur, aut maturentur, aliam diuturni morbi speciem inferant, in adaucta magnitudine dictam. Per abscessum Hippocrates, non tantum hic, sed alibi etiam in suis scriptis, non semper metastasim seu depositionem materiæ de parte nobili ad ignobilem sed etiam imperfectas evacuationes criticas intelligit. Objectiones quæ hic afferri possent, jam in contextu sunt solutæ.

Aphorismus LII.

Quibus in febribus, aut aliis morbis, voluntarii illachrymant oculi, absurdum non est; quibus vero præter voluntatem, absurdius.

Contentum seu Intentio.

De Lachrymis Prognosticis.

Connexio: Manifestam habet hic Aphor. cum superioribus connexionem: Est enim pariter ad eventum morbi prædicendum, in febribus continuis, prout etiam plures alii subsequentes. Hic Aphor. duas habet partes: In *Prima* ponit lachrymas voluntarias, in febribus & aliis morbis bonas: In *Secunda* vero malas quando involuntariæ sunt.

Signum autem hoc à lachrymarum apparitione desumptum, pertinet etiam ad cerebri & partis animalis læsionem. Non voluntariæ vero illæ esse debent, quæ scilicet agrotantibus invitis, & citra quamcunq; causam manifestam accidunt, & absque illa oculorum, & palpebrarum ægritudine: de his quoq; meminit sæpius idem Hippocrates, præsertim vero *1. Progn. 13. 4 & 6 Epid. Sect. 1. & 1. Epid. const. 3.* Unde *Celsus Lib. 2. C. 4.* inter mala signa retulit, *sine voluntate lachrymare*: quippe profiliunt lachrymæ istæ, ob languorem & laxitatem caruncularum ocularium, itemq; cerebri, & meatuum in oculos patentium, unde serositates extillant, quæ plerumq; etiam in his acredinem sapiunt, à consimili lymphâ procedentes: Quod si voluntariæ profiliant lachrymæ, vel patientem aliquam causam, aut oculorum morbum consequantur, nihil mali præfagiunt, nisi quod ab ipsis oculis male affectis indicatur, quemadmodum ex lippitudine, inflammatione, dolore, quibus nihil terrificum accidit illachrymari. Sic pariter si ob mœrorem, commiserationem, gaudium, itemq; fumum, ventum, pulverem, solare lumen, acris alicujus corporis v.g. caparum, nasturtii, piperis contrectationem, aliudve simile lachrymæ defluant. Cæterum in eo, quod culpatur Hippocrates, aut primus librarius, à Galeno, quod scripserit in Aph. *absurdus* (vel ut alii) *horribilius* comparative, cum antea nihil *absurdum seu horribile* dixerit per negationem, scite defenditur à Cardano *in comment.* qui præterea non solum *malum*, sed etiam *mortem* ex non voluntariis lachrymis præfagiri animadvertit, ut accidisse refert suæ propriæ uxori, cui ob diarrhæam pereunti, fluxere ubertim lachrymæ, per tres horas ante obitum. Verum tum crediderim eas minari mortem, cum cæteris & quidem gravioribus symptomatibus associantur, ut accidit de aliis uxori ægræ *XV. 3. Epid.* Porro ipsæ solæ, non omnino sunt exitiales, ut sæpe expertum est. De his lachrymis Poëta canit:

Si ratio est, Natura jubet duo lumina flere:

Si nulla est ratio, mors truculenta jubet.

Quæris cur oculos jubeat mors squallida flere?

Turpem sponsam odio, triste cadaver habet.

Dices:

Dices: Fiunt lachrymæ involuntariæ symptomaticæ, circa morborum principia v. g. à vomitione, quæ tamen formidabiles non sunt. & Lachrymas in vomitione non fieri vi morbi, vel febris acutæ de quibus intelligendus Aphorismus, sed vi motus illius violenti, quo cerebrum & caput potenter concutitur ac per consequens etiam oculi, unde non modo lachrymæ, sed & sæpe ipsa cæcitas exoritur.

Aphorismus LIII.

Quibus per febres, circa dentes lentores obnascuntur, iis vehementiores fiunt febres.

Contentum seu Intentio.

De Lentoribus circa dentes prognosticis.

Connexio: Cum in præcedentibus Aphor. multa ad prognostica in febribus scripsisset, nunc in hoc Aphorismo, diagnosim vehementiæ seu magnitudinis, ex lentore circa dentes proponit. Hic Aphorismus ob brevitatem non dividitur.

A lentore ergo circa dentes adnato, in febricitantibus præfagit hoc Aphorismo, febres futuras vehementiores. Sunt autem lentores tenaces quidam, & glutinosi succi, faucibus sæpe numero adhærentes. & non raro etiam linguæ, ac dentibus, cum uberius cumulantur, unde in oris hiatu, per diducta labia, in liquati glutinis modum extenduntur. Non tantum vero ex viscosis & crassis humoribus ventriculi, & æsophagi tunicas & glandulas occupantibus, gignuntur, verum etiam ex lymphæ crassiori & ductibus Stenonianis derivante. per palatum in gingivas, & dentes, quæ deinde partim inspirati, & expirati aëris miscela, partim ex halitibus & ventriculo & pulmone elevatis, acorem præferentibus, partim denique ab æstu febris adeo densatur, ut glutinis tenacitatem referat.

Ab his igitur portenduntur febres acerbiores, tum quia acris lymphæ & alius similis succus, febrilem fermentationem potentius promovet, & diutius conservat, copia simul ac crassitie; tum quia viscosi ejusmodi humores, oris hiatum liberiores impediunt, ægros in respiratione anxios faciunt, præpeditis non leviter aëris ductibus, unde etiam sitis & æstus major. Sed & sanguis, ejus generis lymphæ irretitus, minus quam subigi & commoveri debeat, ut se ipsum per febrem extricet. Opitulabimur vero ejusmodi malis, nitro aqua dissoluto, vino albo

albo veteri, ejusque spiritu, os sæpius eluendo, item spiritu salis armoniaci dulcificato, vel aliis ad idem conferentibus.

Dices I. Sæpe sanis contingit, qui dormiunt ore aperto, ut mane multum ejusmodi lentoris circa dentes habeant, absque ullo periculo. R. Hoc esse extra febres, Aph. autem loquitur de tali lentore in febribus.

Dices II. Ejusmodi lentor potest etiam esse in chronicis febribus. R. Concedo totum, nam lentor non generat febrem, sed est affectus febris, Ergo à quacunque febre diutius durante fieri potest.

Aphorismus LIV.

Quibus sicca tusses, paulum irritantes, in febribus ardentibus diu durant, ii non admodum siticulosi sunt.

Contentum seu Intentio.

De Tussi sitis antidoto.

Connexio: Cum de febrium vehementia egisset in antecedenti; in præsentī jam causam seu ardentem febrem proponit, & notissimū accidentis illius, nempe sitis, mentionem facit. Hic Aphorismus ob brevitatem divisionem non patitur.

Memorat hoc Aphor. Hippocrates, quam profint sicca tusses, leviter guttur irritantes febricitantibus, cum eas à molesta siti eximant. Febres namq; ardentes, duobus semper, tanquam pathognomonicis signis, sociari solent, urente nimirum æstu, & siti molestissima: modo hæc abesse solet, vel non plurimum urgere, cum sicca tusses leviter fauces & guttur proritant, scilicet irroratis partibus, tum pulmonem, tum ventriculum, spectantibus, unde sitis originem sumit, ut alibi ostendimus. Siccas tusses intelligit eas, ex quibus nihil vel tenue admodum & serosum exspuitur ad differentiam tussis humidæ, per quam crassum multumque sputum educitur. Eas autem fieri credendum serosa & aquea materia, ad partes faucium & gutturis pertingente, quam recentiores anatomici lympham ex primo ejus inventore Thomæ Bartholino appellarunt. E cerebro & glandula pituitaria, putarunt veteres, in os extillare; at sagaci industria Thomæ Warthoni, & Nicolai Stenonis, detectum est, per peculiare ductus, à postica capitis parte, & ex glandulis circa aures sitis, in radicem linguæ, & in musculos buccinatores depluere, quam obrem madidum os, in statu sano perpetuo experimur.

Ab his igitur madescit guttur, & sitis infringitur, cum in febribus fortasse liquatur, ut diluitur plus æquo lymphaticus ejusmodi humor, ut etiam exinde tussicula excitetur.

At quæ de causa, per tussim hanc sitis præcipue remittatur in febricitantibus? antea meminimus, ex doctrina ejusdem Hippocratis & Platonis, sitim vigere in gutture, & pulmone, ut propterea illa facilius, & promptius sedetur, collutionibus, & gargarismis, quibus partes istæ irrorentur, & madescant, defluentibus non nihil per latera asperæ arteriæ sensim ac pededentim in pulmones. Cum itaq; vi febris lymphaticus hic humor tenuatur, & confluens in laryngem titillando tussim promovet, absq; screatu, non multum contingit siti febrientes infestari qui cæteroqui causone affecti, vehementer sitirent. Debent autem ejuscemodi tussiculæ leviter irritari; sic enim arguunt tenuem & serosum humorem in eas partes illabi; nam si fortasse copiosior vel crassior humor tusses pareret molestiores, tale emolumentum nullatenus afferrent, imo pectus, & pulmonem, moleste admodum concutiendo, febrem potius exasperarent, & sitim ad augerent. At vero levis irritatio, neque molestam tussim infert, neque partes spiritales concutit, sed blando solum madore, illas lenit & irrigat.

Quia vero tusses dixit Hippocrates, leviter irritantes, sane non semel sed iterato repetentes ac perseverantes intellexit: hac enim ratione, poterunt illæ sitim lenire, si nimirum sæpius fauces & guttur humefaciant; quamobrem non immerito adjectum est adverbium *plurimum*, quo significetur, multoties per tussim eas partes irrigari oportere.

Tandem dicitur, non multum siti febricitantes infestari, non quod omnino siti careant, sed quod mitius afficiantur, adeoq; illa, quæ per febrem ardentem molesta nimis esset & inextinguibilis sitis, per ejuscemodi gutturis & asperæ arteriæ irrotationem, plurimum remittatur & sedetur, ut proinde magna ex parte tolerabilis evadat.

Dices I. Est sicca tussis, Ergo non adest præfata illa humiditas. R. Et si dicatur sicca tussis, non tamen est talis, ut penitus nihil adsit de humiditate, sed dicitur sicca respectu ad tussim humidam.

Dices II. In febre hæctica adest diuturna tussis sicca, & tamen etiam adest sitis, Ergo tussis sicca, non tollit sitim. R. Nos hic loqui de febribus ardentibus; præterea si in febre hæctica diu duret tussis, fit etiam humida.

Aphorismus LV.

*Ex Bubonibus febres omnes male, præter Ephemeræ
(seu Diarias.)*

Contentum seu Intentio.

De Febribus culpa glandularum ortis.

Connexio: Cum supra de abscessibus, qui in febribus fiunt, multa dixisset Hippocrates: In hoc Aphorismo agit de Bubone, qui abscessus quidam est. Hic Aphorismus dividitur in duas partes: In *Prima* agit de malis: in *Secunda* de bonis tumoribus.

Loca tumorum, nempe inguina, quæ Leonicenus adjecit in sua versione, alii expositores detraxerunt, & fecerunt sententiam universaliorē, comprehendentem quemcunq; tumorem glandularum: Etenim ut advertit præ cæteris Fuchsius, Bubones græce Hippocrati in Aphor. notat significanti tumores, omnes adenum seu glandularum, ex Galeno 2. ad Glauconem Cap. 1. Unde male Leonicenus hanc vocem ad inguinum tantum adenas seu glandulas tumefactas contraxit, cum omnium adenum tumores significet. Occasionem autem (subdit idem Fuchsius) errori huic dedit vox ambigua *Bubon*, quæ ut testis est Phavorinus & locum corporis & malum denotat, inguina nimirū & tumorem adenum.

Itaque non solum ex inguinum tumoribus, sed ex aliis quibuscunq; tumefactis glandulis, in inguine, axillis, collo, retro aures &c. febres obortæ malæ censendæ sunt, exceptis diariis: Etenim diariæ febres, cum sua natura brevissimæ sint, & vix spatium unius diei transcendant, certe non poterunt aliunde pendere, quam à materia facile diffilabili, vel ad summum à confluxu & suppuratione humorum in adenibus collectorum, citra sanguinis & aliorum liquorum, vel viscerum infectionem, quare levis omnino momenti erunt. At vero cum terminum diarium transegerint, & diutius protrahuntur, ab alia plane materia, præterquam ab halitibus originem trahent, adeoq; vel grave vitium glandularum, vel internarum partium infectionem arguunt difficulter resolvablem, præsertim quia glandulæ, in humano corpore, talem, ac tantam inter se incunt societatem, ut etiam vitia protinus communicent. Observatum namq; est, sæpius in cadaverum dissectionibus ad colli, mammarum, & aliarum externarum partium, glandulas tumefactas, præcessisse

cessisse male affectas eas, quæ interiorius reconduntur, in mesenterio, pancreate, lumbis & cæteris visceribus, ut alibi jam notavimus.

Quamvis autem videatur loqui Hippocrates de Bubonibus sponte subortis, si tamen ex venerea lue proveniunt, Judicium longe diversum faciendum erit: Ex ea enim, cum præter materiæ dispositionem, vitium in sanguine, & cæteris liquoribus, imo in partibus solidis præsignetur, etiam absq; febre, periculo illi non vacant, nam & dolores articulorum, exosteses, ulcera, tabes, & alia gravissima symptomata, consequi solent, ut passim experimur.

Solent quoq; bubones malignam & pestilentem febrem ostendere, quæ absq; dubio pessima est & lethalis, quin & non raro ab illis mox apparentibus, febre necdum conspicua, ægri veluti repente pereunt. Salubriter autem ejusmodi malis occurrere expedit ope remediorum in Praxi recensitorum, quo Lectorem remittimus.

Dices: In Carbunculo & Bubone pestilenti ægri moriuntur cum Ephemera, quia prima statim die pereunt: Ergo etiam Ephemera cum bubone est mala. *ꝛ.* In peste non esse Ephemeram veram sed putridam, quæ diutius durasset, nisi Natura in primo statim insultu, vi morbi succubuisset.

Aphorismus LVI.

Febricitanti sudor superveniens, febre non deficiente, malum: prorogatur enim morbus, & multam significat humiditatem.

Contentum seu Intentio.

De inani Sudore febrilium.

Connexio: Cum Hippocrates supra Aphorismo 42. hujus sectionis ex multo sudore morbum majorem vel minorem colligeret: Nunc ex copioso sudore absolute colligit, morbi longitudinem.

In duas Partes dividitur hic Aphorismus: In *Prima* docet & concludit sudores qui febrem non tollunt, vel magna ex parte levant, esse bonos qui vero hæc non faciunt malos: In *Secunda* causam & rationem reddit, quia sive perpetuo fluat, sive per intervalla, & tamen non juvet, morbi longitudinem, & materiæ copiam ostendit.

Sudor ergo, ut febricitantibus prosit, debet febrem vel adimere vel

remittere: cum autem neutrum affert, profecto malus erit. Et quidem si cum aliis signis, pravam febris naturam denotantibus copuletur, etiam mortis periculum minabitur; at vero si his destituatur, morbum fore longum, tantummodo prae monstrabit, quippe qui ab humorum copia proficiatur, ut hic memorat Hippocrates.

Advertit autem Fuchsius sudorem crebro, & assidue repetentem esse oportere, ut multam materiam & productum morbum prae nuntiet. Et quidem si semel accideret, non mirum si febris non esset destituta; considerabilis autem fit, cum repetit, & febrem non interrumpit. Eo enim ex universo corpore fluente, fieri nequit, quin vires langueant, & à perseverante febre magis & magis debilitentur. Sed & idem accidere poterit si sudor semel contingens copiosus fuerit, atque universalis, nec tamen febrem sedet; æq; enim vires infringuntur, iterato sudore, ac uno & copioso. Malus quoq; istiusmodi sudor erit, quia licet calidus, universalis & consentaneus febribus, morbum tamen non solvit; decretoria enim non decernentia mala, aut difficilis Judicii.

Cum ergo febrem sudor super veniens, non interrumpit, profecto morbum longum ostendit, quippe quicumque is sit, qui per sudorem veluti per evacuationem convenientem, nec desinat, nec intermittat, idque non nisi à copia & multitudine serosæ substantiæ quæ plane longius tempus exigit, ut secernatur, ac repurgetur. Præstabit ergo ad morbum hunc breviandum, paulatim imminuere tantam serosæ materiæ superfluitatem, & quidem non solum dejectoriis, præsertim hydragogis, verum etiam diureticis convenientioribus, quæ sane hac in re plurimum prodesse poterunt.

Objectiones quæ hic afferri possent, jam in contextu sunt solutæ.

Aphorismus LVII.

Spasmo aut Tetano vexato, febris si accesserit, morbum solvit.

Nota: Hic Aphorismus fere ejusdem sensus est, cum Aph. 26. l. 2. aliis tantummodo verbis deductus.

Contentum seu Intentio.

De feбри Spasmi seu Convulsionis remedio.

Connexio: Cum hætenus Hippocrates, varie de febribus, & earum accidentibus egisset: In hoc Aphorismo docet, quatenus febris convulsioni succedens, eam tollat.

Hic

Hic Aphorismus ob brevitatem divisionem non admittit.

Febrim non adeo malam esse, & plerisque persuasum, sed plerumque juvamento existere, atque plurimis morbis suffragari, jam alibi ex pluribus ejusdem Hippocratis testimoniis demonstravimus; sed tamen vel ex hoc præcipue Aphorismo palam fieri potest, quo Author confitetur Spasmodum ac Tetanum, ea superveniente sanari. Sunt enim isti morbi, nervorum & muscutorum, inducti ab humoribus fibras eorumdem rigidas, contractas & obturatas reddentibus, ut propterea motui, & flexioni incommodent; unde describuntur à Medicis, contractiones nervorum, ac muscutorum ad propria capita: quam autem febris his attenuandis & dissolvendis opportuna sit, cuique notum. Neque vero solum in ejusmodi capitis affectionibus, sed in catenis quibuscunque, in quibus digerere, diluere secernere, ac repurgare opus sit. Hic quemadmodum convulsiones & distensiones nervorum ac similes alii morbi, febre superveniente desinunt, quippe quæ dissolvendo, & repurgando vitiosos humores, remedio est; Ita ex adverso, si illæ febri accendant, omnino exitiosæ sunt, ut idem Hippocrates meminit *in Coacis prænot.* inquiens: *Cum febre acuta, convulsiones perniciosæ.* Sed de hac re alias. In utiliter autem videntur allaborare, qui nimis anxie exponere student, quid per convulsionem, quidque per distensionem nervorum, sit hic intelligendum, cum ex græco codice habeatur memoratus in Aphorismo *Spasmus & Tetanus*, qui non nisi nominibus differunt, altero generaliori, specialiori altero; Cæterum tum parte affecta, tum causis conveniunt, iisdemque fere remediis tractari solent.

Quamquam autem à convulsione & distensione nervorum habita, febris superveniens salutaris sit, illa tamen, neque lenta nimis esse debet, neque multo post tempore à convulsione & distensione; comperit enim non semel est, febres modum quendam non servantes, convulsis ejusmodi, nulla ratione pro fuisse, sed potius mortem prænuntiasse, veluti quæ ab interim sanguinis & liquoris nervei labe illata, ex solutam vitæ compagem arguat: Et lenta admodum, tenaces succos, nervos infarciuntur nequeat digerere. Debent itaque febres convulsis supervenientes, neque mites omnino esse, neque admodum vehementes, & molestæ, sed Diariarum naturam quodammodo sapere, ut nimirum convenienti calore ac moderata humorum commotione hærentes, in fibris nervorum, succos dissolvant, & per convenientiora corporis emissaria deponant, Unde idem Hippocrates *in Coacis præ-*

not. inquit: *Convulsionem solvit febris superveniens acuta, quæ prius non fuit, si vero fuit prius, jam exacerbata*; Sed & paulo post, quam convulsio acciderit, expedit supervenire febrem, impactos siquidem humores, hebetatas partes, contractas, & obturatas nervorum, ac musculorum fibras, non tam facile febris concoquere, atque ad pristinum statum revocare poterit, præsertim quia huius generis humores acidi, & austeri esse solent, & cum diuturnitate temporis concreverint, inemendabiles fiunt; quam obrem Hippocrates in *Coac. prænot. sect. 3. vers. 55.* ait: *Syderationes repente exolutorio modo fientes, temporis progressu, febre accedente, perniciose sunt.* Hac eadem ratione contingit, membra jam pridem Paralyti resoluta, difficillime sanari, etsi magna & efficacia medicamenta adhibeantur, quæ proxime ad febrem inferendam accedant; Procedente enim tempore, adeo illa ab humoris impactu vitio hebescent, ut tandem veluti emortua videantur.

Sed an liceat febrem cum fortasse fortuna non supervenit, medicamentis ad id facientibus, excitare, quæri hic non abs re potest. Et quidem videtur Hippocrates suadere 2. *Epidem. sect. 5.* ubi, *si Puerperis*, inquit, *convulsio fiat, febrem excitato.* Verum neq; tam facile est id agere, neq; tutum, & nec ex voto sortitum, pro libitu deinde arcere; semel enim inducta febris, sat diu hærebit, aut etiam exasperabitur, ex mala humorum ac viscerum habitudine: Licebit autem solummodo iis remediis uti, quibus passim experimur, tenaces humores attenuari, hærentes dissolvi, atq; per sudorem, vel urinam & paulatim deduci. Idque fortasse crediderim voluisse Hippocratem sub nomine febris significare, cum ejusmodi medicamenta, sudorem potissimum prolicientia, *potentia* præstent, quod à febre, *natura* fieri consuevit, de qua re vide meam Praxim.

Dices I. Febrilis calor non coquit sed potius concoctionem impedit, ergo nec convulsionis materiam concoquere poterit. R. Febrilis calor non concoquit *Pepsi* seu pro nutritione corporis, seu modificatione humorum, concedo: non concoquit *Pepasmo* seu præparatione seu coctione ad expulsionem nego. Nam febrilis calor, si non coquat, saltem consumit, dissipat, & ad excretionem movet.

Instabis: Quidquid est contra Naturam, id non potest esse pro Natura, atqui calor febrilis est contra naturam, ergo. R. Distinguo, per se concedo, per accidens nego. R. 2. Calorem febrilem utpote calori naturali junctum hoc facere, non autem solum per se, cum solius naturalis sit coquere.

Urgebis:

Urgēis: Hippocrates convulsionem seu tetanum curat, affusa aqua frigida, Ergo nec per calorem quemcunq; curatur. R. Id fieri per accidens, concentrato nempe exaffusione aquæ frigida, calore & auctiore reddito, virtus enim unita fortior.

Dices II. Tetanus non videtur esse species convulsionis quia in hoc membra non moventur. R. Membra non moventur, motu locali, concedo; motu tonico nego: Ergo non moventur, nego consequentiam.

Dices III. Febris non potest solvere convulsionem ab inanitione, imo auget, Ergo Aphorismus non subsistit. R. Nulla regula datur sine exceptione; Aph. enim tantum loquitur de convulsione à repletionē.

Aphorismus LVIII.

Si febre ardente laboranti, rigor superveniat, solutio fit.

Nota: Cum hoc Aph. multum coincidunt, Aph. 29. & 46. hujus Libri.

Contentum seu Intentio.

De Rigore Critico.

Connexio: Cum in antecedente Aphorismo, de febre superveniente convulsioni egisset: In hoc præsentī Aphorismo, agit de rigore febris ardenti superveniente: Et sicut febris morbum solvit in superiori, ita in hoc solvit febrem rigor. Hic Aph. ob brevitatem non dividitur.

Rigor febricitantibus, unde quaq; molestissimus, tum ex sensu frigoris, etiam penitiores partes cruciante, tum ex universi corporis, ingenti atq; inæquali concussione, qua vires plurimum infringuntur, solet aliquando criticus, & salutaris fieri, cum subsequenter febrem, vel interrumpit, vel terminat. Et quidem cum post præcedentem, vitiosæ materiæ coctionem & secretionem, ejusdem extra corpus propulsionem, vel per sudorem, quod frequentius, vel per dejectionem aut urinam, quod rarius consequentem retrahit.

Meminit autem hic speciatim Hippocrates, febris ardentis, quippe quæ continens sua Natura est, nec unquam ægrum immunem deserit, quin non raro, ut idem Hippoc. Autor est, septima die perimit: Neque vero quam notam & spuriam vocant, sed legitimam & exquisitam notasse, credendum est, cum sine ulla adjectione, illam protulerit, & cui rigor accidere possit: Constat autem hunc, non nisi exquisitæ posse supervenire.

At unde possit rigor continenter febricitantem arripere? Hippocrates

crates 1. de morbis id ita definit: *Frigefcente fanguine, neceffe eſt & reli-
quum totum corpus perfrigerari, & ubi huiusmodi aliquid factum fuerit, ri-
gor appellatur, vehementior etiam fiet tremor, nam tum contrahuntur vena
fanguine coaſto & congelato, corpus etiam contrahunt & tremere faciunt,
ſi vero minus aliquanto fanguinis coaſtio fiat, hic rigor appellatur, horror
autem dicitur debiliſſimus rigor, hæc Hippocrates.*

Verum ardens febris, vel ab eo quod in fanguine, vitioſum eſt, per
in debitam commotionem, & fermentationem excitatur, vel etiam
ex eo quod aliunde ſuggeritur, & cum fanguine commiſcetur. Per Ri-
gorem autem & univerſalem corporis concuſſionem, sæpe numero u-
trumq; repurgati ſolet, ac per ſudorem, aliamq; evacuationem à ſan-
guine ſecedere & extra mitti, unde poſtmodum febris, vel omnino de-
ſinit, vel ſaltem intermittit, quam ob rem idem Hippocrates animad-
vertit *Aph 63. huius Libri: quibus in febribus quotidie Rigores fiunt, quo-
tidie febres ſolvuntur.* Hinc rigor in hiſ eſt indicium, futurae ſolutionis,
per aliquam evacuationem, quam natura moxmo tentans perficiet
aliquando, cum & nonnunquam ipſa eadem acceſſione rigoris, inter-
dum etiam ſuccedentibus diebus fiat. Sic mulier, quæ decumbebat
in Littore *agra XIII. 1. Epidem.* trimestri foetu gravida, non niſi criſim
paſſa eſt per Vomitum, & ſudorem, in decima quarta die, licet riguerit
in undecima. Qui vero in ſutrina decumbebat, iudicatus eſt cum ipſo
rigore in ſeptima, *4. Epidem* Sed & neq; rigore ſolum, verum etiam
horrore idem contingit, ut de Nicodemo in Abderis, & de Virgine
Lariſſæa, aliſq; meminit idem Hippocrates *3. Epidem. ſect. 3. agra X. &
XII.* neq; tantum febres ardentes & continentes, ſed alias quoq; exin-
de iudicatas teſtatur *1 Epidem. agra VI. & alibi.*

Sed quid ſi à rigore & horrore, febris nec deſinat nec intermittat ut
diximus ſupra hoc libro *Aph. 29. & 46.* Proſecto mali Iudicii imo le-
thalitatis ut ibidem meminimus, ſignum crit; arguit enim naturam
tentare, ſui exonerationem, ſed ex defectu ſecretionis & coctionis non
poſſe, atque adeo imbecillioſiorem fieri per rigorem, ſine ſpe ſuccedentis
criticæ evacuationis, hinc mortua decima quarta die refertur *3. Epid.
ſect. 2 agra XII.* quæ mulier decumbebat in mendacium foro, cum in
quarta riguiſſet, & bis in ſeptima, atque ſemel iterum in decima tertia.
Verendum etiam plurimum in iſtiusmodi iteratis rigoribus, abſq; criſi,
ne cerebrum, diaphragma, aliæq; nervoſæ partes, metaſtaſim patiantur
ab irruente humore ſeroſo & acri, unde poſtmodum internæ inflam-
ma-

mationes, Erysipelata, deliria, atque hujus generis alia, ut sæpius in Praxi experimur.

Dices I. Hippocrates in *Epid.* sæpius febrium à rigore incipientium meminit, qui tamen eas non solvit, Ergo falsus est Aphorismus. *℞.* Hic sudori febri, non febri sudorem supervenisse & sic subsistit Aphor.

Dices II. Diarrhæa vel sudoribus &c. supervenientibus fit solutio, ergo non rigore superveniente. *℞.* Hippocratem hic uti antecedente pro consequentibus, ut sæpe solet, nec male: satis enim est, si id mediate fiat.

Aphorismus LIX.

Tertiana exquisita septenis ad summum circuitibus judicatur.

Contentum seu Intentio.

De Termino tertiana exquisita.

Connexio: Cum in præcedente Aph. egisset de febre ardente continua, in hoc præsentī agit de duratione tertianæ intermittētis exquisitæ. Hic Aphorismus propter brevitatē non dividitur.

Cum ergo mox de rigore meminisset Hippocrates, veluti futuræ judicationis indicio, isq; tertianas exquisitas speciatim comitetur, harum terminum nunc proponit, ut inde conjiciamus, quo tempore cæteris febribus continentibus, ille superveniens possit criticam referre evacuationem, & salubriter easdem desituras indicare. Est autem tertiana exquisita intermittens hic per Antonomasiā intelligenda, quæ nimirum alternis diebus invadit, in singulis accessionibus spatium duodecim horarum, ut plurimum non transcendit, rigore incipit, sudore, vomitu, vel dejectione terminatur, præter ea quibus ad illam dignoscendam adnotavit Galen. 2. de differ. feb. cap. 3 & 1. ad Glauconem cap. 5. Septenis vero circuitibus desinere omnino dicitur, quia causam tenuem, & facile subigibilem recognoscit, quæ sponte sua secernitur, & à reliquis humoribus repurgatur ut ostendimus in Praxi. Cumq; circuitus alternatim repetant, tertio quoq; die, proinde fit, ut ad summum, non ut pleriq; putant, decimo quarto sed potius decimo tertio die, quo septima accessio recurrit, penitus terminetur, nisi tamen error aliquis contingat, aut ex parte Medici, importune medicamenta præcipientis, vel ex parte ægri, qui fors in sex rerum non naturalium usu deliquerit.

Sed *ad summum*, inquit, *judicatur*; nam fieri potest, ut etiam ante hoc tempus desinat, puta quarto, quinto, aut sexto circuitu, seu septima nona vel undecima die, pro corporum affectorum varietate, & humoris febrem foventis, fortasse parcius ac benignioris, faciliori resolutione, quam obrem recte dixit, extremum illius terminum esse, septimum accessionis reditum, cum scilicet nullo artis auxilio interrupta, sponte sua, ut consuevit, procedit, si enim ope antifebrilium medicamentorum, quemadmodum nostra ætate fit, usu corticis peruviani, vulgo china china dicti, ejus impetus infringatur, & periodicum fermentum hebetetur, profecto citius esset abitura, sicut jam passim experimur.

Verum quod hic septimo circuitu, ut tardissime tertianam febri desitutam, inquit, *in Coactis prænot.* ad nonum protulit; ibi enim: *Tertiana exquisita in quinq; aut septem circuitibus aut ad summum in novem judicatur*, fortasse ex mala habitudine corporis patientis, ex abundantiori & consistentiori humore, ex inclementi tempestatum constitutione, vel alia de causa, quæ illius solutionem retardare queat. Hinc crediderim, finem tertianarum, hic ab Hippocrate recensitum, *plerumque* intelligendum, cum pro rerum & causarum, in id concurrentium varietate, & ocius & serius, & facilius & difficilius, desinere possint; quemadmodum easdem experimur, modo simplicibus & levioribus, modo plurimis & gravioribus symptomatibus stipari.

Dices: Dejectio sincera (ut alibi dictum) habetur pessima, Ergo etiam pessima habetur febris exquisita, quia fit ab humore sincero, Ergo non tam facile juxta Aphorismum judicabitur. R. Bilem, febris tertianæ causam, non proprie seu pure esse synceram, sed vel altera tam vel aliis utique commixtam.

Objectiones reliquæ in contextu sunt adductæ & solutæ.

Aphorismus LX.

Quibus per febres aures obsurduerint, iis sanguis è naribus profluens, aut perturbata alvus, solvit morbum.

Contentum seu Intentio.

De Obsurdescentiæ in febribus solutione.

Connexio: Etsi supra Aphor. 28. hujus Libri Hippocrates scripserit, surditatem desinere, supervenientibus biliosis dejectionibus: In hoc

hoc tamen Aphorismo, non per dejectionem solum, sed & è naribus hæmorrhagiam, si febricitantibus accidat, eandem, neq; jam diu genitam, & stabilem, sed ipso febris decursu inductam à metastasi peccantis humoris solutum iri docet. Hic Aphorismus ob simplicem conclusionem non dividitur.

Hoc ipsum, quod meminit, in præsentì Aphorismo, expressius retulisse fertur Hippocrates. *Libro de Judicationibus*, inquiens, *quibus in febribus aures obsurduerunt, his, non soluta febre, insanire necesse est: Solvit autem sanguis è naribus erumpens, aut alvus biliosa egerens, aut dysenteria accedens, aut coxarum aut genuum dolor.* Hinc autem colligere est, oportere febrem desinere, vel saltem multum mitescere, cum subinde aures obsurduerint, translatione nimirum humoris, in organa aurium, & præsertim in eam auditionis semitam, quæ Tympano attigua est, atque in glandulas auribus circumjacentes, unde postmodum in alvum is ferri possit; si vero febris exinde non solvatur, delirium accidit, perturbato potius per metastasim humoris cerebro, adigente, & commovente non leviter febre superstite, quam sane subsurditas, veluti novum symptoma sequetur, non vero ut criticus abscessus judicabit, delirium autem, si non vocis, saltem mentis erit.

Porro id cum surditate solvetur, aut erumpente affluenter è naribus sanguine, aut diarrhæa, vel dysenteria superveniente, aut translato in coxas vel genua humore, aures occupante, unde postmodum in his dolor, & fortassis etiam tumor sensibilis, ut in cæteris judicatoriis abscessibus fieri solet. Quod autem fluens è naribus sanguis, cerebri sensoria gravata, & male affecta levet, atq; alvus soluta, surditatem adimat, jam cunctis notum, estq; à nobis latius antea demonstratum in expositione supracitati *Aph. 28.* Advertere hinc modo est, non dixisse Hipp. solui ex ejusmodi evacuationibus febres ipsas, sed morbum, eum scilicet, qui ex metastasi aures in surditatem, & cerebrum in insaniam deduxerat.

Dices: Idem prorsus est hic Aphor. cum *Aph. 28.* Ergo Hippocrates commisit Tautologiam. *R.* Transeat antecedens nego consequentiam, quia in 28. loquitur magis de inveterata quam recenti ut hic: ibi generalius, hic particularius locutus sit: ibi de vicissitudine surditatis & alvi fluxus, hic de curatione.

Dices II, Potest dari surditas cum diarrhæa, quæ tamen est incurabilis Ergo falsa sunt dicta. *R.* Hippocratem loqui de diarrhæa & surditate critica non symptomatica quæ objicitur. Præterea, si surditas sit à vitio

organi hæreditaria, aut inveterata nimis, nunc diarrhæa nec dysenteria juvat; secus si ab obstructionibus & fermentationibus inordinatis dependet. Plures objectiones vide supra *Aph. 28.*

Aphorismus LXI.

Febricitantem, nisi diebus imparibus, febris reliquerit solet reverti.

Nota: Hoc loco revidendus & recolligendus est *Aphor. 36. hujus Libri.*

Contentum seu Intentio.

De Crisi februm infida.

Connexio: Cum supra *Aph. 29.* docuisset Hippocrates, rigores sextæ diei, judicationem habere difficilem: in hoc Aphorismo, universalem de omnibus diebus criticis tam paribus quam imparibus agit. Hic Aphorismus utpote brevissimus non dividitur.

Dubitat in comment. Galenus, an revera hic *Aph.* sit Hippocratis an à quopiam alio interfertus; siquidem is, inquit, non modo die quarto decimo, multos vidit judicatos, sed etiam in vigesimo, & quadragesimo & sexagesimo & octuagesimo; ipsi vero judicant, & vigesima quarta, & trigesima quarta, & ab initio protinus quarta. Sed cum alibi id ipsum omnino scriptum sit ab Hippocrate, præsertim vero 2. *Epid. Si non die impari febris dimittat, reverti necesse est.* Et in *Coac. prænot. Quibuscunq; desinunt febres, non in diebus judicatoriis, his residiva sunt.* Profecto, ad alium quam ad Hippocratem, sententiam hanc referre, nefas foret. Sed tamen quæ commentatus est Cardanus, ut eandem generalem faceret, in febribus quibuscunq; non tanti sunt, ut mereantur assensum; quin in plurimis is ab Argenterio redarguitur, quippe qui in decretoriis diebus colligendis, & reducendis ad septenarios, sophistam sapiat. Quamobrem præstabit in aliorum interpretum sententiam concedere, qui cum Galeno, pro imparibus, judicatorios substituunt, vel cum Philotheo, ad acutas tantum febres, mentem Hippocratis contrahunt.

Juxta veteres è diebus quidam credebantur vere pares, quidam vere impares, quidam vero medii. Pares dies absolute erant 2. 6. 8. 10. 18. 22. impares absolute erant: 3. 5. 7. 9. 11. 17. 21. Medii absolute erant, qui sunt crediti esse utriusq; naturæ, eratq; 4. 14. 20. 40. 60. 80. 120. qui dies medii, si numerentur, quantitate materica, vere pares sunt; at ratione septi-

septimianæ, impares dicuntur, quare (inquiunt) fit, ut Hippocrates hic pares intelligat, solum absolute tales, non autem hos qui sub imparibus continentur: Hæc veteres, qui dies criticos omnes impares voluerunt. Verum cum à nobis sæpius, ex eodem Hippocrate sit ostensum, quemlibet diem sive imparem sive parem, criticum esse posse, si cum signis coctionis jungatur, & causæ morbificæ motionem, & evacuationem comitetur, plane hunc Aph. referre licebit ad eas tantum febres, quæ diebus imparibus, suos paroxismos proferunt, aut in iisdem exacerbantur, cujusmodi sunt tertianam periodum iterantes, sive simplices sive duplices; sed enim scribitur *1. Epid. Sect. 3. quæ paribus diebus exacerbantur, paribus judicantur*; unde credere decet, voluisse hic solum eas febres memorare, quæ circuitum subeant, per dies impares, cæteroquin inter acutas frequentiores. Porro constat apud omnes, iis diebus febres omnes judicari, in quibus accessiones incutiunt, nam quibus crisis imminet, nox præcedens molesta esse solet, nec unquam visa est crisis, in die à febre vacuo, aut absq; magna colluctatione naturæ cum morbo & causâ morbificâ; & licet decima quarta dies, in acutis dicatur critica, revera tamen crisis accidit, in fine accessionis, decimæ tertiæ diei, quæ cum soleat ex impetu paroxysmi, ob maximam morbificæ causæ commotionem, molestior fieri, atque ex conatu naturæ crisis promoventis, in longius tempus produci, fit propterea, ut beneficium criseos reluceat in decima quarta die, cum victrix natura, morbi causa depulsa, immunis à febre remanet. Atqui accessiones febrium considerando, sapissime quoq; experimur, in septima accessione febrem finiri, quamvis illa ad decimam quartam diem extendatur, ex motu nimirum ejusdem febris, in suis repetitionibus, quodammodo variantis, & paroxismos postponentis; etenim ut alibi diximus, oportet non dies, sed accessiones intueri.

Cum igitur febres desinunt, in iis diebus in quibus accessio, vel nulla fit, vel levis & admodum remissa, de illarum reditu verendum, quippe quæ desinant absq; crisi, sive morbificæ causæ evacuatione; hæc autem ut dictum, nunquam accidit, sine vi atque impetu ejusdem, sese vehementius commoventis & naturæ propellentis ad consuetâ corporis emissaria; idcirco cum adhuc intus remaneat, procul dubio febrem denuo excitabit; *nam quæ in morbis relinquuntur, recidivas facere consueverunt.*

Verum dixit Hippocrates, *solet reverti seu recidere*, non enim est

omnino necesse, ut febricitans recidat, cum à febre evaserit, in die non critico, aut impari & absq; crisi: Expertum enim sapius est, defuisse febres, citra quamcunq; evacuationem, & absq; vehementi naturæ commotione: an quia iteratis egestionibus, per singulos præcedentes paroxismos, solutionem sensim passæ sunt? an quia modicus & exiguus humor, illas fovebat, qui insensibiliter diffatur? an etiam quia ante febrilium medicamentorum usu, pedetentim extenuatus & edomitus est; nisi vero alio translatus, & è primigenia conditione mutatus, aliam morbi speciem excitet ut in abscessibus.

Dices I. Hippocrates 3. *Epid. agroto XII.* dicit Larissæam virginem sexto die bene fuisse judicatam, per largam hæmorrhagiam narium, ergo pari die bona sit judicatio. R. Hanc difficultatem supra solvimus, hic solum addimus, illam sanatam fuisse ob mensium eruptionem secutam: Vel dici posset, crisin illam sub finem diei sextæ inchoasse & finitam die septima.

Dices II. Morbi seu febres acutæ, quæ tertio quoque die exacerbantur periculosiores sunt juxta Aph. 43. hujus Libri, cum tamen exacerbationis die fiant crises, & tertius dies sit criticus, ut patet ex Aph. 36. hujus libri, Ergo noster Aphor. non erit verus. R. Non tantum primum tertium diem hic intelligi, sed etiam secundum nempe sextum, & duodecimum, hi enim quoque habent rationem tertiæ diei.

Aphorismus LXII.

Quibus in febribus, morbus regius (seu icterus) supervenerit, ante diem septimum malum.

Contentum seu Intentio.

De Ictero febribus superveniente.

Connexio: Cum in antecedenti egisset de diebus criticis; in hoc præsentem Aphorismo continuat de crisi agere, asserendo malum esse, si icterus ante diem septimum accidat in febribus. Hic Aphorismus ob simplicem conclusionem indivisus manet.

Mirum sane est, quam sit Hippocrates ex hoc Aphor. reprehensus, quod in eo sententiam protulit, vel erroneam, vel saltem non ubique veram. Plinius enim Lib. 16. C. 12. illum falsitatis arguit, cum se scire fateatur, *vixisse aliquos ab hac desperatione*: Averrhoes etiam Lib. 4. collect.

colleat. Cap. 43. in suis regionibus id ipsum experientia reprobaturum contestatur: Sed & Galen. quoq; in *Comment. 81. super. 4. de ratione victus in acutis*, consimilem fere sententiam interpretatus, quodammodo etiam Hippocratem sugillat. Quem textum exponens Prosper Martianus, ut veritati istius Aphorismi pariter consulere, voluit hic adjiciendum esse, *sine rigore*, nam si fortasse cum rigore icterus accidat, ante septimum salutarem putat.

Verum meminisse juvat eorum, quæ in Praxi de Ictero dicta sunt, sapissime illum fieri, præsertim in acute febrientibus, à sanguinis vitio, ex corrumpente veneno, & à lymphâ vitiata, lixivii conditionem adepta, ut quemadmodum à vipera demorsis accidit, momento fere temporis flavescere, serpente nimirum brevissime per totum corpus veneno, atque universum sanguinem corrumpente: Ita febris pravitate à consimili humore sanguinis diathesim, invertente, verisimile admodum est icterum morbum in ægrotis proficisci. Neque vero credere fas est, voluisse hic Hippocratem, regium morbum nominare, qui ex jecoris inflammatione, scirrho, obstructione ac duritie fieri creditur. Nam præterquam, quod ejusmodi morbi sæpe sæpius visi sunt, nullum plane icterum attulisse? & contra icterus visus est sæpius ab omni jecoris vitio alienus, de quo sejuncte tradit Hippocrates brevi post *Aph. 64. hujus Libri, & Aph. 42. Libri sexti*: ubi ab affecto hepate icterum memorat. Hic autem ejus solum meminisse videtur, qui citra viscerum læsionem à solo sanguine per febrem commoto procedit, cumque is critice prodire nequeat, in tam brevi temporis spatio, quo secretio fermenti febrilis nondum facta est, merito calamitosus ab Hippocrate existimatur. Atque hinc plane fit, cur febrem solvere ipse dicat *Cap. 4. de rat. victus in acut.* si cum rigore conjungatur, absq; rigore vero exitialem esse, si præsertim accedat intempestive, quoniam per rigorem, motus naturæ criticus designatur, qui febrile fermentum à sanguine repurgat, atq; ad corporis habitum deponit; at vero absq; rigore, is omnino symptomaticus habebitur, corrumpentis veneni malitiam arguens.

Quamquam autem plerumq; accidat, male cedere febrientibus icterum ante septimum, fieri tamen potest, ut prævalente natura, etiam ante septimum illa repurgatio, quæ in sanguine, à fermento maligno desideratur, commode & salubriter habeatur, ut in suis regionibus calidioribus fatetur Averrhoës: multum enim variant morbi, pro climatum varietate, & qui alicubi longiores observantur, fiunt alibi breviores,

res, beneficio aëris, ciborum & potuum natura meliori, aliisque de causis. Quamobrem cum icterus, ac redinem & tenuitatem humorum consequatur, & hi promptius secernantur, ac diffidentur, sub cælo æstuosiori, quam frigidiori sicut facilius æstate, quam hyeme, id circo fit, ut in regionibus calidis citius atque ante septimum, in frigidis serius ille febrem iudicet: Porro Hippocrates, (ut diximus) ea posteris tradidit, quæ observavit, & frequentius accidisse vidit. Neque vero in hoc Aph dixit, exitialem esse morbum regium ante septimum, sed tantummodo malum; quippe negari non potest, quod lateat in sanguine, tanti motus ac fermentationis incitamentum, ut illum & cæteros liquores tumultuarie perturbet. Quod si præterea jecoris phlogosim aut phlegmonem erysipelatodem consequatur, non tantum malus & calamitosus, sed plane exitialis dicendus erit, non quod omnino perimat, sed quod plerumque perimere consueverit: nam ex eodem Hippocrate *i. Epidem. const. 3.* habetur: *Quibusdam morbus regius accidit sexta die: Verum his purgatio per vesicam, aut alvus exturbata profuit, aut larga sanguinis eruptio, veluti Heraclides, qui decumbebat apud Aristocydam, qui vigesima die iudicatus est; non velut Phanagora servus cui nihil tale factum est & mortuus est &c.*

Cæterum recte quidem advertit Galenus *in Comment.* morbum regium ante septimum malum esse, sed non tamen post septimum periculo vacare, si præsertim cum delirio jungatur, ut propterea jure scriptum sit ab Hippocrate Aph. 64. hujus Libri; *quibus in febribus morbus regius, septimo vel nono vel undecimo vel decimo quarto supervenerit, bonum, nisi dextrum hypochondrium obduruerit, si vero non malum est.* Cum enim ex inflammatione jecoris, vel cystis felleæ oritur, quocunque tempore accidat, semper malus. Atque hinc patet, de ictero hic meminisse Hippocratem, qui febribus accidit, ex solo sanguinis vitio, citra cujusvis visceris obstructionem, aut tumorem, in Aph. 64. vero mox sequente, de eo etiam, qui ex male affecto hepate procedit. Verum si dextrum hypochondrium non obduruerit, & à sola febre icterus proficiscatur, nisi crisis conditionem referat, & sanguinis repurgationem consequatur, adhuc malus erit, cum evacuationes quæcunque non tempora aut dies morborum, sed criticum naturæ secernentis motum, ut salutare sint, consequi debeant.

Dices I. Galenus *in Comment.* bis dicit, impossibile esse, ut ante septimum diem ictericus factus evadat, ergo. &c. Nos quidem hanc & plures alias

alias difficultates iam solvisse: & tamen 2. si febres sint spuria à materia viscida & crassa concedo: in legitimis ardentibus, à materia tenui nego: Hæ enim breves, illæ longæ esse consueverunt.

Aphorismus LXIII.

Quibus in febribus, quotidie rigores repetunt, quotidie febres solvuntur.

Contentum seu Intentio.

De Typo febrium intermittentium.

Connexio: Cum supra Aph. 29. 46. & 58. rigorem febres continuas solvere pronuntiasset Hippocrates: In hoc presenti Aphorismo, eundem rigorem solvere febrem intermittentem, affirmat. Hic, utpote brevissimus Aphorismus, non dividitur.

Rigorem ergo in febribus periodicis, succedentis intermissionis indicium esse, docet hoc Aphorismo Hippocrates, ut qui semel vel non unquam incidens in febre continenti, post signa coctionis, illam omnino judicet; si in cæteris quotidie recurrat, illarum saltem singulares paroxysmos terminet, atque ab aliis succedentibus interrumpat, quemadmodum in tertianis febribus, sive simplicibus, sive duplicatis, passim experimur. Quamvis autem acriter pleriq; disceptent, an rigor proprie causa dici debeat ejusmodi intermissionis in febribus, an vero potius indicium? Revera mihi videntur de re levissima movere altercationem, nam utrumq; vel alterutrum si dicatur, parum ad medicinam faciendam intererit. Et quidem esto, sit causa, per universalem corporis concussionem, qua noxis humor febrem excitans à sanguine repurgetur ut vult Galenus; vel ut indicium, denotans accessionem illam jamjam iri terminatum, ut pleriq; alii arbitrantur; profecto non tanti erit, ut peculiaris de illo ratio habenda sit, quin simul febrim ipsam, cujus symptoma præcipuum est, non æqualiter respiciat. Verum tamen quia in istiusmodi febribus intermittentibus, quas rigor anteit, fermentum febrile sanguinem in motum fermentationis, indebitum adigens, extraneum est, atq; à visceribus naturalibus accedit, rationalius videtur illum indicem, non opificem intermissionis appellare. Cum enim sanguis indebite fermentescit, à dissentaneo humore, aliunde suggesto, unde frigora, & rigores, ineunte paroxismo, argumento

Hhhh est,

est, iterata circulatione se ipsum sensim repurgaturum, atq; in propria fecernicula, imo in patentiora emissaria, quod alienum, & vitiosum est, depositurum, ut alibi demonstravimus. Hinc rigor præcursor est intermittentium febrium, & cum continuis, aut continentibus supervenit, illas pariter interrumpit, sin secus malignitatis nota est periculi plena, ut antea dictum.

Non est igitur ut se tantopere torqueant hic commentatores in divinando, num Hippocrates proprie rigores, an potius frigora voluerit intelligenda, comprehendendi ergo, cæteras quoq; febres quotidianas, semitertianas, duplices tertianas, & duplices quartanas.

Nam indefinite eas memorat, quæ rigoribus arripiunt, quemadmodum *Lib. de Judicat.* inquit, *quibus febribus rigor accedit febris solvitur*, id est, singularis illa accessio, quæ rigorem prodromum sortitur ut propterea, sicuti continuis superveniens rigor, paroxysmum illum interrumpit; ita intermittentibus quotidie recurrens, quotidianas accessiones infringit & terminat. Quia vero non omnes quotidianæ febres, id est, quotidie repetentes, rigoribus sociantur, ideo fit ut non omnes ad ἀνυψέζια seu quietem febre vacantem revera perveniant, cum adhuc febres illæ quotidianæ, fieri putatæ ab humoribus phlegmaticis, accessiones tam longas sortiantur, ut vix ægrum à febre immunem deserant, veluti Galen. ipse testatur. Verum quid de his verisimilius liceat sentire, jam enucleate deduximus titulo de febribus in praxi: Cum & ipse Hippocrates, omnes quasi febres ex bile oriri crediderit, quasi vero ab uno, eodemq; humore, diversimode tamen affecto, aut cum aliis succis commixto, variæ causari possint febres, atq; pro ejus collectione & ad fermentescendum promptitudine, tardiori vel citiori, nunc quotidie, nunc alternis diebus & ultra repetentes effici. Sed tamen advertere decet, Hippocratem speciatim voluisse admonere, quam utilitatem sint febricitantes ex rigoribus suscepturi, ut etiamsi quotidie febribus divexentur, algeant, & vehementer concutiantur, per rigorem tamen quietem febre vacantem & ἀνυψέζια nanciscantur, qua omni periculo se exemptos credant. Hinc de rigoris beneficio monitos voluit Medicos & ægrotantes, nihilum interea reliquarum febrium, aut symptomatum, illas comitantium sollicitus, sive intermittant sive non, & sive periodo quotidiana, tertiana, aut quartana redeant.

Cæterum usus est vocis *solutionis* non *judicationis*: nam revera febris ipsa integre non finitur (alias minime rediret) sed solum accessiones illæ

illæ seu paroxismi, singulatim desinunt, & humores fermentationem indebitam in sanguine excitantes, in singulis paroxismis solvuntur, tametsi ab aliorum suggestu, novi & novi ingruant: at vero non plures in una eademq; die, ut in febribus subintrantibus dictis evenit, etenim *quotidie* inquit, i. e. semel in die, sed iterato in succedentibus diebus, ne forte inter initia febris solum, rigor invadat, nec deinceps repetat, velut in continuis mali moris. Quamquam duplex tertiana, intra unumquemque diem, bis affligens, rigore si inchoet etiam aliquamdiu intermittat.

Quod de rigoribus hic tradidit Hippocrates, licebit pari ratione, ad *horrores* extendere: Siquidem duplices, aut triplices quartanæ, horrore prodromo invadentes, ad *ἀπυρεσίαν* seu quietem quoq; deveniunt, & in singulis paroxismis solvuntur, ut propterea non semel datum sit, illas iterato usu corticis peruviani seu china chinæ, aliove simili medicamento, pro re nata, sigillatim salubriter fugasse, quemadmodum ad tertianas fieri consuevit. Quomodo autem istæ, sicut pariter rigores & horrores, inter se differant diximus in titulo de febribus.

Dices I. Sæpe videmus, febres non solvi in die rigoris, sed postero, Ergo falsus est Aphorismus. &. Id fieri per accidens, nempe propter complicationem ut sit in hæmitritæo, qui habet rigores & tamen febriū paroxismi non solvuntur, quia est complicata ex quotidiana continua & tertiana intermittente; vel materiæ impropotionem, crassitiem, visciditatem, vel errorem externum; Ergo verus manet Aphorismus.

Instabis: Etiam si solvatur paroxismus, semper tamen manet febris, ergo non solvitur. &. Manet febris secundum paroxysmum universalem concedo, secundum particularem nego: ut diximus in contextu.

Aphorismus LXIV.

Quibus per febres, morbus regius, die septimo aut nono, aut undecimo, aut decimo quarto supervenerit, bonum, nisi dextrum hypochondrium durum sit: alioqui minime bonum.

Contentum seu Intentio.

De Ictero febribus superveniente.

Connexio: Cum Hippocrates Aph. 62. dixisset morbum regium reprobandum esse, cum ante diem septimum advenit: In hoc vero

Aph. docet quando laudandus sit, idem morbus superveniens. Hic Aph. pariter ob simplicem conclusionem & prognosim non dividitur.

Verum recte advertit Galen. *in Comment.* melius hunc præsentem Aphorismum, Aph. 62. fuisse conjunctum: nempe hoc modo: *Quibus in febris, morbus regius, ante diem septimum accidit, malum.* Ut totus sensus talis fiat: *Ante septimum quidem diem, morbum accidere regium, malum omnino: post septimum vero bonum, nisi dextrum hypochondrium obduruerit.* nam absq; ordine videtur hic interjectus. Verum hoc non multum refert: Id vero magis intererit, morbum regium hic recensitum, pertinere potius ad jecoris affectionem, ut proinde sensus sit, illum à septimo, deinceps febrientibus supervenientem, meliorem esse, utpote qui probabilius sanguinis repurgationem consequatur, nec corrumpentis veneni malitiam arguat, sed secernentis naturæ vim & efficaciam. Conferendus autem huic est alius Aph. ex *Coac. prænot.* (unde hic plane desumptus est) sententiam procul dubio clariorem reddens: ibi enim describitur: *Morbus regius ante septimum diem accedens, malum: Septimo vero ac nono & undecimo ac decimo quarto judicatorius est, si non præcordia induret; sin minus ambigua res est.* Nam si fortasse ex naturæ repugnantis motu, felleus humor in cystim quoque, plus quam deceat, irrumpat, & tumorem & inflammationem pariat, profecto ex istius malitia, pessimi morbi indicium erit. Quamobrem inquit; *si non præcordia induret*, quasi vero is causa sit ejuscemodi tumoris & inflammationis. Quod si icterus, veluti symptoma dextri hypochondrii, inflammationem potius consequatur, plane pessimus existimandus erit, tamquam peioris mali seu morbi testimonium, nec absque veneni corrumpentis malitia, per quam habitus corporis universus, colore ad croceum, cum virore commixtum, inficitur. Verum cum Hippoc. adnotaverit, hanc coloris ad cutim translationem, à septimo per dies indices, aut judices, suspicandi ansam præbet, futurum in his icterum, veluti à febre, non ab hepatis inflammatione, oriundum, & propterea voce usus sit generaliori, duritiæ, seu duri tumoris in hypochondrio dextro: Durities autem non tantum inflammationi, sed etiam obstructioni & scirrho convenit. Sed hæc non tanti sunt, ut sententiam Aphoristicam invertant: nam ut antea dictum, quilibet hepatis morbus, quocunque demum modo contingens per se perpetuo malus est, secluso morbo regio.

Si vero, subdit, non in his, sed in aliis à septimo, diebus, intra decimum

num quartum icterus accidat, non bonum; nam revera malum adeo non est, ut de diebus ante septimum antea dixerat, nec ex altera parte bonum, quia fit in diebus, in quibus natura movere per crisin non solet, cum non nisi per dies accessionum, cuiusmodi in his generibus febrium sunt impares, in morbum & causam morbi, impetat: Quamobrem phrasi clariori scripsit in *coacis prænôt. sin minus, ambigua res est*: ut nimirum significaret, ancipitem inde futurum eventum, saltem morbi diuturnioris, aut in deteriorem, puta hydropem, permutati. Ultra decimum quartum diem, non meminit, forte quia de ictero, in acutis febribus sermonem habendum voluit: at non ideo, si ultra hoc tempus febrientibus contingat, omnino bonus, si a naturæ expellentis motu, post coctionem & secretionem non oriatur, quamvis deinceps malitiam semper diminuat; attamen raro accidit icterum supervenire febribus in longum productis, modo alios morbos non accersint, vel in deteriores commutentur. Caterum etiam absque febre, *morbo regio laborantibus, hepar durum si fiat, malum est* 6 Aph. 42. Tunc enim durities jecoris, sequitur icterum, & periculum non ex ictero nascitur, sed ex jecinoris duritie ac tumore, qui semper malus: siquidem scirrhum, cachexiam, hydropem sive humidum sive siccum, aliosq; graves morbos, minatur. Spes autem salutis aderit, si subinde sponte sua, per alvum aut vias urinæ, vel etiam per hæmorrhagiam, vitiosus humor egeratur, ut accidit Heraclidi 1. Epid.

Objectiones quæ hic moveri possent, omnes in contextu solutæ sunt.

Aphorismus LXV.

In febribus, circa ventriculum, vehemens æstus, & stomachi morsus, malum.

Contentum seu Intentio.

De æstuatione ventriculi & cardialgia febrili.

Connexio: Postquam in præcedenti Aphorismo de morbo regio locutus esset Hippocrates, qui ipsius jecoris est affectus; in hoc præfenti Aphorismo, de ventriculi affectione loquitur in febribus. Hic Aphorismus ob summam brevitatem non dividitur.

Videntur autem hæc duo, hic ab Hippocrate, memorata symptomata cum acutis, & continuis febribus, conjuncta, inflammationem

præmonstrare imminens, in iis præsertim partibus, quæ ventriculū, ejusque orificium superius circumdant: Illa vero erysipelatis potius conditionem referet, unde major acredo, morsus & vehemens æstus oriatur. Anatomia enim sæpius compertum, ejusmodi malorum causam extitisse, excitatas circa stomachum, aut pylorum inflammationes, itemq; in hepatis loco, qui ventriculo super incumbit, in omento, in pancreate, imo etiam in exteriori ventriculi membrana, ut proinde ægrotantes brevi vita defuncti sint. Sed & non raro etiam contigit, hæsisse in his partibus acres quosdam, & virulentos humores, qui non tam mole aut copia, quam pravitate nocerent, & nervos, qui plurimi per easdem partes sparguntur, acriter compungerent, & lacerarent. At hæc profecto non nisi in acutis febribus fieri possunt, quas plerique non irrationabiliter existimarunt, nunquam ab internis inflammationibus, vel ab hærentibus humoribus, in apicibus arteriarum, esse sejunctas. Cum autem in febribus ista copulantur, palam est, fieri non posse, ægrotantes non periclitaturos. Sive ergo κοιλίην, ventriculum, sive inferiorem ventrem interpretemur, (cum utriusq; dolores, magni faciat Hippocrates *in coacis prænot.*) idem omnino timendum erit; quamquam cordis morsus in græco codice καρδιακήμὸς, si pro stomachi dolore exponatur, minus periculum arguat, quam si cordis motus, palpitatio- ni similis intelligatur; quippe hæc longe deterior putanda est, veluti proximior cordis affectio, atq; eo magis, quo acutis, & continuis febribus sociatur, veluti disparis omnino conditionis. Atqui *malum*, inquit, non *lethale*: Siquidem, etsi ista periculum vitæ minentur, non tamen spem salutis adimunt, ut de malignis febribus, quibus hæc plerumque accidunt, scripsit alibi Galenus. Verum tamen, si partium extimarum frigus accedat, omnino exitiosum, ut antea dictum.

Dices I. In febribus intermittentibus, vel etiam vermibus extra febres fiunt ejusmodi morsus ventriculi, qui tamen non sunt periculosi, Ergo Aphorismus non est universaliter verus. R. Hippocratem hic loqui de febribus continuis: Si autem ejusmodi ventriculi morbus fiat extra febres, à materia biliosa indicatur, vomitorium esse adhibendum, ut præcepit Hippocrates 17. Aph. hujus Libri.

Instabis: Etiam in febribus continuis, ejusmodi ventriculi & cordis morsus fiunt instante crisi, qui tamen mali non sunt, Ergo adhuc non verificatur Aphorismus. R. Fit ejusmodi morsus in febribus continuis, præcedentibus coctionis signis, & qui non diu durat, nec est malus, concedo: è contra qui diu durat, non est malus nego.

Urgebis: Semper cordis & ventriculi morsus est malus, ergo non debent excipi febres intermittentes vermes. R. Omnis ventriculi vel cordis morsus est malus, prout malus idem est quod lethalis nego: prout est molestus concedo.

Aphorismus LXVI.

In acutis febribus, convulsionibus, & circa viscera vehementes dolores, malum.

Contentum seu Intentio.

De Convulsionibus & doloribus viscerum convulsivis in febribus.

Connexio: Cum in antecedenti Aphorismo, duo gravia symptomata, nempe æstum ventriculi & cordis morsum, assumpsisset, ad prædictionem in febribus: In hoc Aphorismo, alia duo nimirum convulsionibus & viscerum dolores, similiter ad prognosim assumit. Hic Aphorismus, utpote brevissimus, non patitur divisionem.

Convulsionem feбри supervenientem, pejorem asseruit Hippocrates 2. Aphor. 26. in hoc Aphorismo vero, simpliciter malam dicit: forte, quia hic iteratas & sæpius invadentes intelligit, neque unius tantum partis, sed totius, jam antea febre acuta correpti, cui etiam circa viscera dolores vehementes accidunt.

Sed gravius & difficilius profecto est quod scribit, *in fine Libri de Iudicationibus*. Ubi: *Si à feбри detentum, convulsio corripuerit, sedatur febris eadem die, aut postridie, aut tertia die*. Et *Lib. Coac. pranot. Convulsio in febre fiens, sedat febre eadem die, aut postera aut tertia*. Unde non videtur tam mala convulsio acutis febribus (de quibus hic loquitur Hippocrates) contingens, quemadmodum in hoc Aph. memoratur. Verum si perpendantur, quæ ibidem Hippocrates adnotavit, nullo negotio hæc diluentur & eruentur. Ille enim paulo ante inquit: *Convulsio in febre fiens, & eadem die desinens, bona est: & mox: si vero tempus, in quo incepit transgrediatur, & non desinat, malum est*. Quare tunc convulsio feбри superveniens bona est, cum eadem desinit, cum tempus illud transgreditur, omnino mala. Si præterea repetat, & aliis morbis societur, veluti hoc loco referuntur vehementes circa viscera dolores, procul dubio, non tantum mala, sed exitialis æstimanda erit.

Et quidem vehementes viscerum dolores fieri nequeunt, nisi ab humo-
ribus

ribus acribus, acidis, aculeatis, partes præsertim membranofas, & nerveas lancinantibus, qui per febrem acutam, impensius irritati, convulsiones prorsus molestissimas excitant, quamobrem non immerito eas, cum viscerum doloribus junxit in hoc Aph. Hippocrates, ut vel ex hoc conjiceremus, ab his, easdem profecturas; & quamvis perpetuo malæ putandæ istæ sint, peiores tamen longe erunt, si ad febres acutas consequantur, quippe quæ non tantum viscerum, sed & totius sanguinis diathesim vitiatam designent, quam etiam per convulsiones iteratas, nervorum liquor, non dissimiliter comitabitur. Verum tamen *malum* solummodo dixit, non *lethale*; quandoquidem possunt quoque febrientes, ab utrisq; tuto evadere, si nimirum vitiosi humores ferantur in alvum, aut vesicam, & critice, ut moris est, egerantur: quo sane modo lactentes vidimus sæpius liberatos, qui cum à lacte, in intestinis concreto, acerbe simul ventre dolerent, febricitarent, & convulsionibus corriperentur, soluta posthac alvo, in pristinum salutis statum fuerunt restituti.

Lices I. Convulsiones in febribus acutis, sæpe fiunt à repletionem, & tamen facile curantur, evacuatione ut dictum per alvum, Ergo Aphorismus non est verus. *℞.* Si febres acutæ sint symptomaticæ & in principio, concedo, si essentielles & confirmatæ nego, tum enim convulsiones fiunt tantum ab inanitione.

Instabis: Convulsiones tam à repletionem, quam ab inanitionem in febribus, tam per Essentiam, quam per consensum sunt malæ ut patet ex Aph. 3. Lib. 5. à copioso sanguinis fluxu, singultus, aut convulsio, malum. Ergo nulla solutio. *℞.* Sunt æq; malæ, nego, absolute malæ, concedo.

Aphorismus LXVII.

In febribus, per somnos pavores, aut convulsiones, malum portendunt.

Contentum seu Intentio.

De Convulsionibus febrium in somno.

Connexio: Pergit Hippocrates in hoc Aphorismo, duo febrium symptomata taxare, sicut in prioribus, nempe pavorem & convulsionem ex somno. Hic Aphorismus ob summam brevitatem, indivisibilis est.

Memi-

Meminimus alias, somnum animantibus concessum, ad levamen & quietem corporis & animi: ubi autem potius laborem & lassitudinem affert, lethalem eventum portendere, ex Hippocrate constat: hic autem si pavoribus interrumpatur, malum dicitur, in acute febricitantibus. Accidit enim sæpe numero, illos absque ulla externa causa, inter dormiendum, frequenter exterreri, imo nec ex phantasmatibus horrificis, aut somniis tumultuosis, è genere terriculamentorum, expavescere, idq; toties, quoties sopore arripi contigerit. Subitos autem istos, & repentinos, à somno, timores, quamvis pleriq; ad cerebri læsionem retulerint, quasi vero vaporibus melancholicis, aut atrabilariis suffundatur, quia tamen quæsit, de his terriculamentis, ægrotantes, nihil se visum passos conqueruntur, cum cæteroqui nec somno, re ipsa, in quo in somnia capiantur, putaverim ego illos oriri ab irritamento potius, pravorum humorum circa præcordia restagnantium, quibus nerveæ illorum partes laceffitæ quodammodo convellantur, & cerebrum excitent cum terrore, ob concussionem, & exagitationem fibrarum nervearum & liquoris easdem irrigantis. Equidem ejusmodi pavoribus, sæpissime pueros affici experimur, cum à lacte coagulato & acido febricitanti; quod cum ventriculo, & intestinis infensum fiat, nec prompte egeri possit, partes istas, in illis exquisito sensu præditas vellicat, & laceffit, adeoque repentinas expergefactiones & pavores inducit. Id ipsum à vermibus etiam pati solent, unde est, ut huic malo indiscriminatim nostrates fæminæ occurrere satagant, remediis lumbricos encare creditis. Modo quis unquam in his cerebrum ferientes humores aut vapores melancholicos effinget? nisi melancholicos cum acidis confundat. Atqui contingunt plerumque ex somno (si tamen verus somnus is sit) punctiones istæ, quoniam per id tempus, laxatæ quodammodo nervorum fibræ, magisq; hiantes poruli, facilius admittunt, qui ex acidis, & pravis succis fermentescentibus, halitus & vapores infensi quaqua versum diffunduntur. Hinc ad convulsiones, non irrationabiliter, ejusmodi repentinos, ex somno pavores referrem, inductas tamen, non ex affecto nervorum principio, sed ex horum apicibus & fibris proritatis. Qua ratione forsan Hippocrates, cum his junxit in Aph. convulsiones, nimirum ut eas febricitantibus malas pronuntiaret, quæ veræ convulsiones sunt à cerebri vitio proximo, & quæ à sola, & interrupta irritatione fibrarum nervearum in partes desinentium oriuntur. Porro in veris convulsionibus, proxime cerebrum, & princi-

pium nervorum afficitur, à vitiato illorum liquore in acidum pariter degenerato, unde & hæc, & graviora mala proficisci facile est. Sive ergo illæ oriantur ab acido liquore, nervorum principium afficiente, five ab humoribus, circa præcordia restagnantibus, & partes sensu præditas vellicantibus, semper malum, designata nimirum malitia, tum à pravis humoribus, tum à partibus affectis. Quod si somnus, majori ex parte, vel suavis, vel molestus provenit, ex bene vel male affecto ventriculo & vicinis visceribus, ut Helmontio non sine ratione visum est, plane, cum in his partibus pravi succi hærent, fieri nequit, quin turbulenti somni fiant, & pavoribus interrupti.

Dices: Hippocrates 2. Aph. 1. dixit, quibus somnus laborem facit lethale, Ergo convulsio magis erit lethalis, Ergo non tantum malum. *R.* cum Cardano, ibi Hippocratem loqui de morbi declinatione vel statu: hic vero de principio, quo tempore tam lethalis non est convulsio quam in principio morbi.

Aphorismus LXVIII.

In febris spiritus offendens, malus est; convulsionem enim significat.

Contentum seu Intentio.

De Dyspnoea febrili.

Connexio: Manifesta est hujus Aph. connexio, cum præcedentibus Aphorismis, siquidem de convulsione & spirandi difficultate loquitur sicut in præcedentibus, ad prognosim in febris faciendam. Hic Aph. duas habet partes. I. docet spiritum offendentem esse malum. II. causam affert, quod convulsio, offendentem spiritum sequatur.

Hic autem spiritus offendens, five spiritus in faucibus elisus, (ut verit Cellus) idem significat, ac respiratio subsistens & interrupta, quemadmodum ex eodem Hippocrate deducitur 2. *Epid. Sect. 3.* & 6. *Epidem. Sect. 2* & quidem, tum in inspiratione, tum in expiratione, ut adnotat Galenus in *Comment.* Id autem passim accidit pueris ejulantibus, & suspiriosis, plerumque ex angustia spiritalium organorum.

Hanc autem interruptam respirationem, in febricitantibus, instantem convulsionem arguere, monet hic Hippocrates, veluti quæ fiat à languente vi musculorum thoracem & diaphragma attollentium, ac
de-

deprimentium pro respiratione; illi vero, cum motus suos peragant, ope nervorum, quodocunq; deficiant, hos quoq; fatiscere designant: & quidem in febribus à vitiatò & exsoluto liquore, qui non tantum illos, haud quaquam convenienter irrigat, & confirmat, sed potius inficit, & perturbat: Unde etiam non raro anxietas, angor & cordis tremor, cum pulsu inæquali: Semper autem ac sanguinis vitio ex febribus indicato, per indebitam ejusdem ab extraneo humore fermentationem, accedit quoq; liquoris nervei malitia, procul dubio non solum dubius eventus, sed omnino perniciosus, pertimescendus est; quandoquidem partes cunctæ corporis, ab his proximius robur adipiscuntur, & suas exerunt operationes; quin imò cor & vita ipsa sustinetur. Quamobrem ipsis à consueta, & naturali constitutione permutatis, & depravatis, necesse est reliqua omnia, non dissimiliter titubare.

Dices I. In pleuritide est febris continua, & spiritus offendens, illa tamen curatur, Ergo spiritus offendens, non est tam malus. *R.* Non est in pleuritide, spiritus ille offendens perpetuus, sed tantum interpolatus, quando nempe homo tussit; in aliis autem est perpetuus.

Instabis: In febre catharrali, est difficilis respiratio, quæ tamen mala non est, quia cessante catharro cessat. *R.* Nego, quod respiratio difficilis non sit mala in febribus catharralibus, nisi enim præcaveatur, suffocationem minatur.

Urgebis: Si spiritus offendens significaret convulsionem in febribus, Ergo omnes ii convellerentur, qui febre lenta symptomatice à scirrò hepatis, vel lienis laborant, quia hi difficulter respirant, ob compressionem. *R.* Hippocratem hic loqui de febribus acutis & essentialibus, non de longis & symptomaticis. imò & in his sæpe tandem suffocantur.

Aphorismus LXIX.

Quibus non sine febre, urinae sunt crassæ, grumosæ & paucae, si ab his tenues & copiosæ mejantur, prosunt. Maxime vero tales redduntur, quibus statim ab initio, vel non ita multo post, sedimentum inest.

Contentum seu Intentio.

De Prognosi Urinae Crassæ.

Connexio: Cum in antecedentibus Hippocrates, multa declarasset in febribus & februm symptomatibus, ad prognosin facientia, à variis signis desumpta: In hoc præsentè Aphorismo ad urinas transit, & ex illis sumit multa, scitu digna, & ad artem valde utilia ac necessaria, quam doctrinam de urinis continuat, usq; ad finem hujus Libri. • Hic Aph. in duas partes dividitur: In *Prima* dicit quod in febribus ex urinis paucis, grumosis, & crassis, si tenues & copiosæ mingantur, prosit: In *II.* proponit, in quibus casibus & quando talis mutatio sperari debeat.

Urinas ergo in hoc præsentè Aphorismo, & in omnibus subsequen-
tibus usq; ad finem, considerat Hippocrates, cum excretorum in illis
varietate, ut exinde, quo ad fieri potest, conjiciamus, quanam in fe-
bricitantibus meliores aut peiores dici queant, cum febrilium ferment-
torum mutationem consequuntur; quippe non semper è liquoribus,
cum sanguine commixtis procedunt, neq; perpetuo serum istud refe-
runt, quod cum sanguine circumfluit, atq; ejusdem vasa, & cunctas par-
tes corporis pervadit, sed sæpe numero à cibo, & potu prius assumpto,
à succo lacteo, & ductibus chyloferis, à glandulis mesenterii, & vasis
lymphaticis, atq; à visceribus hypochondriorum, per compendiosio-
res vias, recta in renes & vesicam fertur; unde dubias profecto & infi-
deles notas ex illa elicere cogimur, idq; potissimum in iis, qui peculiari
quadam constitutione, varias perpetim, & differentes urinas profe-
runt, & quandoq; à consueto hominum alienas. Cum ergo à sanguinis
fero, prodeunt urinæ, atque à fermentis partium vitiatas secernuntur,
observandas verisimile est hic Hippoc. voluisse, præsertim in febribus.
quandoquidem in his, per indebitam sanguinis fermentationem, ple-
rumque solent, cum serosis ejusdem portionibus, aliæ impuritates per
vias urinarias repurgari, ideoque quæ penitus latent, quodammodo
denuntiare.

Quibus itaque non sine febre, inquit, urinæ sunt crassæ & grumosæ,
sed paucæ; si contingat tenues deinde fieri, & copiosius profluere pro-
derit. Pro crassis & grumosis intelligit, quæ commixtam, & compa-
ctam simul referunt serosam substantiam, cum recementis à sanguine
semotis, ut grumos quodammodo, plurium corporum una collecto-
rum exhibeant; vel ut communiter dicitur, substantiæ simul aquosæ, &
hypostasis concretæ: hæc enim cum debeat, ut salutaris sit, in urinis in-
natare, si forte sit sparsim concreta, & cum illis commixta, ex nondum
peracta secretionem & concoctionem, urinam procul dubio reddet cras-
sam,

sam, & grumofam, quam idem Autor *Lib. 1. de morbis* à pituita progeneritam existimat. Oriri autem ejusmodi crassitiem grumofam hoc loco memoratam, à concretione, & mixtione summa hypostasis cum sero urinario deduci potest, ex appendice ejusdem Aphorismi, ubi adjicitur: *Tales equidem prodire, quibus ab initio, aut non multo post sedimentum in urinis adfuit, cum scilicet primum urinæ visæ sunt, cum suo sedimine innatante, mox vero ita cum illo commixtæ & concretæ, ut grumum referant: at postmodum per fermentationem febrilem, dissolutæ, ac secretæ, & tenues redditæ, crassitiem in copiam commutant, & conferunt; tum quia compingentia salia, cum sero commixta, diluta egerunt; tum quia coctionem & secretionem fermenti febrilis jam peractam indicant.* Tenues autem urinæ hic memoratæ, non simpliciter aqueæ & pellucidæ intelligendæ sunt, sed ut à crassis & grumosis contra distinctæ; sicut enim nimium crassæ & in grumos compactæ, malæ hic referuntur, ob coctionem & secretionem deficientem; ita ex adverso bonæ æstimandæ sunt, quæ tenues deinde fiunt ac dissolutæ, id est, non amplius grumosæ, & habent sedimentum omnino secretum, dissolutum & innatans. Hinc recte Actuarius *Lib. 1. de iudiciis urinarum Cap. 11.* scripsit: *Nonnunquam in morborum fine, copiam profluere urinæ albioris, & tenuioris, atque mediocrem continentis subsidentiam, præsertim, cum præcesserit urina crassior & grumosior.*

Judicium autem ab eodem Hippocrate prolatum, *Lib. de iudicat.* huic plane nullatenus contradicit: Ibi enim inconstantes omnino urinas, in febribus vituperat, ac de crassis in tenues, iterumq; de tenuibus in crassas vicissim permutatur. Inquit enim: *In febribus simulationes habeat urina, diuturnitatem temporis significat, & necesse est agrotum mutari, & ad deteriora & ad alteram partem. Et si urinæ ab initio, non sibi similes fuerint sed ex tenuibus crassæ fiant, iterumq; penitus tenues, tales agre judicant, ac inconstantes sunt.* In hoc autem Aphorismo non solum constantes, sed & crassas, immoderate tenues, permutatas recenset, easque solito affluentiores.

Dices: Urinæ crassæ per concoctionem magis incrassantur: Ergo non attenuantur ut vult Aphorismus. &. Distinguendo, urinæ crassæ jam coctæ magis incrassantur per concoctionem, transeat: crudæ, nego.

Aphorismus LXX.

Quibus per febres, urina turbata, quales jumentorum, iis dolor capitis vel adest, vel aderit.

Contentum seu Intentio.

De Prognosi Urina turbata.

Connexio: Continuat Hippocrates sermonem de urinis, etiam in hoc Aphor. Unde cum hic Aphor. brevis sit, non patitur divisionem.

Cum recrementa sanguinis, aliiq; humores, per renum tubulos repurgati, & cum sero urinario commixti, sua quippe non petunt loca, sed sursum & deorsum tumultuarie feruntur, urinas reddunt confusas & perturbatas, has ergo considerat in hoc Aph. Hippocrates, utq; eas à turbidis, sed mox postea subsidentibus distinguat, adjicit *quales jumentorum*, siquidem in his, non tantum paulo post, quam fuerint excreta, sed deinceps adhuc, & perpetuo turbulentiam, & confusionem servant; sed neq; à frigore ambientis aeris concreverint, neq; diu seposita, in corruptionem abierint, aut renum & vesicæ morbos consequantur; quamobrem non immerito advertit, & eas in febricitantibus hic notari, & quæ non semel turbatae comparent, sed quæ turbatae sunt & minguntur atque tales perseverant, prout *jumentorum* sunt; jumenta enim, in statu naturali, urinas omnino perturbatas & crassas mingunt: de quibus Poëta:

Urinas Asini Medico, transmiserat æger:

Doctum decipiens, hac ratione virum.

Te miserum Doctorem, exclamat callidus æger,

Qui nescis, quid sit bestia, quid sit homo.

Error, ait Medicus, non est, mihi credito, magnus:

Nam latet in te asinus: quippe asininus homo es.

Equidem in febribus duntaxat fieri potest (quidquid in contrarium opinetur Cardanus) ut urinae omnino perturbatae sint & perseverent quales jumentorum, quandoquidem in aliis morbis, citra febrem, quod turbulentum in iis excernitur, mox subsistit, vel evolat, quemadmodum in renum affectionibus, catharris & aliis, sicut etiam ab esu ciborum, diuresim promoventium. Oportet autem urinas ejusmodi turbatas, ab intimiori causa, serum urinarium, confundente, exagitari, quæ profecto in sanguine, & cæteris liquoribus hærebit, ut talem in ipsis fer-

fermentationem excitet, & tumultuariam commotionem pariat, quæ sanguinis serum, recrementa partium, & salia fermentorum turbet & implicet; veluti sæpius expertum in febribus malignis & pestilentibus, à fermento sanguini immixto omnia depravante & confundente. Hinc brevi vita defuncti referuntur uxores Dromæadæ & Philini, Polyphantus & Evalcidæ famula ab Hippocrate 1. & 7. Epid. Nam (ut idem subdit) *urina densa & conturbata, certum signum sunt doloris capitis, convulsionis & mortis*; procul dubio à veneno dissipante & corrumpente. Sed & nequeunt deinceps contenta urinarum perturbata, adhuc à liquoribus corporis seposita subsidere, quia per internam fermentationem acorem nacta, ita simul compinguntur, & cum sero urinario commiscantur, ut ab invicem disjungi non possint, quemadmodum experimur in vino, quod per æstum dierum canicularium, aut à tonitru & ventis australibus impetuosioribus, in debita fermentatione effervesceat, confunditur & perturbatur, ut tandem in perturbationem desinat.

Hinc palam modo fit, qua de causa, dolor capitis exinde subsequatur aut immineat, quia ex ea acredine & virulentia in sanguine inducta, nerveæ partes capitis ab illius transitu & percolatione vehementer vellicantur & compunguntur. Neque vero hinc dolent solum, sed etiam non raro inflammantur, unde phrenitides, lethargi, convulsiones, ut memoratis ex Hippocrate ægris accidit, quamobrem sub nomine cephalalgia comprehendas crediderim, reliquas omnes capitis morbos dolori analogas & affines.

Quod si turbidæ ejusmodi urinæ, pedetentim progressu temporis subsideant, procul dubio meliores fient, atq; ab enarratis affectibus capitis præcavebunt: quippe portendent sensim quoq; internam sanguinis commotionem sedari, & fermentantes humores, ab utilibus secerari, ac repurgari. Unde idem Hippocrates 6 Epid. Sect. 6. commune facit, *urinas, multam subsidentiam habentes, à mentis motione liberare, quemadmodum in Dexippo.*

Non est igitur, ut tam facile credamus perseveranter turbidas excerni urinas à flatibus, ut plerique sunt arbitrati, adeoque illos excutere oportere, sed potius diaphoreticis sæpe memoratis, compagem fermenti febrilis dissolvere, alexi pharmacis ejus malitiam oppugnare, & evictam & secretam, per easdem vias urinarias expellere.

Dices 1. Jumenta absque capitis dolore, ejusmodi crassas urinas excernunt; Ergo idem hominibus fieri poterit. & Jumenta istas urinas excer-

excernere, eo quod crudo utantur victu, Ergo idem poterit fieri hominibus utentibus crudo alimento, extra febres, vel ob renum & vesicæ vitia, concedo: in febribus nego.

Inflabis: Ex sententia Argenterii extra febres non est calor, qui urinas confundat & fermentationem excitet, ergo in homine non dantur tales urinæ. R. Non est calor febrilis concedo; non est alius absolute, nego.

Aphorismus LXXI.

Quibus die septimo futura crisis est, iis urina rubram die quarto nubeculam habet, ceteraq; pro ratione.

Contentum seu Intentio.

De Eneoremate coctionis in urina Indice.

Connexio: Pergit adhuc in hoc Aph. Hippocrates, qualitates urinæ recensere, quæ nobis signa coctionis, secretionis & futuram crisin die septimo prænuntiant. Hic Aphorismus ob simplicem conclusionem non dividitur,

Alibi dixerat Hippocrates, septenorum, quartum esse indicem, nunc in hoc Aphorismo, sumpto exemplo à febribus, *quarum crisis incidit die septima*, inquit, *nubeculam rubeam in quarta precedere in urinis*. Verum hoc non ubiq; verum experimur, sed in quibusdam solum febrium generibus, quæ nimirum commotionem, & fermentationem in sanguine consequuntur, a vitio ejusdem interno, quales veteribus *Synocha* dicebantur, ex non bene repurgato ejusdem sanguinis sero, cujus causa in fervorem & indebitum motum adigitur, ut se ipsum ab illo extricet, potissimum quia ob remoram in vasis sanguineis contractam, nimia infectus acredine, cunctis visceribus molestiæ est. Sed neq; nubecula hæc, revera rubra est, sed vel pallida, vel flava, vel ad summum subrubra comparet, si crisis ad bonum futura sit: Quamobrem 2. *Prognost.* dixit: *Nubecula quæ feruntur in urinis, albæ quidem bonæ sunt, nigra vero malæ*: Unde recte Heurnius, non rubram, sed subrubram vertit. Meminit autem duntaxat crisis septimæ diei; nam in cæteris non plane constant ejuscemodi, indicum & judicum dierum proportionem, quippe sapissime crises præmonstratæ, in undecima, evenere postmodum non decima quarta, sed decima septima, vel vigesima ac ultra, pro ratione peccantium humorum, & viarum laxitate; imo pro diversitate morborum, causa-

causarum. & affectarū partium, ista non minimum variabunt substantia, colore, situ, tempore. Hinc apposite addidit *ceteraq; pro ratione*. potissimum si cetera concurrant ad bonam, & salutarem crism, eo die perficiendam, ut propterea significare voluerit, morbum salubriter judicandum die 7. præferre signa coctionis, ac secretionis in 4. reliquos ad alios dies differendos, non dissimiliter suis indiciis præmonstrari, eosque non unico evacuationis genere, sed pro ipsorum varietate, puta sudoribus, sputis, dejectionibus, atq; etiam uberioris urinæ profusione, prout natura in unam vel aliam partem inclinaverit. Cæterum quod idem Hipp. protulit, citato Lib. prognost. de urina subrubra, & sedimento simili, indicante morbum diuturniorem, licet salutarem intelligendum, cum tota urina, ejusq; serum, sanguineum ruborem refert, non vero cum in sero urinario convenienter colorato, nubecula solum subrubra innatat, ut hic, veluti inchoatæ coctionis indicium; aliud enim est urinas esse rubras, & aliud nubeculas esse rubras, cum palam constet, posse esse urinas rubras sine nubeculis.

Objectiones contra hunc Aphorismum, in contextu sunt relatæ & solutæ.

Aphorismus LXXII.

Quibus pellucida & alba sunt urina, mala: præcipue vero in phreneticis si appareant.

Contentum seu Intentio.

De Prognosi urinæ tenuis.

Connexio: Cum antea de crassis urinis sermonem habuisset: In hoc Aphorismo, de tenuibus verba facit: & sicut ex illis prognosticum sumpsit, ita & ex his.

Duas partes habet hic Aphorismus: quarum *prima* proponit, urinas albas & pellucas, malas esse absolute: *secunda* vero id de phrenitide affirmat.

Cum urinæ alba & perspicua seu aquosa, ut interpretatur Galen. multis ex causis excerni possint, & pluribus in morbis comparere soleant, potissimum vero renum, atq; vesicæ, atq; non raro indicent crism futuram, per alvum, aut per abscessum, præter eas, quæ in statu sano quibusdam accidunt, vel ex consuetudine, vel ex largiori potu aquarum, præsertim diuresim moventium, visum est ita hunc Aph. vertere, aliter ac Leonicens, qui malas ejusmodi urinas, indefinite videtur interpretari; comparere autem solere in delirantibus: Quasi vero exemplum duntaxat apparitionis illarum voluisset Hipp. hoc loco referre, cum tamē in phreneticis, maxime sint perniciosæ, quemadmodum & Celsus, hoc idem Hipp. documentum secutus exponit, L. 2. C. 4, inquit: *Diluta quoq; atq; alba urina vitiosa est. sed in phreneticis maxime.* Et Philoteus: *Sed in phreneticis magis male.* Quamobrem Fuchsius Aphor. hunc ita tradidit: *Quibus urina perspicua & alba sunt mala: maxime vero ubi in phreneticis appa-uerint.* Recte autem admonet phreneticos, non delirantes, hic Hipp. adnotasse: quippe phrenetici à delirantib; differunt, etenim non omnes delirantes, phrenetici sunt.

Urinæ itaque albæ, & pellucidæ, quamvis plerumq; à consuetō naturæ declinent, non tamen omnino malæ illico sunt existimandæ, quasi vero semper morbosam re ipsa, corporis constitutionem attestentur, cum non desint, qui à natura fere illas assiduo proferant, & bene valeant; quin imo plerōq; novi, qui se tunc morbosos exi-

stimarint, cum urinas bene coloratas egerent. Malæ ergo solum dicentur, quia non omnibus communes, & quodammodo à consuetis, remotiores. At vero si in phreneticis observentur, omnino malæ, atq; ex Gal. perniciosæ, quippe qui testetur, *se nullum vidisse phreneticum salvatum, in quo talis urina comparuisset*. Verum tamen non sunt hæ adeo cum phrenesi conjunctæ, ut illam perpetuo comitentur, aut consequantur, siquidem sæpissime etiam fit, ut in ea compareant nimium coloratæ, multoque sulphure saturæ; sed si fortasse cum illa socientur, omnino malæ sint, nisi vero semel tantum appareant: quippe tunc perniciosas penitus illas credere licebit, cum diu perduraverint, & quocunq; tempore, uniusmodi aquosæ prodierint. Hac enim ratione significant, partes sanguinis muriaticas, & sulphureas, acredine ingenti præditas, per febrilem fermentationem, cum sero urinario non repurgari, sed interius detineri; adeoque per cerebrum, ejusq; meninges, ac ductus cum sanguine remeantes, continenter illius plexus, & glandulas vellicare, unde etiam liquor nervorum, & universa hegemonicarum (id est principalium seu animalium) operationum œconomia coafficiatur, siquidem ros ille è sanguine, per cerebri corticem exudans, quo universa animalis regio irroratur & vivificatur; ex vitiata utriusq; diathesi, omnia perturbat, depravat, atq; adigit in furorem. Cum itaque eo deventum est, ut partes vitæ, & rationi destinatæ, perpetim laborent, à mutata, tum sanguinis, tum nervei liquoris constitutione, procul dubio brevi futurum est, ut æger concidat. Spes autem erit reconvalescenti, si ejusmodi sanguinis, & liquoris nervorum impuritates, per consueta emissaria depellantur, potissimum vero, per urinas, quæ primum flavescentes & crassæ, mox etiam copiosiores, & sequestratæ repurgentur: quod optime præstatur antimonio nitrato rite præparato, vel aliis bezoarticis. Sed & advertendum est, quod memorat Hippoc. 1. *Epid. const.* 3. accidisse Bioni apud Silenum decumbenti, Cratiæ apud Xenophanem, & Aretonis filiæ uxori Mnesistrati, ab urinis aquosis, multis, puris & tenuibus, post judicationem, eos scilicet bene fuisse judicatos per dysenteriam; quasi vero, istiusmodi urinæ post coctionem apparentes, crissim portentant, per alvum futuram. Possunt quoque hæmorrhagiam è naribus præsignare, præsertim in juvenibus, si postquam diu probæ visæ, repente attenuentur, & incrudescant, morbo ad declinationem perducto.

Quæres I. Qui nam color urinæ hominis, in statu naturali constituti, sit optimus. *R.* Juxta omnes prope *color citrinus*; & merito quidem, docet enim experientia, in rebus chymicis, quod omnes solutiones sulphuræ, præcipitatis particulis heterogeneis, menstruum citrinum relinquant: hinc Poëta:

Inter tincturas varias, color aureus, olle,

Optimus in lotiis, optimus in loculis,

Hic color in lotiis, purgando noxia deplet,

Hic color in loculis, accumulando replet.

Quæres II. Utrum ex inspectione urinæ possit agnosci, mulierem esse gravidam? *R.* Vulgus firmiter credit, Medicos ex matula, veluti ex speculo, mulierem gravidam posse agnoscere: hinc rusticus ille, fracto in via vitro, & effusa uxoris urina, ampullam urinæ asinæ, cui asinus infidebat, impleverat, & Medico obtulit: de quo Poëta:

Rusti-

Rusticus obtulerat lotium, mingentis asellæ

Num gravida est mulier, dic mihi, Doctor, ait.

Uxor, ait, Doctor, juvenem tua portat asellum,

Fætus hic (ipse scies) an tibi sit similis.

Æ. 2. Negative, & dico indicia ex matula, in hoc casu summe esse falsa & fallibilia. Si enim mensium suppressio, eo usque viscera, & sanguinem læserit, ut cachectica totius corporis constitutio inducatur, urinæ semper fiunt, tenuiores, minus tinctæ, copiosiores & crudiores: siue suppressio illa sit, naturalis, i. e. ex ingravidatione, siue præternaturalis, i. e. ex causa aliqua morbifica: adeoq; temerarius foret, qui ex hoc solo signo, de ingravidatione mulieris, minus fundatum ferret judicium. Non ergo in hoc casu, Autoribus empyricis, Arabes sequentibus, aut edentulis vetulis, consilia sæpe plus dæmonis aut saltem ignorantia sat crassæ imitantibus, tanquam contrariæ sententiæ Patronis & Matronis, subscribendum. Nam teste Aristotele: *multitudo errantium, non parit errori Patrocinium*. Sunt enim Autores empyrici, quasi ignes fatui, qui sequentes se, nescio in quæ præcipitia deducunt.

Dices: Vallesius dicit, urinam albam & pellucidam, minus esse periculosam, ergo Aph. non subsistit. Æ. Urina alba & perspicua, quæ ut diximus, ob interruptam materiam, talis excernitur, concedo, quæ diu retinetur, nego.

Instab's: Talis urina optime in crisi & cum salute ægri excernitur, Ergo nulla solutio. & Hipp. hic potius loqui de symptomaticis, quam criticis evacuationibus; si autem critica fuerint evacuationes, colligi ex eo poterit, quod id derepente, & quod die critico &c. fiat.

Aphorismus LXXIII.

Quibus sublata (seu suspensa) hypochondria murmurant, lumborum superveniente dolore, iis alvi humectantur, nisi flatus inferne erumpant, aut urina multitudo prodeat: atque hæc in febribus.

Contentum seu Intentio.

De Signis Criseos per alvum futura.

Connexio: Varia fecit hætenus prognostica ex urinis Hipp. In hoc Aph. continuat, signa futuri fluxus alvi, vel urinarum in febribus. Hic Aphor. tres habet partes: I. proponit hypochondriorum suspensorum murmura, & supervenientem lumborum dolorem. II. prognosticat exinde crisin, vel per alvum, vel per urinas (quamvis has evacuationes excipiat si post ventris borborigmos aut murmura, succedant flatus) III. determinat id vero in febribus, i. e. ut plurimum seu frequentius, non autem definite, quod similia extra febres etiam contingere possint.

De veritate hujus Aph. valde dubitat *Argenterius*, quippe qui non tam facile existimet, quomodo tria hæc genera evacuationum, accidere possint, in febribus ex hypochondriis inflatis & dolore lumborum. Verum si in memoriam revocentur, quæ alias hoc ipso Lib. præsertim Aph. 11. à nobis recensita, bene poterunt, quæ hic ab Hipp. referuntur, rationi, atq; experientia congruere. Inflantur siquidem, & tumet hypochondria à flatibus, seu halitibus elevatis, ab humoribus crassis simul, te-

nacibus, & acidis, qui non raro loca, utriusq; hypochondrii occupant, præsertim vero glandulas mesenterii, pancreatis & omenti, cumq; per febrem sensim attenuentur, & dissolvantur, per arterias pederentim in intestina feruntur, vel etiam per vasa lymphatica, aliosque ductus inconspicuos deducuntur in renes, adeoque vel alvi fluxu, vel urina copiosiori, critice evacuantur.

De his ergo sermonem facit hoc loco Hipp. & ait, quibus in febribus (hisque potissimum, quas Fernelius omnium primus recensuit, ex hypochondriis in farctis, oriundas, ideoq; ab Autore febres Fernelianas dictas) hypochondria tument, ac inflantur, ut suspensa, & elata fiant, si lumborum dolor superveniat, plane fieri, ut laxata alvus congestam succorum colluviem deponat, nisi aliunde in flatu exolvatur, aut per renes deducta urinam efficiat copiosiore. A tumidis porro, & inflatis hypochondriis conjiciemus crassorum, & consistentium succorum copiam, fermentatione febrili, & acida conditione, inflatus evaporantē, adeoque epigastrium utrinq; attollentem. A murmure, & lumborum dolore, conjectabimus humores ipsos jam attenuatos, & dissolutos, vergere per mesenterium, in intestina: Murmur etenim à motu eorundem peristaltico provenit; lumborum vero dolor, à pondere mesenterii, quod cum lumbis alligetur, juxta ac peritonæum, ubi flatulentis humoribus turgat, gravat simul illos, & extorquet. Quod vero hæc citra jecoris, lienis, aliorumq; adjacentium viscerum inflammationem evenire scripserit Hipp. colligere clare est, ex 2. prognost. ibi: *Præcordiorum dolores, ac tumores, si fuerint recentes, & non cum inflammatione, solvit murmur in præcordio obortum, & maxime quidem, si pertransierit cum stercore & urina, ac flatu; sin minus, etiam ipsum per se, si transierit, prodest.* Dixerat autem Lib. 1. ejusdem operis, tumores omnes in hypochondriis subortos, inter initia quidem, mortem brevi ad futuram significare; post dies 20. vero, febre non desinente, ad suppurationem converti. Ea autem, quæ in hoc Aph. memorantur, his profecto non consonant, cum & nos compertum habeamus, sæpius feliciter successisse, ex turgidis hypochondriis, febres enatas, alvo, quæ prius adstricta erat, laxata, aut copiosiori urina solutas. Verum ut id promptius, & felicius contingat, medicamentis insistendum, quæ amarore, acorem corrigant, & incidendi & attenuandi vi crassos humores ad exitum disponant.

Dices: Multis suspensa sunt in febribus hypochondria, cum murmure, quibus tamen nec succedit alvi fluxus, nec flatu nec urinæ, Ergo non subsistit Aph. R. Si flatu paulatim colligantur, concedo: si repente, nego, opus autem est, ut non fiat ista suspensio, per longam diathesim, vel per diuturnam accumulationem, scirrhum, aut inflammationem, sed derepente.

Aphorismus LXXIV.

Quibus spes est ad articulos, abscessum futurum, abscessu liberat urina multa, crassa, & alba reddita; qualis in febribus laboriosis (seu cum lassitudinis sensu) quarto die, quibusdam exire incipit: Quod si ex naribus etiam sanguis profluxerit, brevi admodum solutio fit.

Contentum seu Intentio.

De Revulsoriis articulorum præsidis.

Con-

Connexio: Tum ratione abscessus in febribus, cum Aph. 31. & 51. tum ratione urinæ, cum Aph. præcedente, tum etiam ratione hæmorrhagiæ cum Aph. 60 hujus Libri, connectitur præsens Aph. Duas habet partes hic Aph. *Prima* demonstrat, qua ratione potissimum futurus abscessus in febribus removeatur: *Secunda*, quibus præcipue evacuationibus, per urinam scilicet & hæmorrhagiam. In hoc ergo Aph. memoratur, unde sit, quod febris quæ desitura per abscessum visa est, & indicia ejusdem prætulerit, abscessu deinde non judicetur; idq; propterea fieri, à crassa & alba urina affluenter profusa. Equidem ubi humores in artus ferendi, vias urinarias petunt, forte tenuiores, & fluxiores redditi, procul dubio vindicabunt ab abscessu. Verum tamen oportet crassam simul albam & copiosam excerni urinam: Etenim hac ratione certi erimus, illos eosdem humores, qui febrim fovebant, & ad artus abscedere præmonstrabant, salubriter per renes, in vesicam fuisse translatos. Quia vero à lymphæ, plerumq; consistentiori ejusmodi fibres accidunt, unde Rheumatismi, cum lassitudinibus, & doloribus articulorum; proinde adjectum; *qualis in laboriosis febribus*, cujusmodi sunt, quæ cum sensu laboris, doloris, & lassitudinis, in toto corpore contingant; quippe vasa lymphatica plurima per articulos repunt, & non raro in eosdem exonerantur. In laboriosis autem febribus, cum Rheumatismo sociatis, sæpissime accidit, à quarta die, in succedentes, consimilis conditionis, urinam affluenter expurgari, exoluta nimirum per febrim lymphæ, atque simul cum sero sanguinis secreta, & deducta in renes, & vesicam, quemadmodum passim experimur in praxi. Atque hinc plane dictum puto, non tantum abundantem, sed etiam albam, & crassam urinam esse oportere, cujusmodi lymphæ est.

Quod præterea additur: *Quod si ex naribus etiam fluxerit sanguis, brevi admodum solutio fit*: indubium revocat Fuchsius, an simul cum urinæ profluvio, an vero seorsim proficere sit intelligendum. Et quamvis utrumq; rationi atq; experientiæ congruere visum sit, & alterutra evacuatione, febricitantes ab abscessibus evasisse, nihilominus si mentem Hipp. attendamus, verisimilius asserere cogemur, junctam utramque evacuationem esse comprehensam: Nam inquit, *si vero etiam ex naribus fluxerit sanguis*: vel ut alii vertunt, *quod si narium quoq; accedat profluvium, multo celerius liberantur*. Idq; clarius Cap. 6. Epid. Sect. 4. *Si vero ultra hoc, adhuc sanguis è naribus, large eruperit, valde. Etiam, seu prorsus levat*. Quæ verba utramq; omnino evacuationem referunt, simul junctam. Cæterum sanguis è naribus profluens maxime quoque his confert, excreto inde ejusdè sero, orgasmum in humoribus excitante: quo fortasse respiciens Hipp. junctam urinam & sanguinem profluentem, citius ægrotantē liberare inquit, ut è naribus tenuior, è renib; crassior humor simul educatur, hinc Poeta:

Qui me vexabat mucus velut aggere rupto,

Per nares, renes, qua data porta, fluit.

Quo fueram mucî fatuo splendore politus,

Nunc minus illustris, sed mage, mundus ero.

Cui enim commodo esset, narium hæmorrhagia, si sanguinis à lymphæ, & sero, repurgationi minime opitularetur? Illum autem egredi natura finit, ut simul acres & tenues serosas ejusdem partes depellat, nisi vero ex accidenti deserat, acredine sibi exitum sero parante,

At vero eam ex his evacuationibus promovere satagemus, quæ tutior sane est, per vias urinæ. Hac enim & crassior & tenuior humor commode potest educi; quin si tantum crassior expurgetur, is satis erit, ut ab abscessu tueatur cum tenuior facile possit adhuc insensibiliter diffilari. Conferentia propter in hanc rem, quæ attenuando, & incidendo diuresim movent, adjuncta his quoq; congrua victus ratione attenuante, ut naturam huic operi intentam adjuvemus, vel diutius cunctantē excitemus.

Dices: In laboriosis febribus, urinæ videntur tenues, ob motum & fermentationem præteritam, quæ humores attenuavit, ergo non erunt crassæ. & Erunt tenues ratione materiæ jam coctæ, concedo, ratione crudæ, cujus pars semper excernitur v. g. quarto die, nego.

Aphorismus LXXV.

Si quis sanguinem, aut pus mejat, renum aut vesicæ exulcerationem significat.

Contentum seu Intentio.

De Mictu cruento & purulento.

Connexio: Pergit Divus senex in hoc Aphor. particularem sermonem facere, de Urinis, & earum substantia, tanquam summe necessariis, ad diagnosim partium affectarum, per quas transeunt, nempe renum & vesicæ faciendam. Hic Aphor. autem propter summam brevitatem non dividitur.

Sive hic Aph. scribatur per particulam *aut* disjunctivam sive per & conjunctivam, magnam semper patitur difficultatem; quippe sanguis solus excretus per urinam, non semper indicat renum, aut vesicæ ulcerationem, cum multis aliis de causis egeri, & à plerisque aliis partibus prodire possit. Si vero simul cum pure excernatur, quamvis ulcerationis indicium certo sit, non proinde ex sanguine, sed ex pure certitudinem nanciscitur. Sed & præterea fieri potest, ut ab erosa renum arteria, aut vena, sanguis ad tempus solus prodeat, deinceps transiturus in pus, adeoq; inchoatæ ulcerationis symptoma sit, sejunctim à pure: Ita Celsus *Lib. 2. C. 7. Gal. 6. de Loc. affect. 3. Hipp. Lib. de natura humana; quibus cruenta urinae sunt, his vena laborant.*

Præstaret itaque pro utraq; particula, *deinde vel, mox* substituere, ut sensus fiat: *Si quis sanguinem, deinde vel mox pus mingat &c.* Sic enim Aph. veritati perpetuo consonabit. At vero nec semel, nec ad breve duntaxat tempus, sanguinis & puris mictio, renum aut vesicæ ulcerationem designabit, nam sæpius expertum ex disrupto apostemate partium superiorum, & à renibus remotissimarum, pus cum urina prodiiisse, imo etiam ex pulmonis vomica, atque ex empyemate per easdem vias repurgato: *Gal. 6. de Loc. affect. 4.* Quamobrem necesse est, ut diutius mictio ista perduret, & continenter purulentus sanguis, cum urina egeratur, ut à renibus, vel vesicæ manans, dici queat, *Gal. in Comm.* Atqui etiam præter ejusmodi egestionis diuturnitatem, à renibus aut vesicæ ulceratis, pus prodire conjiciemus, si in urinis subsideat, vix ac ne vix quidem cum illis commixtum: quoties enim cum iisdem omnino commiscetur, & confunditur, ex altiori profecto loco descendere credendum, ut multis ostendit *Gal. Lib. 6. de Loc. affect. C. 4.* Contra vero si sejunctim ab urina pus egeratur, procul dubio è meatu urinario, aut ex glandulis parastatis, gallica contagione infectis, sponte sua defluet,

defluet, ut in virulentis gonorrhæis passim experimur. Hinc tum solum purulenta mictio, renes aut vesicam indicabit, exulceratos, cum continua fuerit, cum nunquam ab urinis sejuncta, cum subfederit, & cum sanguinis exitum consequetur. Denique prognosim mictus sanguinis, ac puris retulit Hipp. Lib. 2. *prædict.* inquit: *Sanguinem mingere, raro quidem, & sine febre, ac dolore, nihil male significat, sed lassitudinum solutio fit. Si vero sæpius mingat, & aliquid ex his accesserit, malum est. Verum predicere oportet, siue cum dolore mingatur, siue cum febre, fore ut insuper pus mingat, atq; ita dolores ac afflictiones quiescant.* Verum conferet in his plurimum partem affectam internosse, & num pus, ex aliis partibus procedens, in transitu per renes, ureteres, & vesicam, sua acrimonia aut virulenta conditione, illas exulceret, atque adeo diversarum partium affectarum complexu, nequeat tam bene distingui, unde pus prodeat cum ex pluribus confusim emanet. Non multis ab hinc mensibus, curandus ad me venit, qui ex mictu sanguinis, in urinam purulentam inciderat, cum antea gallica gonorrhæa detineretur, adeoq; & ex meatu urinario, & ex renibus pus effunderet, nimirum quandoq; simul cum urina, & aliquando seorsim. Mirum autem, quam in his proficiat usus pastillorum ex cinnabari, itemq; cerussæ stibii Angeli Sale, cum gummi therebinthi, balsamo ligni guajaci & Peruviano, extracto hyperici & camphora,

Objectiones in hoc Aph. occurrentes, jam in contextu sunt solutæ.

Aphorismus LXXVI.

Quibus cum urina crassa, exigua caruncula, aut veluti pili, una exeunt, hi à renibus excernuntur.

Contentum seu Intentio.

De Contentis urinae carunculaformibus & pilaribus.

Connexio: Quemadmodum præcedens Aphor. erat de excretis, ita & præsens: Uterq; autem & hic & ille, unum fere videntur habere scopum, nempe ut renum vitia ab excretis, vel urinarum contentis demonstret. Hic Aphorismus sicut præcedens ob brevitatem non dividitur.

Quod hic disjunctim scribitur de carunculis parvis, aut veluti capillis, cum urina crassa excretis, Celsus Lib. 2. Cap. 7. Junctim vertit, inquit: *Si urina crassa, carunculas quasdam exiguas, quasi capillos habet, nunq; in renibus vitium est: Sed & idem Hipp. Lib. de Natura humana prope finem, unde hic Aph. videtur esse desumptus, in hanc eandem sententiam, concedit, dum inquit: Quibuscunq; in urina, crassa existente, caruncula parva capilliformes simul prodeunt, eas à renibus prodire, nosse oportet, & ab arthriticis: Hinc Martianus pluribus contendit legendum esse hunc Aphor. absque particula aut, imo eo modo, quo scriptus invenitur. Citat. Lib. de Natura humana.*

Sed quamvis ita verisimiliter liceat, ex mente Hippoc. opinari, non tamen falsa erit, ut hic traditur, ejusdem sententia: quin imo Galen. in *Comment.* omnino existimat, alterum de carunculis, alterum de capillis sermonem hic factum; nam nullo modo, inquit, carunculas parvas assimilari posse capillis, ut propterea cum dictione *aut* Aph. legendum velit. Expertum enim aliquando est, ab erosis & ulceratis renibus, carunculas seu frustilla carniū durissima, cum urina prodiiisse. Et quamvis à sphinctere vesicæ musculo, similes substantiæ excerni possint, cum tamen dolor, febris, & alia affecti renis indicia concurrunt, non est cur vesicæ musculus, erosum existimeamus, qui nec alias tam duræ substantiæ est, nec, si semel ulceretur, urinæ exitum poterit impedire, aut aliquantulum remorari, vel saltem sine ingenti dolore esse.

Mictum

Midium autem pilorum, aut capillorum græce *trichiasin*, quamvis rarum, nonnulli conspexere, eosq; referunt, non tantum molles, & flexiles, sed duros, & rigidos interdum etiam fuisse, ut fetas porcinas æmularentur. Unde vero illi procedant, non satis bene à veteribus est explicatum. Galenus enim in hoc *Comment.* illos gigni ait, ex humore crassiori, in renibus quodammodo usto, ideoque quendam memorat, talia corpora, tam longa minxisse, ut incredibilis longitudinis viderentur, qui tamen toto fere anno, in usu cibario habuerat legumina, & fabas fractas, & sæpissime caseum tenerum ac siccum. At vero *Lib. 6. de Loc. affect. cap. 3.* eosdem in venis generari probabilius putat, Verum cum ea, quæ ad renes feruntur, non per venas, sed per arterias, lege circulationis, deducantur, propterea verisimilius videtur, in ipsismet renibus, crassos istos & consistentes succos, in capillamenta commutari; formam autem, & longitudinem, capillorum instar, sortiri, non quidem in renum pelvi, sed in eorundem tubulis, & fibrillis urinariis, per quas serum transcolatur, quippe alveoli isti quam apte, præ nimia exilitate, congruunt producendis ejusmodi filamentis, cum nimirum per ipsos protruduntur viscosi, & concrecentes succi, fortasse ab acido indurati. Horum capillorum cum urina emanantium, curiosam causam dat Poëta:

Cur reliqua hirsutas habeant animantia pelles,

Soli homini cur sit, dic mihi nuda cutis.

Quid si hominem crines, quis diceret intus habere?

Mingit enim crines, cosmice, solus homo.

Quoniam vero in renum alveolis contingit viscosos istiusmodi succos, inspissari, & formam, & figuram capillorum inducere, merito proinde Hippocrates, in hoc *Aph.* dixit, illos à renibus excerni: nullibi enim, quam in eorum tubulis, exilibus, talem, ac tantam spissitudinem, & longitudinem capillarem possint adipisci, præsertim quia ibidem consimiles succos, cum in pelvim extillaverint, lapideam conditionem sortiri passim experimur. Plerumque autem viscosi isti succi, à tenaciori lymphâ, vel à portione sanguinis glutinosa progignuntur, cum utraq; extra suos ductus effusa, facillime concreescere soleat. Atque hinc idem Hippocrates *Citat. Lib. de Natura humana*, non tantum à renibus, sed ab arthriticis capilliformes carunculas prodire fassus est; quandoquidem arthritici, à lymphâ vitata afficiuntur, & circa artus, plurima vasa lymphatica, pereptare ex Anatome observantur.

Neque vero temere adjectum credere est, ista cum urina crassa excerni oportere, etenim si cum tenui egererentur, verendum valde foret, ne ab aliis partibus, quam à renibus prodirent, nam cum tenues, & percolatæ minguntur urinæ, tubuli illi, & fibrillæ urinariæ, obstructæ sunt, adeoque transitum, carunculis & capillamentis non concedunt. Crassæ igitur esse debent, ut patentes renum tubulos designent, & nullum in venis, ac arteriis vitium consequantur, cum absque febre ista, plerumque prodeant, adeoque urina inculcata existente, quemadmodum in statu naturali excerni consueverat, moderate crassa. Conferet ea propter in id mirifice, præter alia usus chalybis, quo acredo feri urinarii in renum erosione, & concrecentium acidorum succorum malitia, in capillamentis retundatur.

Dices: Aduratur quantumcunq; sanguis, non tamen fient carunculæ, Ergo male dicitur à Galeno. & Hipp. non dicere, esse vere carunculas, sed veluti carunculas.

Aphorismus LXXVII.

Quibus cum urina crassa furfurea quadam simul minguntur, his vesica scabie laborat.

Contentum seu Intentio.

De Urina furfuracea.

Connexio: Cum in præcedenti Aph. Hippoc. docuisset, per excreta cognoscere renum affectiones: In hoc præsentē Aph. per eadem excreta, morbum vesicæ ostendit; nempe scabiem vesicæ ex crassa & furfuracea urina. Hic Aph. ob simplicem conclusionem, ejusque brevitatem non dividitur.

Ne vero hæc quoque excretorum in urinis vitia, ad sanguinem, & vasa sanguifera referrentur, cum urina crassa, non tenui, nec aquosa, excernenda inquit. Si enim cum hac efferrentur, degenerati sanguinis, & succialibilis, ex ardenti & prava febre, indicia forent, ut etiam admonet in *Comment.* Galenus. Si ergo Aph. hunc Hippoc. voluit intelligendum, ut ubi absque febre, reliqua omnia bene se habeant, si urina moderate crassa furfurea proferat, vesicam scabie laborantem denuntiet. Accidit autem vesicæ scabies, pari modo, ac externæ cuti pruritus, ab acredine illius liquoris, qui in nutrimentum ejusdem cedere deberet, atque ex mixtura salium cum urina densatur in furfures, & ima petens furfureum sedimentum exhibet, eo quod referat exteriorē tritici corticem, non bene molitum.

Ejus autem meminit speciatim Hipp. 5. *Epid. in Historia filii Theophorbi*, qui id potissimum ex vesicæ scabie patiebatur, ut dum mingere inciperet, ac desineret, pudendum confricaret ex pruritu nimirum ingenti, ejus partis, ad vesicam pertinentis.

Solet etiam sæpissime scabies ista in ulcuscula commigrare & saniem proferre, ut dicetur Aph. 81. *hujus Libri*, ut propterea quibusdam occasio fuerit, utramque vesicæ affectionem confundere, non quod revera eadem sit, sed quod altera in alteram facillime commutetur, præsertim cum ea, quæ urinis commiscetur, acria & erodentia sunt, ut mox infra.

Dices: Furfuracea in febribus ardentibus sæpe minguntur, & tamen vesica scabie non laborat, Ergo non semper verificatur Aphorismus. & Hipp. hic loqui de scabie vesicæ sine febre, non cum febre ardente, ibi enim est colliquationis signum.

Aphorismus LXXVIII.

Qui sponte sanguinem mingunt, iis à renibus venulam ruptam esse significatur.

Contentum seu Intentio.

De Mictu cruento.

Connexio: In præcedenti Aph. egit Hippocrates de mictione furfuraceorum; in hoc præsentī Aphorismo, agit de mictu sanguinis. Hic Aph. ob brevitatem divisionem non requirit,

Notandum: Pro eo, quod Leonicens legiti *sponte* visum est aliis *repente* substituere, quasi vero satis non sit sanguinem è renibus absq; ulla causa manifesta prodire, nisi etiam *repente* egeat. At Hipp. usus est *απὸ ταυτομάτης*, quæ dictio utrumq; significat. Et quidem nullam causam evidentem, ex iis præcessisse necesse est, quæ valeant venas adaperire, & dilacerare; sed & opus præterea est, ut repente mictus sanguinis suboriat, ne fortasse sensim erumpens & guttatim, à vesica erosa emanare credatur, quæ cum non multo sanguine scateat, profecto multum sanguinis effundere non potest. Ab ejusdem vero musculo janitore seu sphinctere dicto, si fortasse ulceretur, manabit quidem sanguis, sed ab urina sejunctus, ut propterea fieri non possit, quin repente, & sine causa manifesta, syncerus prodiens sanguis cum urina, à renum venulis adaperitis, vel erosis non proficiatur. An vero à venis proprie, an potius, ab arteriis is prodeat, jure merito dubitari potest: Etenim post detectam sanguinis circulationem, cunctis notum est, sanguinem in partes per arterias ire, redire vero per venas, quæ cum suis intersepiantur valvulis, nihil profecto poterunt effundere, quod semel in suis conceptaculis fuerit exceptum. Verum cum nomine *venarum* tam venas proprie dictas, quam arterias consueverit Hipp. indiscriminatim sumere, non erit hic, ut diutius mentem ejusdem exagitemus, dummodo constet de parte, quam ille potissimum hic considerandam voluit, affectam, cui sit remediis succurrendum.

At à quibus causis sanguifera renum vasa, interius dirumpantur, tacuit Hippocr. quippe illæ innumeræ esse possunt. Attamen hic commodè ad tres generaliores revocabimus: ad ea scilicet quæ ipsius sanguinis sunt; ad vasa illum continentia; & ad ea, quæ renes transeunt, vel è renum tubulis transcolantur.

Quæ in sanguine sunt, & cum eo continuo commiscuntur, serum, lympa, chylus, si acridinem, aut muriaticam conditionem, præsertim a visceribus hypochondriorum nanciscantur, plane poterunt exilia renum vasa, ut ejusdem generis alia, cum illuc appulerint, erodere, aut relaxare, unde is sponte deinde exeat. Sic aliquos novimus, diutius sanguinis mixtu, ab ejusmodi causa, detentos, qui à corrigentibus è medicamento postmodum convaluerunt. *Vasa ipsa sanguifera* per renum substantiam perreptantia, si fortasse propter exilitatem, naturalem quodammodo constitutionem sortiantur, debilem, laxam, tenuem, vel etiam procedente tempore flaccescant, & extenuentur, facile poterunt habenas quoq; dare sanguini præterfluenti.

Quæ denique per renes, renumq; tubulos transeunt, serum urinarium & cum eo, diversi generis humores, salia, & multa è superioribus visceribus, in eas partes deposita recrementa, pus, sanies, ichor, viscosi, acidi, & concrecentes succi, unde postmodum arenulæ, calculi, sabulum, & id genus alia, quam facillime poterunt erodendo, lacerando, distendendo, gravando, aut aliter afficiendo, sanguinis exitum repente provocare. Sed & quædam casu deglutita, dura, aspera, acuta, angulosa, cum renum alveolos subirent, mictum sanguinis, non raro excitarunt; ut sileamus nunc ea, quæ naturam veneni referunt, & id ipsum afferre solent, ut de cantharidibus memoratur, vesicæ speciatim infensis, cum ex his sanguis, nec sponte, nec citra causam manifestam egeratur. Quod vero de mutilatis fertur, per certa intervalla consuetis sanguinem

guinem mingere, vel per alios ductus evacuare, nihil penitus evincit, quin etiam sanguis cum urina prodiens, venulam aut arteriolam, ab impetu sanguinis diruptam significet.

Ad sistendum autem ejusmodi sanguinis mictum, varie procedendum erit, pro causarum illum excitantium varietate, de quibus plane, præter ea, quæ hic breviter sunt memorata, fuse agitur in praxi: Verum tamen specialiora hic in usum ducenda erunt, quæ glutinandis valis, & sanguini corrigendo, videntur magis accommodata, cujusmodi præsertim sunt, ex vitriolo & marte parata.

Objectiones quæ moveri possent, in contextu jam sunt solutæ.

Aphorismus LXXIX.

Quibus in urina subsident sabulosa seu arenosa, iis vesica calculo laborat.

Contentum seu Intentio.

De Arenulis, calculi signis.

Connexio: Cum de his quæ minguntur, jam sæpius sermonem fecisset Hippocrates: In hoc præsentis Aphorismo, eundem sermonem proseguitur & assumit arenulas seu sabulosa corpuscula, quæ per urinas excerni non raro solent. Hic Aphorismus, utpote brevissimus, non sustinet divisionem.

Cunctis expositoribus, magnarum semper exitit difficultatum, hic præsens Aph. quippe qui adversantem habeat experientiam, qua plurimos constitit, toto fere vitæ spatio arenulas minxisse, citra ullam calculi vesicæ suspensionem.

Hinc autem factum, ut nonnulli interpretes, vesicæ vitio renes quoque adjunxerint, quasi vero Hipp. brevitatis gratia illos omiserit, qui tamen, cum vesica compatientes, forent hic omnino cumulandi, ut vel hæc, vel illi, ex arenoso sedimento laborare intelligerentur. Sed nec defuere, qui in alia divagati, ne verbum quidem moverint, de sensu istius Aphorismi, exterriti fortasse, quomodo possent illum in rationabilem sententiam accommodare. Eum alii Hippocratis nomine indignum existimaverunt, adeoque expungendum à serie reliquorum Aphorismorum.

At melius musa, sagaci plane solertia, invertendum illum voluit, ut potius ex vesicæ calculo arenosa in urinis subsistere deducerentur. Sed tamen nec mutata sententiæ phrasi, nec ordine verborum inverso, adhuc in commodum sensum illum revocabimus, si urina arenosa contineat, crassa, mucosa, neque semel, sed assiduo ejecta, & quocunque diei tempore. Equidem comparent sæpe numero arenulæ, in quorundam urinis, citra calculi suspensionem, sed illæ subsident omnino, ab his cæteroqui bene coloratis separata, atque matutino solum tempore excretæ, vel certis solummodo diebus, at vero quæ ex calculo vesicæ proveniunt, perpetuæ sunt, imo cum multo & crasso sabulo commixtæ, & quacunque fere mictione, urina interim lixivium æmulante. Atque hinc Hippocrates, in urinis dixit arenosa seu potius sabulosa, non vero simplici-

pliciter arenulæ *subsistunt*, id est crassæ, & compactæ resident, ut scilicet prædictas conditiones, breviter simul complecteretur.

Est præterea quod adjiciam, noluisse Hippoc. ad præsens tempus tantummodo, hanc sententiam aphoristicam coarctare, sed eam extendere quoque putavit ad futurum, ut sensus esset, eos, quibus urinæ, cum arenoso sedimento contingunt, vel jam tunc laborare, vel imposterum vesicæ calculo laboraruros; etenim ejusmodi sabula, in urinis indicio sunt, multam crassorum & mucosorum excrementorum, in vesicæ cavo congeriem coadunari, ut exinde calculus jam sit compactus, vel facile deinceps sit compingendus. Porro alias est à nobis demonstratum, lapides ex hisce recrementis viscosis simul & salino acidis exoriri, atque pluribus veluti lamellis paulatim incrustari & increescere. At vero ex hoc edocemur, non solum quid nobis sit conjiciendum, ex ejusmodi arenoso sedimento, sed quibus præfidiis, occurrere possimus calculo imminenti, potissimum de eorum genere, quæ tantam sabarram corrigere & educere, alioque avertere valeant, meliori victus ratione servata, ut alibi fusius est à nobis memoratum.

Objectiones quæ hic moveri solent in contextu sunt explanatæ.

Aphorismus LXXX.

Si quis sanguinem, aut grumos mejat, aut urinam guttatim emittat, & dolor ad imum ventrem, ac interfamineum incidat, ea quæ circa vesicam sunt laborant.

Nota: Cum hoc Aph. corresponderet Aph. 39. Lib. 7. qui ejusdem prorsus est sensus.

Contentum seu Intentio.

De Signis affectæ v. sicæ.

Connexio: Cum de vesicæ calculo in antecedenti Aph. egisset; in hoc Aph. de aliis vesicæ & partium vicinarum affectibus agit. Hic Aphorismus, ob simplicem conclusionem, non eget divisione.

Laborantis ergo vesicæ, & partium adjacentium indicia specialius tradit in hoc Aph. Hippocrates, desumpta ex situ, ex excretis præter naturam, operationibus læsis, ac dolore, ut propterea illa junctim, non separatim sint sumenda, si non eodem simul temporis momento, saltem eadem morbi duratione, cum fieri possit, ut ex his modo unum, modo aliud magis in singulos dies vigeat; sunt autem grumi, quoties sanguis è suis vasis exiliens, in vesicæ cavo colligitur, ibique non tantum propter glutinosam substantiam, sed etiam à sale urinario in ejusmodi affectibus acidiori reddito, facile concrefcit, & coagulatur. Eadem de causa, urinæ stillicidium accidit & dolor, potissimum ex acredine ingenti, ejusdem musculum janitorem, & vesicæ collium vellicante; cumque hæc ad pubem sita sit, & fundo interfamineum occupet, seu perinaum, spatium scilicet illud, quod anum & scrotum interjacet, idcirco utrumque locum, dolor infestat, imo ab his, qui vesicæ calculo laborant, gravior semper noxa perci-

percipitur in perinæo, ut nec equitare, nec sedere, citra gravem ejus partis dolorem, valeant. Ab his ergo inquit, ad vesicam esse laborem: Sive autem is revera lapis sit, sive tophus, sive tumor, aut concreti & compacti sabuli congestus, crassus & mucosus succus, vel aliud simile, non expressit, forte quia hæc omnia modo a corem referant, & compungant, id ipsum possint excitare, neque solum in ipsa vesica, sed etiam in circum sitis partibus, ut experientia sæpius constitit: Sic enim etiam à renibus procedentes grumi in vesicam delati, eam per consensum laborare faciunt.

Objectiones in contextu sunt solutæ.

Aphorismus LXXXI.

Siquis sanguinem aut pus, aut squamulas mejat, & gravis odor adsit, vesicæ exulceratio significatur.

Contentum seu Intentio.

De Signis vesicæ exulceratæ.

Connnexio: Egit priori Aphorismo, de vesicæ & partium vicinarum affectionibus; in hoc Aphorismo de vesicæ morbis, sed particularius agit, nempe de ejusdem exulceratione. Hic Aphorismus ob brevitatem non dividitur.

Et si autem sanguinis & puris mixtio, non semper ulceratæ vesicæ indicium sit, cum etiam è renibus egeri possit, ut alibi diximus, si tamen præterea pus male olens, cum squamulis mingatur, non nisi à vesica prodibit. Malus enim odor, quamvis pus, undecunq; processerit, consequatur nihilominus cum è renibus, aliisq; superioribus partibus emanat, magna ex parte, in longo itinere remittitur; at vero proxime derivans ex vesica, longe gravius foetet, præsertim ex urina mixtura. Squamulæ vero id ipsum fortius attestantur, cum exesa vesicæ certiora indicia sint. Hinc ista junctim sumenda, ut omne dubium adimatur, aliarum quam vesicæ partium affectionum. Meminit autem primo *sanguinis* Hippocrates, deinde *puris*, tum *squamularum*, & deniq; *prævi odoris*, servato nimirum ordine, quo ista prodire solent ex illius ulcere; siquidem seriatim accidere, necesse est, quamvis unum absq; altero, satis non sit, ad ostendendam vesicæ exulcerationem. Quare non nisi ex diuturniori tempore, hæc omnia evenire credendum est, cum verisimile non sit, statim ipsa prodire, vel modico post tempore, sibi invicem succedere: Non immerito proinde usus est Hipp. verbo *minxerit* sanguinem & pus, quo nimirum designaret, multo antea urinam sic intinctam & fædatam prodixisse, mox vero adjecit, *gravis odor adsit cum squamulis*, qui ex præcedentibus excretionibus consequatur, & perseveret. Verum tamen & plus, & minus, & gravius, & levius ac inoffensius isthæc vesicæ accidere possunt, pro varia ejusdem exulceratione, majori, vel minori, magis, minusque fæda. Hunc factorem omnibus abominabilem, Medici non abhorrent, causam dat Poëta:

Qui fluit è matula fætor spirante Mephitem.

Cur nares Medici, non odor iste ferit?

Inficiat totos quamvis fœtore penates,

Dum spirat lucrum, Dindime, gratus odor.

Objectiones quæ hic occurrere poterant, in contextu sunt explanatæ.

Aphorismus LXXXII.

Quibus in meatu urinario, nascitur tuberculum, suppurato eo & rupto, solutio.

Nota: *Hic Aphorismus repetitur iisdem prorsus verbis Lib. 7. Aph. 57.*

Contentum seu Intentio.

De Caruncula urethra.

Connexio: Cum hæcenus de renum & vesicæ affectibus dixisset: In hoc Aphor. de affectione ipsius penis seu meatus urinarii, qui est à vesicæ collo ad glandem usque agit. Hic Aph. ob summam brevitatem non dividitur.

Mictionis mala, non tantum à partibus supra vesicam positis, sed etiam infra ipsam, atq; ab illius meatu provenire possunt, potissimum cum urinæ exitus impeditur à re quapiam ibidem hærente. Hic autem non ea, quæ simul cum urina loco moveri & egeri possunt, sed quæ infixæ & stabilia sunt, considerans Hippocrates, meminit speciatim tuberculi, quod plerumq; in ipsa urinaria fistula in nascitur, & mictui impedimento est, adeoq; stranguriam vel ischuriam parit. Quia vero tuberculorum meminit quæ ad suppurationem perducì possint, videtur propterea ejus duntaxat generis illa comprehendere, quæ ex sanguine & carne excrecente proficiuntur; multa enim in meatu urinario præter naturam gigni solent, quæ raro admodum, imo sæpe numero difficillime suppurationi subjiciuntur; quin & ex lue venerea sunt, quæ carunculas in iis partibus patiuntur, tam difficulter sanabiles, ut pleriq; ad extremum usque senium, maximo cum dolore, & mejendi difficultate immedicabiliter deducantur. At vero de iis solum videtur locutus Hippocrates, quæ tubercula sunt, nil quidpiam pravitatis, ac virulentæ conditionis participantia, sed ex simplici affluxu, aut congestione benignioris humoris progignuntur. Nisi etiam dicere velimus, non omnino, sed sub conditione solum, si maturuerint, tubercula hic suppurabilia, voluisse illum adnotare. Et quamvis in meatu urinario progenita memorare visus sit, verisimilius tamen, ad vesicæ collum, & ubi sphincter musculus jacet, istiusmodi tubercula nasci putandum est: Scribitur enim in *Coacis pranot.* *Quibus tuberculum est circa vesicam, quod mingendi difficultatem facit.* Ubi de vesicæ ductu, ejusque orificio sermo est. Et sane sphincter musculus, cum excoriatur, facillime excrecentem carnem & tuberculum contrahit. Si ergo contingat illud suppurari, plane erumpente pure, & deterisa parte tumefacta & suppurata, fieri necesse est, ut solvatur morbus, qui ex enato tuberculo ægrum divexaverat: id enim est suppurationis beneficium, in tumoribus, ut quod mole excefferat, & dolorem inferebat adimatur, & inde symptomata consequentia desinant, cujusmodi esset stranguria, vel ischuria in casu istius

Apho-

Aphorismi. Dixit autem Hipp. fieri solutionem, duntaxat morbi præcedentis: an autem alterius ex suppuratione consequentis mentionem factam significare voluerit valde ambigo, nam plerumque suppurationes istiusmodi partium, perpetuo excrementis madentium difficillime curantur, nec tam prompte ad consolidationem deducuntur: qua ratione desinere solet pleuritis per suppurationem, superveniente tamen empyemate. Hujus autem nullam rationem habendam censuit Hipp. in Aph. in quo solum, unde urina supprimi posset, & non aliarum partium superiorum, aut ipsiusmet vesicæ affectus, educere constituit, siquidem urinarum vitia, atq; mejendi difficultates, & impedimenta proficisci possunt, affecta non tantum vesica, verum etiam partibus, tum supra, tum infra ipsam sitis, id quod in his Aph. monitum voluit.

Objectiones in ipso contextu sunt solutæ.

Aphorismus LXXXIII.

Mictus noctu plurimus, parvam dejectionem significat.

Contentum seu Intentio.

De Proportionem urinæ & alvi facum redditarum.

Connexio: Cum Hipp. hætenus de urina multa & scitu digna scripsisset, in antecedentibus; in hoc Aph. ultimo, de urina mentionem facit quo ad quantitatem, & exinde docet exiguam alvi dejectionem subsequituram. Hic Aphor. ob summam breviter non dividitur.

Quam inter sese convenient alvi solutio, & urinæ excretio, advertit in hoc Aphor. Hippocrates, ut propterea unius evacuationis copia, alterius parvitatem designet, quod non tantum experientia, & usu quotidiano, comprobatur passim testantur Auctores, verum etiam manifeste constat Anatomia. At vero quamvis una alteram minuere possit, non tamen inde universaliter deducere licet, perpetuo verum esse, alterutram fieri copiosiore, cum non raro contingat utramque supprimi, vel saltem magna ex parte diminui: præsertim in febricitantibus, in Colico-nephriticis, asciticis, & aliis. Solet etiam non raro sudor, cum ubertim effluit, utramq; egestionem parcam admodum reddere, absumptis nimirum humoribus per cutim, qui forte in vias urinæ, vel in alvum decubuissent. Itaq; non videtur omnino verum, ut mictio noctu plurimā facta, modicam significet dejectionem. Verum tamen credere licet voluisse hic duntaxat Hipp. istiusmodi evacuationes, inter sese comparare, cum vel ex criticis egestionibus partium infernarum, futura morbi solutio speratur, vel cum absq; ulla alia causa, alterutra illarum diminuitur, quæ præcedenti tempore sponte & convenienter fluebant: vel cum in affectibus renum aut vesicæ sine ulla ope medica, aut medicamenti diuretici beneficio, urina multiplicatur, & abundantior mingitur: fit enim, ut tum si illa affluentius profiliat, deficiat alvi exoneratio, ideoque nullus sit admirationi locus, quamobrem urina sine evidenti causa copiosior habeatur. Equidem adhuc bene degentibus, id sæpissime contingit, ut quam ex assumpto cibo & potu opperiuntur (seu expectant) evacuationem, illa altera con genere sup-
plente,

plente, deficiat; atqui hyeme potissimum, abundantius mingere solemus, alvo interea restrictiori, ut ex suppressio sudore, sæpissime quoque evenit.

Adjecit non abs re *noctū*: quandoquidem ex ambiente aëre crassiori, pori cutis constipantur, & quidquid exinde perspirare interdium consuevit, quodammodo retardatur, aut detinetur, indeque fertur in vias urinæ, quæ propterea copiosior redditur: quæ etiam ratione fit, ut serosi humores, per noctem corpus aggravent, & glandulas præsertim oppleant, unde vulgo perhibeatur, per idem tempus catharos promoveri. Sed præterea, cum alimenti coctiones noctu, & quiete melius peragantur, distributiones vero & secretiones citius interdium, fit proinde, ut ubi serosæ illius partes, motu ac vigilia, per diem prompte admodum è vasis chiliferis aut succo lacteo, per compendiosiores ductus, in renes & vesicam ducuntur, noctu diutius detentæ, adeoque cum chylo commixtæ, possint per vasa thoracica in cor meare, indeque cum sanguine, in arterias emulgentes iterato saltem deduci, & mox per fibrillas, & glandulas urinarias in renum pelvim, atque deinde in ureteres, & vesicam transcolari.

Unde si major pars humoris, à cibo potuque elicitæ, adhuc noctu feratur in renes, procul dubio fæces in intestinis relictæ exsuccæ admodum & nimium compactæ, & obduratæ remanebunt; quamobrem dejectio & alvi exoneratio, vel nulla vel modica, & tarda erit, eoque magis si peculiaris urgeat causa, ob quam serosæ alimenti portiones, memoratum circuitum haud quaquam perficient, sed etiam recta in vias urinarias deducantur. Non immerito igitur inquit: *Noctū*: equidem si per id tempus, quo urina diutius detineri solet, crebrius adhuc, & affluentius egeratur, fæcum evacuatio, non tantum ex copiosiori ejusdem egestione, parcior fiet, sed etiam in longius tempus prorogabitur.

Quoniam vero indefinite inquit Hippocrates, plurimam mictionem noctu habitam, paucam significare dejectionem; ista sane poterit urinam subsequi, vel præcedere copiosiorē; etenim cum causa mictionis uberioris ex sero, aut sanguinis aut cibi & potus assumpti, in renes corrivante adveniat, unde fæces exhaustæ, & nimium constipatæ remaneant; profecto non minus mictio copiosa futura mox alvo dejectionem modicam significabit, quam hanc eandem, nimis adhuc parcam præcessisse: Modo cætera, quæ cum his concurrere possunt, paria sint, nihilque aliud intermisceatur, quod istiusmodi permutationem & vicissitudinem perturbet: cum id quæ sponte naturæ fiunt, potissimum consequi soleat. Hinc postremo admone-mur, utramque evacuationem fortasse immodicam, posse alterutrius beneficio, prout necessitas exoptulaverit, diminui, aut sedari, promota nimirum, usu medicamentorum, irruentis humoris derivatione, aut in intestina, si urina affluentior mingatur, aut in renes, si forte alvus lubricior sit, prout peritiores practici, in harum partium affectionibus agere consueverunt, & quidem cum ægrotantium emolumento: quamvis fluxuros potius, quam fluxos humores avertere, tutius semper & facilius sit.

Dices I. Non est eadem materia excretorum alvi & urinæ, Ergo unum alterum non subtrahit. *R.* Non est eadem materia totaliter concedo, ex parte nego.

Hoc tamen pro coronide concedimus, ut tandem, hujus vasti Libri sit:

F I N I S.



LIBER QUINTUS

SEU

SECTIO QUINTA

DE

MORBIS CONVULSIVIS, PE-
CTORIS, MULIERUM, LACTE,
TUMORIBUS, &c.

Aphorismus I.

Convulsio ex Elleboro Lethalis.

Nota: Ejusdem tenoris propemodum est Aphorismus Sectionis 7. A-
phor. 25. Ex medicamenti potione convulsio, Lethalis est. Idem
dic de Aphor. 16. Sect. 4.

Contentum seu Intentio,

De Convulsione ex Elleboro.

Connexio Libri & Aphorismorum: Cùm in præcedenti libro
Aphorismo decimo sexto scripsisset Hippocrates, *Carnes sa-
nas habentibus Elleborus periculosus, facit enim convulsiones.*
In præsentì vero aphorismo docet convulsionem ex Elle-
boro inductam esse Lethalem. Hic Aphorismus ob brevitatem &
unicam conclusionem non patitur divisionem.

Mmm m

Qur

Quaritur mox in limine Aphorismi an Hippocrates aut de Elleboro albo vel de nigro sermonem suum intelligat, id quod multos dubitare fecit: Verum si in memoriam revocentur ea, quæ à divo Sene, pluribus aphorismis scripta sunt libro quarto, sane asserere non dubitabimus de albo Elleboro esse intelligendum, quemadmodum fatetur *Galenus in Commentario*, tum quia ejus usus, præ cæteris apud Veteres erat frequentissimus, tum quia de eo expresse meminit citato libro quarto Aphorismor. textu 13. 14. 15. & 16. ubi de Elleboro ad vomitum inferendum verba fecit, non nisi album intellexit, quippe albus sursum, movet, deorsum niger: tum etiam quia convulsio, quæ hic ab usu Ellebori notatur, facilius ex albo, difficilius ex nigro contingere solet; Interim certum & experientia probatum est ex Elleboro nigro dato, æque convulsiones excitatas esse: Sed

Quaritur denuo? cur Elleborus detur melancholicis, cum tamen humor melancholicus vulgo, seu Acidus Neoterîcorum minime tendat sursum sed deorsum, Resp. Si mentem veterum observare animus sit dicere quis poterit (quamvis minus fundate) transitum à liene ad Ventriculum per *Vas breve* habere, unde sine dubio Elleborus facile trahet humorem melancholicum; sed crediderim ego; satis esse, cum Elleborus electivam seu Catharticam habeat virtutem, sic etiam non tantum à liene sed etiam capite & à toto trahet.

Affert autem convulsionem Elleborus albus non tam *Evacuatione* per vomitum excitata, quam *Irritatione* & *punctione* nervis per Stomachum præcipue ejus os superius, dispersis inducta, ob illius acredinem nervorum fibris infensissimam: at si præterea hypercatharsim promoveat, quia tunc præter Evacuationem humorum, in Ventriculi cavum derivantium, etiam exolutionem roridæ substantiæ, & liquoris nervorum, non sine eorundem molestia inferet convulsionem longe facilius succedentem excitabit.

Sed an revera convulsio, quæ retractio est nervorum & musculorum ad propria capita, an potius motus convulsivus, ex Elleboro immoderatam evacuationem promovente subsequatur, adhuc subdubitare licet: & licet fere communi-
ter

ter ab Expositoribus , de convulsione proprie dicta Aphorismus exponatur , cum in græco Codice *σπασμος* scriptus sit : videtur tamen dicendum , incipere primum motum convulsivum , seu convulsionis Prodromum , subsequi vero convulsionem : Vix enim videtur posse tam subito convulsionem exoriri ex vomitionibus ab usu Ellebori , cum non statim Nervi & Musculi contrahantur , & contracti remaneant , nisi postquam iteratis motibus convulsivis fuerint irritati , concussi , ac tandem obrigefacti.

Ea propter crediderim ab usu Ellebori motus convulsivos seu inæquales , atque irregulares contractiones primum inferri , mox vero nisi opportunis remediis occurratur , aut compunctio nervorum sedetur , exoriri convulsionem , quemadmodum memini me observasse , ab hypercatharsi cujusdam medicamenti purgantis & alias ab importuno usu Algorethici seu *Mercurii Vitæ* dicti , ex quibus primum motus convulsivi , postmodum re ipsa convulsiones subortæ sunt.

Id ipsum etiam expertum non semel est in his , qui venenum assumpserunt , præsertim Mercurium sublimatum aut Arsenicum , nam cum præ irritamento Vomitus foret excitatus , motus convulsivi , non vera convulsio inducta est. Hoc idem observare est in singultu , qui ad motus quoque convulsivos refertur : quin & Singultus sæpe sæpius fit , à re stomachum vellicante , unde non convulsio sed motus convulsivus insequitur. Verum tamen cum diutius isti perduraverint , in veram denique convulsionem desinere solent , quemadmodum in Epilepsia , quæ non raro transit in apoplexiam , vel commutatur in convulsionem , unde tandem Exitium.

Sic enim tam *positive* vellicatis magis nervis , quam *privative* largius evacuatis humoribus inferuntur à purgantibus acrioribus , primum motus convulsivi , mox convulsiones , tandem mors , atque hoc ipsum præstare potest Elleborus minus rite in usum tractus.

Sed quod Hippocrates de Elleboro scribit , an dici
M m m m 2 quo-

quoque possit de ceteris catharticiis, tum per superiora tum per inferiora *εὐς καὶ πᾶσι* plus justo moventibus, in controversiam revocari potest: & dicendum judico, Hippocratem *Ellebori* loco Exempli meminisse, adeoque id ipsum referri quoque posse ad cetera pharmaca, si modum exceßerint, & Hypercatharsim promoverint: nam quæcunque possunt roridam Nervorum substantiam extenuare, & eorundem fibras laceßere, irritare & extorquere, poterunt quoque motus convulsivos & convulsiones ipsas parere: quin & humores ipsi præter naturam affecti, ac maligni, deleteriique redditi, id ipsum possunt excitare, quemadmodum *Galenus* in *Commentario* refert de eo, qui humorem æruginosum evomens toto corpori convulsus est, illo autem excreto & penitus educto, à convulsione liber evasit.

Itaque etsi Hippocrates convulsionem ex *Elleboro* *Lethalem* dixerit, non tamen ex ceteris catharticiis inductum exemplum ab hoc eodem periculo putavit, ut idem habet 7. Aphorif. 25. cætera cum paria esse possint; potissimum autem ob sui acritatem ac vehementiam, præter dejectionem, vomitum etiam excitaverint, quippe per vomitum plurimum Stomachus laceßitur, ubi nervi plurimi in consensum quoque Spinam & cerebrum contrahunt.

Cur autem omnino Lethalis dicatur ex *Elleboro* convulsio, non æque apud omnes convenit: *Galenus* & ceteri Expositores ad siccitatem in Nervis inductam, ex immodica inanitione causam retulere; nam cum convulsio ab eodem Hippocrate dicatur, vel inanitione vel repletionem fieri, curabilem fore illam existimarunt, quæ ex repletionem est, incurabilem vero & penitus mortalem, quæ ab inanitione: Attamen cum non adeo facile sit tantam siccitatem in nervis excitari, quanta satis sit ad vitam destruendam, cum alioquin toto corpore tabefacti & marasmo affecti, licet summopere extenuati, tamen non in convulsionem incidant; Hinc verbum *Lethale*, non pro desperato casu accipiendum, sed tantum quandoque pro periculoso, plures enim testantur Practici, ex Hypercatharsi convulsos evasisse, id ipsum videtur insinuare Hippocrates 7. Aph. 41. dicens: *ἰν ἡσιν ὑπὲρ τὸν ὀρθὸν καθαρισθὲν σπασμὸς ἐκτενέσθῃ, οὐ καλόν*; Ergo absolute non *Lethale*, attamen valde periculosum, si enim singultus ab Hypercatharsi in Juvenibus, non est tutus, in senibus eo
erit

erit periculosior, in qua ætate tuta alioquin non solent esse sine periculo. Hinc Poëta:

Quum Juvenis spernit, vetulos affectio sternit.

Hinc probabilius à plerisque creditum, eam quæ ex repletione fit, convulsionem facilius sanari, quia nervorum fibræ ab humore quodammodo crassescunt & tumescunt: quæ vero ex inanitione fieri dicitur, cum ab acritate & virulentia succorum, nervorum fibræ retorqueantur & obrigescant, nec tam facile in pristinum statum reduci possunt, sed læsione cerebri meditullio communicata, talis noxa inducitur, quæ à Compage & naturali constitutione cerebrum ipsum deturbet, proinde fieri ut illa plerumque insanabilis evadat, cum difficillimum sit dissolutum nerveum liquorem restituere, & fibras convulsione distortas ac retractas denuo mollicare, atque in naturalem statum restituere.

Verum, quoniam usus Ellebori albi, apud nos jam exolevit, & cathartica quæcunque tam bene ope Chymica corriguntur, ut omne propemodum virulentum exuant, imo & ista raro in usum ducantur, ejusmodi incommoda nulla fiant nec ullatenus formidanda: Cæterum si unquam id accideret, remediis oppugnandum foret sistentibus hypercatharsim, humefacientibus & retundentibus acritatem atque postremo Vomitus sedantibus, & stomachi irritamentum compescentibus de quibus jam diximus Libr. IV. Aphorism. 16.

Diximus supra Exemplum Ellebori nobis dedisse Hippocratem quò & nos admonitos vult, ut omne validum medicamentum pro possibili fugiamus, ne insignis noxa accidat; turpis enim est calamitas (teste Hippocrate) medicamento dato hominem occidere: Unde discere potest quisque rationalis Medicus, non consilium esse umquam illico ad fortissima remedia confugere, sed à mitioribus incipiendum, præcipue ubi Vires debiles morbusque non summè anceps aut desperatus.

Dices I. In hæmorrhagia magna & animi deliquio raro fit convulsio, Ergo nec in Evacuatione & inanitione ab Elleboro. *Resp. 1.* in hæmorrhagia & animi deliquio nullam aut perexiguam esse vellicationem.

Resp. 2. Non ita trahi elective humores serosos, sicut ab Elleboro-

leboro Resp. 3. Non ita omnes humores violente & confestim evacuantur, prout à violento cathartico utpote Elleborus &c.

Dices II. In Hectica, Marasmo omnia sunt arridiora & inania & tamen non fit convulsio Resp. hanc difficultatem jam in textu esse solutam: Dicimus tamen esse paulatinam inanitionem cum habituali discrasia, in qua non est sensus (sensibile enim supra sensorium positum non elicit sensationem) ad convulsionem autem excitandam requisitum acris sensus.

Aphorismus II.

Convulsio ex vulnere Lethalis.

Contentum seu Intentio.

De Vulnerum Convulsionibus.

Connexio: Cum Hippocrates in Antecedenti Aphorismo egisset de Convulsione quæ ab assumpto Elleboro sequitur: In Præsenti Aphorismo de Convulsione, quæ vulnus sequitur, æque gravi periculoso & lethali agit: Proinde hac aphoristica sententia admonet Medicum ut debite advertat & præcaveat, ne in Vulnere convulsio succedat, maxime autem in Nervorum & articulorum vulneribus, cum enim convulsio ex se magnus morbus sit, Ergo si ad vulnus sequitur lethalis erit.

Hic Aphorismus ob brevitatem & simplicem pariter conclusionem non dividitur.

Animadvertendum est ante omnia quod in hoc Aphorismo *Vulneris* nomine intelligantur omnes quæcunque corporis violentæ affectiones, sive vera vulnera sive ulcera, sive puncturæ, contusiones, fracturæ, luxationes, fortes ligaturæ &c. in quibus convulsio accidere solet, idque aliquando culpa Medici aliquando vero ratione ipsius morbi, nonnunquam autem utriusque causa: Sic enim sæpe numero convulsio ex vulnere contingit, *vel* ob vulneratam partem, nervis plurimis contextam, quemadmodum in spina dorsi,

in

in membranis , in musculis , in tendinibus eorundem: *Vel* ob ingentem inflammationem , prout observatum est , ex importuna trochiscorum de mimo , vel alius similis impropportionati remedii in partem vulneratam immisione : Sed & sapissime etiam accidit sine ulla evidenti causa , vulneratam partem subire convulsionem , imo & alias quoque partes in consensum trahere ob solam Nervi punctiōnem : ea enim est nervorum conditio , ut cæsi atque omnino resecti minus periculi afferant , puncti vero sapissime irreparabile inferent exitium , quod & notatum à Galeno *Lib. art. Medica.* siquidem cæsi & resecti nervi æqualiter in suis fibris coëfficiuntur , & commode per convenientia medicamenta conglutinantur : at vero punctis non æqualiter fibras affici contingit , unde fit , ut illarum aliquæ retrahantur , aliæ resolvantur , adeoque inæqualiter in se ipsis contorqueantur : Hinc consueverunt peritissimi chirurgi adhibendam ejusmodi inaequalem nervearum fibrarum commotionem , punctum nervum penitus rescindere & resecare.

Quoniam vero convulsio , ex vulnere orta , arguit ingentem nervorum læsionem , ob quam etiam Cerebri meditullium coëfficiatur , & ideo fit , ut lethalis evadat : Cerebri enim læsiones potissimum in meditullium , atque in Nervorum originem inflicte perpetuo periculose sunt , & sapissime in mortem desinunt , dissipatis subinde spiritibus , & rorida nervorum substantia vel corrupta vel exsoluta : atque etiam constat ex Anatome , cor pariter ejusmodi spiritibus egere , ut suum motum & vitam tueatur : deficiente autem motu , ipsa vita desinit.

Hic vero pariter notatum velim , ut in priori Aphorismo rationabiliter discussi convulsionem nempe ex vulnere non statim sed post iteratos motus convulsivos subsequi , prout id ipsum priori aphorismo fufius discussimus.

Præterea notatu dignum est , quod convulsio , quæ vulnere accidit vel est *Universalis* , vel *particularis* alicujus nempe membri : verum Hippocrates , hoc in loco præcipue , de universali loquitur , qua ut diximus Cerebrum , & maxime ejus meditullium læditur : Solet tamen convulsio in vulnere aliquando ex parte adversa con-

contingere, ut si malum sit in sinistra, convulsio fit in dextra & est periculosior convulsio adversæ partis, id vero contingit, quod pars sana seu adversa lædatur, vel quia occultatur tumor apparens, vel quia sanguis partis illius in partem læsam seu affectam, per vulnus effluxit, vel quia percussio aliquando consensu quodam partem adversam seu sanam ferit & afficit: quod autem convulsiones maxime lethales sunt, quæ in adversa seu sana parte contingunt, id ipsum testatur *Hippocrates* fieri sæpius in temporum vulneribus, & ipsa Autopsia *Praxeos* contestatur Exemplis.

At quæri hic potest, num etiam ex ulcere convulsio Lethalis sit? Respondeo & dico sapissime quoque fuisse observatum exitialem, an quia ibidem inflammatio suborta est, & non raro cum gangræna & Sphacelo; an etiam, quia sanies ex ulcere prodiens, tantam aliquando acquirit pravitatem, ut sive halitibus sive continuata per partes virulentia, cerebrum cerebrique functiones deturpet, unde postmodum animales & vitales operationes læsæ consequantur.

Verum tamen est, quod non semper convulsiones ex ulcere inductæ mortem inferant, potissimum cum eiusmodi sunt, ut à sorditie ulceris proficiscantur, etenim abstergis sordibus & ulcere mundificato facile solet convulsio desinere: Expertum quoque est convulsionem ex punctura Nervorum desisse, ad motis medicamenti motum illum fibrarum inæqualem sedantibus, quemadmodum ab usu olei therebinthinæ, & similibus Balsamicis. Id ipsum dicendum in convulsione ex Ictu, Contusione, Hæmorrhagia seu magna sanguinis effusione, aut cum nihil ex vulnere fluit, aut cum apparens tumor repente dissipatur, vel in magno vulnere nullus conspicitur, quod malum ingens est, teste Hippocrate, materia enim ad interna vergit, & convulsiones ac deliria creat, quibus omnibus causis Medicus occurrere potest & debet, ad motis nimirum remediis, quæ Ictui, contusioni & hæmorrhagiæ opitulantur, sanguinis nempe effusionem restringendo, ubi nihil effluit, sanguinem mittendo, ægrum à sorditie repurgando, partes nervosas & saniem dorsi oleo calido inungendo, obcæcatum vulnus aperiendo, & saniem extrahendo, Nervum si ex dimidio sectus fuerit, in totum abscindendo, interne autem bezoartica, Nervina An-

tispasmodica , traumatica adhibendo : His enim intro & extus adhibitis, solet sæpe statim convulsio desinere, nisi tantam illa fecerit in nervis & cerebro impressionem , ut non tam facile emendari aut remediari possit: Sic quoque pro partium vulneratarum varietate , varius quoque esse solet eventus, cum aliquæ facilius aliæ difficilius restituantur convulsiones. Quandoque etiam loco convulsione accidit resolutio seu Paralysis, quæ comparata ad convulsionem , minoris solet esse periculi.

Objectiones circa hunc Aphorismum , jam in ipso contextu sunt resolutæ.

Aphorismus III.

Ubi sanguis plurimus fluxerit Singultus aut convulsio superveniens malum : (vel ut alii) à copioso sanguinis fluxu, convulsio aut singultus, malum.

Contentum seu Intentio.

De Convulsione vel Singultu ab hæmorrhagia.

Connexio: Cum in præcedenti Aphorismo de convulsione dixisset, quæ ex vulnere contingit : In hoc de illa sermonem instituit, quæ sanguinis effusionem sequitur , & simul Singultum accipit , quem in præcedenti omisit. Hic Aphorismus uni membri est, & divisionem non patitur.

In primordio hujus Aphorismi, jure merito quis quærere potest, cur Hippocrates in duobus prioribus Aphorismis dixerit *lethale*, in hoc vero Aphorismo *Malum* duntaxat pronunciat : Verum scire oportet Hippocratem nullatenus *Malum* cum *lethale* confundere, quemadmodum existimat *Galenus in Comment.* nam non adeo funestus est exitus ex convulsione aut singultu ab hæmorrhagia, uti ex convulsione ab Elleboro & vulnere; visum enim pluries est, ægrotantes ab illis convaluisse, ab his vero rarissime vel nunquam: attamen levissimi momenti negotiū putandum est, cum non solum ob convulsionem

Nnn n

& sin-

& Singultum, vitæ periculum involvat, sed quod gravius, ab immoderato sanguinis fluxu, cum hic vitæ thesaurus sit, quo exhausto vita ipsa deficit: Præterea clare docet Hippocrates 4. *Acutorum* horrenda symptomata esse convulsionem, singultum, lypothimiam, & alvi fluxum; sunt enim *mala* & ut *signum* quatenus inanitionem maximam indicant: & ut *Causa* quatenus virtutem ipsam prosternunt, præsertim ubi magna vasa sunt præcisa.

Quoniam vero *indefinite* dixit *ubi sanguis plurimus fluxerit*; neque locum seu partem exitus sanguinei determinaverit, procul dubio intelligendus erit ille de sanguinis evacuatione, undecunque contingat: Quare sive ex ore, moribus & partibus superius, sive ex alvo, viis urinæ, utero, aliisque partibus inferius prodeat, semper ac singultus aut convulsio succedat, vitæ periculum minabitur; quamquam coherentem Aphorismo præcedenti, manans solum ex vulnere à quibusdam exponi soleat.

At qua de causa periclitentur ægrotantes, ex singultu aut convulsione, post immodicam sanguinis profusionem, & unde contingat singultum aut convulsionem oriri, ex immoderato sanguinis fluxu, gravis est hujus loci difficultas. Omnes interpretes cum *Galeno* utriusque causam referunt ad immodicam ipsam sanguinis evacuationem, per quam Nervi & muscoli inaniti & exsiccati contrahuntur: Verum qui convulsionem, non nisi à causa irritante progenitam admittunt, non bene his conveniunt, neque ad solam causam inanitionis illam referunt, & eo magis quia præter convulsionem, singultum quoque hic memoravit Hippocrates, modo cum Singultu ventriculi læsionem arguat, & hic non tam facile ab ejusmodi inanitione afficiatur; propterea fit ut ad aliam causam confugere sit necesse, ut ratio scilicet utriusque probabilior elucescat. Crediderim ego ea propter convulsionem & singultum, non proprie oriri ex ipsa sanguinis evacuatione, sed consequi antecedentem illam causam, quæ talem ac tantam evacuationem promoveat: Cum enim sanguis è suis vasis non profiliat, nisi post contractam acridinem, & venenatam conditionem, valentem erodere & reserare vasa, sane quæ in causa est, ut sanguis prodeat, causa quoque erit, ut nervorum fibræ proritentur, & convellantur, atque in ventriculo singultus concitetur: postquam enim sanguinem

nem infecerit, etiam nervos & nervorum liquorem depravat, unde postmodum convulsio aut singultus: Vitium autem sanguini illatum, acorem plerumque refert, qualis in aqua Stygia: at vero ab acidis facile Nervi proritantur & convelluntur, atque eo magis magisque, quo per hæmorrhagiam, citatior fit sanguinis motus tam fermentativus quam progressivus, & acidum oberrans impetuosius fuerit & quoquoeversum irrui. Non est autem necessum, ut junctim convulsio & singultus immoderatam sanguinis evacuationem consequantur, sed satis est si alteruter contingat; Etenim pro majori vel minori, hujus vel alterius partis affectione, modo una, modo altera convellitur, atqui autem convulsio ventriculo contingens, singultum parit: quin imo apud plerosque converti solet, num singultus ad ventriculum, an vero ad septum transversum seu Diaphragma potius referri debeat, ob fibrarum communem utriusque texturam? Quamobrem si ventriculi revera affectio sit, difficultatem omnem elidet, ut præterea convulsio, quæ musculorum morbus est, ad ventriculum referri non possit per singultum, cum ventriculus musculosa pars non sit: Verum etsi ventriculus proprie ad musculos non referatur, fibris tamen carneis est intertextus, quemadmodum à plerisque anatomicis est animadversum. Veteres Anatomix minus gnari Singultum proprie passionem Ventriculi, convulsionem, passionem cerebri esse dicebant: Cæterum magna est utriusque affinitas ad easdem causas uterque sequitur, & eandem significandi vim uterque passim habet.

Sed quamvis ad sanguinis acredinem, convulsionem ac singultum ex immodica sanguinis evacuatione provenientes retulerimus, subest nihilominus alia causa, ob quam nervorum principium ab ejusmodi evacuatione coafficiatur, quippe ubi sanguis plurimus profusus est, liquor nerveus fatiscit & rorida subtilioris lymphæ substantia, qua nervorum fibræ irrorantur, in statu sano, ex non suggesta materia à sanguinis glutine dependente, facillime contorquentur & eo magis, quo partes sanguinis acriores redditæ sunt, ut jam diximus.

Objectiones & Difficultates in contextu sunt solutæ.

Aphorismus IV.

A purgatione immodica (quæ aliis superpurgatio seu Hypercatharsis dicitur) convulsio aut singultus superveniens malum.

Contentum seu Intentio.

De Accidentibus ab Hypercatharsi.

Connexio: Cum Hippocrates in primo hujus libri Aphorismo de Convulsione, quæ ad Elleborum sequitur quasi particulari sententia egisset: In hoc nunc Aphorismo generali utens sermone, de convulsione, quæ ad purgationes seu ab uno vel alio medicamento genere sequitur & quamcunque evacuationem immoderatam infert, agit, ut propterea videatur præcedentium Aphorismorum ratio & causarum inferentium convulsionem, Epilogus & corollarium: proinde non defuere Interpretes, qui hujus Aphorismi explicationem ad primi expositionem retulerint, quo & nos lectorem remittimus.

Hic Aphorismus ob brevitatem unimembris est & divisionem non patitur.

In hoc Aphorismo cautum Medicum esse oportere monet Hippocrates, ne in exhibendo pharmaco, ægrum in convulsionem vel singultum inducat: quamobrem divus Senex *Libr. de Medicamentis purgantibus* præcipit, ut recte consideret Medicus, antequam ægro purgans præbeat, illius naturam an facilis aut difficilis sit dejectionis, & interrogandum, an alias sumpserit medicamentum, quale quantum & in qua forma: unde reprehendit illos, qui extremas purgationes inconsideratè exhibent, aut quandoque etiam bis in die pharmacum propinant, ubi primum nondum est operatum: Sicut & prohibet non esse faciendam purgationem, usque ad animi deliquium, sicut in venæ sectione aliquando licuit, quia non est in manu nostra, opus medicamento sistere, sicut venam claudere.

Quo-

Quoties autem ex nimia purgatione, convulsio aut singultus accidit, semper arguitur interna aliqua causa nervos & nervorum principium afficiens, ita ut quæ nimiam evacuationem promoverit, eadem convulsionem & singultum afferat, & sive evacuatio sponte naturæ suborta sit, sive à cathartico vehementi sit excitata. Quoniam vero dixit, *ex nimia seu immodica purgatione*, indicare videtur, non quamcunque evacuationem, ex quibusvis ductibus corporis habitam, sed tantummodo per alvum & intestina; Etenim usus est voce Græca *χαθαρσις* quæ proprie alvi dejectionem significat: Attamen visum aliquando est ex mictu sanguineo, à cantharidibus excitato, motus convulsivos prodire: Verum facilius & frequentius contingunt convulsiones ex hypercatharsi seu superpurgatione, quam ex alia quacunque evacuatione; Imo singultus, qui ad ventriculum pertinet, non nisi ab immodica evacuatione per alvum oriri potest, ob communem nervorum & membranarum texturam. Sed & non raro sanguis ipse ex hypercatharsi funditur & eliquatur; unde postmodum, præter virium jacturam, fit quædam acro in omnibus humoribus à sanguine procedentibus, quæ convulsione causa est, ut mox ante dictum est. At vero ex cunctis partibus corporis magis afficitur ventriculus & cerebrum; ventriculus quidem ab acri cathartico, ejusque immoderata evacuatione: Cerebrum vero ob peculiarem sui imbecillitatem & succi nervei exhaustiorem, unde postmodum singultus ex uno, convulsio ex altero oritur ut mox supra diximus.

Objectiones in textu sunt solutæ.

Aphorismus V.

Si ebrius quispiam derepente obmutescat, convulsus moritur, nisi febre corripiatur: aut ubi ad horam pervenerit, qua crapula solvuntur, vocem recuperet.

Contentum seu Intentio.

De Ebrietate Lethali.

C*onnexio:* Cum in præcedentibus Aphorismis, de variis convulsionum eventibus & causis egisset Hippocrates: In hoc præsentis Aphorismo, lethale prognosticum exhibet illius convulsionis, quæ mediante obmutescencia ab ebrietate fit, nisi vel febre corripiatur vel hora solutionis crapulæ ligata lingua iterum in loquelam solvatur.

Hic Aphorismus in duas partes dividitur: in *prima* ponit conclusionem seu Thesim: in *secunda* eandem glossat seu exceptiones aut limitationes adfert.

Inter cæteras autem causas convulsionem inferre valentes, recenset speciatim hoc loco Hippocrates ebrietatem, per quam cerebrum & nervi proxime affecti soporantur, cum omnibus notum sit, exinde cerebrum facillare, & corpus universum in sensu & motu animali vehementer offendi. Quamvis autem ebrios hic memoret Hippocrates: non tamen explicat, unde ebrietas contingat, nam licet plerumque ex immodico usu vini illa oriatur, passim tamen eandem fieri experimur ab aliis liquoribus in fermentationem adactis, quemadmodum de cerevisia satis notum est: Aliquando etiam observatum, ab immodico usu lactis, potissimum acescentis, inductum fuisse soporem, unde mirum non est, cur pueri lactentes facile in somnum delabantur. Quamobrem crediderim Hippocratem consulto tacuisse liquoris potionem, sed indefinite ebrietatem, undecunque proveniente referre voluisse, modo talis sit, ut aphoniam seu obmutescenciam seu loquelæ amissionem, ac deinde convulsionem pariat: Sed non tantum ex assumptis liquoribus, verum etiam ex plerisque vaporibus, halitibus, bene vel male olentibus, ebriorum adinstar, somnum induci posse compertum est, sic plerique memorantur ex moscho, ambra, croco; alii ex peto, carbonibus, alii aqua ardente seu spiritu vini, similique spiritu soporati. Id ipsum ex cellis vinariis, ex mephitis, fodinis, Crypta anguiana seu canina prope puteolos, aliisque ut cunctis notum, observatur: quare quæcunque possunt, nimia ac subita evaporatione cerebrum gravare, aut excursions spirituum,

rituum, & roridæ cerebri substantiæ irrigationem intercipere, poterunt quoque soporem & aphoniam inferre.

At quamvis hæc ita sint, specialius videtur hic intelligendus Hippocrates, de ebrietate, ab epotis liquoribus inductæ, potissimum autem à vino meraco, cujus usu bibaces græci (bona pace dixerò etiam germani) sæpe sæpius non tantum ebrii sed etiam convulsi, supremum diem obire consueverant, unde deductum videtur illud verbum *græcari* & *pergracari* hoc est græcorum more bibere vel de germanis ille versus:

More Palatino bibitur ne gutta supersit.

Cum igitur ex ejusmodi ebrietate repentina contingit aphonia, docet Hippocrates futuram paulo post convulsionem, ut proinde ebrius aphonus, non apoplecticus, sed convulsus moriatur.

At qua de causa convulsio ebrietatem consequatur, si illa aphoniam attulerit, non est levis momenti difficultas, & quamvis omnes veteres interpretes, cum Galeno ad vim vini conditionemq; retulerint, quippe illud cerebro infestum dicitur, non tamen bene evinci potest, quomodo soporem & aphoniam inferat, attenta præsertim vini natura, quæ calida à Galeno, cæterisque ponitur. Quo fortasse respiciens idem *Galenus 2. de caus. morbor.* ut hanc difficultatem solveret, scripsit, vinum moderate sumptum, naturalem calorem augere posse, immoderatus vero potatum, frigidos morbos excitare: & *lib. 3. de temperamentis cap. 3.* subdit, non semper illud calefacere, sed ubi plus fuerit illud epotum, quam evinci possit à calore naturali, frigidos morbos gignere, puta apoplexiam, carum, convulsionem & Tetanum. Verum nec his satis facit difficultati propositæ; nam si moderate sumptum calefacit, certe à fortiori magis calefaciet immodice potatum. Sunt etiam qui solo illius odore inebrientur: Sunt & alii qui ex ejusdem usu immoderato vigilant, febricitent, ac delirent, ut propterea non perpetuo verum sit vinum refrigerare atque adeo soporem inferre. Sed etsi vinum immoderatus epotum sopores afferat, malefico vaporum cerebrum occupantium & gravantium, cur est quod convulsionem etiam afferat & motus convulsivos, qui non sine acredine & vellicatione contingunt; quin & plerique per ebrietatem fient Phreniticis similes ac delirantes, quousque vinum edormiverint, quemadmodum testatur de suis popularibus Holerius hoc loco.

Proba-

Probabilius ea propter dicendum vinum, cæterosque liquores ad caput facile effumantes, fermentatione seu efferuescentia in debita in ventriculo promota acorem talem ac tantum contrahere sulphureo-narcoticum, ut halitus ac vapores illuc pertingentes, non solum cerebrum, ejusque roridam substantiam infarciant & obtundant, verum etiam figant, hebetent, ac stupefaciant, unde primum aphonia, siquidem recte *Seneca Epistol. 83.* vinum opio, elleboro & veneno comparat, quod nimirum lethiferum, somniferumque sit; & *Lucretius Lib. 3. de natura rerum*:

- - - cum vini vis penetravit

Acris, & in venas discessit diditus ardor:

Consequitur gravitas membrorum, præpediuntur

Crura vacillanti, tardescit lingua, madet mens,

Nant oculi, clamor, singultus, jurgia gliscunt.

Et quoniam per ejusmodi acorem fibræ nervorum vellicantur, & compunguntur, propterea fit, ut post aphoniam convulsio subsequatur, qua nervi ad suum principium retrahuntur, idque speciatim facta transportatione in nervos, & musculos subjectos potissimum cervicis & spinæ dorsi, ve etiam labiorum, & mandibularum, ut in spasmo cynico; Testatur autem *Cicero Quart. in Tuscul.* eos, qui reliquis potionibus inebriandi vim habentibus replentur in omnem partem, & in dexteram & in sinistram & pronos & supinos cadere, qui vero sunt vino inebriati, retrorsum solum atque supinos decumbere, nervis scilicet per cerebellum præcipue ad cervicem & spinam dorsi pertinentibus affectis. Accidit itaque aphonia, seu vocis privatio, quoniam nervi potissimum vocales afficiuntur, qui per guttur & fauces, aliasque partes circumjacentes diffunduntur, unde etiam lingua, in suis musculis & nervis offenditur. Et quamvis aphonia proxime accedat ad apoplexiam, non tamen omnino cum illa confundi debet, etenim per apoplexiam respiratio graviter læditur, at vero per aphoniam illæsa illa remanet, offensis duntaxat musculis & nervis vocalibus: Sed & Apoplexia desinere solet in Paralysem; Aphonia vero potius in convulsionem. Adnotat autem Hippocrates *in textu repentinam obmutescentiam*, nam ista omnino morbosæ est & convulsionis prodromus: nam si fortasse sensim ebrius obmutesceret per soporem, qui ex ebrietate plerumque contingit, certe in convulsionem

tionem non desineret; at vero cum repente obmutescit, convulsus moritur; significatur enim vitium tale ex ebrietate cerebro, cerebrique medulla fuisse illatum, ut spiritus animales, & roridam nervorum substantiam violenter admodum figat atque coarctet, ut propterea fibræ nervorum postmodum contrahantur & convulsione fatiscant, ab acore eorundem vaporum: quippe partes vini aciores in nervorum substantiam repunt & contorquendo fibras convellunt.

Acescere autem in his vinum ostendunt ructus, vomitusque plerumque ab ebrietate evenientes; ex acore vero nervorum membranarumque fibris inducto, caput vacillat, trepidant artus, oculi rubent, & coarctantur, pupilla constringitur, lingua contrahitur & titubat. Sed & spiritus ipse è vino elicitus ope destillationis acidus in se continet particulas, quibus corrugandi, atque roborandi vi pollet; unde vulneratis partibus admotus, non tantum sanguinem sistit, sed & fibras discissas conglutinat, suppurationem prohibet, ac tandem vulnera ad certam tutamque cicatricem perducit.

Hanc autem lethalem ex ebrietate convulsionem, sola febris prævertere potest: quippe per eam facillime atque citissime dissolvitur, quidquid in nervis & musculis coagulatione concretum est. Hinc idem Hippocrates sæpius etiam advertit, tum in *Aphorismis* tum in *coacis prænotionibus* convulsionem superveniente febre desinere, uti & nos pluries adnotavimus. Debet autem febris superveniens, non omnino levis esse, sed aliquam præferre magnitudinem, qua possit compactam in nervis materiam, acore vitiosam dissolvere, imo etiam per sudorem aut urinam expellere. Verum non dixit Hippocrates omnino per febrem, convulsus ex ebrietate convalescere, sed duntaxat non ex convulsione perire: fieri enim potest, ut adhuc per febrem intereat, nulla adhuc convulsione detentus, siquidem si febris talis sit, quæ causam convellendi deprimat, neque vitium aliud in cæteris humoribus præsupponat, proculdubio & convulsionem tollet & ebrium in pristinum salutis statum revocabit.

Si vero febris superveniens, ex malo fortasse corporis apparatu alios humores inficiat, & alia insuper pariat symptomata, etsi convulsionem auferat, poterit ex alio capite mortem inferre, cum acidi vitiosique succi convulsionem afferentes, in alias partes delati, bene possint febrem mali moris excitare. Itaque conferet

febris superveniens convulsioni, sed nihilominus poterit ex alio capite nocere; & quidem plurimum verendum, si febris, quæ supervenerit, intra triduum nec intra idem tempus desierit, quemadmodum idem Hippocrates admonuit *in coacis prænotionibus*.

Adjecit Hippocrates in Aphorismo posse convulsionem ex ebrietate inductam moveri ex spontanea ebrietatis solutione, unde inquit: *aut ubi ad horam pervenerit, qua crapula solvuntur, vocem recuperet: Quamobrem etsi febris nulla supervenerit, si tamen per id temporis, quo crapulae solvi solent, loquela restituitur, convulsus ex ebrietate convalescet.* Hinc notandum est, convulsionem non statim supervenire aphoniam ex ebrietate, sed post aliquot horas aut etiam dies integros; nam tunc affectio in nervis & cerebro firmiter hærens designatur, quam nullatenus potuerit natura vincere & debellare. Quantum autem temporis videatur exigi posse, ad ebrietatis solutionem, dubium esse potest hoc loco: Et quamvis Galenus *in comment.* pro vini conditione, & corporum affectorum habitudine, aliquos dicat postridie, alios sequenti die, alios etiam tertio ex ebrietate resipuisse, id tamen fortasse verum in vino potentiori crassiorique, quod fortasse suo tempore erat in usu; at vero ex usu adhuc immoderato nostratium vinorum, nunquam non ante unum diem crapula soluta visa est, forte quia nostratia vina (saltem potiora) non tam crassa sunt, neque tam difficilis dissolutionis, sed sat. diuretica: confert in hoc idem varia corporis textura: nam pueri, foeminae, debile caput habentes & quicunque sunt texturæ mollioris & rarioris, facillime ebrietatem incurrunt, etiam ex usu vini levioris, cum è contra, texturam nacti duriores, exercitati, assueti, vinum etsi biberint, difficilius inebrientur.

Qua autem ratione his succurrendum sit, ne in convulsionem incidunt & ex ebrietate liberati vocem recuperent, scite quidem docet Hippocrates 2. *de morbis* ubi hanc eandem sententiam repetens sic inquit: *Si quis ex ebrietate voce privetur & statim sane ipsum febris corripiat, sanus fit, si vero non corripuerit, die tertia moritur: si itaque in sic affectum incideris multa calida lavato, & spongiis calida aqua madefactas capiti apponito, & capas decorticas in nares indito: si quidem si apertis oculis loquatur & ad se redeat, nec deliret, hac die sopore pressus jacet, postridie sanus exsurgit.*

Surget: si vero surgens bilem vomuerit, insanit & moritur, maxime in quinque diebus, si non dormierit: huic ergo hæc facere oportet, multa calida lavato, donec ad se redeat: deinde copioso oleo illitum mollibus in strangulis reponere, ac contegere cum silentio & in tenebris, ut plurimum enim ex balneo dormit, & si dormierit sanus evadet: postquam autem redierit, primis tribus aut quatuor diebus milium tenue, aut ptisanae succum sorbeat, & vinum mellis speciem referens bibat: deinde cibus utatur molliissimis ac paucis primum; Et iterum Lib. 3. subdit: His validas sternutationes excitare convenit, & clysterem bilem ducentem & ipsum validum injicere: quod si sensum ager receperit, thapsiæ (id est Fœniculi) succum, in multa aqua calida dato, quo quam citissime revomat; postea attenuato, & à cibo abstineti usque ad septem dies: detrahendus est & à lingua sanguis si venam comprehendere possis. Verum praxis quotidiana observavit se datas ejusmodi ebrietates iteratis lorionibus pudendorum ex aqua gelida, mirum enim quam istæ partes tum cerebro consentiant, & madorem, frigefactionemque eidem communiscant: sunt & alii qui à fumo tabaci id ipsum assequuntur, & alii sternutationem moventibus; sed præstaret vomitum excitare statim ac immodice vinum fuerit epotum, & antequam temulentia sit confirmata: quod & ab Athenæo memoratum legitur Lib. 2. Cap. 10. in fine. Cæterum ebrietatem præcavere referantur allium & amygdalæ amaræ, si ante potum sumantur, & quidem de allio exstat Authoritas Hippocratis 4. de rat. victus in acutis: dum inquit; optimum est ipso (id est allio) vesci, qui crapula se daturus est & futurus ebrius: de amygdalis vero amaris præter graves alios Authores testatur Plutarchus Lib. 1. Symposiacorum questio. 6. ubi Medicum memorat in comitatu Drusi Tiberii Cæsaris filii, qui cum quinque vel sex amygdalas amaras, ante comensationem edisset, omnes bibendo superabat; sed deprehensa fraude, prohibitus ne id faceret, facillime à vino devictus fuit. Unde autem id fiat, curiose à plerisque quæritur: Sunt & alii qui se ipsos ab ebrietate, frigida aquæ haustu, paulo ante commensationes præmuniebant, & quidem felicissimo successu: Apud Athenæum Lib. 1. Cap. 30. Brassica ejusque semina commendantur, quod præcomestio potatores ebrios fieri non patiantur, quin & in qua vinea nascuntur Brassicæ, vinum progigni debilius

lius dicitur: multa alia ad ebrietatem arcendam recenset Zacutus Lusitanus Lib. 3. Prax. admirabil. observat 123. Mercurialis Variar. Lect. Lib. 4. Cap. 6. & Joannes Langius Epistol. Lib. 1. Epistola 30. taceo aliis. Ego haftenus in Praxi, tum ad excitandos ebrios, tum ad temulentiam eorundem atque aphoniam & convulsionem imminentem praecavendam, nihil efficacius inveni, quam spiritum salis armoniaci aromatizatum (qui vulgo anchora Helluonum seu Germanis *der Sauff-Geist* intitulatur) ad guttas 20. vel 30. in decocto citri vel feniculi notabili quantitate porrectum & iteratum, qui saepe mira praestitit & plures à crapula aliisque malis praeservavit.

Pro coronide tandem advertere oportet, cautos attentosque oportere esse Medicos, in ebriis internoscendis & judicandis, ne illos cum apoplecticis confundant, & sicut apoplecticos tractent, cum magno salutis ægrorum detrimento, & non sine sui ipsorum honore infamia. Memini ebrium quendam, ab ignaro quodam Medico, qui illum apoplecticum existimaverat, adeo perperam tractatum frictionibus, cucurbitulis, vesicatoriis, imo ad verticem capitis ignito ferro cauteriatum, ut postquam experrectus se tam afflictum, tortumque vidisset, Medicum ipsum nisi fugam arripuisset, veluti suum tortorem ac hostem peremisset: Alium novi in magno convivio existentem & se potenter inebriantem, postquam in via concidit, Medicus improvidus accurrens, variis & fortissimis illum aggredi volens remediis à plebe accurrente & adstante dehorratus, hominem hunc non apoplexia sed crapula prostratum esse, ut odor vini ex ore notanter demonstrat; sed medicus frivolæ intentioni & levi judicio insistens, mox ebrius apoplexiam evomuit & ad caligas, cum magno medici derisu deposuit; taceo plura similia opprobriorum exempla. Equidem apoplectici præter soporem, respirationem habent graviter læsam, pulsum inæqualem, pallentem plerumque vultum, vel plus justo rubentem & tumidum: Ebrii vero somnum suavem dormiunt, in cunctis bene se habent, & si convelluntur ab ipsis motibus nonnunquam excitati, statim exsolvuntur & valent. Accedit quod Apoplectici vel moriuntur resoluti vel in paralysem declinant, ebrii autem tandem convulsi non resoluti vitam finiunt.

Dices: Multi Helluones in crapula plerumque obmutescunt & tamen

tamen non convelluntur, Ergo Aphorismus non subsistit, & Hippocratem hic non intelligere levem obmutescentiam titubationem, sed fortem:

Dices II. Obmutescentia supponit summum sensuum stuporem, Ergo hanc potius sequetur Apoplexia quam convulsio, in qua semper est acris sensus & vellicatio Resp. etsi primum sit stupor, natura tamen stimulata à vaporibus acris & virulentis cogitur exsurgere ad expulsionem, unde motus convulsivi vel convulsio suboritur.

Quæres: Cur quidam ebrii dormituriunt alii vero minime & Sicut alii ebrii rident, alii flent, alii rixantur, alii orant, ita etiam diversos facit effectus in ebriis vinum, prout diversos aut sulphureos aut arsenicales seu subtiles aut crassiores sublimat vapores, à corporis contentis diversis, diversimode imprægnatos: Helmontiani hæc Archeo attribuunt, hoc vel illo modo constituto & agente, ita ut modo in iram, modo in risum, modo in gaudium modo in mœrorem concitetur.

Aphorismus VI.

Qui Tetano corripuntur, intra quatuor dies intereunt; si vero hos superaverint, incolumes evadunt.

Contentum seu Intentio.

De Prognosi Tetani.

Connexio: Cum de convulsione, in omnibus antecedentibus Aphorismis Hippocrates determinasset, varias ejusdem afferens causas & judicia: In hoc Aphorismo de illa convulsione in specie agit, quæ Tetanus dicitur, per quam totum corpus rigidum distenditur instar stipitis præcipue autem collum.

Hic Aphorismus duas habet partes: In *Prima* dicit Tetanum intra quatuor dies occidere: in *Secunda* asserit, quod Tetano correpti, si quatuor dies excedant & supervivant, sanentur aut sani evadant.

Dat ergo in hoc Aphor. Hippocrates exemplum Tetani ut inde terminum convulsionis, in interitum desinentis conjiciamus, & Medicus ex hoc certum possit statuere prognosticum de morte aut vita

ægrotantis. Refertur quippe Tetanus ad convulsionem, velut species ad genus, siquidem Tetanus est nervorum tensio æqualiter in toto corpore facta, per quam illud rigidum & immobile cum maximo tamen dolore remanet, cum partes anteriores æque ac posteriores contrahantur: unde *Galenus in Comment.* inquit: illum esse affectum compositum ex Emprosthotono id est tensione ad anteriora, & Opisthotono id est tensione ad posteriora.

Quando igitur contingit aliquem Tetano corripi, id est æqualem pati ad anteriora & posteriora contractionem, facile fit, ut intra terminum acutissimorum morborum, qui est quartus dies, intereat; arguitur enim ex æquali & vehementissima nervorum, per partes anteriores & posteriores excurrentium affectione, plurimum & extremè gravari naturam, & multam ac potentem causam, extremosque habens labores, quæ potuerit, cunctos utriusque partis nervos afficere, unde postmodum, omnes fere operationes & potissimum vitales præsertim respiratio, utpote actio ad vitam summe necessaria, offendantur: Si vero terminus quatuor dierum transigatur, quia sensim morbosam causam cedere iudicio est, ac pedetentim concoctione dissolutam sensibilibiter aut insensibilibiter expurgari, proinde si hunc terminum ægrotantes evaserint, facile negotio reconvalescent.

Verum animadversione dignum est, non dixisse Hippocratem quarto die Tetano affectos interire, sed infra hoc tempus posse periclitari, unde & prima & secunda & tertia die etiam obire poterunt; quamquam & plerosque novimus etiam ad septimum perisse, qui nimirum viribus, & ætate præpotentes, violentiam morbi, diutius sustinere potuerunt.

Verisimile autem est, ex majori vel minori vitiosi humoris aciditate, ejuscemodi varietatem Tetano affectis evenire, ubi enim aciditas pontica, nervos affecerit, & præter contorsionem, acrigiditatem, stuporem attulerit, certe mos citius accidet atque inevitabiliter: ubi vero potius corpulentia quam acore summo, nervi fuerint divexati, non solum in longius tempus Tetanus protrahetur, verum etiam paulatim remittetur & in salutem desinet.

Et quamvis insuper Hippocrates dicat post quartam diem Tetano correptos sanos fieri, non tamen credendum est statim, & absque ullo auxilio medico illos sanari, cum nervi & musculi affecti, non subito in pristinum salutis statum remitti possint, absque eo, quod humores per illos diffusi sensim dissolvantur & evanescant: Quare exponendus Aphorismus est, ut licet post quartum diem Tetano correpti mortem evadant post longius tempus tamen in pristinam salutem restituantur: Sed & neque perpetuo verum est, quod post quartum diem mortis periculum effugiant, cum aliquando observatum sit, etiam in septimo, atq; etiam post septimum illos esse periclitatos; forte etiam tempore Hippocratis citius sanabantur, sive ob salubriorem incolatus constitutionem, sive ob fortiores corporum temperaturas, sive etiam ob temperatiorem victus rationem.

Signa mortalia in hoc morbo sunt maxillarum exsolutio, corporis dissolutio, vomitus, per nares excretio, clamores, nugationes, vocis & respirationis notabilis interceptio: febris vero, etsi maximum huius mali soleat esse remedium, si tamen ex inflammatione procedat, interitum minatur; Sic pariter, si morbus hic vulnera nervosarum partium sequitur, mortalis esse solet.

Quo denique pacto Tetano affecti, juvari possint, ut saltem post quartum diem mortem effugiant, & in salutem revocentur, inquisitione dignum. Et quoniam Nervorum & musculorum affectus dependentes ab humoribus, vel sudore copioso, vel abundantiori urina solvi consueverunt, proinde opportunum erit utroque hoc præsidiorum genere in illis uti. Verum tamen vitanda erunt ea, quæ acriorem conditionem nacta sunt, & volatili alkali prædita, ne scilicet ex his nervi & musculi proritentur, & convulsione impensius afficiantur. Conferunt ea propter, quæ molliter laxando, blande admodum humores alliciant, & educant, unde decocta seu potiones quidem humefacientes, ex medicamentis tamen dissolventibus & roborantibus parata, proficua erunt; Itemque sudores proliciantur ex balneis vaporosis, quibus & pori cutis leniter laxentur, & humores in musculis & nervis impacti molliantur, ut sine noxa diffluant; In eundem usum sæpius contulere unctiones ex oleis & linimentis emollientibus simul & roborantibus, quod sane perpetuo observandum, in omnibus affe-

affectionibus nervorum, ut fusius legi & haberi potest ex praxi, quo lectorem remitto.

Dices I. Hippocrates 3. *de morbis* ait, Tetanum interficere intra quatuordecim dies, ergo non intra quatuor: Resp. hanc difficultatem jam in contextu esse solutam, hoc nimirum ex certis circumstantiis ibidem recensitis obtingere, ut plurimum tamen fit illos intra quatuor dies interire, testantur id Practicantium exempla.

Dices II. Si Tetanus fieret, ut dictum in contextu à vaporibus, halitibus aut flatibus, discuteretur ante quartum diem Resp. Vapores &c. ab acido pontico & vitioso prodeuntes, qui crassitiem præferunt, à calore oppresso & viribus debilitatis, difficillime & tam cito discuti non posse.

Quæres I. An bene Hippocrates jubeat *Aph. 21. hujus libri* aquam frigidam affundi ad curationem Tetani? Resp. hanc quæstionem solvemus suo mox citato loco: breviter interim dico dummodo fiat in Juvenibus & robustis, æstivo tempore, & æger bene cooperatus, mox urgeatur ad sudorem: Sic enim concentrato per effusionem aquæ frigida, calore, virtus unita fit fortior, ad excitandum sudorem & morbum dissipandum.

Aphorismus VII.

Epilepsia (seu morbus comitialis) quibus ante pubertatem contingit, mutationem recipit: quibus vero post vicesimum quintum annum, eos fere comitatur ad mortem usque.

Nota: Huc referendus est Aphor. 45. lib. 2. & Aphor. 28. lib. 3.

Contentum seu Intentio.

De Prognosi Epilepsia.

Connexio: Cum in præcedenti Aphor. Hippocrates egisset de Tetano, qui species convulsionis est, quasi sine motu: nunc de Epilepsia sententiam profert, quæ æque inter convulsiones reponitur, sed cum manifesto motu. Connectitur præterea hic Aphor. cum

eum *Aphor. 45. Lib. 2.* ubi dixerat Hippocrates, juvenes morbo comitiali correptos mutatione maxime ætatum liberari: ubi pro juvenibus, juniores exposuimus; nunc eandem sententiam clarius explicans, inquit, ante pubertatem, mutationem illos accipere, post vigesimum quintum annum vero, fere semper commori solere.

Hic Aphorismus duas habet partes seu conclusiones: In *Prima* asserit & concludit; Epilepsiam ante pubertatem recipere mutationem, seu demonstrat, quo tempore sanatio Epilepsiæ maxime speranda: In *Secunda* vero asserit & concludit, Epilepsiam post 25. annum consuevisse inveterascere, imo post tale tempus desperatam ac incurabilem, eandemque ægrum ad mortem usque comitari.

Comitialis morbus idem est ac Epilepsia, quasi supracaptio, quoniam Epileptici veluti à superis seu divinitus capti, ac fulmine icti videntur; vel quod supernis partibus id est cerebro afficiantur; cumque publice, & in comitiis plerumque corriperentur, perterritis adstantibus, iisque mox etiam abscedentibus, Comitiam finiebantur, Comitialis morbus appellatus est. Hinc *Quintus Serenus* cecinit.

Est subiti species morbi, cui nomen ab illo est,

Quod fieri nobis, suffragia iusta recusat.

Sæpe etenim membris atro languore caducis

Concilium populi labes horrenda diremit.

Is ergo morbus, si ante pubertatem accidat, mutationem & quandoque etiam sanationem facile sortietur, ineunte nimirum ætate juvenili; Est autem pubertas ætas illa, quæ à decimo quarto ad vigesimum primum vel vigesimum quintum annum extenditur, & quamquam plerisque visum sit à decimo octavo anno ad vigesimum quintum, non puberes, sed adolescentes esse appellandos, attamen pubertas hic & adolescentia simul una confunduntur: Itaque si contingat puberes intra hoc tempus & ante vigesimum quintum annum corripì morbo comitiali, in ætatem vegetiorem, puta juvenilem progressi, mutationem in melius subibunt.

Sed qua de causa id accidat, non bene convenit inter *Expositores*: Major autem illorum pars cum Galeno existimat, id illis bene succedere, quia pueritia & pubertas propter humiditatem, & cruditates in ea ætate faciles, obnoxia est epilepsiæ, ut propterea puerilis morbus sit etiam appellatus; facta autem mutatione in juvenitu-

tem, humida illa intemperies, in siccam magisque calidam transmutatur, indeque fieri, ut in melius mutetur. Verum crediderim ego id potius evenire ex solidiori & consistentiori fibrarum nervearum textura, quippe quæ per ætatum mutationem, magis magisque confirmantur & exoluta illa acris sanguinis serositate non tam facile deinceps nervi proritantur, nec aliunde vitium in reliquis humoribus indutum, adeo contumax & pertinax erit, ut per ejusmodi ætatis mutationem nullatenus infringi, ac tandem subigi possit: verum tamen neque dixit Hippocrates revera post pubertatem Epilepsiam sanari, sed in melius solum abire: fieri enim potest, ut epileptici insultus adhuc post pubertatem repetant, non sint tamen adeo infensi, ut violenter adhuc extorqueant & convellant, quin imo & rarius, & per longiora intervalla molestant, quemadmodum sæpius in praxi observatum est: Jure merito ergo scriptum est, tum hic, tum Aphor. 45. lib. 2. mutationem solum accipere: Sed & aliquando contigit, mutationem hanc Epilepticos subiisse in aliam ægritudinem aliquanto degenerem. Sic quidam qui cum Epileptici in pubertate fuissent, post vigesimum quintum annum, non amplius Epilepsia, sed palpitatione & oppressione cordis aliove morbo laborarunt, citra sensibilem mentis læsionem, sed & plerique status mutatione, ubi puellæ, ab erumpentibus menstruis, aut inito connubio, prompte admodum convaluere. Advertendum tamen est, quod ejusmodi mutationes in melius facilius contingent servata simul exacta victus ratione, unde si fortasse puber epilepticus, errata in victus regimine perpetim committeret, proculdubio etiam post vigesim. 5. annum eundem comitiale morbum esset perpeffurus: hinc qui mutationem in melius etiam sub spe recuperandæ salutis sunt obtenturi exactam victus rationem servant oportet, & cum illa salubrioris quoque aëris incolatum, prout fusc ex jam sæpe citato Aphor. 45. lib. 2. colligere est.

Quoniam vero post vigesimum quintum an. Epilepticos interire scribit Hippocrates, dubitari proinde potest, num de illis intelligat, qui in pubertate Epilepsiam contraxerunt, an vero qui post vigesimum quintum annum epilepticos fieri contigerit, ac propterea his recuperandæ salutis spes omnis absit. Ad *primum* putaverim eos intelligi interituros vel saltem cum Epilepsia commorituros, qui li-

cet ad senium perducti, post vigesimum quintum annum in epilepsiam inciderint, secus vero qui ex pubertate affecti, beneficium mutationis post vigesimum quintum annum non sunt sortiti, etenim hi plerumque consenescent & sensim ac pedetentim mutatione aliarum ætatum in melius semper abeunt. *Qui vero* post vigesimum quintum annum, morbum comitiales incurrunt, duplici ex capite videntur difficulter convalescere, *uno quidem*, quia in juventute corripiuntur, unde is causam procul dubio præpotentem arguit, cui ætas juvenilis obsistere non potuit, *altero* quod nullam in melius mutationem, sint in cæteris succedentibus ætatibus speraturi, quippe per has semper in pejus ruunt, fatiscente natura per sanguinem cæterosque liquores, qui semper semperque hebetiores & acidiores evadunt. Quamquam si fortasse ex male antea-cta vita morbus comitialis acciderit, possit usus medicamentorum, & salubriori regimine instituto, in meliorem etiam statum ille revocari. Verum Hippocrates de ea Epilepsia videtur hic locutus, quæ ab his quæ sponte per ætates homini accidunt, provenire solet, nulla propemodum externa causa perspecta.

Sed an revera simul una illa affecti commoriantur, ulterius ex textu dubitare licet: verum cum Hippocrates scripserit illos *ferre commori*, id est simul una consenescent & ad interitum perducere, propterea probabilius est dicere, non omnino & infallibiliter ad mortem usque patientes comitari, sed ut plurimum solum. Quo pacto non semel vidimus etiam in ætate consistenti, & in prima senectute, epilepsiam desisse, superstiti adhuc patientis vita: At vero non inde deducendum est, eos, qui ultra vigesimum quintum annum sunt hoc morbo correpti esse in Senio commorituros, nam ineunte virilitate plerumque visi sunt periisse, commutata præsertim Epilepsia in Apoplexiam ut frequens docet praxis. Quare verbum illud *Commori* non debet referri ad ætatem senilem patientis, quasi vero ad ultimam ætatem morbus ipse protrahatur, & tandem desinente vita desinat; sed debet referri ad ipsum morbum comitiales, qui cum non amplius patientem deferat, eo illum deducit, ut tandem interficiat, adeoque simul cum ejusdem interitu desinat, ut propterea videatur quodammodo dici posse commori morbum, in interitu Patientis.

Quibus denique præfidiis ejuscemodi morbo tam ante quam post pubertatem, occurrendum sit, ea videri possunt in Praxi.

Dices Galenus 6. Epidemio ait per commotionem hæmorrhoidum aut varicum curari Epilepsiam, Ergo non est incurabilis Resp. Galenum intelligendum esse de Epilepsia per consensum, sic enim etiam febris quartana curat Epilepsiam, non autem de essentiali seu Idiopathica de, qua potissimum in toto Aphorismo loquitur Hippocrates.

Objectiones reliquæ in contextu sunt solutæ.

Aphorismus VIII.

Quicumque pleuritide (seu morbo laterali) laborant, nisi intra dies quatuordecim, superne repurgantur, iis in Empyema (seu suppurationem) fit mali translatio.

Contentum seu Intentio,

De Eventu Pleuritidis.

Connexio: Nexus hujus Aphorismi, cum prioribus clarus est; sicut enim in superioribus de tempore egit, quo distensio & Epilepsia terminari solet; ita in hoc de duratione & tempore quo Pleuritis judicatur, sermonem facit.

Hic Aphorismus ob simplicem conclusionem non dividitur. De Pleuritidis ergo progressu & eventu agit hoc Aphorismo Hippocrates, illamque intra quatuordecim dies non repurgatam, in suppurationem seu Empyema tendere docet: Verum ad exactam Aphorismi intelligentiam oportebit plura primum examinare.

Et primo quidem, cum de Pleuriticis agat, qui intra quatuordecim dies non repurgantur, in dubium verti potest, an computus istorum dierum fieri debeat ab initiante & cruda Pleuritide, an vero à Pleuritide ad maturationem & declinationem perducta; Pro cujus difficultatis solutione, meminisse decet, Pleuritidem esse speciem inflam-

inflammationis, factam à sanguine, alicubi in vasis sanguiferis pleuræ vel etiam pulmonis (qua parte præsertim pulmo superiori pectori alligatur) hærente. Non enim videtur hic Hippocrates de pleuritide quam spuriam vocant, sermonem fecisse, quippe cum is subdat, ad suppurationem verti, & non nisi quæ exquisita dicitur, utpote à sanguine facta, in suppurationem verti possit, proculdubio quæ exquisita est, videtur hic specialiter adnotata: Cum ergo inflammatio à sanguine facta egeri nequeat, priusquam maturitati subjecta fuerit, id quod circa statum accidit, proinde probabilius videtur dicendum de pleuriticis sermonem habuisse, qui jam ad declinationem morbi pervenerunt; quam ob rem computus dierum quatuordecim repurgationis à fine status, vel ab initio declinationis desumendus est, atque adeo illi pleuritici in suppurationem deducuntur, qui post statum. & maturitatem pleuritidis per dies quatuordecim imposterum non repurgabuntur, & quidem inflammatione jam edomita & concocta ejusdem materia, illam disrumpi necesse est & paulatim per sputum seu anacatharsim expurgari; cum vero contingit ejusmodi expurgationem intercipi aut impediri, forte ex imbecillitate naturæ nequeuntis expellere per tussim; vel ob multitudinem peccantis humoris; vel ob crassitiem ejusdem, vel ob viarum angustiam; vel ob loci distantiam; vel ob thoracis aut pulmonis impotentiam; vel ob aliam similem causam; profecto detenta materia suppurabitur, indeque commutabitur pleuritis in empyema; unde etsi prior morbus desinat, novus & quidem peior superveniet, id quod ab Hippocrate tum hic tum clarius infra manifestissime declaratur: Itaque cum pleuritis ad declinationem perducta, & sanguis illam faciens jam fuerit maturatione subactus, si per succedentes quatuordecim dies, non fuerit integre repurgatus, ac per anacatharsim excretus, certe commutabitur in pus & morbus in empyema degenerabit.

Dubitari præterea potest, cur Hippocrates terminum ejuscemodi repurgationis dies quatuordecim constituerit, cum cætero qui *anaxion* pleuriticus relatus ab eodẽ 3. *Epidemiorum*, non nisi à die qua capit expuere, nempe à decima septima, usq; ad trigesimam quartam qua judicatur est, fuerit repurgatus. Crediderim ego quatuordecim dierum terminum fuisse hic ab Hipp. constitutum, quia ex eodem lib. 2. Aphorismorum

rum textu 23. omnes acuti morbi (è quorum penu pleuritis est) in quatuordecim diebus judicantur, facto tamen initio à die, qua revera acuti evaserunt; hinc non abs re in hoc Aphorismo dixit, *in quatuordecim diebus non repurgantur.* Anaxion vero pleuriticus memoratus in epidemiis, coepit decima septima die pauca duntaxat exspuere & deinceps abundantius; quin imo nisi sudore fuisset judicatus, proculdubio in longius tempus ægrotasset. Quare suppuratione facta, à sputo abundantiori, vere intra quatuordecim dies fuit repurgatus, ac postremo etiam sudore judicatus, sed si hunc terminum transgisset, in alium plane morbum lapsus esset.

Ulterius dubitari potest, num revera de pleuritide mens Hippocratis sit exponenda; nam in vulgata latina versione scribitur, *quicumque morbo laterali*: morbus autem lateralis latiori significatione aliam pectoris ægritudinem referre potest: verum dicendum in græco codice scribi pleuriticos, qui proprie pleuritide, seu membranæ costas succingentis inflammatione correpti sunt, in quam sane expositionem reliqui omnes interpretes conveniunt; Neque enim, si de morbo laterali, qui costis & musculis intercostalibus externis accidit, sermo foret, posset inde anacatharsis & repurgatio, per sputum expectari, quæ hic ab Hippocrate memoratur, solummodo sputum & anacatharsis sperari potest, duntaxat in morbis pectoris, partes internas, non externas afficientibus.

Adnotat etiam & recte *Heurnius* materiam debere esse expectorabilem, nam si fortasse, præ sui crassitie & viscositate, non facile concoqueretur, & longius tempus exquireret, ad subeundam maturacionem, profecto tempus hoc loco assignatum ab Hippocrate dierum quatuordecim sufficiens non esset peragendæ repurgationi. Verum tamen cum de pleuritide loquatur Hippocrates, & hæc plerumque cum præsertim exquisita est, à sanguine concreto fiat, facili suppurabili, idcirco non absque ratione, terminus quatuordecim dierum est adjectus, quo plane spatium verisimile est, posse materiam jam concoctam expurgari: humor autem crassus & viscosus non nisi in pleuritide spuria observari solet, qui longius tempus expostulat.

Et hoc quoque obiter notandum venit quod omnis inflammatio, quinque modis terminari potest, *resolutione* quæ raro fit; *resudatione* quando inflammatio partium internarum, ob earum calorem & raritatem,

ritatem, facile materiam transmittit; *Suppuratione*, quando natura pepsim seu veram concoctionem in substantiam aliti convertibilem non perficit nec perficere potest, Pepasium orditur, id est vitiosum humorem qui in corporis substantiam converti non potest, in aliquid melius & naturæ convenientius, ut in pus aut puri finitimum commutat, hoc est quando natura mediam quandam viam tentat, ut nec omnino vincat, prout in resolutione & repurgatione omnino vincatur, prout in putrefactione seu suppuratione contingit; *Induratione* quando in scirrhum abit: tandem *putrefactione* quando venenata aut pestilens qualitas accedit & jungitur.

Signa futuræ suppurationis Hippocrates in prognosticis affert: nempe si dolor in parte affecta ante decimum quartum diem non sedetur; nihil vel parum & id quidem omnino crudum rejicitur; nec ad sanguinis emissionem & medicamenti applicationem, febris tamen perseveret, juxta illud, *dum pus fit, dolor & febris intenditur, pure autem confecto omnia remittunt*; nec aliqua evidens evacuatio per alvum, urinam aut sudorem compareat. Signa autem factæ suppurationis seu in empyema mutata, designato tempore sunt, quando nempe pondus sentitur in cavitate pectoris; æger facilius jaceat & decumbat in parte illa in qua stagnat pus; Item cataplasmata aut lintea humida illi loco applicata citius resiccentur quam in parte opposita: Item quando vacillatio & motus materiæ, sentitur, dum corpus de parte in partem movetur.

Denique ut ejusmodi incommodo futuræ suppurationis, & imminētis empyematis occurramus, juvabit toto hoc spatio quatuordecim dierum, ea adhibere medicamenta, quæ anacatharsim promoveant & facilitent, cujusmodi sunt, quæ ex hyssopo, hyperico, hederæ terrestri, tussilagine & similibus parantur aquæ, decocta, syrupi, extracta, tincturæ; confert etiam in idem balsamum peruvianum, spermaceti, elixir proprietatis Helmont. balsamum sulphuris, præsertim therebinthinatum. Si hæc repurgatio fortasse deficiat, practici consueverunt, in opem diuretica trahere, quia non raro expertum, materiam in pectore collectam, aut in pulmonibus hærentem, fuisse per vias urinæeductam, quamvis hoc non tam facile sit, & nec dum bene constat apud anatomicos per quos ductus eo ferri possit: de quibus vide proximam Medicinam.

Objectiones hic occurrentes in contextu sunt solutæ.

Apho-

Aphorismus IX.

Tabes iis maxime ætatibus fit, quæ à decimo octavo sunt anno, usque ad trigesimum quintum.

Contentum seu Intentio.

De Fatalitate Phthiseos ratione ætatis.

Connexio: Cum in præcedenti Aphorismo, de suppuratis mentionem fecisset Hippocrates, suppuratio autem tabi sit perquam affinis: Ideo arrepta hac occasione in hoc Aphorismo, de tabe, suppurationis pedissequa mentionem facit.

Hic Aphorismus unimembris est adeoque divisionem non patitur. Siquidem, ut ex autopsia constat, à pleuritide suppurata, non tamen deinceps sufficienter repurgata empyema fieri soleat, cui postmodum tabes adjungitur, unde prudens Medicus, prævidendo damna, ex non repurgata in Pleuriticis materia, facile prædicere poterit ex mente Hippocratis, *Tabem* græce *Phthisim* oriri & subsequi, idque vero potissimum obtingere posse à decimo octavo anno ad trigesimum quintum: Tabes autem hic proprie ut mox diximus intelligitur pulmonis ulcus seu confirmata Phthisis, de cujus idæa causis & effectibus praxis consulatur, in hoc loco solum de illa sermo est quatenus certo ætatis tempore, potissimum vero ex pleuritide suppurata & non repurgata contingat: Equidem quotiescunq; materia, quæ pleuritidem faciebat, ad suppurationem perducta est, nec deinde intra spatium quatuordecim dierum repurgetur, in thōracis cavo colligitur, & mox tum pravo halitu, tum corpulentia seu succorum plenitudine, pulmonem, indeque circulantem sanguinem inficit: quoniam vero ab infecto pulmone, imo etiam à præsentia puris exulcerato, simulque una vitiato sanguine, accidit febris, quæ hæctica naturæ est, proinde fit ut tabes oriatur seu universalis corporis consumptio: cum enim sanguis pure infectus, salinam acredinem nanciscatur, indeque plus justo dissolvatur & glutine privetur, quo scilicet partes cunctæ corporis nutriuntur, fit propterea ut sensim illæ macrescant: quippe pus sanguini communicatum, tam potenter illum vitiat, ut partibus accedens, loco nutrimenti acre & corrosivum venenum evadat.

Verum cur scriptum sit in hoc Aphorismo, id potissimum evenire
à de-

à decimo octavo ad trigésimum quintum annum? Crediderim ego, neque solum in casu pleuritidis non repurgatæ licet (ut diximus) potissimum, sed etiam si ex quacunque alia causa tabes oriatur, ut propterea indiscriminatim locutus Hippocrates, de facili hujus ætatis contabescencia ad trigésimum quintum annum usq; , reliquis ætatibus exceptis. Imo ut ex græca voce Phthisis deducitur, speciatim, ut mox supra meminimus, videtur voluisse designare illam speciem tabis quæ ex ulcerato vel aliter affecto pulmone contingit. Fuchsius *in Comment.* hujus Aphorismi, rationem deducit ex Galeno *qui in Comment. 29. lib. 3.* exponens ægrotudines juvenilis ætatis, ibidem ab Hippocrate enarratas (ubi præ cæteris sputa sanguinis & tabes referuntur) non ad ætatis rationem, sed ex accidenti, adolescentiæ & juventuti tabem evenire interpretatur, quia adolescentes & juvenes, plerumque saltant, currunt, clamant, digladiantur, belligerant, venantur, aliudve genus laboris, vel exercitii immodici operantur: At causæ istæ, ut alibi quoque à nobis est dictum, communes esse possunt reliquis ætatibus. Sed & neque Hippocrates eorum quæ ex accidenti eveniunt, hic habuit in animo meminisse, sed duntaxat, quæ ratione ætatis contingunt, etenim limitavit tempus à decimo octavo ad trigésimum quintum annum quod sane non fecisset, si id ex accidenti tantum evenire putasset: Ea propter ego credo, id potissimum ea ætate contingere, quia sanguis tunc etiam in sua constitutione permutatur: cum enim in præcedenti ætate puerili, pars ejusdem glutinosa & auctiva prævaluerit, sensim postmodum incipit pars vivifica virtute præcellere, & acrior & tenuior fieri, quæ propterea orgasmum in arteriis & venis efficit, ut facile oscula vasorum aperire queat; hinc sanguinis sputa & partium spiritualium erosiones accidunt, potissimum vero pulmonis sua natura laxioris & spongiosæ; Sed & propter ipsius acridinem nutritio partium non tam bene fit, quemadmodum in ætate præcedenti; unde etiam fit, quare per ætatem juvenilem contingant facilius febres ardentes, vulgo ex bile fieri putatæ, sive potius ex sanguine acriori, ad fermentescendum summe idoneo.

At vero neque dixit Hippocrates, tantummodo in hac ætate tabem accidere, sed *præcipue* solum; nam possunt quoque tabes in aliis ætatibus evenire, & non solum ex prænarrata causa, verum etiam ex aliis innumeris, potissimum ex destillatione ferina, ex tussi vehementi, ex pleuritide suppurata, ex angina, aliisque quæ sane hoc præsentī Aphorismo sunt comprehensa, ex ejusmodi ætatis

adolescentis & juvenilis constitutione: non tamen hinc negaverim speciali⁹ tabem nutare voluisse, quæ ex pleuritide suppurata ac deinde repurgata procedit, de qua præcedenti Aphorismo mentio facta est.

Dices 1. Hunc Aphorismum Hippocrates etiam 2. *Prognosticorum* & in coacis prænotationibus & aliis in locis, proposuit, ergo committit Tautologiam. & Hippocratem in variis locis loqui de tabe, sed diverso respectu, ergo commisit tautologiam, nego consequentiam.

Dices 2. Tabes fit ab abscessu alicujus partis internæ v. g. hepatis vel renum ulcere; datur & tabes dorsalis &c. absque ulcere pulmonis, ergo non ut Aphorismus denotavit. & Has tabis vel potius marcoris species non intelligi nec comprehendere sub hoc Aphorismo, quod mox patuit ex supradicta connexionione cum præcedenti Aphorismo, in quo egit divus senex de pectoris suppuratione post pleuritidem.

Aphorismus X.

Quibus ex angina liberatis, ad pulmonem mali fit conversio, ii intra dies septem moriuntur: si vero hos effugerint, purulenti evadunt.

Contentum seu Intentio.

De Eventu Anginæ.

C*onnexio:* Cum in antecedenti Aphorismo de transmutatione pleuritidis in suppurationem dixisset Hippocrates; nunc de transmutatione anginæ agit.

Hic Aphor. duas habet partes & conclusiones: *Prima est:* Angina in pulmonem versa, intra septem dies occidit: *Secunda est:* Angina quæ in pulmonem vertitur, si intra septimum diem non occidit, suppuratur.

Non facile quis huic Aphor. sententiæ assentietur si superficialiter solum, & ut verba textus sonant, illam accipiant: etenim quomodo fieri potest, ut ab angina liberatus, incidat in pulmoniam seu peripnevmoniam, & deinde in empyema: si ab angina liberati, penitus sanati dicendi sunt; si ergo omnino sanati, proculdubio, non poterunt ex præcedenti morbo in alium delabi, qui causam & originem à priori mutentur: verum huic difficultati facile satisfiet, attenta Hippocratis elocutione, is siquidem dixit: *quibus ex angina liberatis*, id est qui vim & violentiam illius effugiunt, ob quam periculum suffocationis incurriscent,

sent, eo quod muscoli laryngis inflammati intercipiunt, aeris ingressum & egressum, remanente interea causa materiali inflammationis: Hinc genuinus Hippocratis sensus erit, quod illi, qui ex angina videntur liberati, sed citra inflammationis maturationem aut resolutionem & sine ulla manifesta materiae expurgatione, cum humor ille inflammationem faciens alio transferatur, & in pulmonem promptissime decumbat, sequitur, ut ex uno morbo, nempe ex angina incidant in peripnevmoniam seu pulmonis inflammationem: Sunt enim partes istae adeo inter se contiguae, & tum per musculos asperam arteriam circumcingentes, tum etiam per arterias, aliosque conspicuos ductus mutuo consentientes, unde prompte admodum humor inflammationem in gutture faciens, sponte sua potest in pulmonem decumbere; quamobrem ex illius translatione desinit inflammatio, in musculis gutturis & consequenter desinit angina, sed supervenit pulmonis inflammatio ac peripnevmonia. Apposite igitur *Heurnius* Aphorismum hunc ita legit: *qui ex anginosi fiunt peripneumonici*; quandoquidem non semper ex angina contingit peripnevmonia; sed si forte qui anginosi erant, videantur ab angina evadere, citra suppurationem, & purulenti humoris evacuationem, cum non possint tam repente & salubriter ab illa sanari, nisi humor qui inflammationem faciebat, alio transferatur, bene proinde scriptum est, in peripnevmoniam illos delabi: Ex transitu autem isto, & si patientes ab angina seu ab inflammatione gutturis & faucium liberentur, non tamen vitae periculum effugiunt, quippe peripneumonici facti, intra septem dies adhuc periclitabuntur: etenim non minoris acutiei & malitiae est peripnevmonia, quam sit angina, cum ob maximam respirandi difficultatem, febrem acutam ac continuam, contractu in laxa pulmonis substantia inflammatione, facillime aegrotantes mortem incurrant: Id quod clarius expressit *Celsus lib. 2. cap. 7. Si angina subito finita est, in pulmonem id malum transit, idque saepe intra septimum diem occidit.*

Statuitur autem ab Hippocrate, istius exitii terminus septima dies, non quod proprie ad septimum diem peripnevmonia protrahi debeat, ut interitum afferat, sed quod intra hoc temporis spatium mors contingere possit; unde non dixit septimo die pereunt, sed in septem diebus, sive ut clarius explicat *Fuchsius, Celsum* in hac parte secutus, intra septem dies, cum & ante septimum, quarto scilicet, quinto aut sexto die peripnevmonia interimere possit.

Sed quamvis facillime interire possint ægrotantes ex humore in pulmonem translato, tum ratione ipsius partis affectæ respirationi destinatæ, tum etiam ratione febris adjunctæ acutissimæ, non tamen omnino necesse est, ut subinde pereant, quasi quod inevitabiliter sint ex peripneumonia interituri; unde merito subjunxit Hippocrates: *Si vero hos effugerint suppurantur*: id est, si spatiū septem dierum transilient, quia humor in pulmonem delapsus, mitioris naturæ significatur, facileque subigibilis, & ex altero capite natura præpotens denotatur, quæ potuit tanti morbi impetum & violentiam sustinere, profecto delapsus humor in suppurationem in posterum vertetur, atque adeo prior morbus commutabitur in alium, atque ex peripneumonia fiet empyema, sanguis enim ibidem hærens, & qui inflammationem excitavit (ut supra etiam notatum est) maturitati subjectus in pus vertetur. Quare semper ac inflammatio, in sui augmento necem non attulerit, sed ad statum perducta, naturæ concoquenti subicitur, desinet proculdubio in suppurationem, quemadmodum in externis inflammationibus passim experimur. Verum tamen est, quod aliquando non vera inflammatione, sed potius erysipelate affecto pulmone, fortasse, quia sanguis tenuior est, sensibiliter vel insensibiliter per sudorem peripneumonia terminari potest; quamquam raro fiat, ut ab erysipelate pulmonis ægri evadant, cum plerumque phrenetici & quidem intra paucos dies moriantur, ut sæpius expertum in praxi, quod etiam ab eodem Hippocrate memoratur 2. de morbis.

Quoniam vero scriptum est ab eodem lib. 6 Aphorismorum 37. *angina correpto, si tumor fiat in collo bonum, foras enim morbus deducitur*: fieri potest, ut exinde evitetur peripneumonia, adeoque mors vel suppuratio, quia scilicet humor anginam faciens non ad pulmonem, sed ad partes exteriores colli deducitur: nam in hoc Aphorismo 6. Aph. 37. Hippocrates loquitur de levibus anginis: At nec semper id conferret, nisi solum cum per transpirationem humoris, ad partes colli exteriores affectæ liberantur: Nam si fortasse contingat, quod tumor in collo appareat, nec subinde musculi gutturis affecti exonerentur, certe majus vitæ periculum imminebit, quoniam humoris ad partes colli externas extramissio non sequitur criticam naturæ depositionem, sed potius arguit multitudinem peccantis humoris, qui cum non possit totus, in partibus internis gutturis absorberi, occupat ulterius partes externas & vitæ periculum non minuit sed adauget. Unde majoris dilucidationis gratia:

Quæ-

Quæres I. quod cum triplex passim sit Angina: *una* in qua nihil in faucibus apparet, cum magno dolore & spirandi summa difficultate: *secunda*, qua rubent fauces & quæ similem dolorem infert: *Tertia* in qua rubor & tumor extra apparent. Quam num ergo ex his potissimum intelligat Hippocr. ? Resp. primam & secundam, quia plerumque sunt lethales: *prima* enim interficere solet die prima, *secunda* & *tertia*: & *secunda* quamvis diuturnior sit, est tamen non minus lethalis; quare si mortem evitent, fieri non potest, quin materia transferatur ad pulmonem & suffocando aut interficiat aut suppuretur. *Quæres II.* Per quas vias transmittatur materia Anginæ ad pulmones? Resp. non per asperam arteriam, ut veteres credere. sed mediante circulo sanguinis & liquorum poris & canaliculis hiantibus ad pulmones transmitti: Dixit enim ipse Hippocrates *transpirabile & fluxile esse corpus totum.*

Aphorismus XI.

Qui Tabæ vexantur, si sputum quod extussiunt, carbonibus injectum, olet graviter, & capilli à capite defluunt, lethale.

Contentum seu Intentio.

De Prognosi Phthiſeos.

Connexio: Cum superioribus Aph. præsertim 9. ætatem quæ ad Tabem apta est explicuisset: in præsentī Aph. docet eventum funestum ejusdem Tabis per duo signa seu indicia ad prognosim pertinentia, nempe grave olentiam Sputi carbonibus injecti, & capillorum defluvium. Hic Aph. uniformis non patitur divisionem, quia simpliciter concludit. Debent autem ista duo simul in Empyicis copuli, ut interitum portendant, quandoquidem aliquando observatum est, ex sputo purulento, & male olente (ut ipse in praxi observavi) adhuc complures convaluisse; & ideo junctim illa retulit Hipp. ut certius prognosticum inde deducatur. Atque hinc claro etiam colligitur Tabidos hic Hippocr. adnotare, qui ex pulmone affecto & ex Empyemate in Tabem seu Phthiſim sunt delapsi, aliter purulentum sputum hic non memorasset, neque per tussim excretum, ut ex verbis textus manifestissime patet. Et quamvis sæpe numero purulentum sputum per se male oleat, potissimum cum pravæ conditionis est, & aliquandiu in pectore detentum, nihilominus non semper in Empyemate ejusmodi foetorem referre solet, nisi solum cum pulmonis substantiam ulceratam & putrefactam redolet, quippe tunc ulcus pulmonis & sæpissime etiam sordidum & cacoëtheticum subsequitur: addidit quoque Hippocrates, injectum carbonibus, ut scilicet phlegmatis & sputi ordinarii portio, si fortasse cum pure jungatur, vi ignis possit absumi, & quod purulentum est, in halitus melius diffundatur: id quod pariter discerni potest an puri phlegma & sputum ordinarium junctum sit, an vero non, quod, dum in aquam salſam infunditur, pus

fundum petat phlegma autem & sputum ordinarium supernatet teste Hippocrate; quod tamen perpetuo verum non est sed plerumque.

Sed & eodem teste Capilli defluere quoque debent, id est sponte sua è cutis poris decidere: etenim isti nunquam decidunt, nisi poruli cutis fuerint relaxati, & alimentum, quod illis suggeritur acre & erodens evaserit: Unde autem hæc in tabidis contingant, dubitari solet: Ego dicendum judico, id his evenire ex pure, quod sive præsentia sive halitu sanguinem circulantem inficit, imo dissolvit, eliquat, erodit, suoque glutine privat, & secretionem efficit, quam obrem expertum est, sanguinem in tabidis plus justo fluidum fieri & omni glutine orbatum apparere, unde partibus accedens, non solum nutrire & reficere non potest, sed potius acritate infensa & venenata illas extenuat & arefacit, quo deinde fit, ut capilli radicibus suis erosi, sponte sua decidant. At vero promptius è capite defluunt, quam ex mentho, superciliis aliisque partibus, quoniam istæ succulentiores sunt, & cutim crassiorem obtinent, at illud ex succum nimis est, & cutim ossi coherentem habet, unde pariter fit, ut ex vertice citius quam occipite depluant, quoniam in hoc cutis omnium est densissima. Hinc ergo fieri non potest, quin tabidi ad tantam perniciem deducti, non sint paulo post interituri, cum ex pure foetido in foetus & ulceratus pulmo sanguinem universum, & cor vitæ fontem virulenta contagine depravet, indeque totum corpus & alimento & vita privet. Accedit tussis molestissima, qua coguntur graves molestias & maximam virium jacturam tabidi subire, imo somno & quiete privari, & mille alia incommoda, cum quibus vita diu sustineri nequit. His infra additur alvi profluvium quo naturalis regio labefactata designatur, de quo sequenti Aph. dicetur.

Quoad sputum autem & hoc adhuc notandum venit illos Tabidos sæpius evasisse quorum pus album & non foetidum, ut de se ipso testatur *Cardanus* hoc loco, quibus autem pallidum viride, lividum, spumosum, subcruentum, & cænosum, plerosque interiisse: Sic pariter 2. de morbis inquit: *Si pus seētis defluat instar lutei ovi, aut crassum cum virore, sub pallidum foetens, moriuntur, ubi pus effluxerit,*

Dices etiam pituita è pulmonibus rejecta sæpe male olet, ergo non tantum pus. Resp. 1. ideo Hippocrates addidit foetori puris, capillorum defluvium, quod pituitæ raro jungitur, Resp. 2. cum *Cardano in Comm.* quod istud signum foetoris sit certum & proprium puri, quia licet convenire videatur crudæ pituitæ corruptæ, est tamen longe aliud genus tetri odoris in pure, cum sit pars carnis nempe pulmonis, aliusque partis corruptæ & non solius humoris crudi.

Aphorismus XII.

Quibus per Tabem capilli defluunt à capite, ij fluxione alvi superveniente moriuntur. Nota: Ejusdem quasitenoris est Aphorismus decimus quartus, qui sequitur in hoc libro.

Contentum seu Intentio.

De Diarrhoea Phthisicorum.

Connexio: Cum Hipp. in præcedenti Aphor. signa læthalia Tabis descripsisset, nempe si sputum injectum carbonibus male oleat, & capilli à capite defluunt: In præsentī modo Aph. subdit, quibus capilli defluunt, si alvi profluvium superveniat mortē præsto esse: Hic Aph. cum brevis sit divisionē non patitur. Quantumvis utraq; hæc memorata signa mortem portendant, non tamen tempore indistinctam præagiunt: Etenim lethale quidem signum est, sputum male olere, & capillos à capite defluere, sed non nisi post aliquod temporis intervallum: at vero cum post defluvium capillorum alvus solvitur, mors brevi imminet, nec ad longum tempus protrahitur, sed intra triduum vel quatrīdium irreparabiliter accidet.

Qua autem de causa post sputum purulentum & grave olens, itemque post defluvium capillorum alvus laxetur, facile quis dijudicabit ex corruptione à pure inducta, quæ cum sanguinem, & cæteros liquores corporis pertigerit, una simul corporis ductus delaxari necesse est, & potissimum qui feruntur in alvum, id est, ex ventriculo ejusque fermento, liene, jecore, mesenterio aliisque visceribus imi ventris; quare ex alvi fluxu certo conjicere poterimus universam corporis œconomiam esse resolutam, ac proinde extinctis à tabe diuturna viribus, vitam ipsam esse omnino desitutam: Id totum per bellè expressit Hippocrates *Lib. 1. de morbis* his verbis: *cum pus ipsam in ventre moram traxerit, totum corpus ab ipso incalescit, tum maxime vicinissimæ partes; calefcente autem corpore, humidum maxime eliquatur, & quod quidem à supernis partibus eliquatur, in supernum ventriculū præcipue confluit, fitque pus, ad hoc quod jam in ipso est. Pars vero ejus etiam in infernum ventriculū defertur, & quandoque alvus ab ipsa turbatur & hominem perimit, nam cibi ingesti, succedunt incoeli, & alimentum ab ipsis corpori non accedit: Et sputi sursum purgatio non aequalis contingit, alvo nimirum calefacta, & omnia deorsum trahente in se ipsam: Et à spuo quidem suffocatur, & stetit dum non purgatur: à ventre vero fluente debilitatur & plerumque perimitur.* Cæterum hæc non nisi contingunt Tabidis ex diuturno pulmonis ulcere, & febre ut vocant habituali seu hectica emaciatis, quibus nil ultra videtur, toto corpore remansisse; quam sceletos sola pelle contactus: Unde nec inconcinne Hippocrates 7. Aphor. 6. asserit, non solum in Tabē, sed in omni diuturno morbo, pessimum signum est alvi fluxus seu sinceræ dejectiones.

Dices sæpe accidit alvi profluvium criticum phthisicis non symptomaticum v. gr. rupta Vomica, vel etiam dum sanies ab ulcere sordido, per alvum rejicitur, cum Euphoria & tussis remissione; Ergo alvi profluvium in Tabē non est adeo funestum

flum, Resp. in hoc Aph. alvi profluvium solum non esse funestum, sed conjunctum, cum capillorum defludio, quod jam clare ad captum discussum est priori Aphorismo.

Aphorismus XIII.

Qui Spumantem (seu spumofum) sanguinem extusfiunt, iis è pulmonibus educitur.

Contentum seu Intentio.

De Diagnosi hæmophthysos.

Connexio: Magnam dependentiam habet præsens Aphor. cum duobus superioribus; cum enim in illis sermonem habuisset de tabe seu Phthisi; nunc in præsentis Aphor. de sputo sanguinis seu Hæmoptoe seu Hæmophthysi verba facit, quod Tabis seu Phthysos signum quasi pathognomonicum censeatur. Hic Aphor. simplicem conclusionem habet, adeoque non dividitur. Etiam si Tabidi diversimode fieri possint ab affecto pulmone, ut in superioribus ostensum est; peculiariter tamen Phthysici fiunt ex præcedente sanguinis sputo, ut clare exprimit Hippocrates Lib. 7. Aph. 15. *A sanguinis sputo, puris sputum malum: & 16. ejusdem libri: A puris sputo Tabes & fluxus: quum vero sputum retentum fuerit, moriuntur.* Quoniam vero sanguineum sputum non semper ex pectore & pulmone emanat, quamvis per tussim inde prodeat, id circo accuratissimus Hippocrates indicia tradens, quibus ejusmodi eruptionis sanguinis affectas partes internoscere possimus, adjicit in hoc Aph. signum, illudque pathognomonicum, prodeuntis è pulmone sanguinis, esumptum à modo ipsius rejectionis; & qualitate sanguinis rejecti.

Et quidem *Modus rejectionis* cum tussi esse debet; nam quæ in pectoris cavo continentur, non nisi tussi egeri possunt; quam ob rem accuratiores Interpretes, loco verbi *exspuunt* vertunt (& quidem rationabilius) *extusfiunt*, sicut & Galen. in *Comment.* innuere visus est. Nam simpliciter sanguinem spumofum exspuere tribuitur quoque ab Hippocrate in *Coacis prænotionibus* dextro præcordio dolentibus atque ex hepate; quamvis ne hic spumofus sit ex conditione rutilantis sanguinis, sed ex sola interceptione & permixtione aëris in ductibus, vel asperæ arteriæ, vel oesophagi, unde foras profilit, cum per utramque viam è Jecore prodire possit, facta scilicet in eas partes, irruptione à compressio per tumidum, dolensque Jecur, Diaphragmate.

At vero, quia non semper sanguis, qui tussi ejicitur è pectore, aut pulmone prodit, cum fieri possit, ut è faucibus capite, gutture, aspera arteria, in pulmonis Bronchia delabens, tussi pariter egeratur idcirco ad differentiam istarum expulsionum, adjecta est in Textu *qualitas sanguinis excreti*, ut proinde si *spumofus* ille sit, floridus & rutilans, è pulmone prodire dicatur, qui vero alterius est conditionis, fortasse nigricans, grumofus & minime floridus, certe ab aliis partibus, quam à pulmone prodibit, etiam si tussi egeratur.

Solius

Solius ergo pulmonis erit sanguinem spumofum egerere, quoniam in solo pulmone hujusmodi sanguinis qualitas invenitur; fit autem spumofus sanguis, à mixtura illius cum aëre, qui cum pulmones duntaxat ingrediatur proufus respirationis, idcirco nullibi, quam in pulmone, spumofus inest.

Advertendum tamen est, quod tunc spumans è pulmone egrefus sanguis apparebit, cum immediate è suis vasis exilit: nam si fortasse è pulmone sanguis guttatim in pectoris cavum extillet, aut etiam in Tracheolis asperæ arteriæ per aliquod tempus detineatur, procul dubio, spumis expers extuffietur, quandoquidem sanguis ibidem restagnans, mox concrefcit & grumofus egeri potest; sed & è contra falli quoque contingit in eo, quod multoties tuffi excretum, credatur è pectore prodiisse, cum tamen ab aliis partibus processerit: hinc valebit illatio affirmativa, secus vero negativa: nempe, sanguis spumofus prodit, ergo à pulmone est, at non è contra; sanguis non spumofus egeritur, ergo ab aliis partibus quam à pulmone: Hæc duo tamen tuffis nempe & spuma sanguinis si adsint, notabile præstant argumentum à pulmone vitium procedere, attamen ut vere spumofus dicatur, non sufficit, habere spumam superficiei tenus, sed totam ejus substantiam velut spumam esse oportet, si vero tota sua substantia non fuerit spumofus, potest etiam ex alia parte prodire quam ex pulmone; Cavendum pariter, ne quis fallatur cum ex capite sanguis ad asperæ arteriæ infundibulum aut pelvim fluens, tuffimque excitando, tuffique excernatur, ne quis putet ex pulmone educi, nec enim tunc spumofus apparebit, & magis screatu quam tuffi excernetur, aliaque signa aderunt quæ ex capite descendere ostendent.

Insuper ab ejusdem sanguinis excreti quantitate dijudicare poterimus, num sanguis ab ipsa pulmonis substantia, & à vasis exilibus, per illius substantiam diffusis, egeratur; an vero à vasis majoribus, per quæ sanguis in circuitum adigitur, uti sunt vena cava ascendens, & vena arteriosa itemque arteria venosa & bronchialis: siquidem cum sanguis ex vasis majoribus erumpit, non tantum spumofus sed etiam copiosus erit, quin imo periculum suffocationis minabitur; at vero cum è pulmonis substantia & è vasis exilibus prodit, neque multus erit, neque tam proximum vitæ periculum minatur.

An insuper sanguis undecunque ex ore prodiens è venis, an pe-
tius ex arteriis egeratur, controversi potest. Et sane attenta, tum
qualitate sanguinis floridioris, tum etiam ejusdem circulatione veri-
similius dicendum ex arteriis prodire, quippe in arteriis floridus ma-
gis & rutilans sanguis invenitur, nec non per arterias ad partes ex-
currit, per venas vero remeat in cor; imo semel venas ingressus, re-
gredi non potest, impredientibus scilicet valvulis. Solum venæ
compati poterunt, si fortasse fuerint erosæ, nam tunc ob erosionem,
qua data porta, sanguis exinde manare poterit. Cæterum etsi è re-
liquis partibus pectoris, imo etiam aspera arteria sanguis possit ex-
stillare, is tamen neque multus, neque spumofus erit; quippe san-
guis nullibi, præterquam in pulmonibus spumofus invenitur.

Ex his demum admonemur Tabem ac Phtisim proprie dictam
ab ulcere pulmonis exoriri, idque non nisi à sanguinis sputo de quo
idem Hippocrates citatis supra locis *Lib. 7. Aph. 15. & 16.* scribit:
à sanguinis sputo puris sputum, à puris sputo Tabes, à Tabe mors: unde
tunc proprie ~~empirei~~ & phtisici morientur ægri ut præcedentibus
Aphorismis dictum est, cum sanguinis sputum præcesserit, atque ille
è pulmone prodierit,

Denique licet plerique absque sanguinis sputo & ulcere pulmo-
nis tabidi referantur, nihil tamen huic Aphoristica sententiæ refra-
gabitur, qua solum Hippocrates docet, sanguinem per tussim excre-
tum, tum revera à pulmone prodire, cum spumofus est, atque hinc
necessario fieri ut Tabes & phthisis oriatur, ac postremo mors. Hinc
autem minime negatur, posse etiam Tabem ac phthisim aliunde pro-
ficisci, etsi sputum sanguinis nullum præcesserit: attamen verum sem-
per erit, pulmonem in cunctis tam male affici, ut ineptus evadat san-
guini perficiendo & vitæ ac motui cordis conservando.

Quæ vero sint medicamenta fluentem hunc sanguinem sistere,
& cohibere valentia, ea ex praxi petenda erunt.

Objectiones circa hunc Aphorismum in contextu sunt solutæ.

Aphorismus XIV.

*Si Tabe detento (seu habito) profluvium alui super-
veniat, lethale.*

Con-

Contentum seu Intentio.
De Diarrhæa Tabidorum.

C*onnexio:* Hic Aphorismus fere idem videtur cum Aphorismo duodecimo hujus libri, in quo dixerat Hippocrates, profluvium alui cum capillorum defluxu, mortem paulo post Tabe laborantibus allaturum, & id ipsum fere in præfenti Aphorismo repetit: Hinc creditum est à commentatoribus nihil prorsus novi in hoc Aphorismo contineri, quod in memorato duodecimo dictum non sit. At vero non tam temere de Hippocrate suspicandum, quod bis idem omnino repetere voluerit: Quamobrem opinandum, aut illum voluisse hoc loco Tabidos omnes generaliter comprehendere, imo etiam alia quacunque de causa, aut morbo macie confectos, cum alui profluvium, quibuscunque extenuatis superveniens lethale sit, veluti labefactatæ omnino naturæ indicium: vel etiam significare voluisse solam diarrhæam & alui solutionem tabidis esse perniciosam, licet cætera alia symptomata antea memorata deficient, inde, quamvis capilli à capite non defluant, & licet sputum purulentum ingentem foetorem non redoleat, si nihilominus alvi profluvium Tabidis superveniat, lethale est; quoniam cum Tabidi, veluti omnino extenuati, nihil habeant, quod egerere possint, vel debeant, quin imo indigeant potius instauratione, & carniū appositione, procul dubio alvi profluvio si corripiantur, morientur, solutis exinde omnino viribus & labefactata penitus in ipsis reficiendi Facultate.

Verum tamen est quod pro Tabidis hic intelligere debeamus, qui diuturna Tabe (unde dixit *detento* seu *habito*) fuerunt affecti, atque extrema macie consumpti, his etenim quæcunque evacuatio superveniens perniciosa est, cum ex quacunque evacuatione penitus deficient: Neque satis est, si semel tantum alvus laxetur & excrementa solum deiciat, sed omnino necesse est, ut iterato & sæpius solvatur, & non tantum quæ ventriculi & intestinorum cavitatem occupant, sed etiam quæ in intimioribus partibus continentur, & intra ductus corporis relictæ erant, copiose & affluenter egerat.

Accidit quoque ut aliquando etiam iterata vomitio necem attulerit, itemque immodica urinæ profusio, sudor, hæmorrhagia; si qui-

dem ejusmodi evacuationes, veluti omnino incompetentes, tabidis exitum parant, brevique temporis intervallo, prout ex superius traditis facillime deduci potest.

Objectiones Et difficultates in contextu hujus & Aphorismi duodecimi sunt solutæ.

Aphorismus XV.

Qui ex pleuritide (seu morbo laterali) empyi fiunt (seu suppurantur) si à ruptione intra dies quadraginta (seu à die qua fit ruptio) sursum purgentur, liberantur; alioquin transeunt in Tabem.

Contentum seu Intentio.

De Prognosi Empyematis.

Connexio: Pace divi Senis dixero, melioris ordinis causa hic Aphorismus debuisset sequi octavum qui æque de pleuritide & de ejus suppuratione egit. Edocuerat autem ipsissimo Aphorismo octavo Hippocrates, pleuriticos in suppurationem desituros, quandoque in quatuordecim diebus non forent repurgati; In hoc vero Aphorismo eosdem in Tabem lapsuros inquit, cum intra quadraginta dies materiam in pectore contentam per anacatharsim non penitus expurgaverint; unde differt tamen hic Aphorismus ab octavo, eo quod ibi suppuratio portendatur, materia in quatuordecim diebus non repurgata; In hoc vero Aphorismo, ex eadem suppuratione præsignetur tabes in diebus quadraginta; in octavo ergo prædixit pleuritidem transmutari in suppurationem, nisi intra quatuordecim dies repurgetur; In hoc vero de termino suppurationis nempe quadraginta diebus loquitur.

Cum autem pleuritis sit de genere morborum acutorum, & morbi acuti vel in quatuordecim diebus terminentur, si exquisite acuti sint, vel protrahantur, ad dies quadraginta, si fuerint acuti

acuti ex decidentia, & quodammodo spurii; proinde quodocunque pleuritis ad decimum quartum diem, iudicata non sit, prorogari poterit ad quadragesimum diem, præsertim in alium morbum commutanda, unde si spatium quatuordecim dierum, materia pleuritidis, per tussim non fuerit expurgata, vertetur in suppurationem & Empyema: à die vero decimo quarto usque ad quadragesimum, nisi suppurata adhuc per Anacatharsim seu expectorationem expurgetur, à detento pure in pectore vel pulmone, Tabem & phthisim inferet: Hinc humor qui faciebat pleuritidem, duplicem subire potest mutationem; *Vnam* quidem ad diem decimum quartum coctionis, & suppurationis; *alteram* vero expurgationis seu expectorationis, spatium quadraginta dierum, quo transacto, quia purulentus humor ob diuturniorem moram, pulmonem simul & sanguinem per cor circulantem inficit, & sic plane tabem ac phthisim, adeoque febrem habitualement & consumptionem universalem affert.

Quod vero adjectum est in textu, illos liberari à die, *quasi ruptio* manifeste declarat, ob expurgationem impofterum subsequentem, revalescentiam exoriri, quemadmodum contigit Anaxioni, qui trigesima quarta die iudicatus est: Sed non per hoc, quod intra quadraginta dies non sint repurgati, omnino fit, ut tabidi interire debeant, quia fieri potest, ut etiam ultra hoc tempus repurgatio retrahatur, & evadant: multoties enim accidit, ut vel ex multitudine, vel ex crassitie materiæ suppuratæ, satis non sint dies quadraginta ad integre explendam à pectore repurgationem, unde deinceps adhuc expectatio desideretur ac perduret.

At vero initium hoc quadraginta dierum, non erit à principio pleuritidis desumendum, sed à quo die maturatio & ruptio apostematis facta est; Etenim inde principium faciendum, à quo tempore puris expectatio haberi potest: modo ante maturacionem, & ante ruptionem Apostematis nulla per Anacatharsim expectanda repurgatio: Itaque cum inquit Hippocrates à die *quasi ruptio*, certo ab eo tempore computus quadraginta dierum faciendus est: hinc etiam non nisi post quadraginta dies periculum erit futuræ Tabis, quoniam tunc Tabes accidit, quando materia purulenta, in pectore retenta pulmonem infecerit, illumque exulceraverit:

verissimile autem est intra spatium quadraginta dierum, pulmonem ab exulceratione illæsum posse perseverare, ut proinde si totum pus interea fuerit repurgatum, non solum à pleuritide & à suppuratione, verum etiam à Tabe æger facile liberabitur.

At quo pacto dignosci possit jam apostema ruptum esse, indeq; pus fuisse collectum in cavitate pectoris, plene edocuit idem Hippocrates *Lib. prænotionum* his verbis: *Caterum* (inquit) *omnes suppuratos, ex his signis cognoscere oportet: primum quidem si febris non dimittit, sed per diem quidem tenuis est, noctu vero amplior & sudores multi oboriuntur tussesque, ac tussendi promptitudo ipsis adest, & nihil memoratu dignum expuunt, & oculi cavi fiunt, & maxilla ruborem contrahunt, & ungues quidem manuum curvantur, digiti vero calescent, & potissimum summi, & in pedibus tumores fiunt, & cibos non appetunt, & pustulae per corpus nascuntur.* Et num in dextro vel in sinistro latere pus collectum sit, his indiciis ibidem tradit: *si vero* (inquit ulterius) *suppuratio fuerit, in altero latere solum, vertere & considerare oportet, in his, num aliquem habeat dolorem in altero latere, & an alterum altero sit calidius, & agro in latus sanum reclinato, interrogare ipsum an videatur ipsi grave quid ex superno latere incumbere; si enim hoc fuerit, in eo latere est suppuratio, in quo gravitas percipitur.*

Quod vero non in omnibus æque suppurationes fiant, & neque suppurata apostemata æqualiter in ipsis rumpantur, docet expresse eodem loco inquit: *at vero alia suppurationes rumpuntur, plurima quidem vigesimo die, alia vero trigesimo, alia quadragesimo, aliqua vero ad sexaginta dies perveniunt: considerare vero suppurationis principium oportet, suppuratione facta à die qua primum homo febricitavit, aut si forte ipsum primum rigor apprehendit, & si pro dolore gravitatem sibi factam esse dixerit, in eo loco, in quo dolebat: hac enim in principiis suppurationum fiunt; ex his igitur initiis suppurationem juxta tempora prædicta futuram expectare oportet.* Denique an citius vel tardius futura sit suppuratio sic postremo Hippocrates eodem loco concludit: *Siquidem dolor & spirandi difficultas ab initio adsint & tussis & sputatio perseverans, ad vigesimum diem pertingat, eruptionem tum expectare oportet, aut etiam prius: Si vero quietior fuerit dolor, & omnia alia pro hujus ratione eruptio posterius expectanda venit: necesse vero est accedere & dolorem & spirandi difficultatem & sputationem ante puris eruptionem.* Hæc ex Hippocrate hucusque dicta fuere.

In fine Aphorismi additur: *alioquin* (velut alii *si vero non*) *in Tabem transeunt*; hoc est si spatium quadraginta dierum non fuerint ex toto repurgati, ratione scilicet detenti puris pulmo inficietur & ulcus contrahet, atque adeo tabem inferet, quia ex diuturna puris per tissim repurgatione, ejusdemque transitu per pulmonem, facile is eroditur & ulceratur, ab ipsius autem ulcere contingit Tabes & mors. Sed & insuper quodocunque materia ex pleuritide suppurata, intra hoc tempus expulsa non fuerit, & adhuc perdurat, metuendum est à præcedenti pleuritide, ejusque suppuratione, *Vomicam* quoque in pulmone fuisse contractam, quæ disrupta puris productionem continuo foveat, ut propterea etsi jugiter per anacatharsim illa egeratur, perpetuo tamen alia, & alia ex ulcerato pulmone effluat, unde puris ex creationem in longius tempus protrahat atque perennet.

Signa salutis & mortis & etiam dubii eventus in suppuratis in compendio proponit Hippocrates *in Prognosticis*: *Salutis* quidem si febris statim è ruptione cesset, qui album & leve & æquale sit, appetitus redeat & facile expurgetur: *Mortis* vero si omina contraria adsint. *Dubii eventus* si partim bona, partim mala appareant & penes vires magis, minusve constant.

Quomodo autem & quibus mediis Tabidis & suppuratis occurrendum, id petendum ex Praxi erit, ubi pariter an Paracenthesis locum habeat nec ne clare resolvitur.

Dices Qui sunt temperamenti calidioris, citius, qui frigidioris tardius repurgantur, ergo non videtur bene assignasse quadraginta dies Hippocrates, &c. Hanc difficultatem jam esse solutam in contextu; præterea Hippocrates locutus est ut plurimum, non ut semper & irrefragabiliter.

Aphorismus XVI.

Calidum frequentiore usu, (seu ubi quis sæpius eo utitur) hac invehit incommoda; carnis effæminationem, nervorum incontinentiam (seu imbecillitatem) animi (seu mentis) torporem; profusiones (seu profluvia) sanguinis, animi deliquia: ad quæ quidem mors, (seu quibus mors succedit.)

Con-

Contentum seu Intentio.

De Calidi excedentis Noxis.

Connexio: Cum haftenus in prioribus Aphorismis, multa ac erudita, de *convulsione, Tetano, Epilepsia, pleuritide, angina, Tabe, Empyemate, suppuratione*, morbis utique gravissimis, oppidoque frequentioribus dixisset Hippocrates: Nunc in sequentibus ad duas qualitates, activas veteribus primas dictas, *calidum* scilicet & *frigidum* accedit, quæ & morborum causæ potissimæ, nonnunquam etiam remedia sunt; atque in præsentī Aphorismo in specie, caliditatem assumit; breviter quodammodo innuens nullum esse tam innocens remedium, quod noxa careat, & præcipue, si non debito modo fiat.

Noxas ergo ac detrimenta *calidi* in hoc Aphorismo memorat Hippocrates, relaturus in sequenti Aphorismo, incommoda quæ ex frigore proveniunt: Cum autem *calidum* dicat, non *calorem*, quæri hoc loco primum potest, quid nomine *calidi* voluerit intelligere: & quidem ex ipsamet voce clare deducitur non calorem nude sumptum pro qualitate, ut veteres scholastici intelligere solent, is acceptum voluit, sed rem potius calidam, potissimum quia, medice loquendo, quæ corporibus adhibentur calida, non nisi res calidæ sunt, sive medicamenta, sive alimenta, sive alia quæcunque corpora illa sint, cum nunquam sensiones in corporibus fiant, nisi à rebus similiter corporeis.

At vero si rem calidam, calidumque corpus hoc loco designare voluit, videndum de quo specialiter id dictum intelligat. Et revera bene *Fuchsius in commentario* de aqua calente exponit, quod colligit ex *libro de usu humorum*, unde præsens Aphorismus videtur desumptus; quandoquidem damna, quæ hic à calido memorantur, nisi illud cum humore jungatur, neutiquam subsistere poterunt, nam corpora calida & arefacientia, id est quæ calorem siccitati conjunctum habent, nullatenus possunt, *corporis effæmationem, nervorum imbecillitatem, mentis torporem, profluvia sanguinis, animi defectiorem*, & alia consimilia mala parere, cum potius à siccitate seu rebus siccis ac ex siccis contrarii effectus oriantur: Igitur probabilius est, voluisse Hippocratem hic notare calida in humoribus, seu liquoribus qui-

quibuscunquē, potissimum vero in aquis, quæ inter liquida & humida corpora primum locum obtinent: quamquam & usus diuturnus hypocausti, longa insolatio, atque ad ignem immoderata excalefactio, & longior sub sole mora, possit id ipsum afferre, sed tamen diuturniori tempore, & exitu difficiliori.

Num insuper de *calido* intra corpus assumpto, an potius de calido extrinsecus admoto, potest iterum dubitari: Et verisimilius videtur dicendum, sermonem hic haberi de calido exterius admoto, potissimum de Balneis, ac lotionibus aquarum, tam Thermalium simplicium & naturalium, quam artificialium & compositarum. Illa enim ut experientia constat, cutim laxando, & humefaciendo, sudorem promovendo, sanguinem eliquando, & Lympham extenuando bene possunt ac solent, carnes, artus, nervos, musculos, & viscera quæcunque corporis, diluere, mollificare, delaxare & prolongare atque illam (quam Hippocrates *effæminationem* vocat) dispositionem producere. Quæ vero interius assumuntur præterquam quod sæpe sæpius per fermenta ventriculi consentanea, vel dissentanea calorem amittunt, neque tam facile in totum corpus calefactoriam vim & calorem, quem actualem vocant, communicare valent, licet attenuando, dissolvendo, acuendoque sanguinem, sint in causa ut corpus aliquantulum incalescat: At vero passim experimur balnea, tum naturalia tum artificialia promptissime solere ejusmodi corporis delaxationem parere.

An præterea *calidum* intelligi debeat *moderatum* vel *immoderatum* rursum quæri potest: Et sane, licet immoderatum calidum, efficacius in his omnibus de quibus sermo, in præsentī Aphorismo est, operetur, nihilominus si verba textus attendantur, videtur calidum adhuc moderatum, fuisse hoc loco consideratum; etenim in Aphorismo dicitur *frequentiori usu* seu, *ubi quis sæpius eo utitur*: non videtur autem verisimile, quod quis sæpius utatur calido immoderato, quod toleratu non est tam facile. Imo si fortasse Hippocrates voluerit, hoc Aphorismo, morem veterum vituperare, qui frequenter balneis utebantur, certe quia usus balneorum non erat nisi cum moderato calore, dicendum erit moderatum calidum fuisse in hoc Aphorismo descriptum. Accedit quod calidum hic contraponitur frigidus sequentis Aphorismi: at vero

in Aphorismo sequenti, non nisi frigidum moderatum considerandum proponitur, igitur & moderatum calidum in hoc præsentî Aphorismo, erit quoque intelligendum. Verum tamen pro moderato non intelligimus, quod consentaneum naturæ est, & nullum excessum supra mediocritatem habet, sed quod à mediocritate quidem recedit, non tamen extremum frigoris gradum attingit, ut propterea non sit conveniens naturæ, sed nec sit omnino in summo positum: Id ipsum quoque dicendum de calido, quod non sit in excessu caloris urentis, sed à mediocritate naturæ consentanea declinet: debet autem calidum istud, & si non multum excedens diutius tamen iteratis vicibus & sæpius adhiberi, ut exinde nocumenta in textu memorata subsequi possint, alias si semel & brevi adhiberetur, quia non multam in partibus corporis læsionem induceret, neque posset relata in Aphorismo detrimenta afferre. Itaque optimo jure notatum est ab Hippocrate *longiori usu, seu, ubi quis eo sæpius utitur*: quibus verbis denotatur frequens & iterata rei calidæ administratio: hac quippe ratione *calidum* etsi non multum excedens, potest memorata damna parere, nam quod semel & brevi inferre nequit, iteratis vicibus ac frequentius bene poterit excitare: unde (ut paucis dicam multa) sive calidum intensum adhibeatur excessive semel, vel moderatum & sæpius & abusive adhibeatur, utrumque nocet & nocere potest. Damna autem quæ hoc loco describuntur, spectant partim ad operationes animales, partim ad vitales, partim denique ad naturales: ad animales, *Nervorum imbecillitas & mentis Torpor*: ad vitales, *profluvia sanguinis & animi defectiones*: ad naturales demum; *Carnis effæminatio & totius corporis languor*.

Qua vero de causa *carnium effæminatio* à calido proveniat, facile quis dijudicabit (ut jam quidem supra innuimus) attenta perspiratione copiosiori cutis & majori laxitate e corporibus calidis contingit; hinc motus Aristoteles *Lib. de longit. & brevit. vita* dixit Æthiopes & qui Regiones sub zona torrida inhabitant, non tantum imbecilles & effæminatos observari verum etiam brevissimam vitam ducere, languescere nimirum vitali partium calore, & dissipatis ex ambiente calido spiritibus, unde totius corporis & operationum vitalium languor.

Nervorum quoque imbecillitas seu incontinentia, ex eadem causa

causa provenit, etenim quotiescunque partes solidæ corporis & viscera quæcunque languent, tum sanguis tum omnia fermenta, ex illo derivantia, plurimum dissoluta, nequeunt liquorem nervorum suggerere talem ac tantum, qualis & quantus necessarius illis est: sed & fibræ nerveæ, plus justo à calore delaxatæ, neque firmæ & constantes esse possunt, ad pondus partium sustinendum; quamobrem nervorum imbecillitas contingit, unde etiam reliquæ partes imo totum corpus languidum observatur in omnibus præsertim operationibus animalibus: Notavit autem expresse Hippocrates *mentis Torporem & nervorum imbecillitatem*, ut tum ea quæ ad Hegemonicas seu principales (id est animales & vitales) operationes pertinent, tum etiam quæ ad operationes sensitivas & motivas sunt addicta, sub his duabus vocibus comprehenderet: & quidem *mentis Torpor* de quo *Sectione 3. Aph. 5.* docuit, non nisi significat hebetudinem operationum animalium, pertinentium ad sensus internos scilicet ad imaginativam, æstimativam & memorativam: *Nervorum* vero *imbecillitas* complectitur languorem sensuum externorum & motuum animalium, qui non nisi per nervos in musculis peraguntur. Quod autem calidum frequenter adhibitum, valeat etiam sensus internos hebetare patet manifeste ex iisdem rationibus supra recensitis, nam ex illo funduntur humores, sanguis dissolvitur, succus nerveus extenuatur, spiritus dissipantur, quibus omnibus deficientibus, necesse est plurimum quoque hebescere & infringi, prædictas operationes animales, quæ absque vegeto sanguine & nervorum liquore repurgato, itemque sine præpollentibus spiritibus perfici non possunt.

Neque solum læduntur quæ ad animale partem pertinent operationes, verum etiam quæ ad vitales, ubi calidum intra fines mediocritatis non fuerit coercitum: Etenim cum id ejus sit virtutis, ut rarefaciat, attenuet, dissolvat, aperiat, proculdubio laxatis venarum & arteriarum osculis, atque eliquato sanguine facile *hæmorrhagias* seu *profluvia sanguinis* excitare potest, & quidem non solum reſeratione, sed etiam erosione vasorum, præsertim cum in aliquibus, propter acredinem, prompte admodum in fermentationem attigitur, & partim distendendo, partim etiam proritando extra sua vasa profilit: Hac porro ratione fit, ut hæmorrhagiæ facilius contingant æstate, & in regionibus calidis quam hyeme & in regionibus frigidis, quan-

doquidem per æstatem & in regionibus calidis, sanguis admodum rarefcit & prompte fermentefcit, fecus vero hyeme & in Regionibus frigidis. Quia vero non explicuit Hippocrates, unde sanguis ex frequenti usu calidorum profunderet, ansam præbet dubitandi, num ex naribus, ore, hæmorrhoidibus, an ex aliis corporis partibus erumpat: Credere autem licet ex omnibus indiscriminatim posse manare, cum calor æque bene universum sanguinem fundendo, possit omnes & quascunque venas aut arterias relaxare & aperire: sed tamen specialius possunt narium arteriolæ ac venulæ veluti delicatiores, ejusmodi incommoda subire, præsertim in Adolescentibus; quamquam in cæteris etiam hæmorrhoides referari possint, pro varia corporum affectione, & sanguinis in hanc vel illam partem irruptione faciliiori.

Ufus deniq; est nomine *profluvii sanguinis* græce *hæmorrhagia*, ut nimirum ostenderet, non quamcunque sanguinis evacuationem exinde designari, sed largam, copiosam & fortasse etiam iteratam, ad differentiam illarum sanguinis evacuationum, quæ guttatim solum fiunt, & modica duntaxat quantitate quæq; stillicidia à Medicis appellari solent, cum paucæ nimirum stillæ erumpunt. Quod autem exitus sanguinis copiosus & immoderatus hic intelligatur patet ex sequenti textus dictione *animi defectionem*, nam animi defectio, non ex quacunque sanguinis evacuatione, sed ex immoderata & incompefcibili procedit.

Contingit autem animi defectio, tum ex immodica sanguinis eruptione tum etiam ex spirituum & partis ejusdem floridæ nimia dissolutione, quamobrem, his deficientibus, vivens animo deficit & moritur, unde textus *ad quamors*. Pro animi vero defectione licet græce scriptum sit *Lypothimia*, nihilominus cum exinde dicatur *ad quamors* seu *quibus mors succedit*, certe fortis & vehemens illa intelligenda est, quæ proxime accedat ad Syncopen, nisi tamen Lypothimia sæpius redeat, quo casu etsi levior quam Syncope sit, ob recidivam & reditum tamen facile posset mortem asferre, præsertim ubi quis natura debilis ex immoderata sanguinis evacuatione, nullo negotio à quacunque animi defectione succumbit.

Pro coronide non reticeo, prout supra obiter innui hunc Aphorismum Hippocratem potissimum scripsisse hominibus sui ævi & Patriæ, ut nimirum à nimis familiari Balneorum usu (quibus tunc erant dediti) deterrentur: Germaniæ incolæ, ad monitione
hac

hac Hippocratica non egere, ex eo liquet, quod complures saltem Germani Balneorum externorum loco, hospitia potius colant, & guttura potius quam corpora diluant: unde Poëta:

Quicumque est Teuto morbum hunc ex ubere suxit.

Ad Lymphæ nomen pollet, sudat. tremit, alget

Triste est supplicium Germano audere carebis

Si neque suspendit patrem, matremque cecidit.

Itali & Galli obijciunt Germanis sequens distichon.

Germani cunctos possunt perferre labores

O Utinam! possent tam bene ferre sitim.

Germani Italis & Gallis respondent sequenti.

Ut nos dulce merum, sic vos Venus improba vexat

Lex posita est Veneri, Julia nulla mero.

Germani sitiunt vinum, tuque improbe Galle

Perfidiam, lites, dissidiumque sitis.

Difficultates & objectiones circa hunc Aphorismum moveri solitæ, jam sunt solutæ in contextu.

Aphorismus XVII.

Frigidum vero convulsiones, Tetanos, nigrores (seu livores) & rigores febriles.

Contentum seu Intentio.

De frigidi excedentis noxis.

Connexio: Cum in præcedenti Aphorismo Hippocrates egisset de damnis & noxis calidi: accedit nunc in præsentī Aphorismo, ad nocumenta & incommoda frigidi explananda; ut revera hic Aphorismus quasi pars præcedentis esse videatur. Hic Aphorismus uniformis nullam subit divisionem.

Pergit ergo nunc in hoc Aphorismo ad enarranda mala, quæ ex frigore viventibus contingunt, & pari loquendi formula non *frigus* sed *frigidum* recenset, pro quo etiam non qualitatem sed corpus &

rem frigidam intelligere est, eamque potissimum cum humido conjunctam, veluti aqua frigida, nix, glacies, aliave res consimilis, quamquam quodcunque corpus frigidum, etiam durum, solidum, siccum, pro rata sua intelligi possit, quemadmodum de calido superius dictum est; sed & aër ipse qui inter corpora fluida collocatur, si frigidus plus justo fiat, nix, grandine, gelu, itemque ventis Borealibus, pari ratione eadem detrimenta inferre potest, ut propterea quodcunque extrinsecus viventia male afficiens, frigore cujusvis generis poterit prænarrata mala excitare, verum tamen cum frigidum per comparisonem ad calidum, longe admodum infensius sit hominum vitæ, quæ calore fovetur & conservatur, plane, ut ejusmodi mala corpori incutiat, intensiori gradu molestare debet, etenim ab intraneo calore aliquatenus repercutitur, imo facta constipatione in poris cutis, aliquando vis illius fortificatur, nisi propter excessum externæ partes hebetentur & mortificentur.

Cum igitur extrinsecus ad motum, vel diuturniori tempore, vel intensiori gradu, cutis poros constipando, effluvia impedit, & sanguinem circulantem in apicibus arteriarum, per partes extimas corporis excurrentium, figit & coagulat, in causa est ut aliquando etiam mortificatio, syderatio seu sphacelus subsequatur. Hinc ab Hippocrate, inter præcipua illius damna referuntur convulsiones, Tetani, Livores. *Convulsiones* quidem & *Tetani*, ob rigiditatem & contractionem inductam in fibris nerveis, & congelationem, in ipso nervorum liquore seu succo nerveo, qui propterea nequit membranas irrorare, & pro rata sua vigorem iisdem importiri: *Convulsiones* autem hic memoratæ, non motus convulsivi, sed veræ & propriæ convulsiones intelligendæ sunt, per quas nervi & muscoli rigidi, immobiles & inflexibiles redduntur, cum frigoris sit hebetare, obtundere, & motum cuicunque rei adimere. *Tetani* vero ad convulsiones etiam referuntur & quidem universales, cum ex illis universum corpus rigidum & immobile fiat, ut neque ad anteriora neque ad posteriora flecti possit. Id autem non semel expertum est in his, qui per loca nivosa & montana hyemali tempore iter facientes, ingentis frigoris incommoda subire coacti sunt.

Accidunt præterea ex frigore *Livores* seu nigrities & mortificationes in partibus externis eandem ob causam, quia sanguis præ frigore

gore constipante, nequit per eas partes circuire, ut proinde nec illas possit vivificare, unde veluti emortuæ, & viribus ac calore vitali destitutæ, nigrorem subeunt, ut in cadaveribus experimur. Observatum non raro etiam est, in tantam labefactionem externas partes corporis, potissimum manus & pedes incidisse, ut Gangrænam incurrerint, & deinde à reliquis partibus sejunctæ, sponte sua conciderint, potissimum cum ad ignem, aliudque corpus impense calidum repente fuissent admotæ: quo moniti itinerantes per ejusmodi loca, non statim ad extremum calorem & ignem se exponunt, sed sensim ac lente pannis laneis, aut tepenti aqua calorem revocant, quousque paulatim sanguis per suos ductus remeare incipiat, & circuitum pristinum repetere videatur. Addit in textu Hippocrates *Rigores*, qui licet in vulgari versione legantur *febriles*, revera tamen febriles non sunt, sed tantum per analogiam tales dicuntur, quod scilicet quemadmodum incipientibus accessionibus febrilibus rigores accidunt, cum inæquali corporis concussione & sensu frigoris, ita ab externo frigore, vel aëris vel aquæ circumambientis, corpus universum rigit & contremiscit, inita quodammodo pugna inter sanguinem arteriosum vi cordis & portione vivifica impulsam, ac frigoris externi vim constipantem & repercutientem atque ita inæqualiter cutim commoventem & contorquentem. In his autem mirum, quantum valeat iteratos usus aquæ ardentis de phlegmate; etenim ipsa sæpius lenifractione admota simul poros constrictos reserat, & sanguinem hærentem dissolvit, atque in motum concitat & partes roborat, ut propterea cutaneos istos livores perquam optime deleat, citra suppurationem aut ulcerationem: Illam autem ut efficacius operetur, solent Practici vigorare, adjecta portione convenienti Camphoræ, vel etiam infusis floribus & summitatibus roris marini ad plures dies in loco calido ad digestionem convenientem detentis, uti in ea quæ Reginæ Ungariæ nominatur.

Ceterum quod hæc mala ab externo frigore evenire Hippocrates doceat, palam fit, ex supra dictis de rigore & livore partium exterarum; quippe rigor & livor non nisi ad partes extimas corporis pertinere possunt. Res autem frigidæ intro assumptæ, non solent similia mala parere; quin & nostro tempore gelidæ potiones tam in usu frequenti sunt, ut in deliciis habeantur & licet successu temporis cruditates

ditates atque inde alia incommoda pariant, haud tamen memorata hæc in Aphorismo mala excitare observantur.

Quo denique pacto inductis ex frigore nocumentis præter jam dicta occurrere possimus, non erit abs re hoc loco breviter recensere. Et primum animadversione dignum videtur, quod quamvis his ex frigore malis calefacientibus debeamus opitulari, non tamen illa affatim ac violenter, sed sensim ac sensim erunt adhibenda; non minus enim nocere solent, frigefactis partibus calorifica subito ac repente administrata, quam frigida quæ antea læserunt: experientia enim cuique notum est argentes manus igni repente admotas, longe gravio-rem molestiam subire: Itaque oportebit paulatim amissum in parti- bus calorem restituere, pannis laneis ut dictum excalefactis, itemq; vino calente, spiritu vini camphorato & similibus, cavendo immo- derata calefacientia & violenter operantia.

Dices Hippocrates & omnes Authores dicunt convulsionem fieri, vel à repletione vel ab inanitione, ergo non fiet à frigore ut in hoc Aphorismo. *R.* Hippocratem nullibi negasse convulsionem fieri à frigore imò asseruit: præterea diximus per frigus non intelligi solam qualitatem, sed rem & corpus frigidum, ergo haud dubie, convulsio æque sit à repletione: imò etiam ab inanitione fieri dici jure merito potest, quando nimirum per frigus constipans, coarctando & reperiendo, sanguinem & spiritus, partes potissimum vero nervos inanit.

Instabis Quando corpus à frigore riget, non potest fieri motus convulsivus, quia partes fiunt immobiles, ergo à frigore non potest fieri convulsio. *R.* Nos in textu jam dixisse hic veram convulsionem & non motum convulsivum esse intelligendum vel distinguere, si placet, possumus, non potest fieri motus convulsivus localis seu de loco in locum concedo: Tonicus seu firmus & constans nego.

Aphorismus XIIIX.

Frigidum inimicum ossibus, dentibus, nervis, cerebro, spinali (seu dorsali) medulla: calidum vero amicum (seu utile.)

Con-

Contentum seu Intentio.

De frigidi noxis quoad certas partes.

Connexio: Cum in præcedentibus Aphorismis Hippocrates nocu-
menta à frigido & à calido, universim provenientia retulisset:
In hoc nunc Aphorismo recenset partes seu membra quibus frigus
specialius nocet, & calidum è contra proficit: & quidem frigidum
inimicum ossibus, dentibus, nervis, cerebro, spinali medullæ; cali-
dum vero iisdem utile & amicum esse declarat.

Hic Aphorismus, juxta duas conclusiones in duas partes dividi-
tur: quarum *prima* docet, quibus membris frigidum noceat: *Secun-
da* quod calidum iisdem profit.

Rationem hujus sententiæ fere communiter interpretes desu-
munt à natura & conditione partium spermaticarum: Inquiunt enim
carnosas seu sanguineas partes, sua natura calidas esse; Spermaticas
vero frigidas seu exangues: Sicut autem carnosæ partes melius resi-
stunt, agentibus frigoris, ita ex adverso partes spermaticæ, ab
his plurimum offenduntur: juxta illud: *Similia similibus conservantur,
contraria contrariis curantur*: Verum hoc ipsum in controversiam
vertit jam pridem *Laurentius Joubertus Lib. I. Paradoxorum*, qui acri-
ter contendit, partes spermaticas, veluti à semine calidiori (Galenus
enim ipse semen calidius sanguine existimat, quia est magis coctum
& spiritu copiosiori præditum) oriundas, calidiores carnis seu san-
guineis debere dici, juxta receptam veterum opinionem, qui existi-
mabant omnes partes corporis, vel à semine, vel à sangui-
ne, quasi duobus generationis humanæ comprincipiis exoriri;
cumque ossa, dentes, cerebrum, spinalem medullam, nervos, mem-
branas, aliasque partes similes à semine perfectas dicerent, propterea
spermaticas illas appellarunt. At vero, cum recentiorum ana-
tomicorum acuratissimis observationibus compertum jam ab-
unde sit, omnes partes corporis, primordia sua sumere, à mate-
ria illa albuginea in ovo contenta; nutritionem autem & incre-
mentum solum à sanguine, ejusque portione glutinosa, pro-
inde fit ut ejusmodi partium corporis distinctio, vana apud
ipsos reputetur, sed solum quæ irriguum sanguinem affluentius

excipiunt, sint vivaciores & calidiores, quæ vero exiles tantum arteriolas & venulas fortiuntur, debiliores, minusque calidæ observentur; unde quæ carnosæ dicuntur, ab abundantiori sanguine, quo irrorantur, sint calidiores, reliquæ vero spermaticæ appellatæ, ob sanguinis paucitatem & exilitatem arteriolarum dicantur frigidæ.

Quo autem pacto *frigidum* enarratis partibus officiat, breviter hic quæri potest, nam et si hoc apud omnes receptum sit, non cunctis tamen æque bene videtur explicatum, potissimum quia experimur, frigidam etiam aquam, quibusdam partibus magnopere prodesse, unde dentes & os, frigida aqua abluti firmantur magis, & oculi pari ratione sub frigidis lotionibus mirifice instaurantur unde *Q. Serenus* :

Sæpe etiam gelida, gingivas collue Lympha
Dentibus ut possis, validum firmare tenorem.

Et *Plinius Lib. 28. cap. 4.* inter remedia doloris dentium numerat collutionem ex aqua frigida matutino tempore.

Verum facile difficultas solvitur, attenta causa unde calor in viventibus habeatur: is quippe à solo sanguine est, adeoque quas partes sanguis bene irrigat, & affluenter fovet, simul una calefacit & roborat; at vero ubi nec irrigare neque fovere potest, non solum frigus per sentitur, sed & gravis noxa percipitur: cum igitur cerebrum, nervi, spinalis medulla, periostia, membranæ, aliæque partes modico sanguine irroratæ, à frigore offenduntur, gravem noxam subeunt, ab impedita in ipsis, vel saltem magnopere hebetata sanguinis spirituosæ circulatione: Sed non tantum in specialibus partibus corporis id evenire experimur, verum etiam in omnibus corporibus debilibus & extenuatis, quæ vehementer à frigore læduntur, quia in his à frigore torpescit sanguis, ejusque circulatio præpeditur, imo aliquoties etiam hæret, unde postea tumores, abscessus, inflammationes exoriuntur. Sed & aqua frigida non dentibus sed gingivis potius prodest, & facta nimirum in ipsis corrugatione, retusisque in ipsas irrudentibus acerbis humoribus, ex quibus sæpenumero vacillant. Hinc patet quoque de frigido extrinsecus occurrente sermonem Hippocratem hic habuisse, cum à frigore præsertim ambiente, vel aëris vel aquæ gelidæ, vel ventorum Borealium de quibus *Lib. 3. Aph. 1. 2. 3. 4. 5. & sequentibus*: cerebrum spinalis medulla,
dentes

dentes & ossa vehementer afficiantur. Quemadmodum enim vita nostra in calore consistit, quem veluti radium ab ipso luminari majore, nempe sole, mutuatum ad hæc inferiora detulisse *Prometheum* Poëtæ fabulantur: id ipsum Peripatheticorum Princeps *Aristoteles 2. Physicorum text. 26.* expresse docet *sol & homo generant hominem*: Ita mors contrario modo in frigido consistit & radios suos à luna (utpote luminari minore & frigido) quæ lethiferum nobis frigus in hæc inferiora quotidie immittit.

Verum quemadmodum à frigore prænarratæ partes graviter lædi solent, ita ex adverso convenienti calore plurimum juvantur, unde Hippocrates in Aphorismo subjunxit: *Calidum vero utile seu amicum*: verum tamen hic non intelligendum calidum vehemens & immoderatum, nam ut supra dictum, non minus illud nocere potest, cum repente & violenter adhibetur, quam frigidum præmature inductum, ideoque moderatum & conveniens esse debet; hinc qui nimis calide vorant & de super nimis frigide bibunt vehementer dentes lædunt, imo perdunt: quamvis comparatione facta inter frigidum & calidum excedenti gradu applicatum, levior semper noxa à calido quam à frigido partibus mox supra memoratis inferatur. Hinc in omnibus affectibus cerebri, medullæ spinalis, nervorum, ossium, aliarumque partium exanguium, uti solemus medicamentis, tum extrinsecis tum intrinsecis moderate calefacientibus, quin & pro spina & nervis inde exorientibus semper prodesse consueverunt, unctiones ex oleis ac linimentis calorificis, quibus scilicet modicus harum partium calor reviviscat, & humores, si qui forte ibi hæserunt, leniter digerantur & extenuentur.

Quæres 1. An viris an foeminis frigus magis obsit? R. Nullam in hoc subesse dubitandi rationem, cum foeminæ viris sint frigidiores ut ex superius dictis patet, & unanimis est Medicorum sententia: Verum ut & alibi diximus, hoc cum distinctione esse intelligendum, cum autopsia & exemplis res luce meridiana sit clarior, multos dari virgines & Hecubas viris quibusdam longe calidiores, quod ipsum testatur Poëta:

Si spectes mores, mage callida foemina; quam vir,
Temperiem spectes, vir magis est calidus.

Quæres 2. Cur Hippocrates in hoc Aphorismo, dentes ab ossi-

bus separaverit? R. Forſan ideo ſeparaffe dentes ab offibus, quia offa per ſe vel ſaltem valde obtuſe ſentiunt, dentes vero dolent ſive id per ſe accidat, ſeu per nervum, qui in radicem eorum inſeritur.

Dices: Offa non ſentiunt, ergo prorsus non læduntur à frigido. R. Non læduntur ſentiendo, tranſeat; non læduntur patiendo, nego.

Aphoriſmus XIX.

*Quæ perfrigerata ſunt, calefacere oportet præter ea
(ſeu exceptis iis) quæ ſanguinem profundunt, aut
brevis ſunt profuſura (ſeu quibus ſanguis fluit,
aut fluxurus eſt.*

Contentum ſeu Intentio.

De cura pernionum ſeu partium congelatarum.

Connexio: Cum Hippocrates in præcedenti Aphoriſmo dixiſſet de refrigeratione partium præcipue exanguium: In hoc præſenti Aphoriſmo de eadem in facto eſſe agit, ſimulque docet, quomodo iſthæ curanda ſit. Hic Aphoriſmus duas habet concluſiones, & ideo in duas partes dividitur: *Prima* dicit calefaciendas eſſe partes refrigeratas: *Secunda* negat id faciendum, ſi ſanguis fluat, aut fluxurus ſit.

Quod ergo præcedentibus Aphoriſmīs dixerat Hippocrates, de incommodis calidi & frigidi, quæque à frigore mala oriri poſſent, partibus potiſſimum exanguibus; nunc in correctionem illorum ſubdit, excalefacienda eſſe ea, quæ præter modum ſunt refrigerata, ut propterea videatur veluti per corollarium ſuperioris Aphoriſmi documenta tradere, quo pacto tractanda ſint membra à frigore male affecta: Etenim ſi calidum illis utile eſt, certe cum fuerint refrigerata, calorificis erunt in ſtatum naturalem reducenda, adhibita tamen in ejuſmodi partibus male affectis diſtinctione: nam alio modo cerebrum ac ſpinalis medulla, & alio modo dentes ac offa calefacientibus fovenda erunt.

Quamvis in ſuper indifcriminatim dixerit refrigerata caleface-
re

re oportere, & quidem tum extrinsecus tum intrinsecus caloricis adhibitis, nihilominus attentis his, quæ in præcedentibus Aphorismis dicta sunt, verisimilius videntur extrinsecus calefacientia commendata, quemadmodum sunt fots unctiones, balneationes &c. Neque solum earum rerum quæ virtute ac potentia calorem in partibus valent excitare, sed etiam, quæ actuali ut vocant calore fovere, & in pristinum statum, vim & facultatem illarum restituere valent & solent, quemadmodum superius diximus de vino calente, de aqua calida, de balneis aquarum thermalium & aliis similibus: Id ipsum etiam assequi licebit, beneficio aëris vel natura sua calidioris, vel ope artis excalefacti, ut fieri solet in Laconico, ubi etiam aromata diversi generis suavem odorem spirent, ut exinde & calor & robur partibus suggeratur.

Generale autem hoc præceptum, de calefaciendis partibus refrigeratis, in hoc Aphorismo traditum, excipit & limitat Hippocrates, in his, quæ vel sanguinem fundunt, vel fusioni obnoxia sunt, unde in textu subdit: *exceptis iis, quibus sanguis fluit vel fluxurus est*: vel ut melius vertit Fuchsius, *unde sanguis profluit, aut profluxurus est*: Etenim licet quæ refrigerata sunt, ut reviviscant, caloricis expostulent, nihilominus indicatione desumpta à sanguine fluente vel fluxuro, veluti à prævalentiori seu urgentiori, ejusmodi calefacientium administratio locum habere non poterit, quippe calefacientia fluentem sanguinem magis funderent, & vasa aperta aut relaxata magis referarent, quandoquidem calidi est aperire, attenuare, dissolvere, frigidi vero constipare, coagulare, & cohibere. Exemplo res fiet clarior v.gr. Alicui sit rupta vena in pectore ex frigidityte: in hoc licet ratione causæ calefaciens remedium requiratur: ratione tamen sanguinis, qui fluit aut fluxurus est prohibetur: Item, si mulieri, magis quam decet, fluxura essent menstrua, etiam si uterus sit refrigeratus, non tamen illum licet calefacere, aliàs fluxus sanguinis major excitatur, ex dictis jam rationibus: Hinc in gratiam sanguinis, ne plus justo fluat, imo potius, ut decet inter suos ductus detineatur, à caloricis cavendum & corrugantia, frigefacientia administranda erunt.

Cujus autem conditionis ista esse debeant, non admodum difficile erit determinare: Equidem etsi frigefacientia generali-

ter sanguini fluenti cohibendo proficua sint, cum subinde sanguinem in suo motu remorentur, & vasa ad aperta corrugent; unde nix sola, sæpius fluentem sanguinem cohibuit, nihilominus si præter vim frigefactoriam, annexam habeant facultatem stipticam & adstringentem, proculdubio efficaciora erunt, cujusmodi sunt quæ ponticam & austeram conditionem sunt sortita, quæ ex praxi petenda sunt.

Objectiones & difficultates in contextu sunt solutæ.

Aphorismus XX.

Frigidum ulceribus mordax, cutem obdurat, dolorem insuppurabilem facit, livorem (seu nigrorem) inducit, rigores febriles, convulsiones, & Tetanos.

Contentum seu Intentio.

De ulterioribus noxis frigidi.

Connexio: Cum in præcedenti Aphorismo absolute docuisset Hippocrates, quibus membris frigida nocent: In hoc præsentī Aphorismo explicat, quibus morbis potissimum adversetur, seu quos morbos deteriores reddit frigus & præcipue ulcera, convulsiones, rigores, Tetanos. Et quemadmodum in præcedenti Aphorismo Hippocrates frigorifica commendaverat, in his, quibus sanguis fluit, aut fluxurus est, etsi à frigidis videantur lædi posse: ita in hoc præsentī Aphorismo, usum illorum excipit, in illis partibus, quæ ulceratæ sunt, licet in his de sanguinis profluvio timeatur, quia inquit, *frigidum ulceribus nocuum est & valde perniciosum*: vulnerum enim & ulcerum corruptor est aër maxime vero frigidus.

Hic Aphorismus ob simplicem conclusionem non dividitur. Antequam ad deductionem hujus Aphorismi descendam, liceat hanc aphoristicam sententiam clariorem reddere ex *Lib. de liquidorum usu*, unde illa desumpta videtur, nam ex versione *Leocineni* non tantum obscura est, sed multis difficultatibus obvoluta, scribitur autem *citato libro de liquidorum usu: Ulceribus frigida (id est aquæ) mordax cutem ob-*
durat,

durat, dolorosa non suppurari facit, livescit, nigrefacit, rigores febriles facit, convulsiones retro & ante distensiones. Vel ut exponit Cardanus: Frigidum ulceribus mordax, & obdurat cutim, seu ulceris labia, dolores facit, & quaecunque in ulcere sunt, prohibet suppurari, his præmissis:

Dicitur ergo primo *frigidum mordax*, quod an intelligendum sit, ut in causa, an vero potius, ut ex effectu, difficultas esse potest: Nam si ut causa malorum in hoc Aphorismo enumeratorum intelligatur profecto non omne frigidum ulceribus nocuum dicendum erit, sed duntaxat quod mordax, pungens, acutum & per modum ignis combustivum seu urens est: de quo *Virgilius* dum canit *penetrabile frigus adurit*: Si vero intelligatur in effectu, quodlibet frigidum etiam leve, mordax & nocuum fiet ulceribus.

Et quamvis fere cunctis expositoribus congruentius videatur, adjectum frigore verbum illud *mordax*, referendum esse ad *effectus* ejusdem, ut inter alia illius mala præcipuum illud sit, partem ulceratam, mordere, vellicare, ac pun gere, quod sane cuique ulcere valde nocuum est, cum ulcus quodlibet sua natura postulet, ut sanetur à quacunque irritatione & molestia liberum esse, eo quod per irritationem facile ad partem ulceratam humores confluant, & vasa pruritata aperiantur; si nihilominus consideretur mordacitas frigoris ut *causa*, ita ut sensus fiat, non omne frigus ulceribus nocere, sed quod mordax & acutum est, conveniet plane menti Hippocratis: Etenim illud frigus proprie noxium partibus ulceratis percipitur, quod intensum pungens & mordax est, cujus causa cutis corrugatur, sanies detinetur, & pars ulcerata compungitur & elanguet. Sic non raro à Chirurgis adhiberi consueverunt ulceribus medicamenta, tum actum potentia frigida, quæ tamen, quia moderate talia sunt, nullum incommodum afferunt, at vero si in gradu excedunt, molestissima fiunt. Et quidem frigidum immoderatum, quale est glaciei, poros cutis discerpit & extorquet, cutim ipsam (ut dicit textus) obdurat, livores & rigores efficit. Illud vero certum omnino erit, frigidum hoc loco memoratum, quod actuale dicitur, potius intelligendum esse, quam quod potentia est frigefactorium: quamquam Fuchsius, Cardanus, alique plures interpretes, nomine frigidi hic memorati, aquam frigidam duntaxat intellectam velint, qualis est glacialis, quæ & actu & potentia frigorifica est, & non minus qualitate, quam substan-

stantia, imo mixtura salium, præsertim salisnitri (seu Salnitri) partibus viventibus nocua observatur, adeoque longe magis ulceratis & morbo affectis inimica. Quod præterea frigus cutem obduret, patet manifeste, quia pori cutis ab illo constipantur, & adeo arcte vinciuntur ac constringuntur, ut perspirationi impedimento sint, quamobrem jure optimo, sub nomine amicitiae, à quibusdam fuit appellatum; cum autem omnes partes strictim uniat & coarctet, ea ratione simul obdurat, quemadmodum experimur in luto; atqui humana cutis à frigore hyemali adeo constringitur, ut sæpissime obrigescat, & præter duritiem aliquando emoriatur. In ulceribus autem frigus, circumposita labia densando, conglutinationem impedit, & sanguini vivificanti obicem facit.

Sed quæ ratione scriptum sit, *dolorem insuppurabilem facere* dubium esse potest: verum *ex cit. loco de liquidorum usu* solvitur difficultas: ibi enim scribitur, *dolorosa non suppurari facit*, id est ea, quæ circa labia ulceris continentur, & per suppurationem digeri atque expurgari deberent, ordinato frigore detinentur & suppurationi non subjiciuntur: Suppuratio enim ope caloris, juxta omnium mentem peragitur, cujus causa partes heterogeneæ ab invicem disjunguntur & sequestrantur (caloris enim est homogenea congregare & disgregare heterogenea) at vero per frigus, una simul vinciuntur & commiscentur cum frigoris sit homogenea & heterogenea congregare. Sic & fermentatio, quæ omnino necessaria est in suppuratione, per frigidi administrationem penitus inhibetur, unde qui humor circa labia ulceris detentus & dolorem afferens, in suppurationem desineret per frigus in pus verti nequit, adeoque insuppurabilis fit: hinc dici quodammodo potest, frigus suppurationem impediendo dolorem facere insuppurabilem.

Inducit quoque frigus *livorem & rigores febriles*, pari modo ac superius de effectibus frigoris generatim dictum est: Si enim frigus hebetat, obtundit & mordificat, plane livorem nullo modo pariet: rigores autem febriles induci dicuntur à frigore, per analogiam eorum qui febribus rigorificis contingunt, ut antea etiam notatum est: quamquam possint etiam rigores revera febriles, & febres ipsæ exinde oriri, quatenus humores in ulceribus detenti, nec bene repurgati, circulantem sanguinem inficiunt, & in debitam cum ipso
fer-

fermentationem, excitant, unde postmodum febres rigoribus sociatae, imo cum alijs gravioribus symptomatibus conjunctae: ulcera siquidem sordida & malè affecta, praesertim cum virulentam conditionem nacta fuerint, facili negotio febres acutas excitant, & cum rigoribus malignitatem monstrantibus conjunctas, quod si fortasse supurationem internam subeant, ut non raro fieri solet, in partibus musculosis & cavum admittentibus, certè rigor inde sequetur & febris, juxta dictum ejusdem Hippocratis 2. *Aphorism. 47. Dum pus fit dolor & febris intenditur, pure autem confecto omnia remittunt.*

Convulsiones denique & *Tetanos*, frigus parit in ulceribus, quia ut supra diximus, frigidum nervis & cerebro inimicum, absque ullo ulcere convulsiones ac *Tetanos* affert; quanto magis excitabit in ulceribus, ubi non tantum saniei ex ulcere prodeuntis pravitate, sed & irritatione in partibus ulceratis inducta, quam maxime possunt nervi & nervorum fibrae, saltem per consensum affici & impense proritari, cum nulla pars extima sit quae sensu suo non sit praedita, adeoque nervis plurimis referta; quandoquidem in ulceribus fieri nequit, quin cutis, panniculus carnosus, muscoli, aliaeque partes nervae collaedantur, & dissociantur. Sed & mala membris particularibus illata, potissimum ab ulcerum sanie contingunt, quae si fortasse per cerebri medullium diffundatur aut etiam in spinum dorsi decumbat plane non tantum convulsiones particulares accident, verum etiam universales, quales *Tetani* in quibus & ad anteriora & ad posteriora corpus redditur rigidum & inflexibile, atque hinc ubi in Aphorismo scribitur *Tetanos* in supra citato libro de liquidorum usu, clarius exponitur, *retro & ante distensiones*. Cæterum frigus potissimum mordax, & intensum, duplici de causa ulceratis partibus obest, una ex detenta sanie, plerumque corrupta: altera ex hebetudine aut mortificatione, unde partes distentae aut resolutae postremo remanent. Quamobrem monet Hippocrates lib. de Ulceribus, si quando abluenda sunt ulcera, in partibus carnosiss, vino id faciendum praecipit: at in partibus nervosis & in articulis, non vino, quia mordax illis est sed potius tepida aut calida aqua.

Quaeres utrum etiam Aphorismus intelligendus sit de vulneribus? *Re.* Quod sic.

Dices Hippocrates lib. de Vulneribus capitis dicit: Vulnera capitis facilius sanari in hyeme quam aestate, ergo frigus illis

illis non adeò esse inimicum & id fieri per accidens, in hyeme enim non est tantus humorum impetus ad caput, neque tanta illorum solutio & raritas, uti in aestate; non tamen inde sequitur, frigida quovis tempore esse adhibenda.

Reliquæ difficultates in contextu sunt solutæ.

Aphorismus XXI.

Est tamen ubi in Tetano sine ulcere, juveni bene carnosso, aestate media, frigida aqua larga profusio, calorem revocat: Calor autem hac sanat (seu solvit.)

Contentum seu Intentio.

De usu & utilitate frigidi in Tetano.

Connexio: Cum Hippocrates præcedenter, de convulsione & Tetano tractasset, atque à frigido fieri dixisset: In hoc Aphorismo curandi illum occasionem arripit, & præceptum tradit ad artem valde utile: quo ostendit (multis forsan Paradoxum) frigus & efficiendi & solvendi seu curandi Tetanum vim habere, & proinde non esse universaliter verum illud argumentum, quod à juvantibus & lædentibus sumitur cum & à simili & à contrario morbus idem solvi possit.

Hic Aphorismus in duas partes dividi potest: *Prima* continet propositionem & glossam: *Secunda* illius causam.

Melius hanc sententiam ex græco Codice vertit Fuchsius, inquiens: *Nonnunquam in distensione* (distensio autem idem est ac Tetanus) *sine ulcere, juvene mediocri corporis habitu prædito, aestate media:* hac quippe ratione cohærentius necitur hic Aphorismus præcedenti: Sed adhuc clarius Heurnius: *Sed tamen fieri potest, ut in Tetano ulceris experte;* ut propterea sensus sit, aliquando frigida aqua usum utilem esse posse; sive ut mavult Cardanus, existimans, tacitæ cuidam objectioni ex hoc Aphorismo responderi, si fortasse quis opponeret, frigidam aquam in distensione nervorum aliquando profuisse, sed quidem non nisi ex accidenti solum id evenire, atq; in juvene, bono corporis habitu prædito, in media aestate & absq; ullo ulcere; Hinc ideo Galenus falli-

fallitur, qui putat id perpetuo agendum in quacunque convulsione dummodo prædictæ conditiones adsint; nam quod aliquando in usum duci potuit, & ex accidenti tantum proficere perperam generaliter prolatum aut in omnibus commendatum quis credet? alias omnino temeraria dicenda foret ejusmodi convulsione curatio, quæ omni ex parte periculosa vel valde dubia est, cum tamen ipse Hippocrates in suo Jure jurando, se quodcunque dubium omnino vitaturum pollicetur. medica enim manus non in nocuum sed in ægri juvamentum ita prompta esse debet, ut si non juvet saltem non noceat.

Verum singulas conditiones, quas in Aphorismo Hippocrates vult esse considerandas, ad reuerendæ facilitatem breviter perpendamus & discutiamus.

Primo inquit in Tetano sine ulceratione: in Tetano quidem, in quo tam partes anteriores quam posteriores sunt æqualiter distentæ, ut propterea uniformiter frigidæ aquæ perfusio facienda sit & æqualis: Si aliquæ partes tantum forent affectæ, puta anteriores, certe non bene constaret ubi aquæ frigidæ perfusio facienda foret, & num potius pars sana exinde læsionem subiret, quam laborans juvamentum esset receptura: *Sine ulceratione* vero, hoc est, quod nullum ulcus corpus affectum patiatur, nam ratione ulceris, aquæ frigidæ perfusio prohiberetur, quia frigidum ulceribus nocuum præcedenti Aphorismo demonstratum est, unde plane nullum juvamentum in Tetano sequeretur, & ex aduerso, maximum detrimentum, ulceratæ parti inferretur, ut patet.

Secundo dicitur: Iuvene bene carnosio: pro quo melius Fuchsius: *Mediocris corporis habitu prædito*; etenim in græco Codice legitur *ἑυαγρος*, quod non carnosum omnino & obesum, neque gracile intelligendum est, sed quod mediat inter utrumque: Obesa enim corpora propter pinguedinem, & venarum atque arteriarum exilitatem, non multo potiuntur calore, atque adeo facile succumberent tantæ aquæ gelidæ profusioni: Graciles vero, utpote excarnes, neque sufferre possent frigoris vim ex aqua gelida, sed nec impetum ejusdem repentinum utpote qui non bene resistunt frigidis alterantibus, imo ab his facillime læduntur; At vero qui medii sunt, inter obesos & graciles, moderatè carnosi græcè *ἑυαγροι*, utrumque facilius multo sufferunt, sed & ob sanguinis floriditatem, indeque vitalem calorem, ac conve-

nientem carniū habitudinē & fortem viscerum texturam, minime à frigida profusione debilitantur, sed magis & magis potius vigorantur facta in poris partium constipatione; quamobrem præter bonam corporis constitutionem carnosam, additur *in Textu* esse oportere *juvenem*, cum in hac *etate*, quæcunq; in sanguine & visceribus necessaria sunt, exquisitissime inveniantur: Senes autem & pueri, veluti impotentes ab ejusmodi remedii administratione excluduntur; & merito, quia pueri carnes molles admodum habent, ac sanguinem glutinositate potius, quam floriditate præpollentem, & senes in utrisque deficiunt. Ideoque optimo jure conjunxit Hippocrates juventutem & carnosam corporis constitutionem ut ex utroq; capite, robur partium, & calor vitalis validus in sanguine præexistat, atq; per frigida profusionē vehemens in sanguine fermentatio promoveatur.

Tertio subdit *æstate media*, vigente scilicet summo æstu in aëre; cum enim eo tempore pori cutis laxiores sint, & longe potentior transpiratio, ut non tantum halitus & vapores, è corpore perspirent, sed etiam fudor sponte sua uberrimus habeatur, proinde fit, ut frigida aquæ profusione, constipatis poris atque impedita perspiratione, universus calor reperiatur, ad intus atque impetu quodam adoriatur causam morificam Tetani conservatricem; neque vero aqua quæ perfunditur simplex & ordinaria esse debet, sed frigida, etiam nive frigefacta atque copiose affusa, ut nimirum subita ac violenta fiat, in omnibus partibus corporis commotio, obrigescente simul, & vehementer densata cute adeo ut nihil perspirare permittat, sed calor universus per sanguinis commotionem vehementiorem, ad intimas partes recolligatur, impetatque in musculos & nervos Tetano affectos; bene igitur Avicenna 2. *Tertii cap 7. inquit: Hac perfusione obstructis meatibus cutis, & refugiente calore intus, atq; collecto, materia illa consumitur atque diffatur, nervique ad pristinum redeunt statum:* quod & Hippocrates ipse in Aphorismo adjecit inquit: *Frigida aquæ multa perfusio calorem revocat, calor autem hac solvit*: Calorem enim naturalem occursum frigoris præter naturalis per Antiperistasis multiplicari posse, Medicorum & Philosophorum vetus veritatis est oraculum. Est autem Antiperistasis actio, quæ agens à contrario obsessum & oppugnatum colligit quasi spiritus, & evadit fortius, ad retundendas contrarii agentis vires, prout hæc mox supra clare & medice conformiter effato Hippocratis dilucidavimus.

Quomodo autem ista frigida perfusio adhibenda sit, idem Hippocrates explicat 3. *de morbis*, ubi istius morbi curationem proponit his verbis: *Aquam plurimam frigidam superinfundito, & postea vestimenta tenuia pura ac calida superintegito, ignem autem tunc non adhibeto*: Hinc superinfundendam aquam frigidam jubet, illamque plurimam frequenter & ex alto potissimum autem ad partes corporis carnosas qualis venter est inferior & hypochondria, caput tamen vitando, deinde cooperiendum esse agrum vestimentis tenuibus, pure, ac calidis v. g. Lincis excalefactis, ad provocandum sudorem nullo interea igne admoto, ne scilicet calor intro collectus de novo ad cutim diffundatur, sed per aliquod tempus ita detineatur, quousque materia Tetani fuerit subacta, & nervi in pristinum statum fuerint restituti, id quod spatio duodecim, vel viginti horarum ad summum peragi solet.

Pro coronide non est omittenda Pauli Æginetæ in hac re animadversio, qui lib. 3. cap. 20. admonet, istam frigida super infusionem maxime temerariam esse atque posteris vituperatam, adeoque à se ipso damnatam & devitatam; Equidem nisi naturam adminiculantem habent, quæ subito causam morbificam vincat & dissolvat, in maximo periculo æger versabitur, imo irreparabiliter succumbet; Fieri enim potest, ut calor qui exinde speratur, revocandus ad intima atque adeo morbum debellaturus frigida aquæ perfusione potius extinguatur, quam obrem factum est, ut nemo amplius in praxi sit ausus, ejuscemodi curationem tentare; sed neque Hippocrates, revera illam hic commendat, sed solum inquit, qua ratione illa si tentetur conferat, & in quibus corporibus, & cum quibus conditionibus caute administranda sit, ut antea jam diximus: Id quod semel tantum in femina quadam 5. *Epidem*: vehementi dolore ex præfocatione uteri laborante & vix non exanimata peractum à se ipso memoratur, cui plusquam triginta frigida Amphoras superfundit, erat autem crassa mulier. 2. *autem Epidem*: asserit, etiam aquam tepidam, emortua membra in debilibus revocare, uti præstitit in muliere illa, quæ ex cholericæ affectione penè exanimata fuit.

Dices 1. Dantur distentiones in inflammationibus; ergo & hæ erunt aqua frigida perfundendæ &c. hunc Aphorismum maximè intelligendum, de distensione frigida, non de calida.

Dices II. Si quadrati tantum & carnosissimi sunt profundendi, ergo in animi deliquiis, omnes pessimè perfunduntur, & quidem circa caput, quod est pars excarnis. R. Tales etiam tantum in facie ubi maxime carnosa est, aspergendos esse, hoc est circa mentum & buccas.

Aphorismus XXII.

Calidum suppurationem faciens (seu calidum suppuratorium) non in omni ulcere, maximum securitatis præstat indicium: cutem emollit, extenuat, dolorem lenit, rigores, convulsiones & Tetanos mitigat; capitis solvit gravitatem; ossibus fractis plurimum prodest, maxime si nudata sint, multoque magis iis, qui in capite ulcera habent; iis etiam, quæ moriuntur aut ulcerantur à frigore; herpetibus denique exedentibus, sedi, pudendis, utero, vesicæ; his omnibus calidum amicum & decretorium (seu indicans frigidum inimicum & interimens.

Contentum seu Intentio.

De Calidi usu Medico.

C*onnexio:* Cum Hippocrates plura, in præcedentibus Aphorismis de calidi nocumentis tractasset: In hoc præsentis Aphorismo de calidi & juvamentis & nocumentis, seu in quibus calidum juvet aut debeat adhiberi, aut quibus ex adverso noceat, aut debeat vitari, tractat, unde patet hunc Aphorismum omnino directum ad praxim Chirurgicam, & ad rectam, rerum calidarum in partibus ulceratis administrationem.

Hic Aphorismus plurimas continet conclusiones, adeoque in tot dividi potest partes, quæ novem numero sunt: *Prima:* Calidum in quo ulcere pus movet, maximum securitatis præstat indicium:

Secun-

Secunda: cutem emollit, extenuat: *Tertia*: dolorem lenit: *Quarta*: rigores, convulsiones, Tetanos mitigat: *Quinta*: Capitis gravitatem solvit: *Sexta*: Ossibus fractis plurimum prodest, maxime si nudata sint, multoque magis si in capite: *Septima*: His etiam prodest membris, quæ moriuntur aut ulcerantur à frigore: *Octava*: Herpetibus denique exedentibus, sedi, pudendo, utero, vesicæ: *Nona*: His omnibus calidum amicum & decretorium, frigidum inimicum & interimens.

Cum autem tot sint hujus Aphorismi conclusiones, neque unico medio demonstrari facile possint, adeoque membratim singulas annotare & explicare breviter intendimus.

Primum quidem, num de quocunque calido corpore, an solum de aqua calida verba faciat, grave dubium est apud interpretes, quandoquidem usus aquæ, non minus quam vini, frequentissimus erat apud veteres, non tantum inter Epulas & interius sed & exterius atque in lotionibus, balneis, fomentis & aliis, ut propterea sæpius utriusque usus, sparsim in suis operibus Hippocrates meminerit; *Fuchsius* quidem, pluribus contendit, solam aquam calidam hic fuisse ab Hippocrate memoratam, reprehenditque *Brassavolum*, qui de omni calido illum locutum arbitratur: at contra *Cardanus* acriter in *Fuchsinum* invehitur & multis conviciatur: Putarem ego, calidum hoc Aphorismo indicari moderatum, quia tale est suppuratorium ut in Textu exigitur; Etenim si Hippocrates inquit, calidum suppuratorium seu quod suppurationem facit, moderatum est, procul dubio non excedens, sed naturæ consentaneum intelligendum est, ejusmodi autem non sola aqua, sed quodcunque intra mediocritatis limites versatur, accipi debet; neque simplex aqua, sed etiam medicata, qualis ex incoctis herbis emollientibus & anodynis v.g. malva, althæa, chamomilla, parietaria & aliis: Pari ratione, pinguedines & adipēs animalium, atque omnia linimenta & cataplasmata ex iisdem composita, intelligenda, quibus passim Chirurgi utuntur in suppurationibus promovendis: In hanc eandem sententiam concessit *Galenus* 4. method. cap. 5. inquit: *Fomentum multa calida aqua, & omnia quæ calefaciunt & humectant, celerrimè pus movent.* Quamobrem si *Brassavolus* de omni calido etiam intenso & vehementi, velit hoc loco locutum Hippocratem.

cratem, certo falsum erit : Si vero de quocunque alio corpore calido præter aquam, sed tantum moderato, non erit, quod illi opponere possimus : quod autem moderatum calidum suppurationem adjuvet, tam manifeste patet experientia & ratione, ut longius in his minime deceat immorari; calidum namque excedens potius resolvit, quam suppurat. Firmum ergo nobis manet, per *calidum suppuratorium* neque Hippocratem neque alios viros, in arte peritos, aliud intellexisse, quam actionem illam, qua natura sanguinem, ex quacunque demum causa stagnantem suppurat, à caloris alicujus activitate moderate, non excessive se habente, id est calido moderato.

Verum cum Hippocrates in textu subjungat : *Non in omni ulcere*; ostendit manifeste, non in omni ulcere calidum istud licet moderatum & suppuratorium esse adhibendum, id est, ut in *commentario* Galenus explicat, ubi ulcera sordida & putrida sunt vel etiam ubi timetur affluxus humoris præsertim difficulter suppurabilis ut in carcimomate, phagadæna & aliis similibus, itemque in Erysipelate suppurato, vel cum circa ulceris labia inflammatio Erysipelatodes observatur: in his enim calida sive actu sive potentia, nocua esse solent, quippe saltem per accidens exasperant ulcus, febrem arcessunt, dolorem inferunt, & in diuturnum tempus illius curationem distrahunt. Scire etenim oportet, quod suppuratio alia non sit (strictè loquendo) quam sanguinis mutatio in pus seu albam substantiam seu materiam; quæ materia dupliciter consideratur: Vel *communiter* seu *longe* pro omnibus sordibus seu fame, aut materia putrida fætida vel serositas corrosiva quæ ex ulcere prodeunt: vel *peculiariter* seu *strictè* pro illa suppuratione quæ in aliquo peculiari tumore colligitur: & pus laudabile fundit: unde patet, ut diximus, non omne ulcus pati suppurationem, puta cancrosum, malignum, callosum &c.

Dicit autem rursus Hippocrates in textu : *Emergere exinde magnum ad securitatem salutis indicium*; quippe ubi suppuratio fit, ibi quoque præter humorum facile subigibilium benignitatem naturæ concoquentis robur ostenditur: Etenim suppuratio
ut mox

ut mox diximus, opus naturæ est, causam morbificam subigentis: Hinc in praxi chirurgi, omnes salutare signum existimant, in ulceribus quibuscunque pus concoctum apparere: contra vero cum loco ejus sanies tenuis, ichor, aliusve similis humor exudat, malignitatis nota est, & ubi per suppurationem certa promittitur salutis spes ægro-tanti, ita ex adverso, exitus infaustus timetur, vel saltem non facilis ad curationem & consolidationem ulceris reductio: Sed & in ejusmodi parvis ulceribus, in quibus suppuratio nulla apparet, neque in posterum speratur futurum pus conveniens, nullatenus calido suppurante, sed potius exiccante medicamento utendum, quod etiam sua ratione detergat & mundet, vel etiam corrigat, temperet & pravitati resistat.

Dicitur præterea in textu calidum cutim emollire: nam sicuti superius dictum est, frigidum obdurare & constipare poros cutis, ita nunc à calore eadem emolliri & relaxari apertissime demonstratur. Verum calidum istud, non tantum moderatum intelligendum est, sed etiam humori alicui conjunctum: nam calida quæ suppuratoria sunt, humefacientia quoque pro rata sua esse debent, ut exinde cutim mollificare valeant; quamquam non raro calidum cuti admotum evocando ex internis partibus humores & præsertim ex glandulis subcutaneis, humiditatem sibi associat si non per se, saltem ex accidenti, attenuando aperiendo & dissolvendo: Et hinc tale calidum humidum (quale v. g. est Balnei tepidi) cutim emollit fundendo & resolvendo, sicque etiam solvendi pruritus cutis magnam vim habet, ut deducit Hippocrates s. *Epidemio*: de Homine illo qui toto corpore prurigne vexabatur, qui cum nullis remediis juvari posset, Balneo tamen calidæ aquæ apud Melum à pruritu liberatus est.

Pari ratione subditur in textu, cutim etiam *extenuare*. quoniam sive puris egestione, sive insensibili transpiratione, sive etiam dissolutione tenuium partium ex humoribus præsertim lymphæ dissolutarum, semper calidum quodcunque extenuat, & extenuando evaporat, saltem tractu temporis longioris. Sed enim placuit Heurnio in suo contextu, huic dictioni addere *crassam*, sive materiâ cuti hærentem, sive ad eandem confluentem, ut propterea legat in sua versione: *crassam extenuat*:

quidem five crassities ista, in cute ipsa consideretur, five in humoribus ibidem hærentibus, tamen vi caloris utraque dissolvi & extenuari bene potest; quamobrem tumidam cutem, in ulceribus, levi blandoque calore successive digeri, & in pristinum statum reduci licet, ut tandem cæteris partibus complanetur, & humores ipsos circa labia ulceris restagnantes, ejusdem caloris, & remediorum calefacientium beneficio, paulatim quoque dilui & per suppurationem expurgari & extenuari.

Hinc pariter ostenditur, qua ratione dicatur: *Dolorem sedare* quemadmodum ex supra traditis, manifestissime deducitur, etenim digerendo ea, quæ circa labia ulceris, imo in ipsa ulceris cavitate continentur, & dolorem inferunt, vel in causa sunt, ut dolor percipiatur, dolorem ipsum rationabiliter sedare dicuntur: quare five vacuando, five rarefaciendo, five abstergendo, five temperando, five discutiendo, tum humores tum flatus, dolorem lenire bene poterit: Sed & licet humores desint, si solum pars ulcerata ab infensa qualitate proritetur, aut à frigore malo afficiatur, solet non raro calidi alicujus medicamenti beneficio moderari, cum ex antea dictis, frigus viventis cuicunque parti, potissimum nerveæ, infensum ex omni parte sit; calidum vero proficuum & salutare, quin & majora & graviora semper detrimenta, viventibus accidunt à frigidis, quam acalidis, præsertim moderatis.

Dicitur quoque quod calidum *mitiget rigores, distensiones, convulsiones, & tetanos*, oppositis nempe de causis, quibus frigidum hæc eadem antea afferre dicebatur; etenim cum hi affectus, frigidi sint effectus, extenuando & dissolvendo vitiosos frigidos & crudos humores, hæc mala inferentes, sane conferet calidum, in prænarratis nervorum & musculorum ægritudinibus: tum quia causam rigoris & convulsionis adimit; tum etiam quia partes affectas roborat, porositates & penetralia à frigido occlusa & interclusa aperiendo, & calorem velut amicum fidelissimum, ad interiora admittendo, unde cessat tensio partium, & convulsoria illa dispositio doloris causa quantocius cessare solet: nec obstat supra dixisse frigidæ infusionem tetanum liberare posse, cum hoc ex accidenti solum, non per se contingat: unde ratio manifesta eruitur, quod colici, nephritici, aliarumque partium affecti, immediate doloris levamen sentiant, dum balneo aquæ dulcis calido, immerguntur. Insuper

Insuper dicitur, *quod capitis etiam solvat gravitatem*; idque non solum ex jam dictis rationibus, verum etiam quia plerumque *gravitates* fiunt à lymphâ crassiori, viscosa, restagnante in meningibus vel in glandulis cerebri corticalibus, illa autem calidis fomentis diluta fluit in partes inferiores, & vel per nares, aures, palatum ejicitur, vel in articulos decumbit, quemadmodum experimur in catharris: Neque solum calida capiti si admoveantur, in his conferunt, verum etiam si plantis pedum applicentur; experimur siquidem, ut qua ratione humefacti, & refrigerati pedes, cerebrum & caput afficiunt, & humiditatibus opplent, eadem & opitulentur, si calidis fotibus, ac lotionibus vigorentur: hinc consueverunt practici, ad deducendos humores à capite aqua calida pedes abluere, & in gravedine, stupiditate & aliis capitis affectibus cum sopore conjunctis plantas pedum aqua ardente sæpius fovere: experimur quoque per solos halitus atque odores, cerebrum sublevare; & à confluentibus, aut restagnantibus humoribus, sive sensibiliter sive insensibiliter exonerari, cum suffitus aromatum, odorifera medicamenta, fumus tabaci, & gummi animæ, succini aliarumque rerum similium olfactus plurimum in capitis affectibus soporosis conferant. Dixit autem signanter Hippocrates, *capitis solvit gravitatem*: nam si fortasse alia morbi specie caput, & cerebrum afficeretur, aliter plane res hæc tractanda foret: at vero gravitas, in cerebro plerumque à sero, lymphâ atque consimilibus humoribus humefacientibus & gravantibus dependet. Ulterius asserit in textu Hippocrates *calidum conferre ossium fracturis*: & quidem duplici de causa, & quod ossa, utpote partes exangues, affecta frigidum habeant inimicum: & quod ossa fracta, non nisi calidorum ope glutinari & cœniri possint, cum alioquin frigidum ulceribus omnibus insensissimum sit. Idipsum expresse etiam docuit Hippocrates *Lib. de fracturis & Lib. de articulis*. Addit insuper: *sed nudis præcipue, eorumque maxime, qui in capite ulcera habent*, quod etiam testatur, *Lib. de liquidorum usu*: nudata enim ossa si frigido ambienti exponantur, facillime livescunt, & si fortasse fracturam quoque passa sint, gangrænam incurrunt: quamobrem periti chirurgi, omnem industriam solent adhibere, ut ejusmodi vulnera, ulcera & fracturæ ossium potissimum cranii à frigore & à quibusvis frigidis alterantibus præcaveantur, per fascias, ligaturas, & alia similia integumenta: id quod

etiam recentiores agunt, fotu aquæ ardentis, balsamicis, vel aqua Reginae Ungariæ, aliorumque medicamentorum roborantium & calefacientium. Optime ergo Cardanus hoc loco habet: *Trifariam calor in his, necessarius est, & quatenus in ulcere omni, calida conveniunt & quatenus omni ossi denudato, & quatenus cerebro ne lædatur consulendum est.*

Non tantum autem ossibus fractis & denutatis, potissimum in capite, confert calidum, sed etiam cunctis aliis partibus, quæ à frigore hebetantur, emoriuntur aut ulcerantur, & quidem, istæ præsertim censendæ sunt partes nerveæ & membranosæ, de quibus antea dictum est ab Hippocrate, quod frigidis admodum lædantur. Artus quoque corporis à frigidis alterantibus offenduntur, ut quemadmodum supra est notatum, aliquando sponte sua decidere contigerit, uti Galenus etiam meminit *lib. de differ. morbor. cap. 4.* sed quomodo ex frigore ulcerari possint partes, ut in textu dicitur, recte exponit Fuchsius in pernionibus, qui Hyemali tempore accidunt, & sæpissime ulcerantur magno cum dolore, ac difficulter postmodum curantur, atque non nisi in æstate.

Idem Hippocrates *Lib. 6. Epidem.* docet à frigore vehementi, non raro venas disrumpi, indeque ulcera tum externa, tum interna excitari: à nimio quoque frigore, passim experimur scindi & ulcerari partes extimas corporis, quæ magis expositæ sunt aëri, illiusque vehementi alterationi quam maxime subjiciuntur, unde manuum & labiorum scissuræ: Porro in his aliisque similibus, sicuti frigidum in causa est ut findantur & ulcerentur, ita ex adverso calidum conferens & salutare evadit, præsertim si intra mediocritatis limites adhibeatur: nam revera ab uno extremo ad alterum transire atque adeo vehementer applicare, & repente calefacientia etiam periculosum, ut in expositione aliorum Aphorismorum dictum est.

Nocet quoque frigidum his maxime, quibus in capite ulcera nascuntur, eadem profecto ratione, qua mox ostensum est frigidum ulceribus quibuscunque & capiti universaliter officere: cumque Hippocrates dicat in definite de ulceribus in capite enatis, non est, ut id ad hæc vel illa ulcera coarctemus, quippe cuicunque ulcere nocuum illud existimandum est; facile enim etiam levia ulcera inde graviter afficerentur & mortificationem aut gangrænam subirent, non sine

gravi

gravi vitæ periculo. Quamobrem jure optimo conferre his calidum hoc loco memoratur, tum ratione ipsius ulceris, tum etiam ratione partis ulceratæ, atque eo magis, si ad mortificationem vergat, ut ostendunt verba illa; *& his, quæ à frigore emoriuntur aut ulcerantur.*

Herpetibus quoque calidum prodesse asserit Hippocrates: Cumque herpes vel simplex sit, & miliaris dictus, vel exedens & ulcerosus; notatur hic speciatim exedens quia ad classes ulcerum refertur de quibus specialiter hic Aphorismus scriptus est, quod sane hoc loco videtur notandum, siquidem herpes vulgo creditur progigni ab humoribus biliosis & calidis, qui creduntur sed falso indicare refrigerantia, non calefacientia ut hic Hippocrates recenset.

Denique inquit Hippocrates conferre calidum *sedi, pudendis, utero & vesicæ* & sana quidem ratione, quia hæ partes sunt de genere exanguium vulgo spermaticarum: quemadmodum enim superius dictum est frigidum esse inimicum ossibus, dentibus, nervis, cerebro, spinali medullæ, ita plane nocuum putandum quoque est memoratis in hoc Aphorismo partibus, quales sunt pudendæ, uterus & vesica, teste anatomia. Concludit ea propter Aphorismum hunc longum Hippocrates: his verbis: *His calidum amicum est & judicans, frigidum inimicum & perimens*; ut scilicet peroratione Aphoristicam sententiam decernat: quod sicuti prædictis partibus calidum convenire statuitur, sic è contra frigidum sit existimandum, unde quaque nocuum & funestum, ut propterea nulla de causa possit in usum duci frigorificorum medicamentorum administratio, quotiescunque partes istiusmodi laborant, & ulceri vel præsentì vel imminenti subjectæ sunt.

Objectiones & difficultates circa hunc Aphorismum in textu sunt solutæ.

Aphorismus XXIII.

Frigido vero in his utendum, unde fluit aut fluxurus sanguis est, non quidem eodem loci, sed circa ea loca unde fluit: & si quæ partium inflammationes aut ardores (seu velut incendia quædam) ad rubrum sanguineumque colorem

tendunt, ex recenti sanguine iisdem ipsis adhibito: nam inveterata nigrefacit: Erysipelas etiam non ulceratum juvat: siquidem exulceratum laedit.

Contentum seu Intentio.

De frigidi usu Medico.

Connexio: Posteaquam Hippocrates calidi commoda & utilitates in præcedenti Aphorismo enarrasset; in præsentiniunc accedit ad frigidi auxilia & juvamenta.

Hic Aphorismus juxta tres conclusiones prolatus in tres partes dividitur: in *Prima* frigido utendum esse ad sanguinis fluxiones sistendas & præcavendas: in *Secunda* frigido etiam utendum ad inflammationes rubras in sui principio: in *Tertia* utendum quoque ad erysipelata non ulcerata.

Siquidem in prioribus Aphorismis Hippocrates meminerat calidorum adhibitionem non conferre in his, quæ sanguinem fundunt, ac propterea tacite frigidum commendaverat; proinde in hoc Aphorismo non tantum id expresse memorat, sed etiam addit modum & locum, ubi frigida admoveere expediat.

Primo autem monet *utendum frigido, unde fluit sanguis, aut etiam unde fluxurus est*; ad reprimendum scilicet illius fluxum, frigoris namque beneficio sanguis figitur & detinetur, ac ductus ipsi coarctantur; mox vero addit, *illud nequaquam adhibendum esse, supra ipsas partes sanguinem fundentes, sed juxta & circa ipsas*; siquidem frigidum ulceribus nocuum est, & immediate parti sanguinem fundenti admotum, sanguinem ipsum cogeret, & cogendo grumefaceret, cum graviore periculo, tum ipsius partis tum totius: Jure merito ergo adnotat *circa ipsas partes* frigidum esse admovendum, hoc est non parti affectæ seu recipienti sed mandanti, & vasis majoribus per quæ sanguis ad partem affectam fluit, ut nimirum sanguinem, per sua vasa excurrentem quodammodo remoretur, crassiore nimirum illo reddito: Verum tamen summopere expediet, non tantum frigefacientibus uti, verum etiam pro rata sua adstringentibus quemadmodum antea notatū est.

Sed

Sed & non tantum in ipsa parte proxime sanguinem fundente medicamenta frigorifica applicanda sunt, sed etiam proderunt in aliis partibus, unde fortasse majores arteriarum & venarum trunci derivant, quod etiam significare voluit Hippocrates per particulam illam *unde*, ut propterea consueverint peritiores chirurgi etiam frigeficientia & adstringentia medicamenta adhibere supra hepatis & lienis regionem, quoties sanguis per venas sedis, aut etiam per vias urinæ exitum habeat: Sic pariter exeunte sanguine per narium hæmorrhagiam, non tantum naribus ipsis, verum etiam fronti, cervici, & jugulo medicamenta cum fructu admoventur. Id ipsum quoque operari licebit in partibus per quas sanguis fluxurus est: etenim quæ fluentem sanguinem cohibent, fluxurum multo facilius anteverunt.

De inflammationibus (quarum hic mentionem facit) potissimum futuris, quoque par ratio militat, ut partes ipsæ inflammationem subeuntes frigidis foveri debeant, ne ipsam inflammationem contrahant; cum enim frigida poros & meatus corporis coarctent, prohibent proinde ne sanguis in illis excipiatur & hæreat, unde vulgo frigida dicuntur habere vim repellendi: At vero ut tuto ista administrentur non nisi statim ab incipiente inflammatione partibus sunt adhibenda, antequam inflammatio fiat & sanguis stagnet. Ceterum post factam inflammationem, locum habere non poterunt, quoniam tunc sanguinem magis & magis ibidem figentia vel irresolubilem redderent, vel gangranam excitarent. Quod de inflammationibus dixit, protrahit quoque ad flammeos ardores sive phlogosim & efferuescentiam in partibus inductam, ubi nimirum dolor excitatur cum ardore, qui solet esse prodromus inflammationis. Est tamen summopere advertendum, non cuicunque parti, quæ inflammationi aut phlogosi obnoxia videtur, in frigidantia ista tuto admoveri posse, etenim si partes ignobiles sint, & exinde timeatur repulsum humorem, in partes nobiliores vergere posse, proculdubio, frigidorum administratio periculosa erit. Hinc laborantibus articulis, atque corporis emunctoriis, nemo audet frigidorum usu, humores fluentes aut fluxuros repellere, solum autem in affectibus capitis, aliarumque partium principalium; in frigidantia Epithemata tutius admoventur, quamobrem in phrenitide, oculorum inflammatione aliisque affectibus calorificis, & inflammatoriis, partium
supe-

superiorum, oxirrhodina, stillicidia, lotiones & balneationes infrigidantes in praxi adhiberi solent.

Addit porro in *textu* Hippocrates, *ad rubrum sanguineumve seu cruentum seu floridum colorem tendentia*: ut scilicet exinde moneamur, in tenuiori sanguine, vel etiam acriori, ista locum habere posse, & cum de recenti fluxio facta est, id est in principio secus vero cum sanguis aliis humoribus est commixtus & ex diuturniori tempore in partibus hæsit, hoc est in augmento vel statu utpote suppurationi contraria, prorsus exitialia forent. Nam ut idem Hippocrates subdit; *nam inveterata nigrescit seu nigredinem & livorem affert*, & subinde facile gangrænam. Postremo etiam asserit *erysipelas etiam non ulceratum juvat*: eadem prorsus ratione, ut nimirum fluentem illum humorem repellat, & per suos ductus in partes alias distrahat; quod tamen intelligendum, si erysipelas leve sit, & extenui humore oriatur, quod facile corrigi & inverti possit ab usu frigefacientium medicamentorum: Caterum in aliis periculosa erit ejusmodi infrigidantium administratio, cum crassus & multus humor, nec tam facile corrigi, aut transferri possit quin ex adverso facile in partes internas repat & longe majorem noxam afferat: nam ut alibi ex Hippocrate habetur, *erysipelas ab extra intro verti malum*.

Quod denique dixit *de erysipelate non ulcerato*: Excipit in fine Aphorismi, omnino *in ulcerato erysipelate*, tum quia frigidum ulceribus omnibus mordax & inimicum est, tum etiam quia ulceratum erysipelas plerumque illegitimum & spurium esse solet, adeoque non à simplici humore tenui & volatili sed à commixto crasso & acido progignitur, qui frigefacientium usu magis densatur & acescit. De qua re legendus est Galenus lib. 2. ad Glauconem Cap. 1. & 14. meth. Cap. 2. & 3. At experimentis nunc tandem constitit, spiritu vini erysipelata quæcunque aboleri, sicut etiam beneficio medicamentorum acidum absorbentium, temperantium, aut diffillantium, ad quorum classem infrigidantia hic ab Hippocrate memorata referri possunt hoc tamen brevissime nota tum volumus quod frigida humida intempestive repellant frigida terrea & quasi talia securius. Inter alia sanguinem fluentem vel fluxurum sistentia remedia, maximum auxilium idque securissimum (de quo pauci imo nec ipse

ipse Hippocrates mentionem fecit) est maxime vulgare, scilicet compressio loci venæ vel arteriæ, per digitum ; quod ipse in Praxi sæpius, omnibus aliis remediis sistentibus præcisione, uisione &c. in cassum adhibitis, observavi; constituendo Sartores (utpote qui vitæ sedentariæ optime assueti) qui diu noctuque partem digitis comprimendo, tenerent per complures dies, donec sanguinis impetus subsisteret & pars affecta sanguinem fundens consolidaretur per adhibita stegnotica medicamenta eidem administrata & applicata.

Pro coronide hujus Aphorismi, & eruditione Juventutis potissimum medicæ, reticere nequeo, occasione verborum ab Hippocrate, in hoc Aphorismo suprâ allatorum; *non ad ipsa, sed circa ipsa unde influunt*; utilissimam acutissimi Cardani animadversionem, arguens Fuchsum quod hæc verba non intelligens ceciderit in errorem: *nescit enim* (inquit) *ubi humores influunt, non in loco ipso, sed circa adstringentia & repellentia adhibenda seu apponenda esse, ut etiam in Podagra, cruri non pedi v.g. emplastrum ex fursure, aceto & aqua, vel etiam ex accatia & milio, aceto & aqua: idque ex quatuor causis: Primo quod occupet majus spatium & ita plus juvare possit: Secundo quod locum affectum non comprimat nec dolorem excitet; plus enim sæpe in dolore & gravitate emplastri, quam virium in medicamentis quæ in illo ad juvandum egrotantem. Tertio quod si loco patienti adhibueris, quod jam coactum est, ita coeges ut plurimum ladas agrum. Quarto quod ubi materia jam eo pervenerit tametsi repellas cogetur primum ingredi locum affectum; deinde etiam quod non ingrederetur, premit illum & urget circumstans eum: hoc enim veretur & Hippocrates & Galenus alibi onerare lasam partem. Hæc Cardanus.*

Aliæ objectiones & difficultates circa hunc Aphorismum in contextu sunt solutæ.

Aphorismus XXIV.

Frigida veluti (seu qualis) nix & glacies pectori inimica, Tusses movent, sanguinis fluxiones & destillationes efficiunt.

Yyyy

Con-

Contentum seu Intentio.

De frigidi effectis morbosis.

C*onnexio* : Cum superius , nempe Aphorismo decimo octavo Hippocrates damna exposuisset , quæ frigidum facit in universum seu in genere quaecunque illud sit: Nunc in hoc Aphorismo ad illa damna accedit , quæ frigidum immoderatum facit. Hic Aphorismus, cum duas habeat conclusiones, juxta illas in duas partes dividitur : *Prima* dicit frigida ut nix & glacies pectori inimica : *Secunda* demonstrat frigida Tusses movere , sanguinis profluvia & destillationes efficere. De his ergo, quæ frigida dicuntur , præsertim *actu*, loquitur hic Hippocrates , & non tantum si aquea & liquida illa sint sed & cujuscunque generis, etiam solida, dummodo frigorificam vim referant & refrigerare valeant: cumque is utatur exemplo nivis & glaciei , certè intelligenda quoque illa sunt quæ extremè frigida dicuntur , quippe nix & glacies summè infrigidantia observantur.

Et quoniam antea dixerat , frigida convenire partibus sanguinem fundentibus, aut quæ proximè dispositæ forent illum fundere , si nimirum circa illas essent admota, propterea nunc excipit eas quæ ad pectus pertinent , siquidem summe frigida pectori inimica sunt, ubi tantum abest ut sanguinem fluentem aut fluxurum cohibeant , ut potius affluentius promoveant & extimulent, ac præterea tusses excitent & destillationes , ex quibus fit major sanguinis commotio. Et quidem hæc frigida sunt pectori inimica, non solum quia pectus osseum est, & frigidum ossibus hostile observatur, sed etiam ex eo, quod comprimendo thoracem , & musculos respirationi addictos coarctando, eidem magno impedimento sit, quin imo si fortassè exindè sanguis fundatur per frigidorum administrationem facile posset coagulari , atque in pectoris cavo detentus gravem noxam pulmoni, & cordi imo manifestum vitæ periculum minari.

Frigida Tusses quoque movent, tum asperam arteriam vellicando tum etiam coarctando illius cavitatem , undè natura sollicitaretur ad expulsionem per tussim , quæ specialis motus pectoris & pulmonis

monis est, conantis expellere ea, quæ prædictas cavitates occupant & impediunt: Hac eadem ratione promota tussis sanguinis sputum excitat, & ipsum fortasse fluentem impetu suo magis propellit, præterquam quod frigidum, ut ante ex Hippocrate notatum est, venas dirumpit, & sanguinis exitum inducit.

Denique *destillationes* excitant, potissimum constringendo & corrugando glandulas capitis & cervicis, imo cerebrum ipsum, quod magna Glandula ab Hippocrate appellatur, potenter condensat; quemadmodum etiam docuit Galenus 3. *Aphorismorum comment.* 12. Sic experimur in algenti Hyeme catharros, & destillationes excitari, easque perniciosas admodum cum acredine & salsugine, ex prohibita è poris corporis transpiratione. Merito ergo Hippocrates in Aphorismo usum frigidorum in his, & consimilibus casibus tacite vituperare videtur, etiam si aliundè illa ratione fluentis sanguinis viderentur indicata.

Porro si frigida extrinsecus admota, nocua sunt pectori, multo magis eadem infensa putanda sunt, cum intrinsecus fuerint adhibita, quippè si duntaxat laryngem pertingant, solent sæpissime Tusses molestissimas parere, & alia plura incommoda cæteris adhuc partibus inferre; undè aquæ gelidæ, glaciales & nivosæ, perniciosissimæ esse consueverunt, & qui populi illis utuntur, internis doloribus sæpe sæpius primum affecti, sputum mox sanguinis, hæmorrhoidum fluxum obstructions & in glandulis colli, potissimum dolores irresolubiles ac strumosos patiuntur. Unde sedulo præmonendi sunt helluones glaciales nè potis nivatis aut glacialibus potibus cum tot mala efficiendi vim habeant, tot viscera hebetando & destruendo præmaturè ad Hydropem & mortem disponunt.

Quæres : Curiositatis causa, utrum nix & glacies, sint frigidiora aqua pura, quæ inter Elementa est frigidissima seu frigida in gradu quarto, medicè: in gradu octavo Philosophicè: R. Breviter, nivis & glaciei frigus esse intensius quoad activitatem quatenus in subiecto densiori: non autem quoad gradum.

Aphorismus XXV.

Articulorum Tumores, & dolores absque ulcere, atque etiam Podagricos & convulsiones, magna ex parte, frigida aqua large affusa levat & extenuat, solvitque dolorem: nam modicus Torpor, doloris solvendi vim habet.

Nota: De hac materia jam multa diximus supra Aphorismo 21. hujus Libri.

Contentum seu Intentio.

De frigidi usu narcotico in Doloribus.

C*onnexio:* Cum Hippocrates penultimo id est vigesimo tertio Aphorismo, frigidi effectus & juvamenta in universum explicuisset: nunc in hoc Aphorismo, ad eos effectus seu auxilia propria accedit, quæ aquæ frigida propria sunt, unde pariter commendat in hoc Aphorismo Hippocrates usum frigidorum, & præsertim aquæ in doloribus & tumoribus articulorum. Licet podagricam præferant conditionem modo sine ulcere illi sint: Id vero neque indiscriminatim & in omnibus sed aliquibus tantum, prout designant verba illa: *magna ex parte* (seu ut alii) *horum quidem plurima.*

Et quidem *Tumores articulorum* neque omnes & quicunque articulis accidere solent, sed solum calidos seu cum inflammatione conjunctos, quinempe à calidis tenuibus & acris humoribus fiunt; si enim fortasse, ab humoribus crudis, phlegmaticis aut lymphaticis penderent, procul dubio frigida aquæ superaffusio utilis non foret, sed neque in abscessibus, cum scilicet in articulos humores decumbunt. Neque etiam in Tumoribus à causa frigida & crassa, quandoquidem per frigidorum appositionem, nec ad resolutionem nec ad suppurationem illa disponderetur, quin imo densior & crassior effe-

effecta, irresolubilis evaderet, & noxam in articulis & in ossibus inferret inemendabilem, quemadmodum contingere solet, in ea specie tumorum quæ vulgo *Spina Ventosa* appellatur. Porro, neque in abscessibus, quoniam humores in articulis depositi, frigidorum admotione, possent in partes nobiliores recurrere, quemadmodum ab usu repellentium medicamentorum evenire solet. Itaque in illis duntaxat tumoribus exponendus videtur Aphorismus, in quibus tenues, acres & calidi humores peccant.

Sed & adjecit in Textu Hippocrates *Dolores*; quare junctim articulorum tumores & dolores, hic intelligendos interpretabimur, unde frigidorum administratio, videtur potius, in gratiam doloris sedandi, hoc loco commendata: nemo enim in Arte medica, vel medioeriter versatus, rationabiliter frigida, in articulorum tumoribus adhibebit, nisi illi fuerint cum dolore conjuncti, ad sedandam nimirum molestam illam in articulis sensationem, quia dolor est de genere illorum symptomatum, quæ invertunt curationem & specialius sui remotionem expostulant.

Ut autem id expressius adnotaret Hippocrates, addidit in Textu, *Podagricos*, siquidem in Podagra articuli simul tumore & dolore laborant; cum autem dolor cum tumore jungitur, acredo in humoribus designatur, ad quam retundendam, plurimum conferre solet usus infrigidantium.

Sed utrum *frigida* quæ hic memorantur *actu* vel *Potentia*, juxta Veterum Medicorum loquendi modum, talia esse debeant, controversi potest: verum quia Hippocrates in Textu meminit speciatim *aquæ frigida*, ideo probabilius dicendum videtur, frigida *actu* talia, esse intelligenda: At vero licet ista, manifestius notata videantur, non tamen quis inficiabitur, posse etiam *potentia* talia administrari: Sic passim experimur in doloribus articulorum, etiam podagricis convenienter applicari & prodesse ad sedandum dolorem, olea infrigidantia succos plantarum, decoctiones herbarum, itemque cataplasmata & linimenta ex his composita. Sunt qui in doloribus Podagricis acerbioribus admovent dolenti parti aquam nymphææ aut succum ejusdem, sperma ranarum, oleum lumbricorum, acetum tum simplex tum rosaceum & alia hujus generis: Verum quo pacto hic opus & actionem exerant, altioris est inquisitionis de quo alibi.

De frigidis quæ vulgo Medicis Narcotica & stupefacientia dicuntur vimque suam immodicè exerunt uti est opium, Mandragora, Hyosciamus hic sermo nobis non est, cum eorum usus plerumque & intus & extus timendus sit: Nihilominus tamen & ea in maximis doloribus, adhiberi solent, sed cum magna cautela & circumspeditione atque nonnisi corrigentibus quibusdam additis: Interim nos in hoc Aphorismo cum Hippocrate de frigido aquæ utpotè tutiore solum agimus.

Debent autem (ut textus dicit) dolores isti *esse sine ulcere*, nam si ab ulcere dependeant, vel cum ulcere sint conjuncti, frigida admota procul dubio nocebunt, nam frigidum ulceribus est inimicum, atque in his admotum, non solum dolores nullatenus sedaret, sed contra potius augeret & exasperaret: Neque si dolores gravantes sint, ista locum habebunt, sed solum si acuti pungentes & vellicantes fuerint, quam ob rem adjecit *horum plurima*, quibus manifestè designat, se tantum intelligere velle tumores inflammatorios, Erysipelatosos, vigiliam inferentes, adeoque omnino molestos, etenim si leves forent, & tolerabiles ista tentare tutum non foret. Notissima est historia Maximiliani Imperatoris, qui ut se à doloribus podagricis liberaret, in fluvium gelu frige factum pedes immergi mandavit, atque ita vita defunctus est.

Eodem modò intelligendæ sunt *convulsiones* in Aphorismo memoratæ cohærenter his quæ supra de Tetano dicta sunt, dummodo frigida aquæ affusio, & humores acres spasmus seu convulsionem inferentes retundat, & membra affecta, per calorem ad intima revocatum, roboret, ut supra nempe Aphorismo vigesimo primo hujus libri, de Tetano laborantibus dictum.

At verò in his omnibus, multa ac diuturna tantum frigida aquæ affusio juvare poterit, siquidem in Textu dicitur: *frigida aqua largè affusa levat*: hac enim ratione fieri potest ut dolor sedetur, & causa illum faciens aliqua ex parte discutiatur: Id quod multo clarius expressit Hippocrates rationem levaminis istiusmodi in Tumoribus & doloribus articulorum afferens; dum in calce Aphorismi inquit: *nam modicus Torpor dolorem solvit* (seu ut alii) *doloris solvendi vim habet*: quandoquidem ex larga frigida aquæ affusione quodammodo partis laborantis sensus ex ingenti frigore obtunditur, undè torpor fit & dolor sedatur.

Verum advertere oportet, ne utiquam Torporem præfertini extremum induci debere, sed levem, aliàs fieret transitus, ex uno in aliud extremum, & quidem gravius, maxima cum ægrotantis noxa, quoniam obstupefacta omnino parte, Gangræna facillimè succederet & mortificatio cum livore idest syderatio. Quare ad sedandum dolorem, satis erit, si frigida aquæ affusione, levis torpor inferatur, quantus scilicet satis sit, sensum partis aliquatenus hebetare, & causam dolorem inferentem, acrem scilicet humorem obtundere.

Dicitur denique *modicum Torporem* dolorem solvere, non quod reverâ dolorem & causam doloris adimat, sed quòd remittat solum & sedet: Quamquam negari non possit, solutum penitus aliquando fuisse appositione frigidorum, licet tumor, qui fortè cum dolore inerat, remansisset quoniam potuit frigida aqua adeo tonum partis immutare & acres humores invertere, ut vim eorumdem puncturiam & dolorificam remiserit relictâ inertî illorum corpulentia. Objectiones in contextu sunt solutæ.

Aphorismus XXVI.

Aqua qua cito calefit (seu calet) & cito refrigeratur, levissima est.

Contentum seu Intentio.

De Probationibus Aquarum.

Connexio: Cum hætenus multa de Aquæ, tum calidæ, tum frigidæ emolumentis & nocumentis dixisset Hippocrates: In hoc præfenti Aphorismo, nactus occasionem, agere de notis, quibus bona aqua dignosci possit.

Hanc eandem prorsus sententiam, iisdem omninò verbis profert Hippocrates 2. *Epidemor. sect. 2.* quam & repetiisse, nisi mavis dicere, desumpsisse videtur *ex lib. de aëre aquis & locis*, bonarum aquarum recensens qualitates, & quidem istas non aliundè certiores deducendas commonefacit, quam ex cita & prompta earundem calefactione & refrigeratione: Etenim bonitatis indicia à leviori pondere desumpta, non tantum dubia plerisque sunt, sed vana penitus illa

ex-

existimat *Plinius lib. 31. cap. 3.* inquiens: *quidam Statera judicant, de aquarum salubritate frustrante diligentia, quando perrarum est, ut levior sit aliqua*: Atque mox inhærens huius Hippocratis sententiæ subdit: *Certior subtilitas inter pares esse, quæ calefiat, refrigereturque celerius*: Id ipsum fassus est *Celsus Lib. 2. cap. 18.* Aphorismum hunc ita vertens: *Eo melior quæque aqua est, quæ celerius & calefit, & frigescit*: quod & sæpius sentit Galenus præsertim vero *Lib. de Ptisana cap. 1. & Lib. de simplicium medicament. facult. cap. 17. & in commentario huius Aphorismi.* Sed & Erasistrochus apud Athenæum de aquarum bonitate ac levitate iudicium rectum Statera ferre putant, siquidem se ipsum expertum subdit, in Amphiarati atque Eretriæ aquis, quarum altera pessima, altera optima est, nullum in pondere discrimen deprehendi.

Verum etsi iudicium à gravitate & levitate aquarum desumptum beneficio stateræ fallax sit, & nullius fere momenti, non tamen exinde quis deducet, illud omnino vanum esse, ut in isto saltem Hippocratis non aliquatenus includatur, quin potius clare pateat, ex hoc illud fuisse deductum: quæ enim aqua cito calefit, & cito refrigeratur, nullius impedimenti est, ut utrumque prompte admodum subire queat, quoniam alienæ misuræ expers omnino est, neque intermixtum quidpiam habet, quod calefactioni & refrigerationi obicem ponat, quemadmodum sunt aquæ Thermæ nitratæ, Vitriolatæ, sulphuræ aluminosæ, cænosæ & aliæ; quæ enim cito calorem contrahunt & tarde refrigerescunt, aut è converso, à diversa fossilium, & salium mixtura id habent. Hinc ab eodem Hippocrate *Lib. de aëre aquis & locis*, illa aqua ut purissima laudatur, quæ cujusvis odoris, saporis, aut coloris est expers, adeoque proximè accedit ad naturam aëris: cui inhærens *Plinius lib. 31. cap. 18. supra citato dixit*: Aquam salubrem aëri quam simillimam esse oportere. Quam obrem sana ratione *Celsus*, omnes bonæ aquæ dotes comprehendens *lib. 2. cap. 18.* scriptum reliquit: *Levis aqua pondere apparet, & ex his, quæ pondere pares sunt, eo melior quæque est, quæ celerius & calefit & frigescit quoque celerius, ex ea legumina percoquantur*: Siquidem huiusmodi aquæ extraneorum corporum mixtura carentes levissimæ sunt, & non solum levitate, à cita & facili digestionem ac permeabilitate desumpta ut exponit in hoc commentario Galenus, verum etiam à levitate ponderi contrapposita, quia nul-

nullum extraneum corpus in se continentes proxime accedunt ad naturam & conditionem aëris, cum quo illæ Symboleitatem retinent, adeoque proxime parem levitatem participant: aër etenim & levissimus est, & faciliter calore aut frigore fit alterabilis, maluit autem Hippocrates bonitatem & simplicitatem aquarum sumere, à facili & cita calefactione & refrigeratione, veluti testimonio è Physicis eruto certiori, & pene infallibili, omisso alio exponere in statera desumpto veluti vulgari, cunctis obvie multumque fallaci, si potissimum sejunctim consideretur, quo nimirum reimedicae Professores citra mechanicæ leges possent facillime de aquarum bonitate dijudicare.

Debent tamen aquæ internoscendæ, tum gelidæ tum calenti aquæ, aliique liquori, igni aut soli æqualiter exponi, ut nimirum æquali agenti, tum calefacienti, tam refrigeranti subjiciantur: alias, si una efficaciori, altera debiliori, tam in calefaciendo, quam in refrigerando exponatur, rectum judicium exinde ferri non poterit, de cita aut tarda utriusque incallescencia aut frigectione, cum ex inæquali agentium vi, non nisi inæqualis actio exoriatur. Ut ergo aquarum species inter se invicem distinguantur, & quænam ex illis purior, simplicior & levior sit, recte dijudicemus, simul una in eandem aquam calentem aut gelidam, paribus phialis vitreis conclusæ immergantur, atque eodem temporis intervallo & æquali positione detineantur, mox deinde beneficio duplicis & consimilis thermometræ examinentur, in gradibus contracti caloris aut frigoris pluribus vel paucioribus. Verum tamen adhuc in his falli possumus aliquando, cum præsertim aquæ, non corpulenta materia, sed halitibus solum, seu volatilibus partibus sunt referta, ut in plerisque acidulis, nitratis, vitriolatis & sulphureis observatur, quæ etsi levissimæ ac prompte admodum permeabiles, per vias urinæ, nixtum tamen quid habent volatile & halituosum sive ex sulphure, sive ex vitriolo, hali nitro (seu sale nitro) cæterisque similibus, ut propterea etiam, saporibus diversis nonnullæ distinguantur; pari sane ratione, qua fit, ut aquæ fontium, cæteroqui purissimæ, paucis guttulis spiritus vitrioli, sulphuris, salis armoniaci aliisque medicatæ vi atque effectû varient cum aliunde nihil quidpiam ponderis extranei acquirant, aut amittant, nec excalefactioni nec frigectioni pro rata sua, citius vel tardius subjiciantur.

Sed & sine ullo. cujusvis instrumenti mechanici apparatu, solent nonnulli per solam ovi gallinacei aut columbini, in simplicem aquam immersionem brevissime dijudicare, quæ aqua gravior vel levior sit, siquidem quo aqua purior fuerit, eo ovum profundius mergitur, & quo ponderosior eo quoque altius assurgit: idque pro salium permixtorum diversitate & copia. At judicium inde sumendum Delio eget notatore.

Cæterum facile nunc est, aquarum bonitatem atque malitiam Chimiæ beneficio detegere, tum simplici evaporatione, tum per alembicum destillatione, tum etiam per varios stillatitios liquores commixtione; unde quidquid in aquis heterogeneum delitescit, prompte revelatur & patefit. Quoniam vero aquæ omnis odoris, saporis & coloris expertes esse debent, ut quocunque extraneo corpore sint exutæ, hinc fit ut aquæ ex montibus stillantes, ac veluti per filtrum trajectæ, cæteris meliores sint ac levissimæ observentur: Itemque aquæ per æstatem cum tonitru decidentem, utpote è tenuioribus vaporibus altius in aëre delatis, atque omni inquinamento terreo depuratæ, ut idem Hippocrates docet, *cit. lib. de aëre aquis & locis*; si præsertim in bonis deinde locis & politis cysternis diutius asserventur, ut omnem faculentiam penitus deponant. Quam Hippocratis sententiam secutus Vitruvius Lib. 8. Cap. 2. pluvialem aquam cæteris anteponit inquiens: *Itaque quæ ex imbribus colligitur aqua salubriores habet virtutes, quæque elicitur ex omnibus fontibus levissimis, & subtilibus tenuitatibus, deinde per aëris exercitationem percolata tempestatibus liquecendo pervenit ad terram.* Verum non omnem aquam pluvialem æque commendabilem censet Hippocrates, sed temporaneam solum, quæ scilicet media æstate decidit, vigente canicula ut se ipsum explicat *6. Epidem. Sect. 4.* ibi enim aliam facit temporaneam, aliam nimbosam, & procellosam: *Temporanea* magis calore solis elaborata, & veluti per alembicum destillata tenuior & levior est, omnique impuritate exuta, si præsertim cum tonitru decidat. *Procellosa* vero ac nimbosa ex vaporum & exhalationum inter se mixtorum abundantia generatur, unde calori attenuanti & disgreganti neutiquam subest: quamvis in contrarium vernas & hyernas potius commendet Rufus Ephesius apud Oribasium *5. Collect. Cap. 3.* sed minus rationabiliter. Quas omnes aquarum dotes & bonitatis diffe-

differentias complexus Celsus ita distribuit *Lib. 2. Cap. 18. Aqua levissima pluvialis est, (in mundis locis excepta) deinde fontana, tum ex flumine, tum ex puteo; post hac ex nive & glacie, gravior ex lacu, gravissima ex palude.* Verum qui plura de his desiderat, legat Hippocratem ejusque commentatores *super cit. lib. de aëre aquis & locis.* Nec hic reticendum quod monet Rodericus Fonseca in *Commentario* hujus Aphorismi: quod aqua ad tuendam sanitatem maximi momenti sit, ut homines Regionum, qui pravas habent aquas, nec sani nec diu vivere possint; quod ex adverso observatur quod homines in ea Regione sani & diu vivant, in qua bona aqua fruuntur: Bonæ enim aquæ, bonum quoque aërem esse ostendunt; Ubi autem aqua prava fuerit, arte reducenda est vel coctura vel destillatione ut mox innuimus.

Quæres An aquæ an vini Potatores diutius vivant? *R. 1.* Concertant medici ac adhuc sub judice lis est. *R. 2.* In universum aquæ potatores saniores degere & plerumque diutius vivere quam vini potatores, ut testantur exempla patrum & hominum in eremis olim & hodie dum degentium: non ideo autem, quod vinum in re non sit utilius, tum ad sanitatem tum etiam ad senectutem producendam; sed quia ejus est suavitatis liquor ille, ut homines magis quam decet, illi se dedant coque facile abutantur, & inde fiunt graves viscerum Phlogoses & destillationes, podagræ, contracturæ &c. Unde Poëta:

Asthma, tremor, febris, tabes, mors, calculus, hydrops

Sunt soboles Bacchi, & fæx scelerata meri.

Perfide, quam dulci fallis nos, Bacche, veneno!

Quos, aliis ut vivant: cogis alendo mori.

Et Juvenalis:

Non vivas ut edas; sed edas ut vivere possis.

Unde Hippocrates aquam magis corporis castigationem quam nutrimentum appellavit. *R. 3.* Si aquæ Regionum sunt impuræ nitro sulphuræ, præferendum esse moderatum boni vini usum.

Reliquæ difficultates in contextu sunt solutæ.

Aphorismus XXVII.

Quibus noctu bibendi est aviditas (seu qui noctu bibere appetunt) iis admodum sitientibus, obdormiscere bene est.

Zzzz 2

Con-

Contentum seu Intentio.

De siti nocturna.

C*onnexio*: Cum aquæ potus ad sistendam sitim, in usu sit mortalibus: recta optimaque ratione necti potest, hic Aphorismus de siti verba faciens, cum priori.

Hic Aphorismus cum unicam habeat conclusionem non dividitur. Docet ergo in hoc Aphorismo Hippocrates, num ob sitim nocturnam bibendum sit: Bonum autem ait, si sitis illa super dormiendo sustineatur.

Quamvis autem hæc sententia, tum ad prognosim, tum ad the-
rapejam pertinens, clarissima videatur, in ea tamen dubitare primo
contingit, de qua siti intelligenda veniat de naturali nimirum, an de
præternaturali seu morbofa: Et quidem si de naturali interpretemur,
quæ scilicet in statu sano accidere solet, ex cibis solum plus justo in-
gestis vel calorifica vi præditis, quales sunt multo sale, aut aromatibus
conditi alique similes, nemo plane inficiabitur nullatenus bibendum,
ne nimirum afflicto & operato ventriculo, addatur afflictio & onus,
sed super dormitione solum sitim illam esse sedandam, cum ea non
nisi largiori potu desinat, præsertim quia solius aquæ beneficio, salia
illa aut aromata dilui ac infringi desiderant: Ita quoque si sitis fiat,
ab inopia lymphatici vel serosi humoris, ex immodicis fortasse eva-
cuationibus absumpti, cum notissimum cuique sit, ea ratione sitim ani-
mantibus datam, ut ipsa, veluti calcari ad assumendum potum stimu-
lentur, ut & fame ad cibos compeffendos, ne penitus deficient. Itaq;
de præternaturali seu morbofa potius, videtur explicandus Aphorif-
mus, quamobrem apposite adjecit Hippocrates hæc verba: *noctua, iis
admodum sitientibus*: quæ sane ægrotantibus & morbose sitientibus
contingunt.

At vero, quoniam veteribus in usu erat lautius cænare, quam
apud nos saltem plerumque fit, facile quoque est, ut de his quoque
sententiam hanc Hippocrates protulerit, cum sæpe sæpius accidat, à
larga & copiosiori cæna sitim fieri molestissimam & præsertim si vino
meraciori atque uberius assumpto fuerit associata, unde falsa sitis ac-
cidit, & potius à concrefcente & viscoso humore ab assumptis cibis
pro-

progenito : Id ipsum clare docet Hippocrates 2. *prædictionum* inquiens: *eos, qui plurimum comedunt* solere sitire; quo casu sitim sustinere, ac superdormire bonum est, ut nimirum crassities illa per somnum extenuetur, ac dissolvatur; quippe sitis licet passio ventriculi sit, atque in stomacho fiat ut fames (licet Platoni placuerit illam potius ad pulmones referre) percipitur tamen in faucibus & in lingua, vel cum saliva sufficienti deficiunt, vel cum à lymphâ fluida & diluta non irrigantur, sed potius à viscosa, instar glutinis devinciuntur, ita ut pori & glandulæ salivales, roridum illum humorem effundere nequeant, quemadmodum à pastu largiori, & ab assumptis stipticis cibariis frequentissime accidit: tunc enim silere & superdormire ad sitim sedandam optimum remedium est: dixit autem, *bibendi est aviditas seu bibere appetunt* non sitiunt: Aviditatem enim habere seu appetere: non est revera sitire, sed quandam aviditatem & bibendi desiderium habere ex depravato sensu præsertim in ore & faucibus inducto, ad lymphæ salivariæ crassioris redditæ per humectantia dissolutionem: quo etiam fit, ut falsam hanc sitim sæpe numero gargarismis ex aqua ardente vel vino sedare soleamus, aut detenta in ore, vel mansa re quapiam salivam & spuitionem promovente.

Addit præterea *admodum sitientibus*, ergo de siti plane immoderata & excedente videtur locutus, quæ & si sanis à pastu contingens naturali appellari possit, non tamen quis perperam asseret, si quodammodo præternaturalem illam nuncuparet, veluti inductam à causa, vix à morbosa recedente, cum lympham salivalem sua fluxilitate orbatam pariat, & molestiam non levem stomacho ac toti corpori inferat, eo quod istiusmodi sitientes irrequieti & queruli fiant, imo loquela & motu linguæ plurimum hæsitantes, vix verbum proferre possint, quæ sane ad symptomata morbosa proxime accedunt. At vero ex hoc non bene Galenus infert, potum his esse statim exhibendum, quasi vero Hippocrates moderatam sitim esse tolerandam, & immoderatam largo potu sedandam esse voluerit, nam ex supra dictis contrarium clarissime evincitur, si nimirum sitis falsa seu spuria sit, & non ex inopia, sed ex copia, & crassitie lymphæ suboriatur.

Subditur tandem in textu: *obdormiscere bonum est, seu si superdormierint, bonum*: nam à superdormitione sitis proculdubio desinet,

digestis nimirum & dissolutis cibis ventriculum gravantibus, unde postmodum lymphæ salivariæ dilutior sit. Quod si causa sitim inferens omnino morboſa ſit, ut in febricitantibus à ſuperdormitione etiam miteſcet & ſedabitur; unde adhuc bonum ſignum erit, denotans illam non eſſe adeo contumacem ac malignam, ut remitti ac domari non poſſit: quamobrem ſi ſomnum admittit, ad meliorem ſtatum atque ad digeſtionem reducibilis, ſignificatur. Somnus autem hic neutiquam morboſus dici debet, ſed naturalis, qui ſcilicet prodeſt, tum ſedando ſitim, tum coctionem cauſæ illam inferentis promovendo, quæ plane à ſuperdormitione commode ſequitur.

At vero non ex eo quod Hippocrates dixerit *bonum ſi ſuperdormierint*, poterit quis è converſo inferre malum, ſi ſomnus nullatenus inſequatur, cum aliunde ſitis illa deſinere poſſit, præſertim data mora atque indicto ſilentio, admonente ad hoc idem Hippocrate 6. Epidem. Sect. 3. ſcripſit plurimum conferre ad ſitim diminuendam vel extinguentiam, *os claudere & tacere* unde ſalivæ diſpendium non fiat: atque hinc facile deducitur, cur hiantes ore, dormientibus os amareſcat & ſitiat, craſſeſcente nimirum lymphæ inductibus ſalivalibus, atque ab aëre inſpirato, exſpiratoque non minimum alterata, obſtructis interea oſcillis lymphaticis, & corrugatis glandulis palati, faucium & linguæ, ubi remorata craſſeſcit. Bonum autem exinde portenditur tum quia cauſa inferens ſitim, jam ſupponitur diſſoluta, unde non ſolum illa ſedetur, ſed ſomnus pariter facile concilietur; tum etiam quia pleraque alia incommoda placidiſſime evitantur. Porro ſomnus hic erit naturalis, non morboſus, utpote qui conferat, non lædat, dirigendo ſcilicet & attenuando craſſiorem ſalivam, & quietem, ac robur toti corpori impertiendo: neque ſolum bonum de tempore præſenti ſed etiam de futuro, cum exinde corpus ipſum per quam bene ſe impoſterum ſit habiturum. Verbo! bonum denique ſemper eſt, ſi poſt ſitim ſomnus ſuccedat.

Cæterum etiam Vigiliæ remedium eſſe ſitis, quæ ex ſomno ſit, quia diſſipat fuligines & impetuoſos halitus ac calorem qui ſitis cauſa eſſe poteſt retracti per ſomnum; verum cum quis poſt ſomnum ſitit & valide quidem, nec Vigiliæ ſitim tollere poſſint, non mox ad aquæ potum currere oportet, ſed prius permittendum, ut tales fuliginum & vaporum motus & caloris effectus ad ſuperficiem deducantur,

tur, ne bibita prius aqua metus suffocationis vel hydropis enascatur.

Objectiones in contextu sunt solutæ.

Aphorismus XXIIIX.

*Suffitus aromatum muliebria educit : sapius vero
& ad alia utilis esset, nisi capitis induceret
gravitatem.*

Contentum seu Intentio.

De suffitibus Emmenagogis.

Connexio: Cum Hippocrates de calidorum usu, hucusque multa proposuisset; modo in præsentia Aphorismo ad remedium se convertit, quod calidorum nomine comprehenditur, *suffitum* scilicet aromatum.

In duas partes recte dividitur hic Aphorismus: In *prima* ponitur conclusio intenta, quod nempe suffitus aromatum muliebria educat: In secunda vero cautionem proponit, eodem cautius & cum circumspectione mercandum esse.

Ad affectus ergo mulierum sese convertit in hoc Aphorismo Hippocrates, & per plures Aphorismos in posterum acturus de illis symptomatibus, quæ feminis tam nuptis quam innuptis accidunt, & tam tempore gestationis quam ante & post, præsertim vero à partu: In hoc ergo primo generali Aphorismo, ut mox innuimus, docet suffitum aromatum muliebria movere, ac deorsum ducere, eamque in aliis quoque morbis utilem esse, nisi tamen gravitas & dolor timeatur.

Inquit ergo primo *suffitus aromatum*: num autem naribus an utero is sit excipiendus, non memorat nec explicat; & num aromata ista debeant esse bene vel male olentia. Verum ad *primum* dicendum, utero excipiendum illum esse: naribus quippe fatida, odora vero utero semper adhibentur: Ad *secundum*, quamvis Heurnius putet, bene olentia, ut est cyperus, calamus aromaticus, cassia lignea, benzoi-

benzoinum &c. Et Galenus *in Comment.* præcipue intelligi scribat, cassiam costum, cinamomum, & amomum, ipse tamen Hippocrates *Lib. de natura muliebri* aromata hæc esse inquit thymbram, seu satuiream, ericen, hypericon, papaver album, radicem maluæ, semen urticæ, mercurialem, salviæ, dictamnium, amomum, cardamomum, helenium, aristolochiam, adiantum, peucedanum, semina apii, fœniculi, folia & semen rutæ &c. Itemque alibi recenset, cyperum, juncum rotundum, & oderatum, calamum aromaticum, myrrham, sisymbrium, anisum, nigellam, &c. quibus & Cardan⁹ addit moschum & zibethum.

Ego vero crederem distinguendum esse, & quidem, quæ suapte natura odora sunt, & in ignem projecta odorem quoque emittunt, nullatenus in usum ducenda esse; quæ vero odora sunt, sed per ignem halitus inodores, vel saltem non vehementer olentes exhibent, qualia potissimum sunt plantæ, semina, folia, posse tutius exhiberi; experti enim ejusmodi suffitus odorosos perperam fœminas exagitasse, præsertim à partu, quia uterus ex illis gravissime affectus, adeo corrugatur & constringitur, ut nihil penitus deponat: quo propterea factum, ut ejusmodi suffitus exoleverint, quippe pleræque à partu ex his odoramentis perierunt: Substitutus autem est in locum suffituum, usus pessarium, ex rebus bene olentibus puta oleo jasmini, florum aurantiorum, suaveolenti butyro, zibetho & similibus, cum frondibus mercurialis rutæ, salviæ & aliis id genus, quibus scilicet uterus allicitur, & quodammodo in suis vasculis aperitur, neutiquam vero nares halitibus odorosis feriuntur: sed & herba fœtida male olet, at vero injecta prunis nullum exhibet fœtorem: describitur ab Hartmanno in sua praxi suffitus, ex scoriis reguli antimonii, injectis in lixivio calente; verum semper tutius in his existimarem prodesse vapores ex rebus humefacientibus, quam halitus ex rebus exiccantibus: nam quæ humefaciunt, non solum emolliunt, & laxant vias uteri, verum etiam sanguinem grumosum diluunt & concretos atque hærentes seu stagnantes succos lymphaticos vel serosos extenuant atque dissolvunt: Tria enim generaliter requiruntur, in ducendis muliebribus excrementis, ut quod concretum est dissolvatur: Viæ laxentur & aperiantur: atque uterus in suis glandulis & membranis molescat, ac in orificio interno patulus maneat, quæ sane à vaporosis, non autem ab halituosis facilius consequuntur.

Dubitari hic rursus potest quid nomine *muliebrium* hic intelligatur & licet *proprie muliebria* sint expurgationes illæ per uterum quæ accidunt post partum & *lochia* ac *puerperia* dicuntur, nihilominus à commendatoribus hoc loco, sub nomine muliebrium comprehendì dicuntur quæcunque evacuationes, ex utero fieri solitæ etiam extra partum, ut sunt *menstrua* & cum his aliæ evacuationes, tum ex utero immediate, tum etiam ex toto corpore provenientes, cum non raro accadat corpus universum suis impuritatibus exonerari, facta per uterum depositione & expulsionem. Hinc Fuchsius scribit pro muliebribus *mensēs* in sua versione. *Secundina* etiam retentæ, fœtus mortuus, mola, grumi, flatus, semen, aqua & alia præternaturam in utero genita muliebria quoque dici possunt, quippe sunt de genere eorum quæ omnino debent evacuari, & extra uterum expelli: hæc licet etiam medicamentis per os assumptis educi soleant, promptius tamen atque ocyus ab his quæ utero suffiuntur haberi possunt.

Non tantum autem ad muliebria ducenda ejusmodi suffitus prodesse ait Hippocrates, sed etiam ad alia plura, quæ plane intelligenda sunt, in cæteris affectionibus ex utero dependentibus, ut sunt suffocationes & passiones hystricæ, uteri inflationes, dolores &c. Sed & ad facilitandam conceptionem, non raro usu venire solent, itemque in fluxu muliebri, ulceribus uteri, dolore coxendico, doloribus lumborum, præsertim ex ligamentis uteri; vult quoque Cardanus etiam in viris locum habere posse, puta in hæmorrhoidum affectionibus, somno gravi, catharris, nervorum morbis, hydrope & aliis, & ideo dixit ad alia multa fore utilem. Verum quia in his sæpe numero affert suffitus capitis gravitatem seu dolorem, idcirco adjecit Hippocrates, *nisi capitis faceret gravitatem*: quia licet suffitus juvamento foret ejus modi morbis, tamen causa doloris, gravedinis capitis & læsionis cerebri in usum duci non debet; quippe magis prævalet nocumentum cerebro illatum quam quodcunque aliud symptoma, cui per suffitum sit succurrendum, cum & non liceat morbum morbo tollere; verum tamen in affectibus capitis, solemus sæpe sæpius suffitus elicere, ex gummi animæ, balsamo peruviano succino, roremarino, aliisque absque ullo metu cephalalgia. quamquam plerique sint, qui ejusmodi odoramenta sufferre nequeant, ut propterea necesse sit, pro corporum

varietate, ac diversa eorundem dispositione, atque habitudine, modo in aliquibus uti, modo in aliis cavere, pro diversa ratione.

Quæres Utrum cuivis obstructæ mulieri ad provocanda muliebria, statim talia liceat administrare? &c. Negative, sed præmissis præmittendis, hoc est universalibus.

Objectiones & difficultates reliquæ in contextu sunt solutæ.

Aphorismus XXIX.

Pregnantes (seu gravidas) purgabis, si materia turgat, quadrimestres, & usque ad septimum mensem, sed has minus minore vero aut grandiore fœtu abstinebis.

Nota: Vide eundem Aphorismum Lib. 4. Aphorismo I.

Contentum seu Intentio.

De purgatione Gravidarum.

Connexio: Cum Hippocrates de muliebrium educatione egisset in priori Aphorismo per suffitus: In hoc præsentis Aphorismo, agit de mulieribus gravidis, in quibus quidem muliebria educere non expedit, sed si materia turgat, eandem certo tempore expurgandam esse docet.

Hic Aphorismus dividitur in duas partes: *Prima* docet purgandas esse mulieres à quarto ad septimum mensem: *Secunda* contra negat, id esse faciendum, ante vel post illud tempus.

Quantumvis autem hunc Aphorismum scriptum inveniamus iisdem prorsus verbis Lib. 4. Aph. I. ita ut multi interpretes cum hoc loco prorsus omiserint, nos tamen propterea ut ibidem innuimus non frustra cum hic repetimus, aut cum Hippocrate tautologiam canimus aut absolute rem eandem & sub eadem ratione repetimus; siquidem ibi reponitur desumpta indicatione à purgantium medicamentorum natura; hic vero potius à tolerantia gravidarum, & à tempore gestationis

tionis earundem; unde dicitur purgari posse gravidas, turgente tamen materia, à quarto solum mense ad septimum, at has minus; in reliquis temporibus, tum primis, tum ultimis à gestatione, cavere omnino oportere.

Gravidas ergo oportet purgare, sed non ratione graviditatis at morbi: nam si gravidæ aliquo morbo afficiantur, purgatio nulla instituenda est, cum purgans medicamentum, ut indicatum, necessario exigat indicans, quod illud exquirat, juxta leges in methodo traditas. Neque vero morbus debet esse quilibet, sed materialis & ab humore dependens, adeoque cum cacochymia, quæ alio leviori præsidio sit inemendabilis, imo cum turgentia, ut præcipit in hoc Aphorismo Hippocrates, cum inquit: *turgente materia*, turgens autem materia humoralis est, & cum impetu delata huc & illuc, ne scilicet in aliquam partem principem decumbat, ut bene Galenus in *Comment. Aphor. 10. Lib. 4.* & præsertim in uterum, quo irruens abortum simul afferret, & mortem tum foetui tum matri.

Sed quo genere medicamenti? communiter practici existimant levioribus seu minorativis; sed Averrhoes, vult cavendum rhabarbarum & aloë, utpote quæ movent per urinam & uterum, & aperiunt facile oscula venarum & arteriarum, ut manifeste constat in praxi de aloë illud interne datum hæmorrhoides aliaque vascula aperire, extra applicatum hæmorrhagiam vulnerum & alia sanguinis profluvia sistere: Hinc in praxi seligunt mannā & quæ ex manna componuntur medicamenta: Sed nec ista omnino tuta sunt, nisi exacte castigata & correctæ, ne flatu & tormina excitent. An etiam vomitoria? Affirmavi in *Comment. mox dicti Aphorismi I. Lib. 4.* quia pleræque gravidæ, solo vomitu & spontaneo præcaventur ab abortu.

Non solum autem vult Hippocrates, purgandas solum turgente materia, sed etiam tempus limitat peragenda istiusmodi purgationis nempe à *quarto ad septimum mensem*, tunc enim foetus tenacius adhærent utero, nec tam facile vi medicamenti purgantis dissecantur à placenta vasa illorum umbilicalia, Adjicit autem *has minus*, id est eas quæ septimum mensem attigerint, quoniam eo tempore solent foetus motionem in utero subire & quacumque de causa abortiri; quin & tunc grandiores redditæ alimoniam exquirunt abundantiorē, quæ usu medicamenti vel imminuitur, vel depravatur, atqui ex hoc etiam

clare deducitur voluisse Hippocratem inclusas gravidas ad septimum perductas, alias non dixisset, *has vero minus.*

Denique recens concepti seu juniores foetus, & seniores id est adultiores & maturi, vel clarius in primis & ultimis mensibus cavere oportere concludit, quia tum facillime abortus succederet expurgante medicamento: Foetus enim à Galeno quam apposite comparatur fructibus in arbore pendentibus: sicut enim hi, cum tenelli sunt, & molli pediculo ramulis adhærescunt, facillime quacunque de causa etiam ventosa aëris commotione decidunt, itemque cum maturitati sunt proximi, ita foetus pari de causa facillime evelluntur & defluunt.

Objectiones partim in contextu partim supra *Aph. 1. Lib. 4.* solutæ sunt ibique legendæ.

Aphorismus XXX.

Mulierem gravidam (seu utero gerentem) morbo quopiam acuto corripit, lethale.

Contentum seu Intentio.

De morbis acutis Gravidarum.

C*onnexio:* Cum priori Aphorismo explicuisset, purgationem valde circumspecte adhibendam esse in Gravidis: Ideo in præsentī Aphorismo admonet & docet medicum circumspecte & provide agendum in gravidis morbo acuto correptis: gravidis enim nihil tam inimicum & foetui periculosum quam claustra uteri intempestive referari & hoc ipsum faciunt morbi acuti. Hic Aphorismus ob simplicem conclusionem unimembris est. In apice hujus Aphorismi dubitare licet, an acutus morbus utero gerenti superveniens, causa graviditatis accidat & in utero solum, an vero sejunctim à causis gestationis & vitio totius; de hoc nihil meminit in hoc Aphorismo Hippocrates; & quamvis utrumque si accidat, semper contingat utero geren-

gerentem periclitari; nihilominus quia *Aphorismo 43. hujus libri* dicitur: *si mulieri gravida in utero fiat erysipelas, lethale est*; ubi uteri affectionem specialius memorat: verisimilius videtur dicendum, voluisse hoc loco quemcunque morbum acutum commemorare, qui utero gerenti accidat, sive ille vitio alicujus partis & uteri, sive vitio totius fiat, ut propterea non ratione partis affectæ, sed causa acutiei morbi, vitæ periculum contingat, nihil enim magis archeum turbat & sanguinem rarefacit ut amplius affectet spatium & utero excitat quam morbi acuti.

Et quidem ut bene Galenus *in Comment.* vel acutus morbus utero gerenti superveniens est cum febre conjunctus vel absque febre: si cum febre jungatur, uti phrenitide, pleuritide, causo, duplex periculum imminebit, unum ab ipsa febre, quæ sua vi atque acutiei, facillime foetum perimit: alterum ex victu illi indito, qui si tenuis & parcus, ratione acuti morbi foetum destruet, cum is talem diætam ferre non possit & inedia peribit; Si vero largior, febrem continuam augebit, & gravidam absque hoc debilem & quasi exanguem prosterneat & foetum pariter perdet; Si vero morbus acutus absque febre sit, veluti morbus comitialis & attonitus, convulsio, tetanus, Apoplexia aut alius, propter magnitudinem morbi, ejusque vehementiam, impossibile est gravidam inde incolumem evadere.

Sed non tantum ex his, quæ scite quidem proponit Galenus, perituræ videntur gravidæ, gravi atque acuto morbo correptæ, sed etiam quia multa medicamenta, quæ cæteroquin acutis morbis adversarentur, admittere non possunt, ratione graviditatis; sic diaphoretica & somnifera, itemque diuretica & dejectoria, imo omnis generis evacuantia medicamenta in gravidis periculosa sunt, unde vix ac ne vix quidem à medicis præscribuntur.

Gravidæ præterea sunt obnoxia abortui, qui omni & levi de causa non raro accidit, potissimum autem ex acuto & gravi morbo, per quem sanguis indebite fermentescit, coctiones interturbantur, excrementa detinentur & cumulantur, quo circa foetus nutritio & vita graviter afficitur.

Insuper uteri gestatio comparatur morbo, quò multoties gravidæ nausea laborant, dolent, vigilant, & in cunctis suis operationibus male afficiuntur, unde postmodum vires debilitantur: Si igitur his malis acutus morbus adjungatur, vix fieri poterit, ut illæ evadant. Demum acutus morbus gravidæ superveniens, magnam & vehementem causam consequitur, ut quam illæ acutè ægrotant, & symptomata quæ eundem comitantur plerumque sunt vehementissima.

Quamvis autem simpliciter dixerit Hippocrates *lethale esse gravidas acutis morbis corripì*, id tamen non perpetuo sed ut plurimum intelligendum, poterit enim quandoque spei vitæ aliquid subesse, si primis mensibus gravitatis illæ acutum morbum incurrant, cum ceteroquin gravius longè sit ultimis mensibus ægrotare: Primò enim secundo & tertio mense graviditatis, semper vires solent esse validiores, alimentum foetus non exigunt, & si fortassis abortus accidat minus periclitantur quemadmodum idem Hippocrates fatetur *1. Epidemiorum* in historia *trimestris agra* 13. at verò in ultimis mensibus ista omnia graviora fiunt ut patet.

Quid verò in alterutrius periculo agere liceat judicarem expedire, servare omnimodè matrem, licet foetus ex accidenti & præterintentionem medici, sit periclitaturus, de qua re tamen diximus in Institutionibus & Praxi. Hoc brevissimè innuendo semper uno oculo ad matrem altero ad foetum respiciendum.

Tandem nec hoc reticendum licet mulier utero gerens ex acuto morbo evadat, nec abortiat tamen difficilem habebit partum ob labores quos ipsa & Infans passi sunt; unde ipse Hippocrates infra *Aphorismo* 55. hujus libri scribit, *gravidas præ febribus corripuntur difficulter & cum periculo parere aut abortientes periclitari.*

Quæres I. Utra utero gerens, magis periclitetur in morbis acutis, an quæ portat marem, an quæ fœmellam? *R.* Observamus in *Epidem.* illas plerumque quæ fœmellas gerebant fuisse mortuas: an quia fortasse masculus plura tolerare potest; an quia tot non adsunt impuritates.

Quæres II. Cur gravius periclitentur fœminæ quæ abortiunt mares quàm quæ fœmellas? *R.* Quia major est recessus à statu naturali in abortu maris quàm fœmellæ: fortior enim ventus requiritur ad arborem dejiciendam quàm fruticem.

Aphorismus XXXI.

Mulier in utero ferens, secta vena (seu misso sanguine è vena) abortit, eoque magis, si foetus sit grandior.

Contentum seu Intentio.

De venæ sectione Gravidarum.

Connexio : Postquam Aphorismo vigesimo nono hujus libri de Gravidarum purgatione & suffitu aromaticum (quæ ambo sunt remedia, utero gerentibus bene ponderanda, quia violenta) egisset : In hoc Aphorismo agit de venæ sectione, eamque dicit in muliere gravida æque ponderandam, & cum grano salis adhibendam, ne vel abortus vel gravis alius affectus causa existat ; præsertim si foetus sit grandior.

Hic Aphorismus ob simplicem conclusionem non dividitur.

Veri simile ergo nobis admodum videtur, de utero gerentibus, morbo aliquo affectis, Aphorismum hunc fuisse ab Hippocrate prolatum; nam rationabile haud quaquam est, utero gerentes, bene se habentes, debere sanguinis detractione evacuari. Hinc planè dicendum, quod cum antea scripserit, acuto morbo correptas periclitari, si fortasse quis putaret, sanguinem illis esse detrahendum; nunc monet nulla ratione licere, ob periculum manifestissimum abortus.

Sed & nullatenus audiendi sunt, qui distinguunt, de sanguine misso ex venis superioribus, & ex venis inferioribus, ut propterea putent abortum futurum, ex venæ sectione facta in partibus inferis, non superis; contrariam manifestam eruimus in meretricibus quæ non semel sed sæpius ad procurandum abortum sceleratè venæ sectionem ex pedibus celebrant sed in cassum, Ergo an supernè an infernè fiat, utraque suspecta habenda est; nam præterquàm quod Hippocrates indefinitè scribit *sanguine misso ex Vena*, undè quamcunque intelligit; neque

neque tamen verum est, quod ex venis supernis missus sanguis, abortiri non sit allaturus, cum contrarium ex Anatomia deducatur, qua sæpius constitit, sectis venis superioribus uterum redditum fuisse parentiorem, & non tantum foetum sed & catamenia (id est menstrua) deposuisse, cum venæ superiores sectæ, circulantis sanguinis motum magis excitent per arterias in uterum sanguinem ferentes: Cæterum venarum delectus in sanguine mittendo, vanus quoque prorsus existimatur, cum stante ejusdem circulatione universus, brevi temporis spatio per omnes partes circumagatur: Sive igitur sanguis mittatur ex supernis, sive ex infernis venis, semper, saltem ut plurimum, idem periculum abortus imminebit, nisi tamen (notanter dico) adeo plerhorica sit utero gerens, ut ex sanguinis missione convenienti & moderata, nullum sit sensibile incommodum subitura, etenim pleræque sunt, quæ ad plures uncias detractum sanguinem bene sufferunt.

Duo itaque mala timenda erunt, ex ejusmodi sanguinis evacuatione, *unum* quidem universalis *commotionis*, quæ specialius uterum perturbat; *alterum* vero *detractionis alimenti*, tum matri tum fatui, utrumque autem abortus periculum minatur, qua sane ratione adjunctum est, & *precipue si foetus sit grandior*, quippe tunc abundantius alimentum requiritur; quamobrem, quæ fortasse detractio foret tolerabilior in primis mensibus graviditatis, omnino nocua est ultimis.

Sed cur dixit *sanguine misso ex vena (sive secta vena?)* forte quia, si ex aliis partibus educeretur, non esset periculosa, utpote quæ commotionem in sanguine, & toto corpore non excitaret, quemadmodum si cucurbitulis scarificatis ex cute sanguis educeretur, vel etiam ex naribus, levi perfriktione & titillatione: Verum tamen etiam si sanguis ex cucurbitulis scarificatis educeretur ea quantitate, ob quam utero gerens posset debilitari; vel etiam ex inducto dolore, plurimum commoveri & exagitari, periculosa quoque foret existimanda præsertim si ex partibus infernis, aut in cruribus, ut fieri solet, adhiberentur, quippe per eas posset facillime gravida abortire. Sic nec narium proritatio ex data ratione tuta foret, sicut enim proritatio facilis est, ita difficilis per sæpe solet esse ejusdem refrænatio & effectus sanguinis fluentis per eandem concitatus. Pariter sentiendum, de detractio sanguinis per hyrudinum appositionem, quæ cum æque ex venis fiat, adeoque similiter vituperanda.

Addit

Addit postremo Hippocrates, & *præcipue si foetus sit grandior* id est in ultimis mensibus & partui proximis, etenim tunc ex duplici capite periculum abortus immineret, uno quidem quia subtraheretur ipsi alimentum, quod per idem tempus abundantius requiritur, tum ad nutritionem, tum ad vires, quibus eget pro partu validissimis, ad quem promovendum, conatus suos, iterato foetus adhibet, unde Galenus *in Comment.* addit, non modo misso sanguine ex vena, sed etiam ex longiori inedia, foetus destruitur: Et Hippocrates *Lib. de natura foetus* dicit: *illum impelli ad ortum ex alimenti defectu; altero vero*, quia ut antea dictum, in ultimis mensibus quævis etiam levissima commotio abortum affert, propter facilem vasorum umbilicalium & placentæ, ab utero dissociationem, ac promptam orificiæ ejusdem interni dilatationem: si ergo tunc uterus prompte hiat, & foetus pariturus ad exitum sponte sua se accommodat, plane à sanguinis detractiōe, commotio in toto corpore inducta, facillime poterit abortum excitare; is autem, quam sit eo tempore periculosus, cunctis notum est.

Sciendum autem adhuc est, modum & morem veterum venæsectionis longe esse diversum à venæ missione recentiorum; veteres enim magnam sanguinis missionem ad tres prope libras; Medicum teste Galeno ad duas libras extendebant, & de his videtur scriptus noster Aphorismus ab Hippocrate; & hanc si quis quantitatem à prægnante ademerit, non citra periculum abortus faciet. Recentiores vero ad paucas tantummodo uncias, raroque imo vix unquam mediam libram excedendo, idque solum in foeminis plethoricis & boni habitus, non autem in gracilibus & exanguibus: proinde modernus praxeos usus, præcipue in Germania, ubi laute vivitur, & large bibitur, obtinuit, foeminas gravidas valde plethoricas, moderata venæsectione, non læsas, sed ab abortu liberatas & præservatas fuisse, idque ex supernis potius quam infernis partibus. Quamobrem ipse Hippoc. 2. *predictionum*, dysenterias seu cruentas dejectiones, ad partum melius disponere scripsit, quæ tamen alias sæpissime abortum causare assolent; verum hæc Hippocratis sententia, intelligenda est, de mulieribus valde plethoricis & sanguineis, in quibus est periculum, ne ob sanguinis copiam foetus suffocetur, & his equidem dysenteria benigna opitulari potest, secus vero iis quæ exangues & debiles

Bbbbb

sunt,

sunt, quibus ne dum obesse sed valde nocere posset quæcumque dysenteria.

Quæres Utrum venæsectio an purgatio gravidis sit periculosior? *R.* *Absolute*, ex purgatione majus oriri periculum, quia est remedium valde commovens uterum, foetum inquietans, adde, quod illius actio pro arbitrio non possit reprimi, sicut sanguinis missio; *Respective* vero id est secundum sensum Aphorismi 29. purgatio admitti potest.

Quæres II. Quando ergo purgandæ sunt prægnantes & quando venâ in iis secanda? *R.* Ubi ob cacochimiam adest abortus periculum, tunc leniter sunt purgandæ, à mense quarto ad septimum: quando autem idem periculum imminet ob Plethoram, tunc primis mensibus, præsertim quarto & quinto sanguinis missio fieri potest.

Quæres III. Utrum ultimis mensibus, in morbo acuto mulieri gravidæ periclitanti sanguis mitti non debeat? Ratio dubitandi est, si enim facinus, periculum abortus incurrimus, si autem non facimus mortem inferimus. *R.* Stante tanto & matris & foetus periculo, omnino mitti posse, necessitas enim non habet legem, & præstat unum ex accidenti perire, quam duos: ex neglectu & necessitate; Et satius est, potius periculo abortus quam mortis prægnantem exponere. Accedit quod in plethoricis, etiam ultimis gestationis mensibus plurimum sæpe adsit sanguinis, qui foetum sub parte suffocare posset.

Quæres IV. Utrum modus hodiernus roties sub una ingravitatione mittendi sanguinis, sit licitus, approbandus & sequendus? *R.* I. Hunc modum magis ad placitum hominum, præsertim vetularum & domicollarum quarundam, vel ad spartas & pecuniam extorquendam, quam ex ratione, autoritate, & experientia, propallatum fundatum atque inventum esse. *R.* II. Ex data ratione, non debere mirum videri ulli, si sic procedendo, cum sanguinis missione tot atque innumeræ matres & foetus aut hebetentur aut simul & semel aut ~~sejunctim~~ occidantur: *R.* III. Regulariter nulli mulieri utero gerenti, sine ulla ratione, & causa aut ex pura & male inducta consuetudine, quocunque demum ingravitationis tempore, sanguinem mittendum esse, quod si vero plethoricæ & sanguineæ sint, aliæque

aliæque ponderosæ rationes repletionis, suffocationis, oppressio-
nis, fluxionis &c. intercurrent, ex consilio fundati medici non ve-
tulæ aut medicastræ, sanguinis missio primis mensibus, ventilatio
autem aliqualis in medio vel fine noni mensis, in pauca quantitate
celebrari potest quæ nec matri nec foetui obfutura erit, dummodo,
notanter dico, prægnans, apprehensiva & meticulosa nimium non
sit, alias enim ex hac sola ratione, etiam quæcunque levissima san-
guinis motio obesse posset.

Aphorismus XXXII.

*Mulierì sanguinem evomenti, menstruis erumpenti-
bus, solutio fit.*

Contentum seu Intentio.

De vomitu cruento mulierum.

Connexio: Hic Aphorismus potius connectitur cum Aphorismo 28.
quam cum præcedente, cum enim ibidem tractasset de remedio
ad menses educendos; In hoc jam agit de ipsis mensibus tamquam
remedio vomitus cruenti: Potest tamen etiam præsens Aphorismus
connecti cum præcedenti, cum enim in priori dixisset sanguinis mis-
sionem artificialem causare malum, in hoc è contra monstrat san-
guinis missionem naturalem bonum præstare. Hic Aphorismus
simplici constans conclusione non dividitur. Cum ergo non raro
accidat, mulieres diversis morborum generibus laborare, quorum
causa male affectus sanguis, superiora impetat, & præsertim in ven-
triculum, unde vomitus cruentus; Proinde considerans in hoc Apho-
rismo Hippocrates, quo pacto ejusmodi incommodum desinere
possit, citra cujusvis medicamenti exhibitionem, nullaque artis opera
suffragante, docet sponte sua vomitum sanguinem desitutum, si
menstruæ purgationes, quæ forsan antea suppressæ fuerunt, erum-
pant; quippe sanguis ille, qui interciso per vasa uteri cursu, alio

diverterat, & in ventriculum irruerat, denuo in consueta & naturalia emissaria delatus, laxatis & referatis ductibus, ut decet, per uterum expurgatur.

Quamvis autem effatum hoc si generaliter videatur ab Hippocrate pronuntiatum, ut quemcunque sanguineum vomitum, menstruorum eruptio solvere soleat, crederem tamen, eam solummodo sanguinis vomitionem menstruorum eruptionem esse soluturam, quæ à sola eorundem retentione proveniat; etenim si fortasse alia de causa illa habeatur, difficulter fieri poterit, ut desinat per menstruorum eruptionem. Hinc si vomitus sanguinis contingat disrupta vena aut arteria, per splenis aut jecoris parenchima repente, aut etiam è ramulis gastricis aut mesentericis, nequaquam suffragabitur subsequens menstruorum eruptio, sed potius morbum morbo addet, fortasse ex vitio tali, in sanguine contracto, ut ex pari causa, tam uteri vasa, quam alterius viscoris, venæ aut arteriæ aperiantur vel erodantur: saepe tamen accidit, ut ex menstruorum retentione, sanguis utiliter per vomitum aut sputum egeratur, ob consensum quam inter se ineunt uteri vasa, cum mammariis & jugularibus subclaviis: modo seclusis quibuscunque modis, quibus sanguis à vitio vel sui vel viscerum egrediatur, menstrua intelligenda hic illius eruptio, ut propterea à sola uteri obstructione detentus evomatur. Verum cum dixit, *sanguinem evomenti*, non solum de vomitu proprie dicto, qui peculiaris ventriculi actio dicitur, sed etiam de capitis sanguinea destillatione vel etiam à pulmone de spuro & simplici secreta, aut etiam cum tussi, non tamen admodum molesta, voluit adnotare Hippocrates, cum per utramque viam plerumque sanguis ex retentis menstruis egeri soleat.

Apposite etiam plerique exponunt per verbum *erumpere* comprehendere non quamcunque menstruorum eruptionem, sed eam solum quæ affluenter & confertim provenit, quoniam per hanc solam evacuationem, divertitur motus sanguinis, ad consueta uteri emissaria. Porro si menstruæ purgationes erumpant, neque inde vomitus, aut alia sanguinis excreatio desinat, indicium erit, venam aliquam aut etiam arteriam ruptam esse vel exesam.

Perperam autem solent hinc plerique deducere, licere medico

venam

venam tundere ex venis pedis, quoties sanguis sursum efficitur & expurgatur; quasi vero Hippocrates ex hoc Aphorismo edocere voluerit, posse arte id ipsum peragi, quod sponte naturæ plerisque accidit: Sed longe isti, lateque falluntur: alius enim omnino diversus est naturæ motus, ab eo, qui arte per venæsectionem peragitur; quippe qui sponte sanguis per menstruorum eruptionem egeritur, non solum per loca propria & consueta fit, per quæ in dicta venæsectione, neutiquam perficitur, sed ejus etiam humoris fit, qui revera excernendus est; atqui ars nequit tam dextere, opportune & salubriter naturæ motum imitari, quin plurimum sæpe sæpius non fallat. Præterea etiam est, quod specialius in menstruorum eruptionibus advertamus, ipsius scilicet uteri, ac totius corporis repurgationem, siquidem passim experimur, omnia propemodum corporis excrementa, ipsiusque sanguinis impuritates una simul per uterum deponi, & gravissimas cæteroqui ægitudines exinde finiri, quemadmodum idem Hippocrates pluribus edocet, & in historiis epidemiorum sæpius enarrat. In his itaque casibus solertis naturæ operam duntaxat exquiremus, illamque quoad fieri poterit, per loca præsertim conferentia, id est per eundem uterum adjuvabimus ut tuto & sine ullo dubio & difficultate, illam exoneremus, ac tandem à morbis vindicemus; quod si autem illa præter spem & opinionem deficeret, ars imitatrix naturæ, & Medicus ejus minister, ejusdem vices cito tuto & jucunde, ratione, judicio & experientia aget & perficiet. Vel sectione venæ in thalo vel apertione hæmorrhoidum vel cucurbitulis fœmoribus applicatis: vel frictionibus vel aliis hæmagogis menses provocantibus.

Præterea adhuc animadvertendum est, omnem quidem sanguinis vomitum timorosum esse, juxta effatum Hippocratis *libro quarto, Aphorismo 25. sanguinem superne quidem efferri, qualiscunque sit, malam*: at pessimum si à pulmone, sed minus timorosum, si appareat in muliere, quoniam causam habet manifestam, menstruorum scilicet abundantiam, unde si quæ ex utero fiat evacuatio, cum rectitudine vasorum fiat, rejectionem sanguinis per superiora, solvere omnino potest: id ipsum non modo ego sed plures mecum famosi practici experti sunt & viderunt ex

pulmone magna quantitate sanguinem à mulieribus etiam ad libras, sine tamen aliquo malo effectû, ob mensium nempe defectum, rejectum fuisse, iis postea fluentibus, omnem eructationem per superiora evanuisse.

Quares I. Quod si mulier prægnans vomitu sanguinis vel sputo cruento tentetur in qua parte illi mittendus sit sanguis. *R.* Non in pede ut aliis non prægnantibus sed in brachio.

Quares II. Si mulieri menstrua non habenti; superveniat morbus acutus v. g. Phrenitis, pleuritis, peripneumonia, angina &c. Utrum & huic vena in thalo aut in Brachio sit secanda? *R.* Ad quantocius procurandam sanguinis redundantis & stagnantis depletionem, & impediendam maiorem partium inferiorum obstructionem, primo in brachio, deinde in pede venam secandam.

Aphorismus XXXIII.

Mulieri, menstruis deficientibus, sanguis è naribus profluens bono est.

Contentum seu Intentio.

De hæmorrhagia narium menstruis carentium mulierum.

C*onnexio:* Cum Hippocrates in præcedenti Aphorismo, dixisset vomitum sanguinis solvi per mensium eruptionem: In hoc præfenti Aphorismo dicit de effusione sanguinis quæ per nares fit, in mensium defectu.

Hic Aphorismus ob brevitatem & simplicem conclusionem non dividitur.

Quonam ergo pacto defectus menstruorum, aliquando innoxius evadat, atque illius suppressa evacuatio per aliam suppleri possit, docet hoc Aphorismo Hippocrates, ubi narium hæmorrhagiam commendat, si fortasse menses in foeminis defecerint.

Quam-

Quamvis autem alibi Aphorismo 25. Lib. 4. dixerit: *sanguinem supra ferri, qualiscunque sit, malum*: hanc tamen regulam (ut in præcedenti Aphorismo innuimus) ipse Hippocrates excipit in foeminis, quæ suppressionem menstruorum patiuntur, neque enim alia melior superabundantis sanguinis evacuatio unquam visa est ea, quæ per narium hæmorrhagiam accidit, quippe per eam solet sæpiissime natura non tantum ab his, quæ uteri sunt morbis sed à plerisque aliis liberari, sic in febribus synochis & ardentibus, internis inflammationibus & cæteris, fluens è naribus sanguis juvamento est; & quidem cum optima conditione & securitate longe majori quam si per os effluent, sic enim nec per viscera transit nobilia; id quod licet videatur factum, per loca distantissima, statuta tamen sanguinis circulatione facillime innotescit, qua ratione conferat, cum per arterias partium infernarum promptissime in venas recurrentes, ad partes superas sanguis influat. Sic anatomia compertum est, suctis, contrectatis, aut propter vulnus fortasse ibidem inflicto, sectis venis per uberum substantiam perreptantibus, statim ex utero retentas menstruas purgationes prodiisse, ut propterea non tantum ob consensum mammarum cum utero, sed etiam ob motum sanguinis concitatum uterinas arterias promptius relaxari atque aperiri contingat. Modo inter cæteras alias sanguinis è venis supernis evacuationes, specialius proficit, ea quæ è naribus fit, tum quia nullum inde à sanguine extra propria receptacula exeunte damnum imminere potest, ut facile evenit, cum ex ore aut pectore prodit; tum etiam quia venæ in nares desinentes exiles sunt, & non nisi guttatim sanguinem extillant, & nullo impetu quidem aut irruptione, quin imo facile ad motus localibus seu topicis sisti potest, quod secus accidit, cum ex aliis venis erumpit; tum denique quia nullius interni visceris læsionem significat, cui specialius succurrendum sit, uti cum ex ore potissimum excernitur, quoniam vel pectoris vel pulmonis vel oesophagi aut ventriculi vel cerebri meningum gravem noxam arguit. Sed & Hippocrates dixit *bono esse*, desumpta nimirum ratione ab ipsa menstruorum suppressione, non autem à loco: Etenim bonum est, gravatum corpus exonerari, ne scilicet alicubi restagnans excrementitius sanguis, vel alio fortasse transuetus, gravio rem morbum inferat; sed tamen non omnino bonum est per nares egredi, quia consentaneum & naturale non

non est, menstruum sanguinem in foeminis per nares excerni, sed solummodo per uterum, veluti per totius corporis emunctorium; in cunctis siquidem evacuationibus, ut alibi diximus, non id solum quod excernitur, sed quantitas, qualitas, tempus, modus & locus rei excretæ considerandus quoque est, ut omni ex parte salutaris excretio illa censeatur: fieri enim potest, ut etiam per nares sanguis convenienter excretus ex una prosit, sed non penitus ex altera conferat, quia non per loca convenientia expurgatur, inducta nimirum interea obstructione in vasis uterinis, mox etiam tumore, inflatione, scirrho, aliove peiori morbo non tantum uterum sed & solum corpus impofterum graviter afficiente: Advertit postremo Galenus in *Comment.* quod licet, *quæ per nares fit evacuatio, innoxia præ cæteris sit non tamen si aliqua etiam alia evacuatio sine noxa est, propterea Aphorismus est falsus; neque enim quod sola per nares evacuatio, deficientibus menstruis bona sit, dixit, sed hanc simpliciter laudavit, non adjuncto, quod sola: si quispiam igitur alteram, quæ sit per sedem, dixerit ita affectis mulieribus utilem esse, hoc non adversatur Aphorismo; videtur enim aliquando Hippocrates per unum, velut exemplum, de omnibus aliis similibus pronuntiare.* Hæc Galenus.

Sed & hoc quoque animadvertendum est Hippocratem in hoc Aphorismo solummodo intellexisse mulieres quæ in tempore sunt, & non prægnantes, in his enim ratio Aphorismi cessat.

Objectiones in contextu sunt solutæ.

Aphorismus XXXIV.

Mulier, uterum gerenti, si alvus multum fluat, periculum est, ne abortiat.

Contentum seu Intentio.

De Diarrhœa Gravidarum.

Connexio: Cum Aphorismo 31. ex sanguinis detractio per venæsectionem, utero gerentem abortire dixisset: In hoc præsentis Aphorismo, de alui profluvio memorat, & dicit, periclitari foeminas

minas utero gerentes, si illo corripiantur. Hic Aphorismus simpli-
 citer concludit, & ideo non dividitur. Quoniam vero indefinite
 dicitur, *mulieri uterum gerenti*, non erit plane coarctandum tempus
 uteri gestationis, unde & *primis & ultimis* ac *mediis* mensibus, idem
 periculum imminet, si alvus immodice profluet, quamvis pericu-
 losiora semper sint tempora posteriora prioribus & mediis: Est ta-
 men quam maxime advertendum, differre plurimum damna immi-
 nentia, ex alui profluvio, ab iis quæ ex sanguinis missione prove-
 niunt; siquidem id quod aluo profluit, sæpenumero solet esse pror-
 sus inutile, excrementosum, ac præternaturale, ut propterea saltem
 ratione causæ, ejusmodi evacuatio bona censeatur; at vero quæ ex
 sanguinis detractio fit, omnino mala censenda est, cum exinde
 vitæ thesaurus inaniatur & vires manifestissime deficient. Verum
 tamen nocua existimanda solum erit evacuatio sive à natura id est
 humoribus acribus falsis sive arte, seu medicamentis vel cibis facta
 per alvum, si immodica sit ac modum non servet, subindeque ven-
 triculi jacturam faciat, itemque si ab iterato transitu humorum per
 intestina, uterum illis attiguum coafficiat: quamobrem jure opti-
 mo addidit Hippocrates, *si alvus plurimum fluat*; quibus verbis
 & laxatam plus justo alvum, & præternaturam fluentem de-
 notat, nam si fortasse moderate exoneretur, nec exinde ventricu-
 lus, tum in appetendo, tum in digerendo fatiscat, proculdubio ma-
 lum non erit, quin potius omni ex parte bonum, cum sæpissime ex-
 periamur, utero gerentes à talibus moderatis egestionibus levari,
 & ab impuritatibus tum alui, tum totius corporis antea cumulatis,
 cum euphoria vindicari. Sed de quo fluxu Hippocrates intelli-
 gat, dubitari potest; nam alui profluvia, solent esse vel chylosa,
 vel humorosa; Chylosa in lenteria & cæliaca passione, humo-
 ralia vero in diarrhoea, dysenteria, tenesmo. Et quamvis quod-
 libet ex his malum semper sit utero gerentibus, nihilomi-
 nus videtur dicendum, specialius hic fuisse notatam diarr-
 hoeam, nam in diarrhoea potissimum alvus solet affluentius
 profluere, quod in hoc Aphorismo dicitur, in cæteris autem
 non item: quippe in dysenteria, frequens & dolorosa dejectio
 fit, sed non copiosa, sicut neque in tenesmo: In lenteria vero &
 cæliaca passione, cibi indigesti egeruntur, vel semimutati, sed non

nisi semel tantum aut bis in die; at vero in hoc Aphorismo dicitur, *si alvus multum fluat*; quibus verbis & quantitas excretionis, & modus ejusdem præternaturalis significatur. Verum nocent adhuc ex alio capite utero gerenti, atque abortus periculum minantur, cæliaca passio & lenteria, quia per chyli dejectiones, corpus tum matris tum infantis, alimento privantur & viribus deficiunt: In dysenteria & tenesmo, frequens illa & dolorosa dejectio, molestissima est, ut propterea ab iterato infessu, uterus quam maxime comprimatur & doleat, propter consensum & vicinam ejusdem cum intestinis affectis. Sed & cum his intestinorum morbis fere semper conjunguntur febres, ciborum fastidium, sitis, inquietudo, Vigiliæ, symptomata plane molestissima & gravidis potissimum perniciofa. Quamobrem malum semper erit utero gerentem quocunque alui fluxu molestari, cum exinde abortus facile subsequatur. Debent autem istiusmodi alui fluxus per longum tempus perdurare, ut abortum inferant: nam si forte intra biduum vel triduum desinant, citra abortus periculum salubriter non raro contingent, quemadmodum sæpius in praxi experimur, qua forsitan ratione factum, cur Hippocrates dixerit, solum *periculum esse ne abortiat*; equidem non omnino utero gerentes ex hac duntaxat alui turbatione abortum patientur, si modico tempore duret, & cum sola excrementorum, aut malorum humorum exoneratione constantibus & viribus stomacho bene valente, ac postremo sponte sua desinat, quod sane quam in omnibus morbis prodesse possit, claro liquet.

Quæres 1. Quomodo ergo intelligendus sit Hippocrates, cum in 2. *prediction.* dicat dysenterias gravidis facere ad partum felicem, hic autem dicit alui fluxum periculum facere, ne abortiat? R. Hippocratem in 2. *predictionum* loqui de valde plethoricis & cacochymicis simul: hic autem de non plethoricis, his enim si multus alui fluxus accidat, dum multa per alvum rejiciuntur, necesse est ut pauca fiat anadosis seu distributio alimentorum ad sanguificationem & consequenter ad foetus alimentationem unde abortus.

Aphorismus XXXV.

Mulieri hysterica, aut difficulter parienti, sternutamentum superveniens bonum. Vel mulieri quæ uterinis molestat, aut difficulter parit, superveniens sternutatio, bonum.

Contentum seu Intentio.

De Ptarmicorum seu sternutatoriorum usu hysterico.

Connexio: Cum hætenus de morbis, qui utero contingunt locutus fuisset Hippocrates, & quidem in specie Aphorismo 28. dixisset, singulare remedium, ad educenda muliebria esse suffitum aromaticum: In hoc præsentis Aphorismo declarat, quæ ratione se habeat sternutatio ad muliebria: videtur enim utriusque remedii eadem ad expulsionem ratio.

Hic Aphorismus ob brevitatem non dividitur. In hoc ergo Aphorismo sternutationis vires & Juvamenta, in foeminis recenset Hippocrates, & quidem in iis, quæ uterinis molestantur, quæque difficulter pariunt. Quid autem *pro uterinis* intelligat Hippocrates, pluribus examinat Galenus in *Comment.* quoniam vero in græco codice scriptum est *ισχυρῶν*, videtur congruentius exponendum de uterinis, & hysteris affectionibus, potissimum vero, quæ præfocationes appellantur, in quibus foeminæ nodum quendam in gutture percipiunt, & videntur quodammodo suffocari, ob defectum anhelitus; In his quippe sternutatio summe proficit, ob concussionem totius corporis à sternutamento inductam, sed præsertim in utero: verum quia multoties vehementi, atque iterata sternutatione, adhuc quæ in uteri cavo continentur, facillime ejiciuntur, verisimile quoque est, in his pariter sternutationem esse profuturam, unde suppressa lochia, retentæ secundinæ, & sanguinis grumi, aliaque similia promptissime expelluntur, vi atque impetu à sternuendo, quatenus per ejusmodi

concussionem non solum excutitur uterus, & deponit id, quod intra se continet, verum etiam vasa ejusdem facile dilatantur, ac aperiuntur; cumque sternutamentum fiat, ab irritatione, mammillarium cerebri processum & meningum, quæ conantur expellere, quod ipsis infensum est, plane ob uteri cum cerebro consensum per nervos, facile etiam is proritatur & expellit quod ibidem congestum est. Quamvis autem, quæcunque detinentur intra uteri cavum, possint sternutamento superveniente promoveri & expelli, nihilominus magis proprie hoc loco conferens sternutatio præfocationi uterinæ dicenda est: cum enim ex ea foeminæ patientes mente quodammodo abalienentur, & cerebro hebescant, si his sternutatio accidat, fieri necesse est, ut cerebrum ipsum concutiatur, & quodammodo resipiscat, atque adeo concutiat, quidquid ex utero male affecto illi in sensum evaporaverat, sive per nervos sive per arterias: videtur id ipsum recte colligi posse ex contextu verborum ipsius Aphorismi, quippe in eo dicitur, *quæ uterinis molestantur*, modo mulier, tunc potissimum toto corpore afficitur, cum hystericis affectionibus extorquetur.

Non tantum autem proficere dicitur sternutatio, in affectionibus hystericis & uteri præfocatione, sed etiam in partu difficili, modo is ex imbecillitate foetus proveniat: etenim ut bene advertit Heurnius, si partus difficultas fortasse habeatur ex mala conformatione corporis ipsiusmet patientis, aut ex prava foetus pariendi dispositione, cum vel in pedes, vel in latus prodit, certe tunc nihilum prodesset sternutatio, imo potius obesset: at vero si foetus debito modo se aptet ad exitum, sed præ sui infirmitate conatus non adhibeat, tunc summe proderit sternutatio, per quam motus expulsivus uteri plurimum sollicitatur, quia diaphragma ex impetu sternutationis valde propellit, ac comprimit epigastrium, & cum epigastrio uterum. Denique licet dicatur in textu *supervenientem sternutationem* id est sponte naturæ contingentem, proficere, nihil tamen vetat, quin etiam arte si promoveatur, idem quoque beneficium, non sit foeminis laboriose parientibus profuturum. Hinc licebit in partu difficili, vel in foetu mortuo sternutamentum excitare, ad adjuvandum uteri conatum, ut utrumque ad exitum faciliat: profunt ea propter in hanc rem piper, galanga, elleborus albus, nigella, nicotiana, & quodcunque nares impense proritare valet. Verum enim vero, semper modus aliquis,

aliquis in his adhibendus, pro patientis habitudine, ut nimirum citra cerebri læsionem id peragatur.

Conferet quoque multum per idem tempus quo sternutatoria adhibentur, vel paulo ante potionem aliquam exhibere, qua uteri conatus promoveatur & ductus laxentur, ut ex utroque motu facilius habeatur partus propulsio: mire autem in id conferunt, trochisci de myrrha, rubia tinctorum, castoreum, borax mineralis, cinamomum, cassia, lignea, crocus, dictamnium, valeriana, schoenanthum, matricaria, artemisia, atque ex his elicitæ sales, spiritus, syrupi, elixiria, vel se sola, vel aliis commixta prout praxis docet. Hæc eadem valent, ad expellendas secundinas ac placentam, si fortasse ab edito foetu retineantur nec prompte post partum exeant. Animadvertendum tamen est quod quemadmodum aromatum suffitus supra Aphorismo 28. allatus, educit omnia muliebria menses, flatus, semen, foetum, secundinas &c. ita & sternutatio, hæc omnia efficiendi vim habet; & sicut in calidis uteri affectibus, uti inflammationibus non convenit aromatum suffitus, sic neque sternutatio, ne motus motum intenderet plus ad interitum quam sanitatem. Cavendum præterea in morbis pulmonum & capitis cavenda sternutamenta, ne pariter plus obsumus, quam iisdem prodesse intendamus; Neque etiam hæc locum habent in prægnantibus, quia licet ratione morbi juvet sternutatio, tamen impetu suo, abortum efficiendi vim habet.

Quæres Utrum illa Platonis mens vel vulgi opinio verificetur uterum quasi animal, quando non coit & concipit errabundum indignari, moveri & suffocationem inducere? R. Ex mente veterum & recentiorum, uterum non moveri ad superiora, sed tantum convelli, ob præsentiam seminis sanguinis vel alicujus alterius rei corruptæ, unde tetri & maligni vapores elevantur, qui cor, pectus & caput graviter afficiunt, hi autem vapores per sternutamentum discutuntur.

Reliquæ difficultates in contextu sunt solutæ.

Aphorismus XXXVI.

Mulier mensis decolores, nec eodem semper modo & tempore prodeuntes, purgationem indicant esse necessariam.

CCCCC 3

Con.

Contentum seu Intentio.

De Mensibus decoloribus & inordinatis.

Connexio: Cum supra Aphorismo 28. & 33. hujus libri dixisset, aromatum suffitus muliebria educere, nec non de sanguinis vomitione aut per nares educatione menstruorum, expurgationes respiciens, dixisset: In hoc præsentī Aphorismo, ponit præceptum & medium, perquam proficuum pro mulieribus ad mensium effluvium pertinens.

Hic Aphorismus cum simpliciter concludat, divisione non indiget.

Proponit ergo in hoc Aphorismo Hippocrates menstruas purgationes corrigendas, in quibus quidem multa, nempe substantia, tempus, quantitas, qualitas, & modus assolent considerari, hic autem præcipue loquitur de iis quæ decolores inordinatæ & irregulares sunt seu quæ in qualitate, modo & tempore peccant. Et quamvis Galenus dicat in aliquibus locis, loco *mensium decolorum* haberi *mensēs tardos*, nihilominus communior lectio videtur magis consentanea, tum quia tardi menses non omnino exigunt purgationem, utpote qui etiam attenuante diætā possunt promoveri, tum etiam quia tardi menses quam maxime conveniunt cum inordinatis, quippe qui plerumque etiam tardi sunt. Sed etsi tardi menses hic leguntur, neque tamen repugnabit, quod in Aphorismo dicitur necessariam fore purgationem, cum non raro tarditas evacuationis istius, ab humoribus crassis & obstruentibus habeatur, vel etiam ab ipsomet sanguine glutinosiori, qui non tam facile per uteri ductus meare queat; attamen communior versio retinenda, qua *decolores menses* leguntur. Et siquidem, cum decolores sunt menstruæ purgationes, indicant sanguinem sero plus justo scatentem, qui propterea debeat hydragogis medicamentis repurgari, quæ non tantum serum superabundans educant, sed etiam humores, fortasse crassiores, detentos in glandulis uteri, vel mesenterii incidant, attenuent & solvant. Verum quia Hippocrates in hoc textu conjunxit menses decolores cum irregulari eorundem apparitione, ac reditu, proinde crediderim
utrum-

utrumque exigi pro recta purgantis medicamento exhibitione, etenim cum ejusmodi purgationes menstruæ decolores sunt, & debitam & consuetam periodum non servant, non solum sericopiam, facile inedia & potus abstinentia emendabilem, verum etiam crassitiem humorum, uteri ductus obstruentiam arguunt, ut proinde serosiores duntaxat humores permeent, tenaces vero & hærentes retineantur, qui nisi convenienti purgante medicamento dissolvantur, proculdubio in longius tempus retenti, alia graviora mala inferent, tumores scilicet, abscessus, cachexiam, hydropem. Dicuntur autem non per idem perpetuo tempus accidere, cum modo præcurrunt seu anticipant, modo cunctantur & postponunt, & modo in medio cursu intercepti protrahuntur in aliud tempus penitus incongruum, ut propterea inconstantes & irrègulares sint, certam & statutam periodum non servantes. Sed & pro *tempore* legit Heurnius *modum* qui proinde in sua versione habet, qui *nec eodem modo bene respondeant*: juxta quem Heurnii lectionem comprehenderetur sub hoc menstruorum vitio, non solum periodicatio varia, sed etiam modus excretionis assiduo differens, ut si purgatio menstrua uno tempore fuerit quinque vel sex dierum, in alio sit unius vel duorum, & ubi aliquando modus expurgationis guttatim fuit alias sit affluentior, & tardius & celerius & continuatim & interruptim, & magis & minus, sine ullo ordine aut respondentis quantitate & qualitate evacuationis.

Cum igitur hæc ita se habeant, docet Hippocrates purgandum omnino esse corpus ab humoribus vitiosis, ejusmodi irregularitatem efficientibus, attenta tamen ætate, temperamento & consuetudine patientis, num scilicet efficaciori, an debiliori cathartico uti debeamus, incidente simul & evacuante potius serosos, quam crassos succos educente, admixtis medicamentis etiam, uterinis & antihysteriis dictis, aut aliis, aliisque pro ratione. Conferunt autem plurimum in hunc usum pilulæ uterinæ foetidæ, uterinæ nostræ, aloëticæ, aloë phanginæ & de rhabarbaro, cum tartaro vitriolato, myrrha, dictamno, gentiana, croco, rubia tinctorum aristolochia & similibus, in debita dosi, nempe pro virium & humorum evacuandorum ratione. Cæterum his conveniens diæta sociari debet, quæ simul una attenuet, & incidat crassos & tenaces humores, ac per uterum, vel per urinarias vias illos deducat: Plura & meliora praxis suppeditabit.

Quæres Quænam mulieres copiosiora habeant menstrua & quæ ordinarie anticipent & quæ postponunt? *ꝛ.* Biliosæ & intemperatæ, cum valde lubricæ sint plerumq; copiosius repurgantur & anticipant: pituitosæ vero & cachecticæ ut plurimū postponunt & minus repurgantur.

Quæres II. Quo optime cognoscimus & discernimus colores in menstruis? *ꝛ.* Si illa siccentur intinctis vel infectis linteis, vel etiam super arenam sparsis & siccatis, & si color fuerit flavus aut subpallidus bilis dominabitur; si vero pallidus & instar muci, phlegma seu lymphæ suppetias dabit.

Aphorismus XXXVII.

Si Mulieri, uterum ferenti, mamma subito (seu repente) extenuentur (seu graciles fiant) abortit.

Nota: Confer cum hoc Aphorismum infra numero 52. & 53. hujus libri, qui maximam cum hoc præsentem habent analogiam.

Contentum seu Intentio.

De abortus futuri signis è mammis.

Connexio: Cum Hippoc. multos hætenus scripsisset Aphorismos ad abortum pertinentes: In præsentem modo Aphor. signum affert, per quod medicus futurum abortum prædicere possit. Hic Aphorismus ob brevitatem & unicam conclusionem non dividitur.

Maximum inter uterum & mammæ esse consensum, connexionem, & sympathiam docet hic Aphor., sive id fiat per vasa, quæ ambo-
bus illis communicantur, seu sympathiam, sive officiorum communio-
nem, sive ob substantiæ similitudinem cum testibus seu ovariis: hinc monitos nos facit Hippoc., foetum in utero contentum, alias bene va-
lentem, facile abortiri seu abortum pati, si mamma in utero gerente *re-
pente gracilescant, aut subito extenuentur*: quam diu enim mammae sunt
robustæ, firmæ & solidæ, uterus etiam talis censei solet & è contra: Di-
cit autem in textu *subito seu repente*, id est nullo præcedente morbo aut
symptomate, & sine ulla causa manifesta, ob quam graciles illæ evase-
rint, vel extenuatæ fuerint; siquidem cum sensim graciles fiunt, & post
longum temporis intervallum, fortasse ex morbo, aut extrema diæta,
aut alia causa consimili, nihil mirum erit, si graciles evadant, tabescente
paulatim prægnantis corpore, ad cuius extenuationem illas marcescere
con-

contingat: at vero cum *repente* detumescunt, & ubi duræ & turgidæ ut mox dixi, erant, extenuantur & flaccescunt, omnino ex languore, & à laxitate vasorum umbilicalium, & uteri morbo, illæ contabescunt, unde postmodum abortus præsto erit: Attamen hæc potissimum accidere solent post quartum mensem, nam citius vix, ac ne vix quidem turgidæ mammillæ fiunt: provida enim natura per id tempus incipit, alimentum in mammis disponere, & præparare, ut de futuro extra uterum alimento provideat: quamobrem si fortasse ex aliqua, vel ejusdem uteri, vel fetus ibidem geniti, ægritudine contingat, eundem perire, quia cessat finis nutritionis illius, desinit quoque futuri alimenti ad mamillas transmissio, interrupto simul una mutuo vasorum inter sese respondentium commercio.

Sed notandum est quod Galenus memorat *in Comment. hujus Aphorismi* trahere scilicet, *fatum ad se id quod in sanguine dulcissimum est: Simul autem & lactis parte aliqua frui*: Equidem anatomia compertum est ultimis mensibus inveniri, in ventriculo infantis, substantiam quandam albicantem lacti non dissimilem, quam ore sugi constat, atque supeditari à membrana illa quæ immediate fatum ipsum cingit & græce *ἀμνιός* appellatur; sicut autem ista sensim imminuitur in ultimis mensibus, sic alia consimilis in mammis adaugetur, ut propterea soleant non raro istæ, levi compressione, veletiam sponte sua, lacteum humorem exstillare. Atque hinc fit quamobrem fetus in lucem editi, mox fæces, quas meconium vocant, egerant, ac ut notavit Hippocrates *Lib. de Natura pueri* statim à partu lac è mammis sugant, quia videlicet intra uterum, multo antea sugere à provida Natura edocti fuerant: de qua re videantur institutiones.

Præterea notandum, admoneri hoc Aphorismo Medicos, ne in ejusmodi mammarum extenuationibus remedia adhibeant. inde enim fiet, ut succedens abortus illis culpa cedat apud ignarum vulgus, quod sine ulla difficultate & frivole existimabit, ab ejusmodi importuna medicamenti administratione promotum fuisse negligenter abortum, qui tamen sponte Naturæ superventurus erat.

Iterum notandum, quod sicut non ad omnem mammarum extenuationem sequitur abortus sed tantum repentinum, sic pariter impossibile est in abortu non fieri mammarum extenuationem saltem aliqualem.

Quæres I. Cur ubera primis mensibus, ut diximus in c ontextu non attolluntur sed potius in ultimis. *R.* Partim ut Natura fætui pecunum & futurum alimentum procuret: Partim quia in ultimis mensibus ob magnam prolis molem, sanguinis pars sursum premitur ad mammas, id quod pariter obvenire advertimus in pleno stomacho, faciei & frontis venas turgere.

Quæres II. Qua de causa fætus exitum quærat nono v. g. mense. *R.* Quia suo illo alimento contentus amplius non est, nam partim multum regurgitat ad mammas, partim etiam ob majorem fætus aviditatem.

Cæteræ difficultates in contextu sunt solutæ.

Aphorismus XXXVIII.

Mulier geminos ferenti, si altera mamma extenuetur (seu gracilis fiat) alterum abortu edit (seu abortit) & si quidem dextra mamma gracilis fiat, marem; si vero sinistra, feminam.

Contentum seu Intentio.

De Abortus signis è mammis.

Connexio: Hic Aphorismus adeo cohæret præcedenti, ut revera pars prioris censeatur, imo plures sunt interpretum, qui ambos sub uno contextu explicuerunt, pëndet enim hic ex præcedente tanquam effectus à sua causa, nihilominus clarioris doctrinæ causa nos separatim explicamus.

Hic Aphorismus in duas partes secundum duplicem conclusionem dividitur: *Prima* dicit, mulieri geminos ferenti, si una extenuetur mamma, alterum abortit; *Secunda* vero asserit; quod si dextra extenuetur, mas perditur, si vero sinistra, fæmina.

Quod ergo dixerat Hippocrates, in præcedenti Aphorismo de abortu unius infantis, ex extenuatione ambarum mammarum; in præfenti

ſenti Aphoriſmo aſſerit, de alterutro, ſi nempe gemini ſint, cum alterutra pariter mamma gracileſcit; ſed tanto inſuper cum conſenſu, ut ſi fortasſe dextra mamma gracilis fiat, qui foetus in dextra uteri parte eſt, abortum patiat,ur, quique ex ſententia Hippocratis mas erit: Si vero ſiniſtra extenuetur, fœmella, quæ in ſiniſtra quoque uteri parte concepta erit, ſit abortitura.

Sed quamvis id tam clare, & tam certo ſit ab Hippocrate ex veterum ſententia ſancitum, qui ut mox infra dicetur, exiſtimarunt mares in dextra, fœminas vero in ſiniſtra uteri parte generari; apud recentiores tamen, parem aſſenſum non meruit, quoniam ex anatomia, jam conſtitit indifferenter & in dextra & in ſiniſtra uteri parte, tum mares tum fœminas concipi & generari poſſe.

Sed & neque tam facile eſt, ut alter foetus, altero ſuperſtite abortiatur, quippe ad conatum uteri, pro unius foetus excluſione, alterius expulſio facillime haberi poteſt, cum non in diverſis cellulis, ut aliqui crediderunt, foetus in utero contineantur, ſed in una eademque cavitate, qua hianſe, quidquid ibidem continetur, facile deponitur: verum tamen quia Hippocrati non ſemel innotuit, poſſibilem eſſe ſuperfationem, adeoque unum fœtum jam extinctum excludi poſſe, alterum viventem detineri, plane poterit eadem lege alter abortiri, alter conſervari: at vero quod eadem conditione accidat, ut gracileſcente dextra mamma, mas, gracileſcente ſiniſtra, fœmella excludatur, nullus unquam vidit, unde mirari licet, qua ratione ductus Hippocrates ſcripſerit, ita inter ſeſe mammas cum fœtibus reſpondere, ut non ſolum, qui in dextra uteri parte continetur, ſed etiam qui maſculus eſt, occidat, altero in ſiniſtra ſuperſtite: Sed & nec ex alio capite verum eſt, quod mares ſemper in dextra, fœminæ vero ſemper in ſiniſtra generentur, ut Hippocrates Aphoriſmo quadrageſimo octavo huius libri innuit; cum indifferenter experiamur, tum in dextra, tum in ſiniſtra geſtari fœtus, alterutrius ſi fuerint ſexus, ejuſdemque maturitatis & roboris.

Hinc decepti plerique fuerunt, qui cum viderent fœminas dextra uteri parte, plus juſto tumefactas, judicarunt de maris geſtatione; id ipſum quoque accidit illis, qui ex documento Avicennæ, conjectarunt de maſculo, quod in prima, & ſpontanea utero gerentis motione pedem, & crus dextrum prius loco moverunt. Quoniam autem ex anatomia compertum eſt, gemellos unica & communi exteriori

membrana, *chorion* dicta comprehendi, licet interiorem, agninam vocatam (vulgo indufiolum) distinctam habuerit; unde cadit eorundem opinio, quod in partu gemino, mares in dextra, in sinistra feminæ sint progeniti, cum fetus gemini, unico chorio seu secundina contineantur. Non tamen penitus negaverim accidere aliquando potuisse, ut ex extenuatione dextræ mamillæ, mas perierit, & ex extenuatione sinistræ famella; verum id non certa lege stabiliendum, ut perpetuo verum sit & infallibile: quo fortasse exemplo motus Hippocrates, quod aliquando ipse vidit, in Aphorismum redegit, veluti rem notatu dignam, & raram, suoque tempore communiter receptam. Cæterum quæ raro eveniunt, licet sint admiratione digna, non tamen in exemplum ducenda sunt, ut regulam generalem & infallibilem valeant constituere: Ita quidem ab Hippocrate dicitur, feminas podagra non laborare, ut & eunuchos & pueros; hoc licet plerumque verum sit, falsum nihilominus aliquando est animadversum.

Dices: Cardanus hunc Aphorismum utpote illegitimum Hippocrati expungit & rejicit. *R.* Cardanum absolute hunc Aphorismum non rejicere, sed quod Hippocrates, prout & nos jam in contextu innuimus, hunc Aphorismum quasi legem & perpetuam veritatem allegaverit, quæ tamen non est, cum ut experientia docet, & abunde demonstravimus, sæpius fallat, proinde exempli tantum loco non legis acceptandum esse; siquidem talis casus sicuti nostro tempore rarissimus ob magnum mammarum inter se consensum, (licet forsan tempore Hippocratis frequentior) ita tamen impossibilis non est: Ideo non raro videmus in paralyfi, in hemicrania, eandem partem secundum medietatem pati, ut minus mirum videri posset, si in duabus veluti mammis, id ipsum quandoque contingat: Non gratis enim Natura, duas fabricavit mammas, duos oculos, duas aures, duos renes, duos testes, ut altero affecto, alterius uteremur præsidio: Accedit ad hoc quod expulsionem Naturæ plerumque fiant, per rectitudinem fibrarum, vasorum & partium, sicut videmus per hæmorrhagiam dextræ naris, epatis inflammationes critiche solvi.

Quæres: Quomodo gemelli generentur? *R.* 1. Veteres duplici ratione generari gemellos dixere: *Vel* in eodem coitu, quod sæpe fit diviso amborum semine; *vel* in diversis temporibus superfatantibus mulieribus seu quando fit super fatatio; non quod plures cellulae sint

in utero (ut quidam prorsus insensate senserunt) sed quod semina dividantur in duas vel plures uteri partes, unde vel duæ vel tres vel plures generentur proles. R. 2. Recentiores, non attendendo ad veterum prædicta potius figmenta & somnia quam documenta, dicunt gemellorum progenerationem rationabilius ovario tribuendam esse, utpote quo plura per coitum & semen masculinum activantur ovula & in officium uteri internum depelluntur, eo plures vel pauciores proles posse generari: Sed de his plura in institutionibus. Interim de gemellis ex Praxi.

Nota I. Si gemelli concepti fuerint, facilius per venæ sectionem & alios errores fieri abortus, quam si unus solum fuerit fœtus.

Nota II. Fœtibus gemellis conceptis, uno per abortum secreto, ut plurimum & alterum, idem fatum manet.

Nota III. Inæqualibus signis abortus futuri præsumptio est pro masculi, tanquam robustioris conservatione.

Aphorismus XXXIX.

Si mulier quæ nec prægnans (seu grævīda) nec puerpera est, (seu neque peperit) lac habet; ei menstrua defecerunt.

Contentum seu Intentio.

De Lacte Virginum.

Connexio: Cum in præcedenti Aphorismo de mammarum extinctione dixisset Hippocrates: In hoc præsentī loquitur de lacte, quod in mammis generatur & conficitur. Hic Aphorismus ob simplicem conclusionem non patitur divisionem.

Quod autem lac gignatur in mammis ex uteri gestatione, saltem in ultimis mensibus, quando nimirum infans partui proximus est, cunctis notum, & veluti quotidianis experimentis comprobatum est, ut propterea inter indicia gestationis, præcipuum hoc à quibusdam Medicis afferatur, lac è mammis

erumpere; è contrā, nullum lac apparere, etiamsi uterus, & totus venter tumeat, ut in falsa graviditate sæpissime contingit, manifestum indicium sit, nullum fætum in utero contineri, atque ex morboſis aliis cauſis illum inflari; unde lac in virginibus & viduis monſtroſum & perquam rarum eſt, cum lac & menſes maximam inter ſe habent ſymboliſationem, ſiquidem plerumque menſibus fluentibus lac minus fluit, lacte vero ſcaturiente menſes (exceptis plethoricis) ſilent.

Quod autem lac inſuper habeatur in his, quæ mox pepere-
runt, imo quod aliquando ex lactis copia, ad plures menſes & an-
num, illæ lactare queant, luce meridiana & quotidiana clarum eſt,
nullaque proinde eget probatione, quamquam tamen & aliquando
viſum fuerit, fæminas tum utero gerentes, tum enixas, nullum omni-
no lac protuliſſe, idque ſine ullo vitæ incommodo & periculo: Fre-
quenter autem in cæteris omnibus, lac poſt tertium aut quartum
diem à partu prodire, illudque ad plures hebdomadas perdurare
communius accidit, cum manifeſta mammaram tumefactione. Hinc
in hoc præſenti Aphoriſmo conſiderans Hippocrates, quod frequen-
tius utero gerentibus & enixis accidit, inquit, *plerumque* fieri, ut
menſtrua defecerint, ſi neque gravida neque puerpera mulier lac ha-
beat; adeoque ſolere lac in mammiſ comparere, ob ſolam men-
ſtruorum deficientiam, ex inde vero potiffimum confirmari, conne-
xionem maximam mammaram cum utero, ut ex iſtius purgationi-
bus ſuppreſſis, facile fiat, ut ubera lactificent: & vice verſa ſi hæc vel
illa mulier enixa, lactare nolit, obligatis & compreſſis mammiſ ne
lac ad eaſdem tendat illud mox ad uterum declinat & per eundem
repurgatur.

Quamvis vero nec exempla deſint virorum & infantum mam-
mas etiam aliquando lactificaffe, ut videre licet apud Autores. Ve-
rum ut hæc accidant, neceſſe primum eſt, ut menſtrua defecerint,
neque ſolum per unicum, ſed per plures & plures menſes, ſi enim
ſemel tantum menſtrua deficient, non neceſſario fiet, ut lac in mam-
mi� compareat, cum facile poſſit ſanguis, vel ſenſibiliter per alios
ductus corporis amandari, vel etiam inſenſibiliter diſſolvi & repur-
gari: quo fit ut in exercitatis mulieribus, etiamsi menſtrua defici-
ant, lac nullum habeatur, quoniam per exercitia, præſertim laborio-
ſa, adhuc inſenſibiliter per poros cutis, ſanguinis impuritates diſcuti

& repurpari possint, quin & ab exercitiis semper major fit sanguinis & partium solidarum resolutio.

Sed & *Secundo* necesse est, ut nulla alia manifesta evacuatio per id tempus habeatur : unde si fortasse suppressis menstruationibus, hæmorrhagia è naribus accidat, vel sanguinis per os excreatio, aut per hæmorrhoides, vel etiam sudoris & urinæ copia, vel aliud simile, procul dubio lactis apparitio nulla sequetur, excretis nimirum per alios ductus corporis superfluitatibus humorum.

Insuper necesse est *Tertio* ut menstruorum defectus accidat bene se aliunde habente fæmina, nam si fortasse ægrotaret, præsertim acuta febre, aliove morbo simili, valente corpus & humores extenuare & absumere, certe nulla ratione lac è mammis prodire posset : Experimur etiam in dies obstructis, hystericis, scirrho, aliove tumore affectis, in quibus menstrua nulla sunt, lac nullatenus comparere.

Denique necesse est ut menstrua omnino deficient ; si enim solum diminuerentur, vel per intervalla parce prodirent non esset cur lac in mammis prodire deberet : Equidem lactis generatio, non aliunde in his provenit, quam ex impedito exitu sanguinis per vasa uteri, unde secundum sui partem albicantem potest, cum per vasa mammaria remeat in earundem glandulis deponi, & lactis conditionem induere. Quo pacto poterimus veteres cum recentioribus conciliare, super illa tam diu agitata disceptatione, de materia lactis, quam illi sanguinem, isti chylum volvere : cum enim chylus non statim, sed repetitis circuitibus in sanguinem vertatur, ac sensim sensimque repurgetur & perficiatur, plane poterit, cum per vasa mammaria circuit, & per glandulas prædictas percolatur secundum eandem portionem detineri & in lac verti ; nisi etiam dicere velimus, recta è canali thoracico, partem illam chylosam vergere in mammas, ut plerisque Anatomicis est creditum, de qua rê præter alios legi merentur Thomas Bartholinus & Isbrandus Diemebrock.

Est tamen advertendum, id facilius contingere posse nuptis aut viduis, quam virginibus, etsi defectum menstruorum patiantur, etenim in nuptis ac viduis, quæ tamen antea peperint, ductus illi longe patentiores sunt, & ex præcedenti lactificatione, jam consuevit natura materiam lacti generando accommodare illuc transferre ; at vero in virginibus illæ viæ sunt admodum angustiores neque tam prompte excipien-

cipiendo lacti dispositæ; quin etiam ante juventutem majori plane alimento illæ egent, pro suimet corporis nutritu; unde si fortasse sanguis exuperet, facilius in carnum incrementum tendit, quam in lactis generationem: Legendus in hanc rem Galenus *de Locis affectis C. 5.* ubi Aphorismum hunc recitat & examinat.

Optime revera hoc loco ait Cardanus, non esse dicendum mensium retentionem absolute causam esse lactis, quia sic omnes lac gignerent, quod falsum ab omnibus habetur. Cæterum obiter notandum hic velim, olim jam Hippocratem, & plerosque recentiores hodie dum tenere ex anatome, infantes etiam in utero sugere lac per os, ut nimirum assuescat ad nutritionem futuram extra uterum: de qua re consule anatomicos.

Objectiones in contextu sunt solutæ & discussæ.

Aphorismus XL.

Quibus mulieribus in mammis sanguis colligitur, furorem significat.

Contentum seu Intentio.

De Deliriis Faminarum.

Connexio: Cum in præcedenti Aphorismo Hippocrates dixisset de lacte, quod in mammis colligitur & generatur: In hoc præfenti proponit, quod sanguis ad mammas delatus & in lac non conversus, præfagiat furorem. Hic Aphorismus cum simplex sit, divisionem non patitur.

De veritate istius Aphorismi, valde dubitat Galenus *in Comment.* Ideo inquit: *Ego quidem nondum hoc accidisse vidi, & si quando eveniat, ex his est, quæ raro eveniunt*: Subdit tamen, id fuisse ab Hippocrate scriptum, quia observatum; siquidem Hippocrates quod vidit, scripsit: Verum quomodocunque res se habeat, videamus quo pacto sententiam hanc rationibus congruentem adaptemus. Credendum quidem est, in illis fæminis id accidisse quæ menstruorum
diu.

diuturnam passæ sunt suppressionem; unde postmodum sanguis in mammas feratur, atque in propriis earundem glandulis colligatur: cum enim ut superius dictum, magna sit inter mammas & uterum connexio, procul dubio cum diuturno tempore uterus supprimitur, ut sanguinem, quem egerere deberet, non fundat, is per totum fere corpus fertur, sed deinde restagnat & colligitur, potissimum in illis, propter copiam glandularum, molem mamillarum constituentium: diutius autem detentus, fieri nequit, quin ex mora & mala ejusdem habitudine, non concreseat, ace scat & tumorem excitet durum de genere carcimomatum. Quamobrem usus est Hippocrates voce *colligitur* quæ significat ex longo tempore congestionem sensim sensimque factam: Ex hac autem acidi & concreti sanguinis congestionem, duplici ex causa cerebrum afficitur; altera quidem ex circulante sanguine illud inficiente per arterias; altera vero ex communione nervorum, qui plurimi per mammas diffunduntur à pari vago costali; quo circa facillime cerebrum in suis operationibus inficitur.

Sed & ex utero quoque male affecto id ipsum magis & magis adaugetur, quippe experimur ex affectibus hystericis retentis & vitiatis menstruis, furorem exoriri, uterinum dictum, quo miserrimæ mulieres, mente abalienantur, ac furunt veluti maniacæ, manibus & pedibus impetentes, huc & illuc prout multa talium exstant apud Autores exempla. Dixit autem Hippocrates, ejuscemodi sanguinis in uberibus collectionem, *furorem significare*, non *efficere*; non enim per id quod sanguis sit collectus in mammis furor orietur, quasi vero is sit causa effectiva furoris, sed solum significat sanguinem, qui non potuit per uterum evacuari adeoque in mammis collectus, & in tumorem versus, denotet succedentem in nervis & cerebro læsionem unde postmodum furor ac delirium. Sed num verus furor inde oriatur, an solum mentis morio, absque violento atque impetente motu patientis, licet hic etiam dubitare: & quamvis in græco codice scriptum sit *mania* quæ à quibusdam putatur coincidere cum furore, qui delirium dicitur cum impetu & audacia; nihilominus crediderim, larga tantum significatione, delirium hoc loco sumendum esse, & quidem potissimum mentale, quo patientes, licet absurda non loquantur aut agant, mente saltem ac cogitationibus vana meditantur; qualia exempla in praxi observantur. Sed præterea exponendus videtur Aphorismus

Ecce

per

per verbum *significat*, quod potest accidere, licet non semper necessum sit, ut eveniat: nam signum istud est de genere eorum, quæ non sunt inseparabilia & propria, sed solū ut plurimum ostendentia, scilicet cum sanguis vitiosus cerebrum infecerit: nam forte fæmina ejus sit constitutionis, ut non tam facile mente moveatur aliud quid patietur quam delirium: Sic nobilis quædam fæmina scirrho in mamminis diu laborans, qui tandem canerosus factus mortem intulit, cum tamen nunquam mente illa mota fuisset.

Tandem etiam bene perpendendum, quod vox ista (collectio sanguinis) significat repentinum motum & raptum ad mammas, quia cum paulatim confluit lac gignitur, nihilque mali significatur.

In hac autem affectione per Aphorismum adducta Medicus cito remedia adhibere debet, sanguinem ad infernas partes, reducendo & evacuando præsertim in puerperis, in quibus sanguis ad generationem lactis, & quidem in tanta aliquando copia fluit & inflammationes inducit.

Dices: Multis fiunt similes collectiones & tumores imo inflammationes & suppurations quæ tamen non delirant minusque in furorem incidunt, *R.* Hanc difficultatem jam in contextu quidem esse solutam; quod enim Galenus ut in principio Aphorismi diximus, talem casum se nondum vidisse testatus sit, certe experientiæ & praxi medicæ contrariatur, observatæ enim sunt mulieres, quæ quoties pueros lactabant, toties desipiebant, secus si fæmellas, aliæ rursum quam diu lactabant, ingentem capitis dolorem sentiebant alias non. *R. 2.* Intelligendum esse hanc sanguinis quæ ad modum lactis in mammis colligitur, qui haud dubie raro saltem caput ferit; non autem de eo qui in substantia extravasatus inflammationes & suppurationes facit, atque deliria aut similia accidentia inducit.

Quæres: Quodnam lac sit utilius proli matris, vel nutricis? *R.* Cum *Hippocrate de alimentis* qui dicit: Lac proprium utile lac proprium nocivum, id est, si cæteris paribus mater bene habeat, proprium seu maternum est præferendum nutricis: Si vero mater male habeat, alienum seu nutricis est præeligendum. Plura de hoc vide in institutionibus.

Aphorismus XLI.

Si velis nosse, an mulier conceperit, dormitura aquam mulsam potui dato (seu potandam da) & si ventris (seu alvi) tormina patiatur, concepit: sin minus non concepit.

Contentum seu Intentio.

De Experimentis graviditatis per assumpta.

Connexio: Cum Hippocrates in antecedentibus Aphorismis plura de abortu & partu scripsisset: In hoc præsentī Aphorismo ad conceptionem, & graviditatem accedit quæ abortum seu partum præcedere solet.

Hic Aphorismus in duas partes dividitur: *Prima* pars continet mulsæ apparatus: *Secunda* docet effectum quem mulsæ, in hoc casu conceptionis & graviditatis præstare solet.

Præsens ergo Aphorismus, proprie pertinere videtur ad partem Medicinæ diagnosticam, ad dignoscendam seu dijudicandam graviditatem. Cum enim aliquando fæminæ, vel ex tumefactione, & lactificatione mammarum, de qua mox ante diximus; vel ex suppressis menstruis; vel etiam ex alia aliqua ægritudine male se habeant, & medicamentis egeant, vel per unam, vel per aliam corporis partem ducentibus, imo, quod sæpius fieri solet per uterum, & timor aliunde sit ne utero gerant, & in abortus periculum incidant, docet in hoc Aphorismo Hippocrates, quo pacto Medici dignoscere possint uteri gestationem, & fæminam jam antea revera concepisse, adeoque medicamentis evacuationem promoventibus tractandam non esse, ne utero gerenti, damnum, sibi vero infamiam pariant: Proponit autem leve medicamentum, & omni periculo vacuum, quo fæminæ certæ fiant, an non utero gerant, ac propterea possint tuto medicamentis subjacere. Illud vero est aqua mulsæ, id est, aqua melle adjecto medicata, quam vult exhibendam, antequam somno se disponat; si enim

exinde alvi tormina patiatur, jam concepisse iudicio est, sin secus non concepit.

Vult ergo primo, aquam mulsam esse exhibendam, quæ scilicet ex mixtura mellis flatus valeat excitare: fit autem aqua mulsæ græce *μελικρατον*, ex una parte mellis crudi, cum decem vel duodecim aquæ: & deinde ad convenientem dosim exhiberi debet post cænam; nam cum Hippocrates nullam faciat mentionem de modo huiusce exhibitionis, certe debet intelligi, juxta morem consuetum hominum; & quoniam dicitur *in textu* cum *dormitura* est, procul dubio supponitur cæna ante acta. Si vero absque ulla cæna exhiberetur, profecto etiam absque graviditate tormina afferret, quia mel crudum cum aqua exhibitum flatus excitat, alii hanc rationem allegant quia flatus per somnum minus discutiuntur, quam per vigilias quarum motu corporis & spirituum flatus efficacius dissolvuntur.

Sed quo tempore graviditatis velit Hippocrates melicratum hoc exhibendum dubitari potest: Et quidem verisimile admodum est, inter initia graviditatis, atque adeo primo vel secundo mense, his enim temporibus dubia videtur posse esse graviditas; cum tunc fætus, nulla de se prædat indicia; nam tertio, quarto & sequentibus mensibus, tum motu, tum vomitu, tum uteri agglomeratione manifestatur; in principio vero graviditatis ista vel nulla sunt, vel ambigua. Itaque primis mensibus, cum de graviditate ambigitur, tentanda hæc sunt, sed neque tam certi erimus ex his, quippe fieri potest, ut aliis ex causis tormina contingant in intestinis, cum tamen conceptio nulla facta sit; vel contra etsi graviditas habeatur, nulla tamen tormina fiant, ex peculiari quadam utero gerentis constitutione, vel etiam quia ejusmodi generis medicamento aut rebus ex melle compositis uti consueverit, sine ullo ventris incommodo, nam quamvis plerumque his, quæ melle & mellitis utuntur, tormina ista accidant, fieri tamen potest, ut in aliquibus nulla fiant. Atqui ex altero capite, periculosum in aliis esse potest, ob metum colici doloris, aut fluxus, aut alius mali gravioris, cum plerosque noverim pessime se ab ejusmodi rebus mellitis habuisse: Ideo prænosceda primum est cujusque Natura & constitutio, ne in hac melicrati seu mulsæ exhibitione Medicus decipiatur; proindeque sciat, num tormina alvi sequantur revera uteri gestationem, ut ex hoc Aphorismo dijudicandum Hippocrates proponit: Nam sicut in calidis

lidis mulieribus flatus facile discutiuntur ex vi complexionis, sic in muliere alias flatibus obnoxia mulsa pota flatus intensiores licet non gravida excitari possunt. Qua autem de causa tormina ista accidunt ex uteri gestatione? putaverim, quia uterus, postquam genituram comprehenderit, undique clauditur, & in molem attollitur, quo fit ut intestina præsertim ileon & colon comprimantur, atque adeo nequeant, flatus ex aqua mulsa excitatos per alvum discutere, qui retenti tormina excitant: Si autem nihil intra se uterus contineat, cavitates intestinorum liberiores bene poterunt excitatos flatus protrudere & evacuare, unde nullum incommodum exinde suborietur. Efficacius autem mulsa flatus excitabit, si anisum addatur, ut dicitur *Lib. de Sterilibus*, ex quo libro, hic Aphorismus est desumptus, ibi enim ita scribitur: *Mel & anisum tenuissime tritum, in aqua diluito & exhibeto post dormire finito: & si tormen circa umbilicum fiat, pragnans est, si non, non.*

Verum quamvis hæc ab Hippocrate, velut à se ipso observata, notentur ut infallibilia, non tamen inconsiderate à Medicis in usum ducenda sunt, ob periculum quod imminet acerbioris doloris in intestinis, indeque etiam in utero ob consensum & viciniam, quam cum illis habet, & eo magis, si cæna aliquanto lautior fuerit, & mel non sit coctum ac despumatum, vel ipsa mulsa cruda & non cocta facillime noxa gravior ex doloribus & torminibus orietur. Quo sane factum, ut in praxi nemo audeat de his periculum facere, cum aliunde nec certum aut infallibile iudicium ex eo sumi possit. Potius itaque contenti sunt Medici, dictis & factis obstetricum fidem præstare, quam ejusmodi medicamentis fidere, quamquam sæpe sæpius, & istæ fallant & fallantur: Dignotio enim gravidarum, licet plerumque & à plerisque per signa essentialia & secundaria atque ipsa quædam experimenta præstari soleat, attamen signis hisce omnibus, præsertim primis mensibus, maxime vero signis per experimenta sola factis minime in exploranda graviditate est fidendum; neque tamen experimenta fundata in re, ex assè & omnimode sunt negligenda aut rejicienda, prout constat vitum plenum quoad cibum & potum ordinarie ferri non posse à gravidis; sic pariter constat quod gravidæ & vinum & cibos varios aversentur; præterea dulcia licet summe assueta, minime ferre posse, præprimis à pastu: Item si post coitum horror & tristitia & seminis remanentia observetur: Signa autem ultimorum mensium sunt evidentia de quibus nemo dubitat.

Ob-

Objectiones in contextu sunt solutæ & plura de hac materia ex institutionibus & praxi nostra petenda.

Aphorismus XLII.

Mulier gravida, si marem gerit, bene colorata est; si feminam, decolor.

Contentum seu Intentio.

De Experimentis graviditatis per colorem.

Connexio: Cum Hippocrates in præcedenti Aphorismo exposuisset signa graviditatis: In hoc præsentī tradit signa ipsius sexus. Hic Aphorismus ob simplicem contextum non dividitur.

Non ergo Hippocrates tantum signa conceptionis nobis tradere voluit, sed etiam an marem vel fæmellam mulier conceperit hoc Aph. subjungit, quo ex bono, vel malo gravidæ mulieris colore, facile id posse dijudicari proponit, nam si bene colorata sit, marem, si vero sit male colorata, fæminam concepisse decernit. Attamen ut exponit Galenus in *Comment.* asserens, *quod hic scribitur, ex eorum numero est, quæ sæpius eveniunt*, etenim aliquando fit, ut etiam quæ marem conceperit, sit male colorata, & è contra, quæ fæminam conceperit, sit bene colorata.

Verum ad plenam intelligentiam hujus Aphorismi plura notanda sunt. *Primo* quidem, quod bonus vel malus color mulieris utero gerentis, referendus est ad eum, qui consuetus eidem est in statu naturali & sano, citra graviditatem; quamobrem si fæmina in suo statu sano, boni coloris fuerit, neutiquam fieri poterit bene colorata in statu graviditatis & cum utero gerit: præterquam, quod quævis utero gerens ex causa gestationis sit perpetuo se ipsa decoloratior, cum uteri gestatio sit species quædam ægritudinis ex Galeno, ut alibi dictum est, per quam semper fæminæ à suo meliori statu declinant, & non tantum colore, sed etiam carnibus & operationibus cunctis quodammodo deficiunt, cum utero gerunt.

Com-

Comparatio insuper facienda est inter colorem consuetum haberi à fæmina, in gestatione maris, & cum, qui eidem accidit, in gestatione fæminæ, & propterea quamvis ex ratione graviditatis semper utero gerentes decolorentur, nihilominus in gestatione fæmellarum longe decoloratiores appareant.

Præterea in cæteris omnibus, quæ cum uteri gestatione contingunt par ratio esse debebit: nimirum ut iisdem alimentis utero gerens alatur, eundem aërem & regionem incolat, iisdem utatur exercitiis, & reliqua omnia æqualiter se habeant tam in gestatione maris, quam in gestatione fæmellæ: Nam si fortasse, cum utero gerit fæminam, aërem & regionem inhabitet calidiorem, vescatur cibus aromaticis, & floridiorem sanguinem gignentibus, seque plus solito exerceat, & alia peragat, ex quibus coloratio fieri possit; è contra vero cum gestat marem contrariis omnino rebus non naturalibus utatur, procul dubio indicium hic allatum fallax erit; quippe in priori casu coloratio apparet, etsi fæminam conceperit; in posteriori vero, penitus decolorata videbitur licet marem gestet. Ita quoque dicendum in reliquis, quæ fæminis utero gerentibus, pro varietate graviditatis accidere possunt: aliquando enim marem gestantes, inappetentia tenentur, evomunt, bibulæ sunt, acida & acerba appetunt, comedunt cruda & excrementosa, unde nil mirum, si compareant decoloratæ: E contra vero gerentes fæminam, si in his omnibus cautiores sint, & eduliis vescantur melioribus, sane coloratiores observabuntur: Quare remoto quocunque dispari accidenti, ac seclusa quacunque ægritudine, aliave causa externa, varietas ista colorum in gravidis, non nisi ex ipsamet conceptione, & causis ad conceptionem concurrentibus petenda solum erit.

Ratio autem istius varietatis, desumitur ex varietate principiorum ad maris ac fæminæ generationem concurrentium: mares enim fieri perpetuo dicuntur ex fæcundiore ac robustiore semine, fæmellæ vero ex debiliore & laxiori; sanguis etiam, qui ad vitam illorum promovendam à matre tribuitur, in masculis vividior & floridior est, dilutior vero & inefficacior in fæminis, quæ eadem ex causa excrementosiores esse consueverunt: Uterus pariter in conceptione masculorum calidior & vegetior esse solet, frigidior vero & imbecillior in formatione fæminarum: Quamobrem ex his omnibus merito coloratiores, videntur utero gerentes in maribus, quam in fæminis præconceptis.

Porro

Porro semper ac ista omnia simul in graviditate concurrunt, fieri nequit, quin etiam totum corpus, utero gerentis floridius, vegetiusque appareat, juxta commune medicorum effatum, ex Galeno & Hippocrate depromptum: *qualis color apparet in facie, talis humor abundat in corpore*: atqui color floridus, vividus, roseus in cute, non nisi ex sanguine puriori & floridiori in venis & arteriis contento, procedit, ut patet; unde communiter fatentur Medici sanguineos ad purpureum, cholericos ad flavum, pituitosos ad album, & melancholicos ad nigrum & fuscum colorem inclinare; sicut ex adverso, cute nigricantes, melancholiam, albicantes pituitam, flavescentes bilem, rubentes sanguinem, in venis prædominantem significare. Quod hic Hippocrates generaliter dixit de gravidarum colore meliori, vel deteriori, ad dijudicandam maris vel fæminæ gestationem, alii ad lentigines & maculas in facie apparentes revocant; dicunt enim fæminas utero gerentes masculos, faciem habere non tantum coloratiorem, sed etiam nitidam; gestantes vero fæmellas, lentiginibus & maculis cutaneis esse refertas. Alii ex coloribus papillarum in mammis id ipsum præfagiunt, credentes, albicantes vel flavescentes papillas, fæminam, rubentes vero vel etiam fuscas masculum significare: Vel si papillæ sursum conversæ fuerint marem, si deorsum fæminam gestare: Item mulier maculam habens solarem in facie fæminam gestare quæ vero colorata bene manet marem fert. Alii accipiunt lac mixtum cum farina & pastillum formant & ad lentum ignem affant etsi comburatur marem gestat; sin hiet & diffundatur fæmellam. Plerique his non fidentes, potius ex tumore mammillarum, dextræ vel sinistræ, & motu agiliori vel tardiori utero gerentium; in incessu primo inopinanter habito, ac motione dextri cruris vel sinistri: Itemque ex urinis tenuioribus, vel crassioribus, magis minusve coloratis, crudis vel coctis, nec non ex pulsibus majoribus in dextro, quam in sinistro brachio, aliisque similibus, id ipsum præfagire satagunt.

Sed quam vana ista sint & futilia quisque bene noverit, quippe quæ solidis rationibus non fulciuntur, experimentis non correspondent, & falso à vulgaribus hominibus sunt conficta. Et sane, si verum fateari licet, neque quod hic ab Hippocrate traditur, veritati perpetuo consonat, & quod ab expositoribus adjicitur, longe magis erroneum est: Etenim nuperrimis observationibus anatomicorum detectum, aliter
prorsus

prorsus generationem in viventibus haberi, quam ab antiquioribus Medicis est putatum: ubi enim ab his credebatur masculinum & fæmineum semen simul una commisceri, & cum sanguine menstruo, in unam massam intra uteri cavum coadunari, & pro illorum varietate, atque efficacia majori vel minori, unius quam alterius, masculum aut fæminam exoriri, magis similem uni, quam alteri; sed jam satis superque innotuit, nullum semen revera à fæminis suggeri sed solum materiam quandam albugineam, albumini ovi perquam similem, molli sed duplici pellicula involutam, quæ ex earundem fæminarum ovario per tubas fallopianas, cum fæcunda est, in uteri cavum delabitur.

Sed adhuc etiam à nobis alibi est ostensum, præexistere in ovibus mulierum rudimenta fætuum, quare hæc potius referenda erunt ad materiam in ovario præjacentem, atque ad rudem illam, membrorum dispositionem, quæ multo antea, ibidem congenita est, ex varia corporum habitudine, & partium generationi destinatarum constitutione, ut propterea, quæ dispositio & sexus & organorum, huic vel illi sexui addictorum præjecta est, ita in marem vel fæminam, procreatio desinet: Id enim in multiparis animantibus tam patens est, ut longa probatione non egeat: In fæminis etiam humanis, quæ geminos vel plures fætus pariunt, unico chorio contentos, non aliunde fit, ut aliqui mares, aliæ fæmellæ oriantur, quam ex præexistente in organis diversi sexus dispositione. Sed & gallinæ unico galli concubitu, plurima quoque edunt ova, pari formiter fæcundata, ex quibus & mares & fæminæ progignuntur, non nisi ex vario præjacentium organorum apparatu, quod etiam in cæteris oviparis evenit.

Neque vero quod fætus dicatur genitus ex semine ac sanguine calidiori, sequi inde necessario debet, fæminam utero gerentem coloratiorem apparere, quin potius contra non raro visum est utero gerentes masculum, longe admodum se ipsis decoloratas ac defœdatas evasisse, imo & nonnullas cæpisse statim in primis mensibus, cibos fastidire, vomere, dolere, & alia plura ac diversa incommoda pati, unde postmodum valetudinarii, & imbecilles mares orti sunt; quæ sane in gestatione fæmellarum non evenerunt. Id ergo solum in maribus fieri potest, quod sanguis per vasa umbilicalia, nutritui eorundem accedens, floridior & vegetior sit, & designet, utero gerentem bona valetudine frui, adeoque roseus ac venustus color faciei exurgat: hinc au-

tem robustiores solum, vel è contra debiliores partus prænosci poterunt. Verum tamen, ne fidem Hippocrati derogemus, dicere fas erit, id nonnunquam evenire, & quod ipse aliquando vidit posteris tradidisse, cum revera partus fæminei excrementosiores esse soleant, ob collectam in utero, atque in toto fere corpore, crudorum & lymphaticorum humorum saburram, unde sanguis serosior, & minus rutilans in causa esse potest, ut in fæmellarum gestatione, cutis universa, saltem in ultimis mensibus, defædata palleat.

Objectiones in textu sunt solutæ.

Aphorismus XLIII.

Si mulieri prægnanti, fiat in utero erysipelas, lethale est.

Contentum seu Intentio.

De Inflammatione uteri in gravidis.

Connexio: Hic præsens Aphorismus optime conjungitur cum Aph. 30. hujus Libri, ubi dixit: *mulierem gravidam, morbo quopiam acuto corripilethale*: Unde præsens Aphorismus mox dicti exemplum esse videtur. Hic Aphorismus ob brevitatem & simplicem conclusionem non dividitur.

Cum ergo Hippocrates in hoc præsentè Aphorismo junxerit cum *erysipelate* uteri graviditatem, ut de eventu lethali judicium ferri potest, ansam præbet dubitandi, an erysipelas in utero perpetuo lethale sit: Etenim si perpetuo lethale esset, profecto non fuisset necessarium adjicere mulieris graviditatem, cum & citra graviditatem quoque erysipelas utero contingens lethum afferre possit, tum ratione sui quia morbus acutus est, tum etiam ratione partis affectæ, nempe uteri, qui ob consensum, quem retinet cum omnibus partibus principalibus corporis, quacunque de causa afficiatur, periculosissimos morbos affert. Et quidem *Cardanus* non inutiliter adjecta putat graviditatem, quin tria illa simul conjungenda existimat; nempe erysipelas utero contingens, & quo tempore fætus geritur; nam subinde futurum inquit abortum, cujus causa mors postmodum succedet.

Crediderim tamen ego, etiam sine graviditate, si revera erysipelas

las internum fiat, & substantiam uteri occupet, lethale esse, nam affecto erysipelate utero, secundum propriam substantiam, non tantum febris acutissima exoritur, verum etiam gravissimis symptomatibus sociata, qualia præsertim sunt, in illius morbis, delirium, vel lethargus, difficultas respirandi & vomitus, consentientibus nimirum, cerebro, pulmone & ventriculo. Uterus enim viscus valde sensile est, & quod citissime suas communicat affectiones partibus nobilibus, quia maximum consensum, cum corde per venas & arterias; cum capite per nervos habeat. At vero quamvis morbus hic utero contingens lethalis sit, non tamen necessario, & inevitabiliter mortem affert, cum fieri possit, ut ad salutem adhuc desinat, etiamsi uterus pessime afficiatur: etenim à male affecto utero vivere quoque possunt animalia. Cum autem erysipelas infestat uterum in gravidis, non solum damna imminent gravissima ex ipsomet erysipelate sed etiam ex abortu, qui procul dubio exinde accidet; utrumque autem difficillime, imò nequaquam superabit utero gerens ut patet. Quod si erysipelas non internam partem sed cutaneam & externam uteri regionem occupet, facilius semper erit resolutionis, dummodo in suppurationem non desinat, aut in gangrænam.

Sed quod dictum de erysipelate, an non idem accidat quoque ex inflammatione, si fortasse hæc in utero contingat? Galenus quidem dubitat, *inquisitione enim dignum hoc in Comment.* ait, sed in neutram partem inclinat: dubium autem augeri potest ex maxima differentia, quæ intercedere ponitur, inter erysipelas & phlegmonem seu inflammationem: illud enim fieri dicitur à sero sanguinis acriori; inflammatio vero à sanguine blandiori & temperatiori.

Verum inflammationem (si utero forsan contingat) adhuc periculosam fore, nemo quidem dubitabit, attentis nimirum non tantum iis quæ inflammationem ipsam comitantur nempe ardore, dolore, tumore, febre, cæterisque symptomatibus sed etiam & potissimum suppuratione quæ exinde suboriri solet, unde postmodum ulcus. At vero quia inflammatio in utero rarius esse solet, cum non tam facile sanguis in ejus substantia hæreat, sed prompte per internam cavitatem egeratur, vel sursum in alios ductus recurrat, propterea factum est, cur Hippoc. erysipelatis solum meminerit, illam vero tacuerit. Cæterum

scirrhi, alique tumores, in longum tempus protrahi solent, & non nisi cum ulcerantur lethales fiunt.

Hippocrates, ut colligitur *ex Lib. de Natura mulierum*, affert phænomena & symptomata erysipelatis uteri, nempe, tumorem pedum & crurum & ventris, febrem, rigorem, inquietudinem, dolorem pectinis, & lumborum & capitis, ruborem faciei, sitim, livorem, pustulas per totum corpus.

In hoc casu idem Hippocrates suadet uti clysteribus refrigerantibus, crediderim tamen sanguinis missionem non esse omittendam, sed principalem existere; suadet pariter Hippocrates *Lib. de morbis mulierum*, sumptionem lactis asinini.

Objectiones in contextu sunt solutæ.

Aphorismus XLIV.

Quacunque præter naturam, tenues, utero gerunt, abortiunt priusquam crassescant (seu donec habitiores evadant.)

Contentum seu Intentio.

De Abortu gracilium.

Connexio: Cum Hippocrates superioribus Aphorismis 37. & 38. hujus Libri de mammarum extenuatione ejusque prognosi locutus fuisset: In hoc Aphorismo totius corporis extenuationem proponit, & præceptum Medicis valde utile ad generationem tradit.

Non convenit autem inter Autôres, qui nam sit genuinus sensus hujus Aphorismi, cum variæ Autorum circa hunc Aphorismum habeantur commentationes, imo & Galenus ipse multiplicem ejus referat expositionem, sed anceps deinde in quem defleat, non explicat. Et quidem num tenues seu graciles natura, an potius morbo, ut adjectum illud verbum *præternaturam* indicare videretur; & num ex causis externis, puta inedia, exercitiis, vigilia; an vero ab internis, nempe à vitio sanguine, graciles evaserint, non satis aperte docet Hippocrates. At quamvis sub multiplici interpretatione, veritati adhuc consentaneus possit

possit explicari, menti tamen Hippocratis consentiet magis si dicamus illum hic locutum de extenuatis & gracilescentibus, non quidem ex morbo, sed ex causis externis, potissimum extrema inedia seu diæta, ut fit v. g. in obsidione, aut publica fame, aut ex aliquo accidente, quod mox à conceptu supervenerit: Etenim cum agat de gravidis, quibus nisi bene valeant, concipere non contingit, profecto sanas, non autem morbo affectas, ipse comprehensas voluit. Et licet Galenus de diebus decretoriis asserat, adhuc uteri gestationem quandam esse speciem morbi, id tamen præcedente graviditatis tempore solum modo intelligendum, non tamen ipso primo cum concepturæ sunt momento.

Extenuatas itaque hic sumere satius est quæ à causis externis potissimum ex longa inedia macorem hunc contraxerunt, minime vero ab internis causis ægrotare facientibus, quemadmodum recensentur, humores acres, acidi salini & similes, quamvis & ab his quoque illas extenuari & abortiri contingat. Cum ergo accidit, fæminas, cæteroquin bene valentes utero concipere, mox vero inedia, aliave causa externa à naturali & convenienti corporis habitudine deficere, & emaciari, ut sensim extenuentur & contabescant plane fit, ut in longius tempus conceptum foetum ferre non possint, sed ante tertium gestationis mensem abortiantur, illumque deponant: Causa autem hujusmodi depositionis, multiplex sane esse potest, potior autem erit nimia uteri coarctatio & contabescencia: siquidem etsi is primo gestationis mense, nullam sui expansionem subeat, ut conceptui atque embryoni locum faciat, vix tamen fieri potest, ut succedentibus mensibus, non unde quaque amplificetur, & tumeat, quin etiam habitudine propria pinguescat & crassescat, esco reliquum totius corporis non pari mole adaugeatur, quemadmodum experimur in his, quæ nausea aut ciborum fastidio, vel etiam iteratis vomitionibus, ad plures hebdomadas, postquam conceperint, gracilescent, utero interea sensim intumescente, atque citra noxam foetum conservante. At vero cum extenuatio talis est, ut etiam illum in macorem deducat, plane fit ut convenienti expansioni minime cedat, & foeturam ipsam comprimat ac suffocet. Compertum autem est anatomia, uterum in gravidis, sensim & sensim non tantum amplificari, sed evidenti magnitudine crassescere, in suis membranis glandulis, ductibus & cæteris. Insuper post unum aut alterum mensem à conceptu, ubi vala umbilicalia nexum

per placentam cum utero subierint, necesse omnino est, ut per arterias ubertim, sanguis maternus, isque purus & alibilis, in illius incrementum deferatur, qui si deficiat in matre jam extenuata, plane nequibit accedens foetui vitæ favere, unde propterea exarescet & decidet. Hinc non tam paucus sanguis, quam malus & ineptus causa marcoris existimandus, quippe tunc potissimum animalia marcescunt & extenuantur, cum sanguis in illis dulci glutine privatus partibus nutriendis minime appingitur, quin potius veluti dissolutus & acris redditus respuitur ab iisdem, ut alibi à nobis est animadversum, quam obrem tenello foetui omnino incongruus cum sit, abortum parit.

Sed quæret aliquis, quomodo fiat, ut sanguis gignendo fœtui sit aptus, nutriendo vero ineptus & omnino nocuus? Verum fallitur, quicumque suspicatur sanguinem generando fœtui inservire, cum is ex præjacente ovo, à maris semine fœcundato progignatur, & ut observarunt cum Harvæo reliqui omnes anatomici, non nisi post vasorum umbilicalium productionem, per placentam in fœtum diffunditur, quod non nisi secundo mense accidit, ut proinde falsum sit, quod antiquioribus creditum, sanguinem concurrere ad generationem embryonis, cum ad incrementum illius tantummodo, atque ad motum cordis & vitam conservandam, conducere, jam satis superque perspectum sit.

Abortiunt igitur non immerito, quæ in ipso primo conceptu extenuatæ inveniuntur, cum conservando atque alendo fœtui pro dignitate sufficere non possint: sed cur secundo mense, quod incaute fuit à *Leonice* prætermissum? Ratio in promptu redditur, quia vasa umbilicalia, ut dictum, tunc in eum à matre sanguis influitur, qui cum quantitate modicus & qualitate nocuus esse soleat tantum abest, ut foveat ac proficiat, quin potius officiat, & vasa prædicta, si fortasse per placentam, utero sint alligata dirumpat ac dissolvat unde postmodum abortus. Neque tamen omnino necesse est, ut secundo solum mense abortus insequatur, cum & ante & post hoc tempus, is accidere possit, prout major vel minor, gravior vel levior fuerit mala utero gerentis habitudo: plerumque autem evenit, ut circa hoc tempus istiusmodi foetus aboriantur, cum primo à matribus sanguinem per vasa umbilicalia suscipiunt, nisi tamen recta victus ratione usæ & meliori salubritate potitæ, illæ præcaveantur. Verum tamen Hippocrates non temere
ad-

adnotavit *priusquam crassescant*; siquidem arduum plane videtur, posse tam cito extenuatas gravidas puriori & abundantiori sanguine refici, & carnibus impleri.

Quamvis autem antea dictum sit, graciles potissimum à causis externis redditas, hoc Aphorismo comprehensas videri, si tamen à morbo & causis internis extenuatas facundari & concipere contigerit, eidem incommodo obnoxias fieri procul dubio credendum, cum utraque causam abortus ab una emaciatione sortiantur, neque enim illæ abortiunt aliunde, quam quod plurimum marcuerunt; quare si causa in utrisque communis est, idem periculum timendum, quamvis verisimilius videatur, quæ nondum ægrotaverint, quam quæ nuper à morbo convaluerint, concipere posse.

Omnes itaque valde extenuatæ, seu à natura, seu causis externis, seu internis aut à morbo, abortiri possunt & poterunt: ideo illud *præternaturam* immodice interpretandum est.

Dices: Mulieres præternaturam extenuatæ non possunt concipere, Ergo falsum est suppositum: *Prob. Antecedens* eadem causæ quæ abortum faciunt, etiam conceptum impediunt, ergo non possunt concipere: Respondet Fonseca, faciliorem esse conceptum quam retentionem.

Dices II. Multæ hæcticæ dantur quæ concipiunt & retinent neque abortiunt: atqui hæ sunt extenuatæ *præternaturam*, Ergo Aphorismus non subsistit: R. 1. Hæcticas in primo gradu concipere & retinere posse concedo, in secundo difficulter, in tertio prorsus nego. R. 2. Posse fieri ut quædam hæcticæ dentur, quæ tamen sufficiens alimentum possint fœtui contribuere: quæ autem vere sunt exangues & extenuatæ præternaturam, seu immodice, tales non sufficiunt. Hinc vulgus sæpius observavit matres debillimas tenues cæteroquin sanas, robustas & saginatas fortes & pingues matres debiles & emaciatas proles generasse: Ratio hujus eventus & affectus facile eruitur, cum infans in tenui matre, nil nisi moderatam substantiam reperiatur, eamque ad se trahat, ut pote mater fortior indeque fiat ut proles quidem proficiat, mater autem de die in diem magis deficiat, è contra fortissimæ & athleticæ matres, superfluitate alimenti fœtus potius obruunt & debilitant, ut tandem, tanto onere pressus plus deficiat quam proficiat.

Quæres: Quomodo ergo graciles seu extenuatæ post conceptionem

mem sunt fractandæ? R. Tales mulieres *primo* à coitu quantum licet & potest sunt coërcendæ: *Secundo* arcendæ ab omni labore & violentia corporis & animi, & quies ipsis imperanda: *Tertio* utantur molli- bus stratis & lectis: *Quarto* euchimis & substantifice humectantibus contusis, destillatis, gelatinis consummatis nutriendæ: *Quinto* emol- liendæ & humectandæ balneis atque unguentis resumptivis inungen- dæ: *Sexto* umbilico & abdomini apponenda quæ vim habent nutrien- di & foetum roborandi emplastris, fomentis ex vino, pane tosto, aro- matibus & cotoneis.

Aphorismus XLV.

Quæ vero mediocriter corpulenta seu carnosæ abortum faciant, secundo mense aut tertio, sine occasione manifesta, iis acetabula uteri, mucoris sunt ple- na, nec præ pondere foetum continere possunt, sed abrumpuntur.

Contentum seu Intentio.

De Abortu mediocriter corpulentarum.

Connexio: Cum in priori Aphorismo de abortu, qui gravidis, ema- ciatis & gracilescantibus præternaturam, contingit dixisset: In hoc præsentis Aphorismo de prægnantibus, mediocriter carnosis, & in sequente de obesibus verba facit, causamque abortus indagat, in ma- gnâ prægnantium & foetus utilitatem. Hic Aphorismus ob simpli- cem conclusionem non dividitur.

Præliminariter notandum *triplicem* in universum esse corporis habitum, *gracilem, carnosum & obesum*. Et quamvis in hoc textu dicat, *mediocriter carnosas*, has tamen ita vocat utpote differentes ab *obesibus*, quæ nimirum crassæ appellantur *ut in sequente Aphorismo*: Itaque si carnosas mulieres contingat concipere, & postmodum sine causâ ma- nifestæ occasione, secundo aut tertio mense abortire, illas ait id specia- tim pati, quia acetabula uteri plena mucoris sunt, & non possunt ex- pondere, foetum grandiore redditum diutius continere, sed disrum- pi omnino necesse sit.

Ve-

Verum tamen debent carnosæ istæ mulieres esse aliunde aptæ, tum ad concipiendum, tum ad pariendum, quæ propterea alias conceperint & salubriter pepererint: unde ea est differentia inter admodum graciles & obesas, ut illæ non pariant, quia foetum ad maturitatem non perducunt, istæ vero non concipiant; & quidem vitio totius & partium generationi dicatarum: mediocriter autem carnosæ abortiunt solum ex accidenti, cum cæteroquin bene conceperint, & conceptum foetum, cum membrorum exacta dispositione compleverint. Has igitur ait si contingat secundo aut tertio mense abortire, & quidem citra quamcunque causam manifestam, aut morbi aut violentiæ alicujus commotionis, id sane ad acetabula uteri mucore plena referendum est. At quid pro acetabulis uteri intelligere voluerit Hippocrates, non bene constat apud interpretes, cum in græco textu scribantur Cotyledones: Galenus *in Comm.* autoritate Praxagoræ pro his explicat, *ora venarum & arteriarum quæ feruntur ad uterum*: Cardanus placentulam carneam, per quam vasa umbilicalia foetus utero annectuntur: Alii vasa ipsa umbilicalia; Alii universum uteri cavum innumeris glandulis inspersum: At appositè magis ex Anatomia cotyledones seu acetabula uteri intelligenda sunt oscula illa ex glandulis ejusdem hiantia, aut qua tempore menstrua repurgari debent, aut tempore conceptionis, cum placenta utero adnascitur, ut umbilicalibus vasis annectatur pro sanguinis circulatione in foetu. Cum enim Hippocrates non tantum in gravidis mulieribus, sed extra graviditatis tempora, de uteri cotyledonibus meminerit, plane constat, neque placentam, neque vasa umbilicalia, aliave tempore conceptionis prodeuntia intelligere pro illis voluisse, quemadmodum deducere est ex *primo de morbis mulierum* ibi enim dicitur: *Si acetabula pituita plena fuerint, menses fiunt pauciores; & si utero gerat fœmina, fœtus non corroborabitur, sed corrumpitur ac defluit &c.* Quin & *libro de locis in homine, & libro de articulis*, in ossium commissuris Cotyledones quoque considerat. Verum tamen etiam placenta, vasa umbilicalia, uterus ipse & quæcunque ad conceptum & nutritionem foetus faciunt, si quocunque modo infarciuntur & tumeant, abortus pari de causa subsequi poterit. Hinc non tantum mucus, id est crassus, lentus & viscosus humor, si has partes oppleat, & infarciat, in causa erit, ut abortus insequatur, sed etiam sanguis, si plus justo crassior sit, & glutinosior, aliudque vitium contraxerit, quo potius

hæreat quam diffuat ; Licet in moderate carnosiss, veluti eusarchis non tam facile ista contingant.

At unde sit, ut à Catyletonibus, mucore oppletis, abortus accidat, inquisitione ulteriori dignum videtur, cum pauci sint qui ejus causam afferant; & Galenus *in hoc Comment* ne verbum quidem facit ejuscemodi abortus; Nonnulli ad relaxationem ligamentorum aut vasorum umbilicalium: alii ad gravamen, quod uterus & foetus ipse à lentis & crassis succis patitur: alii rursus ad defectum alimenti, cum sanguis propter ejusmodi succorum lentorem, non bene possit permeare, & in foetus nutritionem subire, causam referunt. Alii tandem causam referunt ad uteri parvitatem.

Verum crediderim ipse non unam semper, eandemque in his esse abortus causam; nam moderate carnosæ foeminæ, cum conceperint, non eodem perpetuo & statuto tempore aboriuntur, sed quandoque secundo, aliquando tertio aut etiam quarto mense, ut adnotat Galenus *6. de locis affect. cap. 5. & lib. de uteri dissectione*; unde fit, ut ab ejusmodi crassis & glutinosis humoribus, diversimode uterum & foetum incommodantibus, aboriendi occasio oriatur. Primo etenim & secundo mense impedimento sunt placenta (membrana siquidem amnium & chorion, circumvestientes foetum, sunt in ovo, unde foetus prodit) ne utero veluti fungus adnascatur & ad nata firmiter hæreat cum suis vasis umbilicalibus: Tertio mense ne sanguis convenienter depuratus deferatur per arterias umbilicales in foetus corpusculum, aut etiam detineatur & restagnet in Placenta ipsa ad ejusdem perniciem, impedita quoque plurimum sanguinis per venam umbilicalem remeantis circulatione. Quarto tandem mense præter hæc, etiam alimenti defectus accedet, ob superincumbentis placenta ab inutilibus humoribus obstructa ac tumefacta gravamen, nec non uteri ad sui expansionem, ceteroqui pro grandiori foetu summopere necessariam, non exiguam resistantiam, imo evidentem repugnantiam ut scite etiam advertit idem Hippocrates *Lib. de sterilibus & Lib. de natura muliebri*.

Neque vero quis hinc existimet, perpetuo in his futurum abortum uno vel altero ex memoratis mensibus, ab ejusmodi crassis & viscosis succis: nam Hippocrates non nisi ex conditione loquitur *si mediocriter carnosæ abortierint* & nulla alia causa pateat, ob quam abortus

tus acciderit, sive externa sive interna, asserit esse acetabulorum à mucosis humoribus oppletionem, ut propterea hoc Aphorismo, occultam causam talis abortus aperiat, cui prudens Medicus caute oppituletur, & opportune succurrat, vel saltem in posterum succedentibus conceptibus, illam præcaveat, ne simili infortunio immature delabantur: Hinc Aphorismus quoad causam est diagnosticus, & quoad abortum prognosticus.

Mucosi autem isti humores, plerumque in gravidis gignuntur à mala victus ratione, qua ipsæ utuntur cum & cibariis non raro vescantur acerbis & crudis & potionibus largioribus ac gelidis intulgeant.

Quomodo tandem acetabulorum uteri laxitas, ac mucositas, dignosci & curari possit, docuit idem Hippocrates *cit. lib. 1. de morbis*, & lib de natura muliebri.

Ab acetabulis mucore oppletis aliam deducit, in hoc Aphorismo Hippocrates abortus causam, quia inquit: *illa non possunt ex pondere foetum continere, sed dirumpuntur.* Siquidem cum acetabula viscosis & lentis humoribus opplentur, non tantum mollescent plus justo & relaxantur, sed tumescunt & gravitant, unde facile simul cum placenta dissociantur ab utero, adeoque foetum eidem annexum sustinere nequeunt, quin imo nimio pondere superincumbentia, illum jam primis mensibus tenellum, suisque secundinis inclusum comprimunt & suffocant; adultum vero in cæteris præ mollietate, & nimia laxitate, firmiter utero alligatum continere non possunt, ut exemplo fructuum suis pediculis arboribus adhærentium perbelle equidem docuit Galenus 4. Aphorismorum Comment. primo.

Quæres 1. Quodnam sit signum istius mucoris in uteri acetabulis? *R.* Quod circa menstruum tempus per aliquot dies prodeat ex utero.

Quæres 2. Quid in tali casu faciendum sit Medico? *R.* Gravidam lenibus hydroticis uti jalapa epicratice esse expiandam, & lenibus quoque exiccantibus tractandam, purgato enim ante conceptionem corpore cacochimico multa præcaventur gravidarum symptomata.

Quæres 3. An adhuc aliqua præter eas in contextu recensitas sint hujus abortus causæ? *R.* Cum Galeno *Lib. 3. Epidem.* & Hippocrate *Lib. de morb. mulierum*, morbus gravis præsertim acutus, lumborum do-

lor, erysipelas uteri, vehemens animi vel corporis motus, ira, timor, maror, Archeus enim turbatur talibus pathematibus, casus, elevatio ponderis gravioris, vociferatio, membri distensio, saltus, brachiorum nimia elevatio & extensio, magnæ evacuationes, diarrhææ, disenterix, hæmorrhagiæ, à natura vel medicamento excitatæ &c.

Aphorismus XLVI.

Quæ præternaturam crassa non concipiunt, iis uterios ab omento comprimitur, & priusquam extenuentur, non concipiunt.

Contentum seu Intentio.

De Sterilitate obesiorum.

Connexio: Cum de extenuatione corporis, quæ ad conceptionem sustinendam est inepta Aphorismo quadragesimo quarto egisset: In hoc præfente quadragesimo sexto agit de crassitie alio scilicet conceptionis impedimento, eoque longe validiori. Hic Aphorismus in duas partes dividitur: In *prima* dicit crassas præternaturam non concipere: In *secunda* causam ejus reddit.

Ostendit ergo Hippocrates non modo extenuationem inmodicam sed & crassitiem impedire generationem, unde qui prolem amant, neque nimis extenuatus valde pingues uxores seligant, nam ut supra diximus, extenuatæ concipiunt quidem sed perdunt, at valde crassæ, nec quidem concipiunt, saltem ut plurimum.

De his ergo obesis in hoc Aphorismo differit Hippocrates atque in illis causam exquirat, ob quam causam concipere non soleant: Etenim haud quaquam simpliciter asserit, illas non concipere, cum & aliquando, ut mox innuimus, concipiant ac salubriter pariant: Sed solum edocet, unde sterilitatem in illis conicere possimus, si ceteroqui bene valentes, citra quameunque causam manifestam steriles observentur: hinc non abs re addit, *non concipiunt utero*, ut nimirum ab utero solum hic causam deducat. Et quamvis sterilita-

tis causæ, plures aliæ esse possint, de quibus idem Hippocrates lib. *de sterilibus* hic tamen illam duntaxat memorat, quæ ex habitu corporis dependet, pari ratione ac de cæteris habitibus antea meminerat.

Quoniam verò corporis habitus crassus seu obesus, duplex esse potest, ut docet idem Hippocrates *cit. lib. de Sterilibus & de superfatatione*, atque etiam advertit Galenus *in Commentar.* alter ex propria natura, alter ex vitæ ratione, distinguere sane oportebit, de quo speciatim sit hoc loco intelligendus Hippocrates. Et quidem à *natura crassa seu obesa*, non semel sed iterato concepisse ac vitaliter peperisse visæ sunt, fatagente nimirum natura, ut partes corporis universæ convenienti mole ita construantur & increcant, ut altera alteram in suis operationibus non impediat: At verò quæ supra modum & citra naturalem constitutionem pinguiore evaserunt, puta a ciborum ingluvie, potibus immoderatis, somno, otio & similibus præternaturam obvenientibus, difficulter concipere consueverunt; quam eandem sententiam clarius idem Hippocrates expressit *cit. lib. de superfatatione* his verbis: *Mulier quæ præternaturam crassa est ac pinguis, & pituita repleta, non concipit hoc tempore; quæ vero ex natura talis est, horum gratia concipit, si non aliud quidpiam ipsam impediat.*

Quamvis autem totius corporis obesitas conceptioni promovendæ impedimento esse possit, ob nimiam vasorum exilitatem, & sanguinis crassitiem, speciatim autem illi officit, partium in abdomine contentarum, & præcipuè omenti immoderata pinguedo: id enim sua natura, in cunctis animantibus, multa pinguedine refertum, longè admodum corpulentius & pinguius in obesis foeminis evadit, unde fit ut ingenti mole, non tantum tumeat & elongetur, sed plurimum quoque subjecta viscera aggraveret & comprimat; cumque inter hæc uterus sit, plane præ cæteris, si potissimum emineat, ejusmodi patitur incommodum, adeoque feminis receptioni, retentioni & conceptioni ineptus evadit, neque solum, ut hîc Hippocrates recenset, ab illius internæ valvæ compressione, quasi vero hac de causa fecundantis feminis vim atque efficaciam, is excipere non possit, cum & undique comprimatur & coarctetur, sed etiam ex eo, quod ovarium in ipsis, multa pinguedine oblitum, neque grandescere

neque per tubas in uteri cavum elaboratiora ova deponere possit, quemadmodum experimur in gallinis, quæ plus justo pinguiore reddita, ova nec gignunt nec pariunt: Constat insuper in obesis sanguinem, majori ex parte in pinguedinem verti, nec tam vividum esse, ut in gracilibus, ita etiam testatur Aristoteles *Lib. 1. de generatione cap. 8. & lib. 2. de part. animal cap. 5* Subdit tandem Hippocrates, id illis accidere, priusquam extenuatae fuerint, & quidem sive medicamentorum usu sive alimentorum inopia: quod late edocuit, lib. de natura mulieri inquiring; *si præter naturam crassa facta fuerit mulier, non concipit in ventre, nam omentum multum & crassum incumbens, uteros deprimit & genituram non suscipit: Hanc igitur attenuare oportet, & medicamentum per inferna purgans bibendum dare: uteris vero apponere, quod illos purget & flatus inducat.* Hinc edocemur foeminas ejuscemodi obeso corporis habitu præditas, ut ad conceptionem & generationem disponantur, oportere prius extenuari, atque in meliorem & moderatiorem statum reduci, non solum victu frugaliore & vim extenuandi habente ipsis indicto, itemque exercitiis, cursibus, laboribus, lecto duro, vigiliis, curis, consuetis evacuationibus, sudoribus & aëris tenuioris incolatu, sed etiam medicamentis crassos & glutinosos succos incidentibus, atque per alvum, & urinam potissimum evacuantibus, iisque pariter, quæ uterum repurgent & capaciorem reddant: quamvis ista aliquando etiam opportune præstita, non sufficiant nec satis esse soleant.

Verum Hippocrates *Lib. de superfætatione*, ut obesæ mulieres fertiles reddantur, hæc etiam à viris exigit, ut non sint ebrii neque vinum album bibant, sed quod fortissimum ac meracissimum est, itemque edulia fortissima, & calida non lavent, robusti autem sint & sani & à cibis abstineant ad rem non conferentibus, & ubi marem generare voluerint, mensibus desinentibus aut defectis misceantur, & quam penitissime intrudant, donec desæviant; In idem facit quod idem Autor edocet *Lib. de aëre aquis & locis*, ubi crassas mulieres (quales Scythas esse ait) non concipere subdit, quia os uteri propria pinguedine ita coarctatur, ut nequeat suscipere aut admittere semen.

Quæ denique sint in universum ad concipiendum aptiores vel ineptiores, idem Author edocuit *2. Lib. prædictionum*, inquiring *parva ad conceptionem præstantiores sunt majoribus, tennes crassis, alba rubicundis,*

dis, nigra lividis: qua item venas conspicuas habent meliores sunt, quam quibus non apparent: carnem autem uberiores habere, anicula malum est: mammis autem tumidas & magnas bonum. Conferenda his quoque erunt, quæ idem Author late congerit, in pluribus aliis locis, præsertim vero 1. de morbis mulierum, de natura muliebri, & lib. de sterilibus, unde plurima quæ conceptionem retardare, & promovere possunt, quisque utiliter deducet.

Objectiones & difficultates in contextu sunt solutæ.

Aphorismus XLVII.

*Si qua parte uterus coxæ adjacet, suppuraverit, linamentis concerptis curetur necesse est. Vel
Si uterus in coxam vergens suppuratur, necesse est linamentum seu emmoton fieri.*

Contentum seu Intentio.

De Abscessibus Uteri.

Connexio: Postquam in præcedentibus Aphorismis Hippocrates multa de affectibus prægnantium dixisset; In hoc præsentis Aphorismo, peculiare vitium affert uteri, quod ad ipsius uteri inflammationem sequi potest, nempe ejusdem suppuratio, ea quidem parte qua alligatur coxæ.

Hic Aphorismus ob simplicem conclusionem non dividitur. Verum non unius, sed multiplicis dissensionis causam præbuit expeditoribus hic Aphorismus. Sunt enim, qui volunt, non fuisse hoc loco reponendum. Alii nullatenus uterum in coxam vergere posse contendunt. Alii rem nimis vulgarem, & lippis & tonsoribus notam continere autumant, veluti ad curationem suppurationis ejusdem pertinentem. Reliqui interpretes demum omnes sensum illius, in varias & diversas sententias ita distrahunt, ut non tantum mentem Hippocratis nullatenus assequantur, sed nec quid voluerit, per ipsum edoce-

edocere percipiant, quin potius alter in alterum conviciis & exprobrationibus invehatur, præsertim, ut exponant dictionem illam linamentum quod græcè *Εμμοτον* scriptum est: Verum nulla erit in Aphorismo difficultas, si Anatomiam & experientiam attendamus.

Et quidem licet ipsemet in illorum sententiam non iverim, qui putant uterum loco moveri posse, cum satis notum sit, eum quatuor ligamentis, iisque validissimis alligari, quia tamen ex his, anteriora ligamenta in inguina, adeoque in utramque coxam protenduntur, facile fit, ut alterutrius oppletionem, tumefactionem, relaxationem, aliove simili morbo procumbat in alterutram partem, & tumorem atque inflammationem ibidem pariat, transpositis unà simul exinde diversi generis excrementis, præsertim ex impuro sanguine, forsan nec invenienter per menses repurgato, procedentibus: Quamobrem fieri subinde potest ut postmodum ibidem stagnans sanguis, in fermentationem indebitam deducatur, computrescat & suppuretur, & simul etiam uteri substantiam putrefaciat. Rectè igitur dicit Hippocrates: *Si uterus in alterutram coxam vergat*, à delapsu scilicet vitiosorum humorum necesse est *Emmoton* fieri, à supuratione ibidem contracta.

Sed quid pro *Emmoton* intelligere voluerit, in hoc adhuc graviora sunt interpretum litigia; siquidem inter sese nullatenus conveniunt. Alii asserunt, quod vox ista *Emmoton* significet, aut cavum ulcus & profundum è quo pus emanat. Alii *linamentum* interpretantur medicamentum liquidum quod penicillis conceptum, seu ex linteis aliquando rasis conceptis, aliquando tortis quandoque ex *Elychnis* (gallicè *de la cherpie* vulgo à Chirurgis corpei dictum) confectum, Seu (ut alii) curationis rationem quâ profunda ulcera curantur. *Linamenta* autem seu *Emmota* fiunt in diversa forma; nam quandoque ejusmodi linamentum seu *Emmoton* est rotundum, quandoque oblongum & teres, & hoc medicamentis illito cavitas ulceris vel etiam vulneris ad mundificationem impletur; Quamvis autem si abscessus seu suppuratio uteri sit interna, longè melius sit, per metrenchyta seu clysteres aut injectiones uterinas eandem curare, cum vix ullo modo linamenta ad uterum pertingere possint ob vaginæ uteri longitudinem & constrictionem; Licet alii sint, qui his negent suppositum, quod per vaginam ejusmodi vomicæ seu ulce-

ulcera aut abscessus curari debeant, sed extrinsecè quando ad coxam circa inguinis partem fit abscessus, qui per vaginam curari non debet, sed extrinsecè, in qua parte tumores, sine capitibus, magni ac rotundi, ante omnimodam suppurationem aperiri minime debent, quia uteri collum à sanguine menstruo retento sæpius ejusmodi tumores patitur, qui si præcociter aperiantur, mulieres in summum vitæ periculum præcipitantur.

Verum enim vero auditis & discussis interpretum nostrorum super hoc Aphorismo ejusque verborum litigiis, nolim tamen ego ullatenus Hippocratem cum Hippocrate interpretari, is enim *lib. de Articulis*, & Galeaus in *comment. 3. 55. ejusdem libri* inquit, qui ulcus cavum & excusum ex suppuratione contraxerunt, quod scilicet curationem per linamenta expostularet, *Emmotos* appellat, ut propterea hinc deducere fas sit *Emmoton* fieri uterum, cum in coxam vergens, suppurationem subierit, quoniam inde necesse est ulcus cavum & sinuosum seu fistulosum exoriri, quod non nisi penicillis, seu pessariis, ex conceptis & contortis linteis tractari & curari potest, non autem manu aut digito propter profunditatem & uteri situm.

Itaque voluit potius Hippocrates hoc Aphorismo Medicos docere, cujusmodi sit ex uteri suppuratione futurum ulcus, non autem curationis methodum, aut medicamenti genus, quod pro curatione ipsa sit adhibendum: nam præterquam quod istæ non videntur hic opportunè aut convenienter memorata, sunt plane omnino indigna, ut inter Aphorismos recenseantur, ut proinde Aphorismus dici debeat prognosticus potius quam curativus aut methodicus. Cæterum istiusmodi ulceris curationem proponit idem Hippocrates *libro de superfætatione*.

Quiscunque demum plura de his litigiis hunc Aphorismum concernentibus, interpretum, legere aut audire velit, legat Cardanum, in *Commentario* hujus Aphorismi, qui variis & argumentis & convitiis in illos invehitur, præsertim autem Galenum & Fuchsum, inquit enim, *quinque sunt, quæ celebrem efficiunt virum; multarum rerum cognitio: Studium assiduum: Inventio: Iudicium: & sæculum felix: Fuchsius duo defuere, inventio & Iudicium, cum & ipsum Principem puta Hippocratem lacerare ausus, sic ut non causam sed homines odisse videatur.*

Hhhhh

At nos

At nos (inquit ulterius) Galenum arguimus, non ignorantia (ut fecit Fuchsius) non mali iudicii, non levitatis, non mendacii, sed negligentia atque ambitionis, a quo peccato, nullius, qui res ipsas respiciat, iudicio, liber esse potest: Dissertationem pulsus & Aphorismorum commentaria, scimus, esse potius furtiva infelicia quam libros suos: quae tria quoniam exigebant peculiare studium, quod ob artis exercitium praestare non potuit, &c. Reliquae difficultates in contextu sunt solutae.

Aphorismus XLVIII.

Fœtus, mares dextra uteri parte, fœminæ sinistra magis gestantur.

Contentum seu Intentio.

De notis gestati sexus in gravidis.

Connexio: Hic præsens Aphorismus connectitur cum Aphorismo 42. huius libri, in quo docuit Hippocrates per colorem dignoscendi sexum adhuc in utero existentem: In hoc præsentis aliud adhuc signum dignoscendi sexum in utero declarare nititur.

Hic Aphorismus in duas partes dividitur *Prima* de maribus in dextris: *Secunda* de fœminis in sinistris gestatis concludit.

Sententiam hanc veluti à vetustioribus communiter receptam placuit Hippocrati, inter Aphoristicas referre, utque illam non perpetuo veram designant, non irrationabiliter addidit adverbium *magis*, cum non semper mares in dextra, & fœminæ in sinistra uteri parte gignantur; Licet id ratum omnino fuerit Anaxagoræ & Empedocli, quos tamen redarguit Aristoteles *Lib. 4. de Generat. animalium cap. 1. & 7. de Hystor. eorundem cap. 3.* At vero huic sententiæ conatus est Hippocrates adicere rationem 2. *Epidemior. sect. 6. & 6. Epidem. sect. 4.* Item Hippoc. *de natura pueri & Galenus 14. de usu part. cap. 7.* illamque referre in vigorem & calorem partis dextræ, sinistræ præpotentioris unde etiam semen in dextro teste contentum vividius & efficacius quoque existimavit: quam obrem *Lib. de Superfatione* consulit ad gignendos mares conferre plurimum, si sinister testis obli-

obligetur, ut totum semen in concubitu e dextro, non é sinistro in uterum effluat; quin & cuncta viscera, in dextra corporis parte posita, cæteris robustiora existimavit: *cit. 2. Epidem.* inquires, *secundum naturam, plurimam vim habet mamma dextra, oculus dexter & quæ intra sunt hac parte.*

Vérum ista non tanti sunt, ut contrarium sæpe numero minime successurum evincant, cum sæpissime sit expertum, & fæminas & mares indifferenter genitos. & gestatos fuisse, in alterutra uteri parte, quo factum ut plerique Medicorum in præfagiendis ejusmodi partibus, non sine eorundem derisu, falsi fuerint, hoc Aphorismo confisi. Neque præterea verum est, fœminas in generatione semen effundere, quod cum semine maris commixtum, pro varia utriusque vi atque efficacia, modo masculum, modo fœmellam efformet: Nam ex Anatomia satis superque jam constitit, illas non nisi ovum suis pelliculis obvolutum, in quo rudimenta fœtus præjecta manent in uterum deponere: Mares vero suo solum semine illud fœcundare, atque in motum & expansionem membrorum adigere, ut alibi jam explicavimus.

Si itaque contingat, ex ovario abruptum & semotum ovum in uterum deponi, per dextram & sinistram ejusdem tubam, quod jam masculini sexus dispositionem fuerit præsortitum, atque à robusto semine maris fœcundatum, masculus orietur, contra verò fœmella, nihilum ad hoc conferente loci conditione, dextra vel sinistra, cum utraque & pari calore & non dissimili venarum ac articularum propagatione foveatur. Fortè autem accidit, ut ova vividiora meatus latiores, & dextra uteri pars robustior evaserint, quia universa pars dextra corporis, brachium, latus, crus, pes, horumque muscoli, veluti magis exercitata, grandiora, agilia, & in omnibus operibus efficaciora præ cæteris fuerunt: Hinc levis omnino est conjectura illa, quam plerique deducunt, à pondere, motu, calore alterutrius lateris, ut fœtum masculinum, aut fœmininum in utero gestari præfagiant, sicut & aliæ plures ad hoc idem à pluribus aliis adhibitæ, utpote quæ falso innixæ fundamento sæpissime fallant. Porro non irrationabiliter credere est, plurima istorum quæ in Aphorismis continentur. licet in operibus Hippocratis scripta reperiantur, non fuisse tamen ab eodem, inter Aphoristicas sententias redacta, sed

ab aliis successoribus recollecta, huc illucque sparsim interposita fuisse.

Superest adhuc quorundam opinio, arguentes quod ob vigorem dextræ partis utpote magis robustæ, locatis Gemellis in utero mas dextram, foemella sinistram occupet, & à natura ita collocetur: Contrarium tamen observavit Brassavolus in propria uxore, quæ mares in sinistra foeminas in dextra tulit. Verum & hæc opinio, uti omnes aliæ non nisi probabiles sunt, egentes longe majori & experimentalis certitudine. Eiusdem quoque ponderis est sententia eorum, qui sexus distinctionem, è comparato temperamento conjugum aliquando divinare non edicere solent. Tandem & illi non nisi probabili innituntur fundamento, qui arguunt, si gravida circa hypogastrium male habeat, dolore, duritie, tumore, dextro affecto, marem, sinistro foemellam geri.

Reliquæ difficultates & objectiones solutæ sunt in contextu.

Aphorismus XLIX.

Ad secundas deturbandas, sternutatorio immisso, nares & os comprimito. Vel ut alii:

Ad pellendas secundinas, sternutationem inducito.

Contentum seu Intentio.

De secundina retenta.

Connexio: Cum supra Aph. 35. hujus libri Hippocrates præcepisset, bonum esse signum, si mulieribus hystericis aut difficulter parturientibus sternutatio superveniat: Ita nunc ad deturbandas seu pellendas secundinas, seu membranas, quibus foetus involvitur, si quando in utero remanent, eandem ope artis excitandam admonet, & quidem auxilio cunctis obvio ne scilicet illæ diutius intra uterum ab edito foetu detentæ, repurgandis indecrementis impedimento sint, ac mox putrefactæ, non tantum gravia inferant symptomata sed & mortem inevitabiliter, nisi penitus depellantur.

Hic Aphor. in duas partes dividitur: In prima præcipit secundinas

nas esse expellendas: In *secunda* remedium & modum remedii, id est sternutationem & quomodo sternutatio facienda sit edocet, nempe quod immisso sternutamento, os & nares comprimi debeant,

Naturâ autem comparatum est, ut ad maturitatem perductus foetus, jam jam se partui accommodet, ac deorsum in uteri valvam procumbens, disruptis jam spoliis, proprio nisu, & ipsius parturientis valido conatu efferatur in caput, mox verò secundinæ procident, cum sanguineis superfluitatibus: quamquam, & non raro accidat, simul una foetum, suis obvolutum involucris in lucem prodire.

Sunt autem ista involucra in hominibus *Amnios & Chorion* cui annexa est placenta uterina, vasa vero umbilicalia sunt duæ arteriæ, una vena, sed major, & urachos. Quoniam vero in umbilici, seu umbilicalium vasorum resectione, non levis error quandoque, ab obstetricibus committitur, puta, si intempestivè, si inæqualiter, si non debito modo aut loco resecantur, proinde fit ut illa retracta atque contorta in uteri cavitationem revolvantur, aut etiam fortasse dirupta, secundum partes utero alligata remaneant, unde postmodum incommoda plurima, imo manifestum vitæ periculum: At verò neque salubriter egeruntur, si primo loco & ante partum prodeant, exarefacto nimium utero, ab intempestiva illarum ejectione.

Cum itaque contingit illas à partu detineri, omnis industria adhibenda est, ut quo citius fieri possit, expellantur, in quam rem plura solent a Medicis commendari non tantum ad deturbandas secundinas, sed etiam ad expellendum foetum mortuum; verum hoc loco ab Hippocrate proponitur facilè efficax & promptum auxilium ab incusso sternutamento desumptum, etenim per sternutationem totum corpus vehementer concutitur, ad expulsionem ejus, quod nares & processus mammillares molestat, atque proritat, excujus vehementi concussione uterus non leviter commotus, facillime deponit, quod interius reconditum eique alligatum est.

Sed quid est, quod Hipp. in hoc Aph. vult observandum, ut imposito sternutatorio nares deinde apprehendantur & os claudatur? Neutiquam plane, ut à plerisque putatur, quia detentus spiritus per oesophagum inferius protruditur, & uterum comprimens, ad sui exonerationem, & foetus depositionem, eundem compellat:

Hoc enim nullatenus crediderim, cum neque aër per eas partes

ferri, neque eo delatus, vim aut impulsum utero tribuere possit. Existimaverim proinde potius, impetum ea industria afferri majorem pectori, ac Diaphragmati, quod propterea majori expansione comprimat, & impellat subjecta viscera, præprimis autem uterum mole sua, & a retentis secundinis tam turgidus; quin & obturatis naribus & ore, vis medicamenti sternutationem promoventis penitus se inserit, atque non tantum nervos, per nares diffusos, sed etiam qui è vaga conjugatione promanant, vehementius laceffit, atque motum quendam fere spasmodicum, per subjecta viscera, & uterum ipsum excitat, quo tandem detentæ Secundinæ extrudantur: neque enim sternutatio levis motus concussivus est aut naturalis sed violentus ac præternaturalis, saltem à causa irritante & vellicante Meninges, ut quod noxium est, & cerebro infernum, expellatur: quamobrem Galeno 2. de *Symptom. causis cap. 3.* dicitur quidem sternutamentum promotum à natura, sed non sine vi atque irritamento causæ morbosæ excitatum, ut præterea aliquando acciderit, ex quadam pestilentia, ægrotantes iteratis sternutationibus infelicitè periisse, quippe quæ designabant causam illarum adeo malignam & deleteriam ut non solum naturæ expellenti minime cederet, sed cerebrum ipsum, prava contagione depravaret, ac tandem in exitium deduceret, unde existimo non fuisse vanam historiã, ex qua nata est consuetudo, ut sternutantibus soleamus DEI auxilium imprecari.

Quibus denique medicamentis, id peragi debeat quamvis hoc loco Hippocrates non explicet, alibi tamen illa describit, ex pulveribus nasturtii, Ellebori albi, piperis, synapis, pyrethri, nigellæ, & similibus acrium medicamentorum, tenellas narium membranas, ac meningis ipsas cerebri proritare valentium; quod nunc nostra ætate usu Tabaci passim fieri solet, adjecto præsertim, si libuerit, modico pulveris cyclaminis leni calore siccati, atque ad clibanum leniter torrefacti: Sunt etiam succi herbarum, qui id ipsum potenter efficiunt: Sed & Hippocrates ipse potiones quasdam exhibet ex succo artemisiæ expresso cum vino albo, quod efficacissimum remedium est ad expellendas secundinas, foetumque mortuum; Dictamnium quoque Creticum & album, fæcula Bryoniæ, borax mineralis, extractum granorum chamæactes & alia hujus generis plurima in idem conferunt ut apud Medicinæ Practicos passim legere est.

Reliquas difficultates & objectiones videsis apud Authores; præsertim autem Cardanum, qui variis argumentis impetit Galenum, quæ apud eundem quisque legere potest; multa enim affert de sternutatione & tussi, quæ aliis in locis, convenientius & à nobis & ab aliis dicta sunt.

Aphorismus L.

Mulieri si velis menstrua sistere, cucurbitulam quam maximam ad mammas appone.

Contentum seu Intentio.

De Cura mensium immodicorum.

Connexio: Cum Hippocrates in priori Aphorismo edocuiſſet remedium educendi Secundinas, illudque commune ad educenda omnia muliebria nempe sternutamentum: In hoc præſenti Aphor. docet contrarium, nempe remedium sistendi menstrua & muliebria.

Hic Aphorismus ob simplicem conclusionem non dividitur. Maximum, quod Fautrix natura mulieribus ad salutem largita est, auxilium, catameniorum seu menstruorum muliebrium est lunari revolutione repurgatio, quæ, non aliter ac in reliquis consuetis evacuationibus, debitam quantitatem, & convenientem modum servare debet, ut juvet & nullatenus obsit, siquidem omne nimium Naturæ inimicum est, iisque plus justo fluentibus morbi eveniunt, ut dicitur ab eodem Hippocrate, hoc præſente *lib. 5. Aph. 57.* Et quidem aliquando ita immodice fluunt, ut exanimes non raro deferant mulieres, vel saltem illas in pessimas agridudines deducant, puta, cachexias, hydropes, apoplexias, Epilepsias, syncopes &c.

Dicuntur autem immodice fluere, vel cum singulis mensibus, servata temporis opportunitate ad certos dies affluenter erumpunt; vel cum continuatis diebus, nulla vel modica intermissione data profluunt, ut in profluvio muliebri, quin & aliquando, non sine molestiis, torminibus, præcordiorum anxietatibus: Verumtamen in utrisque purus & syncerus sanguis egeritur, nam si forte serosus aut Lym-

Lymphaticus, aut etiam mucosus & albicans apparet, vel si loco sanguinis perpetim expurgetur Ichor, sanies, aut pallidus humor, ut in fluore muliebri, sicuti evacuationes istæ per uterum nullum sanguinis vestigium referrent, ira nec ad immoderatas ejusdem evacuationes neque ad sententiam hanc Aphoristicam pertinerent, in qua solum immodica mensium quantitas, non qualitas consideratur. Prætereà, quia multum & paucum ad aliquid referuntur, attendenda quoque erit cujuslibet menstruantis mulieris constitutio & habitudo corporis, itemque consuetudo, & mos excretionis, vita antea acta & id genus alia: nam succiplenis, otiosis, opiparis, vinosis, largior semper esse solet ejusmodi expurgatio; contra vero parciore, excitationis, debilibus & frugalem vitam ducentibus. Hinc pleræque solent ad integras hebdomadas menstruari, citra ullum vitæ commodum, imo salubriter; aliæ vero vix uno vel altero die.

Contingit autem istiusmodi mensium immoderata evacuatio, aut vitio sanguinis, aut vitio vasorum uteri, unde is effluit: & quidem vitio sanguinis, si ex propria sui constitutione, ac natura, plus justo per id temporis quo in motum & exitum adigitur, in suis particulis vividioribus, & volatilibus turgat, & ampliorem locum exquirens, facta in eum impetuousa irruptione, diffundatur; vel si adepta, a non bene repurgatis sui recrementis, ac redine latiore vasorum Anastomosim sibi faciat, ac factam occludi non permittat.

Quam vero veteres inculpabant plethoram & immodicam in vasis sanguinis superabundantiam, quis unquam eo modo qua illi admiserit? si præsertim consideraverit sagacem naturæ solertiam, quæ sicut in necessariis non deficit, ita nec in superfluis abundat, nisi ex accidenti, aut quia vasa reddita sunt incapacia, aut quia non mole seu quantitate, sed Euphoria seu tolerantia ac orgasmo seu turgentia, ab intruso chylo fortassis energetico seu exagitato, & particulis plus justo mobilibus saturo, tumultaria commotio, in eodem excitatur, cum turgentia, seu potius vehementiori fermentatione, ut proinde vasa ampliora fieri necesse sit, & tantum non disrumpi; quod & aliquando contingit, non solum in apicibus ac osculis articularum, aut venarum, verum etiam in ipsis meatibus & glandulis, si præsertim aliqua de causa flaccescant, aut laxiorem naturæ sortitæ sint structuram.

Atque

Atque hinc alterum in eruptionibus immoderatis vitium exurgit, ex defectu vasorum uteri, vel ut plus justo laxa, distenta, aut aliter male affecta, facile aperiantur vel etiam ut erodantur & difficulter nimis deinde coarctentur. Seclusa ergo cujusvis alterius humoris, quam sanguinis evacuatione, undecunque illa proveniat, consulit hic Hippocrates, in omnibus immodice fluentis sanguinis vitiis, cohibentia, & sistentia medicamenta esse adhibenda, è quorum numero nunc speciatim meminit cucurbitularum veluti quæ externe adhibitæ, citra magnum corporis incommodum, & absque eo quod humores & sanguis ipse, interius perturbentur, aut alterentur, prompte ac faciliter fluentem sanguinem sistere possunt. Neque vero verendum est, quod vitiosus, acris, aut acidus fortasse sanguis, intra venas & arterias detentus, viscera ipsa inficere, & alios morbos excitare possit; siquidem in his longe magis prævalet desumpta indicatio, ab immoderata sanguinis evacuatione, unde vires, repente concidunt, ac syncope & mors certo certius imminet; Ab immodica namque sanguinis effusione, cujusunque conditionis ille sit, aut undecunque effluat, effractis viribus, partes cunctæ corporis collabuntur atque interrupto cordis & arteriarum motu, vita ipsa deficit: Ut autem hanc evacuationem, ab aliis excrementorum expurgationibus sejungeret Hippocrates, illamque non alterius morbi ratione, vi aut violentia inductam sed consueto tempore, & cum debitis circumstantiis prodeuntem, per catamenia speciatim designavit, quæ non nisi comprehendunt menstruam per uterum purgationem, eamque opportunam, convenientem, & salubriter à natura institutam, ut corpora fæminarum à suis impuritatibus repurgentur, & uterus veluti per ipsam irroratus, & ablutus, ad fæcunditatem, conceptionem & generationem sit dispositus: unde si contingat excedenter fieri, & ultra id quod usus postulet, cum vitæ perniciæ, consulit esse cohibendam: quamobrem non immerito inquit, *si velis cohibere*: id est si plus justo fluant, atque ex immoderato profluvio, expediat prohibere; nam id velle debet prudens Medicus, quod rationabiliter agendum expedit, ne ab evacuatione, quæ cæteroqui salutaris esse solet, in morbum aut vitæ periculum patiens adigatur, quemadmodum in catameniis immoderatis non raro mulieribus accidit.

Ea propter admonet cucurbitulam magnam ad ubera esse appo-

nendam, tum quia hoc medicamento genus, prompte potest adhiberi, ne fluenti sanguini induciæ præbeantur in vitæ perniciem, tum quia apud veteres frequens erat illarum usus, ut deducitur ex eodem, *Lib. de Prisca Medicina & de Medico*: tum etiam quia medicamentum est de genere eorum, quæ extrinsecus adhibentur, & momento fere temporis opitulantur, unde Avicenna 2 r. 3. tract. 3. cap. 4. *Ventosam magnam* (inquit) *sanguinem in una hora retinere*; & licet unius, sed magnæ cucurbitulæ, hic meminerit Hippocrates, ut exinde maxima sequatur ad mammas retractio, & vasorum inde perreptantium compressio & constrictio, nihil tamen vetat, quin etiam plures & minores admoveri non possint, si fortassis major & amplior timeatur: atqui cum ad mammas, hic dicat & 2. *Epidem. Sect. 6.* (unde Aphorismus hic forsan desumptus est) scriptum sit, mulieribus menstruis cohibendis, cucurbitulam maximam adhibendam, ansa plerisque data est, num supra vel infra mammas admovendæ illæ sint. Et quidem Galenus in *hoc Comment.* & Avicenna *cit. loco*: infra & sub mammas interpretantur, ubi venæ mammaria cum uterinis conveniunt, & majorem videntur inter sese inire consensum.

Verum ex hoc non recte evincitur, quamobrem non etiam supra mammas illæ possint admoveri, præsertim cum consensus hic non per venas, sed per arterias potius habeatur, ut ex anatome jam satis constitit, quin imo sanguis, post detectam ejus circulationem, per arterias ad uterum defertur, non per venas quæ deinde in hepar omnes continent. Attamen notabilis est observatio Joannis Ferdinandi Hertodii memorata in *Ephemeridibus Germanicis Anno 1 Obs. 6.* qua uteri cum mammis consensus apertissime detectus est. Sed & cunctis notum, à mammarum iterata & assidua contrectatione, uterum ad sui repurgationem sollicitari, unde etiam experimur, enixas à suctu lactis, atque à fomentis uberibus applicatis, plurimum juvari puerperiorum evacuationem, indeque etiam exoriri majorem in natos affectum, ac nutrimentum in suos lactantes, etsi non à se ipsis genitos, parem matribus amorem ac benevolentiam, à frequenti ac diuturna, per illos mammillarum contrectatione & suctione, ob quam voluptuosam illæ in utero percipiunt sensationem. Hinc quoque fit, cur ad unius defectum, altera evacuatio promoveatur, & supervenientibus menstruis lactis profusio diminuatur aut etiam desinat.

Cæterum cum occasio tulerit,
ut

ut ad mammas cucurbitulæ sint apponendæ, convenientius longe erit, atque securius infra non supra mammas, illas admoveere, ne subinde mammx ipsæ tumefiant aut inflammentur, non sine graviore periculo, neque insuper scarificentur, ne ulcera exinde oriantur, quæ pectori & costis plurimum officerent. Per id temporis vero, quo cucurbitulæ mammis admoventur sunt qui velint etiam obligandos esse poplites cum brachiis, subjecta iisdem lana, forte quia per has ligaturas, sanguinis motus aliquantulum impeditur, ne vehementius per corpus excurrat. Unde idem Hippocrates 6. *Epidem.* 7. docuit: *Sanguinis venarum suppressiones faciunt animi deliquium figura alterata, interceptio, linamentum intortum, appositio, ligatura.* At utilius erit iis interea medicamentis uti, quæ sanguinem fluentem sistere valent, quemadmodum ex Galeno est succus plantaginis, & in praxi sunt in usu pulveres ex Cornu Cerviusto, coralliis rubris, bolo armena, lapide hæmatite, colchotare vitrioli, croco martis adstringente, atque ab opiatiss innumera.

Quæres I. Cur antiqui antequam cucurbitulas applicabant, tam religiose prius corpus multoties purgabant? *R.* Tunc temporis, non nisi in summa necessitate & in deploratis applicabantur, hodierno autem tempore sapissime: Unde si toties corpus purgandum foret, indefinenter esset purgandum: præterea non subest ratio, imo irrationabile esset, si quis in summa uteri vel narium hæmorrhagia, aut ubi animi deliquia & syncopes adsunt, ante cucurbitularum applicationem purgare vellet.

Quæres II. Quot sint genera cucurbitularum? *R.* Duo: *oblongæ* quæ circulum habent angustum, ambitum parvum à Gallis *Cornets* dictæ & hæ trahunt à remotioribus partibus seu etiam internis: aliæ *latiores & concavæ ventosæ* dictæ & hæ magis ex cute tantum trahunt, & circa musculos per ambitum operantur: Hæ rursus sunt vel *maiores* vel *minores*.

Quæres III. Quod si cucurbitula applicata inducat spirandi difficultatem quid in hoc casu sit faciendum? *R.* Eam statim amovendam esse.

Dices: Hippocrates in fluxu mensium immodico ligat poplites & coxas pro sistendo sanguine, quod huic Aphorismo videtur contradicere? *R.* Hoc fieri propter sanguinis motum præpediendum & avertendum, ut nempe sanguis, qui ad uterum fluit, ad venas illas magnas,

per os sacrum & lumbos retrahatur: Hinc pessime sibi suisque patientibus consuluerunt practici, qui venas tali in simili casu & hac intentione secuerunt, longe melius & efficacius faciunt, qui venas superiores seligunt.

Aphorismus LI.

*Qua uterum ferunt, iis uteri os connivet, (vel ut alii)
qua utero gerunt, iis uteri os comprimitur.*

Contentum seu Intentio.

De Statu uteri in gravidis.

Connexio: Cum Hippocrates supra Aphorismo 41. hujus Lib. ex multis potu edocuiisset cognoscere gravidam mulierem: In hoc praesenti Aphorismo, ad eandem graviditatem cognoscendam aliud signum adfert valde notabile uteri oris conniventiam seu compressionem.

Hic Aphorismus ob nimiam brevitatem non dividitur.

Plura quidem à Medicis signa referuntur, quibus conceptio, atque uteri gestatio dignosci possit, sed pleraque admodum fallacia. Hoc autem quod ab Hippocrate proponitur hoc loco, quaquaratione fidelius videtur, eoque ductæ peritæ obstetrices, de graviditate certius solent vaticinari, si nimirum os internum uteri occlusum tetigerint, atque universam ejus regionem molliter tumefactam percipiant: Ea namque est Naturæ in omnibus suis operibus solertia ut quoad fieri possit, quod ipsa molitur, perficiat, & ab externis injuriis alterantibus tueatur, atque in suo robore custodiat & foveat, potissimum autem in hominis generatione, unde non solum foetum suis involucris obtectum, & utero circumvallatum à quocunque externo alterante tutatur, sed interno quoque uteri ore occluso, ab ambientis aëris aerumnis defendere satagit. Et quamvis insuper fatantibus aliquando hiare à plerisque sit creditum, id tamen ipse nulla ratione crediderim, sed potius quando hoc acciderit, præ nimia delectatione, ex iterato con-

concupitu leviter aperiri, ut vim prolificam foecundantis seminis interiorius admittat, pro nova alterius fetus conceptione, si forte alia, quæ à feminis suggeri debent, parata sint, & bene disposita ut etiam advertit Hippocrates *Lib. de superfatation.* Quod autem à Leoniceno scriptum est, *uteri os comprimatur*, melius ab aliis vertitur, *connivet*, *constringitur* aut *corrugatur*: Quippe re ipsa compressio nulla fit, sed sola interioris oris corrugatio & coarctatio, sed adeo stricta & occlusa, ut neque specillum admittat ut alibi Galenus adnotavit ex Herophilo 3. de naturalib. facultat. Cap. 3. Quamquam hæc pro varietate muliebrium constitutionum soleant, ac possint, non leviter etiam permutari.

Sed quomodo fit, ut nonnullæ adhuc post conceptum ad plures menses soleant menstruare, si uteri os internum occluditur? plane per alios ductus menstrua, per id temporis prodire manifeste deducitur ex anatomia, qua constat alias venas & alias arterias ad uteri cervicem protendi, unde sanguis tempore gestationis, prorumpit, veluti sunt venæ illæ, quæ hæmorrhoidas uteri non raro excitant, si glutinosiori & crassiori sanguine tumescant, & in suis valvulis distendantur, quemadmodum in varicibus; quod tamen rarum est. Postremo tumefactio ista uteri, ejusque oris occlusio in gestatione, longe admodum differt à tumoribus præternaturam, qui utero contingere solent, ut est scirrhus, phlegmon &c. nam in his tumet uterus cum duritie, & non raro etiam cum dolore, ac ingenti calore; in iis vero cum mollitie, & citra cujusvis sensationis molestiam.

Quæres: Utrum feminæ gravidæ pati possint fluorem album? R. Eodem modo prout in contextu de sanguine dixi, qui non ex utero sed aliis ductibus, sic pariter latex seu ichor in fluore albo, durante graviditate, affluens ex aliis extra uterum contentis ductibus vasis vel glandulis prodit.

Aphorismus LII.

Mulier gravida, si lac è mammis copiose fluat, fatum imbecillum significat: Si vero firma solidaque mamma fuerint, valentio rem fatum significat.

Contentum seu Intentio.

De Signis status foetus è mammis.

Connexio: Cum supra *Aphorismo* 37. de gracilitate repentina mammarum abortum significari dixisset: In hoc præsentè Aphorismo, aliud fætus debilis & futuri abortus à lacte ipso, è mammis copiose fluente argumentum & iudicium desumit.

Hic Aphorismus secundum duas conclusiones in eo contentas, in duas partes dividitur: Quarum *prima* docet copiam lactis in mammis, indicare fætus imbecillitatem: *Secunda* vero tradit firmitudinem mammarum fætus robur denotare.

Adnotat & rectè Galenus *in Comment.* non quocunque mense, ex prodeunte plurimum è mammis lacte, indicium imbecillitatis foetus esse desumendum, sed eo tempore, quo solet effluere: Lac autem in mammis comparere solet, circa postremos menses, cum jam fætus adoleverit; & licet in nonnullis illud observetur circa quartum mensem, forte quia robustiores sunt, & copiosiori alimento fruuntur, plerumque tamen non nisi post quintum vel sextum mensem, lac è mammis prodire solet. cum jam fætus per os sugere incipit contentum illum *in Amnio* liquorem. Hoc igitur tempore, si flavescentes mammæ lac effundant, fluidum nimis ac multum, fætum indicant fore imbecillum.

Debet autem lac multum & fluidum seu serosum effundi, nam si modicum & consistens exprimatur, valentioris foetus indicium erit; hinc *effluere* dixit Hippocrates, quod est sponte sua prodire, nulla adigente vi, mammas ad illius exitum comprimente; hac siquidem ratione indicatur lac serosum nimium esse, adeoque malum, ut signum & ut causa: ut *signum* quidem, quia inde arguitur, simili alimento nutriri, in utero fætum, quod cum inutile sit, & fluidum nimis, ad maturitatem illum perducere non poterit; ut *causa* vero quia lac non ex sanguine, ut antiquioribus creditum, sed à chylo provenit; hic vero effoetus, vapidus ac serosus plus iusto, veluti ex languidis coctionibus, malisque secretionibus dependens, non tam matri utero gerenti officit, quam fætui, cui in alimentum cedere debet; is autem seroso hoc & inutili alimento nutritus, necesse est, ut sensim elangueat, imo etiam superfluita-

fluitatibus aquosis opprimatur. Perperam autem putarunt veteres lac malum è mammis effluens, indicium esse fætus imbecilli, quia cum non nisi paucum sanguinem in sui alimoniam præ imbecillitate attrahat, majorem ejus partem in concoctum deferit, quæ ad mammas confluens in lac commutetur & effluat; alioquin si multum traheret, atque in sui nutrimentum converteret, modicus remaneret, ad mammas referendus, adeoque multum lac gignere non posset.

Hæc sane commenta sunt & falsis hypothefibus innixa, imo Anatomicis observationibus omnino contraria.

Cum dixerit præterea Hippocrates, in secunda parte Aphorismi, solidas mammas fortiolem fætum significare, procul dubio tacite quoque subintelligere voluit, non solum lac serosum nimis, & sponte sua effluxurum, sed etiam mammas ipsas flaccidas, ac nimium laxas esse oportere; fieri enim vix potest, ut lac multum serosum effluat, quin etiam glandulæ, quæ majorem in mammis structuram faciunt, laxæ quoque non sint, ut propterea lac ipsum continere nequeant, quem admodum etiam in lactantibus istius modi experimur: Sed neque *duras* dixit sed *solidas*, nam durities morbosam plerumque tumefactionem, ut in phlegmone & scirrho arguit: quamquam Celsus *Libr. 2. Cap. 7.* duras mammas cum solidis confundere non sit veritus, cum hunc Aphorismum referens dixit: *Mulier gravida, si lac è mammis profluit, imbecillum est, quod intus gerit; dura mamma sanum illud testantur.* Atque hinc fit, quamobrem Hippocrates, in hac secunda parte, nihilum meminerit, lactis multum fluentis sed solum dixerit, *si mamma solida* fuerint: siquidem in priori Aphorismi parte, cum lacte fluente tacite comprehensam quoque voluit mammarum laxitatem, ac flavescentiam; in secunda vero parte expressit mammarum soliditatem, nulla facta lactis fluentis mentione, quia illam implicite intellectam existimavit, nam subdit: *fætum significant saniolem*, per comparisonem scilicet, ad imbecillum antea memoratum; siquidem mammarum flavescentes & laxæ, lac serosum effundentes, imbecillum simpliciter fætum arguunt; solidæ vere licet lac pariter effundant, saniolem designant: at sanum profecto ostenderent, si solidæ simul forent, & lac non nisi expressum emitterent, illudque crassiusculum, unde robur mammarum lactificantium & alimenti perfectio ac elaboratio significatur. Porro lac, quod primum comparet prope partum, purum

purum omnino non est, sed colostrum dictum, quemadmodum appellavit Plinius & Phavorinus apud Gellium: hinc deducere fas est consensum uteri cum mammis, non per venas sed per arterias & nervos haberi, qui per glandulas vim & facultatem sibi invicem communicant, ut propterea non solum liquorum irrorantium energia, sed etiam partium componentium valida & firma constitutione fulciantur, & mutua ac reciproca affectione consentiant. Unde apprime fieri solet, ut lacte è mammis dicto supra modo effluente, roborantia fœtum sollicitè propinentur.

Quæres: Quomodo præsens Aphorismus differat ab *Aphor. 37.* quia *Aphor. 37. hujus Libri* de subita mammarum extenuatione agit: Præsens vero Aphorismus, de mollitie, quæ ex abundantia lactis fit; ideo ibi necessario abortus prædicitur, hic vero non necessario, sed fœtus imbecillitas.

Plures hunc Aphorismum concernentes controversias, si quis desideraverit, legat Cardanum qui fuse de hoc loquitur, & plures corripit commentatores.

Aphorismus LIII.

*Quæ fœtum sunt perditura, iis mammae extenuantur:
Contra vero dura si fiant, dolor aut mammas,
aut coxas, aut oculos, aut genua fatigabit, nec
abortiunt.*

Contentum seu Intentio.

De Signis fœtus è mammis comparatis.

C*onnexio:* Cum de robore aut infirmitate fœtus in priori Aphor. indicasset Hippocrates, ex mammarum affectione circa ipsum lac: In hoc Aphorismo præsentem, sursum in iisdem mammis, alteram assumit affectionem, gracilitatis vel durtiei.

Hic Aphorismus juxta duas conclusiones in duas partes dividitur: In *prima* dicit, ante omnem abortum extenuari mammas: In

secunda

secunda vero docet, duritiem mammarum non significare abortum, sed dolorem vel ad mammas, vel coxas vel oculos, vel ad genua.

Non tantum ergo à lactis fluentis copia & mammarum laxitate, foetum imbecillum fore præfagiendum, sed accedente earundem mammarum extenuatione ipsum aborsurum significari hoc Aphor. subdit Hippocrates, quemadmodum *Aphorismo 38. huius Libri* quoque dixerat, alterutra mammarum gracilescere, alterutrum pariter geminorum foetuum abortiri. Sed expressius *Lib. 1. de morb. mulier.* edocuit: *quibus in utero habentibus, circa septimum, & octavum mensem repente tumor mammarum, & ventris concidit, nec non mamma gracilescunt, & lac non apparet, asserendum est, puerum vel mortuum esse, vel vivere sed debilem.* Ex quibus deducere nunc licebit, mammas non solum flaccescere, sed extenuari, cum abortus imminet, & quidem cum antea intumuerint, & lac in se ipsis colligere cæperint, quod non nisi ultimis mensibus graviditatis accidit: Id quod manifestius videtur comprobatum ex adjecta *secunda Aphorismi* parte, ubi dicitur; *si vero rursus duræ fiant*; quo patet, illas antea solidas & duras fuisse, aliter qua ratione gracilescere & extenuari dici possent, nisi prius intumuisse? unde autem tumor earum & soliditas indeque ex mala foetus & uteri habitudine, laxitas & extenuatio insequatur, jam supra est expositum: Verum tamen gracilitas hæc & laxitas mammarum, comparanda erit ad statum graviditatis præcedentem, cum pleræque mulieres natura parvas, & graciles sortitæ mammas, non multum tumidas illas habeant, etiamsi prægnantes sint, & bene valentes; at vero ex imminente abortu multo graciliores illæ fient: Parum autem refert, an multo antea ejusmodi mammarum in commodum patiantur, an etiam in ipso abortu aut prope; quamvis Galenus *in Comment.* semper illarum extenuationem præcessisse se compertum fateatur.

Quod ad *secundam Aphorismi* partem, putat Galenus verisimilius dictionem græcam πάλιν exponendam esse pro *secus* aut *contra*, ut sensus sit: *Si vero contra mamma duræ fiant*, ac propterea, ut ipsemet subdit: *quod in toto dicitur Aphorismo sit tale: mamma quidem tenues omnino præcedunt fatuum corruptionem, & non possunt isti corrumpi, hinc earum extenuatione præcedente; duræ vero corruptionem quidem non significant, sed dolor quidem dictarum partium ad ipsas consequitur:*

At oportet non solum dictionem hanc variari, sed totius orationis sensum, nam si supra scribitur, *mammæ extenuari*, procul dubio antea tumidæ esse debebant; & si solidæ ac duræ fiunt, antea flaccidæ erant: Si præterea duræ persisterent, in utroque casu, quomodo simul etiam extenuatæ & graciliores fierent, attenta potissimum earundem mammarum glandulosa constitutione & textura? Quod si revera duræ fiant mammæ, duritie penitus morbosa, qualis in tumoribus præternaturam, tunc alia de causa, & fortassis etiam in mammis particulatim hærente, dolores accident, adeoque utero bene se habente, neque abortus consequetur. Cæterum comparata in universum mammarum soliditate, cum earundem laxitate, ac extenuatione, gravior semper hæc ad partum, levior illa censenda est.

A recurrente autem mammarum duritie, dolores accident, vel easdem infestantes, vel coxas, vel oculos, aut genua, sicque abortus non sequetur, quoniam pravi humores ab utero in has partes, veluti per metastasim delati, immunem illum deserunt, & alias partes, sua corpulentia deturpant, & quidem in eas potissimum, quæ specialius cum eodem consensum ineunt, vel aliqua ratione coherent, aut propter languorem excipiendis humoribus consentientia fiunt, ut experimentis constat, atque ex Anatomia palam fit: quamobrem idem Hippocrates pluribus in locis, recensuit pravorum istiusmodi humorum decubitus modo in coxas ut 1. & 2. *de morbis mulierum* & Lib. *de natura muliebri* modo in genua, poplites & crura, ut eodem 2. *de morbis mulierum* & Lib. *de superfætatione*, quandoque etiam in oculos ut dicitur eodem Lib. *de superfætatione* & *de natura muliebri* & alibi, quæ omnia loca vel apud Hippocratem vel apud Cardanum hoc Aphorismo legi per extensum possunt. Ejusmodi autem reciprocum affluxum è visceribus naturalibus, ad articulos, musculos & nervos, ac viceversa, jam satis ostendunt colicæ, hypochondriacæ & hystericae passionēs, mutuo cum articularibus doloribus respondentes. Porro uterus speciatim per carnosas fibras peritonæo alligatur, per ligamenta lumbis, coxis & inguinibus, per nervos tum è vago pari, tum è vertebris ossis sacri & per arterias & venas, & vasa lymphatica, cum reliquis omnibus partibus corporis, consensum init, ut liquet ex Anatomia.

Cæterum interpretes unanimis sunt sensus, dolorem in mammillis, oculis, coxis, genibus sed plerumque absque abortu fieri, adeoque meliorem

liorem semper esse indurationem quam extenuationem mammarum; durities enim est signum abundantiae, extenuatio defectus, facilius autem est demere quam addere, securiusque replere quam inanire.

Cardanus occasione huius Aphorismi, ejus potissimum partem secundam concernendo, invehitur in Galenum, quod eandem tot ambagibus distraxerit, quæ aliunde simpliciter erat interpretanda; quod si nempe causæ quæpiam, puta dolores ex casu vel contusione, vel febris, vel malum medicamentum, vel media, mammas extenuare ac molles reddere cæperint, inde confirmato fœtu, & causâ desinente, mammae rursus durescant; palam est non abortire nec corrumpere fœtum, sed dolor aut mammas aut oculos aut coxas aut genua infestabit, ut mox supra dictum.

Plura qui super hoc Aphorismo scitu curiosa & controversa desideraverit, Cardanum legat hoc loco & commento.

Aphorismus LIV.

Quibus os uteri durum est, iis os uteri coarctetur (vel ut alii comprimatur) est necesse.

Contentum seu Intentio.

De utero præternaturaliter clauso.

Connexio: Cum supra Aphorismo 51. de naturali uteri clausura post conceptionem egisset: in hoc præsentē Aphorismo, de clausura seu coarctatione ejusdem oris uteri agit, quæ præternaturam contingit. Hic Aphorismus ob brevitatem divisionem non admittit.

Cum ergo præcitato Aphorismo 51. Hippocrates dixerit, in utero gerentibus os uteri internum comprimi ac coarctari; ne quis autem inde putaret ex illius compressione & occlusionē perpetuum atque infallibile conceptionis indicium esse deducendum, ideo in hoc præsentē Aphorismo subdit & declarat, ex oris illius duritie solam compressionem necessario esse colligendam, quæ si præ exstiterit, conceptioni potius impedimento erit; quam obrem ut antea etiam est animadvertum,

nisi uteri occlusio fiat cum ejusdem mollitie, & citra quemcunque dolorem, conceptum foetum nullatenus indicabit; itaque si durum ac renitens admodum illud percipiatur, alia de causa occlusio illa procedet, adeoque morboſa eſſe poterit.

Fit autem durū os uteri internum, non raro ex tumore præter naturam ibidem inducto, potiffimū autem ab inflammatione & ſcirrho, aut etiam à callo, vel ulcere calloſo ut dicitur in *lib. de Sterilibus*: undè deducere eſt, occluſum uteri os conceptionem designare, ſi cum naturali ejusdem partis mollitie conjungatur, citrà dolorem, ardorem, aliudque ſimile ſymptoma; contrà vero cum duritie, & memoratis ſymptomatibus conjunctum tumorem præternaturam, aut etiam callum ſignificare; quamobrem licet compressionem & occluſionem ejusdem neceſſario arguat, non tamen perpetuo ab uteri geſtatione orietur; Sed & in obeſis plus juſto, quibus omentum pinguius redditum elongatur, & procidit in anticam uteri Regionem, illius os præcluditur, ut antea dictum eſt; itemque in hydrope uterino affectis aliisque ſimilibus; verū in his, aut uteri os non omnino occluſum eſt, aut molle nimis, & aquoſa ac fluctuanti humore repletum, ideoque tactui prementi cedens, præter plura alia indicia, morboſam Patientis conſtitutionem attestantia, de quibus hic ſermo non eſt. Dignoſcitur autem iſta durities ſuadente Hippocrate contactu, ſed peritam & expertam requirit obſetricem.

Quæres: Quomodo huic clauſuræ præter naturam medendum ſit? *R.* Per inſeſſus emollientes, injectiones, clyſteres uterinos nempe ex decocto radicis bryoniæ & emollientium factos: poſſunt etiam fieri peſſaria oblonga & unguentis emollientibus inuncta inungi.

Aphoriſmus LV.

Quæ geſtantes uterum febribus corripiuntur, & vehementer ſine cauſa evidente extenuantur, ea difficulter & cum periculo pariunt, aut abortientes periclitantur.

Con-

Contentum seu Intentio.

De Prognosi febrium in Gravidis.

Connexio: Hic Aphorismus connectitur vel cum *Aphorismo 44.* *hujus Libri* in quo dixit Hippocrates, extenuatas mulieres præternaturam abortire, donec crassescerent seu habiliores evaserint: vel cum Aphorismo 30. in quo docuit, mulierem gravidam, morbo quopiam acuto corripì, lethale: In hoc præsentè Aphorismo tangit eandem materiam, sed universaliori modo, atque cum aliis circumstantiis, addendo febres, si illis nempe accidant, inquit, difficulter parere, aut abortientes periclitari.

Hic Aphorismus ob simplicem conclusionem non dividitur.

Dixerat ergo Hippocrates in duobus modo citatis Aphorismis de abortus & vitæ periculo, quod & in hoc præsentè Aphorismo confirmat; crediderim tamen ibi, præsertim Aphorismo 30. specialius in utero, in hoc vero præsentè Aphorismo, ex reliquo corpore morbos gravidarum perpendisse ab utero remotas: Quoniam vero ibi *lethale*, in hoc autem Aphorismo *periculosum* inquit, unde credo, non de febribus ardentibus, quæ acutissimæ sunt, sed de aliis levioribus locutum in quibus licet difficultas pariendi, aut abortus timendus sit, non tamen mors certo immineat, quemadmodum de acutis morbis meminerat, & ab ardentibus febribus procul dubio sequeretur.

Hinc sententiam hanc congruentius exponere in cum iis, qui loco *fortiter calefiunt* (uti quidam in textu ponunt) potius legendum suadent *fortiter seu vehementer extenuantur*: hac enim ratione melius explicabitur, quam obrem non penitus sint peritura, & quomodo absque manifesta occasione incalescant, & qua de causa distinctis dictionibus, ex calefactionem immoderatam à febribus sejunxerit, miror autem unde sibi persuaserit Cardanus, robustas mulieres facile Epialas febres sufferre posse, quas inter graviores & periculosiores recensuit Galenus 6. *Epidem comment. 1. text. 29.* Illas cum hæmitritæis & continuis enumerans: Itaque longe rationabilius erit, si dicatur, utero gerentes febribus correptas difficulter parere & periclitari,

si simul una magnopere extenuentur, & absque ulla manifesta occasione, puta inedia, vigiliis, evacuationibus, aliisque extenuare valentibus :

Hac quippe ratione plane constabit, tum à febre ad plures dies producta, tum à causa interna seu affectione extenuante, non tantum utero gerentem, sed & foetum ipsum vehementer debilitari, unde partus deinde difficilis consequatur, ac propter virium languorem, non sine vitæ periculo: Quod si fetus ferendo non sit, ut in tempus partus producat, procul dubio abortietur, & simul cum illius interitu, patiens ipsa periclitabitur.

Ex his modo deducere licebit, febres hoc loco memoratas, de genere earum existimandas esse, quæ à materia humoralis dependent, exceptis solum Ephemeris simpliciter dictis, quæ cum non nisi diem unum & alterum perdurent, profecto ingentem noxam utero gerentibus afferre nequeunt, aut cum extenuatione citra causam manifestam copulari, quare à pravis humoribus progenitæ, utero gerenti & foetui detrimento sunt; unde idem Hippocrates 2. *Aphor.* 28. animadvertit febricitantium corpora, plusquam ratio postulat, contabescere, malum esse quippe quia imbecillitatem, vel, ut aliis placet pravitatem significat; Ideo non qualibet extenuatio, sed quæ nitabilis & vehemens est, effectus mox dictos efficere poterit.

Dices: Si ex causa prægressa extenuatio fiat & febris perseveret sequi etiam ad causas manifestas Ergo male dictum sine causa manifesta : *℞.* Non sequi tunc necessario, sed tantum si sine ea fiat; Rem dabimus clariorem mox in quæstione secunda.

Quæres I. Cur tantæ febres in Gravidis sint periculosæ ? *℞.* Quia alimentum quod in lentis febribus concedi debet febrim auget, & media quæ tolerari in iisdem non potest, foetum debilitat aut necat; præterea vitium humorum indicat evacuationem, foetus eandem prohibet: unde gravidas curare & difficile & periculosum est.

Quæres II. Quomodo ergo hoc: *Sine causa seu occasione manifesta* intelligendum sit? Respondet Cardanus 1. quod etiam, si acutæ febres adsint, omnia hæc evenire aut alterum necesse erit: Respondet 2. sine occasione seu causa manifesta Hippocratem intelligere ne ob causam antecedentem & procatarticam seu occasionalem

nalem aut evidentem febricitet ; tales enim febres diu durare non solent & facile remediis depelluntur , cum firmam sedem non habeant v. g. quales sunt febres ex casu, terrore, &c.

Aphorismus LVI.

Sit in muliebri profluvio, convulsio, & animi defectus superveniat, male est.

Contentum seu Intentio.

De prognosi mensium immodicorum.

Connexio : Cum Hippocrates supra in Aphorismo 4. hujus Libri in universum vituperasset convulsionem & singultum in omni fluxione, & Aphorismo 50. cucurbitam ad movendam esse mammis præcepisset , ad prohibendam nimiam sanguinis seu mensium effusionem ; In hoc præsentis Aphorismo, proponit duo symptomata, valde periculosa, quæ supervenire solent, ad muliebrem fluxum qui superfluus est, & sisti nequit.

Hic Aphorismus ob brevitatem & simplicem conclusionem , nullam patitur divisionem.

Num autem Hippocrates, revera de fluxu muliebri proprie dicto id est fluore albo ; An vero de copioso menstruorum fluxu scripserit hunc Aphorismum , dubitare contingit apud expositores, & quidem in utramque partem propendere, suis non caret argumentis ; At vero quoniam Aphorismo 3. hujus libri dixerat : *ubi sanguis multus fluxerit, singultus aut convulsio superveniens, malum* ; probabilius videtur, non hic quamcunque ex Utero sanguinis evacuationem illum intellexisse , sed eam speciatim quæ non synceri sanguinis, sed corrupti, ac saniosi humoris est, qualem descripsit Aëtius *Tetrabibl. 4. serm. 4. cap. 65.* Atque ex Archigenis sententia uteri destillationem appellavit, eaque Galenus Boethi Uxorem affectam retulit *Lib. de præcognitione ad Posthumum* : Utcumque autem res se habeat, plane fit, ut quamcunque immodicam evacuationem , undecunque procedentem,

tem,consequens convulsio,animi defectus,malum sit,& longe deterius censeatur,si ab utero,plurimis nervis referto , atque cum principalioribus partibus corporis consentiente,proveniat ; nam morbi isti suapte natura perniciosi sunt , ut qui vitæ custodes nempe spiritus male affectos arguunt,quin imò vires infringunt , ipsumque vitæ fomitem perdunt: recte autem monitum est à Galeno *in comment.* non statim hæc in recenti fluore advenire , *sed cum vel vehementior fuerit, vel diu perduraverit.* Unde hæc convulsio ab inanitione semper mala,imo ut supra diximus pessima est , & ut causa & ut signum: ut *signum* quia ex siccitate seu inanitione: ut *causa*, quia corpus angit magis & torquet: Verum non ita animi defectus,quia animi defectus,ut experientia docemur , solet esse remedium sanguinis nimii effluxus, nisi vehemens sit & diu duret,at ut *signum* semper etiam malus est.

Cæterum Hippocrates *Lib. 2. de morb. mulierum* accidentia & signa narrat quæ copiosæ huic effluxioni mensium supervenire solent : primo enim dolores accidunt clavicularum ac tendinum , & corporis torpor,& crurum perfrigeratio:& si amplius sanguis descendat, sudor multus diffunditur; ad hæc stomachi morsus fiunt, & perfrigerationes,febres,rigores,convulsiones, dolores ad inguina, quasi partus,urinæ stillicidium,sitis,lingua aspera,contractiones digitorum, pedum & surarum ; deinde distensiones totius corporis , ad quas mors succedit: Potissimum autem istæ sanguinis effusiones fiunt ab utero,ex abortu, vel ex partu, aut diuturna mensium retentione, aut ex febribus ut Hippocrates ibidem docet.

Quæres: Quomodo hic fluxus immodicus , differt à fluxu bene ordinato seu mensium ordinario ? *R.* Differt materia , colore, qualitate, quantitate , periodo & excernendi modo : Nam materia magis est serosa aut biliosa aut phlegmatica, colore pallido vel albo vel viridi : qualitas toto genere præter naturam , copia excedens, periodus incerta, nullus ordinatus excernendi modus , quia fit cum continuo plerumque dolore & penitus in disuere.

Aphorismus LVII.

Menstruis abundantibus (seu si menstrua plura fiunt) morbi eveniunt, & subsistentibus (seu si non fiant) accidunt ab utero morbi.

Contentum seu Intentio.

De mensibus quantitate peccantibus.

Connexio : Cum Hippocrates in præcedenti Aphorismo affectus quosdam superfluis menstruis supervenientes nempe convulsionem & animi defectum recensuisset ? In hoc præsentè Aphorismo universaliter dicit morbos uteri fieri à menstruis superfluis & deficientibus.

Hic Aphorismus duas habet partes juxta duas conclusiones : quarum *prima* dicit ex redundantia mensium morbos causari : *Secunda* vero ex eorum suppressione morbos ex utero fieri , Mediocritatem cunctis in rebus laudabilem esse, nemo est, qui non fateatur, ac magnis laudibus non deprædicet, unde effata illa notissima : *Medium tenere beati* : Item : *Virtus in medio* : Item Terentii *Ne quid nimis* : Et tandem illud Horatii :

Est modus in rebus sunt certi denique fines ,

Quos ultra, citraque nequit, consistere rectum,

Eandem autem pluribus in locis ad naturæ tuitionem seu tutelam & sanitatis incolumitatem servandam, passim quoque commendavit Hippocrates, ut propterea scripserit, *6 Epidem. sect. 6. labor, cibis, potus, somnus, Venus, omnia mediocria* : Quod & sæpius repetit in libris Aphorismorum. Hic vero speciatim in fœminis menstruas purgationes considerans, illas modum non servantes, omnino vituperat, & cum affluenter prodeunt, & cum penitus supprimuntur, ea tamen differentia, ut si large profluant, morbo indefinite succedere, si detineantur, ex utero particulariter provenire decernat.

Eveniunt plane morbi, fluentibus large menstruis, plerumque

vitio totius, quoniam malam sanguinis Diathesim sæpissime consequuntur. Non enim alia de causa sanguis affluenter funditur, nisi quia vitiosus est, puta acer, acidus, salsus, serosus, qui propterea, impetu in vasa uteri facto, viam sibi aperit, & quandoque non tantum oculo vasorum laxat & dilatat, verum etiam erodit, & tantum non ditacerat; cumque vitiosus iste sanguis, per universum corpus excurrens, impetum deinde speciatim faciat in uterum, proinde est quod Hippocrates, indefinite dixerit morbos exinde suboriri, nulla de particularis visceris Dyscrasia, mentione facta. Verum non hinc utrum quis ab istiusmodi labe, immunem opinetur, cum adhuc, solius ipsius vitio, id ipsum haberi possit, si potissimum peculiari aliquo morbo sit affectum, aut occulta sui fermenti depravatione contaminatum, quam obrem sæpius uteri scirrhi laborantes, aut ex glandulis ejusdem tumefactis, obstructis, laxatis, & erosus, male se habentes, profluvio sanguinis ad annos integros vexatas vidi, imo doloribus vehementissimis, & spasmodicis affectionibus cruciatas. At vero in menstruorum suppressione, defectus hic videtur omnino adscribendus utero, aut quia illabentem sanguinem non admittit, aut illapsum excipit, & detinet: Non admittit autem, quia in suis vasibus obstructus, aut debito fermento privatus, repurgationi, & secretioni ineptus evasit, cum alioqui velut sentina totius corporis exitum sanguineiscrementis debeat, promptissime exhibere; quapropter si illa recirculent, & aliorum remeent, ejus defectui, jure optimo, consequentes morbi tribuuntur: Quod si, ille excipiat quidem, sed præcrassitie ac lentore deponere postmodum non possit, procul dubio ibidem hærentia, graves morbos excitant, quæ sedem in eodem habentes, ab illo male affecto procedere dicentur, ut in obstructionibus, tumoribus aliisque uterinis affectibus, experimur, & quamvis menstruorum repurgatio impedita magna ex parte, fæculento sanguini tribui possit, debet tamen utero adscribi, qui cum sua natura sit repurgandis mensibus destinatus, quoties hoc munere defungitur, ejus culpæ, istiusmodi defectus attribui debet, quia deficit in eo, quod debet: Deficit autem ut dictum, vel fermenti sui inertia, vel vasorum exilitate, aut compressione, vel denique mala constitutione, ac textura, aliave indispositione nobis adhuc inconspicua.

Quinam vero sint morbi tum ex fluentibus plus justo, tum ex
non

non fluentibus menstruis oriundi, non facile omnino est determinare cum & Hippocrates ipse, licet plurimos recensuerit, in *lib. de morbis muliebrium*, & 2. *Epidem. sect. 3.* & alibi, non tamen omnes penitus est complexus, nam nulli non sunt, qui ex ipsis immodice fluentibus, vel diminutis aut omnino suppressis oriri non possint, ut experientia demonstrat, unde jure optimo scripsit ad eundem Hippocratem, Democritus *Epistola de Natura humana*, innumerabilium ærumnarum Authorem esse uterum, cum & revera dolores capitis accerbissimi, Epilepsiæ, Apoplexiæ, Lethargi, Convulsiones, Catalepses, Phrenitides, inflammationes, cæcitates, surditates, anginae, Astmata, hæmophtises, Peripneumoniæ, Palpitationes, Vomitus, & alia plurima mala, ex illo proficisci consueverint, ut historiis & Anatomicis observationibus est compertum. At vero quamvis innumera sint mala, ex utero progigni solita, specialiora tamen Hippocrates, *citato Lib. de morbis muliebrium* recensuit, sive copiosius quam par sit, effluant, sive diutius remorentur, & suppressi menses sistant. Ut autem quis de eorundem immoderato exitu judicium ferre possit, statuit ibidem in omni muliere sana, duarum heminarum Atticarum mensurarum id est libram unam semis, seu uncias octodecim, excedere non debere, idque ad duos vel tres dies, longius autem aut brevius tempus morbosum esse; Verum tamen hæc plerumque variant etiam salubriter, pro varia fæminarum habitudine, ætate, victus ratione, exercitatione & similibus; nam plerasque videre contingit, quæ ad plures dies abundantius menstruare solent, & cum maxima corporis Euphoria, ut etiam Hippocrates ibidem innuere videtur. Facta autem comparatione inter eas, quibus menses affluentius prodeunt, ac profluvio sanguinis affici contingit, aut ex adverso suppressi sunt, longe periculosius ægrotant primæ, quippe quæ immodicam evacuationem sanguinis ferre nequeunt, tandem decolores redditæ, cachecticæ aut Hydropicæ, hysteriæ febricitantes, vel quod gravius syncope affectæ, brevi succumbunt, & vita deficiunt, vel ab extra Scirrhis, ulceribus, cancris &c. afficiuntur, contra vero, quibus sanguinis menstrua purgatio supprimitur, licet in eadem & similia mala procedente tempore incidant, in longius tamen protrahuntur, adeo ut idem Hippocrates scribat, famulam quandam 4. *Epidem.* septem annis, mensibus caruisse.

Porro mirari subit, quamobrem Hippocrates *cit. lib. de morbis muliebr.* scriptum reliquerit: *detenta per sex menses menstrua incurabilia fieri*; cum ceteroquin ex praxi pluries innotuerit, nonnullas ex adverso convaluisse, alias etiam concepisse, & vitales partus edidisse, nisi aliunde uterus, in sua constitutione laxatus, ineptus evaserit conceptioni & graviditati: meminit quidam Author, se aliquando observasse mulierem quadragenariam ascite laborantem, quæ tamen suo foeta marito, non solum foetum maturavit, sed non sine admiratione, puellum exacte formatum peperit, licet tandem, non repurgatis sufficienter lochiis, & aqua in abdomine detenta, post plures hebdomadas perierit.

Porro animadvertendum morbos a non fluentibus mensibus tum solum evenire, cum alias illi fluere deberent: Incipiunt autem naturaliter fluere, cum mulieres conceptioni, & generationi aptæ fiunt, id quod plerumque accidit, circa decimum quartum annum, & licet aliquibus ante & posthæc tempora eruperint; Nam aliquando statim ab incunabulis, quandoque vero post vigesimum primum annum apparuerunt; hoc tamen illis præter morem, atque ex morbo aliquo accidisse dicendum: Ita quoque desinere consueverunt septimo aut (quod summum) octavo annorum septenario, quamvis pleræque ad sexagesimum annum & ultra menstruas purgationes subiisse perhibeantur: Quare pro diversa fæminarum constitutione, prudens Medicus, de ejuscemodi mensium eruptione, aut desitione, promota nimium, vel impedita conjiciet, num morbosæ sint, aut proxime in morbos sint lapsuræ; atqui certiora indicia desumet ab his quæ idem Hippocrates memorat *cit. lib. de morb. muliebr.* puta doloribus, tumoribus, obstructionibus, febribus; contra vero sponte Naturæ desuisse pronuntiabit, si citra quameunque uteri ægritudinem & nulla subsequente febre, aliave cordis, cerebri, aut stomachi molestia, certa præsertim ætate sensim sensimque defecerint. Quæ denique purgationes à partu fiunt, & proprie lochia aut puerperia dicuntur, longe admodum à mensruis differunt, adeoque ad præsentem hunc Aphorismum nullatenus pertinent.

Mala demum, quæ per singulos menses patiantur fæminæ, explicuit idem Hippocrates *præcit. lib. de morb. mulier.* videlicet febres,

hor-

horrores, lumborum dolores, suffocationes, duritiem ventris, fastidium cibi, vigilias, anxietates &c.

Objectiones & difficultates in contextu sunt solutæ.

Aphorismus LVIII.

Ad recti intestini & uteri inflammationem, purulentosque, Renes succedit urinæ stillicidium: lecori vero inflammatione laboranti supervenit singultus.

Nota: hic Aphorismus repetitur infra Libro 7. Aphorismo 17.

Contentum seu Intentio.

De Accidentibus inflammationem Viscerum infimi ventris.

Connexio: Cum in priori Aphorismo Hippocrates dixisset, morbos fieri ex utero: In hoc præsentè Aphorismo, captata occasione, loquitur de symptomatibus, quæ ad uteri mala & vicinarum partium sequi solent.

Hic Aphorismus duas ponit conclusiones, & secundum has in duas partes dividitur: *Prima* docet Stillicidium urinæ supervenire solere ad inflammationem recti intestini & uteri atque ad purulentos Renes. *Secunda* vero dicit singultum sequi ad jecoris inflammationem.

A suppressis menstruis si fortè sanguis ita in utero restagner, ut excitet inflammationem, non solum inde febres, dolores, anxietates, aliaquæ id genus communia symptomata, inflammatorias febres comitantia orientur, sed compatiens vicinis & adjunctis partibus, alia specialiora suscitabuntur, quæ eorundem nexum arguunt, & partem specialiter affectam designant, quamobrem hoc Aphorismo Hippocrates, ab inflammato recto intestino aut utero, urinæ stillicidium evenire animadvertit;

sicut pariter à purulentis renibus : ab hepate vero inflammato singultum.

Et quidem urinæ stillicidium advenire, recto intestino, aut utero inflammationem patiente, affecta inde vesica, quæ utrique proxima & conjuncta est, palam fit ex Anatomia, qua constat vesicam uteri cervici superincumbere, atque intestino recto alligari; ut propterea ad utriusque partis læsionem, prompte quoque ipsa compatiatur: Quamobrem experimur in gravidis, à tumefacto utero, vesicam comprimi, atque urinam in illa collectam diutius asservari non posse, sed statim egeri, quo circa utero gerentes micturire coguntur: In fæcum autem, præsertim duriuscularum, egestione, ex nimio & frequenti conatu, etiam vesica crebrius sollicitatur, ut modicam adhuc urinam quantocyus expellat: Si ergo hæc citra morbosas causas, & vesicæ morbos accidunt, ut urinæ stillicidium oriatur, quam gravius & molestius affici continget, cum partes illæ inflammatione laboraverint, non sine pravorum succorum acritate atque irritatione.

Id ipsum evenire observamus, à renibus purulentis, cum nimirum urina inde transcolata, & pure suapte Natura mordicante, & acribus particulis, muriatico-acidis referta, in vesicæ cavum deponitur, & stillicidium excitat. Animadversione dignum est quod Hippocrates, non inflammatos, sed purulentos renes hic notaverit, seu ex contracto ibidem ulcere, suppuratos, quoniam ab inflammatione renum, potius dysuria vel ischuria fit, quam stranguria, quippe ab inflammatis renibus, coarctatis scilicet & occlusis ductibus, præterfluenti sero transitus omnino denegari solet, unde ischuria; & si fortasse adhuc illud effluat, collectum deinde in vesicæ cavo, per urethram commode atque affluenter reddetur, non autem stillabit, ut in stranguria fit, de qua hic sigillatim Hippocrates meminit. Quin & rarissime accidit, utrumque renem inflammari, ut exinde urina tale vitium contrahat, & stillicidium pariat; at vero ab alterutro rene suppurato ac purulento, urina manabit, multo & crasso pure satura, unde non libere, per angustum urethræ orificium ferri poterit, adeoque guttatim educetur, & simul sua acredine sphincterem musculum vellicabit, & ad micturiendum laceffet.

Verum quamvis Hippocrates hic dicat, ab inflammato recto intestino aut utero, nec non à purulentis renibus urinæ stillicidium exoriri, non tamen deducere licebit, è converso urinæ stillicidium ac stranguriam

guriam ab uteri & recti intestini inflammatione, aut à suppuratis renibus, perpetuo proficisci, cum illa plures alias causas consequi possit, quamobrem ex uno in aliud vicissim inferre non licet: Hinc stranguria veluti symptoma superveniens, ob affectæ partis viciniam, non proprie indicabit, annexarum partium inflammationem sed solius vesicæ læsionem, quæ cæteroqui aliis de causis haberi potest, ut patet ex praxi: Non enim ista signa sunt pathognomonica propria & inseparabilia, sed supervenientia tantum.

Sicut à recto intestino, aut utero inflammato stranguria, ita ab hepatide seu hepatis inflammatione singultus, qui licet inter symptomata ejusdem minime referatur, præsertim cum sit & recens est, supervenit tamen cum diu increbruerit, & malum signum ab eodem Hippocrate reputatur infra *Lib. 7. Aphor. 17.* Creditur autem fere, communiter id fieri propter consensum hepatis cum stomacho, cui dicitur singultus convenire, cum is veluti convulsivus stomachi motus appelletur. At ipsemet crediderim potius ad diaphragmatis vitium pertinere, quod propter ingentem hepatis inflammationem contrahatur, & in suis expansionibus impediatur quin & irritetur & molestetur, non leviter à contactu tumefacti, & inflammati jecoris, quod eidem alligatum, plus justo præponderans, gravi incommodo est. Coafficitur simul una pariter stomachus, & quia sub septo transverso seu diaphragmate proxime jacet, & quia per pylorum, ab inflammato jecore phlogosim subire solet. Cæterum quamvis non audeam inficiari singultum speciem quandam esse convulsionis, non tamen admiserim ab inanitione atque adeo ab immodica siccitate stomachi tuniceas contrahente, illum revera provenire posse, cum tanta siccitas, vivente animali, partibus accidere nequeat, ut alias ostendimus, quamobrem Galenus ipse in hoc *Commentario* hepatis inflammationem patienti propter nervorum communicationem singultum supervenire, subdit: *non quidem semper, sed quando ad maximam attollitur inflammationem.*

Difficultates & objectiones hunc Aphorismum attinentes vide Cardani super hoc *Commentarium*, & Lib. Hippoc. *de fistula & de natura mulier.*

Aphorismus LIX.

Si mulier non concipiat, & scire placet, an conceptura sit, vestibus (seu pannis) undique obvolutam (seu circumtectam) subter (seu inferne) suffito. & si odor corpus pervadere videatur ad nares, & os usque, non sua culpa (id est ex se ipsa) sterilem esse scito.

Contentum seu Intentio.

De Experimentis sterilitatis exploranda.

Connexio: Hic Aphorismus manifestissime connectitur cum Aph. quadragesimo primo hujus Libri, in quo de mulsæ potu, ad cognoscendam gravidam mulierem scripsit Hippocrates: In hoc vero præsentis Aphorismo, de cognoscenda sterili aut foecunda muliere agit. Hic Aphorismus licet fuscè prolatus ob simplicem conclusionem non dividitur.

Demirari revera valde licet, quomodo factum, ut levem hanc explorandæ fecunditatis in mulieribus conjecturam, inter Aphor. retulerit Hippocrates, cum & suo nomine penitus indigna videatur, quippe quæ nulla ratione, nulloque experimento videtur suffulta. Sed & quis unquam tam arcte poterit, pannis aut vestibus fæminam explorandam circumtegere, aut ita fortiter cingere, prout Hippocrates intendit, ut subter suffitum, nares, bonus vel malus odor non feriat, isque sit totus per corporis meatus interius excipiendus, vel saltem nullatenus infractus, retusus, aut inversus in tot viarum & viscerum anfractibus: Sterilitatis præterea causæ in fæminis multæ sunt, quas idem Hipp. recensuit, *Lib. de sterilibus & morb. mulier.* unde facile est, ut ex una & altera ipsarum, sterilitas proveniat, quamquam impedimento non sint, quo minus per uterum odor, nares aut os pertingat, adhuc in bene valentibus, ut interpretes hic annotarunt. Neque densitas aut raritas uteri, ut commentatur Galenus, quidquam facit, in conceptione & speciei propagatione, cum satis superque constet ex Anatomia, non per inconspicuos uteri poros, sed per patentes meatus,

&

& Tubas Fallopianas , ex ejusdem variis albugineam substantiam, molli putamine obvolutam, in ipsius cavum pro conceptibus deponi; quin & experimentis liquet , duriori & densiori textura præditas, quemadmodum sunt exercitatæ , & frigidas & siccas regiones incolentes, longe facundiores esse otiosis, obesis & laxiorem nactis constitutionem. Quamvis insuper via exquirantur patentes, ac liberæ ut semen è maribus ejaculatum ab utero excipiat, & facundatum ovum, ab ovario sepositum, in ejusdem cavum delabatur, non tamen necesse est , ut reliquum corporis , ita permeabile sit & reseratum ut odores inde exceptos admittat, atque ad nares & os evehat, ut exinde judicium certæ facunditatis deduci possit, quasi vero fæminæ facundæ solum illæ sint, quibus corpus universum patulum & pervium est. Rectius propterea idem Hippocrates Aphorismo 62. *hujus libri*, Sterilitatem à particulari uteri vitio deduxit, inquiens: *Quæcunq; frigidos & spissos uteros habent, non concipiunt &c.* ubi nimirum universum fætationis opus peragitur, ideoque opus est ut is sit optima constitutione præditus, in suis ductibus patulus, & in graviditate amplificationi facile cedens, atque tuitioni infantis accommodus ac peropportunos.

Quamvis autem ex his plurimum de veritate istius Aphorismi suspicari fas sit, quia tamen Hippocrati fuit in animo, eam hic potissimum conjecturam, de judicanda in fæminis facunditate proponere, quæ unicuique obviam foret, & prompte reducibilis in usum, quemadmodum mos antiquis erat, propterea hoc loco, illorum rationem ejuscemodi internotionis recensuit, & methodum, praximque exhibuit, ut saltem quid ex hac parte deduci posset, citra grave fæminarum incommodum & solum ab extrinsecis conjiciendum edocent: quod & alias *lib. de Sterilibus* allii suis exuviis exuti, integri ac purgati, in uteri vaginam inditi beneficio, cum fæmina it dormitum, experiundum admonuit, idque à plerisque obstetricibus, non semel ipse factum audivi, nec irritum successu, quippe in inutilem mucorum seu crassæ pituitæ saburram sensim & sensim, uterus hac ratione deponere consuevit. Ut igitur quæ hic proponit Hippocrates, in usum commode duci possint ad internoscendam fæminarum pro conceptione aptitudinem, conducibilius erit, ut non solum illæ pannis circumtectæ suffiantur, ne dispersus odor, nares potius exterius pertingat, quam per uterum; verum etiam ope convenientis infundibili

M m m m m

exceptus,

exceptus, illas solum tendere cogatur, alias frustranea esset operatio: Sed & horum nescia necessum est, ut sit suffiunda mulier, utrumque simul quæ suffumigari debent, ne scilicet sua malitia propriam sterilitatem tegat; quin etiam oportet, ut odor aromatum, ad foeminæ os delatus, post aliquod tempus, ab obstetrice perita, admoto ejus ori naso, percipiatur: quod sane Platoni animadversum maximum illarum opus dicitur.

Quibus vero foeminæ sint suffiundæ, licet Hippocrates hîc non meminerit, refert tamen in *Commentar.* Galenus, oportere esse, quæ ejus naturæ sunt, ut suffitui apta sint, quemadmodum thus, myrrha, styrax & quæcunque sunt valde odorata: Insuper idem Hippocrates *lib. de sterilibus*, metopum unguentum (seu Mendesium seu Ægyptium unguentum Ægypto usitatum) lana exceptum, uti pessum utero imponendum jubet, ut si subditi odorem per os mane olfecerit, mulierem facundam fore & concipere posse subdit.

Admirabilius est autem, quod idem Author ad hoc, id ipsum internoscendum proponit, illinendos nimirum esse oculos mulieris humore aliquo, quem si iidem combibant, facundam illam esse testatur, id quod etiam confirmat Plinius lib. 7. cap. 16. dum ait: *facunditatis infæminis prerogativam accepimus, in unctis medicamine oculis, salivam infici*: quod & antea Aristoteles adnotavit, 2. *de generatione animal. cap. 5. & 4. sect. Problem. 2.* juxta expositionem Theodori, ut bene etiam advertit Langius *Lib. 1. Epistol. 49.* ubi aliud ex Galbano, orificio uteri incluso, experimentum affert, adhuc ex Hippocratis autoritate desumptum, ut apud eundem legitur: Plura alia, ad hoc idem conferentia Authores hîc memorant, quæ unicuique experiri pro arbitrio licebit: neque vero penitus rationi dissentaneum existimare est, quomodo fieri possit, ut halitus ac vapores odori ex utero nares & os pertingere possint, si nimirum consideremus maximum, quem ille per nervos, cæterosque ductus consensum habet cum cerebro, & partibus caput componentibus; quamobrem bene poterunt halitus isti, imo tenues & volatiles aromatum particulae, per patentes uteri meatus, nervos subire, & sensim per fibras & ipsorum substantiam penitus intromitti & ad cerebrum usque pervadere, sine ulla earundem volatilium partium refractione; quippe experimur, moschum, ambram, zibethum & alia

alia id genus, ita rebus cunctis commisceri, ac pertinaciter hære, ut non solum diutissimè perdurent, atque irretracta perseverent, sed quod majus, adhibita quavis industria, difficillime postea deleantur: qui præterea alimenta aut medicamenta assumpserunt, ejusmodi rebus odoriferis confecta, ad longum tempus illa eadem olere solent: quin & plurima sive bene, sive male olentia, clysteribus injecta, caput & cerebrum afficiunt: Aliquando etiam est observatum ex indito clystere, in quo opium erat dissolutum, cerebrum ad longissimum tempus fuisse soporatum, imo ipse sum vivus testis ex simili opiato clystere injecto mox Apoplexiam esse introductam: unde qua ratione opium per vapores ab intestinis cerebrum gravat: & ad soporem adducit, non dissimiliter odorifere ab utero per nervos & os impetere possunt.

At vero præter ea quæ hic commemorat Hippocrates, de conjectura à suffitu subtus admovendo, oportebit peculiarem fæminarum constitutionem ac totius corporis structuram, ventris & hypogastricæ Regionis habitudinem penitus perscrutari, quo nimirum modo ista se habeant, in suis operationibus, excrementorum repurgationibus, & aliis, & si graciles, an obesæ fæminæ sint, si hypogastrium amplum spatiosum, an vero angustum & arctum, aut exsuccum habeant? Quamobrem sagax Medicus ex his omnibus simul junctis de bona vel mala uteri dispositione, non irrationabiliter deinde conjiciet.

Quibus vero medicamentorum generibus, quæ steriles creduntur, fæcundæ fieri possint (si tamen defectus generationis ab ipsis sit) pluribus tentare ausi sunt periti Medici, & industriæ obstetrices: Sunt qui opè pomorum Mandragoræ, de quibus latè inter cæteros meminere de his Reies, Vallesius, Sennertus, Savanarola, Mercurialis: alii Moscho Zibetho, ambrâ grysea & cæteris aromatibus sæpius iteratis: Nonnulli nuce moschata: plerique testiculis animalium & aliis similibus: Verum hos fallere, & falli contingit, nisi prius de re bene perspecta, ac maturius pensitata constiterit, quâ de causa infæcunditas procedat, & num vitio formationis & structuræ uteri, ejusque vasorum, ac potius defectu sanguinis, & glutinosæ illius substantiæ in ovariis adnatæ, & ad formam ovi adultæ, cujus potissimum ratione, nuperrimè patuit, infæcundas evadere

mulieres, quibus nimirum datum non est, ejuscemodi ovis abundare, aut ad justam magnitudinem illa perducere, vel etiam perducta perficere: sed potius corrumpere, forte quia ab ovariis seponi, atque in uterum delabi nequeunt, nimio adipe stipata & circumducta, ut plerisque anatomicis dissectionibus est observatum. Quamobrem pro varia harum causarum conditione, oportebit diversis auxiliorum generibus, fecunditatem in illis promoveri, totis nimirum partibus, generationi destinatis, aut etiam remotis impedimentis ex quibus fecundatio & conceptio retardetur, quæ propterea sagax Medicus, ubi sedulo perquisierit, atque in deficientis naturæ auxilium promoverit, procul dubio sui voti compos fiet. Cæterum de his consulendi sunt practici, apud quos magna sylvæ horum medicamentorum, pro diversitate causarum proponitur.

Illud tandem ex his omnibus colligere nunc licebit, perperam à quibusdam in praxi, omnem odorum usum, in affectibus mulierum indiscriminatim vituperari, cum tamen is, à primis medicinæ proceribus summopere multis in casibus commendetur, neque solum externe sed etiam interne.

Et quidem licere quandoque in affectibus muliebribus, medicamentis uti, non tantum aromatum mixtura conditis, sed & fragrantibus ac odoris, nempe moscho, ambra, zibeto, nuce myristica, calamo aromatico, &c. dosi tamen convenienti ac moderata, plaris & ab Hippocrate, Galeno, & aliis, non temere educemur: is enim non solum cerebrum, & cor momento ferè reficiuntur, & in suis vigoribus vigillantur, si fortasse sopore, vertigine, apoplexia, syncope ac lypothymia fœminæ laboraverint, sed speciatim uterus exinde suaviter allectus, se ipsum impuritatibus statim exonerat, ut etiam subinde fecundari facile possit. In quam rem legi merentur præ cæteris Sennertus *lib. 4. Prax.* & Laurentius *lib. 7. Anatomie*: Langius, *Epistola 23. lib. 1.* Casparus à Reier *in suo campo Elysio jucundarum questionum, quæst. 84. & 93.* Vivunt præterea nobilissimæ quædam matronæ, quæ diu steriles cum forent, & prolium avidæ, tandem impatientes (temerario plane ausu) plura & plura moschi grana, iterato sumpsere, atque voti compotes, gravidæ paulo post effectæ sunt & masculos peperere validos, robustos & eusarcos. Notum insuper est de Hispanis fœminis, non solum nobilibus, sed plebejis, quibus frequens in usu est acutus & vehemens moschi

moschi & ambra odor, ut etiam præter vestimenta & chirothecas, inter Tabaci delicias, quotidie illum indiscriminatim habeant. Quæ de causa crediderim, iis solummodo frequentes odores speciatim obesse, quæ insuetæ sunt bene olere, ut de Septentrionalibus fertur.

Moschi quoque usum internum, non solum approbant, sed admiranda ex ipso prædicant Horatius Augenius *lib 12. Epistol. 6.* Solenander *Consil. 15. sect. 4.* Riverius *centu. 1. obs. 65. & lib. 15. Prax.* Rodericus à Castro, Mercatus, Zacutus, Montagnana, Platerus, Vorandæus, Chisneaa, aliique plures, quos in unum collegit clarissimus vir Lucas Schröckius in sua historia Moschi.

Hinc ergo deducere erit, ex mente Hippocratis, non omnino explodendos esse odores ab usu medico in foeminis, cum hoc loco expresse præcipiantur; quin contra objurgandi sunt ii, qui indifferenter præfocatas mulieres, & penè exanimes vehementius extorquere, ac affligere adnituntur fatidis, ac malè olentibus rebus, quæ planè benevalentibus ac robustis adhuc infensæ forent. Et quamvis aliquando experiamur mox à partu enixas odoramentis graviter affici, id tamen iis evenit, ex subita illa commotione, quam uterus ab ipsis, tunc temporis patitur, nimium allectus, atque in se ipso corrugatus unde excrementorum repurgationi sibi obicem facit; siquidem tunc ipsius papillæ, & hiantes cotyledones, coacti, atque in suis porulis adstricti, nequeunt lochia & impuritates à partu deponere, quæ detenta, & cum remeante sanguine commista, reliquum corporis inficiunt, unde postmodum animi defectiones, nervorum contractiones, sopores, deliria, febres & alia symptomata perniciosissima insequuntur.

Igitur acutè & suaveolentia cerebro solum infensa sunt per nares olfacta, cum immoderata fuerint, quatenus nimirum nervos & nervorum fibrillas, plus justo exagitant; & laceffunt, & quandoque etiam stupefaciunt & offendunt: qua sane ratione, plures quoque mares, iisdem plurimum offenduntur, & cephalalgis, vertiginibus, motibus epilepticis, aliisque non raro, velut ebrii, vexari solent, ut sæpius expertum est. At contra uterus, cum præsertim vacuus foetura est, ipsorum halitu vigoratur potius beneque afficitur, ut propterea facta subinde quadam expansione, sui que amplificatione, facile hiet, adaperiatur, exultet, & quod in sui cavo superfluitatum hæsit, promptè admodum

expellat: quamobrem pleraque mulieres in hunc finem, moschum, zibethum, aliaque odorata, sarculis inclusa & coxis interius alligata, gestare consueverunt.

Hinc proinde demirari subit, unde factum ut ex medicis in vulgus jam abierit, uterum odores percipere, quasi is olfactus capax foret, adeoque enorme piaculum nunc sit, in morbis muliebribus odorata quaecunque præscribere, cum tamen halitibus blande admodum olentibus, seu particulis tenuioribus & volatilibus, in se ipso exceptis, hærentes in glandulis, noxius & crassos succos, fibrarum & glandularum coarctatione, aut laxitate uterus exprimat & deponat: Verum in his cautio aliqua adhibenda, ut odorosi halitus nares & cerebrum minime pertingant, ne scilicet ingenti copia & sulphurea qua pollent, ac inebriativa conditione illud aggravent & obtundant, aut etiam vellicent & discerpant orgasmo in humoribus inducto. Caterum bene olentia etiam ex moscho & ambra cum aliis commixta, & in bolos vel pilulas redacta ac interius assumpta, multum proficient, ad viscerum, potissimum cerebri, cordis ac uteri robur, viresque adaugendas, quemadmodum plurimorum Authorum testimonio, latè nimis comprobatur, præ cæteris *in sua historia moschi* præcitatus Lucas Schröckius Medicus Augustanus.

Hunc igitur Hippocrates Aphorismum sano sensu & non universaliter verum, propè omnes tenent Interpretes; ratio etiam convincit, nam si ex sola penetratione suffitus, cognosci deberet fertilis mulier plura rationi inconvenientia oborirentur, etenim si os uteri plusquam decet, licet poterit quidem penetrare suffitus, & tamen mulier sua culpa sterilis esse: Cardanus quidem *in Commentar.* hunc difficultatis nodum solvere intendit & asserit Hippocratem intelligere de sanis mulieribus, non de his, quæ morbosæ sunt, ut supra etiam innui; verum hæc solutio & responsio non placet nec valet, quia mulier, cui ex natura magis, quam decet, hiant menses, sana esse potest, & tamen non concipere; unde potius dicendum non perpetuo neque ut plurimum sed tantum aliquando, ut mox supra dictum, veram hanc esse Hippocratis sententiam. Hunc proinde Aphor. valde celebrem & appositum fore Gentilibus & Hebræis, qui fundamento huic innitentes, possunt facile alias uxores ducere, quod nimirum sint sterilitatis inimici capitales; Id vero Chri-
stia-

stianos non decet, sed decet potius cognoscere, cujus culpa malum eveniat, an ex parte mulieris an mariti, quamvis & olim mos erat repudiare mulierem sterilem, sed iste mos dudum evanuit, & veritus est, nemini enim Christianorum licitum est per se solum facere divortium, esto ut dixi hoc Judæis, idololatræ & Turcæ usitatum sit.

Quæres quot ergo modis mulier sterilis esse & dici possit? R. mulieres trifariam steriles redduntur: *primo vel vitio sui*, & has fugere omnino convenit, neque enim ex varietate conjugis, fecundæ unquam evadunt: *secundo vel comparatione alterius*, & has permutare tempestive oporteret; fieri enim potest, ut duo viri, duabus foeminis juncti steriles sint, factaque permutatione fecundi evadant: *tertio, vel ex morbo*, qui per ætatem aut curam Medicorum, in viro vel muliere vel utroque sanatur: unde quædam in juventute non peperere, in consistente ætate factæ sunt fecundæ; in his autem permutatio non est necessaria.

Aphorismus LX.

Si prægnanti, purgationes menstruæ, cursum suum teneant, bene valere fœtum est impossibile.

Contentum seu Intentio.

De Mensibus Gravidarum.

Connexio: Cum supra Hippocrates Aphorismo 52. 53. & 55. hujus libri, ex præcedente febre, vel valida extenuatione de valetudine infantis, judicasset: In hoc præsentî Aphorismo sermonem instituit, de valetudine ejusdem, desumpto signo à Mensibus.

Hic Aphorismus ob unicam & simplicem conclusionem, non dividitur.

Consuetas sanguinis purgationes, quæ singulo tantum mense, foeminis bene se habentibus, salubriter accidunt, tempore graviditatis desinere, in fœtus alendi, & vovendi gratiam omnibus notum est, ut propterea inter cætera conceptionis & gestationis uteri signa
spe-

specialiora illud potissimum recenseatur, ut etiam docetur ab Hippocrate *hoc ipsissimo libro, Aphorismo sequente*: Quamobrem si utero gerenti, purgationes procedant, jure optimo prælagire licet, impossibile esse, genitum factum esse sanum, ut autem id omni ex parte verum sit, necesse est ut non semel, neque modicè, purgationes istæ prodeant, sed iterato & affluenter, cum alias fieri possit, ut ex modica nec iterata menstruum expurgatione, utero gerens potius releveretur, & melius se habeat, deposita nimirum aliqua sanguinis portione, in suo cursu præpedita, uterum gravante & infestante. Hinc non abs re adjectum in *Aphorismo* sub plurali numero *Purgationes*, quæ plane designant, consuetam in singulos menses evacuationem, quemadmodum idem Hippocrates expressius edocet *lib. 1. de morb. muliebr.* cum cætero qui *lib. de natura pueri* scriptum reliquerit, nihil penitus graviditatem incommodare, si uno vel altero tantum mense, modicum sanguinis profundatur. In hoc Aphorismo autem speciatim considerata erunt utero gerentis habitudo, ætas, Regio, consuetudo, victus ratio, quæ præcescit, atque alia universa, quæ graviditati obesse vel prodesse possunt: Siquidem plethorica, robusta, juvenes, otiosæ, bene alitæ & abundantem menstruum evacuationem sortitæ, nullum plane patientur ab ejusmodi, per primos graviditatis menses purgatione superabundantis sanguinis incommodum: Contra vero exiles, imbecillæ, exercitæ, & pravis eduliis nutritæ, & non nisi tenuem sanguinem expurgare solitæ: Sunt enim quæ nihilum in consuetis menstruum expurgationibus perturbantur, sed potius se ipsis leviores & hilariores fiunt; Contra aliæ non tantum utero dolent & cruciantur, sed & viribus & stomacho deficiunt, ut pene langueant, & molestiis innumeris affectæ vix non ægrotent. His ergo potissimum si accidat, à gravitate Catamemia pati, fieri nequit, ut fatum gestent sanum, quippe qui non bene valens, viribus & nutritione deficit vel in posterum ægrotabit & abortietur.

Sed præterea perpendere oportebit, unde sanguis immodice & inconvenienter profusus prodeat, an non ex uteri cavo, an potius ex vasis uterum circumperreptantibus, aut etiam ab his, quæ hæmorrhoides uteri concitare solent; etenim anatome compertum est, tria hæc vasorum genera, uterum pertingere, & sanguinem profundere solere: & quidem in utero gerentibus sæpe sæpius

- ex iis, quæ cervicem ambiunt, sanguis sponte sua ac salubriter prodire consuevit, neque solum primis mensibus, sed etiam ultimis, imò per periodos, toto ferè gestationis tempore, ut historiarum testantur, & à practicis sæpius observatur. Igitur ex vasis solum, quæ uteri cavum pertingunt, sanguis si effundatur; valedudinarum fatum, imbecillum, agrotantem, & facillimè aborturum indicabit: De qua plane purgatione intelligendus hic Hippocrates, si tamen ut dictum, ubertim & iterato profluat, cum cæteroquin levis, & modica quæcunque evacuatio non tanti sit, ut uteri gestationem incommodare, & fatum labefactare valeat, præsertim in plethoricis, in quibus etiamsi, ex internis uteri partibus sanguis prodeat, à conceptu ejusque placenta sejunctis nihilum planè officere consuevit, modo non repetat, cum aliunde effluat, quam ex vasis fetus nutritui & vitæ dicatus: Siquidem non tam ejus exitu, atque alimenti defectu, infans à fluentibus purgationibus periclitatur, quam orgasmo & commotione sanguinis uterum in ejus eruptione concitantis & relaxantis, unde postmodum illius imbecillitas dissolutio & abortus.

Hinc modo tacitè admonentur Medici, quomodo in ejusce-
modi expurgationibus, siue sinendis, siue cohibendis gerere se debeant, attenta nimirum sanguinis excreti quantitate, qualitate, tempore & loco, ac potissimum, utero gerentis habitudine & constitutione.

Quæres: Quantum sanguinis retinetur in puella, & quantum in masculo, toto gestationis tempore? Respondet Hippocrates *Lib. de natura fetus*, retineri in masculo libras 22. in femella 30. adeoque mirum non est, si in partu tantum sanguinis effluat.

Reliquæ difficultates in contextu sunt solutæ.

Aphorismus LXI.

Si mulieri purgationes non prodeant (seu cessent) neque horrore, neque febre superveniente, cibique fastidia ei accidant pregnantem esse putato.

Contentum seu Intentio.

De notis Gravidarum.

Connexio: Cum in priori Aphorismo Hippocrates dixerit, quemadmodum à fluentibus menstruis tempore gestationis procreatum foetum imbecillum fieri: Ita in hoc præsentī Aphorismo ex adverso, ab iisdem retentis, citra manifestum morbum, conceptionem jam factam, atque uteri gestationem præsentem & firmam fore asserit: Connectitur etiam hic Aphorismus cum aliis superioribus, præcipue autem cum Aphorismo 51. ubi conniventiam uteri pro graviditatis signo attulit, ut nempe præsentibus hisce signis medicus graviditatem, affirmare & conservationi foetus necessaria ordinare sciat.

Hic Aphorismus ob simplicem conclusionem non dividitur. Quemadmodum autem menstruæ purgationes, si gravidis superveniunt, sæpe numero minantur abortum, utpote quæ fatum debilem, nec bene valentem præfagierint; ita vacuis minimèque gravidis, si cessent, postquam per lunares periodos, rite & convenienter antea fluxerint, conceptionem jam secutam portendunt; quamobrem inter signa specialiora graviditatis, id præcipuum communiter recenseatur. At verò ne medici in hoc iudicio fallantur, advertit hic Hippocrates, ejuscemodi desitionibus menstruorum, neque febrim, neque rigorem supervenire debere, sed potius ciborum fastidia, ut certior conjectura uteri gestationis depromatur.

Et quidem humanis foeminis inditum à natura est, ut in singulos menses, à secundo annorum vitæ septenario (seu decimo quarto ætatis anno) per uterum sanguinis purgationes subeant, quibus

is convenienter irroratus (non secus ac fecunda Tellus, ab ingruentibus imbribus) statuto quodam tempore fecundus & fertilis evadat, indeque foetum concipiat ac edat. Et quamvis nonnullae referantur, etiam sine ullo menstruorum indicio concepisse, & salubriter quoque suo tempore peperisse, (ut ipse in propria mea Amata observavi, eam absque ulla sanguinis menstrui visa guttula quatuor proles masculas continuo concepisse & feliciter peperisse, aliamque novi amicam meam, quae usque ad septuagesimum aetatis annum & ultra, menstrua sua ordinatissime absque minima naturae molestia continuavit, tandem octuagenaria mortua est) id tamen perrarum plane est & insuetum, atque humanae conditioni valde dissertaneum, quod alias non nisi quibusdam brutorum generibus solummodo permissum est. Itaque ut humanae feminae concipere & utero gerere possint, menstruas purgationes subire debent, quae cum sponte sua defuerint, nulla praexistente morbo causa, nulloque morbo divexante, graviditatis instantis, vel praesentis indicia sunt.

Et quamvis plerique omnes fere morbi, iique potissimum, qui sanguinis vitium & partium imi ventris, ciborum confectioni & chyli distributioni dicatarum laesiones consequuntur, conceptioni & generationi impedimento esse possint; speciatim tamen, quae uterum in sua structura & ductibus afficiunt, illas perturbare consueverunt, ut cunctis notum. Fluentibus autem mensibus, per suas statas & determinatas periodos, fieri nequit, quin cetera quoque ad conceptionem & generationem destinata, bene & salubriter se habeant, ut uteri gestatio naturaliter contingat; quamobrem non immerito solius febris & rigoris hic duntaxat meminit, quamvis alia quoque accidentia retentorum menstruorum retulerit 1. *de morbis*. Accidit autem febris à retentis & suppressis menstruis (citra graviditatis suspicionem) quia irruens per arterias sanguis in uteri glandulas, sive cotyledones, cum non aequè à venis plane minoribus & angustioribus subinde excipiatur (experimento Harvei exercitat. 64. enim constat, arterias uterinas multo numerosiores esse quam venas, cum advehendi, quam revehendi, major sit usus, unde sanguis menstruus fluit, ex osculis arteriolarum, à turgescencia sanguinis dehiscentibus) fit ut data mora fermentescat, nec per fermentum uterinum,

qua decet energia subigatur, ut adaperitis osculis foras amandetur, unde remeans per venas, uterum externè ambientes universum sanguinem totumque corpus inficiat, & febrim excitet, quæ eoque perdurabit, quousque sanguis universus in debita partium aligenarum mixtura exutus, & à prædicta commotione liber redditus evaserit, quod si præterea lymphaticis & crudis impuritatibus onustus atque ab obstruente glutine, & viscoso succo plerumque acido pontico depravatus itidem prodierit, & per reliquum corporis recurrerit, planæ cunctæ aliæ ejusdem glandulæ, itemque glandulosa viscera contaminabuntur, unde postmodum malæ nutritiones, cachexiæ, atrophici chlorosis & febris, velut è genere hæcticarum exorientur, si potissimum his consentiant vitia, quæ ab ovariis turgentibus & male affectis prodire solent, de quibus non est, ut hic edisceremus.

Rigor vero, velut aliis placet horror accidit à concussione & irritatione sensilium uteri partium, ab indebita illa fermentatione laceffitarum, ut etiam ab excursu irregulari sanguinis & lymphæ sursum in reliquas corporis partes perreptantis; quin etiam lumbi, quibus ligamenta uteri lata, & posteriora alligantur, non dissimiliter percelluntur, & non raro etiam dolent, ut & scapulæ, dorsum, pectus mammæ, sicut experientia docet. Sed & ab uno utero male affecto, cætera viscera naturalia pariformiter coafficiuntur, & in suis operationibus, non leviter sæpe sæpius, cum gravi vitæ incommodo collæduntur.

Itaque cum mulieri cessant menstruæ purgationes, nec subinde febris, aut horror supervenit, ut ex his occulta saltem causa morbofa, vel morbus aliquis, ob quem illæ desierint, conjectari possit, atque ex alio capite ciborum fastidia superveniant, procul dubio de uteri fatatione, atque adeo de conceptu præsentem, vel instante judicandum erit.

Cessare autem seu penitus desinere illas oportet, veluti in alium usum destinatas; nam si per aliquod tempus detineantur, mox vero redeant, haud quaquam desisse, & cessasse dicendæ erunt, idque sive eodem sive subsequente mense: Fieri enim potest, ut ex aliqua externa causa, potissimum verò ab animi pathematibus, timore atque molestia, repente affecta mulier, istiusmodi suppressionem patiatur, ut de Phætusa & Namysia meminit Hippocrates 2. Epidem. ul-

timo.

timo. Superveniunt præterea gravidis ciborum fastidia ob consensum uteri cum ventriculo, qui propterea vel cibos consuetos nauseat, vel penitus insuetos appetit, unde morbus ille malacia & pica dicitur.

At vero quo pacto utero gerentes, & variis seu non gravidis, internoscendæ sint, commemorare hic haud inutile erit, ne scilicet hac in re, quæ plerumque magni negotii esse solet, Medici fallantur.

Et quamvis pleraque fallacia sint, ac peritos in arte non raro etiam decipiant, probabiliora tamen esse consueverunt, quæ mox referuntur. Primum autem ex his, quæ sensim utero gerentibus accidunt atque citra quamcunque causam manifestam superveniunt, esse solet, ut cibos quosdam consuetos fastidiant & nauseent, vel etiam evomant, alios vero insuetos & malos avide appetant & comedant, puta Carbones, calcem, corium, cretam, ceram, carnes crudas &c. id quod sub nomine Malaciæ seu Cittæ, morbosæ nimirum famis, appellatur, ut aliquando toto tempore gestationis, aliquando vero ad primos, tres, vel quatuor menses, durare solet. Mammæ etiam plerumque ipsis obturescunt, extuberant, atque impense dolent, etiamsi leviter contrectentur, illarumque papillarum color è purpureo in fuscum mutatur, pectoris venæ ampliores redditæ nigricant: Cervix calidior observatur, nec non colli venæ & arteriæ attolluntur ac turgent; sed & aliquibus maculæ ruffæ, veluti lentigines, in facie apparent, quin imo vultus ipse paulatim à sua speciositate demittitur, conniventibus non nihil oculorum palpebris, cum albugine eorundem permutata, præter capitis gravitatem, aut hebetudinem, totiusque corporis gravamen, pulsum celeritatem, atque frequentiam, cum ex doctrina Galeni graviditas, temporanea quædam ægritudo appelletur. Quod si postremo menstruæ purgationes penitus detineantur, citra manifestam, sensibilemque ægrimoniam, atque subinde ilia tumeant, venter sensim sensimque attollatur, ac retundetur, cum naturali mollitie, haud quaquam de graviditate amplius vereri licebit.

Quibus igitur à retentis consuetis menstruationibus in foeminis salubriter degentibus, hæc signa accidunt, plane de uteri gestatione, verisimiliter judicare fas erit; at vero si postea menses prodeant, sumumque cursum ad longum tempus servant, impossibile ait Hippocra-

tes, foetum in utero genitum sanum esse: Et quidem fieri nequit, ut foetus sanus sit, cui uteri os internum hiat, & vasa sanguifera cum placenta ipsa laxantur & sanguinem fundunt: Constat enim ex Anatomia, placentam uterinam, ita tenaciter utero adhærere, ut universum sanguinem per vasa umbilicalia, in vitam & nutritionem foetus transferat; cum ergo sanguis ex his funditur, procul dubio ipsum laxari, aut etiam discindi necesse est, quod sine ejus interitu fieri nequit.

Necesse est autem, ut sanguis affluenter atque ad longum tempus prodeat; quamobrem si modice tantum, & non diutius effluat, citra periculum detineri foetus poterit. Sed & ab internis uteri venis cavum ipsius pertingentibus profluere sanguis debet, nam si fortasse (ut non raro in praxi observatur) è collo uteri, atque ex venis vel arteriis ejusdem externis emittatur, citra ullum incommodum gestationis, imo & utiliter prodibit, quemadmodum & à Galeno, ceterisque vetustioribus Medicis est animadversum utpote ex venis, quas cruales appellant, quæ non raro in quibusdam succiplenis mulieribus, ac sedentariam vitam ducentibus, varicosæ etiam fieri solent.

Cæterum intelligendus Aphorismus de his quæ menstruas purgationes, juxta consuetam naturæ legem in singulos menses subeunt; nam sicut in plerisque brutis animantibus, illæ nullæ sunt, ita in nonnullis humanis fœminis accidisse memoratur, quod nunquam menstruas evacuationes passæ (ut mox supra contestatus sum) nihilominus conceperint, & sanos & vegetos peperint Filios, quamvis ut dixi id perrarum est.

Reliquæ difficultates circa hunc Aphorismum moveri solitæ, in contextu solutæ sunt, aut apud Cardanum legi possunt.

Aphorismus LXII.

Quæ frigidos & densos (seu spissos) uteros habent, non concipiunt: Et quæ præhumidos uteros habent, non concipiunt: extinguitur enim in ipsis genitura:

ra: & quæ plus æquo siccos & adurentes (seu præcalidos) nam alimenti defectu semen corrumpitur: quæ vero ex utrisve moderatam (seu mediocrem) nactæ sunt temperiem ea facunda evadunt.

Contentum seu Intentio.

De Pathologia sterilitatis fœmininæ.

Connexio: Cum pluribus in præcedentibus Aphorismis ostendisset signis Hippocrates, quæ ratione sterilitas dignoscatur: In hoc præsentè Aphorismo de causis sterilitatis agit.

Hic Aphorismus duas ponit conclusiones, quarum *prima* dicit, Intemperatos uteros steriles esse; *secunda* vero fœcunditate valere: Prima autem conclusio tres rursus continet conclusiones de intemperatis uteris.

Quandoquidem autem uterus, locus continendo fœtui destinatus, plurimum confert ad illius conceptionem, & si bene vel male conformatus est, illam vel promovet & adjuvat, vel contra impedit & extinguit, propterea Hippocrates considerans ejusdem aptitudinem vel ineptitudinem inquit, *frigidos & spissos seu densos uteros habentes non concipere, ut & neque præhumidos & laxos, aut siccos & adurentes, bene vero sortitas moderatos, & medios inter utrosque.*

Et quidem præprimis frigidos ineptos esse generationi palam est, cum vita in animantibus, potius calore seu vi & spiritu quodam calorifico fermentante, inferatur, & conservetur cordis motus; à frigore vero & frigorificis, vel nullus fit conceptus, vel factus torpet & emoritur, unde dicebat Aristoteles 2. de generatione animal cap. 3. *inest in semine omnium, quod facit, ut facunda sint semina, videlicet, quod calor vocatur, idque non ignis, non talis facultas aliqua est, sed spiritus.*

Spissos vero ac densos intelligere oportet, non tantum quos plerique in suis ductibus impervios, ac impermeabiles interpretantur, quique scilicet genituram, tum masculinam tum fœmineam admittere nequeant; sed præterea qui in suis porositatibus, glandulis

lis ac textura, patenter molles atque expansioni & amplificationi faciles non sunt; siquidem non solum per arterias ac venas sed multo magis per tubas Fallopianas dictas, per cotyledones & glandulas ac per hiantes porulos, & convenientem texturam foeminarum uteri ad conceptionem conferunt. Nuperis namque observationibus Anatomicorum, ad peragendam conceptionem, debent primum ova ab ovariiis abrupta, atque foecundo maris semine foetata, per alterutram Tubarum, in cavum uteri deponi, ibique per molles, sed turgentes ejusdem glandulas alligari, ut ope placentæ uterinæ foetus intra propria involucra, seu secundinas efformatus, alimentum ut incrementum suscipere possit. Quare nisi hæc omnia in utero convenienter adaptata ac disposita pateant, conceptio & efformatio procul dubio nulla fiet: Itaque cum uterus spissus ac densus est, ut mollem & patulam, in suis vasculis texturam, & facilem adhærescentiam non habeat, nullatenus conceptioni promovendæ aptus erit.

Sic pariter siccos & exsuccos & multo magis adurentes seu prævalidos uteros habentes, idem infortunium sortientur, cum ab ariditate & ingenti calore, longe majora & graviora incommoda suboriantur, præter ea, quæ de defectu alimenti, & seminis corruptione hîc ab Hippocrate memorantur, ut liquet.

Oppositis vero de causis, quibus uteri præhumidi sunt, & mucositatibus oppleti, infæcundæ fiunt, etenim non solum in his (ut notat Hippocrates) genitura extinguitur, verum etiam ova, aut utero non coalescunt, aut molliâ & flaccida dissolvuntur, aut etiam multo humore obruta, suffocantur, aut interno uteri cavo non adhærescentia, exsoluta diffluunt & evacuantur; unde frequens in istiusmodi foeminis à primo conceptu defluxus.

Accidit quod semen istius virile ob hujusmodi præhumidis impuritatibus oppressum, adeo retunditur & hebetatur, ut inefficax deinde redditum non solum ovum foecundare, non valet, sed simul cum eo dilutum effluit & foras educitur; hinc in universum conceptum vel adimunt vel recusant uteri imbecilles, frigidi, extenuati, adiposi, præhumidi, distorti, occlusi, angusti, laxi, torpidi, insensiles, plorantes, nimiumque aridi, præfervidi, exsucco, semperque patuli, aut facile dehiscences.

Mediæ igitur & moderatæ constitutionis uteri esse debent, ut conceptui promovendo, itemque sustinendo, fovendo & alendo ad maturitatem usque habiles sint beneque valentes. Quare quæ ejusmodi beneficium sortitæ sunt, & mediocrem in omnibus constitutionem & temperaturam adeptæ, hæ fecundæ sunt, id est fecundari aptæ. concurrentibus simul una cæteris aliis ad conceptionem requisitis jam antea memoratis.

Cæterum notas uteri bene vel male affecti, exactè præ cæteris investigat, peculiari quodam opusculo Marcus Antonius Ulmus; & quidem frigidi inquit, esse pubem raram, menstrua tarda, ingratam venerem, difficilem conceptionem, uterum parvum, pudendum molle, frigidum & exile, lac modicum & facile coagulabile: calidi vero ex adverso.

Quæres: Quæ ergo fæminæ in genere ad cõceptum sint aptiores? & parvæ magnis graciles crassis, albæ rubicundis, nigræ lividis, &c.

Quæres 2. An omnis sterilitas curari possit? & omnis accidentalis curari potest excepta ea quæ vitium à natura contractum habet. Bene tamen advertendum an vitium ex muliere an marito proveniat.

Quæres 3. Quo pacto gubernanda sit mulier, ut concipiat ac genituram & genitum contineat & hoc late & diffuse docet & explicat Hippocrates *Lib. 1. de morbis mulierum num. 26.*

Aphorismus LXIII.

Par est de maribus ratio: aut enim propter corporis varietatem, spiritus foras dissipatur (seu extra fertur) ita ut genituram (seu semen) ejaculari nequeat (seu non transmittat ad os) aut propter densitatem humor foras non profilit, aut propter frigiditatem non accenditur, ut eo loci coacervari (seu concrecere) possit: aut propter caliditatem hoc idem ipsum usu venit.

Contentum seu Intentio.

De Pathologia sterilitatis ratione Marium.

Connexio: Cum in antecedente Aphorismo Hippocrates, de causis sterilitatis in muliere dixisset: In hoc præsentis Aphorismo

rismo de illis causis sterilitatis quæ viris obtingunt sermonem instituit.

Hic Aphorismus cum aliquot conclusiones contineat, secundum illas etiam in quatuor partes dividitur: *Prima* de raritate corporis: *Secunda* de densitate humoris: *Tertia* de frigidityte: *Quarta* de caliditate ejusdem agit.

Sive autem hic Aphorismus inter genuinos Hippocratis referri debeat, sive inter spurios, non multum hic intererit disceptare: Galenus quidem hunc Aphorismum, ab Aphorismis genuinis Hippocratis expungit, quippe inquit, si ad verbum intelligatur falsus sit, neque sapiat Hippocratis doctrinam; quem & alii Interpretes secuti, cum quoque vel plane omiserunt, vel cum priore junxerunt, vel inter spurios retulerunt, verum licet in eo memorata Hippocraticam doctrinam sapere non videantur, utile tamen quid continent, & saltem medicos admonent, solere nonnunquam sterilitates non à foeminis, sed à maribus provenire; & quidem non satis est ad conceptionem & formationem foetus peragendam, uterum in foeminis apte dispositum, beneque esse conformatum juxta ea, quæ præcedenti Aphorismo explanata sunt, sed præterea necesse esse, ut semen, quod à maribus suggeritur, prolificum & facundum sit, valeatque foemineum ovum, & rudimenta fatus, in eo prædisposita in motum deducere, atque ad nutrimentum & debitum incrementum suscipiendum habilitare, ut inde vitalis fatus exorians, cunctas operationes exercere, ac tandem in lucem prodire queat; Quamobrem sana ratione, quicumque is fuerit, qui sententiam hanc Aphorismis interferendam existimavit, marium vim & facultatem considerans, similiter in generatione, deficientem esse posse, adjicere voluit, illamque in sterilitate considerandam, pari ratione, ac de foeminis dictum est, & præsertim vitio seminis, quod, vel ob defectum spirituum, facundum & prolificum non est; vel ob crassitiem & spissitudinem ejaculari nequit in uterum; vel quia ob frigiditytem in concoctum & dilutum vel denique quia ob validitatem facile extenuatur & evanescit: quippe semen, ut facundare ac generare valeat, debet esse spumosum ac spiritibus redundans, tenax & consistens, ut hæreat; non vero crassum, spissum ac durum, ut torpeat ac lapidescat; neque frigidum, ut crudum & dilutum sit; neque adeo calidum & acre, ut exolvatur in auras, & uterum vellicet potius,

potius, quam alliciat. Attulit autem hic Author has speciatim feminis conditiones, veluti magis proprias, & magis ad generationem promovendam requisitas, omittens alias has consequentes, vel ad istas facile reducibiles, eo potissimum ductus argumento, quo cunctis notum, semen virile, ut generationem promoveat, debere omnino in uterum primo ejaculari, deinde retineri, mox diffundi, ac tandem fecundare; quæ plane conditiones, in adjecto Aphorismo comprehenduntur, ut consideranti patet. Cætera quæ ad pudenda pertinent, sive ejaculantia, sive præparantia, & perficientia, sive conservantia semen, veluti instrumenta eidem gignendo, vel immittendo prærequisita, tacite sub illis comprehenduntur, ut propterea ad conficiendum semen, prædictis conditionibus præditum, facile quis præsupposita credat.

Quamvis autem Lucretius *Lib. 4. de natura rerum* dicat dissenteanea cæteroqui semina, posse tamen consentanea fieri, atque adeo generationi idonea & per opportuna, si nimirum quod in semine foemineo frigidum & torpidum est, à masculino incalescat, & vigoretur, cum sæpe sæpius visum sit, steriles creditas, fecundas ex aliorum concubitu evasisse, atque vitaliter peperisse; si ovum nihilominus, quod ab ipsis suggeritur, apte temperatum, & in rudimentis fætus rite & recte prædispositum non sit, proculdubio à virili semine, cujuscunque conditionis illud sit, fecundari non poterit, ac propterea frigus illius, nulla ratione ab alterius calore, foveri ac vigorari, vel contra acritas & fervor, opposita virtute temperari; siquidem facilitas, vel difficultas utriusque, in conceptione neutiquam dependet à seminum tenuitate, vel crassitie vel alia qualitate, sed ab aptitudine vel ineptitudine, partium in iisdem conformatarum, atque ab invicem agentium & subigentium promptitudine & habilitate, qua propemodum ratione fit, quamobrem aliquorum animalium semina, mutuo inter sese commixta, concipiant & generent, aliorum verò minime: quod & in plantarum insitione, atque in vegetabilium omnium seminum satione similiter experimur, ubi scilicet plantæ ipsæ inter sese, vel earundem semina, cum Tellure consentiant vel dissentiant, uti apud Philologicos legere est.

Vitium ergo præterea in maribus (quoad generationem) vel ad conformationem vel ad dyscrasiam pertinet vel ad utrumque: quo ad

conformationem attinet, membrum brevius quam decet, semen intra uterum ejaculari nequit; unde non statim colligere & determinare oportet, si semen ex utero foras exit, clausum esse, cum ex brevitate membri id provenire possit, sed & ex obliquitate meatus: Verum si longior sit meatus quam decet, non concipit mulier, quia semen refrigeratur in illa longitudine, & non ita ab utero comprehenditur. At vero si magnum admodum fuerit membrum virile, ut dolorem inducat mulieri, dolens uterus semen amplecti nequit: & si vasa sint admodum lata, per quæ spiritus meat, genitura, quo minus penem erigat, impeditur; quia antiquam penis semen fundat, deprimitur, quod dissipentur spiritus ob raritatem, & sic ad erectionem penis in opere venereo continuandam non sufficit, id quod maxime & ordinarie obvenit senibus & ad actus veneris jam effoetos.

Objectiones & difficultates de hac re in contextu hujus & aliorum antecedentium Aphorismorum sunt solutæ.

Aphorismus LXIV.

Lac præbere (seu dare) capite dolentibus malum; malum vero & febricitantibus & quibus hypochondria elata (seu suspensa) murmurantia, & siticulosis; malum item quibus biliosa dejectiones, febres acutæ, & copiosa sanguinis evacuatio facta est. Convenit vero tabidis, non admodum valde febricitantibus lac præbere, & in febribus longis & languidis, dum nullum, ex supradictis signis adsit, & præter rationem extenuatis (seu consumptis.)

Contentum seu Intentio.

De Lactis noxa & utilitate.

Connexio : Cum in antecedentibus Aphorismis Hippocrates de affectibus prægnantium & quæ ad uterum pertinent, egisset, & de mammis quoque multa scripsisset & docuisset: nunc in hoc præ-
sente

sente Aphorismo agit, quod mammis familiare est, explicans lactis commoda & incommoda, juvamenta & nocumenta.

Hic Aphorismus duas habet conclusiones seu in duas partes dividitur: In *prima* docet, nocumenta lactis, seu quibus nocet: in *secunda* vero juvamenta, seu quibus lac convenit & prodesse potest.

Lactis ergo usum considerans in hoc Aphorismo Hippocrates ea potissimum commemorat, quæ ab illo abstinendum suadent, ne scilicet pro beneficio, quod subinde ab eodem speratur, grave damnum corpori accidat, & majora mala assumentibus inducat: Quippe ejus est lac conditionis, ut quemadmodum salubre admodum est, & conducibile satis iis, qui bene stomacho valent, nullisque pravis humoribus sunt referti; ita ex adverso, maleficientissimum evadit, quibus malus inest corporis apparatus, & stomachus in alibilem succum commutando non est idoneus. Sic planè experimur in lactentibus puellis, salubritati, nutritioni & augmento ipsorum facile conferre, si ventriculus omnino repurgatus inveniat; at contra penitus officere, imo corrumpi, aut acescere, & mille alia prope modum mala deinde afferre, si is alienis aut degeneribus succis infarctus sit, cum cibis potissimum heterogeneis vesci ceperint, unde postmodum tormina ventris, dolores, febres, alvi fluxus, vomitus, lumbrici, motus Epileptici, idque genus alia iisdem super accidant. Quoniam vero frequentissimus apud veteres erat lactis usus, & consuetus innumeris propemodum morbis adhiberi, ut ex eodem Hippocr. deducitur, ne proinde damna extemeraria atque importuna ejusdem exhibitione imminencia provenirent, admonet hic, quibus in corporibus evitari debent & specialius recenset capite dolentes, febricitantes, hypochondriis affectos, crudos, flatuosos, siticulosos & longa hæmorrhagia divexatos: Commendat vero, tabidis, nequè multum febricitantibus, sed potissimum in febribus diuturnis & parvis, minime vero acutis & vehementibus; & denique in omnibus, qui præter rationem consumpti, & extenuati facti sunt.

At statim quis hic dubitabit, quomodo fieri possit, ut lac innocuæ propemodum, & temperatæ naturæ, blandæ & suavis conditionis, atq; in alimentum primum, cunctis animantibus concessum, facilis digestionis, & prompti atq; consentanei alimenti tam malum & omnino nocuum, his omnibus evadat, qui cæteroqui istiusmodi cibis indigent,

ut cito reficiantur, humectentur, temperentur, citra ullam ventriculi validam actionem, & passionem, præsertim quia ipse Hippocrates 1. *Aphor.* 16. edocuit febricitantibus omnibus victum humidum convenire, qualis profecto lac est: Insuper quamvis lactis natura, materia, & generationis modus nondum satis perspecta sint, cum veteribus sit creditum à sanguine; aliis cum Prospero Martiano exchylo; Warthono & aliis, ex commixtione chyli cum liquore nervorum illuc corrivantium; & Barbato ex sanguinis sero proficisci; Undecunque tamen illud oriatur, nil videtur mali quidpiam in se continere, quod istis in Aphorismo memoratis nocere possit, cum conducibilius semper sit alimentum præparatum concoctum & bene dispositum, quale lac est, quam impræparatum & indigestum.

Analysi præterea (id est demonstratione lactis anatomica aut medicâ institutâ, cunctis patet, in tres partes dissolutum illud abire, nimirum in serosam, butyrosam & caseosam, quarum quælibet summo cunctis commodo esse solet; sed & febricitantibus ipsis serosa humectando ac temperando, butyrofa nutriendo, plurimum conferre potest, quibus plane tria hæc necessaria videntur; quin & Diarrhæas, dysenterias, aliasque similes morbosas dejectiones in Epidemiis curare pluries fatagit idem Hippocrates lactis beneficio, & quod majus 2. *Epidem. sect.* 5. ad aurium dolores lacte utendum inquit: & *lib. de internis affectionibus* ad alios plures morbos adhibet; ut cætera hic omittam, quæ à plerisque aliis experimenta referuntur lactis ope utiliter & salubriter diversis in morbis observata, ut propterea non mirum, si illud veteribus tantopere fuerit in usu, quemadmodum ex eodem Hippocrate pluribus in locis colligere est: quin imò solo lacte, plurimos totam vitam sustinuisse scribunt Athenæus & Plutarchus, Strabo &c. unde Ovidius 4. *fastorum*.

Lacte mero veteres usi narrantur & herbis.

Galenus etiam rusticum quendam memorat, qui plusquam centum annos vixerat, lacte usus, fuere & alii Getæ, Scythæ, Nomades, ob id Galatophagi dicti, ut & nunc Belgæ, Helvetæ & Septentrionales populi, qui in deliciis illud habent, & cum omnibus ferè cibariis commiscent.

Verum per hoc idem, quod lac temperatæ naturæ est, atque pri-

primum animantium alimentum, facile subigibile & alterabile, cum magna præmeditatione est exhibendum, & non nisi iis, quibus omnis metus abest, ne acescat corrumpatur, atque in deleteriam naturam abeat, juxta vulgatum illud Philosophorum, *corruptio optimi pessima evadit*; quo circa scite admodum scripsit Hippocrates *lib. de alimento*, sanis corporibus alimentum fieri, at vero morbosis ex adverso, venenum evadere. Atque hinc animantibus omnibus in prima ætate pro alimento à natura concessum, quoniam per id temporis mandendo inhabilibus, ventriculi fermentum, lene admodum est & temperatum, & durioris texturæ cibos dissolvere potens non est, & ubi primum, editis dentibus, illos conterere valent, lacte destituuntur? quæ vero animalia statim, ac in lucem edita, hos capere & conficere possunt, lactificatione privantur.

Neque alia de causa infantes & nuper editi, cruditatibus ac vermibus obnoxii fiunt, adeoque ventris torminibus, dejectionibus, motibus epilepticis afficiuntur, cum nondum ab uberibus depulsi, alterius conditionis alimenta assumere incipiunt, nisi quia ex mala eorundem cum lacte miscela utrumque corrumpitur & accessit, ut ex praxi ipsa satis clare patet. Hippocrates autem victum humidum seu liquidum febricitantibus commendavit, sed neutiquam tam facile corruptibilem, atque in pravos humores transmutabilem, qualis lac est, sed potius qui febrili causæ, atque indebitæ ejusdem fermentationi convenienter adversetur: Auribus vero dolentibus lac extrinsecus admotum aut inditum, non vero assumptum is commendavit, quemadmodum Galenus ipse utendum admonet 3. *de compos. medicament. secundum loca*. Atqui coctum lac pluries exhibitum invenitur, non crudum apud veteres, nisi solum ad alvum subducendam, & in iis, qui febre caruissent: lac etenim decoctum, utpote suo sero orbatum, vim quandam adstrictoriam adipiscitur, unde fluenti alvo plurimum opitulatur. Qui vero lacte à prima ætate pasti sunt, ac pro cibo usi ex consuetudine contracta, nullum planè incommodum perceperunt: & ô utinam lac solummodo in cibum sumere cuncti homines contenti forent, profecto non tam facile tot, tantisque morbis, à multitudine & varietate ciborum laborent: quamquam Galenus *Cap. 5. de sanit. tuenda cap. 7.* quidam alios memoret, Agricola illum sub spe longævitatæ prorogandæ imi-

imitatos, ab usu ejusdem graviter affectos. Cæterum etsi lac ex chylo, aut sanguine oriatur, longe tamen ab illis differentem sortitur conditionem, ut ex inita eorundem analysi satis notum est; præterquam quod ab his, quæ intra corpus fiunt, ad ea, quæ foris accidunt, aut peragi possunt, non valet illatio, mutatis & variatis subinde componentibus, aut concomitantibus corporis cujuscunque compagem: id quod perspicuum in lacte est, nam è mammis elicatum, atque aëri expositum statim alkalinum spiritum amittit, cæterarum lactis partium moderatorem, ut in sanguine educto quoque accidit.

Hinc modo facile deducitur, quare capite dolentibus, nocuum lac esse dicatur, quia cum dolor plerumque fiat, ab acri acido, pungenti & vellicante humore, qui sæpe sæpius è ventriculo, & cæteris visceribus naturalibus male affectis dependet, is procul dubio usu lactis augeretur potius quam retunderetur. Lac insuper sua natura fomosum, vaporibus caput & cerebrum plus justo replet, imo & sopore aggravat & inebriat; unde recte Lucretius lac vino comparans *1. de naturarum ait*: Hinc nova proles.

Ludit, lacte mero mentes percussa novellas.

Quamobrem ex mora, contracto ibidem acore graviora procul dubio damna inferet. Neque distinguere hîc licebit, num caput Idiopathice & sympathice doleat; nam cum indifferenter ab Hipp. scriptum sit, *caput dolentibus*, plane de utrisque intelligendum erit, cum in utrisque causa, dolorem excitans, æque foveatur & increbescat, ab acore scilicet in humoribus excitato; unde Galenus *3. de aliment. facult. cap. de lacte*, sumptuos lac, dixit indiscriminatim oportere capite præstare, ac præpotentes esse, nulla facta eorundem distinctione. Non tamen inficias iverim, longe magis lædi eos, qui idiopathice capite dolent, quam qui sympathicè, quia illis præter dolorè, caput imbecille esse solet, & malarum impressionum promptius susceptivum. Etsi præterea de capite dolentibus specialiter meminero, non tamen aliis morbis capitis affectos exclusit unde delirantes, lethargicos, epilepticos, vertiginosos, adhuc vigiles, eandem ob causam hoc loco comprehensos, sub capite dolentibus, intelligere oportebit: siquidem his quoque contingit, nimis vaporibus caput gravari & offendi, atque humorem acredine compungi & vellicari. Porro licet lac universum & secundum omnes sui partes acorem contrahat, & ejusmodi mala inferat, magis tamen per butyrosam & caseosam nocet, quia ex his concrefcit, atq;

par.

partibus adhæret, aut in deleterios humores corruptum abit. Quamobrem quod serosum magis est, quale asininum ab authoribus, ubi in ægris convenit, commendatur, ad eluendum scilicet, detergendum & laxandum, nitrosa qua pollet conditione. Obesse quoque lac dicitur febricitantibus, & quidem iis, qui humoralibus & putridis, ut vocant febribus corripiuntur, cum infra dicat illud tabidis convenire & non multum febricitantibus, quales hectici & marasmo affecti, ex longis & diuturnis pusillis febribus; in illis etenim tum ob febrilem indebitam & excedentem fermentationem, tum ob sanguinis vitiosam diathesim, qua digestivum stomachi fermentum, pari vitio affectum est, tum ob excrementorum & pravorum humorum apparatus, coctiones & secretiones nullæ vel malæ fiunt, idcirco prompte admodum lac in nidorem aut acorem vertitur, adeoque corruptum, ac in alienam naturam degeneratum, præter febris & febrilis causæ augmentum, mille alia symptomata parere potest, vomitus, cardialgias, singultus, diarrhoeas, dysenterias, intestinorum tormina, aliaque febricitantibus perniciosissima.

Malum præterea dicitur lac iis, *quibus hypochondria suspensa murmurant*: nomine autem hypochondriorum, intelligenda sunt omnia viscera in imo ventre utrinque posita, jecur, cystis, lien, pancreas, pylorus, ventriculus, uterus, intestina; ab his enim male affectis, tumidis, elatis, tensis, duris, obstructis, aut inflammatis, plane constat lac assumptum facile vitari, & vel acescere & coagulari, vel corrumpi & putrefieri, unde postmodum mala innumera: Signanter autem hic meminit eorundem *suspensorum & murmurantium*, quia hæc duo solent esse specialiora male affectorum hypochondriorum symptomata, de quibus latè ex Diocle Galenus 3. *de loc. affect. cap. 7.* & ante ipsos Hippocrates *lib. 2. de morbis* & alibi. Siticulosis pariter lac obesse solet, sed non quibus sitis ex absorptione humidi orta creditur, nam his ut infra constabit, suapte natura convenit & confert, sed quibus vel à febre, vel à corruptis cibis & pravis succis in ventriculo congestis, saliva crassiori, & salsa reddita, cæterisque similibus, frequens ac diuturna sitis infensa est, hi etenim revera vocantur Siticulosi, siti equidem morbofa & molesta, quæ nec largis potationibus, nec frigefacientibus & humectantibus remediis infringitur aut sedatur nisi causa illam efficiens ac fovens penitus fuerit prius abolita. Neque quis putet supervacaneè adjectum, etiam siticulosis lac

Ppppp

esse

esse nocuum, quod fortasse poterat implicite sub febricitantibus contineri : Nam adhuc sine febre molestissima sitis non raro urget, ut in Hydropicis & Scorbuticis, Picrocholis & biliosis, sicuti Hippocrates ipse *Lib. de rat. victus in acut.* dulcia omnia inimica esse dixit & sitim movere, ita quoque lac interdictum credere est, quod facile in his amarescat, acrem & felleam induat conditionem, quare his sitim potius auget, quam minuit.

Eadem de causa obesse dicitur his, qui febricitantes biliosas patiuntur dejectiones: adjunxit autem febribus acutis biliosas dejectiones; non quod acute febricitantibus conveniat, quibus malum jam antea dixerat, sed quod magis noceat, si biliosæ dejectiones illis conjungantur. Verum biliosas hic dejectiones intelligere erit, non quæ solo croceo colore tales videntur, quales in lactentibus, sed quæ re ipsa acres, & acedo-muriaticæ sunt, ventriculi & intestinorum labem indicantes; quibus vero ob peculiarem ciborum, aut medicamentorum qualitatem flaventes dejectiones accidunt, ut ex malis persicis, peponibus, croco, rhabarbaro, & cæteris passim experimur, vel etiam ex speciali quadam ventriculi constitutione à natura inditum, fæces croceas, aut aliter coloratas egerere, lactis usus obesse non poterit, si cætera non dissentiant, & stomachus bene se habeat: at vero vomitus qualiscunque ille sit, lactis usum prohibet, & languente præsertim ventriculo.

Non tantum autem cum biliosæ infestant dejectiones, lac dare malum, sed etiam ubi sanguinis multa dejectio facta est; siquidem à sanguinis immodica evacuatione, non solum languent vires, & digestivum stomachi fermentum hebescit, unde facile lac acescere potest; sed multo magis illud acidum & depravatum indicatur, veluti à sanguine vitiatò & male affecto proveniens, qui planè talis erit, si hæmorrhogiam intestinalem excitat, de qua proculdubio intelligendus hic Hippocrates, multi sanguinis dejectionem memorans, ab aperto nimirum sanguifero vase ut in fluxu hæmorrhoidali dicto; cui inhærens Celsus *lib. 3. cap. 22.* Lac his pro veneno esse ait.

Hactenus quibus lac noceat, nunc quibus conveniat exponit. Et quidem iis primum, qui Tabidi sunt, sed non tamen multum febricitant: At qui pro Tabidis hic intelligendi sint, prænosse primum oportebit, nam Tabidos multifariam intelligi solere, apud Medicos
palam

palam est ; quin & plerique Atrophia, Marasmo & simili emaciatione confecti , non raro tabidi quoque appellari consueverunt ; quamobrem non immerito Mercurialis *varia Lectionum lib. 6. cap. 22.* etiam ex Hippocratis doctrina, indiscriminatim pro Tabe, insignem quamlibet corporis emaciationem ac consumptionem apud Græcos & Latinos Scriptores acceptam interpretatur. Sed & multo antea Celsus C. lib. 3. cap. 22. ad tabem retulit quoque Atrophiam & Cachexiam. Verum ex græco Codice Phthisi laborantes ii intelligendi sunt, quibus ex pulmonis ulcere Tabescere contigit ; nam Phthisis strictè sumpta communiter à Medicis describitur, totius corporis extenuatio, cum febre lenta, ex ulcere pulmonis proveniens, quam & specialius Athenienses Phthoën appellare testatur Galenus 7. *Aphor. comment. 16.* Quanquam non me lateat etiam generalius acceptam significare consuevisse, quamlibet corporis extenuationem, à quacunque causa, & cujusvis partis affectione procedentem, unde multoties confusa ponitur cum marasmo, marcore, atrophia, & tum ab aliarum partium ulcerationibus, tum ab immoderatis evacuationibus, quorumcunque humorum, aut inutilium excrementorum retentionibus, obstructionibus, tumoribus, ossium luxationibus &c. quemadmodum præ cæteris nuperrime collegit, Morton lib. de Phthisi, quin & Galenus ipse, non solum totius corporis, sed & solius pupillæ oculi corrugationem, & angustiam cum exiccatione, Phthisim appellare non est veritus 10. *de usu partium Cap. 5. & 3. Aphor. comment. 16.*

At mirum quomodo Hippocrates Phthisicis, ex pulmonum ulcere, lactis usum commender, cum cæteroqui ulcus quodlibet, non humectatione sed exiccatione egeat, ut scilicet pus inde emergens detergatur, & pars ulcerata consolidetur, ut pluribus ostendit Galenus in *methodo medendi*: Quamobrem & plurimos novi, à lactis usu copiosius pus exspuissse & ulcus pulmonis sorduisse magis, cum citiori ægrotantium internecione. Verum commendatum veteribus lac in Phthisicis crediderim, non quod omnino profuerit, sed quod creditum iis sit, desumptis ex phthisi indicationibus convenienter satisfacere posse, cum alia per id temporis medicamenta simul una iis conferentia minimè innotuerint: cum enim Phthisim ab ulcere pulmonis tria comitentur, Pus, Ulcus & Marcor: Indè

fit, ut tria quoque ad illius curationem expostulentur : nimirum pus detergentia, ulcus conglutinantia, & marcorem restaurantia ; quæ plane ope lactis, specialius consequi posse videntur: quippe serosa sui parte, pus in pulmonibus collectum abstergitur, parte caseosa ulcus conglutinatur atque ad cicatricem perducitur, & parte butyrofa marcore confectum corpus reficitur & impinguatur ; quemadmodum lactis usum, ad Phthisim curandam, non immerito summis laudibus extollebant, atque unicum ejusdem remedium existimabant, ut & ad usque nostra tempora actum & putatum est. At nunc cum vulnerariis, balsamicis, resumptivis propemodum innumeris abundemus, ex vegetabilibus, animalibus & mineralibus petitis, sub forma elixiriorum, electuariorum, extractorum, pulverum, pilularum & similium, quibus citra quamcunque noxam empycis & phthificis opitulamur, lactis usus, non bene apud recentiores audit, eo quod majora semper incommoda ferat, nec re ipsa in salutem ægrotantium cedere observetur ; Hinc ergo moverint, qui ne quidem latum unguem à vetustioribus rei medicæ cultoribus recedere audent, quam fuerit illis curta suppellex, cum jam nostris temporibus, sagaci recentiorum industria, tot & tantorum medicamentorum simplicium & compositorum, numerosa accessione, nimium locuples medicina evaserit.

Quod si unquam lac Phthificis videatur exhibendum, sit illis stomachus bene valens, omni impuritate vacuus, ætas patientis puerilis, alvus adstricta potius quam laxa, sputum purulentum, vel nullum, vel modicum, nulla febris, vel levissima, citra viscerum obstructionem, duritiem vel tensionem, præter ea, quæ in his considerata notavit Hippocrates *Lib. 2.* prædictionum.

Cæterum inter lactis species (licet Authorum variæ & differentes sint opiniones) præcellit humanum, utpote naturæ nostræ consentaneum, quod cum etiam proxime à manibus exugatur, procul dubio conducibilius est, nulla scilicet evolante parte volatili & alhalina, quæ cæteras moderatur & temperat, imo ab acore & putrefactione tuetur, & ventriculo concoquenti, mirum quantum opitulatur : necesse autem est, ut lactans mulier, non tantum optimis & conferentibus eduliis vescatur, verum etiam onani

omni animi pathemate libera sit, juvenis, cathameniis libera, sanæ constitutionis, & quæ a tribus vel quatuor ad summum mensibus pepererit: Quamquam Helmontius, non irrationabiliter contendat: illud præ cæteris, non tantum adultis, sed & recens natis, valde nocuum existimandum esse, eo quod magna incommoda subeat, & inferat, ob varias nutricum animi perturbationes. Humano lacti succedit asininum, quia serosius, postea caprillum, aliquanto consistentius, conferente in id quoque plurimum loci conditione, tum ob aëris, tum ob pascuæ salubritatem, quemadmodum de Stabiis speciatim meminît Galenus *5. methodo cap. 12.*

Ovillum denique, vaccinum, bubulum, equinum, inferioris notæ sunt, licet ob caseosæ partis abundantiam magis nutriant, & impinguent; unde priscis temporibus Athletas caseo ex calathis victitatos refert Pausanias, ad robur & corporis nitorem augendum; & Scythas equorum lacte coagulato & in caseum redacto (Hippacen vocant) uti tradit Hippocrates *Lib. de aëre, aquis & locis*: Camellorum vero lac, omnium dulcissimum & suavissimum esse, scribit Plinius *lib. 28. cap. 9. & lib. 11. cap. 41.* Addit insuper Hippocrates, convenire lac tabidis dare dummodo non valde multum febricitent: equidem si ii vehementi febre corriperentur, lac prodesse non posset, quia ex gravi illa febre, procul dubio lac ejusmodi beneficio detergendi & conglutinandi ulcera orbaretur, cum vix in ventriculo receptum, vi febris & fermenti febrilis, in nidorem vel acorem penitus abiret: non raro enim fit ut phthisici, non tantum febre lenta & pusilla, quam habitualem vocant, sed etiam acuta & gravi, quam dicunt humoralem & putridam, afficiantur, ob cumolata potissimum excrementa, ex malis coctionibus & secretionibus suborta, vel etiam ex intruso pure in pulmone coacervato; per arterias in sanguinis massam, unde is plus justo fermentescit & exoluitur: quamobrem sana ratione, antea dictum est, purulentum sputum vel nullum, vel modicum illis inesse oportere, ut lac prodesse possit: Ita pariter conjectabimus, ulcus neque magnum & profundum, neque sordidum esse adeoque facile in conglutinationem redire, & sanguinem in suam naturalem crasim, lactis beneficio revocari posse.

Similiter in febribus longis & parvis adjecit, lac conducibile esse in quibus sc. ob diuturnitatem corpus extenuari, atq; ob tumorum tenuitatē, & virium languorē, pusillas febres evadere contingit. in his enim

desumpta indicatione à corporis marcore de quo alias scripserat, *quæ longo tempore extenuata sunt corpora, lente reficere oportet Sect. 2. Aphor. 7.* Lac videtur omni ratione convenire, nihilum ex adverso repugnante febris conditione, quæ pusilla & parva ponitur. At quoniam non raro, cum his diuturnis febribus jungi solent obstructions, & viscerum tumores, propterea non temere addidit, *si nullum ex supradictis signis adfuerit*: nam si fortasse hypochondria tumerent, obstructa aut inflata forent, lac nulla ratione conveniret; itemque si ingens sitis, biliosa dejectio aut sanguinis evacuatio conjungeretur ut antea jam dictum. Sed & id ipsum non inutiliter repetendum existimavit, ut nimirum ostenderet, quam cautè lac exhibendum sit, ut si fortasse unum vel alterum illorum contraindican- tium adsit ab illius usu penitus abstineamus, unde non satis esse putavit, illa antecedenter recensuisse, nisi etiam id ipsum nunc denuo rememorasset: Hinc monitos nos voluit, & cautos esse in lactis exhibitione, quia indebite & inconvenienter epotum plurimum nocet & officit, quamobrem recte Galenus advertit, *non semper Hippocratem servare brevitatem, sed in quibus magnum aliquod periculum imminet, si negligentius, quod ab ipso docetur, audiatur bis terve repetere eadem non vereri.*

Postremo ceteris quibuscunque præter rationem consumptis, lac utile esse docet, quemadmodum sunt atrophia, marasmo frigido, tabe dorsali, aliave simili ægritudine affecti, citra febrim, aut aliam evidentem consumptionis & extenuationis causam: quo fortasse motus argumento Galenus, usum lactis approbat, senibus marasmo frigido laborantibus *Lib. de Marasmo & 7. Meth. cap. 5.* quin & plures legimus solo lacte vitam incolumem conservasse, ut de Agricola superius memorato scribit Galenus *Cap. 5. de sanit. tuenda cap. 7.* & de aliis narrant Athenæus, Plutarchus, Plinius, Leo, Africanus & alii.

Coronidis tandem loco subungere non erit incongruum, ad prohibendam lactis coagulationem conferre plurimum, si eidem admisceatur saccharum aut mel, sed & Galenus, *in hujus Aphorismi comment.* Serum lactis, sale & melle conditum, se etiam flatuosis exhibuisse testatur: attamen ut lac minus noceat, imo ut melius nutrire valeat, sit recens mulctum, album, medium inter tenue & crassum,

saporem dulcissimum, omni alio sapore liberum, ab animante elicitum florentis ætatis, & plantis, in opportunum usum conferentibus, nutrita.

Verum de hac re consulantur fusius Claudinus, Primerosius aliique plures, qui de lacte ejusque commodis & incommodis ex professo scribunt.

Quæres quot modis ergo exhibetur lac? & breviter 1. velut nutrimentum, velut medicamentum, vel aliquando utroque modo. & 2. vel simplex vel cum aliis ut jam dictum, mixtum nempe saccharo, melle &c. & 3. vel crudum & frigidum, vel coctum & calidum.

Plures difficultates, de materia, usu & abusu, commodis & incommodis lactis lege Cardanum ejusque super hunc Aphorismum Commentarium.

Aphorismus LXV.

Quibus sunt cum ulceribus Tumores conspicui ii non admodum convelluntur neque insaniunt: his vero repente evanescentibus siquidem postica parte (seu à tergo) factum sit, convulsiones & Tetani accidunt: Si vero à fronte, insania, aut lateris dolores acuti. aut Empyema (seu suppuratio) aut dysenteria (seu difficultas intestinorum) si rubicundi fuerint Tumores.

Contentum seu Intentio.

De tumoribus, doloribus, ulceribus, & vulneribus conjunctis, & recurrentibus.

Connexio: Quam dependentiam habeat hic Aphorismus cum antecedentibus, non est facile consequi, cum valde differentem in eo tractet materiam à prioribus longe diversam; nisi forsàn eum media-

mediate saltem aliquis referre velit, vel ad 22. in quo ultimo de ulceribus, vel ad 21 in quo de Tetano egit, & postea de affectibus mulierum continuo tractavit, & nunc iterum ad ulcera & Tetanum revertitur.

Hic Aphorismus secundum duas conclusiones, in duas partes dividitur: In *prima* asserit, non admodum insanire, neque convelli eos, quibus sunt cum ulceribus tumores conspicui: In *secunda* vero ex tumorum recurso, si ad partem posteriorem sit, ulcus convulsionem & tetanum minari: Si ad partem anteriorem, insaniam, pleuritidem, empyema, & dysenteriam. Aphorismus hic ad partem medicinæ chirurgicæ pertinens totus est prognosticus, eoque Hippocrates futura & imminetia ex ulceribus mala, prædicenda docet, & Medicos quoque præcautos esse oportere admonet, ut internoscere simul & illa præcavere valeant. Desumptus autem ille est ex 2. *Epidem. §. 3.* Licet parumper immutatus, sed tamen ita, ut facile unus alterum exponat. Solent equidem ulceribus, ab inflictis potissimum vulneribus, tumores supervenire & præsertim Phlegmonodes dicti, ab impedito nimirum remeantium humorum circuitu, eo quod interruptis atque intercisis viis, discurrentis sanguinis & lymphæ sic sponte sua ad labia vulneris hæreant & restagnent, unde postmodum tumores: & licet Hippocrates in textu dicat *œdemata*, ista tamen ut interpretatur Galenus, omnem tumoris speciem apud veteres comprehendebant; quamobrem sive sanguis sive lymphæ, aliusque humor præter naturam ibidem congestus, ex mora facile fermentescens, acore atque irritatione, non tantum partem ipsam ulceratam tumefacit, & extorquet, verum etiam membranas & nervos circumjacentes tum corpulentia tum acredine coarctat, comprimit, vel etiam inflat & dilaniat, indeque convulsiones & abalienationes mentis exoriuntur. Hæc autem esto indiscriminatim quibuscunque partibus vulneratis accidere possint, specialius tamen plurima & varia nervorum ramificatione refertus, afficiunt, & ubi extrema musculorum sunt sauciata: talia enim vulnera & ulcera parva sunt ut dicetur *Aph. seq.* Si igitur ejusmodi vulneribus, aut ulceribus tumores superveniant, inquit Hippocrates, neque convelli, neque insanire. Tunc enim verendum de convulsione aut insaniam, cum humores commoti, & per corpus debachantes ad cerebrum afferun-

runtur, atque nervorum principium occupant, & divexant; at vero in partem vulneratam delati, illud indicant immune ab ejusmodi læsione manere, adeoque nec convulsioni neque dementiæ obnoxium fieri, quas procul dubio intulissent, si in cerebri medullam decubuissent. Atqui dixit Hippocrates, *non convellantur maxime*: quia fieri potest, ut etiam cum ejusmodi humorum depositione & tumorum in ulceribus apparitione, convulsiones & insaniæ habeantur, vel ob consensum earundem partium fauciatarum cum cerebro, aut cum spinali medulla; ut contigit sutori illi qui pupugit acu genu: qui ex dolore & inflammatione convulsus insanivit ut refert *s. Epidem.* vel quia non integre mali humores, in ulceratam partem deponuntur, sed alii in hanc, alii in cerebrum sunt translati; vel quia aliunde contingit cerebrum, & nervos una simul affici; sed profecto magis & magis læderentur convulsione & insania correpti, si à depositis pravis humoribus in partem ulceratam, tumores non apparerent: Etsi igitur alia de causa delirium aut convulsio accidat, non maxime nec vehementer & continuo molestabunt, si ulcerata pars tumida apparebit, & ea mole & magnitudine, quæ proportionem servare visa fuerit, ad humorum copiam & ulceris amplitudinem ac profunditatem:

Quoniam vero humores isti, in ulceratam partem depositi, facile loco moveri possunt & alio transferri, promptius plane in cerebrum, veluti in partem suâ natura debiliorem, & magis cum vulnerata consentientem efferentur: id quod cum acciderit, convulsiones & distensiones nervorum evenire palam est; quamobrem recte idem Hipp. subdit, tumoribus hisce repente evanescentibus, quibusdam à tergo convulsiones & distensiones fieri; aliis vero insanas, laterum dolores, aut intestinorum difficultates, prout humores ipsi commoti, in hanc vel aliam partem decubitum fecerint; quod oppressius idem Hipp. declaravit *cit. 2. Epid. sect. 3.* ubi: *His autem*, inquit, *evanescentibus repente, quibus quidem in posteriores partes, convulsiones cum doloribus; quibus autem in anteriores, aut insaniæ aut dolores lateris aucti, & dysenteria rubra*: Siquidem ad posteriorem cerebri partem spinalis medulla, ejusdemque nervi potius afficiuntur; ad anteriorem vero, mens ejusque phantasmata; etsi inferius adhuc deferantur ac decumbant & thoracem aut immum ventrem petant, lateris dolores aut dysenterici exorientur,

unde habemus ægrum illum famosum ab Hipp. 5. *Epid.* descriptum, cui cum scriptum transversum jaculo percussus esset, & ipse rideret, ex eo risu prædixit Hippocr. convulsionem, quæ illum paulo post corripuit & interfecit.

Quin Galenus, reprehensus tamen à Cardano *in comment. hujus Aphorismi*, ab ulceratis partibus posterioribus vel anterioribus, deducit convulsiones, vel manias & cæteras affectiones fore secuturas. Si vero, ait, tumores derepente evanescant, convulsiones aut Tetani, quando in partibus posterioribus, hoc est in dorso, ulcera fuerint: quæ vero deinceps dicuntur, si in partibus anterioribus fuerint, consequi dicit: & rationem addit; posteriora siquidem nervosa sunt, anteriora venosa & arteriosa: At historiæ duæ relatæ hoc loco ab Heurnio de vulneratis in humero & scapula, nullo interea apparente Tumore, in insaniam potius ductis, quam in convulsionem, contrarium evincere videntur: quamobrem hæc indiscriminatim quoque exoriri posse est fatendum.

Sed ut hæc mala eveniant, non satis est, ut tumores dispareant & evanescant, sed necesse etiam est, ut repente & citra manifestam & evidentem causam: Ita enim fit, ut certo judicare liceat, humores alio fuisse delatos, non autem revera evanuisse aut fuisse resolutos ac dissipatos: Siquidem quæ resolvuntur, aut certa ratione dissipantur, sensim & sensim fiunt, præcedentibus signis attenuationis, coctionis & evacuationis: hinc jure optimo idem Hippocrates eodem 2. *Epidem. sect. 3.* docuit: *quacunque sine signo judicationis judicatorio disparent, male judicata sunt, velut Erysipelas ancilla Polemarchi.* & quemadmodum contigit Calvo Larissæo 3. *Epidem.* Sed ne quis ambigat, quo pacto humores à partibus ulceratis subito ac repente dispareant, alioque ferantur, quia corpulenti sunt & plerumque crassi. Siquidem id ope circulantis sanguinis & lymphæ, facile accidere potest, resumptis nimirum iis per venas, aut lymphaticos ductus, qui non raro plus justo, vel repellentium medicamentorum molimine, vel laxantium linimentorum amplificatione, hærentes ceteroqui humores excipiunt & diducunt, circumpellentibus undique partibus annexis. Quod si fortassis tenues & serosi illi fuerint, adhuc promptius per poros partium atque per substratas & adjacentes glandulas absorbentur, & in ordinarios & proprios canales, adjacentes

centium partium, & præsertim musculorum nisi, coadjuvante plurimum calore, & fermentatione ibidem excitata, alio adiguntur & profluunt. Verum tamen, neque solum in cerebrum possunt loco moti, à tumefactis partibus, humores transferri & convulsionem aut maniam excitare, sed alias quoque consimiles morbos, juxta partium affectarum conditionem. Quare non tantum morborum cerebri & nervorum meminit hic Hippocrates, verum etiam Pleuritis, Peripneumoniæ, Empyematis, si id ad pectus atque etiam dysenteriae, si ad anum ventrem & intestina, humores illi transferantur & decumbant. Adjecit autem in textu, *si tumores sint rubicundi*; quia pleuritis & peripneumonia, de genere inflammationum sunt, & non nisi à sanguine, vel cum sanguine restagnante contingunt, atque ab istius putrefactione empyema. Dysenteria autem hic intelligitur cruenta quam rubicundam *cit 2 Epid.* appellavit, cujus etiam meminit *lib. de natura humana 3. Epid. & lib. de artic. & Galenus 3. de symptom. causis cap. 8. & 5. de locis affect. cap. ult.* imo lienosis supervenientem salutarem censet *6. Aph. 48.* veluti sine intestinorum ulcere, & nullo alio gravi symptomate sociatam, imo criticè, natura malum a bono sanguine separante promotam. Quod sane si pari modo contingat, ex tumoribus subito evanescentibus, translatis interea pravis humoribus, in patentiores ductus, unde facilius possint evacuari, vel saltem in ignobiliore corporis partes deponi, cum virium levamine & symptomatum remissione, procul dubio, neque penitus ejusmodi translatio vituperanda erit, ut non raro Podagricis accidit: Observatum etiam aliquando est in quadam muliere, cui tumor ingens ad clunes acciderat, ex ulceribus ibidem antea contractis, illo repente evanescente, atque ex arefactis omnino ulceribus subortum ad femora latum & oberrans erysipelas, non solum permisisse ulcera brevissime sanari, sed etiam febrim, cum adjunctis symptomatibus desuisse. Hinc pariter deducere est (ut etiam advertit Mercurialis) non modo hæc quæ retulit in Aphorismo Hippocrates mala, ab evanescentibus repente tumoribus exoriri sed & surditates, lippitudines, astinata, cardialgias, dysurias, ischiades, idque genus alia, quæ fortasse reticuit contentus generaliora tantum modo attulisse, quæ fortassis frequentius observaverat. Denique si tumores isti, à lymphâ aliisque humoribus, præterquam à sanguine

orti subito evanescant, ab illorum in aliis partibus depositione, congeneres morbi excitari poterunt, qui scil. analogiam, cum iisdem retinebunt, ut patet ex praxi.

Plures difficultates & litigia super materia hujus Aphorismi, legi possunt apud Cardanum *in commentar.*

Aphorismus LXVI.

Si in magnis vulneribus, & pravis, tumores non appareant, ingens malum.

Contentum seu Intentio.

De Prognosi vulnerum ex tumore.

C*onnexio:* Cum in priori Aphorismo Hippocrates, de evanescente seu retrocedente tumore dixisset: In hoc praesente Aphorismo agit de tumore non fiente, nec umquam comparente; unde pendet hic Aphorismus à praecedente, tanquam effectus a sua causa.

Hic Aph. ob brevitatem & simplicem conclusionem non dividitur.

Ut ergo Hipp. ostenderet, solere fere semper, vulneribus & ulceribus tumores supervenire, proinde non inutiliter, ut mox diximus, praecedenti Aphor. dixit, malum esse, si illi repente dissolvantur & evanescant, unde in ejus argumenti confirmationē nunc addit, oportere iisdem tumores supervenire, si praesertim fortia illa sint & prava: Atqui autem parum refert, num vulnera recentia sint, aut antea contracta, aut in ulcus degenerata, cum ista ab Hippocr. non raro confundantur, dummodo ab extrema causa processerint, ut deducitur *lib. de ulcerib.* Et licet hoc loco scriptum sit per *ρεαυμα*, quod proprie continui solutionem, à re incidente factam significat: nihil tamen repugnat, quin etiam ad ulcera inde progenita, id ipsum extendamus, & sive punctim sive caesim, & sive à re contundente, sive frangente & secante sint inducta: Igitur, ubi in vulneribus & ulceribus, vehementibus & magnis, tumor nullus apparet, qui ceteroqui ad vulneris magnitudinem consequi deberet, ingens malum significatur, saltem imminens & futurum.

Vocantur autem vulnera fortia, quæ magna & hiantia ac profunda sunt, vel in partibus principalibus inflicta, ut docet Galenus 4. *method. cap. 6.* 6. ejusdem operis cap. 4. Quamobrem vel ob partis præstantiam, vel ob recissæ carnis nimiam molem, fieri nequit, quin multa & ingentia vasa sanguifera, sint pariter vulnerata & resecta, unde sanguis inde præterfluens, cum nequeat suum circulum, recta peragere, necesse est, ut in adjacentes partes effundatur, itaque stagnet & hæreat, proindeque tumorem ingentem pariat & magnum; quare si fortasse nullus compareat, indicio erit, vel introrsum, in partes scilicet corporis intimiores excurrisse, ibique corruptionem subituum, vel sanguinem ipsum adeo effoetum, & ineptum evasisse, ut lentè admodum moveatur, sibi que remoram faciat, neque partes ut decet irriget, & denique tantam fuisse factam ex vulnere illius effusionem, ut vix reliquus supersit, qui cordis motum & vitam tueatur.

Quod si præterea, non tantum magna & fortia sint vulnera, verum etiam prava observentur, hoc est maligna & cacoëthica, longe magis deteriora erunt, & vitium in sanguine, ex partibus vulneratis, deleterium denotantia, prout in Gangræna & Sphacelo. Istius autem conditionis esse solent vulnera capitis & finibus musculorum maxime nervosorum inflicta, ut observat Galenus *in comment.* quippe illa non sine ingenti dolore, inflammatione, convulsione, virium dispendio, & cæteris pessimis symptomatibus contingunt, quæ cerebrum, cor, & alias principes partes collasas & male affectas arguunt, unde si forte in his tumor nullus appareat, quia ex vulneratarum partium, earumque fibrarum, coarctatione & corrugatione, affluens sanguis excipi nequit, sed ad alias partes principes, & mutuo consentientes, impetu quodam effertur & irruit, vel ex virium languore, in suo motu præpeditur & hæret, procul dubio ingens malum sequitur & sæpe etiam mors; atqui & id ipsum non rarò imperitia chirurgorum accidit, prout scite hic etiam adnotat Galenus, cum scilicet, in fluxus sanguinis in partem vulneratam, valde infrigitantibus aut adstringentibus medicamentis reprimatur, repugnante interea ex adverso nervearum partium natura & conditione, quæ ut idem Galenus subdit; *medicinas calefacientes atq; exsiccantes desiderant.*

Ex his ergo nunc sequitur, ingens malum subinde portendi, ut

etiam edocuit allegato 2. *Epidem. sect. 3.* quod suo more complexus Celsus *lib. 5. cap. 20.* eleganter scripsit: *Nimis intumescere vulnus, periculosum: nihil intumescere, periculosissimum est: illud indicium est magnæ inflammationis, hoc emortui corporis.*

Quamvis autem hæc in universum vera comperiamus, accidit tamen aliquando, ut in corporibus salubri constitutione potitis, & recta victus ratione usis, ob quam pravos aut excrementosos humores, nullatenus cumulari contigerit, inflicta vulnera, licet magna, nullum vel levem admodum tumorem adjunctum habuerint, sine ullo tamen vitæ periculo.

Quamobrem confert plurimum, bonus corporis habitus, & humorum puritas, ad evitandum ejusmodi in vulneribus incommodum: contra vero novi plerosque cacochymos, cachecticos, aut labe venerea infectos, qui etiam ex levibus vulneribus & ulceribus, à suppuratis tumoribus subortis, vitæ periculum subière & difficulter, & non nisi post diutissimum tempus convaluere. Juvat pariter in his attenta Medicorum assidentium cautio & animadversio, qua scilicet præca- veatur, per convenientia & opportuna medicamenta, pravorum humorum, ad partem vulneratam affluxus, ut propterea nullus, vel saltem levis, aut insensibilis tumor sit compariturus: Cum igitur hæc ritè, & rectè peracta sunt, nihilum de tumoribus, non apparentibus pertimescendum.

Quæres! Quot modis vulnus magnum dici soleat? &c. Duplici modo, vel communiter vel propriè: *Propriè* magnum dicitur, quod secundum omnem dimensionem extenditur: *Communiter* magnum dicitur vulnus, vel quod malignum est, licet parvum sit, vel quod in aliqua parte principali factum est: de utrisque ut in contextu dictum intelligendus est Aphorismus.

Aphorismus LXVII.

Molles Tumores, boni, ut crudi mali.

Contentum seu Intentio.

De Prognosi tumorum.

Connexio : Evidens est non modo connexio sed & dependentia præsentis Aphorismi cum prioribus: cum enim de tumoribus, in
vulne-

vulneribus apparentibus, in duobus antecedentibus Aphorismis sermonem habuisset; in hoc præsentè Aphorismo de Tumorum Natura agit.

Hic Aphorismus ob summam brevitatem non dividitur.

Quandoquidem ergo ad ingentia & magna vulnera tumores consequi bonum ex jam dictis præcedentibus Aphorismis dictum sit, proinde plane conveniens visum est Hippocrati in hoc Aphorismo docere, quales tumores esse oporteat, atque illos molles esse debere; nam crudi & duri alia de causa mali censendi sunt. Molles autem, si-ve, ut scribitur eodem 2. *Epidem. sect. 3. Laxi tumores* intelliguntur, qui prementibus digitis prompte cedunt, veluti oppositi crudis, duris ac renitentibus dictis, ut colligitur *exprime in primum Epidem.* & quidem tripliciter tales esse possunt; *Vel* ex conditione humoris tumorem facientis, unde qui ex phlegmate aut lymphâ mollis est; qui exterreo & concreto humore durus: *Vel* ex ejusdem humoris cruditate vel coctione, quia tumores omnes inter initia, ob humorum cruditatem duri observantur, cum vero coctionem subierint, molles fiunt: *Vel* denique ex partibus affectis; quæ enim partes natura sua molles sunt, laxæ & spongiosæ, ut adenes seu glandulæ, sæpe sæpius cum tumescunt, molliorem quoque & laxiorem retinent conditionem. Modo, molles hic tumores in vulneribus apparentes, cujuscunque generis sint, relati ad crudos & duros semper meliores existimandi sunt, quia molles ex ratione materiæ lymphaticæ aut pituitosæ, utpote nullum vel levem dolorem aut irritamentum inferentes, minoris sunt malitiæ, quam si à materia magis consistente & acidiori sint progeniti; molles vero ex prompta, & facili coctione, procul dubio meliores sunt, quam si illa contumax & rebellis foret: & denique molles ex natura partis affectæ glandulosæ, utpote sensus expertes, molestia quoque carent dolorifica & vellicante, cujus rationem specialem habendam voluit Hippocrates, in vulneribus & ulceribus quibuscunque, ex quibus supra convulsionem, maniam & cæteros morbos, acutiem præferentes, metuendas dixit.

Porro perperam egisse videntur illi qui Aphorismum hunc de tumoribus universim indiscriminatum sunt interpretati, in quibus etsi nonnunquam mollities longe admodum melior sit, duritie & cruditate, cum scilicet ille ab imminente, & facili coctione humorum procedit,

cedit; multoties tamen Medicos curantes fallit, & multo gravior & periculosior observatur, quemadmodum palam fit, in œdemate, atheromate, steatomate, meliceride, vomica, & cæteris tumoribus flatulentis & aquosis, potissimum in corporibus cachecticis & ad hydropem dispositis, cum cæteroqui phlegmon, durus ac renitens tumor, facilius subigatur & curetur. Atque hinc etiam facile exponitur quod 2. *Epidem. sect. 3.* de iisdem tumoribus, sub alia phrasi, scripsit Hippocrates, ubi sursum repentes contra posuit mollibus & laxis: sursum autem repentes intelliguntur, non solum qui circa vulnera comparent & partem vulneratam tumefaciunt, sed aliorum, ac præcipuè sursum attolluntur, atque vel ob multitudinem humorum, & eorundem pravitatem, aut propter partis affectæ contractionem & compulsionem, nobiliores partes petunt & introrsum repunt.

Cæterum crudi tumores, id est coctionem minime admittentes nec à natura subigibiles, semper mali sunt, & periculum vitæ minantur, quales scirrhi, strumæ, carcinomata, exostoses, ut ex praxi chirurgica cunctis notum, sicut contra molles ad suppurationem vergentes, minus mali, imò plerumque salutare existimantur; ita & illi qui in acutum tendunt, in pyramidem, quique non bifidi sunt, sed æqualiter maturescentes.

Dices: Humores œdematosi sunt molles, & tamen crudissimi, diuturni & rebelles ergo mollities nil facit ad bonitatem tumorum. *R.* Si simpliciter molles sic accipiamus & crudos concedo, si molles & coctos aut digestibiles nego: præterea potest dici, quod tumores œdematosi possint adhuc dici boni, respectu tumorum scirrhorum, quia illi quandoque concoctionem suscipiunt, hi vero nunquam, præsertim ubi malum est confirmatum.

Aphorismus LXVIII.

Parte capitis posteriore dolenti, in frontem, recta recurrens vena incisa prodest.

Con-

Contentum seu Intentio.

De venæsectionis usu in cephalalgia.

Connexio : Hic Aphorismus therapeuticus, connecti videtur cum
50. hujus libri, ubi similiter sanguinem ab una parte ad alteram,
 nempe ab utero ad mammas, non per venæsectionem sed per cucur-
 bitulas retrahit; Hic autem per venæsectionem, à parte capitis po-
 steriore ad anteriorem retrahit sanguinem & evacuat, & dolorem oc-
 cipitis demit. Aphorismus hic ob brevitatem suam non dividitur.

Quod ergo experimento juvisse compererat *6. Epidem. sect. 2.*
 Hippocrates in eo, cui *dolente capitis parte posteriore, recta vena in fron-*
te secta profuit, in Aphorismum redegit, & hic apposuit, ut vel hinc
 certo nobis constaret, ab experimentis, & iteratis observationibus,
 sententiarum istarum seriem compilasse, ac sicuti in memoriam ca-
 derent, statò quodam ordine, disposuisse, non tamen ea lege ut præ-
 cepta posteris traderet irrefragabilia, sed ut potius moneret, qua me-
 thodo sibi medicam facultatem comparasset, eademque posterì pos-
 sent suis observationibus, illam magis & magis confirmare & locuple-
 tare, juxta illud Manilii:

Per varios usus, artem experientia fecit,
 Exemplò monstrante viam;

Quippe non ex uno aut ex altero experimento sed ex plu-
 ribus & iteratis, atque eodem modo contingentibus, oritur expe-
 rientia, quæ propterea scite admodum describitur à Galeno *Lib. de*
optima secta cap. 11. ad Trasibulum; *memoria ejus, quod sapius & eo-*
dem modo visum est; at vero experimentum proprie dicitur; *ejus,*
quod nondum constat opere, attentatum, seu alicujus medicamenti,
dubia attentatio: Unde experiri idem est, ac rei alicujus pericu-
 lum facere & tentare, quod sane eventus ambiguitate & periculo
 non caret.

Id itaque proponere videtur in hoc Aphorismo Hippocrates, se
 nimirum aliquando expertum, juvisse venæ frontis sectionem in vehe-
 menti occipitis dolore, ut hinc cæteri, si prudenter visum fuerit,

Rrrrr

id

id ipsum experiri valeant , in consimilibus doloribus , num fortasse ex iteratis observationibus generale , quoad fieri potest , documentum elici , & experientia solidior deduci queat , inutiliter ergo allaborant , qui hoc Hippocratis effatum ad rectam & perpetuam medendi rationem reducere conantur per ambagesillas evacuationum , quæ revulsoriæ & derivatoriæ appellari consueverunt ; siquidem istæ jam diu , recta medendi methodo , post detectam sanguinis circulationem exulârunt ; nisi solum vocabula ista , in gratiam venerandæ antiquitatis retinere velimus , ut cum ejusmodi missiones fiunt inter initia morborum revulsiones ; constantibus vero aut invalescentibus iisdem peractæ , Derivationes appellentur ; ea plane ratione , qua forte creditum , fluentes inter initia inflammationum humores intercipi , & in suis motibus præpediri ; in augmento vero & statu earundem , cum jam factæ illæ sunt , diminui atque in motum denuo adigi hærentes partibus humores : Quod tamen non facile plerumque est , imo sæpe sæpius nocuum ac periculosum , ut alibi dictum.

At verò , citra ejusmodi inutiles animadversiones , potest dolori occipitis venæ frontis sectio prodesse , cum is ex moderato & impetente sanguine in illius foramina , angustiora reddita , non tam prompte subeunte , provenit , quo circa vel hærens seu stagnans aliquantisper , vel irruens vel impetuosus excurrrens , Pericranium & duram meningem gravat , aut vellicat , unde postmodum dolor , qui deinde sedatur , promota , per frontalis venæ amplioris sectionem , illius circulatione ; quippe jam satis constat , non aliud beneficium , ex venarum sectionibus corpori exoriri , quam sanguinis motum juxta mechanicæ leges , non nihil aliquando accelerare , ob diminutam ejusdem quantitatem.

De reliquo , id indiscriminatim , in cunctis capitis doloribus experiri velle valde periculosum , cum ex Galeno *in comment. Aphorismi primi experiri ea , quæ non sunt longa experientia comprobata , non est citra periculum , cum mala experientia ad totius animalis interitum terminetur.* Atqui præter alia graviora pericula , quæ ex intempestivis & importunis detractationibus sanguinis incurritur , illa specialius , in venæ frontis sectione contingunt , quod collum undequaque circumligari debeat , & caput ad supercilia , fascia obduci,

duci, ut vena illa turgcat, & intumescat, ne pro vena arteria incidatur, & citra periculum punct. onis & vulneris pericranii. A devinctis autem jugularibus vasis, facile Hydrocephalon, & à puncto & vulnerato Pericranio, convulsio non raro accidit. Hinc propterea factum, ut jamdiu ejusmodi venarum sectiones ab aula medica exulaverint, paucique sint qui eas in praxim deducant.

Quæres: Utrum ista venæ sectio possit fieri reciproca, & dolenti partem anteriorem, vena in syncipite tusa profit? R. Affirmativè; sed cum ob partem capillatam venæ hætenus non patuerint, hinc experientia inde nulla habetur; in tali tamen occasione, cucurbitulas, vesicatoria, cauteria &c. applicamus.

Aphorismus LXIX.

Rigores incipiunt mulieribus ex lumbis magis, & per dorsum perveniunt in caput; Viris vero parte corporis posteriore magis quam anteriore veluti ex femoribus & cubitis, sed & cutis is rara est, id quod pilus indicat.

Contentum seu Intentio.

De Fontibus rigoris.

Connexio: Cum in antecedenti Aphorismo, occipitis consensum cum syncipite detexisset: In hoc Aphorismo præsentem, aliarum partium consensum enumerat, dum originem & distributionem rigorum in utroque sexu demonstrat.

Hic Aphorismus plures habet conclusiones, juxta quas dividi potest, & omnes probare intendunt propositionem præscriptam.

Quamvis plerique expositores, memoratos hos rigores, nolint de veris rigoribus, febres præcedentibus interpretari, sed solum de refrigerationibus, aut horripilationibus, ab externa causa inductis, veluti à gelu & à borea, ipse tamen non video, cur illis nequeat hæc sententia adhuc rationabiliter adaptari, imo nullo magis

quam aliis, cum experimentis compertam habeamus, rigentes à febribus, secundum posteriora potius conqueri ac molestari, imò quosdam etiam febre tertiana affectos, noverim qui integumenta multa ac lanea, etiam adhuc ponderosiora, & excalecta, ad eas partes exquisierint, ut levamen aliquod atque adjumentum, à concutiente & molestante frigore persentirent; Advertit pariter Galenus, nulli Hippocratem rigoris meminisse à febre sejuncti, ut propterea illum sine febre, novum & peregrinum symptoma suo tempore fuisse scribat, *Lib. de rigore, tremore & palpitatione cap. 7.* Verum utcumque se res hæc habeat, & sive rigores proprie dictos, simplices refrigerationes à frigido ambiente illatas intelligat Hippocrates, docet hic à lumbis magis in feminis per dorsum in caput excurrere; in viris vero etiam partes posteriores, potius quam anteriores, atque ex his magis extremas; quod & repetitum bis adhuc invenitur scilicet 2. *Epidem. sect. 3.* & 6. *Epidem. sect. 3.*

Et quidem, quod in febricitantibus, rigores incipiant à partibus posterioribus, atque in feminis magis à lumbis, clare deducitur, ex nuper recentiorum anatomicorum doctrina, qui multis rationibus atque experimentis evincunt, rigorificam illam concussionem ab indebita succi pancreatici, cum felleo seu bile, fermentatione proficisci, adeoque circa lumbos & glandulas lumbares persentiri, unde postmodum spinalis medulla, ductus thoracicus, pulmo, cor, totumque corpus inæquali frigore contremiscat. In feminis insuper, ligamenta uteri rotunda, ad easdem quoque partes protenduntur, ac proinde major afflictio, ex tot nervorum, & partium nervearum compassione; siquidem inter ceteras istæ magis à frigoribus, sive internis sive externis, afficiuntur ex eodem Hippocrate Aphorism. 17. & 18. *hujus libri.*

Dixit autem *magis*, non quod omnino ex lumbis, sed quod præcipuè ab his, ostenderet rigores incipere solere, cum tamen reliquæ etiam partes extremæ corporis, manus, pedes, ingenti frigore molestantur, rigore vero id est inæquali illa concussionem cum sensu intensi frigoris, solum internæ partes nerveæ ad lumbos & præcordia sitæ divergentur. In maribus quoque posteriora magis, quam anteriora frigere incipiant, cum rigor illos invadit, non quod impari ratione hic illis accidat, cum idem sit in utrisque febris fomes & locus, unde 6. *Epidem. 5.* dicitur, rigorem omnem, à superiore ventre inchoare;

choare; sed solum quia in fœminis, frigus ex lumbis per dorsum ad caput fertur; in maribus vero extimas potius partes pervadit: halitus enim ex fermentantibus præter naturam succis, in regione lumborum, per nervos potissimum in maribus divexant, qui ex lumbis & osse sacro atque adjacentibus imi ventris partibus, ad inferiora protenduntur, & per fœmora excurrunt, cum in fœminis, ob eorundem cum utero & cerebro consensum, per dorsum, caput potius feriant, quod sane in illis mollius est & imbecillius. Verum tamen etsi hoc plerum que feminis accidat, non est, ut omnino immunes inde mares ab ejusmodi molestiis existinemus; quamobrem oppositè adjecit Hippocr. adverbium *magis*. Nonnullos equidem novi, è classe illorum, qui affectione hypochondriaca laborant, id ipsum omnino, ex rigorificis febribus passos, quod de fœminis hîc memorat Hippocrat. ut propterea etiam mente titubarent, & secum ipsis obloquerentur; & alios qui aliquantulum convellerentur ac contremiscerent. Adjecit tandem, *veluti femorum & cubiti*, loco exempli, ut cum posterioribus, postremas quoque & exteriores partes intelligamus, quod clarius expressit, *cit. 6. Epidem. sect. 3.* inquiens: *Horremus enim magis exterioribus, quam interioribus corporis partibus, veluti cubitis, femoribus.* Porro si hæc manifesta sunt in rigoribus & horroribus, multo sane patentiora fiunt, in refrigerationibus extrinsecus inductis, aut in defluxionibus humorum præsertim lymphaticorum, per spinam & artus; quippe partes posteriores corporis frigidiores sunt anterioribus, quoniam illæ magis osseæ & nervosæ, istæ vero majoribus & numerosioribus venis ac arteriis sunt refertæ, sicut etiam interiores exterioribus ut cuiq; patet. Quod denique anteriores partes calidiores sint posterioribus, indicare subdit cutem illarum partium raram atque facilem pilorum generationem: rarior enim cutis & facilis pilorum generatio, caloris seu rei calidæ, unde pilus oritur, abundantiam indicat. At vero raritas cutis debet esse moderata, quæ scilicet satis sit, ad halituosa excrementa excipienda, atque in pilum prolonganda, non autem tanta, quæ laxior nimis & multum patula, illa retinere & concrecere non sinat, sed potius evolare ac dissipari permittat; siquidem, quemadmodum adstricta nimium, & densa cutis pilorum generationi impedimento est, ita ex adverso rarior & patentior plus justo glabra remanet, igitur moderate raram esse oportet.

Plures difficultates super hoc Aphorismo legi & trutinari poterunt apud Cardanum hoc loco *in commentario*.

Aphorismus LXX.

Qui quartana corripuntur, non admodum convulsionibus tentantur: si vero prius tentati fuerint, superveniente quartana, liberantur.

Contentum seu Intentio. *De Quartana Medica.*

Connexio: Cum in antecedente Aphor. Hippocrates, mentionem fecisset de Rigore, inter febres autem rigorificas quartana maxime connumeretur: Ideo nactus in præsentī Aph. occasionem, præceptum de quartana tradit, ad prognosim & curam valde proficuum.

Hic Aphorismus in duas partes dividitur: *Prima* conclusionem continet, quæ præcautionem seu prophylaxim facit; *Secunda* quæ curat. Si umquam licuit, à contextu Aphorismorum, mentem Hippocratis explicare, & clariorem reddere, certe ex hoc luculenter patet, rigores antea memoratos, febriles potius intelligere voluisse, quam alios; quia nunc de quartanis febribus verba facit, quæ rigoribus, aut potius horroribus molestissimis ægrotantes cruciant, iisdem veluti signis pathognomonicis sociantur. Sed ista utcunque sint, docet Hippocrates, quartanis febribus correptos non admodum convulsionibus affici, imo his fortassis antea correptos, superveniente quartana liberari. Multum autem allaborant Interpretes, num proprie de convulsione, græcè *σπασμὸς*, an de convulsione epileptica, ac de ipsamet Epilepsia exponendus sit; Siquidem Galenus in *comment.* excipit convulsionem factam ab inanitione, (in hac enim superveniens quartana citius occideret, quam ut salvaret) & illam solum quæ à repletionem fit, atque ab humoribus lentis pituitosis progenitam intelligit, qualis in morbo comitiali: cui sententiæ inhærentes plerique alii in probationem adjiciunt eundem Hippocratem 6. *Epidem.* 6, dicentem: *à quartana correpti magno morbo non corripuntur; si ve-*

si vero corripiantur prius, & succedat quartana, liberantur. Pro magno autem morbo epilepsiam intelligi nemo est qui ambigat. Et quamvis nonnulli, inter quos Cardanus, de omni magno morbo, illum interpretentur, id tamen veritati atque experimento non cohæret, siquidem nulla ratio suppetit, quamobrem quartana correpti, à cunctis aliis magnis malis præserventur, aut liberentur; quin imo experimentis pluries constitit apoplexia, astmate, cordis palpitatione, hydrope, & cæteris magnis morbis eos laborasse, ut taceam scirrhus, obstructions lienis, renum calculos, ischurias, strangurias, aliosque quibus obnoxii fiunt. Sed & Hippocrates ipse 3. *Epid.* 3. complures quartanarios memorat in constitutione illa pestilenti simul cum aliis periisse: Hinc falsum quoque dicere est Celsum, hac ductum Hippocratis autoritate, qui quartanam febrem docuit ab aliis magnis morbis liberare: Verum tot ambagibus & tricis exsolvemur, si juxta recentiorum dogmata & observationes, considerentur omnes istiusmodi nervorum morbi, à vaporibus aut humoribus acidis provenientes, qui cum sedem suam in imo ventre habeant, à vitio viscerum naturalium male affectorum, præsertim vero pancreatis, lienis, ventriculi, & glandularum circumjacentium, propterea fit, quod illis per indebitam, cum cæteris succis, potissimum bile, in gracilibus intestinis fermentationem febrilem subactis, ut speciatim in quartana febre fit, desinat in nervorum & musculorum fibrarum proritatio & convulsio, ut alibi quoque dictum est; Vicissim enim acidum quodcumque felleo & amaro liquore retunditur ac domatur: cumque quartanæ febres ceteris longiores esse soleant, inde etiam sequitur, ut iteratis invasionibus, tum per vehementes illarum horrificas concussiones tum etiam à diuturna perduratione, omnis acor ex humoribus absumatur vel infringatur & removeatur causa irritationis & convulsionis nervorum. Huc etiam facit quod idem Hippocr. 6. *Epid.* 7. circa finem scribit, *Melancholicos fieri epilepticos, & è converso*; quia humor melancholicus acidus, utriusque morbi causa, si in cerebrum & mentem feratur, melancholiam, in principium vero nervorum, & nervos ipsos epilepsiam excitat; atqui febre superveniente, id est per febrilem fermentationem subacto istiusmodi humore, uterque vel desinit, vel remittit. Denique advertendum superest, Hippocr. non penitus dixisse quartanis captos convulsionibus nullatenus corripiri, sed *non admodum*

dum solum; siquidem fieri potest, ut alia de causa illis afficiantur, vel etiam eadem non penitus per febrem discussa, potissimum cum convulsiones & epilepsia fuerint inveteratae, adeoque diutius protractae, languorem in nervis consequantur. quo casu, etsi omnino non desinant, satis tamen est, si admodum, aut violentius non affligant, sed rarius solum & mitius quam consueverant. Hinc demum quartana de qua hic loquitur Hippocr. non est illa, quae symptomatice aut accidens est alicujus visceris male affecti, quoniam ipse non agit de ea, quae est cum periculo, aut quae in senibus accidit, in quibus ratione aetatis, periculosa esse solet; proinde aliquando desinit in paralysem aut alium magnum morbum, ut docet Hipp. 4. *Epidem.* Servus quartana correptus stupidus factus est: at haec non contradicunt Aphorismo, tum quia de quartana loquitur, non aliis affectibus conjuncta, tum quia non dixit in universum & semper liberare sed ut plurimum. Sic pariter, non omnis epilepsia a quartana solvitur; nam quae post 25. annum extenditur, comitari solet usque ad mortem, ut docet *Aph. 7. hujus lib.* Nec abs re erit hoc loco esse memorem *Aph. 26. lib. 2.* ubi scribit: Febrem convulsioni supervenire melius est, quam convulsionem feбри. Tandem breviter sciendum quartanam febrem, ratione febris, adversari frigori seu cruditati qualiscunque illa sit, convulsionem producenti; ratione siccitatis seu ariditatis, humidi seu cacochymiae.

Plures difficultates & quaestiones vide apud Cardanum hoc loco in *commentario*.

Aphorismus LXXI.

Quibus arida & dura cutis obtenditur, sine sudore moriuntur, quibus vero laxa & rara, cum sudore vita defunguntur.

Contentum seu Intentio.

De Modis moriendi.

Connexio: Si ut putant commentatores, hic Aphorismus intelligendus sit, de convulsivis morientibus, facilis illius est connexio cum antecedente Aphorismo in quo de convulsione egit.

Hic

Hic Aphorismus duas habet conclusiones & consequenter partes: *Prima* dicit, quibus arida & dura cutis ostenditur, sine sudore moriuntur: *Secunda* vero ait, eos cum sudore mori, quibus cutis laxa & rara est.

Transcripsus est hic Aphorismus ex *6. Epidem. sect. 6.* ubi per eadem scribitur, nisi quod clarius ibi, cutes aridæ ac duræ, pro aridis & siccis memorantur. Notat autem cutes aridas & duras quæ scilicet simul una exsuccæ sint & densæ, quemadmodum in coriis animalium ad solem exsiccatis, ut nimirum pororum constipationem & coarctationem designet; & cujusvis humoris absorptionem, unde tactu duræ, distentæ & aridæ, adeoque etiam scabræ percipiuntur: Neque solum unius aut alterius partis meminit, sed universalis integumentum, totum circumambientis & circumvestientis corpus; id enim signat verbum istud *ostenditur* vel *circumtenditur*, qua scilicet cute universum corpus circumtegitur & investitur. Quibus igitur cutes tales sunt vel natura vel temporis progressu, forsitan ex morbo, veluti ex Marasmo, sudor nullus fieri potest, etiamsi febribus afficiantur, quoniam vel humor deest propter ariditatem; vel extramitti atque exsudare nequit, propter cutis densitatem, ex arefactis præsertim glandulis subcutaneis dictis, unde lymphæ sudoris materia, proximè solet exstillare, quemadmodum evenisse scribit idem Hippocrates Dealcis uxori, & adolescenti in Mellibœa ægrotis XV. & XVI. 3. *Epidem. sect. 3.*

At vero qui cutem sortiuntur laxam & raram nimio sudore perfusi in febribus, aliisque similibus morbis decedere & mori solent; quia scilicet qui humores pravi per coctionem subigi non potuerunt, & criticè protrudi, sponte sua inter mortis confinia, inutiliter imo etiam maximo cum virium dispendio, erumpere solent, & sudores pariunt, diaphoreticos (vulgo mortales) dictos præsertim si cacoëthiam conjunctam habent, ut in malignis & pestilentibus febribus, & sudore Anglico, nam laxitas & raritas cutis nimia, ad sudorem sunt aptissimæ, laxitas enim redundantiam humoris significat; raritas vero ad sudorem viam parat, proinde quibus talis cutis inest, cum sudore moriuntur colliquatis & dissipatis spiritibus & humoribus seu succis.

Dices: Hic Aphorismus videtur prima fronte totus alienus ab arte medica, & doctrina Hippocratis, cum ipsemet jusserit *in lib.*

de arte à morituris abstinendum. & non ita esse, sed Hippocrates ibidem docet, prædictionem semper & diligenter distinguere debere, id quod *in lib. de ratione victus in acutis* repetit: Imo 6. *Epidem. sect. 7.* varios modos mortis prædicere docuit.

Quæres: cur quidam paulo ante mortem melius sese habere videantur, nam febris & symptomata videntur remittere? & cum Fonseca id multifarie contingere, quia febris remittere videtur, vel dum calor partes externas deserit, & necessitatis, vel imminentis agonie causa, ad internas recedit, ita ut partes ad tactum apyrexiam mentiantur, pulsus tamen in pejus ruente. vel ob virium debilitatem, dum natura victas dat manus, & cum morbo, ejusque causa cessat demicare: vel ob extremum naturæ conatum, quo natura omnes suas vires & facultates, ad corporis centrum, pro morbo ejusque causa vincendis retrahit, omnia in melius vergere putantur, sed latet anguis in herba; nam brevi malum pejus quam ante redit, hinc una vicissitudo aliam, & tandem mors sequitur, hinc est declinatio vitæ, non morbi.

Aphorismus LXXII. & ult.

IctERICI (seu æruginosi seu regio morbo laborantes) non admodum flatulenti (seu ventosi) sunt.

Contentum seu Intentio.

De Ictero flatibus carente.

Connexio: De cute arida & laxa egit Hippocrates in antecedenti Aphorismo: In hoc præsentis Aphorismo de tincta cute colore flavo seu æruginoso sermonem facit.

Hic Aphorismus ob brevitatē non dividitur, cum simpliciter non cludat.

Icterus alibi diximus, vel à veneno sanguinem & lympham corrumpente, vel à crassis & lentis succis fellei humoris, in tenuia intestina transpositionem, ex ductu cystico & choliducho impredientibus exoriri. Primum, plerumque malum, itemque opitiosum, experi-

men-

menta plurima contestantur, de quo etiam Hippocrates, pluries in hisce Aphorismis, præsertim, si ante septimum apparuerit, aut tumido ac duro existente Jecinore *lib. 4. Aph. 62. 64.* Alterum diuturnum quidem, sed minime periculosum, passim experimur, & sæpissime etiam sine febre: Cujus autem hic meminerit, ut eo affectos, non admodum ventosos esse dicat, vereri subit: At de primo effatum hoc veritati non consonat, repugnante quoque eodem Hippocrate, qui Apollonium ægrotum *XIII. sect. 3. Epidem.* æruginosum simul & flatulentum simul fuisse memorat: à tumefacto præterea jecore facile subsequi solet Tympanitis, in qua flatus prævalent, adeo ut universum ventum distendant & inflent.

Ictericos itaque ab impedita bilis seu fellei humoris in gracilia intestina depositione, hic intelligere oportebit, quibus nimirum alvus sliptica esse solet, & fæces si quæ exeruntur albicantes ac cineritiæ observantur: quoniam enim in his bilis consistentior ac interior seu effœta reddita, minimeq; in tenue intestinum deducta, nequit suo sale volatili viscosam pituitam, & hærentes in intestinis succos, etiam ab acido pancreatis fortasse austeriori, itemque ex ventriculo delabentem chylum, convenienter diluere & moderari; propterea fit, ut flatus vel nulli, vel tenues admodum progignantur, sed & fæces inde mucosæ plus justo, & felleo istiusmodi liquore privatae, diu retinentur, atque postmodum non nisi ingenti conatu egestæ, cineritiæ observantur: constat autem felleum hunc humorem pancreatici vim retundere, chylum ab inutilibus partibus repurgare, tenaces & hærentes succos ab intestinis incidendo, detergere, nec non clysteris vicem gerendo flatus discutere, & alvi experimenta ad exitum provocare. At vero adjecit Hippocr. *non admodum* cum fieri possit, ut aliquando leviter saltem, flatus aut ructus ab ictericis emittantur, cum scil. aliqua ex parte, felleus humor ad intestina dejicitur, forte quia non omnino cholidochus ductus obstruitur, & omnem ejus partem remoretur, vel etiam, quia ab oleosa, & tenaci bile cystis ipsa sola infarcitur, indeque Icterus exsurgit, libero interea cholidochi ductu remanente. Sed & contingit pariter nonnullos flatibus vexari, ventris murmura excitantibus, & inflantibus intestina, illos autem nequaquam depellere posse; his equidem facile accidit, ut Ictero corripiantur, & præterea Tympanitici fiant. Novi quendam optima,


cæteroqui sanitate fruente virum, qui tum ingentes flatus, magno sane impetu, per tempus, cum luberet edere consuevisset, mox factus Ictericus, flatus ipsos per ventrem obmurmurantes discutere nequivit, & post aliquod tempus Tympanitico - Asciticus periit: Contigit & pariter experiri Ictericum quendam in convenienti tamen methodo tractatum, flatuosum & ructuosum per totum fere morbi decursum extitisse, sed tandem stomacho & viribus exolutum, cum nihil amplius retinere nec digerere potuisset, ultimum clausisse diem, tumefacto interea jecore, & ictero in hepatidem scirrhosam commutato.

Dices I. IctERICI nigri seu qui laborant ictero nigro ex liene, maxime abundant flatibus. ergo Aphorismus hic locum non habet, & Hippocratem de hoc ictero in hoc Aphorismo non loqui, qui ex lienis duritie vel aliter affecti prodit, sed de eo, qui ex hepate seu potius vitio humoris fellei oritur.

Instabis: Hippocrates 2. *Epidem.* fere adjungit Ictero Hydropem & flatum ergo loquitur de Ictero hepate & succo felleo affecto & Hippocratem hoc loco loqui de Ictero nigro, quia fide quidem hepate & bile affectis; verum tamen ut dictum in contextu, illum non absolute in hoc Aphorismo docere, Ictericos nullatenus esse ventosos, sed revera aliquando esse posse supra monstravimus, & ideo adjecit illud *non admodum*: Vel etiam dici potest, Hippocratem per Ictericos hîc intelligere eos, qui colores habent flavos, & succo felleo vehementer abundant, tales enim ob bilis copiam flatus absumunt, nec ructuosi sunt, sicut lienosi. Et sic esto
hujus utilissimi & laborio-
si libri.

FINIS.

LIBER



LIBER SEXTUS

SEU

SECTIO SEXTA

DE

ACCIDENTIUM PROGNO- STICIS MORBIS.

Aphorismus I.

In diuturnis levitatibus intestinorum, si ructus acidus superveniat, qui prius non extiterit, bonum est signum.

Contentum seu Intentio.

De Prognosi lienteriae.

Connexio : Cum in ultimo libri quinti Aphorismo egerit, Hippocrates de flatibus; In hoc praesente Aphorismo, continuat eandem materiam flatuum, qui per ructus acidos sursum rejiciuntur, hocque utile Medico praecipuum proponit.

Præliminariter autem neminem lateat Sextum hunc librum Aphorismorum Hippocratis, varium esse, & proinde utilem simul & maximè recommendabilem : continet enim sententias ad praxim medicam summopere conferentes, praesertim in his, quæ acciden-

tium morborum proprietates & signatum ad prædictionem, tum ad curam utilia comprehendunt; sumptoque initio ab infima corporis regione naturali primum considerat Hippocrates *acidum ructum* ex ventriculo proveniente, in diuturnis lævitatibus intestinorum, dicitque si is, velut ex inspirato superveniat, qui prius nunquam extiterit, bonum signum esse.

Hic Aphorismus propter simplicem conclusionem non dividitur. Est autem lævitas intestinorum, græce *Lienteria*, morbus ille in quo assumpti cibi celeriter & præpropere nimis, omnisque coctionis expertes ac nullatenus immutati rejiciuntur, nullo tamen existente ulcere in intestinis; & quamvis inter *Lienteriam* & *cæliacam passionem* ea ab authoribus differentia statuatur, ut in *Lienteria* statim ac nullimode immutati; in *cælica* vero parumper detenti, & solum aliquantulum dissoluti deiciantur, non tamen illa tanti est, ut sub nomine lævitatibus intestinorum, hoc loco prior solum, & non etiam posterior affectio comprehendi possit, cum unam eandemque causam, utrisque commune sortiri soleant. Quæ enim à veteribus, de ejusmodi ciborum dejectionibus sunt excogitata, de debili coctione, seu *αρωία* aut languore ventriculi, aut imbecilla retentrice, vel plus justo laceffita expultrice, quarum culpa ingesti cibi, debito tempore non retinerentur, vel ante necessarium tempus expellerentur, ideoque coctionem non subirent; moderna anatomia facilius explicantur, per compressionem & coarctationem tunicarum ventriculi, suis fibris intertextarum, & dissolutionem ciborum, à succis & glandulis lenticularibus earundem in ventriculi cavum exudantibus, quamobrem cum ejusdem tunicæ delaxentur, & succi ipsi digestivi hebetes fiunt, aut in alienam naturam degenerant, coctio nulla fit, vel à modum imperfecta, unde postmodum facilis eorundem delapsus ad intestina, & subita depositio cumque iisdem tunicis ventriculus & intestina convestiantur, atque humores secretionibus addicti, scilicet Felleus & Pancreaticus, parem sortiantur in hoc affectu conditionem, à naturali statu degenerem; proinde fieri ut quod in ventriculo dissolui & concoqui non potuit, multo minus dilui & secerni queat in intestinis, potissimum gracilibus; Quin & hæc tum vitio & inefficacia eorundem humorum, tum defectu ac laxitate glandularum miliarium, quibus interius reficiuntur; tum denique lactearum venarum excipere nequeuntium obstructione, plerumque enim

enim male affecta in causa sunt, ut quato cyus pariter ad alvum inconcocti cibi deturbentur & expellantur. Hinc lienteria, non tantū lævitas intestinorum, sed & cibarius fluxus seu diarrhoea stomachica plerique appellatur, quia stomachus seu ventriculus & intestina, cum suis tunicis, fibris & glandulis, nec non cum liquoribus, in eorum cavum extillantibus, simul una in hoc affectu læsa, conspiciuntur.

At vero, non solum hic considerat Hippocrates lienteriam, seu lævitatem intestinorum quamcunque, vel ex modico tempore indutam, sed specialiter adjecit, ex longo tempore molestantem, siquidem *in diuturnis* dixit *lienteris*: Si enim lienteria recens foret, profecto quod de acido ructu superveniente recenset, foret infidum, quia fortasse semper adfuit, & sicut is à principio lienteriam concomitans, non magni æstimandus, ita nec lienteria ipsa plurimum esset magni facienda, utpote quæ non altas fixerit radices: Jure merito hac ambo animadvertenda scribit, *in longis seu diuturnis lienteris* in quibus gravius de vita verendum, & *ructus acidus superveniens*, qui longe magis utilis existimandus est: In his enim ructus acidus superveniens recuperatum iri ægrotantem portendit, ob restauratæ coctionis indicia, quippe succi illi digestivi, ciborum dissolutionem promoventes amissum acorem referunt naturali statui debitum, quo antea orbatî inidonei evaserant & ventriculus ipse, ad pristinam fibrarum texturam & sui coarctationem quadantenus revocari prædemonstratur. Atq; hinc palam fit, quam longe aberraverint veteres interpretes, ex ructu acido coctionem renovari existimantes ex eo, quod ructus acidus indicium foret inchoatæ coctionis, vi caloris perfici consuetæ; cum tamen ructus acidus ex Galeno frigidam intemperiem consequi dicatur, & coctio ex eodem à calore moderato fieri putetur. Equidem ructus acidus inchoatæ coctionis indicium est, sed ex restauratione ac reditu succorum chylicationi inservientium, quia succi isti, sua natura acido-acres esse debent, & ubi antea per lienteriam hebetes ac inertes, omnique acore dissolventi vim habente orbatî fuerant, cum in pristinum instaurari & exacui cæperint, futuram impofterum meliorem ciborum coctionem pollicentur.

Addidit præterea tunc ructum acidum signum esse bonum, cum antea non extiterit, (ructus enim acidus utcumque ciborum resolutorum & fermenti ventriculi reintegrationem inchoantem arguit,) forte

forte quia succi illi digestivi hebetes, & eficti, vel propter commixtionem aliorum succorum præsertim phlegmaticorum, vel ob mucorem in tunicis & glandulis ventriculi hærentem, vel propter eorundem inertiam ac inefficaciam, veluti à sanguine vapido dependentem, vim & actionem nullam, in cibos assumptos exercere potuerint, qui mox repurgato per iteratas egestionem corpore, autiones & efficaciores reddituri deinceps valeant eorundem dissolutionem & chylificationem peragere; quamobrem, qui succi ciborum dissolutioni dicati, nulli, vel inefficaces erant, comparente ructu acido, illoque perseverante restituti designantur, unde signum bonum: necesse est autem ut perseveret, nam si momentaneus fortasse foret, infidele signum esset.

Sed quid si ructus acidus adhuc antea per initia lævitatatis intestinorum extiterit? Certe ex mente Hippocratis nil boni exinde præfagiri posset, tunc enim ructus acidus, potius à cibis ipsis malè digestis proveniret, quam à succis digestivis, in meliorem statum redeuntibus; quamobrem non immerito lenteriam ipsam comitaretur, & non superveniret; atqui fieri etiam potest, ut succi ipsi talem ac tantum acorem nanciscantur, ut longe admodum à naturali conditione declinent, adeoque referant vim & acutiem aquæ stygiæ, proxime ad veneni naturam accedentes, quo circa non tantum cibos diluant, ac plus justo extenuent, sed & tunicas ipsas ventriculi ac intestinorum proritent & compungant, unde postmodum citissima ac præproperea nimis in alvum depositio, quemadmodum ex vehementioribus catharticiis & venenatis quibusdam liquoribus experimur. Sed & insuper à nimia atque immoderata tunicarum & fibrarum ventriculi laxitate, id ipsum evenire poterit, qua scilicet fiat, ut assumpti cibi nec comprehendi, nec debito tempore retineri queant, sed sponte sua per pilorum se corrugare nequeunt in intestina delabantur, quæ pari formiter affecta aut premente & inepta ejusmodi mole gravata, foras protrudant.

Hinc autem facile deduci potest, evenire quandoque posse lenteriam vitio solius ventriculi male concoquentis, aliquando ex defectu gracilium intestinorum & succorum illuc corrivantium, non secernentium partes chyli alibiles ab excrementitiis, sed una simul permistas ac confusas, ex irritamento statim ad alvum
pro

protrudentium, itemque si à tumida & villosa glandularum substantia quodammodo lævigata, atque à fibrarum & nervorum laxitate, ad debitum tempus continere nequeuntium, indeque fieri cur aliquando gravior, quandoque vero mitior lienteria exoriat, ut exempla testantur. Quoniam vero similem sententiam scriptam reliquit Hippocrates 2. *Epid. sect. 2.* his verbis: *Diuturnis levitatibus intestinorum, acidum ructum fieri, antea nunquam factum signum utile, ut Demaneti accidit; fortasse autem est & arte facere; etenim turbationes huiusmodi alterant; fortasse autem & acidi ructus levitatem intestinorum solvunt;* anam nobis præbet dubitandi, an non æque expediat Medico ructus acidus excitare, imo & vomitum, cum alioquin nihil de hoc memoratum sit in præsentī Aphorismo. Verum Hippocrates cit. 2. *Epidem.* hæsitanter solum sub particula *fortasse* illum commendat, desumpta ratione ab illa turbatione seu commotione ventriculi qua in eructatione se subvertit & efflat, ut inde fortassis calor (cujus defectu lienteria fieri creditur) suscitetur ac vigeat, & frigidi & tenaces humores Ventriculi fundo hærentes submoveantur & expurgentur: Quamobrem cum certum omnino non sit, ex ructu arte promotō, lienteriam fore desituram, proinde factum cur in Aphorismo nil tale retulerit, veluti nondum experimentis comprobatum. Sed & in diuturna lienteria affectis, adeoque toto corpore languentibus, nec videtur tam facile ructum acidum, & vomitum tuto excitari posse, nisi duntaxat ex accidenti, quatenus per medicamenta aromatica & roborantia Ventriculum, vigor in fibris & tunicis ejusdem se quodammodo corrugantibus promoveatur. Et licet vomitus in alvi fluxibus ex eodem Hippocrate à plerisque Authoribus commendetur, is tamen non nisi inter initia convenit, valente nimirum Natura ejus impetum sustinere, quæ cum ex adverso valde imbecillis esse soleat in diuturnis lienteris, propterea nullatenus tutum erit ad ejusmodi commotionem illam laceßere: Quod autem ex angusto alicujus vasis orificio potando, creditur promotum ructum prodesse posse (ut Galenus *comment. 2. in 6. Epidem. text. 32. referens Sabinum ita consuluisse*) vanum omnino existimaverim, cum non nisi ab interna causa excitatos ructus,isque similiter acidus in lienteria commendabilis sit, & signum bonum esse possit; Sed dantur quandoque medici, qui naturæ vices supplere intendentes, & sequentes Consi-

lium Celsi inquietis , quæ per rationem fieri nequeunt per temeritatem facienda : Verum hos sequi , casibus paucis exceptis periculosum.

Quares: Cur vinum citius ace scat in ventriculo quam alii liquores ? *R.* Quia vinum majorem habet ad aciditatem dispositionem quam alii liquores ; præterea vinum plerumque in majori quantitate sumitur quam cæteri liquores. Sed

Quares II. Cur vinum tam facile in ventriculo ace scat ? *R.* Non quia calidum est , sed quia non potest superari à virtute ventriculi aliud esse cum aqua simplici , cruda vel cocta , hæc enim facile digeritur neque tam facile ace scit.

Quares III. Quot modis ergo lienteria obtingere potest ? *R.* Triplici modo : 1. Quando non concoquit ventriculus , licet debito tempore contineat : 2. Quando concoquit , sed non tam diu retinet , ut perfecte concoqui & immutari possit : 3. Quando nec concoquit , nec retinet.

Aphorismus II.

Quibus nares humidiores natura, & Genitura humidior ii minus prospera valetudine fruuntur: Quibus vero hisce contraria adsunt , salubrius degunt.

Contentum seu Intentio.

De Temperie humidiori comparata.

C*onnexio*: Magnam habet hic Aphorismus cum præcedente convenientiam. In priori enim de acido fructu egit , qui humiditatis seu redundantis feri signum esse solet : In hoc de muco narium & femine sermonem facit quæ pariter humiditatis & feri notæ esse consueverunt.

Hic Aphorismus duas continet conclusiones & quidem contrarias: & ideo etiam in duas partes dividitur; *Prima* dicit nares humidio-

midiores Natura, & Genitura humidior, signa sunt culpatae sanitatis: *Secunda* vero asserit contrarium.

Colligit ergo in hoc Aphorismo Hippocrates, ab humidiori vel sicciori narium & geniturae conditione, meliorem & salubriorem: vel contra deteriore & insalubriorem, totius corporis constitutionem; simili fere modo, ac de totius anni tempestate scripserat *Libro 3. Aphorif. 15. ex constitutionibus anni siccitates, sunt Imbribus salubriores & minus mortiferae.* Equidem ab humidiori corporum constitutione, major excrementorum praesertim crassorum & phlegmaticorum proventus designatur, quae partes omnes aggravent ac hebeant, & sanguinem vitae thesaurum, sustinendo & fovendo corpori ineptum & effoetum reddant; quamobrem majora & pejora nobis semper accidunt mala ab his, quae plus justo humefaciunt ac delaxant; Humidum enim in viventibus moderatum, balsamicum & oleosum dictum, minime vero aqueum & excrementosum esse debet, quale per mucum & fluentem lympham narium designatur.

Scriptum est autem *Natura* id est à Nativitate, atque ex naturali & insita corporis habitudine, ad excludendas humiditas illas superfluitates, quae ex causis externis, vel à morbo aliquo inducuntur, quemadmodum ab aëre austrino, cibis excrementitiis, & potibus gelidis ac immoderatis, itemque ex catharris & aliis: In iis praeterea arguitur mala & laxa nimis Cerebri (quod pituitae Metropolis Hippocrati dicitur) constitutio, quae ad lymphaticas, & serosas sanguinis superfluitates facile suscipiat, & susceptas moderari nequeat, sed per nares & cæteras adiacentes partes sponte sua defluere sinat. Id ipsum quoque indicat genitura humidior; Illa quippe tenax, spumosa, ut consistens esse debet; unde cum humida & fluida nimis est, a consimili sanguinis conditione progenita designatur: modo ex utriusque partis humida & laxa constitutione, cæteras quoque omnes pari vitio affectas conjicere licebit, adeoque coctiones omnes, & cunctas operationes inertes & languidas fieri, ex quibus nec integra nec perfecta sanitas exoritur, sed valde debilis & contrahendis morbis multum obnoxia; quandoquidem cerebrum & testes videntur esse praereliquis praecipuae ac praevalentiores partes, ad vim & vigorem toti corpori impertiendum, quippe quia ex Cerebro Spiritus a-

nimales, atque ex Testibus masculinum robur, cunctis aliis communicatur.

Hinc experimur spadones, & illos omnes, qui ejuscemodi aqueis humiditatibus, atque ferosis humoribus abundant, esse perpetuo valetudinarios, ingenio hebetes, sensibus obtusos, languidos, excrementosos, & ad quaecunque opera, aut exercitia, tum mentis tum corporis minus idoneos. Cæterum comparate solum illos his minus salubres esse dixit, cum & non minus sicciori constitutione præditi, suis quoque subjiciantur morbis.

At vero animadvertendum hic est, quod junctim Hippocrates dixit: *Nares & Genituram humidiores*; ut ex utriusque complexu de totius corporis salubritate, rectum judicium ferri possit; nam si una vel altera solum pars humidior foret, non de toto, sed solum de illa parte male affecta ac debili judicabitur; unde si nares solum humescant, cerebrum male affectum, & imbecillum designabitur; si vero genitura duntaxat fluxilior ac ferosior observetur testes solummodo, & aliæ pariter circumjacentes languidæ & laxæ significabuntur. Debent igitur hæc duo simul jungi, ut de totius corporis constitutione conjicere possimus. Id ipsum quoque per eadem fere verba scriptum est *δ. Epidem. sect. 6.* unde excerptus videtur præsens Aphorismus, nisi quod genitura non tantum humidior sed copiosior quoque adjiciatur, non minimum scilicet ad causariam valetudinem conducente copia. Hac etiam de causa idem Hippocrates *2. Aphor. 44.* adnotavit, crassa atque obesa admodum corpora citius interire quam gracilia; quia facilius in gravissimos & lethales affectus incidunt, quales sunt Apoplexia, Lethargus, Carus, Paralytis, oculorum Suffusio, Astma, Hydrops, Lienteria, Diarrhæa, Dysenteria & alii similes; Contra vero sicciori & solidiori corporis constitutione potiti, salubriorem vitam degunt, utpote qui puriori & floridiori sanguine sunt præditi & partes ad robur & operationes vitæ destinatas, solidiores & firmiores nacti sunt; quod pariter confirmat Celsus, *Lib. 2 Cap. 1.* Licet autem negari non possit tales siccioris corporis homines ad acutos morbos, Phrenitidem, ardentem febrem, esse quoque pronissimos.

Dices Hippocrates *lib. de locis in homine* contrarium sentire videtur: & *Lib. 3. Epidem.* dicit eos quibus humidæ sunt nares, & genitura

natura humidior, facilius vivere, Ergo sibi contradicit. R. Licet extricandæ huic difficultati varie studuerint Firolivius, Alarfilius, Hugo Senensis & alii:

Dico ad Primum, Hippocratem loco illo citato nil aliud intendere, quam quod morbi sicci & firmati in corporibus siccis, sint difficiliores & diuturniores; in humidis autem, quod facilius diffuant & curentur.

Dico ad Secundum: Humidos dici saniores, quia vivunt diutius & melius nutriuntur, non tamen inde sequitur, eos minus ægrotare.

Aphorismus III.

In longis intestinorum difficultatibus, cibi fastidium malum, & cum febre pejus.

Contentum seu Intentio.

De Prognosi Dysenteria.

Connexio: Hic Aphorismus connectitur cum primo, cum enim in illo de lævitate intestinorum egisset, & ibidem postmodum signum apparens ad prædictionem declarasset: In hoc præsentem Aphorismo agit de Dysenteria, quæ altera est species alvi fluxus, & pariter signum deducit superveniens ad prognosim.

Hic Aphorismus duas habet partes seu conclusiones: quarum *Prima* malam ponit inappetentiam in longa dysenteria: *Secunda* vero perniciem, si cum febre jungatur.

Hippocrates *Lib. 2. Aphor. 33.* dixit: *In omni morbo, bene se corpus habere, ad ea quæ offeruntur bonum esse, contra vero malum.* at hic specialius in dysenteriis, ciborum fastidium adnotat, veluti signum prostratæ virtutis appetitivæ, atque adeo malum, & cum febre pejus.

Verum animadvertere oportet, non dixisse Hippocratem in dysenteriis seu difficultatibus intestinorum simpliciter, sed notanter adjecit *in longis seu diuturnis*: etenim in initiantibus dysenteriis, ex malo

forte corporis apparatu, atque ex humoribus acris aut oleosis, quales plerumque sunt, qui biliosi vulgo vocantur, non raro fit, ut statim appetitus langueat, & ciborum fastidium ac nausea inferatur: illud tamen non tanti existimandum, ut spes omnis absit recuperandæ imposterum appetentiæ, postquam scilicet humores illi acres & oleosi, edomiti vel evacuati fuerint. At vero cum inter initia dysenteriae, appetitus non est omnino prostratus, si deinde temporis processu, morbo nimirum increbrescente, ille penitus deficiat, & ciborum omnium fastidium insequatur, procul dubio pessimum indicium erit, veluti non à solis humoribus, ventriculi tunicas laxantibus progenitum, sed à labefactata ejusdem actione, atque ab emortuis & exolutis succis eidem addictis, dependens: Neque enim tam facile deinceps est, exolutos ejusmodi succos restaurare, & labefactatas vires reficere, postquam diu cum torminibus alvus egresserit, & intestina tam male affecta fuerint; unde & sanguis & vita ipsa proxime est, ut tandem deficiat. Accedit, quod ad reficiendam consumptam ex immodica egestionem substantiam, necessaria omnino est ciborum ingestio, & pariter conveniens eorundem digestio, & chylicatio, quæ, nisi ventriculus bene se habeat ad appetendum & concoquendum nullatenus haberi poterit, quamobrem de omnimoda virium deficientia, subinde adhuc verendum erit.

Sed quomodo fieri potest, ut in dysenteria, etiam ab initio appetitus ciborum habeatur, procedente vero tempore deficiat? Ratio petenda videtur ab ipsismet intestinis male affectis, sive superioribus & gracilibus, sive inferioribus & crassis & potissimum recto beneque se habentibus superioribus & gracilibus, facile est ut appetitus ciborum habeatur, qui tamen nullus vel valde imminutus erit, cum superiora & gracilia intestina, quibus ventriculus proximius alligatur, afficiuntur: & quia procedente & producta dysenteria, erosiones aut ulcuscula, adhuc in intestinis crassis contracta, sensim & sensim repere possunt in partes superas, & non tantum intestina gracilia, verum etiam ventriculum ipsum contaminare: propterea fieri potest, ut dysenteria inter initia appetentiam non lædat, progressu vero temporis illam inferat: adde quod morbi omnes initiantes debiliores semper sint, sensim vero invalescentes praviore fiant, attritis viribus & languescente Natura.

Quod

Quod diuturnis dysenteriis ciborum fastidium superveniens malum haecenus dictum sit, longe pejus erit, si cum febre jungatur, & quidem si febris à principio dysenteriam comitetur, si in ejusdem decursu superveniat: etenim ratione febris, vitium quoque in sanguine inductum designatur; atqui longe gravius erit, si febris, quæ à principio deerat, vel levis admodum videbatur, mox cum ipso ciborum fastidio supergrediatur, aut in crebrescat; quippe tum vel inflammationem vel mortificationem ibidem factam designat: Id quod etiam notavit Hippocrates 6. *Epidem.* 7. his verbis: *In longis dysenteriis cibi fastidia mala, tum alias, tum si insuper febrierint*: ubi duo notabiliora commemorat: *primum* quod ciborum fastidium non semel sed pluries & diu perstiterit, nam usus est plurali numero, *cibi fastidia: alterum*; quod tum alias, tum si in super febrierint, ubi per particulam *insuper* supervenientem febrem designat.

Neque hoc novum in praxi, qua pluries constitit, dysenteriam citra febrem accidisse, sed & non tantum absque febre, verum etiam absque cruentis egestionibus visam gravissimi Doctores attestantur, illamque epidemicam & populariter grassantem, de qua præ cæteris meminere Willis. Sydenham, Bonetus *in suo sepulchreto* & alii; ut propterea mirum non sit, cur Hippocrates dixerit, in diuturnis dysenteriis, cum tamen dysenteria inter morbos acutos reponatur; etenim fieri potest, ut illa potissimum incruenta, in longius tempus protrahatur, utpote in recto intestino crassiori excitata, quemadmodum etiam in tenebris experimur.

Sunt ergo, cibi fastidium & febris in longa dysenteria, ægro jam num debilitato pessima signa, maxime vero si jungantur, ut jam supra dictum.

Cibi autem fastidium seu inappetentia passim tripliciter intelligitur vel cum nihil potest degustare homo absolute; vel cum appetit, sed admovens alimentum non potest degustare; vel cum alimenta peregrina & prava desiderat: quocunque modo sumpta mala est inappetentia, sed pessima prima, inde secunda, postea tertia: ita Hippocrates 3. *Epid. Sect.* 2.

Plures qui desiderat, hunc Aphorismum concernentes difficultates, eas apud practicos sparsim inveniet titulo de dysenteria.

Aphorismus IV.

Circumglabra ulcera, maligna, (seu prava.)

Contentum seu Intentio.

De Prognosi ulcerum.

Connexio : Cum superiori Aphorismo egisset, de ulcere intestinorum; in hoc præsente agit de aliis ulceribus malignis & pravis. Hic Aphorismus ob nimiam brevitatem non dividitur.

Ulcerata ergo circumglabra dicuntur ex quorum ambitu, & circa illorum labia pili decidunt, ac decisi nullatenus renascuntur. Sive autem ulcera ista à causis externis fuerint inducta, sive ex præcedenti vulnere relicta, perinde erit, modo ab affluxu pravorum humorum, circumjacentes pili è suis radicibus abradantur & sponte decidunt. Hinc ubi Leonicens, aliqui interpretes scribunt *ulcera* Fuchsius mavult legendum *vulnera*, quæ tamen in ulcus desierint, ut proinde non ex vi vulneris, sed ex pravo & maligno humore in labiis vulneris restagnante, radices pilorum erodantur. Addit etiam Cardanus, præter pilorum casum, cutis desquamationem, ut ab iisdem humoribus malignis & erodentibus, ne dum radices pilorum, sed etiam cutis, & caro subiecta depravetur & inficiatur.

Ab ejusmodi igitur pilorum defluxu, & cutis desquamatione, clarissime deducitur, ulcera ipsa evasisse maligna & cacoethica, vel à vitio ejusdemmet partis ulceratæ corrumpentis alimentum; vel à toto, malos humores in eandem partem deponente, prout observare solemus in corporibus Gallica lue infectis. Hinc autem edocemur, pro talium ulcerum curatione, corpus omnino esse repurgandum, à pravis & deleteriis succis, ulcera ipsa inficientibus, ac præterea alexipharmacis & specificis oppugnandum; nisi enim pravi illi humores eliminantur, & alimentum, quod parti affectæ suggeritur, purum & temperatum fiat, procul dubio ulcus nunquam ad cicatricem perducetur.

Hanc

Hanc eandem sententiam scriptam etiam invenies 6. *Epidem. Sect. 7.* sub his verbis: Ulcera circumglabra maligna sunt; quare hic Aphorismus desumptus exinde videtur.

Dices: Pili decidunt, ob discrasiam siccam, uti in Calvitie, ob defectum succi alentis, Ergo non semper ob malignitatem. *R.* Hanc pilorum ruinam non tantum dependere à discrasia seu intemperie, quoniam satis apparet, quod non sit sola, Ergo necesse est, ut pravitas adsit, quæ ulceri iam cacoëthico juncta est.

Quæres I. Quotuplex est putredo in ulceribus? *R.* Duplex, sicca & humida; sicca est in ulceribus callosis de qua Hippocrates 2. *Epid.* humida in sordidis.

Quæres II. Cur Hippocrates non alia signa, nempe corrosionem, rotunditatem, serpentiam, desquamationem, labiorum inversionem & pravitatem, sed tantum pilorum decidentiam adduxit? *R.* Hippocratem hoc signum adferre, tanquam quod oculis statim occurrit, ut Medicus ex hoc statim de ulceris malignitate possit pronuntiare.

Quæres III. In quibus maxime ulceribus depilatio hæc apparet? *R.* In Elephantiasi, impetigine & ulceribus à lue venerea ortis; item in carcinomate & aliis: Quemadmodum herbæ in prato aqua falsa, lixivio, urina aut coenosa illuvie irrigato non crescunt, ita pili in talium ulcerum circumferentia crescere non queunt.

Aphorismus V.

*Dolores laterum & pectoris, ceterarumque partium,
an multum differant, considerandum.*

Contentum seu Intentio.

De Prognosi dolorum.

Connexio: Cum præcedenti Aphorismo, facile connectitur præsens Aphorismus, siquidem in priori ex glabritie docuerit facere differentiam inter ulcera: In hoc præsentī Aphorismo monet, ut Me-

Uuuuu

dicus

dicus inter partium dolores, bene distinguat, & videat, utrum unus alteri sit omnino similis an dissimilis & ex hoc facile veniet in cognitionem partis affectæ, ipsius morbi & ejus causæ. Hic Aphorismus ob simplicem conclusionem non dividitur.

Quo pacto hunc Aphorismum vertit Leonicens, obscuritatem parit; quare melius legendum cum Fuchsio & Cardano, quorum alter ex Græco Codice transfert: *Dolores, qui sunt in latere, & pectore aliisque partibus, num multum prævaleant differantve, considerandum*: Alter vero ita scribit: *Dolores qui sunt in lateribus, & pectore, atque aliis partibus, an multum varient, perdiscendum*: cui consentit etiam Mercurialis. Et quidem utraque hæc versio clarior est, per quam Hippocrates Medicos consulere videtur, ut partem affectam in doloribus, prout mox diximus, internoscere curent: nisi enim partes affectæ, suis indiciis distinguantur, curatio nequaquam prospere institui poterit; etenim in doloribus, non solum distinguenda erit doloris species, num ille acutus & pungens, an vero obtusus & gravans sit, num tendens aut inflans, num pulsans aut convellens; verum etiam à quibus causis potuerit produci; in qua speciatim parte, cum quo morbo conjunctus, quo anni tempore, quave tempestatis constitutione contingat: Si quidem ab horum accidentium & circumstantiarum varietate, partes affectæ & illarum speciales morbi, cum suis causis facilius discerni poterunt.

Et quidem *pungentes* dolores, ab humoribus acribus; *gravantes* à crassis & pituitosis; *inflantes* à flatibus oriri solent: Sicut pariter *pulsans* fit in arteriis; *convellens* in nervis & membranis: *acutus* in partibus sensitivis; *obtusus* in glandulis & viscerum parenchymatibus: Qui contingunt *æstate* plerumque ab humoribus tenuioribus, qui in *hyeme* à crassioribus, ita de cæteris. Modo, pro istorum varietate, varianda quoque curatio erit, ut docet methodus medendi. Dat autem exemplum Hippocrates in hoc textu, de doloribus laterum & pectoris, & pro lateribus intelligit costas, cum adjunctis musculis mesopleuris, & intercostalibus dictis, prout utrumque latus, dextrum & sinistrum occupant: pro pectore autem intelligenda est, pars anterior ejusdem, ubi costæ sterno, adnectuntur, & non solum secundum partem internam, ejusdem pectoris; nam non eodem modo dolor, in utrisque contingens, pectus ipsum afficit, cum pars interior & mem-

brana

brana illa, quam pleurum vocant, sensu exquisitiori communita, acutius dolet; pars vero extima masculis cōtēcta, non adeo acuto sensu torqueri solet. Ita quoque dolor aliter afficit pulmonem ac pleuram, aut musculos intercostales: quamobrem bene constat, pro diversitate partium affectarum curationem diversimode esse instituendam.

Neque solum qualitas doloris, sed ejusdem *Magnitudo* consideranda est, num scilicet exiguus & levis sit, an vero magnus & excedens; Inde enim designabitur causa dolorem faciens, vel levior, vel gravior, vel abundantior, vel parcius, vel tenuior, vel crassior, vel tenacius infixā & recondita, vel superficiētenus duntaxat adhærens, vel intensivus vel extensivus nempe ad plures partes, considerandum insuper est, num in longius tempus dolores sunt processuri; ideoque diuturniores; An vero sint citius desituri; & num per ipsam eandem quā incæperint, anni tempestatem, puta, qui hyeme intra hyemale quoque tempus finiri possint, an potius ad aliam sequentem, nempe vernalem, vel æstivam protrahendi sint, ut ex eodem Hippocrate colligi potest 6. *Epidem.* ubi de constitutione quadam in Perintho vagatā sermonem habet: Quare non irrationabiliter quis conjectabitur, ex dolorum varietate, diversam morbi causam, & morbi *magnitudinem, motum & morem* cum parte specialiter affecta, ut fusius declarat Galenus 2. *de locis affectis cap. 2.* Hinc quod Hippocrates hic exempli causa, de doloribus pectoris & costarum protulit ut inter se invicem distinguantur, nimirum peripneumonia, pleuritis, suppurationes, tabes, venarum ruptiones &c. aptandum quoque erit cæteris partibus, si dolore afficiantur, ut ex iisdem signis discerni possint, puta, cum dolor divexat Ilia, num internæ an externæ partes ventris afficiantur, & num Renes, an intestina, an etiam reliqua viscera adjacentia: procul fit in Nephritide ut colica quæ sane sæpe difficulter discernuntur: quæ sane, ex documento ejusdem Galeni *cit. loco* à quinque fontibus deducuntur; nimirum à Natura & conditione doloris, à situ, ab accidentibus adjunctis, ab excrementis, & ab actionibus læsis.

Postremo advertit Galenus *in comment.* etiam in pluribus individuīs dolores, iisdem in partibus inductos, ex supra dictis indiciis posse diversificari; si nimirum considerentur doloris species à vehe-

mentia : Etsi enim duo individua costarum dolore crucientur , si fortasse tamen in uno dolor sit pungens , in altero tendens vel gravans ; aut in uno vehementior sit , levior in altero : Equidem in illis & causa doloris & pars affecta variabit , pro eorundem diversitate.

Tandem neque prætercunda differentia corporum , Temperamentorum , crasseos , habitudinis , ætatis , consuetudinis , victus rationis , quæ ubique locorum quoque considerata & discernenda sunt tum ad dignotionem & ad prognosim , tum maxime ad remedium in genere , specie , quantitate , qualitate modo , tempore recte adhibendum . Qui ampliorem super hujus Aphorismi contextu , deductionem anhelat , legat Cardanum , qui fuse eundem exponit.

Aphorismus VI.

Renum & vesicæ vitia in senibus , difficulter curantur.

Contentum seu Intentio.

De Prognosi vitiorum Urinae in Senibus.

Connexio : Cum in præcedenti Aphorismo , dolorum mentionem fecisset & docuisset , illorum differentias esse considerandas : In hoc præsentis Aphorismo ad dolores renum & vesicæ , earumque partium morbos se convertit , quibus dolores ut plurimum sunt connexi . Hic Aphorismus propter brevitatem & simplicem conclusionem non dividitur.

Animadvertendum præliminariter , Leoniceum , simul una renum & vesicæ vitia , in hoc Aphorismo conjungere ; alios vero interpretes , & præsertim Fuchsin & Cardanum disjunctim legere ; unde Aphorismum hunc à Græco Codice ita vertunt : *Vitia Renum , & quicunque dolores Vesicæ* : Quasi vero renibus morbi quidem accidant , sed non cum magno dolore , quia illorum substantia parum sensitiva est ; at vero multum sensilis substantia vesicæ , utpote membranosa.

Ve.

Verum enim vero, ista non multum faceffunt ad sententiam Aphoristicam explicandam; etenim five aliter afficiantur, renes & vesica, five etiam diversis morborum generibus divexentur, non tamen Hippocrates ex illorum varietate, eorundem viscerum insanabilitatem, vel difficilem sanationem desumpsit, quippe qui solum, morbos ipsis contingentes considerans difficulter sanabiles in senibus recensuit, respectu ipsiusmet ætatis, & quamvis iidem Authores, pro senioribus intelligant, qui in prima senectutis ætate sunt, ut videtur deduci posse ex eodem Hippocrate 6. Epidem. 7. ubi renum affectiones, post annos quinquaginta se non vidisse sanatas scribit; nihilominus quia ibi de ulcere renum & vesicæ verba facit, non autem de reliquis renum & vesicæ morbis; & aliquando etiam visum senes inter initia senectutis, à quibusdā renum & vesicæ affectibus fuisse vindicatos; verisimilius propterea credere licet, istiusmodi morborum curationem, in provectoribus senibus omnino difficilem aut etiam impossibilem existimasse: modo etiam inter homines in senio constitutos, magna differentia facienda est, nam quidam post sexagesimum annum & ultra, robusti, atque multis aliis etiam minoris ætatis fortiores sunt; contra vero alii ante quinquagesimum adeo imbecilles & languidi observantur, ut non tantum à renum vitiis, sed ab aliis multo levioribus morbis liberari nequeant.

Sed unde est quod senes à morbis renum & vesicæ difficulter liberentur? Omnes fere vetustiores interpretes, causam ad excrementorum multiplicationem, ad expultricis languorem & ad meatuum angustiam retulerunt; Sed & Galenus, & cum Galeno Cardanus quæ Hippocrates indefinite de renum & vesicæ vitiis scripsit, ad ulcera duntaxat contrahunt; pro quibus curandis, quiete inquirunt, opus esse, quæ nulla esse potest in renibus & vesica, perpetuo ad dictis secretioni & expurgationi urinariæ serositatis: Verum hæc cunctis ætatibus communia sunt, quinimo multitudo excrementorum, & meatuum angustia, longe manifestior est in ætate puerili, quam in reliquis; Ego vero judico ideo, curationis difficultatem, in senibus specialiore esse, à vitio acoris muriatici in sanguine, lymphæ, cæterisque liquoribus, temporis progressu, sensim sensimque contracti cujus causa urina ipsa, acriori sale prædita, & serum quod à sanguine repurgatur, acidius effectum, continuam excitant, in uri-

nariis partibus proritationem & molestiam unde quidquid vitiosi in corpore exuperat, ad eas partes delatum, morbos reddit difficiliore, ut propterea nequeant ab iisdem senes ullatenus vindicari. Renum autem & vesicæ morbi senibus contingentes, sunt, dolor Nephriticus à calculis vel arenulis, urinarum suppressio, stillicidium aut ardor, vesicæ scabies & urigo, qui sane pro causa viscosos & acidos succos recognoscunt difficulter emendabiles, atque inducta semel vitia assiduo foventes, prout alibi à nobis ostensum est. Porro si hæc omnia in cæteris quibuscunque cujusvis ætatis & constitutionis, difficulter emendantur, quanto magis in senibus incorrigibilia fient, in quibus omnia languent, & ex ipsa per ætatem mutatione, semper in pejus ruunt, cum & fermenta viscerum in acidum degenerent, ac ipse sanguis sensim & sensim vappescat, coctiones omnes infirmæ fiant, excrementa cumulatiores, crudi & lenti succi in cunctis visceribus contrahantur & hæreant; quamobrem idem Hippocrates *Lib. 2. Aphorif. 40.* dixit: *Rauces & gravedines in valde senibus difficulter concoqui & maturari.* Sed & Articulorum dolores, abscessus, obstructions, calculi, ulcera, sanguinis mictus, Paralyfes, Tusses, alvi fluxus, alique morbi insanabiles in ipsis observantur difficulter quoque irremediabiles: Meminit autem speciatim hoc loco, de renum & vesicæ vitiis, quia ab his præ cæteris, senes gravius affici solent, tum ob seri urinarii acredinem, tum ob tubulorum renalium laxitatem, & sphincteris vesicæ musculi languorem, tum demum quia per hos ductus potissimum, cuncta corporis recrementa, quæ in illis abundantissima sunt, perperim deducuntur, unde illos experimur assiduis mejendi stimulis infestari, & micturiendo plurimum cruciari.

Cardanus non inepte declarat quando à medicis interpretibus dicitur hos in Aphorismo mentionatos morbos, aut prorsus esse insanabiles, aut difficulter sanari; tres modos eventuum intelligit; aut quia non omnino sanantur, aut raro aut cum magna difficultate.

Dices: Illi morbi qui magis congruunt seu proprii sunt ætati, sexui &c. facilius curantur secundum Hippocratis *Aphorismum & 5. Epidem. sect. 2.* Sed morbi renum & vesicæ magis congruunt, & magis proprii sunt senibus, ergo facilius curantur. *R.* 1. Negando minorem, nam etiam pueri & juvenes ut mox dictum his morbis frequentissi-

tissime laborant : 2. Non curantur in senibus ob rationes paulo ante allatas : 3. Dicitur in *Aphorismo*, quod *difficulter* & non impossibiliter sanentur, multi enim observati sunt curati, licet raro & difficulter : 4. Non quia curatu sunt difficiles, ideo sunt periculosi, talis enim est febris quartana; quæ potest esse salutaris & tamen difficillimæ curationis; quoniam cum ejusmodi morbis, vitam licet ærumnosam diutissime producant.

Plura ad hunc Aphorismum explicandum qui desideraverit, adeat Cardanum ubi multa reperiet, quæ nos brevitatis amore omisimus.

Aphorismus VII.

Dolores ventris sublimis, leviores; non sublimis fortiores.

Contentum seu Intentio.

De Prognosi dolorum è Situ.

Connexio: Cum in Prioribus Aphorismis docuisset Hippocrates, considerandas esse dolorum differentias; In hoc præsentī Aphorismo, unam assumit differentiam eorum, quæ ad situm ipsius doloris pertinent.

Hic Aphorismus duas habet partes, quarum *Prima* de levioribus & sublimibus: *Secunda* de non sublimibus & fortioribus doloribus agit.

Hippocrates ergo in hoc Aphorismo distinguit dolores ventris in sublimis, & non sublimis, illosque ait leviores esse, hos vero non tantum graviores sed fortiores, quid autem intelligat per dolores sublimis ventri contingentes, num scilicet secundum corporis longitudinem, an vero secundum ejusdem profunditatem, controversatur apud interpretes; & communior sententia est, locutum hic Hippocratem, de doloribus secundum corporis profunditatem consideratis, ut qui subter Peritonæum fiant, longe graviores & vehementiores sint, leviores vero qui supra.

Ve-

Verum Cardanus, solito sui contradicendi animo, cæteris omnibus se opponit, & contendit, debere intelligi secundum corporis longitudinem, ut nimirum qui in parte ventris superâ, ubi ventriculus, jecur, lien, duodenum intestinum, & pars coli latior continentur accidunt, non ita graves sint, prout sunt qui fiunt in parte inferiori, & in intestino Ileo, Cæco, renibus & vesica. Sed mirari valde licet Cardanum, virum alioqui solertissimum, voluisse in re tam clara cæcutire, & Galeno, cæterisque interpretibus contradicere, & se ipsum gravissimis difficultatibus implicare, quas profecto cavisset, retenta communi explicatione. Quis enim unquam leviores putaverit dolores ventriculi & stomachi, itemque Pylori & Duodeni, quæ sane partes sunt atrocissimis doloribus quam maxime obnoxia, & non sine gravi vitæ periculo contingentes; unde Hippocrates 2. *Epidem. in Prognost.* dixit dolores & tumores supra umbilicum periculosiores esse. Quæ insuper ratione voluerit, renes inter partes inferiores collocare, non satis bene constat, cum ex Anatome habeatur, sinistrum renem intestino colo adhærere. Quæ insuper objicit, de partibus supra Peritonæum sitis, levissima sunt, cum tam Musculi abdominis, quam cutis ipsa, quæ ibidem crassior sane est, doloribus sæpius afficiuntur acutissimis, & non tantum tumoribus œdematosis, verum etiam inflammatoriis molestantur, quam aliæ partes interiores, cæterum facta comparatione partium supra Peritonæum, cum illis quæ infra ipsum sunt, quis ignorat, quod longe graviores accidant dolores intestinis mesenterio, ventriculo, utero & cæteris visceribus hinc inde sitis? Verum tamen pro *fortioribus* doloribus, congruentius *graviores* seu *periculosiores* subrogare licebit, cum gravius & periculosius sit, in interioribus partibus laborare, quam in exterioribus, etiamsi dolor hebetior & obtusior in his percipiatur. Quod si præter dolores adjiciamus quoque tumores, ut plerique expositores, ex Græco Codice addendos volunt in Aphorismo, plane cuique perspectum erit *sublimes* idest ad superficiem ventris positos intelligi oportere; nisi etiam verbum ΜΕΤΕΩΡΟΝ quod in textu Græco est, suspensum, elatum, pendulum, interpretemur, ut dolores hic voluerit Hippocrates, intelligendos, qui fixi non sunt, nec partibus tenaciter adhærentes, veluti ab humoribus tenuioribus & facile exhalabilibus progeniti, ut contra distincti ab his, qui tenacius hærent, nec tam facile resolvuntur.

Quod

Quod præterea de ventre dixit, si ad alias omnes partes corporis concavitates extendamus, procul dubio à veritate alienum non erit, ut sensus fiat dolores sublimes, seu superficarios, leviores semper esse, minusque periculosos ab his, qui in profundioribus partibus maxime nobilioribus & insignioribus accidunt, quippe qui principales corporis partes illi non afficiunt, sicuti isti suapte Natura graviores, unde scripsit Hippocrates *in Prognostico* dolores ventris inferni, si ad septum transversum tendant & supra ventrem, cum aliquo ex malis signis esse lethale; è contra 2. *Epidem.* ait, rupturas circa pubem innocuas esse: Sic etiam coxendicus dolor quo profundior fuerit & ad os ipsum, eo gravior est; qui vero extra magis vergit, eo levior, ita testatur Hippocrates 5. *Epidem.* Polum coxæ dolore profundo laborantem mortuum esse: Lyconem autem non ita profunde dolentem evasisse.

Quæstiones & Difficultates in contextu sunt solutæ, quæ alias observatu dignæ fuerant.

Aphorismus VIII.

Aqua inter cutem laborantibus, exorta in corpore ulcera, non facile sanantur.

Contentum seu Intentio.

De ulceribus Hydropicorum.

Connexio: Hic Aphorismus connectitur cum quarto hujus libri, cum enim ibidem ex glabritie ulceris collegisset, si non incurabilitatem, vel saltem curandi difficultatem: In hoc Aphorismo præsentis, ostendit ex alio signo, tanquam ex causa ulcera difficilis curationis.

Hic Aphorismus ob brevitatem & simplicem conclusionem non dividitur.

De duobus hic Hippocrates Medicos monet: *Primo* quidem, quod ulcera in Hydropicorum Corporibus enata difficillimæ sint

Xxxxx

cura-

curationis, atque adeo omnino vitanda, ne fiant etiam sponte adigente Natura; *Secundo* ut exinde Medici caveant, ne ulcera in ipsis excitent, forte ad totius corporis repurgationem, inde sperantes, ab humoris aquosi per cutim evacuatione, fore illos ab Hydropsi liberandos: in id ipsum convenit etiam Celsus *lib. 2. cap. 2.* hanc eandem sententiam ab Hippocrate mutuatus.

Sed statim sese exhibet difficultas enodanda, de quibus Hydropicis hanc sententiam ipse protulerit. Et quidem de ea Hydropis specie quæ Anasarca vocatur, locutum hic testantur, tum rationes, tum experientiæ; quam obrem summo iudicio peritiores interpretes exponere studuerunt è Græco Codice, non Asciticos, quibus scilicet aqua in abdominis cavo collecta est, sed Anasarca aut Hyposarca affectos, in quibus aqua per totum corpus diffusa, sub cute restagnat, ut propterea *aqua intercus* morbus hic à latinis appelletur. Cum enim Hydropicorum aqua, sub cute constiterit, & universum corporis habitum tumidum effecerit, non tantum humiditate & ædomatosa crassitie cutem ipsam inficit, verum etiam falsilagine muriatica & acre maligno, circumjacentes partes infestat; unde cum præ nimia distensione cutim extenuaverit, concurrente prava ejusdem humoris conditione ulcera excitabuntur vix ac ne vix quidem sanabilia: Atque hinc quotquot hætenus Anasarca laborantes visi sunt, cum enatis ulceribus in tibiis aut cruribus, in mortem tandem concesserunt, omni prorsus curationis spe destituti, imò in aliquibus, ulcera ipsa versa sunt in Gangrænam & Sphacelum, non solum ex languore vitalis caloris, ibidem contracto, verum etiam ob virulentam humoris conditionem irrumpentis in cutem. Cæterum etsi in ascite ac tympanite, solus imus venter tumeat, ab aqua vel à flatu cum aqua permixto, cæteris partibus corporis pene exarescentibus si tamen aliquando fiat, ut reliquæ etiam partes, præsertim infernæ, tractu temporis intumescant & aqua scateant, idem ab exorto in illis ulcere præsagendum. Porro quod in Ascite & Tympanite raro accidit, frequentius fieri solet in Hydrope pectoris, aut pulmonis, in quo pedes & Tibiæ sensim sensimque intumescunt & attolluntur, ut exinde procedente morbo ulcera etiam erumpant & enascantur, pari profecto de causa insanabilia; Id ipsum quoque accidere non raro consuevit, ex disruptione vasorum lymphaticorum, quæ plurima per articulos pedum di-

dispergantur, si tamen lymphæ ipsa acorem muratico-salsum contraxerit, siquidem tumores è simplici & in nova lymphæ procedentes tale quid haud inferunt, & sapissime cum laborantibus consenscunt, à prava itaque & maligna humoris lymphatici conditione, huiusmodi ulcera insanabilia exoriri dicendum, non vero à sola humiditate, quæ nisi gravitatem adjunctam habeat, facile absumi, corrigi & exsiccare tandem poterit.

Hinc igitur clare admonemur, non posse tuto in Hydropicis ulcera excitari: nam si sponte Naturæ inducta, insanabilia fiunt, quanto magis difficillima evadent & periculosa, ab arte facta. Perperam propterea agunt, qui sibi Tibias cauteriis inuri permittunt, sperantes exinde omnem serosæ superfluitatis malitiam iri evacuatum; nam præterquam quod nil peccantis humoris, sed solius particularis laticis, aut alibilis succi portio inde deduci solet, etiam imminenti vitæ periculo se subjiciunt, à Gangræna mox mox successura, ut in plerisque observatum. Qui vero referuntur Hydropici, ab erumpentibus sponte vesiculis, atque ex affluente ab illis sero aliquantulum levati, adhuc etiam postea periêre; sed & nonnullos quoque observavimus, etiam ab egesta & abundanter evacuata per alvum aqua etsi ventre detumuerint, ac de recuperata salute certam spem conceperint, mox tamen congesta denuo aqua irreparabiliter interiisse.

Denique quamvis dictum sit ulcera in Anasarca laborantibus difficillime sanari, ac de his potissimum mentionem fecisse hoc loco Hippocratem, & quod sub cute lympham crassam acido-salinam restagnantem habeant; non tamen inde deducendum in cæteris Hydropis speciebus, licet cutis externa non tumeat, nec ullam sub se stagnantem aquam contineat, ulcera forte ibidem contracta sanabilia reddi; cum cunctorum Hydropicorum corpora, malam in sanguine Diathesim, & pejorem in solidis partibus habitudinem fortiantur quo circa, partes omnes imbecillæ redditæ, & succus alibilis effoetus atque inidoneus effectus, nutritioni facile deinceps, quam non habent, subire possunt insanabilitatem; Sed & tumores illi, qui crassam lympham, & glutinosam materiam, præsertim folliculis conclusam, continent, inter difficulter sanabiles recensentur, quales sunt Strumæ, Melicerides, Steatomata, Atheromata, & oedemata, eoque magis cum diuturniora atque inveterata evaserint.

Manifestum tandem est apud Medicos, omne ulcus exigere, absterfionem, mundificationem, exsiccationem, & cicatrizationem ut nempe 1. ab excrementis repurgetur à sanie & exsiccetur; cum autem Hydropici multis humiditatibus abundant, ulcera resiccare non possunt, adeoque nec curari; 2. Neque repleri carnibus, cum acredo laticis, sanguinis effœti & pauci Balsamicam vim eludat. 3. Nec partis constitutio & temperatura quæ in hydropicis pessima est, arque omni virtute destituta, noxiisque abundans corosivis humiditatibus, nimium quid ad ulceris curationem contribuit; Sic docente Galeno 4. *De medicamentis secundum genera & 3 & 5. methodi*; nihil enim plus facit Medicus, quam prohibere, ne humore superfluo impediatur naturæ opus aut solida pars colliquetur, nam ut Cardanus inquit, *generatio carnis non medici sed naturæ opus est.*

Quæres : Utrum vera sit Cardani opinio, quod Hydrops Ascites, plerumque oriatur à causa calida? R. Mediata transeat, immediata negatur : Vel R. cum Fonsæca licet à ratione non sit aliena sententia Cardani, dicendum tamen videtur melius, hydropis causam ut plurimum frigidam saltem secundum dispositionem, fieri enim potest Hydrops ex acuto morbo aut Dyscrasia viscerum calidiore, calorem homogeneum dissipante frigus & humiditates inducente & sic causa mediata erit calida, immediata frigida: Recte itaque inquit Fonsæca, facient Medici, si in cura Hydropis, non statim calida exhibeant medicamenta cum sub frigida & roborantia, magnum adjuvamentum afferre possint, ubi fervidiori ex causa, morbum ortum compertum habuerint, uti sunt cichoracea & alia à Cardano recensita. Plures controversiæ de hoc Aphorismo legi possunt apud Cardanum hoc loco.

Aphorismus IX.

Lata pustula non admodum pruriginosa; Seu non admodum pruriunt.

Con-

Contentum seu Intentio.

De Pruritu pustularum.

Connexio: Cum de dolore ventris sublimi aut non sublimi Aphorismo 7. mox supra determinasset: In hoc præsentis Aphorismo ad pustulas sermonem dirigit, cum pustulæ aut ulcus sint, aut in ulcus desinere soleant.

Hic Aphorismus ob nimiam brevitatem & simplicissimam conclusionem non dividitur.

Hanc eandem sententiam scriptam legimus 6. Epid. Sect. 2. sub hisce iisdem verbis: *Lata pustula non valde pruriginosa*: Exemplum adducens ibidem de Simone, qui latas habens pustulas, non admodum pruriginosus erat. Inde ergo desumptus videtur hic Aphorismus, quo edocemur non eodem modo se habere pustulas sublimes & in altum sive acutum se attollentes, ac sunt pustulæ latæ, & juxta cutis superficiem expansæ. Quamquam enim in cute erumpere soleant, varia tuberculorum & papularum genera, ut sunt exanthemata, maculæ & efflorescentiæ, cutaneæ, utpote psora, lepra, impetigo, lentigo, herpes &c. considerat nihilominus hic Hippocrates pustulas (sub nomine græco exanthematum indigitatas) quæ ad tubercula quidem referuntur, sed haud quaquam, in fanem purulentam desinentia; etenim pustulæ potius in squamosa quædam & furfuracea excrementa commutantur, fierique solent, ex humoribus tenuioribus, vel acido-acribus, aut acido-salsis.

Facta autem comparatione inter eas, quæ *late*, & eas quæ *elevatae* & *acutæ* sunt, minus quidem pruriginosæ observantur illæ, quam istæ. In latis enim & expansis pustulis, humor peccans ad cutim delatus, crassior esse solet, quam ob rem non multum attollitur; in montuosis vero & sublimibus, humor est tenuior; quo circa verisimile admodum est, in prioribus lympham, in posterioribus serum sanguinis vitiosum ad corporis habitum extramitti. Id ipsum passim quoque experimur in variolis & morbillis, quippe hi angulosi & pyramidales, à tenuiori humore progeniti dolorem & pruritum excitant molestiorem; illæ vero veluti à lymphâ aut crassiore parte sanguinis procedentes, sicuti

sua corpulentia in latum expanduntur, ita minus pruriginosæ observantur. Sic scabies & psoa, cum in exiguas eminentias, sed acutas erumpit, molestior fit, secus vero cum in latas seu expansas, quod sane non aliunde provenit, quam à varietate humoris erumpentis tenuioris vel crassioris. Quod autem humores acres, acidi ac falsi pruritum istiusmodi excitent; palam fit, attenta conditione istorum humorum simul erodentium, & cutim ipsam vellicantium, ea tamen differentia, ut si acritas prævaleat, præter pruritum inducatur quoque cutis erosio aut ulceratio, nisi præ nimia tenuitate & pororum laxitate, sensim dissolvatur & evanescat; at vero si prævaleat falsedo præsertim muriatica, pruritum squamulæ furfuræ comitabuntur. Cæterum in utrisque acidum semper exorbitat, ejus causa humores concreescunt, & cuti adhærent.

Quamquam autem pruritus ab humoribus acris aut muriaticis plerumque proficiscatur, observatum tamen aliquando est, in cutaneis hisce eruptionibus præsertim in scabie, herpete miliari, variolis & aliis, ope microscopii, vermiculos, pediculorum instar innasce, atque ab his molestissimum pruritum illum excitari ut patet in psydraeiis seu syconibus infantum vulgo *Mittesser* / de hac re legi potest tractatus meus de variolis & Kircherus de vermiculatione, alique: Atque hinc factum crediderim, non quibusvis medicamentis cutem sordidam, mundificantibus cutaneas istas ægritudines & molestos pruritus cedere solere, sed iis solum quæ vermiculos istos enecant, qualia sunt quæ ex mercurio tum crudo, tum dulci componuntur, licet ab aliis quoque, puta sulphure, elleboro albo, staphisagria, calce, minio & similibus, vitiosi isti humores corrigi & emendari possint.

Animadvertendum adhuc est, quod Hippocrates Simonis exemplo supra allegato, Medicis ostendere & docere voluerit, curam morborum & febrium in quibus pustulæ aut maculæ apparent aut appariturae sunt, non consistere in aliqua evacuatione, quæ per sanguinem seu sanguinis missionem, vomitum, aut alvum fiat, sed in propulsione humoris ad partes externas; ideo quocunque tempore appareant exanthemata aut ejusmodi symptomata, attrahere & propellere licet, quia melius est materiam venenosam & malignam, ad extra non ad intra movere: juxta illud Hippocrates: *ab intro ferri fores bonum è contra malum* 6. Aphor. 25. Sed de his vide fuse tractantem librum meum de variolis & morbillis.

Dices

Dices I. Erysipelas sese late diffundit neque in conum fastigiatur & tamen est ab humore fervente nempe bile, Ergo etiam latae pustulae fiunt à calido & fervente humore: Præterea herpes exedens maximum excitat pruritus qui tamen est valde latus, ergo latae pustulae non sunt minus pruriginosae. *℞.* cum Fonseca, hanc Aphorismi sententiam esse comparativam, ita ut inter erysipelata & exedentes herpes, alii aliis sese magis vel minus dilatent, & maiorem vel minorem excitent pruritus. Certum enim est autopsia ipsa, quod dolor in angusto consistens omnis acutior qui minus in tumorem solvi amat, exemplo otalgiae, clavi pedis, &c. ille vero qui in tumorem aut latitudinem solutus remissior.

Instabis: Latae pustulae deberent maiorem pruritus excitare, quia majus spatium occupant, ac per consequens plures partes sensibiles. *℞.* Latas pustulas ideo minorem pruritus excitare, quia liberiores per plures porulos nanciscuntur transpirationem, quam parvae & fastigiosae, quae pluries magis sufflaminationem quam transpirationem sequi solent. Præterea latae pustulae, minus profundae esse solent & si scalpantur mox totus humor exit & pruritus cessat; non item in parvis & fastidiosis.

Dices II. Petechiae non pruriunt, cum tamen valde sint angustae pustulae. *℞.* In principio non pruriunt, transeat: in declinatione nego.

Dices III. Succus acidus, serosus, viscosus aut ut veteribus placuit pituitosus aut melancholicus, non habent acredinem & sunt frigidi, Ergo minime queunt pruritus facere. *℞.* Hos humores non nisi per accidens pruritus facere post fermentationem cum aliis acrioribus succis factam, ut patet in scabie, lepra, psora &c,

Quaeres: An variolae morbilli, praecipue autem petechiae, sint morbus novus & veteribus non cognitus? *℞.* Hanc quaestionem fuse resolvimus in citato meo libro de variolis & morbillis quo lectorem remitto; hic brevissime. *℞.* Hos affectus non esse novos sed & veteribus notissimos; ipsemet enim Hippocrates, harum macularum mentionem in plurimis aegris fecit, assimilans illas pulicum moribus; sic primus locus est mox supra citatus Simonis; secundus 5. *Epid.* in filio Eufranoris; tertius 7. *Epid.* in Temonactis filio; quartus 2. *Epid.*
Sect.

Sect. 3. & aliis in multis.
novum quid esse.

Ergo clarum patet hos affectus vetus non

Aphorismus X.

Caput dolenti, & vehementer laboranti, pus vel aqua vel sanguis per nares, aut os, aut aures effluens, morbum solvit.

Contentum seu Intentio.

De Prognosi doloris Capitis.

Connexio: Cum Hippocrates, considerandas esse doloris differentias monuerit Aphorismo quinto; atque etiam Aphorismo sexto, dolores renum consideraverit: In hoc Aphorismo praesente de dolore capitis, suam profert sententiam & utilissimam prognosim. Hic Aphorismus ob simplicem conclusionem non eget divisione.

Animadvertendum bene est, in hujus etiam Aphorismi expositione alienum esse Cardanum, à communi reliquorum versione; etenim ubi ceteri legunt; *Caput dolenti & vehementer dolenti*, ipse exponit *circum dolenti*; (quod etiam tenet Mercurialis) nec male; ita ut velit, intelligendum esse, non solum de dolore capitis interno, sed etiam externo, qui scilicet totius capitis ambitum occupet. Sed tamen si praeter capitis dolorem simplicem & tolerabilem, dicamus voluisse Hippocratem vehementiorem designare, non erit cur communem quoque versionem, retinere non debeamus, quippe cum dolor capitis vehemens est, causam arguit materialem, corpulentam simul & copiosam, quæ non tam facile discuti & resolvi possit, quemadmodum à tenui humore, halitu, & vapore proveniens: quamobrem vehemens capitis dolor, acutiem simul, & magnitudinem designat, qui propterea manifesta curatione curari debeat, de hoc itaque scribit Hippocrates: *Si*

sanguis,

sanguis, pus, vel aqua, è naribus, auribus & ore effluat, morbum solvit; evacuata nimirum materia, quæ tanti doloris causa erat.

Sunt autem hic duo potissimum advertenda: *unum* ex parte causæ materialis, inducentis dolorem, quæ non una & simplex ponitur, sed varia & multiplex, puta vel pus, vel sanguis, vel aqua: *alterum* ex ratione loci, unde humores ipsi effluere possunt, videlicet ex naribus, auribus aut ore; etenim hi ductus patentiores sunt, ut per ipsos, quæ continentur intra calvariam, educi possunt. Et quidem causa, hujusmodi doloris potest esse *primo* sanguis, si perplexus choroïdem & reticularem non bene circuire queat, sed forte alicubi restagnans, potissimum in meningibus, in causa sit, ut in exilibus illarum venulis, & arteriolis circumquaque diffundatur, & dolorem afferat vehementissimum, tum ratione ipsiusmet sanguinis, ob impeditam circulationem, indebite fermentescentis, tum etiam ratione earundem membranarum exquisitissimo sensu præditarum. Quod si forte, *secundo* restagnans ibidem sanguis, ex indebita fermentatione computrescat & in pus vertatur, idem & gravius certe malum afferet. Si denique simile vitium in lymphâ inductum fuerit, ut ex præpedito sui motu hæreat, & acritatem contrahat, procul dubio vehementem quoque dolorem inferet. Humores siquidem isti per universum fere cerebri corticem diffunduntur, quo circa in suo circuitu impediri, acredine & falsilagine contracta, meninges divexant, & dolorem vehementissimum excitant, totius capitis ambitum occupantes.

Loca vero per quæ humores isti, exitum habere possunt, non nisi aures, nares & os sunt, quia per ista veluti emunctoria cerebri, solet Natura, omnes illius superfluitates crassiores repurgare, quemadmodum Anatomia etiam detectum. Excretio autem sanguine, pure, aut lymphâ, non tantum dolor capitis desinit, verum etiam alius quicunque morbus, qui exinde posset imminere protinus solvitur; at vero ex adverso ipsis detentis, & per cerebri substantiam diffusis, apoplexia, convulsio, lethargus, phrenitis, aliique gravissimi morbi suboriuntur, & sæpiissime cum patientis interitu: Quare jure optimo dixit Hippocrates, sanguine, pure vel aqua effluente, non solummodo dolorem sed morbum solvi, quia ex his non solum dolor, sed alius morbus capitis evenit, vel imminet, qui simul cum dolore desinet, quandocunque detenti illi humores fuerint excreti. Excipiuntur autem oculi; quo-

Y y y y

niam

niam minime consentaneum Naturæ foret, tam corpulentos humores, nempe sanguinem, pus, aut lympham, per angustissimos oculorum canaliculos expurgari, nisi cum maximo eorundem detrimento; quin & neque oculi ipsi tantam humorum colluviem excipere possent, cum cæteroqui glandulæ in eorundem angulis sitæ vix, serosiores & tenuissimos liquores admittant. Cæterum crassiores alii humores si fortasse in eas partes deferantur, damnum potius quam levamen afferunt. Id ipsum pariter accideret, si in spinam, in guttur, in gulam, palatum & venas deponerentur, in quas etiam partes, ex doctrina ejusdem Hippocratis Lib. *de Glandulis*, solet natura cerebrum à suis superfluitatibus repurgare; quandoquidem ut evacuatio quælibet salutaris sit, non tantum totius vitiosi humoris necesse est ut fiat, sed per ea quoque loca, quæ conferentia sunt, quemadmodum idem Hippocrates alibi docuit. Ex quibus omnibus nunc admonemur, naturam ejusmodi evacuationes, in vehementibus doloribus capitis tentantem, vel sollicitandam, vel adjuvandam esse, dissolventibus, & per eadem loca educantibus medicamentis, si nimirum illa tarda vel imbecilla sit. Certum autem est, nullum membrum esse, quod difficilius evacuari possit quam caput, medicamenta enim ut, inquit Cardanus, epota, evacuant totum corpus non autem caput, unde convenientibus id præstandum medicamentis, partibus hisce accommodatis ut methodus docet.

Dices: Non dantur abscessus aquosi, Ergo id præpostere est assertum. *R.* Non dantur proprie dicti & perfecti, transeat; improprie & imperfecti nego: Experientia & praxis profert quam plurima.

Plures controversiæ videantur apud Cardanum.

Aphorismus XI.

Melancholicis & nephriticis, hamorrhoides supervenientes bono sunt.

Con-

Contentum seu Intentio.

De Prognosi melancholia & nephritidis.

C*onnexio:* Cum in antecedente Aphorismo, dixisset de materia, quæ in capitis doloribus, per nares, os vel aures effluit: in hoc præsentis Aphorismo, sermonem habet de materia, quæ ex partibus infernis nempe per hæmorrhoides effluit.

Hic Aphorismus ob brevitatem & simplicem conclusionem non dividitur.

Qua ratione nephritici & melancholici solius naturæ beneficio juventur, docet in hoc Aphorismo Hippocrates; idque asserit commode & salubriter accidere, si hæmorrhoides illis superveniant.

Quinam autem intelligi debeant nephritide aut melancholia laborantes, dubium esse potest; nam melancholia aliquando sumitur apud veteres pro ipso humore melancholico; & aliquando pro specie cujusdam delirii, in quo timent & moerent ægrotantes, citra causam manifestam, ut idem Hippocrates *hoc eodem Libro Aphor. 23.* Nephritis vero proprius renum morbus est, qui cum eorundem inflammatione contingit. At cohærenter rationi & experientiæ dicendum, melancholiam hic sumi pro morbo, & nephritidem, pro ea duntaxat renum affectione, quæ ab affluxu acidorum succorum in eas partes provenit, quemadmodum speciatim est dolor nephriticus à calculis, arenulis, atque à tuberculis in renum substantia, aut in canaliculis eorundem progenitis: Hinc non immerito plerique interpretes legere maluerunt *vitia renum* quam nephritidem, ut scilicet comprehenderent, non solum renalis substantiæ affectiones, sed etiam quæcunque alia accidentia renibus inducta.

Qua autem de causa supervenientes hæmorrhoides, melancholicis, & renum vitio laborantibus, conferant, ratio in promptu esse potest, quia per ejusmodi sanguinis melancholici, & crassi profusionem, vel minuitur, vel omnino evacuatur acidus ille humor cum sanguine commixtus, cujus causa melancholicum delirium contingit, & prædicta vitia renibus accidunt: Constat enim ex Anatome, sanguinis impuritates tartareas, & acidas per hæmorrhoidales, sive

venas sive arterias (potissimum externas) feliciter repurgari, cum istæ consentiant, cum arteriis splenicis & mesentericis, ex quibus acidi succi, tartarei & melancholici, in inferiores partes ventris à provida natura deducuntur. Hinc experimur male affecta & cachyma corpora per laxatas ejusmodi venas hæmorrhoidales, nedum à præsentibus, sed etiam ab imminentibus gravissimis morbis præservari; sicut contra à suppressa illorum evacuatione, pessimos morbos tum cordis tum capitis exoriri, ut de Alcippo retulit Hippocrates *s. Epidem.* qui à suppressis hæmorrhoidibus insanivit & periit, quin imo sequenti Aphorismo dicitur tabem vel hydropem succedere, nisi una saltem adaperata servetur.

Verum debent hæmorrhoides melancholicis & nephriticis supervenire, ut subinde proficiant; nam si forsitan illos ab initio comitentur, tantum aberit, ut conferant, ut potius noceant & pessimum signum sint, alterius gravioris mali, quippe indicabunt tantam ac talem pravitatem, tantumque acorem in sanguine exorbitare, ut una simul melancholicum delirium, aut renum vitia foveat, & hæmorrhoidales venas vel arterias proritet, ac reseret. Quare tum solum conferet, per hæmorrhoides evacuatio cum per acidi humoris repurgationem subtrahitur, vel divertitur vitium læsionis cerebri, aut renum: quod sane non contingit, nisi fluxus iste supervenerit. Cæterum dixit Hippocrates *bonum esse*, desumpta nimirum bonitate, tum ex parte humoris excreti, qui, utile est, ut evacuetur, tum ex parte viscerum, firma & valida constitutione præditorum, quæ scilicet à se ipsis vitiosos humores repurgent, & ad alvum, veluti ad totius corporis sentinam, depellant.

Quamquam autem hic melancholicis & nephriticis solum hæmorrhoides supervenientes utiles & conferentes referantur, alibi tamen ab eodem Hippocrate, aliis quoque morbis proficere memoratur, *6. Epid. Sect. 3.* dicitur: *qui hæmorrhoides habent, neque pleuritide, neque peripneumonia, neque phagadena, neque furunculis, neque tuberculis, therebinthi figuram habentibus corripuntur, fortassis autem neque lepris neque vitiliginibus &c.* quin & nonnulli pro nephriticis phreneticos legunt, imo voce etiam generaliori *insanientes*; cum re ipsa insanientibus omnibus ejusmodi fluxus prodesse soleat, quemadmodum *Aph. 21 hujus Libri* subnectitur: *Insanientibus si varices, vel hæmorrhoides*

des supervenerit, insania solutio fit. Morbi siquidem isti ab acido coagulante ac figente sanguinem & lympham, sui originem recognoscunt, quod plane per hæmorrhoidas, jam reſeratas, magna ex parte exiliens egeritur, unaque corpus univèrsum repurgatur & revaleſcit.

Pro coronide tandem advertendum, hæmorrhoides ſponte naturæ tantummodo ſupervenientes utiles eſſe, ſecus vero ſi aliter proſtitatæ, arte quavis promoveantur. Unde male quis ex hoc Aphoriſmo colligeret, poſſe etiam tuto medicos ejusmodi evacuationem per Hyrudinum appoſitionē aut alia ſimili induſtria excitare; nam evacuatio iſta ſponte Naturæ promota, nō tantū ejus humoris fit, qui melancholiam aut Nephritidem fovet (repurgato per eandem convenienter Sanguine) ſed etiam opportuno tempore, & ea quantitate, qua congruit, cum conferentia ac tolerantia ægrotantis, hæc enim non bene quis, licet ſolertiſſimus artifex, internoscere, & diſtinguere valebit, ut quid, quantum, & quando evacuandum ſit, recte peragat. At vero poterit ſolum, inchoatum in eas partes de fluxum adjuvare, ſi fortaiſſis remoretur & hæreat, laxantibus & emollientibus medicamentis, quibus ſcilicet Natura ipſa alliciatur ſolum, ne utiquam vero irritetur & concidat. Ita quidem ſæpe experti ſumus, tumefactas hæmorrhoides, leniter laxatas ſanguinem fu-diſſe, ope emollientium plantarum, malvæ, althææ, chamomillæ, parietariæ & aliarum ſimilium, quibus oſcula venarum reſerantur, & acidi, ſalſi, tum ſeroſi & ſanguinei, tum lymphatici humores, ſua malitia reſuſi, ſalubriter effunduntur, alii quidem hæmorrhoides aperiunt, ficubus inverſis, glandibus acribus, hirudinibus applicatis &c. Sed monet Cardanus, ut appareat vena & tumeat, alioqui ulceratur locus cum damno ut dixit Hippocrates, *Epidem.* de Eudemio. Verum tamen profuſio iſta ſanguinis moderata eſſe debet, & quouſque vires patientis tulerint; nam ſi immoderata fuerit, ut patulas perpetim venas ſanguinem, quocunque levi conatu fundentes habeat, pernicioſa fiet, & cauſa evadet aliorum morborum, longe graviorum, *cum omne nimium Natura ſit inimicum.*

Hæmorrhoides autem venæ vel arteriæ ſunt quæ ad anum tendunt, & ſunt duplices internæ ſeu cæcæ, & externæ ſeu patulæ aut manifeſtæ, illæ in conſpicuæ & ideo cæcæ dictæ; hæ conſpicuæ & ideo manifeſtæ nominatæ.

Quæres: Utrum melius sit assuefieri, ad hæmorrhoidum apertiones vel non ? R. Homines nonnisi maxima urgente necessitate hæmorrhoidum apertioni, assuefaciendos esse ; nam ubi semel, bis vel pluries id factitatum fuerit, continuandum est, alias mala in sequenti Aphorismo contenta timeri poterunt.

Aphorismus XII.

A diuturnis Hæmorrhoidibus curato, (seu sanato) nisi una quæpiam servetur, periculum aquæ intercutem, vel Tabis impendet.

Contentum seu Intentio.

De Prognosi Hæmorrhoidum.

Connexio : Cum dixerit in præcedenti Aphorismo Hippocrates ex hæmorrhoidalium venarum fusione, morbos quosdam & præprimis Melancholicos & nephriticos temperari ; nunc si fortassis illæ diutius fundendo perduraverint, admonet non sine gravi periculo posse in totum supprimi, & fluentem per intervalla sanguinem vitiosum cohiberi ; siquidem aut aquam intercutem seu Hydropem, aut tabem successuram prædicit.

Hic Aphorismus duas habet partes : *Prima* docet curandas esse diuturnas Hæmorrhoides : *Secunda* vero causam addit, cur non omnes curandæ sint.

Verum ad exactam hujus Aphorismi intelligentiam, plura scitu digna sunt animadvertenda.

Primū, *diuturnas* debere esse hæmorrhoides, hoc est ex longo tempore sanguinē fundentes, sed cum certa moderatione, tū quantitatis tū temporis ; secus enim, si recens sanguinis profusio, ex illarum reseratione sit, & neque debita quantitas, nec conveniens modus, nec quantitas moderata, in ejusmodi evacuatione servetur, procul dubio accurata Medici diligentia poterit immodica hæc boni sanguinis evacuatio, sensim sensimque cohiberi : quippe immoderatæ omnes eva-
cua-

evagationes, etiam si ratione excreti, bonæ videantur, sollicite sisti possunt, in gratiam virium conservandarum. Solum igitur fluentes hæmorrhoides sisti non debent, cum ex diuturno tempore vitiosum sanguinem, & glutinosos ac acidos succos emiserint potissimum per intervalla : Tunc enim vitiosis humoribus exitum impedire, atque fluentes hæmorrhoides, omnino cohibere, periculo non vacat, jure optimo proinde Hippocrates adnotavit, à diuturnis hæmorrhoidibus sanato vel curato, Tabem vel Hydropem facillime accidere posse, retentis nimirum intra corpus, pravis illis humoribus, qui per venas & arterias illas infernas convenienter & salubriter repurgantur.

Dixit insuper *sanato seu curato*, hoc est non sponte Naturæ constrictis & occlusis, hæmorrhoidalium venarum osculis, sed ab arte & ope medicamentorum adstringentium ac sistentium sanguinem. Unde Medicos profecto monitos voluit, ne statim cohibeant, ex longo tempore fluentem ex hæmorrhoidibus sanguinem; quemadmodum à plerisque incaute nimis fieri consuevit, ut fortasse importunis agrotantium exactionibus gratificarentur. Oportebit namque primum, a core sanguini inductum emendare, medicamentis potissimum chalybeatis, ut deinde tuto & sine ullo patientis incommodo possit sanguis detineri. Sed nihilominus consulit Hippocrates, neque omnes simul venas, sanguinem fundentes, adstrictoriis medicamentis debere sanari, sed tutius esse unam saltem ad apertam relinquere, per quam reliquæ vitiosorum humorum, si fortasse è toto corpore illuc deferantur, repurgari possint. Prudentis itaque & sagacis Medici erit, unam post alteram, aliquo temporis intervallo occludere, & quam postremo reſeratam agnoverit, aut fortasse tumidiorem viderit, apertam & fundentem relinquere, & cum tandem univèrsum corpus, tum vivido colore, tum solidis carnibus, & naturali vigore fuerit restauratum, de tumescentibus interea hæmorrhoidibus poterit ex integro sanare : Sed & adhuc in his consideranda erit propria cujusque patientis constitutio, ætas & habitus, num deinceps ferendo sit, ejusmodi venarum reclusionem aut occlusionem.

Et quidem, nisi ista exacte perpendantur, & juxta traditas leges methodice servantur, verendum valde erit, ne Tabes vel Hydrops sub-

subsequatur, etenim detentis acidi & tartarei sanguinis recrementis, non tantum cæteri liquores paulatim inficientur, sed etiam partes solidæ corporis, & viscera, tum naturalia tum vitalia; unde vel Hydrops vel Tabes progressu temporis suborietur: Hydrops quidem ex malachylosi ab obstructione à tuberculis ingenitis, & à vasorum lymphaticorum disruptione: Tabes vero ab infecto liquore nutritio, & à pulmone, vel eroso vel flaccido.

Neque vero dixit Hippocrates omnino futuram exinde Tabem vel Hydropem, quasi quod necesse sit, alterutram ex his inevitabiliter successuram, sed solum periculum esse, ne Tabes vel Hydrops subsequatur. Siquidem fieri potest, ut ob exactam victus rationem & ope medicamentorum ad id conferentium, uterque affectus præcaveatur, plerique enim temperatiores facti, post diuturnam hæmorrhoidum profusionem, ab usu medicamentorum, præsertim ex chalybe, non tantum ab hæmorrhoidibus convaluisse visi sunt, sed etiam cachexiam quam incurrerant, evasisse; Secus vero alii diætam non servantes, post mille propemodum incommoda, tandem Hydropici atque etiam apoplectici perierunt, à superabundanti sero, seu lymphæ in cerebrum effusa: in quem sane sensum audiendus Ætius, qui *lib. 14. cap. 5* dictum Hippocratis; *nisi una servetur*, de servanda Diætâ interpretatur, quæ nisi exacta servetur, Hydropem vel Tabem ac postremo mortem certo subsequaturam prædicit; Hinc denique credere fas est, Hippocratem in hoc Aphorismo duos tantummodo morbos Tabem & Hydropem, & quidem ob brevitatem Aphoristicam numerasse, non autem quod multi alii morbi fieri non possint pleuritis, Phagadænæ, tubercula, lepræ atque varii abscessus, nec non alii gravissimi morbi & interitus.

Quares: Utrum etiam præter antiquas hæmorrhoides fluentes, neque alii abscessus utpote fistulæ & varices aut alius antiquus effluxus sint curandi? *℞.* Cum Hippocrate *6. Epidem. sect. 4.* multos intempestive etiam in his & similibus morbis curatos, perniciosus morbis non modo correptos, sed & interiisse.

Quares II. Quot modis vulgo curentur à Chirurgis hæmorrhoides? *℞.* Sectione & unctione, præmissa tamen totius corporis curatione, & recta victus ratione instituta: Ita pariter tenet Ætius; tutius tamen est procedere eo quo diximus modo in contextu.

Apho-

Aphorismus XIII.

Singultu detento, si sternutamenta (seu sternutatio) supervenerint, singultum tollunt (seu liberant.)

Contentum seu Intentio.

De Prognosi seu Remedio singultus.

Connexio: Mirantur multi quod divus noster Hippocrates, ab impuro podice ad stomachum, qui est singultus sedes devenit, sicque non nisi impuram connexionem quidam arguunt ; Nos tamen, salva divi Senis omnimoda autoritate & judicio , hunc præsentem Aphorismum connectimus cum *Prima hujus Libri*, in qua de ructu, curæ lævitatatis intestinorum prodromo egit : Ructus autem cum sit ventriculi symptoma, ita & singultus, proinde pronaeque esse potest connexio.

Hic Aphorismus ob summam brevitatem & simplicem conclusionem non dividitur.

Comparat ergo in hoc Aphorismo Hippocrates, duos motus præternaturam factos inter sese ; unum ventriculi ; alterum cerebri ; etenim sternutamentum cerebri, seu mammillarium processum & meningum motus est expulsivus, ab irritante humore excitatus : Singultus vero commotio ventriculi, est conantis expellere ea, quæ sibi infensa sunt ; & unus alteri iuvamento est ; nam si singultienti superveniat sternutatio, bonum, desinente nimirum singultu per sternutationem.

Quod nonnulli interpretes fieri dicant sternutationem ab exu-cto aëre per nares in cerebrum, unde pulmones illo quodammodo priventur : Licet hæc in sternutatione contingant, non proinde causam excitantem, aut efficientem sternutationem, sed tantummodo concomitantem exponunt ; quippe cum pars anterior cerebri, seu processus mammillares, meningibus obvoluti à causa vel interna vel externa proritantur, quodammodo contrahuntur, ut se ipsos tuean-

Zzzzz

tur

tur, & proritantem simul causam expellant, per idem tempus aër, uberiorius per nares in partes, se contrahentes inferitur, atque ea de causa pulmones attolluntur, mox vero consequente rei irritantis expulsionione, sicuti partes anteriores cerebri, in pristinam amplificationem reducantur, ita quoque pulmones deprimuntur, & simul una sternutamentum contingit.

Quod autem à re irritante, illud accidat, palam fit in his, qui catharris obnoxii, quia humor serosus aut lymphaticus per nares exstillans sua acredine olfactum proritat, & tunicam narium internam laceffit, statim sternutamentis vehementibus, & iteratis molestantur. Qui pariter à pulveribus acris uti sunt Peti Euphorbii, Sampsuchi Betonicae & similium, pari modo naribus vellicantur, sternutationes subeunt. Singultus vero, licet ex mente Hippocratis fieri dicatur, quomodo fit convulsio, cum ille motum convulsivum referat, non tamen sine irritamento accidit, nimirum ab humoribus, fibras & tunicas ventriculi proritantibus, quemadmodum experimur, ab assumptis cibis acris, vel à crapula, quam obrem facillime singultiunt, heluones, ebrii, & qui piperata alimenta, aut etiam allium, cæpam, sinapim, raphanum & alia similia assumpserunt: Sed & à glutinosis & constipantibus, id ipsum, plerique patiuntur. Etenim quosdam novimus, qui tam certo à castaneis, præsertim elixis & mellitis rebus singultirent, ut ab illis fuërit opus, penitus abstinere. Hæc eadem de causa contingit, cur in his sedetur illico singultus, epota mox aqua, vino, vel alio liquore, cujus scilicet beneficio dilutis cibariis, & laxatis fibris ventriculi, vellicatio desinat & singultus.

His breviter præmissis, facile nunc solvitur, quam obrem à superveniente sternutamento singultus sit desiturus: Etenim cum per sternutamentum fiat motus expulsivus, processuum mammillarum & meningum cerebri, indeque concutiatur thorax, & cum thorace vehementer quoque compellatur septum transversum seu Diaphragma, fit proinde, ut etiam stomachus, & ventriculi fundus, violenter etiam concutiatur, ad quam concussionem mox consequitur, dimotio rei illius molestantis, & singultum efficientis in tunicis ventriculi, quapropter illa in ejusdem cavo innatans non solum ab irritatione deficit, sed etiam facile per pylorum ad intestina transferri potest: nisi etiam dicere velimus, singultum illum, hic ab Hippocrate

notari, ex superveniente sternutatione desitutum, qui solum fit à vaporibus acribus aut acidis, qui ubi prius tunicas ventriculi infestabant, mox rursus elati, ac per palatum ad nares deducti, in causa sint, ut sternutatio superveniat, facta interim à ventriculo, in nares eorundem translatione. Quod si non ventriculus, ejusque orificium superius, proprie in singultu pati dicatur, sed potius Diaphragma, ea quidem in parte, qua ab oesophago perforatur, facilius istius Problematis resolutio patebit, ob consensum nervorum, qui plurimi per Diaphragma disperguntur, cum nervis vagæ illius conjugationis, quæ per musculos intercostales & vocales diffunditur; quippe possunt hi nervi per septum transversum, & stomachum dispersi, sola proritatio commoti, internam narium membranam, & meninges cerebri pariformiter contorquere, & ex mutua & reciproca conclusione, halitus & vapores proritantes excutere ac sternutamento singultum & singultiendi occasionem auferre.

Cæterum singultus factus ab ingluvie ciborum, procul dubio superveniente sternutamento tolletur, si ex vehementi illa concussione liberatur ventriculus ab illa molestia quam percipit, ab oppletione & gravamine, non quidem in fibris & liquore nervorum, sed in poris & membranis eorundem; nam nullatenus fieri potest, ut ex iteratis & vehementissimis sternutamentis, id quod internam nervorum substantiam occupaverit extrudi queat. Quare non videtur Galenus bene explicasse Aphorismum hunc de singultu ex plenitudine seu repletione facto, pari modo ac evenit in convulsione: Si quidem in convulsione bene possunt filamenta nervorum, & liquor nerveus à re aut humore replente contrahi & convelli, minime vero in singultu ope sternutamenti excuti & evacuari, quod certo necessarium foret ad liberandum illos à singultu.

Postremo sicut singultus hic memoratus ab Hippocrate, frequens, iteratus ac molestus intelligitur, ita sternutatio quoque, ut illum solvat, debet esse repetita & vehemens ac valde concussiva, qua scilicet possit tenax & hærens humor à partibus semoveri & extrudi; quamobrem non immerito plerique *sternutamenta* plurali voce scribenda voluerant, ut nimirum plura & frequentia illa sint superventura, quæque iteratis concussionibus, rem tenaciter adhærentem excutiant & exturbent; Hac de causa Hippocrates 5. Aphorif. 35.

dixit *mulieri hysterica aut difficulter parienti sternutamentum superveniens bonum.*

Quares I. Cum singultus sit species convulsione, utrum à repletione an inanitione in hoc Aphorismo intelligatur. *℞.* Hanc questionem videri superfluum, quoniam in contextu res abunde de eo potissimum qui ex repletione fit, declarata sit: Unde bene dixit Cardanus *in comment. hujus Aphor. nec est* (inquit) *ut excipiamus eum qui ab inanitione fit, cui non supervenit; sternutatio enim motus est vehemens, hic autem debili agro non potest supervenire: at debilis est ager, quicunque à singultu ob inanitionem corripitur: Ergo maxime singultus ex repletione fit.*

Quares II. Utrum Aristoteles 3. problem 1. singultum bene referat ad pulmonem; quod itidem docuit Galenus *in comment. sternutamentum.* inquit, *fit attracto spiritu à Pulmonibus magnaue compressione facta?* *℞.* Licet Aristoteles magnus Philosophus, ut Philosophus, conceptu Philosophico id statuerit; Medicum tamen instructi Anatome fundamentis singultum ad ventriculum referunt, quemadmodum sternutationem ad cerebrum & tussem ad Pulmonem, similis enim propemodum est omnium trium vehemens motus; Interim negari non potest, etiam per consensum à Pulmone & alio membro, singultum exoriri posse: Galeni Doctrinam autem hoc in passu carpit Cardanus, *fallitur in hoc,* inquit, *Galenus quoniam putat eum aerem attrahi à pulmonibus, ut fiat sternutatio, sane bene fecisset si hunc modum docuisset.* Docet enim Hippocrates *in lib. Prognosticorum* *gravedines & sternutationes, in omnibus circa pulmonem morbis antecessisse & succedere malum est; at in aliis morbis letalissimis sternutationes prosunt quia robur cerebri significant.*

Quares III. Utrum singultus ab inflammatione hepatis aut aliarum partium per sternutationem solvatur? *℞.* Negative quia per hanc singultus causa tolli non potest, sicut & singultus mortis Prodromus non solvitur.

Quares IV. An præter sternutationem dentur alia remedia sistendi singultum? *℞.* Quod sic: uti est spiritus seu halitus retentio & compressio: acetum calefactum: frigida aquæ collutio & potatio: castoreum sumptum aut ejus oleum Stomacho inunctum: Plura vide apud Practicos.

Dices: Galenus *in Comment.* singultum à frigore ortum (ut in pueris sæpe fit) refert ad repletionem, quod videtur à ratione alienum. &c. Ad salvandam autoritatem Galeni dicendum, illum intellixisse per frigus intemperiem cum materia & sic æque à repletionem.

Aphorismus XIV.

Hydrope detento (seu corrupto) si aqua è venis in ventrem confluxerit, solutio fit (seu morbus solvitur.)

Contentum seu Intentio.

De Prognosi Hydropis.

C*onnexio:* Dixit in præcedenti Aphorismo singultum sternutatione solvi: In hoc præsentem solutionem Hydropis proponit, quando aqua à venis in ventrem confluit.

Hic Aphorismus ob simplicem conclusionem & brevitatem non dividitur.

De qua autem specie Hydropis scriptus sit hic Aphorismus, non levis est huius loci difficultas: Etenim si de ascite exponatur, quia aqua in imo ventre collecta est, non bene toti sententiæ Aphoristicae cohærebit, quæ è venis dicitur aquam in ventrem, & consequenter in alvum defluxam, morbum solvere; utque è venis aqua in ventrem, id est, in alvum deflueret, per totum corpus diffusum prius esse oporteret, adeoque anasarcam primo constituere, & deinde in alvum deponi & evacuari pro totius morbi solutione. Per ventrem autem non intelligit capacitatem abdominis, sed tantum intestina seu alvum.

Et quidem in hac solum Hydropis specie, poterit aqua sensim per occultos canaliculos, aut etiam per communes ductus, in ventrem effluere, indeque critice evacuari, ut pressius sane intelligendus erit Aphorismus de laborantibus anasarca, hypofarca ac leucophlegmatia, non vero de ascite aut tympanite: id quod clarius explicans idem Hippocrates 7. *Aph.* 29 & *Lib. de internis affectionibus* sub nomine leu-

cophlegmatia, hanc eandem sententiam protulit inquiring: *Si à leucophlegmatia habito, alvi fluxus superveniat, liberatur.*

Sed quomodo fieri possit, ut lymphaticus humor & aqua intercus ex habitu corporis in ventrem transferatur, alia est gravior difficultas: & quidem crediderim non ex venis aut arteriis illam posse resorberi, & in alvum deduci, etenim per arterias, potius humor deferatur ad partes, quam è partibus referri possit, ut patet ex circulatione sanguinis. Neque deduci potest ex venis, quia istæ reducunt humores in partes interiores, per hepar in cor, unde si aqua in ventrem effluxura è venis deduceretur, procul dubio deberet prius per cor meare, & ex corde postmodum in arterias transferri, atque ex arteriis denique in alvum, id quod non sine gravi vitæ periculo peragi posset, cum ex hoc transfluxu cor ipsum & arteriæ, à tanta humoris serosi colluvie inficerentur, & sanguis universus labem fere inemendabilem contraheret; quare potius è vasis lymphaticis, aqua illa intercus in alvum deferri debebit: Vasa enim lymphatica per universam cutim perreptantia, bene possunt resorbere, ac reassumere lymphicum illum humorem, qui in glandulis subcutaneis continetur, citra sanguinis & viscerum infectionem.

Quoniam vero locutus est Hippocrates, sub conditione: *si aqua è venis in ventrem effluat*: id profecto tum accidet, cum lymphæ sub cute nondum concreverit, sed adhuc fluida manens, per prædicta vasa lymphatica remeare potest: Cæterum postquam diutius hæserit sub cute, & glutinosam induerit conditionem, nulla ratione poterit è vasis lymphicis in ventrem defluere, nisi tamen non eam, quæ extra vasa, in glandulis sub cute jam substituerit, sed, quæ adhuc in vasis lymphicis continetur, fluxuram in alvum intelligere velimus: Id quod facilius semper eveniet intra initia incipientis Hydropis, secus vero in Hydrope jam confirmato, cum scilicet crassior & glutinosior reddita, lymphæ nequibit per vasa lymphica in alvum deferri.

Sed cur est, quod Hippocrates hic venarum meminerit, inquiring: *Si è venis in ventrem seu alvum defluerit?* forte quia sub venarum nomine, omnia corporis vasa humores deducuntia comprehensa intellexit: quo fit ut etiam arterias, is aliquando venas appellaverit; vel etiam quia, cum nondum illi vasa lymphica innotuissent, plane cum vidit aquam, ex habitu corporis, in alvum deductam Hydropicos iudicasse,

casse, ex sola venarum notitia, arbitratus est, non nisi per illas potuisse, aquosum humorem in ventrem effluere: quandoquidem ipse, quæ vidit, scripsit, & quæ iteratis observationibus expertus est, in Aphor. redegit; observavit autem ex habitu corporis aquam in Hydropicis in ventrem effluxam, illos judicasse, existimavit, juxta communem veterum Medicorum sensum, per venas illuc fuisse delatam.

Quamquam autem id in Anasarca laborantibus verisimilius existimem accidere posse, non tamen omnino impossibile putandum, quod id ipsum in asciticis contingere nequeat: etenim licet aqua in ascite, inter peritonæum, & musculos abdominis colligatur, unde difficile admodum est, in alvum effluere posse, fieri tamen aliquando potest, ut per ductus nobis incognitos à provida natura in intestina deferatur & expurgetur: quandoquidem ut alias dicebat Galenus ex eodem Hippocrate *6. Epidem. Sect. 5. mille sibi natura parat vias, per quas se ipsam exoneret*: attamen perrarum hoc plane est, nec tam facile, ut propterea non nisi paracenthesi aquam in abdomine collectam abducere adnitantur peritiores Chirurghi, neque tamen perpetuo successu felici.

Postremo dicitur morbum solvi, effusa in ventrem aqua, non quod in ventre detinenda sit, sed quod per ventrem in intestina & alvum delata prompte evacuetur, & quidem tota quanta est: siquidem ex eo quod aqua Hydropicorum, veluti res præternaturam egeritur per alvum, tanquam per locum convenientem, contingit ipsum morbum solvi, ut quæ totum corpus occupaverat, in ventrem effluens, aditum sibi faciat apertum, adeoque non quia in ventrem effluxerit, conferat, sed quia in alvum translata, possit sponte sua evacuari & extra mitti. Hinc designavit Hippocrates ventrem, veluti locum facilis & promptæ expurgationis, ut exinde corpus universum à leucophlegmatia, & aqua intercute vindicetur; quam obrem tota pariter, & quanto citius fieri possit, educatur, viribus interea constantibus, sicut salutaribus crisis evenit. Porro non quia hic ab Hippocrate solius per alvum evacuationis mentio facta est, exclusa credenda omnino erit, quæ per vias urinæ alias ab eodem velut conducibilis commendatur in tumore lienis, qui prodromus est Hydropisis, ut *2. Epidem. Sect. 2.* de Bione fertur, ex animadversione Mercurialis: nam hoc loco eam potissimum memoratam voluit, quæ citior, facilior, liberior ac securior

rior esse solet, in comparisonem ejus, quæ per urinam fit, longe tardioris, difficilioris ac molestioris eventus. Animadvertendum præterea an hydropisis sit inveterata & viscera destructa aut corrupta, neque enim hoc in passu morbus debite solvi poterit, quin denuo malum succrescat, neque de hoc casu sententia Hippocratis intelligenda est, quemadmodum scripsit Hippocrates *de internis affectionibus*.

Quæres I. Utrum ad curandum hydropem, semper temperata an intemperata remedia requirantur? *℞.* Si hydrops proveniat à colliquatione ut fit post ardentes febres colliquatis carnibus & in lympham conversis, temperata sunt adhibenda: Si vero hydrops sit à lymphæ cruda vel post longum balneorum aquæ frigidaë usum, vel post longam hæmorrhagiam &c. (salvo judicio doctissimi Fonseca) non puto temperata sufficere, sed etiam ad intemperatiora, felici cum successu aliquando transeundum esse.

Quæres II. Utrum ergo in hydrope præparandi sint humores? *℞.* Affirmative, nam qui statim ad purgationes in hoc morbo properant, potius ægrum perdunt quam sanant: unde crassities humorum attenuanda prius, quoniam qua talis educi nequit.

Quæres III. Utrum extenuatio in hydrope æque mala sit ac in aliis morbis? *℞. 1.* Negative maxime in hydrope initiante, nisi enim corpus hydropici aliquantulum extenuetur, non potest præ copia materiæ, debite nutriri aut refici, Ergo aliquantulum extenuatio minime suspecta esse potest. *℞. 2.* Si autem extenuatio talis sit extrema, quæ hydropem confirmatum sequitur, ea non modo suspecta sed desperata credatur.

Plures difficultates in *Commentario* movet Cardanus, quæ ibidem legi possunt.

Aphorismus XV.

Longo alvi profluvio laboranti, sponte vomitus superveniens, solvit alvi profluvium (seu morbum.)

Con-

Contentum seu Intentio.

De Vomitu Diarrhææ Remedio.

Connexio: Cum Hippocrates de acido ructu, in primo Aphorismo hujus Libri verba fecisset, longo alvi profluvio superveniente: In hoc præsentem Aphorismo de vomitu eidem alvi profluvio superveniente, verba facit.

Hic Aphorismus obbrevitatem & simplicem conclusionem non dividitur.

Hippocrates etiam in hoc Aphorismo, memorat unius morbi sanationem per alium, sed cum morbificæ causæ evacuatione conjunctum. At vero non ut præceptum curativum tradat, sed solummodo ut prognosim proponat salutaris exitus diarrhææ inveteratæ, à vomitu spontaneo superveniente, ac propterea non exinde deducant & arguant Medici, id ipsum arte tuto posse promoveri, quod sponte naturæ utiliter accidit, nam ut superius quoque monuimus, non æque bene, nec unde quaque potest ars naturam imitari, ut in humoris excernendi quantitate, conditione, tempore & modo pari formiter se habeat, & valeat id solum, quod vitiosum est, & morbum facit, salutari-ter educere: cum & nec ipsa natura perpetuo atque indiscriminatim quocunque morbi tempore, & qualibet ejusdem circumstantia rite & recte se gerat. Signanter autem notavit in hoc Aphorismo Hippocrates; *diuturnum alvi profluvium per spontaneum vomitum supervenientem terminari*; quia tria speciatim consideranda voluit; *diuturnitatem*, in alvi profluvio; *vomitum supervenientem*, & *sponte naturæ excitatum non ab arte*.

Et quidem, si alvi profluvium recens fuerit, quia tunc peccans materia seu humor multus & pravus esse solet, non tam facile proficiet nec utiliter continget. Inter initia etiam vomitus diarrhææ superveniens, malus, non bonus censendus erit, veluti inductus ab irritata natura vel gravata à multitudine vitiosorum humorum, quæ nequeat illos efferos regere, & emendare; unde & per inferiora & per superiora indomiti feruntur. Quare non solum vomitus in his, nullatenus proderit, sed magis & magis oberit, veluti symptomatice excitatus ab

A a a a a

impetu

impetu & violentia prævalentium & superabundantium humorum, prout in cholera morbo evenit. Itaque diarrhæam ex longo tempore perdurasse notat Hippocrates, quoniam ex temporis diuturnitate, verisimile admodum est, & multitudinem humorum defecisse, & pravitatem magna ex parte fuisse sedatam, ut propterea ex mala & inepta solum dissolutione & secretionem ciborum assumptorum alvi fluxus perseveret, & quidem ex fermentis intestinorum vitiatis, aut etiam ex labefactatis & depravatis succis ventriculi digestivis, qui mox à superveniente vomitu egerantur, vel immutentur: in quem etiam sensum exponendus est idem Hippocrates *2. de Diata* ubi dixit vomitum sistere alvum.

At quamvis ita ab Hippocrate scriptum sit, & plerumque id ipsum experientiæ respondeat, non tamen universaliter verum putandum est, ut aliquando non fallat, cum & nonnunquam à spontaneo vomitu visum sit, non solum diarrhæam nullatenus desisse, sed subinde etiam mortem fuisse subsecutam, potissimum in his, qui viribus destituti, ejuscemodi evacuationem per dejectionem primum, deinde per vomitum sufferre nequiverunt. Sed & vomitus superveniens, si præterea cibalis, vel chylosus fuerit, pejoris plane judicii erit, cum ex illo magis vires atterantur, & labefactatus, unde quaque ventriculus nequeat deinceps illas restituere.

Tunc ergo vomitus spontaneus laudabilis solum erit in diarrhæa, cum humoralis fuerit, & ejusdem plane conditionis, ac est materia ipsa diarrhæam efficiens & conservans: debent insuper vires constare, ut vomitionem tollerent, quæque semel tantum & non ulterius repetat; hac enim ratione crisis naturam referet: Hinc idem Hippocrates *1. de morbis* hanc eandem sententiam describens, adjecit particulam *valide*, quæ non solum referri potest, ad diarrhæam, sed etiam ad vomentem, & ad vomitum supervenientem, puta, cum virium robore toleratum; proinde non temere danda sunt emetica in fluxibus alvi.

Dices I. Hippocrates ut mox dictum *2. de Diata* dicit: Vomitus non tantum alvum sistere, sed etiam solvere. *R.* Si diu fiat post pastum, alvum movebit concedo, quia humiditates in via existentes, vomitus magis deprimit ad intestina ob commotionem factam & etiam propter ciborum qualitatem puta acrium, salforum, dulcium, dispositionem dejectiendi adjuvantium: Si vero statim à pastu provocetur, vomitus

vomitum sistet alvum, quia evacuatus ventriculus, non facile ac statim dimittit, quidquid habet, ideo siccantur intestina.

Dices II. Vomitus semper dicitur malus, Ergo neque hic erit bonus, *R.* Semper est malus, ut signum concedo; ut causa morbum tollens nego.

Quæres: Utrum hic Aphorismus etiam locum habeat in dysenteria? *R.* Affirmative vel potius cum distinctione, si cætera initius habeant, locum habet: Si vero contrarium observetur, vomitus potius noxius & reprehendendus, qui nempe fieret ob intestinorum inflammationem per consensum.

Aphorismus XVI.

Pleuritide aut peripneumonia detento, alvi profluvium superveniens malum.

Contentum seu Intentio.

De Diarrhæa pleuritidis aut peripneumoniæ prognostica.

Connexio: Cum de longo alvi profluvio in præcedenti Aphorismo dixisset Hippocrates tanquam de principali morbo: In hoc præfenti agit de eodem alvi profluvio, sed symptomatico, quod pleuritidi aut peripneumoniæ succedit.

Hic Aphorismus ob brevitatem & simplicem conclusionem non dividitur.

Animadvertendum autem est, quod antea scripsit Hippocrates de supervenientibus evacuationibus conferentibus; num de aliis nocentibus ex adverso discurrit & proloquitur; atque exemplum dat in morbis pectoris, in quibus dejectiones supervenientes nocuas animadvertit. Et quidem pleuritis ac peripneumonia morbi sunt partium spiritalium seu vitalium, quorum alter ad pleuram alter ad pulmonem pertinet: Quamvis non defuerint, qui utrumque pulmoni affixerint, ea tamen differentia, ut si pulmo totus, secundum utrumque

latus dextrum & sinistrum, inflammationem contraheret, peripneumonia laborare diceretur; pleuriritide vero, si alterutro lobo tentum, de qua re alibi. Utcumque autem id eveniat, certum est pleuritidem & peripneumoniam morbos pectoris esse, & partium in pectore contentarum, quæ nulla alia ratione salubriter judicari possunt, quam per anacatharsim, unde 5. *Aphor. 8.* ab eodem Hippocrate scriptum est: *quicumque morbo laterali seu pleuriritide laborantes, in quatuordecim diebus non repurgantur, ii ad suppurationem vertuntur;* quoniam nullus alius tutior ductus patet expurgationi humoris in pectore contenti, quam per asperam arteriam, adeoque per tussim.

Si ergo contingat pleuritide aut peripneumonia laborantem, non expectoratione, sed dejectione per alvum evacuari, duplici proculdubio incommodo afficitur: *Primo* quidem, quod humor in pectore contentus non expurgatur, cum ex pectore ad alvum ductus nullus sit, intersepiente diaphragmate, cavum pectoris & abdominis: *altero* vero, quod alius ab eo, qui peccat, educitur, & non sine ingenti virium dejectione, cum ventriculi & primæ digestionis languore, recrudescente interea, aut etiam putrescente eo qui pectoris cavum occupat; unde tum pulmo, tum cor & sanguis universus plurimum inficitur. Accedit, quod superveniens alvi profluvium, in pleuriritide, aut peripneumonia, alia quoque viscera, nempe naturalia, præter spiritalia affecta designat, potissimum vero ventriculum, jecur, mesenterium, intestina, ex quibus pravi illi humores, alvi profluvium concitantes, sine ulla difficultate derivabunt: quo autem morbi plures fuerint, & partes affectæ variæ, eo plane gravius vitæ periculum imminebit.

Quoniam vero, non quamcunque aut levem evacuationem per alvum memoravit Hippocrates, sed multam, iteratam & copiosam, designatam scilicet sub nomine *alvi profluvii*, idcirco tunc solum exinde de ægrotantis vita verendum, cum alvus immodice, in ejusmodi pectoris morbis fluxerit, secus vero, si levis solum, & modica dejectio fiat: fieri enim aliquando potest, ut citra incommodum partium spiritalium affectarum, alvus cum juvamento potius exponeretur, aut quia cumulatis antea excrementis abundat; aut quia, ob adjunctam febrim, sanguis à suis impuritatibus repurgatur, aut etiam quia compatiencia, reliqua viscera naturalia, forte casualiter ab infarctu, obstructione, tumefactione, vi febris, atque naturæ molimine per dejectionem

nem illam sensim allevantur, ut in Metone & Caupone memorati-
dem Hippocrates 7. *Epidem.* jure igitur per *alvi profluvium*, immode-
ratam, impertinentem, adeoque vires attollentem evacuationem, ac
sputum supprimentem notatam voluit.

Neque solum malum censendum est alvi profluvium in Pleuri-
tide & peripneumonia, ex ratione partium affectarum, quæ nullatenus
per alvum exonerari possunt, sed etiam ex ratione eorundem et
morborum. Sunt enim Pleuritis & Peripneumoma, de genere in-
flammationum; in inflammationibus autem nulla purgatio per al-
vum proficit, ut propterea purgantia medicamenta, sint omni jure
interdicta, & ut inquit Celsus *à parte inflammata, quo plus purgaveris,*
plus addes; Sic Hippocrates refert 5. *Epidem.* historiam Scophi pleu-
ritici qui secunda die mortuus est, & cum purgatus est & à pharmaco,
deliravit cum prius esset mentis compos. Quomodo enim confer-
re poterit alvi solutio in inflammationibus, in quibus sanguis alicubi
haret & concrevit, atque indiget sui resolutione, aut suppuratione,
ut tandem pars inflammata, in pristinum statum restituatur? Id
quod potissimum in Pleuritide & Peripneumonia fit, de qua di-
citur, quod quanto citius sputum comparuerit, tanto quoque morbus
breviabitur.

Quod si cum Heurnio, addere quoque velimus adverbium *Vehe-*
menter, quo non levem inflammationem, sed magnam, ingentem &
vehementem intellexerit Hippocrates, profecto timendum magis,
de illarum eventu, à superveniente alvi profluvio: quippe vehementi
Pleuritide aut Peripneumonia laborantes, gravioribus symptomati-
bus afficiuntur dolore scilicet acutissimo, difficili respiratio-
ne, siti, vi-
gilia, inquietudine, febre continua, aliisque quæ magis & magis exa-
cerbabuntur & ingravescent, à superveniente Diarrhœa. Sed &
longe pejus erit, si alvi fluor accadat his, qui ex longo tempore, Pleu-
ritide aut Peripneumonia laborarint, veluti suppuratis ac Tabidis ef-
fectis, quemadmodum ex voce Græca *ἐχμύω*, id est *habito, detento, ve-*
xato, sive *dintius affecto* colligit Galenus, estque cunctis in Praxi no-
tissimum.

Dices I. Fluxus alvi in fine pleuritidis secundum Hippocratem
est malus, ergo in principio erit bonus. *R.* Non semper in fine esse
malum, præsertim si fiat critice & concocta materia; neque etiam

Sequitur esse bonum in principio, ubi pleraque cruda existunt, & fluxus alvi pure putresymptomaticus, adeoque malus esse consuevit & ut *causa* & ut *signum*; ut *causa* quia fit vi morbi, & vires frangit; ut *signum* quia indicat hepar cæteraque viscera in contextu memorata naturalia & spiritalia, pulmone & pleuræ compati, ut dictum.

Dices II. Si in Pleuritide non est purgandum, cur ergo tot practici id ipsum in illorum Praxi suadere solent, contra hunc Aphorismum? R. 1. Suadent purgandum id est cum moderatione, in declinatione concocta undique & pacata materia: 2. Tantum levissimis & simul pectoralibus remediis v.g. manna, passulis, prunis &c. non autem fortibus veteribus usitatis: 3. Id solum suadent, in Pleuritide descendente quam in ascendente, de qua plura in Praxi.

Aphorismus XVII.

Ophthalmia laborantem, alvi profluvio corripere bonum.

Contentum seu Intentio.

De Prognosi & curatione Ophthalmia.

Connexio: Cum Hippocrates in antecedenti Aphorismo, alvi fluxus vituperasset in Pleuritide & Peripneumonia; In hoc præsentem Aphorismo eundem extollit & laudat in lippitudine.

Hic Aphorismus ob summam brevitatem & simplicissimam conclusionem non dividitur.

Adnotat ergo in hoc Aphorismo Hippocrates, beneficia ex alvi profluvio provenientia in aliis affectibus & pro exemplo affert lippitudinem, quam consequens alvi dejectio, salutaris dicitur.

Quid autem pro lippitudine intelligendum græca vox *Ophthalmia* satis aperte explicat, quam Celsus lippitudinem & oculorum inflammationem sæpius appellat, licet plerisque lippitudo, ad palpebras potius inflammatas referatur, non vero ad oculos. Quin & Celsus ipse *Lib. 6. cap. 6. aliam*

6. aliam & diversam videtur facere lippitudinem, ab inflammatione oculorum eamque sæpius nuncupat *Aspritudinem*, per quam palpebrarum extremitates asperæ & dolentes observantur.

Sed quamvis de nomine parum intersit, multum tamen refert novisse Hippocrat. alibi diversimode descriptum *Ophthalmiam* memorasse, præsertim vero 1. *Epidem. sect. 2. & 3. Aphorif. 12. & 16.* ubi modo humidam, sed mordacem, modo aridam & tabificam, modo siccam & pruriginosam, imo etiam exulcerantem nominat, veluti à diversis causis atque humoribus progenitam, unde ipse fieri crediderim, cur lippitudo quandoque sit contagiosa, & lippientes alios inficiant; imo nec æqualiter afficiant, & afficiantur, neque paribus symptomatibus molestantur, cum & aliquando in Palpebris solum, aliquando etiam in adnata, seu conjunctiva tunica, ruborem & tumorem patiantur: quare qualem hic intellectam velit, queri potest.

Et clare patet eam lippitudinem hoc in Aphorismo designari, quæ non tantum palpebrarum, sed & adnatæ oculorum tunicæ inflammatio est, facta ab affluxu humorum ibidem hærentium, potissimum acrium & erodentium, quorum causa asperitas, dolor, rubor, tumor, in orbita oculorum exteriori percipiatur: Etenim nisi humores corpulentæ has oculorum partes occupaverint, & læserint, fieri non poterit, ut per alvum excreti lippientes liberent; pari certe ratione, ac de obsurdescentibus auribus, alibi idem Hippocrates pronuntiavit. Nisi etiam dicere velimus, cum expositoribus cæteris, liberari lippientes oculos, per alvi dejectionem, facta scilicet depositione humorum, ab affectis visceribus naturalibus, ex quibus illi coafficiebantur. Oportet autem alvi profluvium sponte evenire; Siquidem ut antea dictum istiusmodi evacuationes, morbis supervenientes sponte naturæ excitari debent, cum solius naturæ opus sit id evacuare, quod convenit, & quo tempore, atque ea quantitate, quæ causæ morbificæ correspondeat. Hinc non bene quis ex hoc deducere poterit, licet medicis indiscriminatim oculorum lippitudines, per dejectoria medicamenta curare, nisi aliter constiterit, in ejusmodi opere Naturam sibi adminiculantem habere, forte quia in alvum adigere tentat humores & vel rugitu aut ventris murmure, aut intestinorum inflatione ejusdem depositionem ostendat.

Quia

Quia insuper Hippocrates usus est voce *profluvii* æstimandum propterea supervenientem hanc evacuationem oportere esse copiosam, & non solum fæcum aut intestinalium excrementorum, sed etiam humorum, acrem & muriaticam conditionem præferentium: quippe hac ratione fiet, ut oculi ab humoribus ibidem stagnantibus vindicentur, vel etiam pars alia mandans affecta inaniatur. Quod si evacuatio ista, sponte Naturæ promota, parca admodum sit, & insufficiens, tuto tunc poterit medici industria perfici & adimpleri, documento ejusdem Hippocratis 1. *Aphoris.* 20.

Denique inquit Hippocrates *bonum*; significans ex hoc utilem esse ejusmodi evacuationem, quamquam autem non omnino necesse sit, ut ex illa sit prorsus lippitudo desitura: Etenim postquam humores ab oculis defecerint, remanere quoque solet, asperitas cum rigiditate, quæ non nisi progressu temporis, sponte naturæ desinit, vel fortibus & balneis, venæ sectione potione vini egebit, ut penitus aboleatur, quemadmodum idem Hippocrates 7. *Aphoris.* 46. & hoc eodem 6. *Aphoris.* 31.

Dices I. In ophtalmia (ex praxi) prævalet venæ sectio purgationi: Ergo venæ sectionem potius commendare debuisset Hippocrates. *R.* Hippocratem alio in loco, venæ sectionem nempe in curatione inflammationum recommendasse, hic vero solum agere de purgatione; plurimum enim potest purgatio in oculorum morbis & longe præstantior est venæ sectione, cum hic non sanguis, sed bilis aut lymphæ acrior, suas ludat tragœdias, quæ potius purgatione quam venæ sectione egent.

Dices II. Hippocrates plures oculorum morbos afferre debuisset, qui etiam per purgationem curantur. *R.* Hippocratem nomine ophtalmiæ, omnes aut saltem potiores oculorum affectus comprehendisse.

Dices III. Facilius videtur esse revulsio à pectore ad intestina ob majorem viciniam, & tamen ea improbata fuit in antecedenti Aphorismo. *R.* Ideo improbatam fuisse, quoniam in morbis acutis, procul dubio periculosa sunt ejusmodi evacuationes, præsertim earum partium, quæ facile alias suum trahunt in consensum, quemadmodum pectus, trahit stomachum, hepar, intestina &c. Secus fit cum capite, quod per fibrarum rectitudinem atque patentes vias, longe facilius per alvum expurgatur. Apho-

Aphorismus XVIII.

Cui perfecta fuerit vesica, aut cerebrum, aut cor aut septum transversum (seu Diaphragma) aut tenue quoddam intestinum, aut ventriculus aut jecur, lethale est.

Contentum seu Intentio.

De lethalitate vulnerum.

Connexio: Hic Aphorismus nullam videtur habere cum præcedentibus connexionem, nisi velimus ejus occasionem esse desumptam, ex libro quinto, in quo de magnis vulneribus sermonem habuit Hippocrates.

Hic Aphorismus, licet longior ob simplicem tamen conclusionem non dividitur.

Prognosticus ergo est hic Aphorismus, in quo Hippocrates mortem prædicit in his, qui vulnus vel ulcus patiuntur in cerebro, corde, præcordiis (seu septo transverso) jecore, ventriculo, aut intestinis gracilibus: Simile quid etiam scribitur *Lib. 1. de morbis: moritur autem, si quis cerebro sauciatus fuerit, aut Spinali medulla, aut Hepate, aut præcordiis, sive septo transverso, aut vesica, aut vena sanguiflua aut corde.* Et sane quod pleræque ex his partibus discissæ aut vulneratæ mortem afferant, longe notius est, quam ut longa oratione probari queat; nam cum inter partes corporis numerentur, omnino vitæ tuendæ necessarias plane sit, ut dissectæ, sicut non amplius ad vitam conservandam conferunt, ita imminentem mortem procul dubio portendant: hujus generis præsertim sunt, cerebrum, cor, pulmo, septum transversum, ventriculus. Dissecto etenim cerebro, nervi & nervorum liquor statim male afficiuntur; unde operationes animales deficere necesse est; his autem deficientibus, nec vita diutius perdurare valet. Id ipsum & multo magis dicendum de corde, quod principium & origo est, vitalium operationum. Quamobrem, ipso

dissecto , neque pulsus neque sanguinis motus haberi commode potest.

Pari ratione pulmo discissus necem afferet , cum sit unum ex præcipuis organis respirationis , atque per ipsum principalia vasa sanguifera dispergantur , unde sanguis in cor , & deinde in corpus universum influit. Septum quoque transversum respirationi quam maxime conducit , quare si fortasse dissecetur quia in suo motu labascit, deficit pariter respiratio , qua deficiente animal perit ; respiratio enim & vita pari passu ambulant, ita etiam reliqua viscera , his adjacentia eidem infortunio subjiciuntur, sub quibus præcordia comprehensa intelliguntur.

De ventriculo autem, quamvis à plerisque dubitatum sit , num inter partes principes numerandus foret, quia nihilominus conficiendis cibis incumbit , sine quibus diu animal perdurare nequit , procul dubio ex ipsius dissectione , mortem quoque accidere fatendum , quamobrem non immerito à Quinto Sereno *Rex membrorum* est appellatus, à quo scilicet reliqua corporis membra, alimentum , robur & nutritionem suscipiunt : accedit quod per ipsum plurimi venarum, arteriarum & nervorum rami dispergantur, unde absque istorum gravi læsione eundem vulnerari minime contingit, adeoque non sine videnti vitæ periculo.

Quoniam vero aliquando observatum est , (quemadmodum plurima exempla refert Cardanus in commentario ,) ex vulneribus cerebri, cordis & pulmonis ægros supervixisse, ansa datur plerisque dubitandi, qua ratione id evenerit, ut simul tueri possint, hanc Doctrinam Hippocratis, & ex adverso experimenta eidem adversantia: verū facile difficultas solvetur, si vulnera his partibus inflicta, & à Medicis memorata, examinentur ubi, & quomodo cōtigerint; nā qui testantur à vulneribus capitis, cordis, aut Pulmonum consanuisse, haud quamquam de partibus organicis istorum viscerum meminere, sed solū de superficariis & extimis eorundem; Cerebrum siquidem , ut ex Anatomie liquet, constat cortice & meditullio, ex his autem meditullium omnino necessarium est , ad animales operationes sensitivas & motivas obeundas: Cortex vero non nisi plurimarum glandularum contextus est: Hinc si portio aliqua corticis cerebri rescindatur, illæso meditullio, quia organa destinata functionibus sensitivis & moti-

vis in offensa manent, bene poterit in vita animal permanere, secus vero si interna cerebri substantia, ejusque medullium offendatur. Cor pariter sine vitæ jactura vulneratum memoratur ea in parte, quæ illius mucronem constituit, qui cum pars extrema illius sit, nihilque impediatur motum ejusdem, & sanguinis trajectionem in arterias, neque proinde vitæ tuitioni incommodabit. Cæterum vulnera cordis inflicta basi, ventriculis, arteriæ aortæ, & cæteris ductibus principalibus ejusdem omnino lethalia observata fuere. Pulmones quoque resecti memorantur, superstiti vitæ in extremitatibus & apicibus loborum, quo scilicet vasa pulmoniaça circulanti sanguini necessaria haud quaquam pertingunt.

De core præterea idem omnino dicendum est; nam si vulnus sit inflictum, in substantia jecoris, ubi arteriæ & venæ latiores adunantur, adeoque partem illius organicam constituunt, procul dubio lethale erit; secus vero si fiat in extremitatibus loborum; & ratio inde deducitur, quia vulnera in his visceribus inflicta, non alia de causa lethalia sunt, nisi quia sanguinis circulationi impedimento sunt, & disruptis & incisis venis aut arteriis, sanguis extra propria vasa effunditur, qui deinde exhaustus, motum cordis conservare nequit, nec reliquas partes vivificare, quin & multoties ab irruente sanguine, adjacentes alia opprimuntur & repente suffocantur, unde vita diutius persistere non potest. Accedit quod sanguis extra propria vasa effusus, alia duplici de causa vitæ incommodat, & quia stagnans putrescit & corrumpitur, & quia mole ac irruptione qua in parte hæret, gravat, opprimit, obruit, citius tamen vel tardius pro varietate viscerum affectorum. Atq; hinc modo fit, quam obrem vulnera apices viscerum solummodo lædunt, lethalia non sunt, nisi ex aliquo alio accidente, quia ejusmodi vulnera, vasa sanguifera majora & præstantiora minime perturbant, unde nec multus sanguis effunditur, nec motus sanguinis intercipitur aut impeditur. His itaque de causis accidit, ut vulnera Basim Cordis & venas & arterias inde exorientes transfodientia statim perimant, ut & vulnera perforantia medium pulmonis, quoniam disruptis vasis pulmoniacis, vel sanguis alio diffunditur, quam in Cor, vel impetuosius quam par sit in cor ipsum influit, unde illius motus impeditur; in reliquis autem partibus, vulnera inflicta non statim enecant, sed in aliquod tempus protrahuntur quia ex his non omnino intercipitur motus sanguinis, & cordis, licet

deinde in lethum etiam desinant, alia sane de causa, prout de vulneribus vesicæ & intestinorum mox dicemus.

Vulnera itaque in universum lethalia erunt, non una sed multiplici ratione. *Primo* si in partibus vitæ tuendæ necessariis, conformationem, texturam, & nexum vasorum aut structuram earundem discindant ac turbent. *Secundo* si circulum sanguinis interrumpant. *Tercio* si operationes ad vitam tuendam destinatas lædant vel adimant. *Quarto* si excrementorum repurgationes impediunt. *Quinto* si inflammationem Gangranam, dolorem vehementem, aut alia symptomata graviora inferant, unde vires atterantur & labascant.

Hinc modo vulnera cordis & cerebri ex *primo & secundo capite* lethalia sunt, pulmonis vero, jecoris aliorumque viscerum, magnis & latis arteriis & venis refertorum ex *secundo & tertio capite*; ex *quarto & quinto* denique intestina & vesica, in quibus etiam summi opere considerabilis est propria constitutio membranosa & nervosa, ob quam convulsionibus subjiciuntur & difficillime coalescunt.

Sed adhuc dubitare contingit, cur Hippocrates lienis non meminerit, cum tamen lien arteriosum viscus sit? ad quod dicendum, nullam de illo Hippocratem hoc loco fecisse specialem mentionem, quia parem cum jecore conditionem fortitur, vel quia si fortasse vulneretur, commode rescindi potest cum viscus linguosus sit, & facile à cæteris separabile, quin imo illum eximi etiam integrè posse testantur plerique Anatomei, citra ullum vitæ incommodum.

Quoniam vero Hippocrates in textu, non omnia intestina dixit discissa mortem afferre, videndum hic etiam breviter, quanam sit differentia inter tenuia & crassa intestina, ob quam tenuia si vulnerentur aut scindantur, mortem afferant, secus vero crassa. Et quidem non tantum in vulneribus, verum etiam in erosionibus internis, experimento constitit longe periculosiora esse ulcera tenuium intestinorum quam crassorum, nam in dysenteriis male affecta priora tria duodenum, jejunum & ileon, insanabilia esse solent, facilius vero curationis colon, cæcum, & rectum. Verum diversitas hæc petenda est, tum à structura, tum ab usu, tum etiam ab humoribus, qui per illa diffunduntur: Etenim intestina gracilia, ex membranis constituuntur tenuioribus, habentque glandulas quoque molliores, in quas hiant oricilla

oscilla venarum lactearum, unde chylus in Mesenterium & succum li-
 steum traiecitur, quamobrem & structura & usus aliorum trium inte-
 stinorum crassorum, in quibus & tunicae crassiores & obesiores sunt,
 & glandulae duriores & compactiores, eo quod diutius detinendis fa-
 cibus inservire deberent: Humores etiam confluentes ad intestina
 tenuia, pancreaticus scilicet & felleus, cum in statum praeternaturalem
 degenerant, pessimam & deleteriam conditionem nanciscuntur, un-
 de gravius affici solent intestina gracilia, secus vero crassiora ut patet;
 quamobrem non sine ratione fit periculosiori dysenteria laborare in-
 testina superiora quam inferiora. Non immerito proinde Hippocra-
 tes, consideratis in his intestinis gracilibus, dixit illa discissa lethalem
 exitum sortiri, non ideo tamen ejusdem periculi expertia esse intestina
 crassa, quae etsi plerumque non tam gravi & afficiantur, possunt tamen
 aliquando, ex ingenti & magna discissione pari modo periclitari, sed
 longe minus vel tardius quam gracilia: Vesica pariter discissa insana-
 bilis est, quia cum sit perpetuum emissarium urinae, nequit prompte
 conglutinari, quin & ulcus ibidem contractum perpetuo sordidum
 esse solet; quamobrem saepe saepius experimur, illa in fistulas facili-
 me desinere.

Denique ventriculus si vulneretur, etiam mortem portendit, si-
 quidem ipso discisso necesse est succos digestivos infringi, illius textu-
 ram vitari, chylosim offendi, & chylum ipsum nullatenus protrudi
 posse per pylorum ad intestina: Sed & ob nervorum copiam, quibus
 intexitur, fieri nequit, quin etiam cerebrum compatiatur, unde post-
 modum motus convulsivi; quin imo ex sola & simplici illius laesione
 vomitus, singultus, anxietas, dolor & alia graviora symptomata mini-
 me poterunt evitari, ab his autem fieri nequit, quin mors sit brevi sub-
 secutura.

Ventriculo non irrationabiliter adjungi potest oesophagus, qui
 vulneratus non dissimiliter lethum afferet, ut observatum est in quo-
 dam presbytero, ob vulnus inflictum in parte postica thoracis, prope
 spinam cui oesophagus adnectitur.

Partibus his vulneratis, atque hoc loco memoratis ab Hippocra-
 te, sunt qui plura alia adjiciunt, & quidem Brassavolus, vesicam felle-
 am, pericardium, pulmonem, lienem & spinalem medullam, inter par-
 tes ad exitum vulneratas recenset: & Celsus *Lib. 5. Cap. 26.* addit quo-

que renes, venas & arterias, potissimam circa fauces & guttur, nec non spinalem medullam, uterum & meninges cerebri. Verum non quæcunque vulnera, quæ insanabilia sunt lethalia dicenda erunt; etenim ossa & cartilagines si frangantur, aut vulnerentur, licet plerumque insanabilia evadant, non tamen mortem necessario afferunt. Cæterum multæ aliæ partes vulneratæ aliquando exitiales fiunt (etiamsi commodè sanari possint) vel ob imperitiam artificum, vel ob symptomatum societatem, vel ob vulneris profunditatem aut magnitudinem, vel ob sanguinis effusionem, indeque consequentem virium jacturam, vel ob ætatis languorem, vel ob carniū mollietatem, vel ob alterius morbi, præsertim virulenti concomitantiam, ut in lue Gallica affectis experimur; hinc non semel contigit observare vulnera aut ulcera, in partibus extimis etiam ignobilibus corporis inflicta, quæ tandem mortem attulerint, in senibus valetudinariis gallica lue affectis, & aliis propter quasdam circumstantias cum vulnere conjunctas.

Signa denique quibus internoscere liceat, quæ membra discissa aut vulnerata sint, ut ex illis iudicium ferri possit, lethalis aut salutaris eventus, late exposuit Celsus *cit. Lib. 5. Cap. 26.* ex quo alii Chirurgiæ Professores qui consuli possunt, si lubet.

Illud autem à nobis videtur superaddendum, quod iterati, in æquales & recurrentes rigores febriles, fere semper solent internorum viscerum læsionem prædemonstrare, idque vel ob sanguinis è venis & arteriis discissis effusi in alias circumjacentes partes, præsertim sensu præditas irruptionem, & subsequentem putrefactionem, vel ob impeditum ea in parte sanguinis circulum, qui cum non prompte sua vasa circulationi destinata subire queat, illas impedit & extimulat; & licet magna ex parte, non raro per supervenientem sudorem dissolvatur, perseverante tamen eadem causa denuo illi recurrunt. Hinc bene Cardanus partes universum vulneratæ quatuor modis mortem adferunt: vel necessitate officii ut pulmo: vel potentia naturæ, ut cor: vel sanguinis profluvio, ut jecur, arteriæ magnæ & venæ: Vel symptomatum pravitate ut nervosa, ventriculus, vesica. Alii dicunt vulnera alia sunt lethalia absolute proprie & per se, alia per accidens: alia dubia & periculosa, alia sigillatim, alia conjunctim spectata sunt lethalia. Vulnera per transversum facta sunt graviora quam quæ in longum inflicta sunt, alia sunt penetrantia alia superficialia alia magna alia

alia parva sed sæpe prava & ideo periculosa & lethalia puta in nervis &c.

Dices / In his, in quibus calculus excinditur non est lethale vulnus vesicæ, Ergo falsum est, quod mox dictum est. *R.* In hoc casu non vesica, sed illius collum fecatur, quod tanti periculi non est cum collum sit musculosa pars, nisi forsan ex accidenti puta febre superveniente, sed neque necesse est febrem cum rigore illis oriri; & si oriatur non quidem bonum est signum sed tamen non lethale, quia plerique servantur, nemo ramen absque febre mortuus est.

Quares: Quæ pejora sint an ulcera an vulnera, & quænam ex his magis lethalia? *R.* Longe deteriora sunt ulcera, quo ad sanationem quoniam sensim facta & cum pravitate conjuncta; inquit enim Hippocrates, morbi antiqui difficilius sanantur quam recentes: Vulnera vero sunt periculosiora & magis lethalia, quia majorem subito mutationem in corpore faciunt, unde dolores & convulsiones oriuntur, quæ ex ulceribus raro evenire observantur, ex vulneribus autem sæpissime. Ut ergo lethaliora sunt vulnera, sic majorem sanationis spem habent, quoniam violenter & recenter inciderunt: Ulcera autem, ut sanatione sunt difficiliora, ita lentius mortem afferunt; verum quoniam omnino sanationis spe carent absolute pejora sunt.

Aphorismus XIX.

Persectum os, aut cartilago, aut nervus, aut genæ tenuis particula, aut præputium, neque augetur, neque coalescit.

Nota: Idem Aphorismus habetur Lib. 7. Aphor. 28.

Connexio: Cum in antecedenti Aphorismo Hippocrates egisset de partibus organicis, quæ vulneratæ mortem afferunt: In hoc de illis agit partibus similaribus, quæ dissectæ coalescere nequeunt, quæ in Aphorismo recensitæ sunt: & licet istæ mortem non afferant, sed discissæ vel vulneratæ difficulter coalescant vel augeantur.

Hic

Hic Aphorismus ob suam brevitatem & simplicem conclusionem, non dividitur.

Primo autem loco Hippocrates proponit *fracturas ossium* de quibus tamen dubitatur an non coalescere possint, & successive incrementum suscipere: etenim Galenus *Lib. 3. artu Medica* non solum in pueris illa (inquit) facillime cuniri & deinde augeri, & quidem per primam intentionem ut loquitur Andreas Laurentius in sua Anatomia, id est, perse & nullo interveniente medio heterogeneo, sicuti plumbum liquefactum cera & savum in suam substantiam iterum coeunt; sed etiam in adultioribus per secundam intentionem, id est, intermedio quodam heterogeneo, puta, corpore calloso, quod licet proprio os dici non possit, nihilominus ad illius naturam quam maxime accedit, quippe quod duritie, soliditate, candore, insensibilitate præditum est sicut os. Verum esto ossa fracta, per intermedium aliud corpus uniantur, proprie tamen coalitio illa dici non potest, cum sit quid heterogeneum, differentis omnino conditionis & naturæ, quamquam duritiem & soliditatem ossium æmuletur, ut propterea si contingat, in ea parte os iterum fracturam subire, non quidem frangetur, in poro illo adnato sed alibi, ut sæpius experimento (& quidem meo proprio, quemque pedem bis frangendo) constitit. Sed & neque incrementum suscipit os fractum, sed in eadem magnitudine ac dimensione subsistet, cum nutrimentum, quod ossi suggeritur, supra solum, non vero infra fracturam deferri possit, impediante nimirum transitum poro illo calloso; quamobrem experimur ossa fracta, in pueris non ulterius increescere, sed per comparisonem ad alia ossa correspondentia aliquantulum decurtata & exilia remanere: modo Hippocrates in hoc textu de vero coalitu, & de genuina nutritione mentionem facit, secus vero de falsa & æqui pollente.

Sed unde est quod ossa, aliæque partes hic memoratæ coalescere & nutriri non possint, gravis equidem est huius loci difficultas. Omnes interpretes cum Galeno, communem in omnibus partibus exanguibus & spermaticis appellatis, causam faciunt materiæ alibilis defectum: putant enim partes universas corporis, aut ex semine aut ex sanguine generari: ex semine quidem partes eas, quæ albæ sunt, ut ipsi dicunt ossa, tendines, ligamenta: nervi, venæ, arteriæ, membranæ, cartilagine, glandulæ: ex sanguine vero omnia viscera, cor, pulmonem, jecur, lienem

lienem, renes, musculos & carnes universas: Hinc subdunt partes carnosas & rubras à sanguine progenitas cum vulnerantur aut dilacerantur, facillime regenerari & increfcere poffe, fuffepto ipsis sanguine pro alimento, ex quo exordium defumpferunt: at vero offa fracta, atque cæteras partes albas, veluti spermaticas diffectas, nullatenus coalefcere poffe, quia deficit illis alimentum & principium generationis earundem, nempe fermen,

Sed quam minus fundata fint ejuscemodi veterum opinamenta, clariffime deducitur ex Anatome, & ex earundem partium ftrutura, omnia enim viscera tanquam conftructa ex glandulis, membranis, fibris, nervis, venis, arteriis non nifi in primordiis fuæ generationis, eandem materiam albugineam uniformiter recognofcunt, unde nihil penitus differunt à generatione, & ftrutura partium albarum feu spermaticarum; hinc in prima conformatione embryonis, cum illius corpusculum integratur, non nifi texturam quandam exhibet, fibrarum, glandularum, membranarum & vaforum, per ipsas excurrentium, quæ deinde à sanguine materno per vafa umbilicalia fuffepto, nutritionem & incrementum fufcipiunt, per fubftantiam illam glutinofam ipsiusmet fanguinis, quæ in aliquibus magis & copiofius appingitur, in aliis minus & parcius, pro vaforum exilitate, & pororum & texturæ diverfitate: quod vero pulmo, jecur, cor, lien & alia confimilia viscera rubra videantur; membranæ vero, cartilagines, offa, alba fint, id duntaxat contingit à sanguine affluentius per prædicta viscera difcurrente, quoniam continent venas & arterias latiores & numerofores: at vero in partibus albis, quia venulæ & arteriolæ exiles admodum funt, propterea vix confpici poffunt: atque hinc fi pulmo, jecur, lien & cætera viscera carnea & sanguinea putata, sanguine ipfo exuantur, quod fieri folet per immersionem in aqua tepida, poftquam univerfum sanguinem per illorum parenchymata diffufum, dimiferint, albicantem quoque fubftantiam referunt; & quemadmodum accurata diligentia Anatomicorum detectum eft, non nifi glandulis, veficulis, fibris, venis, arteriis & nervis contexta funt. Itaque omnes partes corporis homogeneam referunt naturam, atque in primis fuis rudimentis ab una fubftantia feminis glutinofa, vel ut melius loquar, ab una fubftantia albuginea, in ovo fæmineo contenta ducunt

originem, à sanguine vero circumfluo, vitam & vigorem suscipiunt, quemadmodum fusius declaratur in institutionibus.

Hinc ergo omnino minus fundatum dicendum est, quod à veteribus fuit creditum de duplici materia, origine & principio partium componentium humanum corpus, & cujusvis alterius animalis: Sed & falsum quoque est, deesse materiam seminalem, nutriendis partibus spermaticis aptam, quippe quæ non tantum in ætate juvenili, verum etiam in virili & senili non raro superabundat. Quin imo si vera sunt, quæ Galenus memorat, de regeneratione & restauratione ossium fractorum in pueris, quia in his semen deficit, procul dubio ossium fractorum coalitus & resectio nulla foret, atque contra faciliior & abundantior haberi posset in juvenibus, in quibus semen uberius est & vegetius, Totum ergo opus nutritionis à substantia sanguinis glutinosa pronat, quæ longe copiosior suggeritur illis partibus in quas sanguis uberius influit: qui fit ut jecur, pulmo, carnes in majorem molem, temporis progressu assurgant, minus vero augeantur membranæ, aliæque partes exangues: nisi etiam dicere velimus alimentum partibus accedere ex nervis & nervorum liquore, ut Glissonius & Warthonus, inter Anglos primi arbitrati sunt, quo circa ubi membranæ corpulentiores sunt, & latioribus nervis sunt intextæ, ibi quoque incrementum sensibilius observatur; contra vero in membranis tenuioribus per quas nervi exiliores diffunduntur.

Neque insuper verum est partes carnosas vulneratas omnino coalescere & restaurari in fibris, venis, nervis, arteriis, siquidem istæ eodem modo uniantur, ac reliquæ aliæ partes spermaticæ dictæ, ut patet ex cicatrice in ipsis relicta; quamobrem non semel observatum est, in cadaveribus anatomix subjectis, viscera antecederent vulnerata, & mox chirurgicis auxiliis restituta, exhibuisse signaturas & cicatrices, qua parte vulnus fuerat inflictum. Sed & in cruribus, tibiis, brachiis, vulnerati muscoli, cum consanescunt, profundam cicatricem relinquunt, & qui cauteriis fuerant inusti, postquam ulcus ad cicatricem perductum est, manifestum signum & foveam gestant, designantem non solum cutim externam, sed etiam musculorum substantiam cicatricem subiisse: Verum in his partibus musculosis, minus sensibilis esse solet, inflicti vulneris signatura, quia sanguis per adjacentes partes circumfluit

fluus illas sublevat, & consueti rubore afficit, unde non adeo conspicua in iisdem remanet cicatrix; contra vero in reliquis partibus, in quibus venæ & arteriæ parciore & exiliores sunt, longe apparentior observatur, & potissimum in membranis, quarum textura tenuis & plana est & colore candicans.

Quoniam vero adhuc de modo quo callus fit in ossibus fractis dubitare contingit, idcirco neque videtur soluta difficultas, in præsentis textu proposita. Et quidem si id à veteribus putamus, difficile admodum erit conjicere, quo pacto ossa fracta invicem conglutinentur per intermedium callum. Recentiores vero Anatomici, nec quidpiam certi in hac re determinare ausi sunt: Solum Anglicum Glissonio & Warthono è membranis & perioostiis eorundum alimentum ossium deduxerunt, quo fieri ajunt, denudata perioostiis ossa siderari & contabescere: at neque per hoc explicant, quomodo callus, in fracturis ossium generetur, cum in illis sæpius membrana ipsa coafficiantur, & rescissæ aut dissectæ nequeant alimentum ipsis suppeditare.

Putaverim idcirco alimentum ossibus suggeri à sanguine secundum partem glutinosam, per apices musculorum desinentium in eorundem ossium capitibus, ubi cartilagines circumponuntur, & glandula innumerabiles sunt positæ: Illa vero sensim per partem post partem, intra poros eorundem intruditur, & per universam ossium substantiam secundum longitudinem communicatur; quippe ossa licet secundum extimam superficiem levigata sint; secundum interiorem tamen substantiam, sunt manifeste porosa, spongiosa, squamosa & perforata, ut propterea si frangantur, non solum succum ipsum alibilem effundunt, verum etiam & non raro sanguine tinctum, quo videlicet vegetari & vigorari possint. Hinc facile dijudicare est, succum ipsum ex glandulis, ibidem sitis, per poros & cavernulas ossium veluti per filtrum transudare & quaqua versum diffundi; quin & quo ossa fuerint majora & longiora, eo etiam cavitas & manifestior & oblongior in illis observatur, cum ingenta quadam substantia medullari, quæ ibidem ex resudante eodem succo ossium nutritio concrevit & coagulatur instar axungia, prout observare est in ossibus femorum & brachiorum. Non tamen inde negaverim à membranis ossa ambientibus aliquid etiam volatile & spirituosum per extimos illorum poros suggeri, quo nimirum vegetiora fiant, & in motibus promptiora, ut scilicet

facilius commoventibus musculis, extendentibus, contrahentibus & circumvolventibus obsequantur. Quia ergo in fracturis ossium textura illa pororum & cavernularum discontinuatur, & alimentum nequit commode veluti per filtrum trajici, potissimum quia fibræ ac filamenta eorundem squamosa, non recta invicem colligantur & uniuntur sed aliquantulum tortuose; proinde nodus in parte fracta gignitur pari fere modo, ac in recisis arborum ramis experimur, sicut etiam in insitionibus in quibus inter truncum seu ramum unius, & surculum aut palmitem alterius, nodus adnascitur.

Differt autem aliquantulum ab osse ipso nodus iste, quia non ex primigenia substantia seminali ortum ducit, sicuti reliquæ ossis partes, sed totus ab adjuncto illis alimento provenit, ut propterea non referat, eandem omnino duritiem, quam habet os, licet eidem quam proxime accedat: Neque vero fracturæ obnoxius deinceps fit, quia osse durior, sed potius è contra, quia osse mollior, sed tamen glutinosior & compactior, uti in nodis arborum; nam quæ dura sunt facilius franguntur, quam quæ molliora & glutinosiora, uti cartilagines, quarum conditionem & duritiem nodus ille refert, ut proinde merito *Callus* appelletur.

De ossium conglutinatione multa hætenus docueram in publicis lectionibus; nuper autem ad manus meas pervenit, accurata & nova Doctoris Cloptonis osteologia Francofurti & Lipsiæ impressa, ibique simul una suam de ossibus anatomen Dominicus Gagliardus Medicus Romanus edidit, qui ambo ossium structuram, veluti ex pluribus lamellis superstructis instructam detexerunt, & de eorundem nutritione & augmento abunde satis egerunt, juxta ea quæ in sua anatome plantarum multo antea Clarissimus Malpighius indicaverat, pag. 19. & 20.

Quod hætenus dictum est de fracturis ossium, facile etiam aptari potest cartilaginibus, quæ pari modo nutriuntur, & pari modo coalescere possunt, uti de ossibus dictum est, ea solum differentia, quod, sicut cartilago est mollior osse, & durior carne, ita alimentum, quod in suis porositatibus recipit, mediam quoque sapit naturam, inter alimentum illius & istius: id autem quod partibus discissis adglutinatur neque tantam duritiem acquirit, quantam habent primævæ partes cartilaginis, quo fit, ut in confluxu humorum præternaturalium ad eas partes

partes, quæ scissuram passa sunt, semper dolor percipiatur acerbior in parte illa conglutinata.

Dixit autem Hippocrates partes istas non coalescere, non quod revera nullum coalitum admittant, cum re ipsa sæpissime conglutinari soleant, sed quia per intermedium corpus uniuntur, non vero immediate per sua filamenta, texturam, porositates, & partium apices, connectuntur, sicut in partibus carnosis, per fibras carneas: atque propterea neque augentur eodem incremento quo reliquæ partes ossæ aut cartilagineæ increscunt, quia alimentum non satis abundanter, neque cum ea vivacitate & efficacia ad partes infra fracturam transmittitur, quemadmodum in aliis partibus sanis fit, ut patet.

Id ipsum inquit accidere nervis discissis aut sectis, ut neque amplius coalescant, neque augeantur. Verum in his distinguenda est *punctura à cæsura*; nam nervi puncti non solum coalescere nunquam solent, sed & convulsiones inemendabiles afferunt, uti alias à nobis est dictum *in commentariis super tertium artis medicæ Galeni*: at vero nervi cæsi, aut omnino resecti, nil tale patiuntur, sed solum nulla ratione poterunt, cum partibus rescissis cœniri, aut imposterum succrescere, unde à Chirurgis communiter pejor & periculosior, censetur nervorum punctura, levior vero cæsura; quin & non raro satius ipsis ducitur, nervum punctum omnino rescindere & resecare.

Quamvis autem cæsi nervi periculum non minentur, non tamen possunt coalescere & augeri, non solum ex præ narratis rationibus desumptis ab alimento, ut de aliis partibus spermaticis dictum est; verum etiam quia nervi secundum longitudinem, præter membranas habent fibras, quæ peculiari liquore perpetim irrorantur, quoties vero illi rescinduntur, fibræ similiter una simul resecantur, quæ cum nequeant in pristinum statum revocari, ut in membris rescissis quibuscunque accidit, propterea fit ut coalescere neque possint. Accedit quod fibræ ipsæ in resectione instar fidium retrahuntur, ut neque deinceps in rectum situm disponi possint, quo certe opus esset, ut cum aliis rescissis possent cœniri.

Adjicit quoque in textu Hippocrates tenuem genarum partem, pro qua intelligendæ sunt, non solum quæ proprie *Gena* dicuntur, verum etiam labia, nares, palpebræ, & facies universa, quippe experimur vulnera, his partibus inflicta, ut quæcunque discissionem vel discon-

tinuationem efficiunt fædas & indelebiles cicatrices relinquere, etiam si post diuturnum tempus sagaci medicorum industria resectæ partes coaluerint. Et quamvis id ipsum commune sit, totius corporis cuti, difficilior semper erit coalitio in partibus faciei vulneratis: Id autem multiplici de causa videtur evenire, tum quia cutis faciei longe nervosior est cæteris aliis, tum quia ita nectitur, cum panniculo carnosio, qui illi subjacet, ut nullatenus possit altera ab altero separari, qua ratione fit, ut nullibi possit cutis se sola contrahi & moveri, nisi solum in facie, unde utra capitis commotionem cutem frontis contrahere, & corrugare solemus, ut & labia, buccas, & pinnae narium, in cæteris autem partibus nullimode; tum etiam quia fibræ intexturæ omnis generis, & dissecta facie ita fibræ discerpuntur, ut quaquaversum retractæ, nequeant imposterum nulla industria ac diligentia cœniri.

Denique præputium seu membrana extrema mentulæ, cum fuerit rescissa, neque amplius coalescit, si in longum neque augetur, si in margine sectionem patiatur, idque non solum propterea, quæ omnibus partibus extremis communia sunt, cum quælibet pars extrema corporis rescissa, nunquam amplius restauretur, vel increseat, ut in auribus, naso, digitis; verum etiam quia pars admodum exanguis est, & paucissimis atque exilibus vasis est intertexta, quamobrem neque multo calore, neque multo alimento prædita est; Et quamvis secundum longum dissecta aliquando visa sit coaluisse, id tamen non contigit sine summa Chirurgi diligentia, consutis scilicet labiis vulneris, & ita proxime inter se invicem statim à vulnere commissis, ut adhuc sanguinem funderent; cum hoc autem summa diligentia, etiam per intermedium corpus callosum coaluisse visa est, ut propterea manifestam cicatricem referret, & quidem duriusculam; Si vero ejusmodi connexio negligatur, nulla ratione fiet, ut imposterum conglutinationem & coalitum admittat, ut sæpius est observatum.

Partibus his in hoc Aphorismo memoratis, possent aliæ plures adjici, præsertim extremæ corporis, maxime palpebræ oculorum, primæ narium, nasi acumen, aures, & digiti manuum & pedum. Verum partes istæ, cum sint ex supra dictis simplicibus in Aphorismo recensitis compositæ, prout ex Anatome manifeste deducitur, propter-
ca

ea ad earum classē sine dubio revocandæ erunt: Memoravit autem Hippocrates illas veluti simpliciore, sub quibus comprehensas voluit, reliquas omnes, vel ex ipsis compositas, vel cum ipsis in natura, constitutione & textura convenientes.

Difficultates cæteræ quæ hac in materia adhuc moveri possent, legi possunt apud Cardanum hoc loco, & apud Chirurgiæ Professores.

Aphorismus XX.

Si in ventrem, sanguis præter naturam effusus fuerit, is suppuretur est necesse.

Contentum seu Intentio.

De sanguinis extravasatione.

Connexio: Cum de vulneribus partium principalium & solidarum, ex quibus sanguis effundi solet, in Aphorismo decimo octavo hujus libri, egisset Hippocrates: In hoc præsentī Aphorismo agit de effusione sanguinis, quæ per vulnera & solutiones continui partium fieri assolet.

Hic Aphorismus ob simplicem conclusionem & brevitatem divisionem non patitur.

Quamvis Aphorismus hic communiter ab expositoribus receptus, & juxta versionem Leonici traditur, verissimus in quocunque sensu credatur, quoniam sanguis extra propria vasa effusus, statim concrescit, grumescit vel acescit, & in pus vertitur, prout passim experimur, in ejusdem collectione in pectoris cavo, cum è venis aut arteriis ejusdem pectoris & pulmonis effunditur, nihilominus re exactius perpenſa, & ad experientiam revocata, non ubique veritati consonat, etenim sæpiſſime etiam observamus sanguinem, in intestinorum cavitatem effusum, ut & in fundum ventriculi, concreſcere quidem in grumos, & coagulari, non tamen in pus verti, sed sub eadem sanguinis forma compactum, & concretum evacuari etiam postquam

quam diu & ad plures dies fuerit detentus : quamobrem non immerito visum est plerisque de veritate istius Aphorismi aliquantulum ambigere; quin imo recentioribus quibusdam putatur, pus non quidem ex sanguine, sed ex lymphâ & adipe proficisci: Sed & Fuchsius aliter quoque existimavit, illum esse exponendum, & quidem sub generaliore significatione, ut sanguis præternaturam effusus in quamcunque cavitatem non suppurationi strictè sumptæ, sed corruptioni subjiçiat: Hinc videndum hoc loco breviter erit, quibus in cavitatibus collectus sanguis suppuretur, & cum quibus conditionibus & circumstantiis suppurari possit.

Et quidem quod pus ex sanguine oriatur, palam est, juxta Doctrinam Galeni pluribus in locis, in quibus clarissime ostendit, suppurationem strictè sumptam, nullatenus competere posse, nisi solum sanguini: Cæteros autem humores per analogiam duntaxat dici posse suppurati, quatenus per corruptionem æmulantur puris naturam, sed in pus revera minime vertuntur: Sic in Empyemate, aliquando pus expurgatur verum, cum ex præcedenti sputo sanguinis originem duxerit, juxta documentum Hippocratis *Lib. 7. Aphorif. 15. à sanguinis sputo, puris sputum*: Aliquando vero, sputum puri simile fit, sed verum pus non est, cum scilicet ex phlegmate aut lymphâ ortum traxerit: Id ipsum quoque experimur in Tumoribus, nam si isti fiant, ex sanguine, & inflammationis naturam referant, verum pus cum maturerint emittent: Secus vero si à cæteris humoribus fiant, ut in œdemate, meliceride, & similibus, licet videantur puris conditionem referre, fortasse propter alborem, revera tamen purulentam materiam minime exhibent, itaque cum sanguis extra propria vasa effunditur bene potest in pus commutari, si tamen per fermentationem in corruptionem tendat.

Ut autem corruptioni subjiçiat, necesse est ut in cavitatem unde quaque conclusam effundatur, in qua post concretionem & acorem, particulæ ejusdem sanguinis heterogenæ inter se invicem colluctentur, & tenues ac volatiles contranitentibus crassis, nisi quodam subigant, & subiguntur, undè in debita fermentatione, & à fermentatione tenuium particularum exolutio, & crassarum præcipitatio, imo & totius humoris permutatio atque in pus conversio. Hinc in cavitatibus patentioribus, in quibus ejusmodi motus fermentati-

vus, minime potest excitari, nec consequenter suppuratio haberi potest, prout experimur, in intestinis crassioribus & in ventriculo. Cæterum in cerebro, pectore, renibus, glandulis, cæterisque cavitatibus angustioribus & occlusis, promptissime suppuratio accidit, ob traditam rationem ; quinimo, quo loci fuerint angustiores, & ex adjuncto calore facile moventes fermentationem, eo quoque citior & facilior suppuratio promovebitur, qua de re sanguis effusus, in musculis citius suppuratur, ut & in Parenchimatibus viscerum ut experientia constat. Atqui pus universim à solo adipe & lymphâ proficisci minime crediderim, cum ex adverso multæ partes adipis expertes, suppurationi subjiciantur, & phthisici penitus extenuati, ac omni adipe consumpti, purulenti sint.

Quamquam autem Hippocrates dixerit *in ventrem* seu ut mavult Fuchsius, *in cavitatem*, non tamen pro ventre & cavitate intelligendi sunt venter imus, & medius scilicet Thorax, & secundum alios etiam caput, sed etiam tubuli & pori omnes, in toto corpore constituti, ut propterea non irrationabiliter plerique Anatomici existimarent, omnem muscolum & quodcunque viscus, imo & partem quamcunque corporis, suos habere ventres, & cavitates, in quibus sanguis recipi & colligi possit ; & sicut in statu naturali sanguis quaquaversum diffunditur vel ut vivificet, vel ut nutriat partes, ita in statu morboso è suis vasis exiliens, si hæserit, inflammationem primum, mox suppurationem excitat : Neque enim fieri potest, ut sanguis recipi & colligi possit, in partibus quibuscunque nisi cavitates saltem inconspicuæ, vel etiam porositates ibidem sint, quæ illam excipiant, cum duo corpora in eodem loco simul esse non possint, ex communi sententia Philosophorum.

Debet insuper sanguis ut putrescat, corrumpatur, & commutetur in pus, moram in cavitatibus contrahere ; unde si fortasse è venis effusus per alios ductus effluat, minime putrescet ; & è converso etiam si intra venas, aut in apicibus arteriarum, aliqua de causa præternaturali immoretur, poterit putrefactionem & suppurationem subire : qua ratione factum est, ut sanguis sit semper in motu, ne scilicet alicubi hærens concreascit & putrescat : Quia vero è suis vasis effusus, à continuato motu circulationis deficit, & in cavitatibus aut poris

partium restagnat, statim concrefcit & corrumpitur, excitata ibidem indebita fermentatione ut dictum.

Adiectum est in super *præter naturam*, ut fortasse discrimen statueretur, inter eam effusionem, quæ naturaliter fit è vasis in poros partium pro nutritione quippe quæ sensim accidit, & non ultra partium exigentium; unde pedetentim convertitur in substantiam partium alendarum, uti & illa sanguinis effusio quæ menstruatim vel alias ad uterum fit nec tamen corrumpitur quia non præter naturam fit: At vero quæ præter naturam fit, affatim accidit, & præter naturæ exigentiam, eo quod nec quantitas conveniens servetur, nec modus nec usus naturæ operantis, sed solum à causis præternaturalibus, tum sanguinem depravantibus, tum vasa sanguifera erodentibus, unde postmodum sanguis effluit.

Denique scriptum est in Aphorismo *neceffe est superari* sanguinem extra vasa effusum; siquidem cum nec amplius regi possit à natura per motum intra propria vasa, neque ex altero capite commutari possit in substantiam aliti, necessario fiet, ut per corruptionem convertatur in pus, modis superius enarratis. Sanguinis autem ista effusio, vel per rupturam, vel erosionem, vel apertionem, vel exsudationem plerumque fieri assolet.

Dices : Si omnis sanguis extravasatus suppuraretur, ergo in quovis phlegmone vel bubone deberet fieri abscessus, quod falsum est, quia plurimæ tales inflammationes resolvuntur absque suppuratione. & Jam dictum fuisse in contextu, non omnem extravasationem sanguinis devenire ad suppurationem sed tantum eam, quæ in parte seu cavitate pororum moratur & subsistit, non vero quæ primo fit, & ulterius vel natura vel arte promovetur, vel resolvitur aut dissipatur.

Aphorismus XXI.

Insanis (seu insanientibus) si varices vel hæmorrhoides supervenerint, insania solutio.

Contentum seu Intentio.
De Prognosi deliriorum.

Connexio : Cum de sanguinis effusione mala & symptomatica ad ventrem in præcedenti Aphorismo egisset Hippocrates : In hoc præfenti Aphorismo de bona & critica sanguinis motione , cum ad partes extimas sive superiores sive inferiores in insanientibus per varices & hæmorrhoides abscedit, verba facit.

Hic Aphorismus ob magnam brevitatem & simplicem conclusionem non dividitur.

Quid autem pro insanientibus intelligat Hippocrates in hoc Aphorismo, potest dubitari; & Galenus *in commentario* de iis exponit, qui melancholico delirio sunt affecti : Verùm non solum melancholicos, sed etiam maniacos, non improbabiler interpretabimur, attenta causa utriusque delirii, quæ semper ab humoribus acorem præferentibus procedit, ea solum differentia, quod in melancholicis, stipticitatem, aut ponticam conditionem sapit; in maniacis vero redolet acritatem.

Quoniam vero per varices aut hæmorrhoides supervenientes, significatur humores istos acidos deorsum transferri & à partibus superioribus removeri, propterea fit, ut insanix solutio exinde sit speranda, & sicuti ex superioribus traditis, *hæmorrhoides supervenientes melancholicis prosunt Aphorif. 11. hujus libri*; translata causa melancholici delirii ad venas podicis, ita in his facile etiam insania desinere poterit, decumbentibus vitiosis humoribus ad partes corporis inferiores. Neque multum differre videntur varices ab hæmorrhoidibus, eo quod pari modo quo hæmorrhoides tument, circa podicem, illæ in cæteris partibus corporis tumorem referunt, unde varices describi solent, venarum in aliquibus partibus corporis tumores; & sicut hæmorrhoidales venæ tumefactæ nigrescunt, ita quoque livescunt varices, à congesto atque stagnante in ipsis sanguine, propter acidum concrefcente, & ut vocant melancholico; quare hæmorrhoides recte possent varices podicis appellari.

Debent autem tum varices, tum hæmorrhoides supervenire, etenim hac ratione significant, deponi vitiosum humorem, ad partes

ipsas tumefactas, & ubi antea acidus & vitiosus sanguis ferebatur in caput, mox à provida Natura repurgetur, & deturbetur, ad partes corporis infernas, cum tumore venarum hæmorrhoidalium & aliarum, à transpositione ejusdem peccantis humoris. Et licet varices comparere soleant, in omnibus ferè corporis partibus collo, brachiis, mammis, pectore, imo ventre, femoribus, tibiis & aliis, nihilominus semper omnino erit, ejusmodi transpositio in partes infernas, & à capite remotiores, ne scilicet reditus exinde timeri possit, è partibus inferis metastasi affectis, in superam insaniam laborantem. Et quidem plurimi ab insaniam & alia consimili capitis ægritudine evasisse visi sunt, vel saltem in melius abiisse, apparentibus varicibus in tibiis, non tantum superficialibus sed etiam profundis; quamobrem etiam in his æstimare est, remeantem ex arteriis in venas sanguinem, omnem malitiam in varicosis tibiis deponere, & reliquum magna ex parte repurgatum denuo, per jecur in cor circumire, unde cerebrum mitius affici cogeretur.

Verum tamen oportebit depositam in his partibus insaniam materiam, hærentem esse; nam si forte denuo in partes superas remearet, facile posset ex nova transpositione in cerebrum, remissam affectionem augere, atque in pristinum statum revocare; Quemadmodum de Alcippo idem Hippocrates memorat. *Epidem.* unde sicut apparentibus varicibus aut hæmorrhoidibus insaniam, vel melancholicum delirium desinit, ita è contra ista redirent, si varices vel hæmorrhoides disparerent.

Dari autem & in internis corporis partibus varices præcipuè in pulmone, unde tabem fieri ipsemet scripsit Hippocrates *Lib. 1. de morbis.*

Quemadmodum autem diximus supra *Aphorif. 12. hujus libri.* antiquas hæmorrhoides, non oportere curare, quin una servetur aperta, ob periculum aqua intercutis vel tabis: Ita neque diuturnas varices curare oportet neque ulcera diuturna, quibus varix subministrat alimenta; audi triste exemplum, quod refert Rodericus à Fonseca in comment. Erat, inquit, rusticus 40 annorum satis robustus, hic ulcus habebat antiquum & Erysipelaceum, supra quod, ad coxam, erat ingens varix tumens, quando autem ulcus sanari non poterat, nisi sanaretur varix, manus admotæ est varici, & factum canterium ad genu alterum, ut eo materia ver-

tere-

zereetur sed audi rursus quid sit secutum; post tres dies in famem caninam, incidit (melancholia, ut reor, quæ ad varicem vertebatur, sursum delata) inde in febrem acutam, postquam insania correptus mortuus est, quatuordecim dierum spatio: hæc Fonseca: Nunc adhuc audi, quid ipse Hippocrates citato mox Lib. I de morbis, & Lib. de ulceribus enarret. at ubi (inquit) varix inest in tibia, aut conspicua, aut in carne, & tibia est nigra, & videtur habere opus sanguine ab ipsa defluente; talia nequaquam pertundere oportet, plerumque enim magna ulcera, ex fissuris fiunt, propter varicis influxum: Verum varicem ipsam, alias atque alias compungere oportet, ubi opportunum esse visum fuerit: hoc est bonos & utiles Naturæ motus imitando, & naturam per similes, discretas tamen evacuationes, quando ipsa met non agit, per hirudinum seu sanguisugarum ad venas hæmorrhoidales applicationem, & venarum malleoli apertionem juvando.

Quæres: Quomodo varices solvant gibbositatem uti scribit Hippocrates Lib. de Articulis: R. I. Vix credibile esse, quod varices confirmatas, & antiquas gibbositates solvere possint, sed tantum recentes aut imminentes quarum affluxus & incrementum, humoribus à natura ad partes inferiores detrusis, partes superas gibbositati obnoxias exsiccat, & gibbositatem præpedit.

Aphorismus XXII.

Ruptiones, quæ ex dorso ad cubitum descendunt, venasectio solvit.

Contentum seu Intentio.

De Venasectione dolorum remedio.

Connexio: Cum in præcedenti Aphorismo dixerit, de Naturæ, per sanguinis evacuationem: In hoc præsentis Aphorismo, de ea cura per sanguinis evacuationem, quæ ab arte fit, sermonem facit.

Hic Aphorismus ob summam brevitatem, nullam exigit divisionem.

Sive autem ruptiones, sive rupta ipsa, quæ in musculosis partibus contingunt, in præsentî Aphorismo legantur, non minimam afferunt difficultatem, cum fieri non possit, ut ruptio, vel ruptum unius partis ad aliam partem remotiorem transferatur: Propterea melius videtur legendum *dolores non ruptiones* ut in *commentario* recte admonet Galenus & ipse Hippocrates *Lib. I. de morbis* dicit: *Quibusdam sunt diuturni dolores, & vocantur ruptiones*: vel etiam melius causa illa, quæ dolorem attulit, quemadmodum esse solet sanguis, serum, lympa ali- usve humor, acredinem aut acorem redolens: & licet ruptio vel ruptum, proprie pertineat, ad distractionem, distensionem, aut divulsionem fibrarum, membranarum, musculorum, & partium carnosarum, nihilominus quia causa diruptionem efficiens (si fuerit interna) vel dolorem à diruptione exortum excitans & fovens (si fuerit externa) non raro loco movetur è parte dirupta, in partem exteriorem corporis, idcirco sub nomine diruptionis implicite Hippocrates, voluit esse intelligendam causam, ipsam ruptionem facientem, vel conservantem, quia dolor diruptionem & partem diruptam omnino debet comitari, qui cum fieri non possit, nisi ab humore discindente & continuum solvente, propterea divulsionem ipsas expressit Hippocrates veluti dolorificas, atque sub sensu cadentes, quæ etiam referuntur percussiones, rupturæ, contusiones; Hollerius etiam *ρεύματα*, id est, fluxiones, legere non veretur.

Si itaque contingat, ruptiones & divulsionem partium dorsi transferri in cubitum hoc est, humores, dolores in dorso inferentes, ex parte ipsa divulsa dimoveri, & in cubitum deponi, argumento erit causam ipsam divulsionem & dolorem inferentem mobilem esse, atque adeo facilius posse evacuari, per vasa proximiora, & magis consentientia, qualia sunt venæ, per quas sanguis, serum, lympa aut alius humor perpetuo circumit. Atque hinc est cur Hippocrates hic scripserit, venæsectione ruptionem ipsam desinere, quatenus per venæsectionem humor ille divulsionem & dolorem inferens, utpote mobilis, & in cubitum delapsus, facile possit evacuari.

Non tamen hinc quis licite deducere poterit, in contusionibus, luxationibus, fracturis, & cæteris divulsionibus, partium musculosarum, debere venam secari, nam præterquam quod tum duntaxat admonet Hippocrates venæsectione divulsionem solvi, cum humor de
parte

parte divulsa ad cubitum defertur, atque adeo mobilis est; neque tamen in quibusvis ruptionibus, divulsionibus & fracturis, causa illas efficiens interna est, sed saepe saepius externa, cujus ratione solutio continui, manifesta est, & sanguis, alique humores in partibus fractis aut contusis hæret, & restagnat, qui propterea nulla ratione per venæsectionem evacuari poterit, sed omnino resolutione egebit, usu & auxilio medicamentorum attenuantium, dissolventium & promoventium diaphoresim. Et licet nonnulli, in his etiam casibus, sanguinem mittant, id tamen agunt, non ut hærentem ibidem sanguinem educant, & ruptionem solvant, sed solum ut prohibeant fluxurum in partem affectam humorem, qui quo paucior fuerit in venis, eo minus in partem affectam confluere poterit. Verum an id recte etiam agatur, non est meum, in præsentī loco examinare.

Cæterum Hippocrates nulla facta venarum electione simpliciter dixit: *venæsectione ruptionem solvi*, forte quia existimavit sanguinem undecunque evacuatum, istiusmodi irruptionibus conferre; nisi etiam dicere velis, implicite contineri in Aphorismo, venæsectionem in cubito faciendam, eo quod ex dorso ad cubitum ruptionem descendere dicatur, quæ cum ex humore mobili & fluente, ad illam partem descendere putetur, per venas quoque eidem proximiores, atque adeo ex cubito, verisimile sit sanguinem esse mittendum.

Difficultates plures hunc Aphorismum concernentes, nobis non supererunt aliæ, quam earum quæ in contextu motæ sunt.

Aphorismus XXIII.

Si metus atque mæstitia, longo tempore perseverent, melancholicum est signum (seu ex eo atra bilis significatur)

Contentum seu Intentio.

De Phenomenis Melancholiae.

Connexio: Cum supra in Aphorismo 21. huius Libri dixisset, varices & hæmorrhoides curare insaniam seu melancholiam aut maniam:

niam: In hoc præfenti Aphorismo, pariter de melancholicis mentionem facit, & docet quomodo melancholici dignosci possint.

Hic Aphorismus ob brevitatem suam & simplicem conclusionem, nullam patitur divisionem.

Quamvis Leonicens, ex metu & mœstitia, longo tempore perseverante, atram bilem significari scripserit, rectius tamen reliqui interpretes, non atram bilem, sed melancholiam ex græco codice vertunt; & licet atrabilis aliquando pro melancholia exponatur, ad evitandam nihilominus æquivocationem, melius erit melancholiam, non atram bilem hic exponere: Sed & neque pro melancholia, humor melancholicus intelligendus est, sed potius affectio melancholica, unde Cardanus & Heurnius scribunt: *Si timor & mœstitia longo tempore perseverent, tale est melancholicum.* Et sane inter symptomata, melancholicam affectionem concomitantia, præcipue recensentur ista duo *timor & mœstitia* sine causa manifesta, ut late explicat Galenus 3. *de Locis affectis* Cap. 7.

Ibidem etiam reprehendit, quod in examine symptomatum, melancholicum delirium comitantium, istorum duorum non meminerit, quippe quod ab his duobus, potissimum quis recte dijudicabit, patientem factum esse melancholicum, si diuturna mœstitia & panico timore laboraverit. Et licet in hoc textu simpliciter dicatur ex diuturnitate temporis, quo timor & mœstitia perseveraverit, melancholicum judicari debere patientem; quia tamen diuturna mœstitia, ac perseverans timor, neutiquam à manifestis ac externis causis oriri possunt, idcirco conditio ista, sine causa manifesta videtur implicite contineri, in temporis diuturnitate, quo timor & mœstitia perduraverint. Quoties enim timor & mœstitia, ex manifestis causis caperint, puta ex obitu parentum, aut amicorum, ex infortuniis, calamitatibus, cæterisque hujus mundi æumnis, tum animi, tum corporis, tum denique bonorum, fortunæ, in longum tempus protrahi non solent, nisi tamen à causa interna foveantur; unde cum diu perseveraverint, non nisi ab humore melancholico, depravante cerebri operationes, ortum ducent, ut propterea sub particula illa *diu* hoc est *longo tempore* implicite quoque contineatur, id accidere non à causa manifesta & externa, sed à causa interna & humoralis.

Quo autem pacto timor & mœstitia ab humore melancholico & acido

acido procedant, indeque designent affectionem in cerebro contractam, similiter melancholicam præter ea, quæ fuscè attulit Galenus *titat. 3. de locis affectis & 2. de symptom. causis*, clare quis deducere potest, pervestigata conditione ejusdemmet humoris, sua aciditate magnopere depravantis, internas cerebri operationes, nec non male etiam afficientis, tum motum cordis tum sanguinis quemadmodum pluribus ostendit præ cæteris Willisius & passim in practicis famosis legitur.

Cum igitur, timor & mæstitia, diu aliquem infestaverint, & sine evidenti externa causa in longum tempus perduraverint, indicio erit, talem factum esse, melancholicum, hoc est delirio melancholico laborare. Verum quamvis dictum sit, sine causa evidenti & externa, melancholicos timere, & mæstos esse, fieri tamen poterit, ut etiam à causis externis timorem & mærorem inferentibus, si quis melancholico delirio laboraturus; etenim si ex præcedente mala dispositione, & habitudine corporis ad melancholicum vergentis, ex malo fortassis apparatu, succorum acidorum, quis à nimio mærore, & à vehementi timore extrinsecus illato, incidat in tantam animi consternationem, ut deinceps amicorum societatem fugiat, solitudinem inquirat, cibos non assumat, ploret, vigilet, & aliis consimilibus incommodis se submittat, poterit procul dubio melancholicum delirium, progressu temporis incurrere, ut propterea timor & mæstitia, quæ symptomata sunt melancholicorum, fierent in isto casu, causæ ejusmodi affectionis. Non negandum tamen, quod cum sint symptomata melancholicorum, junctum melancholicum delirium attestantur; cum vero melancholicorum causæ sunt, disjunctim una vel altera, veluti separatæ passionnes animi, melancholiam ingenerabunt, inducta nimirum in sanguine, & cæteris liquoribus corporis diathesi, acorem præseferente, vel aliter hebetante motum ejusdem & cordis, ut alibi jam est ostensum. Delirium autem etsi non semper in cunctis vocale sit mentale saltem erit, cum sæpe numero mente solum, quæ timent aut mærent, continuo recogitent ac revolvant, & mille phantasmata sibi fingant.

Quamquam autem melancholicos hic ab Hippocrate notatos, censuerimus esse eos, qui ex nigro, fæculento, tartareo & acido humore melancholico laborant, quique hebetes, taciturni, solitarii, tristes, & pavidus esse solent; si tamen melancholicus humor, non lentus,

E e e e e

crassus,

crassus, & terreus sit, sed tenuis, acris, salino-sulphureus, & facile inflammabilis, velut, qui cum atra bile à plerisque confunditur, quemadmodum ex prænarrata quorundam versione, superius est memoratum; procul dubio neque pavorem neque mærorem præferet, sed potius ingenii vivacitatem, intellectus acutiem, mentis perspicaciam, & speculandi profunditatem largietur, ut in plerisque à nativitate, melancholicis natura dictis experimur. De his namque scite admonet Aristoteles *Problem. Sect. 30. Probl. 1* in carminibus pangendis, in republica administranda, & in studiis Philosophiæ, semper exstitisse optimos, quales inter cæteros plurimos fuisse testatur Empedoclem, Socratem & Platonem; & nostræ quoque ætati proximos, ferunt alii, ejusdem prorsus indolis fuisse Tassum, Cartesium: Hinc Seneca *de tranquillitate animi*, affirmare non est veritus, cum Platone *frustra pulsari fores Poëticas absque furore*: & cum Aristotele, *nullum magnum ingenium sine mixtura dementiæ esse*: quamobrem, *non posse grande aliquid & supra cæteros loqui, nisi motam mentem*: quippe quod ab ejusmodi humore atra bilario, non quidem spiritus pauci, hebetes, effœti, & leni profiscuntur, qui solum circa cerebri meditullium (ut in melancholicis terreis) operantes, potius, mentis confusionem pariunt, phantasmatum turbationem, & in judicando inertiam; sed potius tenues, mobiles, quaqua versum impetentes progignuntur, fere ut in maniacis & furiosis, unde postmodum fortis apprehensio, vehemens & prompta existimatio, acutum judicium, & profunda intelligentia exoriuntur. Atque hinc stupendum quidem, quod à plerisque memoratur, hujus generis homines aliquando extitisse Phanaticos, & veluti ecstasi abreptos, non tantum exotico idiomate, quod nunquam didicerant, fuisse locutos, sed & futura ferme vaticinatos; forte quia ex intensa & profunda, nimis in se ipsis meditatione, ab externis objectis penitus abstracti, nullamque in mente aliorum phantasmatum turbationem passi, usque ad ultimas rerum differentias, per rectam mediorum continuationem rei præconceptæ, & concupitæ, votum & finem sunt tandem assecuti: *Hinc efficitur porro* (concludit Aristoteles ibidem) *ut melancholici omnes, non per morbum, sed per naturam, sint ingenio singulari*: per naturam quidem: nam si præternaturam atra bilarii humores corporibus ingenerentur, exitiales morbos pariunt. Verum de hac relegantur præ cæteris *Valescus de sac. Philosop. Cap. 30. Casparus à Rejes*

à Rejes campo Elysiar. jucund. quest. 27. Sennertus Lib. 1. Prax. pag. 2. cap. 15. quest. 1. Marcellus Donat. de histor. med. mirab. Lib. 2. cap. 1. & alii.

Dices: Aliquis timens inimicum per longum tempus habebit metum & mœstitiā, & tamen non erit melancholicus. R. Propter hoc addunt (ut in contextu diximus) interpretes intelligendum esse sine causa manifesta, vel sic intelligendum, ut quocunque modo metus & mœstitia durent esse melancholica.

Aphorismus XXIV.

Si quod gracile intestinum perfectum sit, non coalescit.

Contentum seu Intentio.

De Prognosi vulnerum intestinalium in specie.

Connexio: Contentum hujus Aphorismi, ab eodem Hippocrate expositum jam nunc est Aph. 18, & 19. ea solum differentia, quod ibi gracilia intestina, cum aliis partibus connumerata recensita sint: hic vero sejunctim ab aliis, gracilia solum intestina nempe duodenum, jejunum & ileon, non coalescere referuntur, si fortasse discissa sint, forsitan quia vulnera intestinorum tenuium magis lethalia esse soleant quam crassorum, partim quod nervosa valde & magis venis plena sint, partim quod vulnerata facillime inflammationem & passionem iliacam concipiant, atque omnes propterea eorundem affectiones graviores sint quam crassorum, ac proinde difficilis sunt consolidationis, ubi dissecta (potissimum autem per transversum) fuerint. Mirum tamen videri debet qua ratione Hippocrates hunc Aphorismum hic repetere voluerit, quod ipsum superfluum visum est, multis expositoribus, uti & ipsi Galeno in *Commentario* & Cardano, & pluribus aliis, qui non tantum illum explicare non sunt aggressi, sed neq; in Aphorismorum serie ausi sunt connumerare, cum illum inter Aphorismos adscribere non curaverint. Quoniam ergo ratio istius dicti, in expositione illius Aphorismi 18, & 19. enarrata est, ad eosdem propterea benevolentem lectorem remittimus.

Aphorismus XXV.

Erysipelas foris intro converti malum: Int us vero foras, bonum.

Contentum seu Intentio.

De Prognosi Erysipelatis.

Connexio: Hic Aphorismus, quomodo cum superioribus connecti possit non adeo facile videtur, nisi quis illum velit affinem reddere *Aphorismo 21.* in quo egit de varicibus & hæmorrhoidibus supervenientibus.

Hic Aphorismus commode in duas partes dividi potest & quidem contrarias, quarum *Prima* malum dicit converti erysipelas intro: *Secunda* vero bonum, si convertatur ab intro ad extra.

Cum erysipelas fieri communiter dicatur, à tenuiori & acriori sanguinis portione, quam biliosam veteres appellarunt, & hæc facile mobilis sit & de loco in locū excurrens, considerans ea propter, motum illius in hoc Aphor. Hippocrates inquit ab exterioribus partibus, ad interiores verti malum esse, contra vero bonum, ab interioribus ad exteriores. Id ipsum scribitur in *Coacis prænotionibus*, sub his verbis: *Erysipelas foris quidem accedere commodum est, intro autem converti lethale: convertitur autem intro cum disparente rubore, pectus gravatur & difficilem spirationem habet:* ubi de erysipelate pectus occupante peculiariter meminit.

Neque solum quis credat, locutum hic Hippocratem de erysipelate superficie tenus apparente, atque adeo extimam corporis cutinē divexante, sed etiam de erysipelate, in interioribus partibus enato, siquidem qua ratione erysipelas extrinsecus fit, eadem fieri solet intrinsecus & in intimis visceribus corporis, quæ (ut experientia sapius docuit) nulla ab hac affectione immunia esse non solent, quare & meninges cerebri, & pulmones & jecur, & septum transversum, & uterus erysipelate affecta sæpe observata sunt; ut propterea sicut in inflam-

ma-

mationibus, aliisque tumoribus interna viscera obnoxia sunt, ita etiam possunt Erysipelate laborare, unde Hippocrates *s. Aphorif. 43.* scripsit, *si in utero fiat Erysipelas lethale*, his verbis denuntians bene posse uterum Erysipelate affici.

Si ergo Erysipelas interius genitum, ad externas partes vertatur, bonum erit, quippe quod melius semper censendum est interiora viscera à morbis vindicata remanere, etiam si externæ partes afficiantur: Contra vero gravius omnino erit, & non sine gravi vitæ periculo, Erysipelas intro verti, male affectis internis visceribus, veluti ad vitæ tuitionem, non amplius facientibus, cum & sanguis, qui per illa perpetuo circumit, facillime inficiatur, & infectus, cæteras quoque partes, præsertim cor brevi temporis spatio valeat contaminare. Accedit quod humor Erysipelas efficiens, vel conservans, peioris semper erit conditionis, cum introvertitur, & præter tenuitatem, & acredinem, acidam, ponticam & malignam naturam participabit; Si enim tenuis solum foret & volatilis, procul dubio sponte sua resolveretur, & ex habitu corporis neutiquam denuo internas partes pervaderet, ubi simul deflagrasset.

Est tamen advertendum, quod ejusmodi introversiones Erysipelatis, citra quamcumque occasionem, aut causam externam debent evenire, etenim si fortasse ex ambiente frigido, ex lotionibus aquæ gelidæ, aut etiam ex applicationibus medicamentorum refrigerantium & repellentium, vel etiam incrassantium, & obstruentium poros cutis, Erysipelas ab extimis ad intima vergeret, & si malum quoque foret, quia tamen non ex defectu naturæ, neque ex vitio peccantis humoris id eveniret, minus profecto malum foret, & facilius posset, introversum Erysipelas extra verti, quod secus accidet, si sponte sua, ab interna causa introverteretur.

Sed & præterea animadvertendum, tunc solum bonum esse Erysipelas extra versum, cum per ejusmodi extraversionem, liberantur partes internæ; secus vero, si partibus internis, nullatenus vindicatis, nec ab Erysipelate liberatis, istud ad partes externas vergeret, quemadmodum fieri solet, cum propter multitudinem & malitiam vitiosorum humorum, non satis sunt partes internæ, sed etiam externæ, coguntur super abundantes illos humores excipere; conjiciet autem prudens medicus, bonam fore istiusmodi extraversionem, cum

febris, sitis, ardor, inquietudo & cætera symptomata, quæ cum Erysipelate conjunguntur, omnino desinunt, vel magna ex parte saltem remittuntur; at vero si iisdem perseverantibus, nec ulla ratione intermissis, Erysipelas extra vergere videatur, pessimum indicium erit, denuntians præ multitudine & pravitate peccantium humorum, non tantum partes internas, sed etiam externas affici & co-inquinari.

Quod Hippocrates hic de Erysipelate duntaxat commemoravit, recte admonet Galenus *in commentar.* aptari quoque posse cæteris omnibus translationibus, tumoribus, abscessibus, pustulis &c. è partibus internis ad externas, ut alibi quoque de Angina 4. *Aphorif. 34 & 35. & in coacis prædictionibus; & infra hoc lib. Aph. 37.* recensuit; semper enim ac rumor, vel quodcunque aliud præternaturam, è partibus intimis & profundis corporis, ad extimas & superficarias vergit, bonum erit. Quando etiam motus humorum habiti, à partibus intimis ad intimas, vel etiam ab extimis ad extimas, boni vel mali esse poterunt, attenta partium conditione & natura, unde si à partibus intimis sed præstantibus, ad partes internas sed ignobiles, humores deferantur, bonum erit; contra vero à partibus ignobilibus, ad nobiles malum, ut dictum est supra lib. *Aphorif. 10. quibus ex angina liberatis ad pulmonem mali fit conversio moriuntur aut purulenti fiunt.* Ita quoque si pravus humor, aut etiam Erysipelas, è partibus infernis ad supernas, ex brachiis aut cruribus ad pectus aut caput deferatur malum. Itaq; in unaquaq; humoris motione considerata est partis præstantia, robur naturæ, integra depositio aut transmissio termini à quo ad quem, spatium seu medium per quod translatio illa fit, conferentia, tolerantia, & humoris commoti, quantitas, qualitas, & permanentia in parte, ad quam transmissio facta est.

Denique pro Praxi notandum, perperam ex hoc Aphorismo illos agere qui ad reprimendum ardorem & ruborem partium Erysipelate affectarum consulunt in frigidantia medicamenta, aut etiam oleosa; nullatenus advertentes, facile ab illis reprimi & cohiberi, motum naturæ, propellentis ad cutim; ut propterea subsequi subinde soleat, vel intro pulsio Erysipelatis ad partes internas & principales vel ejusdem suppuratio, cum tamen utrumque malum sit. Satiùs ideo erit, extrinsecus admoveere medicamenta, quæ motum ipsum ad exteriora promoveant, & cutis poros patentiores reddunt,

ut

ut hac ratione facilius vitiosi humores attenuentur & resolvantur : In quem finem consulto solent plerique partes Erysipelate affectas , sæpius madefacere, spiritu vini camphorato, sicuti etiam spiritu salis armoniaci correcto , & similibus quæ in nostra Praxi ad selectionem in copia proposita sunt. Quod si hæc dicta ad movere formido sit , juvabit partes ipsas ab ambiente frigido linteis tueri , atque intrinsecus adhibere ea, quæ simul corrigant , & diaphoresim promoveant, atque ex his quæ mitiora videbuntur, uti est pulvis Viperarum, Cornu Cervi præparatum, sanguis hirci, oculi Cancris sal cardui benedicti & alia infinita in Praxi nostra consignata : Referuntur quoque nonnulla extrinsecus ad movenda Erysipelati specifica ut sanguis leporinus mense Martio recens extractus & linteo imbutus & appositus , sanguis caudæ felis, Pannus Crocatus lapis medicamentosus. Verum ista omnia potius retundendo acidum quod in Erysipelate vigere solet, quam sympathia , ut veteres crediderunt conferre putantur.

Dices : Si materia suapte natura, intus vergat ad alvum, nonne melius est quam si ad cutim vergat. *R.* Raro id fieri solet, quin imo & quando fit, licet melior sit evacuatio, quæ fit per fluxum, quam per abscessum, tutior tamen est, cum natura semel ad cutim transmittit, in eo permanere motu, quam ad interna vergere, cum id per magnas fiat angustias.

Dices II. Ergo etiam periculosissimum erit, mittere sanguinem, trahetur enim materia à superficie corporis ad intima. *R.* Cardanus sanguinem quidem hoc modo aliquantulum refrigerari , sed tamen non ad interiora trahitur : Quod si tamen (inquit ille) quis velit securissime pro vita agere , utatur pluribus cucurbitulis magnis.

Quæres ergo, utrum in Erysipelate, nec purgatio nec venæ sectio locum habeat ? cum utraque trahat ad intra. *R.* Tutius imo securissimum est utramque in Erysipelate omittere; quod si tamen copia bilis, aut sanguinis orgasinus potenter urgeat, levissimum Ecco-proticum dari posse , & sanguinis levissimam ventilationem facere, non est quo quis vereatur ; Id tamen non esse faciendum in omni Erysipelate, neque absque omni cautela & circum spectione, non negligendo penes ea quæ ab intro ad extra pellunt.

Apho.

Aphorismus XXVI.

Quibus in febris ardentibus tremores fiunt, his delirium solvit (vel delirio solvuntur.)

Contentum seu Intentio.

De Prognosi Tremorum in febris.

Connexio : Cum in præcedenti Aphorismo Hippocrates egisset de motu Erysipelatis, ab extra ad intra & e contra : In hoc præsentis Aphorismo, agit de tremoribus, qui æque motus est non naturalis.

Hic Aphorismus ob summam brevitatem & simplicem conclusionem non dividitur.

In expositione huius Aphorismi non conveniunt interpretes, cum enim hanc sententiam, non levibus difficultatibus implexam viderint, ideo non fuerunt concordēs, ut in commodum sensum illam revocarent. Et quidem qua ratione contingat, ut in ardentibus febribus, tumores fiant, tam ab illis disparati? unde Brassavolus pro Tremoribus, rigores apposuit, quoniam rigor, ardentibus febricitantibus supervenire solet : Insuper quomodo fieri possit, ut deliria solvantur, sive febres, sive tremores, cum delirium febribus ardentibus superveniens, illarum malitiam augeat, non minuat ; hinc nonnulli volunt legendum, tremore solvi febrem ardentem, non delirium, putant alii non debere scribi, *delirio solvuntur*, ut habet lectio Leonicieni, sed potius *delirium succedit*, ut exponit Fuchsius, existimans ex tremore, ardenti febre superveniente, succedere delirium, sensu penitus opposito : Quin & Heurnius delirio quidem illos solvi ait, sed in mortem desinentes, quippe qui ex tremore delirantes, resoluti pereant : Quamobrem Cardanus, tam acriter invehitur in Galenum, & alios commentatores, ut se coactum dicat, cum insipientibus insanire.

Ne autem de veritate istius Aphorismi, deque vulgata illius versione

sione dubium ullum emergat, eandem sententiam recolligere, ad verbum nobis liceat, ex *lib. de judicatione, & decoacis pranotionibus*; unde hic Aphorismus est erutus: Quoniam igitur, in utrisque his locis, de tremoribus, non rigoribus delirio solutis sermo fit, ambigere propterea nulla ratione licebit de vulgata versione, adeoque non esse pervertendam sententiam hanc ut reliqui interpretes voluerunt; Idcirco sensus erit, ardentem febricitantibus, supervenientes, delirio facillime solvi, sive ad salutem sive ad mortem; quam ob rem verbum illud *solvi*, non erit referendum ad febres, sed ad tremores, ut scilicet tremores ipsi supervenientes febribus ardentibus desinant, in delirium, sitque delirium ipsum judicatio tremorum, licet ex febre ardente & ex delirio eidem superveniente æger facile sit periturus, nisi opportunis & convenientibus medicamentis illi occurratur.

Sed & fieri potest, ut per delirium ac febrem promptius extenuentur & dissolvantur humores, nervorum fibras vellicantes, adeoque simul una ab utrisque æger evadat, juxta quem sensum Celsus hanc sententiam vertit *lib. 2. cap. 8. cui calor & tremor est, saluti delirium est.*

Quoniam vero tremores hic memorantur supervenientes febribus ardentibus, dubitari non incongrue potest, quomodo illi ardentem febricitantibus contingere queant? præsertim quia Galenus *Lib. 2. de symptomat. causis cap. 3.* Tremorem ait esse motum, compositum ex facultate debili, conante sursum attollere membrum, & ex gravitate ejusdem membri deorsum tendente, unde tremor exurgit, quia ex una parte membrum gravat, ex altera facultas debilis sustinere illud non potest, prout exempla exstant in senibus, & morituris, qui propter virium imbecillitatem tremoribus corripiuntur: Id ipsum experiri est in puellis, pondus aliquod elevare conantibus, qui cum tanta virtute non polleant, ut illud attollere valeant, tremere solent: Sic etiam bajuli ingentiora pondera ferre cum non possunt, sub illis toto corpore contremiscunt.

Verum qui consideraverit, irascentes adhuc juvenes, quandoque magno, & impetuoso tremore affici, & quo fortiores illi fuerint, eo etiam impensius tremere, cum tamen in illis nulla improprio fingi potest, inter facultatem attollentem, & membra depri-
mentia: Et ex adverso, repentino timore perculsos, vehementer

quoque tremere ; Itemque maniacos, phreneticos, aliosque citra ul-
lum partium languorem contremiscere solere , non irrationabiliter
de causa tremoris ambiget, quam Galenus attulit, ut alibi quoque de-
monstravimus in Praxi : quamobrem non immerito Cardanus *in*
comment. istius Aphorismi duo genera tremorum distinguere non est
veritus, atque unum fieri, inquit, ab imbecillitate Facultatis, ut
in Senibus, & pondere gravatis ; alterum fieri cum magno impe-
tu, ex depravatione motricis Facultatis, non tamen debilitatæ,
quemadmodum in convulsionibus ex irritamento vaporum, aut
acrium humorum itemque in Palpitatione & similibus morbis.

Contingent autem tremores in febribus ardentibus, ex illapsis
humorum acrium aut vaporum è cerebro in nervos, & nervorum
tunicas, quæ proritatæ, ut à se ipsis expellant, insensos istiusmodi
vapores aut humores tremorem excitant : Quod si huic tremori de-
lirium superveniat, quia recurrentibus humoribus, aut vaporibus ad
cerebrum, desinunt punctiones illæ nervis illatæ, proinde fit ut tre-
mores delirio solvantur, quamquam in pejus ruat æger, nam longe
pejus est delirare quam tremere : Caterum qui ajunt, febres exinde
solvi, non tremores longe lateque falluntur, tum quia illud verbum
solvuntur, ex contextu verborum nullatenus referri potest ad febres,
tum etiam quia nemo sane mentis concipere poterit, solvi febres ar-
dentes à delirio superveniente, cujus causa potius illæ increbescunt,
& multoties in mortem desinunt ; Atqui fieri solum potest, ut hu-
mores in cerebrum recurrentes & excitantes delirium, tennes ad-
modum sint & facile resolubiles, qui propterea prompte evanescen-
tes & febre & delirio finem faciant.

Animadvertendum autem pro coronide est, delirium, convul-
sionem, & tremorem esse sibi valde affines ; ideoque phrenitidem an-
tecedere & subsequi solet tremor : & tremor sequens phreniti-
dem valde malus est, unde Hippocrates scribit, phreniticas vehe-
mentes affectiones tremulas detinere. Caterum convulsio quoque
cum delirio & tremore, adeo ut mox dictum, affinis est, ut raro sine
his accidat, vel præsens vel subsequens ; Sunt enim omnia ista sua
symptomata ad cerebrum pertinentia & nervos : Nam tremor fit,
cum pravus vapor pungit radicem nervorum : At si ibi firmetur, fa-

cit convulsionem ; delirium autem , cum ad cerebri medullam vergit.

Dices I. Si phrenetici tremuli sunt ex Hippocrate aut in tremorem desinunt , Ergo delirium non solvit tremorem. *R.* Non prohibere esse delirium , cum tremore debili , non autem cum forti.

Dices II. Cur ergo non fit loco tremoris convulsio , & in quo hæc duo differunt. *R.* Quod in tremore materia, omnino truditur ad nervos extra cerebrum ; in convulsione vapor ille pravus manet in cerebro, ideo est solum conatus protrudendi vapores, non effectus ; sed & ob id tremores, si qui citra rigorem fiunt, convulsionis periculum denuntiant.

Quæres : Utrum ergo tremor hic memoratus sit lethalis ? *R.* Si contingat in principio vehementis & maligni morbi veluti Pythomi apud Hippocratem accidit, quod sic : Ita etiam si sub finem aut declinante morbo fiat malus est ; Secus vero, si fiat in statu, dum crisis instat, vel etiam quando fiunt, reduplications, fiunt etiam tremores minus periculum habentes.

Plures qui desiderat super hoc Aphorismo motas controversias, legat Cardanum hoc loco, qui non modo in alios, sed potissimum in Galenum, mirandis contumeliis, invehitur.

Aphorismus XXVII.

Quicumque Empyi (seu suppurati) aut hydropici (seu aquam intercutem patientes) uruntur, aut secantur, si pus aut aqua, universim effluxerit, omnino (seu omnes) moriuntur.

Contentum seu Intentio.

De Cautelis Paracentheseos.

Connexio: Cum Hippocrates hætenus prioribus Aphorismis, de evacuationibus, & operibus quæ à natura fiunt, dixisset ; Nunc

de illis operationibus quæ ab arte fiunt, nempe de unctione & sectione, in Empyemate seu Empycis seu suppuratis, & Hydrope, sermonem facit.

Hic Aphorismus ob simplicem conclusionem non eget divisione, licet de duobus gravissimis & differentibus morbis agat, uterque tamen difficilis utpote sanationis, in unum exemplum adducitur.

Pro suppuratis intelliguntur Empyematici, qui nimirum puris collectionem, in cavo thoracis subeunt: Hi autem cum multoties nequeant, universam puris quantitatem per tussim egerere, ne suffocati perirent, solebant veteres sectione, aut etiam unctione, inter quintam & sextam costam inita, purulentam illam materiam evacuare, quemadmodum tempore Hippocratis, in frequenti usu erat, quod & idem Author manifeste docet, *Lib. de internis affectionibus*, & confirmat Celsus, Aegineta & alii, non tantum ex vetustioribus, verum etiam ex recentioribus medicis. Idem quoque solitum peragi in Hydropicis & asciticis, advertit etiam Hippocrates, *Lib. de locis in homine*, & præcitatus Aegineta hujus operationis modum tradit *lib. 6. cap. 56*. Nec desunt inter recentiores, qui summa diligentia & felici successu, peractum in aliquibus Paracenthesim fateantur,educta sensim aqua, in abdomine collecta.

De his ergo inquit hoc loco Hippocrates, peculiarem cautionem habendam esse, ne pus vel aqua confertim effluat, sicuti etiam in præcitatis locis consulit. Si enim universum pus, & tota aqua ex illis educatur, mortem subinde eventuram prælagit, unde licet in prædictis locis cum cætera præsidia non profecerint, ad educendum pus, ab Empyematicis, & ad evacuandam aquam ex asciticis, sectionem vel unctionem commendet, illam tamen non universam, totamque simul educendam admonet, alias illa affatim exeunte, mors præsto erit, ut sæpius in praxi observatum est in asciticis, qui licet ab exitu aquæ visi fuerint, per aliquot horas, in pristinum salutis statum restituti, mox tamen repente venter intumuit, & paulo post perierunt.

At qua de causa, ex subita tum puris tum aquæ inter cutem evacuatione, mors certo immineat? Erasistratus ut refert Galenus in *Commentario* dicebat se experientia compertum habuisse, universam eva-

evacuationem, febres ac mortem afferre; verum unde id accideret, non memorat, cum tamen aliud quid diversum sit, inter evacuationem affatim factam statim à principio, & eam, quæ in confirmato empyemate, & hydrope evenit, siquidem semper robustiores erunt vires inter initia, quam sint diuturno post tempore, ab inveterato hydrope aut empyemate. Sed & magna quoque differentia est, inter sectionem & ustionem, unde ustionem non nisi volunt in pectore faciendam; sectionem vero in imo ventre. At Hippocrates varius in hac eadem re videtur, nam 2 *de morbis* secandum, non urendum in empyicis ait, & in aqua intercute urit, non secat; *Lib. de internis affect. & 6. Epidem. Hydropicos*, inquit, *citius secare oportet, tabescentes vero statim urere*; at vero *Lib. 3. de morbis*, agens de suppuratis, sectionem aut ustionem simul commendat, quamvis Galenus in *Commentario*, ustione dicat egere eos, qui plurimum habent pus, quod per sputum nequeat expurgari; eos vero qui aquam intercutem patiuntur, sectione potius quam ustione. Verum quocunque pacto pus vel aqua confer-tim egeratur, periculosa semper erit evacuatio, cujus causam refert idem Galenus in suppuratis ad ipirituum immodicam exolutionem, quæ simul cum puris evacuatione, inevitabiliter accidit, ob vasorum reserationem, quæ antea à pure & puris acredine continebantur occlusa; in hydropicis vero non modo ob causam mox enarratam, sed etiam ob subitam viscerum duritiem, quia subducta aqua, non amplius irrorantur, sed arefiunt, unde diaphragma deorsum trahitur, cum reliquis visceribus, quæ in thorace sunt. At crediderim ego potius, mortem iis accidere, quia per subitam & immodicam, tam puris, quam aquæ intercutis evacuationem, vires concidunt, & viscera labefactantur, tum quia nulla immodica evacuatio, etiamsi pravorum humorum sit, tolerari potest; tum quia partes illæ inanitæ, aliquo alio corpore, aut etiam aëre repente impleri solent, quod ad vitam sustinendam inidoneum omnino erit, tum etiam quia partes istas inanitas, humores, qui in venis & arteriis continebantur, sine ulla remora confluunt, unde vasa quæcunque corporis fere inaniuntur, ita ut sanguinis circulationem & lymphæ, penitus interrumpant, quemadmodum præsertim in hydropicis sæpe sæpius est observatum, in quibus paulo post aquæ extractionem, ex abdomine, lymphæ quæ supererat, in vasis lymphaticis, brevi temporis spatio, tota prorupit, in abdomen inanitum. Acce-

dit, quod in his totus fere sanguis, vertitur in serum acre simul & sal-
sum; & in empyicis, à pure in pectore collecto, sanguis pariter infici-
tur, tanta acredine muriatica ut plus justo dissolutus, fluctuet in venis
& arteriis; unde per immodicam & subitam utriusque evacuatio-
nem, commotione majori in toto sanguine, & in visceribus corporis,
inducta, pauci isti spiritus, qui supererant, suffocantur, extinguun-
tur vel dissipantur.

Animadvertendum adhuc est, quod cum sectio & ustio, sint re-
media extrema in medicina, juxta Hippocratem *Lib 8. Aph 6. quaecunq;*
non sanant medicamenta, ea ferrum sanat; quæ ferrum non sanat, ea
ignis sanat; quæ ignis non sanat, ea incurabilia judicare oportet: pro-
inde Medicus debet prius, experiri alia medicamenta, & si his morbus
non cedat, ad illa tandem venire: Ea autem remedia, quæ & empyicis
& hydropicis, prodesse soleant ex praxi desumenda sunt.

Cæterum exemplo puris empyicorum, & aquæ hydropicorum,
Hippocrates docet, etiam in reliquis magnis abscessibus & tumoribus,
non esse totam materiam, una vice educendam, ex rationibus jam
abunde datis; quod etiam in reliquis naturalibus dejectionibus,
sive alvi, sive urinæ, & multo magis sanguinis, experientia com-
probatur.

Quæres: Cum dupliciter contingat empyicis pus habere in tho-
race; vel cum est in vomica, vel cum rumpitur, seu in cavitatem thora-
cis excidit, quid in uno aut altero casu faciendum? R. Plerumque in
priori casu habita cognitione situs vomicæ, fieri crustosam ustionem;
in posteriori casu penetrantem ustionem vel sectionem: semper ta-
men ut in contextu monitum, vires ægri sunt attendendæ, & pus non
plus ultra emittendum, ne sub ipsa operatione æger moriatur: nam si-
cut ubi est summa annonæ caritas, & rerum inopia, homines facilius
tolerant vitiosum victum, quam totalem inediam; ita Natura sæpe
facilius tolerat vitium, quam inopiam, hinc meliori parte vitiosorum
humorum per delectum fruitur, & ideo tam graviter patitur ut dictum,
affatim tales etiam vitiosos humores evacuari. Et quemadmodum
etiam *Lib. 2. Aph. 36. dictum, sana habentes corpora pharmasis purgati*
(puta affatim evacuati) facile exolvuntur, uti & qui pravo utuntur cibo,
seu succo; ita maxime exolvuntur ii, qui pessimo succo utuntur, & ne-
que

que corporis salubritate fruuntur; ideo mirum non est, quod ejusmodi ægri tantam evacuationem ferre non possint.

Plures & ad hunc Aphorismum facientes controversias si quis legere desideret legat Cardanum *in Commentario hujus*.

Aphorismus XXVIII.

Eunuchi podagra non laborant, nec calui fiunt.

Contentum seu Intentio.

De Arthritide & Calvitie Eunuchorum.

Connexio: Cum supra Aphorismo 11. & 21. hujus Libri Hippocrates de hæmorrhoidibus agens, multa mala tollere dixisset, nempe melancholiam, insaniam, nephritidem: In hoc præsentī Aphorismo, de sexu ostendit, quantum faciat ad evitanda podagram & calvitiam. Hic Aphorismus sub summam brevitatem divisionem non patitur.

Quantumvis tempore Hippocratis, perpetuo verum observaretur eunuchos, quibus scilicet virilia exempta forent, podagra non laborare; quia tamen nostra ætate, plurimi adhuc observantur podagra affecti, non defuerunt qui Hippocratem falsitatis in hoc Aphorismo arguerent; quod si vero sententiam hanc inter Aphorismos retulerit, veritati non consentientem. Verum etsi hoc verum sit, quia nihilominus rarissime accidit eunuchos, proprie tales, podagra laborare, illaque non nisi in ultima senectute; idcirco non erit, cur Hippocratem inculpemus; quandoquidem ut alias notavimus, ea potissimum Hippocrates litteris tradidit, quæ vidit & frequentius evenire comperiit.

Ratio autem cur eunuchi Hippocratis tempore, non tam facile podagra afficerentur, triplex ab Autoribus recensetur, ut præ cæteris memorat Fuchsius hoc loco: *Primo* quod non omnino eo tempore otiosi forent, cum mos fuerit apud veteres, mulierum famulatu eunuchos adscribere; quamobrem serosa illa excrementa, quæ in illo-

rum

rum corporibus copulabantur, bene poterant exercitiis, imo etiam laboribus sive sensibiliter sive insensibiliter dissolvi: *Secundo* quia ad coitum impotentes erant, quo plerumque imbecilliora reddi solent corpora & potissimum in articulis; *Tertio* quia moderata illis victus ratio erat, unde pauca, vel nulla excrementa cumulari poterant: Num vero, cum hæc omnia, non tam exacte ab iisdem servari soleant, mirum non est, si nonnulli inter eos podagra afficiantur. Neque solum eunuchi, ut hic memorat Hippocrates à podagra immunes erant, vetusta illa ætate, sed ut advertit in *commentario* Galenus, nec reliqui omnes tam facile illa corripiebantur: *ætate quidem Hippocratis*, inquit hoc loco Galenus, *pauci podagra laborabant, propter vitæ moderantiam; nostris vero temporibus, usque adeo auctis eduliis, ut nihil iis addi posse videatur, infinita est podagricorum multitudo, cum nonnulli sint, qui nihil exerceantur, & cruditatibus atque ebrietatibus offendantur, & ante cibum assumptum, bibant vina potentia, ac veneris utantur immoderatis; nonnulli vero etsi non his omnibus, in uno saltem aut duobus ex iis, quæ dicta sunt delinquant.* Et paulo infra subdit: *Accedit & ad has causas, ob quas plerique incidunt in podagras, quod multi & patres & avos habuere podagricos, in quibus semen erat vitiatum, atque ideo posteris vehementiorem fecerunt partium imbecillitatem:* unde Poëta:

Nascitur ex venere & baccho solventibus artus

Filia, quæ perdit membra podagra virum.

Quoniam vero eunuchi in his non raro delinquere solent, poterunt podagra quam maxime corripì, quamvis nullum habeant usum venerorum; *talis enim* (ut observat ibidem Galenus) *est illorum desidia, insatiabilitas, & ebrietas, quod etiam sine veneris podagra corripì possunt.*

Est tamen advertendum, quod eunuchorum alii sunt, qui castrati dicuntur, alii spadones, alii thlasia, aut etiam thladia, & alii thlibia appellati: *Castrati* dicuntur, quibus ante pubertatem, non solum testes, sed etiam virile membrum exsectum est, ut apud Turcas fieri consuevit, vel tales quibus solum exempti testiculi ut apud nos curandæ herniæ causa; vel etiam tales sunt, qui sine testibus progeniti, vel ab ipso primo ortu exsecti nil virile habent ex Luciano, atque hi proprie eunuchi appellantur. *Thlasia & Thladia* sunt, quibus testes solummodo in prima ætate fracti fuere: *Thlibia* vero qui attritos habent testes, prout fit in juvenis, ut in opera campestria facilius ducantur. *Spadones*

dones denique sunt illi, quibus meatus pudendorum, per quos vel materia seminis, vel semen emittitur, propter impedimentum aliquod, fortasse in ipsa eorundem conformatione, angusti vel obstructi sunt, adeoque fit, vel ut semen nullum fiat, vel inefficax, & minime prolificum, vel etiam quod extra vasa ejaculari non possit; quamobrem ex istis nonnulli sunt, qui nequeunt generare, non quod semen fecundum minime gignant, sed quod propter aliquod impedimentum semen effundere nequeant, eo quod in suis cavitatibus, aut flexuris hæreat, quemadmodum ex multis colligit Fuchsius *in commentar. istius Aphorismi*: Sed & alii licet semen emittant, infecundum tamen illud est: Spadonibus quoque adnumerantur ex alciato, qui cum uno tantum teste nati sunt, aut qui altero duntaxat sunt exsecti. Cum igitur Hippocrates, in hoc textu, de eunuchis meminerit, illi proprie intelligendi erunt castrati, & quidem ii, qui in ætate puerili antequam pubescere, & semen progignere cæperint, testium resectionem passi sunt. Nam etsi juveni jam tota adimas genitalia, cum venere jam sit usus, latas poterit habere vias quæ ad articulos deducunt, & sic podagra laborare ut dicit Hippocrates *Lib. de Natura pueri*: Cæterum thlasix, thlibix & spadones, plane possunt podagra corripì, cum licet semen non efficiant, vel non emittant, aut generent bene tamen concubere possunt, cum virga & scrotum maneant unde si coeunt cur podagra debent esse immunes.

Est præterea advertendum eunuchos podagra proprie dicta corripì non solere, posse tamen affici doloribus articulorum, etenim plurimum interest inter podagram & articulares dolores, siquidem licet artus in utrisque afficiantur, articulares tamen dolores redire non solent, sed postquam semel invaserint, & ad plures dies etiam cum febre acuta & continua vexaverint, tandem cum desierint, non tam facile redeunt, nisi ex nova & præpotenti causa: at vero podagra certis quibusdam temporibus, redire solet, citra quamcunque causam, etiamsi in his rectam victus rationem servaverint, & quidem in mutationibus tempestatum, scilicet in solstitiis & æquinoctiis. Atque hinc plane constabit, posse pueros & adolescentes quoque articularibus doloribus affligi, secus vero podagricis, proprie dictis; quamquam nostra ætate, ob intemperantiam victus, & ob luis venereæ contagionem, et-

iam visi sunt aliquando adolescentes & juvenes, podagricis doloribus affici, & iterato vexari.

Sed est insuper notandum, in podagra, chiragra, & cæteris doloribus articularibus, atque in arthritide universali, duos concipi debere humores illos excitantes, alterum quidem, qui vel à toto, ut putavit Schneiderus, vel à cerebro, juxta mentem Fernellii, vel à stomacho & hypochondriis, ut alii voluere, dependet, & veluti à parte mandante, ut plerisque dicitur, per reliquum corporis divagatur, ut est serum sanguinis, vel lympa acrior, & acidior reddita, ac salina conditione imbuta; alterum vero articulis ipsis inesse atque in internodiis ossium, qualis Paracelso *synovia* dictus est, vel potius ex glandulis artuum mucilaginosus suggestus, qui licet in ætate puerili, ac juvenili, fluxior, laxior & mollior sit, in senili tamen ætate, crassior, densior & acidior evadit, atque fermenti podagrici vel chiragrici vices gerit, estque deinde in causa, cur ibidem hæreat, ac restagnet serum illud, vel lympa præter fluens, adeoque tumorem, ruborem ac dolorem infert vehementiorem vel mitiorem, prout acrior vel acidior fuerit, aut è contrâ temperatior & levior. Neque quis putet, quod synovia aliusve humor crassior redditus in senibus incapax sit, ejusmodi acredinem & dolorem articulorum inferendi; nam præter crassitiem, acquirit etiam in senibus (ut reliqui humores) aciditatem & acredinem, unde sicut calx, auripigmentum, & aliæ res duræ, per humoris injectionem fermentescunt, ac tumescunt, ita & gluten ipse: debet autem istiusmodi glutinosus, & alius similis humor articulis inesse, ut inibi cum præterfluente humore lymphatico, vel sero sanguinis, fermentationem, tumorem ac dolorem inferat, nam aliter nulla potior causa foret, cur ibi hæreret & non alibi. Neque satis est dicere, ibidem hærare, quia articuli sunt partes ignobiles, quonatura transferre solet humores peccantes; nam ex hac ratione deberent potius vitiosi isti humores transferri ad alvum, aut vesicam, veluti ad partes longe ignobiliores, imo à natura ipsa destinatas, velut in cloacam corporis, ad excipiendas omnes superfluitates ejusdem: Quare necesse est, ut in articulis aliud quid resideat, quod in causa sit, ut ibi fluentes humores resideant.

Hinc ut eunuchi aut spadones podagra sint exempti, satis non est,
ut

ut ad coitum sint impotentes, sed necesse etiam est, ut rectam servant victus rationem, cum ex superius traditis, præter artuum imbecillitatem, & glutinis aut mucilaginis ibidem stagnantis vitium, serosi ac lymphici humores, ex toto, vel ex visceribus naturalibus, aut etiam aliunde illuc confluant, ut dolores arthriticos excitent. Porro in eunuchis, spadonibus cæterisque similibus languidæ & mollis constitutionis, ejusmodi humores excrementosi & aquei solent plurimum abundare: Atqui compertum adhuc est, calibem vitam ducentes, non raro etiam podagra corripì, nisi simul una temperantes sint & frugales.

Denique neque calvos fieri eunuchos docet hic etiam Hippocrates, quod certe verius & universalius observatur, cum enim calvitium fiat ob carentiam & privationem ejus humoris, qui per cutim capitis diffusus radices capillorum irrigat, & in alimentum eorum transit, quia eunuchi carnes habent molliores, & ejusmodi humeribus quam maxime abundant veluti mulieres, quibus perquam similes sunt, ut etiam advertit Aristoteles asserens *Lib. 5 de generatione animalium cap. 3. eunuchos non calvescere, quod in feminas mutantur*; unde Galenus *eunuchos, ait, sectio testiculorum, similes efficit feminis; sicut ergo in eis calvitie non accidit, sic neque in eunuchis*: proinde fit ut minime calvi fiant, ob prædictum copiosum humorem, adequatam generandis pilis materiam; ex ejusdem enim defectu aut propter ejus acrimoniam, radices capillorum exedentem defectus eorundem seu calvitium oritur: aliter hunc Aphorismum explicat Poëta:

Calvus es in mento, vertex calvescere nescit

Vertice castratis crescere barba solet.

Myssale vis barbam, bibe strenuus: absque alimento

Tali alimento Myssale, barba nequit.

Quod autem à quibusdam dicitur calvitium oriri in hominibus ob cerebri siccitatem & consumptionem, non videtur omnino verum: etsi enim cerebrum in senibus quodammodo constipetur & obdurescat, non tamen tantam siccitatem acquirit, ut omni humiditate privetur, unde capilli decidere debeant: neque etiam à cerebri humiditate capilli progignuntur, sed potius ab ea, quæ in glandulis subcutaneis continetur, cum cæteroqui nequirent, per meninges, cranii duritiem, densitatem ac magnitudinem pervadere usque ad radices capillorum:

Accedit quod si ex cerebri siccitate & consumptione calvitium accideret, non magis in syncipite, quam in occipite illa foret observabilis, cum tamen experiamur calvitium fieri duntaxat in syncipite, secus vero in temporibus & in occipite, ubi sola canities accidit.

Quæres: Utrum eunuchus, etiam à nativitate talis, podagra hæreditaria, non quæ ex morbo fit, laborare possit? *R.* Quod sic, quia illam à parentibus talibus contrahit jure hæreditario.

Quæres II. Utrum vera sit sententia Hippocratis quam profert: *Lib. de aëre, aquis & locis: ubi dicit: Vena enim retro aures sunt, quas si quis secet, sterilitatem inferet his, quibus secantur?* *R.* Salva autoritate divi Senis, docentis variis in locis semen ex capite decidere, sicque secata tali post aures vena, præpedita materia seminali, sterilitatem vel potius impotentiam induci posse: Verum stante indubitata circulatione sanguinis, & liquorum circulantium, longe aliter res se habet ut abunde in institutionibus de materia hac discurremus.

Plures & notabiles super hoc Aphorismo controversias qui scire & legere desiderat, Cardanum adeat.

Aphorismus XXIX.

Mulier podagra non laborat, nisi menstrua defecerint.

Contentum seu Intentio.

De Podagra Faminarum.

C*onnexio:* Cum in antecedenti Aphorismo docuisset, eunuchos non laborare podagra; in hoc præsentī Aphorismo, adducit mulieres, & pariter docet eas podagra non laborare, nisi menstrua defecerint. Hic Aphorismus, utpote brevissimus nulla eget divisione.

Præsens etiam Aphorismus nostro tempore, veritati non semper cohæret, cum plurimæ sint mulieres, quibus citra menstruorum defectum podagra laborare contingat. Verum ex mox traditis, quia id sicut eunuchis raro accidit, & plerumque fit, ut fæminæ à podagra sint immunes, quotiescunque menstrua illis commode fluxerint, non erit propterea ut Hippocratem inculpemus.

Verum

Verum tamen bene notare decet, menstruorum defectum non simpliciter hic intelligendum, pro omnimoda illorū suppressione, sed pro quacunque eorundem evacuatione, depravata, diminuta, retardata, anticipata aliave, ut propterea, tum fæminas liceat existimare, à podagricis doloribus immunes, cum non solum menstruis purgationibus, debito tempore, & debita quantitate, scatuerint, sed etiam ejus conditionis, & qualitatis, ut in omnibus respondeant earundem constitutioni, ætati, habitudini, victui, exercitiis, & similibus, fieri enim potest ut fæmina menstruas habeat expurgationes, sed non ejus quantitatis, qualitatis & conditionis, ut convenit, relative ad propriam constitutionem & habitudinem: quo casu si exinde sanguis, & totum corpus non fuerit à suis impuritatibus, præsertim serosis, repurgatum, decumbentibus hujus generis excrementis ad articulos, bene poterit podagra illam invadere: Adde quod menstruæ purgationes, non omnibus eodem modo accidunt, nec in omnibus, ejusdem & æqualis sunt durationis: siquidem non nullæ in singulis mensibus, per integram hebdomadam repurgantur, aliæ vero non nisi per duos aut tres dies ad summum; plerisque circa septimum annorum septenarium menstrua deficiunt; aliis vero etiam ad octavum & nonum prorogantur; aliis toto vitæ decursu (licet rarissimum sit) deficiunt, prout in propria mea amita septem filiorum matre, nulla unquam visa gutta sanguinis menstrui; & in alia amica octuaginta prope annorum senicula, menstruas purgationes semper ordinatissimas habente observavi; ut proinde de menstruationis defectu, nulla possit certa regula stabiliri. Quoties igitur citra manifestam causam mulieribus menstrua defecerint, quæ alioqui tam cito deficere non debuissent, habito respectu ad ætatem, corporis habitudinem, temperiem, victus rationem, exercitia & similia, quia facile humores illi excrementitii, qui per uterum veluti per sentinam corporis repurgare consueverant, intus detenti, & cum sanguine & cæteris humoribus commixti, in artus, veluti in partes corporis imbecilliores, decumbere possunt, nil obstat, quin podagricis doloribus, sint eadem laboraturæ, cum ad podagram contrahendam, imbecillitas & mala articulorum habitudo, nec non excrementorum, præsertim ex sanguinis sero, & lymphæ dependentium superfluitates exigantur, quæ sane in mulieribus, in quibus menstrua nimis tempestive defecerint, bene haberi possint. Quod autem à plerisque dicitur, de

intemperantia fæminarum nostri temporis, ob quam etiam commo-
dè menstruantibus podagra laborent, non tanti certe est, ut rem omnem
penitus evincat, cur etiam si menstrua ubertim fluxerint, debeant illæ
podagra laborare: nam ex hac ratione, omnes intemperantes essent
podagricæ, perseverantibus adhuc menstruis, purgationibus, cum ta-
men contrarium experiamur. Demiror itaque Senecam, qui in hoc
mendacii deprehensum dicat Hippocratem *Epistola 95.* & in mores fæ-
minarum sui temporis, tam acriter invechatur, cum inquit *Maximus
ille Medicorum, & hujus scientia conditor, feminis nec capillos desinere di-
xit, nec pedes laborare: Atqui hæc jam & capillis destituuntur, & pedibus
agra sunt. Non mutata fæminarum natura sed vita est; nam cum vi-
rorum licentiam equaverint, corporum quoque virilium vitia equave-
runt; non minus pervigilant, non minus potant, & oleo & mero viros pro-
vocant: æque in vitis ingesta visceribus per os reddunt, & vinum omne
vomitu remetiuntur, æque nivem rodunt solatium stomachi æstuantis: Li-
bidine vero, nec maribus quidem cedunt &c.* & mox: *quid ergo miran-
dum est, maximum Medicorum, ac Naturæ peritisimum, in mendacio pre-
hendi, cum tot fæminæ podagricæ & calvæ sint? beneficium sexus sui, vi-
tiis perdiderunt; & quia fæminam exuerunt, damnata sunt morbis virili-
bus &c.* Si plane is vitam & mores nostrorum temporum contem-
plaretur, nequaquam suæ ætatis fæminas, tam vehementer fuisset cri-
minatus, quinimo fateretur, aut nostra suis temporibus pejora, aut sal-
tem non dissimilia, nihilque esse sub sole novum, quod id ipsum non
fuerit, vel futurum sit. Nec illud quidem admittit de suo sæculo
Cardanus, quod podagricæ fiant fæminæ ob voracitatem, & inconti-
nentiam, quippe qui asserat mundum semper sibi similem extitisse, &
omni tempore voracitatem, incontinentiam & victus intemperan-
tiam fuisse hominibus familiarem. Sed & notatu dignum quod
scribit Athenæus lib. 2. cap. 10. de moris agens: *Hegesander, suis
temporibus, intra viginti annorum spatium, moros fructum non tulisse af-
firmat, atque tantam podagra pestem omnes invasisse, ut non homines solum,
sed pueri, puellæ, Eunuchi, & mulieres eo morbo laborarent.* Quare ad
solam vitæ intemperantiam, Podagram referre, minime posse vide-
tur, cum adhuc cælibes, temperantes, frugales, abstemii, & vitam mo-
nasticam & eremiticam ducentes, visi sint pariter nodosa Podagra la-
borare; quin & si ex intemperantia in victus genere, Podagræ in fæ-
minis

minis orirentur, plane hac nostra ætate nulla esset, quæ hoc morbo non esset affecta, adeo incunctis cujusvis generis gulæ libido excrevit. Itaque dicamus veram esse Hippocratis sententiam, in quacunque ætate, & omni sexu, dummodo omnia ea concurrant, quæ antea à nobis sunt animadversa.

Caterum non est prætereundum, quod aliquando fæminæ aliis doloribus articularibus, præterquam podagricis affici solent, & quidem aliunde progenitis, quæ rheumaticam affectionem, aut venereum contagionem referunt; & licet articuli, tum inferi, tum superi cum dolore & tumore divexentur, nihilominus non veram Podagram, Chiragram, Gonagram, sed rheumatismum, vel simplicem, vel venereum designant; dolores enim Podagræ aut Chiragræ, per certa intervalla & statutis quibusdam temporum mutationibus redire solent; cæteri vero dolores articulares, seu rheumatici sive venerei, cum invaserint, vel nunquam amplius desinunt, vel si semel desierint & perfecte curati sint, denuo non redeunt, licet languidas admodum & labefactatas partes relinquant, & facile, ex quacunque causa fluxionibus obnoxias.

Quæres: Utrum etiam hoc Aphorismo Podagra hæreditaria sit intelligenda? *R.* Videtur quod sic, ex ea ratione, siquidem talis fæmina cum habeat hæreditarium morbum, habebit etiam hæreditarium peccatum in mensibus, unde vitium hæreditarium vitia mensium generat.

Aphorismus XXX.

Puer Podagra non laborat, ante veneris usum.

Contentum seu Intentio.

De Podagra Puerorum.

C*onnexio:* Cum in antecedentibus duobus Aphorismis Hippocrates egisset de Podagra Eunuchorum, & mulierum; In hoc præsentia agit de Podagra puerorum in similem finem & intentionem.

Hic Aphorismus etiam ob summam brevitatem non dividitur.

Quod

Quod Hippocrates, dixerat præcedenti Aphorismo, de faminis, eas Podagra non laborare, nisi ex menstruorum defectu; nunc edocet de pueris, illos referens à Podagra esse pariter immunes ante usum veneris, his designans, plurimum eundem usum veneris, articulis nocere, qui propterea, podagricæ affectioni fiant obnoxii. Quoniam vero non ante decimum quartum annum, incipiunt pueri semen progignere, idcirco visum est plerisque pueros hic interpretari eos, qui impuberes dicuntur, cum quo tempore semen gignunt, simul una pubescere soleant: at vero ætas pubescentiæ, ad annum decimum quartum adscribitur. Verum cum plerique referantur etiam ante hoc tempus semen effudisse & generasse, propterea ad prædictum annum decimum quartum, rem hanc definite adjudicare velle, non videtur rationi & experientiæ consentaneum; Quamobrem non immerito Hippocrates indefinite dixit, *pueros, & ante veneris usum*; quia non ante hoc tempus fieri solet, ut articuli adeo sint labefactati, ut defluentes ex aliis interioribus partibus humores excipiant: Hinc nomine puerorum, eas intelligere licebit, qui ante pubescentiam, & non solum ante seminis generationem, sed & ejusdem effusionem, atque adeo veneris usum illibati permanserunt.

Sed unde sit, ut ex veneris usu possint podagra laborare, non levis videtur hujus loci difficultas; siquidem etsi immoderatus illius usus cunctis nocuus reputetur, documento ejusdem Hippocratis 6. *Epidem.* dicentis, *labor, cibis, somnus, venus, omnia me atocria*; nihilominus si moderata illa fuerit & tempestiva venus, etiam plerisque ægritudinibus conferens, ab eodem Hippocrate proclamatur atque hinc Versus illi:

Balnea, vina, venus corrumpunt corpora nostra:

Conservant eadem, Balnea, vina, venus.

Prout moderatus vel immoderatus fuerit eorundem usus: In morbis quoque frigidis & humidis atque in corporibus succi plenis & obesis, utilis ab eodem existimatur, eo quod dicatur vim habere exiccandi & absumendi superfluas corporis humiditates. Quare cum pueri humidi sint, ob voracitatem, excrementosas superfluitates facile cumulent, atque in frigidas & humidas ægritudines, non raro incidant, non videtur omnino dicendum, post veneris usum pueros podagra laborare, si præsertim moderamen in ipsis servent.

Cui

Cui difficultati facile satisfieri potest duplici responso : *Primo* quia Hippocrates non dixit, post veneris usum pueros podagra esse laboraturos, quasi, quod omnino post illud tempus, illa affici debeant, sed solū quod non ante hoc tempus soleant podagra laborare; siquidē ex veneris usu articuli facile læduntur, & labefiunt; *Secundo* quia pueri adlescere, & debitum magnitudinis incrementum acquirere debent, cumque per seminis effusionem (etiamsi moderata illa fuerit) deficiat quodammodo nutritio, & substantia illa glutinosa sanguinis, quæ in nutrimentum partium, & præsertim articulorum cedere debet, in locum effusi seminis deferatur, proinde fit, ut articuli plus justo labefactentur; quin etiam ex iterata seminis evacuatione, coguntur assumere alimentum, non bene digestum, nec elaboratum, unde postmodum major labefactio & imbecillitas : Et quoniam in podagricis doloribus contrahendis, non solum requiritur articulorum laxitas & languor, sed etiam quædam habitudo, & mala constitutio eorundem, quam Paracelsus *Synoviam* appellavit, & recentiores Medici, fermento cuidam, in ipsis ossium internodiis, & glandulis hærenti adscribunt, cujus ratione decumbentes in ipsos artus, serosi & excrementitii humores, in fermentationem adiguntur, unde postmodum dolor acerbissimus, maximus rubor, & ingens tumor in ipsis artubus excitatur, si alimentum in pueris, ad eas partes delatum, ejuscemodi imbecillitatem, & malam habitudinem & Synoviam ex usu veneris talem imprimat, ut confluentes ex cruditatibus humores facile ad fermentescendum promoveat, procul dubio podagricos dolores excitabit : Qua ratione etiam fit, ut ex parentibus podagricis orti, non tantum ob languorem earundem partium articularium propter malam seminis conformationem, verum etiam ab ingenito fermento podagrico, in articulis hærente, fiant illi etiam in ipsa pubertate podagræ obnoxii; Simile quid à venerea lue artubus infertur, qua plerique solent, in ipsa prima pubertatis ætate articulariis doloribus acerbissime vexari, & exosteses molestissimas pati.

Quamvis autem ex eodem Hippocrate, ut antea dictum est immodicus veneris usus sit cunctis in quacunque ætate nociturus, specialius tamen ob enarratas rationes pueris officiet : Sed neque solum immoderatus sed qualiscunque semper ipsis valde nocuus erit, tum ob carnum, nervorum, viscerum & ossium teneritudinem; tum ob

maiores, ex alimentum inopia, per seminis evacuationem, nutritionis jacturam, & sanguinis, tunc temporis tenuioris dispendium; tum etiam ob partium pudendarum, seminis elaborationi destinatarum imbecillitatem & laxitatem, quæ neque multum semen gignere, neque genitum, in suis vasculis continere possunt; unde in his non raro fieri etiam solet, ut iteratis pollutionibus molestantur, & aliquando pro semine sanguis effundatur; quin & Tabes periculosissima contingat, quam dorsalem appellant.

Podagra itaque vel nulla fit vel rarissima in pueris, antequam venerem exercuerint, nisi hæreditaria contagione illam à parentibus contraxerint; siquidem natura tunc temporis intenta nutritioni & augmentationi partium, nil in ossium intercapedinis deponit, quod proficuum ac salutare non sit, & acidum illud fermentum, quod podagricas affectiones excitat, per eam ætatem iners, vel nullum est, imo humores omnes dulces, grati & consentanei partibus esse solent, nec tam facile acorem contrahunt, nisi aliunde à potenti causa, sive interna sive externa depraventur. Qui vero referuntur in ætate puerili articulorum doloribus cruciati, revera podagrici non fuerunt, sed aliis generibus morborum affecti, ut antea quoque animadvertum est.

Controversias si quis hac de materia legere desiderat, Cardanum hoc in commentario consulat.

Aphorismus XXXI.

Oculorum dolores, meri potio, aut Balneum, aut fomentum, aut phlebotomia (seu vena sectio) aut purgatio (seu medicamentum epotum) solvit.

Nota: Similis Aphorismus habetur Lib. 7. Aphoris. 46. qui etiam hic simul explicatur.

Contentum seu Intentio.

De Ophthalmia curatione.

Connexio: Cum in prioribus Aphorismis Hippocrates egisset de do-

doloribus articulorum: In hoc præfenti Aphorifmo agit de doloribus oculorum.

Hic Aphorifmus ob simplicem conclufionem non dividitur, licet ob tot membra in eo contenta in tot quoque partes dividi poffet.

Quo ergo pacto dolores oculorum curare expediat, docet in hoc Aphorifmo Hippocrates, & quidem non uno remediorum genere, fed vario ac multiplici, pro varietate ac multiplicitate caufarum illos inferentium.

Nomine autem dolorum, utrum simpliciter dolores intelligere voluerit, fine humoris affluxu, an etiam cum tumore, inflammatione, aut lippitudine oculorum, & præfertim tunicæ conjunctivæ, aut etiam palpebrarum, quæri hoc loco poteft. Et quidem probabilius videtur, dolores hic fuiffe recensitos ab humoribus dependentes, tum quia dolor nullus fieri poteft, absque caufa valente folvere continuum, atque adeo materiali & corporea: tum etiam quia remedia, quæ hic ab Hippocrate proponuntur, ad curandos ejusmodi dolores, non nifi caufis materialibus videntur adverfum; qua enim ratione Balneum, fomentum, venæfectio, aut medicamentum purgans, in doloribus oculorum curandis convenire poffent, nifi humores dolores foventes forent diffolvendi, emolliendi aut evacuandi. Itaque dolores erunt hic intelligendi, cum affluxu humorum, atque adeo progeniti à caufis materialibus.

Sive autem totum oculum in fuo ambitu, five folam tunicam conjunctivam ejusque venulas & arteriolas five etiam palpebras ipfas conflui humores afficiunt, parum referet; fi quidem femper eadem indicationes erunt & eadem medicamentorum genera vigeant, in illis indicata.

Proponit autem primo loco Hippocrates *meripotum*, finimirum dolor fit inductus, ab humoribus craffis, viscofis & tenaciter hærentibus, præfertim lymphaticis, unde fanguis etiam craffior & glutinofior, nequeat per anguftas oculorum membranarum arteriolas & venulas tam facile permeare, fed ibidem hæreat, & tumorem referat cum dolore; ab ufu autem vini meracioris, bene poteft fanguis ipfe attenuari, & à craffamentis mucosis repurgari, five per poros cutis, five per vias urinæ, five per alios ductus corporis, & commode etiam dolores oculorum exinde poterunt levare; id quod non tantum in his, fed etiam in

aliis consimilibus morbis , per opportune factum existimaverim , in corporibus humidioribus & excrementosis, potissimum ex mala chylosi, propter ventriculi, aliorumque viscerum naturalium defectum. Sed & *fomentum* & *Balneum* quod adjicitur, etiam ad vinum meracum referri posset, ut propterea quis non male existimaret, fomentum & Balneum, ex vino sit oculis dolentibus profuturum; verum hæc generalius sunt intelligenda.

Secundo *Balneum* quod non tantum particulare , iisdem oculis male affectis adhibitum, sed etiam universale intelligi potest; etenim si particulare oculorum Balneum intellexisset , minime adjecisset fomentum; nisi tamen nomine Balnei audiamus quod humorosum est, & nomine fomenti quod est vaporosum. Conferet autem Balneum toti corpori adhibitum, ad repugnandas superfluitates, è toto corpore provenientes; particulare vero oculis admotum ad diluendos & attenuandos humores ibidem hærentes , & ad laxandas porositates eorundem , & præsertim tunicæ exterioris conjunctivæ. Poterit vero Balneum tum naturale esse , tum artificiale : Naturale è Thermis & aquis mineralibus : Artificiale vero ex herbis emollientibus, attenuantibus & oculariis dictis. In hunc quoque finem excogitatae sunt, ab Authoribus, multæ aquæ ophtalmicæ dictæ, quibus sæpius in die foeti oculi, mirabiliter in visus acie reficiuntur ut videre est apud Quercetanus, Hartmannum, Crollium, Minsicht & alios: attamen in doloribus hic memoratis, aquæ non ex corrosivis & acris sed lenientibus confici debent.

Tertio *Fomentum* additur, quod in multis convenit cum Balneo antea recensito: Verum tamen potest etiam fomentum, non tantum ex aquis & decoctis herbarum emollientium atque humectantium confici, sed etiam ex rebus, halitu atque spiritu parari : Sic ex Gummi, resinis & lachrimis plantarum, pleraque fomenta concinnari possunt, præsertim ad absumendas humiditas & serosas superfluitates, in iis potissimum, qui caput & oculos habent humoribus scatentes & facile il-lachrimantes Ita quoque plerisque in usu & quidem salutari, est spiritus salis armoniaci rectificatus, atque ex sale ipso ammoniaco & tartaro paratus , qui mane & sero ante cibum oculis halitu applicatus , & prope palpebras admotus, efficacissime albugines, maculas, & humores quoscunque tunicæ conjunctivæ inhærentes, diluit & abstergit, sed & tanta insuper est illius efficacia, ut penetrante sua vi, etiam interio-

res oculi tunicas & humores repurget, & videndi aciem, mirabiliter exacuat: olfactus quoque visui prodest, cum inter nares, & oculos, communio maxima intercedat: Cavendum autem esse monente Galeno ab omnibus medicamentis quæ stuporem inducunt, quia visum hebetant: sæpe tamen ex necessitate cogimur ad ea transire, sed non nisi cum magna cautela. Sed de his latius in Praxi.

Quarto proponitur *venæsectio*, cum scilicet oculi dolent, ab impetente sanguine, in corporibus plethoricis, aut ex suppressa sanguinis evacuatione laborantibus, unde illius quantitatem minuere, aut plus justo irruentem in oculos intercipere, aut hærentem promoveri necesse est. Sed & fieri etiam potest, ut in oculis, ob angustiam arteriolarum & venarum sanguinis circulatio aliquantisper impediatur, nequeunte scilicet sanguine, non tam prompte oscula venarum subire; quamobrem ad citandum ejusdem motum & promovendam circulationem in illis conferre poterit venæsectio, vel in brachiis vel in pedibus, etenim diminuta quantitate, & concitato motu, melius sanguis per ejus partes circumibit, atque etiam magna ex parte attenuatus, facilius per angustas oculorum venulas, in reliquas totius corporis diffundetur. Attamen in ejusmodi sanguinis distractione, maximopere cautus debet esse Medicus, ne plusquam natura ferat, aut res ipsa postulet, sanguinem detrahat; siquidem larga illius evacuatio, sicuti cunctis partibus, & toti corpori non leviter obest, ita & multo magis visui & oculis obesse solet, ut cunctis est notum. Cæterum quod scribitur *Lib. 7. Aphor. 46. Dolores oculorum, post meri positionem, & aquæ calidæ balneum venæsectione curari*; non omnino recipitur à Galeno, nec minus à Cardano eo quod cum præsentī Aphorismo non consentiat, quia propter merito rejicitur ab iisdem.

Denique *medicamentum epotum* proponitur, quod plane purgans intelligendum, illudque commode adhiberi poterit, in doloribus oculorū ortis à cacochymia, & quotiescunque corpus pravis humoribus refertum est; siquidem ex convenienti purgatione, sicuti vitiosi humores, extra corpus egeruntur, ita quoque oculorum dolores inde procedentes facillime desinunt. Cujus autem conditionis & virtutis purgans illud medicamentum esse debeat, facile quis determinabit, tum ab humorum peccantium multitudine & pravitate, tum etiam à patientis constitutione, ætate & corporis habitudine. Ve-

rum tamen in gratiam oculorum dolentium vitanda semper erunt ea, quæ acria sunt, & partibus plus justo infensa, qualia ex colocynthide & scammonio & similibus, sunt confecta, nisi forte tam exacte fuerint, à perita manu castigata & correctâ, ut omnem malitiam & acridinem exuerint. Quæ vero conficiuntur ex manna, violis, prunis, neque convenientia esse dicuntur, cum ista vix intestina diluant, & multoties in corruptionem tendentia, majus damnum excitant, præsertim in iis, qui hypochondriorum affectionibus subjiciuntur.

Dices I. Vini potio oculis summe nocet, quia intendit & exaltat causam, & malum. *ꝛ.* In doloribus à causa seu succis acris & fermentibus concedo: à causa seu humoribus crassis & viscosis nego, ut diximus in contextu.

Dices II. Hippocrates in hoc Aphorismo omisit vesicatoria collyria, cauteria setacea & alias unctiones, cum tamen hæc & similia, sint magna in pertinacibus oculorum doloribus remedia. *ꝛ.* Hippocratem hæc omnia supponere, cum brevis hæc Aphoristica doctrina, plura includere non sit passa: *ꝛ.* 2. Hippocratem ideo etiam hæc, hoc in loco omisisse, quia hæc unctiones longis morbis conveniunt; hic autem agit de doloribus cito sanabilibus: *ꝛ.* 3. Hippocratem de his abunde locutum fuisse *Lib. de locis in homine & de visu*, unde hic scite sunt omissa.

Aphorismus XXXII.

Balbi longo alvi profluvio maxime capiuntur.

Contentum seu Intentio,

De Diarrhea Balborum.

Connexio: Cum Hippocrates supra hoc Libro Aphorismo secundo, ex signis naturalibus aliqua scitu digna, ex narium muci & seminis abundantia ad sanitatem vel infirmitatem facientia adnotasset: In hoc præsentis Aphorismo deducit ex balbutie alvi profluvium, seu quod balbi maxime alvi profluvio capiantur. Hic Aphorismus ob brevitatem non dividitur.

Ad-

Advertendum autem est, quod ubi Leonicens, vertit ex græco codice *balbos*. Heurnius exponit *lingua titubantes*: verum in textu græco scribitur *Trauli*, qui proprie quales sint, non sine ratione controverti potest; etenim cum ejusmodi vitium linguæ debeatur, & lingua tripliciter in loquela lædi soleat, idcirco cujusmodi sit vitium hoc in Traulosis, breviter est examinandum.

Et quidem nonnulli sunt, qui unam duntaxat ex Aphabeti Literis nequeunt recte pronuntiare. Alii qui unam vel alteram aut plures, vel etiam syllabam integram in locutionibus prætermittunt; & alii, qui ita in singulis syllabis & dictionibus balbutiunt, ut syllabas & voces universas, perpetim interrumpant, vel transiliant. Modo si ex linguæ mollitie, & musculorum ejusdem imbecillitate voluerit Hippocrates deducendum esse alvi profluvium, omnes ii Trauli hoc loco intelligendi erunt, qui ex linguæ laxitate, & nimia humectatione in locutionibus deficiunt, & blæsi & balbutientes & hæsitantes in vocibus, & pronuntiationibus verborum, poterunt commode hic exponi, ut Galenus ipse in *commentario* de pluribus speciebus Traulosi interpretatur: quamquam Cardanus, Traulos solum putet eos qui voces per T & per R proferre non possunt, pro blæsitate *Trauletum* seu *Traulosim*, pro balbutie *Psellotum*, & pro hæsitantia *Ischnophoniam* exponat ex idiomate græco; quamobrem subdit in *Pselloti* peccare eos qui dictiones, ex Ps proferre non possunt; in *Ancyloglossia*, qui linguam habent radici tenaciter hærentem, ut propterea in mediis dictionibus hærecogantur; in *Migolalia* denique illos, qui præ timore, aut ex vehementi ira titubant ac impediuntur. At Heurnius, triplici vitio solum affici linguam in sanis ait, unde *Trauli* qui aliquam litteram pronuntiare perfecte nequeunt, *Pseli*, qui prætermittunt litteram vel syllabam: & *Ischnophoni* qui in continuata serie verborum syllabas non nectunt & balbutiunt. Cæterum sunt adhuc qui S nullatenus proferunt, vel mutant in T aut C & R in L: Sed & balbi (ut etiam advertit Cardanus) quædam proferre non possunt, aut aliter illa pronuntiant, ex impedito motu linguæ ad certas voces, ut in his in quibus frænulum & ligamentum breve est, aut ex indebita sectione contractum; blæsi vero omnia vitiose: quin & lingua interdum longior quibusdam est, & dentes exciderunt.

Quoniam vero omnia istiusmodi vitia locutionum ex linguæ laxi-

laxitate, mollitie & imbecillitate provenire videntur, & sæpius etiam ex ejusdem corpulentia & crassitie, veluti bovina, & hæ non sine humoribus laxantibus, & plus justo humectantibus & tumefacientibus, puta, pituitosis aut lymphaticis, ideo fieri credendum quamobrem compatiante ventriculo, eandem laxitatem, cum una eademque tunica, omnes istæ partes vestiantur, facile alvus in his laxetur, vel cum forte aliqua alia de causa lubrica fit immodice, ut per longum tempus profluat, concurrente pariter ea, quæ ex cerebro, glandulis, faucibus & ventriculo suggeritur, serosa colluvie. Hinc adverbium illud *maxime* non solum refert promptam & facilem in his alvi solutionem, sed etiam longam & diuturnam, si fortasse balbica, quacunque ex causa, corripiantur. Novi quendam è genere Ischnophonorum, qui adeo lubricam alvum habebat, ut pluries in die faeces egerere cogeretur, easque liquidissimas: in eo autem id peculiariter notandum erat, ut in mandendis cibis penitus deficeret, quippe qui illos pene integros devoraret: hinc non abs re suspicor, tales homines, præter linguarum, & glandularum salivalium laxitatem, atque humorum lymphaticorum copiam, etiam ex præpedito linguæ motu, & mandibularum in molitura ciborum defectu, alvum lubricam subire, eo quod cibi, non bene mansi, nec exacte confecti, aut dissoluti facillime cruditates pariant, unde postmodum alvi profluvia; quin & saliva ipsa, quæ suo sale sub acido, plurimum confert ad ciborum digestionem, in his præ nimia fluiditate, non nihil deficit à naturali sua conditione: consimiliter quoque male affectos existimare licet succos illos dissolutioni ciborum in ventriculo destinatos, ob mutuum glandularum interfese consensum; quamobrem facile exinde accidunt, in ipsis imperfectæ coctiones, atque adeo intestinorum laxitates, quæ semel deinde excitatæ, diutius postea perdurare solent, eodem fomite perseverante, cum laxa fibrarum intestinalium textura. Cæterum hæc, non nisi contingunt his, qui à nativitate balbi sunt, ne uti- quam vero qui ex aliquo morbo tales fortasse evaserunt, vel ex timore vel ira, aut etiam ex ebrietate, per aliquod solum tempus balbuites observantur. Sed & quosdam in puerili ætate, vitia locutionum contraxisse observavi, ex malo usu, quem ab aliis acceperunt, contracto in illa tenera ætate, cum quibus versari consueverant, quippe per id tempus, facillime incurrimus in defectus eorum, cum quibus

bus consuetudinem inimus: de Demosthene scribit Plutarchus, *in ejus vita*, cum vitio linguæ laborasse & voce, ut non mediocriter in dicendo turbaretur oratio, nec mense ejus intelligi posset; atque (ut ex Demetrio Phalereo subdit) ipsum adhuc jam senem linguæ hæsitantiam, conjectis in ore lapillis emendasse, vocem autem currendo, scandendo, inter pronuntiandum exercuisse. Observatum pariter est, aliquem puellum, non dissimiliter affectum, indicta inter pares in litterario Gymnasio æmulatione & vexatione, in recitandis lectionibus, sub certa pæna, moderasse. Quamobrem juvabit plurimum in his industria, ac peculiaris quædam exercitatio, ad ejusmodi vitia tollenda: De his autem omnibus, laute lateque agentem vide Cardanum *hec Commentario*.

Quæres: Cur homines qui evadunt balbi, facile in apoplexiam incidant? *R.* Ob summam qua pollent cerebri humiditatem sese in dies multiplicantem & vel in paralysem vel apoplexiam teste autopfia, incidunt.

Quæres II. Cur balbuties in febribus ardentibus evenire solita huc refertur à quibusdam, cum tamen non fiat ab humiditate? *R.* Balbutiem etiam fieri solere à summa ariditate, per quam motus linguæ præpeditur (contrariorum enim eadem est ratio) sed hæc alvi profluvium non causat.

Dices: Balbi non possunt esse tales à bile ergo hic malo asseritur, bilis enim potius siccatur & firmat organa vocis & alvum adstringit, ut patet in ictericis qui plerumque strictam habent alvum. *R.* Si bilis alio quam ad alvum feratur, concedo quod non laxet alvum, hic autem supponit Hippocrates ferri ad alvum: deinde negatur suppositum, quod balbi syncera & efficaci laborent, cum plurima lympa diluatur & effecta reddatur.

Aphorismus XXXIII.

Qui acidum eructant, non admodum pleuritici sunt.

Contentum seu Intentio.

De Dispositione ad pleuritidem.

Connexio: Quemadmodum, ex naturali signo, scilicet balbutie,

in priori Aphorismo collegit Hippocrates dispositiones ad morbos nempe alvi profluvia: Ita in hoc præfenti Aphorismo, ex acido ructu, qui ex naturali proveniat constitutione, dispositionem colligit ad morbum lateralem seu pleuritidem.

Jam quidem de ructu acido supra *Aphorismo primo hujus Libri* meminimus, & quo pacto à nideroso differat; nunc qua ratione acidum erucentes, non valde morbo laterali corripiantur, breviter exponemus. Neque enim quod communiter, interpretes cum Galeno commentantur, veritati consentaneum est, acidus ructus fieri, ex pituita, sua natura frigida, ventriculum opplente; pleuritidem vero ex humoribus potissimum biliosis: siquidem ructuosi sunt melancholici, & pleuritici plerumque fiunt, ab hærente crassa & viscosa pituita, aut etiam lymphæ in ductibus pulmonum, aut pleuræ: unde neque ructus perpetuo à pituitosis, neque pleuritis omnino à biliosis humoribus, in cunctis corporibus ortum ducet.

Cum itaque Hippocrates acidum ad lateralem morbum retulerit, certe comparatione, inter ipsos inita, ab una eademque causa, illos oriri tacite existimavit, & quidem jam satis apud acuratiores rei medicæ Professores, bene constitit, laterales dolores, imo & pleuritidem ipsam, ab acido figente exoriri: cum enim acidum in humoribus, præsertim sanguine & lymphæ exorbitaverit, in angustioribus vasis, ubi sanguinis motus, vel tardus vel nullus fit, illos cogit; ex quorum concretionem inflammationes, tumores, & abscessus eveniunt, graviores vel leviores pro diversitate partium, in quibus humores isti in suo cursu præpediuntur, & quousque resoluti, vel subacti, & sive insensibiliter sive sensibiliter fuerint educti, eousque tumor & dolor perseverabunt. Et quamvis acidum istud præternaturale, & exorbitans ubique excitari possit, nihilominus frequentius accidit, ex vitiatis succis ventriculi digestivis, aut etiam ex depravato succo pancreatico originem trahere solere, unde postmodum chylus, sanguis, lymphæ, liquor nerveus, & recrementa quæcunque corporis, in suis ductibus, ac secerniculis vitiantur, & vitiata in causa sunt, ut vel in se ipsis hæreant, vel alios præterfluentes humores cogant & coagulent, prout alibi jam adnotavimus,

Cum igitur acidum istud per ductus corporis, ejusque humores, minime vagatur, sed in flatus & halitus vertitur, & per ructus
discu-

discutitur, plane fit, ut neque laterales morbi, neque tumores, aut abscessus in partibus contingant; siquidem resolutio acido, excussoq; per flatus & ructus, humores & viscera ab illius maleficio præservantur.

Quamvis autem ex acido ructu, cujusvis generis morbi, atque innumerabiles aliæ ægitudines præcaveri possint; meminit tamen speciatim hic Hippocrates, morborum lateralium; siquidem ab acido detento, potissimum in ventriculo, & pancreate, proximius affici solent partes pectoris, tum externæ, ut sunt muscoli, tum internæ, ut pleura, mediastinum, pulmo, diaphragma: quare, exusto per ructus acido, detrimenta harum partium spiritalium, quæ exinde proxime corripì possent, præcaventur, & ipsa minime doloribus, & aliis morbis afficiuntur.

Est tamen advertendum, quod ructus acidus hic ab Hippocrate memoratus, debet esse ex longo tempore perseverans, atque iteratis vicibus recurrens, ut nimirum totum quantum acidum, in dies fortasse cumulari potest, quotidie pariter per ructus dissipetur: Hac enim ratione fiet, ut nunquam humores reliqui, à vagante isto acido, quod aberrans appellavit Helmontius, sint vitium aliquod subituri, adeoque nec moram nec coagulationem in pectore & aliis partibus contracturi.

Denique advertendum, quod non dixit Hippocrates acidum eructantes, nullatenus morbo laterali corripì posse, sed solum, *non valde*, sive, ut alii exponunt, *non admodum*, neque tam facile; etenim si fortasse adeo illud augeatur, & exaltetur, ut etiam cum ructibus humores inficiat, poterit quoque laterales dolores & alios morbos parere, prout sæpe sæpius evenit hypochondriacis, in quibus ponticum & austerum, quoque fieri solet. Itaque acidum eructantes, non admodum lateralibus morbis corripuntur, licet illis laborare quoque possint, quapropter Hippocrates de acido duntaxat, in ructibus, non autem de acido per humores diffuso sermonem hic habuit, quod scilicet intra limites ventriculi conclusum illud sit: & licet ructus expresse meminerit, tacite tamen flatus omnes etiam vagantes, & per intestina erumpentes ad alvum, comprehensos voluit, cum non minus per superiora, quam per inferiora discuti possint: At vero quia flatus per inferiora exhalantes, non poterant bene dijudicari, cujus pravitatis Naturam referrent, idcirco speciatim ructus commemo-

ravit, utpote qv̄i malum saporis sensum in ore referentes, bene poterant internosci, cujus qualitatis participes forent. Cæterum tam ructus quam flatus, pro causa materiali, tenacem & crassam pituitam acido-austeram recognoscunt, modico sale volatili, & exigua bile resertam, quæ sicuti fundo ventriculi adhærens, sapissime in ructus exolvitur, ita in intestino ileo, aut etiam cæco erumpit in flatus; unde Simon Pauli, *in suo quadripartito botanico*, non immerito existimavit, cæcum intestinum receptaculum esse flatuum, neque sine ratione, tam amplum à Natura fuisse constructum, ut scilicet distensione, & inflatione minus vexaretur.

Quæres: Quomodo ructus nidorosus differat ab acido. *Re.* Jam in contextu rem quidem esse solutam: dico tamen differre per causam & essentiam, quia nidorosus ut diximus est à bile, acidus à pituita seu viscosa & hærente lymphâ: primus non tollit dispositionem ad morbum lateralem, imo habet; secundus autem non facile habet.

Aphorismus XXXIV.

Qui calvi sunt, iis varices magnæ non fiunt; quibus vero calvis existentibus varices superveniunt, iterum rursus capillati fiunt.

Contentum seu Intentio.

De Varicum & Calvitiei comparatione.

Connexio: In antecedenti Aphorismo Hippocrates ab acido ructu ad pleuritidem: In hoc præsentî à varicibus ad capillos facit conjecturam seu potius signum eruit.

Hic Aphorismus duas habet conclusiones, ideo in duas partes secari potest: *Prima* dicit quod actu calvis varices non fiant: *Secunda* docet si calvis existentibus varices superveniant, eos rursus capillatos fieri.

Insimulat Galenus in hoc Aphorismo mendacii Hippocratem, utpote

utpote qui calvos putet, supervenientibus varicibus, sanabiles fieri posse, cum aliunde calvitium passio existimetur insanabilis: nec insuper verum esse subdit, quod magnæ varices calvis nuncquam accidant. At ab ejusmodi calumniis recte vindicatur Hippocrates à Cardano, qui pluribus contendit calvos capillatos fieri posse, supervenientibus potissimum varicibus, quin & multa alia in medium adducit, ut Hippocratem adversus Galeni accusationes tueatur.

Quamquam Fuchsius in sua versione, non calvos proprie, sed qui capillorum defluvio laborant, eundem exponat, inquit enim *φαλακροί*, *græcam vocem hic, non qui calvi sunt, ut ceteri interpretes fecerunt, sed qui capillorum defluvio laborant, convertimus, ut Hippocratem, aut alium, qui hujus Aphorismi Author fuit, à mendacio vindicaremus*; Atque in hujus rei comprobationem affert auctoritatem Philothei, qui calvos appellat, non eos, qui proprie ita nominantur, sed qui ob malum aliquod, capillorum defluvium patiuntur, veluti propter alopeciam aut ophrasin; unde istos existimat, magnis varicibus non affici, quod vitiosi humores ad caput, & non ad crura ferantur; iis vero, qui capillorum defluvio laborant, si varices succedant, capilli denuo nascantur, quoniam vitiosi humores, qui antea radices capillorum corrumpant, ad crura transferuntur. Et sane cum defluvium capillorum contingat à diffusis, per cutem, pravis humoribus vim habentibus erodendi & radices capillorum corrumpendi, plane fit, ut vergentibus illis ad alias partes corporis & potissimum ad crura, vel tibias, cum tumefactione venarum, unde varices, facta transpositione prædictorum humorum acrium, à capite ad femora vel tibias, poterunt facillime capilli, renasci; & è contra quicumque calvi sunt, & capillorum defluvium, ex mala eorundem humorum acrium dispositione patiuntur, magnis varicibus non tam facile corripientur, opposita procul dubio de causa.

Hinc autem palam fit, defluvium capillorum hic sumi à causis morboſis indictum, non vero ex mutatione naturali ætatum, potissimum in ultima senectute, in qua calvitium accidit, ob defectum potius materiei ex qua capilli generantur, & hæc est insanabilis: cum enim per eam ætatem ob defectum alimenti, partes omnes exarescant, & cutis notanter corrugetur, atque in suis porulis densata & constricta, à cæteris partibus non parum dissocietur, propterea fit, cur capilli

sponte sua decidant: id quod potissimum accidit, in Syncipite, ubi cutis nudo ossi hæret; siquidem in aliis partibus, substratum habet paniculum carnosum, & adipem. Hac eadem de causa fit, quare pleræque mulieres, in ultima senectute, pilos in mente progignant, & supercilia cæteris proluxiora, quoniam ob defectum menstruorum superfluitates illæ, quæ in sanguine cumulantur, ad eas partes deferuntur, & commutantur in pilos & capillos, uti contigit Phætusæ in Abderis ex mensium defectu: test. Hippoc. 6. Epid.

Cæterum quod spectat ad varices superius *Aphorif. 21. hujus Libri* est late examinatum; hoc breviter addimus, materiam calvitiei & varicum esse prorsus eandem, unde calvi non magnas habebunt varices & è contra; Etenim humorum pravitas quæ efficit calvitiam eadem quoque efficit varices.

Plures controversias super hoc Aphorismo, quisque legere poterit apud Cardanum in *commentario hujus*.

Aphorismus XXXV.

Hydropicis (seu aqua intercute laborantibus) tussis si superveniat malum.

Nota: Similis Aphorismus habetur Lib. 7. Aphorismo 47.

Contentum seu Intentio.

De Prognosi Hydropis ex tussi.

Connexio: Cum supra Aphorismo vigesimo septimo hujus libri, de Hydropicis & suppuratis Hippocrates mentionem fecisset, quoad sectionem & effusionem contentæ materiæ; In hoc præsentis Aphorismo, signum assumit in hydrope, quod superveniens eidem, morbi augmentum significat.

Hic Aphorismus ob brevitatem non dividitur.

Hydropici seu aqua intercute laborantibus, intelligendi sunt, cujuscunque generis illi sint, quemadmodum manifeste deducitur ex textu græco. Neque enim tussis mala solum est, si Anasarca laborantibus superveniat, sed etiam Asciticis, quemadmodum deducitur ex eodem Hippocrate *2. prædiction.* ubi signa tradit bonæ & malæ in hydro-

dropicis, ex quibus præfagire quis rationabiliter possit, de eorundem eventu salutari vel lethali.

Rationem autem hujus dicti, quamvis Galenus deducere conetur ab aquosa humiditate tantum adaucta, ut jam asperam occupet arteriam unde tussis; quia tamen exinde non solum malum, sed lethale signum foret deducendum, cum alioqui Hippocrates hic non dixerit lethale, sed tantummodo malum, id circo non sine ratione Cardanus ridiculam esse ait, in hoc Aphorismo Galeni expositionem. Malum itaque signum erit tussis superveniens hydropicis, quia indicat aquam in illis adeo succrevisse, & pravam fuisse redditam, ut sanguinem circumstantem infecerit, ac pulmones in suo transitu, vellicando, ad tussendum exstimulet, veluti ad expulsionem rei noxiæ.

Accedit quod in asciticis, à superabundanti aqua adeo tumescunt, & opprimuntur viscera, sub Diaphragmate sita, & potissimum jecur, sub hypochondrio dextro, Diaphragmati alligatum, ut motum illius impediant, ac deorsum contrahant, unde postmodum respiratio difficilis, & cū difficili respiratione, tussis sicca & molesta. Si præterea in pulmone & pectore hydrops factus sit, partim ab hydatidibus, partim etiã à superincubente aqua, & ab oppleta pectoris cavitate, multo crebrior respiratio, & molestior tussis sine sputo fiet, quod certe pessimū signū est. Deniq; si tussis & respiratio adeo increcant, ut æger non nisi erecta cervice respirare possit, ab irruente in asperā arteriā & Bronchia pulmonis, humore, procul dubio non tantum malum signum inde portenditur, sed etiam brevi mors futura, ob imminentem suffocationem, sub quo sensu præsens Aphorif. videtur repetitus *Lib 7. Apherif. 47.* ubi scribitur: *Aqua intercutelaborans, si tussi corripitur, desperatus est:* Sic contigisse Olynto Hydropico & Ctesiphonti testatur Hippocrates.

Plura super hoc Aphorismo legi possunt apud Cardanum in *commentario.*

Aphorismus XXXVI.

*Difficultatem urinæ phlebotomia (seu vena secta) solvit;
Secundæ vero interiores.*

Nota: Similis Aphorismus habetur Lib. 7. Aphorif. 48.

Con-

Contentum seu Intentio.

De vena sectione Dysuria remedio.

C*onnexio* : Cum Hippocrates supra Aphorismo trigesimo primo de oculorum doloribus dixisset, atque iis remedia congrua proposuisset: In hoc præsentī Aphorismo, ad urinæ difficultatem, unum ex iis affert remedium nempe venæ sectionem.

Hic Aphorismus ob brevitatem non subit divisionem.

Sed verum non esse hunc Aphorismum, scribit Galenus *in comment. nisi &* particulam conjunctivam, *assumpserit, ita ut Aphorismus talis fiat, difficultatem urinæ & venæ sectio solvit*; sed non video, quid unquam particula ista &, ad expositionem hujus Aphorismi conferre potest, cum eam duntaxat urinæ difficultatem, græce Dysuriam, solvere possit, quæ ab inflammatione & multitudine fit ut ipsemet Galenus *in commentario* fatetur; nisi præter venæ sectionem, alia quoque medicamenta inflammationem respicientia, per particulam illam & conjunctivam, intelligere velimus, quasi vero sensus sit, non solum medicamenta, inflammationem temperantia & dissolventia, sed etiam venæ sectionem convenire in urinæ difficultate.

At vero quia urinæ difficultas, cum ardore & dolore conjungitur, plane dicendum videtur, etiam ab ipsa mala urinæ conditione Dysuriam evenire posse. Et quidem quando cunque cum urinis, salia acrimia commiscentur, quæ in transitu per Sphincterem musculum & urethram vellicant & compungunt partes illius sensitivas, plane fieri potest, ut citra quamcunque inflammationem, ardor quoque in urinæ exitu percipiatur. Qua ratione fit, ut iste morbus sæpe sæpius observetur in senibus, in quibus humores omnes, & præsertim lymphatici, ac sanguinis serum, acorem summum contraxerunt, & non tantum urinæ difficultati, sed & consuetilibus aliis morbis ab acido provenientibus, illos obnoxios reddunt. Accidit præterea non raro Dysuria ex ulcere contracto in iisdem partibus, prout experimur in infectis lue venerea: etenim pertransiens urina, sua mordacitate partem ulceratam compungendo, ardorem & dolorem in ipsa mictione ingentem excitat.

Quam-

Quamquam autem venæ sectio hic ab Hippocrate commendata locum habere possit, in inflammationibus partium mictui destinatarum, non tamen in cæteris aliis commendabilis videtur, nisi solum ad deplendam seri sanguinei multitudinem. Cæterum cum serum istud a core plerumque inficiatur, qui nulla ratione potest, per venæ sectionem temperari, proinde fit, ut nemo amplius in Praxi audeat ejusmodi in morbis sanguinem mittere. Sed neque solum apud recentiores rei medicæ Professores, verum etiam apud veteres Medicos, mittendi sanguinis usus, in urinæ vitiis exolevit, & qui illum tentare ausi sunt, in pejora mala ægros deduxêre. Qua etiam ratione putaverim, quamobrem Cardanus hunc Aphorismum exponendum omiserit, imo neque inter Aphorismos, sententiam istam reposuerit, fortasse quia existimavit, neque rationi neque experientiæ illam esse congruentem, adeoque non ab Hippocrate, sed ab aliis adjectam fuisse, quemadmodum Galenus ipse suspicatur ob adjunctas dictiones, *Secunda vero interiores*, utpote Hippocraticis dogmatibus non consentientes.

Postremo additur *secare oportere interiores* idest venas; ut veteribus solitum, nempe venas poplitis & tali in parte cruris domestica non autem externa; quæ antiquis credebantur, majorem consensum cum partibus urinariis retinere, ut nimirum exinde promptius & proximius è partibus inflammatis affluxus humor derivaretur. Verum hæc post detectam sanguinis circulationem sponte sua evanuerunt & selectio venarum dudum profanata & profligata fuit.

Quæres : Utrum etiam in doloribus à calculo conveniat venæ sectio? R. Si calculus magnam concitet inflammationem, concedi potest : Si vero sine inflammatione sint dolores, nec indicans nec locus venæ sectioni datur.

Aphorismus XXXVII.

Angina correpto, si tumor oriatur in collo, bonum; foras enim morbus vertitur.

Nota : Similis Aphorismus habetur Lib. 7. Aphorismo 49.

Contentum seu Intentio.

De Prognosi Angina.

Connexio: Quod alias dixerat supra Aphorismo vigesimo quinto huius Libri Hippocrates de Erysipelate, imo etiam de cæteris aliis inflammationibus: In hoc præsentī Aphorismo, repetit speciatim de angina, in qua si tumor ad partes externas, & ad collum vergat, bonum dicitur, adjecta causa & ratione, quia foras morbus deducitur. Erit tamen advertendum, ut alibi quoque adnotavimus, tunc bonum signum esse tumorem aut ruborem in collo apparentem, cum affluxus humor, Anginam faciens, partes internas gutturis, & faucium deseruerit: Secus vero si adhuc easdem occupet.

Cumque autem hoc notum sit iam ex superius traditis nempe *Aphorif. 25. huius Libri*, non est ut hic longius immoremur aut Chrambem repetamus.

Dices: Hippocrates §. *Epidem. sect. 1.* dicit Anginosam quandam, habuisse tumorem durum & subrubeum, in cervice & pectore & tamen mortua est, ergo non subsistit Aphorismus. *R.* Vel ille tumor, erat in faucibus circa Brithmia, adeoque non externus sed internus, licet conspicuus: vel tota materia morbi non fuit expulsa, sed mansisse adhuc intra illius partem, hinc symptomata non remittebant: Vel mortuam esse illam mulierem ex debilitate & suppressione excrementorum alvi & urinæ: nec enim bonum est semper, pelli foras morbum absolute, nisi symptomata minuantur & abscessus non recurrant.

Plura de huius Aphorismi difficultatibus legi possunt, apud Cardanum, in *Commentario*.

Aphorismus XXXVIII.

Quibus occulti canceri sunt, non curare melius: curati enim citius intereunt: non curati vero longius vitam trahunt.

Cor-

Contentum seu Intentio.

De Prognosi cancri.

Connexio : Cum Hippocrates in præcedenti Aphorismo egisset de tumore colli in Angina : In hoc præfenti Aphorismo, agit de tumore cancroso, morbo pessimo, & pulcherrimum atque scitu dignissimum nobis transcribit decretum, ut nempe occultos cancos quos alias, *noli me tangere* vocamus, non aggrediamur curare, eo quod curati citius intereant, non curati diutius vivant.

Unde hic Aphorismus in duas partes dividitur: in *Prima* concludit cancos non esse curandos: In *Secunda*, adducit conclusionis rationem, mox dictam.

Quid pro occultis cancri intelligere voluerit Hippocrates, in hoc textu dubitat primum in *commentario* Galenus; mox vero tum de cancri in profundo corporis, & in intimioribus partibus enatis, tum de nondum apertis, non improbabiliiter exponit, & quidem in utrisque ratio eadem æque militat. Sed tamen verisimilior semper credita est illorum expositio, qui de cancri nondum apertis, aut ulceratis seu manifestis quos carcinomata, græci vocant, sententiam hanc interpretantur,, siquidem cancri in reconditis partibus corporis geniti, utpote intractabiles, nullatenus subjici possunt, curationi per medicamenta localia seu Topica, quæ ab occultis ad patentes illos deducant.

Sunt autem cancri de genere Tumorum, malignam conditionem humorum redolentium, quales veteribus putabantur atrabillarii, sive maligni erodentes, & veneno aquæ stygiæ valde consimiles. Dicuntur cancri, vel ob similitudinem quam referunt, in sui expansione cum cancri, vel quia partes, quas invadunt inæqualiter depascuntur, & multoties increfcunt; aliquando etiam decrefcunt instar cancrorum. Et quoniam ob malignam & cacoëthicam naturam difficillime suppurantur, etiamsi omnis industria adhibeatur, neque tam facile rescindi possunt, sine ingenti sanguinis effusione, & periculosa circumjacentium partium læsione, propterea fit, ut à Chirurgo insanabiles reputentur, adeoque nullo cujusvis generis medica-

mento illos tractare audeant , quod & Ovidius 2. *de Ponto* innuit.

Vulneris id genus est, quod cum sanabile non sit ,
Non contrectari, tutius esse puto.

Considerata itaque pessima illarum conditione, inquit, in hoc textu Hippocrates melius esse illos non curare , id est medicamentis localibus, aut ad suppurationem, aut ad resolutionem ducentibus tractare ; nam si contingat illos aperiri & ulcerari, cito ad mortem perducunt, cum ex ambiente aëre, virulenter ille humor, magis acuat, vires & spiritus perpetim dissipentur, ob continuam sanguinis effusionem , & reliqui humores , imo etiam partes solitæ circumjacentes gravius afficiantur eoque magis si cancri reconditas corporis partes occupaverint. Et quamvis ab Ætio & Paulo Ægineta methodus proponitur salubriter curandi cancos , & multa medicamentorum genera, in eundem finem conferentia referantur , nihilominus illa aliquando, in praxim deducta, vana & inefficacia evasere, ut proinde nemo amplius in praxi audeat , medicamenta in illorum curationem administrare, nisi solum quæ universale vitium humorum corrigere & temperare valeant.

Præter difficultatem curationis, procedentem à causâ humoralis acido-acri, & maligna, adjicienda quoque est, partium affectarum in cancris, laxa habitudo, quæ deinde durescit, siquidem cancri plerumque fiunt in partibus glandulosis, quæ cum suapte natura debiles sint, & facile malorum succorum susceptivæ, propterea difficiliorem semper reddunt curationem. Fuerunt tamen, qui usu causticorum medicamentorum & exedentium, præsertim olei vitrioli, aliusve, ex integro universum extirpare conati sunt, sed non semper felici successu : Etenim nisi omnino Carcinoma eradicetur, inutilis evadet opera extractionis ; Accedit quod multoties ex resectione vasorum, tanta sanguinis effusio facta est , ut omnino exanimati ægri paulo post interierint.

Atque hinc denique concluditur in textu, non curatos in longius tempus perdurare, cum Natura facilius semper toleret, cancrum non ulceratum quam ulceratum. Observatum namque est in Praxi, plures carcinomate affectos, ad plurimos annos vixisse, & alios usque ad extremam senectutem fuisse perductos, servata tamen convenienti

ti diæta, & assumptis per intervalla medicamentis sanguinis acredinem retundentibus, qualia sunt, quæ ex cancris flaviatilibus ex viperis, Cornu Cervi, decoctis chinæ & aliis similibus conficiuntur, de quibus in Praxi, ubi multa & Theorica & Practica deducuntur.

Quæres: Utrum cancer possit esse in omnibus partibus corporis? *Re.* Quod sic, potissimum autem in mammis, labiis, facie, lingua, faucibus, præputio, utero &c.

Plures de cancris eorumque curatione controversias si quis desideraverit legat Cardanum hoc loco *in Commentario*.

Aphorismus XXXIX.

Convulsio vel à repletionem fit, vel ab inanitione: Ita vero & singultus.

Contentum seu Intentio.

De Causa Convulsionis.

Connectio: Cum in antecedenti Aphorismo Hippocrates locutus fuisset de pessimo inter chronicos morbo, nempe cancro: In hoc præsentis Aphorismo loquitur de morbo inter acutos quoque horrendissimo, nimirum convulsione.

Hic Aphorismus ob simplicem conclusionem non dividitur.

Causas ergo convulsionis memorat in hoc Aphorismo Hippocrates, & illas ait duas esse in universum, inanitionem scilicet & repletionem: Cum enim convulsio sit retractio nervorum & musculorum, ad propria capita, & tum inanitio, tum repletio possint nervos & fibras nervorum ita afficere, ut involuntarie retrahantur & convellantur, eo prorsus modo, quo fides, id est, chordæ in fidibus, & cæteræ partes membranacæ ac fibrosæ, aut plus justo arefactæ, aut plusquam ratio postulat humoribus tumefactæ contrahuntur, propterea fit, ut pari ratione nervi, & nervorum fibræ à consimilibus causis convellantur, quemadmodum Galenus ipse late prosequitur *in Commentario hujus Aphorismi*.

Verum quidquid sit de causa replente, certum est inanitionem talem ac tantam in nervis impossibilem esse, quæ videtur omnino extari non posse: nam quæ Galenus affert, de chordis & coriis arefactis ad ignem, vel ad solem æstivum, licet vera forent (quæ tamen puerilia existimat Martianus) non tamen congruenter aptari possunt nervis & musculis intra corpus positis, cum nunquam isti adeo possint are fieri & exiccari, ut omni prorsus humiditate priventur, sicuti contingit corio ad ignem exiccato: Si unquam insuper id humano corpori viventi possit accidere, procul dubio, in his qui hectica & tabe consumpti sunt, id ipsumliceret experiri; atqui nemo istorum unquam convulsionibus corripì visus est, etsi plerique pellem tantummodo superductam ossibus haberent: Causam igitur istam, ex inanitione petitam, rationi & experientiæ consentaneam nemo plane existimabit. Convulsio insuper nervorum, compunctionem aut cæsuram, momento fere temporis consequens, nec ad inanitionem nec ad repletionem referri potest, sed aliam omnino diversam exigit.

Crediderim ea propter causam hanc inanientem, non ex ratione inanitionis & arefactionis convulsionem excitare, sed ex acredine & molesta quadam vellicatione, nervis & musculis plurimum infensa, proficisci; nisi enim nervi & muscoli in inanitionibus, à re quapiam proritentur & compungantur, nullatenus poterunt convulsionem subire: qua ratione etiam exposuimus *Lib. 5. Aphor. 1.* convulsionem ab usu ellebori, aliusve similis acrioris medicamenti excitatam; siquidem cum elleborum immodice evacuando humores extenuat, ac perturbat, simul una per acredinem nervos & musculos, illorumque fibras proritat & compungit; unde ipsi in æqualiter concitantur & convelluntur. In quam eandem rem Galenus quoque *in commentario istius Aphorismi*, proponens causas singultus, qui species dicitur convulsionis affert exemplum piperis, ex vino sumpti, quod sua acredine potenter singultum promovet, motum scilicet ventriculi subversivum, quo se ipsum ab illa molestia liberet.

Neque solum causa inaniens, sed etiam replens, convulsionem nullam affert, nisi præter repletionem acrem, & molestantem aliquam conditionem conjunctam præseferat: nam membra paralyti affecta, à causis replentibus humidis, & pituitosis, nullatenus convulsioni subjiciuntur, sed potius à copia humorum plus justo distensa & resoluta,

luta, omnem motum & sensum amittant: neque vero nervi in paralyfi aliter afficiuntur, quam ut in convulsione; etenim fibræ & tunicæ nervorum in utrisque æqualiter offenduntur, ea solum differentia, quod in Paralyfi causa sit opplens & hebetans sensum, in convulsione vero pungens & irritans. Atque hinc fit quamobrem, hystericis passionibus laborantes, non raro una simul vexari soleant convulsionibus, & motibus convulsivis, itemque catalepsi & paralyfi membrorum, à materia nimirum simul contorquente fibras, & sensum partis hebetante. Hinc falsum, quod nonnullis huc usque creditum, in convulsione membranas nervorum, in Paralyfi vero cavum eorundem oppleri & tumefieri, siquidem in Paralyfi non raro amittitur sensus, superstiti motu, sensus autem in membranis nervorum fit: & membra Paralyfi affecta, resoluta observantur, ac plus justo differta & flaccida, ut per fibras nullatenus flecti aut commoveri possint, in quarum vitium etiam fibræ musculorum coafficiuntur, ut alibi dictum.

Quod dictum est de convulsione, facili negotio singultui aptari potest, cum singultus sit quædam peculiaris ventriculi convulsio, conantis expellere ea quæ intimas illius partes infestant: atque in hoc differt singultus à vomitu, in vomitu enim humores molestantes, cavum ventriculi occupando, facillime evacuationi subjiciuntur, idcirco ventriculus motu subversivo illos expellit, & ab irritamento se vindicat; at vero in singultu conatus omnis est irritus, quia humores infestantes, penitiores illius partes occupant. Non semel autem expertum est, desisse singultum, citra quamcunque evacuationem, assumptis medicamentis oleosis, ac redinem illorum humorum retundentibus, vel fibras ventriculi laxantibus.

Controversiæ plures, de materia convulsionis, distentionis, singultus, vomitus legi possunt supra *Lib. 5. Aph. 1. 2. 3. 4. & 5.* Itemque Cardanus in *Commentario dictorum & huius Aphorismi*, quæ plura asserti scitu & lectu digna.

Aphorismus XL.

Quibus ad (sive circa) hypochondrium dolor est sine inflammatione, iis febris superveniens dolorem solvit.

Nota:

Nota: *Similis Aphorismus habetur Lib. 7. Aphor. 52.*

Contentum seu Intentio.

De Febre Medica Hypochondriorum.

Connexio : Hujus Aphorismi cum aliis difficile est invenire connexionem nisi fortasse cum illo Libri quarti Aphorismo septuagesimo tertio : *quibus sublata seu suspensa hypochondria seu ilia murmurant &c.* imo quasi sub illo videtur contineri.

Hic Aphorismus ob simplicem textum & conclusionem non dividitur.

Dolores in hypochondriis excitati, varii esse possunt : aliquando enim fiunt cum sensu ponderis, à materia quadam obstruente, & sua mole premente, & gravante partes, præsertim glandulosas in hypochondriis fitas : Aliquando fiunt à flatibus, cum sensu inflationis, unde partes ipsæ plus justo distentæ tumescunt, & attolluntur, adeoque dolent. Non nunquam à detentis fæcibus una simul commixtis, cum crassis & tenacibus succis, ut non raro evenit in intestino colo, quod cum à dextra in sinistram ventris partem porrigatur, sub utroque hypochondrio, non raro etiam cum hypochondriacis doloribus confunditur, eo quod zonæ instar, jecur, lienem, renes & lumbos circum afficiat. Sed & interdum dolor quoque excitatur, à male affecto pancreate, à glandulis lumbaribus, à tumoribus progenitis, in parte cava hepatis aut lienis, unde etiam difficultas respirandi, motus impotentia, murmur ventris, ructus, flatus aliaque consimilia symptomata exoriri solent. Denique contingunt dolores ab inflammationibus aut abscessibus, in iisdem partibus progenitis, ab humoribus præsertim, acris, acidis, lymphaticis, aut biliosis, qui præter dolorem febrim quoque continuam & acutam excitant.

Hos omnes ergo, aliosve similes hypochondriorum dolores considerans in hoc Aphorismo Hippocrates, illos inquit salubriter finiri, superveniente febre, sed neque solum dolores ipsos veluti effectus sed & morbum qualem cunque, unde dolores ipsi proficiuntur, à suscitata febre terminari. Dixit autem dolores hypochondriorum,
hoc

hoc est partium illarum, quæ sub chondriis seu cartilaginibus, costas spurias obducentibus sitæ sunt, quemadmodum in dextra parte, lobus est hepatis, cum adjuncto illius ligamento, in altera parte lien; excipiuntur autem stomachus, ventriculi fundus, pylorus, intestina gracilia, quæ inter utrumque hypochondrium sita sunt, & medium regionis epigastricæ occupant; siquidem partes istæ dolentes, à superveniente febre minime liberarentur, sed magis & magis molestatæ, exitium brevi futurum ex febre portenderent, quemadmodum ex aliis, tum Hippocraticis tum Galenicis locis, clarissime deducitur, & pluribus experimentis passim in Praxi comprobatum est, quippe non dolent, nisi à causis vehementibus, & cum sint partes, maximo sensu præditæ, semper ac febrim comitem habent, in mortem desinunt. Contra vero dolores in hypochondriis excitati, quia plerumque fiunt ab humoribus crudis, crassis, glutinosis & flatulentis, facillime beneficio supervenientis febris discutiuntur & resolvuntur, cum febris vim habeat, attenuandi, resolvendi, & ejusmodi crassos succos concoquendi, facta deinde per vias urinarias, vel etiam per alvum, depositione.

Excipit autem Hippocrates dolores, ab inflammatione dependentes; tunc enim, quia causa doloris non est lentus & crassus humor, aut conclusus flatus, sed sanguis vel acer vel acidus restagnans in ipso jecore vel liene, neutiquam à febre subigetur, sed potius exacerbabitur & exacuetur: Unde sicut in priori casu febris remedium est, ita in posteriori signum erit pessimi morbi, & exitus calamitosi, veluti designans, causam malam difficulter superabilem, & partes affectas penitus esse in suis operationibus invasas. Qua plane ratione fit, cur Hippocrates apposerit adverbium, *circa*: nam inflammatio semper intimiores & præstantiores partes occupabit, simplex vero dolor superficarias tantum, nec adeo naturæ operibus necessarias. Hinc autem idem Hippocrates scripsit 2. *Prorrheticor.* febres ex hypochondriorum doloribus malignas esse, veluti ab inflammatione vel phlogosi dependentes.

Denique adjectum est, non solum dolorem sed etiam morbum subinde solvi; nam cum dolor in hypochondriis, sit symptoma consequens, vel morbum vel causam morbi puta obstructionem, tumorem, vel flatus, & humores crassos, inflantes & distendentes, profecto

non tantum per febrim, dolor ipse desinet, sed etiam morbus, vel causa morbi dolorem excitans.

Et licet dolor nullus fiat sine causa aliqua continuum solvente, quia nihilominus Hippocrates, non definivit in hoc Aphorismo naturam, seu speciem doloris, poterit bene explicari de quocunque dolore, etiam gravante, inflante, vel distendente, qui cum fiat ab humoribus lentis, vel etiam à flatibus, facillime poterunt, a superveniente febre, dissipari, discuti & resolvi.

Pro coronide tandem deducere licebit, ex hoc Aphorismo, non semper febrem nocuam esse, sed sæpe sæpius salutarem, quemadmodum non hic solum sed alibi pluries idem Hippocrates est attestatus.

Reliquas controversias si quis super hoc Aphorismo legere desideret, eas apud Cardanum inveniet *in Commentario*.

Aphorismus XLI.

Quibus in corpore suppuratum aliquod (seu suppuration) existens, nullam sui dat significationem (seu non innotescit) iis ob crassitudinem, puris, aut loci non se prodit, (seu non innotescit.)

Contentum seu Intentio.

De Abscessibus occultis.

Connexio: Hic Aphorismus cum præcedenti in hoc convenit, quod in priori egerit de tumore & inflammatione hypochondriorum; in hoc præsentis Aphorismo autem agit de suppuratione, quæ inflammationem, si hæc in principio non resolvatur, comitari solet. Hic Aphorismus ob simplicem textum & conclusionem non dividitur.

Cum ergo in priori dixerit, dolores in intimis partibus corporis excitatos non raro ab inflammationibus exoriri, & inflammationes

in

in suppurationem deduci; adjicit autem in hoc Aphorismo Hippocrates, quibus de causis illa, non innotescat, & ait, vel ob crassitudinem puris, vel ob profunditatem loci, non apparere, aut visu, vel tactu non percipi.

Et quidem *Primo* necesse est, factam multo antea fuisse suppurationem à sanguine alicubi concreto, unde præcesserint febres dolores, inquietudines, atque alia symptomata, suppurationem comitantia; cumque post suppurationem ista soleant plurimum remittere, documento ejusdem Hippocratis *Lib. 2 Aphor. 47. dum pus conficitur, dolores & febres accidunt magis, quam jam confecto*; propterea ab indicio confecti puris, & desinentium symptomatum, si illud aliunde non innotescat, alterum ex duobus intercedere, crassitudinem scilicet puris, aut loci profunditatem.

Ufus est autem Hippocrates, voce, *non innotescere*, quæ idem omnino significat, ac non conspicuum fieri, non apparere, neque manifesta indicia de se prodere, sive fluctuatione, sive tumefactione, sive novo dolore, ac febre, sive exitu per vias urinæ, per alvum, & alios ductus corporis, ita ut omnino intra corpus delitescens, nullum manifestum indicium præbeat, quo possit prudens Medicus, in illius cognitionem perducere.

Sed tamen non inde quis existimabit, taliter affectum patientem bene se habere, nulloque morbo molestari; nam cum pus genitum, & alibi collectum sit de genere eorum, quæ præternaturam sunt, fieri nulla ratione poterit, quin operationes aliquæ læsæ sensibilibus non sint, unde probabiliter, suspicari queat, à contento pure, alicubi delitescente, fore operationes aliquas, saltem naturales, ab ipso restagnante vitiatas, cum sensu saltem ponderis, cum lassitudine, cum motus difficultate, cum mala nutritione, cum febre aliqua pusilla, cum inquietudine, cum vigilia, aliisque symptomatibus, magis & minus ægrotantem moestantibus, prout pars affecta nobilior, vel ignobilior fuerit. Atque hac ratione multoties visum factas suppurationes in glandulis, & partibus glandulosis, diu patientem male affectum detinuisse, & post aliquot horas à pastu, febricula levi vexasse, cum anxietate, molestia, motus impotentia, sine evidenti aliqua causa, & tandem facta irruptione pus prodiisse per alvum, aut per vias urinæ,

undelicet patiens ipse male se haberet, non tamen certa indicia patebant peractæ suppurationis.

Verum quamvis difficillimum plane sit, de facta suppuratione certum iudicium proferre, poterit nihilominus sagax Medicus ex prægressis causis, atque ex præcedenti morbo, non improbabili-ter conjectari, peractam alicubi illam esse; si nimirum ex casu, contusione, vulnere quis ægrotaverit, itemque ex præcedenti dolore saltem gravante, potissimum in partibus inni ventris; itemque ex nausea, vomendi stimulo, pavoribus nocturnis, pulsu inæquali, decubitu in aliquam partem corporis molesto, lassitudine, inquietudine, motus impotentia, aliisque per aliquod tempus, fuerit ille affectus, mox veluti repente gravi febre & acuta corripiatur, quæ sine ulla intermissione, & cum repetentibus rigoribus, aut horripilationibus, ad tres vel quatuor dies uniformis observetur, deinde subito mitescere & remitti videatur, adjuncto levi sudore, vel urina crassiori, ob quam ita in melius abire videatur, ut se à febre immunem omnino existimet, procedente vero tempore, sensim, statutis quibusdam horis, febricula molesteretur, & cum appetendo & concoquendo bene se habere videatur, nihilum tamen proficit, plane suspicari licebit, ex causis superius memoratis, abscessum aut inflammationem alicubi factam esse, mox ex superveniente febre acuta & vehementi promotam fuisse suppurationem, qua peracta remissa fuisse symptomata, aut etiam inconspicua evasisse, sed non omnino deleta, patentem detineri morbosum aut valetudinarium; quamobrem, si adhibitis medicamentis dissolventibus, & puri confecto exitum parantibus, aliqua expurgatio, & deinde purulenta subsequatur, certum indicium prodibit, latentem suppurationem patentem jam evasisse.

Quod autem suppuratio in corpore existens delitefcatur, & certa sui indicia non proferat, idque ex duabus memoratis in hoc Aphorismo causis, haberi possit, clarius est, quam ut longa hic oratione explicari egeat. Siquidem puris crassitudo multoties à causa est, ut alicubi restagnans, neque ingentem molestiam pariat, neque exitum sibi paret; quia propter crassitiem, circumjacentes partes minime velliantur, quæ propterea non proritata, nullatenus illius evacuationem moliuntur: id quod (ut antea est animadversum) sæpe sæpius acci-
dit,

dit, in partibus glandulosis : Nec præterea purulenta materia tenax, & crassa vehementem in partibus excitat fermentationem, unde diu ibidem subsistere potest, quemadmodum experimur, in Atheromate, Steatomate & Meliceride, in quibus propter humoris contenti crassitiem & viscositatem, partes affectæ in longissimum tempus sufferunt tumefactiones & gravamina. Partes etiam reconditæ & profundæ corporis, itemque crassæ, obesæ, glandulosæ, veluti sensus expertes, in diuturnum tempus solent collectam purulentam materiam, citra grave incommodum sustinere, & absque ullo periculo putrefactionis aut corruptionis, quia putrefactio & corruptio, non fit sine fermentatione, & fermentatio non sine intestino motu partium tenuium & mobilium: Cumque pus crassum sit, atque adeo ineptum motioni, & partes affectæ exanguet, multo vel modico sensu præditæ, fit proinde, ut diutissime suppurationes istæ delitescant, & eo usque innoxia perseverent, quousque promotò in illis motu, vel novus morbus insequatur, vel aditum tibi faciat pus attenuatum.

Cæterum peritiores Chirurgi solent, de internis istiusmodi suppurationibus partium profundarum, certum ferme judicium proferre, à fluctuante per tactum utrinque initum materia, si nimirum hinc inde prementibus digitis, quod subest, loco moveri percipiantur & cutis externa à suo naturali colore & calore permutata videatur.

Omittendum denique non est, de iis suppuratis, locutum esse hoc loco Hippocratem, qui in imo ventre potissimum suppurationem patiantur; secus vero de suppuratis, in pulmone aut pectore, quorum alibi signa, cum eodem Hippocrate tradidimus in commentariis super lib. 5. Aphoris. 8. 10. & 15.

Pro coronide & hoc animadvertendum quod maximi momenti sit puris cognitio, & præcipue in partibus interioribus, ea quidem potissimum de causa quoniam ex ea magna medico gloria nascitur, cum secanti pus effluit, & æger liberatur, sicut è contra ignominiosum est non cognoscere : Unde

Quæres: Quibus præter dictis in contextu signis explorare possit Medicus pus esse in aliqua parte? &c. En comprehendis sequentibus versibus.

Durities longa, pulsus, dolor, & calor auctus,
Signant pus fieri: sed facti dicta remissa
Sub digitis undans, albescens pars & acuta.

Præterea ubi est pus, ipsa pars post adhibitum fomentum mutat colorem: Hippocrates, accipiebat lutum figulinum, vel argillam, quam pectori admovebat humidam, ad modum cataplasmatidis, quod magis liccabatur ibi pus latitabat.

Debet autem cognosci pus non solum quando adest, sed quo tempore fit, & quo tempore factum est, quam sectione indigeat, & quod secare non oporteat, ubi videtur æger adeo debilis, ut sectionem aut unctionem ferre nequeat, ut contingit in Polemone apud Hippocratem.

Quæres II. Quomodo Medicus possit prohibere ne fiant suppurationes? &c. Id fieri in tempore, per universalia remedia, nempe evacuationes (quamvis hæc in multis inflammationibus suspectissimæ sint) Item per venæ sectiones, per topica resolventia, & discutientia collectam materiam quoad fieri poterit.

Plura qui de his scite tractata desideraverit, legat Practicos & etiam Cardanum *in commentario hujus Aphorismi*.

Aphorismus XLII.

Regio morbo laborantibus, jecur durum fieri malum.

Contentum seu Intentio.

De Prognosi Icteri.

Connexio: Cum Hippocrates in priori Aphorismo de tumorum suppuratione locutus fuisset: In hoc præsentis Aphorismo de duro tumore Hepatis in Ictero sermonem prosequitur.

Hic Aphorismus ob brevitatem & simplicem conclusionem non dividitur.

Morbus regius quinam sit, & ex quibus causis progigni soleat, ut quemnam exitum febricitantibus contingens, portendat, alibi jam à no-

à nobis, potissimum Lib. 4. Aphoris. 62. & 64. est examinatum: nunc solum pro expositione istius Aphorismi, dicimus, illum hic duntaxat ab Hippocrate considerari, qui ab inflammatione, vel simplici, vel mixta jecoris contingit; nam cum felleus humor, nequit in sua cysti colligi, propter humorem vel inflammationem jecoris, plane per universum corpus diffunditur, ut sanguinem inficiens, non sine febre evenit; hinc duplici de causa malus ille erit, tum quia infectus subinde sanguis, cunctas corporis partes inevitabiliter contaminat, & operationes ejusdem principales lædit, præsertim respirationem & pulsus, cum Icterus nunquam fiat in febribus, sine fermento sanguinis corruptivo; tum etiam quia à jecoris inflammatione, vel tumore provenit, & ejusmodi mala, in illo semper gravia sunt: Nisi etiam interpretari velimus Hippocratem de Tumore & duritie jecoris consequente, non autem antecedente, vel comitante Icterus. Siquidem morbo regio laborantibus, si jecur obdurescat, indicio erit, tantam in jecore humoris non repurgati collectionem factam fuisse, ut exinde illud remaneat obduratum; vel etiam felleum humorem in cysti recollectum, ex conditione acri transitum fecisse in acidam, malignam, obstruentem, figentem & obdurantem substantiam jecoris, ut proinde non solum ex ipsa humefactione & duritie, sed etiam ex obstructione & maligna conditione fellei humoris jecur obduruisse, ut imposterum nullus sit repurgandæ bili locus, sed universa sit per sanguinem, & habitum corporis diffundenda; quamobrem ex multis capitibus malum ægrotanti portendatur & præsertim etiam ex eo, quod in hoc casu contrariæ adsint indicationes, respectu causæ & effectus.

Plura de hoc lege supra Lib. 4. Aphoris. 62 64. & apud Cardanum *in commentario*.

Aphorismus XLIII.

Quicumque lienosi difficultate intestinorum corripuntur; iis supervenientem longam Dysenteriam (seu difficultatem intestinorum) aqua inter cutem, aut intestinorum lævitas excipit & moriuntur.

Nota:

Nota 1. Vide Aphorismum 48. huius libri, qui videtur huic presenti contrariari.

Nota 2. Similis huic presenti Aphorismo etiam habetur Lib. 7. Aphorismo 76.

Contentum seu Intentio.

De Dysenteria commodis & incommodis.

Connexio: Cum de hepatis affectione in priori Aphorismo dixisset Hippocrates: In hoc presenti Aphorismo, de affectione lienis verba facit.

Hic Aphorismus in duas partes dividitur: In *Primo* loquitur de cruenta sanguinis dejectione seu dysenteria, ad quam si non solvatur morbus, ulcerari solent intestina, & sequi longa Dysenteria: In *Secunda* dicit longam hanc Dysenteriam, sequi aquam intercutem seu hydropem, aut lenteriam seu intestinorum laxitatem, & tandem mortem.

Seriem ergo quorundam morborum, lienosis contingentium, proponit in hoc Aphorismo Hippocrates, & quidem cum prognosi lethali, ut mox est dictum.

Pro lienosis autem, non intelligit quoscunque liene laborantes, sed eos solum qui diuturna lienis ægritudine laborarunt, cum tumore, obstructione, & duritie manifesta in sinistro hypochondrio: Tales enim non tantum acido & melancholico humore abundant, sed etiam serositatibus gravantur, fere per totum corpus dispersis; siquidem & sanguis universus, in his malus est, & totus habitus corporis foedus & decolor, non nisi ab acida ejusdem humoris conditione, & à copia aquosæ superfluitatis, quæ cum non bene repurgetur, nec in renes deferatur, omnia viscera naturalia, & totum corpus inficit & conspurcat. Hinc observant Anatomici, carere Renibus animalia illa, quæ splene sunt orbata, & nos passim in Praxi experimur, spleneticos ex obstructione aut tumore, parum mingere & urinam proferre, decolorem, tenuem & veluti percolatam.

Quoties igitur lienosi, tanta excrementorum copia superabundant, & irruptione per mesenterium, & ramos mesentericos simul &

sple-

splēnicos in alvum facta dysenteriam incurrant , præsertim longiore, fore plane ut labefactatis plus justo visceribus ini ventris , propter diuturnam excretionem cruentam simul & dolorosam intestinorum, aqua intercutem seu Hydrops aut lenteria subsequatur , cum interitu infallibiliter successuro. Neque enim videri poterit mirum, quod post diuturnam dysenteriam, lævitas intestinorum aut hydrops subsequatur ; nam cum lienosi, ex nuper traditis, acidis humoribus, & serosis superfluitatibus abundant , procul dubio ista cumulationa fient in lienosis, post intestinorum difficultatem, tum quia vires sunt magis infractæ, partim ex dolore & assiduo egerendi conatu, partim quoque ex sanguinis egestionem ; tum etiam quia fermentum Stomachi digestivum, vel dilutius omnino fit, vel aciditate infensus, unde Chyloses pessimæ, adeoque & sanguis, qui ab his restaurari deberet ; ut propterea tandem Dysenteriam excipiat lenteria , si acidæ istiusmodi aquosæ superfluitates, petant ventriculum & intestina gracilia, vel hydrops , si per totum corporis dispergantur , aut in abdominis cavum deducantur : Superveniens autem alterutra ex his affectionibus, mortem inevitabiliter afferet, cum ægotantem invadat, diuturno morbo affectum & dolorosis evacuationibus male conflictatum, adeoque viribus imbecillem ; qua sane ratione fiet , ut morti brevi succumbat, effœto sanguine & spiritibus exsoluto. Cæterum quod à plerisque scribitur, subsequatur mortem, in his à labefactata jecoris sanguificatione, quoniam jecur putatur perpetuo affectum in Hydrope, nec experientiæ nec menti Hippocratis, in hoc Aphorismo cohæret: Non experientiæ, quia hydropici, citra jecoris vitium affecti plurimi referuntur , ut alibi jam demonstravimus; Neque menti Hippocratis, qui ex lienis affectione, acido-melancholica, futuram inquit dysenteriam, indeque lenteriam aut Hydropisim, nulla facta de jecoris laborantis mentione. Sed & apud Schnukium, Platerum, Bonetum & alios, plerique memorantur Hydropici, solius male affecti lienis vitio, & ex melancholico potius humore superabundanti, quam ex Dyscrasia frigida & humida jecoris , sanguinem pituitosum & aquosum progignentis; quippe ubi lien tumet & acidus ac melancholicus humor prævalet, aqua etiam, & illa malæ conditionis, perpetim quoque superabundat , ut propterea jure optimo melancholiam Hippocrates aquam appellaverit.

Dices : Hippocrates *Aphorismo* 48. *hujus Libri* ait, *Dysenteriam lienosis supervenire bonum* Ergo sibi contradicit. *R.* In *Aphorismo* 48. loquitur de Dysenteria brevi, in hoc autem de longa, ergo sibi non contradicit.

Quæres : Uter fluxus periculosior sit hepaticus an spleneticus ? *R.* Licet uterque malus sit spleneticus tamen ob succum acido-melancholicum, corrosivum, ulcera cacoethica & cancrofa gignentem peior est.

Plura scitu & curiositate digna super commentarium hujus *Aphorismi* lege apud Cardanum *in commentario*.

Aphorismus XLIV.

Quibus à stranguria (seu stillicidio urinæ) volvulus (seu Ileos) supervenerit , intra septem dies moriuntur , nisi febre superveniente copiosa urinæ fluxerit.

Contentum seu Intentio.

De Stranguria Ileosa, seu Prognosi Ilei è stranguria.

C*onnexio* : Hippocrates noster tractavit in priori *Aphorismo* & dixit de lienteria quæ longam Dysenteriam sequitur. In hoc præsentis *Aphorismo* pergit ad passionem Iliacam quæ sequitur Stranguriam.

Hic *Aphorismus* in duas partes dividitur : In *Prima* dicit morbum morbo supervenire, nempe volvulum seu, Miserere mei, stranguriæ. In *Secunda* prædicit eventum.

Proponit ergo rursus in hoc *Aphorismo*, sicut in priori Hippocrates morbum morbo supervenientem considerandum, ut exinde exitum utriusque deducat, aut ad salutem, aut ad mortem : Affert autem exemplum, supervenientis Ilei, Stranguriæ, & ait lieum Stranguriæ seu urinæ stillicidio supervenientem seu succedentem, intra septem

ptem dies lethum afferre, nisi tamen febris superveniat, & sua vi atque efficacia, urinam reddat copiosam, & affluenter prodeuntem.

Quid autem sit ileos & à qua causa fiat, abunde à nobis atque aliis in Praxi est explicatum nempe affectus intestinorum quo excrementa non dejiuntur, sed sursum tendunt & evomuntur: Et quamvis à fecum constipatione & durtie, à viscosis & tenacibus succis, à situ ejusdem intestini ilei vitiato, vel per contorsionem, vel per intrusionem, vel per inversionem, & denique ab inflammatione ejusdem, aut partium circumstantium oriri soleat, in præsentī tamen Aphorismo quia ex urinæ stillicidio provenire dicitur, putandum à confluxu acrium, & mordicantium humorum, illum excitari, ut propterea, qui humores in vesicam ferebantur, & urinæ stillicidium inferebant, in intestinum ileum delati, aut phlogosim aut inflammationem pariant, maxima autem & vicinissima communio inter vesicam & intestinum ileum intercedit, cum illi proxime vesica superincumbat, quamobrem prompte possunt, ex una in aliam partem, humores decumbere; siue autem isti extimas vesicæ partes occupent, siue etiam musculus janitorem proritent, siue etiam mediam vesicæ tunicam, fibris carnis intertextam infestent, plane poterunt illam ad micturandum sollicitare, atque adeo urinæ stillicidium inferre: Si præterea delati in intestinum ileon, illud inflamment, vel per motum peristalticum inversum ad vomendum laceffant, non sine dolore, & ventris inflatione, profecto fiet, ut mors intra spatium septem dierum sit subsequutura, cum ileus morbus sua natura sit lethalis, & multo magis si fiat ab inflammatione, propter affluxum acrium & mordentium humorum.

Statuitur autem terminus septem dierum, non quod septimo die mors omnino accidat, cum & sexto, quinto, quarto evenire possit, sed quia septimus dies, est terminus morborum peracutorum, cujus modi est ileus. Hinc non dixit Hippocrates, in septimo die, sed in septem diebus, hoc est intra spatium septem dierum pereunt. Poterunt tamen patientes ab hac calamitate evadere, si beneficio febris (quæ procul dubio affectionem hanc, aut à principio comitabitur, aut intra prædictum spatium consequetur) dissoluti humores denuo in vesicæ cavum repant, & urinam affluenter promoveant; siquidem

promota per febrem fermentatione, & attenuatis humoribus, & laxatis viis, in vesicæ cavum tendentibus, fieri poterit transpositio eorundem ab intestino ileo in vesicam; & quamvis de ductibus controversi possit, attenta nihilominus diligenti & accurata Anatome recentiorum, qui duce Bartholino detexerunt de intestinis gracilibus, & præsertim ex ileo, meatus quosdam deduci ad renes, urethres, & vesicam, plane satis fieri poterit, ejusmodi difficultati; quin & sagax natura mille sibi (ut agebat Galenus) parare solet vias, per quas se ipsam exoneret & à morbis vindicet.

Quod si urinæ stillicidium fieri dicatur, ab humoribus mucosis, crassis & acidis, qui partim tenacitate, partim acore vesicam ad micturandum stimulent, longo facilius poterit, à superveniente febre excitatus ileus desinere, & mors præcaveri, quandoquidem per febrem viscosi isti humores, facillime attenuantur & dissolvuntur, unde postmodum urinæ profluvium. Debet autem urina affluenter promoveri, quemadmodum dicitur *in textu*, ut ejusmodi copia non tantum humores in ileo collecti, sed alii quicunque per universum corpus diffusi, veluti critice, uberiori mictu penitus egerantur, siquidem crisis ut sit perfecta debet proportionem respondere quantitati humorum peccantium, qui sane in isto casu, non pauci dicendi sunt, cum ileum, febrem & inflationem cum dolore ventris excitaverint. Et quamvis Hippocrates in Aphorismo non meminerit, cujus conditionis urina futura sit, ut patientem ab ileo & à morte tueatur, credere tamen licet eam debere esse, non solum quantitate copiosam, sed & crassam, multo sale & sulphure saturam, ab abundanti sedimento scatentem, quemadmodum deducere est *ex coacis prænotionibus*.

Dices: Si iliaca passio posset fieri à vesica, plurimum repleta, intestinum comprimente, ergo maxime fieret in graviditate, quæ multo majus spatium occupat. *R.* Levius ferri in utero foetum, veluti aliquid secundum naturam, quam illud quod toto genere est contra naturam. Quin & urinæ & alvus sæpius supprimuntur in gravidis à foetu vias illas comprimente, inde oriuntur pedum tumores & œdemata.

Dices II. Galenus dicit hunc affectum seu passionem iliacam, non posse ab inflammatione provenire, ergo falso hic asseritur. *R.* Galenum intelligendum fortasse esse de inflammatione utriusque &

intestini & vesicæ, quia notissimum est, quod iliaca passio sæpissime fiat ab inflammatione intestinorum.

Dices III. Si malum iliacum proveniat ab inflammatione, uti dictum est; Ergo per febrem exasperabitur, quod est contra Aphorismum. R. Satis esse, si per copiosas urinas possit solvi malum; non est opus ut conjunctive & urinæ & febres operentur: hic enim fit mentio de ileo, qui possit per urinas solvi, si autem proveniat à flatibus, vel obstructionibus crassis (ut in contextu innuimus) per febrem potest solvi.

Plures controversias præsertim contra Galeni interpretationem legere quis poterit apud Cardanum *in Commentario.*

Aphorismus XLV.

Quæcunque ulcera annua sunt, aut longiore tempore durant, in iis os abscedere est necesse, & cicatrices cavas fieri.

Nota: *Similis Aphorismus habetur Libro 7. Aphorismo 77.*

Contentum seu Intentio.

De Prognosi ulcerum & speciatim chronicorum.

Connexio: Cum supra Aphorismo quarto hujus Libri Hippocrates sermonem fecisset, proferens *ulcera circum glabra, maligna & Aphorismo nono latas pustulas non valde pruriginosas esse*: In hoc præsentì Aphorismo rursus regreditur ad idem institutum, & de ulceribus sententiam profert, medico vel potius Chirurgo valde utilem. Hic Aphorismus ob simplicem conclusionem non dividitur.

Maxime ergo utilis est hic Aphorismus in Praxi Chirurgica, pro curandis ulceribus inveteratis: in eo enim edocet Hippocrates, quænam mala consequantur, ulcera diuturniora, simulque reddit causam, cur eadem difficillime, quandoque curentur, etsi efficacissi-

ma remedia, tum interna, tum externa, fuerint administrata; quippe saepe evenit, ut adhibitam quamcunque diligentiam eludant, nulla-que ratione ad cicatricem perducì queant, licet rubra, munda, & sine ulla inflammatione observentur, ac pus referant concoctum, minimeque fatidum, quia scilicet ossa illis subiecta livorem aut corruptionem, ab ipsamet diuturnitate, contraxerunt, unde alimentum periosio communicatum inficitur, & infectum nullatenus permittit ulcus ipsum consolidari. Admonentur proinde Chirurghi, aphoristica hac Doctrina, oportere subiectum os denudari, deinde etiam si læsum aut vitiatum & lividum observetur, detergi, abradi, desquamari, quo usque pars sana ossis detecta fuerit. Verum ad exactam totius Aphorismi intelligentiam aliqua erunt adnotanda.

Primo quidem memorari hic ab Hippocrate *ulcera annua aut etiam diuturniora*: nam recentia videntur excipi debere, nec ejusmodi incommodum subire, tum quia non statim ossa, & ossium periosia in ulceribus læduntur, nec alimentum quod illis suggeritur, statim ab initio contaminatur, tum etiam, quia non subito, à pure detento aut vitiato, ulcera sinuosa aut fistulosa fiunt, vel saltem sordida & cacoëthica, unde profundiores illius partes infici possint, tum demum quia magna etiam ex parte resistunt corruptioni & putredini ipsa ossa, quæ ideo non nisi ad longum tempus foedari & vitari solent. Itaque ulcera debent esse in longum tempus protracta, ut propterea jure optimo dixerit Hippocrates *ulcera annua*, quæ nimirum per annum & ultra perduraverint. Adjecit autem jure merito, *aut longiore tempore durantia*, quoniam non ab annua conditione, sed à temporis diuturnitate, subiecta in ulceribus ossa inficiuntur: Neque vero diuturniora solum ulcera, debent hic intelligi quæ ultra annum producta sunt, sed etiam alia quæcunque intra annum curari potuissent, & sanata non sunt, cum in aliquibus partibus ulceratis curatio faciliior esse soleat, in aliis difficilior; unde experimur partes emunctorias corporis glandulosas, articulares, aliasque similes difficilius curari, longe facilius carnosas & musculosas; quin & inter has adhuc aliqua differentia observatur; nam ulcera in musculis clunium excitata, semper sunt difficiliora, & serius ad cicatricem perducuntur; imo & ulcera musculorum temporalium periculosisima; quamobrem diuturniora appellari poterunt ulcera illa, quæ præter morem pro-

protrahuntur sine ulla evidenti causa; Dico sine ulla evidenti causa, quia fieri potest, ut ulcera in longius tempus differantur, ex mala curatione, & ex imperitia Chirurghi, forte quia non tractantur, iis medicamentorum generibus, quæ à natura ulceris & partis affectæ sunt expositulata, vel quia sordities non est deterfa, vel quia corpus est impurum & cacoëthicum, vel quia lue venerea infectum, vel quia in ulceribus occultum aliquod detinetur, quod curationi impedimento est, prout Galenus refert *Lib. Artis Medica*, & passim Chirurghi experiuntur in vulneribus, in quibus aliquod extraneum relictum est, id est, ensis mucro, stuppa, capillus, pila plumbea, ramentum ossis aliudque simile.

Quoties igitur, citra quamcunque causam manifestam ulcera, quæ cæteroquin apparenter salutaria videntur ad cicatricem non perducuntur, neque consolidationem admittunt, vitium in osse contractum significat, quod primum abradi & desquamari, deinde deterfum complanari expositulat, unde cogendi sunt Chirurghi, ut in his casibus cavum & profundum ulceris exquirant, & tum periossium, tum os subjectum mundificent, atque ab omni vitio tueantur, alias abscessus, & decubitus humorum ad partem ulceratam factus, non solum curationi impedimento erit, verum etiam talem ac tantam læsionem in subjecto osse inferet, ut de totius ossis & totius membri enormi læsione timendum sit, quare jure merito admonet in hoc Aphorismo Hippocrates, ex diuturnitate ulceris abscessum in osse communicari, & cicatricem cavam fieri ex causis superius adductis.

Plura scitu digna, ex Chirurgiæ Praxi deduci poterunt: Controversias vero plures tradit Cardanus *in Commentario*.

Aphorismus XLVI.

Qui gibbi ex asthmate aut tussi sunt, ante pubertatem moriuntur.

Contentum seu Intentio.

De Prognosi Gibbositatis.

Connexio: Cum tumores & ulcera, magnam inter se, habeant affi-

affinitatem; ideo jure merito hunc præsentem Aphorismum priori adnectit Hippocrates ; quia gibbi etiam inter tubera numerantur. Hic Aphorismus ob brevitatem non dividitur.

Quamvis gibbi plerique sint, & ex multis causis tales fieri possint, non tamen omnes hic Hippocrates considerat, sed eos solum, qui gibbi fiunt, à dorsi & pectoris structura vitiata, ita ut pulmo & aliæ partes spiritales intra pectoris cavum conclusæ, & in angustum positæ, in respiratione molestantur: Etenim non alia de causa videntur gibbi hic ab Hippocrate memorati, vitæ periculum subire, nisi quia summopere in respiratione offenduntur, quæ ad vitam omnino necessaria est.

Sed non solum gibbos hic considerat Hippocrates, cum usu respirationis læso sed etiam ante pubertatis tempora; siquidem in ea ætate pectus, nimis angustum esse solet, & cum in situ, vacuitate ac figura sit depravatum, nequit procedente ætate, juxta exigentiam corporis amplificari; quo fit ut viscera spiritalia, in angusto satis loco conclusa, neque debitam magnitudinem possint adipisci, neque pro respirationis usu, commode expandi, unde venæ, arteriæ, vasa lymphatica, itemque pulmonis tubuli, cordis ventriculi, pericardium, admodum exilia & contracta putanda sunt, ut non satis commode sanguinis & cordis motum ad vitæ indigentiam adjuvare queant, proindeque necesse sit, vitam procedente ætate, diutius sustineri non posse.

Addidit præterea Hippocrates ex asthmate aut tussi gibbos, quoniam tum gibbositas non ex sola ossium introversione aut extra versione, sed ex pulmonis, & cæterarum partium spiritalium vitio provenit; nam asthma & tussis morbi sunt pectoris, & pulmonis. Verum tamen sicuti ex asthmate & tussi gibbositas oriri potest, ita ex gibbositate è converso asthma & tussis non raro fit, ea tamen differentia, quod in priori casu gibbositas illa sit maxime periculosa, & plerumque lethalis; in posteriori vero casu, sit quidem molesta, sed potius diutius prolongari; sicut experimur in senibus. At vero qui gibbi fiunt ex asthmate aut tussi, propter violentam & continuam contractionem juguli, ossis sterni, musculorum intercostalium, colli & asperæ arteriæ fieri nequit, quin simul una partes internæ spiritales, & externæ pectoris non graviter coafficiantur, præsertim in ætate puerili

puerili in qua ossa mollia sunt, neque debitam expansionem, ac convenientem structuram sunt adepti, unde organa universa respiratori destinata, inidoneæ fiunt, vitæ tuitioni.

Atque hinc concludit Hippocrates, eos ante pubertatem interire, cum per eam ætatem exigat, naturæ respirationem ampliorem, & vasa circulationi sanguinis dicata, latiora esse debeant; cumque per gibbositatem, & partium spiritalium contractionem illa insufficiencia sint, merito proinde dicitur ante pubertatem illos interire. Sed & posset etiam Aphorismus exponi de gibbis illis ex asthmate, aut tussi factis ante pubertatem, ut proinde sensus fiat, non quod ante pubertatem moriantur, sed quod gibbi ex asthmate & tussi, ante pubertatem facti, in longum tempus vivere non possint. Quocunque autem modo Aphorismus legatur, semper exitus in his lethalis portenditur, quia cum gibbositate respiratio, & motus cordis ac sanguinis plurimum impeditur ac interrumpitur, unde vita diu foveri non potest; hinc etiam gibbosi à nativitate diu durare non solent, raro enim sexagesimum annum pertranseunt ex dictis rationibus.

Advertendum autem quod gibbositas vel est *angulata*, cum una vertebra ex altera recedit, ita ut angulus ex ambabus fiat; vel *arcuata*, cum multæ vertebræ simul incurvantur: rursus unaquæque vel intus est, vel extra, vel ad latera; & iterum vel pertinet ad collum & cervicem, vel ad thoracem, vel lumbos; vel oritur à nativitate vel ex morbo, ut jam dictum.

Animadvertendum itidem quosdam in textu addere *statim moriuntur*, quod verbum *statim* vel significat quod moriantur simul, ac fit gibbositas, vel quod repente moriantur, licet paulo post: quod utrumque contingit; nam suffocantur statim, aut paulo post repente moriuntur.

Dices: Gibbositas potius videtur dilatare thoracem, puta illa quæ secundum curvitatē fit. R. Quod licet ex una parte dilatetur, ex aliis tamen angustior fit, unde Hippocrates Lib. de Articulis scripsit: quibus gibba sit spina, dum pueri sunt, priusquam corpus ad augmentum plenum perductum fuerit, his corpus juxta spinam adaugeri non solet, sed crura quidem ac manus perficiuntur, illæ vero partes defectuosæ sunt: & quibus supra septum transversum gibbositas fit, his & costæ in amplitudinem augeri non solent, sed in anteriorem

Nnn nnn

partem

partem & pectus acutum fit, sed non latum, & ipsi difficulter spirant & stridulam faucium asperitatem habent; hæc causa est, cur gibbi diu vivere nequeant: Hæc Hippocrates.

Instabis: Duplex sæpe est fornicata seu dilatata gibbositas, & dorsi & pectoris simul, Ergo utrinque magis dilatatur thorax, Ergo nulla responsio. *ꝛ.* Licet in reciproca seu utrinque facta gibbositate compressionis minor sit necessitas, tamen major est tensionis, adeoque etiam difficilior respiratio, ob motum pulmonum impeditum, quando ligamenta, quibus pulmones & pectori & dorso ligantur, fortiter tenduntur.

Plura notatu digna de gibbositate lege apud Cardanum in Commentario.

Aphorismus XLVII.

Quibus venæsectio, aut purgatio prodest, hic vere secunda vena, aut purgatio imperanda.

Nota: Similis Aphorismus habetur Lib. 7. Aphor. 53.

Contentum seu Intentio.

De Curationibus universalibus.

C*onnexio:* Cum in antecedenti Aphorismo Hippocrates de gibbositate scripsisset, quæ ad tumorem ipsius spinæ & morbos thoracis sequitur; in hoc præsentī Aphorismo, de commodo tempore agit auxiliorum medicorum, quibus etiam gibbositas illa præcaveri, aut commodius curari possit.

Hic Aphorismus brevis est, & breviter & simpliciter concludit unde non dividitur.

Multoties corpora morbis obnoxia, ad sui præservationem indigent evacuationibus, tum per venæ sectionem, tum per purgantis medicamenti assumptionem; sed quia non quocunque tempore, ejusmodi remediorum administratio opportuna est, docet pro-

propterea in hoc Aphorismo Hippocrates, quodnam tempus sit conveniens & opportunum, adeoque magis aptum purgationibus, aut venæ sectionibus, ut illæ ex voto succedant & proficiant.

At vero non de quibuscunque corporibus, quomodolibet affectis, intelligendus est hic Aphorismus, sed de iis duntaxat, quæ præservatione indigent, ne in morbos labantur, & in quibus humores mali adeo super abundant, ut nullo alio leviori præsidio possint emendari, sed omnino evacuatione egeant; quamobrem non immerito Hippocrates in Aphorismo scripsit: *Quibus venæ-sectio aut purgatio prodest; vel ut alii vertunt; quos opus est purgare, vel sanguinis detractioe evacuare*; isti autem non nisi cacochymi vel plethorici esse solent, & ut cacochymi purgatione, ut plethorici, sanguinis missione indigere videantur.

Corpora namque actu ægrotantia, sicut præsentibus, non imminetibus morbis afficiuntur, ita curatione, non præservatione opus habent: perperam enim quis ageret, si morbo jamjam exigente, purgatorium medicamentum, in vernale tempus differre vellet, cum tamen interea, crescente morbo, facile æger ante hoc tempus perire posset. Itaque Aphorismus intelligendus est, in corporibus præservandis, non autem curandis, quippe corpora præservanda, licet actuali morbo, minime corripiantur, sunt tamen adeo male affecta, causis ægrotare facientibus, ut ne progressu temporis, istæ plurimum adauctæ, vel vitiatæ morbos excitent, peropportune antequam morbos pariant, ab iisdem purganda sint, & quidem tempore convenienti, quale vernale est, priusquam per æstivum calorem, in motum fermentationem præternaturalem adigantur.

Quænam autem corpora ista sint, quæ verno tempore præservari debent, ne postmodum per æstatem in morbos labantur, inquisitione dignum: & recte exponuntur à Galeno, & cæteris interpretibus, quæ per æstatem ægrotare consueverunt; puta, si quis diebus canicularibus solitus sit alias corripì tertiana febre, erysipellate, diarrhæa, & aliis similibus morbis, quia propter super abundantiam excrementorum acrium seu biliosorum, prædictos morbos æstivo tempore incurrere consuevit, profecto antequam æstas accesserit; purgante medicamento, ejusmodi ex-

crementa biliosa, acria & depravata, educenda erunt, ne scilicet quantitate adaucta, qualitate corrupta, & in corpore diutius detenta, in subsequente æstate febres & alios morbos acutos, cum manifesto vitæ periculo excitent.

Quod dictum est, de vere respectu æstatis, pari ratione ampliari potest ad autumnum respectu hyemis, quoties hyemali tempore, consueverint morbi pluries recurrere, & corpora divexare; unde si fortasse quis per hyemale tempus, solitus sit laborare morbis pituitosis aut lymphaticis, poterit præcedenti tempore autumnali, opportune repurgari, à cumulis ejusmodi excrementosis superfluitatibus, antequam istæ per hyemen adauctæ, & depravatæ, solitos illos morbos inducant.

Disjunctim præterea notavit Hippocrates *medicationem* aut *vena sectionem*; nam non in omnibus, indifferenter utraque adhibenda est, sed prout habitudo corporis, morbi conditio, & apparatus humorum exoptulaverit; quare corpora plethorica, carnosæ, sanguinea, & quæ aliquam sanguinis evacuationem suppressam patiuntur, à qua alias juvamentum susceperunt, *vena sectione* tractanda erunt; quæ vero cacochyma sunt, & excrementis abundant, vel in morbos delabi consueverunt, humorales dictos, medicationibus seu purgationibus erunt præservanda.

Neque solum ista diversimode peragenda erunt, pro corporum varietate & humorum conditione, sed etiam pro varietate ætatum, temperierum, regionum, consuetudinum; cum quædam corpora, per ejusmodi circumstantiarum diversitatem, hoc vel illo remediorum genere, in melius procedere soleant.

Denique imminentes morbi, debent esse tales, ut præter timorem certæ repetitionis in æstate, aut in hyeme, gravitatem, diuturnitatem, aut vitæ periculum rationabiliter minentur, quamobrem sana ratione, superius dictum est, nullo alio leviori præsidio posse emendari: Nam si fortasse sola diæta, & exacta victus ratione, aut certo alimentorum genere, & recto usu sex rerum non naturalium, præcaveri possent, nequaquam confugiendum erit ad *venæ sectionem* aut purgationem. Ita quoque si possint eadem præservari medicamentis corrigentibus, aut etiam per alios ductus corporis deducantibus humores, puta, per sudorem, aut vias urinæ; similiter si per vomiti-

vomitum, ut in corporibus Pichrocolis dictis, & in quibus facilis est vomitio, aut sponte natura humores per superiora feruntur, ut ab eodem Hippocrate *Lib. 4.* in Aphorismis plurimis dicitur. Hinc excipiuntur morbi illi, qui immateriales dicuntur, hoc est ab humoribus non pendentibus, aut quæ à solo viscerum languore originem ducunt, adeoque sola correctione, non autem evacuatione curantur.

Quoniam vero in hoc *Commentario* Galenus consulit, Podagra, & cæteris articulariis doloribus affectis purgationibus quoque per eadem tempora præcaveri posse, cum dicat; *Sed & Podagram & morbum articulare adhuc incipientem, & nondum poros circa articulos facientem, ex tali evacuatione, multis jam annis fieri prohibuimus.* Qui hac ratione, se tutos ab illa credunt, perbelle deridet Podagra apud Lucianum in *sua Trago podagra*, jactabunda sic illos eludens;

Quis est hominum, cui non ego, insuperabilis.

Regina morborum Podagra nota sim?

Quam nulla Thura, nulla fumigatio,

Nec fusus apud aras cruor, aut donaria

Suspensa Templis divitum placabilem

Reddunt: Nec ipso vincere summus omnium

Pœan Deorum Medicus, arte sua potest,

Apollinisve filius Æsculapius &c.

Et infra postquam retulerit, varia remediorum genera quibus eandem retundere sibi mortales persuadent, & plurimas, ut se ipsam vincant, industrias adhibent, tandem concludit.

Sed omnibus illis nil, nisi plorare impero:

Et sic facientibus vel irritantibus,

Occurrere soleo magis iracundior;

Qui vero contra me nihil ejus cogitant,

Illis facilem & tractabilem me præbeo.

Verum ut ut ros se habeat, firmo tamen semper stabit talo, in corpore caco chymo & Plethorico, vel ubi caco chymia aut Plethora, tanquam causæ universales adsunt, vix non in omni morbo ab iisdem dependente alvi deductio, aut sanguinis detractio prodesse solet, nec est remedium in mundo, quod juvando sit potentius, in nocendo

do vero innocentius venæ sectione , quod ipsa Praxis quotidiana contestatur.

Signa venæ sectionem indicantia proponit Poëta.

Qui vivunt hilares, cantando, bibendo, jocando,
Et ducunt lætos , sorte favente dies.

Candida si tacitas, ignorant pectora curas:

Si nox in ronchis , luxque sedendo perit ;

Quos duplices cænæ , quos prandia longa fatigant

Crapula queis cerebrum , quotidiana ferit.

Qui retro fornacem sua viscera farcit , edendo:

Quique saginatis , & similis suis.

Convenit ambobus vasorum sectio : venas

Huic lancetta ferit : Sus lanione perit.

De signis autem medice indicantibus & prohibentibus purgationem & venæ sectionem consulantur institutiones Medicæ.

Reliquas controversias super hoc Aphorismo , legere quis poterit apud Cardanum *in commentario*.

Aphorismus XLVIII.

Lienosis , difficultas intestinorum superveniens bono est.

Nota : Hunc Aphorismum , quantumvis apparenter contrarium Aphorismo 43. hujus Libri , eundem tamen ibidem attigimus & pro parte explanavimus ; Sed hoc non obstante , ejusdemet explanationi quemadmodum sequitur incumbendum adhuc intendimus ; ibi enim dictum est de commodis & incommodis Dysenteria, in hoc vero solum commoda ejusdem explanabimus.

Contentum seu Intentio.

De Dysenteria commodis.

Connexio : Cum ergo in mox dicto Aphorismo 43. hujus Libri Dysenteriam Hippocrates damnasset in lienosis: In hoc præsen-

te Aphorismo eandem extollit : Quin imo cum in præcedente Aphorismo, de venæ sectione & purgatione in vere faciendis dixisset ; Nunc in præsentī lienosos asserit salvari fluxu alvi, quasi diceret, in vere potissimum.

Lienosi hic intelliguntur, qui lienis vitio laborant, sed cum tumore citra inflammationem, aut febrem, quia scilicet crassa & tartarea excrementa ibidem collecta sinistrum hypochondrium tumefaciunt, lienis ductus obstruunt, & totum corpus serosis, ac vitiosis humoribus acidis & melancholicis inficiunt : Cumque difficulter humores isti possint evacuari, & lien ab eorundem crassitie ac densitate ægre admodum liberetur, propterea fit, ut non tam facile, medicamentorum beneficio oppletus, pressusque ille inaniatur.

Solet tamen sponte naturæ non raro, moles ejus adaucto diminui, & per ductus proprios, in mesenterium & intestina exonerari, transfusis nimirum ejusmodi humoribus in alvum, unde Dysenteria, hic ab Hippocrate notata, non quidem in ducta à vitio succorum Pancreatici & biliosi, neque ab erosione venarum aut arteriarum intestinalium, sed per solam metastasim decumbentis humoris, è liene in intestina crassa, cujus causa frequens, sed non adeo dolorosa dejectio exorietur, ut in vera Dysenteria intestinali : id quod non ita pridem contigit observari in nobili quodam viro, qui per integram hebdomadam atrum & crassum humorem, à muræ sanguinis non dissimilem, non tamen, sine vitæ periculo abundanter egeffit. Verum tamen bonum erit indicium, si exinde lien ab ejusmodi evacuatione detumescat, & universi illi humores, ibidem cumulati excernantur, viribus simul una constantibus.

Accedit quod lienosi plerumque serosis humoribus abundant, qui ab acido ibidem hærente, sinistrum illud hypochondrium tumefacere solent ; si deinde sponte naturæ serosa illa colluvies in alvum deferatur, lien ipse detumescet, & ductus ejusdem obstructi reserabuntur, totumque corpus exinde male affectum exonerabitur, atque in meliorem statum abibit.

Est tamen verum quod Dysenteria, hic ab Hippocrate memorata, intelligenda erit sine intestinorum ulcere aut inflammatione, & fortasse etiam sine febre, quam plerique sub nomine Diarrhœæ potius quam Dysenterix solent appellare.

Etc-

Etenim si Dysenteria sit cum ulcere intestinorum, vel cum eorundem inflammatione, & febris conjuncta, plane ex his pertimescenda foret, adhuc si è liene tumefacto penderet, adeoque bonum non foret, cum Dysenteria quæcunque semper mala sit, tum ratione partis affectæ, tum ratione ulceris ibidem contracti, tum denique ratione symptomatum adjunctorum, & præsertim febris acutæ.

Hinc modo edocemur sinendam esse ejusmodi evacuationem, in lienosis, si subinde lien detumeat, cum ægri levamine, & virium constantia: quin si fortasse natura tarda sit, & ægre admodum hanc transpositionem tentet, aut illam non perficiat, poterit sagax Medicus eandem explere. Pari ratione admonemur, lienosos per easdem vias alvi, fore evacuandos medicamentis purgantibus, sed attenuantibus simul, & incidentibus, cum plerumque humores ibidem hærentes crassi & tartarei sint, nec facile possint per alios ductus corporis amandari, nisi solum per intestina.

Quod si post crassorum succorum evacuationem serosi alii supersint, qui forsitan nequiverint simul una nec tam brevi tempore evacuari, diureticis plane medicamentis, per vias urinarias deduci poterunt, cum inter lienem & renes magnus consensus ineat, ut ex Anatomie patet: Quamquam, si crassi & tenaces succi fuerint educti, verisimile sit simul una quoque tenues & serosos, per eosdem ductus commodè potuisse evacuari.

Animadvertendum, quod non solum lienosis sed & hepaticis superveniens dicta Dysenteria morbum solvere potest: Exemplum habet Hippocrates famulæ hepaticæ, cui per septem annos menses defecerunt, & Dysenteria facta per septem dies, inde Diarrhæica sanata est, & menses illi effluerunt: Exemplum sane mirabile cum ipse Hippocrates *Lib. de morb. mulierum* ultra sex menses, menstruorum retentionem, insanabilem scripserit, cum præternaturam est.

Plura legi & repeti possunt ex *Aphorismo 43. hujus libri* & apud Cardanum *in Commentario*.

Aphorismus XLIX.

Qui Podagrici morbi sunt, sedata inflammatione, intra dies quadraginta conquiescunt.

Contentum seu Intentio.

De Termino Podagricorum.

Connexio: Cum Hippocrates Aphorismo quadragesimo septimo, de præservatione, quæ in morbis fit, per venæ sectionem aut purgationem dixisset: In hoc præsentī Aphorismo loquitur de Podagra, quæ inter alios morbos, ut ibidem dictum, per ista remedia in vere præcaveri solent.

Terminum Podagricarum affectionum hic memorat Hippocrates, dierum scilicet quadraginta, cum sponte sua & citra quamcunque causam externam aut errorem; tum ab ægrotante, tum à medico commissum, producuntur: Neque solum Podagræ sed cujusvis alterius articularis morbi terminum implicite in hoc contineri existimandum, siquidem par ratio in cunctis est, cum non à partibus affectis, manu scilicet vel pede, sed ab humoribus ibidem depositis, & à loco articulari, terminus quadraginta dierum constituatur: Qua profecto ratione experimur rheumatismum, & rheumaticas quascunque affectiones, in appendicibus musculorum habitas, simili dierum numero terminari solere.

Sed quamquam quadraginta dies hic ab Hippocrate, pro termino desitionis podagricorum affectuum referantur, non tamen quis existimabit, & ante hoc tempus, & multo post finiri non posse; Siquidem juxta variam humorum decumbentium conditionem, ac copiam majorem vel minorem, & citius & tardius poterunt morbi isti desinere; unde si humores pauci sint & tenues, citius, tardius vero, si multi & tenaces fuerint, terminabuntur; Sic in Tophacea seu nodosa Podagra, plerique sunt, qui ad menses, & ultra laborant, sine ulla spe brevioris desitionis. Quamobrem non sine ratione adjecit Hippocrates

O o o o o

tes

tes in textu; *Sedata inflammatione*, nam cum inflammatio eas partes occupat, terminus desitionis speratur quadragesima dies, humores enim depositi in articulos, cum inflammatione, non nisi tenues & calorem præferentes esse solent: Inflammatio autem in his conspicua fit, quia non solum internodia & partes interiores articulorum, sed etiam appendices musculorum, tendinum & ligamentorum, imo & cutis ipsa inflammari consuevit. Contra vero cum humores sunt crassi, crudi, phlegmatici, citra quamcunque inflammationem articulos afficiunt, imo quandoque referunt conditionem tumoris œtymatosi. Tempus etiam vel æstivum, vel hyemale, ad durationem breviorum vel longiorum valde conferet, promota nimirum vel retardata per poros cutis transpiratione.

Præterea neque dixit Hippocrates desituram esse podagram, in quadraginta diebus, sed inflammationem fortasse cum Podagra copulatam; unde tunc ista finienda speratur, cum inflammatio desierit: Primo enim terminari debet inflammatio, in articulis inducta, postea vero morbus podagricus aut articularis. At qua de causa, tantum tempus exigatur, ut inflammatio desinat, bene explicat Galenus in *Commentario*; quia humores illi debent sensim diffiliari & per poros cutis dissolvi, quod sane nequit peragi, intra breve tempus, sed omnino necesse est, spatium quadraginta dierum, qui terminus est acutorum morborum, quare inflammatio, quæ morbus acutus est, ejusmodi termino finietur; Podagra vero quæ inter morbos chronicos refertur, etiam ultra hoc tempus prorogari poterit, & ut dictum, pro varietate adhuc humoris ibidem collecti, vel paucioris, vel copiosioris, vel crassioris, vel tenuioris. Accedit quod ex languore articulorum, & ex conditione Phlegmatis ibidem congesti, acidum referentis, multoties humores isti vertuntur in Tophos, unde tophacea & nodosa Podagra, quæ sane longissima sit, & sæpius immedicabilis de qua Ovidius:

Solvere nodosam nescit Medicina Podagram.

Quin imo articuli ipsi ita convelluntur & distorquentur, ut luxationem subeant, nulla ratione reducibilem, ut docet Praxis.

Cæterum licet terminus hic statutus in rheumaticis affectibus, passim talis observetur, sicut & non raro in repetentibus podagricis affli.

afflictionibus, non tamen de universali, totoque durationis tempore Podagræ, intelligendus est, quippe quæ cum longissima sit, cum podagricis ipsis consenescit, & sæpissime commoritur:

Plura qui de Podagra scire anhelat, consulat Practicos & Cardanum *in commentario*.

Aphorismus L.

Quibus divisum est (seu præcisum) cerebrum; his febrem & biliosum vomitum supervenire est necesse.

Contentum seu Intentio.

De Prognosi vulnerum capitis.

Connexio: In præcedenti Aphorismo Hippocrates docuit, & eventum & tempus eventus dignoscere in Podagra: In hoc præsentis Aphorismo ponit dignotionem loci affecti id est ipsius cerebri.

Hic Aphorismus ob simplicem conclusionem non dividitur.

Est autem hic Aphorismus prognosticus, quo nos edocet Hippocrates quid præfagiendum sit, à præciso vel diviso aut læso cerebro, simulque etiam erit diagnosticus, cum ex symptomatibus hoc loco memoratis, ducamur in cognitionem cerebri præcisi: ubi autem Leonicens vertit *cerebrum præcisum*, Fuchsius clariori significatione exponit *vulneratum*, quin imo & nos, quomodocunque *contusum, punctum, concussum, aliterque exagitatum*, pari ratione interpretari poterimus; quare ad partem Chirurgicam specialius pertinere videtur monitum hoc præsentis Aphorismo memoratum.

Et quidem cum cerebrum est vulneratum aliterve affectum, non solum ratione vulneris febris accidit, sed specialius à sanguine è vulnere prodeunte & in pus converso; quoniam sanguis alicubi restagnans, statim grumescit, & in pus vertitur, unde postmodum febris, quæ & acuta & continua erit, tum ratione partis affectæ, tum

ratione conclusi ibidem puris, vel alius corrupti liquoris, qui non tantum cerebrum ejusque meninges, sed & per transeuntem sanguinem, statim inficit, atque in indebitam fermentationem adigit; Cum fieri non possit, quin vulnerato cerebro meninges etiam scissæ non sint, & proinde præter fluens per eas sanguis depravetur, & inflammatio ibidem excitetur; modo inflammationes in meningibus cerebri statim febrem inferunt, continuam simul & acutam. Est tamen verum, quod non semper febris hæc statim, & inter initia vulneris contingit, cum aliquando sit observatum, tertia aut quarta die illam supervenire, quia ut dictum, non tam ratione vulneris, quam à sanguine extravasato, corrupto aut in pus converso febris oritur. Atqui pus non statim fit, sed plerumque tertia aut quarta die, ut propterea rationabiliter dixerit Hippocrates, *febrem supervenire, non comitari*. Hinc si fortasse in vulneribus capitis, febris post tertium aut quartum diem non appareat, probabiliter conjicere poterimus cerebrum, ejusque meninges, haud quamquam fuisse vulneratas.

Neque solum febris supervenit cerebri vulneribus, sed etiam vomitus, siquidem vulnerato cerebro, meninges etiam, & principium nervorum afficiuntur, unde postmodum stomachum, ventriculum, septum transversum, & cæteras partes nerveas, simul una colladi necesse est, imo etiam contrahi & convelli, adeoque vomitum subsequi, qui peculiaris actio ventriculi est, quin imo non raro accidit, ut statim ab affecto & vulnerato cerebro, ille succedat, ut & singultus, & Diaphragmatis coarctatio, ob maximum consensum, quem inter sese partes istæ cum cerebro ineunt. Neque solum si cerebrum vulneretur, vomitus accidit, sed etiam si scindantur aut lacerentur meninges, quæ cum nervosissimæ sint, imo nervos & nervorum liquorem convestiant, semper ac illæ afficiuntur, partes cum ipsis consentientes, statim mutuo fibrarum commercio in consensum trahuntur, quemadmodum specialiter est Stomachus, multis refertus nervis è vago pari provenientibus.

Quamquam autem vomitus sæpissime, paulo post inflictum vulnus subsequatur, solet nihilominus etiam tertio aut quarto die supervenire, præsertim à sanguine putrefacto, à sanie & à pure jam genito, quod cum non statim fiat, neque subito vomitum afferet;

post

postquam vero sanguis effusus in pus versus fuerit, atque cerebri medullium, ac principium nervorum pertigerit, vomitum inducet. Atque hinc deducunt peritiores practici, mortem proxime esse affuturam, ut propterea, si contingat vomitus in quarta, æger sit periturus in septima; & si accidat in septima, periclitabitur in undecima, & sic deinceps; eo quod vulnera capitis & cerebri, periculum semper vitæ minentur, quosque non fuerint ex integro sanata; sed & aliquando etiam visa apparenter curata, mortem attulisse, ichore ex vulnerata parte in cerebri medullium resudante; quamobrem, non sine ratione plerique ad centesimum quoque diem periculum vitæ protendi existimarunt, ut apud Chirurgos legere est: Et ipsemet casum hunc in Juvene Romæ in Nosocomio consolationis regente observavi, qui ex gravissimo cerebri & meningum penetrante læsione, quadragesimum diem superavit, & tandem apoplexia interiit, ubi pariter doctus sum, quo modo apoplexia fiat, cum cranium ejus sat late trepanisatum, ocularem admisit inspectionem.

Sed unde accidat vomitus biliosus, & utrum à solo bilis vomitu, periclitentur ægri, quæri non incongruenter hoc loco potest. Et quidem bilis vomitus in his accidit, vel quia ob nervorum convolutionem contrahitur ventriculus, & cum ventriculo pylorus, unde intestinum duodenum, in quod per cholidochum ductum portio fellea exoneratur, etiam motu peristaltico inverso sursum retrahitur, & in ventriculi cavum biliosum istum humorem effundit, qui deinde evomitur; vel quia portiones cibales, in ventriculo relictæ, nec bene digestæ, ac propterea in alium humorem degeneratæ, per febrem ex vulnere cerebri supervenientem commutantur in excrementa amaricantia, quæ conditionem biliosam referunt, unde vomitu superveniente postmodum evacuantur; id autem sæpe sæpius experimur in Praxi, quotiescunque ventriculus male affectus, non bene concoquit, nec dissolvit alimenta, & ex inconvenienti mixtura, succorum digestionem destinatorum emergunt superfluitates amaricantes, bilis naturam referentes.

Verum tamen etiam si vomitus biliosus non sit, nec amarorem referat, adhuc nihilominus ejusdem pravitatis existimandus erit, quotiescunque ex vulnerato cerebro accidit: malum enim exinde

significatur, non quod biliosus humor evomatur, sed quod ex vulnerato cerebro vomitus accidat; parum enim referet, an vomitus biliosus an acidus vel pituitosus, aut cibarius sit; nam semper malus erit, veluti designans ex vulnere cerebri meditullium, & nervorum principium, ab effuso sanguine, & à supergenito pure antichore, in eam partem decumbente, fuisse affectum: modo gravis ista affectio à pure vel alio humore deciduo, in principaliorem cerebri partem periculosa semper est.

Denique quod à supervenientibus duobus hisce symptomatibus, febre nempe & bilis vomitu, ægri sint proxime periclitaturi, licet hic ab Hippocrate non sit memoratum, expresse tamen deducitur ex *Libro primo de morbis*, ubi hic Aphorismus in hunc modum scribitur: *Si cerebrum sauciatum fuerit, febrem necesse est supervenire, & bilis vomitum, & aliquam corporis partem siderari atque perire*: Et in *Coacis Prænotionibus Sect. 3* id ipsum fere repetitur: *quibus cerebrum vulneratur, febris plerumque ac bilis vomitus accidit, & corporis sideratio, atque tales perniciose habent*: quin etiam *2. Lib. de morbis* addit, *cerebro corrupto sanguinis vomitum sæpe subsequi*. Cæterum quod sanguis aliquando etiam in his exeat per nares & aures adnotarunt Celsus *Lib. 5. Cap. 26.* & Paulus *Lib. 6. Cap. 88.* licet non semper cum cerebri vulnere jungatur, sed potius in ictu, confusione, casu, in quibus aut sanguis aut pus ex sanguine genitum, exteriores cerebri partes occupat, & per suos ductus, facilius educi potest, quemadmodum in Praxi sæpe est observatum.

Signa vulnerati cerebri refert Hippocrates in mox prænotatis locis; nempe linguæ balbuties, subitus in terram casus, vertigo, marmariges seu fulgores & coruscationes oculis obversantes sanguis per nares, os, aures, oculos effusus, veternus seu lethargus, vocis privatio, resolutio corporis, mentis læsio, pedum torpor, convulsio, vomitus, febris & alia hujuscemodi.

Controversiæ plures si quæ desiderentur, legantur apud Cardanum *in Commentario*.

Aphorismus LI.

Qui valentes (seu sani) capitis repente doloribus corripuntur, & protinus muti fiunt, & stertunt, intra septem dies intereunt, nisi febris eos prehenderit.

Nota: Hic Aphorismus late explanatus est Lib. 5. Aphorismo 5.

Contentum seu Intentio.

De Prognosi Apoplexiæ.

Connexio: In Aphorismo antecedenti Hippocrates attulit prognosticum signum, divisi & sauciati capitis, cerebri & meningum: In hoc presenti Aphorismo pariter proponit divus Senex prognosticon funesti termini gravis ejusdem cerebri, soporosi affectus; atque ita, non tantum ratione loci affecti, verum etiam ipsius morbi, duo hi Aphorismi connectuntur.

Hic Aphorismus ergo in duas partes dividitur: In *Prima* ponitur terminus affectus soporosi: In *Secunda* docetur quo modo ejus causa dissolvatur, & exitum evitetur per supervenientem febrem.

Ad prognosim ergo quoque pertinet hic Aphorismus, in quo Hippocrates edocet bene valentes, dolore capitis repente correptos, si statim obmutescant, & stertant, intra septem dies perire, nisi febris eos apprehenderit. Et quidem sanos, beneque valentes hic considerat Hippocrates, non autem ægros aut valetudinarios, in quibus hæc omnia evenire possunt, sed alia profecto de causa, quæ dolorem capitis afferat, & mox etiam Aphoniam seu obmutescentiam cum stertore; siquidem potentior plane causa existimanda est, quæ ejusmodi affectum excitet in sanis, quam quæ in valetudinariis. Itaque sani beneque valentes, si dolore capitis repente capiantur, vi & violentia causæ externæ, aut virulentia & malignitate causæ internæ, taliter affecti intelligendi sunt: & quidem vi ac violentia causæ externæ,

næ, puta ebrietate ex vino meraciori, aut usu alicujus medicamenti narcotici ac stupefactivi, quemadmodum in expositione *Libri quinti, Aphorismi quinti* late adnotavimus, & etiam repetitur infra Lib. 7. Aphor. 58.

Virulentia vero causæ internæ, videlicet humoris maligni, acidi, figentis & coagulantis, humores per cerebri substantiam diffusos, prout ipse Hippocrates 2. *de morbis*, alia Phrasi illum retulit, inquiens: *repente dolor occupat caput, & vox intercipitur, & sui impotens æger fit; hic in septem diebus moritur, nisi febris invaserit: patitur autem hæc cum atra bilis in capite commota, fluxerit in partes, ubi venæ plurimæ sunt, in collum inquam, & pectus, postridie autem apoplecticus fit, atque impotens sanguine nimium perfrigerato: & 3 de morbis subdit: cum à capite dolor acutus, statim vocem intercipit, tum alias, tum si ex ebrietate hoc contingat: qui sic affectus est, septima die moritur; minus tamen moriuntur, qui ex ebrietate tali quid perpessi sunt, & voce privati permanserunt; nam si eadem die, aut postera aut tertia vocem edant, sani evadunt; faciunt autem hoc aliqui ex ebrietate, & neutri moriuntur.*

Quoties igitur ex præcedenti dolore capitis repente suborto, Aphonia accidit cum stertore, non tantum cerebrum sed etiam nervi vocales in asperam arteriam & in vasa spiritalia tendentes afficiuntur, & siue morbus de genere Apoplexiæ fiat, siue ad speciem cari referatur, ut vult Cardanus, siue etiam convulsionis naturam sapiat, procul dubio ex quibusvis, horum morborum, æger perire poterit. Quomodo autem id contingat, describitur ab eodem Hippocrate 2. *de morbis*, his verbis: *Sanum repente dolor, circa caput invadit, statimque vox intercipitur, stertit & os hiat; si quis ipsum vocet, aut moveat, solum suspirat, nihil autem intelligit, & multum mingit, & se mingere non animadvertit.* Quare sensu motuque privatum illum fieri clarissime designatur, ex his, adeoque ægrum proxime accedere, ad Apoplexiam, aut ad aliam cerebri affectionem, huic valde affinem præsertim, quia repente illum corripit, hoc Aphorismo memoratur & statim mutum fieri; quæ sane fieri nequeunt, sine ingenti cerebri affectione, & cum partis animalis & nervorum læsione. Stertor etiam id ipsum denotat; siquidem hic fit impedita respiratione & nequeuntibus musculis thoracis illum attollere, unde aër interceptus,

in ductibus asperæ arteriæ, stertorem parit, prout experimur in his, qui suffocationis periculum incurrunt.

Sicut autem Aphonia diutius perduratura est, ita quoque & stertor, qui plerumque conditionem ejusdem sequitur, ut propterea Galenus 2. *Aphor. commentario* 42. quatuor Apoplexiæ species constituerit, pro quadruplici respirationis læsione, majori vel minori, ut videre est in Praxi, titulo de Apoplexia.

Hos itaque taliter affectos, in septem diebus mori testatur hic Hippocrates: & licet alibi dixerit Apoplecticos, intra quatuor dies perire, quia Apoplexia morbus acutissimus est, nihilominus non exinde fit, ut nequeant isti, ad alios dies sequentes protrahi, puta ad quintum, sextum vel septimum diem. Neque vero quia Hippocrates in septem diebus illos perire ait, terminus septimæ diei constituitur, nam juxta morem ejusdem, intra septem dies, mortem evenire posse designat, ut sæpe à nobis est dictum, cum & quinta & sexta etiam accidere possit.

Tandem additur in textu, *nisi febris illum prehenderit*, id est, nisi febre intra hoc tempus æger corripiatur, cujus beneficio ligati & obstructi nervi vocales solvantur, & humores cerebrum afficientes per febrim digerantur & alio exturbentur. Quanto citius autem febris accesserit, tanto melior erit, antequam scilicet humor ibidem collectus concreascet & coaguletur ut nequeat postmodum prompte digeri & dissolvi. Verum tamen febris ista, nec adeo miris & levis esse debet, ut humores impactos & crassos non diluat; nec multum vehemens vel diutius protracta, quæ vires infringat & deprimat, sed laudabilis erit, quæ de genere ephemerarum statuuntur, ut nimirum non transcendat spatium trium dierum, quo sane tempore humor Aphoniam efficiens, digeri & dissolvi, adeoque vel per sudorem vel per urinam evacuari commode possit. Cæterum si febris limites ephemerarum excederet, & vel à visceribus male affectis ac tumefactis, vel ab humoribus plus debito fermentescentibus ac vitiosis proveniret, non omnino tuta foret; quoniam exinde tantum abesset, ut aphonia & stertor desineret, ut potius novus ac deterior morbus exoriretur, priori peior, ut alias etiam à nobis est animadversum in *Commentario Lib. 2. Aphor. 26. & aliis*.

Reliqua ad curationem huius morbi facientia legi poterunt apud eundem Hippocratem in præcitato *Lib. 2. & 3. de morbis.*

Dices: Hippocrates *Lib. 2. Aphor. 42.* dixit solvere fortem apoplexiam impossibile est, Ergo neque curari, atqui ista accidentia in hoc præsentis Aphorismo posita denotant apoplexiam fortem cum adsit stertor, Ergo nec hæc curari poterit. *℞.* Duplicem esse apoplexiam fortem, aut à causa externa aut interna: à causa externa solvi poterit, exemplum habetur ejus quæ ex ebrietate fit & *5. Epid.* in puella quæ ex rupe cecidit.

Instabis: Quæ in nostro Aphorismo affertur apoplexia, non videtur fieri à causa externa, cum dicat, *si quis repente quasi sine causa manifesta.* *℞.* Potest solvi aliquando saltem à natura apoplexia fortis, licet non ab arte; vel dico hanc Apoplexiam non esse adeo fortem.

Aphorismus LII.

Sed in somnis etiam, an de oculis aliquid appareat, spectare oportet: Nam si quid non exacte commissis palpebris, ex albo appareat, modo non ex alvi profluvio, aut medicamenti potione, id accidat, malum est signum & valde perniciosum (seu lethale.)

Contentum seu Intentio.

De Prognosi ex oculis dormientium.

Connexio: Quemadmodum ad bonum morbi eventum, in priori Aphorismo, ab Hippocrate febris posita est: Ita in hoc præsentis Aphorismo, ad malum eventum, symptoma in oculis apparens, describit.

Hic Aphorismus in duas partes dividitur. In *Prima* ponit symptoma oculorum, si nimirum album oculi in somno appareat, si non
ex

ex aliquo profluvio vel medicamento proveniat: In *Secunda* affert malum imo lethale ex eo signum.

Cardanus omnino vult hunc Aphorismum adjungendum esse præcedenti, ex eo quod sejunctim ab illo veritati non consonet, quia tamen Cardani mos perpetuus est ut Aphorismos, inter sese connectere plurimum allaboret, ideo & hunc divisum & connexum reliquit; verum tamen est, quod accidentia hæc in oculis ægrotantium memorata, ut malum significant, & eventum quandoque lethalem portendant, à læso cerebro & nervis inde provenientibus proficisci debent: nam si fortasse à venis, aut vaporibus, ex imo ventre elevatis orirentur licet præternaturalem corporis constitutionem designarent, non tamen omnino prava forent, ut passim in pueris experimur: Sic pariter, si quis ex consuetudine dormire consueverit, in conniventibus oculis, & non commissis palpebris, neque malum præfagire exinde posset, quandoquidem multi sunt, qui apertis oculis, profunde dormire solent, imo hiante ore, & cum stertore & ronchis horribilibus, citra ullum vitæ periculum.

Itaque de his speciatim intelligendus est Aphorismus, qui ex morbo cerebri & principii nervorum læsione id patiuntur, prout in delirantibus, caroticis, apoplecticis, lethargicis sæpissime experimur, itemque in maligne febricitantibus, cum depravatione animalium operationum. Et licet in præcedenti Aphorismo, de cerebro laborantibus actum sit, quibus in commissis palpebris dormire malum est, nihilominus non solum de iis, sed de quibuscunque aliis, pari ratione cerebro laborantibus, exponi commode potest, ita ut Aphorismus sejunctim sumptus aptabilis sit omnibus ægrotis, quocunque genere morbi, modo cum illo cerebrum compatiatur. Est præterea hic Aphorismus prognosticus, prænuntians malum, & quandoque etiam lethalem eventum, in ejusmodi ægrotantibus, simulque etiam diagnosticus, designans cum illo morbo, cerebrum una affectum esse, adeoque per ejus medullam, & nervorum principium malitiam ejus morbi esse diffusam.

Unde autem accidat, ut ægrotantes in commissis palpebris dormiant, & album oculorum detectum exhibeant, ratio varia proponitur ab interpretibus; & Galenus in *Commentario* causam attribuit, siccitati jam introductæ, in partibus nerveis; itemque imbecillitati

facultatis motricis, nequeuntis palpebras, unde quaque expandere, & amplificare: Verum siccitas ista si talis ac tanta foret, ut hic fingitur à Galeno, certe non minus in palpebris, quam in aliis partibus membranosis & nervis conspicua foret; quin & id ipsum dici oporteret, in pueris inconniventibus oculis dormientibus, ex causa vermium, aut corrupti lactis stagnantis in intestinis, cum tamen ejusmodi siccitas adaucta in his nulla sit. Neque etiam imbecillitas facultatis motricis causa ejusdem adaequata esse potest, quandoquidem in aliis partibus, illa sensibilibus deberet apparere; quin & in palpebris tanta vis movens non videtur necessaria, ut illas expandere & amplificare cogatur, quia sponte sua palpebrae, laxari & ampliari possunt, nulla intercedente interna facultate motrice, unde saepissime etiam accidit sponte sua illas lymphatico humore gravatas delabi, laxari, & occludere universam oculorum orbitam, praesertim cum palpebrae superiores non committantur, infernae tamen retractae, nequeunt expandi, & simul una committi, cum palpebris superioribus. Accedit quod aliquando vitium non totum est palpebrarum in ejusmodi commissione, sed est oculorum, qui cum ex defectu musculorum, & nervorum illos moventium, quodammodo retracti observentur, propterea non secundum rectam dispositionem constituti, velut in strabonibus, sed vel sursum vel deorsum contracti, exhibent inter utrasque palpebras albumen. quod secus accideret, si oculi in suo situ forent repositi. Itaque ad solam siccitatem, totum hoc oculorum & palpebrarum incommodum tribuendum minime videtur.

Crediderim ea propter rationabilius palpebrarum suspensiones exoriri in his, qui per morbos sive totius corporis, sive partium principalium ejusdem cerebro laborant, & causa morbi in principium nervorum transfusa est, ubi vel propter acredinem, vel propter malignam conditionem infertur, levis primum, mox gravior nervorum contractio, cujus ratione nervi in sensus externos proximiores corporis tendentes, coafficiuntur, & potissimum illi, qui feruntur in palpebras, eo quod propter exilitatem & tenuitatem facilius commoventur, & proritantur, adeoque affectionem quandam convulsoriam incurrunt. Sic etiam in his saepissime experimur motus inaequales, spasmodicos & convulsivos dictos, itemque retractionem labiorum per intervalla, & voces tremulas, & visus obtenebrationem, aliaque acci-

accidentia his similia, ab affectu nervorum principio provenientia, vel saltem à proritatis meningibus, quæ integumenta præstant nervis omnibus corporis, ut ex Anatomia constat.

Hinc itaque deducere licebit, malum esse indicium, aut etiam valde lethale, in ægris, quotiescunque Palpebræ non bene committuntur ipsis dormientibus, ita ut album oculorum subinspiciatur; quia ex hoc arguitur, cerebrum una simul affectum esse, & nervos motus quosdam convulsorios subire à vaporibus, vel humoribus illos vellicantibus; cumque id plerumque non fiat sine absorptione roridæ cerebri substantiæ, aut alterius consimilis liquoris cum ea, quæ irritandi vel vellicandi vim habent, etiam sua natura possint extenuare & exsiccare; idcirco simul cum his sæpe numero etiam partium consumptio & exiccatio copulari poterit, cum languore & jactura virium.

Quoniam vero adjecit Hippocrates in textu: *Si non ex alvi profluvio aut medicamento purgantis potione*, id evenerit; clarissime ostendit causam in illis debere esse internam, non autem externam, & manifestam; siquidem fieri potest, ut ex immodica evacuatione sive spontanea sive promota per artem, adhuc nerveæ oculorum partes, & aliæ adjacentes, partim ab ipsa evacuatione, vim habente extenuandi, partim ex acredine medicamento, in humoribus & sanguine relicta, nervi ipsi, & partes membranosa contrahantur, quemadmodum ab usu Ellebori alias edocuit idem Hippocrates convulsionem exoriri posse, quando quidem medicamenta purgantia, & præsertim validiora, non tantum dissolvendo, & aliquando humores, verum etiam irritando, evacuationem promovent, & non raro etiam Hypercatharsim inducunt. Et quamvis Hippocrates, de *alvi profluvio* mentionem fecerit, veluti de evacuatione spontanea, nihilominus jam satis unicuique notum est, alvi profluvium, & Diarrhœam immoderatam, ab acris & vellicantibus humoribus, proficisci, si nimirum in alvum delati, intestina ad modicam evacuationem laessant, unde postmodum partium superiorum, & cerebri non levis extenuatio ac proritatio contingit, adeoque palpebrarum retractio, quæ non adeo mala dicenda est, veluti facta à causa manifesta, scilicet ab illa immoderata evacuatione, quæ licet humores, & roridam nervorum substantiam absorpserit, non tamen hærentem in cerebro causam ar-

guit, adeoque non adeo periculosa est, præsertim quia humores illi absumpti & evacuati, facilius remitti & restaurari possunt; secus vero corrigi & emendari qui cerebrum proxime non sine malignitate afficientes in causa sunt ut membranosæ partes convellantur.

Tandem concludit, non tantum malum esse signum, sed etiam valde perniciosum, siquidem in morbis quibuscunque cerebrum, & nervosas partes affici pessimum est, sive quod ille inter principales referantur, sive quod sensui & motui corporis dicatæ sint, atque adeo ad cordis pulsum & ad vitam conservandam proxime conferant, si-
ve demum quia nutritioni incommodant, adeoque viribus sustinen-
dis inidoneæ fiant: qua ratione omnes affectus cerebri periculosissimi semper sunt. At vero non dixit Hippocrates, omnino esse signum lethale, sed valde lethale, hoc est multum & plerumque lethale, unde adverbium illud *valde*, non addit, sed aliquantulum potius diminue-
re videtur magnitudinem & periculum symptomatis, si præsertim alia non penitus consentiunt.

Hanc ægrorum semiclausis oculis, nil nisi candidum repræsen-
tantibus conditionem considerans Poëta, sequentem dat rationem:

Cælestis sphaera est oculus, pupillaque Solest.

In cælo lactis nocte videtur iter.

Cur multum de albo moribundus monstret ocellus.

Nosse cupis? Lactis morte videtur iter.

Fusio rem qui desiderat hujus Aphorismi explanationem legat
Cardanum & Brassavolum in commentario: Reliqua in præcedenti
Aphorismo abunde discussimus.

Aphorismus LIII.

*Deliria (seu Desipientia) quæ cum risu fiunt tutiora ;
quæ vero studio adhibito periculosiora.*

Contentum seu Intentio.

De Prognosi Deliriorum.

Connexio: Cum de cerebri morbis in antecedentibus egisset Hippocrates; In hoc præsentī Aphorismo adducit delirium, quod etiam cerebri affectio est valde pernicioſa.

Hic Aphorismus in duas partes dividitur: *Prima* loquitur de deliriis cum risu tutioribus: *Secunda* de deliriis cum studio periculosis.

Comparat ergo in hoc Aphorismo Hippocrates deliria, & quænam periculosa, quæ vero securiora sint, ab adjunctis breviter deducit; Nam cum risu securiora, cum studio vero periculosa dicit; Sive autem ea sint cum febre ut phrenitis vel sine febre ut melancholia vel mania.

Quamvis autem deliria seu desipientiæ, in universum plures & variæ esse solent, prout deducitur ex eodem Hippocrate, atque ex eodem colligit Cardanus: Commode tamen ad tres revocari possunt, utpote quæ sæpe sæpius ægros afficiant, & patentioribus indiciis manifestantur, nempe ad eas quæ cum risu, quæ cum studio, & quæ cum furore & impetu contingunt, ut bene Galenus in *Commentario istius Aphorismi*. Inter has autem securiores semper sunt, quæ cum risu, graviores quæ cum studio, & multo adhuc graviores & periculosiores, quæ cum furore conjunguntur.

Et quidem quæ cum risu fiunt securiores sunt, tum ratione imaginatricis facultatis, non adeo à naturali statu declinantis, tum ratione humoris illum inferentis; etenim quandocunque Phantasmata per imaginativam diffusa lætitiæ & risum repræsentant, naturam non deprimunt, nec dejiciunt, sed potius exhilarant ac sublevant, motum cordis & sanguinis non opprimunt aut intercipiunt, neque à sua Diathesi multum distrahunt aut avertunt, sed per convenientes ac expeditos spiritus confovent & conservant: Humor autem risum excitans non nisi benignus esse potest, qualis est sanguis; & risus ipse seu risibilitas est passio propria, seu proprietas homini quasi essentialis, consentanea plurimum vitæ & animi hilaritati; unde experimur læ-

tos & hilares homines salubriter tegere, & cunctas operationes naturales viriliter peragere atque exercere.

Contra vero desipientiæ cum studio semper sunt graviores, veluti contrariis ex causis inductæ; imaginativam enim magnopere perturbatam designant atque ab Idolis melancholicam & acidam conditionem referentibus, cum timore & mœstitia, unde cogitabundi, timidi, tristes, conversationem averfantes, solitarii, & cibum refugientes, istiusmodi ægri fiunt, utpote qui humoribus abundant acidis, tartareis melancholicis dictis, sanguinem figentibus, effuscantibus, atque in suo motu retardantibus, quamobrem, is parte sua florida, & vivida plurimum diminutus, pulsus & cæteras operationes vitæ necessarias hebetes reddit; indeque postmodum corporis macies, languor & ad motum ineptitudo atque impotentia exoritur, prout experimur in delirio melancholico laborantibus, & sive ab hypochondriis, sive à toto corpore, ex congestione humoris melancholici illud proficiscatur, de quo Galenus 3. *de locis affectis cap. 7.*

Longe demum periculosiores sunt desipientiæ, cum furore, impetu & audacia, ut in maniacis, quia in his operationes vitales magis depravantur, & humores præsignantur longe peiores, quales dicuntur à Medicis atrabilarii, plurimum à statu naturali recedentes.

Hinc modo admonemur, quibus remediorum generibus ejusmodi deliria seu desipientias curare debeamus, sive cum risu, sive cum studio, sive cum furore illæ fuerint: Etenim licet Hippocrates in hoc Aphorismo Diagnosim, ac Prognosim, horum deliramentorum visus sit, solummodo referre; Voluisse tacite tamen comprehensas eorundem curationes, sub intelligendus; adeoque majorem diligentiam esse adhibendam in curatione delirii cum studio, aut cum furore, quam in eo, quod cum risu fit, ut patet ex Praxi.

Plures desipientiarum species, atque de iis disquisitiones vide apud Cardanum *in commentario.*

Aphorismus LIV.

In morbis acutis, cum febre luctuosa suspiria, mala.

Con-

Contentum seu Intentio.

De Prognosi Respirationis in Febris acutis.

Connexio : Cum de læsione mentis in priori Aphorismo egisset Hippocrates: In hoc agit de respiratione: Sicut autem delirium est accidens animalis Facultatis; ita respiratio cum gemitu &c. est Facultatis vitalis : Antea quoque egit de risu, in hoc agit de luctu. Acuti morbi, seu ut alii vertunt acutæ passionēs, non solum hic intelligi debent, quæ brevi temporis intervallo finiuntur, sed quæ gravioribus symptomatibus sunt stipatæ, atque adeo à pravis humoribus progeneratæ, cum læsione partium principalium, ad vitam tuendam summopere conferentium.

Hinc apposite adjecit Hippocrates, *quæ cum febre sunt* : Nam si fortasse sine febre forent, leviores procul dubio essent existimandæ. Itaque cum febribus conjuncti morbi hoc loco intelliguntur, veluti qui vitium in sanguine recognoscunt, & cor proximius & penitius molestant : Hi namque spiritales partes læsas, vel comitantur, vel consequuntur, atque adeo facile possunt, luctuosa suspiria excitare, quæ non nisi ab affecto corde, pulmone ac pectore proficiuntur: Luctuosa namque suspiria seu ut vocat Hippocrates *6. Epidem.* dupla respiratio, sunt, quæ fiunt cum interrupto motu thoracis, & respirationis, quemadmodum etiam Galenus in *Commentario* memorat, & sæpissime pueris ejulantibus vel cogitabundis aut tristitia affectis evenire experimur ob angustiam thoracis & partium respirationi destinatarum, ut propterea nequeant se ipsas tam bene expandere, sicut exigit necessitas naturæ molestia oppressæ, quæ amplificatione cordis & pectoris vellet melancholicum affectum excutere, & ab opprimente causa se liberare. Cum itaque hæc accidunt acute laborantibus & cum febre, procul dubio grave cordis detrimentum arguunt, à maligno & cogente humore, illud comprimente, ut propterea nequeat pro indigentia se convenienter amplificare, unde mala sunt, & quidem tam ratione ipsiusmet cordis male affecti, tum ratione humoris, tam graviter illud afficientis, quam obrem non nisi in malignis, ac pestilentibus febribus ista accidunt, in quibus propter sanguinis concre-

tionem potissimum in vasis pulmonum, & quandoque etiam in arteria venosa, aut in arteria Aorta, ubi grumuli & hærentes succi sæpissime adinventi sunt, cor gravi oppressione afficitur, & veluti à comprimente manu, universa præcordia gravantur, unde pulsus etiam pusilli, intermittentes ac deficientes, exsurgunt, ac postmodum interitus, ut in plerisque cadaveribus, diligenti Anatomica inquisitione sæpe sæpius est observatum. Sive autem hæc omnia fiant cum febre, vel sine febre, ut fit in Tetano, Apoplexia, par ratio est, utrinque enim acute laborant.

Plura de his lege apud Cardanum *in commentario*.

Aphorismus LV.

Dolores podagrici, vere & autumno fere (seu magna ex parte) moventur.

Contentum seu Intentio.
De Paroxismis Podagricis.

C*onnexio* : Fecit Hippocrates supra Aphorismo 28. 29. & 30. hujus Libri mentionem de Podagra, eam removens ab Eunuchis, mulieribus & pueris: In hoc præsentis Aphorismo loquitur de tempore, quo maxime Podagra affligere solet.

Hic Aphorismus ob brevitatem & simplicem conclusionem non dividitur.

Podagrici dolores, ut alibi meminimus, à colluvie serosa, & à superabundanti lymphæ in articulos decumbente excitantur : Illa autem non tantum corpulentia seu quantitate, sed etiam infensa qualitate acri, aut etiam acido-salsa artus ipsos, & adjacentes partes musculofas, itemq; tendines, ligamenta, membranas, nervos tumefaciunt simul & compungunt, unde postmodum rubor, tumor & dolor acerbissimus. Quoniam vero serosi isti & lymphatici humores, superabundare potissimum solent verno & autumnali tempore, idcirco fit, ut per hæc eadem tempora more aliorum morborum ut dictum lib. 3. Aphorismorum, pariter podagrici dolores infestent : Verno quidem tem-

tempore, cum scilicet cumulatae per hyemem pituitosae superfluitates, vi postmodum ambientis caloris diluuntur, & melius fluunt: itemque propter sanguinem in cunctis hominibus vegetiorem, atque etiam velocius excurrentem per arterias, ut indicant pulsus per idem tempus celeriores, & vehementiores: Autumno vero ex impeditis & detentis quodammodo sudoribus, qui per Aestatem copiosissimi esse consueverant, tum à potibus largioribus, tum ab esu fructuum immodico, unde excrementa copiosiora fuerant cumulata.

Magna autem ex parte dicuntur per hæc tempora excitari, sive quod non semper in his temporibus, cunctis accidant, sive quod non solum, in Aequinoctiis, verno scilicet & autumnali, sed etiam in Solstitiis promoveri soleant podagrici dolores: Equidem passim experimur, huiusmodi dolores, & alios similes, per hæc tempora excitari, fortasse ob mutationem in aëri inductam, atque ex illo in humanis corporibus commotionem, cum ex calido in frigidum, vel ex temperato in calidum & e converso mutatio fit, ut propterea scripserit Hippocrates *Lib. 3. Aphorismo 1. mutationes temporum morbos parere* ut alibi etiam jam ostendimus.

Quantum autem valeant ejusmodi mutationes aëris in perturbandis humanis corporibus, & praesertim iis, quæ valetudine non firma fruuntur, notius est quam ut longiori sermone ostendi possit; etenim præterquam quod aër magnam vim in alterandis corporibus habeat, usu respirationis, etiam simplici suo contactu eadem afficere solet, constipando aut laxando cutim, ejusque poros diversimode afficiendo, unde postmodum vel effluvia, quæ perpetim extramitti debent, retineantur, & retenta sanguinem, & cæteros liquores corporis inficiant, vel affluentius exhalantia, eosdem diluunt & extenuant, unde plus justo dissoluti, in habiles fiant partibus reficiendis, quin potius apti ad easdem perturbandas & alterandas, quam obrem qui obnoxii sunt doloribus articulorum, facile per hæc tempora illos incurrunt.

Nam vere florescit rosa Regina Florum; vere florescit rosa in pedibus Podagricorum (hoc enim titulo exosum Podagræ nomen longo sæpe tempore honorari solet:) hinc Poëta:

Nata rosa est veneris, veneris quia sanguine nata,

Deque rosa nasci, sæpe Podagra solet.

Est Bacchus Pater, & mater rosa stemma Deorum

Ad divos tantum, diva Podagra venit,

Q q q q q q 2

Ut

Utque Deos lana pede, vincto incedere dicunt,
Sic pede lanato, diva Podagra jacet.

Pro autumnali tempore de Podagra habet hæc Poëta :

Sola Podagra dolens, Minorum morbus habetur
Luxuriosa avidæ, filia prima Gulæ.

Rara dat autumnus, gustosaque fercla Palato:

Hinc Podagra autumnno, fortior esse solet.

Cardanus in hoc Aphorismo, modum sanandi podagram innuit, quem ipse securissimum appellat, ut scilicet homo jejunos se exerceat usque ad sudorem; inde ponat se in lecto calido, & contactus pannis fudet quousque potest, & hoc faciat quotidie, vel semel aut bis in hebdomada, & prandeat parum, sitque in loco calido & sicco, clausis fenestris contactus & continuet per annum; hæc Cardanus; quam quidem methodum, quemadmodum approbo, ita credo difficile futurum ægris, ut æger ex agro citius nasci, quam hic curandi modus discoloris patientibus persuaderi possit.

Dices : In hyeme plures fiunt Podagræ quam vere & autumnno, imo & in æstate, licet breviores Ergo non tantum in vere & autumnno. R. cum Aureliano in Chronicis verum esse, quod fortasse in Aphor. addi potuisset, in hyeme; quia tamen in hyeme humores sunt fixi & immobiliore, quam in vere & autumnno atque æstate sed rarius, ideo hæc tempora Hippocrates intermisit.

Dices II. In vere ad extra, autumnno ad intra moventur humores, ergo in autumnno non fiunt Podagræ. R. Moventur ad intra per accidens id est clausis poris impinguntur partibus sentientibus concedo, per se nego.

Plura disquisitione & curiositate plena, de Podagra, hunc Aphorismum concernentia si quis desideret legat Cardanum in *Commentario*.

Aphorismus LVI.

Morborum melancholicorum ad hæc periculosi decubitus, vel corporis syderationem (seu stuporem) vel convulsionem, vel maniam (seu furorem) vel cecitatem denuntiant.

Contentum seu Intentio.

De effectis cacochymia melancholica in Capite.

Connexio: Cum in præcedenti Aphorismo de tempore egisset Hippocrates quo podagra affligere solet, quæ species quædam decubitus seu abscessus est; in hoc præsentī Aphorismo agit de decubitu seu abscessibus, qui in morbis melancholicis fieri solent.

Hic Aphor. ob simplicem conclusionem, non eget divisione.

Morbi melancholici dicuntur illi, qui ab humoribus melancholicis dictis seu ut mavult Paracelsus, tartareis & acidis progignuntur; & sive isti proveniant, à melancholica totius corporis constitutione, & peculiari sanguinis diathesi, sive specialius à mala habitudine viscerum naturalium, quemadmodum in hypochondriacis & scorbuticis; in his igitur enumerat Hippocrates, quæ mala sint affutura, nisi cito & opportune succurratur; siquidem increbescente affectu melancholico, & exuberantibus succis acidis ac tartareis, facile subinde accidere solent, stupor corporis vel convulsio, furor vel cæcitas: Stupor vel convulsio, si repant humores in nervos, hebetatis scilicet & male affectis, ab acidis succis, eorundem fibris, vel iisdem, ab acido vellicante proritatis; nam 6. *Epid. Sect. 7.* dicitur, *melancholici sunt epileptici, & epileptici melancholici*: Furor vero seu mania si in cerebrum tendant, unde Galenus explanans relatam modo Hippocratis sententiam 3. *de locis affectis* dicebat: Si humor melancholicus vergat in mentem, delirium vel convulsionem, si vero vergat in corpus paralysem vel apoplexiam infert: Denique cæcitas, si in visus organa deducatur, & specialiter in nervos opticos, vel in tunicam retinam, quæ à fibrillis eorundem nervorum ortum ducit.

Quamvis autem hæc solummodo retulerit Hippocrates, non tamen quis credat alia quoque mala exinde suboriri non posse; nam plures alii similes atque affines morbi, iisdem ex causis supervenire poterunt, pro varia corporum habitudine, ætate, consuetudine, sexu & prout in has vel alias partes, fortasse imbecilliores prædicti humores decumbere possunt.

Controversiæ plures super hoc Aphorismo legi possunt apud Cardanum in *Commentario*.

Aphorismus LVII.

Apoplexia autem fiunt maxime à quadragesimo anno, ad sexagesimum.

Contentum seu Intentio.

De Ætate ad Apoplexiam disposita.

Connexio: Cum in priori Aphorismo Hippocrates mentionem fecisset apoplexiæ, quæ sequitur ad melancholicos morbos: In hoc præsentia agit de tempore, quo illa corripere solet homines.

Hic Aphorismus ob brevitatem non dividitur.

Licet Galenus non de quacunque apoplexia scriptum velit in suo commentario hunc Aphorismum, sed de ea solum, quæ ab atra bile dependet, utpote *quia per eam consistentia ætatem, atra bilis humor abundet, quemadmodum & in autumno*: nihilominus non negat posse etiam cæteris succis, pituitosis & crudis, per eandem ætatem illam oriri: quin & senes ab his potius, quam ab atrabiliaris, aut melancholicis humoribus apoplecticos fieri, alibi etiam sæpius edocuit, cujus causa tam acriter in illum invehitur Cardanus, ut totum hujus Aphorismi commentarium, adversus hoc Galeni placitum, conscriptum videatur.

At vero nobis distinguere fas sit apoplexias; & alias quidem ætatum defectu, alias humorum vitio, & alias à mala partium cerebri conformatione. Ex defectu ætatis, & ob virium languorem, obnoxii magis sunt senes, & provectioris ætatis homines apoplexiæ, à lymphaticis humoribus crassescantibus, & tenacibus, qui per languidam illam ætatem, ex malis coctionibus, & secretionibus humorum, atque ab effoeto & vapescente sanguine emergunt, qui deinde cum per cerebri ambitum, & corticales glandulas facile hærescant, ac remorentur, adeoque gravent, oppleant, obtundant apoplexiam & cæteros similes morbos inferunt. Et quamvis in pueris ejusmodi propter humores videantur superabundare, causa præsertim voracitatis; attamen lymphatici isti humores fluxiores sunt, & viæ molliores & laxiores, unde facillime difflantur & evaporant, quique per cruditates pro-

gignun-

gignuntur, prompte in ductus urinarios, aut intestinorum delati egeruntur & exonerantur, conferente in hoc idem plurimum partium omnium mollitie ac laxitate.

Humorum insuper vitio contingunt apoplexiæ, sive cum ipsi plus justo cumulati, in cerebri meatibus hærent, & vel gravando ac opprimendo, vel etiam obstruendo, motui sanguinis ac lymphæ impedimento sunt, adeoque excrementorum, sive sensibilibum sive insensibilibum repurgationi remoram faciunt; qua ratione Heluones, Ebrii, succi pleni, obesi, catharrofi, alique similes sæpe numero apoplectici aut carotici percunt, factaque cadaverum sectione, inveniuntur in cerebri anfractibus, & intercapedinibus, feri, lymphæ, vel alius corrupti humoris congestiones. Porro hoc pacto omnes, & quicunque humores gravare, opplere, obstruere, & stagnare valentes, aut etiam reserare, erodere, ulcerare, bene poterunt apoplexias & cæteros similes morbos, in cerebro parere.

Ex mala denique partium cerebri conformatione sive à primordiis vitæ, atque ex defectu naturæ, sine tractu temporis, & ex accidenti morbo progenerita, accidunt apoplexiæ; forte quia cerebri molles, pusilla, angusta, duriuscula, aliterve male affecta est; aut etiam ductus, cavitates, pori non convenienter patuli sunt, adeoque arteriolæ, venæ, & vasa lymphatica, liberum excursus & recursus liquorum non admittunt; unde postmodum interceptiones, occlusiones, obstructiones, aut etiam disrptiones, erosiones, suppurationes, & alia hujus generis in commoda suboriuntur: quo sane respexisse visus est Hippocrates, 4. *de ratione victus in acutis* 23. dum scripsit: *cum quis repente obmutescit, id venarum interceptiones, occlusionesque faciunt, si sano absque occasione vel forti alia causa id contigerit*: ubi alia plura in eandem rem accuratissime observanda proponit: hoc etiam pacto ligatis arteriis caroticis, aut contusis musculis temporalibus, concussoque cerebro, aphoniæ & apoplexiæ accidunt, mutata scilicet & turbata partium conformatione. Ex eodem vitio, crediderim plerosque ejusmodi affectibus comatosi natura obnoxios esse, ac repetitis insultibus, per intervalla molestari solere, ut tandem in eunte senili ætate ab iisdem pereant; quin & non raro (anatomia in iisdem instituta) nil quidpiam sensibile extra cerebri ductus inventum est, ut sæpe expertum.

Hinc

Hinc modo putaverim, Hippocratem in hoc Aphorismo, illas solummodo voluisse apoplexiarum species recensere, quæ vitio humorum quidem, sed ex mala cerebri habitudine contingunt, forte quia circuitus humorum, facile per ætatem juvenilem fermentescendum, longam & promptam vasorum expansionem, juxta naturæ indigentiam nactus superveniente ætate consistenti, à fibrarum & membranacearum partium duritie, sensim & sensim inducta, ejusmodi amplificationi non facile deinceps obsequuntur; unde in plexibus cerebri, meningibus, ductibus lymphaticis & aliis, quacunque de causa circumeuntes humores, hærent, aut irruptione, & impetu factò in apicibus eorundem, tenellas illius partes delaxant & aperiunt, vel tumefaciunt, opplent, aggravant, prout acor in illis inductus, major vel minor extiterit, adeoque obstructions, & interceptiones, aut erosiones aut disruptiones inferunt plane inemendabiles. Procedente vero ad senium ætate, quia nifus ille & motus fermentativus, in humoribus tractu temporis lentescit, propterea nec vehementem commotionem, nec urgentem impetum, in iisdem excitat: id quod sane manifestissime ostendunt pulsus, per hæc eadem tempora, tardi admodum, rari & imbecilles. Quamobrem licet sopores, hebetudines, languores, in provectioni ætate contingant, non tamen veræ apoplexiæ dicendæ sunt, veluti ab ipso ætatis decrepitæ, languore & virium ac sanguinis labefactione dependentes, collabente videlicet sensim natura, ex defectu spirituum, ac excrementosorum humorum ingluvie, quo circa soporati potius & comatosi, non vero apoplectici illi pereunt.

Quamvis autem Hippocrates hic dixerit, à quadragesimo ad sexagesimum usque annum apoplexias fieri, non tamen exinde putandum, intra hoc solummodo temporis interstitium illas accidere posse, cum & ante & post ejusmodi tempora bene adhuc possint evenire, si nimirum aliunde causæ illas inferre valentes suppetant; quandoquidem unicuique perspectum est, omnes morbos cunctis ætatibus accidere posse, si causæ vel internæ vel externæ, aut ex defectu naturæ, aut ex aliquo quocunq; accidente supergredientes, salubrem & convenientem corporis œconomiam turbent, ac depravent. Hinc non immerito adjecit adverbium illud *maxime*, ut nimirum indicaret non omnino, & per eam solummodo ætatem, apoplexias evenire, sed

sed magis solum & plerumque per illam: licet in aliis quoque ætati-
bus fieri queant, esto alius generis morbi, quam veræ apoplexiæ.

Dices: Nulla est ratio cur Hippocrates, hic non æque fecerit
mentionem epilepsiæ seu convulsionis & tantum apoplexiæ, cum ta-
men utriusque eadem sit causa. *ꝛ.* Hac ætate epilepsias seu convul-
siones rarius fieri, quam apoplexias adeoque cum ratione nullam
convulsionis fecit mentionem Hippocrates.

Reliquas difficultates magis lectu quam eruditione dignas legi
possunt apud Cardanum *in Commentario.*

Aphorismus LVIII.

Si omentum exciderit, necessario computrescit.

Contentum seu Intentio.

De Omento per vulnus elapso.

Connexio: Nulla apta, huius Aphorismi cum præcedente inveni-
tur connexio, utilissimus tamen est hic præsens Aphorismus, quia
docet casum valde rarum & pro Chirurgis valde utilem.

Hic Aphorismus ob summam brevitatem & conclusionem sim-
plicem non dividitur.

Hunc Aphorismum quoque habet Hippocrates *1. de morbis*, & in
coacis prænotionibus, unde eundem transcripsit.

Excidere autem omentum idem est, ac extra peritonæum & ab-
domen, cum forte vulnerata sunt, egredi ac prolabi, adeoque ambi-
enti frigido exponi; cum enim omentum multo adipe, atq; innume-
rabilibus glandulis refertum sit, facillime ambienti aëri expositum al-
teratur & livescit, adeoque nullo negotio, ac brevissimo temporis in-
tervallo putrescit, idque potissimum cum ex vulnere, ad eas partes af-
flicto, & sanguinis profluvio, illæ viribus fatiscunt & elanguent, ac
præsertim ventriculus, in suis coctionibus obeundis, quandoquidem
ex observatione Galeni *4. de usu partium Cap. 9.* multum ad ciborum
confectionem, & chylicationem conferat, ut in gladiatore illo ibi-
dem memorato, cui omentum abscissum fuerat, compertum refert.

Ex hoc autem Aphorismo monemur, cautos & sollicitos oportere esse Medicos in illius extra abdominis regionem prolapsu, ad statim, nullaque data mora reponendum, sin secus rescindendum potius, ne putrefactioni subjiciatur; cuius repositionis aut resectionis modum edocent *Celsus Libr. 7. Cap. 21. Galenus Libr. 6. Meth. Cap. 4. Paulus Libr. 6. Cap. 52. & Fabritius ab aqua pendente Lib. 2. cap. 45. & alii.* Atqui non raro etiam contingit, à perita adhuc Chirurghi manu repositum periculo non vacasse & computruisse; quandoquidem tam levis & mollis texturæ est, ut ne tantillum è sua fede dimotum, atque ambientia aëri expositum livorem, & putrefactionem incurrat.

Animadvertendum autem adhuc est, quod omentum non solum extra excidit per vulnera, sed intus etiam & facile herniam, ut rupto vel relaxato peritonæo: sed tum omentum quidem excidit & non putrescit, excidit quidem extra peritonæum, non autem extra cutem ut aëri exponatur & putrescat.

Plura de hoc vide apud Cardanum *in commentario.*

Aphorismus LIX.

Quibus longo coxendicum dolore conflictatis, femoris summum (seu cavitate sua) coxa excidit, rursumque recidit, iis mucrescunt in nascentur (seu superveniunt.)

Contentum seu Intentio.

De effectis doloris ischiadici longioris internis.

Nota: Cum hic Aphorismus maximam cum sequenti habeat prope in omnibus affinitatem & connexionem, ideo ne chrambem repetamus, eum una fidelia in sequenti explanabimus.

Apho-

Aphorismus LX.

*Quibus diuturno dolore ischiadico vexatis, femur
(seu coxa) excidit, iis crus contabescit, & clau-
dicant, nisi urantur.*

Contentum seu Intentio.

De effectis doloris ischiadici longioris externis.

Connexio: Cum supra Aphorismo 28. 29. 30. hujus Libri, de Po-
dagra egisset in his duobus ultimis Aphorismis agit de dolo-
ribus coxæ.

Hi duo Aphorismi cum simpliciter concludant non di-
viduntur.

Hos ergo duos Aphorismos, 59. & 60. non debere à se invicem
sejungi, docet *in commentario* Galenus, sed ipsos omnino esse jun-
gendos, ut unus sermo continuatus sit; quasi dicere voluerit Hippo-
crates, à coxendicum dolore molestatis, ubi per mucoris multitudi-
nem articulus excidit, & rursus recidit necessarium esse, processu
temporis os ipsum contabescere, & patientem claudicare, nisi cito il-
le mucor absumatur & exiccetur, quemadmodum idem Hippocrates
Lib. de articulis, faciendum consulit, in brachio jugiter excidente:
quod & Arabes scriptores quoque omnes admonent peragendum,
vel igne *actuali* & ferro candente, vel *potentiali* ope medicamento-
rum causticorum, & per emplastra picata, quas *ustiones Arabicas* mo-
derni appellantur: Juxta illud ejusdem Hippocratis *Lib. 8. Aphor 6.*
*Quascunque non sanant medicamenta, ea ferrum sanat: quæ ferrum non
sanat, ea ignis sanat: quæ ignis non sanat, ea incurabilia judicare oportet.*
Sic Hippocrates curabit hos morbos venæsectione ex popliti-
bus purgatione, cucurbitulis & demum ustione, ut in Licone habetur
exemplum.


Et quidem considerata ossis coxendicis cum osse sacro articula-
tione, facile est ut quisque sibi persuadeat, crassos & mucosos succos,

eo loci, ubi coxa exciderit, colligi & adunari posse, quique postquam obduruerint, & calli fere conditionem fuerint adepti, difficulter discuti aut resolvi poterunt, quin imo extra suam sedem, caput femoris sursum protrudent, & impediunt ne cavum ossis sacri denuo ingrediatur, quamobrem claudicatio sequetur, contractis subinde, & decurtatis, tum crure, tum tibia usque ad pedem: nec abs re dictum ac repetitum, *cavitate sua excidit coxa, & rursus recidit*; quoniam non satis est coxam excidisse, sive e sua sede dimotam esse, sed oportere pariter recidere, si fortassis aliqua industria, vel sponte sua commissa fuerit; siquidem tum significatur cavum illud ossis, à confluxu humorum præsertim lymphaticorum repleti, vel saltem, à luxatione & relaxatione ligamentorum & tendinum, stare firmiter non posse, sed facillime à cavitate illa desciscere, quamproinde lymphatici humores occupent, & in mucos & tenaces succos, data mora convertantur, unde nequeat impofterum os femoris cum osse sacro convenienter articulari.

Non tantum autem exinde claudicatio, sed & atrophia cruris quoque succedet, nisi per unctionem mucosi isti humores absumantur, quoniam læditur subinde non solum conveniens partium illarum dispositio, ac structura, ut proinde alimentum, pro earundem nutritione, vel in alium humorem degeneret, vel non apponatur aut omnino deficiat, sed etiam membranulæ circum amicientes ossa, & medullaris illa substantia, quæ cavum femoris occupat, male afficiantur, quo circa atrophia, postmodum languor, dolor usque ad genu, in periostiis, musculis, nervis, & cæteris suboriuntur.

Dices: Per unctionem excitatur dolor, doloris autem est attrahere, ergo humores plus attrahentur & malum potius augebitur, quam curabitur. *R.* Semper melior & securior est dolor externus quam internus: neque tantum per unctionem attrahitur, quantum extrahatur, & sic fit materiæ evacuatio & Libri nostri
sexti Aphorismorum.

F I N I S.



LIBER SEPTIMUS

SEU

SECTIO SEPTIMA

DE

SUPERVENIENTIBUS.

Aphorismus I.

In morbis acutis, frigus partium extremarum, malum.

Nota: *Similis habetur infra hoc Libro Aphorismus 26.*

Contentum seu Intentio.

De Frigore extremorum, scilicet superveniente morbis acutis.

C*onnexio:* Quemadmodum hic Liber, præcedenti nectitur, ita etiam & hic Aphorismus, ad præcedentes Libri sexti refertur; in hoc itaque Libro septimo, sicut in præcedenti, de iis signis, quæ superveniunt morbis pertractatur, & cum ex symptomatibus, frigiditas extremarum partium, morbis acutis superveniens, non postremum, quin quasi primum occupet locum, cum malam esse asserat, ideo ab illa sermonem inchoat Hippocrates in hoc primo hujus Libri Aphorismo.

Hic Aphorismus, ob brevitatem & simplicem conclusionem non dividitur.

Morbis ergo morbos, & accidentibus accidentia, sive in bonum, sive in malum supervenientia; quæque ex uno in aliud vicissim permutantur, considerata in hoc septimo Aphorismorum Libro proponit Hippocrates; qui propterea vagus, atque indiscriminatim varia comprehendens, neque certum ordinem neque continuum etiam nexum in iis servat. Initium autem facit, ab extremarum partium frigore, non tantum febribus acutis, sed & aliis quibuscunque morbis acutis contingente, quod nocuum generaliter pronuntiat.

Quamvis autem & hic Aphorismus, cum *Aphorismo 48. Libri quarti*, (ubi in febribus non intermittentibus, interiora uri & exteriora frigere, lethale dixerat) multum convenire videatur; revera tamen, omnino distinctus ab illo est, siquidem ibi speciatim in febribus, hic vero, ut mox diximus, in morbis universaliter acutis, apoplexia, epilepsia, tetano, syncope &c. (idem dicendum de senibus & in hyeme nempe magno frigore ubi nihil mali est habere extrema frigida) nulla interea de interiorum uestione ac siti mentione facta, sed solum frigus partium extremarum meminit, ut propterea non penitus lethale, sed malum simpliciter protulerit. Neque insuper in eorum sententiam iverim, qui cum Galeno adhuc de acutis tantum febribus Aphorismum hunc interpretantur, ex viscerum inflammationibus, quia tunc plane exitiosum omnino est, & morti proximum, ut etiam in *Coacis Prænotionibus* adnotatur, cum tamen hic solummodo scribatur *malum*. Recte proinde Celsus *Lib. 2. Cap. 4.* hanc sententiam ab illa sejungens, neque interioris incendii, neque urentis sitis mentionem faciens, extremarum duntaxat partium frigus commemoravit, & mali morbi signum in acutis dixit.

Et quidem frigus partium extremarum cum incendio internarum partium atque ingenti siti ab inflammatione interna procedens, facile in gangrænam vergente, lethale signum omnino est; at vero citra internorum viscerum ardorem, & sine ulla inflammationis suspitione, provenit solum ab hebetato & lentescente sanguinis motu, qui per angustos extremarum partium meatus, progredi non potens, potius in illis concreescens adhæret & stagnat, quam

quam ut porulos earundem pervadens, exangues illas partes, irradiet, & calefaciat, unde non raro etiam liventes illæ comparere solent, ejusmodi autem sunt aures, nares, manus, pedes, & quandoque etiam universa cutis, quæ ambientî aëri quocunque modo exposita, sæpissime horrere solet: addidit autem *in acutis* nam illas in longis & diuturnis morbis frigere non adeo præter rationem videtur evenire: Quamobrem recte Galenus *in commentario* inquit; *in morbis diuturnis, qui præsertim sunt sine febre, & hyeme & ætate senili, partes extremas corporis, veluti nares, aures, pedes & extremas manus frigidæ fieri nihil mali*: præsertim quia diuturni morbi (præter corporis languorem à morbi diuturnitate contractam) non nisi à crassis, lentis & frigidis succis progignuntur: At vero acuti pro causis, tenues, mobiles & calorem excitantes humores recognoscunt, unde in illis frigus persentiri dissentaneum omnino est, ideoque malum & longe gravius; ac periculosius livore conjunctum, indicium enim est aut naturam esse superatam aut saltem ruinæ proximam adeoque unum ex tribus malis significat: vel caloris necessariî insufficientiam: vel jam desperatam naturæ operationem: vel paulatinam caloris nativî extinctionem, quæ potissimum in extremitatibus incipit, utpote partibus, paucissimo sanguine & spiritibus præditis, à caloris fonte remotissimis. Verum tamen frigus istud partium extremarum perseverans esse debet, ut omnino malum sit, nam si fortasse ad modicum tempus appareret, & deinde sponte sua, calefactis partibus iisdem, desineret, quemadmodum inter initia tertianarum & quartanarum febrium experimur, procul dubio nihil mali præfageret, quod tamen potissimum foret, si per totum tempus perdureret, & partes ipsæ, ab admotis calorificis, nullatenus incalescerent; quod & longe adhuc gravius, si cum madore cutis, frigus societur.

Dices: In febrium exacerbationibus sæpe extrema refrigerantur sine periculo, Ergo. &c. Hanc refrigerationem ut jam diximus in contextu, non esse permanentem, quæ tamen ut periculosa sit, debet esse perseverans.

Quares:

Quæres: Quomodo ergo rigor & frigiditas differunt? R. Rigorem sæpius esse judicatorium, frigiditatem autem nunquam. Plures controversias videri & legi possunt apud Cardanum.

Aphorismus II.

Ex osse ægrotante, caro livida, malum.

Contentum seu Intentio.

De Prognosi Sphaceli.

C*onnexio:* Cum in præcedenti Aphorismo Hippocrates egisset, de partium externarum refrigeratione: In hoc præsentis Aphorismo, agit de carnis livore, qui frigoris, vel extincti caloris nativi effectus est.

Hic Aphorismus ob summam brevitatem non dividitur.

Livor in quacunque parte comparens, non tantum frigoris, sed mortificationis & gangrænæ aut sphaceli præsentis, vel imminentis indicium est: cum igitur in osse ægrotante, id est læso, contuso, vulnerato, caro superincumbens, vel circumsepiciens, livida sit, ipsum à suscepta læsione corrumpi quoque conjectandum. At non ideo, quia caro livescit, ipsum corrumpi dicemus, sed potius, quia ipsum à læsione corrumpi contingit, caro livescens apparebit: Sæpe enim in gangrænis, caro livida, & omni sensu orbata percipitur, nullo interea in osse vitio existente, idcirco apposite adjecit Hippocrates, *in osse ægrotante caro livida*: Sed & neque solum caro, si liveat, in læsis ossibus, verum etiam si albicer, si flavescat, si ichorem saniosum & foetidum fundat, si sponte sua sejungatur, & subjecto ossi minime inhæreat, id ipsum arguit: quamquam in his dijudicandis & internoſcendis, sagax & accurata Chirurgorum diligentia multum valeat, siquidem non raro fit, ut à contundente corpore, cutis externa solum liveat, nulla interiorius inducta in osse læsione.

Livor

Livor autem à contusis & vulneratis ossibus, in carne circumjacente & superincumbente, provenit à liquore in nutrimentum ossis transmutando, qui cum in partibus circumjacentibus remoretur & stagnet, atque lamellæ ossium externæ quodammodo à reliquis interioribus dissociatæ, imo & periostrium quo ipsæ amiciuntur, in suis filamentis & loculis distractum, & sauciatur sit, propterea partes subjunctæ rorido & vivificante spiritu destitutæ, sensim languescunt, & ferè emoriuntur, unde postmodum corruptio & putrilago, quæ sensim quoque in adjunctas carnes serpit, & livorem, sphacelum, ac gangrenam parit, simili modo ac in remorante & hærente in poris carniū sanguine contingit; atqui facilius gangræna & mortificatio accidit in membranis ossium quam in carnibus, tum quia hæ exangues sunt, tum quia spiritu valde tenui irradiantur, tum quia glutinosum quid magis & facile coagulabile suscipiunt, quod acore hebetatum, & alkalino spiritu depauperatum, & indomitum redditum tandem frigefacit & mortificat: Hinc experimur gallicas exostoses ab acido illius luis miasmate, nimium infensas, ossibus evadere, corrodendo, frangendo, & terebrando, ut illa pene friabilia reddantur.

Expedit itaque in ejusmodi livoribus, ad carnes circumstantes apparentibus, statim subjectum os detegere, & qua parte squamosum, rima affectum, aut aliter læsum apparuerit, abradere & desquamare, vel etiam urere, & remove, si opus fuerit, ut in posterum meliori alimento reliquum restauretur, & substat, ut ex praxi chirurgica satis notum est.

Unde bene notandum quod ossis ægritudo, vel caries est, vel teredo, vel desquamatio, vel fractura, vel resecatio, vel laxatio; à quacunque autem ex iis affectionibus fiat, caro livida malum, gravius autem malum est ubi magna adfunt vulnera, & pessimum in capite imo lethale.

Exempla talium affectionum, ossium ægrotantium videri possunt apud Hippocratem & Cardanum *in Commentario*.

Aphorismus III.

A Vomitu singultus & oculorum rubor malum.

SSSSS

Con-

Contentum seu Intentio.

De malis Phænomenis vomitus.

C*onnexio:* Cum in antecedenti Aphorismo de colore carnis mutato egisset Hippocrates, qui supervenit ossi ægrotanti; nunc in præsentí Aphorismo agit de colore oculorum mutato, qui ad vomitum accedit, & simul singultum adjungit, cum hæc symptomata invicem copulentur & ad easdem causas sequantur.

Hic Aphorismus ob summam brevitatē divisionem non patitur.

Per vomitum solent humores non tantum per ventriculi cavum innatantes, sed ejus tunicis hærentes, aut aliunde confluentes, salubriter evacuari, qui propterea salutaris pluribus in morbis observatur, quin imo à plerisque statis quibusdam temporibus, gratia præservationis, salutariter instituitur, quemadmodum ab Ægyptiis singulo quoque mense factitatum refert Herodotus *Lib. 2.* Si qui igitur prodesse consuevit, obsit, singultum potius afferens, atque oculorum ruborem, symptomata cæteroqui gravissima, malus plane & perniciosus censendus est.

Singultus siquidem ad classē convulsionum, non irrationabiliter reducitur à Galeno, adeoque semper humorum acridinem & malignitatem nervos vellicare ac laceßere valentem pro causa recognoscit, ut alias ostensum; oculorum vero rubor (si tamen perseverans, nec subito disparsens sit) meningum cerebri, quibus oculorum orbitæ componuntur, inflammationem significat: utrumque autem vomitui, unde non leve emolumentum toti corpori acedere sperabatur supervenire, procul dubio malum est.

Num autem utrumque simul oporteat supervenire an alterutrum tantum, dubitare potest, præsertim quia Celsus disjunctim illorum meminit *Lib. 2. cap. 4.* sententiam hanc Hippocratis, ita in latinum vertens: *Mali morbi signum est, aut post vomitum singultum esse, vel rubere oculos.*

Et quidem ipse crediderim fuisse utrumque hic consulto ab Hippocrate memoratum, ut certius de mala prognosi judicium ferri posset; nam etsi singultus solus si superveniat, malus sit veluti nervorum per ventriculum serpentium læsionem designans, & potius à prava humorum conditione proveniens, quam ab eorundem multitudine,

dine, quæ saltem magna ex parte inanita per vomitum existimanda est, nihil minus tamen, si cum eodem oculorum rubor pertinax & durabilis conjungatur, longe magis illorum malitiam adauget, utpote quæ cerebrum ejusque meninges in consensum trahere potuerit, & præter irritationem & corrugationem fibrarum nervarum, atque angustum reatum sanguiferorum etiam phlogosim vel inflammationem in iisdem excitare. Porro per vomitum, præsertim violenter promotum, non solum ventriculus ipse, propter sui inversionem, cum stomacho graviter contorquetur & affligitur, sed etiam septum transversum, thorax, aspera arteria, oesophagus, jugulum, facies & caput universum, moleste admodum afficitur, & non leviter impeditur in his omnibus sanguinis reditus per venas, qui impetuosius per arterias, stante illo per vomitum conatu, sursum appellitur, unde non mirum si oculi & vultus impense rubeant, qui tamen sponte sua à vomitu sedari solent, si is bene cesserit, secus vero, si vitium in humoribus, atque in ipsamet textura ventriculi profundos recognoscat, ut interiorē ipsius membranā & nervis coaffectos arguat. Hinc cautos esse oportet eos, qui ad vomendum inepti vel in partibus capitis & thoracis male formati, crebris vomitionibus se subjiciunt, quoniam facile ejuscemodi pericula subeunt, talia tristia exempla legi possunt apud Hippocratem in historiis *Epidemiorum*; præsertim quæ fiunt ab Elleboro, Mercurio, croco metallorum, vitro antimonii, venenis &c.

Cæterum licet Hippocrates *malam* hic tantummodo dixerit, non tamen istos ab exitio immunes putandos, si alia subinde concurrerent virium languorem contestantia.

Dices: Singultus à vomitu sedatur; ergo non erit tantum periculum. *Resp.* Singultus qui fit à mordacitate (ut diximus in contextu) & quantitate forte humorum in stomacho concedo quod sedetur à vomitu: qui vero per vel post vomitum fit, & diu perseverat, sedatur à vomitu nego.

Vide plura apud Cardanum in *Commentario*.

Aphorismus IV.

A Sudore horror non bonum.

SSSSSS 2

Con-

Contentum seu Intentio.

De horrore & sudore.

C*onnexio* : Quemadmodum in antecedenti Aphorismo Hippocrates damnavit singultum & oculorum ruborem, qui ad evacuationem per vomitum factam sequitur : Ita in presenti Aphorismo, damnat horrorem, qui ad evacuationem per sudorem factam succedit.

Hic Aphorismus utpote brevissimus divisione non eget.

Licet sudor totius corporis evacuatio credatur, proxime tamen glandularum subcutanearum humores exhaurit, qui cum à lymphaticis derivent, & isti à sanguine, propterea ab unius exoneratione, reliqui successive diminuuntur, & tandem sanguis ipse, imo & universum corpus, communiōe illa cum partibus reciproca repurgatur, & impuritatibus inanitur; quamobrem à Medicis evacuatio hæc universalis dicitur, & morbis ferè omnibus indifferenter conducibilis. At vero ut omni ex parte proficiat, non solum exigit, ut è toto corpore faciliter prodeat & calens sit, sed etiam ut levamen ægrotanti afferat, & à morbis solvat, vel saltem temperet, unde si fortè non allevet, sed aggravet, imo nova symptomata inducat, vel præterita resuscitet, procul dubio indicium *non bonum* erit, quoniam ex eodem Hippocrate: *Decretoria non decernentia partim lethalia sunt, partim difficilis judicii*: id est mortem vel longitudinem morbi indicant: Quamquam autem multa alia pessimi indicii mala sudorem subsequi possint, meminit tamen hic speciatim Hippocrates *horroris* seu potius horripilationis, quæ sane sæpius illi succedere solet: nam cum, ut dictum, sudor proxime à glandulis subcutaneis emanet, si forsitan is, per cutim sensu præditam excurrens, acore vitiosus, & glutinositate hærens, porulis ejusdem impingatur, & ab ambiente aëre magis & magis recrudescat & figatur, procul dubio eandem vellicans & compungens, horrorem aut horripilationem incutit, quin imo rigescente corporis habitu, humores ad glandulas è partibus internis commoti, repelluntur, & intro remeant, unde postmodum incommoda majora, & præsertim si id accidat ex sudore manante in febribus, quo tempore speratur crisis; tunc enim non tantum priorem morbum non tollit, sed poti' novum & pejorem efficit, elanguente interea natura ac infractis per sudorem viribus: Hinc in multis ægrotis *Epidemiorum*, rigor aut horror post sudorem vel lethalem vel longum saltem morbum demonstravit.

Verum debet horror hic à sudore supervenire ; nam si fortasse præ-
extiterit, ut inter initia febrium intermittentium , malus omnino di-
cendus non erit, velut initiantis futuræ febris prodromus : Criticus
enim sudor in febribus, horrore aut rigore incipit, subsequente calore
& copiosa tandem emanante humiditate terminatur ; discussa scili-
cet integrè ut supra dictum horroris morbifici materia : quod per
Exemplum probat Poëta :

Jupiter obscurum confringens murmure coelum

Mille jacet flammæ, fulmina mille jacet.

Tandem deposita, rabiosi Numinis Ira

Ignæus in liquidas solvitur æther aquas.

Tempestas similis febris est, nam frigore & igne

Incipit, & pluviis, pallida finit aquis.

Symptomaticus è contra nec semel sudore incipit , sæpius au-
tem horrore & frigore terminatur, ob defectum spirituum & virium,
reluctante materiæ copia, cruditate , malignitate, & sic inceptum
evacuationis opus perficere nequeat atque ex reliquiis morbificis
horror subsequitur.

Animadvertendum porro hic est, quod horror (ut alibi dictum)
medius sit inter frigus & rigorem, horror tamen peior est rigore,
quia constat ex duplici materia , bile & viscositate seu lymphæ acc-
escente, estque proprius febrium compositarum : Sciendum tamen,
quod sicut se habent ad invicem calidum & frigidum , ita sudor &
horror : nam ut docet Hippocrates *in libro de veteri Medicina* , ca-
lidum & frigidum , maximè cognatæ sunt affectiones in eo , quod alterum
alteri facillime succedit uti in febre post frigus calor sequitur , & post calo-
rem frigus : ita etiam horrorem & rigorem solet sequi sudor.

Quæres : utrum verificetur Galeni commentum , quod imperfe-
ctas judicationes horror sequatur ? & id non universaliter verificari :
nam retrocedens sudor sæpe citra horrorem necat, vel saltem reci-
divam facit.

Exempla hunc Aphorismum concernentia & alias controver-
sias vide apud Cardanum *in Commentario*.

Aphorismus V.

*Ab insania (seu furore seu mania) difficultas intesti-
norum, aut Hydrops (seu aqua intercus) aut
mentis alienatio, bonum.*

Contentum seu Intentio.

*De Deliriorum supervenientibus Phano-
menis*

Connexio: Cum Hippocrates in antecedentibus egisset de sympto-
matibus ad evacuationes supervenientibus: in hoc presenti A-
phorismo agit de morbis, qui aliis succedunt.

Hic Aphorismus cum simplici habeat conclusionem; divisi-
one non eget.

Etsi non raro morbus morbo succedens majorem malitiam ar-
guat, & extremum Naturæ languorem, quæ proinde debilis reddi-
ta, cuicunque deinceps incommodo succumbat, solent tamen ali-
qui alios peiores solvere, & è gravioribus principes partes occupan-
tibus liberare, aut saltem in leviores, magis domabiles, aut in lon-
gius tempus protrahendos commutare, prout jam dictum *lib. 6. A-
phor. 21. & 48. de Melancholicis & Lienosis*. Debent autem isti ad-
junctam semper habere materiæ peccantis evacuationem, vel sal-
tem decubitus in partem minus nobilem, prout in hoc Aphorismo
Hippocrates memorat, de furore in dysenteriam, vel hydropem,
aut etiam mentis alienationem, commutato.

Cum enim humor furorem & maniam in cerebro efficiens,
alio transfertur, & per intestina, veluti per communem corporis
cloacam foras educitur, etsi vellicando & abradendo dysenteriam
in illis exciter, attamen quia è cerebro deponitur & maniam delet,
omnino salutaris censenda est, tum ratione loci à parte affecta remo-
tissimo, quamquam in ratione convenientis deficiat. Atqui potest
etiam

etiam furor & mania desinere, si ex humore in hypochondriis commoto, cerebrum in consensum trahatur, cujusmodi plerique maniaci, per intervalla furiosi, certis duntaxat temporibus perturbantur & impetunt, si quidem in his necesse non est, ut vitiosus humor cerebrum materia sua occupet, sed satis est, si plexum nervorum in Mesenterio, aut Diaphragmate situm afficiat, & fibrillas eorundem extorquendo, in cerebri medullam desinat, ac talem commotionem excitet, ut phantasmata rerum confundat ac perturbet. Sed & Ecstasim quoque seu mentis alienationem, non dissimiliter parere potest, deturbata materia in fibras nervorum, vel etiam vaporibus cerebro perfuso, quo pacto de humore melancholico acido dicebat Hippocrates, & Galenus, si is nimirum in mentem vergeret, fieri melancholiam seu delirium melancholicum: Inde enim mania remittitur à continuitate, quia per ecstasim interruptitur, & attenuata materia, in halitus & vapores facilius moxmox penitus sit exsolvenda: constat autem fixos & hærentes succos perpetim molestantes, benigniores evadere, si loco moveantur & attenuentur adeoque mitius affligant & per intervalla; ut è contra acres, tenues, mobiles, si crassescant & subsistant, plerumque commutantur in melius resolutis tenuioribus partibus & subactis, & concretis crassioribus, atq; adeo non tam vehementer ferientibus & perturbantibus, quemadmodum de phreniticis, factis comatosis dicitur *primo Proorrheticorum*, consumpta scilicet parte humoris tenuiori, & relicta crassa mitiori. Commutari vero potest mania in hydropem, si humores illi in hypochondriis stagnantes, & nervos extorquentes, cum phantasmatum perturbatione, loco moti, & inter cavitates imi ventris, à nervorum plexibus sepositi, ipsum tumefaciant, & hydropem efficiant, atque hac de causa mania opitulentur.

Nisi etiam fieri contingat, ut melancholici & acidi succi maniam inferentes in serosiores dilati, salino-acidum ex parte dimittant, & in cavum ventris confluentes aquam intercutem inducant; quippe novum non est melancholicos & acidos humores facile commutari solere in aqueos & serosos imo maximam inter utrosque analogiam inesse, ut ab Hippocrate docemur, & constat ex pancreatis liquore, per ductum Wirsingianum in gracilia intestina derivantem. Ab his autem supervenientibus mania symptomatibus, licet bonum dixerit

xerit Hippocrates, non tamen simpliciter tale intelligendum est, sed comparatè solum ad maniam, & cum criticorum motuum rationem sapiunt, nam si fortasse unum aut alterum ex his superveniret, nullatenus interea desinente, aut mitesciente mania, proculdubio gravius esset, siquidem unum alterum non dederet, sed potius augeret: Sic pariter etiam humores alio translati, si tenaciter ibidem hæerent, ac consisterent morbum solummodo in alium morbum commutarent, æque periculosum, ut sunt dysenteria & hydrops, & sua etiam ex parte Ecstasis, quæq; morbi sunt non minus quam mania lethales, quin imo sæpe perniciosiores ac breviores. Debent itaque ejusmodi humerum maniam inferentium motiones criticam conditionem referre, ut ex his illi, vel extra corpus quam citissime expellantur, ut in dysenteria, illæsis interea intestinis; vel alio sepositi ignobiliores partes occupent, nobiles deferendo, sintque mox etiam facile egerendi, vel denique in se ipsis intranea commotione subacti, malitiam deponant, & mitiorem nanciscantur conditionem ut in Ecstasi.

Dices morbi cujusvis chronici mutatio in hydropem est mala, ergo non potest dici hic bona Resp. mutatio est mala secundum terminum à quo nego: secundum terminum ad quem transeat, quemadmodum jam in contextu abunde explicuimus.

Instabis hydrops est morbus lethalis, ergo nullo modo potest dici bona mutatio: Resp. hydrops à frustratione sanguificationis opere aut viscere quocumque modo graviter læso, concedo: à translatione materiæ morbificæ prout hic sumitur nego.

Ad hunc Aphorismum reduci possunt Lib. 6. Aphor. 40. 44. & lib. 7. Aphor. 53. 54.

Plures controversias vide apud Cardanum in Commentario.

Aphorismus VI.

In morbo diuturno (seu longo) cibi fastidium, & syncera dejectiones malum.

Con-

Contentum seu Intentio.

De Prognosi morborum chronicorum è statu ventriculi.

Connexio : In præcedenti Aphorismo Hippocrates ex quibusdam furorem consequentibus bonum fecit prognosticum: In hoc vero præsentè Aphorismo ex consequentibus, cibi nempe fastidio & synceris dejectionibus, post diuturnos morbos, malū facit augurium.

Hic Aphorismus ob simplicem conclusionem nullam patitur divisionem.

Quotiescunque morbi spatium quadraginta dierum transiliunt, & ulterius progrediuntur, ex acutis fiunt chronici seu longi, potissimum ex humoribus lentis, crassis, hærentibus progeniti, vel etiam in locis stagnantes, ubi difficulter fermentationi & secretioni subji- ciuntur, sed potius impacti tenaciores evadunt & veluti gypsei, quemadmodum in glandulis & articulis, si præsertim viribus infractis langueat natura, & sanguis ac viscerum fermenta suo spiritu alkali- no destituta, inertia prorsus evaserint: His ergo si fastidium cibo- rum, nausea, & inappetentia superveniat, malum erit, tum quia præ longitudine, effoetis omnino viribus, per alimenti carentiam, facile est ut natura penitus succumbat, & concidat, antequam morbus fi- niatur; tum quia à ciborum fastidio & nausea stomachicum fer- mentum, valde languidum & ineptum, indicatur, & quod gravi- us, nec à sanguine & cæteris liquoribus, similiter effoetis, ut decet suggestibile, ut proinde etiam si vi & conatu cibi resumptivi inge- rantur, ob illorum inertiam potius corrumpantur, & degene- rent in excrementa magis & magis cumulantia, materiale causam chronicitatis, unde etiam dejectiones synceræ prode- unt. Quamobrem non abs re Hippocrates utrumque sym- ptoma conjunctim in hoc Aphorismo proposuit, quoniam vix fieri potest, ut unum sine altero habeatur: Dicuntur autem synceræ dejectiones, quæ uniformes sunt & impermixtæ, æqualiter fermenta viscerum male affecta significantes, ut ejusdem languo- ris, tam quod in stomachum derivat, quam quod per confluentes

succos, intestinorum excrementorum repurgationi famulatur, vitium denotet, unius modi & homogeneæ conditionis alvi dejectiones efficiat, sive illæ hunc vel alium colorem referant, à prædominio unius vel alterius succi depravati cum cibo commisti. Hinc & flauæ & virides, & pallidæ & ciberales & humorales, vel aliæ esse possunt, quas propterea generaliori nomine voluit Hippocrates synceras appellare. Cæterum esto alterum horum symptomatum satis etiam attestari possit, de malo morborum chronicorum eventu, cum illis superacciderit, juxta ea quæ Celsus *lib. 2. cap. 4.* sententiam inter sua prognostica referens, commemoravit; crediderim tamen voluisse Hippocratem, utrumque hoc loco jungere ut certius mali morbi testimonium desumatur, præterquam quod difficile admodum sit, ex uno alterum non esse consecuturum, si præsertim ciborum fastidium cum nausea, in appetentia, & mala assumptorum digestionem conjungatur, ut sæpius accidit.

Dices I. Nigræ dejectiones sunt synceræ dejectiones, sed hæc teste Hippocrate, multos morbos curant, nempe furorem, quartanas &c. Ergo hic Aphorismus non subsistit? & negando quod omnes nigræ dejectiones sint synceræ quia possunt heterogenei succi esse permixti cum colore nigro: deinde non adest cibi fastidium: ista autem duo debent esse conjuncta, ut dixi in contextu.

Dices II. Cibi fastidium in quartana bonum est, nam ubi ægri valdæ sunt voraces, diutius torquentur; Imo Hippocrates *Lib 2.* Laudat inappetentiam, ergo non est tam mala, vel sibi contradicit. Resp. Cibi fastidium in quartana cum synceris dejectionibus, quando nempe natura occupata causæ morbi concoquendæ, corporis nutritionem negligit, adeoque non appetit, concedo: Nec Hippocrates hîc sibi contradicit, quia illo loco citato loquitur absolute de impuris corporibus; hoc vero loco non, sed respectively: deinde ibi loquitur de convalescentia, hic de morbo, in quo non tantum adest cibi fastidium, sed etiam syncera & frequens dejectio.

Plures controversias vide apud Cardanum *in commentario.*

Aphorismus VII.

Ex multo potu rigor & delirium (seu desipientia) malum.

Contentum seu Intentio.

De Περιγενομένοις seu supervenientibus bibacitatis.

Connexio : Cum in Aphorismo quinto hujus libri Hippocrates mentionem fecisset maniae seu mentis alienationis , quæ delirii species est :

In hoc præsentī Aphorismo de delirio agit, quod ad ebrietatem sequitur, cumque de horrore, qui ad sudorem sequitur Aphorismo quarto etiam dixisset ; In præsentī quoque dicit de Algore , qui sequitur ebrietatem.

Hic Aphorismus ob summam brevitatem non dividitur.

Mala ex ebrietate provenientia, tum mentem tum corpus plurimum turbantia , nemo est qui ignoret, & quidem ex his *lib. 5. Aph. 5.* dixerat Hippocrates subsequenter ab ebrietate aphoniam convulsionem inferre , ac postremo mortem, nisi illam febris præverteret; nunc alia memorat , ex multa potatione symptomata & prognosim inde faciendam : Et quamvis potationem simpliciter recensuerit, nulla factâ liquoris potabilis mentione, non est tamen ut ambigamus, de alio ipsum, quam de vini potu sermone habere voluisse, ut Galenus exponit, & cum eo omnes reliqui interpretes conveniunt; nam à nullo alio liquore, in usum potus deducto rigorem, ac dementiam proficisci posse res in comperto est : dementia enim certe ab aqua nunquam fiet : Itaque ex nimia solum vini potatione , seclusa tamen temulentia ac ebrietate , rigorem & desipientiam supervenientem, malum esse inquit. Quia vero hominum industria factum est, alios æquipollentes liquores pro vino fuisse excogitatos, qui cum immoderatus fuerint epoti, paria incommoda inferant , id ipsum idcir-

co de iis intelligendum suadent, quod à larga vini potatione hic est animadversum, cum non dissimiliter cerebrum & nervi malo afficiantur à vino, quam à cerevisia & zitho (seu specie quadam cerevisiæ) cæterisque aliis artificialibus potibus vinosis, qui identidem cerebrum vaporibus opplent & obfuscant, atque acorem facile redolentes nervos & nervorum fibras vellicant & extorquent, imo spiritus animales acres & tumultuarios progignunt.

Incuitur autem exinde rigor concussione, in iisdem inæqualiter excitata ab acore ipso irritante, & à natura impellente per contractionem & corrugationem earundem partium nervearum; Desipientia vero à turbata fibrarum dispositione & spirituum animalium violenta commotione, qui nimirum à potu vini largiore turgentes & efferi, imo confertiores, mobiliiores & acres reddit, non suaviter & blande irrigando ac leniendo foveant, sed è contra impetuose irruendo, omnia conturbant, irritant, & exagitant, unde postmodum delirium.

Junxit autem utrumque non inconsulto Hippocrates, ut malum exinde rationabilius prædici queat, quia per rigorem malum in nervis & fibris membranarum; per desipientiam vero damnum in spiritibus, & in mente, & cerebri substantia portenditur, quæ sanè quantum faciant, ad vitæ tuitionem, nemo est qui nesciat.

Nullatenus autem hic reticebo, quod à bibacibus quibusdam, in usum inter epulas, ne remulentiam incurrant ac pro more largissimè bibant, invecum est, vinum etsi potentissimum, saccharo commiscere, ita enim confitentur illud minus, imo nullatenus inebriare, forte quia per sachari mixtionem ejus spiritus inspissantur, & dulcore coerciti, coarctantur adeo, ut propterea minus, vel nullatenus cerebrum feriant; qua etiam ratione fit, ut vinum colatum dictum, seu non fermentatum, aut etiam mustum ipsum, paucissimos ac inertes admodum spiritus per destillationem emittat, ac largius adhuc epotum minimè inebriet, licet ventrem inflet, & in ingentes flatus erumpat.

Etiam hoc notatu dignum est, rigorem non raro ex largo quoque aquæ gelidæ potu supervenientem, imminentis morbi esse solem prænuncium, prout non raro in praxi observatum est in quibusdam, qui, cum à potu aquæ frigidæ, etiam à prandio & cæna, rigeret, futuram sibi prædicebant infirmitatem, potissimum à stomacho, vel
imo

imo ventre procedentem, & saepius etiam cum febre; forte quia in fracta, vel deficientia ventriculi, & intestinorum fermenta, ab aquæ potu languidiora reddita, chylosim non bene moderabantur, nec melius excrementorum alvi repurgationem, unde postmodum febris & alia ventris incommoda.

Quæres 1. Cur quidam à cibo frigeant alii non? *R.* Illorum stomachum debilius concoquere & digerere, ob debile fermentum & tonum languidum ventriculi, hinc spiritus aliunde revocantur ad eundem, ad digestionem secundandam, relictis partibus exterioribus algidis: Hi vero utpote fortes & robusti, hac spirituum succursu non egent.

Quæres 2. Quomodo illud Platonis in Timæo sit intelligendum, ubi dicit; Vinum calefacit corpus & animam? *R.* Per animam intelligi spiritus.

Quæres 3. Quomodo vinum generet frigidos morbos; Seu cur multa potatio vini, primum frigus pariat, cum tamen vinum calidum sit? *R.* Cum Aristotele 3. Problem. quod humidum plurimum, seu in copia, & quantitate, non calefaciat, sed sponte refrigeratur, ut sudor ex veste calida cum plurimus fuerit: Ergo etiam vinum, cum ob multitudinem, à calore naturali vinci non possit, ad naturam suam qualem habet antequam hauriretur, redit; sicque totum corpus refrigerat ut testatur Galenus 3. *de temperamentis*. Aliter adhuc hoc ipsum explicat & dicit: Proinde nec vinum ipsum semper calefacit animal, æque ut nec oleum flammam accendit, tametsi aptissimum sit ignis nutrimentum: Imo si imbecillæ & exiguæ flammæ, confertim multum oleum infundas, suffocabis eam & prorsus extinguēs potius quam ut augeas: Sic pariter & vinum ubi plus bibitur, quam ut vinci possit, tantum abest, ut animal calefaciat ut etiam frigidiora vitia gignat nempe cōpressiones, obstructions, caloris suffocationes, debilitates, spirituum interceptiones, unde frigiditas & tandem etiam ipsa mors. Hanc Philosophi rationem, à ratione esse alienam adeoque vix non absurdam dicit Cardanus *in Commentario*.

Neq; enim (inquit) par exemplum est, de oleo extinguente flammam, quia illam suffocat; & de vino in corpore nostro, quod non nisi quia frigidum refrigerare potest, non prohibere respirationem & exhalationem, ut oleum in igne, sanus mente dicat.

Plures controversiæ videri adhuc possunt apud Cardanum in
Commentario.

Aphorismus VIII.

*A Tuberculi introrsum ruptione exolutio (seu virium
dejectio) vomitio, & animi defectio fit.*

Nota : Conferri potest hic Aphorismus cum Aphorismo 41. Libri sexti.

Contentum seu Intentio.

De Prognosi rupti abscessus interni.

Connexio : Cum in antecedenti Aphorismo Hippocrates egisset de symptomatibus seu supervenientibus ebrietatis ; In hoc præsentis Aphorismo loquitur de symptomatibus seu supervenientibus, rupti abscessus.

Hic Aphorismus ob simplicem conclusionem non dividitur.

Accidentia à tumoribus internis disruptis exorientia, hic ulterius memorat Hippocrates, atque prognosim ex iisdem recenset, quam malam & infaustam ait, si subinde vomitus animi defectio, aut exolutio consequantur : hinc prognosticus est præsens Aphorismus, & summo opere in praxi medica utilis.

Tumores in humano corpore progigni, non tantum externos, sed etiam internos & ratio manifestissima suadet & experimenta plurima ex dissectorum cadaverum observationibus, certo certius attestantur. Eos autem non solum, in viscerum parenchymatibus, jecore, liene, renibus, utero, verum etiam in glandulis, quibus totum fere corpus constructum & contextum est, tum majoribus & conspicuis tum etiam parvis & inconspicuis seu miliaribus, ac solo microscopio observabilibus, cunctis plane in confesso est, adeo ut plerique, nec sine firma & constanti ratione arbitrentur, raro febres acutas, aliosque graves & calamitosos morbos accidere, qui ingenitum tuberculum seu vomicam (quæ potissimum hic intelligitur) comitem non habeant, vel pro causa, sive efficiente, sive foveante non recognoscant.

Quo

Quo fane videtur Hippocrates respexisse, cum dixit omnes morbos, vel ulcus esse, vel ulceris conditionem præferre, ut alibi dictum.

Quoties autem accidit, interius genitos tumores suppurari, ac postmodum disrumpi, nisi prompte materia suppurata exitum habeat, necesse est alicubi deponi & hære, & quidem si in glandulis; quæ uti spongiosæ, facile quoscunque humores excipiunt facillimè corruptionem inferet, & symptomata plane exitiosa; si vero in ventriculum feratur, vomitum excitabit; si in thoracem & pulmonem tussim, anhelitum, suffocationem; si in intestina diarrhoeam, vel dysenteriam; si in abdominis cavum hydropem; si in renes aut vesicam, stranguariam, dysuriam, ischuriam, & sic deinceps alia & alia incommoda pariet, prout in unam vel aliam partem abscedet. Ex his autem specialim memoravit Hippocrates, *virium exsolutionem, vomitionem & animi defectionem*, quæ videntur esse symptomata specialiora diruptionis, ad cavum thoracis & præcordiorum pertinentia, unde gravius timere sit vitæ periculum; siquidem quæ fit ad intestina, renes, vesicam & abdomen, levius præ cæteris vitam incommodat, etsi etiam mala sit.

Silentio autem prætermisit Hippocrates prognosim, quam in cæteris antea præsignaverat, forte quia implicite in his continebatur, vel facile ab iisdem deduci poterat; quam obrem recte Mercurialis hoc loco, *sat fuisse, inquit, dicere fieri, cum sint semper perniciofa quomodo cunq; fiant; sunt enim hæc omnia mala, si separatim, & multo magis si conjunctim capiantur; tum quia significant magnitudinem tuberculi, & pravitatem illius materiae, lociq; ad quem missa est præstantiam; tum quia cuncta hæc tria symptomata, tam per sese, quam consecutive, unum quodq; separatim, vires magis atterit, atq; alios graves affectus producere potest.* Quin & grumi sanguinis, ex rupto apostemate, ulcus ipsum sordidum, facile in gangrænam terminandum, continuus per eas partes humorum effluxus, fistulæ, cuniculi sinus, & alia plura, quæ supervenire solent, vitæ periculum adaugent; ut dixit Hippocrates lib. 6. Aphor. 27.

Quibus omnibus unica spes est evadendi, per iteratas potiones vulnerarias adjecto spermate ceti, mumia, & aliis similibus ex praxi delibandis.

Dices: Exsolutio & animi defectio, videntur esse eadem, ergo gratis distinctim ponuntur? &. Exsolutionem esse quid minus quam animi defectum sicut lypothimia levior est affectus quam syncope, licet uterque gravis sit.

Apho-

Aphorismus IX.

A Sanguinis profluvio desipientia, aut etiam convulsio malum.

Contentum seu Intentio.

De Prognosi hæmorrhagiarum.

Connexio : Cum Hippocrates in antecedenti Aphorismo egisset de symptomatibus quæ ad interim abscessus ruptionem pertinent, quatenus nimiam evacuationem sequuntur : In hoc de illis symptomatibus agit, quæ ad magnam sanguinis effusionem fiunt.

Hic Aphorismus cum brevissimus sit divisionem nullam admittit.

Ex sanguinis fluxu convulsionem aut singultum consequentem, malum esse scripsit Hippocrates lib. 5. Aphorif. 3. in hoc Aphorismo addit etiam desipientiam : Unde propterea crediderim, sejunctim unum ab altero, si hæmorrhagiæ superveniat, malum portendere, quamvis Celsus *Lib. 2. cap. 8* utrumque sociaverit ; & quidem convulsio sola, aut sola desipientia satis superque mali morbi testimonium esse possunt, cum cerebri & nervorum læsionem arguant, quæ sua natura mala semper est : quod si præterea simul una copulentur multo deteriora erunt ; quare idem Celsus, utrumque conjungens non solum malum, sed *mortis periculum* adjecit. At vero hæc non dixit Hippocrates, supervenire posse cuicunque sanguinis evacuationi, sed illius profluvio duntaxat, seu largæ & copiosæ hæmorrhagiæ, de qua etiam meminerat *cit. lib. 5. Aphorism. 3.* nam si modice sanguis fluat, fieri procul dubio nequit, ut desipientia vel convulsio sequatur, quin imo sæpius accidit, ut sanguis moderate, præsertim per nares, vel uterum, vel per hæmorrhoides profluens, multum levaminis afferat ægrotantibus, ut etiam ex pluribus locis Hippocratis deducere est. Num autem de sola hæmorrhagia dictum hoc retulerit, an etiam de aliis aliarum partium evacuationibus cruentis, licet dubitari possit, probabilius videtur & quocunque sanguinis immodica evacuatione, cerebrum

brum præ cæteris visceribus magis afficiatur & langueat, attenta præsertim ejusdem conditione, licet quæ è naribus procedit; proximius cerebrum debilitet, quæ de causa non solum malum esse indicium censuit Celsus, sed etiam exitiosum dixit *cit. loco.*

Desipientia autem seu dementia, quæ hic notatur, ea potissimum videtur intelligenda, quæ stuporem, stultitiam, & sensuum omnium hebetudinem significat, ut in mente captis, obingentem virium præsertim animalium jacturam.

Quæres Cur Hippocrates mentionem non fecerit deliquii animi, quod maxime sequi solet effusiones sanguinis? &c. Quia deliquium non ita remotum est, imo remedium est effusionis; sequitur autem maxime deliquium animi, cum repente sanguis effluit; & hanc sequi solet convulsio, delirium vero cum paulatim sanguis effluit & tamen durat.

Plura qui desiderat adeat Cardanum *in suo Commentario.*

Aphorismus X.

*Ab ileo vomitus, vel singultus, vel convulsio vel delirium
(seu desipientia) malum.*

Contentum seu Intentio.

De Prognosi ilei.

Connexio: Quemadmodum in præcedenti Aphorismo de sævis symptomatibus quæ à sanguinis effusione proveniunt tractavit Hippocrates; Ita in hoc præsentis Aphorismo de illis accidentibus, quæ ileo superveniunt, æque gravibus sermonem instituit.

Hic Aphorismus obbrevitatem & simplicem conclusionem non dividitur, ileos latine volvulus, est morbus in quo nil quod superne assumptum est, ad inferiora & ad alvum descendit, sed potius sursum revolvitur & per os regeritur, obstructo & constipato, aut etiam contorto, atque inflammato intestino ileo, à quo morbus ipse nomen desumpsit: quamquam autem intestinali hujus affectionem specialius morbus iste volvulosus comitetur, aut consequatur,

Uuuuuu

non

non tamen omnino vomitus necesse est, ut simul una jungatur, cum fieri etiam possit ut non tantum ileum intestinum, sed etiam reliqua superiora compertiantur dolore, cruciatu, torminibus, inflatione, febre, siti, inappetentia aliisque symptomatibus, citra vomitum, qui etsi postmodum subsequatur solius cibi assumpti, vel humoris in cavo ventriculi stagnantis esse solet. At vero si vomitus deinde stercorearius accedat, aut etiam cum singultu, omnino lethale esse consuevit, de quo hic Hippocrates: tunc enim intestinum ileon tam crudeliter vexari indicio est, ut irritatione perpetim inducta, fibræ illius laceratæ distorqueantur, & veluti convulsione affectæ, sursum retrahantur, ac motum peristalticum penitus conturbent & invertant, unde postmodum faeces in cellulis & constrictibus illius residentes, evomantur, ex citato simul una singultu.

Perpensis præterea causis, è quibus ileos proficisci solet cum vomitu, plane ab illis periculum vitæ magis adaugetur: nam sive ab inflammatione contingat, sive ab ejusdem contractione ac tortura, aut etiam prolapsu, ut in enterocèle, sive à facibus induratis, aut viscoso & hærente humore, sive ab alio quopiam vim habente convellendi, & fibras intestinorum proritandi, atque distorquendi, semper exitum minatur, ut historiis quoque compertum est & praxis ipsa pluries ostendit, quamobrem non immerito funestum signum hic ab Hippocrate proclamatur.

Quod si ulterius cum vomitu singultus adjungatur, longe gravius malum indicitur tum ex natura singultus, qui ad convulsionem refertur, tum ex conditione materiæ ventriculum & stomachum impetentis, planè mordicantis & acris; tum denique ex ratione partis affectæ, ad vitæ sustentationem penitus necessariæ (qualis est ventriculus) & propter nervos quibus intexitur innumerabilibus, magnam cum cerebro connexionem habentis, ut alibi dictum.

Hinc non solum Hippocrates singultum supervenientem malum dixit, sed etiam convulsionem, quæ procul dubio periculosior censenda erit, ob cerebri & nervorum inde immediate prodeuntium affectionem. Atqui de sapientiam quoque suboriri posse ex ileo, illumque pari modo funestum signum esse, nulli dubium, tractis nimirum in consensum partibus, ad animales operationes pertinentibus, depravatis spiritibus, & turbatis ac confusis phantasmatibus, imaginativam, & æsti-

æstimativam dirigentibus ac moderantibus. Quæ cum clariora sint, quam ut fusiori sermone egeant, non est ut diutius in his immoremur; solum id animadvertere juvabit, unum quodque horum symptomatum, satis esse, ad indicandam morbi Ilei pravitatem & contumaciam; quamquam unum ab altero profectum, & intra quatridentum lethum attulisse non raro observatum sit.

Quæres: unde cognoscatur quod Ileos intestina tenuia, an crassa afficiat? Respondet Fonseca vomitum chyli sequi, ubi malum est, in tenuibus intestinis sed fæcum, ubi in crassis consistit.

Plura lege in Cardano *in Commentario*.

Aphorismus XI.

A pleuritide (seu morbo laterali) peripneumonia (seu inflammatio pulmonis) malum.

Contentum seu Intentio.

De prognosi pleuritidis.

C*onnexio:* Cum in præcedentibus Aphorismis de symptomatibus supervenientibus ad varia mala tractasset Hippocrates, ad prognosin: In hoc præsentī Aphorismo agit de pulmonia pleuritide succedente, in qua mutatione, morbus morbo succedit.

Hic Aphorismus ob summam brevitatem non patitur divisionem.

Pleuritis & peripneumonia adeo inter se affines morbi sunt, ut sæpe unus alterum mentiri soleat, quin imo plerique utrumque confundere consueverint.

At quamvis inter initia, diversimodè molestant, & distinctas partes, Pleuram scilicet, vel pulmonem afficiant, unde postmodum à partis affectæ diversitate, Pleuritis aut peripneumonia vociterur pleurumque tamen, procedente morbo ac peioribus symptomatibus comitato, citra suppurationem & sputum, etiamsi antea partes à pulmone distantes affecerit, facile in ipsius pulmonis substantiam repere potest, & peripneumoniam seu inflammationem pulmonis exci-

tare; cumque hic affectus, majus vitæ periculum minetur, ob majorem cum corde viciniam, & cum toto corpore consensum, per arterias inde latiores excurrentes, ac recta in cor, ejusque ventriculos & aortam sanguinem asportantes; propterea transitus pleuritidis in peripneumoniam longe perniciosior existimatur; id quod considerans in hoc Aphorismo Hippocrates, dicit; *à pleuritide peripneumonia malum.*

Dignoscitur autem his præsertim indiciis transitus hic ex pleuritide in peripneumoniam à febris exacerbatione majori, à difficultate spirandi magis adaucta, à tussi profundiori, vel nulla citra screatum, à genarum rubore, ab urinæ substantia magis flavente & crassa, atque à doloris sensu, qui prius acutus & pungens, mox vero gravis & pre-mens evadit cum majori anxietate, & corporis inquietudine.

Tunc itaque pleuritis in peripneumoniam commutata mala dicitur, cum illa non desinente hæc supergreditur: at vero si cessante priori, posterior adveniat, licet bonum simpliciter non sit, non tamen omnino malum esse solet, si præsertim materia inflammationem inferens aut fovens, perducta ad pulmonem, atque ad ductus ejusdem tracheales, possit subinde facilius & promptius extuffiri & excreari. At vero cum pleuritis seu inflammatio pleuræ, non omnino desinit, sed potius majori sua expansione, etiam in pulmones diffunditur & una simul cum inflammatione pleuræ, pulmonem quoque ipsum, secundum alterutrum saltem lobum, inficit ac tumefacit, tantum abest, ut commutetur, & aliquatenus prosit, ut potius malum malo gravius adjiciat, & pejora vitæ incōmoda pariat, de qua re hic sermo est, unde merito scriptum *malum*, imo & fortasse pessimum ac lethale asserere licet, eo quod subinde febris, quæ utrumque morbum comitari solet augeatur, spirandi difficultas increascit, & quod gravis, cor & vitale robur magis & magis infringatur & hebescat; quod si præterea genæ, exinde rubcant, sputum, vel supprimatur, vel crudum, rotundum, flavum, viride aut nigrum, & non nisi maximo cum conatu & educatur, vel in lethum desinit, vel in empyema ac phthisim commutatur, & postremo in ipsam mortem.

Sed an quod Hippocrates hic dicit, de inflammatione pulmonis ex pleuritide ampliandum quoque sit è contra in pleuritide, si in hanc peripneumoniā transeat, ut *in coacis prænotionibus*, ubi peripneumonia pleuritidis succedanea, tutior primigenia dicitur, & cure ejusmodi trans-

transmutationem Hippocrates tacuerit? Crediderim dicendum illam siluisse., non irrationabiliter Hippocratem veluti rarissimam & insuetam, quæ si aliquando forsan visa sit, pari imo peiori prognostico esse judicandam, cum subinde conjectura pateat, jam pulmonem ex integro fuisse inflammatum, ut proinde incapax novi affluxus humoris, illum excipere non potens, alio divertere faciat, quin imo beneficii educendi per sputum & tusim humorem, penitus desperatur, à superveniente Pleuritide, quod facilius expectandum erat, ex sola peripneumonia.

Qua vero de causa Pleuritis in peripneumoniam transire possit, non aliunde crediderim, quam ex impedito magis minusve in partibus pectoris sanguinis circuitu: cum enim in apicibus solum arteriolarum sanguis hæret, cæteræ verò liberæ & expansæ sunt, ac præter fluentem sanguinem admittunt, ac deducunt, levis planè inflammatio fit, & pleuram non excedit; at vero si illæ excipiendo sanguini satis non sint, & adhuc ulteriori egent spatio, forte quia sanguis crassior, acidior, glutinosior, aliusve amplitudinem exigit majorem sed latiore, tum in adjacentes partes excurrens adhuc in pulmonem divertitur, illiusque substantiam tume- facit ac inflammat: Unde duo magni morbi hominem vincunt, quorum alteruter sufficiens ad occidendum ut testatur Hippocrates *Lib. de Affectionibus* dicens: *cum morbus alteri succedit pleurumque occidit.*

Quæres: Utrum omnis Peripneumonia sit æque periculosa? & in rigore loquendo quod sic: Sed tamen mitiorem illam, quæ à sanguine crudiori fit, esse, quam quæ à sanguine æstuante seu bilioso fit, hæc enim dicitur Erysipelatosa quæ pessima est.

Aphorismus XII.

A Peripneumonia (seu pulmonis inflammatione) phrenitis malum.

Uuu uuu 3

Con-

Contentum seu Intentio.

De Prognosi Peripneumonia.

C*onnexio*: Sicuti facile ad pulmonem transit pleuritis, quando ad malum vergit: Ita ex pulmonia facile Phrenitis sequi solet; adeoque rationabiliter Hippocrates hunc Aphorismum post præcedentem proposuit.

Hic Aphorismus pariter ob brevitatem summam non patitur divisionem.

Quamvis Pleuritis & peripneumonia, morbi sint inter se adeo affines, ut vices invicem commutent, & unus in alterum transire possit, frequentius tamen mutatio in pejus, à superveniente nimirum graviore & periculosiori contingens, juxta seriem ab Hippocrate hic notatam, fieri solet, ut ex pleuritide peripneumonia, atque ex peripneumonia phrenitis accidat.

Hac enim ratione per partes successive nobiliores, & magis ad vitam sustentandam necessarias, periculum adaugetur & propius ad mortem acceditur: Pleuritis autem & peripneumonia, ita à pleurisque ut priori Aphorismo dictum, confunditur, ut ex utrisque commune nomen, apud quosdam factum sit, & Pleuro-pneumonia non incongruenter vocitetur.

Cum igitur à Peripneumonia transitur in phrenitidem, aut hæc illi superaccidit ab affectione partis vitalis trahitur in consortium morbus alius partis animalis & cerebri, ubi phlogosim & inflammationem pariter exortam suspicari irrationabile non est, eo ferè modo, quo pulmo ipse affectus creditur: Etenim sæpe numero evenit, ut quemadmodum partes externæ erysipelate vexatæ aliis consentientibus & vicinis id ipsum comunicent quod patiuntur, ita & partes internæ inter se invicem consentientes: Sed & fit quoque, ut Erysipelas, veluti per saltum diffundatur, & has & illas partes, non raro etiam dissitas, indifferenter infestet, at in eo quod *volaticum dicunt*: At qui maximus inest consensus per arterias, venas & nervos, inter thoracem & pulmonem cum cerebro, ut patet, estque & hoc notatum in anatome. Si igitur præter pulmonis inflammatio-

nem,

nem, cerebrum quoque vel ejus meninges, & plexus, accidat inflammari, unde Phrenitis exoriatur, nullum dubium, mali morbi testimonium esse, & ægrum de vita facile periclitaturum.

Porro in his, siue urinæ turbulentæ compareant, siue è turbidis mox repente tenues fiant, aut etiam quæ inter initia concoctæ videbantur, post quartum diem attenuentur, aut aliter in excretis confusæ variant, mortis prænuntiæ esse solent, ut dicitur ab eodem Hippocrate *Lib. Coacar. prænotionum.*

Aphorismus XIII.

Propter ardores vehementes (seu æstus fortes) convulsio, aut Tetanus malum.

Contentum seu Intentio.

De Effectibus uredinis seu ardoris fortioribus.

Connexio : Cum de supervenientibus & morbis & symptomatibus ab Hippocrate sit institutus sermo, & in præcedenti Aphorismo, de Phrenitide pulmonia superveniente egerit : In hoc præsentis Aphorismo de convulsione verba facit quæ ardores excipit.

Hic Aphorismus ob brevitatem nullam patitur divisionem.

Quo autem pacto legendus sit hic Aphorismus, non satis adhuc constat, cum & neque inter veteres expositores convenisse scribat Galenus *in commentario*, qui fatetur Marinum insignem Aphorismorum interpretem, pro *æstibus*, maluisse scribendum *vulnera*, ut propterea ex vulneribus potius fortibus, quam ex æstibus, convulsiones oriri posse fuerit arbitratus, cum nusquam rationabiliter constare possit, ab æstibus fortibus convulsiones proficisci, aut quinam unquam intelligendi sint, ejusmodi fortes æstus, an ab ambiente aëre, an vero à vehementibus medicamentis, sudorem potissimum inferentibus vel etiam unctionem & Escharam excitantibus, & aliis.

At

At sicut hæc versio suas patitur difficultates, ita nec altera Marini, suis aliis ex adverso caret; Quis enim unquam veluti rem notatu dignam, & inter Aphoristicas sententias collocandam arbitrabitur, ex fortibus vulneribus convulsiones oriri posse, aut ortas inter mali morbi testimonia reponere dubitabit? cum tamen alias, & pluries id ipsum Hippocrates, memoraverit, sitque cunctis jam satis superque notissimum, multoties etiam observatum in praxi ab hypocaustis & laconicis, ex thermis naturalibus, sudore nimium & vehementer promoti, excalefacta plus justo, corpora exaruisse, ac nervorum & musculorum tensionem passa esse; itemque alia ab usu causticorum medicamentorum supra partes sensu exquisito præditas applicatorum, contractas & convulsas illas remansisse, ut & ab usu Mercurialium; quo circa non omnino impossibile putandum, ab æstibus fortibus, cæterisque extrinsecis calorificis immoderatis convulsionem ac Tetanum posse proficisci: unde Celsus *Lib. 2. Cap. 7.* hanc Hippocratis sententiam ita accepit, ut verteret: *Post magnos fervores corporis, nervorum rigor aut distentio malum.*

Sed etsi ab his & aliis similibus causis externis convulsiones excitari posse crediderim, non videtur tamen hoc loco Hippocrates, voluisse istas ab illis deducere, sed duntaxat, quæ ab internis causis progignuntur, cum hic de morbis, aliis morbis supervenientibus sermonem habere, à principio hujus libri sibi constituerit: Hinc rationabilius fortes æstus exponere conveniet, febriles, & quales ab ardentibus inferuntur, quæ causones & æstuosæ febres appellantur, & aliquando colliquativæ fiunt. Et quidem ab his plurimum commoti & fermentescentes humores, non tantum calore intensissimo, & siti inexstinguibili, ægotantes excruciant sed etiam acredine ac molestia intolerabili, partes cunctas corporis exagitant, laceßunt & divexant, ut muscoli & nervi, rorida illâ ac blanda substantia exhausti, rigidi, & contracti fiant; atque hinc animadversione dignum sequitur, quare Hæctici & Tabidi effecti, etiamsi toto corpore exarefacti evaserint, nullatenus tamen convelluntur, qui non à siccitate (ut vulgo creditur) quæ sane in illis extrema est, sed potius ab humorum acritate & irritatione, convulsio nervorum & musculorum evenit, ut alibi adnotavimus. Quod autem febres ardentes, fortes æstus ab Hippocrate appellari soleant, præter voces græcas πυρε, πυρεξία, πυρετός, qui-

quibus ipse utitur ad significandas febres ardentes deducitur quoque ex eodem *libro de medicamento purgante*, ubi in fortibus æstibus cavendum à catharticis consulit.

Hinc etiam expositioni melius cohæret Celsus antea memoratus *Lib. 2. cap. 7.* hanc Hippocratis sententiam afferens, dum inquit: *Pest magnos fervores corporis, nervorum rigor aut distentio malum;* quandoquidem ibi de his, quæ intrinsecus in singulis morborum generibus accidunt, sermonem facit.

Sed quid est, quod Hippocrates sejunctim hîc scripserit convulsionem à Tetano, quem Latini vertunt nervorum distentionem, cum tamen Tetanus ad convulsiones referatur, sitque affectus compositus ex opisthono & emprostho? & dicendum super addidisse Tetanum convulsioni simpliciter dictæ, veluti morbum simplici convulsione deteriorem, eo quod totum corpus, tum anterius tum posterius rigidum, contractum & immobile reddat; unde quodam modo ad naturam catalepsis videtur accedere, in qua præter contractionem & tensionem nervorum & musculorum, corpus univsum rigidum & inflexile fit, à nerveo liquore & spiritibus, gelu fere coactis.

Controversiæ circa hunc Aphorismum in contextu sunt solutæ.

Aphorismus XIV.

Propter plagam (seu lctum) in capite acceptam, stupor (seu obstupescencia) aut desipientia, malum.

Nota: *Similis Aphorismus est hujus libri 58.*

Contentum seu Intentio.

De Prognosi vulnerum capitis.

Connexio: Cum in præcedenti Aphorismo de convulsione, quæ ardoribus supervenit, mentionem fecisset Hippocr. In hoc præsentis Aph. de stupore seu desipientia agit, quæ ad capitis percussionem sequitur, quæ symptomata convulsioni sunt affinia.

X x x x x

Hic

Hic Aphorismus ob simplicem conclusionem & brevitatem non eget divisione.

Capitis vulnera & contusiones, undecunque contingant, vel inflicta sint semper metuenda; innumeris id attestantibus experimentis & confirmante ratione; quoniam primum ratiociniis animæ domicilium conturbant & offendunt quamvis pro regionum varietate magis & minus molesta sint, & serius vel tardius curari soleant, plurimum ad hoc concurrente ambientis aëris conditione ac qualitate: quod & luculenter quoque deducitur, ex pluribus Hippocratis, Galeni, aliorumque clarissimorum Authorum testimoniis: At vero ubi præter generalis hujus timoris causam manifestam, comparent nuper læsi interius cerebri indicia, quæ symptomata sunt veluti pathognomonica, concussæ ejusdem substantiæ, & vitiatæ structuræ, tunc non tantum graviora, sed etiam periculosiora illa existimantur.

Quamobrem scite admodum Hippocrates hoc loco scripsit; *obstupeſcentiam & deſipientiam*, quæ solent esse ejuscemodi læsionis symptomata frequentiora, illis supervenientia, malum esse, ut fusius *Lib. de vulneribus capitis* refert, & admonet. Neque solum à re gravi contundente, ut ferro, lapide, ligno vel alio, sed etiam ab impetente quovis violenter id accedisse plurimæ testantur historiæ: notabilior autem est, quæ scribitur ab eodem Hippocrate, de virgine illa Nerii filia s. *Epidem.* quæ lata manu ad synciput percussa, vertigine capta est, & nona periit: & de eo qui lapide in caput percussus, à Macedone curruit, secunda die voce destitutus, tandem mortuus est; ut & Autonomus in Omilo lapide ex manu ictus, & decima sexta pariter defunctus.

Quoniam vero hic speciatim meminit, *letuum*, videndum quid ex his magis quam ex vulneribus cerebro contingat? Et sane noxa quæ obstupeſcentiam vel deſipientiam infert non aliunde provenit, quam ex interna totius substantia cerebri concussionem & perturbationem qua nimirum illius fibræ, poruli, sinus, spiritus, & roridus ille liquor, qui ejus substantiam irrorat & vigorat perturbantur, concutuntur, exagitantur, & è suis loculis dimoventur. Sed & aliquando etiam accidit, ut cerebrum in sua constitutione ac textura depravetur & dissolvatur, vel etiam è diruptis venulis aut arteriis sanguis gut-

guttatim effluat, atque vel in eadem cerebri substantia, vel in meningibus & plexibus restagnet, ut propterea mole aggravet, aut putrefactione corrumpat, motum fluidorum corrumpat, motum liquorum interrumpat, & mentem & mentis operationes heberet, ac dementet. Hinc autem fit, quod gravior & periculosior non raro sit ictus & contusio, quam simplex vulnus capitis, si præsertim per illud prodire possit, quidquid extra vasa effluxerit, & pus exinde proveniens exitum habeat.

Accedit, quod multoties ex ictibus, non ipsa pars percussa, aut contusa, sed opposita lædatur, & frangatur, unde occultum nimis ubi, & cui medela adhibenda sit, quod secus contingit in vulnere, dummodo fracturam, aut vehementem contusionem adjunctam non habeat: quamobrem ex contusionibus, periculosiores fiunt cerebri læsiones, veluti interius inductæ, nec sensibus conspicuæ & apparentes, ut compluries est observatum.

Quamquam autem innumera propemodum mala, ex ejusmodi ictibus & contusionibus capitis accidere possint, speciatim tamen meminit in hoc Aphorismo Hippocrates obstupescentiæ & desipientiæ; siquidem istæ frequentius ex illis accidunt, ob enarratas causas. A concussione enim cerebri, atque ab effusione sanguinis, & alterius liquoris, extra propria conceptacula, facilius cerebrum gravatur, atque exprimitur, unde postmodum obstupescencia, qua nimirum icti, vel vulnerati, attoniti, immobiles ac veluti apoplectici remanent. Desipientia vero hic ab Hippocrate notata, non ad Phrenitidem vel maniam referenda est, sed ad dementiam seu stupiditatem, per quam mens stupefacta nil recte agit, vel cum sopore, confusione & ignavia, ut in vacillantibus, temulentis & multo vino repletis.

Denique dixit Hippocrates *malum*, non lethale; quia etsi sæpe sic affecti pereant, fieri tamen potest, ut revalescant & salventur, si nimirum cerebrum sua substantia illæsum, solum in suis vasis sanguiferis aut lymphaticis noxam patiatur, & sanguis ex illis effluxus, exitum habeat per aures, nares aut os, ut in multis visum: tunc enim nullibi restagnans cerebri substantiam nec comprimit, nec corrumpit, adjuta potissimum natura à traumaticis & vulnerariis medicamentis, de quibus alibi dictum.

Cæterum malum semper est stupere ac dementari ex capitis vulneribus aut ictibus, quoniam ab his cerebri substantia concussa & vitata significatur, quæque tum ratione sui, tum ratione sanguinis effusi facile in corruptionem abit, niper patentes suos ductos statim se ipsum exoneret, & commotum & turbatum humorem repurget & erogat. Neque à non apparente extrinseca capitis læsione quis certo conjiciet, nullam internam cerebro commotionem fuisse illatam; quandoquidem non raro etiam compertum est, sine ulla apparente contusionis aut vulneris signatura, cerebrum male affectum, & conturbatum fuisse, atque etiam repente post aliquod tempus mortem intulisse, nullo interea præcedente sensibili symptomate.

In his igitur magnis læsionibus, non tantum capitis, sed & cæterarum partium, statim sanguinem mittere expedit, & tenuissima diætâ uti, & aperire vulnus, & secare aut trepanare cranium, præsertim si ea in parte vel os fractum sit, vel disruptum aut incisum.

Plures aut similes controversias super hoc Aphorismo lege apud Cardanum *in Commentario*.

Aphorismus XV.

A sanguinis sputo puris sputum, malum.

Nota: Similis Aphorismus est 78 hujus libri.

Contentum seu Intentio.

De Prognosi Hemophthysos.

Connexio: Cum hic liber sit de supervenientibus potissimum scriptus ab Hippocrate, proinde sicut in antecedentibus, ita & in hoc præsentem Aphorismo de superveniente signo agit & pro Exemplo adducit sanguinis sputum, symptoma grave & horrendum.

Hic Aphorismus ob suam brevitatem non dividitur.

Dixerat *libr. 4. Aph. 25.* Hippocrates *sanguinem superne quidem efferri, qualiscunque sit, malum*: Nunc superaddit, illum superne ejectum nisi citò & sponte sua desinat, in pus verti atque ab illius sputo,

pu-

puris sputum evenire, atque adeo priori malo, aliud pejus & gravius succedere, quod est suppuratio & empyema.

Et quidem sputum hic memoratum, non simplicis spuitionis, aut excreationis intelligendum, veluti ex faucibus & ex faucium glandulis erumpens, sed quod è pectore per tussim ejicitur, quemadmodum omnes interpretes exponunt; huic enim duntaxat puris sputum supervenit, & deinde phthisis de qua sequens Aphorismus subnectitur. Nec aliter pus verum fieri potest nisi sanguis è suis vasis exiliens in pectoris cavo, aut alibi concreseat, & fermentatione subactus suppurationem postmodum subeat. Cohæret hic consuetus loquendi mos Hippocratis, qui ceteras quascunque expurgationes, excreationes semper appellat, per tussim vero habitas, sputa restrictius vocat unde lib. 5. Aphorism. 13. scripsit: *Qui spumofum sanguinem expuunt, iis ex pulmone educitur: & in coacis praeotionibus; Sputa spumosa & flava & alba & nigra, rotunda ac viscosa nominat quæ è pectore educuntur.* Quoties ergo sputum sanguineum observatur mox futurum expectare est purulentum.

Quoniam vero à sanguinis sputo, inquit, vereri subit, num propriè sanguinis puri puti, & simplicis, an etiam mixti, vel sputi solum cruentati is intelligendus sit? Et planè asserendum, in vero pure simpliciter sanguinem esse extussendum, nam verum pus non nisi à solo & puro sanguine provenit; at vero à sputo cruento, seu cum aliis humoribus commixto potissimum cum phlegmate, verum pus non exoritur, sed quid puri forme, & puri simile, quemadmodum experimur in catharris diuturnis ad maturitatem perductis. Parum autem refert, si sanguis excretus multus sit vel modicus, dummodo iteratis vicibus expuatur, ut exinde conjicere liceat vas aliquod sanguiferum fore apertum vel disruptum & secundum aliquam sui partem, saltem in pectore hæreat, & concreseat, cujus causa deinde fiat, ut in pus vertatur: Sed adhuc gravius erit longe, & pus subinde futurum portendetur, si spumofus ac floridus, adeoque ex pulmonis parenchymate ille prodeat, ut alias ostensum: Cæterum major vel minor copia sanguinis excreti, non nisi proveniet ex vasis apertis vel erosis latioribus aut angustioribus ejusdem, præsertim per pulmonis substantiam dispersis; vasa enim illa, per quæ sanguis, è dextro in sinistrum cordis ventriculum per pulmones traducitur, longe majora sunt,

& cum referantur, ab impetente sanguinis irruptione ac suffocatione & impedita circulatione.

Puris præterea sputum, hoc loco ab Hippocrate notatum tunc eveniet, cum valida natura vim extulsiendi ferre potest, nam si forte imbecilla sit, quæ tussis impetum atque anacatharsis molestiam sustinere nequeat, licet sanguis antea prodierit, puris sputum non comparabit, quia interius detentum cavum pectoris occupabit, quocunque autem modo fiat, malum semper erit, quia sputum purulentum & sanguinem præter fluentem inficiendo, & pulmonis substantiam erodendo, phthisis causa evadit, de qua in sequenti Aphorismo.

Verum tamen observare est, non fuisse in Aphorismo absolute pronuntiatum, omnino à sanguinis sputo puris sputum subsequitur, sed solum sub conditione, si à sanguinis sputo, puris sputum subsequatur, malum esse; plerosque enim novi, sanguinem non semel tantum, sed pluries atque iterato ad certum tempus exspuisse, nullamque passos esse puris excretionem; quin & pleuritici & mulieres in menstruo catameniorum vel viri in hæmorrhoidum recursum, consuevere ad plures dies copiosum sanguinem sputo, ac tussi, non sine ingenti molestia expurgare, citra succedentem ullam puris excretionem. Jure optimo itaque adjectum est, malum tunc signum esse, cum ad sanguinis sputum, puris sputum consequitur; siquidem hoc pacto fiet, ut deinceps à puris sputo phthisis, & marcor universalis insequatur, ac tandem interitus ut dicitur in sequenti Aphorismo.

Controversiæ circa hunc Aphorismum in contextu sunt explanatæ.

Aphorismus XVI.

A puris sputo tabes (seu phthisis) & fluxus; cum vero sputum retentum fuerit, moriuntur.

Contentum seu Intentio.

De Prognosi phthiseos.

Connexio: Adeo nectitur hic Aphorismus præcedenti, ut ferè unus censeatur cum illo: cum enim de puris sputo egisset, quod ad san-

sanguinis sputum fit; nunc de tabe & fluxu agit, qui puris sputum sequi solet.

Hic Aphorismus duas habet partes: *Prima* dicit sputo puris succedere tabem & puris fluxionem: *Secunda* indicat tempus mortis, ubi retineatur effluxus.

Quamvis ut mox dictum hic Aphorismus cum præcedenti videatur quasi unus & idem, ex ante dictis tamen clare liquet, non irrationabiliter hunc Aphorismum fuisse à præcedenti disjunctum, cum non omnino necessarium sit, puris sputum, sanguinis rejectionem subsequi debere, licet plerumque id fieri soleat: Quamobrem sensus utriusque Aphorismi videtur esse, quod si à sanguinis sputo, puris sputum habeatur, malum sit, quia à puris sputo phthisis, & deinde fluxus sequitur, & si forsitan puris sputum impofterum detineatur, mors infallibiliter succedet; unde Aphorismus hic videtur esse ratio præcedentis. Sed unde fit, ut à puris sputo phthisis & fluxus portendatur, sitque alterum alterius symptoma, veluti necessario superventurum? planè id videtur deducendum, à pure & puris conditione; pus enim, ut alias dictum, acredinem habet muriatico salinam, adeoque erodentem, atque infensam sanguini & pulmone, ubi hæret, unde cordi, & toti corpori, vis, robur & nutrimentum, suggeritur; quamobrem ab infecto, & ulcerato pulmone, sanguis inde præterfluens, semper vitiosus & acer ac mordens redditus, non tantum ulcus ipsum fovet, sed sordidum reddit, sed etiam ventriculos cordis, & reliquos humores inficiens, febrem excitat tabificam, & subinde postmodum, alia innumera detrimenta & tandem mortem.

At cur sputum in pleuritide cruentum bonum sit, & quo citius comparuerit, tanto melius; cum ex adverso hic malum referatur, & suppurationem portendat? ratio facile reddi potest ex eo, quia ibi ex disrupto apostemate, à sanguine extra vasa restagnante, hic vero è pulmonis vasis disruptis, vel reseratis proxime resilit, etiam cum pulmonis læsione, cujus insanabilia dicuntur ulcera authore Galeno 4. *de locis affectis cap. 5. & 5. Method. cap 8 & 11.* Legi meretur de hac re Hippocrates *lib. 1. & 2. de morbis*, multiplex genus phthiseos distinguit, & unius cujusque causas, ac generationis modum accurate recenset, ut propterea in illis describendis, non sit opus hic ulterius immorari.

Fluxus vero, qui in hoc Aphorismo nomine generaliori notatur, vel

vel intelligendus erit, qui ventris dicitur, juxta documentum ejusdem Hippocratis *Lib. 5. Aphorif. 12. & 14*, dicentis: *Tabes laboranti, si alui fluxus superveniat* (id est cum pus ad ventriculum vel ventrem transmittitur seu ad intestina) vel capillorum defluvium, ut ibidem memoratur, vel utrumque plane nihil erit, quod huic sententiæ non conveniat, quoniam ex utrisque proxime imminens interitus portenditur, ut iis in locis à nobis est explanatum; quidquid enim præter naturam evacuari phthificis, ex pulmonis scilicet ulcere tabefactis contingit, procul dubio malum est, imo etiam lethale, ob maximum naturæ languorem, & virium dispendium: In quam rem non semel observare curiosum fuit, phthisi peremptos, in tam extremam sanguinis consumptionem pervenisse, ut is solum in arteriis & venis superfuerit, qui vix circulationi ejusdem satis foret, reliquo penitus exhausto.

Tandem ad calcem Aphorismi adjicitur *cum sputum detinetur, moriuntur*; & sanè detento etenim pure, pulmo non tantum magis inficitur, sed in usu respirationis multum opprimitur, ut tandem suffocetur; unde cor à suo motu deficiens vivere desinit. Atque hinc liquet, quam gravius sit puris sputum intercipi, & remorari, quam, moleste licet, extussiri & educi; quoniam ex hoc expellentis naturæ robur ostenditur, ab eo vero detento summa ejusdem imbecillitas indicatur, & proximus vitæ finis.

Non est tamen necessarium, ut ad omne puris sputum tabes sequatur: nam ex suppuratione, nisi intra dies quadraginta repurgentur, tabem fieri dixit Hippocrates *Lib. 5. Aphor. 8*. ergo dum repurgantur sanari possunt; & phthifici non fient ut dictum in priori Aphorismo.

Plura qui desiderat legat Cardanum *in Commentario*.

Aphorismus XVII.

Propter jecoris inflammationem, singultus malum.

Contentum seu Intentio.

De Prognosi inflammati hepatis.

Connexio: Quamvis hic Aphorismus à nobis explanatus fuerit *Lib. 5. Aphorif. 58*. superfluum sanè videri posset, crambem repetere: Ne tamen & Hippocrati & nobis Tautologia seu repetitio ejusdem rei,

rei, impingatur; dico obiter, Hippocratem ibidem plurium partium inflammationes, & earum effectus enumerasse, adeoque universalior locutum fuisse, quam hic: Ne tamen videamur omisisse aliquid, quod operæ pretium esse posset, breviter & succinctè hunc Aphorismum explanamus.

Hic autem Aphorismus ob prorsus magnam brevitatem divisionem non patitur.

Multoties hepar (sicut & pleraque alia corporis viscera,) ab hærente in ejus substantia, sanguine, utriusq; vel alterutrius vitio, inflammatur. Cum autem id morbi genus subit, non solum graviter ægrantes divexat, sed in maximum vitæ periculum, eosdem conjicit, si præsertim vehementiori febre, anhelitu difficiliore, ingenti dolore, siti, vigilia, cæterisque molestioribus accidentibus societur. Ex multis autem quæ illius inflammationem comitari, vel subsequi solent, specialius hic, notat Hippocrates *Singultum*, veluti symptoma raro superveniens, atque ab alio viscere male affecto, puta stomacho, aut diaphragmate dependens; aitque illum malum esse, quia designat, eo diffusam extensamque esse jecoris inflammationem, ut alias quoque partes superiores & adiacentes affecerit, magisque ad vitam sustinendam necessarias. Et quidem à singultu stomachus & diaphragma perpetim convellitur, unde & ciborum assumptio ac eorundem digestio, nec non respiratio plurimum impeditur, quæ operationes sunt quam maxime ad viventis corporis conservationem conferentes, præterquam quod affecti ac proritati, à causa singultum excitante, nervi per stomachum, & septum transversum dispersi, trahunt quoque in consensum cerebrum, unde alia longe graviora & periculosiora mala exoriri possunt, ut cunctis notum est.

Sed etsi hepatis inflammatio ad stomachum & diaphragma non subreperit, adhuc tamen poterit, singultus ab hepatis inflammatione suboriri, propter ligamentum carneum, quo illud diaphragmati alligatur, ut ex anatome patet. Quamobrem illo inflammato, tumefacto ac plus justo distento, ex nimio pondere contrahitur diaphragma, & in suis expansionibus impeditur, cumque stomachus diaphragmati quoque cohæreat, inde fieri potest ut singultus exoriat, qui utriusque passio dicitur; & quoniam singultus ad

motus spasmodicos refertur, & isti nervos malè affectos, & cerebrum quoque læsum arguunt, adhuc exinde malum signum erit, & multarum partium principalium, simul una laborantium indicium manifestissimum.

Quæres: Quomodo distinguatur hepatis inflammatio à pleuritide? Resp. Distinguitur, quia in hepatis inflammatione dolor gravior, in pleuritide pungens.

Aphorismus XVIII.

Propter vigiliam (seu à vigilia) convulsio, aut desipientia, malum.

Contentum seu Intentio.

De Supervenientibus vigiliarum.

C*onnexio* : Cum supra Aphorismo 13. hujus libri de convulsione egisset Hippocrates, quæ ex ardoribus nascitur, eamque malam esse pronuntiasset; in hoc præsentì Aphorismo, de convulsione agit & desipientia, quæ ad vigiliam sequitur.

Hic Aphorismus ob simplicem conclusionem & brevitatem suam non dividitur.

Quemadmodum convulsio aut desipientia plerisque aliis morbis, cum nervorum læsione conjunctis supervenire solet, & mali morbi testimonium addit; ita si vigiliæ, ut non raro fit, accidant, malum pariter portendunt; quia si in reliquis deducti in compassionem cerebri indicia sunt, multo magis in vigilia, cerebrum ipsum male affectum proximius designabunt. Verum vigilia in his vehemens, diuturna, & nulli penitus remedio cedens esse debet, ut convulsionem & desipientiam pariat: sunt etenim & fuere plurimi, qui ad menses integros, somno caruerint, nihilum tamen convulsionis, vel desipientiæ incommoda passi sunt, ut historiis liquet, & de Meccœnate cunctis notum. At vero ubi ex perenni vigilia ista evenerint, non tantum humores & spiritus per cerebri substantiam diffusi, acriores redditi, multum infensi evaserunt, sed etiam cerebrum ipsum id sua constitutione ac textura, non leviter à naturali statu declinasse indicio est, cum ipsius medi-

meditullium & nervorum principium depravari & offendi contingat, ex contumaci & diuturno pervigilio, alias convulsio vel desipientia nullatenus accideret. Cujus autem generis desipientia hic intelligenda sit, facile ex supra dictis deducere licebit quam nimirum vocant melancholicam vel maniacam, ab acidis, exustis, vel acris humoribus progeneritam; ab his enim dictum convulsiones excitari solere, irritatione nervorum fibris inducta; quamobrem pari ratione ab iisdem desipientiam hoc loco memoratam proficisci credendum est. Atque hinc modo facile quoque deducitur, cur vigilia, quæ plerisque innocua esse solet, in his mala fiat, si nimirum ad eam convulsio aut desipientia subsequatur, siquidem denuntiat, non à sola exiccatione, aut humoris absorptione, illam provenire, sed ab alia peiori, mordaci ac virulenta causa, quæ convulsionem ac dementiam gignere valeat, vel saltem ex tali ac tanta substantia cerebri coarctatione, ut roridum ipsius liquorem, vel non gignat, vel in meditullium diffundi non permittat, unde in contumax & incompefcibilis vigilia sensim & sensim suborta sit, quamobrem malum ægrotanti portenditur, & fortassis etiam interitus, nisi humectantibus simul ac retundentibus ac redinem convenienter & opportune occurratur.

Dices : Si vigilia est causa manifesta, non æque mala erit convulsio & desipientia, quæ illam sequitur, ac si sine illa fiat. *R.* Vigiliam hic ut dictum, non esse causam manifestam, sed sequi internam causam ad faciendâ prædicta symptomata.

Animadvertendum tamen medico est pro somno conciliando, ne narcoticis & stupefacientibus utatur, & malum in lethargum transferat, sed potius adhibenda modificantia causasque corrigentia de quibus consulendi practici.

Plura videri possunt apud Cardanum *in Commentario*.

Aphorismus XIX.

Ab (vel ex) ossis nudatione Erysipelas.

Contentum seu Intentio.

De Prognosi ossis nudati.

Connexio: Hic Aphorismus affinis est 14. hujus libri, in quo egit de capitis percussionibus, & inde stuporem & desipientiam prognosticans Hippocrates: In hoc præsentī Aphorismo addit Erysipelas, quod si ossi nudo superveniat, malum esse asserit.

Hic Aphorismus propter brevitatem indivisibilis manet.

Crediderim, huic Aphorismo adjiciendum omnino esse *malum*, vel implicitè subintelligendum, ut sensus Aphorismi, consonet experimento & menti Hippocratis; siquidem illo emissō, nequaquam videtur utrisque consentaneum, quod ossi nudato Erysipelas perpetuo accidat, quidque portendat, cum supervenerit ignoretur, attenta ossis denudatione. At vero fieri nequit, quin grave & periculosum symptoma, censendum non sit Erysipelas, ossi denudato superveniens, tum suimet ipsius ratione, tum ob ejusdem ossis denudationem, quia denudatum os facile livori & correptioni subicitur, unde postmodum sphacelus. Fuere siquidem ossa omnia, à provida natura, tenui quadam membranula, quæ periostrion vocatur unde quaque circumvestita, cujus causā foveantur, & ab extrinsecis alterantibus custodiantur: Quamobrem ubi illa orbata ambienti aëri exponuntur, promptissimè frigent, livescunt, & quamlibet aliam præternaturalem alterationem subire possunt; cumque liquor & vigor nerveus, qui per illam diffunditur, propter ossis denudationem, per eas partes permeare nequeat, sed vel hærescit, & circumquaque restagnat, vel ex partium circumstantium vitio, ac ambientis aëris importuna actione, acescit, & corrumpitur, proinde fit ut ante dicta mala exoriantur. Hinc cauti & accurati chirurgi, in ejusmodi casibus, omnem adhibent diligentiam, ut os denudatum amiciant, ac balsamicis medicamentis tutentur, simulque una ab extrinseco ambiente aëre custodiant, & defendant, imo si quid in osse vitiosum appareat, statim abrasionibus ac lituris detergant, & amoveant.

Dices 1. Os denudatum non est Erysipelatis, quia Erysipelas est affectus cutis ergo male adstruitur in hoc Aphorismo. Resp. Non ossi præcise, sed cuti & carni proximæ attribui Erysipelas, quam-

quamvis etiam os, suam in tali casu sentiat alterationem, cum plerumque talis ossis denudatio & Erysipelas oriatur à violenta causa, contusione, percussione, vulneratione, &c.

Dices II. Hippocrates *Lib. 2. Aphor. 5.* ait, *si in magnis & pravis vulneribus, tumor non appareat, ingens malum*: Ergo erysipelas non erit malum. & In principio si non apparet concedo: postea & cum ossis denudatione, non est malum, nego.

Plura utilia lege apud Cardanum *in Commentario.*

Aphorismus XX.

Ab Erysipelate putredo, aut suppuratio malum.

Contentum seu Intentio.

De Erysipelate ulcerato.

C*onnexio*: Cum in antecedenti Aphorismo de Erysipelate dixisset Hippocrates, quod sequitur ossis nudationem: In hoc præfenti Aphorismo de putredine & suppuratione quæ sequuntur Erysipelas verba facit.

Hic Aphorismus utpote brevissimus, non admittit divisionem.

Quamvis Erysipelas ad tumores referri posse videatur; quia tamen à tenui admodum humore acri & volatili plerumq; fit, qui vix cutem affectum elevat, & ruffo vel flavo colore inficit, propterea sponte sua solet promptissime discuti, & insensibiliter resolvi, intacta atque illæsa relicta parte, si præsertim verum & legitimum illud fuerit. Cum autem præter rubicundum colorem, in manifestum tumorem, cutim attollit, mixtum ex alieno & crassiore humore esse solet, adeoq; spurium appellatur; quin & pro ratione humorum admixtorum, nunc thegmonodes, nunc ædematodes, nunc etiã scirrholes dicitur, prout in colorem varium inclinatur, & hunc vel illum humorẽ adjunctũ habeat, ut apud Chirurgos: quo casu nisi illorum peritia & accurata diligentia accedat, facile in apostema degenerat, & suppurationi succumbit,

Y y y y y 3

neque-

queunte scilicet alieno illo, & admixto humore, tam prompte attenuari & exsolvi. Id ergo considerans in hoc Aphorismo Hippocrates, inquit, putredinem aut suppurationem ex Erysipelate inductam, malam esse, eo quod à sua consueta constitutione recedat, & alio quam dissolutionis & evaporationis modo desinat, imo in graviorem morbum, & in ulcus sane periculosum commutetur.

Et quidem cum in putredinem vel in suppurationem tendit, procul dubio designat ex mixtura alterius humoris crassioris, indebitam fermentationem inibi fuisse excitatam, per quam partes tenues exsolutæ, fæculentas ac tartareas reliquerint plane irresolubiles, quæ cum acorem ac virulentiam etiam contraxerint, facile insuper subjectas & circumjacentes partes inficiant & corrumpant ac tandem in gangrænam desinant, substratum os vitiantem & contaminantem.

Sed & ex putredine ac suppuratione, nova semper febris exoritur, & non raro priore peior, infecto subinde sanguine, per affectam partem in cor remeante, indeque per corpus universum, unde postmodum, gravius vitæ periculum imminet. Accedit quod putredo ista & suppuratio mali semper moris esse solet, ratione mixtorum humorum, spurium erysipelas progignentium, qui cum ferè semper acorem salinum referant, & procedente tempore adipiscantur, præter crassitiem & lentorem, sordidum quoque ulcus efficiunt, quod non tam facile detergi solet, nec tam cito consolidationem admittit, quapropter diuturna mora, etiam circumjacentes partes, excitationis cuniculis afficit, & novos novosque tumores & abscessus promovet, dubium semper exitum comminantes, præsertim si circa articulos fiant, & in corporibus valetudinariis, & humidis regionibus, atque in ætate senili, ut multoties est observatum: Sic anno 1700. sub Autumni finem, ac deinceps per totam hyemem sequentis 1701. Neapoli, genus quoddam crustosi Erysipelatis vagatum est, epidemicam constitutionem referens, quod cunctos facie peculiari-ter affecit, cum febre acuta, pervigilio, delirio, è naribus hæmorrhagia, aliisque symptomatibus perniciosissimis, è quo pauci admodum evasere.

Quares: quomodo suppuratio distinguatur à putredine? & putredinem esse omnino præter naturam, & malignam quandam corruptionem; Suppurationem vero non esse absolutè præternaturam,

turam, sed lyfim seu opus partim naturæ vincentis, partim caloris extranei, adeoque medium aliquod inter coctionem & putredinem, unde ex parte bona & mala: bona respectu ad putredinem, mala respectu resolutionis, quæ melior est quam ipsa suppurationio.

Plura qui desiderat, consulat Cardanum *in commentario* & ipsam praxin.

Aphorismus XXI.

A forti in ulceribus pulsu, hæmorrhagia (seu profluvium sanguinis) malum.

Contentum seu Intentio.

De Prognosi pulsationis in ulceribus.

Connexio : Cum Hippocrates in antecedenti Aphorismo egisset de suppuratione: In hoc præsentis Aphorismo agit de pulsu, qui affinis est, & quasi signum suppurationis & inflammationis.

Hic Aphorismus ob brevitatem non dividitur.

Ulcerata sicut etiam vulnera, cum præsertim maligna sunt, & in partibus arteriosis inflicta, solent circum labia, ob indigestam materiam intumescere, & non raro etiam cum rubore, dolore & ardore sociari, ut propterea circum venæ & arteriæ sanguinem deducere & excipere non valeant, unde postmodum ab ipso restagnante, vehementius pulsant & elatius attollantur. In his ergo ait in hoc Aphorismo Hippocrates, facile posse sanguinis profluvium exinde succedere, impetente nimirum illo atque aditum sibi per violentiam faciente: quod cum acciderit malum esse subdit, tum ratione ipsius sanguinis, immodice profluentis, tum ratione ulceratæ partis, quæ ab ejusmodi immoderata sanguinis effusione languida & effoeta remanens, difficulter ad cicatricem sit perducibilis.

At vero, hæc in ulceribus quibuscunque contingentia, longe graviora evadunt in carcinomatibus, quorum proprium esse solet
ejus-

ejusmodi mala inferre, & fortes pulsus, aut irrestagnabiles sanguinis profusiones inducere à maligna, & virulenta materia, arsenicalem conditionem referente? quamobrem non solum malum, sed pessimum in his indicium promitur insanabilitatis & mortis.

Notavit autem signanter Hippocrates *fortem* id est vehementem & elatum *pulsus* esse debere, nam non quælibet pulsatio, in ulceribus mala est, quæ enim concors, & conformis est cum cordis cæterarumque arteriarum pulsu, mala non est, imò potius salutaris, cum sit conveniens debito naturæ usui, arguens ulceratæ partis vim & facultatem validam, & sanguinis circulantis blandam & consentaneam conditionem. Quare ut pulsationes istæ morbosæ sint, fortes, vehementes & impetentes esse debent, vitium ulceris, & qualitatem materiæ restagnantis designantes acrem, multumque infensam, quæ peculiari fermentatione ibidem excitata, violenter concutiat, & percellat arterias, imò & ambitum totius partis ulceratæ; quo circa fiat, ut orificia arteriarum & venarum, ab impetente, atque erodente illius malitia referentur, & scindantur. Sed & nec solum ab vulneratis partibus, sanguis si profluat malum erit, sed etiam si à naribus, hæmorrhoidibus, utero, cæterisque immoderatè exiliat; quippe tunc arguit vitium tale in sanguine inductum, ut non tantum labia ulceris & adjacentes partes tumefaciat & excruciet, verum etiam reliquas omnes, totius corporis inflet, vellicet & depravet; unde Celsus latiori plane significatione sententiam hanc expressit *Lib. 2. cap. 7.* inquiens: *ubi vehementer vena, super ulcera moventur, sanguinis profluvium erit.* Et quidem ex cancerosis ulceribus aliquando observatum, nares immodice sanguinem fudisse, cum jam patientes in proximum exitum deducti, toto corpore ejus malitia forent infecti. Sunt etiam qui fortem ac vehementem pulsationem, non proxime in ulceribus, sed in corde ex ulceribus vehementer affecto, & elato illam velint, veluti signum inflammationis ibidem inductæ atque ex pulsu cordis manifestandæ, cum pulsationes omnes arteriarum, ab unico & solo corde procedant: & quidem id non in verisimiliter dictum putaverim, quamvis fere cunctis interpretibus creditum sit pulsus Hippocrati, vel incognitum fuisse vel neglectum; at vero si nonnulla in ejusdem operibus loca perpendantur, non inficiabimur, fuisse non raro pulsus in ægrotantibus observatum, si-

qui-

quidem 4. *Epidem. N. 9.* in acutissimis febribus pulsus densissimos & maximos fuisse adnotat: & *N. 12.* In Zuiilo fabro, pulsos tremulos & tardos memorat: Item *N. 23.* & 2. *Epidem. sect. 5.* cui vena, inquit, in cubito pulsarit, insanus & iracundus est: & 7. *Epidem. N. 41.* Phereide pulsus in fronte valde obscurus memoratur: & *N. 42.* Vena in Temporibus saliebant (pro venis autem arteriæ intelliguntur juxta Veterum morem) & in Coacis pranotion. quibus in febribus, ait, venæ in temporibus pulsant, atque ibidem pulsus lethargicorum tardus esse, dicit: & inferius Pulsus memorat in præcordio: Pulsuum etiam circa tempora meminit *Lib. de flatibus* & *lib. de aliment.* Venarum pulsationes, & aëris respirationem sanitatis signa esse statuit. Ex quibus locis colligere plane & consuevisse aliquando Hippocratem pulsus observare, imo etiam in diversis corporis partibus, eo ferme modo quo apud Chineses (superstitiose tamen nimis) factitari legimus, quibus mos fertur pulsus in toto fere corpore percipi & observari; Verum eos Hippocrates non adeo magnifert, de hoc vid. *Mercurialis variarum lectionum Lib. 2. cap. 12.*

Dices I. Hippocrates *Lib. de Ulceribus capitis* dicit: in omni ulcere multum sanguinem fluere bonum, ergo hic sibi contradicit. Resp. multum sanguinem effluere è vena bonum est, transeat: ex arteria nego: Resp. II. Hippocratem non intelligere enormem illum sanguinis effluxum sicuti fit rupta arteria.

Dices II. In omni magna inflammatione partis alicujus adest arteriæ pulsatio, & tamen nullus est metus hæmorrhagiæ, ergo nec in ulcere, imo minor erit, quia tanta non est repletio, eo quod alias perpetuo membrum repurget. Resp. negando paritatem arteriarum in parte inflammata & integra, & in parte corrupta: in hoc casu arteriæ sunt multo debiliores, quam in primo: Deinde in parte inflammata, non ideo fortiter pulsant, quia turgent, sed quia comprimuntur à sanguine extravasato, non intravasato.

Plura de hac materia reperire licet apud Cardanum in *Commentario.*

Aphorismus XXII.

*A diuturno partium ad ventrem attinentium dolore,
suppuratio.*

Contentum seu Intentio.

De prognosi doloris diuturni circa ventrem.

C*onnexio:* Cum in priori Aphorismo Hippocrates egisset de sup-
puratione. In hoc præsentī Aphorismo agit de signo sup-
purationem indicante.

Hic Aphorismus ob brevitatem non dividitur.

Est autem hic Aphorismus diagnosticus & simul prognosticus, summopere ad praxin conducibilis, admonens Medicos, ut in tractandis diuturnis ventris doloribus cauti fiant, ne inadvertenter decipiantur, imo aberrantes à scopo, exoptatæ curationis, ægros in perniciem deducant, quemadmodum non raro plerisque accidisse, maxima sanè incuria observatum.

Accidunt sæpe sæpius ventris dolores in intestinis, ex retentis & constipatis fæcibus, à flatibus cavum eorundem distendentibus, & quodammodo convellentibus, à tenaci & hærente pituita, aco-rem partium referente, & fibras contrahente & corrugante, aliisque consimilibus causis in praxi memoratis, exceptis his, qui ad utrumque hypochondrium pertinent, ut & ad vesicam & uterum. Isti vero temporis diuturnitate, sponte sua desinere solent, vel ope medicamentorum remitti atque aboleri, discussis nimirum flatibus, egestis fæcibus, & subactis aliis causis, dolorem inferentibus, nisi tamen ut bene advertit Galenus *in Commentario* doloris ferocia à contumaci & repugnanti causa mors ægrum præoccupet.

Quoties ergo dolor in diuturnum tempus producitur, nec beneficio medicamentorum sedatur aut desinit, indicio est doloris causam, cavum intestinorum, aut locum ad exitum, per alvum patentem non occupare, sed interius reconditam esse & fortasse etiam fixam, & hæren-

hærentem in glandulis mesenterii, omenti, Pancreatis, & similium, quæ non nisi coctione & maturatione subigi, & subacta, maturata & fluida reddita expelli possit; idque beneficio suppurationis, quæ opus naturæ est, in rem malam alicubi conclusam, & fermentationi subjectam, unde optimo jure inquit hic Hippocrates à diuturno ventris dolore suppurationem esse expectandam, cum non alia sub- sit via, perquam illa corrigi & expurgari queat. Nisi tamen natura impotens & imbecilla evaserit à laboris & doloris diuturnitate, quam etiam vigiliæ molestissimæ & virium jactura sæpe sæpius consequi consueverunt, unde ægrotanti interitus ante suppurationem acci- dat, ut non raro evenit, in istiusmodi tumoribus & abscessibus inter- nis. Tacuit postremo Hippocrates *malum*, vel quod implicite subin- tellectum velit vel potius quod in ipsa suppuratione contineatur, quæ licet opus naturæ concoquentis sit, adeoque bonum, mala tamen est saltem, ex relicto, in parte dolente, ulcere, quod diffi- culter admodum detergi, & ad cicatricem perducere potest, adeo- que timendum deinceps est, ne in longius tempus protractum, de- nique mortem sit allaturum.

Quod hætenus de imi ventris doloribus est expositum non- nulli quoque ad cæteras corporis cavitates, quas etiam ventres vo- cant, extendunt, nimirum ad thoracem & caput, ita ut, si in his quoq; dolores diutius perseveraverint, secuturam suppurationem por- tendant pariratione. Verum etsi id non improbaverim, cum rationi & experimento non repugnet; Verisimilius tamen id videtur, pro- nunciatum, ab Hippocrate de infimo ventre, qui proprie, imo speci- fice talis dicitur atque in diuturnum tempus dolorem sustinere po- test, maximè si in Mesenterio, ejusque glandulis progignatur ut di- ctum. Atque hinc modo facile etiam deducitur, dolorem hic ab Hippocrate memoratum, nullatenus vehementem & magnum esse intelligendum; nam si magnus & ingens foret, nullatenus posset in longum tempus produci, cum tantam doloris vehementiam, & acu- tiem natura diutius ferre non possit, citra manifestum vitæ periculum. Modo in capite & in pectore dolores, qui fiunt, semper sunt gravissimi, & cito intra terminum acutorum, vel ad salutem vel ad mortem desi- nunt; scus vero qui in mesenterio, ejusque glandulis fiunt, levio- res sunt, & sæpe sine febre, adeoque ad menses integros perdurasse

fatentur historiæ: suppurata autem materia, doloris causa, dolor ipse mitescit, & febris, si quæ fuit, remittit: nam *dum pus conficitur, dolores & febres accidunt magis, quam jam confecto* Hippocrates *Lib. 2. Aph. 47.* atqui pus sive verum sive falsum sit, parum refert, cum utrumque esse possit, pro varietate humoris in parte dolente congesti & subacti. Pro coronide advertendum collectos in glandulis Mesenterii humores, præsertim crassos & consistentes, non semper dolores excitare, neque in suppurationem desinere, sed aliquando in tubercula durissima, scirrhus æmulantia commutari, atque ita cum ægrotantibus consenescere & anatomicis inspectionibus dissectorum corporum sæpius est observatum. Ad hunc Aphor. referendi sunt *Lib. 4. Aph. 10. & lib. 6. Aph. 38.* Plura vero legi possunt apud Cardanum *in Comment.*

Aphorismus XXIII.

*A Syncera dejectione Dysenteria (seu difficultas intesti-
norum,) malum.*

Contentum seu Intentio.

De Prognosi Syncera dejectionis.

Connexio: Cum in antecedenti Aphorismo de dolore infimi ventris egisset Hippocrates: In hoc præsentī Aphorismo agit de Dysenteria, quæ dolores ejusdem ventris afferre solet.

Hic Aphorismus ob brevitatem non patitur divisionem.

Synceras dejectiones appellat Hippocrates, quæ uniusmodi sunt, & simplicis, ac sinceri humoris conditionem referunt, quales sunt, quæ folius flaventis bilis, seu fellei humoris aut nigricantis, vel albi coloris comparere solent, atque à veteribus, ad flavam aut atram bilem & ad pituitam reduci consueverunt; quamvis num à detectis, industria anatomica, novis humoribus aliter evenire referantur. Utcumque autem istæ fiant, cum comparent, minus male esse solent, eo quod arguant naturam, non tam varie distractam & male affectam, nec viscera, esse diversimode coinquinata, ut alios & alios succos præternaturales gignant, & genitos deponant, in intestina, ut alibi meminerat Hippocrates.

Ve-

Verumtamen non adeo à facibus sejunctæ egeridebent, ut penitus impermixtæ ac solidariæ educantur; tum enim immodicum humoris excessum, & causam effectricem, nimium præpotentem denuntiant, quæ nullatenus à reliquis, aliorum viscerum succis corrigatur, ut cum dejectiones flavæ fiunt, ab exuberantia fellei humoris nullatenus à succo pancreatico edomiti, & contemperati; vel è contra, cum nigricantes sunt, ejusdem pancreatici acidioris redditi vitium arguentes, qui ab inertis & pauci succo felleo corrigi non potuit. Has ergo vituperat Hippocrates, tamquam malas, tum ratione signi, quia significant viscera, unde illæ derivant, à naturali constitutione degenerantia; tum etiam ratione causæ, eo quod indomitæ nec correctæ, quo tendunt, veluti efferæ, partes cunctas inficiunt, depravant & excruciant. Quamobrem non immerito hoc loco animadvertit, à synceris dejectionibus, dysenteriam supervenientem malam esse, non quod undecumq; ista proveniat, mala non sit, sed quod longè gravior ac molestior sit futura, cum à synceris dejectionibus originem habuerit. Et quidem ut mox dictum, quia à causa provenit, nimium præpollente & excedente, tum in quanto, tum in quali & viscera, unde dejectio provenit, plurimum à naturali statu recedentia atq; intemperata recognoscit; quare intestina non tantum continuis & constantibus doloribus extorquentur, sed etiam facile subinde exulcerantur & exeduntur. Hinc alias dixerat idem Hippocrates *Dysenteriam ab atra bile lethalem esse*, quippe quæ à simplici & syncero humore procedit; & alibi mutationes colorum in evacuationibus commendavit, utpote arguentes humores sibi invicem in melius succedentes, & mutuo se contemperantes, ne scilicet alter super alterum, nimium prævaleat.

Quod autem hic edocet, de malis dejectionibus synceris, à statu naturali in præternaturalem, excipere convenit in his, quæ à statu morbofo & præternaturali in sanum accidunt, cum scilicet in declinatione morborum, & præsertim febrium acutarum criticè contingunt; tunc enim facile fit, ut à victrice natura separante bonum à malo, unius duntaxat synceri humoris, febrem soventis evacuationo criticè & salubriter habeatur.

Quo pacto experimur sæpe numero, tertianas & alias febres acutas, desinere solere, copiosa, simplicis humoris flavi seu biliosi dicti, evacuatione, unde postmodum æger convalescat; Ita pariter in aurium

obsurdescentia scripsit Hippocrates, biliosas dejectiones salutare esse, redeunte in pristinum statum auditu.

Neque insuper inquit Hippocrates, omnino futuram dysenteriam, ab ejusmodi synceris dejectionibus, sed solum sub conditione, si evenerit, malum esse; ut propterea perperam à quibusdam omittatur particula *malum*. Quin & syncera dejectio, in singulari numero, à Leoniceno, & aliis expositoribus notata, non unicam sed iteratam nec modicam sed copiosam egestionem designat, quæ scilicet valeat dolores, tormina & cruentam quandoque evacuationem excitare: quæ profecto conditiones junctim solent dysenteriam comitari.

Dices 1. Excrementa variegata, plures morbos significant, ut alibi dictum. Atqui ubi plures sunt morbi, ibi semper gravius est malum, ergo excrementa syncera non sunt mala. *R.* Nego minorem: Scabies enim in corpore, febris quartana & ophtalmia sunt plures morbi, qui tamen licet simul sumpti, tantum non afferunt periculum quam hectica in summo gradu, vel dysenteria fortis à syncero humore orta.

Dices 2. Dysenteria potest fieri critica ab humore syncero post acutam febrim, vel etiam post quartanam vel maniam cum salute ægri; Ergo Aphorismus non est verus? *R.* Si dysenteria fiat absque ulius visceris læsione aut abscessu, atque magno dolore, & cibi fastidio, concedo; sed de tali dysenteria non est intelligendus Aphorismus.

Quæres Utrum Aphorismus non possit intelligi de aliis synceris dejectionibus per vomitum, sputa, urinas, sudores &c.? *R.* Affirmative; hæ enim si sint flavæ, porraceæ & atrabilarie seu nigre, semper malæ sunt, quia semper sunt mali moris & constitutionis, ut testatur Hippocrates lib. 4 Aphorism. 23. 24. Plura vide apud Cardanum in *Commentario*.

Aphorismus XXIV.

Ab ossis præcisione (seu vulnere) delirium (seu desipientia) si in vacuum usque penetraverit (seu apprehenderit.)

Nota: Vid. Lib. 6. Aphorism. 50. & Lib. 7. Aphorism. 14.

Con-

Contentum seu Intentio.

De Prognosi vulnerum Capitis.

Connexio : Cum in Aphorismo 14. hujus libri, stuporem & desipientiam ad capitis plagam seu percussionem supervenientem damnasset Hippocrates; In hoc præsentī Aphorismo docet rursus, quando ista sint timenda & maxime autem desipientia,

Hic Aphorismus ob simplicem conclusionem non dividitur.

Os hic sumitur per Antonomiasiam, cranium, quod cæteris offibus præcellat, magnitudine, structura, ministerio, præstantia, ac sublimitate; Præciditur autem multoties, exteriori duntaxat lamina vel ad medullium, aliquando etiam ad ejusdem concavum usque, ubi dura Meninx appingitur & alligatur; sed & quandoque parte posteriori, quæ durior & validior est; interdum vero parte anteriori, tenuiori & magis friabili, quæque molliorem cerebri substantiam amplexatur ubi plerique phantasiam & imaginatricem facultatem stabulari arbitrati sunt.

Etsi autem indiscriminatim scribat Hippocrates, ex illius præcisione desipientiam suboriri, putaverim tamen id non perpetuo succedurum (quod sane sæpius observatum, irrita hujus Aphorismi prædictione) nisi ad eam partem sectio, atque incisio facta sit, quæ meningem duram comprehendit aut penetravit; unde ipsa graviter læsa, vel saltem detecta ab ambiente aëre, à confluyente sanguine, & hærente sanie, vel alio humore præter naturam alteretur, & subjectam aliampiam meningem, & tenellam cerebri substantiam, in consensum trahat, indeque postmodum desipientia, succedat. Hinc non absre dictum videtur *in ossis præcisione*; quod sane verbum, antè incidi aut secari significat, græcè *διενπν*. Neque solum incisione, sed etiam contusione crediderim, os illud affici oportere, ut, si fortasse desipientia (quam vocalem dicunt) proprie non sequatur, saltem accidat, quæ mentalis dicitur, vel ea quæ cum stupiditate, obstupescencia, caro & comate vigili confundi solet, de qua supra meminerat Hippocrates. Sed quid voluerit intelligendum per ea verba, *si in vacuum apprehenderit, vel penetraverit*, non bene constat apud Interpretes, puto tamen,

id

id ipsum hic intelligi, *ac in cavum*, id est in internam & concavam cranii partem, qua *duram matrem* suspensam sustinet: *Vacuum* autem illam partem appellat, quia revera inter cerebrum, suis meningibus obtectum & cranium, spatium quoddam intercedit, quo levis ille & tardus cerebri motus, expansionis & amplificationis peragi possit, ut in ejusdem cranii incisionibus compertum & patentissimum est in recens natis.

Quamquam autem hæc ita exposita, experimento & rationi non dissentiant, sunt nihilominus, qui in hoc Hippocratem criminentur, quod rem scripserit rarissime contingentem, cum sæpius capite vulnerati, & cranio præcisi, nil penitus desipuerint.

Verum id summæ & accuratæ chirurgorum diligentiae tribuendum, qui efficacissimis remediis balsamicis, ejusmodi vulnera quam optime tractare sint conati, & non tantum ab imminentibus ejusmodi periculis tueri, verum etiam ad perfectam sanationem perducere satagerunt. Quæ autem imminetia mala, præfagit Hippocrates, intelligenda sunt à vi præcisionis & vulneris, siquidem vulnera & incisiones Cranii, certo certius hæc & alia graviora mala minantur, imo inevitabilem mortem plerumque arcessunt, cum potissimum cerebrum concutiunt & perturbant. atque in his quæ eitra artis beneficium accidunt, Aphoristicam hanc sententiam intelligendam mox recensita suadent, juxta Hippocratis observationem, qui & posteris tradidit, quæ sola morborum vi ac violentia, ut plurimum contingant.

Quæres: Quænam sint signa vulneratarum meningum? *Resp.* Quando æger nucem dentibus frangere non potest; Vomit &c.

Aphorismus XXV.

A Medicamento poto convulsio, lethalis.

Hic Aphorismus satis superque expositus est supra lib. 5. Aphorif. 1. & 4. hic vero quod speciatim de uno genere medicamenti purgantis asseruerat, ad quodvis aliud prorogat & extendit, si tamen catharticum sit; siquidem ut bene exponit Galenus *in commentario* de purgantibus, atque per irritationem, & acridinem humores educen-
tibus

tibus monet intelligendum, cum convulsio nonnisi ad acrimoniam & irritationem nervorum consequatur, ut ibidem à nobis est explicatum; ideo ne chrambem recoquamus, immorari in hisce ultra non licet.

Aphorismus XXVI.

*Propter vehementem dolorem partium ad ventrem at-
tinentium, extremarum perfrigeratio malum.*

Contentum seu Intentio.

De Frigore extremarum à dolore.

Connexio : Hippocrates hoc libro Aphorismo primo docuit, in acutis morbis, frigus partium extremarum malum esse; In hoc præfenti Aphorismo vero specialius memorat id ipsum malum esse, & fortasse pejus in ventris dolore; quoniam ibidem designat, inflammationem genitam, jam jam in gangrænam vergentem, & partes internas mortificantem, unde postea extremarum frigiditas emanat, cum istæ ab illis bene se habentibus, vigorentur & incalescant.

Hic Aphorismus ob simplicem conclusionem non dividitur.

Quandoquidem Hippocrates ventrem indefinitè nominavit, posset quis omnes tres, animale, vitale & naturale subintelligere, juxta consuetam anatomicorum divisionem. Attamen satius credere licebit, notatum hic speciatim ventrem inferiorem; ibi enim specialius dolores atroces, & tormina fiunt, imo ibidem facilius gangræna & mortificationes exoriuntur, unde postmodum extremarum partium frigus, quod sane pluribus experimentis comprobatum in cadaverum ejusmodi genere mortis interemptorum dissectione, quin & varietas viscerum, glandulis & membranis innumeris constantium, id ipsum prompte accidere posse suadet, ut consideranti patet. Cæterum etsi intestina, acutis potissimum doloribus subiciantur, cætera nihilominus viscera, suo pariter sensu prædita, iisdem expertia non sunt, quæ cum affecta fuerint, proxime adjuncta & consentientia intestina divexant, & condolere quoque cogunt.

Denique quid Hippocrates scribit *malum*. Celsus *lib. 2. cap. 8.* hanc eandem sententiam interpretatus, inquit *periculosum* nec sine ratione, quia ad harum partium inflammationem & gangrænam, non nisi interitus brevi expectandus est, prout exemplum refert Hippocrates 1. Epidem. agroto 9. de Critone quod ibidem legi potest : Id ipsum confirmat *Aphorismus 48. lib. 4.*

Plura legere potes apud Cardanum *in Commentario.*

Aphorismus XXVII.

Si Prægnanti tenesmus supervenerit, abortus est causa.

Contentum seu Intentio.

De Tenesmo gravidarum.

Connexio : Cum in præcedenti Aphorismo, de dolore ventris dixisset Hippocrates : In hoc præsentī Aphorismo, de Tenesmo, qui vel ventris dolor est, vel ad dolores ventris referri potest dicit.

Hic Aphorismus ob brevitatē non dividitur.

Tenesmus est torminosus & irritus ille conatus disidendi & egerendi faces, in quo tamen vix mucosum quid sed cruentum, aliquando vero solus crepitus emittetur, molestissimus sane affectus, quo præter tormina, & intestinorum cruciatus, cupiditas ejiciendi perpetua est, nec desinit etiam si crebro venter comprimatur atque ad egestionem sollicitetur ; quamobrem frequentem hanc molestiam & ventris compressionem, vulgo *Premitti* appellare solent.

Id ergo si prægnanti accidat abortum facit, ex multis causis, speciatim ex his quæ illum excitant ; siquidem plerumque ex ambiente aëre frigido subter excepto, à cibariis acidis, crudis, crassis, ac glutinosis, gelidis potionibus, fructibus ponticis acerbis aliisque ; Itemque ex natura ipsius morbi, & ex situ partis affectæ cum sphincter musculus & intestinum rectum eo afficiuntur ; denique attenta molestia symptomatum adjunctorum, præsertim vero symptomatum intestinalium, & assidua ventris compressionē, quibus omnibus accidit sæpe stomachi, tum in appetendo tum in digerendo nimia imbecillitas, qua vires deinde valde imminuuntur. Atqui hæc prægnanti potissimum infensissima

lima sunt, ob viciniam partis affectæ, & ob ingentem noxam quam idem uterus subire cogitur ab iteratis compressionibus, quas cum infans diutius sufferre nequeat, alia ex parte multum ob carentiam alimenti labefactatus, & procul dubio abortui succumbit, nisi artis auxilio succurratur, de qua re plura in praxi: Id ipsum Hippocrates lib. 5. Aphorism. 34. insinuasse videtur, ubi universaliorem prodidit sententiam, scribens: *Ex copioso alui fluxu abortum fieri*, quem fluxum plerumque Tenesmus aut comitatur aut subsequitur. Plura vide apud Cardanum in *Commentario*.

Aphorismus XXVIII.

Quodcumq; os sive cartilago, sive nervus præcisus fuerit, in corpore, neque augetur, neque coalescit.

Nota: Qua ratione denuò præsens Aphorismus hoc loco insertus sit, cum jam *Lib. 6. Aphorismo 19.* Latius & clarius eadem sententia relata & non tantum de his, sed de aliis quoque similibus partibus discissis ac resectis explanata adeo, ut ultra non ausim crambem repetere, nisi dicere cum aliquibus velimus, industria librariorum fuisse adjectum, ut per ampliolem libri molem, hunc reliquis aliis coæquaret; unde lectorem ad *lib. 6. Aphorism 19.* remittimus.

Aphorismus XXIX.

Si Leucophlegmatia (sive pituita alba) detento, fortis diarrhæa supervenerit, morbum solvit.

Nota: Huc referripotest Aphorismus 74. libri hujus 7. *Alba pituita, aqua intercus supervenit.*

Contentum seu Intentio.

De Prognosi Leucophlegmatia.

Connexio: Cum de ventris affectionibus dixisset in duobus mox ante dictis Aphorismis Hippocrates: In hoc præsentì loquitur de

morbo ad ventrem pertinente, qui leucophlegmatia seu pituita alba seu anasarca dicitur.

Hic Aphorismus ob simplicem conclusionem non dividitur.

Qui leucophlegmatiae intelligat, hic Hippocrates, non satis bene constat, aliquando enim cum ascite, quandoque etiam imo plerumque cum anasarca, aut hyposarca confunditur. At vero contra ascitem pugnare videtur *Aphorismus 27. lib. sext.* in quo dicitur, quod hydropicis scētis vel uſſis, si aqua affatim exeat moriuntur; cum hic ex adverso dicatur vehementem & copiosum alui fluxum illos liberare; quamobrem verisimilius putandum anasarcam aut hyposarcam intelligendam esse, in qua crassa & lenta pituita, vel etiam lymphæ glutinosior reddita, in extremis partibus corporis, & sub cute universa, diffusa hæret, nihil compatiens visceribus internis, ut in *Prorrheticis* dicitur, sed solum vitio vasorum lymphaticorum resorbere per glandulas illam non valentium. Soluta namq; fortiter alvo, universus ille humor pituitosus, vel lymphaticus glutinosus, per glandulas ipsas inter sese connexas & consentientes facile sensim sensimque deducitur in proprios ductus & salubriter evacuatur. Porro cum hoc evenit, validum naturæ robur indicatur, quæ non solum vias evacuationis patentes reddit, sed etiam humores ipsos evacuandos, disponit evacuatione, dissolutione, lubricitate, nullo interea viscerum internorum detrimento exoriente; quod sane facilius in asciticis haberi solet. Atqui fluxus iste alvi vehemens copiosus, & crassi illi⁹ humoris qui peccat esse debet, quemadmodum hic indicitur, ne scilicet tenuiores humores egerantur, crassioribus ac tenuioribus relictis, quamobrem non immerito notatum *fortem ac validum* esse oportere, ut à leucophlegmatia liberet.

Sed quamvis de anasarca aut hyposarca hanc sententiam simus probabilius interpretati, nullatenus tamen diffidendum id ipsum salubriter quoq; evenire posse in ascite, in quo licet in abdomine, contentus humor non tam facile, ad intestina deduci possit, eo quod supra peritonæum ille fluctuet; non raro tamen factum est, ut parante sibi viam natura, adhuc salubriter inter mali initia evacuat, & cum ascites altam ibidem non fixerit radicem, nec adjacentia viscera infecerit, aut labefactaverit, quæ casu etiam eos perire accidit, & si ab uberrima feri evacuatione videantur sublevati, quoniam paulo post in novam feri collectionem, à labe in visceribus

ribus relicta recidunt, laxatis simul una glandulis, & vasis lymphaticis erosis. At vero neque hic colligere audeant, qui audacter à naturæ evacuationibus, ab arte promovendas, pari gradu procedere contendunt, licere nimirum prudenti medico id ipsum rationabiliter tentare, quod aliquando à natura criticè peractum est; nam disparitas longa & lata nimis est inter utrumque: Siquidem naturæ opus tempestivum ac oportunum, quis umquam, etsi peritus artifex ad amissum poterit imitari? ut alibi dictum. Quin & ipsam naturam quoque non raro fallere ac falli experimur, cum in iisdem evacuationibus, salubriter interdum inchoatis, tandem deficiat & naufragetur sæpe sæpius æger in portu.

Dices I. Si ex pituita seu lymphâ glutinosiori fit, cur ergo tales subflavum & sublividum colorem referunt? Resp. ex commixtione bilis, adhæc ipsissima ratio est quod leucophlegmatici & chloreticæ foeminæ, ex bilis & salium admixtione vehementissime sitiant.

Dices II. Leucophlegmatici commota Diarrhæa moriuntur ergo hic Aphorismus non subsistit. Resp. Si Diarrhæa fiat à principio morbi & viribus constantibus nego antecedens; Viribus prostratis & visceribus male affectis concedo, in hoc enim casu Diarrhæa non tollit morbum sed ægrum *Teste Dureto.*

Plura vide apud Cardanum in *Commentario.*

Aphorismus XXX.

Quibus per Diarrhæas (seu alvi profluvia) alvi excrementa spumosa sunt, iis à capite fit defluxio (seu pituita defluit)

Contentum seu Intentio.

De Facibus alvi spumosis in Diarrhæa.

Connexio: Cum in antecedenti Aphorismo dixisset de Diarrhæa, quæ leucophlegmaticæ supervenit: In hoc præsentis Aphorismo rursum Diarrhæam assumit, & ex ea Prognosticum notabile affert.

A a a a a a 3

Hic

Hic Aphorismus ob simplicem conclusionem non dividitur.

Diarrhæam non ineptè plerique multiplicem faciunt, tum pro diversitate humorum excretorum, tum pro varietate partium affectarum, unde illæ originem ducunt: Memorat autem hic Hippocrates eam, quæ à capite male affecto atque ab humore ejusdem causa congesto, & vel ingenito, vel non repurgato, derivat.

Inquit autem illam internosci à spumosis excrementis, per alvum egestis, non quod ista, si compareant cerebrum affectum designent, cum possint aliunde procedere etiam ab ipsis intestinis; Sed quod male affectum caput, si fortassè per intestinorum cavitates exoneretur, excrementa spumosa deponat, atque ab iisdem apparentibus id ipsum alleviari, spes non levis adsit, quemadmodum *in Coacis prænotionibus* de Angina per intestinales vias solvenda idem Author admonet.

Dicuntur autem spumosa excrementa, quæ præter novum, & tenacem pituitam bullosa comparent, & intermixtos flatus, illana attollentes, ac quodammodo fermentantes, nec non etiam crepitus adjunctos habent. Tales autem egestionis fiunt, quoties lymphaticus, sive pituitosus humor a corem contraxit, & cum tenui & effæto felleo humore, ad intestina delatus commiscetur, qui cum è glandulis, inter se invicem connexis prodeat, & potissimum à cerebro, quod magna glandula ab Hippocrate dicitur, nil mirum si hic ab eodem, censeantur ejusmodi spumosa excrementa è capite defluere, non quod proxime spuma ipsa à cerebro dependeat, sed quod pituitosus seu lymphaticus humor ab ipso malè affecto, ceterisque glandulis potissimum proficiscatur, qui deinde in intestinis, à mixtura cæterorum succorum, atque ab intermixtis flatibus spumosis evadat; quin & non raro docente eodem Hippocrate *Lib. de internis affectionibus* & *Lib. de glandulis*, per ventriculum & glandulas per ipsum interfertas, ad alvum exoneratur, non levi interea nec unica sed ingenti ac multiplici fermentatione, in itinere promotà à variis succis, per ductus & viscera occurrentibus, præsertim felleis, pancreaticis & intestinalibus ut ex anatome constat; sed & per glandulas ipsas in quibus secernitur, diversimode commotus, atque inæqualiter discerptus, & variis salium generibus, pro varietate fermentorum, facillimè postea spumescit, & quæ in intestinis invenit

excre-

excrementa, pari conditione inficit, imo multo magis, coadjuvante nimirum accommoda ejus loci ad fermentandum habitudine.

Quod autem hic interpretes opinantur de spumæ generatione ab intercluso aëre, in liquoribus, vel motu exagitatis, vel calce ebullientibus, verum quidem est in iis, quæ extra corpus sunt, quibus aër intermisceri potest; at cum humoribus per corporis nasa discurrentibus, quomodo umquam externus aër commisceri queat, non bene liquet, nec rationabiliter sibi quis persuadebit, cum vix is pulmonis Tracheolas habeat; quamobrem quod Galenus in *Commentario* edocet, *flatuosum spiritum, dum humori commiscetur, vehementem habentem motum & inaequalem, ita quod ipse dirumpitur & pituitam frangit, in multas plantas & parvas*, spumam progignere, verisimilius optabitur fermentantibus in se ipsis humoribus, in se invicem commixtis, ut mox ante expositum, cum fermentatio ad localem etiam motum partium heterogenearum se ipsas subigentium per quam optime reducatur. Cæterum adhuc si à capite, pituitosus vel lymphaticus humor non defluat, ut ex longo itinere, & cæterorum succorum commixtione agitari queat, & spumofus fiat, satis tamen erit, si ex confluxu solum prædictorum humorum inter se invicem fermentescentium commotio talis habeatur, ut excrementa spumescant, adeoque indicent, à laborante cerebro pendere, si crassior lymphæ inde deducatur, ob malam per ejusdem glandulas expurgationem, veluti per filtrum laxum, plus justo vel obstructum, habitam, quemadmodum in catharris, ut proinde per glandulas sensim sensimque delabatur in ventriculum & intestina.

Constat autem ex anatome consentire cum cerebro, glandulas pene universas corporis, tam arcte inter sese connexas, ut catenam indissolubilem efforment, uti præsertim sunt corticales Cerebri, papillares, pituitaria, quæque in collo, jugulis, faucibus & in oesophago interspersæ sunt, ad ventriculi fundum usque indeque ad intestina, pancreas, mesenterium, ut reliquas sileam, viscerum ferè omnium, & subtercutaneas dictas, quæ nexu equidem inexplicabili cum fibris partium, & præsertim membranacearum texturam efformant reticularem, ut ferme dixerim aliud non esse, humanum corpus, exceptis ossibus, quam exactam & elegantem compagem glandularum, fibrarum filo consutam, exstructam & intertextam.

Qua-

Quare qui hæc in humano corpore consideraverit, plane addiscet qua ratione Hippocrates dixerit partes omnes inter se mutuo consentire, & consensum in toto corpore unum esse, *conspirationem unam & omnia esse consentientia* & lib. de locis in homine; inter initia, scripserit: corporis autem singula partes, altera alteri, ubi hinc vel illinc processerit, morbum statim facit, venter capiti, caput carnibus, ac ventri, & reliquæ omnes juxta eandem rationem, quemadmodum venter capiti, & caput carnibus ac ventri &c. & paulo infra: Corpus porro ipsum, sibi ipsi idem ac simile est, & ex iisdem compositum est: Similiter autem habet parvas & magnas partes, itemque infernas ac supernas: & si quis minimam partem corporis acceptam male afficere velit, totum corpus affectionem sentiet, qualiscunque ea tandem fuerit propterea quod minima corporis pars omnia habet, quacunque & maxima &c. hæc Hippocrates. Ex quibus omnibus patet, non tantum in capite, sed etiam in aliis corporis partibus excrementa spumosa generari, ut plurimum tamen in capite.

Quæres: Utrum ex spumosa urina bene catharri ab urologis præfagiantur? Resp- tutius esse stare experimentiæ quam rationi: illa docet, sæpius observatas esse spumosas urinas, quæ tamen signa non erant catharri, nos autem in praxi observavimus, flatuum potius esse Phænomena.

Plura de his enucleatè tradita lege apud Cardanum in *commentario*.

Aphorismus XXXI.

Quibus per febres, in urinis sedimenta, crassiorem farinam referunt, longam in valitudinem fore significant.

Contentum seu Intentio.

De Urina crassa farinacea.

Connexio: Cum Hippocrates in præcedenti Aphorismo dixisset, de excrementis alvi spumosis: In hoc præsentis Aphorismo de urinis

rinis, earumque sedimentis crassioribus & farinaceis longitudinem morbi significantibus loquitur.

Hic Aphorism. propter simplicem conclusionem non dividitur.

Prognosticus est hic Aphorismus, fortasse congruentius & opportunius inter eos, qui *libr. 4. Aphor. 69. 70. 72. 76. usque 82.* continentur, fuisset relatus, cum ibi de his quæ ad febres pertinent, sermo habeatur, sed quia nobis, nunquam curæ fuit, tam anxie Aphorismorum connexionem exquirere; propterea parum intererit, quo loco hic sit adjiciendus, modo Aphorismi utilitatem & veritatem assequamur.

Urinarum sedimenta hic considerans Hippocrates in febricantibus, dijudicat ex illis futuras diuturnas & chronicas febres, si farinæ crassiori & furfuraceæ simile quid referant. Sunt enim sedimenta in urinis repurgamenta eorum, quæ ex circulante sanguine in visceribus deponuntur, atque cum sero urinario ad filtra tubulorum renalium amandantur, & propterea ostendunt quidquid in sanguine & visceribus præsertim imi ventris superabundat, atque sicut inutile secernitur & repurgatur. Quoniam vero febres, cum longæ futuræ sunt, à crassis, lentis, tartareis, atque acidis succis progeneritæ foveantur, & his diuturno plane tempore egent, ut dissolvantur, attenuentur ac seponantur, per fermentationem in ipsis promotam; proinde fit, ut cum ejusmodi humores prævalent, longos quoque morbos excitent, quandoquidem hi non alio promptius deduci solent, quam ad renes, quo superabundantes in sanguine & visceribus humores, fermentis eorundem subacti & secreti, simul cum sero urinario transcolantur ac deponuntur, & actione inter se ipsos inita, acidum illorum à sale urinoso alkalino subigitur, unde præcipitatio succedit, cum depositione partium tartaricarum & crassiorum, quæ fundum matulæ petentes, sedimentum urinarium efficiunt farinæ crassiori simile; quamobrem cum istud in urinis comparet, indicio est crassos, tartareos & acidos succos in corpore prævalere, qui febrem foventes, illam significant, chronicam & diuturnam futuram.

Cæterum tunc solum sedimenta istiusmodi, farinæ crassiori similia morbi longitudinem indicabunt, cum citra sanguinis, vel coagulati, vel dissoluti vitium accidunt, à sola scilicet crassioris lymphæ, vel glutinosi feri abundantia; at vero si cum aliis

pravis symptomatibus conjungantur, mali moris in sanguine ut non attestantibus, non tantum mala erunt, sed etiam lethalia, ut contigit *Sileno* & qui in *Dealcis* horto decumbebat, ut bene hic advertit Gal. quia tunc non à multitudine aut crassitie humorum dependent, sed à veneno dissolvente, & sua acredine veluti in cinerem redigente, glutinosam sanguinis substantiam, quam reficere difficillimum est, & acre ac corruptivum ejusmodi venenum retundere ac debellare pene impossibile, unde tandem fatiscente corde animal perire cogatur.

Queres utrum verum an ignominiosum sit vulgi proverbium matulam Medico esse quasi speculum fidissimum. Resp. hæc & similia vulgi putatitia scomata, apud eruditos habentur utilia documenta, ex urina enim totius sanguinis crasis, consistentia & dispositio tutissime colligitur, licet huic veritati rixosus quidam Poëta contradicat his versibus.

Turbida significat mentem esse urina serenam

Dum clara urina est, turbidus est animus;

Si speculum matula est, hominis quo cuncta videntur

Intima, erit speculum corporis haud animi.

Dices I. His qui laborant calculo vesicæ, vel renum affectibus, similia quoque prodeunt sedimenta, quæ tamen non habent significationem supra febrem. Resp. hæc sedimenta per febrem distinguere de febre autem intelligendus est Aphorismus: hinc monente Hippocrate in prognostico, medicum attentum esse debere, ne ab urina, si mala sit, ob vitia renum aut vesicæ, turpiter decipiatur.

Dices II. Urinæ farinacæ & crassæ significant vias esse apertas & vires constantes, ergo non indicabunt morbi longitudinem & habito respectu ad vires & vias apertas, concedo, non fore morbum longum: sed habito respectu ad quantitatem & qualitatem materiæ nego.

Hæc & plura enucleata legi possunt apud Cardanum in *Commentario*-

Aphorismus XXXII.

Quibus in urinis biliosa sedimenta, sed supra tenuia apparuerint (seu & superne tenues sunt) acutum morbum significant.

Contentum seu Intentio.

De Urina biliosa.

Connexio: Cum Hippocrates in antecedenti Aphorismo locutus esset de sedimentis crassis urinæ: In hoc præsentī Aphorismo de sedimentis tenuibus sermonem instituit.

Hic Aphorismus ob simplicem conclusionem non dividitur.

Præsens Aphorismus contrarius videtur præcedenti, quia sicut in illa sedimenta furfuracea vel farinacea, velut à pituitosis succis pendencia, chronicum & longum morbum portendere dicta sunt; ita in hoc à sedimentis suspensis & elatis, utpote à biliosis humoribus exortis, acutus morbus prædicatur: & quamvis in priori, attenta potius videatur sedimenti substantia atque conditio, in hoc vero locus & situs ejusdem, si restamen ipsa intimius pensitetur, idem omnino in utrisque, sub diversa licet consideratione perpensum animadvertemus, cum ea, quæ farinæ crassioris similitudinem referunt, tantum petant, quæ vero biliosa sunt, in altum attolluntur; unde sedimenti substantia in præcedenti Aphorismo considerata re ipsa convenit, cum situ hic memorato.

Naturalis equidem sedimenti situs in urinis, ut salubritatis indicium sit, medius planè esse debet, inter sublimem & infimum, cum is propriè pertineat ad hypostasim, quam tantopere Medici, in urinarum inspectionibus desiderant, eo quod peractam & absolutam in operibus naturæ coctionem & secretionem demonstret, quæ mediocriter in crassando procedere dicitur. At vero variat plerumque sedimentum, à conditione varia humoris concoquendi, ac secernendi, unde qui crassus & lentus est, licet naturæ concoquenti ac expellenti subjiciatur, imum semper suo pondere in urina locum petit; tenuis vero in altum effertur, ut eo magis, quo urina ipsa multo sale satu-

ra est, quo sanè pacto gallinaceum ovum experimur in catino aqua salina repleto, sursum magis vel deorsum tendere, prout multo vel paucò sale marino imbuta illa fuerit.

Quoniam vero sedimina biliosa, præ ceteris tenuiora sunt, ut ex adverso à phlegmaticis & crudis humoribus procedentia, crassiora & compactiora; proinde fit, ut illa sursum attollantur, hæc deprimantur, & fundum matulæ petant: Etenim illa volantis sulphuris, ista acidi coagulantis conditionem participant. Adjecit insuper Hippocrates biliosis hisce sedimentis, aliam in urinis conditionem *ut superne tenues sint*; quæ verba, cui aptanda sint, non satis liquet: & quidem non sedimentis, quæ cum biliosa dicantur, plane tenuia quoque ut dictum, esse debent; neque urinis, quia nullatenus videntur posse simul esse biliosæ & tenues, præsertim juxta expositionem Galeni, qui tenues arbitratur ex mente Hippocratis intelligendas perpetuo aquosas esse. Verum rationabilius illa congruent urinis ipsis, tum secundum propriam substantiam serosam consideratis, tum secundum eorundem contenta, græce hypostases; quia in ejusmodi casibus, & acutiem morbi indicent, præter sedimentum biliosum, supernè tenues quoque esse solent; hac enim ratione neque multitudinem, neque crassitiem aut oleositatem bilis significant, quippe fieri adhuc potest ut cum sedimentis biliosis, urinarum substantia undique crassa & flavo colore plurimum tincta copuletur, at vero, ut brevitem & acutiem morbi prænuntient, tanto humore flavo tinctæ ac saturæ esse non debent, ut pene ictericæ videantur, cum multitudo, crassities, & oleositas ejusdem longitudinem potius præsignaret: Attamen nec omnino tenues seu decoloratæ esse debent, ita enim malæ quoque forent, ob symptomatum & signorum disparitatem, sed *superne* solum, hoc est ea parte qua sedimentis supernatant, & per comparisonem ad infernam earundem partem, quâ coloratiores, opaciores & crassiores erunt. Qua sanè ratione salino-sulphureus humor, illas tingens non tantum tenuis, sed etiam modicus designatur, qui propterea, cito concoqui, secerni, atque expurgari possit, unde postmodum morbi acuties & brevitatem.

Quod si fortasse tenuitas urinarum talis sit, ut flammeam conditionem referat, & illos reddat quales alibi Hippocrates pellucas appellavit, tum sanè non solum acutus, sed etiam peracutus & valde periculosus

Iosus præsignabitur, veluti in delirantibus, phreneticis, detenta nimirum parte salino sulphurea crassiori, atque alicubi in partibus principalibus hærente. Verum Galenus *in Commentario superne tenues* non ad *situm* sed ad *tempus* retulit, ut proinde voluerit eas tenues intelligendas fore inter initia, & cum nondum coctio in illis relucere conspicitur, quia inter initia morborum omnia cruda sunt adeoque tenuia, & coctio ut dictum, increassando procedit: Sed in Galenum more suo acriter invehitur Cardanus, apud quem hæc & alia legi possunt.

Dices: In febribus tertianis maximè æstivis sunt similes urinæ, & tamen non sunt morbi acuti. R. Licet hæc tertianæ non sint morbi acuti ratione paroxismi universalis, sunt tamen ratione paroxismi particularis, neque enim sæpe in his delirant & extreme laborant, adde: hunc Aphorismum Hippocrates scripsit de febribus continuis non intermittentibus.

Aphorismus XXXIII.

Quibus divulsæ (seu diversæ) sunt urinæ; iis vehemens fit in corpore turbatio.

Contentum seu Intentio.

De Urina variante.

Connexio: Cum in duobus antecedentibus Aphorismis Hippocrates egisset de crassis & tenuibus urinis: In hoc præsentis de earundem diversitate agit.

Hic Aphorismus ob simplicem conclusionem non dividitur.

Quod ergo mox ante de urinarum sedementis, nunc de iisdem in universum, secundum totam substantiam & contenta, consideratis sermonem subjicit, dicitque urinas divulsas fortem seu vehementem turbationem in corpore significare.

Quid vero pro divulsis intelligat, licet Galenus *in Commentario* dubitare videatur, si tamen perpendantur, quæ ipsemet Hippocrates aliis in locis adnotavit, & in Epidemiorum ægrotantibus observasse

meminit, procul dubio, minimè ambiget, divulsas & distractas urinas dici, quæ sive in substantia serosa sive in contentis, sive in utrisque sibi non coherent, & inæquales, & inconstantes observantur, & modo tenues, modo crassæ, nunc uno nunc alio colore tinctæ, & sedimenta disjuncta sursum, deorsum aut ad latera, magis, minusve concocta referunt, vel eodem tempore, vel diverso, quemadmodum in Phitisco, in Pythione, uxore Philini & aliis.

Quamquam autem indicia ex urinis desumpta, non raro fallacia sint, cum pleræque malæ creditæ, quibusdam consuetæ sint & naturales, imo variata in ætatibus constitutione, victus ratione, exercitatione & aliis sæpe etiam variæ esse solent, & pro renata etiam nunc bonæ, nunc malæ, nisi peculiare adhuc viscerum præsertim naturalium affectiones, specialiter quoque illas immutent, ut in hypochondriacis potissimum, unde dubie prorsus conjecturæ deducantur; attenta nihilominus æquali corporis constitutione, ac nihilum præterea permutata in suis ductibus urina, quæ à serosa sanguinis parte, & à lymphâ procedere putatur, procul dubio fidelius indicabit, quæ in vasis sanguiferis gesta sunt, aut in ductibus reliquis corporis, quos pervadit; quamobrem visceribus ac ductibus omnibus, in sua naturali habitudine constitutis, quandocunque urinæ divulsæ, atque in suis partibus contentis discerptæ comparent ingentem in sanguine commotionem attestantur: Tunc enim sic affectæ & distractæ minguntur cum inæqualiter partes inutiles à sanguine secernibiles, & fermentationi subjectæ, non totæ simul repurgantur sed prout à puriore parte sanguinis, tractu temporis secedunt, quare interruptim, inutiles illæ impuritates in urinis observantur magis vel minus concoctæ & compactæ, quo aliæ ab aliis melius fermentationem subactæ fuerint. Ejusmodi itaque in urinis varietates indicant fortem & vehementem in sanguine commotionem, per quam partes inutiles, ab utilibus sejungi necesse est, neque enim aliter istæ ab invicem secedunt & separantur, quam per fermentationem, in præcipitationem desinente, prout experimur in musto doliis incluso. Recte ergo Hippocrates ab illorum sedimentis apparentibus distractis ac divulsis vehementem in corpore turbationem conjicit. Verumtamen commotio hæc & turbatio non raro etiam fieri solet in hypochondriis & cæteris visceribus naturalibus, è quibus sæpe urina per compendarios meatus educitur, ut alibi ostendimus,

dimus, cum jam satis anatome compertum sit, adhuc breviori itinere urinæ materiam in renes percolari, ut propterea peculiare horum viscerum affectiones indicare soleat, ut de Hypochondriacis dictum; quamobrem non immerito Hippocrates indefinite dixit, *fortem in corpore turbationem fieri*, comprehendens sub nomine corporis, omnem & quamcumque ejusdem cavitatem, ubi fermentatio & heterogeneorum succorum commixtio & exagitatio haberi potest.

His ergo divulsis, distractis & inconstantibus ac minimè coherentibus urinis fidendum non est eodem quasi modo, quo hominibus inconstantibus qui aliud stantes aliud sedentes dicunt & agunt, de quibus Virgilius

Animum nunc huc, nunc dividit illuc:

Quæres Utrum excrementorum diversitas etiam in aliis morbis perturbationem significet? *R.* Affirmative: *Varietas enim excrementorum significat varietatem humorum & affectuum*: Exemplo sit Hippocratis doctrina, qui sputum quod post suppurationes ejicitur, ubi in eo cum pure bilis rejicitur, mortiferum asserit.

Dices: Substantia urinæ, quandoque bona est, sed color variat, quandoque color bonus, & substantia tenuis, non raro hypostasis est divulsa, & partes habet differentes, & tamen nulla inde turbatio in corpore fit, Ergo *Comment.* Galeni non subsistit. *R.* In febribus nego, extra febres transeat: Aphorismus autem ut supra dictum intelligendus est de febribus.

Plura vide apud Cardanum *in Commentario*.

Aphorismus XXXIV.

Quibus in urinis (seu in urinarum summo) bullæ innatant (seu insident) nephritim (seu morbum renalem) & longam fore invaletudinem significant.

Contentum seu Intentio.

De Urina spumosa.

Connexio: Cum de urinis in præcedentibus Aphorismis egisset Hippocrates: In hoc præsentis Aphorismo de iisdem agit, non autem

autem hic sedimentum, vel urinam ipsam, sed supernatantes bullas pro Medici facienda Prognosi proponit.

Hic Aphorismus ob simplicem conclusionem non patitur divisionem.

Eruit ergo in hoc Aphorismo, longi & renalis morbi prognosticum Hippocrates, ab his, quæ urinis insident aut innatant, cujusmodi sunt bullæ parum differentes à spuma, nisi quod hæc confertionem sed humiliorem, inclusi halitus elationem in materia crassiori & plerumque teste Hippocrate à capite proveniunt; illæ veluti à materia hærente quidem sed magis expansibili sublimiorem & latiore tumefactionem referunt, non tamen adeo arcte inter se connexam. Insident autem istæ urinis, cum in mictione sal universum, veluti ammoniacum volatile sali acido lymphatico & sero urinario commixtum, mutua vicissim actione, in tenues halitus elevantur, qui quoad usque extricari nequeunt, à parte phlegmatica urinarum supernatantes bullas, & perdurantes excitant, at vero postquam, interno nisu, atque adigentis externi aëris impulsu extenuantur, rarefiunt & discerpuntur, statim dissolvuntur & evanescunt.

Cum igitur hæc insidentes urinis apparent, renalem morbum significant, quia arguunt, porulos & tubulos renum, ac eorundem filamenta, in pelvim definentia, anfractuosa & implexa evasisse, ut proinde non tam promptè transcolare sinant serum urinarium suo sale imbutum, à tartareis acidis & viscosis succis, per eas partes derivantibus, unde facile progressu temporis tubuli ipsi & cavum renum infarciri possint, & gravia calculorum, obstructionum, tumorum & aliorum similium accidentium incommoda, ipsis inferre, si præsertim præter bullas sedimentum illæ referant, sabulosum, crassum, & fæculentum. Ab his enim constat plane morbum renalem futurum longum, siquidem vitio crassorum humorum, excitati morbi longi sunt, & præsertim si acorem illi, ut plerumque fieri solet, simul una contraxerint, quo crassities & aciditas humorum difficulter subigitur & cedit.

Dices 1. Similes urinæ etiam à pectore vel capite possunt provenire ergo non tantum à renibus & spumosa urinæ ut in contextu diximus concedo; quibus bullæ permanentes innatant, nego.

Instabis: Imo bullatæ urinæ ex prædictis partibus prodeunt ergo nulla solutio: Resp. Sunt bullatæ cum circulo livido concedo: sine illo

illo uti hic, nego.

Urgebis : Agitata fortiter urina bullas & spumas facit, quæ tamen non proveniunt à renibus, ergo. &. Bullas & spumas facit brevi evanescentes concedo, permanentes nego; ut autem sint à renibus, debent esse permanentes.

Plura de Bullis & hunc Aphorismum concernentibus controversiis vide apud Cardanum in *Commentario*.

Aphorismus XXXV.

Quibus in urina adipalis superficies est & conferta (seu quibus summum est pingue, & confertum) iis nephriticum (seu dolorem renum) & acutum morbum adesse significat.

Contentum seu Intentio.

De Urina oleaginosa.

Connexio : Cum in præcedenti Aphorismo Hippocrates egisset de signo, per quod longus renum morbus dignoscitur : In hoc præsentis Aphorismo de illo signo agit, per quod acutus illorum morbus dignoscatur.

Hic Aphorismus pariter ob simplicem quam continet conclusionem non dividitur.

Quod ergo dixit in priori Aphorismo, de bullis insidentibus, in hoc præsentis Aphorismo de superficie ejusdem urinæ, pingui & conferta pronuntiat; sed multo gravius quam antea, quippe exinde ait non longum, sed acutum morbum renum significari. Apparet autem summa urinæ superficies pinguis, ac adiposa alicujus partis substantia dissoluta & liquefacta; atqui hæc non tam ingenti & exurenti calori renum, aliarumve partium circumstantium tribuenda est, ut interpretes existimant, quam sali erodenti ac exsolventi per eas partes cum sero urinario transcolato, quod etsi adipem ipsum, jam concretum minimè diluat, aut corrodat, si tamen glutinosam substantiam alimentorum abrasat atque exsolvat, poterit quoque adiposam urinam reddere, & secundum superficiem pinguefacere, id quod plerumque

Ccccccc

fieri

fieri solet, in æstuosis aut inflammatoriis febris, atque exinde acutus morbus significatur.

Non tantum autem pingue, sed etiam confertum, coactum & concretum esse oportere adjicitur, ut nimirum non oleosum, aut guttis adipis conspersum urinæ summum intelligatur quo scilicet compacta substantia sit ex partibus excerpta. At vero falluntur qui putant, acutum morbum hic ab Hippocrate notatum, renibus ipsis insidere, cum is universaliter atque indefinite in Aphorismo recenseatur, ut etiam è quibuscunque partibus imò è toto corpore pendere possit; Renibus autem solus tumor adscribatur, quod plane tum ab acuto morbo, cum febre conjuncto, tum etiam ab urina erodente, & multo sale acri vim habente pungendi, & partium nexum solvendi, imbuta provenit. Hinc hallucinatos eos existimaverim, qui ut Galenus in *Commentario* recenset, pro nephriticis Phreneticos morbos exposuerunt, coarctantes Hippocratis dictum, ad hunc unum duntaxat particularem affectum. & quidem à renibus remotissimum, cum tamen urinæ & urinarum contenta, si unquam probabilius quid significant, plane renum & vesicæ affectiones specialius ostendunt, ut cunctis notum est. Quod si concretus adeps, totus simul in urinis excernatur, nec iteratis vicibus appareat, ut confertum potius exeat, quam confertum & coarctatum, tum profecto à renibus, & partibus circumstantibus specialiter prodibit; eadem penitus de causa, ab acri scilicet & erodenti humore falso, cum urinis excreto, vim habente relucendi & abradendi.

Unde autem frustulum adipis, vel adeps ipse liquatus, & deinde in renibus concretus prodeat, non bene ex anatome, ab interpretibus explicatur, quippe ex illa constat renum substantiam in se ipsa consideratam adiposam non esse, & canaliculos in ejus pelvim desinentes, membranosos, fibrosos ac duriusculos esse, ut nec tam facile erodi, nec erosos adipem amulari, sed potius strigmenta membranacea, vel filamentosa.

Adeps autem quo renes circumvallantur, licet multus sit, & undequaque illos circumdet, nullatenus tamen in ejus substantiam, aut cavitatem patet; unde etiam si liquetur, vel abscindatur, haud quamquam potest in renum pelvim deduci, & per urinas expurgari, quamobrem difficile admodum videtur viam invenire, qua ipse perducatur, & cum urina permisceri queat, ut supernatans in eadem compareat.

Hinc

Hinc verisimilius existimaverim, adipem in urinis apparentem, vel è glutinosa sanguinis portione prodire, vel è glandulis atrabilaribus seu capsula atrabilaria seu renibus succenturiatis dictis, quæ consensum cum renibus ineunt, illuc guttatim deduci, ac deinde vel in renum pelvi, vel in vesicæ cavo concrefcere, & frustulum adipis æmulari. Sed fieri quoque potest, ut male affectis renibus phlogosi, inflammatione, tumore, tam in suis porulis amplificentur & hient, ut possint attenuati, & liquati, saltem ex parte circumambientis adipis substantiam excipere, atque in pelvim deducere, attenta præsertim recentiorum anatomicorum observatione, qua universa renum substantia refertur innumeris tubulis pervia, ac fibris & glandulis quaquaversum intertexta, quæ ad pelvim undequaque patulam desinunt.

Nota: Ly confertum varios sortiri sensus: 1. ut in magna quantitate exeat ex renibus: 2. ut brevi tempore & frequenter admodum veniat: 3. ut modo in magna quantitate, modo in parva inæqualiter prodeat, & hic sensus ultimus est verior & accommodatior, quia duo priores etiam colliquantibus febribus possunt accommodari.

Cæterum amplissimum super hac re, vide Commentarium Cardani.

Aphorismus XXXIV.

Quibus verò è renibus laborantibus, præter supra dicta signa, dolores etiam circa spinæ musculos fiunt; siquidem ad loca exteriora sentiantur, extrinsecus quoque abscessum fore expecta: Si vero dolores ad interiora magis vergant, abscessum etiam intrinsecus futurum potius sperandum est.

Nota: Confer hunc Aphorismum cum libri hujus septimi Aphorismo 22. quo & hunc vicissim reducimus.

Contentum seu Intentio.

De Abscessibus Nephriticorum.

C*onnexio:* Cum de renum affectibus tum longis tum acutis, ex urinis dignoscendis in præcedentibus Aphorismis egisset Hippocrates: In hoc præsentis Aphorismo, de iisdem affectibus renum agit, de sumens indicium quod ad dolorem pertinet.

Hic Aphorismus licet longus sit, simpliciter tamen concludit de abscessibus internis & externis, & sic divisionem non requirit.

Quæ ergo hætenus ab urinis deduxerat Hippocrates, nunc à doloribus posticam renum partem occupantibus alia præfagit, & quidem futurum abscessum ad anteriora, vel exteriora lumborum, prout illi internas, vel externas partes magis obsederint aut pervaderint: Quia vero renes ad eas partes siti sunt, quæ lumbos & lumbares musculos respiciunt, non raro proinde accidit, ut dolor unius partis, alterius dolorem mentiat, & aliquando dolores lumborum & musculorum, tum ad spinam, tum ad abdomen pertinentium præsertim cum tumefacti, ac inflammati fuerint, Nephritidem referant; & è converso, attentis solummodo situ, & doloris qualitate, quandoquidem se quoque deceptum fatetur Galenus, in internoscendo colico, à nephritico dolore, ob earundem partium vicinitatem; quin & dolor renum, facillime cum lumbis communicat, prout experimentis innotescit, & edocet etiam Hippocrates *Lib. de internis affectionibus cap. 16. & 18.* quamobrem plerique crediti nephritidem passi, inventi sunt subisse abscessum in musculis lumborum, ut de quodam Medico Pisano fatetur Mercurialis, & in quibusdam observatum memorat Bonetus; quamquam dolor in his, atque doloris sedes omnino differentes sint. Accuratius ergo hic Hippocrates advertit, quibus jam diu morbo renali laborantibus prædicta accidunt signa, & ex urinis earumque contentis, nihilum levantur, & dolores ad spinæ musculos protenduntur, vel exterius prodituri, prout ad interiores vel exteriores partes illi vergere videbuntur.

Fiunt autem & perdurant tam diu, ejusmodi dolores ab humoribus ad eas partes transfluxis, & non raro etiam paulatim congectione concretis, quamdiu nec exsolvi, nec per renes aut ureteres ad vesicam, nec per alios ductus ad alvum transferri & evacuari possint, sed in tumorem & abscessum coacerventur; unde si renum substantiam, aut alias circumjacentes partes, cum renibus consentientes occupaverint, & fermentatione ac suppuratione sensim inducta, fluidiores reddituri fuerint, alio tandem decumbent, atque (natura tamen existente valida) per diruptionem atque evacuationem aliquam se prodeant; si vero lumbares musculos pertingant, ad extimas renum partes, in illis abscessus fiet; procurante interea natura, qua data porta possit illos exonerare. Hæc autem præter antedicta, comitabuntur febres suppuratoria vocata, manifesta in lumbis elatio ac tumefactio, itemque rubor, ac dolor, tactu longe sensibilior, quibus prudens & diligens Medicus pro re nata congruis remediis, vel interne vel externe administratis, opportune opitulabitur.

Dices: Sæpe lumborum dolores torquent ægros diutissimè & tamen nullus fit abscessus, Ergo. & in febre acuta, & inflammationis renibus nego: Extra febrem & inflammationem seu ab obstructione vasorum, concedo.

Aphorismus XXXVII.

Qui sanguinem vomunt, si sine febre accidat, salutare est; si cum febre malum: Curatio autem refrigerandi & adstringendi vim habentibus perficitur.

Huc quadrat Lib. 5. Aphorismus 32. ibidem explicatus.

Contentum seu Intentio.

De Vomitu cruento.

Connexio: Cum Hippocrates in præcedenti Aphorismo de Abscessibus, qui quandoque expurgari possunt per vomitum sanguinis &

puris: In hoc ergo præsentī Aphorismo agit de ipso vomitu sanguinis, qui fit cum vel sine febre.

Hic Aphorismus in duas partes dividitur, secundum duas conclusiones.

In *prima* proponit salutarem esse vomitum sanguinis, qui sine febre accidit: malum autem si cum febre fiat: In *secunda* docet, curationem esse faciendam refrigerantibus & adstringentibus.

Verbum Vomere, licet alibi videatur latiori significatione ab Hippocrate usurpatum pro quacunque sanguinis per os rejectione, hīc nihilominus stricte sumptum, audiendum est pro ea duntaxat, quæ à ventriculo procedit, cujus actio specialis est vomere. Eos igitur hoc loco considerat Hippocrates, qui sanguinem evomunt, id est ex ventriculo sanguinem eructant, seclusis viis, qui vel è pectore, vel è capite illum exspuunt, quippe non facile foret febre exemptos eos inveniri, qui sanguinem Tussi atque ex pectore egerunt, saltem procedente tempore excreationis, vel ratione ipsius sanguinis, multo antea male affecti, aut postea alicubi stagnantis & suppurati; qui vero simplici excreatione è faucibus & aliis adjacentibus partibus illum exspuunt, veluti rem nimis levem patientem, nullatenus videntur sub tanta Aphoristica sententiæ contemplatione comprehensi, longe admodum ab Hippocratis proposito, qui res graves & notatu dignas solummodo in Aphorismos redegit.

Sed unde est, quod alibi *Libr. 4. Aphor. 25.* scripserit, *sanguinem qualiscunque is sit, superne efferri malum*; hic vero saltem sine febre salutare esse dicat? Verum comparatè locutum animadvertet, qui distinguet, ibi contulisse supernam cum inferna sanguinis evacuatione: hic vero modum expurgationis ejusdem, vomitu ne an tusi, unde locus etiam valde differens conjici possit sanguinis rejecti: Siquidem ab his longe graviora, vel mitiora imminent mala, adeoque præfagia itidem deducuntur periculosiora vel tutiora.

Equidem sanguinem evacuari, nunquam bonum, quia talis evacuatio est de genere eorum, quæ nunquam debent excerni. Facta autem comparatione si aliquando ipsum egeri contingat, pejus est supra quam infra evacuari: ex illis vero, quæ per supernas partes accidunt, sanguinis evacuationes, minus malum est vomitu, gravius vero tusi, levissimum simplici screatu illum rejicere, quoniam hic

ex ore & faucibus, ille ex ventriculo, medius inter utrosque è pectore aut pulmone prodit.

Quoniam vero adhuc qui sanguis vomitu ejicitur magis, vel minus malus esse solet, hinc Hippocrates ab adjuncta febre, illum discriminandum edocet; & quidem sine febre salutarem, cum febre vero malum esse ait, atque salutarem hic subaudire decet, non quod profit, aut salutem inferat, sed quod in salutem facile terminetur, nisi etiam dicere velis, salutarem esse, quia exoneratur natura sanguine illo, qui extra vasa, si stagnaret, vitæ periculum afferret, & fortassis etiam mortem; quippe sanguis non tam obest egestus, quam cum extra vasa alicubi hærens coagulatur, & corrumpitur.

Cur autem salutaris dicatur qui sine febre accidit, contra vero qui cum febre fit, ratio facillime deducetur, quia cum febre junctus, vitium in sanguine arguit, qui salsa acredine, venas aut arterias arrodit, & sibi exitum faciat; cumque non tam facile sit vitium tale à sanguine delere; atque erosa vasa conglutinare, propterea malus omni ex parte existimandus est, attenta præsertim ventriculi structura membranacea, quæ corrosa difficillimè refarcitur; & si aliunde sanguis ille prodeat, atque in ventriculum exoneretur, adhuc malum prænunciat, veluti signum labefactati aut exsoluti visceris, infectique sanguinis. Contra vero sine febre excretus sanguis, non tam malus est, quin potius in salutem facile terminatur, cum citra sui vitium prodeat, & per solam ut dicunt Anastomosim, apertis & dilatatis osculis arteriarum aut venarum quæ plerumque sponte sua corrugari & conniri solent, præsertim si aliunde is effluat, quam è ventriculi cavo: qua sane ratione evenit, quare salutaris dici etiam possit, inducto in viscere ipso male affecto levamine, quod nequitiam haberetur, nisi per vomitum sanguis fuisset excretus, id quod tamen adhuc accideret, si per alvum deponeretur ut libro quarto ostensum.

Non tantum autem subsistit Hippocrates in vomitus sanguinei prognostico sed methodum quoque addit eundem curandi, indicatione nimirum sumpta ab ejusdem exitu, qui plane tum ratione ipsiusmet sanguinis excreti, tum etiam ratione partis affectæ & evo-mentis, longè urgentior videtur etiam si febris adjungatur, quæ sæpe sæpius symptomatrica (ut dicitur) esse solet: omisit autem indica-

dicationem à febre desumptam, vel quod non semper, cum sanguinis vomitu copuletur, vel quod secundo loco considerata sit, & subsequenti tempore, eoque longiori, adimplenda, quæ nimirum directa sit ad vitium sanguinis adimplendum, vel quod demum è vomito sanguinis fluxu, ipsa sponte sua sit desitura repugnante interea, quod alienum in sanguine est natura, per convenientia corporis secernicula, quoties sanguis opportunis remediis prompte constiterit. Hæc autem fore subdit, acerbæ seu adstringentia & refrigerantia, quæ scilicet una simul oscula venarum & arteriarum conglutinent, fibrosam & glutinosam sanguinis portionem figant, & coarctent, ac denique sanguinem ipsum temperent, atque in suo motu aliquantulum remorentur, quorum sylva magna est apud practicos: præcellunt autem quæ ex chalybe & vitriolo confecta sunt, cum succis plantarum bistortæ, centinodii, pyrolæ & aliis: Cæterum vomitus sanguinis cum febre, ab interna inflammatione, nullus erit, vel una purulentus observabitur, si nimirum disrupta vel ulcerata illa fuerit, adeoque non multo post lethalis.

Erit tamen summopere advertendum, an non sanguis è venis aut arteriis egressus atque conversus in grumos, ventriculi cavum occupet, tunc enim acerbæ ista atque adstringentia medicamenta, nullatenus forent administranda; quippe quæ magis concretum sanguinem coagularent & figerent; quin imo communicato inde illi acore non solum in fermentationem eundem adigerent præternaturalem, sed etiam infractis & depravatis succis ventriculi digestivis, ventriculum ipsum labefactarent, & chylosim impensè admodum vitiarent; quamobrem expediet, tum primum concretum sanguinem dissolvere & educere, postmodum oscula venarum aut arteriarum occludere & coarctare.

Conjiciemus autem de grumis ventriculorum occupantibus, à pondere, laxitate, anxietate, & ciborum fastidio, sicut etiam ab assiduo vomendi conatu, aliisque symptomatibus Epigastricam regionem molestantibus. Verum tamen utramque paginam adimplebit mixtura illa Sylviana, ad vomitum sanguineum compescendum peropportuna, præter alia plurima dissolventia, ex testaceis potissimum petita: at vero hæc convenient solum in anastomosi & in simplici reseratione vasorum; etenim in erosione, aut ulcere, a-

lia

ha omnino differentia essent adhibenda, ut propterea hic arguere liceat, Hippocratem non alium sanguinis exitum memorasse quam ex sola apertione venarum & arteriarum, ut dictum.

Adnotare insuper convenit, quam ex parte probabilius suspicari fas sit, sanguinem prodire, num scilicet ex ipso met ventriculo, aut gula, aut potius ex inferioribus aut collateralibus visceribus, etenim pro earundem partium varietate, adhibere quoque convenit varia eaque specialiora medicamenta, sine ipsius ventriculi incommodo, qui non nisi ex consensu illarum sanguine oppletur atque ad vomendum laceffitur.

Hæc autem facile erit internoscere ex eorumdem viscerum affectionum læsione, tumore, dolore, excreti sanguinis quantitate ac qualitate, aliisque symptomatibus adjunctis, & causis prægressis, de quibus fusius in praxi.

Postremo vomitus sanguinis, ex disrupto Aneurismate, adhuc sine febre lethalis est, quin imo momento temporis interimit, ut sæpe observatum.

Difficultates in contextu sunt solutæ, si quis plures desiderat, legat Cardanum & alios in commentariis.

Aphorismus XXXVIII.

Destillationes in ventrem superiorem, ad suppurationem perveniunt, intra dies viginti.

Contentum seu Intentio.

De defluxionibus catharralibus ad Pectus.

Connexio: Hic Aphorismus potius cum Aphorismo 26. hujus libri, quam cum præcedenti conecti videtur; ibi enim egit de suppuratione ventris inferioris, in hoc præsentis Aphorismo de suppuratione ventris superioris.

Hic Aphorismus ob simplicem conclusionem non dividitur.

Quid nomine destillationum seu fluxionum hic intelligat Hippocr. hallucinatos plerosque video, qui putant pituitosos humores in

Ddd ddd d

cere-

cerebro collectos, sensim per glandulam pituitariam dictam, in os & guttur irruere, ac postea per tracheam delabi in pectus & pulmonem, ubi si diutius detineantur, forte quia per tussim, & anacatharsim educi non potuerunt, putrescunt, & in pus verum, vel aliud æquipollens commutantur: Quamobrem destillationes hi authores ad catharros revocant, de quibus extant versicul illi:

Qui fluit ad pectus, dicatur Rheuma catharrus

Ad Fauces Branchus, ad nares esto Coryza.

Quin insuper existimant illas potissimum à vaporibus è visceribus naturalibus plus justo excalefactis exoriri, qui sua tenuitate ad cerebrum elati, ibique concreti (quo pacto experimur in destillationibus artefactis usu alembici) ac denuo in serosos humores redacti, sponte sua decidant, in subjectas partes, & præsertim in pectus & pulmonem, ubi nisi cito expurgentur & suppurentur ac proinde spurium empyema progignant, de quo hic Hippocrates.

At hæc recentioribus non arrisere, quippe qui figmenta dicunt, quæ de viscerum naturalium excalefactione illi commenti sunt, deque attenuatione, evaporatione, & concretionẽ humorum cum & nec vias, per quas efferantur, nec meatus per quos in pectus decumbant patentes, hæcenus Anatome detegere potuerit; quamobrem ad vasa lymphatica opportunius confugere coacti sunt, veluti quæ majore consensum cum partibus inferioribus, tum gutturis, tum pectoris habere observantur. Verum mihi adhuc superest animadvertendum, solere in gravedinibus cerebrũ exonerari, per corticales suas glandulas in nares, aures, collum, tonillas, & cæteras per guttur & fauces dispersas; unde multoties copiosè serositates illæ expurgantur, & quandoque etiam raucedines, angina, tusses aliæque affectiones exoriuntur; quamobrem verisimile admodum est, per consentientes glandulas posse cerebrum, saltem secundum exteriorẽ ambitum humoribus gravatum, in subjectas partes exonerari, licet ductus, per quos illi deferuntur, lymphatici esse soleant, quorum interest exsuperantem lympham & alias humiditates referre è glandulis exceptas atque depositas; in quem sane sensum audiendus Hippocrates, cum dixit *Lib. 1. de morbis: Pituita multa, cum confertim è capite, in ventrem superiorem fluxerit, putrescit, & pus evadit.*

Quandocunque igitur ejusmodi humores lymphatici aut serosi,
è ca-

è capite & cerebro in ventrem superiorem, sive in thoracem, decubitus fecerint, inquit Hippocrates, nisi cito alio deferantur, atque per urinas vel per urinam, vel per sudorem exitum inveniant, infra viginti dies suppurari, id est maturari, concoqui & puriformem conditionem adipisci, cum revera puris naturam subire nequeant, quod non nisi à sanguine stagnante proficiscitur, ut alias dictum. At vero necesse est, eos concoqui & maturari, ut expelli possint, siquidem coctionis beneficio crassescunt, & impulsu per rursus à pectore susceptum sustinent & admittunt: nam tenues & fluidi cum sunt, impellenti pectori cedunt, ac denuo in ejus cavum delabuntur, sicut in omnibus liquidis impulsis experimur. Statuit autem vigesimum diem, pro termino ejusmodi maturationis, non quod ad illum præcise diem, concoctio ista & maturatio perducenda sit, cum possit etiam, saltem in validioribus, & junioribus corporibus, multo citius promoveri, sed quia infra hoc spatium, in occluso pectoris cavo, facile stagnantes humores concoqui possunt, ac deinceps ad subsequentes dies, usque ad quadragesimum expurgari, ut de pleuriticis alias docuerat Hippocrates. Verum tamen ut materia in pectore collecta, re ipsa maturationem & concoctionem subeat, intra hoc spatium viginti dierum, novam aliam defluentem admittere non debet, alias concoqui & suppurari illa non posset: quin & nec ab inspirato frigido aëre, aut ab epotis gelidis & crudis sorbitionibus recrudescere, frigidum enim pectori inimicum est, & coctioni officit, non proficit: quod profecto plerique nulla ratione servantes, catharos etsi leves, in longissimum tempus protrahunt, & sæpius etiam Empyci fiunt.

Neque in fine hujus Aphorismi omittendæ pilulæ quædam plurimum conferentes ad ejusmodi destillationes reprimendas, potissimum si salsam & acrem conditionem referant; potenter enim illas temperant ac sistunt, conficiuntur autem hoc modo: ℞. thuris masculi seu olibani & mastichis aa. ℥j myrrhæ, opii, croci aa. gr. vii succi liquirit ℥j. & cum aq. ros. f. pilulæ ad magnitudinem pisi, quarum una sumatur tempore somni.

Quæres: Cur sanguis potius suppuretur, quam reliqui humores? ℞. quia consistit in calido & humido: & sic corruptio optimi pessima, præsertim cum calidum & humidum excesserit: Alii humores

non facile admittunt suppurationem, licet corrumpantur: Sed:

Dices I. Hippocrates *hoc lib. Aphor. 20.* dixit: ab Erysipelate putredo & suppuratio Ergo humores alii synceri sicut sanguis, ita & bilis quæ causa Erysipelatis est, suppurantur. Resp. id non nisi a valde malignis & percussis Erysipelatibus fieri, quæ non tantum cutem, sed etiam subjectam carnem adoriuntur & corrodunt.

Quares II. Cur non omnes destillationes ad pectus suppurantur? Resp. quia aliæ sunt cum impetu, aliæ paulatinæ; hæ paulatim resolvuntur, illæ suppurantur. Plures controversias lege apud Cardanum *in commentario.*

Aphorismus XXXIX.

Si quis sanguinem & grumos meiat, & stranguria (seu stillicidio urinæ) laboret, dolore ad hypogastrium (seu imum ventrem) & pectinem & perinaum (seu ad anum) pertinente, ad vesicæ localaborant.

Nota: De hoc Aphorismo a nobis dictum est abunde lib. 4. Aphorismo 80. quo lectorem remittimus ne chrambem repetamus.

Aphorismus XL.

Si derepente lingua incontinens fiat, aut aliqua corporis pars attonita stupeat, signum est melancholicum.

Contentum seu Intentio.

De Causis Apoplexiæ.

Connexio: Postquam in penultimo id est Aphorif. 38. egisset Hippocrates de fluxionibus, quæ fiunt ad thoracem; In hoc præsentis Aphorismo, tractat de iis, quæ fiunt ad linguam, vel alias corporis partes.

Hic Aphorismus ob simplicem conclusionem non dividitur.

Di-

Dictio græca ἀργατης, qua hic utitur Hippocrates, in lingua vitio, ad melancholicos internoscendos, magnum sanè apud interpretes excitavit dissensum; quippe Leonicens, *Incontinentiam*, Cardanus, *procacitatem*, alii *immobilitatem* exposuerunt, Galenus vero, in *Commentario*, eam vult esse, quæ ita infirma est, ut non possit integre vocem dearticulare, aut immobilem, & omnino resolutam esse: Ex his autem expositionem primam solum retinet, & commendat Mercurialis, ut proinde verbum ἀργατης significet linguam, quæ difficulter firmatur, & quando non oportet sistatur, ob sui imbecillitatem; nam quæ penitus subdit, resoluta est, comprehenditur sub secunda Aphorismi dictione, in qua dicitur, *aut aliqua pars corporis attonita stupeat*, alioquin aut idem his repeteretur, aut lingua non esset corporis pars. In hanc eandem sententiam condescenderant reliqui tum priores tum posteriores Interpretes. Verum Cardanus cunctos redarguens pro incontinenti lingua exponit, quæ plura loquitur quam deceat, ut propterea sensum Hippocratis eum esse dicat, melancholicum indicari, cum quis repente absurda & turpia loquitur. Sed contra observat idem Mercurialis, ejusmodi linguæ incontinentiam seu procacitatem esse potius, cujusvis alterius insaniam indicium, quam veræ melancholiam. Et quidem attenta humoris melancholici conditione, nullatenus accidit, ut in continentes & loquaces, melancholici sint, multoque minus procaces & lubrici, absurda & turpia loquentes. Sed & de linguæ immobilitate, non omnino dici potest Aphorismum esse intelligendum; nam etsi melancholici, taciturni plerumque sint, solitarii, tristes, cogitabundi, non tamen prorsus stupidi observantur, modo immobilitas hæc cum stupiditate confunderetur, quam adjecit in Aphorismo Hippocrates inquiens: *Aut si aliqua corporis pars attonita stupeat*. Ex his ergo colligere plane est, aliud quid per verbum ἀργατης hic illū voluisse sub intelligendum, alias idem repeteret bis, per diversa.

Verisimilius itaq; per verbum ἀργατης, ineptitudinem, impotentiam, hæitationem seu trepidationem interpretabimur, quæ certè accidentia sunt, melancholicis familiaria, quæq; ut plurimum eosdem invadunt & arripiunt, cumq; non tantum corpulentia & terrestreitate, sed potius halitu acido, & pontica conditione, perquam solent momento ferè temporis molestari, & stuporem ac ecstasim seu congelationem pati ut in catalepticis, propterea non abs re adjectum in Aphorismo adverbium illud *de repente*.

Et quamvis Aristoteles in *Problematicis*, scriptum reliquerit, melancholicos in republica administranda, in carminibus pangendis, & in rebus philosophicis exstitisse optimus, hi potius meditando ac scribendo, quàm loquendo valere solent; quin imo de melancholicis, virtute, prudentia ac moribus, veluti à natura, non vero à morbo & causa morbosa alias sumus interpretati.

Adjectum est autem in Aphorismo *derepente seu subito*, contractis & convulsis musculis linguam componentibus, non quidem à quantitate humoris melancholici craffi & tartarei, sed à qualitate ejusdem acida corrugante ac figente; acidum enim quod in eo prævalet, non raro aberrans, cito cunctos meatus corporis pervadit, & nervos potissimum afficit, eorumque fibras coarctat.

Quod si non tantum vapore aut halitu, verum etiam crassitie & lentore, capita & oscula nervorum obstruat, stupore ac paralyti, partes afficit, & ideo in Aphorismo dicitur, *aut aliqua corporis pars stupeat*; si quidem acidus humor, melancholicus dictus, quantitate exsolutionem, acore vero convulsionem inducit. Atque hinc etiam deducitur quare linguæ incontinentia ad impotentiam & taciturnitatem, non vero ad loquacitatem referenda sit, ut scilicet Hippocratis mens in duo omnino disparata, ac veluti opposita symptomata, ab uno eodemque humore provenientia deducatur. Quamquam etiam fieri possit, ut ab eodem acido & vitioso humore degenerato ac vellicante fibras nervorum, non solum linguæ loquacitas, & musculorum omnium commotio, sed impetuositas quoque corporis universi excitari possit, veluti in Maniacis unde idem Hippocrates *Lib. 6. Aphorism. 56.* scribit: *In morbis melancholicis, in hæc pericula inciditur, stuporem corporis, vel convulsionem, vel furorem, vel cecitatem significat.* Refert Lucas Tozzius, Romæ virum quendam religiosum & valdè doctum, à perturbata vehementer imaginatione, cum metu ex imminente famæ periculo adeo mente commotum esse, ut attonitus fieret, & vocem articulare nequiret, quin imo vix pedibus stare posset; post multos vero dies viribus & animo reffectus convaluit, sed adhuc mente hebes persistit, & in actionibus animalibus imbecillus; Quamobrem constat solere non raro melancholicos attonitos evadere & lingua ac voce titubantes fieri.

Unde autem id illis accidat, facile quispiam deducet, ex humore ipso

ipso melancholico acido, cujus maleficio spiritus animales, & nervi qui plurimi in linguam confluunt pro ejusdem motu & loquela, a core infecti, inefficaces fiant & nequeant pro indigentia linguæ promptè ad varios motus peragendos sollicitare. Sed & quod linguæ accidit, sæpe etiam ad alios musculos extenditur, adeoque impotentes ad corporis pondus regendum observantur, quo profecto fit, quare pusillanimes & repentino timore deprehenfi, aliquando repente concidant, & nec pedibus stare nec progredi possint. Notanter autem de linguæ trepidatione & titubatione, mentionem hic fecit Hippocrates, utpotè quæ proximior cerebro est, unde labes ista melancholicorum, cumque lingua musculis plurimis sit referta, quandocumque in suis motibus fatiscit, cæteras partes gravius affici posse pari vitio demonstrat: & proinde subditur hoc eodem Aphorismo, *aut pars aliqua corporis stupida sit, tale est melancholicum* id est morbo melancholico affectum, pariter illi *Lib. 6. Aphorism. 23. Si timor & mæstitia longo tempore perseverant, melancholicum est signum.*

Dices: Talis stupor potest etiam fieri à bile, quia celeriter movetur & tenuis est: Item post colicam biliosam, fit paralysis & stupor partium: Item homini summè irato adest incontinentia & stupor linguæ, Ergo à bile & non à solo melancholico humore fit. *R.* Stuporem non fieri cum calida seu tenuium partium sit: *R.* 2. Paraliticos non tam fieri à bile quam à bilis vehiculo pituitoso, seu lymphatico acido humore nervos imbibente: *R.* 3. Illa linguæ titubatio in iracundis, non provenit à bile, sed ab inopia spirituum seu illorum per motum iræ dissipatione.

Reliqua vide apud Cardanum *in Commentario.*

Aphorismus XLI.

*Si Senibus supra modum purgatis, singultus accidat
(seu superveniat) non bonum.*

Nota. Hic Aphorismus est similis illi quem supra Lib. 5. Aphorism. 4. abundè explicuimus, ubi indiscriminatim & universaliter, de omnibus à medicamento cathartico singultientibus explanatus est:
Mirum

Mirum proinde est, cur id ipsum Hippocrates repetat non bonum esse in senioribus, cum id ipsum potuisset ex antedicto Aphorismo facillimè deducere: Quamobrem, jure merito & non sine ratione à plerisque hic Aphorismus omittitur, veluti inutiliter ab aliis quam ab Hippocrate hoc loco insertus; Id ipsum & nos pariter facimus; hoc unice dicendo, Hippocratem hic magis de senibus loqui, & convulsionis non meminisse, sed singultum adduxisse, forsitan quod singultus sit magis peculiaris senum affectus, & ideo etiam illis minus periculosus, & ideo dixit *non bonum*: nolumus tamen hic comprehendere nimis senes aut decrepitos, in quibus singultus, utut cognatus senum morbus, illis non modo non bonus sed lethalis foret.

Aphorismus XLII.

Si febris sit, non ex bile orta, multa aqua calida capiti superfusa, febris solvit.

Contentum seu Intentio.

De Balneorum usu in febris.

Connexio: Cum Hippocrates Aphorismo 40 hujus libri locutus fuisset de succo melancholico seu acido stuporem inferente: In hoc præsentè Aphorismo loquitur de bile quæ febrem non facit, ejusque medelam proponit.

Hic Aphorismus ob brevitatem non dividitur.

Febres omnes ex bile fieri, alias expresse docuit Hippocrates, præsertim vero *Lib. de natura humana* & 2. ac 4. *de morbis*; eas autem intelligere oportet, quæ ab humoribus vitiatis progenitæ dicuntur, quales sunt, quæ antiquis putridæ & humorales appellantur, tertianæ, quartanæ, quotidianæ, exceptis hæcticis, atque ephemeris, unde febres omnes hic ab Hippocrate memoratas humorales duntaxat interpretari licebit, contra id quod arbitratur Galenus in *Commentario*.

Et quamvis quotidianæ, ac quartanæ febres iisdem fieri credantur,

tur, à pituita vel melancholia putrescentibus, non autem à bile, bene tamen juxta mentem ejusdem Hippocratis, adnotat Prosper Martianus in Commentariis ejusdem, & ante ipsum Mercurialis *hoc loco*, adhuc in ipsis bilem causam esse, cujus scilicet maleficio instar sulphuris, cæteri humores effervescent & inflammentur, ut propterea recte scriptum sit ab eodem Hippocrate febres omnes ex bile fieri; quod scilicet ab hac solummodo reliqui humores in motum & commotionem febrilem adigantur. Et sanè quandoquidem etiam à recentioribus dicitur nuspian sanguinem, lympham, succum pancreaticum, aut alium quemcumque humorem, febrem parere posse, nisi per alterius acrioris humoris, qui biliosi vel fellei cōditionem referat, mixtionem, in motum fermentativum adigatur & sanguinem ad celerius circulandum provocet, & commoveat: id quod communissimum fuit vetustioribus omnibus etiam ante Hippocratis tempora, ut deducitur ex eodem in citatis locis.

Itaq; de iis solummodo febribus, scriptus videtur hic Aphorismus, quæ hecticarum & ephemerarum naturam sapiunt, ad redarguendos scilicet Medicos illos, qui cunctis indiscriminatim febricitantibus, capitis & totius corporis ablutionem commendabant, quemadmodum refert Celsus de Cleophanto *lib. 3. c. 14*. Quamobrem ejusmodi lotionem convenire solum docet in Ephemeris & hecticis (potissimum ex laboribus, lassitudinibus, cutis constipationibus &c.) minime vero in putridis dictis & humoralibus febribus. Sed & advertit quoque perquam optimè Mercurialis ex doctrina ejusdem Hippocratis *2. Epidem. sect. 6.* (ubi hunc quasi Aphorismum paucis mutatis repetit) nec febrem propriè, & strictè accepta, sed calorem duntaxat excedentem, qualis in febre levissima hic intelligendum documento etiam *Galen. 1. Epidem. agro 12. & 3. ejusdem operis agro 2.* quemadmodum ille ipse in *libris Method. Medendi* pro curatione ephemerarum & hecticarum febrium, ex veterum more latius prosequitur & proponit: Sed & num Hippocrates propria, an potius aliorum prædecessorum sententia id protulerit, adhuc plerique non irrationabiliter dubitant; cum aliter ipse de febrium natura & causis sensisse videatur. Cæterū etsi calidam aquam capiti solummodo superfusam, febrem solvere fateatur non tamen exindè colligere est, ut reliquum corpus includat, siquidem antiqui in more habebant, non tantum caput, sed etiam totum corpus abluere ac detergere.

Difficultates in contextu sunt solutæ , plures legi possunt apud Cardanum *in Commentario*.

Aphorismus XLIII.

Mulier non fit Ambidextra.

Contentum seu Intentio.

De Ambidextris.

C*onnexio* : Nullam video opportunam connexionem hujus Aphorismi cum antecedentibus: videtur ergo potius curiositatis quam artis causa interpositus: Unde cum diu mente revolvi, quomodo unquam potuerit Hippocrati in mentem cadere, hanc sententiam inter Aphoristicas collocare, quæ nec doctrinæ gravitate, nec sententiæ pondere, nec ad rem medicam faciendam utilitate, videtur tanto viro digna, quoque si unquam inter Aphorismos recensenda visa fuisset, certè sermonis analogia inter eos qui libro quinto continentur, ubi multa de foeminis referuntur, reponenda fuisset. Sed & cum Galenus *in Commentario* ex quibusdam Authoribus exponat, ambidextrum hominem intelligi, qui ambabus manibus pro dextris utitur, quemadmodum fertur Homero fuisse Aristopaum; si id ipsum fæminis adscribere vellemus, plane constaret, non omnimodè verum esse, cum licet nonnullæ fuerint, quæ dextræ manus opera, ad sinistram etiam transtulerint non æque tamen bene, nec cuncta manuum ministeria pari dexteritate, vi atque vigore illa peragere potuisse, valde dubium est. Plerasque equidem novimus, quæ acum, forficem, glomum (atque adeo suere, incidere, glomerare, nere) sinistra manu expedite nimis & agiliter tractarent; alia vero munia nullatenus, & non nisi dextra solum, nec è converso; quamobrem etsi nonnulla manualia exercitia mulieres plurimæ sinistra manu agant, non tamen illa eadem, nec reliqua omnia æqualiter dextra peragunt.

Sed nec Mares ipsi, qui lævi dextri dicuntur, æque viriliter ac pari robore, sinistra ac dextra utuntur, cum plerique strenue admodum sinistra digladiari visi sint, scopum vero aliaque instrumenta bellica, non-

non nisi dextra solum, prout una vel altera manu ad huiusmodi opera peragenda usum assiduitate contraxerunt, rustici & agricolæ ingentia & ponderosa nimis instrumenta promptissimè tractantes; calamum tamén in scribendo vix regere valent, tacendo alia exempla.

Quo circa rari admodum erunt, qui æque bene utraque manu omnia persolvant, aut æquali dexteritate, vi, ac promptitudine, præsertim quæ majus robur exigunt.

Hinc non irrationabiliter factum crediderim, quare isti Italicè *Manini* vocentur, veluti mancam & deficientem alterutram manum habentes, ut propterea prout usus & frequentior alterutrius manus exercitatio prævaluerit, aut lævi aut dextrin magis, minusve præpotentes evadant: Unde licet Plato 3. *de Legibus* & Aristoteles 2. *de histor. animalium* cap. 1. & 31. probl. 12. paucos viros, nullas vero fæminas ambidextras fieri dixerint, id tamen non ad virtutis imbecillitatem, & calor inopiam, quæ sinistro lateri inesse creditur, sed ad defectum exercitationis ejusdem, qui pares & æquipotentes in suis operibus observantur, quia parem instando & incedendo usum & exercitationem ab ortu subiêre: Et quidem plurimum in his valet assiduus exercitationis usus, longo tempore comparatus.

Hac quippe Arte, Amazonidas, Sauromathas, & Scythicas mulieres, in sagittis jaculandis, & bellicis instrumentis tractandis excelluisse refert Hippocrates *Lib. de aere, aquis, & locis*, quia à pueritia ea exercere consuevissent. Experimur pariter artifices omnes, quia ab incunte prima ætate, sinistra simul & dextra manu, malleum, asciam, ferram, terebram, aliaq; artium instrumenta æqualiter tractare consueverant, utraque manu deinceps, pro arbitrio uti solere, & si fortassis sinistram potius quam dextram exercere consuecant, illa potius quam ista prævaleant: fuit aliquando, qui tam bene usum scribendi sinistra manu sibi comparavit, ut non melius dextra characteres efformaret, non alia planè industria, quam assuetudine perpetim, à prima ætate puerili acquisita.

Non multis abhinc annis vidi & masculum & fæminam, pedibus peragendo quidquid à cæteris sola dextra manu perfici solet; tantum valet contractus ab initio vitæ usus & frequens ac iterata eorundem actuum exercitatio.

Cum igitur hæc ita sint, non abs re verendum videtur ab alio

profus quam ab Hippocrate sententiam hanc, hoc loco fuisse insertam, ut propterea si alius unquam inter adjectos Aphorismos dicendus est, de isto planè suspicari omnino licebit, ex jam allatis.

Cæterum qui ambidextras dictas volunt (ut memorat Galenus in hoc Commentario) *qua parte uteri dextra genita sint*; adeoque ambidextras fæminas non fieri, quod in utraque parte uteri minimè generentur; tam longe à veritate declinant, & ob anatomes inscitiam falluntur, ut nullius penitus mereantur assensum, cum non minus in dextra, quam in sinistra uteri parte, progigni fæmellæ visæ sint: *His adhuc magis à ratione alienum* (subdit in eodem Commentario Galenus) *alii ajunt de iis qui hermaphroditi nominantur, Hippocratem esse locutum, quasi dicat mari quidem pudendum accrevisse multum bre, mulieri vero virile minimè.* Quandoquidem id remotissimum est ab Hippocratis mente nec ullatenus aptari potest huic Aphorismo, in quo de utriusque manus dexteritate sermo fit, quin & fæminis virile membrum, aut quid simile, ex elongata clitoride succrevisse, ac foras prodiisse, non semel observatum, maribus vero muliebria pudenda nullatenus.

Hujus Aphorismi veritatem etiam negat Poëta, dum canit de mala muliere:

Cum tua Tisiphone rabidas exarsit in iras,
Sævior in stygia bellua nulla domo.
Ambobus pedibus, conculcans obvia quæque,
Dextra manus monstrat ligna, sinistra ferit,
Ambi hæc dextra tibi si non sit, & usque furentem
Job patiens tuleris, tu mihi manus eris.

Quares: Cur Amazones sibi dextram mammam curabant abscindi? R. Ut essent robustiores, ut nempe spiritus & sanguis, alias alendæ mammæ necessarius brachio dextro communicaretur.

Dices: Sunt mulieres viragines, quæ viris effæminatis sunt robustiores, Ergo etiam fieri possunt ambidextræ Resp. nego suppositum viros fieri posse effæminatos vel esse ambidextros.

Quares: Cur viri qui sinistro brachio utuntur, dicuntur mali moris esse. R. Quia fæminas imitantur, adeoque illis comparantur. Plura & curiosa vide apud Cardanum in Commentario.

Aphorismus XLIV.

Si Empyicis, cum uruntur, aut secantur, purum & album pus effluat, evadunt: Si vero subcruentum & faculentum ac foetidum, pereunt.

Contentum seu Intentio.

De Prognosi Empyicorum.

Connexio: Cum Hippocrates Aphorismo 38. hujus libri egisset de suppuratione, quæ fit tum in inferiori tum superiori ventre: In hoc præsentī Aphorismo agit de sectione & ejus eventu, quæ in puris collectionibus fiunt.

Hic Aphorismus duas habet partes: quarum *prima* docet: purum & album pus, si per sectionem in suppuratis exeat, esse sanitatis futuræ indicium: *Secunda* vero, quod si pus effluat, subcruentum & faculentum ac foetidum pereant.

Hippocrates alibi nempe *Lib. 6. Aphor. 27.* docuit Empyicos uestros vel sectos à pure affatim exuente periclitari; nunc à qualitate puris exeuntis bonum vel malum eventum prælagit, & ait, si pus album & purum exeat, bonum, si vero subcruentum &c. exitum portendi. Cum enim pus album & purum prodit, neque materiam in pectore collectam pravam & deleteriam, neque ulcus fordidum aut malignum designatur, quare facile fit, ut ab illius exitu, nulla in pectoris cavo relicta noxa reconvalescant agrotantes, quod secus accidit, si pus inde prodiens, foeculentum & fatidum comparuerit, unde de ulceris pravitate, & de humoris ibidem collecti ac suppurati malitia judicare est: Subcruentum autem pus rebellem & contumacem humorem, non satis coctioni subjectum indicat, qui & sanguinis è vasis pulmonis profusionem facilem & subitanæam time-scendam arguit, unde periculosior eventus: Id ipsum habet idem Hippocrates in *Coacis prænotionibus*. Verum quod in Empyicis tempore Hippocratis frequentissimæ sectionis aut unctionis opera peragebatur, nunc penitus quasi exolevit.

Quoniam vero indiscriminatim Hippocrates dixit *suppuratos*, ansam inde plerique arripuerunt, ut etiam Galenus meminit, de quibuslibet suppurationibus in quavis alia corporis parte habitis intelligendum. Nihilominus idem Galenus advertit, proprie suppuratos ab Hippocrate nominare eos, quibus inter thoracem & pulmonem acervatum pus est, quos urere consuevisse veteres adjicit ex Platone comico. Quin & subsequens Aphorismus de suppurato hepate scriptus, clare etiam designat speciales hic memorare voluisse suppurationes, ut consideranti patet.

Quæres I. Qua arte locum collectionis puris explorare possumus? &. præterquam quod locus affectus calidior reddatur, nempe à putredine & halitu puris; Hippocratem *Lib. de morbis 3.* imitari possumus, qui terra Eritriade vel creta liquida ac tepida linteum tenue ablui jubet, eoque totum thoracem obvolvi, ut quæ pars primum resiccari ceperit, in ea sectio fiat, aut ustio: Item cum ager infanum latus decumbit, sentit aliquod pondus, premitur angustia, & tussi, dolor augetur, eo quod pendens tumor magis gravet; Denique, fluctuatio ac strepitus puris, auditus in parte affecta &c.

Quæres II. Utrum statim ac pus in thoracis capacitatem effusum est, facienda sit sectio aut ustio? Resp. Negative sed potius cum Hippocrate in *Coacis* differenda est operatio ad decimum quintum usque diem à ruptione vomicæ, donec iterum, illud pus novam admittat coctionem, nam statim post ruptionem crassescit, & sic ineptum foret ad educationem: Quo autem in loco sectio fieri debeat Resp. inter quartam & quintam costam.

Plura vide apud Cardanum *in Comment.*

Aphorismus XLV.

Quibus purulentum (seu suppuratum) jecur aduritur, si purum pus effluat & album, salvi fiunt; In tunica enim ipsis pus continetur: Si vero qualis amurca profluat, intereunt.

Nota:

Nota: Hic Aphorismus multum correspondet cum Aphor. 40. libr. 6. & cum Aphor. 52. libri hujus.

Contentum seu Intentio.

De Prognosi Abscessuum in hypochondriis.

Connexio: Optime hic Aphorismus connectitur cum præcedente; quod ille de suppuratione pectoris seu ventris superioris; hic vero de suppuratione hepatis seu ventris inferioris agat.

Duas habet partes hic Aphorismus: *prima* docet, quibus per adustiones purulenti jecoris, pus purum effluat & album, salvi fiunt: *secunda* vero si veluti Amurca profluat, intereunt.

Simul ergo hic Hippocrates Aphorismum prognosticum ab inustione suppurati hepatis proponit, & actionem boni vel mali eventus superaddit, inquit enim ita affectos evadere si purum & album pus fluxerit, quia in his pus continetur in tunica, seu membrana exteriori jecoris; secus vero, si qualis amurca prodeat; quia è converso pus internam jecoris substantiam pervasit, & illius Parenchyma collæsit; id ipsum habet in *Coacis prænotionibus*, ubi de variis hepatis affectionibus agitur, speciatim de inustis inquit: *quibus secundum jecur inustis veluti amurca exit, mortale*: Non enim fieri potest, quin jecoris substantia intimius computruerit, si pus exinde prodiens putridum & concretum instar amurcæ, seu facis olei appareat, eo quod pravum ulcus ibidem genitum designet: ulcera autem in hepatis parenchymate excitata læthalia omnino sunt.

Quæres: Utrum ustio ista hodierno tempore practicetur: R. ut ingenue fatear, nunquam vidi, & rarius etiam visam audiivi ab aliis.

Quæres II. Utrum sectio & ustio eodem tempore fieri possint; Resp. quod sic, ferro nempe incidente & acuto.

Quæres III. Utrum in omni hepatis parte, fieri possit hæc operatio? Resp. negative; nam in parte cava, fieri non potest, sed in Sima seu Gibba.

Quæres IV. Utrum mox hoc remedii genus adhibendum sit? Resp. quod non, sed prius alia ruptoria, tum interna, tum externa esse tentanda.

Plura hunc Aphorismum & prædictam operationem concernentia vide Cardanum in Commentario.

Aphorismus XLVI.

Dolores oculorum post meraci vini potum, & aqua calentis copiosa balneum, venæsectione curato.

Hic Aphorismus non connectitur ei, qui scriptus est *Libr. 6. Aphorism. 31.* quæ enim hoc loco, unum post aliud proponuntur, ibi disjunctim ad dolores oculorum arcendos commendantur & quidem rationabilius. Hinc non immerito Galenus interfertum, atque adjectitium adeoque expungendum hunc Aphorismum opinatur: Neque præterea congruenter videtur ex mente Galeni & aliorum venæsectio post vini potionem & balneum instituenda in quocunque oculorum dolore, ex quacunque causa indifferenter proveniente: nam si corpus venæsectione indiget & plethoricum est, non est, cur balneum & vini potionem prius tentemus; at si non est plethoricum, venæsectione non indiget: Unde forsitan scriptus est hic Aphorismus ab Hippocrate, ut inde discamus quandoque methodum extraordinariam ordinariæ esse proponendam præsertim in casibus temerariis & urgentibus.

Aphorismus XLVII.

Si Hydropicum (seu aqua inter cutem laborantem) tussis habeat, desperatus est.

De hoc Aphorismo dictum abunde est supra in *Commentario Aphorismi 35. Libr. 6.* ut proinde opus non sit eandem chrambem hic repetere, cum igitur locum adeat, qui hujus Aphorismi expositionem desiderat.

Aphorismus XLVIII.

Urinæ stillicidium ac mējendi difficultatem, vini meraci potus & venæsectio solvit; incidenda autem sunt interiores venæ.

Nota: *Hic Aphorismus quoque jam supra expositus est Lib. 6. Aphoris. 36. quo lectorem etiam remittimus:*

Pauca tamen pro claritate hujus addimus, quod nempe urinæ stillicidium plerumque fiat à crassis & lentis succis, meatum urinarium occupantibus, atque urinæ exitum impredientibus, sive isti cum ipsamet urina commixti sint, sive musculo Sphincteri seu Janitori impacti, cumque præter viscositatem, acorem etiam referant, quia facillimè fit, ut qui viscosi sunt, acidi fiant, & è contra etiam accidit ut simul una urinæ exitum retardent, & stillicidium inferant, atque etiam musculum sphincterem vellicent & proritent, unde postmodum stranguria & dysuria. Hac eadem de causa evenit, ut in horum ægrotantium urinis sedimenta observentur semper fere mucosa, cænosa & crassa. His ergo ad diluendas ejusmodi viscositates, summe confert vinum meracum, & largius una vice epotum, vel parcius sed sæpe iteratum; eo enim succi crassi geniti diluuntur ac extenuantur, & forte imposterum gignendi impediuntur, ne fiant, si præsertim in reliquis victus ratio, & usus sex rerum non naturalium, in id ipsum concurrens consulatur, desumptus est hîc Aphorismus ex 2. Epidem. & ut jam dictum etiam deductus est prædicto Lib. 6. Aphorism. 36. & ideo à quibusdam plane hic omittitur.

Cæterum quod spectat ad venæsectionem, & ad selectionem venarum interiorum non tanti est, ut indifferenter prodesse possit, in omni urinæ stillicidio, nisi solum indirectè, ad deplendam feri copiam vel ad impediendam vesicæ inflammationem, si tamen id commodè fieri possit. Præterea notandum, quod inter alia remedia solvendi urinam balneum est, cujus tamen hic non meminit Hippocrates, ratio hujus est, quia non ita promptum videtur, neque omnes balneum ferre possunt. Plura remedia etiam extrema nempe catheteris applicationem &c. suadet & docet praxis & Cardanus in Commentario.

Aphorismus XLIX.

Ab angina detento, tumor & rubor in pectore superveniens bonum: foras enim morbus vergit seu vertitur.

Nota: Et hic pariter Aphorismus repetitus hoc loco invenitur (ut & adhuc alii) Lib. 6. Aphorismo 37. & libr. 4. Aphorism. 34.

Dices: Hic videtur esse translatio à parte ignobili ad nobiliorrem, Ergo male Resp. si fieret ad ipsos pulmones & ibi Peripneumoniam excitaret concedo, ad partes exteriores nego.

Dices II. Ista materiæ translatio à collo ad pectus arguit materiæ copiam Ergo non est bona. Resp. in principio morbi concedo, in statu nego.

Instabis: Si fiat in statu illa translatio, Ergo rubor adesse non poterit, quia etiam sanguis in inflammatione, postquam concoctus est ruborem amittit, & alborem induit. R. Si ruborem omnino exueret, & alborem indueret, ergo jam facta esset suppuratio, hoc autem esse nequit, necessario ille sanguis etsi magis coctus ruborem retinet, quem parti in quam deponitur & tumorem efficit, communicat: Deinde impossibile est, quin aliquid semper sanguinis, à dolore partis attrahatur: dolet autem pars dum intumescit.

Aphorismus L.

Quibus Cerebrum syderatum (seu sphacelatum seu concussum) est, intra tres dies intereunt: Si vero hos superaverint, sani fiunt.

Con-

Contentum seu Intentio.
De Sphacelo seu Syderatione cerebri.

Connexio: Quemadmodum in præcedenti Aph. egit de gravi ac periculoso morbo nempe angina Hippocrates, ejusque statuit prognosticon: Ita in hoc præsentis Aphorismo agit de Sphacelo, morbo cerebri gravissimo. Hic Aphorismus duas habet partes: in *Prima* dicit cerebro sphacelato affectos intra triduum interire: in *secunda* ait eos sanos fieri, si ultra triduum duraverint.

Verbum hoc *Sphacelari* cunctis Expositoribus, non modicæ fuit offensioni. Attentâ siquidem pressâ illius significatione *sphacelari* idem vertunt ac syderari ac corrumpi: cum autem bene noscerent, non posse id Aphoristicæ huic sententiæ commodè adaptari, quia ex cerebro sphacelato impossibile est patientem evadere, cum à corruptione interitus inevitabiliter subsequatur: propterea Galenus, primum mox alii deinceps sphacelismum hic, veluti dispositionem tantummodo ad sphacelum & corruptionem, sunt interpretati, ut accidit ex intemperie aut inflammatione, quæ gangrænam ac sphacelum præcedere solet. At isti minime adverterunt, difficulter admodum imo nullatenus internosci posse internam hanc cerebri corruptionem, ut exinde quisquis etiam oculatissimus, prædicere queat, de interitu intra triduum, vel de convalescentia, atque salute, ipso transacto subsequutura, prout ex hoc Aphorismo deducendum consulit Hippocrates: Nam quis umquam, etsi Lynceus id introspiciet? sed nec insuper facile est, cerebrum inflammatione affectum, tam subito, transacto scilicet triduo consanescere posse, quin potius contra facillimum sit, ut sola inflammatione, imo etiam sola phlogosi succumbat inducta phrenitide cum acuta febre, ut documento Hippocratis, attestante quoque experientia passim observatur: undely triduum ut plurimum est intelligendum, aliquando enim ad quinque vel septem dies extenditur teste Hippocrate. A causis præterea internis inductam, istiusmodi syderationem quomodo fieri poterit, ut quis probabiliter conjiciat, fuisse eo innumeris potius inflammationem, & non alias, quæ cæteroqui plures & variæ esse possunt: cum tamen rarissime vel nunquam cere-

Fff ffff 2

brum

brum sua substantia inflammationi subjiciatur, & in phrenitide potius meningcs, quam cerebrum ipsum, inflammentur? hinc factum, quare Cardanus illud *concussum* id est à causis externis, contusum, vulneratum, commotum interpretetur, unde cerebrum interius læsum magis patere potest sensibus, tumore, rubore, vel etiam livore & corruptione.

Et quamvis de cerebro concussio alibi verba faciat Hippocrates, nil tamen obstat quin utrobique in eundem finem, idem consideraverit, ut in uno causam externam, & signa, in alio prognosim advertat: Siquidem ab ictu, vulnere & concussione Aphonia primum, mox si corruptio subsequatur, mors sit intra triduum succedura. Verum quæ in cerebri Sphacelismo contingunt, latius idem Hippocrates memoravit 2. & 3. *de morbis* pluribus in locis: faciunt ad hoc idem, quæ ipsemet *in Coacis prænotionibus* Celsus *Lib. 8. cap. 9.* & Galenus 2. *de locis affectis cap. 7.* de cerebri Sphacelo edocent, qui videri possunt.

Cæterum sphacelato cerebro, interitus imminet, ob affectæ partis dignitatem, & quidem intra triduum, cum diutinum tempus, læsa cerebri substantia ferre non possit: Post hoc tempus vero ægri evadunt, non quod illud gangræna id est inflammatione, liberetur, sed quod concussio tanta non fuerit, ut gangrænam & sphacelum intulerit. Difficultates pleræque in contextu sunt solutæ, plures vide apud Cardanum *in Commentario*.

Aphorismus LI.

Sternutamentum cietur (seu fit) ex capite, cerebrum excalefacto, aut perhumectato spatio in capite inani: aer enim intus contentus foras erumpit: Strepit (seu sonat) autem, quia per angustum ipsi est exitus.

Contentum seu Intentio.

De Physiognomia Sternutationis.

Connexio: Cum in antecedenti Aph. egisset Hippocrates de cerebri affectu præternaturam: In præsentī modo Aphorismo, de Symptomate ejusdem cerebri, naturali, nempe sternutamento agit.

Hic

Hic Aphorismus duas habet partes: *Prima* docet sternutamenti causam esse calidum & humidum: *Secunda* vero docet, strepitum fieri propter aëris per angusta transitum.

Considerat hic Hippocrates sternutamentum veluti male affecti cerebri symptoma, per quod & qualitas morbi ejusdem internosci queat, & ex superantis humoris locus, & modus excretionis; cunctis enim notum, non tantum hac de causa, sed ex multis aliis tum internis tum externis excitari sternutamentum, ut propterea quæcunque, aut irritando aut gravando, tum nares & olfactus sensoria, tum etiam quæ cerebri meninges vellicant, & compungunt, valeant ad sternutandum facefcere, de qua relatiſſimè Galenus 2. de symptom. causis cap. 1. aliiſque Doctores. Quoties ergo caput & cerebrum secundum corticem serosis & lymphaticis superfluitatibus gravatur atque ad organa olfactus, per sentientes meninges, illos protrudere potis est, ex angustis & occlusis meatibus, in patentiores propellens, sternutamentum inducit & sonum edit. Quare ex illo cerebrum judicatur superfluitatibus hujusmodi gravari, atque ad earundem expulsionem impelli, non sine manifesto plerumque levamine. Accidere autem illud dicitur ex calefacto cerebro, aut humectato inani spatio, quod partem cerebri anteriorem & cranium interest, siquidem nisi humor lymphaticus ac serosus exinde exstillans, concalescat, & acredinem & vellicationem contrahat, procul dubio sternutamentum non fit, quemadmodum experimur in gravedinibus & coryzis, quæ tunc sternutamenti sociantur, cum materia per nares effluens acris & mordax est, quod etiam palam fit, cum in imminentibus catharris, ab humectato capite, aërem calidiorem inspiramus, & halitus odoriferos, aut solares radios affatim excipimus. Caterum sonitus in sternutantibus fit, erumpente cum impetu è naribus veluti ex angustis locis, in apertum aere, sive flatu, aeri analogo, concurrente in id ipsum motu thoracis, vehementius expirantis; in multis enim similitudinem magnam referunt sternutatio & tussis ut bene explicat Hollerius.

Denique sternutamentum ut salutare sit, & levamen cerebro, imo etiam pectori afferat, cum exitu fluitantis humoris, aut crassioris mucii esse debet; nam si inaniter contingat & iterato, sine ulla humoris educatione, malum omen esse consuevit, ut in pestilentiis: tunc enim vel à maligno & irritante miasmate fit; vel si quis humor inest sternuta-

menti concussione, ob aëris exsuctionem internam, potius cerebri substantiam pervadit & apoplexiam infert.

Dices 1. Sternutamenta quæ fiunt per tabacum & similia, non habent calorem & humiditatem. *R.* Hippocratem loqui de sternutamento à causis internis orto: præterea negatur hæc & similia non habere calorem & humiditatem quia v. g. Calor piperis ad nares attrahit & sternutationem excitat; neque etiam cerebrum unquam est absque humiditate.

Dices 2. Excitatur etiam sternutatio à frigore, Ergo non tantum à calore; *R.* Tanquam à causa externa concedo, tanquam ab interna nego, calor enim per ambiens frigus concentratur, qui expulsionem causat ut mox diximus.

Dices 3. Datur etiam sternutamentum præternaturale, nimirum in morbis à maligna cerebri dispositione, Ergo non tantum fit secundum naturam *R.* Licet causa ipsius sit præternaturalis, actio tamen ipsa cum fiat à natura robusta, dicitur secundum naturam.

Plures controversias vide apud Cardanum *in Commentario*.

Aphorismus LII.

Quibus Jecur vehementer dolet, iis febris superveniens solvit dolorem.

Nota. Hippocrates lib 6. Aphorismo 40. hunc ipsissimum quasi Aphorismum repetit, ibi quidem dixerat, dolorem in hypochondriis, febre superveniente sedari, in hoc vero Aphorismo, de dextro solum hypochondrio meminit, ubi Jecur jacet. Sed num revera de dolore Jecoris substantiam occupante, an poti⁹ partes eidem annexas, hoc loco intelligat, dubitari potest: Etenim non tam facile quis sibi persuadebit superveniente febre, dolorem in Jecore inductum exsolvi, si ipsius parenchyma affectum fuerit, tumore præsertim inflammatorio qui per febrem potius exasperetur, vel in suppurationem vergeret: Hinc non abs re putavit Mercurialis, legendum *circumdolet*, non dolet, ut partes dolentes Jecori circumpositas potius designaret, non proprias ejusdem.

Verum

Verum si dolor Jecur afficiens ex obstructione sit, prout ex sensu gravante & attollente solum, ut ex tenui materia conjicere licet, procul dubio tunc etiam febris superveniens auxilio esse poterit, quippe per febrem, impactus ibidem humor crassus & stagnans diluitur, meatus aperiuntur & alio, id est, ad intestina, vel ad renes & vesicam ille deducitur, ac si fortasse ex adverso tenuis fuerit, facillime dissolvitur & evanescit: Febris autem non debet præcedere sed supervenire; si enim dolorem præcederet vel comitaretur, illum velut ab inflammatione, vel phlogosi dependentem argueret, ita neque eundem solveret, sed potius augeret, & mali morbi indicium foret, adeoque periculo non vacaret.

Aphorismus LIII.

Quibus sanguinem è venis detrahere conducit, iis vere secanda est vena.

Nota: Hic ipsissimus quoque Aphorismus jam expositus est *Lib. 6. Aphorismo 47* ubi tamen non tantum de venæ sectione, sed etiam de purgatione actum: Unde eo lectorem amandamus:

Hic solum pro distractione quadam addimus quosdam versus curiosi cujusdam Poëtæ venæ sectionem indicantes:

Qui vivunt hilares, cantando, bibendo, jocando,

Et ducunt lætos, sorte favente dies,

Candida si tacitas, ignorant pectora curas,

Sinox in ronchis, luxque sedendo perit.

Quos duplices coenæ, quos prandia longa fatigant,

Crapula queis cerebrum quotidiana ferit.

Qui retro fornacem sua viscera farcit edendo,

Quique saginatis, est similis suibus.

Convenit ambobus vasorum sectio: Venas

Huic lancetta ferit: Sus lanione perit.

Aphorismus LIV.

Quibus inter ventriculum & septum transversum, pituita concluditur, & dolorem affert, in alterutrum ventrem viam non habens, iis per venas in vesicam versa pituita, morbi fit solutio.

Contentum seu Intentio.

De Morbis præcordialibus.

Connexio: Cum in præcedenti Aphorismo de hepatis dolore egisset: In hoc præsentî Aphorismo agit de dolore, qui hepatis dolorem facile mentiri potest ob affinitatem.

Quinam sit istiusmodi locus, inter ventriculum & septum transversum, qui pituitam collectam continere valeat, illamque deinde ad vesicam deducere, ex anatome nondum patuit: Sunt tamen ex hypochondriacis nonnulli qui passim de fluctuante aqua, velut in utre conclusa, per eas partes conqueruntur, ac perpetim illam undantem & sursum & deorsum vergentem, exaudiunt, atque aliis manu commotam exaudiendam præbent; Sed num revera illa aqua sit, vel aqueus & flatuosus liquor, & ubi includatur, perspectum non est, licet plures homines reperiantur qui de hoc symptomate & ejusmodi fluctuatione conquerantur & reddita copiosa prima liberantur.

Hinc suspicari fas est, ut sicuti in hydropicis, non raro serum ad vias urinæ deducitur & quidem salubriter: Ita quoque in his pituita, sive lymphæ crassa, inter ventriculum & lienem, collecta, ac postmodum dissoluta in vesicam delabi possit, & cum profectu patientis, siquidem ea parte, qua ventriculi fundum lienem respicit & colon intestinum, humores in hypochondriacis colligi solent, sibi locum facientes. Quod autem Hippocrates dixit *per Venas*, intelligendum est vel de arteriis, vel de lymphaticis vasis, cum olim apud veteres canales omnes corporis venæ appellari consueverint.

Cæterum cum dolorem affert collecta illic pituita, in vias urinæ efferri potest, quia tunc per fermentationem & sui dissolutionem fluidior reddita, vasa illa subire potest, & foras educi, præsertim si lienem ipsum pervadat, indeque per renes egeratur; hinc diuretica in hoc casu curando sunt optima, minus utilia purgantia.

Plura de hoc casu qui legere desiderat videat Cardanum in *Commentario*.

Aphorismus LV.

Quibus Jecur aqua refertum eruperit in Omentum, his venter aqua expletur atque moriuntur.

Nota: Contrarius huic Aphorismo, habetur Aphorismus 14. lib. 6.

Contentum & Intentio.

De Prognosi hydropis.

Connexio : Cum in præcedenti Aphorismo egisset Hippocrates de pituitæ, à septo transverso ad renes : In hoc præsentis Aphorismo similiter agit de aquæ translatione, à Jecore ad omentum & inde abdominis cavitatem.

Hic Aphorismus ob brevitem non dividitur.

Qui per omentum & omenti meatus, in renes & vesicam pituitam in præcedenti Aphorismo memoratam deduci posse explicant, non inaniter moventur ex his, quæ in hoc Aphorismo ab Hippocrate, de aqua in hepate collecta, & per vias urinæ excreta referuntur; nam quæ ratione Jecur aqua repletum potest per omentum exonerari, pari formiter quoque poterit, collecta inter diaphragma & ventriculum per eosdem ductus in vesicam deferri : Porro id experimentis frequenter comprobatur, sed per quos ductus, huc usque nescitur.

Sagax autem & provida natura, scit mille sibi parare vias, per quas se ipsam exoneret.

Repletur hepar aqua ex vasis lymphaticis illuc confluentibus, & plerumq; hydatides innumeras excitantibus, quæ ubi nimium distentæ amplius extendi non possunt, & aquam stagnantem continere in omentum, quod hepatis & ventriculo super incumbit illam exonerant: Undè omentum ipsum sua natura adiposum, ab ejusdem falsilaginis acris & erodente dirumpitur, atque universam aquam in ventrem, id est in abdominis cavum effundit, & hydropem ascitem dictum excitat. Exinde autem sequitur ægri interitus, tum à gravi hepatis læsione, atque hydatidum eruptione, tum ab omenti erosione, ubi ulcus insanabile exoritur, tum denique à mala ejusdem lymphatici humoris qualitate salia & erodente, quæ diuturna ibidem mora, reliqua adjacentia viscera, præsertim vero intestina labefacit & mortificat, cum potissimum nullo aditu remeare is possit, aut per patentes ductus foras educi: Hinc antiquis in usu fuit paracenthesis, quæ cum non minoris periculi fuerit observata, quam morbus ipse, à recentioribus rarissimè adhibetur.

Controversias super hoc Aphorismo plures tradit Cardanus in *Commentario*.

Aphorismus LVI.

Anxietudinem, oscitationem, horrorem, vinum pari aqua portione temperatum, epotum solvit.

Contentum seu Intentio.

De Remediis anxietatum præcordialium.

Connexio: Cum supra Aphorismo 48. hujus libri dixerit Hippocrates vini potum solvere urinæ difficultatem: In hoc præsentis Aphorismo vini potum extendit ad anxietudinem, oscitationem &c. tollendam.

Hic Aphorismus ob simplicem conclusionem non dividitur. Quam in multis conferat vinum, præsertim moderato sumptum, non

non est ut diutius hic suadeam, cum cæteroqui cunctis notum sit summum esse medicamentum, imo medicamentorum omnium maximum de quo sapius Hippocrates verba facit, illiusque utilitates magnopere commendat. Speciatim autem hoc loco docet, medelam esse anxietudini, oscitationi, horrore, quæ licet sæpe morbi periculosi non sint, solent tamen non raro esse nimium molestæ, & sapius stomachi atque ventriculi male affecti symptomata, contumacem & fixam causam nervos proritantem indicantia, quæ nisi cito detergatur, & dissolvatur, pejora planè incommoda solet afferre. Est autem anxietudo fastidium illud, in imo ventre, quo ægri huc & illuc se jactare coguntur, cum situm commodum quiescendi non inveniant, etiamsi lecto decumbant; id vero illis accidit, à fixo & glutinoso succo plerumque acido & austero, qui simul vellicando, & transitum reliquis humoribus impediendo quandoque etiam per flatus distendendo, ingentem molestiam excitat, ut ægros loco stare non sinant. Non dissimiliter oscitatio fit, cum in ipsa nervi quoque per ventriculum dispersi, atque in intestina transfusi pariformiter laceffiti, alios & alios sibi correspondentes commovent, & musculos faucium, oris, & mandibularum, ad se trahendum proritant, quod plerumque accidit, cum insomnes, dissolutionem exactam ciborum minimè peregrimus, nec vapores per cerebrum & nervos diffusos convenienti somno discussimus. Horror denique ut alibi dictum à crassis & acidis succis in fermentationem indebitam adactis, prout in quartanis febribus provenit.

Porro his omnibus vinum & quidem meracum summopere conferre potest, dissolutis nimirum & detractis succis illis, crassis & tenacibus, quorum causa ventriculus atque intestina afficiuntur. Et quidem subdit Hippocrates pari aquæ portione commixtum potandum esse, tum ut acidum illorum succorum, retundatur, & tenacitas eorundem melius diluatur: tum denique nè totum in vapores exsolutum caput petat, & crassitiem illam succorum minus efficaciter detergat. Mixtio autem variari potest, pro varia vinorum conditione ac virtute.

De hoc vino aquæ nimium mixto canit Poëta:

In Cratere meo thetis est conjuncta, Lyæo,

Est Dea juncta Deo; sed Dea major eo.

Gggggggg 2.

Alius

Alius Poëta docet quale vinum ferat aquam.

- - - - non omne merum nisi cornua sumat
Censo miscendum, ventres cruciantibus undis:
Omnis adulterii speciem, fugiamus & umbram.

Postremo dicit morbum solvere, id est non solum symptomata ista delere, sed etiam causam eorum abstergere, concoquere & superare.

Vinum latificat cor hominis. Plura vide apud Cardanum in *Commentario*

Aphorismus LVII.

Quibus in meatu urinario generatur tuberculum, ubi suppuraverit & eruperit, doloris fit solutio.

Nota: Hic etiam Aphorismus alibi, nempe lib. 4. Aphorismo 82. scriptus & à nobis explanatus est, quare ad eum locum lectorem remittimus: in hoc enim præsentis Aphorismo, nihil additur, nisi dolor, qui in præfato 82. Aphorismo dicti libri non est adductus.

Aphorismus LVIII.

Quibus occasione aliqua Cerebrum fuerit vehementer concussum, mutos protinus fieri est necesse.

Nota: Huic Aphorismo correspondet Aphorismus 14. hujus libri.

Contentum seu Intentio.

De effectibus motus Cerebri.

Connexio: Cum supra Aphorismo 50. hujus libri de Sphacelo cerebri dixisset Hippocrates: In hoc præsentis Aphorismo concussionem cerebri indicat quæ vel est cerebri syderatio vel illi perquam affinis.

Hic

Hic Aphorismus ob brevitatem non dividitur.

Hanc sententiam & latiori quidem sermone exaratam habet Hippocrates 1. *de morbis & in coacis prænotionibus*, ubi, quibus cerebrum, inquit, *concussum fuerit & doluerit, percussis, aut alias lapsis, hi statim voce privantur, & neque vident, neque audiunt & plerumque moriuntur.* Experimentis quoque confirmatam eandem proponit: 5. & 7. *Epidemiorum*, de fœmina quadam palma manus ab alia percussa, & in eo qui à Macedone lapide ictus fuit: Quamobrem ab externis causis, concussionem hanc induci oportere manifestè liquet, ut antea jam dictum: Istos autem Aphonos fieri necesse subdit, quia à cerebri concussionem, non tantum spiritus tumultuariè commoventur & confunduntur, verum etiam molè sua cerebrum conturbatur, & qua parte nervis originem tribuit, vel potius in iis elongatur, ingentem patitur perturbationem, ut propterea loquelæ, auditioni ac visui impedimento fiat; cum nervi ad loquelam, auditum & visum pertinentes proximè à cerebro ipso dimanent. Contingit tandem hos plerumque mori, si non statim, vel intra triduum quod summum, resipiscant, siquidem ultra hoc tempus, neque cerebri læsionem gravem fuisse argumento est, neque nervorum originem, stuporem & corruptionem subiisse, ut de corrupto cerebro ibi dem dictum. Plura qui desiderat legat Cardanum *in Commentario*.

Aphorismus LIX.

Corporibus humida carne præditis, imperanda fames est: nam fames siccatur corpora.

Contentum seu Intentio.

De Remediis corporis humidioris.

Connexio: Cum in Aphorismo 56. hujus libri de utilitate potus vini dixisset Hippocrates: In hoc præsentì Aphorismo de utilitate famis agit.

Hic Aphorismus ob brevitatem non dividitur.

Non de qualibet humida corporum constitutione Aphorismus hic intelligendus, sed de excedente, extranea & præternaturali: quippe moderate humidi atque innata primigenia & radicali, ut vocant humiditate præditi, sicuti in siccam constitutionem deflectendi non sunt, ita neque fame diuturna macerandi, id enim esset illos nullo modo in sanitate tutari, sed potius in morbos & quidem perniciosissimos transferre. Corpora itaque excessive humida & excrementis scatentia serosis seu pituitosis dictis, ut in meliorem constitutionem reducantur, exsiccatione egent, adeoque fame, ne in morbos humidos labantur, præservanda sunt.

Debent pariter hujusmodi corpora, in carnibus, imo in cunctis partibus, humidis superfluitatibus scatere; nam si in una tantum, aut in altera parte humida comparerent, nullatenus fame, veluti re universum corpus exsiccante tractanda forent: quamobrem jure optimo Hippocrates dixit, *corporibus humida carne præditi*, & quidem non solum muscularibus & externis, sed & internis quoque, imo etiam parenchymatibus viscerum, ut ex illis superflua undequaque humiditates absumentur. Quin & ab articulis easdem exsolvendae esse docuit idem Hippocrates *Lib. de artic.* Hinc rheumatici, Tussiculosi, Podagrici, hydropici & alii, plurimum ab illa juvari solent. Famem autem his dixit adhibendam, non omnem, seu ab omni cibo abstinentiam, sed moderatam solummodo ciborum subtractionem, præsertim eorum, qui humores adjiciunt; nam qui illos potius detrahunt atque absument, commendari possunt.

Sub nomine famis, sitim quoque comprehensam intelligere licet; etenim proportionatè ad salutem conservandam, qui modice edunt, parce etiam bibere debent, unde quibus detrahenda indicitur ciborum copia, diminuta quoque censetur potulentorum assumptio. Et quidem proposuit hic ad exsiccanda humida corpora Hippocrates famem potius, quam cætera alia, sive alimenta sive medicamenta, quippe illa insensibiliter & citra viscerum noxam, æqualiter corpus universum, in meliorem statum revocare potest; reliqua vero omnia tam ex Prophylaxi quàm ex therapeutice desumpta, ut sunt exercitia, vigiliæ, diuretica, diaphoretica & cathartica medicamenta, vel non æque cunctis partibus opitulantur & magis of-
fici-

ficiunt, quàm proficiunt, ut bene etiam advertit Cardanus, qui etiam in aliis controversiis legi potest *in commentario*.

Dices I. Fames juxta Hippocratem *libr. 2. Aphorism 4.* calorem nativum debilitat Ergo nullatenus est admittenda. Resp. Fames immoderata ut dictum in contextu, concedo: moderata nego.

Dices II. Sitis magis siccatur quam fames ergo hanc potius esse suadendam. Resp. Sitim quidem potentissimè siccare, sed fames & facilius & tutius quam sitis toleratur.

Aphorismus LX.

*Ubi in toto corpore mutatio, & corpus refrigeratur
& vicissim calefit, aut colorem alium ex alio mutat, morbi significatur longitudo.*

Nota: *Hic Aphorismus explanatus videri potest lib. 4. Aphorismo 40. & 42.*

Aphorismus LXI.

Sudor multus, calidus aut frigidus semper fluens, humoris copiam inesse significat: Hac igitur robusto quidem superne, debili vero infernè deducenda.

Nota: *Hic Aphorismus explicatus reperitur lib. 4. Aphorismo 41. nisi scilicet quod hic adjecta est sudoris istius curatio, per humoris nimirum abundantis evacuationem, & quidem, in robustis corporibus per superiora, id est per vomitum, in debilioribus vero per dejectionem, habito scilicet respectu ad tolerantiam patientis.*

Aphorismus LXII.

Si febres non intermittentes, tertio quoque die vehe-
men-

mentiores fiant, periculosa. quoquo modo autem intermiserint, periculo vacare significatur.

Nota: Hic Aphorismus jam explanatus est Lib. 4. Aphorismo 43.

Aphorismus LXIII.

Quibus febres longa, his tubercula in articulis aut dolores fiunt.

Nota: Hic Aphorismus explicatus reperitur lib. 4. Aphor. 44.

Aphorismus LXIV.

Quibus longa tubercula, aut in Articulis dolores à febre fiunt, hi copiosiore cibo utuntur.

Nota: Hunc Aphorismum explicatum habes lib. 4. Aphor. 45.

Aphorismus LXV.

Si quis febricitanti cibum prabeat, valenti quidem robur, egrotanti vero morbus fit.

Nota: Vide Aphorismum 10. Lib. 2. & Aphor. 67. hujus libri, qui ambo ejusdem cum hoc praesente sunt tenoris.

Contentum seu Intentio.

De Victu febricitantium.

Connexio: Cum Aphorismo 59. hujus libri verba fecisset Hippocrates de fame, utpote remedio humiditatis carniū: In hoc praesenti Aphorismo, verba facit de cibo, qui famis est remedium.

Hic

Hic Aphorismus ob simplicem conclusionem non dividitur.

Hic autem Aphorismus nequaquam de cibo, cuicumque ægro-
tanti exhibito sed duntaxat febricitantibus & quidem acute scriptus
est ab Hippocrate, nam in his semper gravior noxa petimescenda est
à cumulatis excrementis & à naturæ distractione; nec insuper de
quocunque cibo, sed solum de eo, qui sanis offerri solet, unde pro-
cul dubio, damnum majus & gravius sequitur, si forte febricitanti-
bus offeratur; quippe sicuti sanis corporibus, is conversus in ali-
mentum robur addit, ita febricitantibus, aut simili alio morbo af-
fectis in malos humores transmutatus, morbum fovet, quod sane
cunctis notum est.

Id tamen peculiariter adnotandum, carnium esum fortiores
reddere animantes ut sunt lupi, ursi, leones, accipitres, aquilæ aliæ-
que carnivoræ: contra verò quæ herbis vescuntur, ut pecudes debi-
liores sunt: Et licet Cameli, Elephantes, Equi, plantis nutriti, fortes
etiam observentur illæ tamē plantæ exarefactæ sunt & substantiæ lon-
gæ solidioris ac vegetioris, ut cardui siccati, scænanthi & similes: Bo-
ves deniq; promiscui pastus, cum fæno vescuntur & aridis herbis, for-
tiores observantur cum vero virentibus utuntur imbecilliores, quam-
quam & istæ solidioris quoque substantiæ sint, ut lupini, rapa &c.

Quo autem tempore virentibus herbis, tum boves, tum equi
pascuntur, licet pinguescant, non tamen æque bene vigorantur.
Hinc commodum animalibus pro rata, & usu propriæ passionis, den-
tes, mandibulas, musculos temporales aliaque instrumenta, ad
atterendos & conficiendos cibos, magna & valida vel minora & la-
xiora providit natura, ut consideranti palam fieri potest. Hippocra-
tes quoque docet *de veteri Medicina*, à primo illo ævo, homines vi-
ctu bestiarum fuisse nutritos tandem utpote insuperabilis à natura
humana temperatus est & reductus ad cocturā & alias immutationes.

Hunc Aphorismum negat Galenus esse Hippocratis, cui tamen,
obstat Cardanus, & Galenum refutat. Vide hæc & alia plura in e-
jus *Commentario*.

Iratus quidam Poëta in Medicos hac vivendi regula suos patien-
tes excarnificantes, canit hos versus:

Multa vetant medici sanæ seu noxia vitæ,

Hunc piscem, has carnes, hæc fuge vina logi.

Hhh hhh h

Di.

Dicunt non faciunt, monitor bibit ac edit omne.

Quæque aliis vetuit, non vetat ipse sibi.

Sic cum non faciant Medici, quæ plurima dicunt.

Nonne Phariseos dicere jure licet.

Aphorismus LXVI.

Quæ per vesicam excernuntur, spectare oportet, an talia sint, qualia sanis subeunt: nam quæ his minime sunt similia, ea morbosiora: quæ verò valentibus similia, minimè morbosa.

Nota: Similis prorsus huic Aphorismo est Aphorismus 79. hujus libri.

Contentum seu Intentio.

De Fundamentis Prognoseos ab Excretis.

Connexio: Hactenus multa particulariter de urinis tradidit Hippocrates: In hoc præsentī Aphorismo ad urinam denuo redit.

Hic Aphorismus licet longus sit, ob conclusionem simplicem non dividitur, licet alias commodissimè in duas partes dividi posset: *Primam* nempe quæ docet excrementa esse spectanda: *Secundam* quæ declarat, urinas sanorum similes esse salubres; Dissimiles vero insalubres.

Et hunc pariter Aphorismum suspicatur Galenus, Hippocratis non esse, cum non habeat elocutionem Hippocratico stylo convenientem. Sed & neque magnum quid, aut in arte reconditum, continere videtur, imò potius cunctis obvium atque manifestum.

Verum tamen habet quoque quidpiam, quod cautum reddat Medicum, in judicandis excrementis & morbosis corporibus prodeuntibus: nam si ea ipsis congruant, dum bene valebant, non solum morbosadici non poterunt, sed non magnum eadem corpora, recess-

recessum à naturali statu fecisse demonstrant. Sic plerisque in usu est, cum bene valent, urinas mingere perpetuo crudas ac decolores, si in statu morbofo, tales quoque inspiciantur meliores plane erunt, quam si ab illo consueto statu recesserint. Sic contra alii aliis urinarum egestionibus sunt natura affecti, ut eo modo bene, contra vero male se habeant.

De ejusmodi autem similitudine, atque dissimilitudine, excretorum in statu sano & morbofo meminit quoque idem Hippocrates *Libr. de offic. Medici, & initio Prognosticorum*, & Galenus ex mente Platonis *9. de Plac. Hippocrat. & Platon. cap. 1.* Conferri huc quoque possunt, quæ idem Hippocrates protulit *6. Epidem. sect. 7.* ubi quæ à Medico sint in ægrotantibus considerata pluribus edocet, sed præsertim, *quæ & ex qualibus*, qualia fiant &c. Hinc etiam animadvertendum, quod ista similitudo & dissimilitudo excretorum, non tantum in urina, sed etiam in alvi fæcibus, sputis, sudoribus, mucis, fordibus & aliis sit facienda, potissimum tamen in urina, quia hæc in febribus potissimum & fidissimum signum observatur, exceptis febribus malignis, in quibus pulsus bonus, urina bona & æger moritur, ibi enim prævalet malignitas, licet urina ex se bona salutem indicet, malignitas tamen occidit.

Plura leges apud Cardanum in *Commentario*.

Aphorismus LXVII.

Et, quibus dejectiones, si residere (seu stare) permiseris, nec moveris, subsident, veluti strigmenta: quæ si pauca sint, parvus morbus est: si vero multa, magnus: his alvum inferne purgari conducit: alioqui si non repurgata alvo sorbitiones exhibueris, quanto plures dederis, tanto magis nocebis.

Nota: Huc referri potest libri hujus septimi Aphorismus 31. & 79.

Contentum seu Intentio.

De Ramentis Excretorum.

Connexio: Cum Hippocrates in præcedenti Aphorismo urinam considerasset: in hoc præsentī Aphorismo, accedit ad fæces & alvi excrementa.

Hic Aphorismus duas habet partes: *Prima* docet strigmenta in febribus, morbum indicare magnum si multa fuerint, at parvum si pauca: *Secunda* vero dicit, quod quibus talia adsunt, inferius sunt purgandi.

Si quis umquam alius Aphorismus, certe hic non leveni sui suspicionem præbet; fuisse ab alio, quam ab Hippocrate, hic insertum propter nimiam prolixitatem & verborum multitudinem, nihil quidquam novi, utilis aut commendabilis in arte contineat, ut propterea à Galeno & aliis commendatoribus adjectitius reputetur. Et quidem si strigmenta, seu ramenta in excretis, sive per urinam sive per fæces considerat, quæ modica, modicum morbum, vel potius modicam morbi causam, & multa, copiosiores significant, cur est ut substantia aut superstantia observanda proponat, illaque stare, non autem movere præcipiat? fortè quia sub his conditionibus, malitiam minuant, vel adaugeant, & morbum leviores vel deteriores prænuntient? Plane si ab illorum præsentia & copia, morbus gravior portenditur, parum vel nihil referet, si stare vel moveri permiseris, atque ea vel superstare vel subsistere observentur; Sed & neque consonat, quod pro curatione subjicitur, conferre his alvi purgationem, si præsertim strigmenta aut ramenta intestinorum, hic notata intelligantur, quippe quæ non nisi in ferina ac protracta Dysenteria comparere solent, in qua alvi purgatio tuta non est, quæ ceteroqui à multitudine ramentorum valida & copiosa desideraretur ut illa penitus depellerentur.

Denique quod à sorbitionibus, alvo non purgata majus damnum sit subsequiturum, jam dictum est supra *Lib. 2. Aphorismo 10. corpora impura quo plus nutrieris plus laferis*: unde nihil novi videtur hic additum.

Quam-

Quamvis & hoc suam quoque patiatur limitationem, ut ibidem & alibi à nobis est animadversum. Quin & Galenus *in Commentario* rectè admonet, neque omnes ab hujusmodi sorbitionibus lædi, neque prius eos purgare necessarium esse, atque adhuc minus, quibus aliquid urinis insertum est, quod strigmenta referat; Sed super hoc legatur Galenus, licet Fonseca hunc Aphorismum ob aliquam humanæ vitæ utilitatem & Hippocratis auctoritatem tueatur.

Ita etiam sentit Cardanus quem lege *in Commentario*.

Aphorismus LXVIII.

Quibus cruda deorsum subeunt, ab atra sunt bile; si plura, major, si pauciora, minor morbus est.

Contentum seu Intentio.

De Cruditate excretorum.

Connexio : Egit Hippocrates in præcedenti Aphorismo de Calvi dejectionibus; in præsentī Aphorismo de iisdem sermonem instituit.

Hic Aphorismus duas habet partes : *Prima* docet cruda deorsum subeuntia ab atra bile fiunt : *Secunda* vero dicit, à multa atra bile, majorem, à pauca minorem morbum fieri.

Verum & hic Aphorismus adjectitius creditur, quippe qui à plerisque expositoribus penitus omissus, ab aliis interpositus referatur : continet enim sententiam vel nunquam praxi respondentem, vel falsitatis ream : Si tamen unquam id expertum, aliam planè causam recognoscit cruditas excrementorum deorsum vergens, quam atræ bilis dejectio; de qua nos alibi abunde diximus & de ea controversiæ ibidem legi possunt nempe lib. 4. Aphorism. 22. & 23.

Vel lege Cardanum *in Commentario*.

H h h h h h h 3

Apho-

Aphorismus LXIX.

Excreationes in febribus non intermittentibus, lividae, cruentae, biliosae, fatidae, omnes malae; commode tamen si prodeant, bonae: Per alvum etiam & vesicam & quacunque corporis prodeat aliquid, si non purgatum restiterit, malum.

Nota: Hic Aphorismus est explanatus lib. 4. Aphorismo 47. præter illam ultimam partem, quæ potius concordat, cum Aphorismo 12. libri 2. *Quæ in morbis relinquuntur, recidivas facere consueverunt.*

Aphorismus LXX.

Corpora cum quis repurgare voluerit, fluxilia faciat oportet: & si quidem supra velit, alvus sistenda: Si vero infra humectanda.

Nota: Hic Aphorismus reperitur explicatus lib. 2. Aphorismo 10. nisi quod majoris explicationis causa, pauca quædam hic addat, de sistenda alvo, ubi per superiora purgandum est; & laxanda ubi per inferiora evacuandum: Ne nimirum quis volens purgare vomitu, naturam irriteret per medicamenta ad infernam dejectionem & vicerfa.

Aphorismus LXXI.

Somnus & vigilia, modum si excefferint, morbus.

Nota: Hunc Aphorismum explanatum invenis lib. 2. Aphorismo 3.

Aphorismus LXXII.

In febribus non intermittentibus, si externa frigeant, interna vero urantur, & sitis detineat, est mortiferum.

Nota:

Nota : Hic Aphorismus deductus est lib. 4. Aphorismo 48.

Aphorismus LXXIII.

In febre non intermittente, si labrum aut nasus, aut oculus, aut supercilium pervertatur, si non videat, si non audiat, quidquid horum agro debili, acciderit, lethale.

Nota : Hunc eundem Aphorismum habes explicatum lib. 4. Aphorismo 49.

Aphorismus LXXIV.

Alba pituita, aqua intercus supervenit.

Nota : Hic Aphorismus in superioribus libris sparsim explanatus reperitur :

Hic tamen obiter & succinctè adverte, quod ascites hydrops differat à pituita alba seu cachexia, tantum secundum magis & minus: Hæc est in fieri, ille in facto esse; omnes enim hydropis species inter se sunt cognatæ; unde quo magis depressus est sanguis, & eventum serum seu lymphæ, eo facilius & cachexia & cachexiæ hydrops succedit; in leucophlegmatia & anasarca tamen, lymphæ magis ad coagulum seu pituitæ naturam disposita; In ascite vero copiosa & diluta; In tympanitide elastica seu halituoza. Vide plura apud Cardanum *in Commentario*.

Aphorismus LXXV.

A Diarrhæa disenteria seu difficultas intestinorum.

Nota : Hic Aphorismus quoque in superioribus libris sparsim explanatus est & in specie hoc lib. Aphorismo 23.

Palam præterea est alvi profluvia inter se ita affinia esse, ut una species in alteram facile mutetur.

Vide plura apud Cardanum *in Commentario*.

Apho-

Aphorismus LXXVI.

*Dysenteria (seu difficultati intestinorum,) supervenit
lienteria (seu levitas) intestinorum.*

Nota : Hic Aphorismus reperitur explicatus lib. 6. Aphorismo 43. Vide Cardanum *in Commentario.*

Aphorismus LXXVII.

A Sphacelismo (seu à corruptione) ossis abscessus.

Nota : Hic Aphorismus explanatus est lib. 6. Aphorismo 45. Vide plura apud Cardanum *in Commentario.*

Aphorismus LXXVIII.

A sanguinis vomitu tabes, & puris superne purgatio.

Nota : Hic Aphorismus explicatus reperitur hoc libro 7. Aphorismo: 15. & 16.

Aphorismus LXXIX.

Qualia etiam quæ per urinas & alvum subeunt, & quæ per carnes abeunt, & sicubi alias corpus à natura recedat, spectare oportet: Nam si parum parvus morbus est; si multum, magnus; si valde multum, lethale istud est.

Nota : Hic Aphorismus jam explicatus est hoc libro 7. Aphorismo 66. unde nihil super est, nisi hujus libri septimi

F I N I S.

LIBER



LIBER OCTAVUS

SEU

SECTIO OCTAVA

DE

APHORISMIS INTER- JECTIS.

QUantumvis constitueram, hunc octavum Aphorismorum Librum plerosque Aphorismos interjectos, adjectitios & repetitos continentem, exemplo aliorum expositorum, & ne chrambem rerum in prioribus Libris pluries repetitam, recoquerem, silentio & sicco pede præterire; quoniam vero paucos repererim expositores, qui, ad quos nempe, hi ipsissimi, Libri hujus præsentis Aphorismi reduci commode possint, aut in quibus jam num explanati reperiantur, minimam mentionem fecissent: Quamobrem judicaveram, ex rationibus in Præfatione hujus operis Aphoristici allatis, juventuti medicæ consulere, atque omnes

lii liii

hujus

hujus Libri octavi Aphorismos, partim ad apta priorum librorum loca reducere, partim si quis illorum sit explanatione dignus aut explicatione nondum attactus, more hactenus solito exponere.

Aphorismus I.

Qui Seniores annis quadraginta phrenetici sunt, non admodum convalescunt: minus enim periclitantur ii, quorum natura & etati morbus fuerit familiaris.

Nota: Hic Aphorismus ejusque contentum & intentio explanata reperiuntur, Lib. 2. Aphor. 34. & 39.

Aphorismus II.

Quibuscunque oculi in morbis lachrimantur voluntarie, bonum: quibus vero sine voluntate malum.

Nota: Hunc Aphorismum explicatum habes Lib. 4. Aphor. 52.

Aphorismus III.

Quibus in febris quartanis, sanguis è naribus fluxerit, malum est.

Nota: De quartanae sanguinis è naribus, eruptionibus, quod ea agre judicent, ipse Hippocrates dicebat 6. Epid. Sect. 2.

Ratio

Ratio autem hujus Aphorismi facile eruitur, quod *malum* dixerit: Sive enim quartana febris, ex succo veterum melancholico, sive bile adusta in atram versa, sive à succo acido, viscoso aut glutinoso recentiorum prodeat; in nullo casu fluxus sanguinis potest esse vere criticus, sed potius symptomaticus & exitialis; per hanc enim, materia febrim quartanam causans, nempe humor melancholicus aut acido ponticus, crassus & fæculentus, qui semper inferiora non superiora sui natura gravante petit, magisque fluxus figit quam excitat, neque proinde hanc viam superiorem affectabit: Unde hic fluxus, sive paucus sit sive copiosus semper nocet, quod sane patet, cum quartanarios tali fluxu prehensos semper fieri magis decolores ac tandem cachecticos imo hydropicos.

Plura vide apud Cardanum *in commentario*.

Aphorismus IV.

Sudores in diebus judicatoriis oborientes, vehementes & veloces, periculosi sunt: & qui expelluntur ex fronte, veluti gutta & aqua scaturientes; & frigidi valde ac multi: necesse est enim ejusmodi sudorem prodire cum violentia, & laboris excessu, ac expressione diuturna.

Nota: *Quemadmodum dictum in præcedenti Aphorismo excretionem sanguinis per nares in quartana esse malam.*

Ita pariter in hoc præsentis Aphorismo dicitur humorum serorum seu lymphaticorum per sudorem & habitum corporis, vehementem, velocem, & in diebus criticis factum esse malum; quoniam non tantum indicat febris vehementiam & magnitudinem, sed etiam materiæ & causæ morbificæ copiam & violentiam, viriumque resolutarum debilitatem, ac caloris nativi proxime imminentem extinctionem, quæ semper repentinam, vehementem, velocem & immodicam

evacuationem, cum qua spiritus universi plurimum disperduntur sequitur: *omne enim violentum natura inimicum* atque repentinæ mutationes ab uno extremo ad aliud sunt periculosæ: unde Hippocrates *in Coacis Lib. 4.* ait sudores si paulatim fiunt, juvant qui vero subito & affatim nocent.

Dices: Hippocrates & Galenus, laudant copiosam urinarum excretionem, præcipue die critico, atqui eadem materia est urinæ & sudoris, Ergo si in uno laudabilis est excretio, debet esse etiam in altero. *R.* Nego consequentiam, quia diversa est ratio, quia per urinas crassa etiam expelluntur, quod non fit per sudores, neque per urinas tot spiritus evacuantur, quam per universum sudorem.

Instabis: Excretiones quæ fiunt diebus criticis sunt bonæ: deinde, *nihil criticum debet esse paucum* teste Hippocrate, Ergo sudor multus die critico erit bonus. *R.* Excretiones quæ fiunt diebus criticis moderatæ & cum euphoria seu tolerantia sunt bonæ concedo: Secus nego. *R. 2.* Nihil criticum debet esse paucum, nec etiam nimium, sed medium tenere beati.

Plura vide apud Cardanum *in commentario.*

Aphorismus V.

Ex morbo diuturno, alvi fluor malum.

Nota: Hic Aphorismus explicatus reperitur Lib. 5. Aphor. 12. & 14.

Differentia tamen inter hunc & illos Aphorismos est, quod in hoc de omni morbo longo, ibi de tabe tantum agat Hippocrates. Rationes autem ibidem generaliter sunt deductæ.

Plura vide apud Cardanum *in commentario.*

Aphorismus VI.

Quaecunque non sanant Medicamenta, ea ferrum sanat, quæ ferrum non sanat, ea ignis sanat, quæ ignis non sanat, ea incurabilia judicare oportet.

Quamquam Aphorismus hic in Classem illorum Aphorismorum, qui in septem prioribus Libris explanati sunt, redactus non inveniatur, sed inter cæteros hujus Libri octavi relatus, proindeque adjectitius & spurius simul cum iisdem creditus sit; placuit tamen nobis singulariter præ cæteris seligere, utpote qui revera supra reliquos (sive Hippocrates, sive alius quispiam ejus Autor sit) aliquid memorabile, & magis magisque commendabile complectatur. Etenim quæ hætenus ad morborum fere omnium curationem explanata sunt, hoc unico veluti per epitomen, admirabili sane peroratione, videntur comprehensa, ut hinc saltem noscant medici, qua via & quibus mediis in arte progredi debeant, ut therapeiam universam expleant & absolvant, quæque fortassis uno remediorum genere mala cedere non observaverint, alio atque alio subigere adnitantur; quod primum, ac supremum est totius rei Medicæ opificium: Quod si neque his morborum contumacia & prævicacia subjiciatur, immediate illi censendi sint, utpote artis ministerio non subigibiles, & naturam omnino impotentem & abjectam arguentes. Et quamvis hic partem solummodo medicinæ chirurgicam amplexari, atque ad ejus classis morbos curandos pertinere videantur, cum *ferrum & ignis* non nisi in vulneribus, ulceribus, tumoribus aliisque similibus adhiberi soleant; si tamen res exactius pensitetur, ad universam Medicinam faciendam eundem spectare, non incongrue existimabit, qui perpendit cum Hippocrate omnem morbum ulcus esse, aut ulceris conditionem præferre, sive præsens, sive imminens, & sive apparetis ac conspicuum, sive latens & inconspicuum illud sit. Accedit quod

hæc gravis sententia ad plurimos & numerosos fere morbos, valde proficua est, quin & statuta per ipsam series & methodus applicabilium medicamentorum ex ferro & igne, ac igneis & ignitis rebus, veluti extremis & summis Medicinæ præsidiiis desumptorum, non poterit non esse plurimum cunctis Medicis fructuosa.

Et quidem *Primo* ex medicamentis extrinsecus admotis, putaturis, inunctionibus, cataplasmatibus, cerotis, emplastris, & aliis similibus; mox etiam ab interioribus assumptis cathartics, tum vomitum tum dejectionem, moventibus; itemque diureticis, diaphoreticis, incidentibus, attenuantibus, aperientibus, dissolventibus, temperantibus, corrigentibus, roborantibus, cæterisque; & tum cephalicis tum cardiacis, tum stomachicis, tum thoracicis tum hystericis, idque genus aliis, plurimi ac innumerabiles morbi tolluntur, ut ex Praxi Therapeutica & Pharmaceutica patet. Itemque *ferro* tum simplici tum candenti, diversimode incidente, secante, terebrante, abradente, scalpente; ut in tumoribus, apostematibus, abscessibus, gangrænis, sphacelis, fracturis, contusionibus, calculo, cataracta, cancro, hernia, &c. Tandem *igne* tum actuali, ut vocant, tum potenciali, igneis ac ignitis rebus, & ignea vi ustionem, rubificationem, vesiculas, escharam, aliudve simile excitantibus: Itemque thermis, hypocaustis, laconicis, tum naturalibus, tum artificialibus, ex sulphure, Mercurio, sale armoniaco, camphora, gummi quocunque, ac spiritu vini, vel simplici vel medicato & aliis, fere omnes humani corporis morbi & affectiones indiscriminatim abiguntur: de ferro ejusque usu canit Ovidius *i. metamorphos.*

Immedicabile vulnus

Ense rescindendum, ne pars sincera trahatur.

Quæres: Quid per moxam intelligatur? R. Esse lanuginosam quandam substantiam, herbæ cujusdam chinensis vel japonicæ propaginem (alii lanuginem ex artemisia substituunt) quam in coni formam redactam, & sua basi parti dolenti aptatam, & bacculis aromaticis accensam, & sæpius repetitam, adustione facta & vesiculis extractis Podagram curare dicunt, evanescentibus nempe doloribus, & tardius & debilius vel nunquam redeuntibus, vide de hac Observationes 118. & 124. *Ephemeridum Anni sexti Collegii Naturæ Curiosorum.*

rum. Hanc moxam aliqui judicant, bubonibus pestilentialibus apponendam cum utilitate.

Plura de hoc Aphorismo legere poteris apud Cardanum in huius commentario.

Aphorismus VII.

Tabes iis maxime etatibus fiunt, quæ à decimo octavo sunt, usque ad tricesimum quintum.

Nota: Hic ipsissimus Aphorismus explicatus reperitur Lib. 5. Aph. 9.

Aphorismus VIII.

Qui secundum naturam ad tabem vergunt, omnia quidem vehementia, quadam vero etiam lethalia. Secundum autem erat, si eo tempore egrotet, quo tempus ipsum morbo opem fert, quemadmodum feбри ardenti æstas, hydropico hyems: id enim, quod est à natura, victoriam obtinet: at spleni plus affert timoris.

Nota: Huius adjectitii Aphorismi rationes per longum & latum deducitas invenies Lib. 3. Aphorismo 1. & sequentibus usque ad 23. & apud Celsum pag. 70. Lib. 26.

Aphorismus IX.

Lingua nigra atq; cruenta, cum quid horum signorum abest, non admodum malum signum: morbum enim minorem significat.

Nota:

Nota: *Cum enim lingua nigra & cruenta ex febre ardente imo ex urente originem ducat, cujus vi lingua impense exarescit, & adustas fuligines à viscerum incendio elevatas recipiens, camini instar nigredine illa fingitur; proinde si hæc absunt, minus malum portendunt.*

Aphorismus X.

Hæc igitur in febribus acutis observare oportet, quando quis moriturus sit, & quando evasurus.

Nota: *Vel hic Aphorismus nullus est vel ad alios in prioribus Libris de prognosticis tractantes serevocans; alias per se consideratus nihil docet nihil determinat.*

Aphorismus XI.

Testis dexter frigidus & convulsus, mortiferum est.

Nota: *Vix hujus fundamentalis ratio dari potest proinde melius est sicco pede eundem proprie interjectum praterire & rejicere.*

Aphorismus XII.

Ungues nigri, & digiti manuum & pedum frigidi, contracti vel remissi mortem proximam esse significant.

Nota:

Nota: Hunc Aphorismum explicatum habes Lib. 4. Aphor. 48. 49. & Lib. 7. Aphor. 1. 26. 72.

Aphorismus XIII.

Labra livida, aut etiam resoluta & inversa & frigida, mortifera.

Nota: Hic ipsisissimus Aphorismus explicatur in iisdem locis, in quibus precedens nempe duodecimus.

Aphorismus XIV.

Aures frigida, pellucida, contracta, lethales sunt.

Nota: Et hic quoque ad ea loca spectat quo duodecimus.

Aphorismus XV.

*Et tenebricosa vertigine laborans & lucem aver-
sans, & somno & ardore multo detentus, de-
speratus est.*

Nota: Signa enim hac sunt apoplexia fortioris mortis prodroma.

Aphorismus XVI.

*Et qui paulatim rabie agitari incipit, et non agno-
scit, neque audit, neque intelligit, exitio proxi-
mus est.*

Nota: Hac omnia signa sunt vel apoplexia vel repentina mortis.

Aphorismus XVII.

Morituris signa hæc multo fiunt manifesta, & venter attollitur, atque inflatur.

Nota: Hic Aphorismus nec in ratione nec in experientia nisi aliqua alia addantur phænomena, fundatur, unde potius fuisset expungendus.

Aphorismus XVIII.

Terminus vero mortis est, cum anima calor, supra umbilicum, ad locum septo transverso superiorem ascendit, & omnis humor exuritur: cum autem pulmo & cor, calore in mortiferis locis coacervato, humorem amiserit, caloris spiritus confertim exhalat, cujus ope totum cum toto compactum erat. Præterea partim per carnes, partim per capitis spiracula, unde vivere dicimus, relinquens anima corporis domicilium frigidum, & mortale simulachrum, una cum bile, sanguine, pituita, & carne deductione reddit.

Nota: Hic Aphorismus pura est descriptio moribundorum & morientium. Alii hos ultimos septem Aphorismos reducunt ad Libr. I. Aphor. I. ubi occasio præceps, seu tempus mortis hos omnes comprehendit, & ibidem implicite explicati sunt.

Nihil ergo amplius super est, nisi omnium octo Librorum Aphoristicorum.

F I N I S.

HIPPOCRATIS LEX.

Medicina omnium artium præclarissima est. Verum propter ignorantiam & eorum, qui eam exercent, & eorum, qui temere hos ipsos judicant, omnium artium prope infima censetur. Qui quidem error ab hac potissimum causa provenire videtur. Soli namque Medicinæ nulla poena in Reb. publicis statuta est, præterquam ignominia: Verum hæc non lædit eos, qui ex ea conflati sunt. Simillimi enim hujusmodi Medici sunt personis mutis, quæ in tragædiis introducuntur. Quemadmodum enim illi figuram quidem & habitum ac personam histrionum referunt, histriones autem non sunt: Sic & Medici fama quidem & nomine multi, re autem & opere valde pauci. Quisquis enim Medicinæ scientiam sibi vere comparare volet, eum hisce nitî oportet, Natura, Doctrina, Loco Studiis apto, institutione à puero, Studio & Industria, atque tempore. Primum quidem igitur omnium Natura opus est. Natura enim repugnante, irrita sunt omnia. Eadem vero viam ad optima commonstrante, artis Doctrina contingit. Quam ipsam cum prudentia sibi comparare oportet, ita ut à puero institutio accedat, idque in loco à Natura ad disciplinam accomodato. Amplius

pius autem & industriam adhibere oportet: eamque ad multum temporis, ut scilicet disciplina in naturam versa ac veluti ingenerata, feliciter & copiose fructus proferat. Qualis enim eorum, quæ terra producit, consideratio est, tales etiam Medicinæ cognitio. Natura enim nostra, velut ager est: Dogmata Præceptorum, veluti semina sunt. Institutioni à puero cum eo convenit, quod opportuno tempore semina terræ committere oportet. Locus autem in quo Disciplina contingit, est velut ambiens aër, è terra nascentibus nutrimentum præbens. Studium autem, cultura est. Tempus postremo hæc omnia corroborat, ut perfecte enutrientur. His igitur ad Artem Medicam allatis, & vera ipsius cognitione comparata, tandem per urbes ambulando, non sermone tantum, sed & opere Medicos haberi convenit. Imperitia vero malus thesaurus est, & infelix, opulentia his, qui eam possident; tum opinione ipsa, tum revera tranquillitatis animi & lætitiæ expers, timiditatis & inconsiderantiæ nutrix. Et timiditas quidem impotentiam, inconsiderantia vero ignorantiam artis arguit. Duo enim sunt, scientia & opinio. Quarum illa scire facit, hæc ignorare. Cæterum res sacræ sacris hominibus communicantur: prophanis id fas non est, priusquam scientiæ orgiis initientur.

F I N I S.



INDEX

Rerum & Verborum, Libris sive Sectionibus octo Aphorismorum Hip- pocratis contentorum.

A.

<i>Abdomen quid sit, v. Anatomiam.</i>	
<i>ejus crassities in quo consistat</i>	pag: 197
<i>Abortus futuri signa è mammis</i>	760
<i>ejus signa è mammis</i>	762
<i>gracilium</i>	780
<i>mediocriter corpulentarum</i>	784
<i>ejus causa varia</i>	786
<i>Abscessus aquosi an dentur</i>	906
<i>februm prognostici</i>	588
<i>quid significant</i>	589
<i>in febribus ubi fiant</i>	544
<i>unde prasagiendi</i>	ibid.
<i>convalescentium</i>	545
<i>occulti</i>	1002
<i>uteri</i>	701
<i>Abstinencia & victus tenuis morbis curandis commoda</i>	27
<i>que circa hac ponderanda</i>	ibid.
<i>Accidentia ab hypercatharsi</i>	652
<i>inflammationum viscerum infimi ventris</i>	821

INDEX

<i>Accessio in morbis quid</i>	32
<i>Acetabula uteri quid</i>	785
<i>Acetabulorum uteri laxitas ac mucositas, unde dignosci possit</i>	787
<i>signum mucoris in illis</i>	ib.
<i>Acuti valde, quando purgandi & quomodo</i>	478
<i>Acutorum morborum prognosis</i>	132
<i>Aër quomodo se habeat</i>	277
<i>illo mutato & constitutio hominis mutatur</i>	275
<i>quid faciat</i>	270
<i>juxta Hippocratem</i>	276
<i>quibus rebus obnoxius sit</i>	271
<i>quot modis nos immutare soleat</i>	286
<i>Ægri quando in febris cibandi</i>	30
<i>quomodo alendi</i>	26
<i>rei alicujus diuturno desiderio perciti saepe sanantur</i>	206
<i>exemplum</i>	ib.
<i>Æger si non habeat appetitum, quale signum</i>	89
<i>Ægrotantes in commissis palpebris ut dormiant, & album oculorum</i>	
<i>detectum habeant, unde accidat</i>	1035
<i>cujus mali indicium</i>	1046
<i>Æquinoctia quot</i>	38
<i>Æstatis & autumnus declinationes</i>	337
<i>juventutis comparatio</i>	376
<i>Æstate prima qui optime degant</i>	372
<i>qui</i>	ib.
<i>quibus remedio sit</i>	377
<i>Æstuatio ventriculi in febris</i>	613
<i>Ætas ad apoplexiam disposita</i>	1046
<i>& morbi ad anni tempora collati</i>	283
<i>morborum ejus ab intra definitio quotuplex</i>	24. 409
<i>quot</i>	35
<i>puerilis, quibus morbis obnoxia sit</i>	409
<i>senilis quotuplex</i>	434
<i>Alimenta</i>	36
<i>Allium & amygdalæ contra ebrietatem remedia</i>	659
<i>Alvi</i>	

RERUM ET VERBORUM.

<i>Alvi excretorum diversitas ratione ætatis</i>	265
<i>fluxus quotuplex</i>	114
<i>spontaneus & symptomaticus quotuplex</i>	ib.
<i>fluxuum ex fæcum mutatione prognos</i>	112
<i>fluxus & vomitus atrabilarii in principio</i>	516
<i>in muliere uterum gerente quid</i>	752
<i>profluvia unde</i>	355
<i>stricta non salutaris & cur</i>	265
<i>succedentis humectationis in febricitantibus ex fluxu sanguinis</i>	531
<i>prognosis</i>	1140
<i>Amazones cur sibi dextram mammam abscindi curabant</i>	1138
<i>Ambidextra</i>	797
<i>Amnios & chorion</i>	356. 388
<i>Angina unde</i>	994
<i>prognosis</i>	674
<i>eius eventus</i>	677
<i>quotuplex</i>	404
<i>quando eveniat</i>	549
<i>tumoris expers lethalis</i>	552
<i>convulsiva</i>	254
<i>Animus ad aspera assuesfaciendus</i>	82
<i>eius & anima differentia</i>	692
<i>defectio</i>	274
<i>Anni divisio</i>	302
<i>tempora ad gignendos & solvendos morbos vim habent</i>	310
<i>qualem referant calorem</i>	
<i>totum temperatum esse an magis conducat sicut in vere, an vero</i>	
<i>melius sit, temporum varias esse mutationes & con-</i>	
<i>trarias</i>	282
<i>quomodo ab Hipp. Aphor. IV. Sect. IV. dividatur</i>	456
<i>Antiqui, quantum sanguinis emisserint per venæ sectionem</i>	57
<i>Anxietatum precordialium remedia</i>	1154
<i>Aphtha idem quod oris ulcus</i>	409
<i>unde oriatur in infantibus recens natis</i>	410

INDEX

<i>Aphtha remedium</i>	412
<i>Apoplexia quid</i>	221
<i>illorum distinctio</i>	1046
<i>quando fiat</i>	ib.
<i>prognosis</i>	221
<i>gradus quot</i>	ib.
<i>unde</i>	408. 1047
<i>ejus causa</i>	1132
<i>an febre superveniente solvi possit</i>	222
<i>remedia quæ ad ejus curationem tentanda</i>	223
<i>somni nepos</i>	66
<i>Apoplectici quomodo pereant</i>	224
<i>Apostema quo pacto dignosci possit esse ruptum</i>	686
<i>Appetitus quando variet</i>	433
<i>in morbis revertens vires reparat</i>	185
<i>reconvalescentium prognosis</i>	184
<i>ejus in morbis alteratio</i>	186
<i>quotuplex</i>	188
<i>quot modis depravetur</i>	190
<i>ciborum quid</i>	205
<i>Aqua quotuplex</i>	730
<i>quamam levissima</i>	731
<i>mulsa ubi adhibenda</i>	771
<i>quando</i>	772
<i>Aquarum probationes</i>	727
<i>internoscenda</i>	729
<i>distinctio quomodo facienda</i>	ib.
<i>Aquilonares constitutiones quid faciant</i>	359
<i>Aquilonis descriptio</i>	296
<i>vires</i>	297
<i>quales in eo morbi oriantur</i>	297
<i>quando & quibus magis noceat</i>	340
<i>Ardores vehementes quid ex illis expectandum</i>	1079
<i>Arenula calculi signa</i>	635
<i>Aromatum suffitus</i>	735
<i>Aroma-</i>	

RERUM ET VERBORUM.

<i>Aromata qualia hac esse debent</i>	735
<i>an bene vel male olentia</i>	ib.
<i>quid educunt</i>	ib.
<i>Ars longa quid</i>	3
<i>quot partibus constet</i>	7
<i>Articulorum dolores unde</i>	356
<i>praesidia revulsoria</i>	628
<i>Arthritis & calvities eunuchorum</i>	967
<i>Assuefaciendum se vario cibo & potui à juventute</i>	254
<i>corpus & animus ad aspera</i>	254
<i>Asterismus quotuplex</i>	461
<i>quando oriatur</i>	463
<i>Asthma unde</i>	404
<i>cur in senibus non curetur</i>	218
<i>in aetate consistente unde</i>	432
<i>Athleta qui dicantur</i>	12
<i>cur evacuandi</i>	ib.
<i>Atra bilis quid</i>	517
<i>ejus humor deleterius quomodo generetur</i>	517
<i>Aurium dolores quando vagentur</i>	396
<i>consensus cum intestinis unde deducatur</i>	535
<i>humiditates in infantibus recens natis unde</i>	412
<i>contra illas remedium</i>	ib.
<i>Auster pluviosus & mollis quid faciat</i>	326
<i>ejus descriptio</i>	295
<i>Autumnus aquilonius & siccus</i>	344
<i>quibus conferat</i>	345
<i>noceat</i>	ib.
<i>quales gignat morbos</i>	292
<i>ejus morbi difficiles</i>	ib.
<i>qui ad eum male se habeant</i>	280
<i>qui bene</i>	372
<i>Autumni tempus quomodo metiri debeat</i>	313
<i>per illud vagantur plerumque morbi acutissimi</i>	ib.

INDEX

<i>Autumni tempus quibus noceat</i>	320
<i>ejus & æstatis declinationes</i>	337

B.

B <i>Albi cur facile in apoplexiam incidant</i>	985
<i>illorum diarrhœa</i>	982
<i>Balbuties unde</i>	984
<i>Balneum quomodo oculorum dolores curet</i>	980
<i>Balneorum usus in febris</i>	1136
<i>Bibacitatis supervenientia</i>	1067
<i>Bibuli cur minus quam alii edant</i>	144
<i>Bilis an famem excitet</i>	145
<i>atra quid</i>	517
<i>Biliose dejectiones quæ</i>	534
<i>Boreas vide aquilo</i>	
<i>Bubones idem quod tumores</i>	594
<i>qualem ostendant febrem</i>	595

C.

C <i>Acocchymia quid & quotuplex</i>	96
<i>in quo reperiatur</i>	97
<i>melancholica in capite effecta</i>	1045
<i>est somni nepos</i>	66
<i>Calculi in infantibus unde</i>	420
<i>signa arenulæ</i>	635
<i>Calidum ejus excedentis noxa</i>	688
<i>innatum quid</i>	36
<i>quid faciat</i>	714
<i>quibus utile</i>	716.717
<i>quotuplex</i>	689
<i>usus ejus Medicus</i>	710
<i>Calor & frigus loci affecti indices</i>	562
<i>quid designent</i>	ib.
<i>ejus, frigoris & caloris vicissitudo</i>	564
<i>Calvi-</i>	

RERUM ET VERBORUM.

<i>Calvities unde</i>	971
<i>ejus & varicum comparatio</i>	988
<i>Cancris prognosis</i>	995
<i>quid</i>	ib.
<i>quomodo curandus</i>	996
<i>Canicularium dierum numerus</i>	464
<i>Capillorum defluvium unde</i>	989
<i>Capitis dolores unde</i>	408
<i>quando vehementer fiant</i>	338
<i>Capita quot Medicus praevidere debeat antequam purgans exhibeat</i>	59
<i>Caruncula urethrae</i>	638
<i>Cardialgia idem quod ventriculi morsus</i>	613
<i>febrilis quid</i>	ib.
<i>Castrati qui</i>	968
<i>Catharrus senum</i>	213
<i>materia quae</i>	215
<i>Somni filius</i>	66
<i>Cautela paracentheseos</i>	963
<i>Cerebro acute & suave olentia infensa sunt & cur</i>	829
<i>Chirurgus quale in ulceribus signum salutare</i>	713
<i>Cholerae in juvenibus unde</i>	433
<i>Chylus bonus vel malus sanitatem vel morbum adfert</i>	97
<i>Cibus cur post illum assumptum quidam frigeant, quidam vero non</i>	1069
<i>fastidium ejus, quando mulieribus superveniat</i>	837
<i>quotupliciter intelligatur</i>	887
<i>immoderatio</i>	124
<i>unde</i>	125
<i>circa illam nota</i>	ib.
<i>in paroxysmis penitus non denegandus</i>	31
<i>quando illis abstinendum</i>	45
<i>eger quando nimis utatur</i>	87
<i>quotupliciter appeti potest</i>	ib.
<i>adjici vel detrahi potest</i>	42
	Cocctio

INDEX

<i>Coctio quid & quotuplex</i>	54
<i>quomodo alias dicatur</i>	ib.
<i>Cœnandi apud veteres usus qualis</i>	732
<i>Coloris, frigoris & caloris vicissitudines</i>	564
<i>Colores menstrui quo cognoscantur & discernantur</i>	760
<i>ex illis cognoscendum, quid mulier gerat</i>	774
<i>Comitiales morbi quando oriantur</i>	404
<i>Concoctionis & symptomatum vigoris differentia</i>	183
<i>Consensus aurium cum alvo</i>	533
<i>Constitutio in morbis quid</i>	32
<i>Constitutiones aquilonares quid faciant</i>	359
<i>austrina quid</i>	360
<i>Consuetudo ad quid referenda</i>	42
<i>est altera natura</i>	248
<i>ejus vis quanta</i>	250
<i>quotuplex</i>	253
<i>ejus mutatio ubi fiat</i>	254
<i>Contraria contrariis curantur</i>	147
<i>Convulsio quid</i>	997
<i>ejus causa quotuplex</i>	ib.
<i>unde oriatur</i>	998
<i>ejus & febris relatio</i>	163
<i>in muliebri profluvio mala & quomodo</i>	816
<i>aqua frigida large affusa illam levat</i>	726
<i>ex elleboro quid</i>	641
<i>cur lethalis dicatur</i>	644
<i>vulnerum quid</i>	646
<i>quotuplex</i>	647
<i>ab hæmorrhagia</i>	649
<i>Convulsiones & dolores viscerum convulsiui in febris</i>	615
<i>februm in somno</i>	616
<i>si à medicamento poto quid</i>	1104
<i>Corpus ad aspera assuefaciendum</i>	254
<i>vomendum aptum</i>	468
<i>impurum quotuplex</i>	97
	Corpus

RERUM ET VERBORUM.

<i>Corpus cibis non implendum</i>	97
<i>sanum quotuplex</i>	201
<i>quando in morbis ad purgandum preparandum, & quando non</i>	95
<i>qua illud extenuent</i>	176
<i>ejus partes</i>	697
<i>habitus quotuplex</i>	784
<i>Corpora quanam sint, qua verno tempore preservari debeant, ne post-</i>	
<i>modum per aestatem in morbos labantur</i>	1019
<i>Cotyledones idem quod acetabula uteri</i>	785
<i>unde ab illis abortus accidat</i>	786
<i>Coxendicum dolores unde</i>	403
<i>Crisis perfecta signa quot</i>	104
<i>imperfecta quot</i>	ib.
<i>quid</i>	105
<i>ejus antecedentia & consequentia</i>	107
<i>nata, qua ante eam contingunt</i>	108
<i>quot partes habeat</i>	109
<i>ejus prima pars perturbatio quando fiat</i>	109.155
<i>rationes cur noctu fiat</i>	110
<i>ejus tertia pars quando accidat</i>	110
<i>per alvum futura signa</i>	627
<i>febris infida</i>	604
<i>regimen</i>	46
<i>Critici dies quotuplices</i>	155
<i>quando sint</i>	156
<i>distinctio in illis septimanarum</i>	158
<i>Criticam aliquam mutationem in natura operationibus Perī probatur</i>	
<i>ex variis autoribus</i>	153
<i>Cruditas humorum unde cognosci possit</i>	54
<i>Cucurbitula ubi adhibenda</i>	804
<i>quot earum genera</i>	805
<i>Cura mensium immodicorum</i>	799
<i>Curatio morborum quotuplex</i>	261
<i>universalis, & quanam</i>	1018

M m m m m m m

Curio-

INDEX

<i>Curiositas quorundum volatiliū</i>	4
<i>Cur quidam paulo ante mortem melius sese habere videantur, si febris & symptomata videntur remittere</i>	874

D.

D <i>efinitio atatis morborum ab intra quotuplex</i>	24
<i>Defluxiones catharrales ad pectus</i>	1129
<i>Dejectiones syncerae quae</i>	115
<i>Delirium quid</i>	68
<i> quando fiat</i>	69
<i> quotuplex</i>	ib.
<i> in febribus unde</i>	587
<i> quomodo illi succurrendum</i>	71
<i> quae medicamenta in illo eligenda</i>	ib.
<i> in febribus continuis est lethale</i>	586
<i> prognosis</i>	997
<i> ab ossis praecisione</i>	1102
<i> quotuplex</i>	1039
<i> eorum supervenientia phaenomena</i>	1062
<i>Delinquentia quid</i>	219
<i> ejus gradus</i>	ib.
<i>Demersi in aquam, si nondum extincti, quomodo in vitam referri possint</i>	227
<i>Dentes canini qui dicantur</i>	416
<i> quibus accidunt, & cur</i>	ib.
<i>Dentientium symptomata</i>	414
<i>Dentitionis tempus</i>	413
<i> illius indicium</i>	414
<i>Depilatio in quibus ulceribus maxime adpareat</i>	889
<i>Determinatio circuituum unde</i>	46
<i>Diarrhoea balborum</i>	982
<i> pleuritidis aut peripneumonia prognostica</i>	923
<i> ejus remedium vomitus</i>	921

Diar-

RERUM ET VERBORUM.

<i>Diarrhœa quid in illa considerandum</i>	921
<i>gravidarum</i>	752
<i>tabidorum</i>	683
<i>que sponte evenit unde</i>	9
<i>Dieta moderata post morbos adhibenda</i>	189
<i>ejus errores quando facilius noceant</i>	44
<i>Diagnosîs hæmophthiæ</i>	680
<i>Dies caniculares</i>	274
<i>critici</i>	153
<i>quotuplices juxta veteres</i>	604
<i>Differentia animi & animæ</i>	82
<i>inter intestina crassa & tenuia</i>	932
<i>Difflatio lymphæ quando major</i>	43
<i>Dispositio ad pleuritidem</i>	985
<i>Diversitas alvi excretorum ratione ætatis</i>	139
<i>Dolor faucium</i>	115
<i>quando æstimandus</i>	116
<i>quid ad hunc requiratur</i>	117
<i>quid & unde eveniat</i>	236
<i>quotuplex</i>	237
<i>suppurationis ejusque index</i>	239
<i>quando fiat</i>	241
<i>insensilis</i>	80
<i>prognosis</i>	889
<i>Dolores quotuplices</i>	890
<i>quid in illis considerandum</i>	891
<i>in illorum causa quæ advertenda</i>	905
<i>viscerum convulsivi in febribus</i>	613
<i>unde oriantur</i>	616
<i>non una in parte concurrentes</i>	235
<i>Dysenteria unde</i>	405.327
<i>prognosis</i>	885
<i>quæ in illa pessima signa</i>	887
<i>commoda & incommoda</i>	1008
<i>commoda</i>	1022

INDEX

<i>Dysenteria ab atra bile lethalis</i>	522
<i>non facile sanatur</i>	523
<i>carnosa</i>	529
<i>quæ in ea considerata</i>	ib.
<i>unde lethalis ejus exitus præfagiendus</i>	529
<i>Dispnoea idem quod respirandi difficultas</i>	586
<i>in febribus continuis est lethalis</i>	586
<i>febrilis</i>	618
<i>Dysuria unde</i>	292

E.

E <i>Brietas lethalis</i>	654
<i>quid per illam fiat</i>	ib.
<i>quomodo eam convulsio sequatur</i>	655
<i>quid illam prævertere potest</i>	657
<i>quomodo succurrendum ne agri in convulsionem incidant</i>	658
<i>contra illam remedia</i>	659
<i>Effectus motus cerebri</i>	1156
<i>purgantium</i>	60
<i>Emeticorum preparationes</i>	488
<i>Emmoton quid</i>	792
<i>Empyematis prognos</i>	684
<i>Empyematici quinam</i>	964
<i>quid cum his agendum</i>	ib.
<i>Empyicorum prognos</i>	1141
<i>Enæorema idem quod sublinamentum</i>	624
<i>est index coctionis in urina</i>	ib.
<i>Epilepsie prognos</i>	232. 664
<i>quid</i>	233
<i>quibus propria</i>	ib.
<i>differentia ejus quotuplex</i>	234
<i>ejus descriptio</i>	ib.
<i>unde</i>	356

Epi-

RERUM ET VERBORUM.

<i>Epilepsia quando accidat</i>	415
<i>quotuplex</i>	431
<i>definitio</i>	665
<i>vocatur comitialis morbus, & cur</i>	ib.
<i>quid illis, qui post vigesimum quintum annum corripiantur ex-</i> <i>pectandum</i>	666
<i>cur hi difficulter convalescant</i>	667
<i>ante pubertatem ab ea correpti quid sortiantur</i>	668
<i>unde accidat</i>	666
<i>Errata victus collata</i>	15
<i>Errores diætæ quando plus noceant</i>	44
<i>Erysipelas interius genitum si ad externas partes vertatur bonum, si</i> <i>introvertatur malum</i>	957
<i>an in illo venæ sectio aut purgatio locum habeat</i>	958
<i>unde</i>	956
<i>quid occupet</i>	582
<i>ulceratum</i>	1093
<i>si mulieri pregnantæ in utero fiat quid</i>	778
<i>Evacuatio extrema vitanda</i>	12
<i>ejus scopus quotuplex</i>	ib.
<i>quam bona</i>	61
<i>quomodo fieri debeat</i>	56
<i>quid per eam intelligendum</i>	148
<i>mensium immoderata quando contingat</i>	800
<i>remedium</i>	801
<i>sanguinis quid ex illa timendum</i>	744
<i>quomodo fiat</i>	127
<i>malorum humorum per quid facienda</i>	89
<i>que illam faciant laudabilem</i>	61
<i>Evacuationes quæ & quot in illis consideranda</i>	581
<i>symptomata quomodo dicantur</i>	451
<i>quomodo prædisponantur</i>	92
<i>Evacuationum per alvum secundum plerosque distinctio</i>	113
<i>tempus in febribus</i>	177

INDEX

<i>Evacuatione ex subita tum puris tum aquæ intercutem, qua de causa mors certa imminet</i>	964
<i>Eunuchus à nativitate talis an podagra hæreditaria laborare possit.</i>	972
<i>illorum arthritis & calvities</i>	967
<i>podagra non laborant</i>	ib.
<i>cur Hippocratis tempore podagra non laborarint</i>	ib.
<i>quotuplices</i>	968
<i>quinam inter illos podagra corripiantur</i>	969
<i>cur calvi non fiant</i>	971
<i>Euphoria idem quod tollerantia consuetorum</i>	252
<i>Excrementa alvi nigra sponte euntia pessima</i>	511
<i>in extenuatis à morbo</i>	519
<i>statim exitiata</i>	522
<i>quenam inspicienda</i>	117
<i>circa illa nota quedam</i>	ib.
<i>juxta assumtorum qualitatem</i>	128
<i>illorum mutatio quotuplex</i>	113
<i>muliebria educenda, quæ & quot requirantur</i>	736
<i>spumosa quæ</i>	1110
<i>Examen & constitutio infimi ventris</i>	196
<i>Excreta ab illis fundamenta prognoseos</i>	1162
<i>Excretionum moduli variatio</i>	10
<i>quæ in illa observanda</i>	ib.
<i>Excretio quid</i>	129
<i>triplex</i>	130
<i>Excretorum ramenta</i>	1164
<i>cruditas</i>	1165
<i>prognosis</i>	579
<i>si illa difficulter educantur quia</i>	579
<i>si facile</i>	ib.
<i>quenam male censenda</i>	580
<i>Experientia quid</i>	865
<i>Experimenta graviditatis per assumta</i>	771
<i>calorem</i>	774
<i>Expe-</i>	

RERUM ET VERBORUM.

<i>Experimentum periculosum quid</i>	5
<i>Experientia plus credendum quam rationi</i>	20
<i>Extenuati extreme & si nigra deiecerint, quid illis expectandum</i>	518
<i>Extenuatio quotuplex</i>	85
<i>quando mala</i>	175
<i>ejus signum unde desumi possit</i>	176
<i>Externa, quae abesse apud agram debent</i>	7
<i>Extrema repletionis & inanitionis</i>	11

F.

<i>Facultatum trium labor</i>	442
<i>Fames quotuplex</i>	75
<i>quid</i>	120
<i>naturalis juxta Aristotelem</i>	75
<i>juxta recentiores</i>	76
<i>unde oriatur</i>	ib.
<i>quotupliciter excedat</i>	ib.
<i>quid praternaturalis</i>	ib.
<i>ejus immoderatio</i>	74
<i>an calorem nativum debilitet</i>	1159
<i>Fatalitas phthiseos ratione ætatis</i>	672
<i>Faucium dolor & tubercula</i>	115
<i>quando æstimanda</i>	116
<i>quid ad hæc requiratur</i>	117
<i>Febricitantium victus</i>	1160
<i>sudor</i>	301
<i>Febris & convulsionis relatio</i>	163
<i>dupliciter bona, si ei convulsio succedat</i>	164
<i>mala si ei convulsio succedat</i>	165
<i>emergentium in illa mutationum ratio</i>	168
<i>Febris quæ & quot in illa significanda signa</i>	170
<i>quotuplex</i>	393
<i>cur æstate potissimum eveniat</i>	394

Febris

INDEX

<i>Febris spasmi remedium</i>	596
<i>qualis esse debeat</i>	597
<i>an liceat medicamentis id excitare</i>	598
<i>tertiana exquisita terminus</i>	601
<i>obsurdescentia in illa solutio</i>	602
<i>si ea detento suffocatio derepente supervenerit, nullo in faucibus</i>	
<i>adparente tumore lethale</i>	549
<i>repente collum intorqueatur, nullo existente tumore</i>	
<i>lethale</i>	551
<i>medica hypochondriorum</i>	1009
<i>Febres quibus periculosa</i>	36
<i>minus periculosa</i>	ib.
<i>acuta cur in siccitatibus extremis fiant</i>	305
<i>chronica unde oriantur</i>	355
<i>ardentes vel tertiana quotuplices juxta veteres</i>	393
<i>in gravidis cur sint periculosa</i>	814
<i>quartana inter morbos autumnales recensentur</i>	399
<i>erratica quae</i>	ib.
<i>cujus temporis peculiare</i>	ib.
<i>diuturna unde in pueris oriantur</i>	423
<i>acuta in adolescentibus, unde</i>	430
<i>ardentes in juvenibus unde</i>	433
<i>illarum longitudo ex constantia paroxysmi arguenda</i>	540
<i>in illis abscessus futuri</i>	543
<i>culpa glandularum orta</i>	594
<i>continuarum & intermittantium prognosis</i>	572
<i>accidentia quid boni vel mali prænuncient</i>	ib.
<i>continua quanam</i>	573
<i>intermittentes, an periculosa</i>	572
<i>illas consequentia tubercula vel dolores</i>	574
<i>inequalium prognosis</i>	582
<i>si in illis partes externa algeant interna urantur, & sitiant, quid</i>	
<i>prænuncient</i>	582
<i>in illis mortis imminenti signa</i>	584

RERUM ET VERBORUM.

<i>Febres in continuis respirandi difficultas & delirium lethale</i>	586
<i>abscessus prognostici</i>	588
<i>lachrymæ in illis prognosticæ</i>	589
<i>illarum crisis infida</i>	604
<i>intermittentium typus</i>	609
<i>in illis rigores quotidiani quid</i>	609
<i>sudor inanis</i>	595
<i>Febribus morborum cause tolluntur</i>	164
<i>ratio cur</i>	ib.
<i>Filius somni quis</i>	66
<i>Fluxus alvi quotuplex</i>	114
<i>immodici differentia à fluxu bene ordinato</i>	816
<i>qui periculosior hepaticus an spleneticus</i>	1010
<i>Famina quæ mala per singulos menses pati debeant</i>	820
<i>quibus suffiende</i>	826
<i>quid illis inditum à natura sit</i>	834
<i>quanam ad conceptum aptiores</i>	841
<i>illarum podagra</i>	972
<i>quando illa laborant</i>	ib.
<i>deliria</i>	768
<i>Fæces alvi spumose in diarrhœa</i>	1109
<i>Fœtus unde</i>	777
<i>cui rei à Galeno comparetur</i>	740
<i>cur exitum suum quærat nono mense</i>	762
<i>Fomentum qua ratione oculorum dolores curet</i>	980
<i>Fractura ossium</i>	936
<i>Frigida aqua tumoris dolorem solvit</i>	724
<i>qualis esse debet</i>	725
<i>persusio, quomodo adhibenda</i>	709
<i>cui noceat</i>	716
<i>tusses movent</i>	722
<i>& destillationes</i>	723
<i>Frigidi effecta morbosa</i>	722
<i>quibus noecant partibus</i>	721
<i>excedentis noxa</i>	693

Nnnnnnn

Frigidi

INDEX

<i>Frigidi quomodo illis occurrendum</i>	696
<i>ejus noxa quoad certas partes</i>	697
<i>usus Medicus</i>	718
<i>narcoticus in doloribus</i>	724
<i>ulteriores noxa</i>	702
<i>Frigefacientia cujus conditionis esse debeant</i>	701
<i>Frigidum quomodo noceat</i>	698
<i>mordax quomodo intelligendum</i>	703
<i>Frigus quibus maxime noceat</i>	699
<i>quid inducat</i>	704
<i>extremorum scilicet superveniens morbis acutis</i>	1053
<i>à dolore</i>	1105
<i>Furores qui</i>	386
<i>quot eorum classes</i>	ib.

G.

G <i>Emelli quomodo generentur</i>	764
<i>juxta veteres</i>	ib.
<i>recentiores</i>	765
<i>Genitalium putredines quid</i>	397
<i>quando fiant</i>	ib.
<i>Gibbi unde</i>	1016
<i>Gibbosi cur ante pubertatem moriantur</i>	1007
<i>Gibbositas quotuplex</i>	1017
<i>Gingivarum prurigo & dolor unde</i>	414
<i>Glaucedo in senibus unde</i>	438
<i>Glacies & nix, an sint frigidiora aqua pura</i>	723
<i>Graciles post conceptionem quomodo tractanda</i>	784
<i>quomodo alias omnes purgandi</i>	468
<i>Gracilium abortus</i>	790
<i>Gracilitas unde corporibus accidat</i>	469
<i>Gravedines, quando eveniant</i>	407
<i>Gravida an pati possint fluorem album</i>	805

Gravida

RERUM ET VERBORUM.

<i>Gravida</i> quanam purganda	738
quare purganda	739
& qua ratione	ib.
quibus medicamentis	445.739
illarum morbi acuti	741
lethale est, si morbis acutis corripiantur	ib.
vena sectio	743
quando purganda & quando illis secanda vena	447.738.746
in quo morbo	441
illarum diarrhoea	752
tenesmus.	1106
nota	834
<i>Gravedines</i> unde	389 - 340
<i>Graviditatis</i> experimenta per assumpta	771
colorem	774

H.

H abitus corporis quatuorplex	230. 784
<i>Hamophthiseos</i> diagnosis	680
<i>Hamorrhagia</i> narium menstruis carentium mulierum	750
<i>Hamorrhoides</i> quid	909
unde	433
illarum prognosis	910
quales esse debeant	ib.
quot modis curentur	912
& varices quid per illas supervenientes significetur	947
cur supervenire debeant	ib.
<i>Harmonia</i> inter consuetudinem & naturam, qua & quanta	248
hujus testes quinam	ib.
<i>Hæctica</i> laborantes febricitant fortiter, & quomodo	176
<i>Helleborus</i> idem quod veratrum quatuorplex	642
albus quid adferat	ib.
an ab eo assumto vel alio medicamento vomitorio corpus	
movendum	493

INDEX

<i>Helleborus ejus dosis & preparatio</i>	498
<i>noxæ</i>	498
<i>quibus noceat</i>	ib.
<i>quomodo ex illo convulsio oriatur</i>	496
<i>Hepar multoties inflammatur</i>	1089
<i>Horror & sudor</i>	1060
<i>unde</i>	ib.
<i>Humiditas alvi in juvenibus ex duplici causa fit</i>	141
<i>exuperans hæmorrhagiæ largioris pèdissequa</i>	531
<i>Humidum quid per illud intelligatur</i>	39
<i>Humores an & quomodo turgeant</i>	54
<i>& corpus quando in morbis præparanda ad purgandum, &</i>	
<i>quando non</i>	95
<i>mucosi in gravidis unde</i>	787
<i>illorum morbifica dispositio, in quo consistat</i>	147
<i>Hydropis prognosis</i>	917
<i>ex tussi</i>	920
<i>quomodo illa solvatur</i>	919
<i>qualia ad illam curandam requirantur media</i>	920
<i>an in illa præparandi sint humores</i>	ib.
<i>an extenuatio in illa æque mala sit, ac in aliis morbis</i>	ib.
<i>unde sæpe oriatur</i>	401
<i>est somni nepos</i>	66
<i>ascites an à causa calida oriatur</i>	900
<i>Hæms aquilonia</i>	322
<i>ejus & veris commutata temperies</i>	328
<i>placida quæ dicatur</i>	330
<i>austrina</i>	ib.
<i>qui in illa optime degant</i>	372
<i>ejus & senii comparatio</i>	376
<i>Hypercatharsis idem quod superpurgatio ad illam disposita</i>	199
<i>Hypochondriorum medica febris</i>	1000
<i>dolores in illis unde</i>	ib.
<i>superveniente febre tolluntur</i>	ib.

Hyste-

RERUM ET VERBORUM

*Hystericus usus sternutatoriorum
vox græca quid notet*

755
ib.

L

I chor quid	241
I cterus idem quod morbus regius	606
quid si febribus superveniat	ib.
in quibus & unde fiat	607
quando malus	608
febribus superveniens	611
post septimum diem	ib.
ejus prognosis	1006
flatibus carens	874
unde oriatur	ib.
I ctus quid ex illis cerebro contingat	1082
ex illis innumera mala oriuntur	1083
I ecoris vulnus lethale	931
I leos quid	1011
est idem quod volvuli	404
I mmoderatio cibi	124
unde	126
somnia & vigiliarum	72
sacietatis & famis	74
I mpuritas quid	96
quotuplex	ib.
I nequalitas temporis dierum morbifera	290
I n educendo quid observandum	51
I n hyeme appetitus comedendi duplex	38
I nfantēs cur à partu statim sugant	761
I nflammatiō uterī in gravidis	778
quot modis terminari possit	670
I ntestinorum difficultates & levitates inter quos morbos numeranda.	403
I schiaes idem quod coxendicum dolores	ib.

INDEX

<i>Ischiadici doloris longioris effecta interna</i>	1050
<i>externa</i>	1051
<i>Judicium difficile quid</i>	6
<i>excernendorum</i>	115
<i>boni vel mali signa</i>	311
<i>unde petenda</i>	ib.
<i>morbi Medicis quid</i>	541
<i>Juvenes robusti cur citius pereant, quam imbecilles</i>	193
<i>Juventutis & astatis comparatio</i>	376

L.

<i>L</i> <i>Abor, quid per illum intelligatur</i>	66
<i>Labores consueti eorumque tollerantia</i>	247
<i>corpus cur robustum faciant</i>	249
<i>Lac virginum</i>	765
<i>quando generetur</i>	ib.
<i>in quibus generetur</i>	ib.
<i>quodnam sit utilius, proli matris vel nutricis</i>	770
<i>circa quod tempus & quomodo effundi debeat</i>	806
<i>malum è mammis effluens cujus rei signum</i>	807
<i>quibus noceat</i>	849
<i>conveniat</i>	850. seqq.
<i>inter ejus species quodnam optimum</i>	852
<i>ad ejus coagulationem quid conferat</i>	854
<i>quot modis exhibeatur</i>	855
<i>Lachryma prognostica</i>	589
<i>quales esse debeant</i>	590
<i>Lassitudo spontanea & ejus effectus</i>	77
<i>quid sit & quotuplex</i>	543. 78
<i>quales patiatur differentias</i>	78
<i>quot species habeat</i>	ib.
<i>quid excitare possit</i>	ib.
<i>unde oriatur</i>	79

Lento-

RERUM ET VERBORUM.

<i>Lentores circa dentes prognostici</i>	591
<i>quid</i>	<i>ib.</i>
<i>unde oriantur & quid præsagiant</i>	<i>ib.</i>
<i>Lepra quid</i>	389
<i>Lethalitas vulnerum</i>	929
<i>Lethargus unde</i>	408
<i>in atate consistente unde</i>	432
<i>Leucophlegmatici an commota diarrhœa moriantur</i>	1109
<i>Lienis tumores unde</i>	400
<i>Lienosi quinam dicantur</i>	1008
<i>Lienteria quid</i>	485. 878
<i>unde</i>	405
<i>prognosis</i>	877
<i>quot modis obtingere possit</i>	882
<i>Lippitudines oculorum, quando vagentur</i>	396
<i>unde</i>	326
<i>quid</i>	927
<i>Livores unde</i>	694
<i>Locus quid</i>	234
<i>evacuandorum</i>	49
<i>Loca conferentia quot</i>	51
<i>non conferentia quot</i>	<i>ib.</i>
<i>Lumborum dolor ad quid referatur</i>	483
<i>Lumbrici, quomodo alias dicantur</i>	420

M.

M <i>Magnitudo secundum quid consideretur</i>	267
<i>corporum ad quid inepta</i>	268
<i>causa ejus quæ</i>	<i>ib.</i>
<i>Mamma ex illis futura abortus signa</i>	760
<i>inter illas & uterum consensus</i>	<i>ib.</i>
<i>sanguis in illis furorem notat</i>	768
<i>cur</i>	769

Mammæ

INDEX

<i>Mammæ virorum & infantum lactificasse</i>	766
<i>Mater somni pigritia</i>	66
<i>Matula medico est quasi speculum fidissimum</i>	1114
<i>Materia cruda, ubi minus purganda</i>	54
<i>Medicamenta quæ in paroxysmo concedenda</i>	31
<i>quæ in illis observanda regula</i>	42
<i>purgantia ad quid conducant</i>	200
<i>sano corpori nocent</i>	203
<i>cur noceant</i>	ib.
<i>Mediæ de robore corporis reparando</i>	86
<i>Medicamentum ex quo uteri gestatio cognosci possit</i>	771
<i>epotum</i>	981
<i>Medicina quid</i>	147
<i>Medicus, qualis esse debeat</i>	4
<i>scientia ejus in quo consistat</i>	41
<i>est natura minister</i>	16
<i>cui juxta Galenum comparandus</i>	47
<i>ejus officium</i>	57. 652
<i>circa febricitantes</i>	303
<i>ebrios</i>	660
<i>purgandas uterum gerentes</i>	833
<i>ad quid in reconvalescentibus respicere debeat</i>	88
<i>imperare debet agro, non ager Medico</i>	205
<i>nec temere promittat salutem in morbo desperato</i>	221
<i>si ad civitatem aliquam accedat, quid ipsi considerandum.</i>	370
<i>Mediocritas in omnibus rebus laudanda</i>	817
<i>Medium tenere beati</i>	267
<i>Melancholia quid juxta veteres</i>	345
<i>recentiores</i>	346
<i>ejus prognos</i>	951
<i>& nephritidis prognos</i>	907
<i>Melancholici qui</i>	953
<i>cur diu vivant</i>	405
<i>quomodo purgandi</i>	476
<i>Melan.</i>	

RERUM ET VERBORUM.

<i>Melancholici morbi quinam dicantur</i>	1045
<i>Mens quotupliciter sumatur</i>	82
<i>quando laboret</i>	ib.
<i>quomodo in stultis agrotet</i>	82
<i>quid</i>	190
<i>laborantis signa</i>	80
<i>raro animadverti possunt & cur</i>	82
<i>Menses gravidarum</i>	831
<i>immodici quantitate peccantes</i>	817
<i>illorum cura</i>	799
<i>immoderata evacuatio quando contingat</i>	800
<i>prognosis</i>	815
<i>decolores & inordinati</i>	758
<i>illis recte fluentibus cetera quoque ad conceptionem destinata</i>	
<i>benè se habent</i>	835
<i>Menstrua si abundant, quid</i>	817
<i>ex eorum suppressione quid</i>	ib.
<i>large fluentia quid ex illis expectandum</i>	818
<i>suppressa quid excitent</i>	821
<i>Mensura evacuandorum</i>	55
<i>Methodus medendi per contraria</i>	146
<i>ejus mutatio</i>	260
<i>est hæc via regia omnis curationis morborum</i>	260
<i>Mictus cruentus & purulentus</i>	630
<i>quid notet</i>	ib.
<i>cruentus</i>	633
<i>unde</i>	634
<i>noctu plurimus quid notet</i>	639
<i>Miserere mei qualis morbus</i>	1010
<i>Modi reficiendi</i>	83
<i>Modulus evacuationum</i>	9
<i>offerendorum</i>	41
<i>victus in paroxysmis</i>	44
<i>Mæstitia unde</i>	952

INDEX

<i>Morbi acuti qui</i>	21
<i>extremi</i>	18
<i>quid in illis faciendum</i>	58
<i>status cui equipolleat</i>	24
<i>graviores quid exposcant</i>	56
<i>chronici quid</i>	85
<i>quid acuti</i>	ib.
<i>quomodo curentur</i>	147
<i>æstivi quibus breviores</i>	160
<i>ratio cur</i>	ib.
<i>autumnales, cur hodiernum plures curentur</i>	162
<i>eorum causa febrium beneficio tolluntur</i>	164
<i>ratio cur</i>	ib.
<i>unde ordinarie pendeant</i>	178
<i>eorum tempora</i>	181
<i>Et quot</i>	183
<i>principium quomodo dicatur</i>	182
<i>post illos non statim cibi immodice ingurgitandi Et cur</i>	189
<i>sed moderata diæta adhibenda</i>	189
<i>congrui</i>	192
<i>ad anni tempora collati</i>	283
<i>quot modis ad anni tempora comparari possint</i>	285
<i>tempestatibus consoni</i>	305
<i>quomodo in æstate fiant acutiores</i>	317
<i>ex æstate aquilonari Et autumno austrino venientes</i>	337
<i>ex multis imbribus Et siccitatibus venientes quinam</i>	354
<i>comitiales unde</i>	356
<i>ab anni temporibus invitati</i>	379
<i>æstate evenientes</i>	393
<i>hyemales qui</i>	406
<i>laterales unde</i>	407
<i>qui Et quot in infantibus recens natis oriuntur</i>	409
<i>adolescentium quinam</i>	428
<i>infantum recens natorum</i>	409
<i>dentientium</i>	413

RERUM ET VERBORUM.

<i>Morbi infantum</i>	418
<i>puerilium ad aetatem accedentium</i>	422
<i>puerilium</i>	424
<i>adolefcentum</i>	428
<i>ultra aetatem provectorum</i>	432
<i>senum</i>	434
<i>acuti gravidarum</i>	740
<i>Morbus unde conjiciendus</i>	547
<i>quid ad ejus victoriam requiratur</i>	210
<i>quidam morbi quomodo dicantur</i>	136
<i>breves an facilius discernantur quam longi</i>	137
<i>præcordiales</i>	1152
<i>vesicae & renum senibus contingentes quinam</i>	894
<i>Morborum acutorum certa non sunt prædictiones</i>	132
<i>triplex in illis reperitur contingens</i>	136
<i>acutorum gradus diversi, & quo respectu</i>	252
<i>autumnalium acuties unde</i>	314
<i>vernalium pathologia</i>	382
<i>Morbis accidit acute ledere, & agros affligere unde deducere illud liceat</i>	133
<i>Moriendi modus</i>	872
<i>Mors somni frater</i>	66
<i>ejus signum quale in strangulatis</i>	225
<i>Moschi usus apud Hispanas fœminas</i>	828
<i>Motus quid</i>	244
<i>corporis quotuplex</i>	ib.
<i>cerebri effectus</i>	1156
<i>Moxa quid</i>	1174
<i>Muliebria quid</i>	737
<i>Mulier quomodo sterilitatem suam explorare possit</i>	824
<i>quot modis sterilis esse & dici queat</i>	831
<i>quo pacto gubernanda ut concipiat</i>	841
<i>decolores & inordinatos menses habens, quomodo purganda</i>	759
<i>medicamenta purgantia</i>	ib.

INDEX

<i>Mulier, quanam copiosius citius aut tardius fluant</i>	760
<i>Mutationes subita</i>	256
<i>morborum quo tempore fiant</i>	157
<i>temporum morbose</i>	269
<i>juxta Philosophos duplices</i>	271
<i>aëris duplices</i>	272
<i>morborum repentina quid prænuncient</i>	165

N.

<i>Narium haemorrhagia menstruis carentium mulierum</i>	750
<i>prodest</i>	ib.
<i>cur</i>	751
<i>Natura quid juxta Veteres</i>	279
<i>Hippocratem</i>	280
<i>Neotericos</i>	281
<i>optimus Medicus</i>	190
<i>ejus actio in materiam quotuplex</i>	240
<i>occupata circa crisin, quid circa illam faciendum</i>	45
<i>quid illa noceat</i>	47
<i>bene agens nunquam turbanda</i>	ib.
<i>quomodo illa succurrendum</i>	49
<i>morborum medicatrix</i>	50
<i>ejus minister Medicus</i>	ib.
<i>Nephritici & melancholici qua ratione curentur</i>	907
<i>quinam intelligi debeant</i>	ib.
<i>quomodo supervenientes haemorrhoides illis conferant</i>	907
<i>illorum abscessus</i>	1124
<i>Nervorum imbecillitas unde</i>	691
<i>quid complectatur</i>	ib.
<i>Nimum omne natura inimicum</i>	257
<i>Nota de purgatione</i>	90
<i>circa preparationem purgantium</i>	93-94

Nota

RERUM ET VERBORUM

Nota gestati sexus in gravidis

799

Nutritio cacochymicorum corporum

96

O.

O besitas cui debeat originem	230
que damna ipsi adscribantur	ib.
corporis cur conceptioni promovende impedimento sit	789
remedia illis ad concipiendum apta	790
O besi & graciles	229
quibus morbis obnoxii	231
O besiorum sterilitas	788
causa ob quam concipere non soleant	788
O besus corporis habitus quotuplex	789
O bsurdescentia in febribus solutio	602
cur ab hac febris solvatur	603
O ccasio quid	4
praecepta	ib.
juxta veteres	5
O culorum vertigo quid	369
O fferendorum modulus	41
O fficium Medici	757
O mentum per vulnus elapsum	1049
si excidat, quid	ib.
O phthalmia idem quod lippitudo oculorum quid	926
prognosis	ib.
curatio	926. 978
quomodo curetur	978
unde fiat	326
sicca unde	332
O rgasmus idem quod turgens materia	53
quando accidat	ib.

INDEX

<i>Oris exulcerationes quando fieri possint</i>	397
<i>Ossa cur coalescere & nutriri non possunt</i>	936

P.

<i>Paracéntheseos cautela</i>	963
<i>Paroxysmus quid</i>	30
<i>Pars affecta quoruplex</i>	215
<i>ad abscessus recipiendos apta</i>	547
<i>Pathologia morborum æstivalium</i>	393
<i>atatis consistentis</i>	432
<i>autumnalium</i>	398
<i>dentientium</i>	413
<i>hyemalium</i>	406
<i>infantum</i>	418
<i>recens natorum infantum</i>	409
<i>juvenum</i>	428
<i>puerilium</i>	424
<i>puerilium ad pubertatem accedentium</i>	422
<i>senilium</i>	434
<i>vernalium</i>	382
<i>Sterilitatis fœminæ</i>	839
<i>Patientis gustui aliquid indulgendum</i>	205
<i>ratio cur</i>	ib.
<i>Pavores infantum unde</i>	411
<i>Peripneumonia qualis morbus</i>	923
<i>laborans, si dejectione per alvum evacuetur, quorupli-</i>	
<i>ci malo afficietur</i>	924
<i>an omnis periculosa</i>	1077
<i>unde in illam pleuritis transire possit</i>	ib.
<i>Pernionum seu partium congelatarum cura</i>	700
<i>Petechiæ ubi pruriant</i>	903
<i>an sint morbus novus</i>	ib.
<i>Phthisis quid</i>	340
<i>est idem quod tabes</i>	672

Phthisis

RERUM ET VERBORUM.

<i>Phthisis ejus prognosis</i>	677.1086
<i>fatalitas ratione ætatis</i>	672
<i>qua ætate fiat</i>	ib.
<i>in adolescentibus unde</i>	429
<i>Phthisicorum purgatio</i>	474
<i>quomodo hi purgandi</i>	ib.
<i>medicamenta illos purgantia</i>	475
<i>diarrhœa</i>	679
<i>Phrenitides in ætate consistente unde</i>	432
<i>Phænomena morborum quæ</i>	33
<i>quotuplicia</i>	ib.
<i>Physiognomia sternutationis</i>	1148
<i>Pigritia mater somni</i>	66
<i>Pituita somni filius</i>	ib.
<i>Plenitudo cibi morborum familiaris causa</i>	148
<i>Plethora quid & quotuplex</i>	96
<i>Pleuritis qualis morbus</i>	684
<i>Podagra quid</i>	725
<i>unde</i>	1042
<i>quando excitetur</i>	1043
<i>illam levat aqua frigida large affusa</i>	725
<i>fæminarum</i>	972
<i>puerorum</i>	975
<i>ejus paroxysmi</i>	1042
<i>Potatio vini, quid ex illa oriatur</i>	731
<i>Potatores vini vel aquæ quinam diutius vivant</i>	731
<i>Potus quid</i>	99
<i>Porri vide veracæ</i>	
<i>Preparatio purgantium</i>	90
<i>quotuplex</i>	92
<i>circa illam nota</i>	93 94
<i>Pregnantium seu gravidarum purgatio</i>	441
<i>Profluvia in juvenibus diuturna unde</i>	433
<i>sanguinis in pueris unde</i>	423

Progno-

INDEX

<i>Prognosis adpetitus reconvalescentium</i>	184
<i>ex ratione & adpetitu</i>	189
<i>apoplexia</i>	221. 1031
<i>angina</i>	994
<i>abscessuum in hypochondriis</i>	1143
<i>cancri</i>	995
<i>dolorum</i>	889
<i>è situ</i>	895
<i>capitis</i>	904
<i>deliriorum</i>	947. 1039
<i>dysenteria</i>	885
<i>doloris diuturni circa ventrem</i>	1098
<i>empyematis</i>	684
<i>empyicorum</i>	1141
<i>epilepsia</i>	232. 664
<i>erysipelatis</i>	956
<i>februm in gravidis</i>	813
<i>continuarum & intermittentium</i>	571
<i>hemorrhagiarum</i>	1072
<i>gibbositatis</i>	1015
<i>hemophthysos</i>	1084
<i>hepatis inflammati</i>	1088
<i>hemorrhoidum</i>	910
<i>hydropis</i>	917. 1153
<i>icteri</i>	1006
<i>ilei</i>	1073
<i>è stranguria</i>	1010
<i>leucophlegmatia</i>	1107
<i>lienteria</i>	877
<i>melancholia</i>	951
<i>& nephritidis</i>	907
<i>mensum immodicorum</i>	815
<i>ossis nudati</i>	1092
<i>peripneumonia</i>	1078

Progn-

RERUM ET VERBORUM.

<i>Prognosis pleuritidis</i>	1075
<i>pulsationis in ulceribus</i>	1095
<i>rupti abscessus interni</i>	1070
<i>sincera dejectionis</i>	1100
<i>singultus</i>	913
<i>sphaceli</i>	1056
<i>morborum chronicorum è statu ventriculi</i>	1063
<i>syncope</i>	218
<i>tetani</i>	661
<i>tremorum in febribus</i>	960
<i>tumorum</i>	862
<i>vitiorum urina in senibus</i>	892
<i>ulcerum</i>	888
<i>urina crasse</i>	619
<i>turbata</i>	622
<i>tenuis</i>	625
<i>vulnerum capitis</i>	1103. 1081
<i>ex tumore</i>	860
<i>intestinalium in specie</i>	955
<i>hydropis ex tussi</i>	990
<i>ulcerum & speciatim chronicorum</i>	1013
<i>ex oculis dormientium</i>	1034
<i>respirationis in febribus</i>	1041
<i>Proportio urinae & alvi sæcum redditarum</i>	639
<i>Pruritus pustularum</i>	901
<i>unde</i>	902
<i>Pubertas quid</i>	665
<i>Puer quis dicatur</i>	234
<i>Puerorum podagra</i>	975
<i>unde sit, ut ex veneris usu possint podagra laborare</i>	976
<i>Pulmo discissus quid</i>	930
<i>sanguinem spumofum egerere debet</i>	681
<i>Purgantes in acutis</i>	58
<i>quid in illis adtendendum</i>	61

PPP PP PP

Purgan-

INDEX

<i>Purgantes illorum preparatio</i>	90
<i>medius terminus</i>	451
<i>qualitas & modus</i>	449
<i>sitis pedissequa</i>	503
<i>Pruritus in senibus unde</i>	436
<i>Purgatio de quo intelligenda</i>	92
<i>vel vomitus contra cibi fastidium</i>	189
<i>sanorum</i>	202
<i>sub diebus canicularibus</i>	461
<i>sub & ante canem est difficilis</i>	ib.
<i>phthysicorum</i>	474
<i>melancholicorum</i>	476
<i>in acutis</i>	478
<i>lientericorum</i>	485
<i>illam promoventia & sistentia</i>	493
<i>ejus distinctæ indicationes infra vel supra</i>	501
<i>ejus notæ per alvum</i>	509
<i>Purgationes menstruæ quid in illis corrigendis considerandum</i>	758
<i>decolores</i>	ib.
<i>quid minentur</i>	834
<i>si cessent, quid tum expectandum</i>	836
<i>quomodo cessare debeant</i>	ib.
<i>Pus unde fiat</i>	239. 944
<i>ejus confectio, quæ habeat tempora</i>	240
<i>quale esse debeat</i>	241
<i>Putredo unde & quid</i>	356
<i>quotuplex</i>	889

Q.

<i>Quartana febris quotuplex</i>	160
<i>ejus in æstate juxta tempora anni prognosis</i>	159
<i>medica</i>	870
<i>Quid circa non educenda faciendum</i>	51
<i>Qui per inferiora purgandi</i>	476
<i>quomodo</i>	ib.

Quies

RERUM ET VERBORUM.

<i>Quies quid</i>	244
<i>quotuplex</i>	245
<i>quid per illam fiat</i>	ib.
<i>Quod paulatim fit tutum est</i>	258

R.

R amenta excretorum	1164
<i>Ratio victus senum & puerorum</i>	36
<i>lymphæ maxima, ubi adhibenda</i>	40
<i>Rationes morborum acutorum incertitudinis quot</i>	134
<i>Raucescines quid per illas intelligatur</i>	214
<i>unde fiant</i>	214-340
<i>quando eveniant</i>	407
<i>Recidiva morborum</i>	102
<i>quotuplex</i>	104
<i>unde oriatur</i>	105
<i>quomodo ei succurrendum</i>	106
<i>Reconvalescentes à morbo voraces</i>	185
<i>plus appetunt, quam concoquere possunt & cur</i>	188
<i>Refectiva fluida quæ</i>	98
<i>Reficiendi seu alterandi modi</i>	83
<i>Regulæ quæ in victu observandæ</i>	42
<i>solerti medico in purgatione observandæ</i>	455
<i>Regimen criseos</i>	46
<i>Relatio laboris & victus</i>	119
<i>Remedia extrema</i>	18
<i>quæ & quotuplicia</i>	18. 19
<i>ubi adhibenda</i>	19
<i>quæ juxta veteres</i>	19. 20
<i>recentiores</i>	18. 20
<i>quid in illis adhibendis sit pensitandum</i>	59
<i>famis morbose</i>	143
<i>difficilium curatu morborum, quot & quæ</i>	233
<i>extrema quando optima</i>	259
<i>ad fugandas febres</i>	397

INDEX

<i>Remedia contra morbos infantum recens natorum</i>	412
<i>anxietatum precordialium</i>	1154
<i>corporis humidioris</i>	1157
<i>Renum sanguiferorum vasorum causa quotuplex</i>	634
<i>Repetitio determinata circuituum unde</i>	46
<i>Repletio ciborum quotuplex</i>	127
<i>quid per illam intelligatur</i>	148
<i>Res naturales quid limitent</i>	42
<i>Respiratio ad quid maxime necessaria</i>	224
<i>Respirandi difficultas in febris continuis lethalis</i>	586
<i>quid</i>	587
<i>ejus differentia, & qua intelligenda</i>	ib.
<i>Revulsoria articularum praesidia</i>	628
<i>Rigor quid</i>	536
<i>& quotuplex</i>	ib.
<i>criticus</i>	597
<i>mortifer</i>	577
<i>si agrum debilem invadat quid</i>	ib.
<i>ejus fontes</i>	867
<i>unde in mulieribus & viris</i>	867
<i>infebricitantibus unde</i>	868
<i>Rigores sexto die evenientes mali</i>	536
<i>quotidiani in febris quid</i>	609

S.

<i>Sanguis quantum veteres emiserint per vena sectionem</i>	57
<i>ad omnes corporis partes movetur</i>	214
<i>procedente tempore etiam movetur sensim, & quomodo</i>	426
<i>spuitio ejus in adolescentibus, unde</i>	429
<i>infra & supra excretus</i>	524
<i>immodice fluens nocuus</i>	531
<i>spumantis e pulmone signa</i>	681
<i>unde egeratur</i>	682
<i>ejus vomitus mulieri gravida, qualis</i>	747

Sanguis

RERUM ET VERBORUM.

<i>Sanguis in mammis q id notet</i>	768
<i>in utero gerentibus unde prodeat</i>	832
<i>quantum in puella & masculo toto gestationis tempore reti-</i>	
<i>neatur</i>	833
<i>ejus extravasatio</i>	943
<i>quomodo in pus vertendum</i>	944
<i>moram in cavitatibus debet contrahere</i>	945.
<i>cur potius suppuretur quam reliqui humores</i>	1131
<i>Sanies quid</i>	241
<i>Sanorum purgatio</i>	202
<i>Satietas quid significet</i>	77
<i>ejus immoderatio</i>	74
<i>Satyriasmus quid</i>	420
<i>Sectio & ustio extrema remedia</i>	956
<i>Sedes nigra & variegata in genere</i>	511
<i>Secundina retenta</i>	796
<i>Senectus qualis etas</i>	215
<i>quotuplex</i>	216
<i>Senes cur à morbis renum & vesica difficulter liberentur</i>	893
<i>minus edunt quam juvenes</i>	141
<i>ratio cur</i>	142
<i>valetudo illorum</i>	209
<i>cur minus quam juvenes agrotent</i>	ib.
<i>raro acutis morbis corripuntur</i>	ib.
<i>in illis non medicamentis tardandum</i>	210
<i>cur suis diuturnis commoriantur</i>	ib.
<i>illorum ad juvenes comparatio</i>	211
<i>catharri</i>	213
<i>obstructi cur pejus habeant quam juvenes</i>	266
<i>Senii & hyemis comparatio</i>	376
<i>Senilis etas quotuplex</i>	434
<i>Septenarii numeri magna autoritas in diebus criticis</i>	156
<i>Serum in senio cur peccet</i>	216
<i>quale in senibus</i>	ib.
<i>Sexus gestati in gravidis nota</i>	794

INDEX

<i>Sexus gestati quanam illa nota</i>	795
<i>Siccitates sunt salubriores imbribus</i>	350
<i>quales intelligenda</i>	351
<i>Signa in febris imminentis mortis</i>	584
<i>unde desumantur</i>	ib.
<i>quid si illa adsint expectandum</i>	584
<i>cur illa sint lethalia</i>	585
<i>criseos per alvum futura</i>	627
<i>affecta vesica</i>	636
<i>vesica exulcerantis</i>	637
<i>status fœtus è mammis</i>	806
<i>fœtus è mammis comparata</i>	808
<i>ex quibus gravidam esse aliquam cognoscitur</i>	834
<i>internoscere liceat, an vulnera lethalia</i>	934
<i>spuria, quæ accidentaliter superveniunt morbo, quanam sint</i>	33
<i>de urinis à Medicis quibusdam memorata sæpissime fallere, prohibetur</i>	ib.
<i>criseos quot</i>	48
<i>mentis laborantis</i>	80
<i>refectionis corporis quæ</i>	186
<i>certissima salutis vel mortis quæ & quot</i>	189
<i>quæ in significanda febre observanda, & quot</i>	170
<i>boni vel mali judicii unde perenda</i>	311
<i>ex quibus uteri gestatio cognosci possit</i>	804
<i>an fœtus bene valeat</i>	831
<i>qualia in pleuritide</i>	33
<i>Similia similibus curantur</i>	147
<i>Singultus ab hæmorrhagia</i>	649
<i>cur ex eo periclitentur agrotantes</i>	650
<i>quando sequatur</i>	821
<i>unde oriasur</i>	823
<i>prognosis</i>	913
<i>remedium</i>	ib.
<i>quomodo solvatur</i>	916
<i>an præter sternutationem adhuc alia dentur illum sistendi</i>	ib.
<i>remedia</i>	ib.
	Singul-

RERUM ET VERBORUM.

<i>Singultus ad quam classem reducendus</i>	1058
<i>Situs nocturna</i>	732
<i>unde oriatur</i>	ib.
<i>ejus remedium</i>	734
<i>ejus organum seu sedes</i>	504
<i>in animantibus unde deducatur</i>	505
<i>naturalis ubi excitetur</i>	506
<i>morboſa ubi</i>	ib.
<i>Solſtitia quot</i>	38
<i>Somnus quid</i>	64
<i>quomodo fiat juxta neotericos</i>	ib.
<i>est neceſſarius juxta ſententiam Ariſtotelis</i>	65
<i>quotuplex</i>	ib.
<i>quæ adferat emolumenta</i>	ib.
<i>naturalis quid</i>	ib.
<i>præternaturalis quid</i>	66
<i>in deliriis</i>	68
<i>ejus habenda eſt ratio in morbis</i>	70
<i>immoderatio</i>	72
<i>differentiæ</i>	73
<i>quo ſenſu malus</i>	ib.
<i>morbum juvans & minus juvans</i>	63
<i>quid faciat</i>	245
<i>in vomitione quomodo educendus</i>	494
<i>Spadones quinam</i>	968
<i>cur perpetuo valetudinarii</i>	884
<i>Spasmi ſeu convulſionis remedium eſt febris</i>	596
<i>Sphacelus ſeu ſideratio cerebri</i>	1147
<i>ejus prognofis</i>	1056
<i>Spirandi difficultas in ſenibus unde</i>	435
<i>Spuma cauſa in ſtrangulatis quæ</i>	215
<i>quotuplex</i>	ib.
<i>Sputum in pleuritide cruentum cur bonum</i>	1087
<i>Statura procera commoda & incommoda</i>	267
<i>Status aquilonius & auſtralis</i>	358
	<i>Status</i>

INDEX

<i>Status australis commoda & incommoda inde provenientia</i>	358
<i>pluvius & siccior morbiferus</i>	354
<i>corporum quotuplex statuatur</i>	88
<i>febricitantium</i>	175
<i>Steriles quibus medicamentis facunda fieri possint</i>	827
<i>Sterilitas obesiorum</i>	788
<i>an omnis curari possit</i>	841
<i>ejus exploranda experimenta</i>	824
<i>Sternutamentum unde oriatur</i>	756
<i>ubi & cur excitandum</i>	756
<i>ad illud excitandum remedia</i>	ib.
<i>Sternutatio quomodo facienda</i>	797
<i>quibus medicamentis excitanda</i>	798
<i>unde oriatur</i>	913
<i>Sternutatoriorum usus hystericus</i>	755
<i>Stillicidium urinae quando supervenire soleat</i>	821
<i>unde</i>	822
<i>Strangulati cur non redeant in vitam, si spuma circa os adpareat</i>	226
<i>qui sint</i>	ib.
<i>illorum solutorum prognosis</i>	224
<i>Strangulationis quotuplex causa</i>	226
<i>Stranguria idem quod stillicidia urinae quando oriatur</i>	403
<i>unde</i>	403. 823
<i>cur etiam pueris accidat</i>	421
<i>ileosa</i>	1010
<i>& dysuria in senibus unde</i>	435
<i>Strumæ v. tubercula.</i>	
<i>Substantia corporis deperdita quot modis reficiatur</i>	99
<i>quotuplex</i>	100
<i>spirituosa quomodo reficiatur</i>	ib.
<i>humorosa quomodo</i>	101
<i>solida quomodo</i>	ib.
<i>humida quotuplex in strangu'atis</i>	225
<i>Suavitas in cibis quotuplex</i>	208
<i>Succi vitiosi in dentibus quid faciant, si cerebrum & nervos afficiant</i>	415
Succi	

RERUM ET VERBORUM.

<i>Succi vitiosi quid si ad album vergant</i>	415
<i>Sudores critici</i>	553
<i>frigidi</i>	557
<i>cum acuta & continua febre conjuncti quid prænuncient</i>	558
<i>nocturni</i>	567
<i>Sudor loci affecti index</i>	560
<i>frigidus vel calidus continuans malus</i>	569
<i>februm inanis</i>	595
<i>quid facere debeat, ut febricitantibus prodest</i>	ib.
<i>qualis esse debeat</i>	596
<i>febricitantium</i>	301
<i>unde eveniat</i>	302
<i>Suffitus emenagogi</i>	735
<i>quid educant</i>	ib.
<i>ad quæ ducenda</i>	737
<i>Suppurationis signa salutis & mortis</i>	687
<i>futura signa</i>	671
<i>quomodo illis occurrendum</i>	ib.
<i>ne illæ fiant, quomodo Medicus possit prohibere</i>	1006
<i>Suspensi laqueo, sed nondum penitus extincti, quomodo in vitam referri possint</i>	227
<i>Symptomata quando quieta</i>	182
<i>vigoris illorum & concoctionis differentia</i>	183
<i>Syncopes quid</i>	219
<i>ejus causa</i>	ib.
<i>prognosis</i>	218
<i>est perniciosissima passio</i>	220
<i>quæ ad curationem ejus adhibenda</i>	ib.
<i>unde oriatur</i>	221

T.

T <i>Abes quid</i>	672
<i>genera quot & quæ</i>	319
<i>quando eveniat</i>	401
<i>Tabidi, cur autumnus eis malus sit</i>	320
299 99 99	Tabidi,

INDEX

<i>Tabidi, illorum diarrhœa</i>	683
<i>fatalitas ex tempore anni</i>	318
<i>Temperamenta ad anni tempora collata</i>	279
<i>Tempestatis constantia & inconstantia</i>	309
<i>Temperies humidior comparata</i>	882
<i>Tempora morborum quam requirant methodum</i>	24
<i>quibus plus alimenti consumatur</i>	37
<i>anni quot juxta quatuor Zodiaci puncta</i>	38
<i>quibus magis in febribus humectandum est</i>	40
<i>morborum</i>	181
<i>ex quibus signis internosci illa possint</i>	182
<i>quatuor anni suas habent qualitates</i>	291
<i>anni ætatibus adsignata</i>	372
<i>Tempus purgandi</i>	52. 442
<i>anni commodius ad emetica vel purgantia propinanda</i>	456
<i>vomendi</i>	457
<i>Tempestas sicca cum pluvia comparata</i>	336
<i>Temporis dierum inequalitas morbifera</i>	290
<i>Tenesmus unde & quando oriatur</i>	403
<i>gravidarum</i>	1106
<i>quid</i>	ib.
<i>Terra motus quedam exempla</i>	298
<i>Terminus acutorum morborum</i>	150
<i>podagricorum</i>	1025
<i>motus</i>	243
<i>Tetanus idem quod distentio nervorum</i>	661
<i>prognosis</i>	ib.
<i>exemplum</i>	ib.
<i>quando illo correpti intereant</i>	662
<i>ejus signa lethalia quæ</i>	663
<i>contra illum remedia</i>	ib.
<i>& convulsiones frigus pariunt</i>	705
<i>cur</i>	ib.
<i>Thlasia & Thladia quinam</i>	968
<i>Thlibia qui</i>	ib.
<i>Thorexis</i>	143
	Timor

RERUM ET VERBORUM.

<i>Timor unde</i>	952
<i>Tolerantia consuetorum</i>	252
<i>Tonsilla quid sint</i>	418
<i>earum inflammationes, quibus accidunt</i>	ib.
<i>unde oriantur</i>	419
<i>Transitus ex pleuritide in peripneumoniam unde cognoscatur</i>	1076
<i>peripneumonia in phrenitidem</i>	1078
<i>Tremorum prognosis in febribus</i>	960
<i>quomodo ardentem febricitantibus contingere queant</i>	961
<i>quid</i>	ib.
<i>quot genera</i>	962
<i>ubi contingant</i>	ib.
<i>Tremor & convulsio quomodo differant</i>	963
<i>an hic tremor lethalis</i>	ib.
<i>Traulosis quotuplex</i>	983
<i>Trichiasis idem quod mictus pilorum</i>	632
<i>Tritæophyes idem quod febres tertianarum naturam referentes</i>	572
<i>Tubercula faucium</i>	115
<i>quando æstimanda</i>	116
<i>quid ad hæc requiratur</i>	117
<i>quot ex causis oriantur</i>	118
<i>Tuberculorum & dolorum in febribus longis occasio</i>	576
<i>quibus accidunt</i>	ib.
<i>Tumor quotuplex</i>	550
<i>mollis quinam</i>	863
<i>crudus semper malus</i>	864
<i>Tumores & dolores absque ulcere frigida aqua large affusa levat</i>	724
<i>dolores, ulcera & vulnera conjuncta & recurrentia</i>	855
<i>illorum prognosis</i>	862
<i>quales esse debeant</i>	863
<i>præter naturam quot</i>	240
<i>quot modis terminentur</i>	ib.
<i>quot in corpore generentur</i>	1070
<i>Turgens materia quid</i>	53
<i>an per venæ sectionem tolli possit</i>	ib.

INDEX

<i>Turgens materia quando accidat</i>	53
<i>Turgentia in humoribus inducenda quotupliciter</i>	445
<i>Tussis unde</i>	340
<i>sitis antidotum</i>	592
<i>sicca quid & unde</i>	ib.
<i>cur ab hac sitis sedetur</i>	593
<i>infantium recens natorum unde</i>	410
<i>remedium</i>	412
<i>Tympanitidis futura signa</i>	481
<i>Typus & phaenomena morborum indicia</i>	32
<i>paroxysmorum quid</i>	33
<i>februm intercurrentium</i>	609

V.

<i>Valetudo senum</i>	209
<i>Varices quomodo solvant gibbositatem</i>	949
<i>illorum & calvitiei comparatio</i>	988
<i>Vbera cur primis mensibus non attollantur sed in ultimis</i>	762
<i>Venasectio dolorum remedium</i>	949
<i>quomodo oculorum dolores curet</i>	981
<i>dysuria remedium</i>	992
<i>an etiam in doloribus à calculo conveniat</i>	993
<i>ejus usus in cephalalgia</i>	865
<i>modus juxta veteres</i>	745
<i>recentiores</i>	ib.
<i>an purgatio gravidis sit periculosior</i>	746
<i>Vena frontis sectio ad quid profit</i>	866
<i>Veneris usus in quacunque aetate cum primis pueris nocet</i>	977
<i>ratio cur</i>	ib.
<i>Ventriculus discissus quid</i>	930
<i>cur lethalis</i>	933
<i>Venter quid per illum intelligatur</i>	38
<i>infirmi examen & constitutio</i>	196
<i>superior quid per illam intelligatur</i>	457
<i>quosimplex</i>	460

Venter

RERUM ET VERBORUM

<i>Ventris dolores unde</i>	1098
<i>quotuplices</i>	895
<i>Venti</i>	276
<i>morbifici</i>	294
<i>quot juxta veteres</i>	ib.
<i>principales</i>	ib.
<i>minus principales</i>	295
<i>eorum efficacia causa & origo</i>	297
<i>Ver austrinum</i>	322
<i>ejus & hyemis commutata temperies</i>	328
<i>autumni comparatio</i>	312
<i>Veratrum quotuplex</i>	489
<i>Vertebra occipitis unde</i>	419
<i>Vertigines unde</i>	408
<i>Vere quinam optime degant</i>	372
<i>Vesica scabies unde</i>	633
<i>affecta signa</i>	636
<i>exulcerata</i>	637
<i>Veteres cur, antequam cucurbitulas adplicabant, religiose prius corpus</i>	809
<i>multoties purgabant</i>	809
<i>Veruca quanam dicantur & unde</i>	420
<i>Viētus quid</i>	234
<i>ejus gradus & distinctio</i>	14
<i>quotuplex</i>	ib.
<i>quibus conveniat</i>	ib.
<i>ratio exacta quando admittenda</i>	16
<i>acutorum morborum</i>	21
<i>in vigore morbi, & quidem secundum eorum tempora</i>	23
<i>tenuissimus quis</i>	25
<i>è viribus aestimandus</i>	26
<i>juxta morborum vigorem variandus</i>	27
<i>acutorum in quot classes dividatur</i>	28
<i>in paroxysmis</i>	29
<i>quid in illo rite exhibendo sit considerandum</i>	32
<i>secundum aetates</i>	34
<i>ratione hyemis & veris</i>	37

INDEX

<i>Victus humidus quid</i>	39
<i>qua in eo observanda regula</i>	42
<i>ratione aestatis aut autumn</i>	43
<i>Via per quas morbi expelluntur</i>	49
<i>Vigilia immoderatio</i>	72
<i>supervenientia</i>	1090
<i>infantum recens natorum unde</i>	411
<i>remedium</i>	412
<i>Vinum saccharatum</i>	1068
<i>calefacit corpus & animam, id est spiritus</i>	1069
<i>cur citius ace scat in ventriculo quam alii liquores</i>	882
<i>ejus potus qua ratione oculorum dolores solvat</i>	979
<i>an oculis noceat</i>	982
<i>est solutio famis</i>	143
<i>qualem praeter ceteris rebus creatis habeat prerogativam,</i>	
<i>& in quo illa consistat</i>	144
<i>quotuplex</i>	ib.
<i>quando dandum</i>	ib.
<i>Virginum lac</i>	765
<i>Virilitatis & autumn</i>	376
<i>Viscera glandulosa, unde contaminentur, & quid exinde oriatur</i>	836
<i>Visus hebetudo quotuplex</i>	437
<i>Vita quid</i>	8
<i>brevis</i>	3
<i>cur brevis sit</i>	8
<i>quousque summa cum inedia sine cibo & potu sustineri queat</i>	122
<i>Visu & tactu Medicus agros diligenter exploret, & cur</i>	197
<i>Vitilignes quid</i>	389
<i>Ulcera annua quid Chirurgis in illis faciendum</i>	1014
<i>illorum prognosis</i>	888
<i>cur circumglabra dicantur</i>	ib.
<i>hydropicorum</i>	897
<i>non sunt in illis tuto excitanda</i>	899
<i>quid exigant</i>	900
<i>Umbilici inflammationes infantum recens natorum unde</i>	411
<i>Umbilici remedium</i>	412
	Vomi-

RERUM ET VERBORUM.

<i>Vomitus qui sponte evenit unde</i>	9
<i>contra cibi fastidium adhibendus</i>	189
<i>cur aestate faciles sint</i>	395
<i>infantum unde</i>	410
<i>an dejectio magis debilitet</i>	471
<i>cruentus mulierum</i>	747
<i>si naturalis prodest</i>	ib.
<i>mala phaenomena</i>	1058
<i>quid per illum fiat</i>	ib.
<i>biliosus unde</i>	1039
<i>cruentus</i>	1125
<i>diarrhoea remedium</i>	921
<i>quando malus</i>	ib.
<i>bonus</i>	922
<i>an semper malus</i>	923
<i>vox vomere quomodo sumenda</i>	1126
<i>Volvuli unde</i>	404
<i>Vomentibus difficulter quid cavendum</i>	472
<i>Vomitores ad ea dispositi</i>	468
<i>non dispositi</i>	472
<i>Vomitores operationem promoventia & sistentia</i>	491
<i>indicantia</i>	498
<i>quae illa indicia sunt</i>	498
<i>Urethra caruncula</i>	638
<i>Urina crassa</i>	619
<i>ejus prognosis</i>	ib.
<i>unde oriatur</i>	621
<i>ejus stillicidia unde</i>	356
<i>turbata prognosis</i>	622
<i>differentia ejus & jumentorum</i>	622
<i>quid ab hac sequatur</i>	623
<i>tenuis prognosis</i>	625
<i>contenta carunculae formia & pilaria</i>	631
<i>furfuracea</i>	633
<i>quid denunciet</i>	ib.
<i>ejus & alvi faecum redditurarum proportio</i>	639
	<i>Urina</i>

INDEX RERUM ET VERBORUM.

<i>Urina crassa furfuracea</i>	1112
<i>sedimenta ejus quanam</i>	1113
<i>biliosa</i>	1115
<i>naturalis sediminis in illa situs, qualis esse debeat</i>	ib.
<i>varians</i>	1117
<i>spumosa</i>	1119
<i>oleaginosa</i>	1121
<i>Ufus & utilitas frigidi in tetano</i>	706
<i>Uteri gestatio quomodo dignosci possit</i>	771
<i>inflammatio in gravidis</i>	778
<i>abscessus</i>	791
<i>status in gravidis</i>	804
<i>intemperati steriles sunt</i>	839
<i>præternaturaliter clausus</i>	811
<i>os internum unde fiat durum</i>	812
<i>quomodo clausura huic medendum</i>	812
<i>innumerabilium ærumnarum autor & cur</i>	819
<i>in gerentibus illum quid considerandum</i>	832
<i>gerentes uterum, & non gravida quomodo internoscenda</i>	837
<i>ad quid conferat</i>	839
<i>frigidus, quare ad generandum ineptus</i>	ib.
<i>quomodo esse debeat</i>	841
<i>Vulneris convulsio quid</i>	646
<i>nomine quid intelligatur</i>	ib.
<i>prognosis ex tumore</i>	860
<i>Vulnera fortia quanam</i>	861
<i>quid illis fere semper superveniat</i>	860
<i>ad evitandum in illis incommodum quid conferat</i>	862
<i>quot modis magna dici soleant</i>	ib.
<i>in universum lethalia sunt multiplici ratione</i>	932
<i>an ulcera, magis lethalia</i>	935
<i>Vulnerum intestinalium in specie prognosis</i>	955
<i>Vulneribus capitis quid superveniat</i>	1029
<i>Vulnerati capitis signa</i>	1030

F I N I S.

